


# YISASINI KAMA VAYA



The New Testament in the Agarabi language of Papua New  
Guinea

**YISASINI KAMA VAYA  
The New Testament in the Agarabi language of Papua New  
Guinea  
Nupela Testamen long tokples Agarabi long Niugini**

Copyright © 2010 The Bible Society of Papua New Guinea

Language: Agarabi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

---

PDF generated using Haiola and XeLaTeX on 25 Nov 2022 from source files dated 22 Nov 2019  
105c264e-e2fa-503a-9726-8b662c09b700

## Contents

Matiu . . . . .	1
Maki . . . . .	69
Ruku . . . . .	109
Yoni . . . . .	179
Aposeri . . . . .	228
Romu . . . . .	290
1 Korini . . . . .	320
2 Korini . . . . .	348
Karesia . . . . .	366
Efesasi . . . . .	377
Firipai . . . . .	387
Korosi . . . . .	394
1 Tesaronika . . . . .	401
2 Tesaronika . . . . .	408
1 Timoti . . . . .	412
2 Timoti . . . . .	421
Taitasi . . . . .	427
Firimoni . . . . .	431
Iburu . . . . .	433
Yemisi . . . . .	455
1 Pita . . . . .	463
2 Pita . . . . .	472
1 Yoni . . . . .	477
2 Yoni . . . . .	485
3 Yoni . . . . .	487
Yuti . . . . .	489
Revaresen . . . . .	492

# MATIUNI KAMA VAYA (Matiu)

## Matiuni Kama Vaya Ma Uvanteí Pákenai Afova Vaya Ino

*Ma vompon ma uvantein banta ino.*

Yisas Karaisini Kama Vaya ma varen orin banta (aposeri) Matiu anon uyanten mino. Beni ena ví Revi ino.

*Uvarein orana ino.*

AD eiti (80) ráké eiti-faipi (85) fin mi ma vompon uvanten minon ten kokhon afova vanta kayo ano inikhen mifo inká ena kéká ano AD sikisti (60) ráké seventi (70) fin minon ten inikhen mino.

*Ma vompon ma uvantein baru ino.*

Parestaini san ma Kantasí Ukhein Bara e ma siyaimpin mino.

*Ma vompon ma uvaman amikhein kéká ino.*

Yutan anan kékái uvaman amiyáken betimpin ma monó nanin banta vain mi moéken tiamichein mino.

*Nái ana vará ma vompon uvan-ten nafino.*

Yutan kayoi anafu aráompin ma sakhanampa vaya siáden ma varará nanin banta ma aya uren evaránen avirano van ma Tiyarafenu ano aní ukharé ein mai vantán Yisasi vákan mi véin maman dákó uren Kin ne sinten mino.

*Yisasin Anafu Aráo  
(Ruku 3:23-38)*

<sup>1</sup> Yisas Karaisi maen Abaraamun nú Kin Devitin nui anan pintéi afoká ukhan mi ma ven anafuyan aví ino.\*

<sup>2</sup> Abaraamu maen Aisakin kain baren

Aisaki ano Yekopun kaúdan

Yekopu ano Yudan má be afá aváeyan má kaen mino.

<sup>3</sup> Yuda maen Peresin nú Seran nü afóe ifo míkan iyampon anóe maen Tamari ino. Peresi ano Esronin kain baren Esroni ano Ramun kaen mino.\*

<sup>4</sup> Ramu ano Aminadapin kain baren Aminadapi ano Nasonin kaúdan Nasoni ano Sarmonin kaen mino.

<sup>5</sup> \*Sarmoni maen Boasin afóe ifo ve anóe maen Reapi ino. Boasi maen Obetin afóe ifo ve anóe maen Ruti ino. Obeti ano Yesin kaúdan,

<sup>6</sup> inká Yesi ano Kin Devitin kaen mino. Deviti maen Soromonin afoén bákán be anóe maen Uraiyan aná ma varé ein nanin mino.\*

<sup>7</sup> Soromoni ano Reoboamin kain baren Reoboami ano Abiyan kaúdan Abiya ano Asan kaen mino.

<sup>8</sup> Asa ano Yeosafatin kain baren Yeosafati ano Yeoramin kaúdan Yeorami ano Usaiyan kaen mino.

<sup>9</sup> Usaiya ano Yotamun kain baren Yotamu ano Easin kaúdan Easi ano Esékaiyan kaen mino.

<sup>10</sup> Esékaiya ano Manasen kain baren

Manase ano Amonin kaúdan Amoni\* ano Yosaiyan mo khauran,

<sup>11</sup> \*inká Yosaiya ano Yekonaiyan\* má be afá kayo vá kauran mi Babironí barafá karavusi e fáken oren mino.

<sup>12</sup> \*Karavusi e fáken moran mai oyampáké Yekonaiya ano

\* **1:1:** Esé 22:18; 1Kr 17:11    \* **1:3:** Esé 38:29-30; Rut 4:18-22    \* **1:5:** Rut 4:13-17    \* **1:6:** 2Sa 12:24    \* **1:10:** Amonini ena ví Amosi ino. 1Ki 3:14 fin ná onano.    \* **1:11:** 2Ki 22-24; 2Kr 36:10; Yer 27:20    \* **1:11:** Yekoniani ena ví Yeoikini ino. 2Ki 24:6 fin ná onano.    \* **1:12:** Esr 3:2

Seatierin kaúdan Seantieri ano Serubaberin kaen mino.

<sup>13</sup> Serubaberi ano Abiudin kain baren

Abiudi ano Eriakimin kaúdan Eriakimi ano Asorin kaen mino.

<sup>14</sup> Asori ano Sadókin kain baren Sadóki ano Akimin kaúdan

Akimi ano Eriutin kaen mino.

<sup>15</sup> Eriuti ano Eriasarin kain baren

Eriasari ano Matanin kaúdan Matani ano Yekopun kaúdan maen,

<sup>16</sup> inká Yekopu ano Marian avafu Yosepin kaen mino.

Maria anoi Tiyarafenu ano ma aní ukhein banta e sen ma ariyain banta Yisasin kaen mino.

<sup>17</sup> Máon tukhan Abaraamun táké Devitimpin onóben Devitin táké Babironí ma karavusi fáken o varé ein damú onóben mai ráké Tiyarafenu ano ma aní ukhein banta Yisasantá ma o khanaí ukhein mai fotini (14) afóeyan mi mai aúbaná me yáko urú ukhen mino.

*Tiyarafenu Ano Ma Aní Ukhein  
Banta Yisasi Ma Ve Anóe Ano Kaein  
Baya Ino*

(Ruku 2:1-7)

<sup>18</sup> Máon tukhan Tiyarafenu ano ma aní ukhein banta Yisasin ma ve anóe ano kaein mai máon mi ukhen mino. Be anóe Maria maen Yosepin amiran bákan ínaimpáke iman amintéin Kantá Aunan mano véin arápin iyampon báuuantan baréin Yosepi inire afová en mino.\* <sup>19</sup> Afová uren mai van be avafu Yosepi maen puntákein banta váken banasi avorá Marian ída ayave ameno van aúpáke bei inímpin mai ma véin iman ameno van iyaré ein ifá ono van en mino.

<sup>20</sup> Máon inin bái variyan baré íkan Bafani enisorí ano véi vaintá kaimpin dákó uven temí, “Devitin anin Yosepi oe, éin ma Marian iman ameno van iyain ída vá ifá ono. Para vara seyo, mai ma véin

amúpin báken ma yáko ono van iyain iyampon mai Kantá Aunani ákona anon mai yaná afoká ukhen mino. <sup>21</sup> Béi afon iyampon mi kainten mifo Yisasin\* ne se vá ben aví teno. Para vara seyo, véi anon bei vanasi ume fintena aya uren evaránen aviranten mino.”\*

<sup>22</sup> Mai yanásinta ma yáko ein manon pura sen Bafan mano ma sakhanampa vanta finté uaren ma máo sikharé ein mi kanaíen mino. <sup>23</sup> “Mana arínta ano amúbasí uven mana afon iyampon kaúdantin maen Imanuerin ne sinten mino.” *Ais 7:14*

Mai víi ana maen Tiyarafenu setin má ban mino.

<sup>24</sup> Mai khain ma Yosepi ódaren maen orun mantaven mai ma Bafani enisorí ano ma véin tiamein ánaín bákuren Marian o aviren me ve anasí en mino. <sup>25</sup> Be anasí ma ukhan maen bái ída yen má manafin baranton nentá bákan baren mana afon iyampon káudan bái ano Yisasi ne sen aví ten mino.\*

## 2

*Ofu Ma Afova Varan Banta Kayo  
Ano Ma Ena Vara Fáké Erein Baya  
Ino*

<sup>1</sup> Yudiá barafin ma Eroti kiní ukhein damú Betariamú barufá Maria ano Yisasin kain bákan áau e uní páke manáo afova vanta kéka ano Yerusalemí barurá eriven <sup>2</sup> máo sen inaemí, “Mana iyampon ma Yutan kayoi kin afoká ukhein mai intefasá ban nafino. Tetí ankan áau e uní páke onékun béis ma anín ofu édaví ódaréi ventá monó teno van eriyá tiféuno.”\*

<sup>3</sup> Maa sen ina íkan Erotin má minó Yerusalemí barurá ma varé ein nanin banta vá ano mai vaya iníden maen kokhon ineine en oreraen mino. <sup>4</sup> Máon tiyákan Eroti ano vanasii monó ánon banta vá man baya ma afová ukhein banta kayo vá aran e

\* **1:18:** Ruk 1:27, 35 \* **1:21:** Yisasin bí maen mai veni ana máon mi ukhen mino. Bafan mano vanasi aya intene ma siyain baya ino.

\* **1:21:** Ruk 1:31; 2:21 \* **1:25:** Ruk 2:21

\* **2:2:** Nam 24:17

átaru uvin betí ankan inaemí, "Mai ma Tiyarafenu ano ma aní ukhein banta inte varurásá afoká intéin ná sakhanampa vanta kayo ano sikharen nafino." <sup>5</sup> Máa síkan betí ankan evaránen béis tiamemí, "Béis Betariamú barurái Yudiá barafá afoká inten ne," sikharen mino. Para vara seyo, sakhanampa vanta ano máa sen Tiyarafenui vompon dókifin uvantaren mino,

<sup>6</sup> "Yudiá bara fintena varu Betariamu oe,

Yudiá barafin ma ayí bain  
baru kayoi oyampá éi ída va  
ono.

Mai fara vara seyo, éin pinté mana  
ánon banta e afoká uven  
maen

béis anón tenti Isarerí nanin  
bantai yafisiní inten  
mino." <sup>\*</sup> Mai 5:2

<sup>7</sup> Máa sen tiamin Eroti iníden  
áau e uní páke ma afova vanta  
kéká erikhá ein aúpáké aran béis  
vaintá erikan mai ofu ma afoká ein  
damusan betí ankampin avovéen  
ina uren afova varen mino.  
<sup>8</sup> Afová uren betí ankan tiantan  
Betariamú oriyáken temí, "Tireti  
ankan ore vá mai iyampon nan mo  
kamaeya yosire ma véin ódante vá  
ovaráne séin me sisimesirá ten má  
dere oresá mo ventá monó teno."

<sup>9</sup> Máa síkan betí ankan kini vaya  
iníden mairá me ampen oriyan  
maen mai ma áau e uní páke ma  
onein ofu ano vetin an uanten  
oriyaren mai iyampon ma vain  
namun amontá o kharemen mino.  
<sup>10</sup> O kharemíkan betí ankan mai  
ofu oniyáken moéken amusin en  
mino. <sup>11</sup> Máan turen mai afova  
vanta kéká ano mai namumpin un  
pében onákan mai iyampon mano  
ve anóe Marian má baréin betí  
ankan mun aron kan durafúden  
barará mátimen mai iyampontá  
monó tiren betí unan máden oté  
uren kori vá kama auna iyain  
uveri vá irafin ma sádan kama  
aunka iyain uveri vá máden mai

iyampon amusin amen mino.\*  
<sup>12</sup> Amiren bakhái Tiyarafenu ano  
kaimpin betí ankan tiamen ída vá  
eváráne Eroti vaintá orono síkan  
betí ankan inireni mai aa me ifá  
uren ena aa sáké betíi varufá oren  
mino.

*Yosepin Má Be Aná Akhá Bá Ma  
Isipí Barafá Karan Orein Baya Ino*

<sup>13</sup> Afova vanta kayo ma orivíkan  
maen Bafani enisori ano kaimpin  
Yosepin avorá afoká uven máa  
semí, "E mantaveya iyampon má  
be anóen má avíare Isipí karan  
ore o varé esí ma séi siamenuna  
yamusá ovaráneya ereno. Mai  
fara vara seyo, Eroti ano mai  
iyampon dosiré arono van iyan  
mino." <sup>14</sup> Máa siran Yosepi e  
mantaaren iyampon má be anóen  
má avíaren mai inuran mana Isipí  
oren mino. <sup>15</sup> O van baren  
Eroti ma fúbíkan Bafan mano ma  
sakhanampa vanta oo ráké uaren  
tiyáken, "Isipíkena se sanin aré  
uno," ma sikhá ein baya fura sen  
afoká en mino. *Ose 11:1*

<sup>16</sup> Eroti ma afová en áau e  
uní páke afova vanta kéká ano  
semi mákasen mino siren moéken  
aranan en mino. Máan turen  
afova vanta kéká ano ma siamiyan  
ofu ma afoká oné tiferuna mai  
kan oranan orikhen mino ma  
sikhá ein nan bei aruvín banta  
kayo siantan Betariamú baru  
akhempá ma kákán baru vá titó  
baru vá ma vain pimpá oriyáken  
kan orana aránaópá ma vain ain  
iyampon kayo máa minó aruan  
puren mino. <sup>17</sup> Minó ma yanasa  
ma afoká ein mai Tiyarafenu anon  
sakhanampa vanta Yeremaiyan  
pinté uaren máa sikhárén mino:  
<sup>18</sup> "Ífi baya Ramá barufin inéku  
ifisana yariyan kákán arun  
bariyá iné uno.

Resori maen be akhafana van  
arunaná bariyan  
ará kusiantan baya ma siyain  
ída inen mino.

\* 2:6: Yon 7:42 \* 2:11: Íbo 72:10-15; Ais 60:6

Para va ino, minó iyampon mi fúan kípakhan mino.”\* Yer 31:15

*Yosepi Ma Ve Aná Akhá Bá Evaránen Nasaretí Barurá Orein Baya Ino*

<sup>19</sup> Eroti ma fúbin maen Bafani enisorí ano kaimpin Yosepin avorá Isipi afoká uven máa sen 20 bén tiademí, “Éi e mantaveya iyampon má be anóen má aviare evaráne Isarerí barafá orono. Mai iyampon ma aruan purono van iyaré ein banta kayo inka furen mino.”

<sup>21</sup> MÁA síkan Yosepi esé ana e manteni iyampon má be anóen má aviaren evaránen Isarerí barafá oren mino. <sup>22</sup> Oriven iníkan Erotin anin Arkerausi ano ve afóení varu varen Yudiá kayoi kiní ukheimpin Yosepi mai akhempá orin nan péden mai ma ena khaimpin Tiyarafenu ano véin tiamicáh einí en Kariri varafá oren mino. <sup>23</sup> Orein mano Nasaretí barurá o varen mino. MÁAN ma ein manon sakhanampa vanta kayo ano ma siyáken bén nan Nasaretí banta ino sen aranten mino ma sikhá ein pura sen afoká en mino.\*

### 3

*Monó Non Péantan Banta Yoni Ano Ma Yisasini Aa Uvíden Puntáantein Baya Ino*

(Maki 1:2-8; Ruku 3:1-18; Yoni 1:19-28)

<sup>1</sup> Maí damú Yudiá barafá banta ída van kámápin monó non péantan banta Yoni afoká uven banasi monó baya máa sen tiademí, <sup>2</sup> “Tireti ankan ará baerano. Inaru yafisin inka ádé erikhen mino.”\* <sup>3</sup> Sakhanampa vanta Aisaiyan oorá Tiyarafenu ano Yonin nan mi máa sikharen mino,

“Banta ida van kámá bara fáké mana vanta ano oovaren máa siyan mino,

‘Bafani aa uvídeya  
veni aa funtáantano.’” Ais 40:3

<sup>4</sup> Yoni véi kameri ayo fóké uvaran au anamun ureñ kao au fóké amú anan ureñ báken panon má bonkampun anu vá niyaren mino.\* <sup>5</sup> Yerusalemíke nanin banta vá Yudiá bara fáke nanin banta vá minó Yodaní non akhen páke nanin banta vá ano vanta ída van kámá barafá Yonini vaya ineno van ore ore en mino.

<sup>6</sup> Oriven mo vetí ankani ume sian páman urákan Yoni ano Yodaní nömpin monó non péanten mino.

<sup>7</sup> Yoni ma monó non péantian onákan Farasisi kayo vá Sadyusi kayo vá mairá eríkan betí ankan máa sen tiademí, “Tireti ankan namu osafae akhafanan banan Tiyarafenu arananá uman mano siretimpin ereno van iyan mifo mai van iye anó tiamicáh mai uman pinté karan orono van iya fono.\* <sup>8</sup> MÁAN tiya ompo sireti ankan ma fura seja ará baédanteya mai sireti ankani avúavá pókesá aní oro. <sup>9</sup>\*Téi sireti ankan tiame umpsó sireti ída vá Abaraamu nan tetin tinafu ino se vá ineno. Tiyarafenu ano kanaíen ma onámaná kayo sintin Abaraamun anavasiní inten mino.

<sup>10</sup>\*Minó daa ma ída aran iran nain tikaré irafin karú dano van mai yaa kayo anafin tantume fe van mino.

<sup>11</sup>\*“Téi ma sireti ankan nompó péantianrúna mai sirenin nan inka ará baéken mino siré aní iyá umpsó sen toyampá ma eriyain bantai ákoná ano senti ákoná esantakhá téi ída kanai é ben arantan anamun ayufirí ukhé uno. Béi anon Kantá Aunan má ira vá póke péantanten mino.

\* **2:18:** Esé 35:19 \* **2:23:** Ais 11:1; 53:2; Ruk 2:39; Yon 1:45 \* **3:2:** Mat 4:17; Mak 1:15  
\* **3:4:** 2Ki 1:8 \* **3:7:** Mat 12:34; 23:33 \* **3:9:** Yon 8:33, 39; Rom 4:12 \* **3:10:** Mat 7:19;  
Ruk 13:6-9 \* **3:11:** Yon 1:26-27, 33; Apo 1:5

12 Béin ayampin bakhari in danka van mino. Bei uviti namumpin bakhari iyan uviti aítan mápin kaiyáken ída kípan irafin aítan taman kaurinten mino.”

*Yoni Ano Ma Yisasin Monó Non Péantein Baya Ino*

(Maki 1:9-11; Ruku 3:21-22)

13 Yoni ma vaya siyákan maen Yisasi Karirifá me ampiren Yoni ano véin monó non péantano van Yodení non arufá oren mino. 14 Oríkan Yoni ano véin ayópá ono van temí, “Éi ano ma séi monó non péintaren mifo éi fará téi varunafá eriya fono.”

15 MÁA síkan Yisasi evaránen béin tiameemí, “Ída ifo séi ma siyarunaí ma éi esin mi Tiyarafenu ano ma erasan nan ma funtákein avúavá barano ma sikhá ein baya ano mo kanaí inten mino.” Síkan Yoni iníren beni vaya vakuren monó non péanten mino.

16 \*Yisasin ma monó non péantádan non pinté ainén e ayoren avafá ma ódiyain má inaru ona yivin béis oniyain má Tiyarafenu Aunan mano mana kukhofá nun avúaváká ten béis vaipá eren mino. 17 \*Eriyain má inaru fáké mana oova ano máa semí, “Mai sen tanin mino. Téi ven nan moéké tinunu ukhé te súkáká ben nan moéké timusin iyá uno.”

## 4

*Ban Anon Mano Ma Yisasin Akhenóka Ein Baya Ino*

(Maki 1:12-13; Ruku 4:1-13)

1 \*MÁA siran Ban Anon mano Yisasin akhenóka ino van Kantá Aunan mano mai rákena yo aviren banta ída van kámá barafá oren mino. 2 \*Aviren mo khain báken foti (40) inuran má bayan má dunan auraren bareín arafan puren mino. 3 Arafan nan iyan baré íkan béis ma akhenókain

banta ano enóben béis máa sen tiameemí, “Éi ma fura se Tiyarafenu Anin ma vanteya sesin ma onámaná kayo ano veretií ino.”

4 MÁA síkan Yisasi evaránen tiameemí, “Tiyarafenui vompon dókifin máa sen baya uvanten mino, ‘Banasí ano yunantá ana ída kanaíen para van oriyán ban aunan baranten mifo Tiyarafenu oo fenté ma kuviyain baya ánaín ma vákurinten mai fara van oriyán ban aunan baranten mino.’” Diu 8:3

5 MÁA síkan Ban Anon mano véin do aviren kantasí ukhein baru Yerusalemí oren mo kákan monó namun amonta suron mantaanten mino. 6 Mo mantaantáden Ban Anon mano véin máa sen tiameemí, “Éi Tiyarafenu Anin ma vanteya káuse aravono. Para vara seyo, Tiyarafenui vompon dókifin máa sikhen mino:

“‘Béisano vei enisori kayo siantantin  
éintá dafibén betí ankan ayan  
do uvídantiya

mairá káusesin ída mana onámaná  
ano arantan aru finten  
mino.’” Ibo 91:11-12

7 Yisasi evaránen béin tiameemí, “Tiyarafenui vompon dókifin enádá máa sikhen mino, ‘Éi ída vá ei Bafan Tiyarafenun akhenóka uan onano.’” Diu 6:16

8 MÁA siran Ban Anon mano véin evaránen do aviren mana yan bain anu yontá mun kaúdaren ma varará ma ákoná vara kayofin ma ara ara kama yanasinta vain aníen mino. 9 Aní ureñ béis máa sen Yisasin tiameemí, “Éi ma aron durafúdeya matime sentá ma monó tiresí maé ma ma oniyaona yanasintá minó éin amenté uno.”

10 MÁA síkan Yisasi evaránen béin tiameemí, “Ban Anon noe, sífó ono. Tiyarafenui vompon dóki ano máa sikhen mino, ‘Éi Bafan Tiyarafenu veyaká aránaópá bákeya

\* 3:16: Yon 1:32 \* 3:17: Ibo 2:7; Ais 42:1; Mat 12:18; 17:5; Ruk 9:35 \* 4:1: Ibo 2:18; 4:15  
\* 4:2: Eks 34:28

ventá ana vá monó teno.' " *Diu 6:13*

<sup>11</sup> Máa síkan Ban Anon mano me ifá en orivin enisori kayo ano eriven ben me ayaen mino.

*Yisasi Ma Karirifá Monó Doran Mo Araí Ein Baya Ino*  
(*Maki 1:14-15; Ruku 4:14-15*)

<sup>12</sup> \*Aruvin banta kayo ano ma Yonin pákaan karivusifin kain baya ma Yisasi iníden béis evaránen Karirifá oren mino. <sup>13</sup> Nasaretí barurá manáa yamú o varen mairá me ifá ure Seburunin má Naftarin mái varafin ma Karirí non ankinafá bain baru Kabeniamú o varen mino. <sup>14</sup> Yisasi ma mai avúavá barein mai Tiyarafenu ano ma sakhanampa vanta Aisaiyan oorá máa sikhare ein mi fura sen afoká en mino,

<sup>15</sup> "Seburuni vá Naftari vái varafin má vain nanin banta vá Karirí non akhempá ma orikhein aayana vá Yodan non arufá ma vain nanin banta vá

maen mai ena anan nanin bantan Kariri varafin baren mino.

<sup>16</sup> Mai kayo ano kákan titipafin baré íkan kákan oon inka khan onen mino.

Purin mano ma sítipa uádan duntein barafin baré ein nanin bantafin inka kakhan afoká en mino." *Ais 9:1-2*

<sup>17</sup> \*Yisasi araíen monó baya vanasi siamemí, "Tiretí ankan ará baerano. Para vara seyo, inaru yafisin ádé anantá erinten mino."

*Yisasi Ma Araí En Kamí Kamí Eyo Iyampon Kayo Arein Baya Ino*  
(*Maki 1:16-20; Ruku 5:1-11*)

<sup>18</sup> Maná damú Saimonin nan ma Pitán ne siyain banta vá be afá Endurun má ano noyana arin dorarí iyain bákan base karúdiyáin Yisasi Kariri non ankinafá oriyaren onen mino. <sup>19</sup> Ódaren

\* **4:12:** Mat 14:3; Mak 6:17; Ruk 3:19-20 \* **4:17:** Mat 3:2; 19:27 \* **4:23:** Mat 9:35; Mak 1:39; Apo 10:38 \* **4:24:** Mak 6:55 \* **4:25:** Mak 3:7-8 \* **4:25:** Dekopori sin bí ma vain mai tiyan míkan baru en tikhen mino.

Yisasi vékanan máa sen tiamemí, "Tirékanan taréa noyana vaseí iya ompo sen má eresí banasi ma aviran aní uantano." <sup>20</sup> Máa siyain má ana vékanan base unan me ampiren béis dakhafen oren mino.

<sup>21</sup> Yisasi mai ráké oriyan onákan Yemisin nú Yonin nú anavasan botifin kumanten be afóe Šebetin má base avové iyá íkan békanan má aren mino. <sup>22</sup> Ariyain má anan békanan mai voti vá betíi afóen má me ampiren Yisasin bákuren oren mino.

*Yisasi Ma Aí Nanin Banta Ayofein Baya Ino*  
(*Ruku 6:17-19*)

<sup>23</sup> \*Yisasi Kariri varafin oriyáken betí ankani monó átaru namumpin un pében monó baya vanasi siamiyáken inká Tiyarafenu yafisin pintena kama vaya sian dákó iyan aí ma vá ein nanin banta ayofian au ma namu ukhá ein puntá antiyan en mino. <sup>24</sup> \*Máan tiyákan beni vaya ano minó Siriai varafá orera íkan minó nanin banta anó ara ará namu aí ma vákan ai san iyá ein má namu aunan ma varé ein kayo vá auvayaní ma iyá ein kayo vá ai ayan ma fukaré ein kayo vá aviren erikan Yisasi minó evaránen ayofian kama uanten mino. <sup>25</sup> \*Kariri vara fáke nanin banta vá Dekoporisíke nanin banta vá\* Yerusalemíke nanin banta vá Yudiá bara fáke nanin banta vá Yodení non ufáke nanin banta kayo vá ano véin bákuren noren mino.

## 5

*Yisasi Ma Vanasi Ano Avu Vá Uman Má Ma Varan Nain Afova Amein Baya Ino*  
(*Ruku 6:20-23*)

<sup>1</sup> Maná damú Yisasi onákan kokhon nanin banta átaru

\* **4:23:** Mat 9:35; Mak 4:17: Mat 3:2; 19:27 \* **4:23:** Mat 9:35; Mak 4:17: Mat 3:2; 19:27 \* **4:25:** Dekopori sin bí ma vain mai tiyan míkan baru en tikhen mino.

iyaimpin béis me onen anuí ukhein akhempá kena un kumamin bei eyo iyampon kayo ano véi vaintá eren mino. <sup>2</sup> Enóbin béis araíen betí ankan afova vaya amiyán temí,

<sup>3</sup>\*“Tiyarafenu van ma aiyain kayo vá amusin ino  
fara vara seyo inaru yafisin  
baru vetí ankan nina ino.

<sup>4</sup>\*Arunanápín ma vain kayo ano  
vá amusin ino  
fara vara seyo Tiyarafenu ano  
ará kusiantanten mino.

<sup>5</sup>\*Be au ma vararasí uren bain  
kayo ano vá amusin ino  
fara vara seyo Tiyarafenu ano  
ayuen bara vetí ankan am-  
inten mino.

<sup>6</sup>\*Puntakein avúava san ma  
aiyantin ma arafan nan  
iyain kayo ano vá amusin  
ino  
fara vara seyo Tiyarafenu ano  
kanaí uantanten mino.

<sup>7</sup>Ena nanin banta van ma arunan  
uantiyain kayo ano vá  
amusin ino  
fara vara seyo Tiyarafenu ano  
vei arunaná betin aní inten  
mino.

<sup>8</sup>Ará ano ma avusese ukhein kayo  
ano vá amusin ino  
fara vara seyo vetí ankan Ti-  
yarafenon onanten mino.

<sup>9</sup>Aruve asiveimpin ma kusin  
avúavá pákaren bain kayo  
ano vá amusin ino  
fara vara seyo vetí ankan  
nan Tiyarafenu akhafana  
ino sen aranten mino.

<sup>10</sup>\*Puntákein avúava san ma  
uman amiyantin ná mai  
kayo ano amusin ino  
fara vara seyo inaru yafisin  
baru vetí ankan nina ino.

<sup>11</sup>\*“Ten tñain ma sivákuriyásin  
ma ódaren mai van ma vanasi ano  
namu vaya siren namu uantén  
ara ara kampun bayafó ma aufin

\* **5:3:** Ais 57:15    \* **5:4:** Ais 61:2-3; Rev 7:17

1Pi 3:14    \* **5:11:** 1Pi 4:14    \* **5:12:** 2Kr 36:16; Apo 7:52

Mak 4:21; Ruk 8:16; 11:33    \* **5:16:** Efe 5:8-9; 1Pi 2:12

16:17; 21:33    \* **5:19:** Yem 2:10

kuráden tiyanti mai vará amusin ono. <sup>12</sup>\*Para vara seyo, inarufá tiretí kákán miyan ave ukhen mifo siretin ará ano kama ukhan-  
tiya vá moékeyá amusin ná ono. Tiretin ma aan uantein erikhá ein sakhanampa vanta kayo aurá ma namu uantaká ein avúavái afoká inten mino.”

*Yisasi Siyáken Banasi Ano Un  
Má Kakhan Má An Mi Yakhen Mino  
(Maki 9:50; Ruku 14:34-35)*

<sup>13</sup> Yisasi evaránen temí, “Tiretí ankan un ma einíi ukha ono, Uni ase ma kípavinti mai un intesá ure-  
sin ná evaránen ase inten nafin. Máan tukhein un ída veni ase vanti fase karúdáresin mai yaró onóbe enóbein manan ban mino.

<sup>14</sup>\*“Maná kákán baru ma ída  
áupasín anu yontá báé iyain an  
deya sireti ma varai kakhan mono.

<sup>15</sup>\*Banasí ano ída oon uruan ku-  
rafín kuferé iyan mifo sakhotkái  
uruan kain báken mápin ma vain  
nanin banta kakhaanté iyan mino.

<sup>16</sup>\*Máan mana eya vá tiretí ankaní  
oon áesin ná banasi avorá panu  
siyantin ná tiretí kama avúavásá  
oniyáken inarufá bain Afóen avisá  
daní ino.

*Yisasi Ma Man Baya Kayo Kanaí  
Ono Van Erein Baya Ino*

<sup>17</sup>\*Ída vá teya man baya vá  
sakhanampa vanta kayoi vaya vá  
do varanton mi sen nan eren  
mino se ineno. Téi ída ma  
vaya kayo yo maman karúdano  
van eré umpo yorékun mai vaya  
kayo ano mo kanai suron ino van  
mi eré uno. <sup>18</sup>\*Téi fura siré  
tiretí ankan tiámé uno ínáimpáké  
inaru vá bara vá kípanten mifo  
man baya fintena sitó bompon  
ná uvantá inten nafi inká titó  
kasá usikhá inten nafi ída aiy-  
oran para vantin mi minó mai ma  
uvantá ein daná afoká inten mino.

\* **5:5:** Íbo 37:11    \* **5:6:** Ais 55:1-2    \* **5:10:**

\* **5:11:** 1Pi 4:14    \* **5:12:** 2Kr 36:16; Apo 7:52    \* **5:14:** Yon 8:12; 9:5    \* **5:15:**

Mak 4:21; Ruk 8:16; 11:33    \* **5:16:** Efe 5:8-9; 1Pi 2:12    \* **5:17:** Rom 3:31    \* **5:18:** Ruk

16:17; 21:33    \* **5:19:** Yem 2:10

19 \*Máan tukhen mifo mana vanta ano ma man bayá kaya finté sító máa yurafúden ena nanin banta afova amintin má vetí ankan mai ánaín bákuriyáré intin maen inaru yafisimpin titókái ven aví aminten mino. Máan tinten mifo mana vanta ano ma minó man bayá ánaín bákuriyán ma minó nanin banta van mai ánaín bákurino van ma afova amiyyaren maen mai vanta ano inaru yafisimpin kákán bí baranten mino. 20 Máan tukhái séi saretí ankan tiamiyá uno. Toretí ma ída Tiyarafenu anunu ánaín ma vákuresin ma saretí funtákein avúavá ano ma man bayá ma afová ukhein banta kaya vá Farasisi kaya vái funtákein avúavá ma ída esantakhá intiya saretí ankan ída kanaíeyá inaru yafisimpin oferan nono.

*Banta Aruan Purin Baya Ino  
(Ruku 12:57-59)*

21 “Mosesini man bayá ma anafu aráon amikhá ein mano sikhen mino, Ída vá banta aruan purono. Banta ma aruan purin nain mano vá kópin ná orino sikhaya saretí ankan inka inikha ono. *Eks 20:13; Diu 5:17*

22 \*Máan tukhái séi saretí ankan tiámé umpo vá mumunan afá aváén má ma aran kanti asivúdanona vanta ano kópin ná orono. Máan mana e mana vanta ano ma ve afá aváén nan ánon ída vain banta ono\* ma sin nain mai Kanisorii\* ánon banta anon kó tiantanten mifo mana vanta ano ma ena van óen banta ono sinten ira kiyan uman baren berai siyan purin barurasá orino.

23 \*“Mai van mi Tiyarafenu ma íkun uan ameno van ma on karánará uádantá o mantave e afá

ayáe ano ma éin má asivuká inain bayá ma ovare me ininte vá, 24 ei íkun uan amin daná mairá me khaúde vá esé ana ore mo mai vaya afá aváén má puntáde vá ovaráne me íkun uan ameno.

25 “Éin kó tiantan banta ano ma aviren kó barufá ma kó tiantano van oriyyantiya aine vá ayanafá béin má mai vaya funtarano. Ída ma aine funtaresin mæn kó inin banta ayampin ma éin kaintin kó inin banta ano aruvín banta ayampin kaintin aruvín banta ano éin karavusifin aviren mo khainten mino. 26 Téi fura siré éin tiamiyá uno. Éi karavusi namumpin para vákeyai mai ma éin aví tiantein kó miyan máa miyaní uan kípan nono.

*Ena Nanin Banta Vá Ma  
Vanasín Baya Ino*

27 “Toretí ankan pefái ída vá ena aná ba safi ena avafun ma safi vá e vare vare e nono síka inikha ono. *Eks 20:14; Diu 5:18*

28 Máan tukhen mifo séi saretí ankan tiámé uno. Mana vanta ano ma mana nanin ódaren ma ineinefin aran nanteya mai vanta ano e aúpin inka ven má bare umeí e ono. 29 \*Máan tukhen mifo ayan kurompáke auu ano ma éin e yarifaan umefin ma kaintiya mai auu vá do vían karúdano. Mana vukhafa ma yo síkaan karúdáresin ma minó bukhafa ída karúdantin ma ira khiyan uman baren berai siyan purin barufin ma karúdantin orin manan kanaí inten mino. 30 \*Inká éin ayan kurompá ano ma e yarifaan umefin ma kaintiya vá mai yáman ná do síkaan karúdano. Mana vukhafa ma yo síkaan karúdáresin ma minó en au ída ira kiyan uman baren berai siyan purin barufin orin manan kanaí inten mino.

\* 5:22: 1Yn 3:15 \* 5:22: Ánon ída vain banta ono Aramaiki vaya finté ma Raka e siyain mai veni ana máan mi ukhen mino. Mana vanta ano ma ena vanta van aran nan uaren ma namu vaya sen asiayin bayá ino. \* 5:22: Kanisori e ma siyain mai Kiriki vaya finté Senhedrini en tiyan min. Mat 10:17; 26:59; Mak 14:55; Apo 4:15; 5:33; 6:15; 7:1; 22:30; 23:1, 6, 15, 20, 28; 24:20, 21 fin ná dere onano. \* 5:23: Mak 11:25 \* 5:29: Mat 18:9; Mak 9:47 \* 5:30: Mat 18:8; Mak 9:43

*Anasi Ma Ifá Uantan Avúavá  
Bayá Ino*

31 \*“‘Mana vanta ano ma ve aná tiantano vará béin ifá uantan bompon uvaman béin amiren ná tiantano,’ sen pefá Mosesini man baya ano sikha inikha ono. *Diu 24:1-4*

32 \*Inikha ompo séi saretí ankan tiamiyá uno. Mana vanta ano ma ve aná ano ída ena vanta vá noré intin ma véi mai nanin ma siantanten mai vanta ano man bayan durafuren mai nanin nan ena vanta vá e vare vare en non bí aminten mino. Máan turantin pasen mana vanta ano ma véin má ábasuí inten maen ída vá ena aná bá e vare yare en nono ma sikhein man bayai yurafurinten mino.

*Ayan Ma Vefió In Baya Ino*

33 \*“Mosesini ena man baya ma anafu aráon amikhein tiretí ankan inikha ono. ‘Pura ódino ma sire ayan befió uranteya mai vaya ída vá durafuriyákeya mai yaná puntáde vá Bafan avorá barano.’

34 \*Máan tukhái séi saretí ankan tiamiyá umpsí ída vá mana vayará ma ákona ono van inarufá ódino sireya ayan befió ono. Mai fara vara seyo, Tiyarafenui kumanin kin karái inaru van mino.

35 \*Tiretí ankan ída vá mana vayará ákona ono van bara aví teno.

Mai fara vara seyo, Tiyarafenui arantan kain kará ino. Tiretí ankan ída vá mana vayará ákona ono van Yerusaremí aví teno.

Mai fara vara seyo, Kákán Kini varu ino. 36 Máan tukhen mifo éi ída vá mana vayará ákona ono van e ánon aví teno.

Mai fara vara seyo, éi ída kanaíeya ánon do maman efanteni safi sókonteni safi in nono. 37 Tiretí ankan ná eyo ana seja vá ída ino ana seja vá inompo manáa vaya

ma mairá mo asotúip maen Ban Anon pintéi eriyan mino.

*Evaránen Anona In Avúavá  
Bayá Ino*

(Ruku 6:29-30)

38 “‘Mana vanta ano ma auu ankaman dufúkinti vá ben auu ankaman dufúkono. Inká aveantun ankaman duvikanti vá ben aveantun ankaman duvikano,’ sen Mosesini man baya ano fefá tikhaya inikha ono. *Eks 21:24; Riv 24:20; Diu 19:21*

39 Máa sikhen mifo séi saretí ankan tiamiyá uno. Mana vanta ano ma saretí ankan namu avúavásí uantantiya sretí ída vá béin evaráneya namu avúavásí uantano. Mana vanta ano ma mana ufáke ápa ankádanti vá ena ufáke ápa yo vaédesin ná ankan mino. 40 Inká mana vanta ano eni au anamun kó tiré barano van ma intiya vá ei ayá au anamun masá béin ameno. 41 Mana vanta ano ma éin nan ona siya uan manáa ayáká mo simeno ma sinti vá éi enavá ayáká mo asotú ure vá aya uan mo ameno. 42 Mana vanta ano ma éi vaonafá mana yana san inantinti mae véin amiyáke inká mana vanta ano ma mana yana san éi vaonafá ma simikharéesí anona evaráne ameno ma sin nain banta ída vá oyan ameno.

*Tiretí Namuro Ma Avábá Uantan Bayá Ino*

(Ruku 6:27-28, 32-36)

43 “Mosesini man baya ano ‘E arona avábá ureya vá’ ei namuro ída vá avábá ono sikhaya sretí ankan pefá inikha ono. *Riv 19:18*

44 \*Máa sikhen mifo séi saretí ankan tiamiyá uno. Ei namuro avábá ureya vá\* éin aren asen ono van ma yakhafin nain kékásá Tiyarafenun amúkuán ameno.

45 Máan ma inte mae sretí ankan

\* 5:31: Mak 10:4    \* 5:32: 1Ko 7:10-11    \* 5:33: Riv 19:12; Nam 30:2; Diu 23:21    \* 5:34: Ais 66:1; Mat 23:22; Yem 5:12    \* 5:35: Íbo 48:2; Ais 66:1    \* 5:44: Eks 23:4-5; Ruk 23:34; Apo 7:60; Rom 12:14, 20    \* 5:44: Manáa ínaímpá uvarein bompon enavá baya asotú en máa sikhen mino: éin má namu uantan nain kayo vá avábá uantantiya inká aranan ma uantianan nain kayo vará kama uantano.

Afóe ma inarufá báken áau yan ma namu nanin banta vá kama nanin banta vá amaniná ma kiyain má inká á dákan ma funtákein nanin banta vá ída funtákein nanin banta amaniná bá ma yan eriyain akhafanaíi inono.<sup>46</sup> Tiretí ankan ma avábá iyan nain kéká ana ma avábá inteya mai intéa miyan ná barante fono. Ídá takisi varan banta kayo vá dere máon té iyan nafino.<sup>47</sup> Tiretí ankan ma e afá aváeyan mana ma avábá iyanteya mai éi intéa avúavasá ena avorá mo variya fono. Monó ída inin kayo vá ano yeren ídá maná avúavasí é iyan nafino.<sup>48</sup> \*Para vara seyo, siretí ankan Afóe ma inarufá báken puntáken bainisá ukhe funtákein nanin banta vá bano.

## 6

### *Ona I Van Nanin Banta Ma Amin Avúavá Baya Ino*

<sup>1</sup>\*“Tiretí ankan dafían ná ákona ure ída vá tiretíi kama avúava sínta vanasi ano onano van betin avorá aní ono. Tiretí ankan ma máon tinte mae siretí Afóe ma inarurá baípáke ná ída kanaíe miyan baran nono.

<sup>2</sup> “Éi ma ona ídq van nanin banta ma manáa yaná ameno van ma inteya ída vá manáa kéká an deya kampun bayá sire ída mai ánain dakhafin banasi ano ma amo sino van tiantan oriyan ma monó átaru namumpin nafi ayanafa safi ma ufen aseiní ono. Téi fura siré tiretin tiamiyá uno. Mai vanta kayo ano inká minó miyan baren mino. <sup>3</sup> Máon té iyan mifo éi ma ona i van nanin banta kayo ma aya inteya vá en ayan kuron mano ma variyain daná ída vá ayan ópá ano áesín afová ino. <sup>4</sup> Máon tesin maen eni ayain mano umefá bantin e

\* **5:48:** Riv 19:2; Diu 18:13      \* **6:1:** Mat 23:5  
18:26-29      \* **6:8:** Mat 6:32      \* **6:10:** Ruk 22:42

Ruk 22:40; Yem 1:13; Yon 17:15; 2Te 3:3; 2Ti 4:18  
Ruk 22:40; Yem 1:13; Yon 17:15; 2Te 3:3; 2Ti 4:18  
Sivian ka ono. Manáa ínaimpá ma uvarein bompopmin ena vaya asotú en máa sikhen mino, Máon tukhein nan mi yafisin má ákona vá kákán bí bá enina van para oriyan banten mino. Pura.

Afóe ma inarufá báken aú páke ma variyain danasinta ma oné iyain mano éin miyan aminten mino.

*Dunan Auraren Ma Amúkin  
Avúavá Pákena Vaya Ino  
(Ruku 11:2-4)*

<sup>5</sup> \*“Inká tiretí ankan ma amúkinteya ída vá au khákan banta kéká ano ma vaya siren ída mai ánain dakhafé iyain an deya vá banasi ano onano van monó átaru namumpin nafi aayanafa safi mantaveya amúkono. Téi fura siré tiretin tiamiyá uno. Mai kéká ano vetí minó miyan inka varen mino. <sup>6</sup> Manten mifo siretí ankan ma amúkoño van ma inteya vá ei karafarampin un pébe ona munkure vá aúpá bain Afóe vaípasá amúkono. Máon tesin maen aúpá bariyain danasinta ma oniyain Afóe ano éin miyan aminten mino. <sup>7</sup> \*Inká monó ída inin nan ma afokhampin bain kayo ano ma Tiyarafenu ano inino van muno siren ma ayáká amuké iyainí ída vá ono. <sup>8</sup> \*Tiretí ída vá betí ankan an dano fara vara seyo siretí Afóe ano intéa yanasará inanteno van iya fo, mai véri fe afová ukhen mino.

<sup>9</sup> “Máon tukhen mifo siretí ankan ná máon amúkirisá ono.

“Tetin Tifóe inarufá baona en aví kantasá bano.

<sup>10</sup> \*Éini yafisin ná erino.

Inarurá ma éin oo yaiiyainí erá teti má barará éin oo yaiyono.

<sup>11</sup> Má damú kena yunan éi setin timeno.

<sup>12</sup> \*Éi setinti ume ampesirá inká tétein má dere máon manaé enai ume ampiantano.

<sup>13</sup> \*Inká éi ida vá tétein akhenókafin tivire ore vá

\* **6:5:** Mat 23:5; Ruk 18:10-14      \* **6:7:** 1Ki

\* **6:12:** Mat 6:14-15; 18:21-35      \* **6:13:**

\* **6:13:** áa namu yaná pinte vá tétein do

Ban Anon ayan pinte vá tétin do sivían ka ono.”\*

<sup>14</sup> \*Para vara seyo, ena nanin banta ano ma sireti ankan umeí uantádantí ma vetí ume ampiantanteya mai sireti Afóe ma inarufá bain mano sireti ume vá ampiantanten mino. <sup>15</sup> MÁAN tukhen mifo sireti ankan ma ena nanin bantai ume ma ída ampiantesin maen tireti Afóe ano sireti ume vá ída ampiantanten mino.

<sup>16</sup> \*“Tireti ankan ma yunan aurare amúkiyante vá ena nanin banta ano onano van ída vá au khákán banta kéká ano vaya siren ma ída mai ánaín dakhafiyán ma yunan auraren arunan en noiní ono. Téi fura siré tireti ankan tiámé uno. Mai kéká ano vetí minó miyan inka varen mino. <sup>17</sup> MÁAN tukhen mifo éi ma yunan aurare amúkiyante auná tesé ure vá áñontá uveri vana ono. <sup>18</sup> MÁAN tesin ná minó nanin banta kayo ano ída afová intin ná e Afóe ma aúpá bain mai ano ana vá afová iyan inká minó daná ma aúpá bariyain daná ma afová iyain Afóe anon eni miyan aminten mino.

### *Moní Bá Ona Vá Ma Kaiyan Ban Baya Ino* (Ruku 12:33-34)

<sup>19</sup> \*“Tireti ankan ída vá bara rákena kama yanásinta ma antan danú ano niyan ma karokharón ariyan ma inká umoyan banta ano varákuren bariyaimpin tireti kama ona kaiya vá bano. <sup>20</sup>\*Ída vá máan tin nompo mai ma ída antan danú nan ma karokharón iran ma inká umoyan banta ano varákuren baré iyain mai inarufasá tireti kama ona vá kaono. <sup>21</sup> Para vara seyo, éni kama ona ma vain mai varurái eni ineine vá aú amafon má banten mino.

\* **6:14:** Mak 11:25-26    \* **6:16:** Ais 58:5-9  
18:22                 \* **6:25:** Fir 4:6; 1Ti 6:6-8; 1Pi 5:7    \*

### *Auu Ma Vain Mai Au Vukhafai On Mino* (Ruku 11:34-36)

<sup>22</sup> “Auu ma vain mai aui on mifo éin auu ma kama ukhantin maen éin au fimpá kakhan mano víkakhen banten mino. <sup>23</sup> Bikanter mifo éin auu ma namu ukhantin mai minó éin aufimpá titípá inten mino. Mai oon ma éin aufin titípá ukhantin maen eni minó bukhafá ano moéken titípá en kumayusí inten mino.

### *Kankan Ayafai Yorarí In Baya Ino* (Ruku 16:13)

<sup>24</sup> \*Ída mana vanta ano kanaíen kankanan ayafai yorarí inten mino. MÁAN ma inten maen mana ayafa oman kaumpán uantáden ena ayafa avábá uantent inká manai oo yaiyen ena oofá átakharé uantanten mino. MÁAN tukhanti sireti ankan ída kanaieya Tiyaratfenu vá moní bái yoran bantai inono.

### *Kokhon Ineine Ma In Baya Ino* (Ruku 12:22-31)

<sup>25</sup> \*“MÁAN tukhein nan mi séi sireti ankan tiamiyá uno. Ída vá tireti ma váke yunan má non má ma nanona van e inian moreya inká auí daná ma aurá inona van kokhon ineine ono. Aunan ma váka vaona anó dunan ma naren ban esantakhan ná inká au vukhafá ma váka vaona anó auí daná ma uren ban esantakhen nafino. <sup>26</sup>\*Tireti ankan ayompin ma vain nun kayo vá onano. Betí ankan ída yunan doren unafen uan mápin kaé iyan mifo sireti ankan Afóe ma inarufá bain manon betin dunan amé iyan mino. Tireti ankan ídá mai nun kayo esantakhé unó té inikhe fono. <sup>27</sup> MÁAN tukhen mifo sireti ankan pinté mana ano ma kamaé bano van ma kokhon ineine inten maen mai ano kanaisá ená bei van manáá vá mo asotú inten nafino.

\* **6:19:** Yem 5:1-3    \* **6:20:** Mat 19:21; Ruk  
**6:26:** Mat 10:29-31; Ruk 12:6-7

<sup>28</sup> “Máan tukhen mifo siretí ankan pará auí dana san kokhon ineine iya rafono. Tiretí ankan paravan kayo ma ampantein ná onano. Betí ankan iyan ída vákán auí daná ina ída amué iyan mino. <sup>29</sup>\*Máan té iyan mifo séi siretí ankan tiámé uno. Pefá Kin Soromoni ano minó buí daná amu uren iyaren mifo veni auí daná kayo ano faravan kayo ma kiyain má ída manaí ukharen mino. <sup>30</sup> Mai ma sare ampantaré intin inuran ma síkoren ira saran nain kátu mai Tiyarafenu ano kamaen auí uanté iyain mifo sitó mumunan má baona nanin banta oe, véi ída kanaén ná tiretin auí uantanten nafino. <sup>31</sup> Máan tukhanti nái yunan má non masá naré báké intéa vuí danasá onte rafuno se siretí ankan ída vá kokhon ineine iya vá bano.

<sup>32</sup>\*Para vara seyo, afokhampin ma vain nanin banta kayo ano mai yanásinta van dosé iyan mifo siretí ankan Afóe ma inarufá bain mano siretin nan mai yanásintan barano van iya ono sen pefái afová ukhen mino. <sup>33</sup>\*Máan tukhen mifo esé daná Tiyarafenui yafisin má beni funtákein avúavá bá dosiresin ná mai yanásinta yere minó tiretin amino. <sup>34</sup> Máan tukhen mifo vá inurantena yana san ída vá tiretí ankan kokhon ineine ono, fara vara seyo inun damú ano veyan inurantena van ineine inten mifo mana mana yamúpin bei uman barú barú ukhen mino.

## 7

### Banasii Avúavá Ma Yaimin Baya Ino (Ruku 6:37-38, 41-42)

<sup>1</sup>\*“Tiretí ankan ída vá ena nanin bantai avúavá daimono. Para vara seyo, Tiyarafenu ano siretin má

\* **6:29:** 1Ki 10:4-7; 2Kr 9:3-6    \* **6:32:** Mat 6:8    \* **6:33:** 1Ki 3:11-14; Íbo 37:4, 25; Rom 14:17  
\* **7:1:** Rom 2:1; 1Ko 4:5; Yem 4:11-12    \* **7:2:** Mak 4:24    \* **7:7:** Mak 11:24; Yon 14:13; 15:7;  
16:23-24    \* **7:8:** 1Yn 3:22; 5:14-15

deren máan manaen daiminten mino. <sup>2</sup>\*Tiretí ankan ma ena nanin banta yaimiyá inona mai avúaváká anan Tiyarafenu ano siretin daiminten mino. Tiretí ankan inte avúavákásá ena nanin banta yaimiyá inte fo mai avúaváká anan ten Tiyarafenu ano siretin daiminten mino.

<sup>3</sup>“Éi fará e afá aváen auufen ma sitó daa antan bain oniyá bákeyá e auufen ma yaa khaéádan bain nan ída iniya fono. <sup>4</sup>Daa khaéádan maen auufen bantiya éi mai intesá eyá e afá aváen nan tifá tiváe oe, en auu fentena yaa antan do manantano van muno sinte fono. <sup>5</sup>Éi vaya ma sire ída mai ánaín dakhafin banta ompo vá e auufen ma yaa khaéádan bain nare vá do máde vá auu kamaeya óde vá e afá aváen auu fentena yaa antan do manantano.

<sup>6</sup>“Tiretí ankan ída vá Tiyarafenu ma siantádantin kantasí ukhan nain daná maman iyan kayo ameno. Amesin naren mai iyan kayo ano vaéaren tiretin untaranten mino. Tiretíi kama ukhein ankaroro kayo arantampó dasamin nafo ída vá pon kayo karúdaan ameno.

### Amúkin Avúavá Pákena Vaya Ino (Ruku 11-9-13)

<sup>7</sup>\*“Tiretí ankan amúkimpó ma inantiya vasin maen Tiyarafenu ano aminten mino. Dosiya ma vare mae oman afoká inono. Onará ma ankamiya vasin maen ona yiantanten mino. <sup>8</sup>\*Para vara seyo, amúkimpó ma inan ma sé iyain nanin banta ano minó daná baré iyan mino. Mana vanta ano ma mana yana san ma yosiyaren mai yaná oné iyan mino. Mana vanta ano ma onará ma ankamiyá intin maen Tiyarafenu ano véin ona yiantanten mino.

9 "Mana iyampon mano ma siretin pinte mana afóe vaonafá ma yáun nan ma inantinti mae iye anó onámaná maman aminte fono.  
 10 Inká noyana van ma inantinti mae namu osafáé e akhá aminte fono.  
 11 \*Tiretí afóeyan mano ma namu avúavá bariyákeya ma e akhafana kama yanasantia ma amin mai afová ukheya ma amé iyaonaí anan en tiretí Afóe ma inarufá bain mano ventá ma amúkimpó inantin nain nanin banta moéken kama yanasantian aminten mino.  
 12 \*Máon tinten mifo ena nanin banta ano inte avúavá sintá tiretin uantano vará anunu iyante fo mai avúavá sintia ana vá betin uantano. Mai avúavá sintia maen mai man bayá vá sakhanampa vanta kayo vái ana vaya ino.

*Kákan Ona Vá Titó Ona Vápín  
 Ma Oferan Baya Ino  
 (Ruku 13:24)*

13 "Tiretí ankan titó onafin ná umperano. Para vara seyo, o afeyoran barufá ma orikhein ona kákán mi yákon maifá ma orikhein aa kákán ban kasaen orirí ukhan mi kokhon nanin banta ano mai aa anan bákulen oriyan mino.  
 14 Máon tukhen mifo aun baran barufá ma orin ona sitói vákán mai varufá ma orin aa sitosí ukhan maen manáa nanin banta ano anan mai aa yosiren óden oriyan mino.

*Daa Ana Vá Beni Aran Máí Vaya  
 Ino  
 (Ruku 6:43-44, 13:25-27)*

15 \* "Kampun sakhanampa vanta kayo vará tiretí ankan dafian ná ákona ono. Sipi pipi ayo unan kafina uren erinten mifo aúpin afá iyan kayo víkakhen mino.  
 16 \*Máon tukhein tiretí ankan betin avúavá ano ma aran imá dan nain mi ódeya afováin nompo

kaná ayankun anan tákena uvaini aran kúdená inká avi kháta kayo rákena fíki aran kúden ná inten nafino.  
 17 Máon manan en mi kama yaa ana kayo ano kama aran máon imádé iyan mifo namu yaa ana kayo ano namu aran máon imádé iyan mino.  
 18 Kama yaa ana ano ída namu aran iran maen inká namu yaa ana ano ída kama aran iran é iyan mino.  
 19 \*Ída ma kama aran iran nain daa ana kayo síkaren ira saman kaurinten mino.  
 20 \*Máon tukhantiya vetí ma aran imádan naintái afová eya onan noño.

21 \* "Téin nan ma Bafan noe, Bafan noe, sen tariyain nanin banta kayo minó ano va inaru yafisimpin oferanten naino. Ída ifo inarufá ma vain Tifóeni vaya ánaín ma yakhafin nain nanin banta kayo ano anan inaru yafisimpin oferanten mino.  
 22 Tiyarafenu ano ma vanasi yaimin nain damú kokhon nanin banta ano se nan 'Bafan noe, Bafan noe, setí ankan en avíká sakhanampaín dorarí iyáké inká en avíká ana namu aunan do siantiyá maé inka kokhon enará ukhein danasinta maman afoká iyaré uno,' sinten mino.  
 23 \*Máon ma sintí maé téi funtadé evarané betin tiamenté uno, 'Tiretí ankan namu avúavá baran nanin banta kayon banái séi ída siretin afová ukhé umpo sifó oro.'

*Kama Afova Vain Banta Vá Ída  
 Kama Afova Vain Banta Vá Ano Ma  
 Má Uvaran Baya Ino  
 (Ruku 6:47-49)*

24 "Máon tukhein nan mi senti vaya iniren ma mai ánaín dakhafin nain nanin banta anon kama afova vain banta ano ma kákán onámaná daró ma má uvareiní iyan mino.  
 25 Uvantaré íkan á bá uva vá uáken anon non taven mai

\* 7:11: Yem 1:17 \* 7:12: Mat 22:39-40; Ruk 6:31; Rom 13:8-10 \* 7:15: Mat 24:24; Apo 20:29; 2Pi 2:1 \* 7:16: Kar 5:19-22; Yem 3:12 \* 7:19: Mat 3:10; Ruk 3:9; Yon 15:6 \* 7:20: Mat 12:33 \* 7:21: Ruk 6:46; Yem 1:25 \* 7:23: Íbo 6:8; 2Ti 2:19

má avékan maen kákán onámaná daró uvantarein pasen ída mai namun baráken mino. <sup>26</sup> Mápán ten mifo senti vaya ma iniren ída mai vaya ánain ma yakhafin nain nanin banta ano mai ída afova vanta ano ma eyurá ma ve amá uvareiní iyan mino. <sup>27</sup> Uvantaré íkan á bá uva vá uáken anon non taven mai má avékan baráken eraven mino.”

<sup>28</sup> Yisasi ma mai vaya kayo siamiran maen minó nanin banta ano véi ma afova amiyaín baya kayo van takhaen oreraen mino. <sup>29</sup> \*Mai fara va ino vetíi man baya ma afová ukhein banta kéká ano ma afova amiyaínisa en naifo mana aví bain banta ano ma afova amiyaíní en mino.

## 8

*Amon Dana Ái Bain Banta Ma Yisasi Ayofein Baya Ino*

(Maki 1:40-44; Ruku 5:12-14)

<sup>1</sup> Yisasi ma anuyon me ampireñ aravíkan maen kokhon nanin banta ano ven ánain dakhafen araven mino. <sup>2</sup> Araviyain má mana amon dana aí bain banta ano Yisasi vaintá eren me arón kanan durafúden mátimen temí, “Bafan noe, éi ma anunu iyante séin tu sesé usintesi evaráne kama ono.”

<sup>3</sup> Máa síkan Yisasi ayan dan orin mai vanta au aruvíyan temí, “Evaráneñ en au avusese en kama ino van téi sinunu iyá uno.” Siyain má manadá amon dana aí kipan maen mai vanta au evaráneñ kamaen mino. <sup>4</sup> \*Kama uantáden Yisasi véin máa sen tiámemí, “Ei ída vá ma ma en au kama uanteruna vaya mana vanta siameno. Oreya vá monó doran banta vaintá oresin ná éin avové en onano. Pefá ma Mosesini man baya ano ma sikhá einí eya vá Tiyarafenu ma íkun uan amin danasinta máde susu seya amusin

amesin ná minó nanin banta ano óden inka veni aí kípakhán mino sino.”

*Mana Antareti (100) Aruvín Banta Kayoi Ayafa Vanta Ano Ma Mumunan Ein Baya Ino*  
(Ruku 7:1-10)

<sup>5</sup> Yisasi ma Kápeniamú barufin o uniyain má mana antareti (100) aruvín banta kayoi ayafa vanta ano véi vaintá eriven béin ayaino van ínán en inaemí, <sup>6</sup> “Bafan noe, senti yoran banta ai ayan púkan kákán aí iyan berai siyáken bakhen manan bá uno.”

<sup>7</sup> Máa síkan Yisasi véin tiámemí, “Téi oré mo ayofanté uno.”

<sup>8</sup> Máa sin aruvín banta kayoi ayafa ano Yisasin evaráneñ tiámemí, “Bafan noe, séi ída kama vanta varuna éi ída kanaíye sen timá orin nompo vaya ana sesin ná tenti yoran banta evaráneñ asefa ino. <sup>9</sup> Mai séi farava máa siya rauno sesi ayafa vanta kayoi aránaópái séi vákun maen inká tenti aránaópái manáa aruvín banta kayo vái mana van ma orono ma sekun oriyá maé inká ena van ma ereno sekun maen eré iyan mino. Inká tesí yoran banta van ma ma yorarí ono ma sekun mai yorarí é iyan mino.”

<sup>10</sup> Máa síkan Yisasi mai vaya iniren anú duren mai ma ven dakhafen noré ein nanin banta máa sen tiámemí, “Téi fura siré tiretí ankan tiámíyá uno. Téi onékuñ ma vantai mumunán má manaí ukhein banta Isarerii varafin ída mana van mino.

<sup>11</sup> \*Mápán tukhái séi siretí ankan tiámíyá uno, Áau e unipá bá orun perápá bá ma vain bara fintena nanin banta kayo finté\* kokhon mano inaru yafisimpin ere ere uven maen maifin ma omasí inaimpin Abaraamu, Aisaki, Yekopun ankan má manafin

\* **7:29:** Mak 1:22; Ruk 4:32    \* **8:4:** Riv 14:1-32; Mat 9:30; Ruk 17:14    \* **8:11:** Ruk 13:29

\* **8:11:** Mai kayo ena anan nanin banta ino.    \* **8:12:** Mat 22:13; 25:30; Ruk 13:28

kumamen dunan nanten mino.  
<sup>12</sup> \*Nanten mifo Tiyarafenu ano ma vei yafisimpin bano van ma fe iyáontákain nain nanin banta yo siantantin titípa ukhein barufin o váken berai siyan aveantuntá inkékípiyán ifí danten mino.”

<sup>13</sup> Máa siren aruvín banta kayoi ayafa vanta siamemí, “Éi ma mumunan eonaíen mai yaná afoká inten mifo orono.” Máan ma siyain áaurá anai mai yoran bantai aí daná kípen mino.

#### *Yisasi Ma Pitan Aná Anóen Ayofein Baya Ino*

(Maki 1:29-31; Ruku 4:38-39)

<sup>14</sup> Yisasi ma Pitan amápin un pében onákan maen Pitan aná anóen aí uaren aufá ira kharo iyan takhópin bakhen baren mino.  
<sup>15</sup> Bakhen baré íkan Yisasi ven ayan bana fákiyán má mai aí dana kípavín e mantaaren beni yunan taren mino.

#### *Yisasi Ma Kokhon Nanin Banta Ayofein Baya Ino*

(Maki 1:32-34; Ruku 4:40-41)

<sup>16</sup> Mai inúpá kokhon nanin banta ano namu aunan ma vain kéká aviren Yisasi vaipá ere ere íkan mai aunan kéká do siantian inká aí dana ma vá ein kayo minó ayofen mino. <sup>17</sup> Máan ma ein manon sakhanampa vanta Aisaiyan pinté uaren Tiyarafenu ano sikhan mino. “Béi anon tetisi ara ara sí dana kípasintáden tetin kama usintanten mino,” ma sikhá ein mi fura sen afoká en mino. Ais 53:4

#### *Yisasin Ánain Dakhafiyain Nan Ma Uman Baran Baya Ino*

(Ruku 9:57-60)

<sup>18</sup> Yisasi ma onákan kokhon nanin banta ano véin aúban den iyen eúkiyáimpin bei eyo iyampon kayo siamemí, “Erí non e khadé ena ufá ódó tifano.” <sup>19</sup> Máa síkan mana man bayá ma afová ukhein

banta ano eriven Yisasin tiameémí, “Aru soe, éi ma orinonafá téi en dakhafé nonté uno.”

<sup>20</sup> \*Máa síkan Yisasi evaránen béin tiameémí, “Afá iyan kayoi ain bákan maen inká nun kayoi nan bákan ukhen mifo Banta Anin\* mano ma ánon kauren báran nain beni kanú ída van mino.”

<sup>21</sup> \*Máa síkan maen eyo iyampon kayo finté mana ano máa sen Yisasin tiameémí, “Bafan noe, áesirá te sifóen nare mo masí urerá ono.”

<sup>22</sup> Máa síkan Yisasi véin tiameémí, “Aín púkein banta kayo ano furin banta masí iyantiya éi sen dakhafono.”

#### *Yisasi Ma Kákan Uva Yo Siantein Baya Ino*

(Maki 4:35-41; Ruku 8:22-25)

<sup>23</sup> Máa siren Yisasi votifin un kumanin bei eyo iyampon kayo ano yakhafen óden mino.  
<sup>24</sup>\*Ódiven non aúbaná oriyain má anú deinien kákán uva íkan non karantó uaren boti yararári iyan mifo Yisasi fara aun bakharen mino. <sup>25</sup> Bakharé íkan bei eyo iyampon kayo ano véin mo avoriyan avádóden temí, “Bafan noe, Bafan noe, non ufurirí iyá tiféumpo setin tiya ono.”

<sup>26</sup> \*Máa síkan bái evaránen betí ankan tiameémí, “Titó mumunan má baona vanta kéká soe! Pará akhokho van iyara fono.” Máa siren bái e mantaaren uva vá non má ákonaen asiyain má púkehaven ída kayaen mino.

<sup>27</sup> Máan tiyain má betí ankan takha iyan kokhon ineine en orera iyan beraran inaemí, “Ma inté ukhein bantá bákan ná uva vá non má ano véin oo yaiiyian nafino.”

#### *Namu Aunan Bá Ein Bantá Kanan Pinte Ma Yisasi Yo Siantein Baya Ino*

(Maki 5:1-17; Ruku 8:26-37)

\* 8:20: 2Ko 8:9    \* 8:20: Yisasi ma Banta Anin ne ma sikhein mai Yisasi veyan nan mino.

\* 8:21: 1Ki 19:20    \* 8:24: Íbo 4:8    \* 8:26: Íbo 89:9; Mat 14:31

<sup>28</sup> Yisasi Karirí non e kháden ena ufá Kadará kayoi varafin óden mino.\* Ódiyain má namu aunan kayo ma vain bantá kanan mano ven má e fóken mino. Maí kanan banta ano afasien non banta masí ukhein pimpá baren nóken aran má ukhan maen banasi ano féden mai aasá ída oriyaren mino. <sup>29</sup>\*Máan tiyá íkan mikanan mano avádóden oovaren temí, “Éi Tiyarafenu Anin mompo, náisá ono vará damú ída afoká ukhayá tetin namu ono van eriya fono.”

<sup>30</sup> Máan ma siyákan maen manáa nentá pon kayo iyukhen báken dunan niyaren mino. <sup>31</sup> Niyan bákán namu aunan kayo ano Yisasin ínánen inaemí, “Tetí ankan ma sisintante vá áesirá mesan pon kayo aúpin ná oferá tifano.”

<sup>32</sup> Mái síkan Yisasi evaránen betin tiämémí, “Tiretí ankan orono,” siyain má namu aunan kayo ano mai kanan banta me ampiren pon kayo aúpin o fébíkan mai fon kayo ano sava uaren kákán ayafin o káusiven non ufuren puren mino. <sup>33</sup>Máan tiyain má pontá ma yafiká ein banta kéká ayo kákán barufá karan oren mo minó nanin banta mai ma afoká ein daná baya siamiyáken namu aunan kayo ma vá ein bantá kanampin ma afoká ein baya vá dere siamen mino. <sup>34</sup>Tiamíkan iniren mai varu finté minó nanin banta ano Yisaín onano van eren mino. E oniyáken betii vara me ampiren ena akhempá orino van ínánen tianten mino.

## 9

*Ai Ayan Püká Ein Banta Ma  
Yisasi Ayofein Baya Ino*

(Maki 2:1-12; Ruku 5:17-26)

<sup>1</sup>\*Yisasi mana votifin un kumamen Karirí non e kháden bei varufá oren mino. <sup>2</sup>Oriyain

má manáa vanta kayo ano ai ayan púkein banta kúkútafin bavin daiyen erikan Yisasi ma vetí ankaní mumunan ódaren mai aí banta máa sen tiämémí, “Tanin noe, eni ume ampianté umpo vá en ará ano ákonaen ná bano.”

<sup>3</sup>Mái síkan maifin manáa manbaya ma afová ukhein banta kéká ma varé ein mano mai vaya iniren betiyan ten oreraemí, “Ma vanta ano Tiyarafenu varun bariyan ume ampiantiyan mino.”

<sup>4</sup>\*Mái sen iniyán Yisasi vetí ankaní ineinefin afová urem temí, “Pará tiretí ankan aúpin namu ineine maman ayuman iya rafono.

<sup>5</sup>Inte vaya ma seruna anó tesosikhen nafino. ‘Eni ume ampianté uno’ ma seruna ano fino áa éi ‘e mantave orono’ ma seruna ano fino. <sup>6</sup>\*Mái tukhen mifo sireti sá afová ono Banta Animpin ákona vákan mi ma varará ume kayo ampiantiyan mino.” Mái siren mai ma ai ayan púkein banta van temí, “Mantaveya ei kúkúta mamare ei varufá orono.”

<sup>7</sup>Mái siyain má mai vanta ano e mantaaren bei varufá oren mino. <sup>8</sup>Oríkan banasi ayo ódaren akhokho van urem máqan ákona ma varará banta ma amé iyain nan Tiyarafenu aví daníen mino.

*Yisasi Ma Matiun Arein Baya Ino*

(Maki 2:13-17; Ruku 5:27-32)

<sup>9</sup>Mairá Yisasi me ampiren oriyaren o onákan Matiun ne sin banta ano sakisi varan namumpin kumantaré íkan Yisasi véin tiämémí, “Éi ere sen tivákurono.” Síkan Matiu e mantaaren ben avákuren oren mino.

<sup>10</sup>Yisasi ma Matiun amápin o khumanten dunan niyákan maen kokhon takisi varan banta kéká bá ume nanin banta kayo vá ano maifin ódiven Yisasi má bei eyo

\* **8:28:** Manáa vompon Kerké barafin máa sen ena vompon Kerá barafin máa sen mino.

\* **8:29:** Mak 1:24; Ruk 4:41 \* **9:1:** Mat 4:13 \* **9:4:** Ruk 9:47; Yon 2:25 \* **9:6:** Yon 17:2

\* **9:11:** Ruk 15:2

iyampon kayo vá manafin kumamen dunan nen mino.<sup>11</sup>\* Niyákan Farasisi kéká ano ódaren aranan iyáken beni eyo iyampon kaylorá inaemí, “Pará tiretí ankaní arú ano sakisi varan banta kéká bá ume vanta kayo vá manafin kumamen dunan niyan nafino.”

<sup>12</sup> Máa siyákan Yisasi mai vaya iniren máa semí, “Aí ma ída vain nanin banta kayo ano ída ayofan banta vaípá oré iyan mifo aí ma vain nanin banta ano anan ayofan banta vaípá oré iyan mino.

<sup>13</sup>\* Ma vaya ma Tiyarafenui vompon dókifin ma vain pintena vá tiretí ankan ore vá o afova varano. ‘Ena ma arunan uantan nan mi siranakhen mifo íkun ma uan amin nan ída ino.’<sup>14</sup> Ose 6:6 Téi funtákein kéká arano vara erauna, umeí ma en noin kayon arano van mi erikhé uno.”

*Dunan Ma Aurá Pákena Van Ma Yisasin Inaein Baya Ino*

(Maki 2:18-22; Ruku 5:33-39)

<sup>14</sup>\* Maná damú Yonini eyo iyampon kayo ano Yisasi vaintá eriven bén inaemí, “Farasisi kéká bá tetí ankan má ano yunan turé iyá umpsó fará eni eyo iyampon kayo ano ída yunan auriyan nafino.”

<sup>15</sup> Máa sen ina íkan Yisasi evaránen betí ankan tiameémí, “Anasi ma iman ameno van iyantin ma mai vanta ano ma vei kéká bá para vantin maen mai vetí ankan nái vará bén arunan uantanen nafino. Maná damusí intin ma anasi iman ameno van iyain banta ma aviren orivintin maen maí damuí vetí ankan dunan auranten mino.

<sup>16</sup> “Ída mana ano auyen davaráe ma kafáadán pójé peyante au anamun ma yakakheimpin mo yamparen amué iyan mino. Para vara seyo, auyen davaráe kafáadán ma feyante au anamuntá mo yamparen amu urantin

baren maen auyen davaráe ano yarifantin tampí tiaren mai au anamun kákantá eyáken orera inten mino.<sup>17</sup> Ída mana vanta ano feyante memé au unampin auyen uvaini anu vanaé iyan mino. Peyantefin ma vanarantin maen paútiaren uvaini anu varará bañana eravintin mai memé au unan namu inten mino. Mágán tukhan mi auyen memé au unampin ma auyen uvaini anu vanaran maen mi mikánan kamaen báé iyan mino.”

*Yisasi Ma Fúká Ein Arinta Avían Manten Ma Aí Nanin Ayofen Ma Ein Baya Ino*

(Maki 5:22-43; Ruku 8:41-56)

<sup>18</sup> Yisasi ma Yonini eyo iyampon kayo vá baya siyákan maen mana átaru namuntá ánoní ukhein banta ano véi vaintá me aron kanan durafüden mátimen temí, “Te siraun taréa furí umpsó éi ereya mo ayan ben aurá kaesin evaránen aunan baren mantano.”<sup>19</sup> Mágán Yisasi e mantaaren bén dakhafen oríkan bei eyo iyampon kayo vá ano yere oren mino.

<sup>20</sup> Oriyákan mana nanin maen tirantan kan orun kádan (12) oranárá biyon aí daná mantein baré íkan mai nanin mano ádé eriven Yisasini ayá au anamun áton aruvén mino.<sup>21</sup>\* Aruvíyan mai nanin mano veyan nan temí, “Beni au anamun ma aruvékuñ maen tenti sí daná kípanten mino.”

<sup>22</sup> Mágán siren aruviyain má Yisasi yo vaéan mai nanin oniyáken temí, “Tiraun noe, eni mumunan manon eni aí kípaanten mifo en ará ano vá ákonáen bano.” Mágán ma siyain má anan mai nanini viyon aí daná kípen mino.

<sup>23</sup> Mágán turen mairá Yisasi oren monó átaru namuntá ma ánoní ukhein banta amápin o onákan banasi ano kuní iyaren mino.\*<sup>24</sup> Mágán tiyákan Yisasi semí, “Tiretí

\* **9:13:** Mat 12:7 \* **9:14:** Ruk 18:12 \* **9:21:** Mat 14:36 \* **9:23:** Yisasi ma yorun baré ein barufá ma vanta fúbin maen okhakhan mi asiyán ifí diyan mino.

ankan báe entavoro. Mai arinta ída fúken paran aun bakhen mino.” Máa síkan minó ano venan inten oreraen mino.<sup>25</sup> Mai nanin banta ma yo siantan barufá eravuvín maen Yisasi mápin un pében mai arinta ayan bana ma fakaaran orun mantén mino.<sup>26</sup> Mai ma Yisasi varein avúavá baya ano mai varafin minó akhempá oreraen mino.

*Auu Yufúkukhá ein Bantá Kan  
Má Ida Vaya Siyá ein Banta Vá Ma  
Yisasi Ayofein Baya Ino*

<sup>27</sup> \*Yisasi ma mai varu me ampiren oríkan maen auu yufúkukhein bantá kan mano oyampá dakhafen oriyan oo vararen máa semí, “Devitin Anin noe, verasan nan arunan usintano.”

<sup>28</sup> Máa sen oriyákan mai ma véi vain namumpin un pébin mai ma auu yufúkukhein bantá kan mano mai namumpin béis vaintá unóbin Yisasi vékanan máa sen inaemí, “Tenan tirékan auu kama urantí onano vará mumunan iya fono,” síkan békanan evaránen béis ti amemí, “Eyo Bafan noe, berasan mumunan iýá uno.”

<sup>29</sup> Máa síkan békanan auurá ayan kaúden temí, “Tiré kan ma sentá mumunan eonarái mai yaná kanaén afoká inten mino.”<sup>30</sup> \*Máa siyain má míkanan evaránen auu mábíkan Yisasi ákonen airon ananí uanten temí, “Ma ma siré kampin ma afoká ein daná ída vá áesin mana vanta ano afóvá ino.”<sup>31</sup> Máa siran maen mai kan banta ano oren Yisasi ma varein avúavá baya mai varafin ma minó akhempá ma vain nanin bantafin mai vaya siádan oreraen mino.

<sup>32</sup> Mai kan banta ano ma Yisasin me ampiren oriyain má namu auan manó oorá iyákan ída vaya siyain banta vanasi ano aviren béis

vaintá eren mino.<sup>33</sup> \*Eríkan Yisasi ma mai namu auan do siantádan maen mai vanta ano vaya síkan bánsi ano sakha iyáken temí, “Pefá ída Isarerii varafin máan daná afoká in ontaren mino.”

<sup>34</sup> \*Máa sen orera iyan maen Farasisi kéká ano semí, “Namu auaní ánon bantai ákonarái véi namu auan do siantiyan mino.”

*Maná Yoran Bantan Ban Mino  
Ma Sein Baya Ino*

<sup>35</sup> \*Minó kákán barufimpa safi sitó barufimpa safi Yisasi oriyáken betíi monó átaru namun kayofin Tiyarafenui yafisin pintena kama vaya kayo siamiyáken ara ara aí daná kayo ayofen oren mino.

<sup>36</sup> \*Máan ten oriyáken kokhon nanin banta kayo onákan sipsisipirá dafisin banta ída vákan ma asuse en aminofin nóken ma ayain banta van dosen noiní iyákan mai van Yisasi vetí ankan nan arunan uanten mino.

<sup>37</sup> \*Arunan uantáden bei eyo iyampon kayo siamemí, “Kokhon dunan karakhan mifo mai yunan ma yuyasin kéká tanáan ban mino.

<sup>38</sup> Máan tukhen mifo vá dunan afóe vaipasá amúke inantesin ná béis kokhon doran banta siantantin bei yunan karápín oriven ná beni yunan duyáan átaru ino.”

## 10

*Tirantan Kan Orun Kádan (12)  
Eyo Iyampon Kayo Ma Yisasi Aní  
Ein Baya Ino*

(Maki 3:13-19; Ruku 6:12-16)

<sup>1</sup> \*Tirantan kan orun kádan (12) eyo iyampon Yisasi araren namu auan kayo ma yo siantan má ara ara aí daná ma ayofan ákona vá amen mino.

<sup>2</sup> Mai máa sirantan kan orun kádan (12) baya varen orin banta kéká aví máan mi ukhen mino. Esé

\* 9:27: Mat 20:29-34    \* 9:30: Mat 8:4    \* 9:33: Mak 2:12    \* 9:34: Mat 12:24; Mak 3:22;  
Ruk 11:15    \* 9:35: Mat 4:23; Mak 1:39    \* 9:36: Nam 27:17; 1Ki 22:17; Sek 10:2; Mat 14:14;  
Mak 6:34    \* 9:37: Ruk 10:2    \* 10:1: Mak 6:7; Ruk 9:1

araén Saimonin nan ma Pita ne siyain má inká ben afá Enduru má inká Sebetin anin kanan Yemisin nú Yonin nú anavasan má inká<sup>3</sup> Firipin má Bataromiun má Tomasin má takisi varan banta Matiun má inká Arafiasin anin Yemisin nú Tadiusin nú bá<sup>4</sup> Serotin anan banta Saimonin má inká ínaiimpá ma Yisasin avían namuro ayampin amin nain banta Yudas Iskariotin\* má ino.

*Yisasi Vei Eyo Iyampon Kayo  
Siantan Ma Monó Dorantá Orera  
Ein Baya Ino*

(Maki 6:7-13; Ruku 9:1-5)

5 Yisasi mai máa sirantan kan orun kádan (12) banta siantan oriyákan afova vaya kayo máa sen tiameví, "Tireti ankan ída vá ena anan banta kékápin ore vá inká Sameriá kayoi varufimpá bá ída vá orera ono. 6 \*Isarerí kékái sipsipi kayo ma afeyókein mai kayofin mana vá orono. 7 \*Tireti ankan ma oriyáke mae vá máan ná teno, 'Inaru yafisin inka ádé erikhen mino.' 8 Tireti ankan oreya vá aí banta mo ayofesin evaránen asefa intiya vá, pükáin nain ayanóan mantiyáke vá, amon dana aí ma fákakhán nain kama uantiya vá, banasifin ma namu aunan baréin nain do siantiya vá ono. Ma ákona ída miyan bákaya faran tireti ankan bare ompo vá mai ída miyan bantiya fara vá bannasi aya ono. 9 \*Tireti ankan ída vá kori fi siriva fi kopa moni safi vá amú anan unampin bá ureya vare orono. 10 \*Tireti ankan ma oriya mae ída vá unan bareya inká ída vá ena aü anamun má arantan anamun má ayonta vá bare vá orono. Mai ma mo yorarí uantanona nanin banta ano vá éin dunan má minó daná bá amino.

11 "Tireti ankan ma mana kákan barufin nafi sitó barufin nafi ma orivinte mae funtákein banta van mairá dosireya mai vanta amasá bareya mai varu me ampeno. 12 \*Tireti ankan ma mai vanta amápin un pébinteya mai namumpin ma van nain nanin banta máan ná te siameno, 'Tiretin má ará kusin banten mino.' 13 Máa sesin ma mai namun pinte nanin banta ano ma amusin iyan ma saretí ankan aviranti mae vá tiretií avu vaya áesin ná betin má bano. Banten mifo saretin ma ída amusin iyan ma avirantiya vá tiretií ará kusiantan bayá áesin ná ovaránen tiretempin erino. 14 \*Mana ano ma saretí ankan ída aviren be amápin oren ma saretíí vaya inin nan ma afonkarí intiya ma mai varu me ampinté vá arantantáke kayosá betin avorá me fúpá tian karú desin ná afová en ná Tiyarafenu ano setin uman timinten mino sino. 15 \*Téi fura siré tireti ankan tiamiyá uno. Tiyarafenu ano ma vanasi yaimono van inikhein damú ma afoká intin Sodomu varu vá Komora varu vá ané ma afoká ukhá ein mai uman moéken esantakhein uman mí mai varu kayo finté nanin banta ané afoká inten mino.

*Ara Ara Uman Ma Afoká Inai  
Páke Amaan Tikhein Baya Ino*

(Maki 13:9-13; Ruku 21:12-17)

16 \*"Máan tintéí séi saretí ankan afá iyan ofen ma sipsipi kayo siantan oreiníí é umpo vá osafáe an de vá bempáké barará tonanempe vá oriyákeya kukhofá nun mano ma fúkeháven noinísá ono.

17 \*"Manáa vanta kéká kasá dafian ákona ono. Tiretin avían Kanisorí kaylorá mo kaintin kó tiantáden betíi monó átaru namun

\* **10:4:** Yudas Iskarioti e ma siyain mai Iskariotí baru ráke vantán ban mino. \* **10:6:** Yer 50:6 \* **10:7:** Mat 3:2; 4:17; Ruk 10:9, 11 \* **10:9:** Ruk 10:4 \* **10:10:** Ruk 10:7; 1Ko 9:14 \* **10:12:** Ruk 10:5-6 \* **10:14:** Ruk 10:10-12; Apo 13:51 \* **10:15:** Mat 11:24; Yut 7 \* **10:16:** Ruk 10:3; Rom 16:19 \* **10:17:** Mak 13:9-11; Ruk 12:11-12; 21:12-15

kayofin tiretin dafiyó ankaminten mino. <sup>18</sup> Téintá ma mumunan iyaona van mai kéká ano siretin avían kamanin kayo vá kin kéká bá avorá kaintiya mairái vetin má ena anan nanin banta kayo avorá bái kama vaya sian dákó inono. <sup>19</sup> Máan tesin ma siretin avían kópin ma kaintiya inte vayá tente rafuno sireya ída vá anomé ineno. Mai áaurá anan Tiyarafenu ano mai ma sinona vaya ineine amintiya sinono. <sup>20</sup> \*Mai fara vara seyo, sretiyantá ída vaya sin nompo sretí Afóeni Aunan manon tiretin oo ráke uaren baya sinten mino.

<sup>21</sup> \*“Be afá ayáe ano e mantaaren be afá ayáen avían namuro ayampin kaintin aruan purintin maen be afóe ano e mantaaren be akhá mai ayúavasí ana uantantin maen inká iyamponinta ano e mantaaren be anóe afóen namuroí uantáden arintin purino van avían namuro ayampin kainten mino. <sup>22</sup> Téin tíví ma sretimpin banti ma séin bákuriyanona van mi minó banta kéká ano sretí ankan ará namu uantanten mifo iye anó mantaan ákona ukhen baré intin ná ma varai kípan damú afoká inten nafi Tiyarafenu ano mai nanin banta kayon evaránen aviranten mino. <sup>23</sup> Tireti ankan ma mana varu fintena nanin banta ano ma inian namu uantanti mae ena varu fasá karan orono. Téi fura siré tiretin tiámé uno. Isarerii varafin ma vain baru kayofin ída yóan kípkhesin mi Banta Anin er-inten mino.

<sup>24</sup> \*“Sikhuru iyampon mano vei arú ída esantakhan inká doran banta ano vei ayafa ída esantakhan ukhé iyan mino.

<sup>25</sup> \*“Sikhuru iyampon mano ma vei arú bá mun manaí intin ma inká doran banta ano ma vei ayafa

vanta vá mun manaí intin maen mai anan kanaí inten mino. Má afóen nan ma namu aunani ánon banta Beseburi e ma sen ariyain mai veni kéká bá deren moéken namu ví aranten mino.

### *Namuro Kayo Van Ma Ída Fera Baya Ino*

(Ruku 12:4-7)

<sup>26</sup> \*“Banta kéká ano ma sretí ankan uman ameno van ma intiya sretí ída vá akhokho van ono. Aúpá ma ana yamuán kain bain danasinta ano yáko intin inká aúpá baya kayo vanasi ano afová inten mino. <sup>27</sup> Téi ma inuran pinté ma siamenuna vaya vá tireti ankan kakhakhein tasá teno. Tireti ankan átorempin ma kafaya finté ma siamin nain baya vá má amontasá un mantaveya vá oovare vanasi siameno. <sup>28</sup> \*Banta kéká ano ma yante vukhafa aruan purin nan ída vá tireti ankan perano. Beti ída kanaén aú bá aruan purinten mifo Tiyarafenu veya vará perano. Béi anón kanaén aú bá dan bukhafa vá mai ma ira kiyan uman baren berai siyan purin barufin taman kaurinten mino. <sup>29</sup> Mana monípó titó nun kanan miyaní ino van kaé iyan mifo sretí ankan Afóe ano mai nun kayo kamaen dafisiyáken mai fintena mana ída áintin barará eravino van anunu ukhen mino. <sup>30</sup> Máan tukhan mi Tiyarafenu ano sretí ankan ánon do yankáan kíporen minó afova suron ukhen mino. <sup>31</sup> \*Máan tukhaya sretí ankan titó nun kayo esantakha ompo ída vá akhokho van ono.

### *Yisasini Vaya Sin Nan Ma Ída Ayave In Baya Ino*

(Ruku 12:8-9)

<sup>32</sup> \*“Maná vanta ano ma e manten banasi siamen ma séi veni kéká uno ma sintí maé mai sen má deren béin nan tesí kéká ino sé

\* **10:20:** Yon 14:26   \* **10:21:** Mai 7:6; Mat 10:35; Mak 13:12; Ruk 21:16   \* **10:24:** Ruk 6:40; Yon 13:16; 15:20   \* **10:25:** Mat 9:34; 12:24; Mak 3:22; Ruk 11:15   \* **10:26:** Mak 4:22; Ruk 8:17   \* **10:28:** Rom 8:31; Yem 4:12   \* **10:31:** Mat 6:26   \* **10:33:** Mak 8:38; Ruk 9:26; 2Ti 2:12

Tifóe ma inarufá bain tiamenté uno.<sup>33</sup> \*Tiamenté umpo mana vanta ano ma e mantén banasi siamen ma séi ída veni kéká uno ma sintí maé mai sen má deren béin nan ída sesi kéká ino sé Tifóe ma inarufá bain tiamenté uno.

*Yisasin Ma Móeken Anunu In Baya Ino*

(Ruku 12:51-53, 14:26-27)

<sup>34</sup> “Ma varará aruvín kusiantan mi sen nan baren eren mino seya siretí ankan ída vá ineno. Téi vaenatin baré eré uno,<sup>35</sup> Para vara seyo, namuroíin avúavá afoká ino van mi séi eré uno.

“Banta ano e mantaaren be afóen namuroí intin,  
be araun mano e mantaaren be anóen namuroí intin,  
be anafú ano e mantaaren anasi anafú namuroí uantantin  
<sup>36</sup> inká mana vanta ano e mantaaren baéden bei kéká bá namuroi inten mino.” Mai 7:6

<sup>37</sup> “Mana vanta ano ma ve anóe afóen nan ma moéken anunuen ma sen nan ma ída moéken anunu inain mai ano ída kanaíen ten bákurinten mino. Inká mana vanta ano ma ve anin nafi ve araun nafi moéken anunuen ma sen nan ma ída moéken anunu inain mai ano ída kanaíen ten bákurinten mino.<sup>38</sup> \*Máon tinten mifo iye anó ída vei yaa unkamádan mamaren ná ten tíain dakhafinten nafi mai ano ída kanaíen ten bákurinten mino.\*<sup>39</sup> Bei aunan ma ákonaen pákakhá inain nanin bantai aunan o afeyoranten mifo sen nan ma iniren bei aunan ma ampin nain nanin banta ano fara van oriyan ban aunan o varanten mino.

*Ena Vanta Ma Aya Iyain Kéká Ano Ma Inarufá Kákan Miyán Baran Nain Baya Ino*

(Maki 9:41)

<sup>40</sup> \*“Tiretí ankan ma avíden ma avábá inain mai vanta ano séin mi sivíden kama inten mino.

Téin ma siviran nain banta ano mai ma séin tisintá erikheruna Sifóen mi aviranten mino.<sup>41</sup> Máon tinten mifo mana vanta ano ma mana sakhanampa vanta aya iran munó ma siren aviren be amápin mo kaúden dafisinten maen mai ma Tiyarafenu ano sakhanampa vanta amiayin miyan mi mai vanta ano varanten mino. Inká mana vanta ano ma mana funtákein banta aya ono van ma avíon be amá mo kaúden ma yafisinten maen mai ma funtákein banta kayo ano ma varé iyain miyan mi mai vanta ano varanten mino.<sup>42</sup> “Mana vanta ano sen naro siren ma senti eyo iyampon kayo finté mana aví ída vain doran banta ma kápifin iyon non dáan aminten maen mai séi fura siré tiretin tiamiyá uno. Mai vantai miyan ída afeyoranten mino.”

## 11

*Monó Non Péantan Banta Yonin Nú Yisasin Núi Vaya Ino*

(Ruku 7:18-35)

<sup>1</sup> Yisasi ma sirantan kan orun kádan (12) eyo iyampon kayo ma vaya siamiren maen mai varu me ampiren Kariri varafin ma vain baru kayo fimpá nóken banasi afova amiyan Tiyarafenu kama vaya vetin tiamen mino.

<sup>2</sup> Yoni ma karavusifin baren ma Tiyarafenu ano aní ukhein banta ano ma minó dorarí iyain baya iniren bei eyo iyampon kayo van máa sen Yisasin mo ina ino van tiamemí,<sup>3</sup> “Ei fura sé mai ma Tiyarafenu ano ma aní ukhá ma avé ukhá erúna vanta fono. Áa ena vanta eriyain nará tetí ankan ave ótifan nuno.”

<sup>4</sup> Máa síkan Yisasi evaránen betí ankan tiamemí, “Tiretí ankan ma ma oniyáke ineona vaya vá evaráne ore mo Yonin tiameno:<sup>5</sup> \*Auu ma yufukhá ein kayo

\* **10:38:** Mat 16:24-25; Mak 8:34-35; Ruk 9:23-24; 17:33; Yon 12:25      \* **10:38:** Bei yaa unkamádan ma varani ana máon mi ukhein mino. Yisasin ánain bákurintá ma uman baran mino. \* **10:40:** Mak 9:37; Ruk 10:16; Yon 13:20      \* **11:5:** Ais 35:5-6; 61:1

ano evaránen onákan inká arantan ma namu ukhá ein kayo ano e mantén orin maen amon dana aí ma vá ein kayo au evaránen kama íkan inká átaren ma kontá ein kayo ano evaránen baya kamaen iníkan maen púká ein kayo ano evaránen e mantákan inká ona ma ída vain nanin banta ano kama vaya inin en mino. <sup>6</sup> Téin ma soniyantin ma vetíi mumunan ída eravukhan nain kayon Tiyarafenu ano moékan amusin aminten mino.”

<sup>7</sup> Yonini eyo iyampon kayo ma orivíkan Yisasi máa sen Yonin nan banasi siamemí, “Tiretí ankan inté ukhein bantá onano vará banta ída van kámá barafá oriyare fono. Béi ída ákona van ura ano ma kaya einisá iyayá onano van oriyare fono. <sup>8</sup> Áa náinásá onano vará oriyare fono. Mana vanta ano kama ukhein auí danasá uren bákayá tiretí ankan onano van oniyare fono. Ída ino. Kama auí daná ma ukhein banta kayo ano kin amápin mi váé iyan mino. <sup>9</sup> Mái té iyan mifo mai fará tiretí ankan oriyare fono. Mana sakhanampa vanta onantasá oriyare fono. Mai fura ino. Téi saretí ankan tiamé uno, mai sakhanampa vanta ano minó sakhanampa vanta esantakhen mino. <sup>10</sup>\* Mai vanta van mi Tiyarafenui vompon dóki ano máa sikharen mino,

“Téi mana vanta siantékun éin an uanten oren  
eni aa mo uväsenten mino.

*Mar 3:1*

<sup>11</sup> Téi fura siré tiretí ankan tiamé uno. Monó non péantán banta Yoni ano minó ma varará ma afoká ukhá ein banta kayo esantakhen mifo inaru yafisimpin ma sitosí ukháiñ nain manon Yonin esantanten mino. <sup>12</sup>\* Monó non péantán banta Yoni ma kama vaya siyan monó non péantiyaré ein táké ma eren ma saréa varunarai ákona mumunan iyain

\* **11:10:** Ruk 1:76    \* **11:12:** Ruk 16:16

\* **11:19:** Mat 9:14

kéká ano inaru yafisimpin ainen orono van iyákan kokhon banta ano Tiyarafenui yafisin namuroí uantiyan mino. <sup>13</sup> Para vara seyo, minó sakhanampa vanta kayoi vaya vá man baya vá ano ma afoká inten ne ma sikháré ein danasinta ano Yonintái me kanaíen mino. <sup>14</sup>\* Tiretí ankan mai van ma mumunan iyanteya mai ma Tiyarafenui vompon dóki ano ma sakhanampa vanta Iraiyan an dakhein banta van ma erinten ne ma sikhá ein mai Yonin nan mi sikharen mino. <sup>15</sup> Átaren ma van nain kayo ano vá inino.

<sup>16</sup> “Ma ma saréa ma vain nanin banta van nái yanákasá tiádante rafuno. Iyampon kayo ano ma átaru varurá kumanten ma ena iyampon kayo máa sen areiníi iyan mino.

<sup>17</sup> “Tetí ankan í dano van okhakhan asékuya ompo saretí ankan ída í de ono. Arunan ná baran í déku ompo saretí ankan ída arunaná mádeya ifí de ono.”

<sup>18</sup> Mai fara vara seyo, Yoni ma eriven maen dunan má uvaini non má auraren ída niyáken minó ano siyáken béimpin namu aunan ban mino siyaren mino. <sup>19</sup>\* Máa siyaréin ma Banta Anin eriven ma yunan má non má nákan maen minó ano sen, ‘Onano, yunan má uvaini non má béis kokhon niyáken béis tákisi varan banta kéká bá ume vanta kayo vái arona ino.’ Máa siyan mifo Tiyarafenui vaya ánaín ma vákuró tifanuna van mi veti afová en pura vayan tiyaren ne sinten mino.”

*Ída Ma Ará Baeran Nain Baru  
Kayo Ano Ma Kákan Uman Baran  
Nain Baya Ino*  
(Ruku 10:13-15)

<sup>20</sup> Manáa varufin Yisasi kokhon enará ukhein danasinta yákó urákan mai varu fintena nanin

\* **11:14:** Mar 4:5; Mat 17:10-13; Mak 9:11-13

banta ano ída ará baeriyaimpin Yisasi mai varu finté nanin banta máq sen asemí.<sup>21</sup> “Korasiníke nanin banta vá Betsaidake nanin banta va soe, sretí kákán uman uron mi varan nono. Mana vanta ano Taiya vá Saidoni vái varufin oriven máan avúavá daná afoká intin baren betí ankan pefái ará baéden koyan buí daná uren dun akhempá kumanten betí ume van arunaná baran nainten mino.<sup>22</sup> Máan tukhái séi sretí ankan tiámé uno. Tiyarafenu ano ma vanasi yaimono van ma aní ukhein damú ma sretimpin afoká inain uman mano Taiya vá Saidoni varu kampin ma afoká ein uman mano esantaren tiretimpin afoká inten mino.<sup>23</sup> Tireti Kapaniamú kéka soe, Tiyarafenu ano sretin avirantí inarufá ódinte fono. Ída ino. Tireti ankan purin nanin bantai varufin námen uron mi aravin nono. Aravin nompo mana vanta ano Sodomú barurá oriven téi ma sretin aúbáná afoká iyaruna yanásinta afoká en baréinti Sodomú baru fara van nainten mino.<sup>24</sup> Máan tukhái séi sretí ankan tiámé uno. Tiyarafenu ano ma vanasi yaimono van ma aní ukhein damú ma sretimpin afoká inain uman mano Sodomu varufin ma afoká ein uman esantaren tiretimpin afoká inten mino.

*Yisasi Ma Ve Afóen Tusu Sianten  
Amúkein Baya Ino*  
(Ruku 10:21-22)

<sup>25</sup> \*Mai damú ana Yisasi máa semí, “Tifóe oe, éi inaru vá bara vái Bafan mi van ná ein amo sé uno. Mai fara vara seyo, kama ineine vá afova vá bain banta kayo ano onan nain nan ma aúposí ukhareya ma iyampon arará kayo an dakhein banta kayo ma aníeona van mi susu sé uno.

\* **11:21:** Ais 23; Isi 26-28; Yoe 3:4-8; Amo 1:9-10; Sek 9:2-4      \* **11:23:** Esé 19:24-28; Ais 14:13-15  
\* **11:24:** Mat 10:15; Ruk 10:12      \* **11:25:** 1Ko 1:26-29      \* **11:27:** Mat 28:18; Yon 1:18; 3:35;  
10:15; 17:2      \* **11:28:** Yer 31:25      \* **11:30:** 1Yn 5:3      \* **12:1:** Diu 23:25      \* **12:2:** Eks 20:10  
\* **12:3:** 1Sa 21:1-6      \* **12:4:** Riv 24:5-9

<sup>26</sup> Pura ino. Tifóe oe, éi ei kama anunu máan dakhafeya máan te ono. Pura.”

<sup>27</sup> \*Máa sen amúkuren banasi siamemí, “Te Sifóe ano inka minó daná ten tiyampin kaen mifo mana vanta ano ída ve Anin afová ukhan be Afóe ano anan afová ukhen mino. Inká ída mana vanta ano ve Afóen afová ukhen mifo ve Anin mano ma ve Afóen aní ono van aní ukhein nanin banta kayo vá be Anin má ano anan afová ukhen mino.

<sup>28</sup> \*“Uman ma variya nan ma avesara iyain kayo ano vá téi varunafá eresí avíkan ameno.<sup>29</sup> Tireti ankan ten pintena ma afova mamareya vá tenti vaya aránaopa sá bano. Mai fara vara seyo, séi sirá kusen barará orin avúavá baran bantan baruna sen pinten nan avíkan baran nono.<sup>30</sup> Mai fara vara seyo, ma vaya ma sretí ankan tiamiyaruna vá inká barano van ma amiayaruna uman má ano seso sikhen mino.

## 12

*Yisasi Ma Veyan Nan Sabatii  
Bafan Muno Sein Baya Ino*  
(Maki 2:23-28; Ruku 6:1-5)

<sup>1</sup> \*Mana Sabati yamú Yisasi má bei eyo iyampon kayo vá uiti yunampin oriyaré íkan bei eyo iyampon kayo arafan puríkan uiti ankáden aú puníden nen mino.<sup>2</sup> \*Niyákan Farasisi kéka ano ódoren Yisasin tiämémí, “Onano Sabati yamú baran nan airo ananí ukhein danái eni eyo iyampon kayo ano variyan mino.”

<sup>3</sup> \*Máa síkan Yisasi evaránen betí ankan tiämémí, “Pefá ma Deviti ma vei kéka bá arafan puríkan ma mantaré ein bayá vompon pintena sretí ídá dankáke fono.

<sup>4</sup> \*Deviti ma Tiyarafenu amápin

un pében ma ven avorá bereti khauren airo ananí uran ban ma monó doran banta kayo ano ana vá nano sikhá ein ma un máden bei kéká bá nein mino. <sup>5</sup>\*Monó doran banta kayo ano Sabati yamú ma monó namumpin doriyá ein mai are ukhein damuí vetí ankan doriyan ída uman bariyaren mifo sireti ankan ídá man bayai vompon dókifin dankáke fono. <sup>6</sup>\*Téi sireti ankan tiamiyá uno. Monó namun ma esantakhein daná ano mafin ban mino. <sup>7</sup>\*Tiyarafenu vompon dóki ano ma sen 'Ena ma arunan uantan nan mi siranakhen mifo íkun ma uan amin nan ída ino,' <sup>Ose 6:6</sup> ma sikhein baya kayoi ana ma sireti ankan afová ukhanteya aau ma ídq vain nanin banta ída namu ví amin nono. <sup>8</sup> Para vara seyo, Sabati yamuká ma yafisin ákona Tiyarafenu ano Banta Anin mi amikhen mino."

*Yisasi Ma Mana Ayan Púkein Banta Ma Sabati Yamú Ayofein Baya Ino*

(Maki 3:1-6; Ruku 6:6-11)

<sup>9</sup> Yisasi mairá me ampiren oren mai varui monó átaru namumpin ódikan <sup>10</sup>\*maifin mana ayan davénakhein banta varé íkan Farasisi kéká ano Yisasini aau ana yosiren kó tiantano van inaemí, "Sabati yamú tetí ankan kanaísá erá aí banta ayofá tifante rafuno."

<sup>11</sup>\*Máa sen ina íkan Yisasi vetin tiameemí, "Tiretin pinté mana vanta ano ma mana sipisipi yesin baren ma Sabati yamú masípin o áadvinti ídá mai finté orun avian kainte fono. <sup>12</sup>Banta anon moéken sipisipi esantakhein pasé Sabati yamú kasaé aya ó tifanté uno."

<sup>13</sup> Máa siren bái mai vanta siameemí, "E ayan darurono," síkan mai vanta ano ve ayan daruriyain má mai ayan evaránen kama

uaren ena ufake ayan má manaíen mino. <sup>14</sup>\*Máan tíkan mai Farasisi kayo ano ódaren e khuven manápá o iyuven Yisasin ma aruan purin nain aa van dosen mino.

*Yisasi Maen Tiyarafenu Ano Aní Ukhein Doran Banta Ino*

<sup>15</sup> Mai ma Farasisi kéká ano véin uman ameno van iyain baya ma Yisasi afová urem mai varu me ampiren oríkan kokhon nanin banta kayo ano véin bákuren oríkan aí ma vain nanin banta minó ayoaan tádein <sup>16</sup>\*beyan nan ída ena siamino van mai nanin banta airo ananí uanten mino. <sup>17</sup> Yisasi ma mai avúavási ein manon sakhanampa vanta Aisaiyan oo ráké uaren ma Tiyarafenu ano siádan baré ein mi kanaíen mino. <sup>18</sup>\*Máan mi sikhan mino,

"Ma senti yoran banta séi ma aní ukheruna ino.

Téi ven nan moéké tinunu iyáku ten tirápin kákán timusin édavíyan mino.

Téi sesi saunan bempin kaékun puntákein avúavá baya varará nanin bantafin tiaminten mino.

<sup>19</sup> Béi ída aran má avádóden baya sen aruven inten mino. Banasifin bái ará kusin má bempáké baya sinten mino.

<sup>20</sup> Banasi ano ma ura an den iyarí ukháiñ nain bái ída iyanten mino.

Inká oon ma yusimono van ein an ma yakháiñ nain nanin banta véi ída funtim-inten mino.

Béi yoren oriyan maen puntákein avúavá mo maman dákó inten mino.

<sup>21</sup> Minó barará nanin banta ano ventá mumunan uven bái ayaino van ave inten mino. <sup>Ais 42:1-4</sup>

\* **12:5:** Nam 28:9-10   \* **12:6:** Mat 12:41-42   \* **12:7:** Mat 9:13   \* **12:10:** Ruk 14:3

\* **12:11:** Ruk 14:5   \* **12:14:** Yon 5:16   \* **12:16:** Mat 8:4; Mak 3:12   \* **12:18:** Mat 3:17

*Yisasi má Beseburi Máí Vaya Ino  
(Maki 3:20-30; Ruku 11:14-23,  
12:10)*

<sup>22</sup> Maí damú mana namu aunan mano fákakhán auu yufúkuvin ída vaya siyain banta aviren Yisasi vaintá eríkañ mai vanta ano oniyan baya siyan ino van Yisasi mai vanta ayofen mino. <sup>23</sup> Máián tíkan minó nanin banta ano sakhaen orera iyáken inaemí, “Ma vanta Devitin Anin ná banten nafino.”\*

<sup>24</sup> \*Mái sen oreraen mifo Farasisi kayo ano ma mai vaya inire betí ankan má semí, “Ma vanta ano minó namu aunan kayoi ánon bantai\* ákonarái namu aunan kayo yo siantiyan mino.”

<sup>25</sup> Mái siyákan Yisasi vetí ankaní ineinefin afová uren betín tiamemí, “Mana vara ano ma aúban aií uren maná páké kábintin ena fáké kábintin uven ma aruvinten maen mai vara namu inten mino. Inká mana varu finté safi mana má pinte safi ma aúban daíden aruvinten maen mai varu fi mai má safi ída ákonáen banten mino. <sup>26</sup> Máián tukhantin Ban Anon mano ma e mantaaren Ban Anon ma yo siantanten maen mai veyan mi aúban daiminten mifo inté uren ná beni yafisin ákona ano fara vantén nafino. <sup>27</sup> Inká namu aunan kayoi ánon bantai ákonará ma namu aunan kayo yo siantiyákuun maen mai iye anó tiretíi kéká ákona amin ná namu aunan kayo yo siantiyan nafino. Máián tukhantin tiretíi kéká anón tireti ma seona vayará aní iyan tiren nan ída funtáká ono sinten mino. <sup>28</sup> \*Máián tukhen mifo séin ma Tiyarafenui Aunan mano siyaintí ma namu aunan do siantiyáku maeya mai sireti ankan afová inono, Tiyarafenui yafisin ákona fefái siretimpin e van mino.

<sup>29</sup> “Inká intesá uren ná mana ákona vanta amápin mana vanta ano un pében ná beni ona varanten nafino. Mai ákona vantai ona ma varano sinten maen ákona anan póké nare véin damuádaren mi ven amá pintena yanasa minó baranten mino.

<sup>30</sup> \*“Téin ma namuroí usintiyain nanin banta mai ída sen tirona ino. Inká téin ma ída siyaen banasi avión áturu iyain mai nanin banta anon banasi intanin orera iyan mino. <sup>31</sup> \*Máián tukhái séi sireti ankan tiamiyá uno. Minó ume vá oyampá baya ma sinona vá Ti-yarafenu ano ampiantanten mifo Kantá Aunan nan ma oyampá baya sinona mai ume Tiyarafenu ano ída kanaén ampiantanten mino.

<sup>32</sup> Mana nanin banta ano ma Banta Anin ma oyampá baya sinona ume Tiyarafenu ano ampiantanten mifo Kantá Aunan ma oyampá baya sinona ume saréa fi ínaimpa safi Tiyarafenu ano ída uron mi ampiantanten mino.

*Daa Aran Ma Iran Naintá Ma  
Mai Yaa Oman Afová In Baya Ino  
(Ruku 6:43-45)*

<sup>33</sup> \*“Máián tinten mifo kama yafisirí ma inona yaa ana anon kama aran imádantin inká namu yafisirí ma inona yaa ana anon namu aran imádantén mino. Para vara seyo, inté ukhein daa aná ban nafi mai veni aran ma imádan naintái afová inono. <sup>34</sup> \*Tireti ankan namu osafae akhafana ompo, inté uákeyá namu avúavá ma aúpin bain kéká ano kama vaya sen novara fono. Aúpin ma vain avúavá máán oofente kuvé iyan mino. <sup>35</sup> Kama vanta arápin ma kokhon kama ineine kayo víkakhán ma vain manon kama

\* **12:23:** Tiyarafenu ano ma aní ukhein banta Devitin anan pintéi afoká inten mino ma sikhá ein nan Yutan kayo ano mumunan ukharen mino. \* **12:24:** Mat 9:34; 10:25 \* **12:24:** Kiriki vaya finté mai vanta aví Beseburi ne siyan mino. Matiu 12:27 dere manaí ukhen mino.

\* **12:28:** Apo 10:38; 1Yn 3:8 \* **12:30:** Mak 9:40; Ruk 9:50 \* **12:31:** Ibu 6:4-6 \* **12:33:** Mat 7:16-20 \* **12:34:** Mat 3:7; 15:18; Ruk 3:7; 6:45

avúavá baré iyan mifo inká namu vanta arápín ma kokhon namu ineine kayo víkakhán ma vain manon namu avúavá baré iyan mino.<sup>36</sup> Máo tukhái sireti ankan tiámé uno. Tiyarafenu ano ma vanasi yaimin nain damúi vanasi ano ma ída funtákein baya ma siyáin nain tian dákó inten mino.<sup>37</sup> Para vara seyo, Tiyarafenu ano eni vaya kaylorá anan kama vaya siyare ono sen inká ída funtákein baya siyare ono sen daiminten mino.”

*Yonan Amaniná Ma Afoká Ukhá  
Ein Nan Ma Yisasi Sein Baya Ino  
(Maki 8:11-12; Ruku 11:29-32)*

<sup>38</sup> \*Máa sirákan manáa man baya ma afová ukhein banta kayo vá Farasisi kéká bá ano máa sen Yisasin tiámemí, “Aru soe, setí ankan ma éin nan Tiyarafenu yorará iyan mino sen ma inino sinte mae éi mana enará ukhein daná aníesirá oná tifano.”

<sup>39</sup> \*Máa síkan Yisasi vetí ankan evaránen tiámemí, “Táreá ma vain mai namu avúavá baran nanin banta vá Tiyarafenurá ída ákonqen monó tin nanin banta vá báken ena ena yamú betí aní dana san manan ina iyan mifo vetí ankan ída kanaén mana aní daná onanten mino. Sakhanampa vanta Yona ma aní ukhein mai aní daná anan betí onanten mino.

<sup>40</sup> \*Para vara seyo, Yona ma kanú manaú bayan má inuran má ma kákán noyana arápín ma varé einii en Banta Anin mano kanú manaú bayan má inuran má bara aúpin banten mino.

<sup>41</sup> \*Máo tinten mifo Tiyarafenu ano ma vanasi yaimin nain damú Ninivéke vanta kayo ano mairá e mantaven maen ma ma saréa vain nanin bantai namu avúavá tian afoká inten mino. Para vara seyo, Yona ma mo vaya sin maen minó Ninivéke

nanin banta ano vaya iníden ará baeren mifo saretin aúbanápín mana Yonan esantakhein daná ano e vakaya ída ará baeriya ono.

<sup>42</sup> \*Tiyarafenu ano ma vanasi yaimin nain damú mana sautíke Kuinin mano mairá e mantaven maen ma ma saréa vain nanin bantai namu avúavá tian afoká inten mino. Mai farava ino mai Kuini ano vara akhempa suron mi varen Soromonini kama afova vaya ineno van erein mifo mana Soromoñin esantakhein daná ano e van mino.

*Namu Aunan Kayo Ano Ma  
Evaránen Banta Aúpin Oriyain  
Baya Ino  
(Ruku 11:24-26)*

<sup>43</sup> “Namu aunan mano ma mana vanta me ampiren ma vanta i van kámá barafá nóken bei avíkan baru van dosintin ma ída mana kama afokhan bantin maen,<sup>44</sup> béis máa sinten mino, ‘Téi ma fefá báeruna namumpin evaránen oronté uno,’ siren o onantin maen mai namumpin ída mana yaná bantin mai namun bakhari ureñ auí uádantin banten mino.

<sup>45</sup> \*Máo tukhantin maen béis evaránen oren dan manápá ifo afápá kan un kádon namu uron ukhein namu aunan o avíaren mai namumpin o vantin maen mai vanta ano fefá ma namu avúavá ma variyá ein esantaren moéken namu uró inten mino. Mai ma einí ukhein avúavá anan taréa ma vaona nanin bantafin afoká inten mino.”

*Yisasin Anóen má Be Afá Kayo  
Vái Vaya Ino*

<sup>46</sup> Yisasi ma mai nanin bantafin para vaya siyan bákan maen be anóen má afá kayo vá ano véin má baya seno van barurá e mantakhen ave ukharen mino.

<sup>47</sup> Ave ukhan mana vanta ano Yisasin mun tiámemí, “E anóen má e afá

\* 12:38: Mat 16:1; Ruk 11:16; Yon 6:30 \* 12:39: Mat 16:4; Mak 8:12 \* 12:40: Yna 1:17

\* 12:41: Yna 3:5 \* 12:42: 1Ki 10:1-10 \* 12:45: 2Pi 2:20 \* 12:47: Manáa vompon dókifin ída ma vesi (12:47) van mino.

kayo vá ano en má baya seno van barurá e ave ukhen mino.”\*

<sup>48</sup> Máq síkan Yisasi evaránen mai vanta siamemí, “Iye anó te sinóe van ná inká inte kékgsá ten tifá tiváeyan ban nafino.” <sup>49</sup> Mái siren bei eyo iyampon kayo aníen eúkiyan temí, “Onano. Ma se sinóen má te sifá tiváeyan máí van mino. <sup>50</sup>\* Para vara seyo, inarufá ma vain Tifóení anunu ánaín ma yakhifiyain mai nanin banta anon ten tifá tiváe, siyofi, sinóe van mino.”

## 13

*Danayun Ma Fafasin Bantará  
Ma Ovaéádein Baya Ino  
(Maki 4:1-9; Ruku 8:4-8)*

<sup>1</sup> Maí damú ana Yisasi má pinté ekhuven non akharun akhempá o khumanen mino. <sup>2</sup>\* Kumantaré íkan kokhon nanin banta ano véi vaintá e iyyaimpin béis e manten botifin un kumamin banasi ano eyurá manten mino. <sup>3</sup> Mantakhan Yisasi kokhon baya o vaédiyan betin tiameemí, “Ineno. Mana vanta ano yunan barafin danayun mo fafaseno van oren mino. <sup>4</sup> Mo fafasen oriyákan maen manáá aasá eravíkan nun kayo ano e aíden nen mino, <sup>5</sup> Inká manáá yanayun on daró eravuaren bara asamana ukhan ainen e ampamen mino. <sup>6</sup> Ampamen mifo vara ída amákó ukhan amun ída kain námen aravukharéin á kan maen mai yanayun kfuren puren mino. <sup>7</sup> Inká manáá yanayun ayankun namampin eravukharen e ampamíkan ayankun naman mano úkuon dararen mino. <sup>8</sup> Inká manáá yanayun mano kama varafin eravukharen e ampamaren aran iren mino. Manáá ano mana antareti (100) iran manáá ano sikhisti (60) iran manáá ano teti (30) iran en mino. <sup>9</sup> Átaren ma van nain kayo vá inino.”

\* 12:50: Rom 8:29 \* 13:2: Ruk 5:1-3 \*

\* 13:14: Yon 12:40; Apo 28:26-27 \* 13:16: Ruk 10:23-24

*Yisasi Ma Ovaeran Baya Fákena  
Ma Sian Amá Ein Baya Ino  
(Maki 4:10-12; Ruku 8:9-10)*

<sup>10</sup> Ínaimpáke bei eyo iyampon kayo ano Yisasi vaintá eriven máa sen inaemí, “Pará éi vaya ovaédiya banasi siamiya fono.”

<sup>11</sup> Máq síkan Yisasi evaránen betí ankan tiameemí, “Inaru yafisin pintenai aúpá baya ana ma afováin Tiyarafenu ano inka siren amikhen mifo vetí ankan ída amikhen mino. <sup>12</sup>\* Tiyarafenu vaya iniren ma kamaen dafisin nain nanin bantai Tiyarafenu ano moékan afova aminten mifo ída ma kamaen dafisin nain nanin banta fintena gefá ma mantain nain afova vá inan do varanten mino. <sup>13</sup> Ma anarái ovaéde ana vaya siyá uno:

“Auu ano oniyan mifo vetí ankan ída mana yaná onanten mino.

Átarempó iniyan mifo vetí ankan ída vaya iniren afova inten mino.

<sup>14</sup> \*Mai ma nanin banta ano sakhanampa vanta Aisaiyani vayan pura sen afoká iyan mino. Béi máa sikharen mino,

“Tireti ankan kokhon dádá baya inin nompo ída mai vayai ana afová inono.

Tireti ankan kokhon dádá onan nompo ída kanaíeya mana yaná oman afová inono.

<sup>15</sup> Para vara seyo, mai nanin bantai aú ona inka munkin átaren konin maen baya ída inen amúkuven oriyán mifo auu máben onen átarempó baya inen inká áukaké afová uren aú baeren baré intí kasaé betin ayofanté eruna ren mino.’ *Ais 6:9-10*

<sup>16</sup> \*Máon tukhen mifo siren auu ano ma kasaen minó daná onan

ma átaren mano ma vaya iniyain nará tiretí ankan amusin ná ono.<sup>17</sup> Téi fura siré tiretí ankan tiamé uno. Pefá sakhanampa vanta kayo vá puntákein banta kayo vá ano ma ma saréa oniyaona yanásinta onano van iyaren mifo vetí ída ontaren mino. Inká ma ma saréa ma siretí ankan ma iniyaona vaya kayo ineno van ukharen mifo vetí ankan ída inikharen mino.

*Danayun Pafasí Pákenai  
Ovaeran Baya Ma Sian Amá Ein  
Baya Ino*

(Maki 4:13-20; Ruku 8:11-15)

<sup>18</sup> “Banta ano ma yunan barafin ma yanayun pafasintá ma sian baereruna vayai ana vá ineno.

<sup>19</sup> Banasi ano ma inaru yafisini kama vaya ma iniren ma ída mai vayai ana ma afová iyain mai yanayun ma aasá eraveinii íkan mi Ban Anon mano eriven Ti-yarafenui kama vaya ma aúká pafasirein ainen do varé iyan mino.

<sup>20</sup> “On daró ma vain barafin ma eravein danayun kayo mai vanasi ano ma vaya iniren ma mai vaya ainen mamaren ma amusin einii ukhen mino.

<sup>21</sup> Máián tukhan maen ídq arú kain orera uvin amun dan námen aravukharéin mi Tiyarafenui vayará ma ara ara uman ma erin maen ainen eraven ankamé iyan mino.

<sup>22</sup> \*Ayankun namampin ma eravein danayun kayo mai vanasi ano ma vaya iniren ma vara ráke yanásinta vá inká moni san ma in mai avúgvá danasinta yá anon Tiyarafenui vaya yaramádan ída aran iré iyan mino.

<sup>23</sup> Máián té iyan mifo kama varafin ma eravein danayun kayo mai vanasi ano ma vaya iniren mai vayai ana ma afová iyain manon mai mana antaretí (100) aran imádan inká manáa ano sikhisti (60) aran imádan inká manáa ano teti (30) aran imádan é iyan mino.”

\* 13:22: Ruk 12:16-21; 1Ti 6:9-10, 17

*Namu Kátará Ma Ovaéádan  
Baya Ino*

<sup>24</sup> Yisasi ena vaya máa sen betí ankan tian baéan amen mino. “Inaru yafisin mai máan mi ukhen mino. Mana vanta ano kama uviti ayun bei yunan barafin doren mino.

<sup>25</sup> Dóden e vakhan maen beni namuro ano inuran eriven namu káta ayun me mai vanta ano ma uviti yódampin pafasiren oren mino.

<sup>26</sup> Orikharé íkan uviti e ampamíkan maen inká mai namu káta vá deren e ampamen mino.

<sup>27</sup> “Ampantá íkan doran banta kayo ano eriven dunan afóen máa sen tiamemí, ‘Kákán banta oe, éi kama uviti ayun mi ei yunan barafin pafaseona ifo inté eípasá namu káta maifin pótikhen nafino.’

<sup>28</sup> “Máa síkan béisvetí ankan tiamemí, ‘Mana namuro anon mai avúqvási ukhen mino.’

“Máa síkan doran banta kayo ano véin inaemí, ‘Tetí ankan nan mai namu káta kayo oman daruren manará átaru ino vará anunu iya fono.’

<sup>29</sup> “Máa síkan béisvetin tiamemí, ‘Ída ino. Namu káta yariyá inonafá uviti vá dere yari nona van muno.

<sup>30</sup> Míkanan ma áesin manafin pótikharé intin ma yunan duyasin damusí ma inain mai anon kama ukhen mino. Pótikharé intin ma yuyasin damusí ma intí maé mai yorarí ma inain banta kayo séi máa sé tiamenté uno, Namu káta kayo nare vá ira saran átaru ure ana yamuádare vá inká uviti átaru ure vá tenti yunan kain namumpin bare mo khaono.”

*Mastati Arantá Ma Ovaéádan  
Baya Ino*

(Maki 4:30-32; Ruku 13:18-19)

<sup>31</sup> Yisasi ena ovaeran baya máa sen betí ankan tiamemí, “Mastati e sin daa aran ma einii inaru yafisin mano ukhen mino. Mana vanta ano mastati aran máden bei yunan barafin doren mino.

<sup>32</sup> Mastati aú

maen ída ena yunan aú kayo an den kákání ukhen mifo sitó aúí vaé iyan mino. Dunan bara finté ma véri e fotiaren maen minó dunan ana esantaren dan mi ódivin nun kayo ano mai yaa ayantá e yomané iyan mino.”

*Yisirá Ma Ovaéádan Baya Ino  
(Ruku 13:20-21)*

<sup>33</sup> Mápá siren Yisasi evaránen ena vaya ovaéden betí ankan tiámemí, “Inaru yafisin mai yisi an mi yakhen mino. Mana nanin mano ma yisi máden kokhon paravampin kakhufaren upí uran ma ínaiimpáké mai faravan mano kákantá pamiyainíí ukhen mino.”

*Yisasi Ma Ovaeran Baya Kayo  
Fóké Ana Vanasi Siamein Baya Ino  
(Maki 4:33-34)*

<sup>34</sup> Minó bayá ma Yisasi ano vanasi siamiyaré ein maen mai ovaédiyán manan tiámiyan mifo véri ída mana vaya funtáden tiámiyaren mino. <sup>35</sup> Mai avúavasí ma ein mai gefá mana sakhanampa vanta oo ráké uaren máa sikharen mino,

“Téi vaya ovaédiyá anan tiretin tiamenté uno.

Pefa suron ma ma vara afoká ein táké ma eriyan baren ma ma sare vaonará ma aúpá baré ein bayá máon téi senté uno,” ma sikhare éin mi fura sen afoká en mino. *Ibo* 78:2

*Namu Kátai Ovaeran Baya Ma  
Yisasi Sian Amá Ein Baya Ino*

<sup>36</sup> Mairá Yisasi vanasi me ampiren mápin orivíkan beni eyo iyampon kayo ano véri vaintá onóben temí, “Kaná éi mai namu kátá ma yunampin ampantá eini ana setin tisimesí inétifante rafuno.”

<sup>37</sup> Mápá síkán Yisasi evaránen betí ankan tiámemí, “Kama uviti ayun ma yorein banta maen mai Banta Anin mino. <sup>38</sup> Dunan bara

maen mai ma vara ino. Inká kama uviti ayun maen mai inaru yafisin pintena nanin banta ino. Namu kátá maen mai Ban Anoni vanasi ino. <sup>39</sup> Mai ma namu kátá ayun ma fasifiyain namuro maen mai Ban Anon mino. Dunan ma yuyasin damú maen mai ma vara ma kípan nain damú ino. Inká dunan duyasin banta kayo maen mai enisori kayo ino.

<sup>40</sup> \*“Banta kayo ano ma namu kátá átaru ureñ ma irafin taman kaureiníí ma vara ma kípan nain damú inten mino. <sup>41</sup> \*Banta Anin mano vei enisori kayo siantantin maen beni inaru yafisin pintena umeí ino van ma vanasi akhenóka iyá ein danasinta vá namu avúavá ma variyá ein nanin banta vá do siantanten mino. <sup>42</sup> \*Do siantáden maen mai kéká kákán irafin karúdantin o váken kákantá berai siyan aveantuntá inkekí piyan banten mino. <sup>43</sup> \*Máan tiyantin maen puntákein nanin banta ano áau ma kheiníí vetí Afóeni yafisimpin inten mino. Átaren ma van nain kayo ano vá inino.”

*Aúpá Ma Kama Ona Vain Má  
Ankaroro Vasan Ma Sian Baéádan  
Baya Ino*

<sup>44</sup> Yisasi evaránen máa semí, “Mana varafin kokhon kori aúpá baré íkan ma mana vanta ano oneiníí inaru yafisin ukhen mino. Ódaren kákán amusin ureñ ainen evaránen orein mano vei minó danasinta mo sarí ureñ moní mamaren mai vara e miyanien mino.”

<sup>45</sup> Yisasi evaránen máa semí, “Ona kokhon bain banta ano ma kama ankaroro kayo van ma yosiayainíí inaru yafisin ukhen mino. <sup>46</sup> Dosen noren ma mana kama uron ukhein ankaroro vain ma o ódaren maen bei minó ona mo sarí ureñ moní mamaren mai ankaroro o miyanien mino.”

\* **13:40:** Yon 15:6    \* **13:41:** Mat 24:31; 25:31; Mak 13:27    \* **13:42:** Mat 8:12    \* **13:43:** Dan 12:3

*Noyana Arin Base Unantá Ma  
Sian Baéádan Baya Ino*

<sup>47</sup> Máp siren Yisasi ena ovaeran baya semí, “Base unan ma non akharumpin karúdan aravuvín ma ara ara noyana ma fákiyainíi inaru yafisin ukhen mino. <sup>48</sup> Mai vase unan ma karúdarán noyana kayo víkavin maen noyana arin banta kayo ano orun darifaan akhempá kaúden ma kumanten kama noyana máa aían unan kayofin kauren namu noyana kayo karúdé iyan mino. <sup>49</sup> Ínaímpá ma vara ma kípan nain damú máon manan inten mino. Enisori kayo ano eriven maen kama nanin bantafin ma namu nanin banta kayo ma vain do airanten mino. <sup>50</sup> \*Do aíden maen karúdantin kákán ira kiyaímpin o váken kákantá berai siyan aveantuntá inkékí piyan banten mino.”

<sup>51</sup> Máp siren Yisasi vei eyo iyampon kayo inaemí, “Ma ma ovaeran baya kayo ma siamerunai ana inká afová e rafono,” síkan betí ankan “eyo” sen mino.

<sup>52</sup> Máp síkan béisí vetí ankan tiameemí, “Máan tukhan mi man baya ma afová ukhein banta kayo ano ma inaru yafisin pintena vaya ma afova amiayán kéká ano kákán namun afóen an mi yakhen ona kain karafarampin un pében maen auyen afova vá peyante afova vá ma kama ukhein baren eré iyan mino.”

*Nasaretí Nanin Banta Ano Ma  
Yisasin Oyan Amein Baya Ino  
(Maki 6:1-6; Ruku 4:16-30)*

<sup>53</sup> Yisasi ma mai vaya kayo ovaédiyán tiámiden maen mai varu me ampiren <sup>54</sup> \*bei varu anará oren mino. Oriven betíi monó átaru namumpin ódiven araén Tiyarafenui vaya vanasi siamiyákan beni vaya iniren

takhaen oreraen temí, “Ma vanta ano ma afova vá enará ukhein daná ákoná ma maman afokáin má inte fáken ná mantan nafino. <sup>55</sup> \*Béi mana má uvoran banta anin mi vá tetí afová ukhé uno. Be anóe Marian bákán inká be afá kéká Yemisi, Yosepi, Saimoni, Yudasi siren mino. <sup>56</sup> Inká minó ben ayofin nái setin má bain mifo inte fákená béisí mai ákoná mantan nafino siren takhaiyan kokhon ineine en mino.” <sup>57</sup> \*Máp siren béisí ará namu uantiyan maen Yisasi vetí ankan tiameemí, “Sakhanampa vanta aví minó barufá ban mifo yeni varu anará bá ben amápin má ída ven aví ban mino.”

<sup>58</sup> Máp siren béisí ída munuman iyaimpin mai varurá ída kokhon enará ukhein daná afoká en mino.

## 14

*Yonin Anuran Ma Síkein Baya Ino*

*(Maki 6:14-29; Ruku 3:19-20, 9:7-9)*

<sup>1</sup> Maí damú kámanini ánon banta Eroti ano\* Yisasi ma yoriyain avúavá baya kayo inen mino. <sup>2</sup> Iniren bei yoran banta kayo máa sen tiameemí, “Monó non péantán banta Yonin purin pinté e mantakhan mai van mi enará ukhein ákoná yaná anon béisí doríyan mino.”

<sup>3-4</sup> \*Pefá Eroti ano ve afá Firipin aná Erodiasin mamaran ma Yoni ano Eroton nan ten ma éi Tiyarafenui man bayan durafure mai nanin bare ono ma sein nan mi Yonin pákoren ayan nan kuan karavusifin kaen mino. <sup>5</sup> \*Eroti ano Yonin aruan purono van ukharen mifo mai véi mana sakhanampa vanta ino sen banasi ano afová ukhan mai van mi vetí nan periyaren mino.

\* 13:50: Mat 13:42; Ruk 13:28    \* 13:54: Yon 7:15    \* 13:55: Yon 6:42    \* 13:57: Yon 4:44

\* 14:1: Ma Eroti maen Yisasin ma araraká ma arono van ein Eroton anin mino.    \* 14:3-4:

Riv 18:16; 20:21; Ruk 3:19-20    \* 14:5: Mat 21:26

<sup>6</sup> Máan tiyá íkan Erotin ma ve anóe khaein damú afoká íkan kákan dunan táden niyan iyukhein aúbaná Erodiasin arauun mano mo yanisií íkan Eroti kákan amusin uaren <sup>7</sup> béis e mantén mai arinta máa sen iyáan ten temí, “Ódino fura sé uno éi nái yanasará inantinte fono séi fara amenté uno.” <sup>8</sup> Máa síkan be anóe Erodiasi ano véin ákona ineine amirákan mai arinta ano mo Erotin inaemí, “Monó non péantan banta Yonin ánon tíkaan mana yókifin kaúdeya vare me simeno.” <sup>9</sup> Máa síkan Kin mano mai vaya iníkan ben ará uman den mifo minó banta ma ven má kumanten dunan niyan ma mai kayo avorá ma fura ódino siren ma iyáantákaré ein nan ayave varana e siren bei aruvín banta kayo van mai arinta ano ma seiní ono sen mino. <sup>10</sup> Máa siren mana aruvín banta siantan karavusifin oren mo síkan Yonin amen tíken mino. <sup>11</sup> Tíkaren mana yókifin ben ánon kauren mai arinta mo amíkan baren be anóen mo amen mino. <sup>12</sup> Máan turákan Yonini eyo iyampon kayo ano ven au e yaiyen mo masí uren Yisasin mo siamen mino.

*Yisasi Ma Yan Manápá Tauseni  
(5,000) Vanta Yunan Amein Baya  
Ino*

*(Maki 6:31-44; Ruku 9:10-17;  
Yoni 6:1-13)*

<sup>13</sup> Yonin ma aruan purin bayá Yisasi iníden mai varu me ampiren aúpáké botifin ódiven banta ída van kámá barafá bei eyo iyampon kayo vá ana orivin maen minó nanin banta ano mai ma Yisasi orikheipá afová en inire betí varu me ampiriyán barará maifá ana ore ore en mino. <sup>14</sup> Yisasin ma voti ano mo kaúdan maen béis onákán kokhon nanin banta kayo iyukheimpin betin nan arunan uren betí aí kayo ayofaanten mino.

<sup>15</sup> Máan ten oriyákan inúpasí in eyo iyampon kayo ano Yisasi vaintá eriven máa sen tiameimí, “Ma vanta ída van kámá barafáí vá íkan inka yunirien mifo vanasi siantesin ádé ma vain baru kayo fimpá oriven ná betiyan dunan miyaní ino.”

<sup>16</sup> Máa síkan Yisasi evaránen bei eyo iyampon kayo siameimí, “Betí ankan áesin bantiya sretí ano vá betin dunan amesin ná nano.”

<sup>17</sup> Máa síkan béis ankan evaránen béis tiameimí, “Tetí ankan dan manápá bereti vá kankanan noyana vá anan dáké tiféuno.”

<sup>18</sup> Máa síkan béis semí, “Mai vereti kayo vá noyana vá bare mará me simeno.” <sup>19</sup>\*Máa siren banasi van káta yaró kumaneno síkan kumamin béis mai yan manápá bereti vá noyaná kanan má mamaren inarufá kakháben Tiyrafenu susu siantáden kisiren bei eyo iyampon kayo amíkan máden banasi amen oreraen mino. <sup>20</sup> Banasi ano mai vereti kayo vá noyana kayo vá nákan amú kuriyaimpin bei eyo iyampon kayo ano antan o éke e éke uren tiyan míkan mifo sirantan kan orun kádan (12) unan bíken mino. <sup>21</sup> Anasi iyampon ída yankafein mifo vanta máa ma yankafein mai yan manápá tauseni (5,000) anon nen mino.

*Yisasi Ma Non Daró Orein Baya  
Ino*

*(Maki 6:45-52; Yoni 6:16-21)*

<sup>22</sup> Mai oyampáké ana Yisasi vei eyo iyampon kayo nare síkan botifin un kumamen betí ankan non e kháden ena ufá oriyákan béis fara váken banasi siantan oreraen mino. <sup>23</sup>\*Tiantan ma orera uvíkan maen béis amúkono van beyaká anufá óden un bákan inuráien mino. <sup>24</sup> Bei eyo iyampon kayo ma orein botí ano nenta suron orivin maen auu fáké kákán uva uaren

\* **14:19:** Mat 15:35-39; Mak 8:6-10    \* **14:23:** Ruk 6:12; 9:28

non karantó en mai voti e máden dómeron en mino.

<sup>25</sup> Máan ten oriyan kakhano van iyákan Yisasi vetí ankan baípá non akharun daró oren mino. <sup>26</sup> \*Bei eyo iyampon kayo ano Yisasin onákan non daró ma orin maen ban mi eriyan mino siren akhokho van báden oreraen mino.

<sup>27</sup> Báden orera iyain má Yisasi ainen betí ankan tiämémi, “Téi umpo sretí ankan ída vá akhokho van iyáke ará kuse vá bano.”

<sup>28</sup> Máa síkan Pita evaránen bén tiämémi, “Bafan noe, éi ma vanteya mai séin tesirá non daró éi vaonafá orono.”

<sup>29</sup> Máa síkan Yisasi semí, “Ereno.” Siyain má Pita voti finté erafuvén Yisasin kakháaren non daró oren mino. <sup>30</sup> Oriyan onákan uva ano ákonäen non karantó eimpin akhokho van iyáken araíen nompin orun periyan oovaren temí, “Bafan noe, siya ono.”

<sup>31</sup> \*Máa siyain má ana Yisasi ayan dan orin Pitán pákaaren máa sen tiämémi, “Tító mumunan má baona vanta oe! Pará éi ída munan e fono.”

<sup>32</sup> Máa siren míkan ma votifin un kumaniyain má uva kípen mino.

<sup>33</sup> Kípiyain má mai ma votifin kumanteré ein kéká ano Yisasin aví danien temí, “Pura uron tireya éi Tiyarafenun Anin mono.”

*Yisasi Ma Kenesaretíke Kokhon Nanin Banta Ayofein Baya Ino*

(Maki 6:53-56)

<sup>34</sup> Máa siren Yisasin má bei eyo iyampon kayo vá non e kháden oriaren maen Kenesaretí akhempá óden mino. <sup>35</sup> Ódiyain má mai akhen páke vanta kayo ano Yisasin afová en óden baya yan orera íkan minó baru fáke nanin banta ano aí kéká aviren bái vaintá eren mino. <sup>36</sup>\*Eriven maen Yisasin ínanen inaemí, “Áesin aí kayo ano eni au anamun áton mana aruvino,” siran beni au

anamun áton ma aruvein kayo ano asefaen oreraen mino.

## 15

*Banasi Ma Maman Avusese  
Iyain Danasinta Fákena Van Ma  
Yisasi Siamein Baya Ino*

(Maki 7:1-13)

<sup>1</sup> Mairá Yerusaremíké manáá Farasisi kéká bá man baya ma afová ukhein banta kayo vá ano Yisasi vaintá eriven máa sen béin inaemí, <sup>2</sup> “Pará eni eyo iyampon kayo ano sinafu siráoni avúavá durafuren ná dunan ma nanovan ayan nare ída sesé iyan nafino.”

<sup>3</sup> Máa síkan Yisasi vetí ankan evaránen tiämémi, “Mai fará tiretí ankan anafu aráoni avúavá ánaín mana vákuriyá Tiyarafenui man baya yurafuriya rafono. <sup>4</sup> Para vara seyo, Tiyarafenui vompon dókifin máa sikhen mino, ‘Anóe afóeni aránaopa sá ore vá betin oo vá daiyono.’ Eks 20:12; Diu 5:16 Inká ‘Be anóe afóen ma ankayantin nain mano vá purino.’ Eks 21:17; Riv 20:9

<sup>5</sup> Máa sikhen mifo inká tiretí ankan máa seja vanasi afova améiyá ono, Banta ano ma ve anóe afóen ma moní ameno van inain mano kasaen Tiyarafenun amiren maen be anoifon máa sen tiamenti mino. En ma ameno seruna moní Tiyarafenun mi amé uno. <sup>6</sup> Máan ma iyain mai avúavá anon e anóe afóen oo vá daiyono sen Tiyarafenu ano ma sikhein bayan durafúdeya sretí anafu aráoni avúavá ánaín manan bákuriyá ono. <sup>7</sup> Tiretí ankan Tiyarafenui vaya ana sireya ída mai ángin dakhafin banta kéká ompo sakhanampa vanta Aisaiya ano sretí ankaní avúavá san ma siádan baré ein mai fura uron mi sikharen mino.

<sup>8</sup> “Ma nanin banta kayo ano oo máa fókéi sen tiví daní iyan

\* 14:26: Ruk 24:37

\* 14:31: Mat 8:26; Mak 4:39

\* 14:36: Mat 9:20-21

mifo vetí ankaní ará bá ineine  
vá ano nenta suron mi van  
mino.

<sup>9</sup> Betí ankan dan bukhafafói séin  
monó tisintiyáken  
barará bantai ineine máa  
fói vanasi afova amiyan  
mino.” <sup>Ais 29:13</sup>

*Banasi Ma Maman Painí Íyái  
Pákéna Van Ma Yisasi Sein Baya Ino  
(Maki 7:14-23)*

<sup>10</sup> Yisasi vanasi aran béis vaintá  
erikan máa sen betin tiameemí,  
“Kamae inire vá ovare me ineno.

<sup>11</sup> \*Nái yaná anó banta oofen  
ódiaren ná áupin aravé iyan nafi  
mai ano ída véin maman painié  
iyan mifo nái yaná anó aú pinté  
édaaren ná oo fenté kuvé iyan nafi  
mai anon béis maman painié iyan  
mino.”

<sup>12</sup> Ínaimpáké eyo iyampon kayo  
ano Yisasi vaintá eriven béis  
máa sen inaemí, “Eí afová ukhen  
nan ná Farasisi kéká ano ma ma  
vaya kayo iniren aran dosé iyan  
nafino.”

<sup>13</sup> Máa síkan Yisasi evaránen  
tiameemí, “Inarufá bain Tifóe ano  
ma ída yókaré inain dunan mai  
veyantái minó arú bá darinten  
mino.” <sup>14</sup>\*Auu yufukhein banta  
kayo ano ma auu yufukhein  
banta ma aa aníen orínten maen  
minó ano masípin o ádinten mino.  
Betí ankan auu yufukhein kékáí  
váken auu yufukhein kayo aa aní  
ono van mifo vetin mo ampeno.

<sup>15</sup> Máa síkan Pita semí, “Mai ma  
ovaeran baya ma seona vaya ana  
setin tisimesí ineno.

<sup>16</sup> Yisasi evaránen betin inaemí,  
“Ma ma ovaéadán baya ana saretin  
má dere ída afová iya vae. <sup>17</sup> Minó  
daná oofen ma naáden nan arápin  
aravuaren mi masípin esanten oré  
iyan mifo saretí ankan ída mai  
yaná afová ukhe fono. <sup>18</sup> Máa  
tukhen mifo vanta oo fenté ma

kuvé iyain mai anon aú bá in  
eine vá pinte édiyan pasen mi  
vanta maman painí é iyan mino.

<sup>19</sup> Banta aú pinte namu ineine  
kayo vá banta aruan purin má  
ena ana safi avafun nafi ma varen  
non avúavá bá pamúku avúavá  
bá umoyan avúavá bá kópin ma  
kampun tin má inká ena nanin  
banta ma namu vaya sen asiyain  
mái khuvé iyan mino. <sup>20</sup> Minó  
mai avúavá sintá anon Tiyarafenu  
avorá banta maman painí é iyan  
mifo ayan ída seséin ma yunan  
pákoren niyain mai ano va vanta  
fainí é iyan naino. Ída ino.”

*Ena Anan Pinte Nanin Mano Ma  
Yisasantá Mumunan Ein Baya Ino  
(Maki 7:24-30)*

<sup>21</sup> Yisasi mai varu me ampiren  
Taiya vá Saidoni vái varafá  
oren mino. <sup>22</sup> Oríkan mana  
Kenaníi anan pinte nanin maifá  
bain baré íkan béis Yisasi vaintá  
eriven oo vararen temí, “Bafan,  
Devitin Anin noe, se siraun namu  
aunan mano fákakhan kákán berai  
siyan bá umpo sen nan arunan  
usintano.”

<sup>23</sup> Máa síkan Yisasi ída evaránen  
mana vaya siyaimpin bei eyo  
iyampon kayo ano véi vaintá  
eriven béis ákonáen tiameemí,  
“Ma nanin mano ínánen oovaren  
eriyan ban mifo siantan orino.”

<sup>24</sup>\*Máa síkan béis evaránen mai  
nanin tiameemí, “Isarerí kékáí  
sipisipi kayo ma afeyokein nan  
manan Tiyarafenu ano séin tisintá  
erikhé uno.”

<sup>25</sup> Máa siyain má mai nanin  
mano Yisasiní ádé eriven me aron  
kanan durafüden barafin mátimen  
temí, “Bafan noe, eí sen tiya ono.”

<sup>26</sup> Máa síkan Yisasi véin evaránen  
tiameemí, “Iyampon kayoi yunan  
ma máden betíi iyan kayo ma  
karúdáan amin mai ída funtáken  
mino.”

\* **15:11:** Mat 12:34    \* **15:13:** Mai ma arú bá darinten ne sikhein dunan maen mai Farasisi  
kéká ino.    \* **15:14:** Ruk 6:39; Rom 2:19    \* **15:24:** Mat 10:6

<sup>27</sup> Mápá síkan mai nanin mano semí, “Bafan noe, éi fura siya ompo iyan kayo ano vetí afóeni sakho aránaópá ma yunan antan eravein kasaen né iyan mino.”

<sup>28</sup> Yisasi mai vaya iniren evaránen tiämémí, “Anasi oe, éi ákona mumunan mái vaona éi ma afoká ino van ma iyaona mai yaná afoká inten mino.” Mápá ma siyain áaurá anan mai nanin araun e asefaen mino.

### *Yisasi Ma Kokhon Nanin Banta Ayofein Baya Ino*

<sup>29</sup> Mápá siren Yisasi mai varume ampiren Kariri non akhempá oriyan baren mana anu avapá un kumanen mino. <sup>30</sup> Un kumantan kokhon nanin banta ano véi vaípá eriyáken ai ayan púká ein nafi auu yufukukhá ein nafi ai ayan ma namu ukhá ein nafi ída ma vaya siyá ein nafi inká ena aí daná ma vá ein kayo vá minó aviren mo ven arantampin aseren orera uran mai kéká ayofen mino. <sup>31</sup> \*Ayofiyán maen minó nanin banta ano onákan ída ma vaya siyá ein kayo ano vaya síkan ai ayan ma namu ukharé ein kayo evaránen puntarákan arantan ma namu ukharé ein mano e mantén oríkan auu ma yufukukharé ein kayo evaránen onákan iyaimpin banasi ano sakhaen kokhon in-eine en orera iyáken Isarerí kéká Ayarafenun ávi danien mino.

### *Yisasi Ma Kamí Kamí Tauseni (4000) Vanta Yunan Amein Baya Ino*

(Maki 8:1-10)

<sup>32</sup> \*Daní iyákan Yisasi vei eyo iyampon kayo aran eríkan máa sen tiämémí, “Ma nanin banta maen dunan ída nan kanú manaú damúi sen má baká betin nan tirunan iyá umpo arafan bantí ma siantan oriyaren ayanafá auu entave entave intin eraven ankam-inten mino.”

\* 15:31: Mak 7:37    \* 15:32: Mat 14:14    \* 16:1: Mat 12:38; Ruk 11:16    \* 16:2: Manáa fefá ma uvantaré ein bompon dókifin ves 2 vá 3 vá ída varen mino.

<sup>33</sup> Mápá síkan eyo iyampon kayo ano véi tiämémí, “Ma vanta ída van kámá barafá ifo inte fáken ná minó ano kanaíen ma naren bereti kayo máderá máon nanin banta amenté tiferafuno.”

<sup>34</sup> Mápá síkan Yisasi evaránen betí ankan inaémi, “Nái mápá veretí tireti ankan dáke fono.”

Mápá sen ina íkan betí ankan temí, “Dan manápá ifo afápá kan un kádon bereti vá manáa sitó noyana kayo vái van mino.”

<sup>35</sup> Mápá síkan Yisasi mai nanin banta van barará kumaneno síkan kumanen mino. <sup>36</sup> Kumamíkan

béi mai yan manápá ifo afápá kan un kádon bereti vá noyana kayo vá máden Tiyarafenu susi siantáden kisiren bei eyo iyampon kayo amíkan máden banasi amen oreraen mino. <sup>37</sup> Amíkan minó nanin banta ano nákan amú kuriyaimpin eyo iyampon kayo ano antan o éke e éken uan dan manápá ifo afápá kan un kádon unan báen mino. <sup>38</sup> Mai yunan ma nein mai kamí kamí tauseni (4,000) vanta ifo anasi iyampon ída yankafen mino. <sup>39</sup> Narákan Yisasi mai nanin banta siantan orivin maen botifin un kumamen Makhadaníi akhempá oren mino.

## 16

### *Farasisi Kayo Ano Ma Yisasin Nan Inaru Fáke Avúavá Aní Intin Onano Van Ein Baya Ino*

(Maki 8:11-13; Ruku 12:54-56)

<sup>1</sup> \*Farasisi kayo vá Sadyusi kéká bá ano Yisasi vaintá eriven béin akhenóka uan onano van inaru fáke mana aní daná aní intí onano van béin inaen mino.

<sup>2</sup> Ina íkan Yisasi evaránen betí ankan máa sen tiämémí,\* “Inupasí íkan ma ayontá ma nararé íka maeyan inuran afe inten mino séiya ono. <sup>3</sup> Inká ákurá ma onen nan ma sókon konan ma yampa maeya saréa uva intin á danten minon téiya ono. Ayontá ma afoká

ein avúavá tiretí ankan ódeyan daíde afová éiyá ompo saréa ma afoká iyain danasinta sretí ída yaimiya ono.<sup>\*</sup> <sup>4</sup> \*Tareá ma vain mai namu avúavá baran nanin banta vá Tiyarafenurá ída ákonæn monó tin nanin bantan báken ena ena aní daná aní intí onano van manan iyan ban mifo vetí ankan ída kanaien mana aní daná onanten mino. Aní daná ma mana vetí onan nain mai sakhanampa vanta Yonani aní daná ana ino,” siren Yisasi vetin me ampirenen oren mino.

*Farasisi Kayo Vá Sadyusi Kéká  
Bái Yisi Fákena Vaya Ino*  
(Maki 8:14-21)

<sup>5</sup> Yisasi vei eyo iyampon kayo vá non akharun ekháden ena ufá oriyákan beni eyo iyampon kayo ano á úden ída vereti varen mino. <sup>6</sup> \*Oriven Yisasi máa sen betí ankan tiameemí, “Farasisi kayo vá Sadyusi kéká bái yisi vará dafian ná ákona ono.”

<sup>7</sup> Máa síkan beni eyo iyampon kayo ano vetiyan máa sen oreraemí, “Tetí ankan ma ída vereti varé erikheruna van mi véri mai vaya sen mino.”

<sup>8</sup> Betí ankan ma siyain baya Yisasi afová uren máa sen betin tiameemí, “Titó mumunan bain kéká soe, fará tiretí ma vereti ída manteona van baya siya rafono. <sup>9</sup> \*Tiretí ankan ída afová ukhe fono. Dan manápá tauseni (5,000) vanta ano ma yan manápá bereti nara maeya antan dunan nái máa unan ná bíke fono. <sup>10</sup> \*Inká dan manápá ifo afápá kan un kádan bereti ma kamí kamí tauseni (4,000) vanta ano ma nara maeya antan dunan nái máa unan ná bíke fono. <sup>11</sup> Téi ída vereti van tiameiyá umpsa fará tiretí ída afová iya rafono. Farasisi kayo vá Sadyusi

kéká bái yisirá dafian ákona ono van mi séi siamiyá uno.” <sup>12</sup> Máa síkan betí ankan inireñ afová uren temí, “Béi ída veretifin ma kain yisi van tiyan mifo mai Farasisi kayo vá Sadyusi kéká bái kampun afova ma amiyain bayará dafibén bano van mi siyan mino.”

*Pita Ma Yisasi Nan Tiyarafenu  
Ano Ma Aní Ukhein Banta Ono Ma  
Sein Baya Ino*

(Maki 8:27-30; Ruku 9:18-21)

<sup>13</sup> Yisasi ma Sisariá Piripai kayoi varafin ma oriven maen máa sen bei eyo iyampon kaylorá inaemí, “Banta Anin nan banasi ano iye inó ten iniyán nafino.”

<sup>14</sup> \*Máa síkan betí ankan temí, “Manáa ano éi nán monó non péontan banta Yoni ino sin maen ena kéká ano Iraiya ino siyákan inká manáa ano sakhanampa vanta Yeremaiya fi áa mana ena sakhanampa vantafin banten mino siyan mino.”

<sup>15</sup> Máa síkan Yisasi vetí ankan inaemí, “Mai sretí ankan te nan iye inó té iniyá rafono.”

<sup>16</sup> \*Máa síkan Saimon Pita evaránen temí, “Tiyarafenu ano ma aní ukhein bantan éi váke ayun para van oriyan ma vain Tiyarafenu Anin mono.”

<sup>17</sup> \*Máa síkan Yisasi evaránen béin tiameemí, “Yonin anin Saimoni oe, éi amusin ná ono éin ída mana varará banta ano ma vaya aníen mifo inarurá ma sen Tifóe vain manon aní uanten mino. <sup>18</sup> \*Aní uantákai séi máa sé éin tiamey uno. Éi Pitan\* ban ná mai onámaná darói sesi vanasi ma mumunan iyain kéká o éke e éke uré átaru uan kaudékun mai ma furin nanin banta ma o iyiyain barui ákona ano ída kanaien mai kéká esantaren maman bararasí

\* **16:3:** Yisasi ma enará ukhein daná ma variyain betí ída oman afová uren mumunan en mino. \* **16:4:** Mat 12:39; Ruk 11:29 \* **16:6:** Ruk 12:1 \* **16:9:** Mat 14:17-21 \* **16:10:** Mat 15:34-38 \* **16:14:** Mat 14:1-2; Mak 6:14-15; Ruk 9:7-8 \* **16:16:** Yon 6:69 \* **16:17:** Kar 1:15-16 \* **16:18:** Yon 1:42; Efe 2:20 \* **16:18:** Pitan nan onámaná ino sen mino. \* **16:19:** Mat 18:18; Yon 20:23

inten mino. <sup>19</sup>\*Inaru yafisin pinta  
tena ki kayo séi minó éin amenté  
umpo éi nái yanasá ma varará  
pákaañ ákona intefo mai inarurá  
bá pákaañ ákona inten mino.  
Pákaañ ákona inten mifo éi ma ma  
varará ampinona yanasintan mai  
inarurá bá ampiantanten mino.”  
<sup>20</sup> Máa siren Yisasi veyan nan  
Tiyarafenu ano ma aní ukhein  
banta ino sen ena nanin banta ída  
siamino van bei eyo iyampon kayo  
airo ananí uantent mino.

*Yisasi Ma Veyan Púaren E Man-  
tan Nain Nan Ma Sein Baya Ino  
(Maki 8:31–9:1; Ruku 9:22-27)*

<sup>21</sup> Mai ráké ma Yisasi e man-  
ten Yerusalemí orintin ma ven  
aurá afoká inain daná máa vei  
eyo iyampon kayo siamen mino.  
Ánon banta kéká bá monó ánon  
banta kayo vá man baya ma afová  
ukhein banta kayo vá ayampin ma  
orintin béin pákaren namu arirí  
uren kamanini aruvín banta kéká  
ayampin kaintin aruan púdantin  
ma kanú manaú damusí intin  
maen evaránen aunan baren e  
mantantenen mino.

<sup>22</sup> Pita mai vaya iniren Yisasin  
aviren akhempá moren béis  
ákonaeñ asemí, “Bafan noe,  
Tiyarafenu ano ída vá áintin ma  
yaná ano en aurá afoká ino.”

<sup>23</sup> Máa síkan Yisasi yo vaéaren  
Pitan nan temí, “Ban Anon noe,  
soyampá entavono. Éi senti aan  
iyariya ono. Éi ída Tiyarafenu in-  
eine ánain dakhafiya ompo varará  
bantai ineine ánain mi yakhafiya  
ono.”

<sup>24</sup>\*Máa siren Yisasi vei eyo  
iyampon kayo máa sen tiameemí,  
“Maná vanta ano ma sen tíain  
bákurono ma sinten nái bei anunu  
ampintin barará erafuvintin nái  
bei yaa unkamádon mamaren nái  
ten tíain bákurino. <sup>25</sup>\*Mai fara  
vara seyo, mana vanta ano ma

vei aunan pákañ ákona ukharé  
intin maen mai veni aunan o  
afeyoranten mifo mana vanta ano  
ma se nan inireñ ma vei aunan  
ampiádakaren maen mai ano vei  
aunan evaránen baranten mino.  
<sup>26</sup>\*Mana vanta ano ma minó má  
vara ráke yanasinta ana ma variyá  
intin ma veni aunan ma o afey-  
orantin maen intesá uren nái mai  
minó danasinta ano véin aya inten  
nafino. Intéa yaná pókesá banta  
ano evaránen bei aunan miyaní  
inten nafino. <sup>27</sup>\*Para vara seyo,  
Banta Anin mano ma ye Afóeni  
kákán kakhan má bei enisorí kayo  
vá ma erin naij maí damuí vanasi  
ano ma variyá inona avúaváká ten  
mi yaíden mana mana miyan am-  
inten mino. <sup>28</sup>Téi fura siré tiretí  
ankan tiámé uno. Ma ma saréa  
ma mantakheona kéká pinté ída  
manáa ano fúkesin mi Banta Anin  
mano kin an daven erinti onan  
nono.”

## 17

*Yisasini Minó Bukhafa Ma  
Enará Ein Baya Ino  
(Maki 9:2-13; Ruku 9:28-36)*

<sup>1</sup> Dan manápá ifo afápá mana  
un kádon damú orivíkan Yisasi ano  
Pitan má Yemisin nú Yonin nú  
anavasan má avíaren mana ayá  
anurá un baren mino. <sup>2</sup>\*Un baren  
betí ankan onákan Yisasin au ano  
enará iyain má ben auná ano áau  
ma kheiní íkan beni auí daná ano  
efanten uron en mino. <sup>3</sup>Máan  
tiyain má Mosesin nú Iraiya nú  
ano mairá afoká uven Yisasin má  
baya siyákan betí onen mino.

<sup>4</sup> Ódaren Pita máa sen Yisasin  
tiameemí, “Bafan noe, setí ankan  
ma mará banuna mai kama  
ukhen mifo éi iniresirá iyón  
baran namun kanú manaú téi  
uvarano. Mana en nina vantin  
mana Mosesin nina vantin inká  
ena Iraiyan nina vantin ino.”

\* **16:24:** Mat 10:38; Ruk 14:27 \* **16:25:** Mat 10:39; Ruk 17:33; Yon 12:25 \* **16:26:** Mat 4:8-9 \* **16:27:** Íbo 62:12; Pro 24:12; Mat 25:31; Rom 2:6; Rev 22:12 \* **17:2:** 2Pi 1:16-18  
\* **17:5:** Diu 18:15; Íbo 2:7; Ais 42:1; Mat 3:17; Mak 1:11; Ruk 3:22

5 \*Pita ma fara vaya siyákan maen mana fanu sikhein konan mano vetí ankan úkuan daran má darákan mai konan pinté mana vaya ano máa semí, “Ma sen Tanin mino. Téi ve nan moeké tinunu iyá uno. Téi venan timusin iyá uno. Ben avaya vá ineno!”

6 Mai vaya ma vetí ankan iníden akhokho van iyan barará baven auná bara finien mino. 7 Máan tiyákan Yisasi vetíi ádé eriven au aruviyáken temí, “Tireti ankan ída vá akhokho van eya orun mantano.” 8 Máa síkan betí ankan orun mantaven onákan Yisasi má ída mana ano van beya ana varen mino.

9 Betí ankan ma anuyon me ampiren eriyákan maen Yisasi ákonaen betín tiamemí, “Ma yaná ma saretí ankan oneona mai ída vá mana nanin banta siamikhesin ná Banta Anin ma van oriyan ma fúaren purin pinté e mantavinti vá tiameno.”

10 \*Máa síkan eyo iyampon kayo ano véin inaemí, “Paraé tiren ná man baya ma afová ukhein banta kayo ano Iraiyan nare vá erivintin ná ino sé iyan nafino.”

11 Máa sen ina íkan bái evaránen temí, “Mai fura vaya ino. Iraiya eriven minó daná evaránen puntáadantem mino. 12 \*Puntáadantem mifo séi saretin tiámé uno. Iraiya gefái erikhan minó nanin banta ano ída véin afová en pasen betíi anunu ángain dakhafen bén aurá ara ara namu avúavasién mino. Máan avúavá anan Banta Anin aurá inten mino.” 13 \*Yisasi ma máa siyákan maen betí ankan afová en monó non péantan banta Yoni van mi siyan mantino sen inen mino.

*Namu Aunan Bá Ein Iyampon  
Ma Yisasi Ayofein Baya Ino  
(Maki 9:14-29; Ruku 9:37-42)*

14 Betí ankan ma vanasi vaintá erákan maen mana vanta ano Yisasi vaintá me aron kanan durafúden mátimen temí, 15 “Bafan noe, éi sen tanin nan arunan uantano. Béi auvayaní uaren kokhon damú irafin kákiyon non ádiyan iyá uno. 16 Ei eyo iyampon kayo vaípá avíán morékun maen betí ankan ída kanaíen béin ayofarién mino.”

17 Máa síkan Yisasi evaránen tiamemí, “Tireti ankan ída mumunan ukheona nanin banta banan mi saretíi ineine vá avúavá bá ída funtáken mino. Nái máa yamusá téi saretin má para vante rafuno. Nái máa yádasá téi saretíi uman evaráne bariyá bante rafuno. Mai iyampon avire séi varunará ereno.” 18 Máa síkan mai iyampon avíán meran Yisasi mai namu aunan ákonaen asiyain má me ampiren orivíkan beni aí kípen mino.

19 \*Máan turákan ínaimpáké beni eyo iyampon kayo ano ana aúpáké bái vaintá eriven inaemí, “Pará tetí ankan ída kanaíen namu aunan do santiya rafuno.” 20-21 \*Máa síkan bái evaránen betí ankan tiamemí, “Tiretií mumunan titó máan bákayoi ída kanaí iya ono. Téi fura siré tireti tiamiyá uno. Para vara seyo, saretíi mumunan mano ma mastati yaa aran aú an den ma sitó suron ma vantiya mai saretí kanaíeyá ma anuyon nan ma mesapá e afáne orono ma sesin maen orinten mino. Máan tiyasin maen mana yaná ano saretimpín ída kanaíen uman danten mino.\*

*Yisasi Veyan Ma Fúaren E Mantan Nain Nan Ma Kan Dádasí En*

\* 17:10: Mar 4:5 \* 17:12: Mat 11:14 \* 17:13: Ruk 1:17 \* 17:19: Mat 10:1 \* 17:20-21: Mat 21:21; Mak 11:23; Ruk 17:6; 1Ko 13:2 \* 17:20-21: Manáa vompon dókifin ena vaya ves 21 fin máa sen asotú ukhen mino: Máan namu aunan mano ída fara orinten mifo yunan ma auraren amúkin manan oré iyan mino. \* 17:22: Mat 16:21

*Tein Baya Ino**(Maki 9:30-32; Ruku 9:43-45)*

<sup>22</sup>\*Betí ankan ma Karirí barafá o átaru uvín maen Yisasi máa sen betin tiāmemí, “Banta Anín avían namuro kayo ayampin am-inten mino.” <sup>23</sup>Amirantin ma véin arintin púkaren maen kanú manaú damusí ma intin e mantantan mino,” síkan eyo iyampon kayo ano mai vaya iniren arunan en oreraen mino.

*Kákán Monó Namun Ayain Moní Ma Karúdán Baya Ino*

<sup>24</sup>\*Ínaimpáké Yisasin má bei eyo iyampon kayo vá ano Kapeniamú barurá onóbíkan monó namun ma ayain moní ma varan banta kéká ano eren me Pitan máa sen in-aemí, “Tiretií arú ano kákán monó namun ma ayain moní amé iyan nafino.”

<sup>25</sup>Máa sen ina íkan Pita evaránen temí, “Eyo amé iyan mino.” Máa siren ma Pita mápin un pében ída vaya sikhan maen Yisasin nare véin inaemí, “Saimoni oe, éi inte é teyá iniya fono. Ma vara ráke kin kayo ano ara ara sákisi iyen pinten ná baré iyan nafino. Betíi kéká pinten ná baré iyan nafi áa ena kéká pinten ná baré iyan nafino.”

<sup>26</sup>Máa sen ina íkan Pita evaránen temí, “Ena kéká pinten nan baré iyan mino,” síkan Yisasi véin tiāmemí, “Máan tukhan mi vetíi kéká ano ída yetíi sakisi amé iyan mino. <sup>27</sup>Máan té iyan mifo vetin aran amétifa nampo araveya vá morun non akharumpin úku karúdoreya esé ma arinona noyana oo yavódeya vá maj oofentena ma onanona monisá bareya kákán monó namun ma ayain ná erasantina mun ameno,” síkan mai ma seiní uren bare mun amen mino.

**18***Inaru Yafisimpín Iyé Kákání Inten Nafino Ma Sen Ina Ein Baya Ino*  
*(Maki 9:33-37; Ruku 9:46-48)*

<sup>1</sup>\*Maí damú eyo iyampon kayo ano Yisasi vaintá eriven máa sen inaemí, “Inaru yafisimpín iyé kákání inten nafino.”

<sup>2</sup>Máa síkan Yisasi mana arará iyampon aran erikan betin aúbaná avían manten mino. <sup>3</sup>\*Avían mantaren máa semí, “Téi fura siré tiretin tiāmiyá uno. Tiretií ma ída evaráne arará iyampon kayo an ma yanteya mai ída kanaíeyá inaru yafisimpín orin nono. <sup>4</sup>Máan tukhantin mi iye anó beyan maman bararasí uren ná ma iyampon arará an ma yiyré inain manon inaru yafisimpín kákání inten mino.

<sup>5</sup>\*“Inká iyé ten nan iniren ná mana máan tukhein iyampon arará aya inten nafi mai sen mi siya inten mino.

*Umeín Avúava San Ma Yafíken Ban Baya Ino**(Maki 9:42-48; Ruku 17:1-2)*

<sup>6</sup>Máan tinten mifo ma iyampon arará kayo finté mana ano ma sentá mumunan ukharé intin ma mana vanta ano ma vetin maman umefin kaintin ma eraven ankantaré intin ínaimpá mai vanta moékan uman baran nafo véin amempin ná kákán konkamú onámóná kureya vá un nompin karúdán námen aravuven ná non ufuren purino.

<sup>7</sup>“Intéa vanta anó ena kayo e yarifaan umefin kain ná eraven ankamiyan nafi mai kayo ano kákán uman uron mi varanten mino. Mai namu avúavá afoká inten mifo iyen banta fintesá mai yaná afoká inten nafi mai anon kákán uman uron baranten mino.

<sup>8</sup>\*Éin ayan arantan mano ma e yarifaan umefin ma kaintiya vá

\* **17:24:** Eks 30:13; 38:26 \* **18:1:** Ruk 22:24 \* **18:3:** Mat 19:14; Mak 10:15; Ruk 18:17

\* **18:5:** Mat 10:40; Ruk 10:16; Yon 13:20 \* **18:8:** Mat 5:29-30

mai yo síkareya karúdan ná orino. Mana ayan má mana arantan má ana ma varéintiya mai ída furin ayun ma van oriyan ban aunan baran nono. Míkanan ayan má arantan má ma vantiyá ma umeí ukharé inte mae mai ída kípan irafin mi karúdanti orin nono.<sup>9</sup> Éin auu ano ma e yarifaan umefin ma kaintiya vá mai auu yo vían karúdan ná orino. Mana auu ana ma varéintiya mai ída furin ayun ma van oriyan ban aunan baran nono. Míkanan auu ma vantiyá ma umeí ukharé inte mae mai ma íra khiyan ma uman baren beraí siyan purin barufin mi karúdanti aravin nono.

10-11 \*“Ma arará\* kayo fintena sretí ankan oman titó danasí inampo yafian ná ákona ono. Inaru fáké betí enisorí kayo ano ena ena inarufá mā vain Tifóen avorái vágé iyan mino.”

*Sipisipi Afeyorantá Ma Sian  
Báédan Baya Ino  
(Ruku 15:3-7)*

12 “Tireti ankan inte esá té iniya rafono. Mana vanta ano ma mana antareti sipisipi yakaré intín mai fintena ma mana afeyóbintin maen mai van ída dosinten nafino. Ída nainti naini (99) me khaintin anurá bantin ná mai mana sipisipi ma afeyókein nan dosinten nafino.<sup>13</sup> Dosiren ma avíaren mai mana sipisipi van ma amusin inain manon nainti naini (99) sipisipi ma ída afeyoran para vain nan ma amusin inain esantanten mino.<sup>14</sup> Máan manan en tireti Afóe ma inarufá bain mano ma arará kayo fintena ída mana afeyorano van inikhen mino.

\* 18:10-11: Ibu 1:14      \* 18:10-11: Arara se ma sikhein mai varará kusen ban ma ída aau varan mumunan iyain kayo fi áa arará iyampon kayo varafin tikhen mino. \* 18:10-11: Manáo Tiyarafenu vompon dókifin ves 11 asotú en máa sikhen mino: Afeyóka ein kayo yosiré avirano van mi Banta Anin mano erikhen mino. \* 18:15: Ruk 17:3; Kar 6:1      \* 18:16: Yon 8:17      \* 18:18: Mat 16:19; Yon 20:23      \* 18:19: Mak 11:24; Yon 15:7      \* 18:22: Ruk 17:4

*Mumunan Ayofi Afá Aváeyan  
Mano Ma Umeí Uantádanti Ma  
Funtaran Nona Fákena Vaya Ino*

15 \*“Mumunan ayofi afá aváe ano ma en nina yaná ma auí uran tiya vá éi vempákesá béin o avíde vá beni namu avúava san tiamíde aúpasá tirékan puntarano. Puntaresin ma eni vaya ma véi ininti mae vá mai éi ei mumunan afá aváen mi evaráne avire ono.<sup>16</sup> \*Aviran nompo véi ma eni vaya idá ininti mae vá “mana vanta fi kan banta fi avíareya oresin ná kan mano fi kanú manaú ano fi vá mai vaya mo iníden puntarano.”

*Diu 19:15*

17 Máan tesí ma véi ída vetíi vaya ma inintiya vá mumunan nanin banta siamesin ná mai vaya iniren puntarano. Puntarantin ma ída inintiya vá mai véin maman ída mumunan bain banta kayo vá takisi varan banta kéká bá an dakhen mino vá tire onano.

18 \*“Téi fura siré tireti ankan tiámé uno. Inte yanásá ma varará pákaan ákona intefo mai inarurá bá pákaan ákona inten mifo éi ma ma varará ampinona yanasin tan mai inarurá bá ampiantanten mino.”

19 \*“Téi evaráne tiretin tiámé uno. Ma varará ma kan mano ma mana yaná barano van ma ará manafiní ureya ma amúkesin maen te Sifóe ma inarufá bain mano siré kanan aminten mino.<sup>20</sup> Para vara seyo, kan nafi kanú manaú ano fi ma sen tiviká ma átaru intí maé mai séi vetin áuban banté uno.”

*Ída Ena Van Arunan Uantan Doran Bantai Avúavá Baya Ino*

21 Mairá Pita eriven Yisasin máa sen inaemí, “Bafan noe, sifá tiváe ano ma auí usintádantí maé mai nái máa yádasá béin tirá amente

rafuno. Dan manápá ifo afápá kan un kádan dádasa fino.”

<sup>22</sup> \*Máa síkan Yisasi evaránen bén tiämémí, “Téi ída seveni yáda se sé éin tiämikhé uno seventi taims seveni (70 x 7)\* yáda sen tikhé uno.”

<sup>23</sup> “Máan tukhein nan mi mana kin pintena ma vei yoran banta kéká ano ma manáa moní mantáin ma evaránen barano van ma funtaré iyainíi inaru yafisin ukhen mino. <sup>24</sup> Tiyan míkan mirioni moní ma mantaré ein banta nare funtarano van bái vaintá aviren eren mino. <sup>25</sup> Meran mai vanta ano ída kanaén mai moní evaránen amiyaimpin kin mano vei yoran banta siämémí, ‘Ma vanta vá be aná akhá bá bei minó danasinta vá sarí uresin miyaní uarantí vá tesí moní máa ovaráne simeno.’

<sup>26</sup> “Mai yoran banta ano ma mai vaya inire kin arantampin mo aron kan durafúden mätímen ínanen inaemí, ‘Éi se nan arunan usintádeya sive ukhesirá éin pinte ma mantáeruna moní máa evaráne anona ameno.’ <sup>27</sup> Máa síkan mai kin mano vei yoran banta van arunan uantáden ifáin oren mino.

<sup>28</sup> “Ifá uantádon mai yoran banta ano e khuyen barufá aravuven onákan bei mana yoran banta eríkan ben amen bana oo fákao ákona uaren máa sen tiämémí, ‘Éi ma sen pinte mantaré eona moní máa anona aine simeno.’

<sup>29</sup> “Máa síkan bei mana yoran banta ano mai vaya inire aron kan durafúden mätímen ínanen inaemí, ‘Éi se nan arunan usintádeya sive ukhesirá éin pinte ma mantáeruna moní máa evaráne anona ameno.’

<sup>30</sup> “Máa síkan maen mai vanta ano ída inin na vei mana yoran banta aviren mo karavusifin kaurantin báken bei moní evaránen anona amino van karavusifin mo

khaen mino. <sup>31</sup> Minó bei mana yoran banta kéká ano véi ma varein avúavá ódaren kákantá ará namu uren mai vaya kin mo siamen mino.

<sup>32</sup> “Mo siämíkan kin mano mai yoran banta aran eríkan máa sen bén tiämémí, ‘Éi namu yoran banta ono. Éi ínane séi vaípá inaen ná maéi éi ma mantaré eona moní máa mo ifá uanté uno.’ <sup>33</sup> Téi ma en nan tirunan uanterunai eya éi fará ei mana yoran banta van ída arunan uante fono.’ <sup>34</sup> \*Máa siren kin mano aran máa tíkan karavusirá ma yafisin banta kéká ano mai yoran banta e fáken mo khaintin báken bén pinte ma mantaré ein moní máa anona evaránen amino van en mino.

<sup>35</sup> \*“Tireti ankan ma mununan afá aváeyón má ayó má bái ume ma ída fura seja aúkáké ampiantiyaré esin maen te Sifóe ma inarufá bain mano mai avúavasí anan tiretin uantanten mino.”

## 19

*Ábasu Ma Yurafurin Avúavá In  
Bayá Ino*

(Maki 10:1-12; Ruku 16:18)

<sup>1</sup> Yisasi ma mai vaya kayo sian kípären Karirí bara me ampiren e manten Yodení non e kháden Yudiá barafá oren mino. <sup>2</sup> Oríkan kokhon nanin banta ano ven bákuren orin maifin ma aí bá ein kéká ayofen mino.

<sup>3</sup> Ayofiyákan Farasisi kéká ano Yisasi vaintá eriven bén mákáan onano van betí ankan máa sen ben inaemí, “Éi inte esá té iniya fono. Man bayá ano kanaé tikhan ná banta ano vei anunurá be aná tiantanten nafino.”

<sup>4</sup> \*Máa síkan Yisasi evaránen betin tiämémí, “Tiyarafenu ano esé araiántá ma vanta vá anasi vá ma uvantá ein tireti ankan ída bompon dókifin dankádé afová

\* 18:22: Áa seventi seven \* 18:22: Seventi taims seveni mai ena ena yamusá ume ampiante oriya vano. \* 18:34: Mat 5:25-26 \* 18:35: Mat 6:15; Mak 11:25; Efe 4:32; Kor 3:13 \* 19:4: Esé 1:27; 5:2 \* 19:5: Efe 5:31

ukhe fono.<sup>5</sup>\* ‘Mai van mi vanta ano ve anóe afóen me ampiren be aná bá o súpá en mana vukhafái é iyan mino.’

*Esé 2:24*

<sup>6</sup> Máon tukhein nan mi míkánan ída kanaí ukhen mifo mana vukhafái ukhen mino. Mai van mi Tiyarafenu ano ma vékan maman túpá uran nain banta ano ída yurafurinten mino.”

<sup>7</sup>\* Máa síkan Farasií kéká ano véin evaránen inaemí, “Pará Mosesini man bayá ano sen ná banta ano vá bompon uvaman e aná amídeya vá tiantano sikhén nafino.”

<sup>8</sup> Máa síkan Yisasi evaránen betí ankan tiámemí, “Tireti aú avétan in kékái vanan mi Mosesi kana ino sikhaya anasi siantiyare ompo esé araiíntá ída mai avúavá baren mino.

<sup>9</sup>\* Téi saretí ankan tiámiyá uno. Mana vanta aná ano ma ída ena vanta yarifen non nain ma véin tiantáden ma ena nanin baranten maen mai vanta ano ena ana safi avafun nafi ma vare non avúavái varen mino.”

<sup>10</sup> Máa síkan eyo iyampon kayo ano mai vaya iniren Yisasin tiámemí, “Tiyarafenu ma esé araiíntá ma sikhá ein bayá ánaín dakhafin ma uman dakhantin maen mai vanasi ano ída vá ábusú ino.”

<sup>11</sup> Yisasi evaránen betí ankan máa sen tiámemí, “Ída minó ano ma vaya kanaíen ininten mifo Tiyarafenu ano ma manáa nanin banta ákon amikhein mai kayo ano anan mai vaya ánaín dakhafinten mino.

<sup>12</sup> Para vara seyo, manáa iyampon avankan namu ukhein kaé iyan mino. Inká manáa vanta ano avankan do visiyan maen inká manáa ano inaru yafisin pintena yorarí ono van anasi varan airo ananí uren báé iyan mino. Máon tukhen mifo vanta ano ma ma vaya kanaíen ma inin nain mano vá mai ánaín dakhafino.”

*Yisasi Ma Arará Iyampon Arintan Avu Uantein Baya Ino*  
(*Maki 10:13-16; Ruku 18:15-17*)

<sup>13</sup> Máa sirákan Yisasi ayan áñontá kaúden amúkuantano van banasi ano arará iyampon arinta aviren eríkan maen eyo iyampon kayo ano vetí ankan ákonæn asen mino.

<sup>14</sup>\* Asiyaimpin Yisasi máa semí, “Tireti ankan áesin ná arará iyampon arinta se vaípá erino. Tireti ída vá betin ayópá ono inaru yafisin mai arará iyampon arinta kayo an ma yákein nanin banta ina ino.”

<sup>15</sup> Máa siren iyampon arinta áñontá ma véi ayan kaúden avu uantáden maen mai varu me ampiren oren mino.

*Kokhon Ona Ma Vain Pumara Vantai Vaya Ino*

(*Maki 10:17-31; Ruku 18:18-30*)

<sup>16</sup> Oríkan mana vanta ano Yisasi vaintá eriven temí, “Aru soe, séi inte avúavasá kama urerá ayun ma fara van oriyan ban aunan barante rafuno.”

<sup>17</sup>\* Máa síkan Yisasi evaránen béin tiámemí, “Pará kama avúava sintá van téin ina iya fono. Tiyarafenu veyáká anan kama ukhen mifo éi ma ayun para van oriyan ban aunan ma varano sinté vá Tiyarafenu man bayá kayo ánaín ná dakhafono.”

<sup>18</sup> Máa síkan mai vanta ano Yisasin inaemí, “Inte man bayá kayo vará éi siya fono.”

Síkan Yisasi evaránen béin tiámemí, “Máon ma sikhéin man bayá kayo van mi siyá uno.

Tireti ankan ída vá ena nanin banta aruan purono.”

‘E ábasu ano ída vá ena ana safi avafun nafi vare nono.’

‘Tireti ída vá umoyan barano.’

‘Tireti ída vá kampun tireya ena nanin banta kó tiantano.’

<sup>19</sup> ‘Tireti ankan anóe afóeni aránaopá sá oreya vetin oo

\* **19:7:** Diu 24:1-4; Mat 5:31 \* **19:9:** Mat 5:32; 1Ko 7:10-11 \* **19:14:** Mat 18:2-3 \* **19:17:** Riv 18:5; Ruk 10:28

vá daiyono.' *Eks 20:12-16;*  
*Diu 5:16-20*

Inká 'eyan nan ma anunu iyaonaíe  
vá ena van anunu ono.' *Riv*  
*19:18*

<sup>20</sup> Máa síkan mai fumara ano  
semí, "Téi minó mai man baya  
kayo ánaín dakhafiyá umpo mai  
ena inte man baya ánaín ná dakhafonte rafuno."

<sup>21</sup> Máa síkan Yisasi evaránen  
bén tiámémí, "Éi ma funtákéiní  
uron ma ono yará minó ei ona  
mo sari ure vá ona ma ída van  
nanin banta vá mai moní ameno.  
Éi ma máón tinteya enina inarurá  
kokhon kama yana suron banten  
mifo éi ere sen bákurono."

<sup>22</sup> Máa síkan mai fumara ano  
kokhon ona yákaren pasen mai  
vaya iniren anomé inivaen ifá en  
oren mino.

<sup>23</sup> Orivíkan Yisasi vei eyo  
iyampon kayo máa sen tiámémí,  
"Téi fura siré tiretin tiámé uno.  
Kokhon ona ma vain banta kayo  
ano ma inaru yafisimpin ma orin  
mai uman dakhen mino." <sup>24</sup> Téi  
enádá bá evaráné tiretin tiamenté  
uno. Kameri ano ma ufi aimpiń  
ma ódin mai uman dakhen mifo  
kokhon ona ma yákein kéká ano  
ma Tiyarafenu yafisin barufin ma  
ódin mai moéken uman mi yakhen  
mino."

<sup>25</sup> Máa síkan eyo iyampon kayo  
ano mai vaya iniren anúden or-  
eraen temí, "Máón ma ukhantin  
maen mai iye ná Tiyarafenu ano  
kanaíen aviranten nafino."

<sup>26</sup>\* Máa síkan Yisasi yetin auufen  
kakháben temí, "Minó banta ano  
ída kanaí inten mifo Tiyarafenu  
ano veýká anan kanaíen minó  
danásí inten mino."

<sup>27</sup> Máa síkan Pitá evaránen temí,  
"Ineno minó daná teti me ampire  
éin bákuriyá umpo mai setí ankan  
ena nái yanasaá bará tifante ra-  
funo."

<sup>28</sup>\* Máa síkan Yisasi evaránen  
betin tiámémí, "Téi fura siré

tiamiyá uno. Ínaimpá ma minó  
daná ma auyení uvintin maen  
Banta Anín mano ma kákán bí  
mamaren bei kin karáká ma  
kumanin nain damuí sen tíngin  
ma vákure nónona vanta kéká  
ano sirantan kan orun kádán  
(12) kama ukhein kini karáká  
kumameya sirantan kan orun  
kádán (12) Isarerí anantá dafisin  
nono. <sup>29</sup> Inte kéká anó ten tivi san  
iniren ná be ama safí afá aváen  
nafi ayofin nafi ve anóe afóen nafi\*  
inká be akhafana fi yunan ana  
fi ma me ampikharéin nain kéká  
anon ena antareti yádá bá (100)  
máden inká ayun ma fara van  
oriyan ban aunan má baranten  
mino. <sup>30</sup>\*Baranten mifo saréa ma  
esé an ma vain kayo ano ínainí  
intin maen anona ínainí ma vain  
kéká anó un aní inten mino.

## 20

*Uvaini Yunan Anafin Ma Yoran  
Banta Kékáká Ma Ovaéádan Baya  
Ino*

<sup>1</sup> "Para vara seyo, inaru yafisin  
mai máón mi ukhen mino. Mana  
vanta ano vei uvaini yuna anafin  
dorano van banta kayo avirano  
van pe ákurá e mantén oren  
mino. <sup>2</sup> Mai vanta kayo van maná  
damúke na miyan amenté uno  
síkan kana ino sin betin tiantan  
uvaini yunampin dorantá oren  
mino.

<sup>3</sup> "Nain kiroki inafá mai kákán  
banta ano oriyaren o onákan ba-  
nasi ma átaruiyain barurá manáá  
vanta kéká ano fara mantakhen  
baren mino. <sup>4</sup> Mantakharé íkan  
béi máa sen betin tiámémí, "Tiretí  
ankan má dere oreya sentí uvaini  
yunan anafin mo yoriyaréesí maé  
puntadé miyan amenté uno. <sup>5</sup> Máa  
sin mai kéká orivíkan mai kákán  
banta ano vayan bero vá inúpá  
kanú manaú áaurá bá evaránen  
máón mana en mino. <sup>6</sup> Inúpáké  
dan manápá áaurá béi oriyaren

\* **19:26:** Yop 42:2 \* **19:28:** Mat 25:31; Ruk 22:30; Rev 3:21 \* **19:29:** Manáá vompompin  
anóen narafi áa vanta aná barafin tikhen mino. \* **19:30:** Mat 20:16; Ruk 13:30

o onákan manáa vanta kayo fara mantakhen baré íkan béis máa sen betí ankan inaemí, ‘Náisá ukhayá ma áau ayá ayá pasavi mantakhé ba rafono.’

<sup>7</sup> “Máa síkan betí ankan evaránen béis tiamemí, ‘Maná vanta ano ída setin doran timikhái vá tiféuno.’

“Máa síkan mai kákán banta ano vetin tiamemí, ‘Tiretin máa dere oreya senti uvaini yunan anafín mo yorano.’

<sup>8</sup> \*“Máa siran doriyaréin ma inúpasí íkan maen mai uvaini yunan anan afóe ano vei yorantá ma ayafaí ukhein banta máa sen tiamemí, ‘Taréa ínaiimpáké ma me yorein kéká nare vá araí eya miyan ame ore ore vá esé ma me yorein kéká tasore ínaiimpasá mo ameno.’

<sup>9</sup> “Inúpáké dan manápá áaurá ma me yorein kéká ano nare eriven maná damükáke miyan puntáden mana yanka mádú mádú en mino. <sup>10</sup> Mamaran pe ákurá ma me araién dorein banta kéká ano eriven tetí ankan kokhon moní i varanté uno siren iyaren mifo vetin máa dere funtáden manaí ukhein miyan manan baren mino. <sup>11</sup> Mai moní ma máden ódaren maen dunan afóen máa sen koúanten mino, <sup>12</sup> ‘Tare ínaiimpá suron ma erein banta kéká ano mana áurá me yódayai setin máa manaí miyan amiya ompo seti fe ákura suron mi me ákonaé doriyáku kákán átikhakhen mino.’

<sup>13</sup> “Máa síkan dunan ana afóe ano mai vaya iniren mai yoran banta kéká pintena mana vanta evaránen tiamemí, ‘Tirona oe, séi ída namu iyá uno. Esé dorano van ma iyan ná ma maná damükáke miyan nan ina éku mae ída kana ino sikhare fono. <sup>14</sup> Ei miyan mamareya orono. Tesi sinunurái ínaiimpá ma erein banta kayo vá

manaí miyan amiyá uno. <sup>15</sup> Mai sesina yaná ifo ída tesí sinunurái tesí moní daimonte rafuno. Téi ma ma vanta kayo kama avúavá uantiyaruna vará éi ará namu uantiya fono.’

<sup>16</sup> \*“Máan tukhanti mi ínqin ma vain kéká ano esé un aní intin maen esé ma aní ukhein kayo ano ínainí inten mino.

*Yisasi Veyan Ma Fúaren E Mantan Nain Nan Ma Kanú Manaú Dádasí En Tein Baya Ino*

(Maki 10:32-34; Ruku 18:31-33)

<sup>17</sup> Yisasi ma Yerusaremí ódiyáken maen tiyan míkan mifo sirantan kan orun kádan (12) bei eyo iyampon máa aviren mo áupá kaúden betí ankan máa sen tiamemí, <sup>18-19</sup> \*“Taréa setí ankan ma Yerusaremí ódé tiféku maen manáa kéká ano Banta Anín ayían monó ánon banta kéká bá man baya ma afóva ukhein banta kayo vá ayampin ma amintin maen béis aruan purino van monó namuntá ma yafíkein kéká ano ena anan banta kéká ayampin aminten mino. Máan turantin béis máká maáká uren intireñ dafiyopó ankáden daa unkamádantá arintin pükaren kanú manaú damusí ma intin evaránen e mantanten mino.”

*Yonin Nú Yemisin Núi Anóe Ano Ma Yisasin Mana Inaein Baya Ino*  
(Maki 10:35-45)

<sup>20</sup> Ínaiimpáké Sebetin anin kanan Yemisin nú Yonin nú anóe ano vékán má Yisasi vaintá eriven me aron kan durafüden mátimiyan be anin kan nan Yisasi arunan uren ayaino van inaen mino.

<sup>21</sup> \*Máa síkan Yisasi véin inaemí, “Ei nái nasará iya fono.”

Síkan mai nanin mano Yisasin tiamemí, “Ei yafisimpin kaná áesin ten tanin kanan mano en ayan kurompá mana ano kumanintin ná ayan ópá mana ano kumanintin inten nafino.”

\* **20:8:** Riv 19:13; Diu 24:15    \* **20:16:** Mat 19:30; Mak 10:31    \* **20:18-19:** Mat 16:21;  
17:22-23    \* **20:21:** Mat 19:28; Ruk 22:30

<sup>22</sup> \*Máa síkan Yisasi mai vaya inirev evaránen tiämémí, “Tiretí ankan ma séin ina iyaona yaná ída afová ukha ono. Téi ma varanuna uman kanaísá é tiretí ankan má barante rafono.”

Máa síkan béin evaránen tiämémí, “Berasan kanaí é baranté uno.”

<sup>23</sup> Máa síkan Yisasi vékanan tiämémí, “Pura ino. Tiré kanan ten ma varanuna uman baran nompo iye anó ten tiyan kuompá kumanintin ná tiyan ópá kumanintin ná inten nafi mai ída sen tina yaná bain iyáantanté uno. Mai kará ma vain mai ma Sifóe ayo ma aní ukhein kéká inan puntáádon ban mino.”

<sup>24</sup> Be anavasan mano ma Yisasin inaein baya van tiyan míkan eyo iyampon kayo ano inirev békan anan uanten mino. <sup>25</sup> \*Máan tiyákán Yisasi vetin arákán be vaintá erivin máa semí, “Tiretí ankan afová ukha ono. Ena anan nanin banta kayoi kin kéká bá kákán banta kayo vá ano vei kékáká ída kama yafisirí iyáken maen betíi vaya ánan bákurino van duvun en arirí é iyan mino.

<sup>26</sup> \*Máan té iyan mifo sirectimpín ída vá mai avúavá bano. Tiretin pinté iye anó kákán bantaí ono van inten nafi mai ano vá tiretí yoran bantaí intin ná <sup>27</sup> inká iye anó esesi ono van inten nafi mai ano vá tiretí ída miyan ban doran bantaisá ino. <sup>28</sup> \*Máan manan en mi Banta Anin ma erikheiñ mai vanta ano ven ayain dorarí ino vara erikhen naifo véi ano vetin ayaen bei aunañ betin amiré kokhon nanin banta evaráne miyaní ono van mino.”

*Auu Yufúukhein Bantá Kanan  
Auu Ma Kama Ein Baya Ino*

(Maki 10:46-52; Ruku 18:35-43)

<sup>29</sup> Yisasin má bei eyo iyampon kayo vá ma Yerikó baru me ampiren oriyain má kokhon nanin

banta ano Yisasin bákuren oren mino. <sup>30</sup> Oriyákán kankanan auu yufúukhein bantá kanan mano aa akhempá kumantaren iníkan Yisasin nan eriyan mino siyaimpin avádóden oovararen temí, “Bafan noe, Devitin Anin mompo verasan nan arunan usintano!”

<sup>31</sup> Máa sen oovarákan banasi ano inirev míkan nan baya fákano síkan mifo míkanan mano moéken avádóden oovararen temí, “Bafan noe, Devitin Anin mompo verasan nan arunan usintano!”

<sup>32</sup> Máa síkan Yisasi mairá o mantaven míkan nan araaren inaemí, “Téi náisá tiré kanan uantano vará iya fono.”

<sup>33</sup> Máa síkan míkanan mano evaránen béin tiämémí, “Bafan noe, verasan tuu marano van munó.”

<sup>34</sup> Máa síkan Yisasi vékanan nan arunan uren auu aruviaín má manadá auu kama uvin auu máben oniyáken Yisasin bákuren oren mino.

## 21

*Yisasi Ma Kin An Daven  
Yerusaremí Ódein Baya Ino  
(Maki 11:1-11; Ruku 19:28-40;  
Yoni 12:12-19)*

<sup>1</sup> Yisasin má bei eyo iyampon kayo vá oriyaren Yerusaremí áde Orifi anurá Betfásí barurá o unen mino. O unaven Yisasi vei eyo iyampon kanan tianten <sup>2</sup> temí, “Tiré kanan mesan barurá oresin ma mana donkin ma ayan nan kurantin arará bá ma van nain ná ayan nan utúde vá míkanan avire se varunarasá ereno. <sup>3</sup> Eresin ma mana ano ma manáa vaya ma sinti vá tiré kanan máa ná teno, ‘Míkani yoran Bafampin ban mino’ má sesin maen ainen mi siantanti avire erin nono.”

<sup>4</sup> Máan ma ein manon pefá ma sakhanampa vanta oo ráké uaren ma máa sikhá ein mi kanaíen mino.

\* **20:22:** Mat 26:39; Yon 18:11

\* **20:25:** Ruk 22:25-26

\* **20:26:** Mat 23:11; Mak 9:35

\* **20:28:** Ruk 22:27; Fir 2:7

5 "Saioní nanin banta siameno.  
    'Onano. Tiretí ankani kin mi  
        eriyán mino.

Béi manā donkin ané kumamen  
    aví ída van banta an daven  
        eriyán mino.

Béi maen mana ané ída ku-  
    mantá ein donkin amaniná  
        kumamen eriyán mino."  
    Sek 9:9

6 Eyo iyampon kanan mano oren  
mai ma Yisasi siameiní mo en  
mino. 7 Máan turen mai donkin  
kan aviren meran betí ayá au ana-  
mum daváden arará donkin ané  
kaúdan Yisasi mai yaró kuma-  
nen mino. 8 Kumamen oriyákan  
kokhon nanin banta ano au ana-  
mum daváden aasá uvisen orin  
inká manáa ano yaa ayan tíkariyan  
uvisen orin en mino. 9 Máan  
tiyákan kokhon nanin banta ano  
Yisasin aufá orin oyampá erin  
iyáken máa sen oovaremí,

"Devitin Anin avisá daní ino!"\*

"Bafan avíká ma eriyain banta vá  
    avu uantano!"                           Ibo  
    118:25-26

"Dan uron ma vain Tiyarafenu  
    avisá daní ono!"

10 Yisasi ma Yerusalemí barufin  
ódiyain má banasi ano anúden or-  
eraen máa sen inaemí, "Ma vanta  
iye fino."

11 Máa sen ina íkan mai ma  
oriyaré ein nanin banta ano  
semí, "Kariri varafá ma vain baru  
Nasaretike sakhanampa vanta  
Yisasi ino."

*Yisasi Ma Kákan Monó Namun  
Pinte Ma Minó Daná Sarín Banta  
Kayo Yo Siantein Baya Ino*

(Maki 11:15-19; Ruku 19:45-48;  
Yoni 2:13-22)

12 Yisasi monó dafufin un pében  
ona ma sarí iyá ein banta kayo  
sianten mino. Moní ma arun  
miyan ma nun kayo yáken sarí  
iyaré ein takhó bá kará kayo vá  
béi vanaan karúdan oreraen mino.

13 Banaan karúdiyáken máa sen

betin tiameemí, "Tiyarafenui vom-  
pon dóki ano máa sikhen mino,  
'Banta ano séin tima san amúkin  
namun nen tinten'                   Ais 56:7  
mifo siretí maman 'umoyan banta  
kéká amasíi' iya rono.           Yer 7:11

14 Máan turen Yisasi kákán  
monó namumpin bákán auu  
yufukhein kéká bá arantan ma  
namu ukhein kayo vá ano véi  
vaintá eríkan kama uanten mino.  
15 Máan tiyákan monó ánon banta  
kéká bá man bayá ma afová  
ukhein banta kayo vá ano mai  
ma véi enará ukhein danasinta ma  
variayin oniyákan mai monó dafu  
finté iyamporinta kayo ano máa  
sen oovariayimí, "Devitin Anin  
avissá daní ino!"                   Máa síkan betí  
ankan ará namuen mino.

16 Ará namu iyáken Yisasin in-  
aemí, "Ma iyamporinta ma siyain  
baya inká iriúyá nan nafino."

Síkan Yisasi evaránen betin  
tiameemí, "Eyo séi iniyá umps  
'minó arará iyamporinta anon éin  
aví daní é iyan ne'                   Ibo 8:2

ma sikhein bayá siretí ankan ídá  
Tiyarafenui vompon dóki fintena  
yankáke rafono." 17 Máa siren bái  
Yerusalemí bá betin má me am-  
piren mai inuran Betaní barurá o  
varen mino.

*Yisasi Ma Fiki Yaa Ana Asin Ma  
Kafurein Baya Ino*  
(Maki 11:12-14, 20-24)

18 Pe ákura suron Yisasi e man-  
taaren Yerusalemí evaránen oriyá  
íkan arafan puren mino. 19 Arafan  
puríkan bái onan mana fiki yaa  
ana aa akhempá baré íkan ádé  
oriven mai anafin onákan ída  
mana aran iren mifo anaa ana  
variayin baré íkan bái mai fiki yaa  
ana van temí, "Éi ída vá enádá bá  
aran irano!"                   Máa siyain má mai  
yaa ainen kafuren mino.

20 Kafuriyain má eyo iyampon  
kayo ano ódaren takhaen oreraen

\* 21:9: Iburu vaya finté 'Osana' ma sikhein mai 'avisá daní ino.' \* 21:21: Mat 17:20; Ruk  
17:6; Yon 14:12; 1Ko 13:2

temí, “Inte uáken ná ma fiki anaa ainen kafuren nafino.”

<sup>21</sup> \*Máa sen ina íkan Yisasi evaránen betin tiamemí, “Téi fura siré tiretí ankan tiamiyá uno. Tireti ma ída kan ineine in ma fura seya mumunan uron ma inteya ma fiki yará ma eruna avúavá ana ída varan nompo ma anuyon nan ma e afáne un nompin orono ma sesin maen kasaen tiretí ma sinonaí inten mino. <sup>22</sup> \*Tireti ankan ma mumunan iya amúkinte mae mai ma varano van amúkin nona yaná baran nono.

*Yisasini Ákona Van Ma Monó  
Átaru Namuntá Ma Ánoni Ukhéin  
Banta Kéká Ano Ma Inaein Baya  
Ino*

(Maki 11:27-33; Ruku 20:1-8)

<sup>23</sup> Yisasi ma monó namuni yafufin un pében monó baya siamiyákan maen monó ánon banta kéká bá Isarerí kayoi ánon banta kayo vá ano Yisasi vaintá eriven máa sen béin inaemí, “Éi inte ákona fosá mai yanásinta varyákeya inká iye anó éin mai yorarí ono siren ná mai ákona amikhen nafino.”

<sup>24</sup> Máa sen ina íkan Yisasi evaránen betin tiamemí, “Tiretin má dere mana inain ina urékuya ma funtáde sisimiresí maéi mai ma yorarí ino van ma simikhein ákona ana siamenté uno. <sup>25</sup> Banasi ma monó non péantán mai ákona Yoni inte fákená mantaren nafino. Mai ákona maen Tiyarafenu fintesá erikharen nafi áa varará banta fintesá erikharen nafino.”

Máa síkan betíyan ten inen emí, “Mai setí ma ‘Tiyarafenu finté erikhén mino’ ma sékun maen mai véi máa sen tetin ina inten mino, ‘Mai fará Yonini vayará ída mumunan iya fono.’ <sup>26</sup> \*Máa sinten mifo mai setí ma ‘varará banta finté erikhén mino’ ma sékun maen mai Yoni mana sakhanampa vantán

bákán minó ano afová ukhein mifo seti vanasi vará perá tifano.”

<sup>27</sup> Máa siren betí ankan evaránen Yisasin tiamemí, “Téi ankan ída afová ukhé tiféuno.”

Síkan Yisasi vetin tiamemí, “Mai séin má dere iye anó ákona simikhará doriya rafu mai saretin ída siamenté uno.”

### *Kan Anavasantá Ma Ovaéádan Baya Ino*

<sup>28</sup> Máa siren “tireti inte inin ná iniya rafono” sen inaemí, “Mana vanta ano ain iyampon kanan dákaren esékena iyampon mo máa sen tiamemí, ‘Tanin noe, saréa uvaini yunampin ná mo yorano.’

<sup>29</sup> “Máa síkan mai iyampon mano semí, ‘Tifon kiyá uno,’ siren ineine uvákon den ínaimpáke oren mino.

<sup>30</sup> “Máa siran be afóe ano ena iyampon baintá onóben mai ma sein baya ana mo síkan mai iyampon mano ‘eyo oronté uno’ siren ída oren mino.

<sup>31</sup> “Mai iyampon kanan pinté iye anó be afóen oo yaiyen nafino.”

Síkan betí ankan temí, “Eséke ano ino.”

Máa síkan Yisasi vetin tiamemí, “Téi fura siré tiretin tiamiyá uno. Takisi varan banta kayo vá pamúku nanin arinta vá ano naren tiretin esanten Ti-yarafenu yafisimpin oferanten mino. <sup>32</sup> \*Mai fara vara seyo, Yoni saretimpin afoká uven puntákein avúavá tiretin aní iya sretí ída ventá mumunan e ompo takisi varan banta kayo vá pamúku nanin arinta vá ano anan bentá mumunan en mino. Tireti ankan mai ódare ompo ída ará baédeya ventá mumunan e ono.

*Uvaini Yunan Anaará Ma Namu  
Yafisirí in Banta Kéká Pákena Ma  
Sian Baéádan Baya Ino*

(Maki 12:1-12; Ruku 20:9-19)

\* **21:22:** Mat 7:7-11; 18:19    \* **21:26:** Mat 14:5  
5:1-2

\* **21:32:** Ruk 3:12; 7:29-30    \* **21:33:** Ais

33 \*“Ena ovaeran baya ifo vá tiretí ankan ná ineno. Mana vanta ano uvaini yunan dóden dafuí uren maen uvaini afu kúduren ma yasáden anu kasin nain masí maifin uáden inká dunan anará ma yafisin nain mana yan bain namun uvamá daren nentá bain barufá orono van iyáken manáa vanta kéká ano yafíantano van mai yunan anan me vetin ayampin kaen mino.”<sup>34</sup> O varé íkan uvaini aran kúdin damusí íkan maifin ma yoriyain banta kayo vaípákena uvaini aran ma kúduádan o varano van bei yoran banta kéká tiantan oren mino.

35 “Oríkan maen mai yunampin ma yoriyaré ein banta kayo ano mai yoran banta kéká dakhádan orera iyákan mana fákaren anka-men ena aruan puren inká ena onámaná ankamádan puren mino.

36 Máan turan mai yunan ana afóe ano evaránen pe ma siantan orikhá ein esantaren kokhon doran banta siantan oríkan maen mai yunampin ma yoriyaré ein kayo ano mai ma gefá ma ukharé ein avúavá ana mai yoran banta kayo amaniná kaen mino.<sup>37</sup> Máan mana iyaimpin ‘te sanin avayan ininten mino’ siren dunan afóe ano ínaimpáké be anin tiantan mai kéká baípá oren mino.

38 \*“Oríkan maen mai yunampin ma yoran banta kayo ano ve anin ódaren betiyan máa sen oreraemí, ‘Ma vanta anon minó be afóen nina yanasinta varanten mifo erí tifé béin aruan púdé benina yanasinta vará tifano.’<sup>39</sup> \*Máa siren betí ankan béin pákaren mai yunan dafu fintena yarifen akhempá morúden aruan puren mino.

40 “Máan ten mifo siretí ankan inte esá té iniya rafono. Ínaimpá mai uvaini yunan afóe ma eriven maen mai yunampin ma yoriyá

ein banta kayo amaniná inte yaná avúavasá kainten nafino.”

41 Máa síkan betí ankan bén tiameémí, “Mai ma namu avúavá barein banta kayo me aruan púden maen uvaini aran ma kúdin damú ma erintin ma kúduren bariyan ma véi siran nain máa uvaini aran ma kanaíen bén ameren kéká ayampin mi mai yunan ana kainten mino.”

42 \*Máa síkan Yisasi yetin tiameémí, “Tiretí ankan ídá Ti-yarafenui vompon dókifin ma ma vaya vain mai yankáke fono. Mai vaya máan mi sikhen mino,

“Má uvaran banta kayo ano ma yo maman karúdein onámaná ano  
maman má dádaimpin mana  
ákona onámanasí ukhen mino.

Mai Bafan mánon máan turan  
mai anon tetin tivorá kama  
ukhen mino.”<sup>40</sup> *Ibo 118:22-23*

43 “Máan tukhái séi siretí tiameýá uno. Ti-yarafenu ano siretí ankan ayan pintena vei yafisin baru e yafiaren maen maifin ma kamaen aran iran nain nanin bantan aminten mino.<sup>41</sup> Banta ano ma mai onámaná daró ma erave ankaminona ano kisikhási inono. Inká mai onámaná ano ma mana vanta amaniná ma eravinten ankaman tafin tafin uádanten mino.”\*

45 Yisasi ma yunan anará namu yafisirí in banta kaylorá ma sian baerein baya van monó ánon banta kéká bá Farasisi kayo vá ano setin nan mi siyan mino sen afovaen mino.<sup>42</sup> Afová uren betí ankan Yisasin pákano van en mifo vanasi ano Yisasi nan sakhanampa vanta ino sen iniyákan mai van betí ankan banasi van péden ifá en mino.

\* 21:38: Mat 27:18    \* 21:39: Ibu 13:12    \* feanten bompon dókifin mai vesí ída van mino.

21:42: Rom 9:33; 1Pi 2:6-8    \* 21:44: Manáa

## 22

*Anasií In Omáká Ma Ovaéádan  
Baya Ino  
(Ruku 14:15-24)*

<sup>1</sup> Yisasi ena vaya máa sen tian baéan betin amemí, <sup>2</sup> “Inaru yafisin máan mi ukhen mino. Mana kin mano ma ve anin anasi iman ameno van iyákan ma kákán dunan tariyainí ukhen mino. <sup>3</sup> Tarano van ma iyáken maen mai ma gefá arakhá ein kéká ano mai omáká eriven dunan nano van bei yoran banta kéká tiantan mo siamíkan ifá en oreraen mino.

<sup>4</sup> “Máa siyaimpin béis evaránen manáa kokhon doran banta siantan oriyákan tiameemí, ‘Mai ma gefá arakheruna kayo vá tiameño. Téi afon kao kayo vá kákán aino víkakhein tafúna kayo vá inka aruré tamádé umpo eriven ná ma anasií in omáká ma samáderuna yunan ná nano sen mino vá te siameño.’

<sup>5</sup> “Doran banta kéká ano mo máa sen tiameíkan maen mai kayo ano ída inen mino. Mana ano me ifá en bei yunampá oríkan inká ena ano me ifá en bei moní dorantá orin en mino. <sup>6</sup> \*Máan tíkan manáa ano mai kini yoran banta kéká pákaren namu arirí uren aruan puren mino. <sup>7</sup> Aruan púdeimpin kin mano aran karen bei aruvín banta kéká tiantan mai ma vei yoran banta kéká arein banta kayo mo aruan minó kíparen betii varu saman kauren mino.

<sup>8</sup> “Taman kaúdán kin mano vei yoran banta kayo máa sen tiameemí, ‘Anasií in dunan inka samádán ban mifo mai sarampín erino van ma areruna kéká ano inian kaumpán uren pasen ída eren <sup>9</sup> mifo saretí ankan oriveya aayana fáke ma onanona nanin banta avire eresin ná anasií in dunan me nano.’ <sup>10</sup> Máa síkan doran banta kayo ano ayanafá orera uven kama nanin banta vá namu nanin banta vá iyanuan

meran mai namun e víkaven mai yunan nen mino.

<sup>11</sup> “Niyákan kin mano vanasi ma e iyukhein onano van mai namun un pében onákan mana vanta ano anasií in damú ma uren oriyain buí daná ída ukharen mino. <sup>12</sup> Ída ukharé íkan kin mano véin inaemí, ‘Tirona oe, náisá iyá éi ída anasií in damú ma iyain buí daná ureyá e va fono.’ Máa síkan mai vanta ano ída vaya sen mino.

<sup>13</sup> \*“Ída vaya siyaimpin kin mano máa sen doran banta kayo siameemí, ‘Tiretí ankan béis ayan arantantá damureya karúdan titípafin o váken ifí diyan aveantuntá inkekípiyan bano.’

<sup>14</sup> “Para vara seyo, kokhon nanin bantan Tiyarafenu ano arakhen mifo manáa aní ukhein mino.

*Kamanin Ma Takisi Amin Baya Ino*

*(Maki 12:13-17; Ruku 20:20-26)*

<sup>15</sup> \*Máa siyaimpin Yisasin mákádantin manáa ída funtákein baya sirantí beni vayará kó tiantano van Farasisi kayo ano o átaru uven baya sen inen en mino. <sup>16</sup> Betí ankan betii eyo iyampon kayo vá manáa Erotini anan banta kéká bá tiantan Yisasi vaípá oriven mo máa semí, “Aru soe, setí ankan afová ukhékuya éi fura vaya ana sin banta ono. Éi fura sikhein baya fóké anan Tiyarafenui avúavá baya sian banasi amé iya ono. Aví bain banta fi ída aví bain banta fi éi minó manaí ukhein baya anan ída feran tiámé iya ono. <sup>17</sup> Máan té iya ompo ei ineine setin tisimeno. Sisan ma sakisi amin mai kama ukhen nafino áa ída fino.”

<sup>18</sup> Máa síkan Yisasi vetí ankaní ineinefin pe afová ukhen temí, “Tireti vaya ana siren ída mai vaya ánaí dakhafin banta kéká ompo fará tiretí ten mákáan oniya rafono. <sup>19</sup> Takisi ma amé iyaona mai

\* 22:6: Mat 21:35

\* 22:13: Mat 8:12; 25:30; Ruk 13:28

\* 22:15: Mak 3:6

moní mana aní onano.” Síkan betí ankan mana moní baren béin me amen mino. <sup>20</sup> Amírákan Yisasi vetí ankan máa sen inaemí, “Ma iyen aman má iyen aví basá ban nafino.”

<sup>21</sup> \*Máa síkan betí ankan evaránen temí, “Sisan nina ino.”

Síkan béisvetin tiämémi, “Sisan nina yanasá Sisan ame vá inká Ti-yarafenu ina yanasá Tiyarafenun ná ameno.”

<sup>22</sup> Máa síkan betí ankan mai vaya iniren kokhon ineine uvákon béisvan me ampirenen oren mino.

### *Pükaren Ma E Mantaven Ábasuí Inain Baya Ino*

(Maki 12:18-27; Ruku 20:27-40)

<sup>23</sup> \*Maí damú ana Sadyusi kéká ano Yisasi vaintá eren mino. Mai kéká ano furin banta van ída evaránen e mantanten ne siyain bákán máa sen betí Yisasin inaemí, <sup>24</sup> \*“Aru soe, Mosesi máa sen tetin tisimikhen mino. Mana vanta ano ma anasi mantaren ída iyampon kainton ma fúbintin maen ná ben afá ayáe ano vá mai nanin máden ná mai vanta avíkosá iyampon kauantantin ná ben aví ída vá kipano. <sup>25</sup> Máa sikhan mi gefá tetimpin dan manápá ifo afápá kan un kádan anavádano varen esékena ano anasi mantaren ída iyampon kain na fúbin be afá ano mai nanin baren mino. <sup>26</sup> Mantaren mai ven ánaín tena vanta ano ída iyampon kainton púbikan mai rákena vanta ano mai nanin mana mantaren púbin e máan ten oriyen minó dan manápá ifo afápá kan un kádan anavádano anon mai mana nanin manan mantaren mino. <sup>27</sup> Mantaren minó banta ano fúbikan ínaiimpáké mai nanin dere furen mino. <sup>28</sup> Máan tukharen mifo ínaiimpá ma furin banta ma evaránen e mantan nain damú mai nanin mano yan manápá ifo afápá kan un kádan anavádano

mantaren mifo mai véi iyen anasá banten nafino.”

<sup>29</sup> Máa síkan Yisasi evaránen betin tiämémi, “Tireti ankan Ti-yarafenu vompon dókifin ma vain baya vá beni ákona vá ída afová ukheyen baya asuse iya rono. <sup>30</sup> Purin banta kéká ma evaránen e mantan nain damú mai nanin banta kéká ano ída ábasuí inten mifo inaruráke enisor kayo an manan den orera inten mino.

<sup>31</sup> Máan tinten mifo furin bantai e mantan nan ma siyaona vayará téi sretin inaintó uno. Ti-yarafenu ano ma sretin nan máa sikhein baya ída dankáke rafono.

<sup>32</sup> \*“Téi Abaraamun má Aisakin má Yekopun mái Ayarafenu uno.” Eks 3:6

Béisí ída furin nanin bantai Ayarafenu ifo ayun ma fara vain nanin bantai Ayarafenu ino.”

<sup>33</sup> Máa síkan banasi ano veni vaya iniren takhaen oreraen mino.

### *Moéken Kákani Ma Ukhein Man Baya Fákena Vaya Ino*

(Maki 12:28-31; Ruku 10:25-28)

<sup>34</sup> Yisasi ma mai vaya sein nan Sadyusi kéká ano ída vaya siyaimpin Farasisi kayo ano mai vaya iniren betiyan o átaru en mino. <sup>35</sup> Betí aúbaná mana man baya ma afová ukhein banta varen Yisasin akhenóka uan onen máa semí,

<sup>36</sup> “Aru soe, intéa man baya anó minó man baya esantaren ná es- esí ukhen nafino.” <sup>37</sup> Máa síkan Yisasi evaránen temí, “Ei Bafan Ti-yarafenun ná e aú amafon má ei ineinefó basá anunu ono.” Diu 6:5

<sup>38</sup> Ma esé ma araién kákani suron ukhein man baya ino. <sup>39</sup> Mairá ben oyampá ma ven má manaí ukhein man baya máan mí ukhen mino. ‘Eyan nan ma anunu iyaonaíe vá ena van anunu ono.’ Riv 19:18

<sup>40</sup> \*Ma man bayá kanan manon mai minó man baya vá

\* 22:21: Rom 13:7 \* 22:23: Apo 23:8 \* 22:24: Diu 25:5 \* 22:32: Mat 8:11 \* 22:40:  
Rom 13:10; Kar 5:14

sakhanampa vanta kayoi vaya vái ana uron mi van mino."

*Tiyarafenu Ano Ma Aní Ukhein Banta Mai Iyen Anin Nafino*  
(Maki 12:35-37; Ruku 20:41-44)

<sup>41</sup> Farasisi kayo ma átaru ukhen baré íkan maen Yisasi vetin in-aemí, <sup>42</sup>\* "Tiyarafenu ano ma aní ukhein banta van tiretí inté esá teyá iniya rafono. Mai véi iyen anin nafino."

Máa síkan betí ankan evaránen temí, "Devitin anin mino."

<sup>43</sup> Máa síkan Yisasi vetin inaemí, "Mai intesá ukhan ná Kantá Aunán mano ineine Devitin amin ná mai vanta van Bafan ne sen nafino. Deviti máa sikhen mino,

<sup>44</sup>\* "Bafan mano senti Bafan máa sen tiámemí,

"Éi sen tiyan kurompá kuman-tesirá  
eni namuro maman

en aránaópá kaúdéku vá  
ono." *Ibo 110:1*

<sup>45</sup> Mai vanta van ma Deviti Bafan ne sikhan tiya mai saretí intesá eyá ben nan Devitin Anin ne sinte fono." <sup>46</sup> Máa sirákan mana ano ída anona evaránen Yisasini vaya siamin nainí eimpin péden mai ráké betí ankan ída mana yana san béin inaen mino.

## 23

*Yisasi Ma Farasisi Kayo Van Amaan Baya Sein Mino*  
(Maki 12:38-39; Ruku 11:43, 46, 20:45-46)

<sup>1</sup> Máa sen inauren mairá Yisasi vei eyo iyampon kayo vá banasi vá tiamen temí, <sup>2</sup> "Man bayá ma afrová ukhein banta kéká bá Farasisi kayo vá anon Mosesi ma iyá einién mi man bayá vaéan tiretin amiyan mino. <sup>3</sup>\* Máan tukhanti vá minó bayá ma vetí siamin nain inire vá mai ánaín ná dakhafono. Dakhafin nompo vetí ankan ma variyain avúavá ída vá barano.

\* 22:42: Yon 7:42 \* 22:44: Mat 26:64 \* 23:3: Mar 2:7-8 \* 23:5: Eks 13:9; Nam 15:38-39; Diu 6:8; Mat 6:1 \* 23:11: Mat 20:26; Mak 9:35; Ruk 22:26 \* 23:12: Yop 22:29; Pro 29:23; Ruk 14:11; 18:14

Kokhon bayá vetí siren ída mai vaya kayo ánaín dakhafé iyan mino. <sup>4</sup> Betí ankan mana uman dakhein bayafó banasi siamin mai uman baren oriyan mifo vetí ída mana yáman máafó mai kayo e aya é iyan mino.

<sup>5</sup>\* "Banasi ano onano van mi minó daná betí ankan baré iyan mino. Kákán amúkin ana ayafentá damuren inká anan kayo vetí ayá au anamun átontá damiyan é iyan mino. <sup>6</sup> Kákán omá dunan ma sariyan ma átaruimpin betí ankan esé an kará ana varyáken inká monó átaru namun kayofin ina esé avorú karáká anan kumanin kayo ino. <sup>7</sup> Minó daná ma kain miyaní in barurá banasi ano vayan mino siyantin inká aru soe sen arano van mi vetí ankan anunu iyan mino.

<sup>8</sup>\* "Máan tiyan mifo saretin nan banasi ano ída vá aru soe sino. Para vara seyo, saretí Kákán manan bákayan tireti minó ano mana nanin banta an mi yakha rono. <sup>9</sup> Ma varará ída vá mana vanta van tiretí ankan mano sifóe oe seno. Mana Afóe anan beyaká inarufá ban mino. <sup>10</sup> Minó ano ída vá éin nan aru soe sino. Para vara seyo, Tiyarafenu ano ma aní ukhein banta anan tiretí arú ban mino. <sup>11</sup>\* Tiretí ankani ánon banta ano vá tiretí yoran bantai sá ino. <sup>12</sup>\* Mai fara vara seyo, ve aví ma yaní inain banta aví barará eravintin maen inká be aví ma vararasí inain banta ano kákán bí baranten mino."

*Yisasi Ma Farasisi Kayo Asein Baya Ino*  
(Maki 12:40; Ruku 11:39-52, 20:47)

<sup>13-14</sup> Yisasi evaránen máa semí, "Tiretí Farasisi kayo vá man bayá ma afrová ukheona vanta kéká ba soe, vaya ma sireya ída mai ánaín dakhafé iya ono! Inaru yafisini

ona munkiya vákeya siretiyantá ída maifin oferiya ono. Banasi ano ma maifin oferano van ma iya mae vetin ida áen nan oferiyain mai sireti kákán uman uron mi varan nono.\*

<sup>15</sup> “Man baya ma afová ukheona vanta kayo vá Farasisi kéká ba soe, kákán uman uron mi varan nono! Tireti vaya ma sire ída mai ánaín dakhafé iya ono. Tireti ankan ma varará bá un nompin má ma noreya ma mana vanta o avíán tiretimpin kauren nan ma sretin an davi mae véin maman aron ída van ma ira kiyan uman baren berai siyan purin baru finté vanta an daádiya ono. Tireti ankan manon béin avíáde nan mi véi moéken tiretin esantaren namu avúavá bariyan mino.

<sup>16</sup>\*“Tireti ankan auu yufúukhein kéká anon banta aa aní uantano van iyaona sireti kákán uman uron mi varan nono. Tireti ankan máa sé iya ono. ‘Banta ano ma Tiyarafenu amáká ma o siaren asíká ayan befió uren ma fura ódino siren té iyain mai sitó daná ifo Tiyarafenu amápin ma vain korirá ma o siaren ma asíká ayan befió ma uranten ná mai ma véi siran nainisá ino.’<sup>17</sup> Tireti ankan auu yufúukukha óén banta kéká soe! Inte yaná anó kákán daná ban nafino. Kori anó kákání ukhen nafi áa kákán monó namun manó kori maman kantasí ukhen nafino. Tireti ankan afová ukha ono kákán monó namun mai anon kákání ukhan mai Tiyarafenu inan ban mino.<sup>18</sup> Tireti ankan máa sé iya ono. Mana ano ma íkun uan amin onámáná ma karánará ukheintá ma o siaren asíká ayan befió é iyain mai sitó daná ifo íkun uan amino van ma amiyaín danasintará ma o siaren asíká

ayan befió uranten ná mai ma véi siran nainisá ino.<sup>19</sup> Tireti ankan auu yufúukhein banta kéká soe! Inte yaná anó kákán daná ban nafino. Íkun ma uan amin danasinta anó kákání ukhen nafi áa íkun ma uan amin onámáná ma karánará ukhein manó mai ma íkun uan amin danasinta maman kantasí ukhen nafino. Tireti ankan afová ukha ono yunan ma íkun uan amin kará daró ma vain mai anon kákání ukhan mai Tiyarafenu ina ino.<sup>20</sup> Máan tukhan mi mana ano ma íkun uan amin onámáná ma karánará ukheintá ma o siaren asíká ayan befió é iyan, mai anon íkun ma uan amin kará bá mai yaró ma íkun uan amin danasinta ma vaintái vei vaya sian ákoné iyan mino.<sup>21</sup> Máan té iyan mifo mana ano ma Tiyarafenu amáká ma o siaren ma asíká ayan befió é iyain mai anon Tiyarafenu vá ben amáká bái vei vaya sian ákoné iyan mino.<sup>22</sup> \*Mana ano ma inaru van o siaren ma asíká ayan befió é iyan mai anon Tiyarafenui kumanin karái vákan mairá béis kumanntan mi vei vaya sian ákoné iyan mino.

<sup>23</sup>\*“Máan tiyan mifo sretí ankan man baya ma afová ukheona vanta kayo vá Farasisi kéká bá ano vaya ma sireya ída mai ánaín dakhafin kékái vaona kákán uman uron mi varan nono. Tireti ankan dunan ana fintena yanásinta siyan míkan pintan daídeya mana masiman Tiyarafenun améiya ompo man bayafin ma moéken kákání ukhein man baya máan tireti ampikha ono. Mai ma funtákein avúavá baya máa mai máan mi ukhen mino. Puntákein avúavá póké ma vanta yaimiyain má arunan in má inká Tiyarafenu vá ma súpá ukhen

\* **23:13-14:** Manáa Tiyarafenui vompon dókifin manáa vaya ma asotú ukhein mai vaya vesí 14 fin ban mino: 14 Man baya ma afová ukheona kéká bá Farasisi kayo vá ano kákán uman uron mi varan nono. Mai fara vara seyo, sireti ankan ída ayave váka varé nanin kayo mo mákáde vetin nina yanásinta variyáke maeya inká kampun te ayáká amuké iya rono. \* **23:16:** Mat

15:14 \* **23:22:** Ais 66:1; Mat 5:34 \* **23:23:** Riv 27:30; Mai 6:8

ban má ino. Ma máa man bayá anon moéken kákání ukhen mifo mai máa ánaín ná dakhafiyáke ída vá ena man bayá kayo vá dere ampeno. <sup>24</sup> Tiretí ankan auu yufúkukhein kékái vákeya sitó danasinta yo aíán karúdiá ompo kamerin nankuriya rono.

<sup>25</sup>\*“Máan tiyan mifo siretí ankan man bayá ma afová ukheona vanta kayo vá Farasisi kéká bá ano vaya ma sireya ída mai ánaín dakhafin kékái vaona kákán uman uron mi varan nono. Tiretí fereti vá kápi vá dantena ana seséin kéká ompo ena ina yaná ma aran nan avúavá bá eyan nan mana ma in avúavá bá ano anan mai aúpin bíkakhen mino. <sup>26</sup>Auu yufúkukhein Farasisi kéká soe! Pereti vá kápi vá aú pinte nare vá tesé uresin ná ínaiimpákesá dantena me avusese ino.

<sup>27</sup>\*“Máan tukhen mifo siretí ankan man bayá ma afová ukheona vanta kayo vá Farasisi kéká bá ano vaya ma sireya ída mai ánaín dakhafin kékái vaona kákán uman uron mi varan nono. Banta masíká ma efanten peni fédan ma kama ukhan oniyainíí ukha rofo masípin ma vanta ayampa kayo vá púta yanásinta vá ma vainíí siretí ukha rono.\* <sup>28</sup>\*Tiretí ankan má máan mi ukhe va ono. Banta ano siretin dan bukhafarái ódaren tiretin nan puntákein banta kéká ino sen iniyán mifo aúpin kampun avúavá bá man bayá yurafurin avúavá bá bíkakhein kéká ono.

<sup>29</sup>Yisasi evaránen máa semí, “Tiretí ankan man bayá ma afová ukheona vanta kayo vá Farasisi kéká bá ano vaya ma sireya ída mai ánaín dakhafin kékái vaona kákán uman uron mi varan nono. Tiretí ankan mano sakhanampa vanta kayoi masí uantádeya inká

puntákein kékái masíká kama auí uan kain banta kayo ono. <sup>30</sup>Máan tiya váke siretí ankan máa séiya ono, ‘Pefá tinafu siráo ma vá ein damú tetin má baré ída kanaié betin ayaé sakhanampa vanta kayo aruan puronté erunaren mino.’ <sup>31</sup>\*Máan ma siyaona anon sakhanampa vanta kéká ma aruan púkaré ein mai vanta kayo anavasin mi vá uno seja siretiyan aní iya ono. <sup>32</sup>Oriveya anafu aráo ano ma namu avúavá araí urein ná mo maman kípano!

<sup>33</sup>\*“Tiretí ankan namu osafae akhafana ono! Tiyarafenu ano ma siretin ma kó tiantáden ma ira kiyan uman baren berai siyan purin baru ma iyáantákein mai intesá eyá akhakhante rafono. <sup>34</sup>Máan tukhen mifo vá tiretí ankan ineno. Téi sakhanampa vanta kéká bá kama ineine vain banta kayo vá man bayá ma afová ukheona vanta kayo vá tiantékuñ tireti vaípá erinten mifo siretí ankan manáa yaa unkamádantá aruan puriya manáa sireti monó átoru namun kayofin aviáde yafiyó ankamiya mae manáa kéká baru vaintá e yakháon more mere esin orera inten mino. <sup>35</sup>\*Máan tukhein nan mi mai ma funtákein banta kéká ma Eborin táké araí ure ma are eriya ma Barakian anin Sekaraiyan ma Tiyarafenu amá bá íkun uan amin takhó aúbóná bá ma aruan pureona kékái nare miyan tiretí ankan amaninái erinten mino. <sup>36</sup>Téi fura siré tiretin tihamiyá uno. Mai namu avúavái miyan maen tare ma vaona nanin bantafin mi afoká inten mino.”

*Yisasi Ma Yerusaremí Baru Van Arunaná Barein Baya Ino*

(Ruku 13:34-35, 19:41-44)

<sup>37</sup>Yisasi evaránen temí, “Yerusaremí oe, Yersaremi oe, éi sakhanampa vanta kayo aruan

\* **23:25:** Mak 7:4   \* **23:27:** Apo 23:3   \* **23:27:** Iburu kayo ma vanta masí é iyain mai on boraádampin mi kaiyain bákán mai on masíká efanten penifó peré iyan mino.   \* **23:28:** Ruk 16:15   \* **23:31:** Apo 7:52   \* **23:33:** Mat 3:7; 12:34; Ruk 3:7   \* **23:35:** Esé 4:8; 2Kr 24:20-21

puriya ono. Máan tiyákeya Tiyarafenu ano ma sirenimpin tiantan erein banta kéká aruan purono van onámaná ankamiya ompo séi kokhon dádái anasi kokore ano ma ve ayan aránaópá be akhafana avían kaeiníi iyáku ompo sirení ankan ída ine ono.

<sup>38</sup> \*Ída inen nan Tiyarafenu ano eni kákán monó namun oyan amiran dúken mino. <sup>39</sup> Máan tukhái séi sirenín tiamiyá uno. Enádá bá tiretí ída sen tonan bare maeya maná damusí intiya 'Bafan avíka ma eriyain banta vá avábá uantano' sin nono. *Íbo 118:26*

## 24

*Kákán Monó Namun Ma Varákín Nain Baya Ino*

(Maki 13:1-2; Ruku 21:5-6)

<sup>1</sup> Yisasi ma kákán monó baru me ampireñ oriyákan maen bei eyo iyampon kayo ano ve vaintá eriven kákán monó namun kayo aní ono van en mino. <sup>2</sup> \*Máan tíkan béis vetin inaen temí, "Tiretí ankan ma kama namun kayó oniya rafono. Téi fura siré tiretin tiámé uno. Namuro ano me varákuren maen minó onámaná ída áintin ben ané ben ané ukhen banten mifo varakuádantin eraven asuse inten mino."

*Ma Vara Kípan Akhempá Ma Aní Daná Afokáin Nain Baya Ino*

(Maki 13:3-13; Ruku 21:7-19)

<sup>3</sup> Yisasi ma Orifí anu yontá kumantá íkan beni eyo iyampon kayo máa ano oriven béis inaemí, "Éi setin tisimeno. Inte yamusá mai yaná afoká inten nafino. Inte yaná ma afoká intirá tetí ankan onesá éin nan inka erintéin ma vara kípan ten mino sente rafuno."

<sup>4</sup> Máa síkón Yisasi evaránen betin tiámemí, "Banta ano sirenín mákasín nafo yafían ná ákona ono.

<sup>5</sup> \*Para vara seyo, kokhon nanin

banta ano eriven ten tiví tiaren máa sinten mino. Tiyarafenu ano ma aní ukharé ein bantan téi eré uno sirenín maen kokhon nanin banta máka sinten mino. <sup>6</sup> Tiretí ankan inesín aruvín baya vá aruvono van ma siyan nain baya vá mai van tiretí ída vá anú duman duman ono. Mai yanásinta erivintin maen ínaiimpákei ma vara ma kípan damú afoká inten mino. <sup>7</sup> Mana anan banta kéká ano e mantaaren ena anan banta vá aruvintin mana kini kéká ano e mantaaren ena kini kéká bá aruvintin manáa akhempá kákán anan afoká intin maen ma vara kaya intin inten mino. <sup>8</sup> Máan tinten mifo mai yanásinta ma afoká inain mano mai anasi ano ma aráin inamun nan ineiníi inten mino.

<sup>9</sup> \*“Máan ma intin maen ten naro sirenín tiretin ará namu uantáden avían namuro ayampin kaintin tiretin aruan purinten mino. <sup>10</sup> Maí damú tentá ma mumunan ukháiin nain nanin banta kéká ano vetíi mumunan ampintin erafuvintin beraran anan maran uaren ben avían namuro ayampin kain maran intin

<sup>11</sup> \*inká kampun sakhanampa vanta kayo afoká uven maen banasi máka siantanten mino. <sup>12</sup> Namu avúavá ano kákán intin maen kokhon nanin banta ano ena ma ará amin avúavá an pinten mino. <sup>13</sup> \*An pinten mifo ákonaen ban ma oriyán baréin nain mai nanin bantan ínaiimpá ma ma vara kípan nain damú Tiyarafenu ano evaránen aviranten mino.

<sup>14</sup> \*Tiyarafenu yafísintena vaya ma varará minó akhempá betí ano siamen orera intin ma minó nanin banta ano inirantin ínaiimpáke suron mi vara kípan damú erinten mino.

*Mana Namu Yana Suron Ma*

\* 23:38: 1Ki 9:7-8; Yer 22:5    \* 24:2: Ruk 19:44    \* 24:5: Mat 24:23-24; 1Yn 2:18    \* 24:9: Mat 10:22    \* 24:11: Mat 24:5, 24; 1Yn 4:1    \* 24:13: Mat 10:22    \* 24:14: Mat 28:19

**Afoká Inain Baya Ino**  
(Maki 13:14-23; Ruku 21:20-24)

15 \*“Pefá ma sakhanampa vanta Danierin oorá ma sikharé einén Tiyarafenu kantasi ukhein kákán monó namumpin mana namu yana suron afoká uven minó daná máden asuse intiya sretí ankan onan nompo ma vaya ma yankafin nain mano vá mai vayai ana afová ino. 16 Máa ma intin mái damusá Yudiá barafá ma vain nanin banta ano anufá ana vá karan orino. 17 \*Orintin maen ná be amá daró ma un baréin nain mano ída vá mana yaná be amá pintena eravuven barano van inino. 18 Máan ma intin maen dunan anafá ma o varé inaín mano ída vá evaránen be amá pintena vei ayá au anamun o varano. 19 Amú bá nanin kéká bá iyampon ma nan kuviyán bain nanin kayo vá ano maí damú ma erintin maen kákán uman mi varanten mino. 20 Á den iyon in damu safi Sabati yamu safi mai yaná afóka inafo amúkesin ná pasavi yamusá afoká inti vá karan orono. 21 \*Para vara seyo, ma vara ma araíen uvarein táké ma eren tare ma e vaona aúban ída máan uman afoká ukharé ein uman mi maí damú afoká inten mifo ída máan uman ínaimpá afoká inten mino. 22 Tiyarafenu ano ma ída máan uman kayoi yamú ma maman asíkái intin maen minó nanin bantan afeyoranten mifo véi ma fe iyákein nanin banta van ma ininten maen maí damú maman asíkái inten mino. 23 \*Maí damú ma mana vanta ano ma sretin tiamen ma onano, Tiyarafenu ano ma aní ukharé ein banta masi mafá ban mino áa mesapá ban mino ma sintiya ída vá betíi vayará mumunan ono. 24 \*Para vara seyo, manáa

\* 24:15: Dan 9:27; 11:31; 12:11    \* 24:17: Ruk 17:31    \* 24:21: Dan 12:1    \* 24:23: Mat 24:5    \* 24:24: Diu 13:1-3; 2Te 2:8-9; Rev 13:13-14    \* 24:26: Ruk 17:23-24    \* 24:27: Mat 24:37-39    \* 24:28: Ruk 17:37    \* 24:29: 2Pi 3:10; Rev 6:12-13    \* 24:30: Dan 7:13; Sek 12:10; Rev 1:7

kampun sakhanampa vanta ano eriven maen máa sinten mino, Tiyarafenu ano ma aní ukharé ein téi mai vantán báké mana sakhanampa vantan bá uno.’ Máa siren maen ara ara aní danasinta vá kákán enará ukhein danasinta vá afoká inten mino. Afoká uren kokhon nanin banta aviren mo asuse iyáken Tiyarafenu ano ma veyan iyákein nanin banta vá dere kasaen kufa uádanten mino. 25 Ineno. Mai yanásinta afoká intéíi séi sretin pe o útúbé tiamiyá uno.

26 \*“Tiamé umpsa manáa ano ma sretí ankan tiamen ma Tiyarafenu ano ma aní ukhein banta mesapá banta ída van kámápá ban mino ma sintiya ída vá maifá orono. Ma namumpin aúpá ban ne ma sintiya sretí ída vá betíi vayará mumunan ono. 27 \*Tireti ankan afová ukha ono. Áau e uní páké ma afayuí uaren ma áau orun perápá ma aravé iyain máa uran mi Banta Anin ma erin nain damú intin mi minó nanin banta ano onanten mino. 28 \*Purin banta kayo au ma asenten bain mai varurái sumpan kayo ano o átarué iyan mino.

**Banta Anin Ma Overánen Erin Nain Baya Ino**

(Maki 13:24-27; Ruku 21:25-28)

29 \*“Mai kákán uman kayo ma kípán nain damú anan  
áau ano sitipa intin

    biyon ída ena vá kantin  
    ayon táké minó ofu kayo kararen  
        eravintin  
        minó ákona yaná ma inarurá  
            báin nain mano kayamana  
            inten mino.”” Ais 13:10;  
            34:4; Isi 32:7; Yoe 2:10, 31

30 \*“Maí damú Banta Anini aní daná ma ayontá afoká intin mi varará nanin banta ano ifí diyáken

onantin mi Banta Anin mano inaru fáké konan daró bei ákona vá kákán kakhan má erinten mino. <sup>31</sup>\*Eriyáken maen bei enisori kayo sintin ufen kákánien asiyáken ma vara minó akhempá oriven beyan ma iyákaré ein nanin banta avían átaru inten mino.

*Fiki Yaa Anará Ma Afova Varan Baya Ino*

(Maki 13:28-31; Ruku 21:29-33)

<sup>32</sup>“Tiretí ankan anna rasá afova varano. Anna amú ma eyavénan maeyan afeen aá kanten mino séiya ono.” <sup>33</sup>Máon ten ma minó daná afoká inti oniya mae vá mai Banta Anin inka ádé anantá ereno van onará mantakhen mino vá te afová ono. <sup>34</sup>\*Téi fura siré tiretin tiamiyá uno. Ma ma saréa vaona nanin banta ano ída fúkesin mi mai yanásinta afoká inten mino. <sup>35</sup>\*Inaru vá bara vá kípanten mifo senti vaya ída uron mi kípanten mino.

*Ída Mana Nanin Banta Ano Yisasi Ma Erin Nain Damú Bá Áau Vá Afová Úkhen Mino*

(Maki 13:32-37; Ruku 17:26-30, 34-36)

<sup>36</sup>\*“Ída mana nanin banta ano maí damú bá áau vá afová ukhan inaru ráké enisori kéká bá ano ída afováin be Anin mano yere ída afová ukhen mifo ve Afóe veyáká anan afová ukhen mino. <sup>37</sup>\*Mai ma Noani yamú aniana iyáiñ ma afoká einí ukhein avúavá anan Banta Anin ma ereno van iyantin maen afoká inten mino. <sup>38</sup>Ída ma á den non takhan banasi ano yunan táden non má niyáken anasi variyan inká arinta uviran maran en oriyain pintéi Noa votifin un peren mino. <sup>39</sup>\*Mai yaná ma afoká inain betí ankan ída afová ukharéin mi kákán á den non taaren banasi ufúan kípen mino.

Máon tukhein avúavá anan Banta Anin ma erin nain damú afoká inten mino. <sup>40</sup>Kankan banta ano ma yunampin baré intin Tiyarafenu ano mana avíoren mana ifá inten mino. <sup>41</sup>Kakan nanin mano ma vereti uvaran uviti yasamiyáre intin maen Tiyarafenu ano mana avíoren mana ifá inten mino.

<sup>42</sup>\*“Máon tinten mifo sretíí Bafan ma erin nain damú ída afová ukha ompo yafíke vá bano!

<sup>43</sup>\*Tiretí ankan mai vá afová ono. Umoyan banta ano ma inuran má barákin nain áau ma má afoé ano ma afová uren máká ma yafían ákona uvintin maen umoyan banta ano ída kanaíen mai namun barákuren ódinten mino. <sup>44</sup>Máon tukhen mifo sretí ankan ná utare vá bano. Mai fara vara seyo, sretí ma ída erinten mino se ininona yamúi Banta Anin mano erinten mino.

*Kama Yoran Banta Vá Namu Yoran Banta Vái Vaya Ino*

(Ruku 12:42-46)

<sup>45</sup>“Inte yoran banta anó kama ineine vákan kama yorarí iyan maen ná bei ayafa ano véin manan doran banta kaylorá dafisiní uran báken ná dunan daíden amin áuui ma íkan ná mai yoran banta kéká daiman amé iyan nafino.

<sup>46</sup>Mai yoran ma kamaen doriyan baré intin ma vei ayafa ano ma ovaránen e onan nain doran banta ano vá kákán amusin ino. <sup>47</sup>\*Téi fura siré tireti ankan tiamiyá uno. Ayafa ano mai yoran bantan manan kaintin benina yanásintará dafisinten mino. <sup>48</sup>Dafisinten mifo namu yoran banta ano maen beyan nan máa sinten mino, ‘Sesi ayafa vanta ano ayákai o van ída ainen ovaránen erinten mino’ siren maen <sup>49-50</sup>arona yoran banta kéká ankamiyáken ma inká non naren óen iyain banta kayo vá oriven ma yunan nen non nen

\* **24:31:** 1Ko 15:52; 1Te 4:16 \* **24:32:** Kriki vaya finté fiki yaa ana e sikhen mino. \* **24:34:**

Mat 16:28 \* **24:35:** Mat 5:18 \* **24:36:** Apo 1:7; 1Te 5:1-2 \* **24:37:** Esé 6:5-8 \* **24:39:**

Esé 7:21-23 \* **24:42:** Mat 25:13 \* **24:43:** Ruk 12:39-40; Rev 16:15 \* **24:47:** Mat 25:21,

iyáken ma vei ayafa van ída er-inten mino ma sen inin nain damúi erinten mino.<sup>51</sup> Eriven maen mai yoran banta sika sika uren tiantantin bayá siren ma ída mai ángan dakhafin banta kéká bá báken ifí diyan aveantuntá inkekí piyan berai siyan banten mino.

## 25

### Tiyán Míkan Aríntará Ma O Sian Baékein Baya Ino

<sup>1</sup> \*“Mái damú inaru yafisin mano siyan míkan arintai vaya an mi yanten mino. Mana vanta anasi iman amintéin béis eriyákan maen mai arinta kayo ano yaamu on uruaren mai ma anasii ono van iyain arinta amápin o ave inton oren mino. <sup>2</sup> Oren mifo yan manápá arintafin ída afova vákán inká dan manápá arintafin afova varen mino. <sup>3</sup> Mai ma ída afova vain arinta máa ano karasin ída varanton daamu ana varen oren mino. <sup>4</sup> Mai ma afova vain arinta máa ano yaamu variyan botorefin karasin banaaren oren mino. <sup>5</sup> Oríkan mai ma anasi iman ameno van iyain banta ano ída ainen eriyaimpin mai arinta kayo auu nan aiíkan auun baren oreraen mino.

<sup>6</sup> “Aun bakharen betí ankan iníkan inurán aúbaná mana vanta ano oovaren temí, ‘Anasi ma iman amin banta inka eren mifo varufá erafúbe avirano.’

<sup>7</sup> “Máa siyain má minó arinta ano orun mantaven daamu avové en oreraen mino. <sup>8</sup> Máan tiyákan afova ma ída vain arinta kéká ano afova ma vain arinta kayo máa sen tiamemí, ‘Tetinti yaamu yusimíri iyá umpo manáá karasin timeno.’

<sup>9</sup> “Máa síkan mai ma afova vain arinta kéká ano evaránen betin tiamemí, ‘Ída ino. Ma karasin mano minó tetimpin ída kanaí inten mifo saretí ankan orive vá mai ma karasin kaiyain pimpá dosirya miyaní ono.’

<sup>10</sup> “Máa síkan mai ma afova ída vain arinta kéká ano karasin barano van orivíkan anasi ma iman amin nain banta ano eren mino. Eríkan mai ma útakáh ein arinta máa ano mai vanta vá anasii ono van ma yunan tamádan baré ein namumpin un pébin ona munken mino.

<sup>11</sup> \*“Munkurákan ínaiimpáké ena arinta kéká ano enóben temí, ‘Kákán banta oe, kákán banta oe, setin ona yisintano!’

<sup>12</sup> \*“Máa síkan betin evaránen tiameemí, ‘Téi fura siré tiretin tiamiyá uno. Tiretin ída afová ukhé uno.’

<sup>13</sup> \*“Máan tukhein mifo vá Bafani erin damú bá áau vá tireti ída afová ukha ompo yañan ná ákona ono.

### Moniká Ma Kamaen Dafisin Nan Ma Sian Baéádan Baya Ino (Ruku 19:11-27)

<sup>14</sup> Máa siren Yisasi evaránen temí, “Mana vanta ano ayá barufá orono van iyáken ma vei yoran banta kayo átaru uren ma veina yanasinta vetin amintin dafisino van ma einíi inaru yafisin mano ukhen mino. <sup>15</sup> \*Mana mana yoran bantai avúavá bá ákona vá béis iniyáken moní daíden mana vanta yan manápá tauseni (5,000) moní amen inká ena vanta kan tauseni (2,000) moní amen ena vanta mana tauseni (1,000) moní amen urem béis me onen ena varufá oren mino. <sup>16</sup> Máan turen béis orivíkan mai ma yan manápá tauseni (5,000) moní ma mantaré ein banta ano ainen mai monípó dóáken ena yan manápá tauseni (5,000) veni aman moní o yóáden mino.

<sup>17</sup> Máan tíkan inká kan tauseni (2,000) moní ma mantaré ein banta vá ano mai monípó dóáken ena kan tauseni (2,000) aman moní o yóáden en mino. <sup>18</sup> Máan ten mifo mana tauseni (1,000) moní ma mantaré ein

\* 25:1: Ruk 12:35; Rev 19:7    \* 25:11: Ruk 13:25-27    \* 25:12: Mat 7:23    \* 25:13: Mat 24:42    \* 25:15: Rom 12:6

banta ano ve ayafai moní baren mo varafin úden aúpá masien mino.

<sup>19</sup> “Mai yoran banta kékái ayafa vanta ano ayáká o varen ínaimpáké ovaránen eriven mai ma moní amikharé ein nan puntarano van aran eren mino.” <sup>20</sup> Eriven dan manápá tauseni (5,000) moní ma mantaré ein banta ano ma ena yan manápá tauseni (5,000) moní bá ma yóan kova urákaré ein baren meren máa semí, ‘Kákán banta oe, onano. Éi yan manápá tauseni (5,000) moní ma simeonafó téi yódé ena yan manápá tauseni (5,000) vá maman kovaé uno.’

<sup>21</sup>\*“Máa síkan beni ayafa vanta ano véin evaránen tiamemí, ‘Éi kama yoran bantan bákeya mai moníká kama e yafibeya yoreóna kokhon danáká tékuya yafisin nompo eriveya sen má manafin amusin ono!’

<sup>22</sup> “Máa siran kan tauseni (2,000) moní ma mantaré ein banta váano yere eriven mai ma ena kan tauseni (2,000) moní bá ma yóan kova urakaré ein baren meren máa semí, ‘Ayafa vanta oe, onano. Éi kan tauseni (2,000) moní ma simeonafó téi yódé ena kan tauseni (2,000) vá maman kovaé uno.’

<sup>23</sup> “Máa síkan beni ayafa vanta ano véin evaránen tiamemí, ‘Éi kama yoran bantan bákeya mai moníká kama e yafibeya yoreóna kokhon danáká tékuya yafisin nompo eriveya sen má manafin amusin ono.’

<sup>24</sup> “Máa siran mana tauseni (1,000) moní ma mantaré ein banta váano eriven temí, ‘Ayafa vanta oe, éi ákoná vantan bákeya éi ma ída yókaré eona yunan unafiyákeya inká éi ma ída ayun pafasikharé eona yunan duyasiyaona vantan baná téi

afová ukhéi <sup>25</sup>e nan péde eni mana tauseni (1,000) moní barafin mo aúpá masi urakaré umpo ma ei moní ifo onano!”

<sup>26</sup> “Máa síkan kákán banta ano evaránen béin tiamemí, ‘Éi avesara yoran banta ompo séi ma ída yokaréeruna yunan ma unafiyákeye inká téi ma ída ayun pafasikharéeruna yunan ma yuyasiyáeruna mai máan in banta inó éi siya fono.” <sup>27</sup> Máan tiyaruna ifo éi fará tenti moní ída moní ma kain namumpin kaenan baré irá ovaráné ma ereruna yamú tesi moní bá aman moní bá bare rafuno.

<sup>28</sup> “Mai vará mana tauseni (1,000) moní ma mantá ein banta vaípáke vá dafian mai ma siyan míkan tauseni (10,000) moní ma yákein banta vá ameno.” <sup>29</sup>\*Para vara seyo, kokhon danasinta ma yantin baréin nain nanin bantan móeken aminten mino. Inká ída ma yakáin nain kéká ina mai sanáa ma yaká intin mai vá deren minó baranten mino.” <sup>30</sup>\*Máa siren temí, ‘Mai namu yoran banta karú desin ná barufá títipá ukheimpin orun báken ná ifí diyán aveantuntá inkekí piyan bano.’

### Memé Bá Sipisipi Vaká Ma Sian Baékein Baya Ino

<sup>31</sup>\*“Banta Anin ma erin nain damú bei kakhan má kantasi ukhein kin karáká kumamen enisorí kayo vá erinten mino.”

<sup>32</sup>\*Kumamen erintin maen enisorí kayo ano minó nanin banta o éke e éke uan bái vaintá me átaru urantin sipisipirá dafisin banta ano ma sipisipi yo aíáden memé do aíáden iyainíi en kampintan daiminten mino.” <sup>33</sup> Daíden sipisipi kayo ve ayan kurompá kaen inká memé kayo ve ayan ópá kaen inten mino.”

<sup>34</sup> “Máan turantin maen kin mano ayan kurompá ma vain

\* **25:21:** Mat 24:45-47; Ruk 16:10    \* **25:29:** 8:12; Ruk 13:28    \* **25:31:** Mat 16:27; 19:28

\* **25:30:** Mat 13:12; Mak 4:25; Ruk 8:18    \* **25:32:** Isi 34:17; Rev 20:11-13

nanin banta máa sen tiamintemí, 'Tifóe ano siretin nan amusin ureñ avábá ein mai ma vara ma arai ein tákéi inaru yafisimpin tiretin ninan utaan kaúantan baré ein mifo erive vá barano.'<sup>35</sup>\* Para vara seyo, séi sirafan bákeya yunán timikhare ono. Téi non nan ékuya non timikhare ono. Téi enafá banta erékuya e amápin e sivían kae ono.<sup>36</sup> Téi suí dana san ékuya simikhare ono. Téin túiyá bákuya sentá dafikare ono. Inká téi karavusifin bákuya o sontare ono.'

<sup>37</sup> "Máa sintin maen puntákein nanin banta ano evaránen bén máa sen tiamintemí, 'Bafan noe, inte yamusá éi arafan nan ená dunan amiré non nan ená non amé é tife rafuno. <sup>38</sup> Inte yamusá éi enafá bantá erenará aviré teti simá ore rafuno. Inte yamusá éi auí dana san enará amikharé tiferafuno. <sup>39</sup> Inte yamusá éin aí iya vayá inká karavusifin bayá ukhenasá tetí ankan o oné tiferafuno.'

<sup>40</sup>\* "Máa sintin maen kin mano evaránen betin tiamintemí, 'Téi fura sé tiretin tamiyá uno. Mai ma sen tifá tiváeyon ída aví bain kéká ká ma mai yanasinta variyareeron mai sentái variyare ono.'

<sup>41</sup>\* "Máan ma siren ayan ópá ma varéin nain kéká san kin mano máa sintemí, 'Afeyoran nanin banta sretí ankan tifó uveya Ban Anon má bei enisorí kéká bá ina ma ída kípan ira ma utaádon baré ein maifin ná orono. <sup>42</sup> Para vara seyo, séi sirafan bákeya yunán ída simikhare ono. Téi non nan ékuya non ída simikhare ono. Téi enafá banta erékuya e amápin ída e sivían kae ono. <sup>43</sup> Téi suí dana san ékuya ída simikhare ono. Téin túiyá bákuya sentá ída yafíkare ono. Inká téi karavusifin bákuya ída o sontare ono.'

<sup>44</sup> "Máan ma sintin maen betí ankan bén evaránen ina intemí,

'Bafan noe, inte yamusá éi arafan nan eyá non nan eyá enafá bantá ereyá auí dana san eyá aí iya vayá inká karavusifin bayá ukhenará tetí ankan ída aya é tiferafuno.'

<sup>45</sup> "Mágn ma sintin maen bái evaránen máa sen betin tiamintemí, 'Téi fura sé tiretin tamiyá uno. Mai ma sen tifá tiváeyon ída aví bain kéká ká ma ída mai yanasinta variyare eona mai sentái ída variyare ono.'

<sup>46</sup>\* "Máa sirantin maen mai nanin banta ano ma namu miyan o varan nain mai ída kípan para van oriyan ma van nain aí danái varanten mifo funtákein nanin banta ano ída kípan para van oriyan ban aunan baranten mino.

## 26

*Yisasin Arin Aa Van Ma Yosein  
Baya Ino  
(Maki 14:1-2; Ruku 22:1-2; Yoni 11:45-53)*

<sup>1</sup> Yisasi ma mai vaya kayo sian kípáren maen bei eyo iyampon kayo máa sen tiameemí, <sup>2</sup>\* "Tireti ankan afová ukha ono. Avo Uantan Damú ma afoká inain mai kan damú ana ein mi vetí ankan Banta Anin ayílan namuro ayampín kaintin bén daa unkamádantá arinten mino."

<sup>3</sup> Máan ma siyákan maen monó ánon banta kéká bá banasii ánon banta kéká bá ano mana monó ánon banta kékái ánon banta Kafiafasin amá átaru ukhen <sup>4</sup> Yisasin ma kampun tiren pákaren aruan purin nain aa van aúpáké ten inen iyaren mino. <sup>5</sup> Máan tiyáken beti semí, "Banasi ano ódaren aruvín dákó inafo Avo Uantan Damú teti ída vá ma yanasí ó tifano."

*Betaní Barurá Ma Yisasin  
Ánontá Aunka Uveri Vanaein Baya  
Ino  
(Maki 14:3-9; Yoni 12:1-8)*

\* 25:35: Ais 58:7

\* 25:40: Pro 19:17; Mat 10:42; Mak 9:41

\* 25:41: Mat 7:23

\* 25:46:

Dan 12:2; Yon 5:29

\* 26:2: Eks 12:1-27; Mat 20:18

\* 26:7: Ruk 7:37-38

<sup>6</sup> Betaní amon dana aí bain banta Saimonin amá Yisasi varé íkan <sup>7</sup>\*mana nanin mano kama auna iyain uveri kákán miyantá bain mamaren mai namun un pében Yisasi yunan nan takhó akhempá kumanten dunan niyaré íkan auna uveri ánompin mun banaen mino.

<sup>8</sup> Máan tíkan eyo iyampon kayo ano ódaren ará namuen oreraen temí, “Pará béis auna uveri savifá afe iyan nafino. <sup>9</sup> Ma kama aunka ma iyain uveri anan ma sarí uré moní mágde ona ma ída vain kéká ma ameren mino.”

<sup>10</sup> Betí ma siyain baya Yisasi afová urem máa sen tiameémí, “Tireti ankan pará ma nanin kakhirun ariyá ba rafono. Béis kama avúavasíi usintiyan mino. <sup>11</sup> \*Ena ena yamúi ona ída van kéká tiretin má banten mifo séi ída sirenín má ena ena vanté uno.

<sup>12</sup> Anasi ano ma auna uveri ma sen turá bana iyain mai senti masípin orin mi úta sintiyan mino. <sup>13</sup> Téi fura siré tiretin tiameiyá uno. Ínaimpá ma kama vaya ma varen minó bara akhempá ma orera intin ma nanin ma varein avúavá san tiren ininten mino.”

*Yudasi Ma Yisasin Namuro Ayampin Avián Kaono Van Kana Ino Sein Baya Ino*

(Maki 14:10-11; Ruku 22:3-6; Yoni 6:70-71)

<sup>14</sup> Maí damú tiyan míkan mifo sirantan kan orun kádan (12) eyo iyampon kayo fintena mana Yudas Iskariotin ne sin banta ano monó ánon banta kayo vaipá onóben <sup>15</sup>\*betin máa sen mo inaemí, “Téi ma Yisasin avián amirékuya mae séin nái yanasá timinte rafono.” Máa síkan teti (30) siriva moní dankáan ben amen mino. <sup>16</sup> Amirákan betí ayampin ma Yisasin avián amin nain aa van Yudas araíen dosen mino.

*Yisasi Ma Vei Eyo Iyampon Kayo Vá Avo Uantan Dunan Tipá Nein Baya Ino*

(Maki 14:12-21; Ruku 22:7-14, 21-23; Yoni 13:21-30)

<sup>17</sup>\*Yisi Ída Van Bereti Ma Nan Omá Damú kayoi esé araí in damú eyo iyampon kayo ano Yisasi vaintá eriven máa sen inaemí, “Intefasá mo funtáádesá tetí Ayo Uantan Dunan mo nanté tiferafuno.”

<sup>18</sup> Máa síkan Yisasi evaránen betin tiameémí, “Tireti kákán Yerusalemí barufin orive mana vanta ma onante máa se vá mai vanta siameno, ‘Tesi yamú inka ádé iyái sesi eyo iyampon kayo vá en amápin mo Avo Uantan Dunan naran muno sen arú ano semantino’ vá teno. <sup>19</sup> Máa siran mai ma Yisasi siameinén beni eyo iyampon kayo ano mo Avo Uantan dunan puntááden mino.

<sup>20-21</sup> Máan turan inúpákesí iyain má tiyan míkan mifo sirantan kan orun kádan (12) eyo iyampon kayo vá dunan nan takhoká Yisasi kumamen dunan niyáken temí, “Téi fura siré tiretin tiameiyá uno. Tiretin pinté mana ano sesi namuro ayampin téin tivíán kain nono.”

<sup>22</sup> Máa síkan minó eyo iyampon kayo ano mai vaya iníden arunan en orera iyáken mana mana ano máa sen Yisasin inaemí, “Bafan noe, ída sen ne sin nono.”

<sup>23</sup>\*Máa sen orera iyákan béis evaránen temí, “Ma ma sen má ma ayan kain ma yunan dókifin araviyain mai anon téin namuro ayampin tivíán kainten mino. <sup>24</sup>Tiyarafenu ano vompon dókifin tikharé einén Banta Anin mano furinten mifo Banta Anin ma namuro ayampin ma avián amin nain banta ano kákán uman uron mi varanten mino. Be anóe ano véin ída kaen baré intin mai kama inté ein mino.”

\* 26:11: Diu 15:11    \* 26:15: Sek 11:12; Yon 11:57    \* 26:17: Eks 12:14-20    \* 26:23: íbo 41:9

25 Mai ma namuro ayampin ma Yisasin kain nain banta Yudasi ano máa sen béin inaemí, “Aru soe, séin nará tiya fono.”

Síkan Yisasi véin tiamemí, “Eyantái se ono.”

*Yisasi Ma Vereti Vá Uvaini Vá Bei Eyo Iyampon Kayo Amein Baya Ino*

(Maki 14:22-26; Ruku 22:15-23; 1 Korini 11:23-25)

26 Betí ankan ma niyákan Yisasi mana vereti orun máden Tiyarafenu susu siantáden kisiren eyo iyampon kayo amiyan temí, “Ma séin tu ifo saretí ankan máde nano.”

27 Niyákan mana uvaini kápi orun máden Tiyarafenu susu siantáden temí, “Tiretí ankan minó ano ma finté vá nano.

28 \*Para vara seyo, senti nare ma vanain nain manon minó nanin bantai ume arúantáden tiretin má ma manafin kasen ban\* maman ákona inten mino. 29 Téi saretí tiamiyá uno. Marákéi séi ída uvaini anu nan oriyaré maéi Sifóeni yafisimpin mi saretí má manafin auyen uvaini anu nanté uno.”

30 \*Máa siren betí ankan mana monó ii daren kákán baru me ampiren Orifí anufá oren mino.

*Yisasi Ma Pita Nan Téin Oyan Timin Nono Sein Baya Ino*

(Maki 14:27-31; Ruku 22:31-34; Yoni 13:36-38)

31 \*Oriven Yisasi vei eyo iyampon kayo máa sen tiamemí, “Tare inuran manan minó daná ten turá afoká intiya ma oniyasin mi saretí mumunan eravinten mino. Mai van Tiyarafenu vompon dókifin máa sikhen mino:

“Téi sipisipirá dafisin banta arurékun  
sipisipi kéká meren asuse en  
karan orera inten mino.”  
*Sek 13:7*

\* 26:28: Eks 24:8; Yer 31:31-34; Sek 9:11; 1Ko 10:16  
sikhen mino: auyen kasen ban

\* 26:30: Ruk 22:39; Yon 18:1

Mat 28:7, 16

\* 26:34: Mat 26:69-75

\* 26:38: Yon 12:27

32 \*Máa tinten mifo séi evaráne e mantaaré tiretin an uanté Karirifá oronté uno.”

33 Máa síkan Pita evaránen béin tiamemí, “Éin aurá ma mai yaná afoká intin ma vetíi mumunan eravintin ma éin me ampiren karan orera intí maé téi ída uron mi éin me ampenté uno.”

34 \*Máa síkan Yisasi evaránen béin tiamemí, “Téi fura siré éin tiamiyá uno. Tare inuran manan kokore ída asikhantiya kanú manaú dádá ten nan ída afová ukhé uno sin nono.”

35 Máa síkan Pita véin tiamemí, “Ída ino. Téi en má purono van pasé ída éin afová ukhé uno, sé ída uron mi senté uno,” síkan minó eyo iyampon kayo ano máan baya ana sen oreraen mino.

*Yisasi Ma Ketsemani Amúkein Baya Ino*

(Maki 14:32-42; Ruku 22:39-46)

36 Yisasin má bei eyo iyampon kayo vá mana Ketsemani se siyain dunan anafin oriven maen betin tiamemí, “Tiretí ankan mará kumante sirá téi mesápá orivé mo simúkono.” 37 Máa siren Pita má Sebetin anin kanan má avíaren oriyáken be au kasiyan avádúan onákan ará uman den ben aufá ída kamaen mino.

38 \*Máa tiyáken betin tiamemí, “Téin tirá ma uman diyain mano ádé anantá téin tiruan purirí iyá umpo saretí ankan mará ten má ba vá dafiseno.”

39 Máa siren béri manáa nentá oriven barará o mátimen auná bara finí uren máa sen amúkemí, “Téin Tifóe oe, éi kanaí ma ukhanatiya mai kápi sen pintena yo varano van mi séi iyá umpo éi ída vá tenti sinunu yakhafono. Ei anunu ana vá dakhafono.”

40 Máa sen amúkuren Yisasi evaránen kanú manaú eyo iyampon baintá oriven onan auun bakharé íkan Pitan inaemí, “Ída

\* 26:28: Manáa vompon dókifin máa

\* 26:31: Yon 16:32

\* 26:32: Yon 12:27

mana áau rá ten má dafíke onante rafono.<sup>41</sup> Akhenókain tiretimpin afoká intiya erave ankamin nampo saretí ankan dafike vá amúkiya vano. Aú ano mai yana san asese ukhan mifo yan bukhafafin ída ákoná van mino.”

<sup>42</sup> MÁA siren béis evaránen oriven máa sen amúkemí, “Tifóe oe, mai kápi ma ída yo vararí intí maé téi nanté umpo mai ei anunu ánaín ná bákurono.”

<sup>43</sup> MÁA sen amúkuren ovaránen bei eyo iyampon kayo vaintá eriven onákan betin auunan ai eimpin auun bakharen mino. <sup>44</sup> Bakhan béis evaránen kanú manaú dádásí en oriven mo mai ma amúkein amúkiri anaen mino.

<sup>45</sup> Amúkuren béis evaránen eyo iyampon kayo vaintá oriven máa sen betin tiámemí, “Tiretí ankan aun ná bakhé bayá avíkiyá ba rafono. Onano. Ume vanta kayo ayampin ma Banta Anin ma kain nain áquí inka en mino. <sup>46</sup>\* Mantá oró tifano. Namuro ayampin ma séin tivian kain nain banta masi inka eriyan mino.”

### *Yisasini Namuro Kayo Ano Ma Véin Pákein Baya Ino*

(Maki 14:43-50; Ruku 22:47-53; Yoni 18:3-12)

<sup>47</sup> Yisasi mai vaya fara siyákan tiyan míkan mifo sirantan kan orun kádan (12) eyo iyampon kayo finté Yudasín ne sin banta eren mino. Monó ánon banta kéká bá banasii ánon banta kayo vá ano siantan kokhon banta ano sópe vá karápuna vá bariyan uaren béis má eren mino. <sup>48</sup> Yudasi ano ma Yisasin aní intin pákan nain nan pefá máa sen tiámkharen mino, “Téi ma mo amónanuna vanta mai Yisasi ifo vá mai vanta vá pákan.” <sup>49</sup> MÁA sirákaren béis manadá ainen Yisasi vaintá oriven

temí, “Aru soe, inuran mino.” Siyan béis amónen mino.

<sup>50</sup> Dafayoriyain má Yisasi máa sen béis tiámemí, “Tirona oe, éi ma varano van ereona yaná aine varano.”\*

MÁA siyain má minó banta ano Yisasi vaintá oriven bein páken mino. <sup>51</sup>\*Pákiyain má mana vanta ano Yisasin má baren tópe orun danúoren mana monó ánon banta kéká ánon bantai yoran banta átoren tíkaan kurúdan barará eraven mino. <sup>52</sup>\*Erayíkan Yisasi máa sen béis tiámemí, “Ei sópe evaráneya veni anamumpin kuferano. Tópefó ma aruvín banta kéká tópe anon arintin purinten mino. <sup>53</sup>Téin nan ída kanaíen Tifóe vaipá ina intin kokhon tauseni enisori kayo siantantin eriven téin tiya inten minó té tiretí iniya rafono. <sup>54</sup>Téi ma máan tékun maen Tiayarafenui vompon dókifin ma séin turá afoká ino yan ma siká ein baya ano ída kanaíen afoká inten mino.

<sup>55</sup>\*Mai áaurá ana Yisasi mai vanta kéká máa sen tiámemí, “Téi mana aau vantá bákuyá tiretí ankan téin pákan van tópe vá karápuna vá mamareyá ere rafono. Ena ena yamú ma séi monó dafufin báké banasi monó baya siamiyákeya fará mai rákena séin ída fáke rafono. <sup>56</sup>Sakhanampa vanta ano ma vompon uvamádan baré ein mai kanái ino yan mi mai yanásinta afoká en mino,” Yisasi ma máa sirákaren maen minó eyo iyampon kayo ano Yisasin me ampiren karan oreraen mino.

### *Yisasi Ma Kanisori Kéká Avorá O Mantein Baya Ino*

(Maki 14:53-65; Ruku 22:54-55, 63-71; Yoni 18:13-14, 19-24)

<sup>57</sup> Yisasi ma fákein banta kayo ano véin aviren monó ánon banta kéká ánon banta Kaiafasin amápin

\* **26:46:** Yon 14:31    \* **26:48:** Mai amónan avúavá ma vain mai arona ma kamaen avábá in mino.    \* **26:50:** Mánáa vompon dókifin máa semí, “Tirona oe, para éi mafá ere fono.”

\* **26:51:** Yon 18:26    \* **26:52:** Esé 9:6; Rev 13:10    \* **26:55:** Ruk 19:47; 21:37

mo khaen mino. Mai namumpin man bayá ma afová ukhein banta kayo vá banasii ánon banta kéká bá ano átaru ukharen mino.<sup>58</sup> Átaru ukhan Pita ano Yisasin bákuren oren mifo ída áde oriont nen táké en oriaren monó ánon banta kékáí ánon bantai yafufin ódiven inte yanásá Yisasin aurá afoká inten nafi mai onano van dafisin banta kéká bá un kumanen mino.

<sup>59</sup> Monó ánon banta kayo vá Kanisori kéká bá ano Yisasiní mana aaú yosiré mai anará bén aruan purono van kampun bayá sin banta kéká san dosen mino.<sup>60</sup> Dosiyákan kokhon banta kayo ano eriven kampun bayá kayofó ben aufin kurádiyan ten mifo ída mana aaú kanaíen tian afoká uren mairá bén aruan purin nainien mino. Máan tiyákan ínaimpáké kan banta ano eriven<sup>61</sup> \*máa semí, “Ma vanta ano Tiyarafenu kákán monó namun nan ‘téi kasaé barákuré kanú manaú damú ana evaráné uvaranté uno,” sikharen mino.”

<sup>62</sup> Máa síkan monó ánon banta kékáí ánon banta ano e mantaven Yisasin máa sen inaeímí, “Ma ma éin aufin kuráden tiyain bayá kayo van éi náiesá tinte fono. Éi ída mana vaya anona evaráne sinte fono.”<sup>63</sup> \*Máa síkan Yisasi ída mana vaya seimpin monó ánon banta kékáí ánon banta ano véin tiameémí, “Para ma ayun ban oriyan bain Tiyarafenu avíkasá éi fura seja setin tisimeno. Éi Tiyarafenu ano ma aní ukhein bantá bákeyá Ben Anin ná ba fono.”

<sup>64</sup> \*Máa síkan Yisasi evaránen betin tiameémí, “Mai inka eyantái se omo séi siren tiameémí uno. Ínaimpáké Banta Anin mano Minó Ákona Vain Tiyarafenu ayan kurompá kumamen inaru fáke konan daró erintiya onan nono.”

<sup>65</sup> \*Máa siyain má monó ánon banta kékáí ánon banta ano anú diyan bei au anamun bararó iyáken temí, “Béi Tiyarafenu varun bariyan mino. Tiretin má inikhen nan mi véi Tiyarafenu varun barein beyantái aau varanten mifo nái vará tetí ankan enádá bá manáa vanta arékun ná béní aau me sian amá inten nafino.<sup>66</sup> \*Ída ino! Tiretí ankan inte esá té iniya rafono.”

Máa síkan betí ankan oovaren temí, “Béimpin aau van mifo vá arin purino!”

<sup>67</sup> \*Máa siren Yisasin aufen akhare siyan ayan daná ankamen mino. Inká ena kéká ano ápa ankamiyáken temí,<sup>68</sup> “Éi seja Tiyarafenu ano aní ukhein banta uno séiya ompo inte vanta kayo anó éin ankamiyan nafi mai kayo aví éi sakhanampaí eya setin tisimeno.”

#### *Pita Ma Yisasin Nan Ída Afová Ukhé Uno Sein Baya Ino*

(Maki 14:66-72; Ruku 22:56-62;  
Yoni 18:15-18, 25-27)

<sup>69</sup> Máan tiyákan mai yafufin Pita kumantaré in mana yoran arinta ano veni áde eriven máa semí, “Kariri fáke vanta Yisasin má éi nore ono.”

<sup>70</sup> Máa síkan Pita minó banta avorá temí, “Ída ino. Mai ma éi siyaona vaya séi ída afová ukhé uno.”

<sup>71</sup> Máa siren ínaimpáké bái yafu onará oríkan ena yoran arinta ano ven ódaren mairá ma varé ein nanin banta máa sen tiameémí, “Ma vanta maen Nasaretíke Yisasin má baré ein banta ino.”

<sup>72</sup> Máa síkan Pita evaránen asiká ayan befio uren temí, “Pura ódino! Téi ída mai vanta afová ukhé uno!”

<sup>73</sup> Máa siren manáa vakan mairá ádé ma mantakharé ein banta kayo ano Pita vaintá eriven máa sen tiameémí, “Pura seja éi mai

\* **26:61:** Yon 2:19-21    \* **26:63:** Ais 53:7; Mat 27:12    \* **26:64:** Íbo 110:1; Dan 7:13; Mat 24:30    \* **26:65:** Mat 9:3; Yon 10:33    \* **26:66:** Riv 24:16; Yon 19:7    \* **26:67:** Ais 50:6; 53:5

kéká pintena vantana banan en amen avaya ano éin inka maman dákó en mino.”

<sup>74</sup> Máa síkan Pita ákonæn tiyáken, “Téi ída mai vanta afova ukhé umpo séi ma ída fura sekun maen ná Tiyarafenu ano séin uman timino,” ma siyain má ana kókore asen mino. <sup>75</sup> \*Kókore ma asiyain má Yisasi ma sikhá ein baya Pita ovaren me inen mino, “Kokore ma ída asikhantiya éi kanú manaú dádái sen nan ída afoyá ukhé uno sin nono.” Pita mai vaya ovaren me iniren barufá aravuven kákán ifíden mino.

## 27

*Monó Ánon Banta Kéká Ano  
Ma Pairotin Ayampin Yisasin Kaein  
Baya Ino*

(Maki 15:1; Ruku 23:1-2; Yoni 18:27-32)

<sup>1</sup> Do khakhiyain má pe ákura suron monó ánon banta kéká bá banasii ánon banta kayo vá ano Yisasin ma aruan purin nain baya sian damuáden mino. <sup>2</sup> Máan turan ínaímpáké ben ayantá damuren aviren kamanini ayafa vanta Pairotin ayampin mo khaen mino.

*Yudasi Ma Veyantá Aren Purein  
Baya Ino*

(Aposeri 1:18-19)

<sup>3</sup> Namuro ayampin ma Yisasin amein banta Yudasi ano onákán kó tiantáden Yisasin aruan puromo van iyaimpin béis arunan iyáken kokhon ineine uvákon mai ma monó ánon banta kéká bá banasii ánon banta kayo vá ano ma teti (30) siriva moní ma amikharé ein evaránen baren betin mo ameno van oren mino. <sup>4</sup> Mo amiyáken temí, “Ída mana aau vain bantan téi umeiéi saretin ayampin kaé uno.”

Síkan betí evaránen béis tiememí, “Mai éin nina yaná ifo ída setin tina yaná ino.”

<sup>5</sup> \*Máa siyaimpin Yudasi mai siriva moní baren kákán monó namumpin mo karúdaren beyantá mo anan aren mino.

<sup>6</sup> Monó ánon banta kayo ano mai siriva moní mamaren temí, “Ma moní mai vanta aruan purintáke miyan mifo setí ankan ída vá monó namunpintena moní bá manafiní erá man baya yurafuró tifano.” <sup>7</sup> Máa siren betí ankan baya sian damuaren bara kave ma uvaran banta kayo fintena mana vara miyaní uren mai vara manan enafáke vanta kayoi vanta masí in baraíen mino. <sup>8</sup> Máan turákan mai van mi mai vara aví den Nare Eravukhein Bara e sikhan mi saréa yere fara máa sen aví tiyan mino. <sup>9</sup> Máan ma ein manon pefá ma sakhanampa vanta Yeremaiyan oorá ma Tiyarafenu ano siádan baré ein mi fura sen afoká en mino. Béis máan mi sikharen mino: “Isarerí kéká ano mai vanta teti (30) siriva monípói miyaní onté uno siren ma yan baré ein moníi vetí ankan baren oren mi <sup>10</sup> Bafan mano ma sisimikhá einien mi mai monípóké bara kave uvaran banta kayoi vara o miyaníen mino.” <sup>11</sup> Sek 11:12-13; Yer 19:1-13; 32:6-9

*Yisasi Ma Pairotin Avorá O  
Mantein Baya Ino*

(Maki 15:2-5; Ruku 23:3-5; Yoni 18:33-38)

<sup>11</sup> Máan tiyákan kamanini ayafa vanta Pairotin avorá Yisasi o mantavin béis inaemí, “Eí Yutan kayoi kin na fono.”

Síkan Yisasi evaránen tiememí, “Eyo. Mai inka eyantá te ono.”

<sup>12</sup> \*Máa síkan monó ánon banta kéká bá banasii ánon banta kayo vá ano kokhon bayafó Yisasin aufin kuráden ten mifo véi ída mana vaya anona evaránen ten mino. <sup>13</sup> Ída mana vaya siyaimpin Pairoti ano evaránen béis inaemí, “Ara ara vaya kayofó ma éin aufin

\* 26:75: Mat 26:34

\* 27:5: Mat 26:14-15; Apo 1:18-19

\* 27:12: Ais 53:7

kuráden ma vetí ankan tiyain mai éi ídá iniya fono.”<sup>14</sup> MÁA síkan Yisasi ída mana vaya anona evaránen Pairotin tiamiyaimpin béis kákantá anomé inen mino.

*Pairoti Ano Ma Yutan Kéká Ayampin Yisasin Amein Baya Ino*  
(Maki 15:6-15; Ruku 23:13-25;  
Yoni 18:38b-19:16)

<sup>15</sup> Ena ena oranará Ayo Uantan Dunan ma Nan Damú ma erin maen banasi anó ma aví tein karavusin kamanini ayafa vanta anó útúantan oré iyan mino. <sup>16</sup> Mai damú mana kákán aaú vanta Barabasin ne sin karavusifin bákán banasi anó afová ukharen mino. <sup>17</sup> MÁAN tukharé íkán banasi o átaru uvin Pairoti ano inaemí, “Iyen ná útúantékun ná tireti vaípá orino vará iya rafono. Barabasin nafi áa Tiyarafenu ano ma aní ukhein banta Yisasin nafino.” <sup>18\*</sup> Mai fara va Pairoti ano máa sen inaen naino. Béi afrová ukhan monó ánon banta kéká auuyaniyáken Yisasin ará namu uantiyan kópin aviren erikhan mino.

<sup>19</sup> MÁA siren ma véi ma kó inin karáká kumantan maen be aná ano mana vaya máa siádan eremí, “Eí ída vá mai ma aau ída vain banta aurá mana avúavasí ono. Téi sare inuran mana kain ódákékun tirá uman diyá ineine iyá bá uno.”

<sup>20</sup> MÁA sirákan maen Barabasin ifáesin erinti vá Yisasin aruan purón vá teya Pairotin tiameno siren monó ánon banta kéká bá banasii ánon banta kayo vá ano vanasi arápínien mino.

<sup>21</sup> MÁA siyákan kamanini ayafa vanta anó vetin inaemí, “Tiretí ankanji anunu anó má kan banta finté inte vantá útúantékun ná orínten nafino.”

MÁA síkan minó nanin banta anó ooavararen temí, “Barabasi ná útúantano!”

<sup>22</sup> MÁA síkan Pairoti ano vetin inaemí, “Mai Tiyarafenu ano ma

aní ukhein banta Yisasin intesá ino vará iniya rafono.”

MÁAN ma siyain má minó anó ooavararen temí, “Daa unkamádantá béis arono!”

<sup>23</sup> MÁA síkan Pairoti ano vetin inaemí, “Para vae. Béi nái ausá ukhen nafino.”

MÁA siyan mifo vetí ankan avádóden ooavararen temí, “Daa unkamádantá béis arono!”

<sup>24</sup>\* Avádóden oovariýáken Pairotin avaya ída inirén banasi anó aruvín adé eimpin béis manáa non dáden betin avorá be ayan tesé urem temí, “Ma vantai nare anó ída sen tiyantá banten mifo mai siretin nina yaná ino.”

<sup>25</sup>\* MÁA síkan minó nanin banta anó evaránen ooavararen tiámemí, “Béini nare anó áesin ná tetin tina yanasá baren ná tetin tikhafanafin ná bano.”

<sup>26</sup> MÁAN turen Pairoti ano Barabasin útúantan betí baipá oríkan inká aruvín banta kayo van tíkan Yisasin anan dafiyópó ankáden daa unkamádantá arino van betin ayampin amen mino.

*Aruvín Banta Kéká Ano Ma Yisasin Máká Máká Ein Baya Ino*  
(Maki 15:16-20; Yoni 19:2-3)

<sup>27</sup> Amíkan kamanini ayafa vantai aruvín banta kéká anó kamanin amápin Yisasin aviren mûden minó anó ven maman aúban kaúden iyen eúken mino.

<sup>28</sup>\* Iyuven beni au anamun do yaváden mana nararé au anamun maman uanten mino. <sup>29</sup> Uantáden betí ankan mana ayankun anan máden anouren damuan kini kamamó ma einí urem ben áñontá afu uanten mino. Afu uantáden mana ayonta maman ayan kurompá pákaantáden aron kanan durafúden mátimiyan máa

sen ben máká maáká iyan temí, “Yutan kayoi ákona kin noe, en aví daní iyá tiféuno!” <sup>30\*</sup> MÁAN turen ben aufen akhare siren mai ma

\* 27:18: Yon 11:47-48; 12:19 \* 27:24: Diu 21:6-9 \* 27:25: Apo 5:28 \* 27:28: Ruk  
23:11 \* 27:30: Ais 50:6

véin ayampin pákaantan baré ein ayonta máden ben árontá kokhon dádá ankamen mino.<sup>31</sup> Betí ankan minó ano véin máká maáká uren mai ma nararé au anamun ma uantákoré ein do yaváden beni au anamun evaránen uantáden daa unkamádantá aruan purono van aviren oren mino.

*Daa Unkamádantá Ma Yisasin  
Arein Baya Ino*

(Maki 15:21-32; Ruku 23:26-43;  
Yoni 19:17-27)

<sup>32</sup> Aviren oriyaren Sairiní baru rákeSaimonin ne sin banta ano aasá eriyá íkan aruvín banta kéká ano ódaren béin duvun íkan Yisasiní yaa unkamádán ayaen baren oren mino. <sup>33</sup> Baren Korkota e ma siyain barurá o unen mino. (Mai ví ma yákein mai Ánon Dampai Varu inon tikhen mino). <sup>34</sup> \*Mairá moren betí ankan aí barasin uvarano van uvaini non máden mana íta yaná bá opé uren Yisasin amíkan béis naan óden mai non ifá en mino. <sup>35</sup> \*Aruvin banta kéká ano Yisasin daa unkamádantá antópó arurena maen beni au anamun barano van mairá kati sen mino.\* <sup>36</sup> Máián turen mairá kumanten bentá dafíken baren mino. <sup>37</sup> Béin ma kó tiantein baya máa ven árontá bompon uvaman kain baren mino. Mai vaya máa sen uvantaren mino: “MA YUTAN KAYOI KIN YISASI INO.” <sup>38</sup> \*Yisasiní ádé umoyan bantá kanan arukharen mino. Mana anon ayan kurompá ma vain daa unkamádantá aren inká ena anon ayan ópá ma vain daa unkamádantá aren ukharen mino. <sup>39</sup> \*Máián turákan banasi ano ma onóbe enóbe iyáken béin ayanavan baya siyáken maen ánon karú darú iyan <sup>40</sup> \*temí, “Eí eyantá eyan aya ono. Eí kákán monó namun

barákureya kanú manaú damú ana evaráne uvaran banta ono. Eí fura seja Tiyarafenu Anin ma vanteya mai yaa unkamádán táké me ampire varará erano.”

<sup>41</sup> Monó ánon banta kéká bá man baya ma afová ukhein banta kayo vábanasii ánon banta kéká bá ano yere máan mana sen ayanavan baya semí, <sup>42</sup> “Béi ena kayo anan aya iyaren mifo véi ída kanaén beyan aya iyan mino. Béi Isarerii kin ma vanten maen áesin daa unkamádán me ampiren erantí maéi setí ankan bentá munuman ó tifantéuno. <sup>43</sup> \*Béi Tiyarafenurá mumunan iyáken mi sen téi Tiyarafenu Anin muno siyaren mifo Tiyarafenu ano ma ven nan ma anunu ukhanten maen áesin mai saréa véin kanaén aya ino. <sup>44</sup> Mai ma umoyan bantá kan ma yaa unkamádantá ben má aruran baré ein kanan mano yere vá béin ayanavan baya ana sen mino.

*Yisasi Ma Furein Baya Ino*

(Maki 15:33-41; Ruku 23:44-49;  
Yoni 19:28-30)

<sup>45</sup> Bayan áúbanasí íkan ma vara minó dun maren titípa ukhen ban áau eraven kanú manaú áquien mino. <sup>46</sup> \*Kanú manaú áquí irí iyáken Yisasi avádóden ovaraaren máa semí, “Eri, Eri rema sabaktani?” Mai vayai ana máa mi ukhen mino. “Tenti Tiyarafenu oe, senti Tiyarafenu oe, éi fará téin oyan timiya fono.

<sup>47</sup> Manáa vanta ma mairá ádé mantakhá ein kéká ano mai vaya inire temí, “Ma vanta ano Iraiyan mi ariyan mantino.”

<sup>48</sup> \*Máiásirena mana ano savaen oren mómofen ma einí ukhein daná o máden uvainifin kain maifin pébin mana yankará damuren Yisasi nano van kain

\* 27:34: Íbo 69:21    \* 27:35: Íbo 22:18    \* 27:35: Manáa Tiyarafenui vompon dókifin ena asotúin baya máa sikhemi, “Betí ma mai au anumuntá ma kati sein manon” pefá ma sakhanampa vanta oorá ma sikhá ein bayai kanaén mino. \* 27:38: Ais 53:12    \* 27:39: Íbo 22:7; 109:25    \* 27:40: Mat 26:61; Yon 2:19    \* 27:43: Íbo 22:8    \* 27:46: Íbo 22:1  
\* 27:48: Íbo 69:21

óden mino. <sup>49</sup> Kain ma ódiyákan manáa ano semí, "Iraiyá ano véin me aya inain pimpá ifo áuke ódaré ono."

<sup>50</sup> Yisasi enádá avádóden oovariayain má beni aunan kípan puren mino.

<sup>51</sup> \*Mai áaurá ana kákán monó namumpin ma kuran baré ein davaráe ano yanté kafasen barápá morúden maman kaníen mino. Máan tíkan bara khaya iyain má kákán onámaná kayo ma varé ein kauren oreraen mino. <sup>52</sup> MÁAN tiyain má banta masí kayo khayosen oriaren duvavin Tiyarafenu kantasí ukhein nanin bantai ma gefá púkaré ein kéká ano e mantén mino. <sup>53</sup> Ínaimpáké Yisasi ma evaránen e mantavíkan maen betí ankan masí me ampiren kantasí ukhein baru Yerusalemí afoká íkan kokhon mano vetin onen mino.

<sup>54</sup> Aruvín banta kayoi ayafa vanta vá aruvín banta kéká bá ano Yisasintá dafíkaren onákan bara khayain minó danasi iyaimpín moéken kákantá akhokho van uren beti máa semí, "Ma vanta fura sen Tiyarafenu Anin mi varen mino."

<sup>55</sup> \*Kokhon nanin kayo ano ma Yisasin aya ono van ma Kariri fáké béis bákuren erikharé ein nanin kayo ano manáa nentá mantakhen oniyan baren mino. <sup>56</sup> Maifin ma mantakharé ein nanin kéká mai kákán baru Makdaráke Marian má Yemisin nú Yosepin nú anóe Maria má inká Sebeti anin kanan anóen mái varen mino.

#### *Yisasin Ma On Aimpin Masí Ein Baya Ino*

(Maki 15:42-47; Ruku 23:50-55; Yoni 19:38-42)

<sup>57</sup> Inupasí iyákan Aramatiá baru rákena moní banta Yosepin ne sin mano eren mino. Béis má mai

mana Yisasin eyo iyampon mi varen mino. <sup>58</sup> \*Baren mi Yisasin au amintí barano van béis oren mo Pairointá ina íkan Pairoti ano aruvín banta kayo van Yisasin au Yosepin ameno sen mino. <sup>59</sup> Yosepi ano Yisasin au máden avusese en efanten ukhein davaráe fóké úke en mino. <sup>60</sup> \*Mai masí Yosepi ano manáa vanta kéká tíkan ompín boraádan baré íkan mai aimpín mo khauren mana kákán onámaná baébaé uan ain oyirá iyáden oren mino. <sup>61</sup> Makdaráke Marian má ena Maria má ano mai masí ádé kumanten oniyan baren mino.

#### *Masíká Ma Aruvín Banta Kéká Dafíkaré ein Baya Ino*

<sup>62</sup> Sabati rákena yaná ma Útavin Damú orivíkan ená damú\* monó ánon banta kéká bá Farasisi kayo vá ano Pairotin o onen mino.

<sup>63</sup> \*O ódaren betí ankan máa sen ben tiámemí, "Kákán banta oe, mai kampun banta ano ma fara váken maen kanú manaú damú ma orivintí téi evaránen e mantanté uno ma sikharé ein baya van mi seti ovaré me ineine iyá tiféuno.

<sup>64</sup> MÁA sikhan mífo éi sesin ná masí oyirá ákonæn áta urantin ná kanú manaú damú orino. Ída ma máan tesin maen beni eyo iyampon kayo ano ven au e umoyan uaren béis inka evaránen purin pinté e mantén mino sintin mai kampun baya ano gefá ma véi sikharé ein kampun baya esantaren mo kákán inten mino."

<sup>65</sup> MÁA síkan Pairoti ano evaránen betin tiámemí, "Tiretí ankan aruvín banta kéká tesin ná mai masíká dafisino. Tiretí oreya vá mai masíká ma ákoná ono ma se ininyaona yanasisá mo ono." <sup>66</sup> MÁA sirákan betí ankan oren mo mai masí oyirá ákonæn áta uren aruvín banta kayo síkan mai masíká dafisen mino.

\* **27:51:** Eks 26:31-33; Ibu 10:19-20    \* **27:55:** Ruk 8:2-3    \* **27:58:** Diu 21:22-23    \* **27:60:**

Ais 53:9    \* **27:62:** Ená damú maen mai Sabati yamú ino.    \* **27:63:** Mat 12:40; 16:21; Mak 9:31; 10:33-34; Ruk 9:22; 18:31-33; Yon 2:19-21

## 28

*Yisasi Ma Evaránen E Mantein  
Bayá Ino*  
(Maki 16:1-8; Ruku 24:1-12; Yoni 20:1-10)

<sup>1</sup> Sabati yamú kípavín esé araí in damú ákura suron áau eunono van iyákán Makdaráke nanin Marian má ena Marian má masíká onano van oren mino.

<sup>2</sup> Oriyain má manádá kákantá bara khayá íkan Bafani enisorí ano inaru me ampiren eraven masí oyi rákena onámaná do vaébaé uan kaúden mai yaró kumantaren mino. <sup>3</sup> Kumantan mai enisorí aufáke afayu ma fanu seiní iyákán inká beni auí daná ano efanten uron en mino. <sup>4</sup> Máan tíkan betí ankan oniyan avinantan nan iyaín má mai ákona ano minó aruyin banta kéká do ankaman karúdan barará baren orera uven purin banta kayo an den mino.

<sup>5</sup> Máan tukhan enisorí ano mai kan nanin tiameví, “Tiré kanan ída vá akhokho van ono. Mai ma yaa unkamádantá ma arein banta Yisasin nan doseno van mi eriyan ná téi afová ukhé uno. <sup>6</sup> \*Béi ída mafin ban mino. Pefá ma véri sikaré einiéen béis inká e mantakhen mifo véri ma vakharé ein takhópin eriveya onano. <sup>7</sup> “dare aine evaráne ore vá beni eyo iyampon kayo vá mo máa se siameno, ‘Béi inka furin pinté evaránen e mantakhein tiretin an uanten Karirifá o vantiya mai fákena o onan noná’ mai vaya siretin tiamtítoi eré uno.”

<sup>8</sup> Máa síkan míkan nanin mano akhoko van uren ainen masí me ampiren beni eyo iyampon kayo siameno van amusin iyan tavaen oren mino.

*Yisasi Ma Mákdaráke Nanin  
Marian Avorá Dákó Ein Bayá Ino*  
(Maki 16:9-11; Yoni 20:11-18)

<sup>9</sup> Oriyá íkan Yisasi ainen manádá aasá afoká uven temí, “Ákurá ino.” Máa síkan míkan beni ádé oriven

ben arantan bana fákaren míkan mano ventá monó tiyan aví danien mino. <sup>10</sup> \*Monó tirákan Yisasi vékan máa sen tiameví, “Tiré kanan ída vá akhokho van iyáke ore vá te sifá tiváeyan mo siamesin Karirifá oriven maifá kena vá ten tonano.

*Masí Oyirá Ma Yafiká ein Banta  
Kékái Vaya Ino*

<sup>11</sup> Míkan nañin mano ma oriyaintena aruvín banta kéká ma masíká dafikaré ein pinté manáa ano kákán barufin ódiven mai ma afoká ein baya máa monó ánon banta kéká tiamen mino. <sup>12</sup> Tiamíkan monó ánon banta kéká bá banasii ánon banta kayo vá ano mai aruvín banta kéká kokhon moní amiren <sup>13</sup> temí, “Maná ano ma siretin inainti maeya máan ná teno, ‘Setí ankan inuran tuun baverunaren beni eyo iyampon kayo ano ven au e umoyan baren oren mino.’ <sup>14</sup> Kamanini ayafa vanta ano ma mai vaya inintí maé tetí ankan mai vaya ven má puntadékuya sireti ída aaú varan nono.” <sup>15</sup> Aruvín banta kéká ano mai moní mamaren kákán banta kayoi vaya ánaín dakhafen mino. Máan tíkan mai vaya ano minó Yutan kayofin orera uvin mai vaya sen eriyaré íkan taréa yere fara mai vaya sé iyan mino.

*Yisasi Ma Vei Eyo Iyampon Kayo  
Ákona Yoran Amein Bayá Ino*

(Maki 16:14-18; Ruku 24:36-49;  
Yoni 20:19-23)

<sup>16</sup> \*Tiyan míkan mifo sirantan mana orun kádan (11) eyo iyampon kayo ano Karirifá oren Yisasi ma vetí nan mai anurasá orono ma sikharé ein anurá o unen mino. <sup>17</sup> O unaven ma vetí ankan Yisasin oniyáken bentá monó tiyan aví danien mifo manáa ano kan ineine iyaren mino. <sup>18</sup> \*Máan tiyákán Yisasi vetí vaintá eriven tiameví, “Inaru ráke yaná bá

\* **28:6:** Mat 12:40; 16:21    \* **28:10:** Mat 26:32    \* **28:16:** Mat 26:32    \* **28:18:** Yon 13:3;  
Efe 1:20-22

bara ráke yaná bá dafisino van  
 Tiyarafenu ano minó ákona séin  
 inka simen mino.<sup>19</sup> \*Máan  
 tukhein nará tiretí ankan oriveya  
 vá minó nanin banta maman  
 tenti eyo iyamponí ureya vá be  
 Afóen má be Anin má beni Kantá  
 Aunan má avíkasá betin monó  
 non péantano.<sup>20</sup> Péantáde vá  
 tiretin ma ameruna vaya kayo vá  
 betin afova amiresin ná mai ánain  
 bákurino. Téi fura sé tiretí ankan  
 má ena ena yamú bá oriyá bákun  
 mi yamú mo akhení inten mino.”

---

\* **28:19:** Mak 16:15-16; Apo 1:8

# **MAKINI KAMA VAYA INO (Maki)**

## **Makini Kama Vaya Ma Uvanteí Pákenai Afova Vaya Ino**

*Ma vompon ma uvantein banta  
ino.*

Yerusalemíke nanin Marian anin Yon Maki Banabasin afóna anon uvanten mino. Porin nú Banabasin nú bá béin esé araien monó baya varen orin dorarí ukharen mino. Oo siádan baya ano siyáken bái anon Pitan oo vantaí ukhen beni vaya o vaéan banasi amiyaren mino. Máan tiyákan Pita anon ma vompon ma uvaran danasinta véin amikhen minon ten manáa ano inikhen mino.

*Uvarein orana ino.*

AD sikisti-fo (64) ráké sikisti-faipi (65) fin mi uvanten minon ten kokhon afova vanta kayo ano inikhen mino.

*Ma vompon ma uvantein baru  
ino.*

Kákán baru Romú ino.

*Ma vompon ma uvaman  
amikhein kéká ino.*

Romu kamani ano ma yafikein baru kayofin má ena anan kéká pinté ma monó tiyain kayon uvaman amikhen mino. Peyante monó dóki fintena vaya ma sakhanampaí uádan ma varé ein baya kayo ída kokhon mafin ban maen inká Yutan kékái anafu aráoni ayúavá bá inan tian dákó en ukhen mino.

*Nái ana vará ma vompon uvan-  
ten nafino.*

Yisas Karaisi maen minó ákona vain Tiyarafenu Anin mifo

ume nanin bantai miyan ída van doran bantaí uven ma ume fintena aya uren ma miyaní ukhein mi aní ukhen mino.

*Mónó Non Péantan Banta Yoni  
Ano Ma Aa Uvisein Baya Ino  
(Matiu 3:1-12; Ruku 3:1-9,  
15-17; Yoni 1:19-28)*

<sup>1</sup> Yisas Karaisi Tiyarafenu Anini kama vaya araí in máan mi ukhen mino. <sup>2</sup> Sakhanampa vanta Aisaiyani vompon dókifin Tiyarafenu ano máa sen uvantaren mino,

*"Ineno! Téi vaya varen orin  
banta siantéku éin an uan-  
ten oren  
eni aa mo uvisinten mino!"  
Mar 3:1*

<sup>3</sup> "Kámá barafá mana vanta ano  
ovaren máa siyan mino,  
'Bafani aa uvíde vá beni aa fun-  
tarano.'" *Aís 40:3*

<sup>4</sup> \*Aisaiya máa sikáin monó non péantan banta Yoni ano kámá barafá afoká uven temí, "Ará baéde non baresin ná Tiyarafenu ano siretí ume ampiantano."

<sup>5</sup> Máa síkán Yerusalemí baru fáke bá Yudiá bara fáke nanin banta kayo vá ano Yoni vaintá eriven betíi ume sian páman urákan bái Yodení nompin monó non péanten mino. <sup>6</sup> \*Béi kameri ayo fóké uvaran au anamun uren kao au fóké amú anan uren báken panon má bonkampun anu vá niyaren mino. <sup>7</sup> \*Niyáken bái máan mi siyaremí, "Ten toyampá ma eriyaini ákona ano senti ákona moéken esantakhen mino. Téi ída funtákeruna ída kanai é matimé beni arantan anamun anan útufonté uno. <sup>8</sup> Téi non pokéi féantiyá umpo véi Kantá Aunan pokéi féantanten mino.

\* 1:4: Apo 13:24; 19:4    \* 1:6: 2Ki 1:8; Mat 11:8    \* 1:7: Apo 13:25

*Yoni Ma Yisasin Monó Non  
Péantein Baya Ino*

(Matiu 3:13-17; Ruku 3:21-22)

<sup>9</sup> Maí damú Yísasi Kariri varafá Nasaretí baru fáké erikan Yoni ano Yodení nompin béin monó non péanten mino. <sup>10</sup> Péantádan Yisasi non pinté e ayoren édiyan onákan inaru ona yivin kukhofá avúaváká ten Kantá Aunan mano vén ánontá eren mino. <sup>11</sup>\* Erákan inaru fáké mana oova ano má semí, “Éi sen tanin uron mono. Éin nan moeké tinunu ukheruna iyampon mi van ná timusin iyá uno.”

*Ban Anon Mano Ma Yisasin  
Akhenóka Ein Baya Ino*

(Matiu 4:1-11; Ruku 4:1-13)

<sup>12</sup> Máa siyain má Kantá Aunan mano Yisasi ainen tiantan banta ídq van kámá barafá oren mino. <sup>13</sup>\* Maifá foti (40) yamú o vákon Ban Anon mano Yisasi eraven ankan mino van akhenóka uan onen mino. Béi kámá barafá afá uraran kayo vá ana vákon enisori kayo ano ventá dafíkaren mino.

*Yisasi Ma Karirifá Monó Doran  
Mo Araí Ein Baya Ino*

(Matiu 4:12-17; Ruku 4:14-15)

<sup>14</sup>\* Eroti ma Yonin karavusifin pákaan kaúdan maen ínaiimpáké Yisasi Karirí barafá Tiyarafenui kama vaya siamen oren mino. <sup>15</sup>\* Oriyáken temí, “Damú inka afoká íkan Tiyarafenui Yafisin inka ádé e van mino. Ará baéde vá Kama Vayará mumunan ono.”

*Yisasi Ma Araí En Bei Eyo Iyam-  
pon Kayo Avirein Baya Ino*

(Matiu 4:18-22)

<sup>16</sup> Maná damú Yisasi Kariri non akhempá oriyaren onákan Saimonin má be afá Endurun má noyana van baseí iyaren mino. Mai fara va ino. Betí ankan noyana arin kékái váken baseí iyaren mino. <sup>17</sup> Máoan tiyaré íkan Yisasi

vetin araren temí, “Ten má eresi aní ekuya noyana ma vaseí lyaonaí ureya vanasi avirano.” <sup>18</sup> Máo síkan békanañ manadá base kayo me ampiyan béin bákuren oren mino.

<sup>19</sup> Yisasi ma non akhempá manáa oriyen onákan Sebetin anin kanan Yemisin nú Yonin nú botifin base kayo yókiyan baren mino. <sup>20</sup> Dókiyaré íkan békun nan ariyain má betí afóe Sebetin má doran banta kayo vá me ampiren Yisasin bákuren oren mino.

*Yisasi Ma Namu Aunan Do  
Siantein Baya Ino*

(Ruku 4:31-37)

<sup>21</sup> Betí ankan Kapaniamú barurá o varé íkan Sabati yamú ma afoká íkan maen Yutan nanin bantai monó átaru namumpin Yisasi ódiven monó baya siamen mino. <sup>22</sup>\* Tiamíkan banasi ano iniren takhaen orera iyan temí, “Beni vaya ano Yutan kayoi man baya ma afová uhein banta kéká ano ma vaya seinisa iyan naino. Ída ino. Pura sikhein ákona vá ma vain banta ano ma seiní iyan mino.”

<sup>23</sup> Máa siyákan namu aunan ma vain banta ano mai monó átaru namumpin baren mino.

<sup>24</sup>\* Mai vanta ano vádiyan temí, “Nasaretíke vanta Yisasi oe, éi setin namu ono vará ere fono. Tetí ankan éin afová ukhékuya éi Tiyarafenui Mana Kantisí ukhaona uron mono!”

<sup>25</sup> Máo síkan Yisasi mai namu aunan nan arankaan táden temí, “E avaya fákare vén pinté entavonol!”

<sup>26</sup>\* Máa siyain má namu aunan mano mai vanta máden dómeron uren me ampiren bádiyan oren mino.

<sup>27</sup> Máoan tiyain má mai ma iyukhen oniyaré ein nanin banta ano sakha iyáken betiyan inain maran en temí, “Ma naísá iyan

\* 1:11: Íbo 2:7; Ais 42:1; Mat 12:18; Mak 9:7

\* 1:13: Íbo 91:11-13 \* 1:14: Mak 6:17

\* 1:15: Mat 3:2

\* 1:22: Mat 7:28-29

\* 1:24: Mak 5:7

\* 1:26: Mak 9:26

nafino. Ma auyen afovan bákan mai ákona fókéi namu aunan kayo yo siantiyan mai kéká ano véin oo yaiiyian mino!"<sup>28</sup> \*Máan turákan Yisasi ma varein avúavá baya ano ainen Kariri varafá oreraen mino.

*Yisasi Ma Pitan Aná Anóen Ayofein Baya Ino*

(Matiu 8:14-15; Ruku 4:38-39)

<sup>29</sup> Yisasi ma mai monó átaru namun me ampiren Saimonin nú Enduru nú amapin orin maen Yemisin nú Yonin nú bá béin bákuren oren mino.<sup>30</sup> Oríkan betí ankan temí, "Saimonin aná anóen aí iyáken aufá ira kharo iyan bakhen mino" sen Yisasin tiamen mino.<sup>31</sup> Máa síkan mai nanin ma vakhein ádé ódiven ayan bana fákaoaren avían mantiyain má manádá aí kípavín mai nanin mano vetíi yunan taren mino.

*Yisasi Ma Kokhon Nanin Banta Ayofein Baya Ino*

(Matiu 8:16-17; Ruku 4:40-41)

<sup>32</sup> Mai inúpá áau ma orun periyain má kokhon aí nanin banta vá namu aunan mano ma fákakhéin kéká bá ina Yisasi vaintá avireñ ere ere en mino.<sup>33</sup> Máan tiyákan Kapaniamú baru ráke nanin banta ano o vúten Yisasi ma varan nain avúavá onano van onará e átaru en mino.<sup>34</sup>\*Máan tuvin ara ara aí ma váiñ kayo ayofiyáken namu aunan ma fákakhá ein kéká pinte ina yo sianten mino. Máan ten mifo namu aunan kayo ano Yisasi iýé ban nafi mai véin afová ukhan pasen ída áikan manáa vaya sen mino.

*Yisasi Ma Karirí Akhempá Monó Dorarí Ein Baya Ino*

(Ruku 4:42-44)

<sup>35</sup>\*Ená damú ída kakhakhan Yisasi fe ákura suron e mantaaren amúkono van banta i van kámá barafá beyaká oren mino.

<sup>36</sup> Orivíkan ínaiimpáké Saimonin

má manáa kéká bá Yisasin doseno van oren mino.<sup>37</sup> Oren ma o oman afoká uren maen temí, "Éin nan minó ano yosiyán mino."

<sup>38</sup> Máa síkan Yisasi evaránen betin tiameví, "Monó baya siameno van mi erikhé umpo erítifé ena varu kayo fimpá orivé maifá ina mo siameno."<sup>39</sup>\*Máa siren Kapaniamú me ampíren Kariri barafá ma vain baru kayo fimpá oriven Yutan nanin bantai monó átaru namun kayofin monó baya siamiyáken kokhon nanin banta fintena yere namu aunan kayo yo sianten mino.

*Amon Dana Aí Bain Banta Ma Yisasi Ayofein Baya Ino*

(Matiu 8:1-4; Ruku 5:12-16)

<sup>40</sup> Maná damú amon dana aí bain banta ano véin ayofano van Yisasin arantampin me aron kan durafúden temí, "Éi ma anunu iyanteya senti sí daná tiyofasintan nono."

<sup>41</sup> Máa síkan Yisasi arunan máden ayan dan orin au aruvíyan temí, "Eyo, ayofé umpo aí daná kípano."<sup>42</sup> Máa siyain má anan mai amon dana aí manádá kípen mino.<sup>43</sup> Kípavín Yisasi mai vanta siantan oriyan ákona vaya siamemí,<sup>44</sup>\*Ída vá ena nanin banta ma vaya siamiyáke funtáde ore vá monó doran banta aufásá mo aní ono. Máan turefefá ma Mosesi sikhan amon dana aí ma vá ein kéká ano ma variyá ein avúavási eya vá manáa yanásinta vare mo ákonte esin ná banasi ano mai ma aí kípein ná onano."

<sup>45</sup> Máa síkan mifo mai vanta ano oriven banasi avorá Yisasi ma véin aí ayofein baya mo siamín inireñ minó nanin banta ano Yisasi vaintá eren mino. Máan tiyámpin Yisasi ma minó baru kayo fimpá orono sikhá ein me ifá uren banta ída vain akhempá o vákán minó akhen páke nanin

\* 1:28: Mat 4:24   \* 1:34: Mak 3:10-12   \* 1:35: Mat 14:23; Mak 6:46   \* 1:39: Mat 4:23;  
9:35   \* 1:44: Riv 14:1-32

banta ano kasaen be vaintá oren mino.

## 2

### *Ai Ayan Püká Ein Banta Ma Yisasi Ayofein Baya Ino (Matiu 9:1-8; Ruku 5:17-26)*

<sup>1</sup> Manáa yamú ma orivíkan Yisasi evaránen Kabeniamú barurá o van mai vaya ano ainen mai varufin oreraen mino. <sup>2</sup> Orera íkan banasi ano o víuten mai ma väein namun e víkagren onará ina ída afokhan bákan Yisasi monó baya siamen mino.

<sup>3</sup> Tiamiyákan kamí kamí banta ano ayan arantan püká ein banta kükútafin kaúden aviren eren mino. <sup>4</sup> Eríkan banasi ano víkakhan ída kanaíen Yisasi vaintá aviren orin nainí iyaimpin má nantá ódiven amompin kápoden anan póké kükútará damuren mai aí banta Yisasi vaintá kain araven mino. <sup>5</sup> Aravíkan Yisasi ma mai máa vantaí mumunan ódaren maen mai ma ayan arantan püká ein banta siamemí, “Te sanin noe, eni ume ampianten mino.”

<sup>6</sup> Máan tiyan maen maifin manáa man baya ma afová ukhein banta kéká ina kumantaren máan ineine en oreraen mí, <sup>7</sup> “Ma vanta ano fará máa siyan nafino. Béi Tiyarafenu oyampá baya siyan mino! Mana vanta ano ída kanaíen ume ampiantanten mifo Tiyarafenuveyafin mi mai ákona van mino!”

<sup>8</sup> Máan ineine en orera iyákan Yisasi afová uren betin tiamemí, “Ma avúavá ma variyaruna van tiretí ankan pará Tiyarafenu oyampá baya siyan mino sé iniyara fono. <sup>9</sup> Ayan arantan püká ein banta van inte vaya ma seruna anó teso sikhen nafino. Eni ume ampianté uno ma seruna ano fi áa orun mantave ei kükúta mamare orono ma seruna ano fino.” <sup>10</sup> Mai avúavá ma variyaruna anon Banta Animpin ma varará ákona vákán ume ampiantiany mino sé

aní iyá uno.” Máa siren Yisasi mai ma ai ayan püká ein banta van temí, <sup>11</sup> Ái daná kípen mifo mantave ei yuvasí mamare varufá orono.” <sup>12</sup> Máan ma siyain má mai vanta ano orun mantaaren duvasí mamaren mai ma oniyáre ein nanin banta yo éka náka iyáken oren mino. Mai ma iyukhá ein nanin banta ano mai avúavá ma oniyáken, “Máan avúavá tetí ankan pefá ída ontaré eruna yanái afoká en mino!” siyáken Ti-yarafenu aví danien mino.

### *Yisasi Ma Rivain Ne Sin Banta Arein Baya Ino*

*(Matiu 9:9-13; Ruku 5:27-32)*

<sup>13</sup> Máan turen Yisasi evaránen non akhempá oríkan banasi ano ve vaintá o iyuvín monó baya siamen mino. <sup>14</sup> Tiamíden ori-yaren ma Arafiusin anin Rivain onákan takisi varan namumpin kumantaréin maen béin ariyan temí, “Tesi eyo iyamponí in nompo ereno.” Síkan béi e mantaaren Yisasin bákuren oren mino.

<sup>15</sup> Mai inúpá Rivai ano Yisasin má bei eyo iyampon kayo vá arákan be amápiń mo yunan niyan maifin takisi varan banta kéká bá ume nanin banta vá inan baren mino. Máan avúavá bá bain nanin banta vá dere anon Yisasi ma oreipá bákuren noren mino. <sup>16</sup>\* Mai kéká bá ma Yisasi yunan niyákan man baya afová ukhein Farasi khayo ano Yisasini eyo iyampon kayo ina iyan temí, “Para Yisasi sakisi varan banta kayo vá ume nanin banta vá manafin dunan niyan nafino.”

<sup>17</sup> Mai ma ina iyain baya ma Yisasi iniyáken betin tiamemí, “Ái ma vain nanin banta ano anan ayofan banta vaípá oré iyan mifo ída ma aí bain nanin banta ano ída ayofan banta vaípá oré iyan mino. Puntákein nanin banta arano vara erikhe raumpo ume nanin banta arano van mi eriké uno.”

\* 2:16: Mat 11:19

*Dunan Ma Aurá Pákena Van Ma Yisasin Inaein Baya Ino*

(Matiu 9:14-17; Ruku 5:33-39)

18 Yonini eyo iyampon kayo vá Farasisi kayo vá ano yunan auraren bákan maná damú manág nánin banta ano Yisasi vaintá eriven béin inaemí, "Yonini eyo iyampon kayo vá Farasisi kayo vá ano yunan auraren ban mifo fará ei eyo iyampon kayo ano ída yunan auriyan nafino."

19 Máa sen ina íkan Yisasi evaránen betin tiámemí, "Mana vanta ma anasi iman ameno van iyan maen mai omápin ma arakhá ein kéká ano yunan auré iyan nafino. Anasi iman amin banta vá ma váken ída kanaien duna auranten mino." 20 Mana damusí intin anasi iman amin banta ma aviren orivintin maen dunan auranten mino." 21 Máa siren temí, "Mana vanta ano ída auyen davaráe kafádan póké peyante yavaráe ma yákakheimpin mo yamparen amu é iyan mino. Auyen davaráe fóké ma yamparen amu urantin o fáke e fáke uaren kákantái yáken orera inten mino." 22 Inká auyen uvaini anu kháan peyante memé aufin ída khaé iyan mino. Peyante memé aufin ma auyen uvaini anu khaintin maen paútiaren eravin nain nan mino. Auyen uvaini anu káan auyen memé aufin mi khaé iyan mino."

*Yisasi Ma Veyan Nan Sabatii Bafan Muno Sein Baya Ino*

(Matiu 12:1-8; Ruku 6:1-5)

23 Mana Sabati yamú ma Yisasi má bei eyo iyampon kayo vá arokhú dunampin oriyan maen bei eyo iyampon kayo ano arokhú ankanen oriyan mino. 24 \*Máan tiyákan Farasisi kayo ano ódaren Yisasin tiámemí, "Sabati yamú ma arokhú ankaniyain mai ída vá doran barano sikhein damuí vakan man bayan durafuriyan

mino. Mai ída ma máan toren mino."

25 \*Máa síkan Yisasi evaránen betin tiámemí, "Deviti má bei kéká bá arafan puríkan ma mantá ein avúavá tiretí ankan bompon dóki finté ída dankadé afová ukhe fono.

26 \*Abiata ma monó ánon doran pákkhein damú bái Tiyarafenui mápin un pében monó ánon doran pákkhein kéká ano ana kantasí ukhein bereti niyain un máden niyáken bei kéká amin nakhen mino. Máan ma ein mai man baya yeren durafunten mino." 27 \*Máa siren betin tiámemí, "Banasi aya ino van mi Sabati uvádan ban mifo vanasi ano Sabati aya ono vara uvamádan ban naino. Ída ino. 28 Mai van mi Banta Anin mano Sabatii Bafan ban mino."

### 3

*Yisasi Ma Mana Ayan Púkein Banta Ma Sabati Yamú Ayofein Baya Ino*

(Matiu 12:9-14; Ruku 6:6-11)

1 Ená damú Yisasi evaránen Yutan nánin bantai monó átaru namumpin ódikan aiayan púkein banta ano maifin baren mino.

2 Mai damú Sabati varé íkan Yisasin nan manáa avúavá mádantí béis aufin pákaan kaono van ben ma namuroí uantiyain kéká ano sen inen uaren béstia dafian ákoná ukharen mino.

3 Máan tukhan Yisasi mai ma aiayan púkein banta siámemí, "Minó avorá mará e mantano."

4 \*Máa siren Yisasi vetin inaemí, "Sabati yamú ma kama avúavá mamantan manó kama ukhen nafi áa namu avúavá ma mamantan manó kama ukhen nafino. Má damú banta aruan puró tifante rafuno áa ayaó tifante rafuno." Máa síkan betí ankan baya ída sen mino.

5 Máan tiyáimpin Yisasi onen eúkiyáken betin ará ákoná ukhan aran daná máden mai ma aiayan púkein banta van

\* 2:24: Diu 23:25    \* 2:25: 1Sa 21:1-6    \* 2:26: Riv 24:5-9    \* 2:27: Diu 5:14    \* 3:4: Ruk 14:3

temí, "Ayan antúkano" síkan ayan antúkiyain má evaránen ayan kamaen mino. <sup>6</sup>\*Máan tiyain má Farasisi kayo ano ainen e mantan oren Erotini kéká bá mo Yisasin ma aruan purin nain aa van ten inen en mino.

*Kokhon Nanin Banta Ano Ma Yisasin Bákuren Orein Baya Ino  
(Ruku 6:17-19)*

<sup>7</sup> Yisasin má bei eyo iyampon kayo vá ano Karirí non akhempá oríkan kokhon nanin banta ano véin bákuren oren mino. <sup>8</sup> Yisasi ma variyain dana san ma vanasi ano inen Yudiáke safi Yerusalemíke safi inká Idumiáke safi Yodení non ufáke safi inká Taiya vá Saidoní akhen páke nanin banta ano fi mai ma variyain avúavá onano van ere ere en mino.

<sup>9</sup> Máan tiyan kokhon nanin banta ano eyu akhempá bíkiyákan boti varen erino van Yisasi vei eyo iyampon kayo siamen mino. <sup>10</sup>\*Maí damú kokhon nanin bantan ayofen mino. Máan ma iyain avúavá san aí nanin banta ano Yisasin au aruvono van béis vaintá oren mino. <sup>11</sup>\*Máan tiyákan namu aunan ma varé ein kayo ano Yisasin ma oniyáken béis anafin o ankamiyan bá diyáken, "Éi Tiyarafenu Anin mono" sen mino. <sup>12</sup>\*Máa ma síkan béis iyé ban nafi ída sian páman ino van Yisasi vetí ankan kákán airo ananí uanten mino.

*Tiyan Míkan Mifo Sirantan Kan Orun Kádan (12) Eyo Iyampon Kayo Ma Yisasi Aní Ein Baya Ino  
(Matiu 10:1-4; Ruku 6:12-16)*

<sup>13</sup>Ínaiimpáké Yisasi anurá ódiven bei kékási ma inain banta kayo arákan béis vaintá oren mino. <sup>14</sup>Onóbin tiyan míkan mifo sirantan kan orun kádan (12) banta avíden béis má nóken monó

\* 3:6: Mat 22:15-16 \* 3:10: Mat 14:36 \* 3:11: Ruk 4:41 \* 3:12: Mak 1:34 \* 3:16: Yon 1:42 \* 3:17: Ruk 9:54 \* 3:19: Yudas Iskarioti e ma siyain Iskariotí baru ráke vantán ban mino. \* 3:22: Mat 9:34; 10:25

baya varen orino van aposeri kéká ino sen aren mino. <sup>15</sup> Araren namu aunan ma yo siantan ákona vetin amen mino.

<sup>16</sup>\*Ma sirantan kan orun kádan (12) banta ma avirein kékái aví ino. (Ínaiimpáké Pita ne sen ma arein banta) Saimoni ino.

<sup>17</sup>\*Sebetin anin Yemisin nú be afá Yoni nu san Boanekesi ne sen mino. Mai víj ana maen aafa ma kankaré tiyain anin kanan nen tikhen mino.

<sup>18</sup> Inká Enduru ne sen, Firipi ne sen, Batoromu ne sen, Matiu ne sen, Tomasi ne sen, Arafiusin anin Yemisi ne sen, inká Tadiasi ne sen, mana Seroti anan banta van Saimoni ne sen, <sup>19</sup>inká (ínaímpáké ma namuro ayampin avían amin nain banta van) Yudas Iskariotin\* ne sen en mino.

*Yisasi Má Beseburin Máí Vaya Ino  
(Matiu 12:24-32; Ruku 11:14-23, 12:10)*

<sup>20</sup>Ínaiimpáké ma Yisasi evaránen béis ma varé ein namumpin ma oríkan kokhon nanin banta ano evaránen o átaru iyákan béis má bei eyo iyampon kayo vá ano ma yungan nan afokhan ída varen mino. <sup>21</sup>Máan tiyain baya ma Yisasini kéká ano iniren "béis nan óen mi iyan mino" siren aviré barufá orono van eren mino.

<sup>22</sup>\*Eríkan Yutan kayoi man baya ma afová ukhein kéká ma Yerusalemíke erein kayo ano semí, "Beseburin ne sin namu aunani ánon banta anon béisimpin báken mi namu aunan ma yo siantan ákona amiyan mi namu aunan do siantiyan mino."

<sup>23</sup>Máa síkan Yisasi iniren betin aran eríkan baya o vaéden tiamemí, "Ban Anon mano kanaisá ená Ban Anon do siantan ten nafino. <sup>24</sup>Mana vantai yafisimpin ma yaíden aruvinten

maen ída kanaíen ákona ukhen banten mino.<sup>25</sup> Inká mana namun pinté ma yaíden beraran aruvinten maen ída kanaíen ákona ukhen banten mino.<sup>26</sup> Inká Ban Anon mano ma veraran daiminten maen mai inté en ná mantaañ ákona ukhen banten nafino. Ída ino. Máan ma inten ída ayáká banten mifo ainen mo kípanten mino.”<sup>27</sup> Máa siren ena vaya sian baéan amen temí, “Mana vanta ano ída kanaíen ákona vanta amá pintena ódiven beni ona umoyan baranten mino. Béin nare ma anan póké damuan kaúden manan beni minó ona umoyan baranten mino.”<sup>28</sup> Máan tukhái siretin pura vayan tiamenté uno. Minó ume khayo vá Tiyarafenu ma oyampá baya sin ume khayo vá Tiyarafenu ano kasaen ampiantanten mifo,<sup>29</sup> Kantá Aunan ma oyampá baya sin ume ana ída kanaíen ampiantanten mino. Mai ume ano fara van oriyan banten mino.”

<sup>30</sup> Yutan kayoi man baya afova mantein kéká ano ma Yisasi nan “namu aunan mái va ono” ma sein nan mi mai vaya sen mino.

### *Yisasini Mana Kékasi Ma Iyain Baya Ino*

(Matiu 12:46-50; Ruku 8:19-21)

<sup>31</sup>\*Máa siyákan Yisasini anóen má be afá kayo vá ano véi ma vain namun baintá eren mino. Barurá e iyoven Yisasini mun tiamintin barufá erantí béin má baya seno van baya yan óden mino.<sup>32</sup> Kokhon nanin banta ano Yisasini maman aúban den iyukháiñ manáa vanta ano véin tiamemí, “E anóen má e afá kayo vá ano onano van barurá e iyukhen éin nan ina iyan mino.”

<sup>33</sup> Máa síkan Yisasi evaránen in-aemí, “Iyé ten tinóe vákan iye néne ten tifá tiváeyan ban nafino.”<sup>34</sup> Máa siren mai ma iyukháiñ ein nanin banta onen eúkiyáken temí, “Ma ma iyukhein nanin banta mai

se sinóen má te sifá tiváeyan mái van mino.<sup>35</sup> Intéa nanin banta anó Tiyarafenu oo yaiyiyan nafi mai kéká pura sen te sintun mi van mino.”

## 4

### *Danayun Ma Fafasin Bantará Ma Ovaéádein Baya Ino*

(Matiu 13:1-9; Ruku 8:4-8)

<sup>1</sup>\*Yisasi evaránen Kariri non akhempá oriven monó baya siyákan kokhon nanin banta ano eyu akhempá o átaru en mino. Átaru iyaimpin botifin un kumamen manáa e afánen o váken monó baya siamiyan mino.<sup>2</sup>\*Máon tiyáken maen minó baya vaédiyáken banasi siamiyain pintena mana o vaeran baya máa semí,

<sup>3</sup>“Ineno, Mana vanta ano yanayun mo fafa seno van oren mino.<sup>4</sup> Danayun ma mamaren oriyákan manáa ayun mano aa akhempá eravíkan nun kayo ano mai ma eravein aíen nen mino.<sup>5</sup> Manáa ayun mano manáa vara on daró baré íkan mai yaró eravukharen ainen orun ampamen mino.<sup>6</sup> Ampantaré in ma áau édaviyáin ma kákán á kan maen mai ma ampamein ayun mano ída kokhon bara varéin pasen ainen kafuren mino.<sup>7</sup> Inká manáa ayun ma ayankun namampin eravukhá ein mano ma e ampamen édavin ayankun naman mano úkuaren mákáká uádan ída aran iren mino.<sup>8</sup> Manáa ayun mano kama varafin eravukharen mai ano ampamaren kokhon aran iren mino. Manáa ano tetí (30) irákan inká manáa ano sikisti (60) iran inká manáa ano mana antareti (100) vá manáa moéken imádan en mino.”<sup>9</sup> Máa siren Yisasi semí, “Átaren ma van nain kayo áesin ná ma vaya iniren afová ino.”

\* **3:31:** Mak 6:3; Yon 2:12; Apo 1:14    \* **4:1:** Mak 3:7-9; Ruk 5:1-3    \* **4:2:** Mat 13:34; Mak 4:33-34

*Yisasi Ma Ovaeran Baya Fákena  
Ma Sian Amá Ein Baya Ino*  
(Matiu 13:10-17; Ruku 8:9-10)

<sup>10</sup> Ínaimpáké banasi ma orivíkan Yisasin má bei eyo iyampon tiyan mikan mifo sirantan kan orun kádan (12) má manáa nanin banta kayo vá ana váken máa sen Yisasin inaemí, “Éi ma vaéde siya ona vaya kayoi ana mai intesá ukhen nafino.”

<sup>11</sup> Máa síkan betin evaránen tiamemí, “Tiyarafenui yafisimpín ma aúpá baya vain mi saretin aní iyá umpo vanasi ano ma ída sentá mumunan iyain kayo ano ída kanaén tian baeran bayai ana afová inten mino. <sup>12</sup>\* Mai van mi Tiyarafenui vompon dóki ano máa sikhareni mino.

“Téi ma variyarúna avúavá betí ankan onanten mifo ída veni ana afová inten mino. Tenti vaya vetí ankan ininten mifo ída kanaén beni ana afová inten mino.

Máan tiyáken ume finté ída ovaránantin betii ume ifá uantante mino.” Ais 6:9-10

*Danayun Pafasí Pákenai  
Ovaeran Baya Ma Sian Amá Ein  
Baya Ino*

(Matiu 13:18-23; Ruku 8:11-15)

<sup>13</sup> Máa siren Yisasi semí, “Mai vaeran baya ma saretí ankan ída afová inteya mai minó baya ma vaédiyá tiamenunai ana inté ureyá afová inte rafono.” <sup>14</sup> Máa siren betin tiamemí, “Mai yanayun ma fafasein banta ano Tiyarafenui vayan pafa siyan mino. <sup>15</sup> Asá ma manáa yanayun eravein mai Tiyarafenui vaya ma vanasi ano iniran ma Ban Anon mano ainen eriven betin aúkáke yo varé iyan mino. <sup>16</sup> Inká manáa yanayun ma on daró eravein mai vanasi ano ma ainen Tiyarafenui vaya iniren amusin é iyain mino.

\* 4:12: Apo 28:26-27 \* 4:19: Mat 19:23-24 \* 4:21: Mat 5:15; Ruk 11:33 \* 4:22: Mat 10:26; Ruk 12:2 \* 4:24: Mat 7:2 \* 4:25: Mat 13:12; 25:29; Ruk 19:26

<sup>17</sup> Máan té iyan mifo vetí arú ano ída námen aravukhan mi ída ayáká báé iyan mino. Máan tukhan mi Tiyarafenui vaya ma siyaintá ma uman nafi aufi ma erin maen ainen eraven ankamé iyan mino. <sup>18</sup> Manáa yanayun ma ayankun namampin eravein mai Tiyarafenui vaya ma iniyain mino. <sup>19</sup>\* Iniren ma vara ráke yana san ma in ineine ma erin maen Tiyarafenui vaya me ampiren ainen oré iyan mino. Moní ona van in nafi inká bara ráke yaná kokhon barano van in avúavá anon Tiyarafenui vaya me yaramádan ída aran iré iyan mino. <sup>20</sup> Inká kama varafin ma eravein danayun kayoi mai vanasi ano ma Tiyarafenui vaya iniren ma aran iré iyain kékái aní ukhen mino. Manáa ano teti (30) irákán inká manáa ano sikisti (60) iran inká manáa ano mana antareti (100) vá manáa moéken imádan é iyan mino.”

*Daamu Ma Antúduan Kain Nan  
Ma Sian Baékein Baya Ino*  
(Ruku 8:16-18)

<sup>21</sup>\* Yisasi vetí ankan tiamemí, “Maná vanta ano ma yaamu antúduren kurafin ná kuferé iyan nafino. Áa sakho aránaó pasá kaé iyan nafino. Ída ino. Takhókái kaé iyan mino. <sup>22</sup>\* Minó daná ma aúpá ma vain nain mai ínaimpáké dákó inten mino. Maná vanta ano ma mana yaná dará dantin báin nain mai yaná ínaimpá afoká inten mino. <sup>23</sup> Átaren ma vantin ineno van inain mano áesin ná inino.”

<sup>24</sup>\* Máa siren betin tiamemí, “Sireti ma vaya inire mai vayai ana kama e vá afová ono. Tiretí ankan ma ena nanin banta siamesin maen Tiyarafenu ano máón avúaváká anan tiretin má amiren ena vá moéken aminten mino. <sup>25</sup>\* Manáa vantá ano

inireya yoran baresin maen Ti-yarafenu ano moéken afova am-inten mino. Inká manáa vanta ano ma iniren doran ída varantin maen Tiyarafenu ano véin pintena mai ma mantáin nain afova yo varanten mino.

*Danayun Ma E Ampamintá Ma Sian Baékein Baya Ino*

<sup>26</sup> Yisasi evaránen temí, “Ti-yarafenu yafisimpin máan mi ukhen mino. Mana vanta ano yuhan barafin danayun mo fafasen mino. <sup>27</sup> Pafa siren e yáken inurán má bayan má intesá en ná ban nafi ída afová íkan mai yanayun mano veyantá e ampamen mino. <sup>28</sup> Mana ano ída ayaíkan barai ákonará anan mai yanayun mano e ampamen mino. E ampamaren araíen amun ana ódiáren aran imádákaren mi ínaímpáke afukhé iyan mino. <sup>29</sup>\* Afu khakharé íkan ínaímpáke dunan duyasin damusí ma in maen mai vanta ano sope fóké mai yunan duyasé iyan mino.

*Titó Daa Arantá Ma Sian Baékein Baya Ino*

(Matiú 13:31-32; Ruku 13:18-19)

<sup>30</sup> Yisasi evaránen temí, “Téi inté uresá Tiyarafenu Yafisin pintena vaya siamente rafuno. Mai vaya inte yaná kasá tian baerante rafuno. <sup>31</sup> Mana Yudia nanin bantai varafá ma mastati e sin daa ma vain mai aran aú an mi yakhen mino. Mai aran aú ano ída ena yaa aran aú an dakhen mifo véi sitó aúi van mino. <sup>32</sup> Máan tukhan mi mana vanta ano ma mai aú dódan baren e ampamen kákani uaren nun kayo ano ma kasaen o yomaniríen ayan dan orera uven konesí é iyan mino.”

<sup>33</sup> Máan baya khayo fókéi vanasi ano ma kasaen afová oren avúaváká Yisasi ano vaya vaédiyan mana siamiyaren mino. <sup>34</sup> Banasifin ma váken mana vaya ída funtáden tiamiyaren

mifo minó baya vaédiyan manan tiamiyaren mino. Ínaímpáke bei eyo iyampon kayo vá ana ma váken mi mai vayai ana sian amá uan amiayaren mino.

*Yisasi Ma Kákan Uva Yo Sianstein Baya Ino*

(Matiú 8:23-27; Ruku 8:22-25)

<sup>35</sup> Maí damú áau eraven inúpasí íkan Yisasi vetin tiameví, “Eritifé non e khadé ena ufá oró tifano.” <sup>36</sup> Máa síkan betí ankan mai nanin banta me ampiren Yisasi ma kumantá ein bótifin un kumamen oríkan manáa voti kayo ano vetin dakhafen oren mino. <sup>37</sup> Oriyaré íkan kákán uva uaren non karantó en botifin avanen ódiáren mai votifin non mano víkarién mino.

<sup>38</sup> Máan tiyákan Yisasi mai voti oyampáke kanuká ánon kaúden bakharen mino. Bakharé íkan betí ankan beín avoren temí, “Aruso oe! Ádé anantá tetí ankan non ufuró tifanté umpo éi ídá mai van iniya fono.”

<sup>39</sup> Máa síkan Yisasi e mantaaren uva asiyáken non nan temí, “Kípantiya! Púkekhanó!” Máa siyain má uva kípan non mano evaránen púkekhen mino. <sup>40</sup> Máan turen Yisasi vei eyo iyampon kayo siameví, “Pará tiretí ankan akhokho van iya fono. Tiretí ankampin mumunan ídá ban nafino.”

<sup>41</sup> Máa síkan betí ankan kákantá akhokho van uren betiyan ten oreraen temí, “Ma vanta véi iyé bákan ná uva vá non má ano véin avaya iniyán nafino.”

## 5

*Yisasi Ma Namu Aunan Bain Banta Ayofein Baya Ino*

(Matiú 8:28-34; Ruku 8:26-39)

<sup>1</sup> Yisasi má bei eyo iyampon kayo vá ano Kariri non e kháden Kerasá barafá oren mino. <sup>2</sup> Yisasi ma voti finté eraviyain má mana namu aunan mano fákakhán óen

\* **4:29:** Yoe 3:13; Rev 14:15

iyain banta ano vanta ma masí ukheí páké béin onano van eren mino. <sup>3</sup> Mai vanta ano vanta ma masí uran bain pimpá baren nókan mana vanta ano véin ída kanaíen ayanan kuvirí ukhan inká seni anan póke dere ída kanaíen kuviyaren mino. <sup>4</sup> Seni anan póke safi ankati fo safi kokhon damú ayan arantantá damuran mai anan antáden titó titó iyákan ída kanaíen mana vanta ano véin pákaan kaiyaren mino. <sup>5</sup> Máan tiyáken mai vanta ano inuran má bayan má banta ma masí ukhein pimpa safi inká anuyon kayo fimpá safi nóken bá diyan maen eraven onámaná kayorá be au kaviyaren mino.

<sup>6</sup> Máan tiyaren mai vanta ano manáa nen táké Yisasin óden maen tavaen oren béin aufá mo aron kanan durafúden mágimen mino. <sup>7</sup> \*Mágimen avádóen oovararen temí, “Yisasi oe, Ei Yan Bain Tiyarafenu Anin mompo séin náisá usintano vará eriya fono. Téin ma ída namu inteya mai Tiyarafenu avíká purase sisimeno van muno.” <sup>8</sup> Mai fara va máa sen naino. Yisasi ma siyáken, “Namu aunan mompo mai vanta finté eravono,” ma sein nan mino.

<sup>9</sup> Máa síkan Yisasi mai vanta inaemí, “Éin aví iye fino.”

Síkan béisí semí, “Te siví kokhoná uno. Mai fara vara seyo, setí ankan kokhon kékái vá tiféuno.”

<sup>10</sup> Máa siren mai namu aunan kayo ída siantantin mai varu me ampiré nentá orono van ákonaeen Yisasi vaípá ínánen inaen mino.

<sup>11</sup> Máa siyáken mai ádé titó anurá kokhon pon kayo iyuken dunan niyaren mino. <sup>12</sup> Máan tiyáken mai namu aunan kayo ano Yisasi vaípá ínánen tiámemí, “Éi sétin tisintesí mesan pon kayo aúpin oferá tifano van muno.” <sup>13</sup> Máa síkan Yisasi kana ino siyain má mai namu aunan kayo ano mai

vanta me ampiren oren pon kayo aúpin oferen mino. O fébíkan kan tauseni (2,000) fon kayo ano savaen mana kákán ayafin aravuaren non akharumpin orun áduven ufuren puren mino.

<sup>14</sup> Máan tíkan pontá ma yafisiyaré ein banta kayo ano karan oriyáken kákán baru kayofin má mai akhempá ma vain baru kayofin má mai ma afoká ein baya e siamen oriyáken betiyantá onano van ore ore en mino. <sup>15</sup> Minó nanin banta ano Yisasi vaintá oriven onákan mai ma namu aunan ma fákakhá ein banta ano yavaréé íden kamaen kumantan o óden akhokho van en mino. <sup>16</sup> Máan tíkan ma o onein kayo ano mai ma namu aunan pákakhá ein banta vá pon kayo vá amaniná ma afoká ein avúavá baya vanasi me siamen mino. <sup>17</sup> Máa síkan banasi ano iniren Yisasin nan mai vara me ampiren enafá orino van ákonaeen baya sen mino.

<sup>18</sup> Máa síkan Yisasi ma evaránen botifin ódin maen mai ma gefá namu aunan mano fákakhá ein banta ano véin má orono van ínanen inaen mino. <sup>19</sup> Máa síkan maen Yisasi mai vanta siamemí, “Bafan mano ma arunkaren éin kama uantein nan barufá ore ei kéká mo siameno.” <sup>20</sup> Máa síkan mai vanta ano oren mai ma véin aya ein baya Dekaporísí barafá mo sian afokáin minó nanin banta ano kokhon ineine iyáken takhaen oreraen mino.

*Yisasi Ma Füká Ein Arinta Avían  
Manten Ma Ái Nanin Ayofen Ma Ein  
Bayá Ino*

(Matiu 9:18-26; Ruku 8:40-56)

<sup>21</sup> Máan turen Yisasi evaránen botifin Karirí non e kháden ena ufa oriven non akhempá o vákan kokhon nanin banta e átaru en mino. <sup>22</sup> Átaru ukhan mana monó namuntá ma ánoní ukhein banta Yairasin ne sin mano eren mino. Béisí Yisasin onen ben arantampin e matimen mino. <sup>23</sup> Matimen

Yisasin ákonaen inaemí. “Te sir-aun arará purono van iyá umpo éi kaná ereya véintá mo ayan kaúde ayofesin ná evaránen asefa inten nafino.”

<sup>24</sup> MÁA síkan Yisasi véin avákuren oriyákan kokhon nanin banta ano mákáká uven oren mino. <sup>25</sup> Tiyan míkan mifo sirantan kan orun kádan (12) oranará biyon aí daná baren oriyan baré ein nanin má maifin baren mino. <sup>26</sup> Mai nanin mano kokhon damú ayofan banta kayo vaípá bei moní mo miyaní uan kíparan mai aí daná ano moéken aí ana iyan ída kípaanten mino. <sup>27</sup> Mai nanin mano Yisassi vaya ma siamin iníden maen banasi mákáká ukheimpin oriaren ben oyampáké beni ayá au anamun aruven mino. <sup>28</sup> Mai farava máanten naino. “Téi ma siyan máa ma veni au anamuntá kaonté evaráne kama onté uno,” sen iniren mino. <sup>29</sup> MÁA sen iníden ma aruviyain má manádá ainen beni nare vo íkan béis aváduan onákan mai aí daná kípen mino.

<sup>30</sup> \*MÁA tíkan Yisasi afová in manáa vei ákona oríkan do vaéaren máa sen inaemí, “Iyé tenti su anamun aruven nafino.”

<sup>31</sup> MÁA síkan bei eyo iyampon kayo ano máa sen béis tiameemí, “Éi oniya fono. Kokhon nanin banta anon éin mákáká ukhen mifo éi fará, ‘Iyé téni tu anamun tiruviyian nafino,’ siya fono.”

<sup>32</sup> MÁA siyákan maen Yisasi vei au anamun ma aruvein onano van onen eúken mino. <sup>33</sup> MÁA tíkan mai nanin mano ve aurá ma afoká ein dana san pé den avinantan má Yisasi vaintá aron kánan mo yurafúden matimen be aurá ma afoká ein dana san tiamen mino. <sup>34</sup> \*Tian míkan Yisasi véin evaránen tiameemí, “Tiraun noe, Éini mumunan manon eni aí kípaanten mifo ará kusin masá orono.”

<sup>35</sup> Yisasi ma fara vaya siyákan maen monó átaru namuntá ma ánoní ukhein banta Yairasín amá pinté manáa vanta kayo ano eren me véin máa sen tiameemí, “Éin arauñ inka furen mifo ída vá enádá arú uman ameno.”

<sup>36</sup> MÁA siyákan mai vaya Yisasi ída avové en inin nan monó átaru namuntá ma anóní ukhein banta máa sen tiameemí, “Éi ída vá akhokho van iyáke mumunan mana vá ono.” <sup>37</sup> MÁA siren béis minó nanin banta ayópá uren Pitán má Yemisin má be afá aváe Yonin má mai máa ano anan Yisasin má oren mino. <sup>38</sup> Monó átaru namuntá ma ánoní ukhein banta Yairasín amá barurá ma yetí ankan orivin maen Yisasi onákan kokhon nanin banta ano sisovo siyáken kákantá ifí diyaren mino. <sup>39</sup> MÁA tiyákan Yisasi maifin un pében betin máa sen tiameemí, “Para saretí ankan ifí diyákeyá kákantá sisovo siya rafono. Ma arinta arará ída fúken béis faran auun bakhen mino.”

<sup>40</sup> MÁA síkan minó nanin banta ano véin nan intíkan béis mai nanin banta yo siantan barufá arafuvíkan mai arinta anóe afóen má bei eyo iyampon kanú manaú bá avígen mai arinta ma kain bain karafarampin un peren mino. <sup>41</sup> \*Um pében mai arinta ayan bana fakáoren máa semí, “Tarita kumi,” Mai vayai ana máan mi sikhen mino. “Titó arinta oe, séi éin tiameemí umpo éi e mantano.”

<sup>42</sup> MÁA siyain má mai arinta arará ano manádá ainen e mantaaren oren mino. (Mai arintai orana sirantan kan orun kádan (12) mi varen mino.) Oríkan mai namumpin ma varé ein nanin banta ano ódaren kákantá anúden oreraen mino. <sup>43</sup> MÁA tíkan mai ma afoká in onein dana san ena nanin banta ída siamino van Yisasi ákonqen betin tiameemí mai arinta arará ana yunan amino van tiamen mino.

\* 5:30: Ruk 6:19

\* 5:34: Mak 10:52; Ruk 7:50; 17:19

\* 5:41: Ruk 7:14

**6**

*Nasaretí Nanin Banta Ano Ma Yisasiñ Oyan Amein Baya Ino  
(Matiu 13:53-56; Ruku 4:16-30)*

<sup>1</sup> Yisasi mai varu me ampiren bei eyo iyampon kayo vá bei varu anará Nasaretí oren mino. <sup>2</sup> \*O varen Sabati yamú Yisasi monó átaru namumpin ódiven Ti-yarafenui vaya vanasi siamiyákán iniren kokhon mano anúden oreraen temí, “Ai! Inte fákená ma vanta ano mai ákona vá afova vá mamáken ná má avúavá danasinta afoká iyan nafino. <sup>3</sup> Pura sen béis mana má uvaran bantan ban mino. Béi Marian anin mi váken Yemisi, Yosepi, Yudasí, Saimoni siren mai kékái afá aváe ino. Béin ayómái setín má mafin ban mino,” siren béis namu inin mananten mino.

<sup>4</sup> \*Máon tiyákán Yisasi vetin tiamemí, “Sakhanampa vanta avíenä varufá ban mifo vei varu anará bá minó bei mana nare vá be amápin má ída véin avi báé iyan mino.” <sup>5</sup> Betíi mumunan ída ákona ukhan pasen mi Yisasi mai varurá ída manáa avúavasí ina ái ma vain kéká aurá anan ayan kaúden ayofiyaren mino. <sup>6</sup> Máon tiyan ma vanasi ano ída mumunan iyain nan Yisasi kokhon ineine en mino.

*Yisasi Vei Eyo Iyampon Kayo Siantan Ma Monó Dorantá Orera Ein Baya Ino*

*(Matiu 10:5-15; Ruku 9:1-6)*

Máon turen Yisasi mai akhempá ma varé ein baru kayo fimpá oriven monó baya e siamen oren mino. <sup>7</sup> Máon tiyákén baya varen orino van tiyan míkan mifo sirantan kan orun kádan (12) eyo iyampon kayo araren namu au-nan ma yo siantan ákona amíden kaní uriyán tiantan oren mino.

<sup>8</sup> \*Tian tiyákén maen Yisasi vetin máa sen tiamemí, “Ída vá mana yaná bare vá ayonta ana vá pákore orono. Ída vá dunan nafi unan nafi inká moni safi ída vá manan unampin bádo ono. <sup>9</sup> Tiretí ankan arantan anamun máa vá ure orin nompo ída vá ena au anamun má mamare orono. <sup>10</sup> Tiretí ankan ma mana varurá orinte mae mana namumpin mana vá bareya ínaimpáké mai varu me ampeno. <sup>11</sup> \*Mana varurá oresin ma ída avían má naumpin kaen ma inká tiretí vaya ma ída inti mae mai varu vá me ampire vetíi namu vara ma arantantá dampakhái nain ná me fúpá tian karú dano. Mai anon betíi namu avúavá aní intin betiyantá afová inten mino.”

<sup>12</sup> Máa sirákan banasi ano ará baerano van eyo iyampon kayo ano oriyan monó baya e siamen oren mino. <sup>13</sup> \*Oriyáken betí ankan namu aunan kayo yo siantiyákén ái ma vain nanin banta aufá uveri féantan mai kayo ano asefaen mino.

*Monó Non Ma Féantan Banta Yoni Ma Furein Baya Ino*

*(Matiu 14:1-12; Ruku 3:19-20, 9:7-9)*

<sup>14</sup> \*Yisasi ma variyain avúavá baya ano minó akhempá orera íkan banasi ano ma mai vaya ana sen orera iyan maen Kin Eroti inen mino. Manáa kéká ano siyáken, “Monó Non Péantán Banta Yoni anon purin pinté evaránen e mantakhan mi enará ukhein ákona ano véimpin doriyan mino.” <sup>15</sup> Máa síkan manáa ano sen, “béis Iraisa ino,” sin inká ena kéká ano sen, “pefá ma vá ein sakhanampa vanta kayo an dakhen mai véi mana sakhanampa vantán ban mino.”

<sup>16</sup> Máa síkan Eroti mai vaya kayo iniren temí, “Pefá ma séi anuran

\* **6:2:** Yon 7:15    \* **6:4:** Yon 4:44    \* **6:8:** Ruk 10:4-11    \* **6:11:** Apo 13:51    \* **6:13:** Yem 5:14    \* **6:14:** Mat 16:14; Mak 8:28; Ruk 9:19-20

tíkeruna vanta Yoni anon purin pinté evaránen e mantakhanten mino.”

<sup>17</sup> Mai farava máa sen naino. Eroti ano ve aná Erodiasin amusín ameno van bei aruvín banta kéká tíkan Yonin pákaan karavusifin kain baren mino. Be afá aváe Firipin aná Erodiasin ma véi mantaré ein mai van mi Yonin karavusíi ukharen mino. <sup>18</sup>\*Erotin nan ma Yoni ano sen, “Éi e afá aváen aná ma yafeona mai ída kama ukha ono,” ma sein nan mino. <sup>19</sup>Máa ma sikhein nan Erodiasi ano Yonini aran naná máden bén aruan purono van iyaren mifo véimpin ída mai ákona varen mino. <sup>20</sup>Máan tiyákan maen Yoni funtáken kantasí ukhein banta vákan Eroti ano véi ma siyain baya kayo van kokhon ineine iyáken bén aya ono van inikharen mino.

<sup>21</sup>Erodiasi ma Yonin arin nain aa van dosiyaré íkan Erotin ma ve anóe ano khaein damú e afoká en mino. Mái damú Eroti kákán dunan taríyáken béis kamanimpin ma ánoní ukhein banta kayo vá aruvín banta kayoi ánon banta vá Kariri fáké ánon banta kéká bá aran e átaru en mino. <sup>22</sup>E átaru ukhan Erodiasin aráun mano mai ma iyukheimpin eriven danisién mino. Danisií íkan Erotin má mai ma yunan niyaré ein kéká bá ano kákán amusin en mino. Máan tíkan Kin Eroti ano mai arinta van temí, “Éi ma sinona mai yaná téi fara amenté uno.” <sup>23</sup>Máa siren Eroti asíká ayan befiyó uren béis tiamemí, “Éi ma sinona yaná téi fara amenté uno. Tesi yafisin nan ma aúban daíde simeno ma sesí mai fara máan tonté uno.”

<sup>24</sup>Máa síkan mai arinta ano oren be anóentá mo inaemí, “Náinasá inantékun ná Kin mano siminten nafino.” Máa síkan be anóe ano evaránen béis tiamemí, “Monó non péantan banta Yonin ánon nará inan teno.” <sup>25</sup>Máa síkan mai arinta ano ainen evaránen Kin

baípá o nóben temí, “Monó non péantan banta Yonin ánon mana yókifin kaúde simeno van muno.”

<sup>26</sup> Máa siyain má Kin mano kákantá ará uman den mifo véi má ma váken dunan niyá ein kayo avorá ma asíká ayan befiyó uren tikhá ein nan iniren ída mai arinta avaya yo yurafuren mino.

<sup>27</sup> Mai van Yonin ánon mo síkaren baren erino van esé ana mana aruvín banta siantan oren karavusi finté Yonin ánon mo síken mino.

<sup>28</sup>Tikaren maen Yonin ánon manan dókifin kaúden mai arinta me amíkan baren be anóen mo amen mino. <sup>29</sup>Yonin ma arin baya vei eyo iyampon kayo ano iniren bén au e varen mo masien mino.

*Yisasi Ma Yan Manápá Tauseni  
(5,000) Vanta Yunan Amein Baya Ino*

*(Matiu 14:13-21; Ruku 9:10-17;  
Yoni 6:1-13)*

<sup>30</sup>\*Yisasi ma vei eyo iyampon kayo siantan dorantá orikhá ein mai ovaránen e átarú uven betí ma yoriyá ein má banasi ma siamiyá ein baya kayo vá bén tiamen mino. <sup>31</sup>Kokhon nanin banta ano eriven oriven iyákan Yisasi má bei aposeri kayo vá ída yunan narí eimpin Yisasi máa sen betin tiamemí, “Eritifé banta ma ída van naipá o váke tiviká tifano.”

<sup>32</sup>Máa siren betí ankan mana votí mamaren banta ma ida vain afokhantá oren mino. <sup>33</sup>Oríkan kokhon nanin banta ano yeti ma oriyain afová uren minó kákán baru ráke nanin banta ano non akhempá tavaen mai ma orin naintá betin nare o varen mino. <sup>34</sup>\*O varé íkan Yisasi non akhempá oriven mai nanin banta oniyáken sipisipi kayo ano ma ída yetintá dafisin banta vákan iyukhen bainí ukharé íkan kákantá arunan uanten mino. Mai van kokhon danasinta vetin afová amen mino.

\* 6:18: Riv 18:16 \* 6:30: Ruk 10:17 \* 6:34: Nam 27:17; Mat 9:36 \* 6:35: Mak 8:1-9

<sup>35</sup> \*Afova ma amiyan áau eraven inúpasí íkan maen bei eyo iyampon kayo Yisasi vaintá eriven temí, “Banta i van akhempái e varé étifékun mi áau eraven mino. <sup>36</sup> Éi vanasi siantesin oriven ná ádē ma van nain baru khayo finté vetí yunan miyaní ino.”

<sup>37</sup> Máa síkan Yisasi evaránen betin tiameémí, “Tireti yantasá betí dungan ameno.” Máa síkan betí ankan evaránen bén tiameémí, “Kankan antareti moní kasa\* bereti o miyaníe betin me amenté tife rafuno.”

<sup>38</sup> Máa síkan Yisasi vetin tiameémí, “Tireti ankan nái máa veretí denan ban nafino oriveya onano.” Máa síkan betí ankan o oman afová uren me siameémí, “Dan manápá bereti vá kankanan noyana vái van mino.”

<sup>39</sup> Máa síkan minó nanin banta sintin kata yaró manafin kumádú ino van betin tiamen mino. <sup>40</sup> Tiamíkan manafin mana antareti (100) ano kumaníyan inká enafin fifty (50) ano kumaníyan en oreraen mino. <sup>41</sup> Mágan tuvíkan Yisasi mai yan manápá bereti vá kankanan noyana vá pákaaren inarufá kakháben mai yunan nan. Tiyarafenun tusu sianten mino. Máa turen mai vereti kayo vá noyaná kanan má máden kisikisi uren bei eyo iyampon kaylorá dákán mai nanin banta amen oreraen mino. <sup>42</sup> Amíkan minó anó kanaíen nen mino. <sup>43</sup> Narákan mai yunan antan tiyan míkan mifo sirantan kan orun kádán (12) unan bíken mino. <sup>44</sup> Mai yunan ma naran banta máa ma yankafein mai yan manápá tauseni (5,000) ino.

### *Yisasi Ma Non Daró Orein Baya Ino*

(Matiu 14:22-33; Yoni 6:16-21)

<sup>45</sup> Narákan Yisasi ma vanasi siantan orera iyan maen bei eyo iyampon kayo van betin nare

ainen botifin káusiven non e kháden Betsaidá akhempá orino van tiamen mino. <sup>46</sup> \*Máa turen mai oyampáké béis amúkono van anufá óden mino.

<sup>47</sup> Inupasi íkan mai voti ano non aúbaná bákan Yisasi veyáká non akhempá para varen mino.

<sup>48</sup> Báken béis onákan uva ano voti e avékaan more mere iyákan betí ankan ákongen non intaniaren mino. Máa tiyákan ma kúkarosíen kakhanó van in maen Yisasi non daró oriaren betin esantano van en mino. <sup>49</sup> \*Máa tíkan bei eyo iyampon kayo ano véin onan non daró oríkan betí ankan bén nan ban mi eriyan mino sen iniren báden oreraen mino. <sup>50</sup> Minó ano véin ódaren kákantá akhokho van iyaimpin Yisasi ainen betin máa sen tiameémí, “Téi umpo ída vá tireti ankan periya vano.” <sup>51</sup> \*Máa siren béis votifin un bákan uva kípavín minó ano sakha iyáken kokhon ineine en mino. <sup>52</sup> Yisasi ma vereti kisian ameini avúavái ana vetí ankan ída afová ukharen mino. Mai fara va ino. Betin aú ano ákona ukhan ída mumunan ban mino.

<sup>53</sup> Betí ankan ma non e kháden Kenesaretí akhempá ódiven maen botí anan kuan kaen mino.

<sup>54</sup> Máa turen ma vetí ankan botí finté eravyain má banasi ano ainen Yisasin afová en oreraen mino. <sup>55</sup> Afová uren banasi ano mai akhempá oriviyan aí kéká ma varé ein avireni Yisasi vaintá duvasiká mo khaen oreraen mino.

<sup>56</sup> Mai akhempá titó baru kayo vá kákán baru kayo vá inká akhempá ma vain baru kayo fimpá bá ma Yisasi orin maen banasi ma átoru iyain barurá aí nanin banta ayofano van béis vaintá avireni oriyaren mino. Aí nanin banta ano Yisasin nan áintí beni ayá au anamun áton aruvono van íngan en ina iyaren mino. Aí nanin banta

\* 6:37: Mai kan antareti moní ma vain mai yan manápá ifo afápá kanú manaú un kádán biyontá ma variyain moní ino. \* 6:46: Ruk 5:16 \* 6:49: Ruk 24:37 \* 6:51: Mak 4:39

ano ma inaúden aruvín maen mai  
kékái aí kípaantiyaren mino.

## 7

*Banasi Ma Maman Avusese  
Iyain Danasinta Fákena Van Ma  
Yisasi Siamein Baya Ino*  
(Matiu 15:1-9)

<sup>1</sup> Farasisi kayo vá manáa Yerusaremi fáké man baya ma afová ukhein banta kayo vá Yisasi vaintá e átaru <sup>2</sup> \*iven onákan manáa Yisasini eyo iyampon kayo ano Yutan nanin bantai avúavá durafuren ída ayan nare sesé inton dunan pákaren nen mino. <sup>3</sup> Minó Farasisi kayo vá Yutan kayo vá be anafu aráoni avúavá dakhafen ayan ma ída kamaen tesé ukhen maen ída yunan pákaren né iyan mino. <sup>4</sup> \*Betí ankan ma máketifá noren ma ovaránen eriven ma ída non péken maen mai yunan ída né iyan mino. Kokhon avúavá daná ma vetí anafu aráopintena ma mantein mai ánaín mi yakafen betíi kápi, kura, yóki, takhó tesé é iyan mino. <sup>5</sup> Máan tiyain mi vakan Farasisi kayo vá man baya ma afová ukhein banta kayo vá Yisasin inaen temí, “Éini eyo iyampon kayo ano ma ída ve anafu aráoni avúavá dakhafen ayan ída sesé iyain mai intesá ukhen nafino.”

<sup>6</sup> Máa síkan Yisasi vetí ankan evaránen tiamemí, “Tiretí ankan kampun banta kayon banan mi fura sen tiretin nan mi sakhanampa vanta Aisaiya ano máa siren bompon uvamádan baren mino.

“Ma vanta kayo ano oo máafói séin tiví daní iyan mifo vetí ankan ará ano nenta suron ban mino.

<sup>7</sup> Betí ankan bantai man baya ma siamiyain mai van mi ‘Tiyarafenui vaya ino’ sé iyan mino. Máan tiyáken

betí ankan téínta faran monó máan tiyan mino.”  
<sup>8</sup> Tiretí ankan Tiyarafenui man baya me ifá ureya vantai avúavá máa anan ákona e fákare va ono.” Ais 29:13

<sup>9</sup> Mairá Yisasi vetin máa sen tiamemí, “Tiretí anafu aráoni avúavá ánaín dakhafono yan mi kama aafáke Tiyarafenui man baya yo ékiya ono. <sup>10</sup> Para vara seyo, Mosesi sikhen mino, ‘Éi e anóe afóeni vaya ánaín ná dakhafono.’ Eks 20:12; Diu 5:16 Inká ena vá tiyáken, ‘Mana vanta ano ma ve anóe afóen nan ma namu vaya sin nain ná arintin purino.’ Eks 21:17; Riv 20:9

<sup>11</sup> Purinten mifo saretí máa sé iya ono, ‘Mana vanta ano ma ve anóe afóen ayain moní dákaren békanan tiámé iyan mino, “Téi ma moní Tiyarafenu ameno van derúna ino.”

<sup>12</sup> Mai máan ma inten béisída vá be anóe afóen kama ino. <sup>13</sup> Tiretí ankan ma anafu aráón pintena vareona mai avúavá ánaín dakhafiyákeya Tiyarafenui vaya ma kantifin karú dareya saretí ma avúavá daná kokhon mano variya ono.”

*Banasi Ma Maman Painí Íyai  
Pákena Van Ma Yisasi Sein Baya Ino*  
(Matiu 15:10-20)

<sup>14</sup> Máa siren evaránen Yisasi vanasi aran erin tiamemí, “Tiretí ankan téínti vaya inere vá afová ono. <sup>15</sup> \*Mana yaná ma mafá baren banta aúpin ma aravin mai ano ída vanta fainí é iyan mifo vanta aupinté má édan mai yaná kayo ano anan banta fainí é iyan mino. <sup>16</sup> Átaren ma van nain banta ano vá ineno.”

<sup>17</sup> Béi ma mai nain banta me ampiren má naumpin orivíkan bei eyo iyampon kayo mai vaya ma sian baé ádeini anavan béintá inaen mino. <sup>18</sup> Ina íkan béisída véti tiamemí, “Tiretí bá dere ída inikhe

\* 7:2: Ruk 11:38 \* 7:4: Mat 23:25 \* 7:15: Apo 10:14-15

fono. Minó daná ma mafá bare ma vanta aúpin aravin mai ano ída vanta faini é iyan mino. Ída ino! <sup>19</sup> Mai yaná ano ída vanta amafompin oré iyan mino. Mai yaná ano arápin araven arái íkan ara masípin mo karákan aravé iyan mino.” Ma vaya fókéi Yisasi minó dunanan avusese ukhen ne sen mino.

<sup>20</sup> Mairá béis máa semí, “Mana yaná ma vanta aúpin varen ma édiyain manon banta maman painí é iyan mino. <sup>21</sup> Minó daná ma ineine finté afoká é iyain mai yana sinta ino. Minó namu ineine in avúavá, pamúkuí in, umoyan in, banta aruan purin, <sup>22</sup> ábasu yurafurin, ena ina yana san kampun tin, ara ara namu avúavasí in, baya atákore en kampuntin avúavá bá Tiyarafenu ará namu uanten béis oyampá baya sin avúavá bá baya átakharé uren be au kákani in avúavá bá óen in avúavá bá <sup>23</sup> minó mai namu avúava sínta anon banta aúpin baren ma éden maen mai anon maman banta fainí é iyan mino.”

*Maná Fonisiá Nanin Mano Ma Yisásintá Mumunan Ein Baya Ino  
(Matiu 15:21-28)*

<sup>24</sup> Yisasi mai varu me ampiren Taiyá barafá e mantén oren mino. Oriven béis mana namumpin un pében ída mana vanta ano afóvá ino van en mifo véi ída kanaén aúpá baren mino. <sup>25</sup> Mana nanin mano véi ma o vain baya iniren be arau namu aunan mano fákakhan baré in mai nanin mano Yisasin arantampin mo aron kanan durafú den matimen mino.

<sup>26</sup> Siriá barafin Fonisiá kaein Kiriki váken béis Yisasin nan be arau aufin ma namu aunan bain do siantano yan tiamen mino. <sup>27</sup> Yisasi evaránen béis tiamemí, “Tetí iyampon nare vá dunan amékun ná kanaí en nano. Ída vá

iyamponi yunan tetí maman iyan oofen karú dá tifano.”

<sup>28</sup> Máa síkan mai nanin mano evaránen béis tiamemí, “Bafan noe! Pura siya ompo sakho aránaópa bain iyan kayo ano iyamponi yunan antan ma eravein mi né iyan mino.”

<sup>29</sup> Máa síkan Yisasi evaránen béis tiamemí, “Éi ma máa seona rá namu aunañ mano inka e arauñ aú pinté me ampiren oren mifo éi evaráne orono.” <sup>30</sup> Máa síkan mai nanin mano evaránen be amápin o onákan namu aunañ mano ve akhá me ampiren orivíkan béis sakhoópin bakhen baren mino.

*Yisasi Ma Átaren Kontan Ída Kama En Baya Siyain Banta Ayofein Baya Ino*

<sup>31</sup> Mai ráké Yisasi e mantaaren Taiyai vara me ampiren Saidonii vara aúbana oriaren Kariri non akhempá orun nóbén Dekaporisi varafá oren mino. <sup>32</sup> Oríkan manáa ano mana átaren kontan ída kamaen baya siyain banta avión Yisasi vaintá meren, “Béis nan ayan kaú antano,” sen mino. <sup>33</sup> Máa síkan Yisasi mai vanta avíoren minó nanin banta me ampiren manáa nentá békán mana oriven mai vanta átarempin Yisasi ayantá akhare siren mai vanta amafintá kaen mino. <sup>34</sup> Máan turen Yisasi inarufá kakháben avádóden aunañ mamaren mai vantavan Aramaiki vaya finté temí, “Efata.” Mai máan ma semí, “Divono.” <sup>35</sup> Máa siyain má mai vanta amafintá ma yampakhen uman diyá ein daná orivin átaren inen baya kamaen ten mino.

<sup>36</sup>\* Máan turen Yisasi yetí ankan airo ananí uantá den ída vá ma avúavá baya ena nanin banta siámero. Máa siren béis ákonæn airo ananí urákan betí ankan mai avúavá moéken tian afoká en mino. <sup>37</sup>\* Máan tíkan minó ano anúden oreraen temí, “Átaren ma kontaré ein mano kamaen iníkan inká baya ma ída siyaré ein mano

vaya síkan Yisasi ma minó avúavá barein mano kamaen mino.”

## 8

*Yisasi Ma Kamí Kamí Tauseni  
(4000) Vanta Yunan Amein Baya Ino*

*(Matiu 15:32-39)*

<sup>1</sup>\*Máan ten nókan maná damú kokhon nanin banta ano Yisasi vaintá átaru ukhan betíi yunan ída vaimpin bei eyo iyampon kayo arákan erin tiamemí, <sup>2</sup> “Kanú manaú damúi ma nanin banta sen má bákán betíi yunan minó kípavíkan dunan ída van tirun kiyan mino. <sup>3</sup> Manáa ano ayá aa sáké erikhein betí ankan ma arafan tiantékun betíi varufá oriyaren ayanafá auu entave entave intin aasá o ankaminten mino.

<sup>4</sup> Máa síkan bei eyo iyampon kayo ano máa sen bén tiamemí, “Ma vanta ída van kámá barafá ifo setí kanaisá erá bereti máderá ma nanin banta amenté tiferafuno.”

<sup>5</sup> Máa síkan Yisasi vetí ankan inaemí, “Tireti nái máa vereti yáke fono.”

Síkan betí ankan temí, “Dan manápá ifo afápá kan un ká dan mino.” <sup>6</sup> Síkan mairá béis minó nanin banta van barará kumaneno síkan barará kumamin dan manápá ifo afápá kan un kádán bereti máden Tiyarafenun tusu siantáden kisiren bei eyo iyampon kaylorá dákan banasi amen mino. <sup>7</sup> Bei eyo iyampon kayo ano manáa sító noyana kayo kain baré íkan Yisasi mai máden Tiyarafenun tusu siantáden bei eyo iyampon kaylorá dákan betí ankan máden banasi amen mino.

<sup>8</sup> Amíkan minó nanin banta ano kanaén naran antan o éke e éke uren daa manápá ifo afápá kan un kádán unan biken mino.

<sup>9</sup> Kamí kamí tauseni (4,000) vanta anon mai yunan narákan Yisasi vetí ankan tiantan oren mino.

<sup>10</sup> Orivíkan béis votifin bei eyo

iyampon kayo vá un kumamen Daramanuta varafá oren mino.

*Farasisi Kayo Ano Ma Yisasin Nan Inaru Fáke Avúavá Aní Intín Onano Van Ein Baya Ino*

*(Matiu 16:1-4)*

11 Maná damú Farasisi kayo ano Yisasin akhenóká uan onono van béis vaintá mana inaru fákena avúavási í oná tifano sen inaen mino.

12 \*Máa síkan Yisasi veyan avádúan onan uman diyaimpin temí, “Teréq ma vain nanin banta ano nái vará téin nan mana avúavá aní ino van tiyan nafino. Téi fura siré tiretin tiamé uno. Tireti ankampin téi mana avúavá daná ída aní onté uno.” <sup>13</sup> Máa siren béis votifin un kumamen non e kháden ena ufá oren mino.

*Erotin Má Farasisi Kayo Vái Yisirá Ma Siádein Baya Ino*

*(Matiu 16:5-12)*

14 Eyo iyampon kayo ano áuden ída vereti varanton oriyákan mana vereti ana votifin baren mino.

<sup>15</sup>\*Yisasi vetí ankan amaan temí, “Tireti ankan Farasisi kayoi yisi vá Erotini yisi vasará antan ono.”

16 Máa síkan betí ankan Yisasi inaemí vaya ída afová ukhen betiyan ten orera emí, “Tetí ankan ída vereti yáké kun mai van mi véi sen mino.” <sup>17</sup>\*Máa siyákan Yisasi afová uren betin inaemí, “Nái vará tireti ankan bereti ída yáké uno sé orera iya rafono. Tireti ankan ída afova vá e ine ukhen nan mi siretin ará ano uman diyán mino.

<sup>18</sup> Tireti ankan auu vákaya ompo ída oniya ono. Tireti ankan átaren bákaya ompo ída vaya iniya ono.

<sup>19</sup>\*Téi ma yan manápá bereti ma yan manápá tauseni (5,000) nanin bantafin kisirékun ma mai vereti antan ma fara vá ein nái máa unan ná bá de fono. Á unten nafino.”

\* **8:1:** Mak 6:35-44    \* **8:12:** Mat 12:39; Ruk 11:29    \* **8:15:** Ruk 12:1    \* **8:17:** Mak 6:52

\* **8:19:** Mak 6:41-44

Síkan betí ankan temí, “Tiyan míkan mifo sirantan kan orun ká dan mino (12).”

<sup>20</sup> MÁA síkan Yisasi vetí ankan inaen temí, “Ená damú ma séi yan manápá ifo afápá kan un kádán bereti ma kamí kamí tauseni (4,000) bantafin ma kisiré amékun ma minó ano narákan mai antan bereti nái máa unan ná tiretí ankan bíkhe fono.”

MÁA síkan betí ankan temí, “Dan manápá ifo afápá kan un kádán mino.”

<sup>21</sup> Síkan béisvetin tiamemí, “Mai sirectí ankan ída afová ukhe rafono.”

### *Yisasi Ma Auu Yufúkukhein Banta Ayofein Baya Ino*

<sup>22</sup> Yisasi vei eyo iyampon kayo vá Betsaidá oríkan manáa nanin banta ano mana auu yufúkukhein banta avígn Yisasi vaintá me khaúden béisnan mai vanta aurá ayan kaono sen mino. <sup>23</sup> Síkan Yisasi mai auu yufúkukhein banta ayan pákaaren mai varu me ampireñ aviren oren morun baru akhempá kaúden mai vanta auufen akhare siren be ayan mai vanta aurá kaúden inaen temí, “Éi kaná manáa yanásinta oniya fono.”

<sup>24</sup> MÁA síkan mai vanta ano yan auu mááken onen temí, “Eyo, téi vanasi oniyá umpo vetí ankan daa ana kayo ma kayamanaen noiní iyan mino.”

<sup>25</sup> MÁA síkan Yisasi evaránen mai vanta auufen ayan kaúan tádán auu kama uvín mai vanta ano kákantá auu mariyáken minó danaá kamaen onen mino. <sup>26</sup> MÁAN turen mai vanta Yisasi slantán be amapá oriyákan temí, “Ída vá mai varufin umperano.”

\* **8:28:** Mak 6:15   \* **8:29:** Yon 6:68-69  
mai Tiyarafenu ano ma vei vanasi evaránen avirano van ma aní ukhá ein banta van mi sikhen mino. Ruk 20:41; 22:67; 23:35; 24:26, 46; 23:35; 24:46; Apo 3:20; 1Yo 5:1; Rev 11:5 fin ná dere onano.

### *Pita Ma Yisasi Nan Tiyarafenu Ano Ma Aní Ukhein Banta Ono Sein Baya Ino*

(Matiu 16:13-20; Ruku 9:18-21)

<sup>27</sup> Mai ráké Yisasi vei eyo iyampon kayo vá e mantan Sisaria Firi-paí barufimpá oriyákan ayanafá Yisasi vei eyo iyampon kaylorá inaemí, “Minó nanin banta ano séin nan iye inó tiyan nafino.”

<sup>28</sup> \*MÁA síkan betí ankan evaránen bein tiamemí, “Manáa nanin banta ano éin nan monó non péantán banta Yoni ino síkan inká ena kéká ano sakhanampa vanta Iraia ino síkan ena kayo ano mana feyan sakhanampa vanta ino siyan mino.”

<sup>29</sup> \*MÁA síkan Yisasi inaemí, “Tiretí iye inó téin nan tiya rafono.”

Síkan Pita evaránen tiamemí, “Éi Karaisi\* Tiyarafenu ano ma gefá ma sen minó nanin banta evaráne aviranongo ma sikaré ein banta ono.” <sup>30</sup> \*MÁA sirákan Yisasi vei eyo iyampon kayo airo ananí uanten ten mino. Pura ifo séi Karaisi umpo ída vá mai vaya ena nanin banta siameno.

### *Yisasi Ma Veyan Púaren E Man- tan Nain Baya Sein Mino*

(Matiu 16:21-28; Ruku 9:22-27)

<sup>31</sup> MÁA siren mairá betí ankan afová amen temí, “Banta Anin mano kákán aí barantin minó ánon banta kayo vá monó ánon banta kéká bá man baya ma afová ukhein banta kayo vá béisnan oyan amiren béis aruan purinten mino. Aruan púdantin kanú manaú damú orivintin béis evaránen e mantanten mino.” <sup>32</sup> MÁA siren Yisasi mai vaya ana afoká amá uan betí ankan amirákan Pita ano véin do aviren akhempá mo khaúden araíen asen temí, “Mai ma siyaona vaya ída vá teno.”

\* **8:28:** Kiriki vaya finté Karaisi ma sikhein mai Tiyarafenu ano ma vei vanasi evaránen avirano van ma aní ukhá ein banta van mi sikhen mino. Ruk 20:41, 22:67, 23:35; 24:26, 46; 23:35; 24:46; Apo 3:20; 1Yo 5:1; Rev 11:5 fin ná dere onano.

\* **8:30:** Mak 9:9

33 Máa siyákan Yisasi yovaéan bei eyo iyampon kayo oniyáken Pitán asen temí, “Ban Anon noe. Téin toyampá entavono. Éi ída Tiyarafenui ineine ánaín dakhafiya ono. Ída ino. Éi vantai ineine ánaín mi yakafiya ono.”<sup>34</sup>\* Mairá Yisasi minó nanin banta vá bei eyo iyampon kayo vá arákan béis vaintá eríkan betí ankan tiameemí, “Mana vanta ano ma séin tínaín ma vákurono van beyan maman bararasí urená bei yaa unkamádon mamaren ná téin tínaín bákurino.<sup>35</sup> Para vara seyo, mana vanta ano ma vei aunantá ma yafisintin maen mai veni aunan o afeyoranten mifo vanta ano ma séi má tenti kama vaya va san ma inireñ bei aunan ampirákaren mai ano evaránen bei aunan baranten mino.<sup>36</sup> Mana vanta ano ma minó ma vara ráke yanásinta ma mamarantin beni aunan ma aiyóbintin minó daná ano intesá ená béin ayainten nafino.<sup>37</sup> Mai nái yaná pókesá banta ano evaránen bei aunan miyaní inten nafino.<sup>38</sup>\* Taréa ma ume vá nanin banta ma vaimpin ma mana vanta ano ma séin má tenti vaya vasa ma ayave iyá intin maen Banta Aníñ mano ma ve afóeni kakhan má kantá enisorí kayo vá ma ayompin erin nain damú mai vanta van be yeren ayave uantanten mino.

## 9

<sup>1</sup>\*Yisasi vetí ankan máa sen tiameemí, “Teí fura siré tiretin tiamiyá uno. Ma ma mantakhein pinté manáa ano ída fükantin mi Tiyarafenui yafasin mano vei ákona vá erintin mi vetí ankan onanten mino.”

*Yisasin Au Vukhafá Ma Enará  
Ein Baya Ino*  
(Matiu 17:1-13; Ruku 9:28-36)

\* 8:34: Mat 10:38-39; Ruk 14:27    \* 8:38: Mat 10:33    \* 9:1: Mak 13:30    \* 9:2: Apo 3:22;  
2Pi 1:17-18    \* 9:11: Mar 3:1    \* 9:12: Íbo 22:1-18; Ais 53:3; Mar 4:5-6

<sup>2</sup>\*Dan manápá ifo afápá mana un kádan damú orivíkan Yisasi ano Pitán má Yemisin má Yonin má aviören mana ayá anurá betí ankan mana un báken Yisasi vetí avorá be au ayúden ena vukafaén mino. <sup>3</sup>Béini auí daná ano oon má kheiní iká efanten uron en mino. Ma vara ráke mana ano efanten davaráe sesé urantin ída kanaíen maman máaón efanten inten mino. <sup>4</sup>Máaón tiyain má Iraiyá nü Mosesin nü betí ankan baintá afoká uven Yisasin má baya siyákan betí onen mino.

<sup>5</sup>Máaón tíkan Pita ódären Yisasin tiameemí, “Aru soe, setí ankan ma sító namun kanú manaú en nina vá Mosesi nina vá Iraiyá nina vá ma uvará tifanuna mai kama ukhen mino.”<sup>6</sup>Pita kákantá akhokho van iyáken béis ma sin nain baya ída afová ukhan inká Yemisin nü Yonin nü bá dere kákantá akhokho van iyaren mino.

<sup>7</sup>Mairá máaón tiyain má konan mano eriaren betí ankan me úkuá darákán mai konan pinté mana oova ano máa semí, “Ma séin tanin uron mino. Béin nan téin moéken tiraniyan mino. Béin avaya vá inero.”<sup>8</sup>Máa siyain má manádá betí ankan onen eúkin ída ena vanta vákán Yisasi veyáká ana vetin má baren mino.<sup>9</sup>Betí ankan mai anu me ampiren eriyákan Yisasi vetin airo ananí uantten temí, “Ma yanásinta ma oneona mai siredí ída vá ena vanta sian mikhesin ná Banta Aníñ ma masí pinté orun mantavinti vá tiameeno.”<sup>10</sup>Máa sirákan betí ankan mai vaya fákaán ákona uren betiyan mana sen oreraen mino, “Mai ma masí me ampiré e mantanté uno ma sikhein mai nái yana sará ten nafino.”

<sup>11</sup>\*Betí ankan Yisasin inaemí, “Pará man baya ma afová ukhein banta kayo ano sen ná peyan

sakhanampa vanta Iraiya nare vá erino siyan nafino."

<sup>12</sup> \*Máa síkan Yisasi evaránen betin tiamemí, "Eyo mai fura ino. Iraiya ovaránen eriven minó daná maman puntaranten mifo feyan sakhanampa vanta kayo ano máa sikhen mino, 'Banta Anin mano uman baren berai sintin béin oyan aminten mino' sen pará tikhan nafino. <sup>13</sup> \*Máa sikhá mifo séi seretin tiámé uno. Iraiya inka fe erikhen mino. Bompon mano ma sikhá einén betí anunu kípen ara ara avúavá ben amaniná kaen mino.

*Namu Aunan Bá Ein Iyampon  
Ma Yisasi Ayofein Baya Ino*

(Matiu 17:14-21; Ruku 9:37-43)

<sup>14</sup> Máa siren betí ankan araven eyo iyampon kayo ma varé eintá o uníkan kokhon nanin banta vetin má iyukhan man baya ma afová ukhein banta kayo ano vaya fóké betin má aruvein an diyaren mino. <sup>15</sup> Máan tiyan baren mai nanin banta ano onákan Yisasi orin minó ano anúden orera uren tavaen mo véin kamaen mino. <sup>16</sup> Máan turan mairá béisvetin in-aemí, "Tireti ankan nái vará baya fóké man baya ma afová ukhein banta kayo vá aruvein an diya rafono.

<sup>17</sup> Máa síkan mai nanin banta aúbanáké mana vanta ano evaránen Yissasin máa sen tiamemí, "Aru soe, séin tanin namu aunan mano véimpín bákan orá iyákai éi vaípá béisaviré eré uno. <sup>18</sup> Kokhon damú mai namu aunan mano ákonæn béis pákaren barará maman asédan bavin oo fenté efanten akhare avanen eravin maen aveantuntá inkékipiyákan béis au ano kafifi sé iyan mino. Máan tiyákai éini eyo iyampon kayo van mai namu aunan do siantano sékun betí ankan ída kanaién mino."

<sup>19</sup> Máa síkan iniren Yisasi evaránen banasi siamemí, "Ída

mumunan bain nanin banta oe! Nái máa yádasá téi saretin má para vante rafuno. Nái máa yádasá téi saretí uman barante rafuno. Tireti ankan mai iyampon avire séi ma varunará ereno." <sup>20</sup> Máa síkan betí ankan mai iyampon aviren Yisasi vaintá eriyain má mai namu aunan mano Yissasin onen mai iyampon ainen ankaman karúdan barará baven baé baé íkan efanten akhare oo fenté avanen mino. <sup>21</sup> Máan tiyain má Yisasi ve afóenta inaemí, "Nái máa yádasá béis máan tiyan nafino."

Síkan be afóe semí, "Béisma araraká ma vá ein táké ino. <sup>22</sup> Kokhon damú mai namu aunan mano véin aruan purono van irafin nafi nompin nafi yauman karú diyan mifo éi kaná tétin nan arunan ureyá tiya inte fono."

<sup>23</sup> \*Máa síkan Yisasi véin tiamemí, "Éi ma mumunan inteya éi kanaíeya minó daná baran nono."

<sup>24</sup> Máa siyain má mai iyampon afóe ano evaránen temí, "Téi mumunan ukhé umpo senti mumunan tiyaesin mo ákoná ino."

<sup>25</sup> Máan tiyákán banasi savaen e átaruin Yisasi ódoren mai namu aunan béis asen temí, "Éi átaren konen oo uman dan auna noe. Téi éin tianté umpo mai iyampon ampireya entavuveya enadá bá ída vá béisimpin oferano." <sup>26</sup> \*Máa siyain má mai namu aunan mano avádóden bádiyan mai iyampon máden antú antú iyáken béis me ampiren orivíkan mai iyampon purein an davin minó ano óden temí, "Béis inka furen mino." <sup>27</sup> Máa siyain má Yisasi mai iyampon ayan bana fákaren orun ayanoran béis e mantan mino.

<sup>28</sup> Mantavíkan Yisasi ínaimpáké mánaumpin oríkan bei eyo iyampon kayo ana váken béis inaemí, "Mai náisá ukhará tetí ankan ída

\* 9:13: Mat 11:14    \* 9:23: Mat 21:21; Mak 11:23    \* 9:26: Mak 1:26

kanaí erá mai namu aunan do sianté tiferafuno.”

<sup>29</sup> Mái síkan Yisasi evaránen betí ankan tiamemí, “Tireti ma Tiyarafenu vaípá ma kokhon dádá amúkinte maen máan namu aunan kanaíe yo siantan nompo ena aa ída van mino.”

*Yisasi Ma Veyan Píaren E Mantan Nain Nan Ma Kan Dádasí En Tein Baya Ino*

(Matiu 17:22-23; Ruku 9:43-45)

<sup>30</sup>\*Mairá betí ankan mai varu me ampiren Kariri vara aúban oriyáken mana ano ída afová ino van Yisasi inen mino. <sup>31</sup>\*Para va ino. Bei eyo iyampon kayo vei furin afova ameno van mino. Béi semí, “Banta kayo ayampín Banta Anin amintin béis aruan purinten mino. Aruan púdantin ma kanú manaú damú orivintin béis evaránen e mantanten mino.” <sup>32</sup>\*Mái síkan betí ankan ída mai vaya afová ukhen béis inain nan peren mino.

*Inaru Yafisimpin Iyé Kákani Inten Nafino Ma Sen Ina Ein Baya Ino*

(Matiu 18:1-5; Ruku 9:46-48)

<sup>33</sup> Mairá betí ankan Kapení amú oren mino. Oriven béis ma mápin báken betin inaemí, “Ayanafá tireti ankan nái vará asive asive iya rafono.” <sup>34</sup> Mái síkan bei eyo iyampon kayo ano iyé minotí kákán ban nafino siren ayanafá asiven eriyaren béis ída siamen mino. <sup>35</sup>\*Maira Yisasi kumamen tiyan míkan mifo sirantan kan orun kádan (12) eyo iyampon aran eríkan betí ankan tiamemí, “Mana vanta ano ma kákán ono van minó banta ángimpá báken ná minói eyo vá bariyan bano.”

<sup>36</sup> Mái siren Yisasi mana arara iyampon avíón betin aúbanapín mantaan táden béis ayan bana fákaren o yafayóden betí ankan tiamemí, <sup>37</sup>\*“Iye anó téin nan

inireyá mana máan tukhein iyampon arará aya inten nafi mai ano séin mi siya inten mino. Inká iye anó téin tiya inten nafi mai ída séin tiya inten mifo Tifóe ma séin tisintá erikheruna mai véin mi aya inten mino.”

*Iyé Ída Setinti Namuroí Inten Nafino, Mai Setin Tirona Ino Ma Sein Baya Ino*

(Ruku 9:49-50)

<sup>38</sup> Yoni véin tiamen temí, “Aru soe, setí ankan onéku mana vanta ano éin avíkánamu aunañ do siantiyaren mifo véi ída setí ankan ma manápá noin bantan bakái véin airo ananí uanté uno.”

<sup>39</sup> Mái síkan Yisasi véin tiamemí, “Tireti ankan ída vá béis airo ananí uantano. Mana vanta ano ma séin tiviká ma mana avúavá daná ma uvaryaren mai vanta ano ída ainen téin nan namu vaya sinten mino. <sup>40</sup>\*Setin ma ída namuroí iyain banta mai setin tirona ino. <sup>41</sup>\*Téi fura siré tiretin tiámé uno mana ano ma siren nan Yisasini kéká ino siren ma non dáan amin nain mano fura siren bei miyan baranten mino.

*Umeúavá San Ma Yafiken Ban Baya Ino*

(Matiu 18:6-9; Ruku 17:1-2)

<sup>42</sup>“Banta ano ma mana auyen monó kéká ma séintá mumunan ukharé intin ma vetí ankan pinte ma e avíá dantin ma umefin orintin mae vá mai vanta amempin ná kákán onámaná kurená un nompin karúdantin námen aravino. <sup>43-44</sup>\*Éin ayan mano ma umefin ma avíón kaintiya mai ayan ná tikareya karú dano. Mana ayan mana ma éin baréinti kanaíe éi ída kípan aunañ baran nono. Mai kama inten mifo éin ma kankanan ayan ma áesin báken mana ayan mano umeí iyá intin mae ída kípan íra

\* 9:30: Yon 7:1 \* 9:31: Mak 8:31; 10:32-34 \* 9:32: Ruk 9:45 \* 9:33: Mat 20:25-27; Mak 10:43-44; Ruk 22:24-26 \* 9:37: Mat 10:40 \* 9:40: Mat 12:30; Ruk 11:23 \* 9:41: Mat 10:42 \* 9:43-44: Mat 5:30

ma kiyan ma uman baren berai siyan purin barufin mi orin nono.\*

<sup>45-46</sup> Éin arantan mano ma umefin ma avian kaintiya mai arantan ná tíkoreya karú dano. Mana arantan mana ma éin baréintiya ída kípan aunan kanaileya varan nono. Mai kama intenmifo éin ma kankanan arantan ma áesin báken mana arantan mano ma umeí iyá inti mae ída kípan ira ma kiyan ma uman baren berai siyan purin barufinmi orin nono.\* <sup>47</sup> \*Éin auu ano ma umefin ma avian kaintiya mai auu víaná karúdan orino. Mana auu ana ma éin baréinti Tiyarafenu yafisimpin oferan nono. Mai kama inten mifo éi ma kankanan auu ma áesin báken mana auu ano ma umeí iyá inti mae ída kípan ira ma kiyan ma uman baren berai siyan purin barufin mi orin nono.

<sup>48</sup> Mai varufin titó bintókéna kayo ma vetí ankan aufin bain mai ída furintin ira ída yusiminten mino. *Ais 66:24*

<sup>49</sup> Tiyarafenu ano minó nanin banta kama ino van ara ara uman betin ané ma kaiyain mano irará ma iyó uren antereiní iyan mino.\* <sup>50</sup> \*Un kama yaná ifo veni ase ma kípavintiya sretí ankan náisá uresin ná evaránen ase inten nafino. Éi un ande vá afá aváen má manafin kamaeaya vano.

## 10

*Ábasu Ma Yurafurin Avúavá Baya Ino*

(*Matiu 19:1-12; Ruku 16:18*)

<sup>1</sup> Yisasi mai varu me ampiren Yudia varafá oriaren Yodan non e kháden ena ufá oríkan kokhon nanin banta ovaránen bái vaintá e átaru íkan bái ma iyain avúavasien

Tiyarafenu vaya vetí ankan tiamen mino.

<sup>2</sup> Tiamiyákan Farasisi kayo ano véi vaintá eriven béin akhenókæn temí, “Tetinti man bayá ano kanaisá intin ná mana vanta ano ve aná ifá uantanten nafino.”

<sup>3</sup> Máa síkan Yisasi evaránen betí ankan tiamemí, “Tiretí ankan Mosesi ano intéa man bayá amikhan nafino.”

<sup>4</sup> \*Máa síkan betí ankan temí, “Banta ano ve ábasu ma yurafurin bompon uvamá daren ná be aná ifá uantanon Mosesi sikharen mino.”

<sup>5</sup> Máa síkan Yisasi evaránen betí ankan tiamemí, “Tiretí ankan átakharé en nan mi Mosesi ma man bayá sretin uvaman amikhan mino. <sup>6</sup> Pefá Tiyarafenu ma araíen minó daná ma uvarein damú “béis” vanta vá anasi vá uvaren mino.” *Esé 1:27; 5:2*

<sup>7</sup> \*Máaón tukhan mi vanta ano ve anóe afóen ampiren be aná bá manafin kasukhen mino.\* <sup>8</sup> Mai vanta vá anasi vá ano mana yukhafáí ukhen mino. *Esé 2:24*

<sup>9</sup> Máaón tukhan ma Tiyarafenu ano veyantái vanta vá anasi vá maman kasuantákein mai vanta ano ída yaimin nono.”

<sup>10</sup> Máa siran betí ankan ínaímpáke má naumpin oriven Yisasintá bei eyo iyampon kayo ano mai vaya van evaránen inaen mino. <sup>11</sup> \*Inaíkan bái vetí ankan tiamemí, “Maná vanta ano ma ve aná ifá uren ma ena nanin ma o varanten mai vanta ano mai nanin má pamukúi inten mino.

<sup>12</sup> Inká mana nanin mano ma ve avafun ifá uren ma ena vanta ma o varanten mai nanin mano mai vanta vá pamukúi inten mino.”

*Yisasi Ma Arará Iyampon Arintan Avu Uantein Baya Ino*

(*Matiu 19:13-15; Ruku 18:15-17*)

\* **9:43-44:** Manáa vompon mano ves 44 kaen mino. Mai vesi ano ves 48 vá manaí ukhen mino.

\* **9:45-46:** Manáa vompon mano ves 46 kaen mino. Mai vesi ano ves 48 vá manaí ukhen mino.

\* **9:47:** Mat 5:29 \* **9:49:** Riv 2:13 \* **9:50:** Mat 5:13; Ruk 14:34 \* **10:4:** Diu 24:1-4; Mat 5:31 \* **10:7:** Efe 5:31-33 \* **10:7:** Manáa vompompín ída “be aná bá manafin kasukhen mino” sikhen mino. \* **10:11:** Mat 5:32

<sup>13</sup> Manáa ano Yisasin nan ayan ántoná kaú antanovare siren arará iyampon arinta aviren eríkan beni eyo iyampon kayo ano vetí ankan asen mino. <sup>14</sup> Asíkan Yisasi vetí ankan onan aran kiyaimpin temí, “Tiretí ankan áesin arará iyampon arinta séi varunafá erino. Ti-yarafenu Yafisin mai kayo ma einí ukhein nanin banta ina ino. <sup>15</sup>\* Téi fura siré tiretí ankan tiamiyá uno mana nanin banta ano ma ída arará iyampon arinta anden ma Ti-yarafenu Yafisin ída varanteya maifín ída kanaíeya oferan nono.” <sup>16</sup> Máa siren mai iyamporinta yafayó diyan ayan ántoná kaúden avu amen mino.

*Kokhon Ona Vain Pumarai Vaya Ino*

(Matiu 19:16-30; Ruku 18:18-30)

<sup>17</sup> Mairá Yisasi e mantén oríkan mana vanta ano savaen me aron durafúden matimen temí, “Kama aru soe, séi inté ma erá ídakípan aunan barante rafuno.”

<sup>18</sup> Máa síkan Yisasi véin tiameí, “Pará éi séin nan kama e siya fono. Ti-yarafenu veýáká anan kama ukhen mino. <sup>19</sup> Man baya éi afóvá ukha ono.

‘Ída vá banta aruan purono.’

‘Ída vá ábasu namu ono.’

‘Ída vá umoyan daná barano.’

‘Ída vá ena vanta kampun kó tiantano.’

‘Ída vá kampun tire ena ína yaná barano.’

‘E anoiwon aránaó pasá bano.’ *Eks 20:12-17; Diu 5:16-20*

<sup>20</sup> Máa síkan mai vanta ano Yisasin tiameí, “Aru soe, séi ma iyampon táké eré tare ma e varúna mai man baya kayo máa minó bákuriyá uno.

<sup>21</sup> Máa síkan Yisasi véin ódaren arunaná máden béin tiameí, “Éi mana yaná o útúka ompo ei ona minó mo sarí ure vá ona ma ída van nanin banta mai moní ameno.

Amiráka mae mai ínaimpáké inaru fáke kama yaná baran nompo eriveya séin tivákurono.” <sup>22</sup> Máa síkan mai vanta ano kokhon ona kaúdákaréin ará ano uman diyaimpin me ampiren oren mino.

<sup>23</sup> Orivíkan Yisasi vei eyo iyampon kayo onen eúkiyan temí, “Ona ma kokhon kain ma vain banta ano Ti-yarafenu yafisimpin ída kanaíen oferanten mino. <sup>24</sup> Máa síkan bei eyo iyampon kayo mai vaya van anúden orera íkan Yisasi evaránen betí ankan tiameí, “Tikhafana oe, banta ano ma Ti-yarafenu yafisimpin ma oferan mai ákona yoran mino.” <sup>25</sup> Kameri ano ma ufi aimpin ódin mai uman dakhen mifo kokhon ona ma yákein kéká ano ma Ti-yarafenu yafisín barufin ma ódin mai moéken uman mi yakhen mino.

<sup>26</sup> Máa síkan beni eyo iyampon kayo anú duren betiyan ten orera emí, “Máan ma ukhantin maen mai iye ná Ti-yarafenu ano kanaíen aviranten nafino.”

<sup>27</sup> Máa síkan Yisasi vetí ankan kakháben temí, “Minó danápiñ banta ano ída kanaí inten mifo Ti-yarafenu veýáká anan kanaí inten mino.”

<sup>28</sup> Máa síkan Pita ano Yisasin mana vaya siameí, “Ineno setí ankan minó daná me ifá uréi éin dakhfifiyá uno.”

<sup>29</sup> Máa síkan Yisasi semí, “Téi fura siré tiretin tiameí uno. Manáa vanta kayo ano ma sen má tenti kama vaya va san ma iniren afá aváen má ayofin má anóe afóen má iyampon má dunan ana vá ma me ampikharen maen <sup>30</sup> betí ankan ena mana antaretivá (100) baranten mino. Betí ankan ma varará para vantin Ti-yarafenu ano yetí ankan ma fefa mantá ein danasinta esantaren kokhon daná aminten mino. Betí ankan kokhon má bá afá aváen má ayofin má anóe afóen má iyampon má

\* **10:15:** Mat 18:3    \* **10:24:** Manáa vompompin ena vaya asotú ukhen mino: “Kokhon ona ma varano van inikhein kéká ano ma Ti-yarafenu yafisimpin ma oferan mai ákona yoran mino.”

dunan ana vá barantin maen manáa vanta kayo ano vetin namu avúavá uantanten mino. Máan uantiyaré intin ínaiimpá ma yamú afoká intin ída kípan para oriyain ban aunan baranten mino.<sup>31</sup> \*Baranten mifo aní maen oriyain nanin banta kayo ano ínainí intin ínainí maen oriyain nanin banta kayo ano anona aní inten mino.

*Yisasi Ma Veyan Púaren E Man-  
tan Nain Nan Ma Kanú Manaú  
Dádasí En Tein Baya Ino*

(Matiu 20:17-19; Ruku 18:31-34)

<sup>32</sup> \*Máa siren ínaiimpáké betí ankan e manten Yarusaremí ódono van aayana oren mino. Yisasin nare an oríkan beni eyo iyampon kayo ano kokhon ineine iyákan betí ankan ma avákuren noré ein nanin banta ano akhokho van en mino. Máan tíkan Yisasi sirantan kan orun kádan (12) eyo iyampon kayo ádun avían kaúden be ané ma afoká inain baya enádá evaránen tiamen mino. <sup>33</sup> "Yerusalemí ódé tifékun maen mana vanta ano Banta Anin maman monó ánon banta kayo vá man baya ma afová ukhein banta kayo vá ayampin kaintin béis aruan purono van betí ankan kó tiantanten mino. Béin ída Yutan banta anampin aminten mifo ena anan bantafin mi aminten mino. <sup>34</sup> Amintin maen betí ankan mano véin ayanavan baya sen akhare sen dafiyó ankamen uren béis aruan purinten mino. Aruan púdantin kanú manaú damú orivintin maen béis evaránen e mantanten mino."

*Yemisin Nú Yonin Nú Ano Ma  
Yisasin Inaein Baya Ino*

(Matiu 20:20-28)

<sup>35</sup> Máa sirákan Sebetin anin kanan Yemisin nú Yonin nú ano véi vaintá eriven temí, "Aru soe, berasan mana yana san ina

urékuya éimai yanasi berasan usintano van muno."

<sup>36</sup> Máa síkan béis evaránen békaran tiamemí, "Tiré kanan téi nái yanasisá uantano vará iya fono."

<sup>37</sup> Máa síkan béis tiamemí, "Ínaiimpáké ma éi ma kákan Kiní uvesí berasan pintena mana ano éin ayan kurompá kumanintin mana ano ayan ópá kumanintí ono van muno."

<sup>38</sup> \*Máa síkan Yisasi evaránen békaran tiamemí, "Tiré kanan ma séi ma inaiyaona mai yaná ída siré kanan afová ukhe ono. Téi ma saréa ma nanuna kápifin tiré kanan kanaí neyá inká téi ma feranuna non pereyá inte rafono."

<sup>39</sup> \*Máa síkan békaran béis tiamemí, "Berasan kanaí onte uno."

Síkan Yisasi vékanan tiamemí, "Pura ino saréa ma séi ma nanuna kápifin tiré kanan má maifin nan nono. Téi ma feranuna non tiré kanan má peran nono. <sup>40</sup> Máan tím nompo séin tiyan kurompá kumanintin tiyan ópá kumanintin ma in mai ída sen tina yaná ino. Tiyarafenu veyantái mai kumanin manáa vanta kayo aminten béisfefái vetin nina funtáadan ban mino."

<sup>41</sup> Máa síkan tiyan míkan eyo iyampon kayo ano inire Yemisin nú Yonin nú anan uanten mino.

<sup>42</sup> \*Anan uantákan Yisasi vetí ankan arákan béis vaintá erikan betin tiamemí, "Tireti ankan afová ukha ono ánon banta kayo ma ída Tiyarafenurá ma mumunan iyain nanin banta kaylorá ma yafisé iyain mai vetí ankaní ákona vákan mi yafisé iyan mino. <sup>43</sup> \*Dafisiyan mifo srietí ankampin ída vá ma avúavá bano. Tireti pinté ma kákaní ma ono van béis vá tiretí yoran banta vá bano. <sup>44</sup> Mana ano ma srietí ánon bantaí ma ono van béis vá minói miyan ída van doran

\* **10:31:** Mat 20:16; Ruk 13:30      \* **10:32:** Mak 8:31; 9:31      \* **10:38:** Mak 14:36; Ruk 12:50  
 \* **10:39:** Apo 12:2; Rev 1:9      \* **10:42:** Ruk 22:25-26      \* **10:43:** Mat 23:11; Mak 9:35

banta vá bano. <sup>45</sup> Mai fara vara seyo, Banta Anin ma erikhein mai véin ayaen dóantano vará erikhen naino. Ída ino. Béi vanasi ayaen doren be aunan amintin mai ano kokhon nanin banta miyaní uren avirano van mino.”

*Yisasi Ma Auu Yufúkukhein  
Banta Auu Kama Uantein Baya Ino  
(Matiu 20:29-34; Ruku 18:35-43)*

<sup>46</sup> Betí ankan Yerikó barurá oren mino. Béi Yerikó me ampiren oríkan bei eyo iyampon kayo vá kokhon nanin banta kayo vá bái oriyákan Timeasin anin Batimeasin auu yufúkukhan aa akhempá kumanten banasi vaípá moni san inantiyaren mino. <sup>47</sup> Inantiyaren iníkan Nasaretíké Yisasi eriyan mino síkan bái avádóden oovaren temí, “Devitin anin Yisasi oe, séin nan éi arunan usintano.”

<sup>48</sup> Mái síkan kokhoná banta ano véin asen temí, “Ei vaya fákano.”

Mái síkan mai vanta ano moéken avádóden enádá oovaren temí, “Devitin anin noe, séin nan éi arunan usintano.”

<sup>49</sup> Mái síkan mairá Yisasi o mantaven temí, “Béin aresin erino.”

Síkan betí ankan mai auu yufúkukhein banta araren béisn tiameemí, “Éin ará ano vá ákona ino. Éin ariyan mifo e mantano.” <sup>50</sup> Mái síkan bái vei au anamun me karúdaren e mantan Yisasi vaintá oren mino.

<sup>51</sup> Oríkan Yisasi véin tiameemí, “Éin náisá téi uantano vará inikhe fono.”

Mái síkan mai auu yufúkukhein banta ano véin tiameemí, “Aru soe, séi evaráné onarami iyá uno.”

<sup>52</sup> \*Mái síkan Yisasi véin tiameemí, “Éini mumunan mano éin evaránen kama uanten mifo orono.” Mái siyain má manádá ano ainen béisn auu kama uvín oniyáken Yisasin bákuren ayanafá oren mino.

\* 10:52: Mak 5:34

## 11

*Yisasi Ma Kin An Daven  
Yerusaremí Ódein Baya Ino  
(Matiu 21:1-11; Ruku 19:28-40;  
Yoni 12:12-19)*

<sup>1</sup> Máan turen Yisasi má bei eyo iyampon kayo vá ano Yerusaremí áde suron oriven Orífi Anuyon áde ma Betfakhé baru vá Betaní baru vá baintá oren mino. <sup>2</sup> Oriven mai ráké Yisasi vei eyo iyampon kayo fintena kankanan tianten temí, “Tiré kanan ma mesan barufá oriveya onesin maen mana ano ída ané kumantan nain donkin ayanan kurantin banten mino. Mai vá ayanan utú deya séi varunará bare ereno. <sup>3</sup> Eresin ma mana ano ma siré kanan inaan ma ‘fará máan tiya fono’ ma sintiya vá béisn ná tiameeno, ‘Bafani yoran bákan mi véi sisintá e aviriayrúna veni yoran ma kípantin ainen ovaránen tiantantin erinten mino.’” <sup>4</sup> Mái síkan beni eyo iyampon kanan mai varufin oriven onákan aa akhempá mana namun onará ayanan kuran baré íkan míkanan mai donkin ayanan mo útufen mino. <sup>5</sup> Útufíkan manáa vanta mairá áde mantakharen békaranan inaemí, “Tiré kanan náisá intoyá mai arará donkini ayanan útufiya fono.” <sup>6</sup> Mái sen ina íkan Yisasi ma vékanan tiamein bayá máa mai kayo siamíkan “Kana ifo avirano” síkan mai donkin békaranan aviren oren mino. <sup>7</sup> Oren mo Yisasi vaintá mai donkin kaúden békaranan au anamun davá den mai donkin ané uvídan Yisasi mairá kumanen mino. <sup>8</sup> Kumamen oríkan kokhon nanin banta ano yetíi au anamun davá diyan aasá uvísien manáa ano yaa ayan iyaren uvísien mino. <sup>9</sup> Mái tiyákan manáa nanin banta ano auufá orin manáa ano oyampá orin iyáken oovararen temí,

“Bafani avisá daní ono!”

“Bafani avíká ma eriyain avisá daní otifano!” *Íbo* 118:25-26

10 “Ma ma eriyain tétin tinafu Devitini yafisin an dakhein mifo avábasá ino.”

“Tiyarafenui avisá moéke yani suron ono!”

<sup>11</sup> Mápaa siyákán Yisasi Yerusaremí o unaven monó namumpin un pében minó daná onen eúkiyan áau eraven inúpasí íkan bei sirantan kan orun kádan (12) eyo iyampon máa vá Betaní oren mino.

*Yisasi Ma Fiki Yaa Ana Asin Kafurein Baya Ino*  
(*Matiu 21:18-19*)

<sup>12</sup> Ená damú Betaní me ampiren eriyá íkan Yisasin arafan puren mino. <sup>13</sup> \*Arafan puriyan eriyaren bái onákan manáa nentá mana anañoni ukhein fiki anaa ampantan bái mai anafin aranan doseno van oren mino. Mai fiki ano ma aran iran damusí ída ukhan ananon dakhaní ana ukhan mai yaa anafin oriven onákan ída mana aran bareñ mino. <sup>14</sup> Mápaa tukheimpin Yisasi mai fiki yaa van temí, “Éni aran mana ano ída vá evaránen nano.” Mápaa síkan bei eyo iyampon kayo mai vaya inen mino.

*Yisasi Ma Kákan Monó Namun Pinte Ma Minó Daná Sarín Banta Kayo Yo Siantein Baya Ino*

(*Matiu 21:12-17; Ruku 19:45-48; Yoni 2:13-22*)

<sup>15</sup> Betí ankan Yerusaremi oriven Yisasi kákan monó namumpin ódiven maifin ma sarí iyan ma miyaní iyá ein kéká bá inká moní arumiyan ma nun kayo sarí urákan ma miyaní iyá ein takhó bá kumanin má banaan karú diyáken do sianten mino. <sup>16</sup> Banaan karú daren betí ankan ma minó daná baren kákan monó namumpin ma non airo ananí uanten mino. <sup>17</sup> Uantáden betí ankan tiameemí,

“Tiyarafenui vompon dóki ano ída máa sikhen nafino,  
Téin timá ma vain mai minó nanin banta ano vá amúkin namun mino vá teno.” *Ais 56:7*

Mápaa ná tin nompo ‘siretí ankan mano mai namun maman umoyan banta kayoi aúpá baruuí e ono.’” *Yer 7:11*

<sup>18</sup> \*Mápaa siyákán monó ánon banta kayo vá man bayá ma afová ukhein banta kayo vá ano mai vaya inireñ béin ma arin nain avan araién dosen mino. Dosiyán mifo minó nanin banta ano véini vaya van kákantá anúden orera iyan mai van béin nan betí ankan peren mino. <sup>19</sup> Mairá inúpasí íkan Yisasin má bei eyo iyampon kayo vá Yerusaremí me ampiren oren mino.

*Mumunani Ákona Fákena Vaya Ino*

(*Matiu 21:20-22*)

<sup>20</sup> Ená damú pe ákurá betí ankan oriyaren onákan mai fiki yaa ana anaa vá arú bá minó ira khakhan onen mino. <sup>21</sup> Ódaren Pita mai van ovaren inen temí, “Aru soe, inuran ma ma fiki yaa van ma namu ono ma seona mai inka irakhen mifo onano.” <sup>22</sup> Mápaa síkan Yisasi evaránen tiameemí, “Tiyarafenu rasá mumunan ono.

<sup>23</sup> \*Téi fura sé uno. Éi kanaíeya ma anuyon nan teya ‘anuyon noe, e ankábore un nonafin oferano ma’ sesin maen mai ano fara éi ma sinonaí inten mifo éi ma ída kankanan ineine vanti ma mumunan ma ukhesin mi Tiyarafenu ano mai yanásí uantanten mino.

<sup>24</sup> \*Tiretí ankan ma mana yaná baranton iyáke ma amúkiya mumunan e ma fura mai yaná tetí baranté uno ma sesin mai ma siretí ankan ma varano van muno ma sinona yaná ano afoká inten mino. <sup>25-26</sup> \*Inten mifo siretí ankan ma mana vanta ano ma

\* **11:13:** Ruk 13:6 \* **11:18:** Mak 14:1 \* **11:23:** Mat 17:20 \* **11:24:** Mat 7:7 \* **11:25-26:** Mat 6:14-15

namu uantáká inti mae amúkiya mai vantai ume vá ifá uantano. Ifá ma uantesin maen mai siredí afóe ma inarufá bain mano siredí ume ifá uantanten mino.\*

*Yisasini Ákona Van Ma Monó  
Átaru Namuntá Ma Ánoni Ukhein  
Banta Kéká Ano Ma Inaein Baya  
Ino*

(Matiu 21:23-27; Ruku 20:1-8)

27 Enádá Yisasin má bei eyo iyampon kayo vá Yerusalemí oriven béis kákan monó namumpin nókan monó ánon banta kayo vá man banta ma afová ukhein banta kayo vá ánon banta kayo vá ano véi vaintá eren mino. 28 Eriven betí ankan béis inaemí, “Eimpin intéa ákoná bayá éi máon tiya fono. Iye ano éin mai ákona amiren ná éin nan mai yorarí ono sikhen nafino.” 29 Maa síkan Yisasi evaránen betí ankan tiamemí, “Téi mana yana san tiretí ankan ina onté uno. Inaéku ma ovaráne mai vaya ma séin tisimidesíi mai séi ma manté doriyarúna ákona siredin tiamenté uno. 30 Tiyarafenu anó Yonin monó non péantan doran amen nafino áa vanta ano mai yoran amen nafino. Tireti ovaráne vaya séin tisimeno.” 31 Maa síkan betiyan ten orera emí, “Teti ma sé Tiyarafenun anon mai yoran Yoni amikhan mino ma sekun mai siredí ankan, ‘Pará ída mairá mumunan iya rafono,’” sinten mino. 32 Maa sinten mifo setí ma sé, ‘Banta anon mai yoran amikhen mino,’ ma sekun mai ano ída kanaí inten mino.” Yoni sakhanampa vanta uron mino sen minó nanin banta ano inikhan mai van mi vetí ankan peren mino. 33 Maa siren betí ankan evaránen Yisasin tiamemí, “Tetí ankan ída afová ukhé tiféuno.” Maa síkan Yisasi vetí ankan tiamemí, “Téininte

ákoná bará doriya rafuno. Mai siredin ída siamenté uno.”

## 12

*Uvaini Yunan Anaará Ma Namu  
Vanta Kéká Ano Ma Yafiká Eintá  
Ma Ovaéádan Baya Ino*  
(Matiu 21:33-46; Ruku 20:9-19)

1 \*Yisasi araíen baya vaédiyan betin tiamemí, “Mana vanta ano uvaini yunan dóden dafuí uran baré íkan mai vanta ano uvaini ma yasamín nain masí uáden inká dafisin banta amá uvamá den uran baren mino. Baré íkan manáa vanta kayo ano maifin dorarí uré moní barano van íkan mai vanta kayo ayampin me ampiren béis enafá ayáká oren mino.

2 Orikaréin ínaimpáke uvaini aran kúdin damusí íkan béis mana vei yoran banta siantan mai ma uvaini yunampin doriyá ein banta kayo vaípá oren mino. Mai vanta kayo ano manáa uvaini aran mai yunan pintena véin amino van tiantan oren mino.

3 Orikan betí ankan mai yoran banta fákoren namu arirí uren ída mana yaná amin para siantan oren mino.

4 Oriyaimpin mai vanta ano evaránen ena yoran banta siantan oríkan betí ankan mai vanta ánon ankáden béis

máden namu uren ayave amen mino.

5 Maa tiyaimpin béis mana vei yoran banta siantan oríkan betí ankan mai vanta aruan puren mino.

Aruan puriyaimpin béis kokhoná bei yoran banta kayo

siantan oríkan betí ankan manáa ankamiyan manáa aruan puriyen en mino.

6 Maa turákan béis ma anunu ukheinmai ve anin mana ana en mino. Mai iyampon típá kípan uron béis siantan mai ma yunampin ma yoriyain banta kayo

\* **11:25-26:** Pefa v. 26 ída feyante kama Iburu vompompin baréin ínaimpáke bompon uvaran banta kayo mai vaya asotú en mino. Ma vaya Matiu 6:15 vá manaí ukhen mino: “Ifá uantanten mifo siredí ankan ma ena vantai ume ma ída\* ma ifá uantesin mai siredí afóe ma inarufá bain mano siredí ume ída ifá uantanten mino.” **12:1:** Ais 5:1-2

vaípá oríkan béisemí, "Téin tikhái vayan ininten mino."

<sup>7</sup> Mai yunampin ma yoriyá ein banta kayo ano vetiyán ten orera emí, "Ma vanta anon minó be afóen nina yaná baranten mifo erítifé béis aruan purono. Aruan púdē maé tetí ankan mai yunan dafu varátifano." <sup>8</sup> \*Máa siren betí ankan mai iyampon pákoren aruan púden béis au yaiyó uan mai yunan dafu akhempá mo kharúden mino.

<sup>9</sup> Karúden mifo mai yunan dafu afóe ano intesá inten nafino. Béis eriven maen mai yunan dafufin ma yoriyá ein banta kayo me aruan púden mai yunan dafu e maman ena vanta kayon aminten mino. <sup>10</sup> Tiyarafenu vompon dóki ano ma máa sikhein mai saretí ankan ída dankáke rafono.

"Máa uváran banta kayo ano  
ma yo maman karúdein  
onámaná ano  
maman má dádaimpin mana  
ákona onámanasí ukhen  
mino."

<sup>11</sup> Mai Bafan mánon máan turan  
mai anón tetin tivorá kama  
ukhen mino." *Ibo 118:22-23*

<sup>12</sup> Yisasi ma sian baeriyain baya  
mai vetí ankan nan tiyákan afová  
uren béis pákano van uvaen  
bánsi van péden me ifá en oren  
mino.

*Kamanin Ma Takisi Amin Baya Ino*  
(Matiu 22:15-22; Ruku 20:20-26)

<sup>13</sup> \*Ínaimpáké Yisasin mákasino van betí ankan manáa Farasisi kayo vá Erotini vanta kayo vá tiantan Yisasi vaípá eren mino.

<sup>14</sup> Eriven betí ankan béis tiamemí, "Aru soe, setí ankan afová ukhé uno éi fura vaya ana sin banta ono. Éi ída mana vanta van kokhon in-eine in banta ono. Minó banta ano manaí ana ukhayai éi Tiyarafenu fura sikhein baya afova amé iya

\* **12:8:** Ibu 13:12    \* **12:13:** Ruk 11:53-54

\* **12:19:** Diu 25:5

ompó setin tisimeno. Sisan ma takisi amin mai funtákein ná tetí amé tifante rafuno áq ída fino."

<sup>15</sup> Máa síkan Yisasi vetí ankan kampun afová ukhen betin tiamemí, "Tiretí ankan pará téin akhenóka iya rafono. Mana aran moní bareya eresí onano." <sup>16</sup> Máa síkan betí ankan mana moní aran maman bein me amíkan betin inaemí, "Ma moniká iyen aunasá baná inká iyen avisá mairá uvanten nafino."

Máa síkan betí ankan evaránen temí, "Kin Sisan mino."

<sup>17</sup> \*Síkan Yisasi vetí ankan evaránen tiamemí, "Sisan nina yaná Sisan ame vá inká Tiyarafenu ina yaná Tiyarafenu vá ameno."

Síkan betí ankan kákantá anúden mino.

*Pükaren Ma E Mantaven Ábasuí  
Inain Baya Ino*

(Matiu 22:23-33; Ruku 20:27-40)

<sup>18</sup> \*Sadyusi kéká ano furin nanin banta van ída e mantanten ne siyain bákán betí ankan Yisasi vaintá eriven béis inaen mino.

<sup>19</sup> \* "Aru soe, mana vaya Mosesi ano setí ankan nan máa siren bompon uvanten mino. 'Mana

vanta ano ma iyampon ída kainton ma fúbintin ben aná ma fara váintin maen ná béis afá aváe ano vá mai nanin baré mamákená be afá aváen ayaená iyampon kaúantano.' <sup>20</sup> Dan manápá ifo afápá kan un kádan anavádano varé íkan mai finté esé banta

ano nare mana nanin mamákoren ída mana iyampon kainton mai vanta furen mino. <sup>21</sup> Púbíkan béis ánaíntena vanta ano mai nanin mantaren ída iyampon kaina mai vanta furen mino,

<sup>22</sup> Mai nanin minó dan manápá ifo afápá kan un kádan anavádano mádiyan ída iyampon kaina yo fúdú uvíkan mai nanin inaimpáké puren mino.

<sup>23</sup> Máan tukhen mifo ínaimpáké ma furin banta ma evaránen e mantan

\* **12:17:** Rom 13:7    \* **12:18:** Apo 23:8

nain damú mai nanin iyen anasá banten nafino. Mai éi afová ukha ono mai nanin manan minó dan manápá ifo afápá kan un kádan banta ano mantaren mifo éi sétin tisiminte fono.

<sup>24</sup> MÁA síkán Yisasi evaránen betí ankan tiämémí, "Tiyarafenui vaya vá ákoná vá tiretí ankan ídá afová ukheyá baya namu iya rafono. <sup>25</sup> Purin nanin banta ma masí pinté ma evaránen e mantan nain damú ídá vanasi ano ábasuí inten mifo vetí ankan enisorí kayo ma inarufá bain an mi yen banten mino. <sup>26</sup> Banten mifo furin nanin banta ma evaránen e mantan nain baya ma Moseni vompon dókifin ma sító daa anan ma ira kiyan ma Tiyarafenu ano ma Mosen tiamen ma, 'Téi Abaraamuni Ayarafenu uno. Téi Aisakini Ayarafenu uno. Téi Yekopuni Ayarafenu uno,' Eks 3:2, 6

ma sein mai saretí ankan ídá dankáke rafono. <sup>27</sup> Purin nanin bantai Ayarafenu vaino. Ída ino. Para ma vain nanin bantai Ayarafenun bákaya saretí ankan tavi aaimpin mi oriya rono."

### *Moéken Kákani Ma Ukhein Man Baya Fákena Vaya Ino*

(Matiu 22:34-40; Ruku 10:25-28)

<sup>28</sup> \*MÁA siyákan mana man tinbanta ano eriven iníkan betí ankan baya fóké aruviyákan béis inin Yisasi kama vaya fóké evaránen betí ankan tiämýákan inireñ béis Yisasin inaemí, "Intéa man baya anó minó man baya esataren ná esesí ukhen nafino." <sup>29</sup> MÁA síkán Yisasi evaránen béis tiämémí, "Esésí ma ukhein mai ma man baya ino: 'Tiretí ankan Isarerí nanin banta oe, setisi Bafan Tiyarafenuveyáká anan Bafan ban mino. <sup>30</sup> Ban mifo vá ei Bafan Tiyarafenu vá ei aú amafon má ei ineine vá ei ákoná vasá minó o éke e éke ureya vá anunu ono.' Díu 6:4-5

<sup>31</sup> Mai man baya ánai ma vain man baya mai ma man baya ino. 'Eyan nan ma anunu iyaonaíe vá ena van anunu ono.' Ída ena kákán man baya váken mai ano má kanan man baya esantakhen mino." <sup>Riv 19:18</sup>

<sup>32</sup> MÁA síkán mai man baya ma afová ukhein banta ano máa sen Yisasin tiämémí, "Aru soe, éini vaya kamaen mino. Pura ino. Tiyarafenu veýáká Bafan ban mino. <sup>33</sup>\*Ban mifo setí vá minó tú timafon má minó ineine vá minó ákoná vá pókesá béisnan tiran ná tifano. Tetí ankan ma seyan nan ma iyárúna máan ná esá enavan tiran ná tifano. Tetí ankan ma mai kanan man baya ánain ma vákurékun maen mai avúavá anon ira ma sáden minó akonte iyain má ara ara akonte vá esantakhen mino."

<sup>34</sup> MÁA síkán Yisasi inin mai vanta ano ma evaránen tein baya van mai mana kama afova vain banta ano ma seiní ikán Yisasi evaránen béis tiämémí, "Éi ída Tiyarafenu yafisimpin nentá ba ono." MÁA síkán minó nanin banta kayo ano akhokho van uren Yisasin ída enádá bá mana vaya inaen mino.

### *Tiyarafenu Ano Ma Aní Ukhein Banta Mai Iyen Anin Nafino*

(Matiu 22:41-46; Ruku 20:41-44)

<sup>35</sup> Yisasi átaru namumpin báken banasi vaya siamiyaren béis semí, "Intesá ukhan ná man baya ma afová ukhein banta kayo ano Karaisi nan Devitin akhá ino siyan nafino." <sup>36</sup> Mai van Kantá Aunan mano Devitin ineine amíkan Deviti veyantá máa semí,

"Bafan mano senti Bafan ne máa sen tiamen mino,

"Éi sen tiyan kuompá kumaneno.

Inaímpáké eni namuro kayo séi mamán

éin aránaópá kaonté uno." ,

*Íbo 110:1*

\* **12:28:** Ruk 10:25-28    \* **12:33:** 1Sa 15:22; Ose 6:6

<sup>37</sup> Deviti veyantá bén nan Bafan ne sikhen mifo véi intesá urená bei anin bavae.”

Máa síkan beni vara kokhon nanin banta ano amusin iyan inen mino.

*Yisasi Ma Au Khákán In Banta  
Kayo Van Ma Sein Baya Ino*  
(Matiu 23:1-36; Ruku 11:37-54,  
20:45-47)

<sup>38</sup> Iniyákan Yisasi vanasi afova amen temí, “Tiretí ankan man bayá ma afová ukhein banta kayo vará dafiseno. Betí ankan kama ukhein ayá au anamun ma uren orin má átaru varu ráke ma vanasi ano ódaren bayan mino ma sin ma san aranakhen mino. <sup>39</sup> Betí ankan monó átaru namun kayofin banasi avorá ma kumamen inká kákán dunan nan damú ma esé karáká ana ma kumanin nan mi aranakhen mino. <sup>40</sup> Betí ankan baré nanin kayo kampun tiriyan betí ona umoyan iyáken au khákán en ayáká amuké iyan mifo mai kéká anon Tiyarafenu kópin kákán uman baranten mino.

*Baré Nanin Mano Susu Sin Moní  
Ma Karú Dein Baya Ino*  
(Ruku 21:1-4)

<sup>41</sup> Maná damú kákán monó namumpin Yisasi moní kain anan ádé kumanten oniyákan banasi ano susu sin moní mai anampin kuferiyákan kokhon moní ma yákein kayo ano kokhon ná moní kuferiyán mino. <sup>42</sup> Máan ten kuferiyákan mana ve avafu fúkein baré nanin ída kokhon ona vain mano eren me kankanan titó moní kanan mana ten toya ma (10t) eini ukhein kuferen mino.

<sup>43</sup> \*Kuferiyákan Yisasi vei eyo iyampon kayo aran eríkan betí ankan tiameí, “Téi fura siré tiretin tiameí uno. Ma ma ona ída van ma ve avafu fúkein baré nanin mano kákán moní kuferen mino. Béi ma átaru namumpin bain anampin ma kuferein moní ano minó nanin banta esanten

mino. <sup>44</sup> Esanten mifo ona ma yákein nanin banta ano kokhoná dáken mai finténa manáon anafín kufé dan araviyan mifo ma nanin mano ona ída van o útúken mi yungan ma nan nain moní ída antan á inton minói kuferen mino.”

## 13

*Kákán Monó Namun Ma  
Varákin Nain Baya Ino*  
(Matiu 24:1-2; Ruku 21:5-6)

<sup>1</sup> Yisasi kákán monó namun me ampiren eriyákan mana vei eyo iyampon mano véin tiameí, “Aru soe, onano ma monó namun kákán onámaná kayo vá kama yanasinta vá pökéi uvádan ban mino.”

<sup>2</sup> \*Máa síkan Yisasi evaránen bén máa sen tiameí, “Éi ma kákán má oniyaona mai finténa ída mana onámaná áintin benané benané ukhen banten mino. Ída ino. Minó onámaná barákujan karúdantin barará erafuyintin ída mana onámaná benané benané ukhen banten mino.”

*Ma Vara Kípan Akhempá Ma  
Aní Daná Afokáin Nain Baya Ino*  
(Matiu 24:3-14; Ruku 21:7-19)

<sup>3</sup> Ínaimpáké kákán monó namun e omaren Orifí Anurá Yisasi kumantan Pitan má Yemisin má Yonin má Endurun má betí ana váken betí ankan Yisasin inaemí,

<sup>4</sup> “Tetin tisimeno, inte yamusá mai yanasinta afoká inten nafino. Intéa aní daná naré afoká intí tetí óde afová erá mai yanasinta inka afoká in ádé en mino sente rafuno.”

<sup>5</sup> Máa síkan Yisasi vetí ankan tiameí, “Manáa nanin banta ano sireti ankan maka sinten mifo yaffian ná ákona ono.

<sup>6</sup> Kokhon banta ano eriven téin tiví taraaren tinten mino séi Tiyarafenu Anin banasi avirantá ma siantan erikhá ein banta uno siren betí ankan mano kokhon nanin banta máka sinten mino. <sup>7</sup> Ínaimpáké tireti ankan ma aruvín baya vá aruvono van ma siyan nain baya vá

\* 12:43: 2Ko 8:12    \* 13:2: Ruk 19:44

ma ininteya ída vá tiretí ankan anú duman duman ono. Mai yanasantia afoká uvintin mi kípan damútasoren mí erinten mino.<sup>8</sup> Mana anan banta ano e mantan ena anan banta vá aruvintin inká mana kini kéká ano e mantan ena kini kéká bá aruvintin inka manáa akhempá bara kaya intin kákán arafan purinten mino. Mai yanasantia maen anasi ano ma iyampon kaono van inamunan iniyán ai san aureiníi inten mino.

<sup>9</sup>\*Máan mi inten mifo sireti ankan dafian ná ákona ono. Betí ankan mano vetí ánon banta kayorá tiretin kó tiantanten mino. Kó tiantáden betí monó átaru namun kayofin tiretin ankaminten mino. Ankáden betí ankan téin tíyi manan bararasí ono van iniyáken kamanin banta kayo vá kin kayo vá avorá mantaan táden duvun intiya séinti vaya vetí ankan tiamin nono. <sup>10</sup> Ínaiimpá mai yanasantia afoká inten mifo kama vaya nare vá minó nanin banta siameno. <sup>11</sup>\*Máan tinten mifo vetí ankan ma sireti ankan pákaren ma kópin mo khaintiya sireti ída vá akhokho van eya inte vayá tente rafuno sireya ineine ono. Mai áaurá ma eni ineinefin ma erin nain mai Tiyarafenu anon amen mifo mai vaya vá teno.

<sup>12</sup>\*Máan intin be afá aváe ano e mantaren be afá aváen aruan purino van namuro vanta kayo ayampin aminten mino. Amintin be afóe ano e mantaren be akhá aruan purino van namuro vanta kayo ayampin aminten mino. Amintin be akhafana ano e mantaren be anóe afóe aruan purinten mino.

<sup>13</sup>\*Minó banta ano sirenin namu uantanten mifo mai farava ino séin tivi tiretimpin bantin mino. Máan tinten mifo éi iye anó ákona iyá inte fono mai kípan damú éin Tiyarafenu ano evaránen aviran-

ten mino.

*Mana Namu Yana Suron Ma Afoká Inain Baya Ino  
(Matiu 24:15-28; Ruku 21:20-24)*

<sup>14</sup>\*Baru ma namu inain mai namu yana suron mi erintiya sireti ankan onan ono. Béin nan ída vano ma sikhá ein mai varurái mantakhen banten mifo ma vaya ma yankafin nain mano kama vá en inino. Máan ma inain damú minó nanin banta ma Yudiá ma vain mano vá anu yonpimpasá karan orino. <sup>15</sup>\*Máan ma intin maen má daró ma väin nain banta ano ída vá erafuvén má naumpin un pében be amá pinte yanasantia varano. <sup>16</sup>Máan ma intin dunampá ma orikháin nain mano ída vá evaránen bei au anamun ovarano. <sup>17</sup>\*Máan ma intin máí damú amúbá nanin kayo vá arará iyampon ma nan kuyiyain nanin kayo va san mi sirunken mino.

<sup>18</sup>Amúkesiná mai avúava sinta iyon ma in damú ída vá afoká ino.

<sup>19</sup>\*Maí damú kákán uman mi vanten mifo esé ma Tiyarafenu ano ma araíen inaru vara ma uvarein táké ma eren tare ma varúnará ída máan ukhein uman pefá afoká ukharen mino. Ínaiimpá ída máan uman banten mino. <sup>20</sup>Bafan mano ma máan damú ída ma manan asíká intin maen minó nanin bantan afeyoranten mifo veyan ma fe iyákein nanin banta van ma iniyáken maen máí damú manan asíká inten mino. <sup>21</sup>Máan ma intin máí damú manáa vanta ano sireti ankan tiaminten mino, “Onano masí na Tiyarafenu ano ma aní ukhein banta van mino. Áa mesápá ban mifo onano.” Máan ma sintiya sireti ankan ída vá mai van mumunan ono. <sup>22</sup>\*Manáa vanta kayo ano eriven kampun ten máa sinten mino, “Téi Tiyarafenu Anin banasi avirano van ma siantan erikhein banta uno.

\* **13:9:** Mat 10:17-20    \* **13:11:** Ruk 12:11-12

Yon 15:21    \* **13:14:** Dan 9:27; 11:31; 12:11

\* **13:19:** Dan 12:1; Rev 7:14    \* **13:22:** Rev 13:13

\* **13:12:** Mat 10:21    \* **13:13:** Mat 10:22;

\* **13:15:** Ruk 17:31    \* **13:17:** Ruk 23:29

Téi mana sakhanampa vanta uno,” siren ara ara avúová daná afoká en ara ara yoran baranten mino. Máan tinten mifo veti ankan ma kanaí inten Tiyarafenu ano ma veyan iyádan bain nanin banta kéká kanaén kufa uádanten mino.<sup>23</sup> Máan tukhen mifo sretí dafianá ákona ono. Téi minó dana san inka sretin tiámé uno.

*Banta Anin Ma Overánen Erin Nain Baya Ino*

(Matiu 24:29-31; Ruku 21:25-28)

<sup>24</sup>\*Máa siren Yisasi enádá betí ankan tiámemí, “Mai minó uman ma kípavintin

“áau ano ída e uníntin  
biyon mano enádá ída kanten  
mino.”

25 Máan tintin inaruráké ofu kayo kararen eravintin  
inarurá ma ákona yanásinta  
vain mano kayamana inten  
mino.” *Ais 13:10; 34:4*

26\*“Máan ma sin nain mai damú betí ankan onantin mi. Banta Anin mano kakhan má ákona vá mamaren ayompin erinten mino.

27\*Eriven maen mai damú bei enisori kayo siantantin oriven beyan ma iyákaré ein nanin banta avían átaru inten mino. Béi mino inaru vá bara vá ma o útúkein akhen páke yeren aviranten mino.

*Fiki Yaa Anará Ma Afova Varan Baya Ino*

(Matiu 24:32-35; Ruku 21:29-33)

<sup>28</sup> Ena aní daná ba san Yisasi afova siámemí, “Fiki yaa ana ano sétin afova simé iyan mino. Daa ayan mano ma amun amun in ma auyen amun basen oriyan maen mai inka á kanten mino siya ono.<sup>29</sup> Máan manan ukhen mino ínaiimpá ma sretí ankan onesin ma mai yanásinta afoká inti vá mai inka erikhen onará mantakhen mino vá te afová ono.<sup>30</sup> Téi fura siré tiretin tiámé uno. Ma ma saréa ma vain mai nanin banta ída fúkantin mi minó mai yanásinta afoká inten mino.<sup>31</sup> Máan tintin

maen inaru vá bara vá kípanten mifo séinti vaya ída aiyoranten mino.

*Ída Mana Nanin Banta Ano Yisasi Ma Erin Nain Damú Bá Áau Vá Afová Ukhen Mino*  
(Matiu 24:36-44)

<sup>32</sup> “Ída mana nanin banta ano mai yamú bá mai áau vá afová ukhen mino. Inarurá bain enisori kéká bá Tiyarafenu Anin má ano yere ída afová ukhen mifo ve Afóe veyáká anan mai yaná afová ukhen mino.<sup>33</sup> Máan tukhen mifo sretí ankan utá are yafíke vá bano. Tiretí ankan ída afová ukha ono inte áau rasá mai afoká inten nafino.<sup>34</sup> Mai máan mi ukhen mino. Mana vanta ano ma ve amá me ampireñ enafá orono van maen bei yoran banta kaylorái veina yaná daíden amé iyan mino. Máan turen maen mi onará ma yafisin banta van kama vá eya yafiseno sé iyan mino.

<sup>35</sup>\*“Máan tukhen mifo sretí ankan dafian ná ákona ono. Tiretí ankan ída afová ukha ono intéa yamusá mai má afóe erinten nafino. Béi inúpákesá erinten nafi áa inuran aúbanasá erinten nafi áa kokore asin pintesá erinten nafi áa ákura sa erinten nafino mai sretí ída afová ukha ono.<sup>36</sup> Tiretí ankan aunká bakháré esin béis ainén eren e onantén mino.<sup>37</sup> Ma ma séi ma sretin tiámerúna mai vaya anan minó tiámé uno, ‘Tiretí dafike vá bano.’”

## 14

*Yisasin Arin Aa Van Ma Yosein Baya Ino*

(Matiu 26:1-5; Ruku 22:1-2; Yoni 11:45-53)

<sup>1</sup> Yisi Ída Van Bereti Ma Nan Omá Damú ma afokáin mai kan damú ana ukhan monó ánon banta kayo vá man bayá ma afová ukhein banta kayo vá temí, “Intesá urerá tetí Yisasin kampun tirerá

\* **13:24:** Yoe 2:10, 31; 3:15; Rev 6:12-13 \* **13:26:** Rev 1:7 \* **13:27:** Mat 13:41 \* **13:35:** Ruk 12:38

pákaré béin aruan puró tifante rafuno.”<sup>2</sup> Mái siren betí ankan temí, “Mai kantá damú ída vá tetí ankan máan tono mai vanasi ano e manten aruvín afoká inten mino.”

*Betaní Barurá Ma Yisasin Árontá Aunka Uveri Vanaein Baya Ino*

(Matiu 26:6-13; Yoni 12:1-8)

<sup>3</sup> \*Máan tiyákan Yisasi Betaní barufá oren amon daná aí bain banta Saimonin amá karáká o kumamin mana nanin mano kákán esantakhein moníká bain aunka uveri anan mamaren eriven mai aunka uveri anan me yuvaren Yisasin árontá banaen mino.

<sup>4</sup> Bana íkan maifin manáo vanta kayo varen aran naná máden betiyan ten oreraen temí, “Pará ma aunka uveri fasavifá afe iyan nafino.”<sup>5</sup> Tetí ankan ma kanú manaú antareti (300) moníká sarí uré ma mai moní mádé ma ona ída van nanin banta ameren mino. Mái siren betí ankan mai nanin asen mino.

<sup>6</sup> Asíkan Yisasi vetí ankan asen temí, “Tiretí ankan mai nanin áduantaro. Nái vará tiretí ankan béin uman amiyara fono. Béi ano séin kama avúavái usintiyan mino.

<sup>7</sup> \*Ona ída van nanin banta kayo ano ena ena siretin má bantiya aya ono ma sinte aya in nompo séi ída siretin má ena ena vanté uno.<sup>8</sup> \*Anasi ano ma variyain mai yaná inka véi máantin kípen mino. Téin tufá ma véi aunka uveri ma vanaein mai séi ma masípin oronunan úta sinten mino.<sup>9</sup> Téi fura siré tiretin tiámé uno. Minó bara akhempá ma monó bayá ma siamín nain maifimpá deren ma nanin mano ma varein avúavá dana san tiren béin nan ininten mino.”

*Yudasi Ma Yisasin Namuro Ayampin Avían Kaono Van Kana Ino Sein Baya Ino*

(Matiu 26:14-16; Ruku 22:3-6; Yoni 6:70-71)

<sup>10</sup> Maí damú tiyan míkan mifo sirantan kan orun kádan (12) eyo iyampon kayo finté mana Yudas Iskariotin ne sin mano monó ánon banta kayo ayampin Yisasin ameno van oren mino.<sup>11</sup> Oren mo síkan betí ankan mai inireñ amusin ureñ béin ma moní miyaní inain iyá antádán Yudasi ma vetí ankan ayampin ma Yisasin amin nain áau vá aa va san araíen dosen mino.

*Yisasi Ma Vei Eyo Iyampon Kayo Vá Avo Uantan Dunan Tipá Nein Baya Ino*

(Matiu 26:17-25; Ruku 22:7-14, 21-23; Yoni 13:21-30)

<sup>12</sup> \*Yisi Ída Van Bereti Ma Nan Omá Damú esé damú afoká en mino. Maí damú betí ankan Avo Uantan dunaní ma in sipisipi ararái aré iyan mino. Yisasin eyo iyampon kayo ano véin tiámemí, “Intefásá tetí ankan mo avové uré kuyá éi Avo Uantan dunan nante fono.”

<sup>13</sup> Mái síkan eyo iyampon kanan tianta Yerusalemí oriyákan máa sen tiámemí, “Tiré kanan Yerusalemí barufin oresin ma mana vanta ano ma kákán non kave mamaren ma fókanti mai vanta ángan ná bákurono.”<sup>14</sup> Bákure oresin béis ma mana namumpin un perantiya mai namun afóen máa seja vá tiámeno, ‘Arú ano semantiño senti karafaran intesin ná bain tesí eyo iyampon kayo vá Avo Uantan dunan nante rafuno.’<sup>15</sup> Tesin maen béis siré kanan mana yan bain kákán karafaran aní inten mino. Maiifin dunan ma nan takhó bá kumanin kará bá pe funtáken mino. Mai karafarampin ná tiré kanan tétesi yunan puntá ádano.”

<sup>16</sup> Mái síkan eyo iyampon kanan mai varufin oriven onákan mai ma Yisasi ma vékanan tiameinien mino. Máan tikan békanan Avo Uantan dunan ma mo nan nain puntáan kaen mino.

\* 14:3: Ruk 7:37-38    \* 14:7: Diu 15:11    \* 14:8: Yon 19:40    \* 14:12: Eks 12:6    \* 14:18: Íbo 41:9

<sup>17</sup> Inupáké Yisasi má bei eyo iyampon tirantan kan orun kádan má (12) eren mino. <sup>18</sup>\* Mairá betí ankan takhóká kumanten dunan niyákan Yisasi semí, “Téi fura siré tiretin tiámé uno. Tiretin aúbaná pinté mana vanta ano senti namuro kayo ayampin téin aminten mino. Ma ma séin má manafin dunan niyain mano ino.”

<sup>19</sup> Máa síkán bei eyo iyampon kayoi ará uman dákan mana mana ano vetí ankan Yisasin araien inaemí, “Téi funo áa iye fino.”

<sup>20</sup> Mairá Yisasi vetí ankan tiámemí, “Mai saretí tirantan kan orun kádan (12) kayo aúbaná pintena mana vanta ano ino. Mai vanta ano vereti fákuren dökifin ma séin má manamáni kain araviyain mai ano ino. <sup>21</sup> Mai fura ino vompon mano fefá bén nan tikharé einén mi Banta Anin purinten mino. Purinten mifo namuro kayo ayampin ma Banta Anin ma amin nain mai vanta van mi kákantá tirun ken mino. Mai séin ma namuro ayampin kain nain banta namu ukhen mifo moéken kama ukhen mino véin ída kaen na ino.”

*Yisasi Ma Vereti Vá Uvaini Vá Bei Eyo Iyampon Kayo Amein Baya Ino*

(Matiu 26:26-30; Ruku 22:15-23; 1 Korin 11:23-25)

<sup>22</sup> Mairá betí ankan dunan niyákan Yisasi mana vereti máden Tiyarafenu susu siantáden kisiren betí ankan amen temí, “Máde nano. Ma séin tu ino.”

<sup>23</sup> Mairá bái uvaini kápi máden Tiyarafenu susu siantáden betí ankan amemí. Amíkan minó ano mai nen mino.

<sup>24</sup>\* Narákan bái vetí ankan tiámemí, “Ma senti nare ano siretin ákona uranti kokhon nanin banta ano Tiyarafenu vá ará manafiní ureya vano van téi vanaé uno. <sup>25</sup> Téi fura siré tiretin tiámé uno. Téi ída enádá bá uvaini aran

anu nanté umpo maí damusí ma intí Tiyarafenu yafisimpin auyen uvaini anun nanté uno.

<sup>26</sup> Máa sírakán betí ankan mana monó í daren Orifí Anufá oren mino.

*Yisasi Ma Pita Nan Téin Oyan Timin Nono Sein Baya Ino*

(Matiu 26:31-35; Ruku 22:31-34; Yoni 13:36-38)

<sup>27</sup> Mairá Yisasi vetí ankan tiámemí, “Monó bompon mano máa sikhen mino, Téi sipisipirá dafisin banta aruréken minó sipisipi karan orera inten mino.” *Sek 13:7*

Máa sikhein tiretíi mumunan minó asuse en namu inten mino.

<sup>28</sup>\* Téi ma evaráné e mantaré ten naren tiretin an uanté Karirifa oronté uno.”

<sup>29</sup> Máa síkán Pita véin tiámemí, “Minó kayoi mumunan asuse en namu inten mifo senti mumunan ída asuse en namu inten mino.”

<sup>30</sup> Máa síkán Yisasi véin tiámemí, “Téi fura siré éin tiámé uno. Taréa inuran kokore ída kankanan dádá asikhan tiya éi séin nan kanú manaú dádá ída afová ukhé uno sin nono.”

<sup>31</sup>\* Máa síkán Pita enádá ákonaen temí, “Ída ino. Téi éin má manafin puronté uno. Téi éin nan ída afová ukhé uno ída senté uno. Ída uron mino!” Máa síkán minó eyo iyampon kayo ano veyan máa sírú en oreraen mino.

*Yisasi Ma Ketsemani Amúkein Baya Ino*

(Matiu 26:36-46; Ruku 22:39-46)

<sup>32</sup>\* Mairá betí ankan oren mana yunan anafin o unen mino. Mai vara aví Ketsemani ino. Mairá oriven Yisasi vei eyo iyampon kayo siámemí, “Téi simúkono van mumpo saretí ankan marasá kumante vá bano.” <sup>33</sup> Máa siren Pita, Yemisi, Yoni siren aviran oriyáken aváduan onákan ará uman dan au

\* **14:24:** Eks 24:8; Yer 31:31-34; Sek 9:11; 1Ko 10:16; Ibu 9:20 \* **14:28:** Mat 28:16; Mak 16:7

\* **14:31:** Yon 11:16 \* **14:32:** Yon 18:1 \* **14:34:** Yon 12:27

ira khen mino.<sup>34</sup>\*Máan tiyaimpin béisvetí ankan tiamemí, “Téin tiráano kákantá uman dein téi inka furonté uno. Tiretí ankan marábákeyá vá dafían ákona ono.”

<sup>35</sup>Mág siren béis manáá e afánen oriven barará o vaven amúken mino. Béini anunu anó mai vei furin ma eriyain kanaísá ená béis akhakhanten nafino siren inen mino.<sup>36</sup>\*Iniren béisemí, “O tifóe oe. Éi kana minó danasi in nompo séin pintena ma kápi yovarano van mi iyá umpo mai éi ída vá tenti sinunu ángain dakhafono. Éi ei anunu vá dakhafono.”

<sup>37</sup>Máa siren béis oren o onákan bei eyo iyampon kayo auun bakharé ikán béis Pitan tiamemí, “Saimoni éi auunábakhe fono. Éi ída ena mana áau vá dafisinte fono.<sup>38</sup> Tiretí ankan dafíkeyá amúkono. Tiretí ankan ma akhenókain daná erinten mino. Para vara seyo, aú ano anunu ukhan mifo yan bukhafa ano avesara iyan mino.”

<sup>39</sup>Mág siren béis evaránen mo enádá mai ma esé amúkein amúkirí anaen mino.<sup>40</sup>Amúkuren béis ovaránen bei eyo iyampon kayo e onákan betí ankan au ano kákantá uman dákanunká bakharén mino. Béin ma evaránen tiamín nain baya vetí ankan ída afová ukharen mino.

<sup>41</sup>Yisasi ovaránen kanú manaú dádasí en eriven betí ankan tiamemí, “Tiretí ankan pará auun bakhe vákeyá avíkiyá ba fono. Mai kana ifo senti áquí inka en mino. Onano Banta Anin inka ume vanta kayo ayampin amen mino.<sup>42</sup> Tiretí ankan mantavesí oró tifano. Téin ma vetí ankan ayampin ma amin nain banta inka eren mifo onano.”

### *Yisasini Namuro Kayo Ano Ma Véin Pákein Baya Ino*

(Matiu 26:47-56; Ruku 22:47-53;  
Yoni 18:3-12)

\* **14:36:** Mak 10:38; Yon 6:38    \* **14:44:** Amónan avúavá ma vain mai arona ma kamaen avábá in mino.    \* **14:49:** Ruk 19:47; 21:37; Yon 18:20    \* **14:50:** Íbo 31:11

<sup>43</sup>Yisasi mai vaya fara siyákan tiyan míkan mifo sirantan kan orun kádan pintena (12) mana Yudasi eren mino. Kokhon banta kayo ano vaenati variyan dan bariyan uaren béis má eren mino. Monó ánon banta kayo vá man baya ma afová ukhein banta kayo vá ánon banta kayo vá ano vetí ankan tiantan eren mino.

<sup>44</sup>Mai Yissasin ma vetí ankan ayampin ma amin nain banta ano mana aní inain baya vetí ankan tiamikharen mino, “Téi ma mo amónanuna vanta\* mai Yisasi ifo vá pákareya vá ákona e yafibeya avire orono.”<sup>45</sup>Máa sikharen Yudasi e unen eriaren ainen Yisasi vaintá oriven temí, “Aru soe!” siyáken béis amónen mino.<sup>46</sup>Máan tiyain má betí ankan ayan dan orin Yissasin páken mino.<sup>47</sup>Pákiyain má mai ma véin má ma mantakhá ein kéká pinté mana vanta ano vaenati orun danúaren mana monó ánon bantai yoran banta átaren ankáboren kaven mino.

<sup>48</sup>Kavíkan Yisasi vetí ankan tiamemí, “Tiretí ankan téin pákano vará baenati vá dan má mareyá mana umoyan banta ma fákano van einí e fono.”<sup>49</sup>\*Ena ena yamú ma séi sireti ankan má monó namun kumanté afova amiyákeyá sireti ída séin páke ompo vompon pintena vaya ano vá pura sen afoká ino.”<sup>50</sup>\*Máan tiyain ma minó beni eyo iyampon kayo véin me ampireñ karan oreraen mino.

<sup>51</sup>Karan orera iyain má mana fumara ano efanten davaráe minó aurá ukhuren Yissasin avákuren oriyá ikán betí ankan béis páken mino.<sup>52</sup>Pákaádarán béis efanten davaráe me yavaman kaúden au urontá karan oren mino.

### *Yisasi Ma Kanisori Kéká Avorá*

*Ma O Mantein Baya Ino*

(Matiu 26:57-68; Ruku 22:54-55, 63-71; Yoni 18:13-14, 19-24)

<sup>53</sup> Mairá betí ankan Yisasin aviren monó ánonbanta kékái ánon banta vaintá oríkan minó monó ánon banta kayo váánon banta kayo vá man bayá ma afová ukhein banta kayo vá e átaru en mino. <sup>54</sup> Pita anko Yisasin bákuren oriyan mifo véi nentá o útúbiyan onen oren mino. Béi mai monó ánon bantai ánon bantai yafufin ódiven piripo kayo vá báken ira kaniyan baren mino.

<sup>55</sup> Bákán minó monó ánon banta kayo vá minó Kanisorí kayo vá ano manáa vanta kayo arákan eriven Yisasi ma variyá ein avúavá ana me sirú en mino. Betí ankan béini aau ma vantí mairá béini aruan purono siren dosíkan beni aau ída mana varen mino. <sup>56</sup> Kokhon banta ano kampun bayá fóké béin aufin kuráden ten mifo mai vaya kayo ano ída manáien mino.

<sup>57</sup> Ída manaí eimpin manáa vanta ano e mantaaren kampun bayá fóké Yisasin aufin kuráden temí, <sup>58</sup> \*“Tetí ankan inékuén béi máa sen mino, ‘Banta ano ma ayampó uvantein monó namun téi varákurékanú manaú damú ananmai monó namun uvaranté umpo mai namun banta ano ayampóké ída uvaranten mino.’” <sup>59</sup> Máa sen mifo mai kayo ma sein bayá vá ano mo asusein ída kanaíen mino.

<sup>60</sup> Mairá monó ánonbantai ánon banta ano aúban mantaven Yisasin inaemí, “Eí ída mana vaya ovaráne sintó iya fono. Betí ankan ma éin aufin kurariyain bayá mai intesá ukhen nafino.” <sup>61</sup> Máa síkan Yisasi ve avaya fákaren kofakhen ída mana vaya evaránen ten mino.

Evaránen monó ánon banta kékái ánon banta ano véin inaemí, “Eí avábá in Tiyarafenu Anin Karaisi fono.”

<sup>62</sup> Máa síkan Yisasi semí, “Mai séi umpo sireti ankan onesin maen Banta Anin mano minó ákoná vain Tiyarafenu ayan kurompá kumamen béri inaru fáke konantá eritten mino.”

<sup>63</sup> Máa síkan monó ánonbanta kékái ánon banta ano aran kiyaimpin bei au anamun bararó uren temí, “Tetí ankan ída vá manáa vanta kayo vá arékuén beni vaya me sino van ó tifano.

<sup>64</sup> \*Tireti ankan inka inen nan béri Tiyarafenu oyampá bayá sen mifo sireti inté esá teya iniya rafono.”

Máa síkan minó ano vaya manafin máa sen Yisasin nan temí, “Béimpin aaú van mifo véi vá purino.” <sup>65</sup> Mairá manáa vanta ano araíen béin aufen akhare siyákan betí ankan béin aunáká davaráe yamuan iyádenankamiyan temí, “Eí sakhanampa vanta omposaréa aví teno iye ano éin ankamiyan nafino.” Máan tiyákan piripo kayo ano véin avíden ankamen mino.

*Pita Ma Yisasin Nan Ída Afová Ukhé Uno Sein Baya Ino*

(Matiu 26:69-75; Ruku 22:56-62; Yoni 18:15-18, 25-27)

<sup>66</sup> Máan tiyákan bararasí ukheintá dafufin Pita varé in monóánon banta kékái ánon bantai yoran arinta ano eren mino. <sup>67</sup> Eriven mai arinta ano onan Pita ira kaniyaré íkan mai yoran arinta ano véin purefure en ódaren temí, “Eí mai Nasaretíke Yisasin má bare ono.”

<sup>68</sup> Máa síkan Pita ída ino sen mino. “Téi véin ída afová ukherúna vayan éi siya ono.” Máa siren béi e mantan barufá ona akhempá aravin mana kokore asen mino.

<sup>69</sup> Máan turan mai yoran arinta ano véin ódaren mairá ádé ma mantakhá ein banta kayo siamemí, “Ma vanta ma vain mai véi mai kayoi kéká ino.” <sup>70</sup> Máa síkan béri evaránen temí, “Ída ino.”

\* **14:58:** Yon 2:19-21    \* **14:64:** Riv 24:16; Yon 19:7

Máa siren bákán manáa ádé ma mantakhá ein banta kayo ano ínaiimpáké evaránen Pitán nan temí, “Pura ino éi mai kayoi vanta Kariri fáké ono.”

<sup>71</sup> Máa síkan mairá Pita ákona uron en máa semí, “Pura ódino séi maisiretin ma siyaona vanta ída uron mi afová ukhé uno.”

<sup>72</sup> Máa siyain ma kokore ainén asian kani iyain má PitaYisasi ano ma véin tiamein baya ovaren inemí, “Kokore ída kankanan dádá asikantiya éi kanú manaú dádá téin nan ída afová ukhé uno sin nono.” Mai vaya iniren Pita ifí den mino.

## 15

*Pairoti Ano Ma Yisasini Vaya  
Yaimein Baya Ino*  
(*Matiu 27:1-2, 11-14; Ruku 23:1-5; Yoni 18:28-38*)

<sup>1</sup> \*Pe ákura suron monó ánon banta kéká bá ánon banta kayo vá man baya ma afová ukhein banta kayo vá minó kanisoro kayo vá manafin baya siaren Yisasin ayantá damuren aviren mo Pairoti amen mino.

<sup>2</sup> Amíkan Pairoti ano véin inaemí, “Éi Yutan kayoi kin na fono.”

Síkan Yisasi evaránen béin tiameí, “Éi mai inka se ono.”

<sup>3</sup> Máa síkan monó ánon banta kéká ano véin aufin kokhon baya fóke kuráden ten mino. <sup>4</sup> Tiyákan Pairoti ano véin evaránen enádá inaen temí, “Éi ída anona evaráne mana vaya sinte fono. Onano vetí ankan nái máa vaya fókesá éin aufin kurariyan nafino.”

<sup>5</sup> \*Síkan Yisasi ídaevaránen anona vaya siyaimpin Pairoti ano anú duren kokhon ineine en mino.

*Pairoti Ano Ma Yutan Kéká  
Ayampín Yisasin Amein Baya Ino*  
(*Matiu 27:15-26; Ruku 23:13-25;  
Yoni 18:38-19:16*)

<sup>6</sup> Ena ena orana Avo Uantan damú ma erin kamani ano mana

vanta karavusi fintena útuanté iyan mino. Mai minó nanin banta ano ma útuantano ma sein mai vantán útuanté iyan mino. <sup>7</sup> Máan tiyain bákán mana Barabasin ne sin banta karavusifin baren mino. Béi manáa vanta kayo vá kaminin má aruvín duváden manáa vanta aruan púdan mai vanbetí ankan má karavusii uran baren mino. <sup>8</sup> Mairá banasi ano oriven Pairotin nan pefá ma iyaonáí ono siren ovaren mino.

<sup>9</sup> Oovarákan Pairoti ano evaránen betíi vaya anona siamemí, “Tiretí ankaní anunu ano Yutan kayoi kin na ifá ékun orino van iya rafono.” <sup>10</sup> Mai véi afava ukhan monóánon banta kéká ano Yisasin inian namu unantáden kópin aviren mo kain baren mino. <sup>11</sup> \*Bákán mai monóánon banta kéká ano vanasi arápín antaran betí ankan Pairoti vaípá oovaren temí, “Barabisin ifá uantan erino Yisasi ída ino,” sen mino.

<sup>12</sup> Máa síkan Pairoti ano enádá evaránen mai nanin bantará inaemí, “Mai saretí ankan ma Yutan kayoi kin mino ma siyaona mai vanta séi náisá béin onte rafuno.”

<sup>13</sup> Síkan betí ankan evaránen oovararen temí, “Béin daa unkamádantá arono.”

<sup>14</sup> Síkan Pairoti ano evaránen enádá betin tiameí, “Paravae nái auisá béis ukhavae.” Máa síkan minó nanin banta ano moéken avádóden oovararen temí, “Béin daa unkamádantá arono.”

<sup>15</sup> Máa síkan Pairoti ano vanasi arápín amusin amen Barabasin ifá uantan betí baípá oríkan béis Yisasin aruvín banta kayo ayampin kaíkán anan dafiyópoké nare ankáden daa unkamádantá béis arino van amin aviren oren mino.

*Aruvin Banta Kéká Ano Ma  
Yisasin Máká Máká Ein Baya Ino*  
(*Matiu 27:27-31; Yoni 19:2-3*)

<sup>16</sup> Mairá aruvín banta kayo ano Yisasi aviren kamanini yafufin má

\* 15:1: Ruk 22:66    \* 15:5: Ais 53:7; Mak 14:61    \* 15:11: Apo 3:13-14

naun ódiyáken minó aruvín banta kayo arakan oren mino.<sup>17</sup> Oriven betí ankan kini narare au anamun Yisasi untáden ayankun anan póké mana kini kamamo uváden béin ánontá afú uanten mino.<sup>18</sup> Máián tuantáden betí ankan e mantaven taró uanten máká maáká iyan temí, “Yutan kayoi ákona kin noe, en aví daní iyá tiféuno!”<sup>19</sup> Mái siren betí ankan mana ura yafiyópoké béin ánón ankáden aufen akhare siren aron durafúden matimen béin kampun amusin uanten mino.<sup>20</sup> Máián turen aruvín banta kayo ano véin ayanavan baya siren intiren mai kini narare au anamun do yaváden beni au anamun evaránen uantáden béin daa unkamádantá arono van aviren oren mino.

*Daa Unkamádantá Ma Yisasin Arein Baya Ino*

(Matiu 27:32-44; Ruku 23:26-43; Yoni 19:17-27)

<sup>21</sup>\*Oríkan Yisasi ída ákona íkan mana Sairini varu fáke vanta Saimoni Arekisanda nú Dufasin nú afóe ano kákán barufá Yerusaremi orono van aasá eríkan aruvín banta kayo ano ákonáen duvun íkan béis Yisasini yaa unkamádan ayaen baren oren mino.<sup>22</sup> Mairá betí ankan Yisasin ayiren mana Korikhota e sin anura mo khaen mino. Mai Korikhota e ma siyain beni ana máan mi sikhen mino. “Ánon Dampa Anuen” tikhen mino.<sup>23</sup> Mairá avían mo Yisasin kauren betí ankan uvaini vá aí ma kusiantan non má\* opé uren amíkanmaen béis ifá en mino.<sup>24</sup>\*Ifá íkan betí ankan béin daa unkamádantá antópoké aruren beni auí daná daváden betiyan maman kaúden mai auí danáká kati siren ayá nampa ma fákein mano mana yaná mágú en mino.

\* 15:21: Rom 16:13 \* 15:23: Ái ma kusiantan non nan mi Mer ne siyan mino. \* 15:24:  
Íbo 22:18 \* 15:27-28: Pefá ves 28 ída varéin ínaiimpáké mana vanta ano kaemí, Máián tikan mai mana monó baya ma vompompin ma vá ein pura sen afoká en mino. Mai vaya máan mi sikhamí, “Béin aau vanta kayo vá manafin e yankaádanten mino.” (Ais 53:12 fin ná onano).  
\* 15:29: Íbo 22:7; 109:25; Mak 14:58 \* 15:34: Íbo 22:1

<sup>25</sup> Dan manápá ifo afápá kamí kamí un kádan áaurá Yisasin daa unkamádantá aren mino.<sup>26</sup> Mai véin ánontá ben ma kó tiantein baya máa siren uvaremí, “Yutan Kayoi Kin Mino.”<sup>27-28</sup> Máián turen betí ankan umoyan banta kanan má daa unkamádantá aren mino. Mana véin ayan kurompá aren mana ayan ópá aren en mino.\*<sup>29</sup>\*Banasí ano onóbe enóbe iyáken béin ayanavan baya sen máa semí, “Odo! Éi monó namun barákureya kanú manaú damú ana uvaran banta ono.<sup>30</sup> Máián tin banta ompo éi eyan ayaeya yaa unkamádantákerano.”

<sup>31</sup>Mái siyákan monó ánón banta kéká bá man baya ma afová ukhein banta kayo vá ano yere oyampá baya sen betiyan máa semí, “Béi ena nanin banta ana ayaian mifo veyan ída kanaíen béis ayainten mino.<sup>32</sup> Mai Karaisi Isarerí kayoi kin mano véi kanaíen daa unkamádan me ampiren erantí tetí ankan ódé béintá mumunán otifanté uno.” Mái siyákan mai ma yaa unkamádantá béin má manará ma arukhein bantá kanan máano yere ven nan oyampá baya sen mino.

*Yisasi Ma Furein Baya Ino*  
(Matiu 27:45-46; Ruku 23:44-49;  
Yoni 19:28-30)

<sup>33</sup> Bayan áau siya yavanin dun maren titipá ukhan áau inúpá kanú manausí emí.<sup>34</sup>\*Áau sitipá ukhen kanú manausí íkan Yisasi avádóden oovaren máa semí, “Eri, Eri rama sabáktani” Mai máan mi sikhemí, “Tenti Tiyarafenu oe! Tenti Tiyarafenu oe! Éi fará téin me oyan time fono.”

<sup>35</sup> Mái síkan manáa vanta kayo mairá ádé mantakharen betí ankan mai inirem temí, “Ineno!

Béi feyan sakhanampa vanta Iraian mi ariyan mino."

<sup>36</sup> \*Siyáken mana vanta ano savaen mómofen ma einí ukhein daná máden uvaini vá íta non má ma úpí urampin daren ura yankará damuren Yisasi nano van amiren mai vanta ano semí, "Ave ukhesí oná tifano Iraia ano véin e aví ádantin ná eranten nafino áa ída fino."

<sup>37</sup> Máa siyain má Yisasi avádóden bádiyan puren mino.

<sup>38</sup> Puriyain má kákan monó namumpin makákan davaráe kuran ma varé ein mai veyantá danté kafasen barará morúdan maman kankananen mino. <sup>39</sup> Aruvin bantai ánon ayafa ano mairá Yisassi ádé mantakharen béini furin ódaren béisemí, "Pura uron ma vanta Tiyarafenu Anin mino."

<sup>40</sup> \*Máa siyákon manáa nanin kayo nentá mantakhen oniyan baren mino. Mai vetin pintena mana Makdaráke María inká ena mai Yemisin nú Yosepin nú anóe María má ena Saromii. <sup>41</sup> Mai fefá ma Yisasin ma Karirifá ma vákan maen mai nanin kayo ano avákuren nóken béis aya iyaren mino. Mai véin má ma Yerusalemí orein nanin kayo yere mairábaren mino.

### *Yisasin Ma On Aimpin Masí Ein Baya Ino*

(Matiu 27:57-61; Ruku 23:50-55; Yoni 19:38-42)

<sup>42</sup> Inuran Sabati yamú bantéin mai útain damú inúpasien mino.

<sup>43</sup> Inúpasí íkan Arimatiaké Yosepi ano eren mino. Béi mai mana kama aví bain kanisoro ifo véin má deren Tiyarafenu Yafisin ave ukharen mino. Mairá Yosepi orein ída feranto Pairoton avorá o mantaven Yisasin au varen mo masí ino van béintá inaen mino. <sup>44</sup> Ina íkan Pairoti ano kokhon in-eine uren temí, "Béi inká púken nafino." Máa siren aruvin bantai ánon ayafa aran eríkan béintá

inaemí, "Yisasi inká púken nafino áa ída fino." <sup>45</sup> Mairá béisí siren aruvin bantai ánon ayafai vaya inirene Yosepin nan kana ifo véin au varano sen mino.

<sup>46</sup> Máa síkan Yosepi efanten davaráe o miyaní uren béisí un maman barará aséden mai efanten davaráefin ukhuren béisí mo on aimpin kaúden ain oyirá kákan onámanáo vaé baé uan ataen mino. <sup>47</sup> Kaiyákon Makdaráke María nú Yosesin anóe María nú intefasá béisí kaiyan nafi siren o váken onen mino.

## 16

### *Yisasi Ma Evaránen E Mantein Baya Ino*

(Matiu 28:1-10; Ruku 24:1-12; Yoni 20:1-10)

<sup>1</sup> Sabati yamú kípavíkan Makdaráke María má Yemisin anóe María má Saromin má kama aunka iyain uveri kayo vetí ankan Yisasin aufá mo féantano van miyanén mino. <sup>2</sup> Esé araí in damú pe ákura suron asaréa áau e unin betí ankan masiká oren mino. <sup>3</sup> Oriyáken betiyan ten orera emí, "Iye anó masí oyi rákena onámaná do setin eka sintanten nafino."

<sup>4</sup> Máa siren onákan mai onámaná ída masí oyirá baren mino. Mai kákan onámaná ifo mana vanta ano fefá do avékakharen mino. <sup>5</sup> Mai masí aimpin betí ankan ódiven onákan mana fumara ano ayan kurompáayá efanten au anamunuren kumantaré íkan betí ankan ódaren akhokho van en mino.

<sup>6</sup> Akhokho yan íkan béisí vetí ankan tiameemi, "Tiretí ankan ída vá akhokho van ono. Nasaretíke Yisasin onano van ere ompo véin ma yaa unkamádantá ma antópó arukhá ein mai inka véi fe e mantakhen mifo onano véin má kain báeimpin ída van mino. <sup>7</sup> \*Tiretí ankan ore vá beni eyo iyampon kayo vá Pita má mo siameno, 'Béi

\* 15:36: íbo 69:21

\* 15:40: Ruk 8:2-3

\* 16:7: Mat 26:32; Mak 14:28

ma gefá tiretin tiamikhá einiéñ tiretin an uanten Karirifá orikhen mifo mai fákena vá tiretí ankan béis o onano.”

<sup>8</sup> MÁA síkán mai nanin kayo masí ain pinté e khuven eravuaren anú duman duman en karan oriyáken péden ída mana vanta vá baya sen mino.\*

*Yisasi Ma Mákdáráke Nanin Marian Avorá Dákó Ein Baya Ino*  
(Matiu 28:9-10; Yoni 20:11-18)

<sup>9</sup> Esé arai in damú pe ákura suron Yisasi e mantáoren Makdaráke Marian avorá naren o afoká en mino. Yisasi mai nanin au fintena yan manápá ifo afápá kan un kádan namu aunan kayo yo siantein mino. <sup>10</sup> Maria orein minó Yisasi má ma nóein banta kayo mo siamemí. Mai minó banta kayo ano ará umandan ifí diyan baren mino. <sup>11</sup> Baré íkan Maria vetí ankan tiameemí, “Yisasi ída furin para vá téi oné uno.” Síkan betí ankan mai vaya iniren ída mumunan en mino.

*Eyo Iyampon Kan Mano Ma Yisasin Ayana Fáke Onein Baya Ino*  
(Ruku 24:13-35)

<sup>12</sup> Ínaimpáke bei eyo iyampon kanan mano mana aayana ori-yaréin Yisasi enará uven békanan baintá o afoká en mino. <sup>13</sup> O afoká íkan ódaren békanan manáa eyo iyampon kayo mo siamíkan betí ankan ída vékanani vaya vá mu-munan en mino.

*Yisasi Ma Vei Eyo Iyampon Kayo Avorá Ma Afoká Ein Baya Ino*  
(Matiu 28:16-20; Ruku 24:36-49;  
Yoni 20:19-23)

<sup>14</sup> \*Ínaimpáke tiyan míkan mifo sirantan mana orun kádan (11) eyo iyampon máa ano kumanten duna niyaréin Yisasi vetí ankan baintá afoká uven betí ankampin mamumunan ída vákan ma véi ma

e mantein ma onein nanin banta ano ma siamin ma vetí ankan ará uman daren ída mumunan iyain nan béis vetin asen mino.

<sup>15</sup> \*MÁA siren béis vetí ankan tiameemí, “Tiretí ankan ore vá barará minó akhempásá kama vaya mo vanasi siameno.

<sup>16</sup> \*Banta ano ma mumunan uven ma non baran nain mai Ti-yarafenu ano evaránen avirantin ben ninái inten mino. MÁAN tinten mifo vanta ano ma ída mumunan inain mai ano kópin afeyoranten mino. <sup>17</sup> \*Ti-yarafenu ano mumunan ma inain banta kayo ayantá máan avúavá daná afoká inten mino. Téin tivíká betí ankan namu aunan do siantiyáken auyen baya sinten mino. <sup>18</sup> \*Betí ankan ayampó osafae fákarantin ída untaranten mino. Betí ankan beyantá uvá naren ída furinten mino. Betí ankan banta aurá ma ayan kaintin mai aí bantan ano e asefa inten mino.”

*Yisasi Ma Inarufá Ódein Baya Ino*

(Ruku 24:50-53; Aposeri 1:9-11)

<sup>19</sup> \*Bafan Yisasi ano vetí ankan baya siamirákan Ti-yarafenu ano aviran inarufá óden Ti-yarafenu ayan kurompá un kumanten mino. <sup>20</sup> \*Minó eyo iyampon kayo ano minó akhempá oreraen beni kama vaya mo siamen mino. Bafan mano vetí ankan má manafin doriyáken betí vayafin ákona amíkan manáa avúavási ma íkan mai afoká iyaren mino.

\* **16:8:** Pefa esé Makini vompomin ves 9-20 ída varéin ínaimpáke ena vanta ano mai vaya (ves 9-20) uvaman asotú en mino. \* **16:14:** 1Ko 15:5 \* **16:15:** Apo 1:8 \* **16:16:** Apo 2:38 \* **16:17:** Apo 2:4; 8:7 \* **16:18:** Ruk 10:19; Apo 28:3-6 \* **16:19:** Apo 1:9-11; 2:33-34

\* **16:20:** Apo 14:3; Ibu 2:3-4

# RUKUNI KAMA VAYA INO (Ruku)

## Rukuni Kama Vaya Ma Uvanteí Pákenai Afova Vaya Ino

*Ma vompon ma uvantein banta  
ino.*

Ena anan pinte vanta Ruku ayofan banta vákan ma minó ano anunu iyan ma inká Porini kama arona váken ma ven má manápá non ma monó dorari iyá ein manon ma vompon uvanten mino.

*Uvarein orana ino.*

AD sikisti-tu (62) fin ma Kama Vaya Varen Orin Banta (Aposeri) Kayoi Yoran Bompon ída uvanten mino. Manáa afova vanta kéká ano siyáken AD fifti-eiti (58) ráké sikisti (60) fin ma Sisareá barurá ma Porin karavusií ukhá ein damúi ma vompon uvantan mino. Mágan tukhan mi Yisas Karaisini Kama Vaya vá Baya ma Varen Orin Banta (Aposeri) Kayoi Yoran Avúavá bá bompon ma uvaran danasinta vá mai damú anan ovare evare uan átaru ukhen mino.

*Ma vompon ma uvantein baru  
ino.*

Kiriki varafin ma vain baru Ákaia safi áa Sisarea safin uvanten nen ten inikhen mino.

*Ma vompon ma uvaman  
amikhein kéká ino.*

Ída afová ukhé tiferuna vanta Tiofirasin mifo kákán ineine maen Kiriki varafin ma vain kéká bá inká ena anan kéká ma monó tiyain kayofin má ino.

*Nái ana vará ma vompon uvanten nafino.*

Yisasini yoran ma oniyáken afová ukhá ein kéká anon mai yoran nan tian amá ukhen mino.

*Rukuni Esé Baya Ino*

<sup>1</sup>\*Kákán banta Tiofirasi oe. Pefá kokhon banta kayo ano Yisisi ma setin aúbaná afoká uádakoré ein daná baya van uvaman one one iyaren mino. <sup>2</sup> Mai yaná avúavá ma afokáin ma ontaré ein banta kayo mai Tiyarafenu yoran banta kayon bákan esé anará ma afokáin ma onein daná bayan uvaman tetin timen mino. <sup>3</sup> Mágan tukhein nan mi séi yere ayá damú ina uré mai vaya ana kamaé afová uréi ma funtákein bompon uvaman amé uno. <sup>4</sup> Pefá ma siamikharé ein baya mai fura vaya ino seja yankáde afová ono van mi ma vompon uvaman amé uno.

*Yoni Moñó Non Péantan Banta  
Ma Kain Nain Baya Ino*

<sup>5</sup>Eroti ma Yudia kayoi kini ukhá ein damú Abiya ma monó ánon bantai ukhan maen mana moñó doran banta Sekaraiyan ne sin banta vákan ben aná Erisabeti Eronini kéká pintenan baren mino. <sup>6</sup>Békánan Tiyarafenu avorá puntáken minó man baya ánaí dakhifiyáken Bafan oo yaiyen puntáden Tiyarafenu avorá baren mino. <sup>7</sup>Békánan ayokhuvini ukharen mifo Erisabeti a naniní ukhan míkanan ída iyampon kaúkaren mino.

<sup>8</sup> Maná damú Sekaraiyani monó ánon banta kéká ano monó namumpin mo yorari iyákan Sekaraiya má maifin Tiyarafenu avorá doriyaren mino. <sup>9</sup>\*Máí damú monó doran banta kayo ano yanka iya iya ureñ asíka vá ayá danka kayo vá ma yanufin nain banta anon mun monó

\* 1:1: Apo 1:1 \* 1:9: Eks 30:7 \* 1:9: Danka yanufin avúavá mai kati ma siyainíi ukharen mino.

namumpin Tiyarafenu íkun uan aminten mino sirákan\* Sekaraiya ano ayá danka yanú dan béin tiantan monó namumpin óden mino. <sup>10</sup> Íkun uantan áquí iyákan kokhon nanin banta ano monó barurá átaru ukhen amúkiyan mino.

<sup>11</sup> Amúkiyákan Sekaraiya vaintá mana Bafani enisori ano mai ma kama aunka íkun uantan takhó adé afoká uven ayan kurompá mantakhan mino. <sup>12</sup> Mantakharéin Sekaraiya mai enisori ma onen anú diyan akhokho van en mino. <sup>13</sup> Akhokho van íkan mai enisori ano Sekaraiyan máa sen tiämémí, “Ída vá akhokho van ono. Tiyarafenu ano eni amúkin inka inen mino. En aná Erisabeti afon iyampon kainten mifo ven avisá Yoni ne se vá aví dano.” <sup>14</sup> Mai iyampon ma afoká inain damú éin ará ano kama intiya amusin esin maen kokhon nanin banta ano yere moéken amusin intin maen <sup>15</sup>\*Béi Bafan auufen kákán bí baranten mino. Be anóen amúpin ma vantin Kantá Áunan mano ven aúpin bíkanten mifo véi ída vá uvaini vá óen non má nano. <sup>16</sup> Béi anon kokhon Isarerí nanin banta ará maman baéden evaránen betí ankani Bafan Tiyarafenu vaipá avíren orinten mino. <sup>17</sup>\*Béi Iraiyani ákona vá avúavá bá mamaren Bafan an uantan oriven maen mo ve akhafana vá be afóeyan má ará maman manafiní uantanten mino. Máan tuantáden maen man baya ma átakharéin kékái ineine maman puntáden kama ineine ma vain kayo an daantanten mino. Béi vanasi maman arakhoku urantin Bafani erin nan ave inten mino.”

<sup>18</sup>Síkan Sekaraiya evaránen máa sen enisori siamemí, “Téi intesá uré mainá afoká inten mino siré éni vaya afová onte rafuno. Te

síbasu afova nanin bantan bá uno.”

<sup>19</sup>\*Máa síkan mairá enisori ano máa sen tiämémí, “Téi Kebrieri uno. Téi Tiyarafenu auufen manté iyarunan bákán mi Tiyarafenu anon tisintá ma kama vaya éin tiamento van eré uno. <sup>20</sup>Ineno. Tentí vaya ma éi ída mumunan eonafá éin oo uman dantiya éi ída vaya sin basin mi mai yaná afoká inten mino. Beni yamusí ma intin mi senti vaya ano yákó inten mino.”

<sup>21</sup> Minó nanin banta ano Sekaraiya monó namumpin ayáká bákán ave ukhen bavakon kokhon ineine en mino. <sup>22</sup> Ínaimpáké monó namun pinté Sekaraiya ekhoven barufá eraven béisí vaya semí. Máan tíkan betí ankan afová en ten mino. “Mai monó namumpin ben avorá ena yaná afoká ukhan ayampó ana avavé navé iyáken oo uman dan ída vaya siyan mino.”

<sup>23</sup> Ínaimpáké Sekaraiyani yoran kípan be amá barufá oren mino. <sup>24</sup>Orikharé íkan ínaimpáké be aná Erisabeti amú basí en mino. Amú basí uven dan manápá biyontá umeraren baren Erisabeti sian páman en mino, <sup>25</sup>“Bafan mano séin avábá usinten mino. Mai avábá ano vanasi avorá ten tiyave yo arútinten mino.”

### *Yisasin Ma Kain Baya Ino*

<sup>26</sup> Erisabetin dan manápá ifo afápá mana un kádán biyon esantavin Tiyarafenu ano enisori Kebrierin tiantan Kariri varafá Nasaretí barufá oren mino.

<sup>27</sup>\*Oren mana Kin Devitini anan pintena vanta Yosepin ne sin banta amikharé ein arinta Marian ne sin ída mana vanta vá bakharé ein arinta vaipá enisori ano oren mino. <sup>28</sup>Mairá Kebrieri véi vaintá onó ben máa semí, “Anasi oe, bayan mino. Bafan mano éin má ban mino. Tiyarafenu ano

\* **1:15:** Nam 6:2-3   \* **1:17:** Mar 3:1; 4:5-6; Mat 17:11-13   \* **1:19:** Dan 8:16; 9:21   \* **1:27:** Mat 1:16, 18

éin moékentá avu uren éin kama uanten mino.”

<sup>29</sup> Síkan Maria mai vaya iniren anú duren mai nái vayá ten nafino siren kokhon ineine en mino. <sup>30</sup> Máan tíkan mairá enisori ano máa sen Marian tihamemí, “Maria oe, ída vá éi akhokho van ono. Tiyarafenui anunu ano éi má ban mino. <sup>31</sup> \*Ineno. Éi amúbasí ukhareya mana afon iyampon kain nono. Kaúde vá mai iyampon avisá Yisasi ne vá teno. <sup>32</sup> \*Béi ayafa vanta vandin béis nan Moéken Dan Bain Tiyarafenu Anin mino siyantin Bafan Tiyarafenu ano véin maman be anafu Devitin an den kiní uantanten mino. <sup>33</sup> Kiní uantádantin béis Isarerí kékái kin bantin maen beni yafisin doran mano fara van oriyán ban ída kípanten mino.”

<sup>34</sup> Máa síkan Maria evaránen enisori inaemí, “Intesá uren ná mai ná afoká intéi vae séi ída vanta manté uno.”

<sup>35</sup> Máa síkan enisori ano evaránen béis tihamemí, “Kanta Aunán mano éimpin erivintin Moéken Dan Bain Tiyarafenui ákona ano éi má banten mino. Máan tukhantin mai iyampon ma ínaijmpá kainona ano kantasí ukhein bantan bantin ben nan Tiyarafenu Anin ne sinten mino. <sup>36</sup> Afová ukha ono ei kéká pintena nanin Erisabetin nan ma a nanin báken iyampon ída kainten mino siyan mifo mai saréa véi afovaí uvein pimpá amú basí ukharéin dan manápá ifo afápá mana un kádan biyon orikhein afon iyampon mi kainten mino. <sup>37</sup> \*Para vara seyo, minó danápin Tiyarafenu ano kanaí inten mino.”

<sup>38</sup> Máa síkan Maria evaránen temí, “Téi fura sé Bafani yoran nanin muno. Éi ma sisimeona mai veni anunu ifo vá maina sá dákó ino,” síkan enisori ano Marian me ampiren oren mino.

\* 1:31: Ais 7:14; Mat 1:21-23    \* 1:32: 2Sa 7:12, 13, 16; Ais 9:7    \* 1:37: Esé 18:14    \* 1:46: 1Sa 2:1-10

### Maria Ano Ma Erišabetin Onano Van Beni Varufá Orein Baya Ino

<sup>39</sup> Manáa yamú orivin Maria e mantén Yudiá barafá anu yompin bain barufin oriven <sup>40</sup> Sekaraiyan amápin ódiven Erisabetin nan mo vayan ne sen mino. <sup>41</sup> Erisabetin nan ma vayan mino ma sein baya ma Erisabeti iniyain má ana ven amúpin ma vain iyampon mano káusen ódiven eraven iyain má Kantá Aunán mano véin aúpin bíken mino. <sup>42</sup> Máan tíkan béis avádóden oovaren temí, “Tiyarafenu ano éin kama uanten mi ena nanin kayo ano ma variyain mai avu moéken esantakhein avun éin amen mino. Máan tukhein mi en amúpin ma vain mai iyampon má ano yere Tiyarafenui avu varen mino. <sup>43</sup> Téi iyé bákun ná tenti Bafan anóe ano se varunafá eriyan nafino. <sup>44</sup> Para vara seyo, éi ma sen nan bayan mino sená ma iniyaruna vá anan ten timúpin ma vain iyampon mano amusin iyáken káusen ódiven eraven en mino. <sup>45</sup> Mai ná Bafan mano afoká inten mino siyáke mumunan e ompo mai vará éi amusin nono.”

### Mariani Í Ino

<sup>46</sup> \*Máa síkan Maria máa sen idemí,  
“Ten tirá ano Bafan aví daní iyan  
<sup>47</sup> ten tauñan mano moéken  
    Ten Tiyaín Tiyarafenu van  
        amusin iyákai  
<sup>48</sup> séi veni yoran nanin mi váké  
        paen danái vaken mifo  
        véi sen nan iniren mi séin ka  
            maen tarisari ein mi  
        saréa fi ínaijmpáke safi vanasi ano  
        sen nan Tiyarafenu ano  
            kákán amusin amikhein  
                nanin mino sinten mino.”

<sup>49</sup> Tiyarafenu Minó Ákona  
Vain mano kákán danasintan ten turá afoká uren ten tiyaén mifo

béin avisá kantasí ino.

50 \*Beni aránaópá ma orein nanin banta ma avábá uanté iyain mano

sare ma vain nanin banta vá ínaiimpáké ma afoká inain nanin bantafin má dere máan mana en oriyan bantin

51 \*béin ayan mano kákán dorarí ukhantin

beyan nan ma kákán muno siren be aví ma yaní iyá inain mai nanin banta yo siantantin orera iyantin

52 \*ákona kin kéká maman bara finí uren aví ma ída vain banta kayo maman danién mino.

53 \*Nanante vanante ma iyá ein kayo véi kokhon kama yaná póké kanaí uanten kama yaná ma kokhon kain baré ein kéká do siantan para oríkan

54-55 \* Abaraamun má be ana akhá bá ma avábá onté uno sikhá ein baya van béis ovaren me iniyáken

bei Isarerí nanin banta ayaen mino.”

56 Má sen ídaren béis Erisabetin má kanú manaú biyontá baren me afaen bei varufá oren mino.

### *Yoni Monó Non Péantan Banta Ma Kain Baya Ino*

57 Erisabetini iyampon kain damú afoká íkan béis afon iyampon kaen mino. 58 Kaúdákán mana varu ráke nanin banta vá bei kékabá ano Tiyarafenu ma Erisabetin avábá uantein nan iniyáken béin má minó ano amusin en mino.

59 \*Amusin urákan dan manápá ifo afápá kanú manaú un kádan damú orivíkan mai iyampon au khaviyan be afóen avavaníden Sekaraiya ne seno van aviran

\* 1:50: Íbo 103:13, 17    \* 1:51: 2Sa 22:28

Íbo 34:10    \* 1:54-55: Esé 17:7; Íbo 98:3; Mai 7:20

\* 1:68: Íbo 72:18    \* 1:69: Íbo 18:2    \* 1:71: Íbo 106:10

eríkan 60 be anóe ano, “Ída ino. Ben aví Yoni ne vá teno,” semí.

61 Mái síkan minó ano véin tiamemí, “Ída Yonin bí tetimpin bain mino.”

62 Mái siren betí ankan ayampó ana avavé nave iyáken be afóentá mai iyampon avi san inaen mino.

63 Inaíkan béis vetí ankan nan mana vompon ma uvaran dóki vare ereno síkan bareñ meran mairá bompon máa sen uvaremí, “Ma iyampon aví Yoni ino,” sirákan betí ankan anú duren kokhon in-eine en mino. 64 Mái tiyain má Sekaraiya oo saferen baya siyan Tiyarafenu aví danién mino.

65 Mái tiyain má beni varu ráke kayo ano mai yaná ma afoká ein ódaren akhokho van uren e siádan Yudiá barafin anufá ma vain barufimpá oreraen mino. 66 Bafani ákona ano véin má bákán minó nanin banta ano mai vaya iníden anúden orera iyan temí, “Mai iyampon ínaiimpá interená inten nafino.”

### *Sekaraiyani Í Ino*

67 Mai iyampon afóe Sekaraiyan aúpin Kantá Aunan mano vikavíkan sakhanampa vaya máa sen mino:

68 \*“Bafan avisá daní ó tifano. Béis Isarerí nanin bantai Ayarafenu ino.

Béis ma varará eraven barará nanin banta kama uren ume fintena evaránen avíken mino.

69 \*Tetin evaránen tivirano van bei yoran banta Devitini kéká pintena

béis mana ákona vanta maman dáko uáden mino.

70 Pefá ma vei kantasí ukhein sakhanampa vanta kayo oorá ma sikhá einíi en mino.

71 \*Béis ma siyáken namuro ayan pintena vá tetin ma ará namu usintiyain kéká ayan

\* 1:52: Yop 5:11; 12:19; Íbo 147:6    \* 1:53:

\* 1:59: Esé 17:12; Riv 12:3; Ruk 2:21

pintena vá ma evaráné tivirano van ma sikhá ein mi yákó en mino.

**72** \*Tetin tináuyan arunan uren aya ukharen mino. Pefá ma manafín kasukhen ban kantasí ukhein baya ma veyantá tikharé ein mai van béis ovaren me inen mino.

**73** \*Tetin tinafu Abaraamun avorá ma ayan befiyó uren ódino fura sé uno ma véi sikharé ein danái saréa setimpin afoká en mino.

**74** Ma mai ma véi iyáantan baré ein mino. Béi ano namuro ayan pintena setin tivian ádun kaintí báké  
ída feran beni yorarí ó tifanté uno.

**75** \*Ena ena yamú béin avorá teti kantasí é puntáké ana vá bá tifano.

**76** \*Mai van mi se sanin noe, ínaiimpá éi nan Moéken Dan Bain Tiyarafenu sakhanampa vanta ino siyantiya  
éi ano Bafani an uante oreya aa uvisin nono.

**77** \*Bei vanasi evaránen aviran nain afova amiresin betí ankani ume arúantanten mino.

**78** \*Para vara seyo, Tiyarafenu ano vei sarisarifói máan tinten mino.

Mai maen Yisasi ano kakhan an den Tiyarafenu vaipáké teti vaipá eranten mino.

**79** \*Minó nanin banta ma anukheimpin báken  
ma umefin purein an dakhein mai on mano kakhaantantin  
ará kusin aintá oró tifanté uno.”

**80** Ínaiimpá mai iyampon e anoní íkan Kantá Aunan mano véin aúpin bikhavíkon kámá barafá o van damú afoká íkan e unen Isarerí nanin bantafin dákó eren mino.

\* **1:72:** Esé 17:7; Íbo 105:8-9    \* **1:73:** Esé 22:16-17    \* **1:75:** Tai 2:12-14    \* **1:76:** Ais 40:3  
\* **1:77:** Yer 31:34    \* **1:78:** Ais 60:1-2    \* **1:79:** Ais 9:2    \* **2:2:** Yudiá baru maen Siriá barafin mi van mino.

## 2

*Yisasin Ma Kaein Baya Ino*  
(Matiu 1:18-25)

<sup>1</sup> Sisa Okastasi ano ma Romu kamanini ánon bantá ma ukhein pimpá Romu kamanin mano ma yafikein barafin ma vain nanin banta minó avisá bompopmin uvarano siren ákona vaya siádan oreraen mino. <sup>2</sup> Mai yaná afoká ein mai Kuiriniasi ma Sirian barafin kamaniní ukharé ein damúi esé araíen afoká en mino.\* <sup>3</sup> Máa siyaimpin kamani ano aví barano van minó nanin banta ano evaránen betí varu anará oreraen mino.

<sup>4</sup> Orera iyákan Devitini kéká pintena vantán Yosepi maen Kariri varafá Nasaretí barurá baren e mantén Devitini varu anará Yudiá barafá Betariamú oriyáken <sup>5</sup> ben ma varano van tiantan ma váein arinta Maria amúbá baré íkan kamani ano aví barano van avíaren oren mino. <sup>6</sup> Békanan o varéin María inamun nan iniyaimpin <sup>7</sup> miyaní ma uren baran namun bíkakhen ída afokhan baimpin me khoen kao amápin óden mun esékena afon iyampon kauren davaráe yo úkuren kaoi yunan nan dókifin kaen mino.

*Sipisipirá Dafisin Banta Kéká Bá Enisorí Kayo Vái Vaya Ino*

<sup>8</sup> Mai inuran maen mai varu akhempá manáa sipisipirá dafisin banta kéká ano sipisipirá dafikaré íkan <sup>9</sup> Bafani enisorí ano vetí vaintá eriyain má Bafani kakhan mano vetin eúkuádan akhokho yan en mino. <sup>10</sup> Akhokho van iyain má enisorí ano vetí ankan máa sen tiameví, “Tiretí ankan ída vá akhokho van ono. Téi kama vaya varé tiretin tiameño van mi eré umpsó mai kama vaya ma minó nanin banta ano ma ininten moéken amusin inten mino. <sup>11</sup> Tare inuran manan Devitini

varufin mana nanin mano afon iyampon kaein mai iyampon manon tiretin ayainten mino. Béi Bafan mi vákan Tiyarafenu ano ven nan mi minó nanin banta evaránen avirante ne sikharen mino. <sup>12</sup> Máan tukhantiya ma yanákai véin o ódeya afováin nono. O onesin maen davaráe yo úkuren kaoi yunan nan dókifin asédantin banten mino.”

<sup>13</sup> Máan ma siyain má manádá ainén inaru fáké iyankaforen enisori kéká bá ano mai enisori vaintá afoká uven Tiyarafenu aví danién máa semí,

<sup>14</sup>\*“Dan uró bain Tiyarafenu avisá daní ono.

Be ma aní ukhein nanin banta ano vá ará kusin masá barará bano.”

<sup>15</sup> Máan turen mai enisori kéká ano ma inarufá evaránen ódivíkan maen sipisipirá ma yafisin banta kéká ano vetiyan ten oreraemí, “Eritifé ma ma Bafan mano ma setin tisimein baya ánaín dakhafé mai yaná ma Betariamú barufin ma afoká ukhein o onátifano,” siren <sup>16</sup> betí ankan ainén oriven Yosepin nú Maria nú mo yosiádaren onákan mai iyampon kaoi yunan nan dókifin asédan bakharen mino. <sup>17</sup> Bakharé íkan betí ankan mai iyampon oniyáken enisori ano ma vetin tiamicáh ein baya sian páman íkan <sup>18</sup> mai vaya ma inein kéká ano kokhon ineine iyan maen <sup>19</sup>\*Maria mai vaya kayo inian be aúpin kaúden iniyan baren mino. <sup>20</sup> Máan turen sipisipirá dafisin banta kéká ano evaránen oriyáken mai ma enisori ano siamin inireñ ma onein dana san Tiyarafenu aví daní iyáken amusin uanten mino.

*Yisasin Ma Au Kharen Bafan  
Amein Baya Ino*

<sup>21</sup>\*Dan manápá ifo afápa kanú mañaú un kádan damú orivíkan mai iyampon au khaiyáken pefá

\* **2:14:** Ruk 19:38 \* **2:19:** Ruk 2:51 \* **2:21:** Ruk 1:31 \* **2:22:** Riv 12:1-8 \* **2:30:** Ais 52:10; Ruk 3:6; Tai 2:11

ma ve anóen arápin ída afoká ukhan ma enisori ano ve anóen tiamicáh einien Yisasin bí amen mino.

<sup>22</sup>\*Mosesini man baya ano ma sikhá ein damú afoká íkan Yosepin nú María nú ano Bafan avorá avusesein doran dóan kipiyán mai iyampon Bafan mo ameno van békánan Yerusalémí barufá avireñ oren mino. <sup>23</sup>Mai ma orein mai man baya ano máa sikhan mino, “Mana nanin mano ma esékena ain iyampon ma kaúden maen ná mai iyampon Bafan aníen ná eni kéká pinte ino siren ná mai iyampon mo amino.” Eks 13:2, 12

<sup>24</sup> Amiyan kankanan kukhofá nun nafi kukhun nafi varen mo íkun uan ameno van Yerusalémí monó namumpin oren mino. Riv 12:8

*Simioni Ano Ma Yisasin Avu  
Amein Baya Ino*

<sup>25</sup> Maí damú mana Simionin ne sin banta Yerusalémí báken mumunampin béis funtákán Kantá Aunán mano ven aúpin bíkakhan Isarerí nanin banta ma ará kusiantáden ma evaránen aviran nain banta onano yan ave ukharen mino. <sup>26</sup> Kantá Aunán mano véin pefá tiamicá, “Éi ída furin para vasin mi Bafani vanasi ma evaránen aviran nain banta yákó intiya onan nono.” <sup>27</sup> Bafani man baya ano ma sikhainén Yosepin nú María nú ano Yisasin avireñ monó namumpin ódiyákan Kantá Aunán mano Simionin avireñ maifin módan <sup>28</sup> mai iyampon un daumaren Tiyarafenu aví daní iyáken máa semí,

<sup>29</sup> “Bafan noe, pefá éi ma siáden nan baré einí eya ei yoran banta saréa áesin ná ará kusin masá orino.

<sup>30</sup>\*Banasí ma ayaino van ma aní ukhá eona mai inka se suu fóké oné uno. <sup>31</sup>Mai minó

nanin banta ano onano van  
utaan kaúkare ono.

<sup>32</sup> \*Mai véi mana on mi vain ena  
anan nanin banta kakhaan  
táden maen  
Eni Isareri kéká kákán bí am-  
inten mino.”

<sup>33</sup> Máa síkan mai iyampon nan  
ma Simioni sein baya van be anóe  
afóe ano anú diyan kokhon in-  
eine iyákan <sup>34</sup> \*Simioni vetin avu  
uantáden mai iyampon anóe Mar-  
ian máa sen tiamemí, “Tiyarafenu  
ano ma iyampon nan mi siyan béis  
anon kokhon Isareri nanin bantai  
eraven ankamín má ena kokhon  
Isareri nanin bantai e mantan mái  
mana aní banta vantin banasi ano  
véin oyampá baya sinten mino.  
<sup>35</sup> Máa siyantin béis ano vanasii  
aúpá ineine maman dákó intin éin  
dere vaenati ano arápin kéká inten  
mino.”

*Sakhanampa Nanin Ana Ano  
Ma Yisisin Nan Tiyarafenun Tusu  
Siantein Baya Ino*

<sup>36</sup> Asani anan pinte Fanuerin  
araun mana sakhanampa nanin  
Ana varen afovaí ukharen mino.  
Béis ve avafun má dan manápá  
ifo afápá kan un kádan oranará  
baré íkan <sup>37</sup> be avafu fúbin eiti  
fo (84) oranará baré báken ena  
ena inurán má bayan má ída  
monó namun baru me ampiyan  
maen manáo yamú dunan au-  
raren Tiyarafenurá amúkiyáken  
beni yoran pákaren baren mino.  
<sup>38</sup> Mai damú ana véi má dere  
vetíi ádé eriven Tiyarafenu susu  
siantian Yerusalemí nanin banta  
ma Tiyarafenu ano evaráné avi-  
ranté uno sikhan ma afoká intí  
onano van ma iyá ein nanin banta  
kayofin mai iyamponi vaya sian  
dákóen mino.

*Yosepin Má Be Aná Bá Yisasi  
Má Ma Evaránen Nasaretí Barufá  
Orein Baya Ino*

<sup>39</sup> \*Bafani man baya ano ma  
sikharé einén Yosepin nú María  
nú ano mai yoran dóan kípareñ  
bei varufá Karirí barafin Nasaretí  
oren mino. <sup>40</sup> O vákan mai iyam-  
pon ákona vá e anoni iyákan Ti-  
yarafenui avábá ano ve má bákan  
kama ineine ano véimpin bíken  
mino.

*Yisasi Ma Tíyan Míkan Mifo Sir-  
antan Kan Orun Kádan (12) Oranaí  
Uven Ma Yerusalemí Monó Na-  
mumpin O Vá Ein Baya Ino*

<sup>41</sup> \*Minó oranafin ma Avo  
Uantan Dunan Nan Damú ma erin  
maen be anóe afóe Yerusalemí  
oriyaren mino. <sup>42</sup> Tíyan míkan  
mifo sirantan kan orun kádan (12)  
oranaí Yisasi ukharen betin anóe  
afóen má anafu aráoni avúavá  
áncain dakhafen Avo Uantan  
Dunan Nan Damú oren mino.  
<sup>43</sup> Orikhá íkan Avo Uantan Dunan  
ma Nan Damú kípavíkan Yisasi  
ma Yerusalemí bain ída afová en  
onanton be anóe afóe evaránen  
barufá oren mino. <sup>44</sup> Oriyáken be  
anóe afóe ma inein mano Yisasin  
nan be arona kayo vái oríyan mino  
ana siren ída ve nan dosin mana  
vayan orivíkan ínaimpá be nan mo  
yose me yose iyan mana varuráke  
ma orikharé einta safi arona  
kayora safi me inae inae en mino.

<sup>45</sup> Békanan dosivaen ída onari  
iyaimpín evaránen Yerusalemí mo  
yoseno van oren mino. <sup>46</sup> Békanan  
dosíyan kanú manaú damú  
orivíkan béis monó namuni yafufin  
arú kayo aúbaná kumanten betí  
ankan ma sein baya iniyáken  
manáo vaya evaránen betimpin  
inauren iniyán baré íkan o onen  
mino. <sup>47</sup> Beni vaya ma inein banta  
kéká ano veni afova vá inain baya  
vá ma evaránen tiyain ma san  
anúden oreraen mino. <sup>48</sup> Békanan  
ma Yisasin o onen kákantá anú  
diyáken be anóe máa sen bén  
tiamemí, “Tanin noe, éi fará ma  
avúavá afóe rasan usintenará

\* 2:32: Ais 42:6; 49:6; 52:10   \* 2:34: Ais 8:14; Mat 21:42; 1Pi 2:8   \* 2:39: Mat 2:23   \* 2:41:  
Eks 12:24-27; 23:14-17; Diu 16:1-8

berasan tirá ano uman diyasá éin nan dosiyare rafuno.”

<sup>49</sup> Máa síkan béis evaránen békaran tiamemí, “Pará te nan dosé no vae séi se sifóen\* amái vanté umpo ída tiré kanan afová ukhe fono.” <sup>50</sup> Máa síkan mai ma véri siyain baya ana ída vékanan afová en mino.

<sup>51</sup> \*Máan turen ben avíaren betí evaránen Nasaretí oren o váken be anóe afóe ma sein baya máa iniren oo yaiiyákan inká Yisasi ma sein baya máa ve anóe ano maman aúká kaúden pákaan ákonáen mino. <sup>52</sup> \*Máan tiyáken Yisasi e anóní íkan beni afova ano mo kákaní íkan Tiyarafenu vá minó barará nanin banta vá ano moéken béis nan anunuen mino.

### 3

*Monó Non Péantan Banta Yoni Ano Ma Yisasini Aa Uvíden Puntáantein Baya Ino*

(Matiu 3:1-12; Maki 1:2-8; Yoni 1:19-28)

<sup>1</sup> Sisa Taiberiasi ano ma Romú barafá ma kiní ukhan tiyan míkan mifo sirantan dan manápá orun kádan (15) oranaí ma iyákan inká Pontiasi Pairoti ano Yudiá barafá kamaniní ukhein damú anan Eroti Antipasi ano Karirí barafá kamaniní ukhan ben afá Firipi ano Ituriá bá Tarakonitisí bara vái yafisiní in mi inká Risaniasi ano Abiriní barafá dafíkan <sup>2</sup> ma ukhein damú anan Aanásin nú Kaiafasin nú ano monó ánon banta kékái ánon bantá kaní ukhan maen Sekaraiyan anin Yoni ano vanta ída van kámá barafá bákán Tiyarafenu vaya ano véimpin eren mino. <sup>3</sup>\*Ervíkan béis Yodení non akhempá ma vain baru kayo fimpá oriven banasi siamemí, “Ará baédesin Tiyarafenu ano sretí ankaní ume ampiantá dantiya vá non barano.”

\* **2:49:** Manáa Tiyarafenu vompon dókifin ena asotúin baya máa sikhen mino, “se sifóeni yoran mi varanté umpo...” \* **2:51:** Ruk 2:19

\* **3:7:** Mat 12:34; 23:33 \* **3:8:** Yon 8:33, 39

<sup>4</sup> Sakhanampa vanta Aisaiya ano máa sen bompon uvantaremí, “Kámá bara fáké mana vanta ano ooaren máa sinten mino, Bafani aa uvídeya funtarano.

<sup>5</sup> Masisí ma ukheimpin bara kaesin édavintiya anuyon kayo úan avaí eya aa ma koren ukhein maman puntareya namu ma ukheimpin kama uresin ná

<sup>6</sup> Tiyarafenu ano ma evaránen minó nanin banta ma aviran dorarí ma inain mai minó anón onanten mino.” *Ais 40:3-5*

<sup>7</sup> \*Máa siyákan kokhon nanin banta ano Yoni vaintá monó non péantano van eríkan betí ankan máa sen tiamemí, “Eeeee, tiretí ankan namu osafáe akhafana ompo iye anó tiretin afova amikhayá Tiyarafenu aran naná ma sretin amaniná ereno van iyain nan karan orono van iya rafono. <sup>8</sup>\*Tiretí ankan ma fura seja ará baédante vá beni aran ná iran nompo sretí ída vá ‘tetí Abaraamun akhafana uno’ seno. Téi sretí ankan tiamé uno. Tiyarafenu ano kanaén ma onámaná kayo sintin Abaraamun akhafaná inten mifo. <sup>9</sup>\*ída ma kamaen aran iran nain daa ana sikaren ira sarano van Tiyarafenu ano gefá tasume anafin kain ban mino.”

<sup>10</sup> Máa síkan banasi ano Yonini vaya iniren máa sen béis inaemí, “Mai setí náisá onte rafuno.”

<sup>11</sup> Máa síkan Yoni evaránen betí ankan tiamemí, “Kankanan au anamun ma yákanona ano ída ma yákan nain ná mana au anamun amesin ná dunan ma yákanona vá dere ano máan mana vá ono.”

<sup>12</sup>\*Takisi varan banta kéká ano yere non barano van erikharen

\* **2:52:** 1Sa 2:26; Pro 3:4 \* **3:3:** Apo 13:24

\* **3:9:** Mat 7:19 \* **3:12:** Ruk 7:29

betí máa sen inaemí, "Aru soe, setí intesá ótifante rafuno."

<sup>13</sup> Mág síkan Yoni evaránen betín tiámemí, "Tiretí ankan ma takisi variyákeyá vá kamani ano ma sin nain mai máa ana vá bareya ída vá mairá manáa mo asotú ono." <sup>14</sup> Mág síkan manáa aruvín banta kéká bá ano yere Yonin inaemí, "Tetí ankan náisá ótifante rafuno."

Síkan Yoni vetin tiámemí, "Tiretí ankan ída vá banasi namu uante vetí moní máká tire umoyan bareya ída vá betí ankan kampun kó tiantáde moní bare vá kamani ano ma miyan amin nain mai máa moní ana vá amusin iya varano.

<sup>15</sup> Mág síkan banasi ano Yonin oniyáken betí ankan kokhon in-eine uren be nan mai ma Ti-yarafenu ano ma varará nanin banta evaránen aviranten mino ma sikharé ein mai vanta ino sen inen mino. <sup>16</sup> \*Máan in-eine iyákan Yoni evaránen betí ankan máa sen tiámemí, "Téi non máa fói siretin péantiyá umpo sen toyampá ma eriyaini ákona ano senti ákona moéken esantakhá téi ída funtákeruna ída kanaí é matimé beni arantan anumún anan útufonté umpo véi Kantá Aunan má irafó bái siretin monó non péantanten mino. <sup>17</sup> Kákán poki ma ayampin pákakhein banta an daven béis ereno van iyain ma eriven maen bei uviti namun pintena aitan má asuí ma ukhein ma yo ínáan karúdaren uviti o éke e éke uren bei uviti namumpin kau-ren aítan má asuí ma ukhein má ída yusimin irafin taman kauri-ten mino." <sup>18</sup> Yoni ano kokhon baya kayofó banasi ará mantano van Tiyarafenui kama vaya siami-yaren mino.

### *Eroti Ano Ma Yonin Karavusifin Kaein Baya Ino*

<sup>19</sup> \*Eroti ma kamaniní ukhen maen be aváen aná Erodiasin ma yafein má ena kokhon aaúi ma ukhá ein masan Yoni ano

vanasifin páman uren asirákan inireñ <sup>20</sup> Eroti moéken ena vá namu avúavasien Yonin pákaan karavusifin kaen mino.

### *Yoni Ano Ma Yisasin Monó Non Péantein Baya Ino*

(Matiú 3:13-17; Maki 1:9-11)

<sup>21</sup> Kokhon nanin banta ma non bariyákan Yisasin má dere non mamaren amúkiyain má inaru ona yivíkan <sup>22</sup> \*Kantá Aunan mano kukhofá nun an daven ámaren Yisasin ánontá e yomaniyain má inaru fáké máa sen oovaren temí, "Eí sen tanin uron mono. Téi éin nan moéqué tinunu ukhé éí nan timusin iyá uno."

### *Yisasin Anafu Yan Ma Ayun Man En Erikhei Pákena Vaya Ino*

(Matiú 1:1-17)

<sup>23</sup> \*Yisasi ma tetí (30) oranaí ma uven bei monó doran araí íkan banasi ano ma inein mano véi nan Yosepin anin mino sen iniyákan Yosepi mai véi Erin anin mino.

<sup>24</sup> Eri maen Matatin anin bákán Matati maen Rivain anin bákán Rivai maen Merikin anin bákán Meriki maen Yanain anin bákán Yanai maen Yosepin anin mino.

<sup>25</sup> Yosepi maen Matatiasin anin bákán Matatiasi maen Amosin anin bákán

Amosi maen Naumin anin bákán Naumi maen Esirin anin bákán Esiri maen Nakhain anin mino.

<sup>26</sup> Nakhai maen Matin anin bákán Mati maen Matatiasin anin bákán Matatiasi maen Semenin anin bákán

Semeni maen Yosekin anin bákán Yoseki maen Yodan anin mino.

<sup>27</sup> Yoda maen Yoananin anin bákán Yoanani maen Resan anin bákán Resa maen Serubaberin anin bákán

Serubaberí maen Siaritierin anin bákán

Siaritieri maen Nerin anin mino.

<sup>28</sup> Neri maen Merikin anin bákán Meriki maen Adin anin bákán Adi maen Kosamun anin bákán

\* 3:16: Apo 13:25    \* 3:19: Mat 14:3-4; Mak 6:17-18    \* 3:22: Yon 1:32    \* 3:23: Ruk 4:22;  
Yon 6:42

Kosamu maen Erimadamun anin bákan  
 Erimadamu maen Erin anin mino.  
<sup>29</sup> Eri maen Yosuan anin bákan  
 Yosua maen Eriesan anin bákan  
 Eriesa maen Yorimin anin bákan  
 Yorimi maen Matatin anin bákan  
 Matati maen Rivain anin bákan  
 maen  
<sup>30</sup> Rivai maen Simionin anin bákan  
 Simioni maen Yudan anin bákan  
 Yuda maen Yosepin anin bákan  
 Yosepi maen Yonamin anin bákan  
 Yonami maen Eriakimin anin mino.  
<sup>31</sup> Eriakimi maen Mereanin anin bákan  
 Mereani maen Menan anin bákan  
 Mena maen Matatan anin bákan  
 Matata maen Netanin anin bákan  
 Netani maen Devitin anin mino.  
<sup>32</sup> \*Deviti maen Yesin anin bákan  
 Yesi maen Obetin anin bákan  
 Obeti maen Boasin anin bákan  
 Boasi maen Saromonin anin bákan  
 Saromoni maen Nasonin anin mino.  
<sup>33</sup> Nasoni maen Aminadapin anin bákan  
 Aminadapi maen Ramun anin bákan  
 Ramu maen Arinin anin bákan  
 Arini maen Esaronin anin bákan  
 Esaroni maen Peresin anin bákan  
 Peresi maen Yudan anin mino.  
<sup>34</sup> Yuda maen Yekopun anin bákan  
 Yekopu maen Aisakin anin bákan  
 Aisaki maen Abaraamun anin bákan  
 Abaraamu maen Teran anin bákan  
 Tera maen Nahon anin mino.  
<sup>35</sup> Nao maen Serukun anin bákan  
 Seruku maen Reun anin bákan  
 Reu maen Perekim anin bákan  
 Pereki maen Eberin anin bákan  
 Eberi maen Seranin anin mino.  
<sup>36</sup> \*Serani maen Kainanin anin bákan  
 Kainani maen Apaksatin anin bákan  
 Apaksati maen Siemin anin bákan  
 Siemi maen Noan anin bákan  
 Noa maen Ramekin anin mino.  
<sup>37</sup> Rameki maen Metuseran anin bákan  
 Metusera maen Inokin anin bákan  
 Inoki maen Yaretin anin bákan

Yareti maen Maararerin anin bákan  
 Maararereri maen Kenanin anin mino.  
<sup>38</sup> \*Kenani maen Enosin anin bákan  
 Enosi maen Setin anin bákan  
 Seti maen Adamun anin bákan  
 Adamu maen Tiyarafenu anin mino.

## 4

*Ban Anon Mano Ma Yisasin  
 Akhenóka Ein Baya Ino  
 (Matiu 4:1-11; Maki 1:12-13)*

<sup>1</sup> Yisasi Yodení non me ampiren oríkan Kantá Aunan mano véin aúpin bíkaaren aviren kámá barafá oríkan <sup>2</sup> Yisasi foti (40) yamú dunan ída nanton arafan bákan Ban Anon mano véin akhenóka uan onen mino.

<sup>3</sup> Ban Anon mano máa sen béin tiameemí, “Éi fura se Tiyarafenu Anin ma vanteya ma onámaná tesin ná beretií ino.”

<sup>4</sup> Máa síkan Yisasi véin evaránen tiameemí, “Tiyarafenui vompon dóki ano máa sikhen mino, ‘Bansi ano veretirá ana ída fara ayun ban ákona varé iyan mino.’” *Diu 8:3*

<sup>5</sup> Máa síkan Ban Anon mano Yisasin do aviren dán bain anurá mun kaúden minó ákona vará kayo ma ma varará bain anién mino. <sup>6</sup> Aní iyáken Ban Anon mano véin máa sen tiameemí, “Ma vará kayo éin amiré éin ákona amé kuyá dafisiyáke kákán bí baran nono. Minó danasinta sen tinan bain téi ma sinunu onunan amenté uno. <sup>7</sup> Amenté umpo aron durafúde matimeya ma sentá monó tiresí maé mai yanasantia minó éin amenté uno.”

<sup>8</sup> Máa síkan Yisasi evaránen béin tiameemí, “Tiyarafenui vompon dóki ano máa sikhen mino, ‘Ei Bafan Tiyarafenurá ana vá monó tiante vá beya aránaópá ana vá bano.’” *Diu 6:13-14*

<sup>9</sup> Máa síkan Ban Anon mano Yisasin do aviren Yerüsaremi monó namun amontá mun kaúden

\* 3:32: Rut 4:17-22    \* 3:36: Esé 11:10-26

\* 3:38: Esé 4:25-26

béin máa sen tiämémí, “Éi fura se Tiyarafenu Anin ma vanteya ma má amon táké káuseya aravono. <sup>10</sup> Mai fara vara seyo, Tiyarafenui vompon dóki ano máa sikhen mino,

“Béi vei enisorí kéká tiantantin éintá dafían ákona inten mino.”

<sup>11</sup> Ákonaen entá dafíben ayan dóki uvídantiya  
mai yaró aravesin onámaná  
ano ída arantampin un per-  
anten mino.” *Íbo 91:11-12*

<sup>12</sup>\*Máa síkan Yisasi evaránen béin tiämémí, “Tiyarafenui vompon dóki ano máa sikhen mino, ‘Éi ída vá ei Bafan Tiyarafenu akhenóka ono.’” *Diu 6:16*

<sup>13</sup>\*Ban Anon mano ma Yisasin akhenóka uan kíparen me ifá en orein ená damusan o ave en mino.

*Yisasi Ma Karirifá Monó Doran Mo Araí Ein Baya Ino*

(*Matiú 4:12-17; Maki 1:14-15*)

<sup>14</sup> Kantá Aunani ákonará Yisasi evaránen Karirí barafá oríkan mai varafin ma vain nanin banta ano véi ma o vain baya iniren afová en oreraen mino. <sup>15</sup> Béi monó átaru namu kayofin ódiven monó baya siamiyákan banasi ano iniren ben aví daníen mino.

*Nasaretí Nanin Banta Ano Ma Yisasin Oyan Amein Baya Ino*  
(*Matiú 13:53-58; Maki 6:1-6*)

<sup>16</sup> Béi ma araraká baren e anóní ukhaein mai Nasaretí barufá orikharen bei avúavá baren Sabati yamú monó átaru namumpin ódiven monó bompon dankafono van orun mantavíkan <sup>17</sup> sakhanampa vanta Aisaiyani vompon dóki varen mo amíkan bái kaváden máa ma sikhein baya yankafen mino.

<sup>18</sup> “Minó daná ma ída vain kéká Bafan mano vei kama vaya siamino van

téin aní uran Beni Kantá Au-  
nan mano sen má ban mino.  
Karavusifin ma vain nanin  
banta siamékun karavusi  
útuifiyantin  
auu ma yufukhein auu  
kama iyantin  
ena kéká ano ma vetí ankan  
maman bararasí uren ma  
uman amiyaín má kípántin  
ino van mi  
téin tisintá eré uno. <sup>19</sup> Bafan  
mano ma vei vanasi kama  
inain damú inka afoká en  
mino sen tian dákó ino van  
mi véi sen tisintá eré uno.”  
*Ais 61:1-2*

<sup>20</sup> Máa siren Yisasi vompon dóki evaránen dádoren mai vompon dókirá ma yafisin banta amiren kumamíkan minó nanin banta ano yovariyáden béin mana urú onen mino. <sup>21</sup> Oniyákan bái máa sen betí ankan tiämémí, “Tiyarafenui vompon dóki ano ma sikhá ein bayan tiretin átoren mano inka inin mai yaná taréa afóken mino.”

<sup>22</sup>\*Máa síkan betí ankan Yisasin aví daní iyáken mai ma kama vaya kayo ma ven oo fenté eriyain nan kokhon ineine en orera iyáken betí máa semí, “Ma vanta Yosepin anin mi vá tetí afová ukhé umpo intesá uren ná ma kama vaya kayo siyan nafino.”

<sup>23</sup> Máa síkan Yisasi máa sen tiämémí, “Minó nanin banta ano ma siyain baya ma mádeya mae sireti se nan, ‘Ayofan banta oe, éi eyantá e au kama ono’ seja sisimiyákeya ‘éi ma Kabeniamú ma vareona avúavá ma setí inikheruna mai ei varu anará barano van muno.’”

<sup>24</sup>\*Máa siren bái evaránen betí tiämémí, “Téi fura uron mi siré tirétin tiämé umpo mana sakhanampa vantai varu rákena nanin banta ano ída ven avaya iné iyan mino. <sup>25</sup>\*Téi fura siré tiretí ankan tiämé unofefá Iraiayani yamú be avafun ná púbikan

\* *4:12:* 1Ko 10:9 \* *4:13:* Ibu 2:18; 4:15

\* *4:25:* 1Ki 17:1, 7

\* *4:22:* Ruk 3:23; Yon 6:42 \* *4:24:* Yon 4:44

kokhon baré nanin kéká bákán inarurá á pákáran kanú manaú orana ifo yan manápá ifo afápá mana un kádán biyontá ída á dákan kákón anan afoká íkan minó barufá arafanan en orera iyákan

<sup>26</sup> \*Tiyarafenu ano Iraiyan ída Isarerí baré kéká baípá tiantan oren mifo véin Serefatí barufá Saidonii varafin mana ve avafu fefá púkein baré nanin baípái siantan oren mino.

<sup>27</sup> \*Máan tukharéin inká ena sakhanampa vanta Iraisa ma varé ein damú ana amon dana aí bain kéká Isarerifin kokhon bikakhá ein pintena mana vanta au ída evaránen kamaen mifo Siriá banta Namanin beyaká anan aya íkan amon dana aí kípen mino.”

<sup>28</sup> Máa síkan monó átaru namumpin ma varé ein nanin banta kayo ano mai vaya iniren moéken aran nan en mino.

<sup>29</sup> Aran nan uaren mai varu anu yontá baré íkan Yisasin do siantan mai varu finté ekhuven aravíkan béin ayafin avékaan karúdano van do yarifen oren mino.

<sup>30</sup> Darifen oriyain má Yisasi mai nanin banta aúbaná oriaren mai aya oyi ráke me ampirenen oren mino.

*Yisasi Ma Namu Aunan Do  
Siantein Baya Ino*  
(Maki 1:21-28)

<sup>31</sup> Karirí barafá Kabeniamú barurá béi orun baren Sabati yamú monó baya araién banasi siamen mino.

<sup>32</sup> \*Tiamiyákan béi ma siyain monó baya ano ákona vá eriyákan minó nanin banta ano iníkan aví bain banta ano ma siyainí iyaimpin minó ano anúden oreraen mino.

<sup>33</sup> Mái damú mana namu aunan mano fákakhein banta ano mai monó átaru namumpin un baren avádóden bádiyan máa semí,

<sup>34</sup> “Nasaretíke Yisasi oe, éi ída vá tétin namu ono! Tetí éin afová

ukhé uno. Éi Tiyarafenu mana kanta suron mono.”

<sup>35</sup> Máa síkan Yisasi mai namu aunan máa sen asemí, “E avaya fakareya mai vanta aú pinté entavono,” síkan namu aunan mano mai nanin banta avorá mai vanta maman barará aséden béin me ampirenen oriven ída uman amen mino.

<sup>36</sup> Máan tíkan minó nanin banta ano anú duren betiyan ten oreraemí, “Aii! Ma nái vayá tiyan nafino. Ákona uron ukhein bayafó béi síkan namu aunan kayo ano ven oo yaiyen oriyain mino.”

<sup>37</sup> Máan turákan mai ma Yisasi varein avúavá baya ano ainen minó mai varafin oreraen mino.

*Yisasi Ma Pitan Aná Anóen Ayofein Baya Ino*

(Matiu 8:14-15; Maki 1:29-31)

<sup>38</sup> Yisasi mai monó átaru namun me ampirenen Saimonin amápin oríkan Saimonin aná anóen aufá irakharo uaren aí uádan bakharéin béin ayaino van betí ankan Yisasin inaeen mino.

<sup>39</sup> Ina íkan Yisasi adé o mantaven aí ano mai nanin me ampirenen orino van ákonaen baya síkan aí orivin mai nanin mano manádá orun mantaven betíi yunan taren mino.

*Yisasi Ma Kokhon Nanin Banta  
Ayofein Baya Ino*

(Matiu 8:16-17; Maki 1:32-34)

<sup>40</sup> Áau ma yo úbefen eravíkan banasi ano ara ara aí ma vain kéká Yisasi vaintá aviren ere ere íkan béi mana mana aurá ayan kaúantádán betí ankan evaránen kamaen mino.

<sup>41</sup> \*Máan turen Yisasi namu aunan kayo yo siantan kokhon nanin banta ma me ampirenen oriyáken máa sen oovaren mí, “Éi Tiyarafenu Anin mono.” Máa síkan béi vetin asiren baya ída sino van airo ananí uanten mifo mai fara va ino varará nanin banta ma evaránen avirano van ma Tiyarafenu ano

\* **4:26:** 1Ki 17:8-16

\* **4:27:** 2Ki 5:1-14

\* **4:32:** Mat 7:28-29      \* **4:41:** Mat 8:29; Mak

3:11-12

aní ukharé ein mai vantán béis  
vákan betí afová ukhan mino.

*Yisasi Ma Ena Varu Kayo Fimpá  
Monó Dorari Ein Baya Ino  
(Maki 1:35-39)*

<sup>42</sup> Pe ákura suron Yisasi mai varu me ampiren mana vanta ída van akhempá oren mino. Orivikan banasi ano ven nan dosen oren o ódaren betin ída véi me ampiren orino siren ayópá ono van en mino. <sup>43</sup> Ayopá ono van íkan béis má sen betin tiameví, “Téi ena varufimpá basá orivé Tiyarafenui yafisin pintena kama vaya minó nanin bantafin tiameño van mi véi sen tisintá erikhé uno.” <sup>44</sup> \*Máa siren Yudiá barafá ma minó barurá bain monó átaru namun kayo fimpá oriven monó baya vanasi siamen mino.

## 5

*Yisasi Ma Pitán Nan Base  
Karúdere Noyana Fákano Sein  
Baya Ino*

*(Matiu 4:18-22; Maki 1:16-20)*

<sup>1</sup>\* Maná damú Yisasi Kenesaretí non akhempá mantakharé íkan\* kokhon nanin banta ano véi vaintá ere ere uven Tiyarafenui vaya siamintin ineno van béis maman aúban kaúden iyen eúken mino. <sup>2</sup> Iyen eúkukhan Yisasi mo onákan kankanan noyana arin boti non akhempá bákan mai voti kanampín ma noyana ariyain banta kéká ano vase sesé iyan mino. <sup>3</sup> Máon tiyákan Yisasi mana Saimonini votifín ódive béis tiamin mai voti avékan manáa nompin orivin mai votifín kumanten monó baya vanasi siamen mino.

<sup>4</sup> Monó baya sian kíparen ínaiimpáké béis Saimonin máa sen tiameví, “Ma voti vareya mesan non aúbaná oriveya vase

karúdesin nompin aravintiya noyana fákano.”

<sup>5</sup>\*Máa síkan Saimoni evaránen temí, “Bafan noe, inuran tákoi o vase karúdé erékuñ me kakhá ída mana vá noyana fáké umpo en oo yaiyé base karúdanté uno.”

<sup>6</sup> Máa siren base karúdarákan noyana ano mai vase víkaaren dákaríen mino. <sup>7</sup> Base víkaaren dákarí iyaimpin ena votifín ma varé ein kéká arákan erin mai votifín má noyana yaiman kaúdan mikánan boti víkaaren nompin orun peraríen mino.

<sup>8</sup> Saimon Pita ma mai yaná oniyáken maen Yisasin arantampín mo aron kanan durafúden mátimen temí, “Bafan noe, séi ume vanta umpo sen ampireya orono.”

<sup>9</sup> Máa siren béis má be arona vanta kayo vá ano mai noyana kayo oniyáken moékentá anúden orera íkan <sup>10</sup> Sebetin anin kan Saimoni arona Yemisin nú Yonin nú bá anú diyákan Yisasi máa sen Saimonin tiameví, “Ída vá akhokho van ono. Tare ráké aráí eya éi vanasi avíán timin nono.”

<sup>11</sup>\*Máa siran betí ankan mai voti vá mai yanásinta vá baren non akhempá me khaúden Yisasin bákuren oren mino.

*Amon Dana Aí Bain Banta Ma  
Yisasi Ayofein Baya Ino*

*(Matiu 8:1-4; Maki 1:40-45)*

<sup>12</sup> Mana varurá amon dana aí bain banta varen Yisasin onen barara amupáké baven berai semí, “Bafan noe, éi ma anunu iyanteya séin tu kama usintano.”

<sup>13</sup> Máa síkan Yisasi ayan dan orin béis au aruvíyan máa sen tiameví, “Téi sinunu iyá umpo éi kama ono,” síkan mai vantai amon dana aí ma varé ein manadá kípen mino.

<sup>14</sup>\* Mai vanta ma Yisasi ayofaren maen ákonáen tiameví, “Ma

\* 4:44: Mat 4:23 \* 5:1: Mat 13:1-2; Mak 3:9-10 \* 5:1: Mai Kenesaretí non má Kariri non má mana non mino. Kan bí ifo mana non mana ino. \* 5:5: Yon 21:3-8 \* 5:11: Mat 19:27

\* 5:14: Rív 14:1-32

avúavá ma en aurá afoká ein mai ída vá mana vanta siameno. Mosesi ma sikhá einí eya vá monó doran banta avorá e au mo aní iyákeyá vá e aí ma kípein nan Ti-yarafenu íkun uan amesin ná minó nanin banta ano eni aí kípen mino sen afová ino.

<sup>15</sup> Máa síkan mifo Yisasi ma yoriyain avúavá baya van e siádan minó barufá ainen orera íkan kokhon nanin banta ano veni vaya iniyantin betí ankani aí kípaantano van ere ere en mino. <sup>16</sup> Máan tiyákán kokhon damú Yisasi vanasi me ampiren banta ídavan afokhampá amúkono van beyaká oriyaren mino.

*Ai Ayan Püká Ein Banta Ma Yisasi Ayofein Baya Ino  
(Matiu 9:1-8; Maki 2:1-12)*

<sup>17</sup> Maná damú Yisasi monó baya siamiyákan Kariri bara fáke safi Yudiá bara fáke safi inká Yerusalemí baru fáke safi Farasisi kayo vá man baya ma afova ukhein banta kéká bá kumantákan Bafani ákona ano Yisasimpín bíkavíkan aí nanin banta ayofen mino. <sup>18</sup> Yisasi ayofiyán mápin bákán mana ayan arantan púkein banta kúkútafin kaúden manáa vanta kayo ano veni ádé ka ono siren daiyó en eren mino. <sup>19</sup> Mai kúkúta yaiyó en eríkan banasi víkaaren ída afokhaní ukhan me khoen mai kúkúta yaiyen má daró ódiven má amon káponaren mai kúkútará anan damuren kain Yisasi vaintá araven mino.

<sup>20</sup>\*Máan tíkan Yisasi vetí ankani mumunan ódaren máa semí, “Tirona oe, eni ume inka ampianté uno.”

<sup>21</sup> Máa síkan man baya afová ukhein kéká bá Farasisi kayo vá ano vetiyan ten oreraemí, “Ma vanta ano Ti-yarafenui varun bariyan mifo véi iye fino. Ída mana vanta ano kanaíen ume

ampiantanten mifo Tiyarafenuveyafin mi mai ákona van mino.”

<sup>22</sup> Máa siyákán Yisasi vetí ankani ineine fe afová iyáken máa sen tiameemí, “Nái vará tiretí mai in-eine iyara fono. <sup>23</sup>\*Arantan ayan ma fúkein banta van ma mantaveya ei kúkúta mamare orono’ ma senuna fi áa ‘eni ume ampianté uno’ ma senuna mai anó teso sikhen nafino. <sup>24</sup>\*Banta Anin mano ma varará ume ifá uantan ákona mantan mino sireya saretí ankan afová ono van mi séi inikhé uno.”

Máa siren Yisasi máa sen ayan arantan púkein banta siamemí, “Eí e mantaveya ei kúkúta mamare e amápá orono.” <sup>25</sup> Máan ma siyain má ana mai nanin banta avorá mai ma ayan arantan púkaré ein banta ano orun mantaven bei yuvasí mamaren Tiyarafenu aví daní iyáken be amápá oren mino. <sup>26</sup> Minó nanin banta ano Tiyarafenui ákona ódaren anúden orera iyáken temí, “Taréa ena yanái oné tiféuno,” siren ben aví danien mino.

*Yisasi Ma Rivain Ne Sin Banta Arein Baya Ino*

*(Matiu 9:9-13; Maki 2:13-17)*

<sup>27</sup> Máan turen Yisasi oriyaren o onákan takisi varan namumpin takisi varan banta Rivain ne sin mano kumantáré íkan béis ódaren máa sen tiameemí, “Ere sen bákurono.” <sup>28</sup> Máa síkan Rivai minó daná mairá me ampiren béis bákuren oren mino.

<sup>29</sup> Orono van iyáken Rivai ano Yisasin nina kákán dunan tamá daran takisi varan kéká bá ena nanin banta kayo vá ano maifin e átaru uven békánan má dunan nen mino. <sup>30</sup>\*Niyákán man baya ma afová ukhein banta kéká bá Farasisi kayo vá ano kóiyáken beni eyo iyampon kayo inaemí, “Tiretí ankan pará takisi varan banta

\* 5:20: Ais 43:25; Ruk 7:48 \* 5:24: Yon 5:8

\* 5:30: Ruk 15:1-2

kéká bá ume nanin banta kayo vá manafin dunan niyara fono.”

<sup>31</sup> Mápá síkan Yisasi evaránen betin tiämémí, “Aí ma vain nanin banta ano anan ayofan banta vaípá oré iyan mifo aí ma ída vain nanin banta ano ída oré iyan mino. <sup>32</sup> Mápá tukhái funtákein nanin banta aran novara séi erauno ume nanin banta arékun ará baerano van mi séi erikhé uno.”

*Dunan Ma Aurá Pákena Van Ma Yisasin Inaein Baya Ino*  
(Matiu 9:14-17; Maki 2:18-22)

<sup>33</sup> Mápá síkan betí ankan máq sen Yisasin tiämémí, “Kokhon damú Yonini eyo iyampon kayo vá Farasisi kayoi eyo iyampon kéká bá ano yere yunan auraren amúké iyan mifo eni eyo iyampon kayo ano fará ída yunan auranton ná niyan nafino.”

<sup>34</sup> \*Mápá síkan Yisasi evaránen betin tiämémí, “Kanaísá ená anasi ma iman amin nain banta ma vei kéká bá para vantin maen beni kéká ano yunan auranten nafino. Ída ino. <sup>35</sup> Anasi ma iman amin nain banta ma aviren orivintin maen máí damúi veni kéká ano yunan auranten mino.”\*

<sup>36</sup> Mápá siren bái ena vaya máa sen tian baé amemí, “Peyante au anamun ma yákavintin mana vanta ano ída auyen davaráe vararó ureya mairá mo yampare amuin nono. Mápá ma esin maen ída kanaíen o yampaan ákona uven míkanan ída manaí inten mifo mai au anamun kákantá anan e yáken orera inten mino.

<sup>37</sup> Mápá tukhantin mi mana vanta ano ída feyante memé au unampin auyen uvaini anu vanainten mino. Auyen uvaini anu ma feyante memé au unampin ma vanaresin maen mai uvaini anu ano feyante memé au unan dákaaren banaen eravintin mai unan má dere namu inten mino. <sup>38</sup> Mápá tin nain

nan mi auyen uvaini anu auyen memé au unampin mi vanai nono.

<sup>39</sup> Mápá tukhain nan mi feyante uvaini anu ma naren maen ída auyen uvaini anu né iyan mifo mai fara vara seyo feyante uvaini anu ano moéken kama ukhen ne sé iyan mino.”

## 6

*Yisasi Ma Veyan Nan Sabatii Bafan Muno Sein Baya Ino*  
(Matiu 12:1-8; Maki 2:23-28)

<sup>1</sup>\*Mana Sabati yamú Yisasi uviti yunampin nókan bei eyo iyampon kayo ano uviti araní uren ayantá kasekhasu faren aitan do fútian karúdaren niyaren mino.

<sup>2</sup> \*Niyákan manáa Farasisi kayo ano ódaren betí ankan máa sen tiämémí, “Sabati yamú ma vanta ano ma mai avúavá baran are ukhein mifo fará tiretí ankan bariya fono.”

<sup>3</sup> \*Mápá síkan Yisasi evaránen betí ankan tiämémí, “Devitin má bei kéká bá ma arafan nan uaren ma mantaré ein daná tiretí ankan ída dankádeyá afová ukhera fono. <sup>4</sup> \*Tiyarafenu amá ma Deviti un pében ma monó doran banta kéká ano ana vá nano ma siren Tiyarafenu avorá kain baré ein bereti ma véi un máden bei kéká bá ma nein mai vaya sireti ída afová ukhe fono.” <sup>5</sup> Mápá siren Yisasi evaránen betí ankan tiämémí, “Banta Anin bái Sabatii Bafan mino.”

*Yisasi Ma Mana Ayan Púkein Banta Ma Sabati Yamú Ayofein Baya Ino*  
(Matiu 12:9-14; Maki 3:1-6)

<sup>6</sup> Ena Sabati yamú Yisasi monó átaru namumpin un pében baya sian banasi amiyákan maifin mana vanta ayan kurompákena fúkein banta vá baren mino.

<sup>7</sup> Yisasi monó baya siamiyákan

\* <sup>5:34:</sup> Yon 3:29    \* <sup>5:35:</sup> Yisasi maen anasi ma iman amin nain banta ino.    \* <sup>6:1:</sup> Diu 23:25    \* <sup>6:2:</sup> Yon 5:10    \* <sup>6:3:</sup> 1Sa 21:1-6    \* <sup>6:4:</sup> Riv 24:5-9

man bayá ma afová ukhein banta kéká bá Farasisi kayo vá ano maifin báken Sabati yamú aí nanin banta ayofantí ódé béis avían kópin ka ono siren aa van dosiyáken béintá dafíkaren mino.  
<sup>8</sup> Dosiyákan Yisasi vetí ankanineinefin afová iyáken mai ma ayan púkein banta van máa sen tiámemí, “Eí vanasi avorá orun mantano,” síkan mai vanta ano orun manten mino.

<sup>9</sup> Mantavíkan Yisasi vetí ankan tiámemí, “Tiretií inaé umpo kasaerá Sabati yamú banasi kama uantante rafu áa namú uantante rafuno. Banasi aruan puronte rafu áa ayaékun ná para vanten nafino.”

<sup>10</sup> Máa siren Yisasi minó nanin banta onen eúkiyáken mai vanta máa sen tiámemí, “E ayan antúkano,” síkan mai vanta ano máan tíkan evaránen béis ayan kamaen mino.  
<sup>11</sup> Máan tíkan man bayá ma afová ukhein banta kayo vá Farasisi kéká bá ano kákantá Yisasi nan aranan iyáken betiyan ten orera emí ma vanta setí ankan náisá ótifante rafuno.

*Tiyan Míkan Mifo Sirantan Kan  
Orun Kádan (12) Eyo Iyampon  
Kayo Ma Yisasi Aní Ein Baya Ino*  
*(Matiu 10:1-4; Maki 3:13-19)*

<sup>12</sup> Maí damú Yisasi amúkono van mana anurá ódiveñ mai inuran Tiyarafenurá béis amúken oriyan bákan mo kakhen mino.  
<sup>13</sup> Kakhan áau édavíkan bei eyo iyampon kayo aran erin tiyan míkan mifo sirantan kan orun kádan (12) banta aní uren betí ankan aposeri ví amen mino.  
<sup>14</sup> Mana Saimoni varé íkan be nan Pitane sen mino. Máa siren Saimonin afá Enduru ne sen Yemisi ne sen Yoni ne sen Firipi ne sen Batoromiu ne sen <sup>15</sup> Matiu ne sen Tomasi ne sen Yemisi Arifiusin anin ne sen mana Serotí anan banta Saimoni ne sen <sup>16</sup> Yemisin

anin Yudas ne sen inká ínaimpáké ma véin ma namuroí iyain banta kayo ayampin ma avíán amin nain banta Yudas Iskarioti\* ne sen en mino.

*Yisasi Ma Aí Nanin Banta Ayofein Baya Ino*

*(Matiu 4:24-25; Maki 3:7-12)*

<sup>17</sup> Máan turen Yisasin má bei eyo iyampon kayo vá amempá aravuaren kama ukhein avará ena kokhon bei eyo iyampon kayo vá Yudiá ankina fáke nanin banta vá Yerusaremí bá un non akhempá ma vain barú kan Taiyá bá Saidoni vá ano varéin orun manten mino.  
<sup>18</sup> Béini vaya iniyantin betí ankanai aí ayofaantano van mi erikharéin mi namu aunan mano ma váken ariyá ein nanin banta Yisasi ayofen mino.  
<sup>19</sup> Máan tiyákan minó nanin banta ano onan béis pinté enará ukhein ákona eriyáken aí nanin banta ayofiyaimpin minó ano ayan dan oríkan ben au aruvono van en mino.

*Yisasi Ma Vanasi Ano Avu Vá  
Uman Má Ma Varan Nain Afova  
Amein Baya Ino*

*(Matiu 5:1-12)*

<sup>20</sup> Máan tiyákan Yisasi vei eyo iyampon kayo oniyáken máa semí, “Tiretií minó daná ma ída vain kayo ano amusin na ono. Tiyarafenui yafisin tiretin nina ino.

<sup>21</sup> \*Taréa ma arafan nan iyaona kayo ano vá amusin ná ono. Ínaimpáké naresin amú kurinten mino.

Taréa ma ifidiya vaona kayo ano vá amusin ono. Ínaimpáké intin ono.

<sup>22</sup> \*Banasí ano saretin onantiya ma Banta Anin ma yakhafiyasin maen betí ankan pura sen tiretin ará namu uantiyáken

\* **6:16:** Yudas Iskarioti e ma siyain Iskariotí baru ráke vantán ban mino. \* **6:21:** Íbo 126:5-6;  
 Ais 61:3; Rev 7:16-17 \* **6:22:** Yon 15:19; 16:2; 1Pi 4:14

namu vaya siyan éin avi san  
namu ukhen mino siren do  
ékanten mino.

Máan tintin ma mai yanasta-  
inta ma afoká intiya vá tireti  
ankan ná amusin ono.

<sup>23</sup> "Betí ankan ma máan avúavá  
ma siren taintiya vá tireti  
amusin iya vá ará kama uron  
ono. Para vara seyo, inarufá kákan  
miyan tiretin ave ukhen mino.  
Pefá betí ankan anafu aráo ano  
máan avúavá anan sakhanampa  
kéká uantákoren mino.

<sup>24</sup> "Máan tukharen mifo siren  
moní nanin banta kéká ano  
vá dafiseno.

Tireti ará ma kamain daná  
máa gefái manta ono.

<sup>25</sup> Taréa ma yunan naren nan ma  
amúkunta vaona kéká ano  
vá dafiseno.

Ínaiimpá arafan nan inono.

Taréa ma intiya vaona kéká ano vá  
dafiseno.

Ínaiimpá auufenté ánu eravin-  
ten mino.

<sup>26</sup> Minó nanin banta ano ma siren  
ankan aví ma yaní iyantiya  
vá tireti dafiseno.

Pefá betí anafu aráo ano  
kampun sakhanampa kéká  
manáí ukhein avúavá anan  
bariyaren mino."

### *Tireti Namuro Ma Avábá Uan- tan Baya Ino*

(Matiu 5:38-48)

<sup>27</sup> Mái siren Yisasi semí, "Téinti  
vaya ma iniyaona nanin banta  
kayo ano vá tireti namuro vará  
anamu iyákeya siren ankan ma  
ará namu uantiyain banta kayo vá  
kama ono. <sup>28</sup> Kama iyákeya vá  
manáa kéká ano ma siren nan  
ma Tiyarafenu ano vá namu uan-  
tano ma sintiya vá tireti ankan  
Tiyarafenun amúkuon amesin ná  
betin avu ino. Tireti ankan Ti-  
yarafenurá amúkesin ná tiretin  
ma namu uantan nain kékásá  
avábá ino. <sup>29</sup> Máan tiyantin ma  
manáa kéká ano ma maná páke  
ápa ankamintiya mae vá tefáke

yere vá do véan bétí baípasí ono.  
Manáa kéká ano ma yante afuin  
ma yafintiya áesin ná namente  
afuin má dere o varano. <sup>30</sup> Manáa  
yana san ma vanasi ano éi vaípá  
ma inantintiya éi kasae vá ameno.  
Mana ano ma éin nina yaná ma  
mantaré intiya éi ída vá evaránen  
amino van ákona eya inanteno.  
<sup>31</sup> \*Máan tiyákeya vá ena nanin  
banta ano siren intéa avúavasá  
uantano vará ukhanten nafi mai  
avúavá ana vá betin má uantano.

<sup>32</sup> "Tireti ankan ma anunu iyain  
kéká ana ma anunu inteya iye anó  
tireti nan inen ná kama nanin  
banta ino sinten nafino. Umeí  
ma iyain kéká ano yeren betin  
nan ma anunu iyain kéká anunu  
é iyan mino. <sup>33</sup> Tireti ankan ma  
kama avúavá uantiyain kayo ana  
ma kama avúavá uantan teya iye  
anó tiretin nan inen ná kama  
nanin banta ino sinten nafino.  
Umeí ma iyain kéká bá ano yere  
manáí ukhein avúavá anan baré  
iyan mino. <sup>34</sup> Betí ankan manoi  
kanaíen anona ovaráne siminten  
mino ma sireya amiyaona mai  
iye anó tiretin nan inen ná kama  
nanin banta ino sinten nafino.  
Ume vanta kayo vá ano yeren  
umeí ma iyain kéká kasaen tim-  
inten mino sen afová iyáken amé  
iyan mino. <sup>35</sup> Máan té iyan  
mifo sirenii namuro vá anunu  
iyákeya vetin ná kama avúavá  
uanteyavá tiretin ma ída kanaíen  
anona evaránen ameren ukhein  
kayo vá ameno. Béin ma ída  
susu siantiyain kéká bá namu  
kéká bá deren béi kama é iyan  
mifo sirení máan tiyare vá kákantá  
moékakhein miyan ínaiimpá ma-  
mareya vá Dan Bain Tiyarafenu  
akhásí puraseya ono. <sup>36</sup> Tireti  
ankan Afóe ano ma vetin nan ma  
arunan uantiyainí eya vá tiretin  
má dere vá betin nan arunan uan-  
tano.

*Banasii Avúavá Ma Yaimin Baya*

\* <sup>6:31:</sup> Mat 7:12

*Ino*

(Matiu 7:1-5)

<sup>37</sup> \*“Tiyarafenu ano yere máa mana en tiretí avúavá bá daiminafo saretí ankan ída vá enai avúavá daídeya vá namu vanta kayo ino siyákeya vetí ume vá áuantesin ná Tiyarafenu ano saretí ume áuántano. <sup>38</sup> \*Tiretí ankan ma ena nanin banta amesin maen Tiyarafenu ano saretíin má aminten mino. Béi ma avarí inain mai víkaren morun avékaren kaiyantin bíkaaren avanen eravyantin mi saretíin aminten mifo saretí ma avarí iyá inona mai avúaváká anan temi saretíin aminten mino.”

<sup>39</sup> \*Yisasi máa siren betí ankan mana vaya sian baéan amemí, “Kanaisá ená auu yufukhein banta ano ena auu yufukhein aviren orinten nafino. Ída ifo míkanan mano masípin mana o ádinten mino. <sup>40</sup> \*Afova ma variyain kayo ano ída vei arú esantakhé iyan mifo véi ma kamaen afova ma mamaren mi vei arú bá mun manái é iyan mino.

<sup>41</sup> “Máan té iyan mifo éi fará e afá aváen auufen ma sótó kanti vain nan mana oniyákeyá e auufen ma kákán daa khaeádan ma vain nan ída iniya fono. <sup>42</sup> Máan tukhen mifo éi fara e afá aváen auufentena sótó kanti yo varano van iyákeyá e auufen ma yaa khaeádan mano ma iyákein ída oniya fono. Éi kampun baya sire ída mai ánain dakhafin nanin banta ono. Esé e auufen ma yaa khaeádan ma vain nare yo kanire vá kama e oniyáke vá e afá aváen auufentena sótó kanti khasae vá do varano.”

*Daa Ana Vá Beni Aran Mái Vaya Ino*

(Matiu 7:16-20, 12:33-35)

<sup>43</sup> Máa siren Yisasi evaránen temí, “Kama yaa ano ída namu aran irákon inká namu yaa ano ída kama aran iran é iyan mino. <sup>44</sup> Banasi ano yaa aran naren

\* 6:37: Mat 6:14    \* 6:38: Mak 4:24    \* 6:39: Mat 15:14    \* 6:40: Mat 10:24-25    \* 6:46: Mat 7:21

ódaren kama ukhen nafi namú ukhen nafi siren oman afová é iyan mino. Banasi ano ída ayankun anan kayo rákena fiki aran kúden inká ayankunien namu ukhein daa kayo rákena ída uvaini aran kúden é iyan mino. <sup>45</sup> Kama vanta aúpin kokhon kama ineine víkakhán béis kama avúavá baré iyan mifo namu vanta ano ven aúpin namu ineine víkakhán béis namu avúavá baré iyan mino. Máan ineine ma aúpin ma víkakhein mi oo ano sian dákó é iyan mino.”

*Kama Afova Vain Banta Vá Ída  
Kama Afova Vain Banta Vá Ano Ma  
Má Uvaran Baya Ino*

(Matiu 7:24-27)

<sup>46</sup> \*Máa siren Yisasi evaránen temí, “Tiretí ankan pará Bafan noe, Bafan noe, se nan tiyákeyá te ma siamiyaruna vaya ánarin ída bákuriya rafono. <sup>47</sup> Máan tiya ompo mana ano ma se varunafá eriven ma senti vaya iniren mai ánain ma yákurin nain nanin bantai avúavái saretíin tiamenté uno. <sup>48</sup> Mai máan mi ukhen mino. Mana vanta ano ma má uvarano van ma mana kákán onámaná daró masí ufen námen araven morun kaúden ma simenti upí uren maifin kain araven ontá orun ákona uvin ma má uvá dakaréin ma anon non taaren mai má avékan maen mai vanta ano ákona namun uvan taréin ída varáké iyainíi ukhen mino. <sup>49</sup> Máan tukhen mifo senti vaya ma iniren ma ída mai ánain bákuriyain nanin banta mai véi mana vanta ano ma ída simentifó ákona inton para varará ana ma uvareiníi ukharéin ma ínaimpáké non taven ma mai má avékan ma ainan barákuaren namu ma einíi ukhen mino.

## 7

*Mana Antareti (100) Aruvín  
Banta Kayoi Ayafa Vanta Ano Ma*

*Mumunan Ein Baya Ino**(Matiu 8:5-13)*

<sup>1</sup> Yisasi monó baya ma vanasi siamian kíparen Kapaniamú barufin óden mino. <sup>2</sup> Ódikan mai varufin mana antareti (100) aruvín banta kayoi ayafa vanta ano mana vei miyan ída van doran banta van béis anunu iyaré ein banta kákán aí íkan ádé anantá purono van en mino. <sup>3</sup> Purono van iyákán aruvín banta kayoi ayafa vanta ano Yisasin nan evan ne sin baya inireni bei miyan ída varan doran banta eman ayofano van Yutan kayoi ánon banta kéká tiantan Béin oman tiamen mino. <sup>4</sup> Tiantákon betí Yisasi, vaintá oriven ákonaen Béin tiameemí, “Aruvín banta kayoi ayafa vanta mai kama vanta ifo éi kanaíeya véin ayain nono. <sup>5</sup> Tetí Yudiá kéká san béis anunu iyáken tetinti monó átaru namun beyantá uvantintein banta ino.”

<sup>6</sup> Máa síkan Yisasi vetí ankan má mai má ádé oríkan aruvín banta kayoi ayafa vanta ano vei aronará baya siádan Yisasin me siameemí, “Bafan noe, séi ída kama vantán baruna éi ída kanaíeya séin timápin édan nono. <sup>7</sup> Máan tukhái séi ída kama vantán báké teyantá ída kanaíé éin o onanté umpsa vaya máa vá éi se siná tenti miyan ída van doran bantai aí kípano. <sup>8</sup> Téi farava máa siya rauno. Tentá manáa vanta kéká ano yafiká betí aránaópá téi váken maen manáa aruvín banta kayo ano senti aránaópá báká mana van ma orono sekun maen oriká ena van ma ereno sekun maen eré iyan mino. Tesi miyan ída van doran banta van ma ma yorarí ono sekun maen mai yoran baré iyan mino.”

<sup>9</sup> Máa síkan Yisasi mai vaya van anú duren ben ma yakhafen noré ein nanin banta yovéaren máa sen tiameemí, “Isarerí kékápin ma vantai mumunan ma einí ukhein

banta ída mana van mino.” <sup>10</sup> Máa sirákan aruvín banta kayoi ayafa ano ma siantan orikhá ein banta kayo ano evaránen oren mápin o onákon mai miyan ída van doran bantai aí kípakhan mino.

*Yisasi Ma Varé Nanin Anin Púkaréin Evaránen Avian Mantein Baya Ino*

<sup>11</sup> Ínaimpáké Yisasi Naini se sin kákán barufá oríkan bei eyo iyampon kayo vá kokhon nanin banta yá ano véin bákuren oren mino. <sup>12</sup> Oriaren mai varui yafu ona ádé o mantaven onákon mana varé nanin mano mana iyampon uró ana kain baren mai iyampon púkaré íkan beni kükúta manáa vanta kayo ano yaiyóen erákan be anóen má kokhon nanin banta ano vákuren eren mino. <sup>13</sup> Erákan Bafan mano mai nanin ódaren moéken arunan uren máa sen bén tiameemí, “Ída vá ifidano.”

<sup>14</sup> Máa siren béis mai ma fúkein banta ma yaiyen oriyá ein ádé o mantaven kükútará ayan kaíkan mai ma yaiyen eriyá ein kayo ano o mantavíkan Yisasi semí, “Pumara oe, séi éin nan tiyá umpsa orun mantano.” <sup>15</sup> \*Máa síkan mai ma fúká ein pumara ano orun mantaan kumamen araíen baya síkan Yisasi evaránen be anóen amen mino.

<sup>16</sup> \*Amirákan minó nanin banta ano Tiyarafenu kákán ákona ódaren akhokho van uaren Tiyarafenu aví daní iyáken temí, “Maná sakhanampa vanta inka setí aúbaná afoká ukhan Tiyarafenu ano vei vanasi aya ono van inka e van mino.” <sup>17</sup> Máa siren banasi ano mai ma Yisasi varein avúavá baya e siádan Yudiá barafin ma vain baru kayo fimpá bá ádé barafá ina vá mai vaya ano oreraen mino.

*Monó Non Péantan Banta Yonin Nú Yisasi Núi Vaya Ino*  
*(Matiu 11:2-19)*

\* <sup>7:15:</sup> 1Ki 17:23; 2Ki 4:36    \* <sup>7:16:</sup> Ruk 1:68

<sup>18</sup> Orera íkan Yonini eyo iyampon kayo ano Yisasi ma variyain dana san bén mo siamen mino.  
<sup>19</sup>\*Tiamirákan Yoni vei eyo iyampon kanan araren Bafan baípá tiantiyan temí, “Tiyarafenu ano ma siantantin erino van ma sikhá ein éi mai vanta fono áa ená tetí ankan ave ótifante rafuno,” sen inaino van tianten mino.

<sup>20</sup> Tiantákan míkanan mano Yisasi vaintá oriven temí, “Éi nan mo inaino siren monó non péantán banta Yoni ano verasan tisintá eré umpo mai ma Tiyarafenu ano siantantin erino van ma siádan baré ein banta fono áa ená ave ótifante rafuno.”

<sup>21</sup> Maí damú Yisasi ara ara aí daná ma varé ein nanin banta ayofiyáken namu aunan mano ma fákókháréin kayo fintena yo siantan namu aunan oriyákan auu ma yufúkukháré ein kéká evaránen auu kama uantan onan en mino. <sup>22</sup>\*Máan iyákan Yisasi evaránen Yonini eyo iyampon kanan tiamemí, “Taréa siré kanan nái yanasá oniyá iniyá iya fono mai vá Yonin mo siameno. Auu ma yufúkukháré ein kayo ano evaránen onákan arantan ma namu ukhá ein kéká ano oríkan aufá ma amon dana aí ma varé ein evaránen kama íkan átaren ma kontaré ein kayo ano vaya iníkan pefá ma füká ein kéká ano orun mantan maen ona ma ída vain kayo ano kama vaya iniyán en mino.” <sup>23</sup> Máan tukhein nan mi vanasi ano ma senti yoran ódaren ma mairá ída eraven ankamin nain kayo ano vá amusin ino. Mai kéká anon avu varanten mino.”

<sup>24</sup> Yonini vaya ma varen erikhá ein bantá kanan orivíkan Yisasi Yonin nan banasi máa sen tiamemí, “Tiretí ankan ma vanta ída van kámá barafá ma oriyare eona mai nái yanasá onano vará oriyare fono. Uva ano mana ópen ná kayaiyayá onano vará oriyare

fono. Ída ino. <sup>25</sup> Tiretí ankan náiyásá onano vará oriyare fono. Mana vanta ano kama auí danasá uren bayá onano van oriyare fono. Ída ino. Kama auí daná ma ukhein banta kéká ano kin amápin mi váé iyan mino. <sup>26</sup>\*Máan té iyan mifo saretí ankan nai yanasá onano vará oriyare fono. Tiretí ankan mana sakhanampa vantan onano van mi oriyare ono. Oriyá ená séi sretin tiámé uno. Minó sakhanampa vanta kayo véi ano esantakhen mino. <sup>27</sup> Mai vanta van mi Tiyarafenui vompon dóki ano máa sikharen mino, ‘Ineno. Séi mana vanta siantéku tenti vaya varen éin anuan- ten  
 eni aa mo uvíantanten mino.’

### Mar 3:1

<sup>28</sup> Tei sretí ankan tiámé uno ma vara rákena minó banta Yoni ano esantakhen mifo Tiyarafenu ano ma yafíkein barufin ma sitosí ukhen bain banta anon Yonin esantakhen mino.”

<sup>29</sup>\*Máa síkan betí ankan mai vaya iníren Yonin ayantá ma non mantaré ein nan ovaren me iniyáken takisi varan kéká bá banasi vá ano semí Tiyarafenui avúavá puntáken mino. <sup>30</sup>\*Máan tukhan mifo Farasisi kayo vá man baya ma afová ukhein banta kéká bá ano Tiyarafenui kama ineine oyan amen Yoni ma monó non péantiyain ída mantaren mino.

<sup>31</sup> Máa siren Yisasi evaránen temí, “Taréa ma vain nanin bantai avúavá ínte yanákosá tiádante rafuno. Betí inté ukhein nanin bantá ban naftino. <sup>32</sup> Betí ankan maen arará iyampon kayo ano ma varu aúbaná kumanten ma ena iyampon kayo van ma oovariyyáken, “Tiretí ankan nan danisí ono van mi setí ankan okhakhan asiyákuya

sretí ída amusin danisí e ono. Ída amusin e ídiyaonafin mi setí ifisana yékuya

\* **7:19:** Íbo 40:7; Mar 3:1; Rev 1:8 \* **7:22:** Ais 35:5-6; 61:1; Ruk 4:18 \* **7:26:** Ruk 1:76

\* **7:29:** Ruk 3:12 \* **7:30:** Mat 21:32

siretí ída ifídiyan ná uno.”

<sup>33</sup> Mápá siren Yisasi evaránen temí, “monó non péantan banta Yoni ano vereti vá uvaini vá ída niyákoya siretí ankan teya véimpín namu aunan mano van mino si-yare ono. <sup>34</sup>\*Mápá siyaré e nan mi Banta Anin mano saréa eriven uvaini vá dunan má niyákoya siretí ankan teya onano sakisi varan banta kayo vá ume vanta kéká bái aronan báken mi kokhon ná dunan má uvaini vá niyáken óen iyan mino siya ono. <sup>35</sup>Tiretí ankan máa siya ompo Tiyarafenu afava ma mantein nanin banta ano vetii afava ano fura yanasi ukhan mi setin aní iyan mino.

*Ume Nanin Mano Ma Yisasin  
Kama Aunka Iyain Uveri Féantein  
Bayo Ino*

<sup>36</sup> Mana Farasisi vanta ano véin má mo yunan nano van Yisasin arákan mai vanta amápin béis yunan nano van o kumanen mino. <sup>37</sup>\*O vákan mana namu avúavá baren noin nanin mano mai varurá bain bákan Yisasi nan Farasisi vanta amápin dunan niyan mino síkan mai nanin mano mana on botorefin kama auna iyain uveri mamaren eren mino. <sup>38</sup>Eriaren Yisasin ayompá arantan ma vain ádé o mantaven ifí diyan baren mino. Ifí diyákan auufenté ánu kararen Yisasin arantantá arafubíkan mai nanin mano ve ánon do fóké arúanten mino. Arúan tiyáken kokhon dádá Yisasin arantan amónaren kama auna ma iyain uveri anan máden béis arantantá péanten mino.

<sup>39</sup> Máan tiyákan Yisasin ma arákan erein Farasisi vanta ano mai nanin ma variyain danasinta ódaren béis máa sen inemí, “Ma vanta fura sen sakhanampa vanta ma varen ma nanin mano ma ventá ayan kaiyain afová iyáken béis avúavá bá dere afová inainten mino. Ma nanin béis ume yaná baren noin nanin mino.”

<sup>40</sup> Mai Farasisi vantai ineine Yisasi afová iyáken máa sen béis tiamemí, “Saimoni oe, séimpín mana vaya váká éin tiamintó uno.”

Mápá síkan Saimoni máa semí, “Aru soe, ei vaya seno.”

<sup>41</sup> Mápá síkan Yisasi semí, “Kankanan banta ano mana vanta vaípákena moní inantiren mantaren anona evaránen ameno van baren mino. Mana vanta ano yan manápá tauseni (5000) moní barákan ena vanta ano yan manápá antareti (500) moní máa ana varen mino. <sup>42</sup>Mamákoren míkanan banta ano ída kanaíen anona mai moní evaránen amirí ukheimpín mai vanta ano míkanan ma mantaré ein ifá uanten mifo éi ma iniyaoa vekanan pinté intéa vanta anó béis nan moékentá anunu inten nafino.”

<sup>43</sup> Mápá síkan Saimoni evaránen temí, “Mai ma yan manápá tauseni (5000) ma mantaré ein banta ma ifá uantein mano ino,” síkan Yisasi véin tiamemí,

“Mai eni ineine ano mo funtaren mino.”

<sup>44</sup> Mápá siren Yisasi yo vaében mai nanin oniyáken Saimonin tiamemí, “Éi ma nanin oniya fono. En amápin erékuya éi ída sirantan teséin non time nan mi ma nanin manoi ve ánfófi sirantan tesé usintáden be ánon dofókéi yo arútinten mino. <sup>45</sup>En amápin ma yun bákuya éi ída simó nen nan mi ma nanin mano anan mai ma éderuna ráké ten tirantampin timónen eriyan ban mino. <sup>46</sup>Éi ída uveri fétinten nan mi ma nanin manon auna uveri varen me sirantantá banaren pétinten mino. <sup>47</sup>Máan tukhái séi en tiámé uno. Ma nanin ná teti ódesá afová ótifano véi sen nan moéken anunu iyákan mi Tiyarafenu ano veni kokhon ume arúanten mino. Arúanten mifo sótó ume ma variyá inain bantai ume ma arúantá dantin mai vanta ano sótó máorái anunu inten mino.”

\* 7:34: Ruk 15:2 \* 7:37: Mat 26:7; Mak 14:3; Yon 12:3

<sup>48</sup> Mápá siren Yisasi mai nanin máa sen tiämémí, “Eni ume kayo inka séi arúanté uno.”

<sup>49</sup> Mápá síkán dunan nan takhoká ma ve má kumantá ein banta kayo ano vetiyan ten orera emí, “Ma vanta véi iye uraná báken ná ume yere arúantiyán nafino.”

<sup>50</sup>\* Mápá siyákán Yisasi mai nanin tiämémí, “Eni mumunan mano sikaya Tiyarafenu vá taréa kama e va ompo éi ará kusin masá orono.”

## 8

### *Manáa Nanin Mano Ma Yisasin Bákuren Noré Ein Baya Ino*

<sup>1</sup> Ínaiimpáké Yisasi kákán baru kayo fímpá bá titó baru kayo fímpá bá nóken Tiyarafenu yafisin baru fintena kama vaya kayo vanasi siamen oriyákán tiyan mítan mifo sirantan kan orun kádan (12) beni eyo iyampon kayo vá ano véin bákuren noren mino. <sup>2</sup>\* Bákuren nókan pefá ma Yisasi ano ma manáa nanin kéká pintena ma namu aunan kayo ma yo siantiyan ma aí kípaantiyan ukharé ein nanin kayo ano véin má oriyaren mino. Oriyákán mai kayo fintena mana Mákdara kena Marian ne sin nanin ma yan manápá ifo afápá kan un kádan namu aunan ma véin pintena yo siantákaré ein nanin má dere maifin oriyaren mino. <sup>3</sup> Oriyákán maifin Erotin amáká ma yafisin banta Kusan aná Yoanan má Susanan má inká ena nanin kayo vá ano vákuren oren mino. Mai nanin kayo ano vetí ina yaná poké Yisasin má bei eyo iyampon kayo vá aya iyákán doraríen noren mino.

*Danayun Ma Fafasin Bantará  
Ma Sian Baéádein Baya Ino*  
(Matiu 13:1-9; Maki 4:1-9)

<sup>4</sup> Kokhon nanin banta ano minó baru fáké Yisasi vaintá e átgru uvin mana vaya véi sian baéan

betí ankan amen mino. <sup>5</sup> “Mana vanta ano vei yunan barafin danayun pafaseno van oren mino. Mo fafasiyákán manáa yanayun mano aasá eravíkán banasi ano arantampó me yasamiyan nun kayo ano e aídiyan nan en mino.

<sup>6</sup> Manáa yanayun mano ompin eravukharen orun ampamaren barai anu ída vákan mai kayo ano ainen kfuren puren mino. <sup>7</sup> Manáa yanayun mano ayankun namampin eravukharen orun ampamin ayankun naman mano úkuaren daramáden mino. <sup>8</sup> Mápá tiyákán manáa yanayun mano kama varafin eravukharen e ampamaren kokhon ná antareti (100) aran iren mino.”

Yisasi máa siren bái oovaren temí, “Áesin ná átaren ma van nain nanin banta ano vá ma vaya inino.”

*Yisasi Ma Ovaeran Baya Fákena  
Ma Sian Amá Ein Baya Ino*  
(Matiu 13:10-17; Maki 4:10-12)

<sup>9</sup> Mápá síkán beni eyo iyampon kayo ano véi ma ovaeran baya sikheini ana siamino van bén in-aen mino. <sup>10</sup> Inaíkán bái máa sen temí, “Tiyarafenu ano inka aní ukha vei yafisin baru fintena aúpá baya gefá afová ukha ompo ‘ena nanin banta kayo ano ovaeran baya inídaren onano van kokhon dádá onanten mifo vetí ankan ída mana yaná onanten mino. Kokhon dádá inire mai ana vetí ankan ída afová inten mino.”

*Ais 6:9-10*

*Danayun Pafasí Pákenai  
Ovaeran Baya Ma Sian Amá Ein  
Baya Ino*

(Matiu 13:18-23; Maki 4:13-20)  
<sup>11</sup> Mápá siren Yisasi evaránen temí, “Mai vaeran bayai ana mápá mi ukhen mino. Danayun mai Tiyarafenu vaya ino. <sup>12</sup> Mai vaya inire mai vetí ankan mumunan intin Tiyarafenu ano aviran

\* 7:50: Ruk 8:48; 18:42 \* 8:2: Mat 27:55-56; Mak 15:40-41; Ruk 23:49

nae siren ma Ban Anon mano ínaiimpáke eriven betin aú pintena mai vaya ma yovariyain mai nanin banta anoi yanayun ma aasá eravé iyain an mi yakhen mino. <sup>13</sup> Mai vaya ma iniyáken amusin iyan ma variyain kéká ano on daró ma eravukharéin ma arú ída yan araviyainí ukhen mino. Betí ankan manáa afokhantá anan mumunan iyaréin ma akhenókáin damusí ma íkan betí eraven ankamen Tiyarafenu me ampiren oré iyan mino. <sup>14</sup> Ayankun namampin ma eravein danayuni ana maen mai vaya iniren ma orein kékái vampin uman má minó daná baran má bara rákena amusin má ano mai kéká pákaan ákona uran ída kama aran iré iyain mino. <sup>15</sup> Máan té iyan mifo kama varafin ma fafasein danayun an ma yakein kéká ará ano kamaen puntákein kéká anon ákonaen báken mi aran iriyan báé iyan mino.

*Oon Ma Uruan Takhóká Kai  
Pákena Ovaeran Baya Ino*  
(Maki 4:21-25)

<sup>16</sup>\* Mái siren Yisasi ena ovaeran bayá vanasi siamemí, “Maná ano ída kanaíen oon uruan takhó aránaópá kaen maen kurafin kuferen é iyan mifo sakho darói vákan maen mi vanasi ano fanu ma siyain ódare iyan mino.

<sup>17</sup>\* Aupá ma vain danasinta ano ínaiimpáke afoká iyantin maen banasi ano ma yarariyá inain danasinta ano ínaiimpáke afokasí intin minó nanin banta ano mai yanásinta afová inten mino.

<sup>18</sup>\* Máan tukhein nan mi saretí ankan dafíon ákona uveya vá kamaeya vaya ineno. Manáa nanin banta ano ma manáa afova yákantin Tiyarafenu ano manáa vá aminten mifo intéa nanin banta anó mana afova ída yáken ná mai afova van bái inen ná inká yáké

uno siren ma vaya ída inin nain mai kéká ina Tiyarafenu ano minó do varanten mino.”

*Yisasin Anóen Má Be Afá Kayo  
Vái Vaya Ino*

(Matiu 12:46-50; Maki 3:31-35)

<sup>19</sup> Maí damú ana Yisasin anóen má be afá kayo vá ano véin onano van eríkan kokhon naniq banta ano víkavín ída afokhaní ukhan beti ída kanaíen beni ádé oririen mino. <sup>20</sup> Máan tiyákan manáa ano Véin tiameemí, “E anóen má e afá kayo vá éin onano van barurá e ave ukhen mino.”

<sup>21</sup> Máa síkan Yisasi evaránen betin tiameemí, “Tiyarafenu vaya ma iniren dakhafiyyain nanin banta mai séin tinóen má tifátiáven má ino.”

*Yisasi Ma Kákán Uva Yo  
Siantein Baya Ino*

(Matiu 8:23-27; Maki 4:35-41)

<sup>22</sup> Maná damú Yisasi vei eyo iyampon kayo siamemí, “Eritifé ma non ekhádé mesan ufá oró tifano,” siren betí ankan botifin un kumanen oren mino. <sup>23</sup> Oriyákan Yisasi mai votifin auun bakharen mino. Bavíkan mairá kákán uva uaren békon unen non karantó en mai votifin un bíkaaren ádé anantá banairí íkan betí umampin oririen mino.

<sup>24</sup> Máan tíkan betí ankan Yisasin mo avoriyan temí, “Bafan noe, Bafan noe, setí ankan ádé anantá non ufurirí iyá uno,” síkan bái orun mantaven mai uva vá kákán non ma karantó iyain má kípano van ákonaen asíkan mai uva vá kákán non ma karantó iyá ein má kípaaren ída evaránen kayaen mino. <sup>25</sup> Kípavíkan bái máa sen betin inaemí, “Tiretíi mumunan intesá ukhen nafino.”

Mái síkan mai kéká ano akhokho van iyáken beraran ten oreraemí, “Ma vanta iyé báken ná uva vá non má tiámíkan ná bén oo yaiyiya nafino.”

\* 8:16: Mat 5:15; Ruk 11:33 \* 8:17: Mat 10:26; Ruk 12:2 \* 8:18: Mat 25:29; Ruk 19:26

*Yisasi Ma Namu Aunan Bain  
Banta Ayofein Baya Ino*  
(Matiu 8:28-34; Maki 5:1-20)

<sup>26</sup> Máan turen Yisasin má bei eyo iyampon kayo vá Karirí non ankinafá bain Kerasá\* barufá oren mino. <sup>27</sup> Oriven mai voti finté ma káusen non akhempá ma araviyain má ana mana namu aunaña pákakhein banta ayá damú avápa váken ída mápin barana vanta masí ukhein pimpá ana varen noré ein má o fóken mino. <sup>28</sup> O fókavíkan mai vanta ano Yisasin oniyán avádóden bádiyan ben arantan ádé o vaven ovararen máa semí, “Yisasi oe, éi yan bain Tiyarafenu Anin mompo éi náisá téin into fono. Téin ída vá namu usintano van mi éin tiamiyá uno.” <sup>29</sup> Béi farava vádenaino mai vanta namu aunaña mano me ampiren orino van Yisasi fefá tiamíkhon mino. Kokhon dádá mai vanta ayan arantantá seni ananpoké damuan ákona uren ma kaúdan maen béisí mai seni anan bempáké antádan maen namu aunaña kayo ano véin do aviádan kámá barufá oriyaren mino.

<sup>30</sup> Máan tiyaréin Yisasi véin máa sen inaemí, “E aví iye fino,” síkan pefái mai vanta aúpin kokhon namu aunaña kayo varé íkan mai vanta ano máa semí, “Ten tiví kokhon ná aruvín banta kayo ino.” <sup>31</sup> Máa síkan namu aunaña kayo ano váden berai siyan Yisasin tiameémí, “Éi ída vá tetí ankan aron ída van masípin tisintano.”

<sup>32</sup> Máa siyan mo onákan ayo fákena fon kayo iyukhen dunan niyaré íkan mai namu aunaña kayo ano verai siyan ákonáen Yisasin inaemí, “Éi áesirá mesan pon kayo aúpin oferá tifano,” síkan béisí “kana ino” siren ifái oren mino. <sup>33</sup> “Kana ino” síkan namu aunaña kayo ano mai vanta me ampiren pon kayo aúpin ofébíkan

mai fon kayo ano ayampaíen tava uaren ayafin araven nompin orun áduven ufure puren mino.

<sup>34</sup> Máan tíkan mai fon kaylorá ma yafikáré ein kéká ano mai yaná ma afoká ein ódaren betí ankan karan oriaren mai vaya e siádan ádé ma vain kákan barufin má akhempá ma vain baru kayo fimpá bá dere oreraen mino. <sup>35</sup> Mai vaya orera íkan banasi ano inireñ mai ma afoká ukhein daná onano siren minó nanin banta ano evúten oriyaren o onákan mai ma namu aunaña kayo ano ma me ampiren orein bantai ineine kama uvíkan auí daná uren Yisasin arantan ádá kumantan betí ankan akhokho van en mino. <sup>36</sup> Akhokho van iyákan mai yaná ma afokáin ontaré ein kéká ayo eriven intesá ená mai vanta aú pinté namu aunaña mano me ampiren orivin ná kamaen nafi mai vaya vanasi siamin inen mino. <sup>37</sup> Tiámíkan Karasá baru rákena nanin banta ano Yisasi ma ákona yorarí ukhein nan betí ankan akhokho van uren betin me ampiren orino van ákonáen tiyaimpin Yisasi votifin káusen ódiven evaránen oren mino.

<sup>38</sup> Tiantan Yisasi me onen oriyákan mai ma namu aunaña má fákakharé ein banta ano ven má orono siren iyaní íkan béisí evaránen tiantiyan máa semi, <sup>39</sup> “Éi evaráne ei varufá oriveya vá mai ma Tiyarafenu ano ma éin ayaen kama uantein baya vá tesin banasi inino,” síkan mai vanta ano vei varufin oriven eúkiyáken Yisasi ano ma véin ayaen kama uantein baya e siamen oren mino.

*Yisasi Ma Fúká Ein Arinta Avíán  
Manten Ma Ái Nanín Ayofen Ma Ein  
Baya Ino*

(Matiu 9:18-26; Maki 5:21-43)

<sup>40</sup> Yisasi non ekháden ena ufá oríkan banasi ano véi ma oriyain ave ukharen ben onen amusin en mino. <sup>41</sup> Amusin iyákan mana

\* **8:26:** Manáa vompompin Kadarenesi e sen inká ena vompompin Kekesenesi e sen ukhen mino. 8:37 dere vá onano.

monó átaru namuntá dafikein ánon banta Yairasin ne sin mano mairá eriven Yisasin arantampin aron kanan mo yurafúden ben má orino van béin ákonaen inaan mino.<sup>42</sup> Parava véin inaan naino véri mana arinta anan dan baren tiyan mikan mifo sirantan kan orun kádan (12) oranaí ukharen aí baren ádé anantá purono van iyan mino. Máa sen ina íkan Yisasi ven má orin kokhon nanin banta ano véin dakhafen mákáká suron uven oren mino.<sup>43</sup> Oriyákan maifin mana nanin tiyan mikan mifo sirantan kan orun kádan (12) oranará ena ena yamú biyon aí daná bariyákan\* mana vanta ano ída kanaíen béin ayofiyaren mino.<sup>44</sup> Máaen tiyaré íkan mai nanin mano Yisasin ayompá oriven ayan dan orin beni ayá au anamun áton aruvíkan manádá beni nare kípen mino.

<sup>45</sup> Máaen tíkan Yisasi máa sen inaemí, "Iye anó téin tiruviya fono," síkan minó nanin banta ano "ída ino" sen orera íkan Pita semí, "Bafan noe, kokhon ná nanin banta anón éin amáden mantén eukukhen mi avékiyan mino."

<sup>46</sup> Máa síkan Yisasi semí, "Mana ano séin tiruvín mi sentí ákonqano sen me ampiren oriyái afová iyá uno."

<sup>47</sup> Máa síkan mai nanin mano iníkan avinantán den ída umerarí eimpin Yisasin arantampin mo aron kan durafúden mátimen minó nanin banta avorá pará ben aruvín ná bei aí ainan kípen nafi mai yaná tiamen mino.<sup>48</sup> \*Máa síkan Yisasi semí, "Tiraun noe, éini mumunan manon éin ayofen mifo ará kusin masá orono."

<sup>49</sup> Máa siren Yisasi fara vaya siyan bákan monó átaru namuni ánon banta Yairasin amá pinté mana vanta ano eren me véin tiamemí, "E arau inka furen mifo éi ída vá enádá bá arú banta uman ameno."

<sup>50</sup> Máa síkan Yisasi mai vaya inireni mai ánon banta evaránen tiamemí, "Ei ída vá akhokho van eya vá mumunan mana vá ono e arau asefa inten mino."

<sup>51</sup> Máa siren Yisasi mai ánon banta amápin ódiyáken Pitán má Yonin má Yemisin má mai arinta anóe afóen má ana ayíaren banasi ída áíkan maifin béin má óden mino.<sup>52</sup> Ódikan pefá ma mápin baré ein nanin banta ano mai arinta van arunáná baren ifí diyan baréin Yisasi vetin máa sen tiamemí, "Béi ída fúken paran auun bakhen mifo sireti ída vá ifí dardo."

<sup>53</sup> Máa síkan betí ankan mai arinta ma fúkein afová ukhen béin nan inten mino.<sup>54</sup> Intiyákan

Yisasi mai arinta ayan pákaaren máa semí, "Tiraun noe, orun mantano."

<sup>55</sup> Máa síkan mai arinta aunán mano ovaránen béimpin eríkan ainan orun mantavin mai arinta yunan amino van Yisasi vetin tiamen mino.<sup>56</sup> Tiamirákan mai arinta anóen má afóen má ano anú duren akhokho van íkan Yisasi vékanan ákonaen tiamemí, "Tiré kanan ída vá ma yaná ma afoká ein ena nanin banta siameno."

## 9

*Yisasi Vei Eyo Iyampon Kayo  
Siantan Ma Monó Dorantá Orera  
Ein Baya Ino*

(Matiu 10:5-15; Maki 6:7-13)

<sup>1</sup> Yisasi vei eyo iyampon kayo sirantan kan orun kádan (12) ma aran eríkan maen namu aqan ma yo siantan má aí nanin banta ma ayofan ákona vá mai kéká amiyáken<sup>2</sup> Tiyarafenui yafisin baru fintena vaya siamiyáken uren aí nanin banta ayofano van tiantan oren mino.<sup>3</sup> \*Tiantan oriyákan Yisasi vetin máa sen tiamemí, "Tireti ankan ída vá unan má bereti vá moní bá ayonta vá bare vá inka ída vá

\* 8:43: Kokhon bompompin máa sikhemi, 'Minó bei moní ayofan bantan amian kípakhán mino.' \* 8:48: Ruk 7:50 \* 9:3: Ruk 10:4-11

kankanan afuin barano. <sup>4</sup> Mana varurá ma saretí ankan oriveya mana namumpin ma ódinte vá mai namun mana vá bareya mai namentesá mai varu me ampire orono. <sup>5</sup> Mana varu rákena nanin banta ano ma saretin ída e avían be amápin kainti vá mai varu ma me ampire oriya vá arantantáke kayó me fúpá tian karúdesin ná banasi afová ená teti namu é uno sino.” <sup>6</sup> Máa sirákan eyo iyampon kayo ano varufimpá orera uven kama vaya siamiyáken minó akhen pákena ái nanin banta ayofen mino.

*Eroti Ma Yisasi Iye Fino Van Ma Afová Ono Van Ina Ein Baya Ino  
(Matiu 14:1-2; Maki 6:14-16)*

<sup>7</sup> \*Máan tiyákan manáa vanta kayo ano siyáken, “Yoni evaránen masí pinté orun mantakhen mino,” siyákan Eroti kamanini ánon banta ano Yisasi ma variyain dañasinta van iniren kokhon inéine iýákan <sup>8</sup> manáa kéká ano sen pefá ma vá ein mai sakhanampa vanta kéká pintena mana anon orun mantakhen mino síkan manáa kéká ano sen Iraiyan afoká ukhen mino síkan en mino. <sup>9</sup> \*Máa síkan Eroti máa semí, “Téi gefái Yonin amen tíkakhé umpo ma vanta iye uron ná bákán ná banasi ano véi ma ena yaná dorarí iyain baya siyará iniya rafuno.” Máa siren Yisasin onano van en mino.

*Yisasi Ma Yan Manápá Tauseni (5,000) Vanta Yunan Amein Baya Ino  
(Matiu 14:13-21; Maki 6:30-44; Yoni 6:1-13)*

<sup>10</sup> Beni eyo iyampon kayo ano ovaránen eriven betí ankan ma yoren noré ein baya kayo Yisasin tiamiran betin mana yo avíaren ena nanin banta kéká me ampireen Betsaida se sin kákán barufá oren mino. <sup>11</sup> Orivíkan kokhon nanin banta ano Yisasi ma orein afová

uren béin bákuren orikan amusin iyáken Tiyarafenu yafisin pintena vaya siamin iniyákan ái ma varé ein kayo ayofen mino.

<sup>12</sup> Inúpasi íkan tiyan míkan mifo sirantan kan orun kádan (12) beni eyo iyampon kayo ano véi vaintá eriven béin máa sen tiameemí, “Ma ma setí baruna akhempá ída mana nanin banta van mifo éi kaná betin tiantesin ná kákán baru kayo fimpá bá titó baru kayo fimpá bá oriven ná betí yunan má baran ma san dosino.”

<sup>13</sup> Máa síkan Yisasi evaránen betí ankan tiameemí, “Tireti ano vá mai nanin banta yunan ameno,” síkan betí ankan temí, “Dan manápá bereti vá kankan noyana vá anan dékun ban mifo ena vá dunan o miyaní é ma nanin banta me amente rafuno.” <sup>14</sup> Dan manápá tauseni (5000) fumara vanta vákán Yisasi vei eyo iyampon kayo máa sen tiameemí, “Mai nanin banta siamesin fifty (50) ano me kumádu kumádu ino.” <sup>15</sup> Máa síkan eyo iyampon kayo ano mai ma seiní íkan minó nanin banta ano kumanen mino. <sup>16</sup> Kumamíkan Yisasi mai yan manápá bereti vá kankanan noyana vá máden inarufá kakháben Tiyarafenurá tusu siren mai vereti vá noyana vá kisikisi uren dákan bei eyo iyampon kayo ano masiman en mino. <sup>17</sup> Masiman íkan minó nanin banta ano kanaíen narákan antan dunan ma fara varé ein eyo iyampon kayo ano manafin o éke e éke uan átaru uren tiyan míkan mifo sirantan kan orun kádan (12) basiketi unan kayo víken mino.

*Pita Ma Yisasi Nan Tiyarafenu Ano Ma Aní Ukhein Banta Ono Sein Baya Ino  
(Matiu 16:13-19; Maki 8:27-29)*

<sup>18</sup> Maná damú Yisasi veyáká amúkiyan bákán bei eyo iyampon kayo ano véin má baré íkan bái

máa sen betin inaemí, “Téin nan iye inó banasi ano siyan nafino.”

<sup>19</sup> \*Máa síkan betí ankan evaránen béin tiameémí, “Manáa kéká ano éin nan monó non péantán banta Yoni ino síkan inká manáa kayo ano Iraiya ino síkan inká manáa ano fara sen pefá ma sakhanampa vanta kayo varé ein pinté mana ano orun mantakhen ne siyan mino.”

<sup>20</sup> \*Máa síkan betí ankan bái máa sen inaemí, “Tiretí ankan téin nan mai iye inó tiya raffono.” Síkan Pita evaránen béin tiameémí, “Tiyarafenu ano ma sian damuádiyáken ma sesi vanasi evaráne avirano van tiantéku orintene ma sikhareé ein mai vantán éi va ono.”

<sup>21</sup> Máa síkan Yisasi vei eyo iyampon kayo van ída vá ena nanin banta siameno siren ákonæn areuanten mino. <sup>22</sup>\*Máa siren bái semí, “Banta Anin mano kokhon uman barantiń maen ánon banta kayo vá monó ánon banta kéká bá man baya ma afová ukhein banta kéká bá ano véin oyan amiren aruan púdantin maen kanú manaú damusí intin bái evaránen orun mantanten mino.”

<sup>23</sup>\*Máa siren minó eyo iyampon kayo véi máa sen tiameémí, “Manáa nanin banta ano ma séin bákurono van anunu iyanten bei anunu maman bararasí uren ná ena ena yamú bei marípo yaa mamarén ná téin bákurino. <sup>24</sup>\*Manáa nanin banta ano ma ve aunan pákaan ákona intin bái aunañ mano o afeyoranten mifo mana nanin banta ano ma séi nan iniren ma ve aunañ ampin nain kayoi aunañ mano fara kamaen bantén mino. <sup>25</sup>Banten mifo mana nanin banta ano ma ma vararakena yanásinta variyáken ma veyan namuen afeyókantin mai yanásinta ano intesá uren ná bái ayain-

ten nafino. <sup>26</sup>\*Manáa nanin banta ano ma senti vaya vá téin ma san ma ayave van iyare esin ma Banta Anin mano ma vei kákón kakhan má be Afóeni kakhan má kantasi ukhein enisorí kayoi kakhan má ma ínaiimpáke erinten maen mai nanin banta van dere véi ayave van uantanten mino. <sup>27</sup>Téj fura urá tiré tiretí ankan tiameémí uno. Mará ma saréa mantakheona kéká pinté manáa ano ída füken mi Tiyarafenu yafisin baru onanten mino.”

*Yisasin Au Vukhafá Ma Enará  
Ein Baya Ino*

(Matiu 17:1-13; Maki 9:2-13)

<sup>28</sup>Yisasi mai vaya kayo siran dan manápá ifo afápá kanú manaú un kádán damú esantavíkan Pitan má Yonin má Yemisin má aviaren amúkono van mana anurá óden mino. <sup>29</sup>Ódiven amúkiyan baré íkan bái auná enarasí íkan bái ona ano maman efaní iyan moéken panu sen afayu an den mino. <sup>30-31</sup>\*Máa tíkan kankanan banta Mosesin nú Iraiya nú dákó iyain má békaran au fáké moéken panu siyákan Yisasin ma Yerusalemí arintin púaren ma vara me ampireñ orinaí pákena vaya siyaren mino. <sup>32</sup>\*Máa siyákan Pitan má ena eyo iyampon kanan má auunan aí iyaimpin betí ankan aunká bakharen orun mantaaren Yisasini kakhan má kankanan banta vá ano ma mantakhein onen mino. <sup>33</sup>Oniyákan ma míkanan banta ano Yisasin ma me ampireñ oriyákan maen Pita ano máa sen Yisasin tiameémí, “Bafan noe, setí ankan ma mará baruna maj kama ukhen mino. Tetí kanaié kanú manaú iyón baran namun uvadékun mana éin nina vantín mana Mosesin nina vantín mana Iraiyan nina vantín ino.” Pita mai vaya sen mifo veyan

\* 9:19: Ruk 9:7-8    \* 9:20: Yon 6:68-69

10:38; Ruk 14:27    \* 9:24: Mat 10:39; Ruk 17:33; Yon 12:25    \* 9:26: Mat 10:33; Ruk 12:9

\* 9:30-31: Ruk 9:22    \* 9:32: 2Pi 1:16-18

náiesá tiya rafuno sen ída afová ukharen mino.

<sup>34</sup>Pita mai vaya fara siyan bákan mana konan mano vetí ankan me ukuan dararan akhokho van en mino.

<sup>35</sup>\*Akhokho van iyákan mai konan pinte mana oovaren máa semí, “Ma se sanin pefá aní ukheruna ifo véini vaya vá ineno.”

<sup>36</sup>Mai vaya ma sian kiparákan Yisasi veyká ana mairá mantakhan betí ankan óden mai damú ma afokáin onein danasinta vetí mái damú ana ída ena nanin banta siamen mino.

*Namu Aunan Bá Ein Iyampon Ma Yisasi Ayofein Baya Ino*

(Matiu 17:14-21; Maki 9:14-29)

<sup>37</sup>Ená damú Yisasin má Pitán má Yemisin má Yoni má ano mai anuyon me ampiren aravyain má kokhon nanin banta ano vetin má efóken mino. <sup>38</sup>Mai aúbanáké mana vanta ano oovaren máa semí, “Aru soe, éi kana eriveyá te sanin onante fono. Mai mana iyampon manan téi yékun baren mino. <sup>39</sup>Kokhon damú mana namu aunan mano véin aúpin ódivin maen béisí namu vá dákan maen mai ano véin máden antu antu íkan efanten akhare ano ven oo fenté eriyákan maen mai namu aunan mano véin au máden namu ureñ ída ainen me ampiren orin nainí é iyan mino. <sup>40</sup>Máan tiyáka téi ákonaé berai sé eni eyo iyampon kayo van mai namu aunan do siantano van tiamiyákun mifo vetí ankan ída kanaien tiantan nainí iyan mino.”

<sup>41</sup>Máa síkan Yisasi semí, “Tiretí ída mumunan in nanin banta kayo ompo saretíi ineine vá avúavá bá ída funtáken mifo nái máa yamusá téi saretin má bákerá tiretí uman bariyá bante rafuno.” Máa siren mai vanta van “E anin avire mará ereno,” sen tiamen mino.

<sup>42</sup>Máa síkan mai iyampon mano ma Yisasini ádé eríkan maen mai namu aunan mano véin karúdan

barará aravúbin béin máden antu antu iyain má Yisasi mai namu aunan asíkan mai iyampon mano evaránen kama uvíkan be afóen amen mino.

*Yisasi Veyan Ma Fúaren E Mantan Nain Nan Ma Kan Dádasi En Tein Baya Ino*

(Matiu 17:22-23; Maki 9:30-32)

<sup>43</sup>Máan túkan minó nanin banta ano Tiyarafenui kákan ákona ódaren akhokho van iyáken Yisasi ma variyain dana san kokhon ineine iyákan Yisasi vei eyo iyampon kayo van máa sen tiameví, <sup>44</sup>\*“Kamaeya vá átaren kaúde ma vaya ineno. Banta Anin maen mana ano namuro kéká ayampin avían aminten mino.” <sup>45</sup>\*Eyo iyampon kayo ano mai vayai ana ída afová en mino. Mai vayai ana ano vetimpin aúpá bákan ída afová iyáken mi mai vaya inain nan betí ankan akhokho van ureñ ída véin inaen mino.

*Inaru Yafisimpin Iyé Kákaní Inten Nafino Ma Sen Ina Ein Baya Ino*

(Matiu 18:1-5; Maki 9:33-37)

<sup>46</sup>\*Maná damú eyo iyampon kayo ano veraran iye anó o esesí inten nafino siren asive asive iyaren mino. <sup>47-48</sup>\*Máa siyákan Yisasi vetí ankani ineine afová iyáken mana arará iyampon avireñ bei ádé me mantaantáden eyo iyampon kayo máa sen tiameví, “Iye anó téin nan inireyá mana máa tukhein iyampon arará aya inten nafi mai ano séin mi siya inten mino. Inká iye anó téin tiya inten nafi mai ída séin tiya inten mifo Tifóe ma séin tisintá erikheruna mai véin mi aya inten mino. Para vara seyo, saretí ankampin ma aví ída vain nanin banta anon o esesí inten mino.”

\* 9:35: Ruk 3:22 \* 9:44: Ruk 9:22 \* 9:45: Ruk 18:34 \* 9:46: Ruk 22:24 \* 9:47-48:  
Mat 10:40

*Iyé Ída Setinti Namuroí Inten  
Nafino Mai Setin Tirona Ino Ma  
Sein Baya Ino*  
(Maki 9:38-40)

49 Máa síkan Yisasini vaya Yoni iniren béin evaránen tiamemí, “Bafan noe, setí ankan onékun mana vanta ano éin avíká namu aunan tiantiyáken éin ída vákuren nói setí ankan mano véin are uantano van é uno.”

50\* Máa síkan Yisasi véin máa sen tiamemí, “Tiretí ankan ída vá béin airo ananí uantano. Tiretin má ída namuroí iyain kéká ano mai siren arona ino.”

*Sameriá Kéká Ano Ma Yisasin  
Oyan Amein Baya Ino*

51 Tiyarafenu ano ma Yisasin evaránen avirantin inarufá ódiń nain ádé iyákan Yisasi Yerusaremi orono van ákona inin bariyaren mino. 52-53 Béi manáa vanta kéká tiantan minó ben nina yána utaono van mana Sameriá bain barurá oríkan mai varu rákera nanin banta kayo ano afová iyáken béri Yerusaremi orono van mino siren betí amápin ída Yisasin e avian kaen mino. 54\* Máan tíkan beni eyo iyampon kanan Yemisin nú Yonin nú ano mai ma Sameriá nanin banta ano ma variyain avúavá baya iniren béin máa sen inaemí, “Bafan noe, éi anunu iyan nona vará tetí ankan inarufákena ira arékun ná morun betin ken kaurinten nafino.”\* 55 Máa síkan Yisasi yo vaéoren míkanan asiren 56 betí ankan ena varufá oren mino.\*

*Yisasin Ánain Dakhafiyain Nan  
Ma Uman Baran Baya Ino*  
(Matiu 8:19-22)

57 Oriyaré íkan aasákena mana vanta ano Yisasin máa sen

\* 9:50: Mat 12:30; Ruk 11:23 \* 9:54: 2Ki 1:9-16 \* 9:54: Tiyarafenu manáa vompon dókifin ena asotúin baya máa sikhémí, “Pefá Iraiya máan tukharen mino.” \* 9:56: Tiyarafenu manáa vompon dókifin ena asotúin baya máa sikhémí, Béi máa semí, “Tiretí ankan intéa aunan niná bafo mai siren ída afová ukha ompo Banta Anin mano ída vanasi namu ono van eren mifo véi evaránen avirano van mi eren mino.” \* 9:60: Manáa afova vanta kayo ano ma iniyain esé purin maen aú iyampompin ma fúkein mino. Mai rákená furin maen dan bukhafa ma fúkein mino. \* 9:61: 1Ki 19:20 \* 10:1: Mak 6:7 \* 10:2: Mat 9:37-38; Yon 4:35

tiamemí, “Éi ma orinona akhempá téin má bákuré nonté uno.”

58 Máa síkan Yisasi evaránen béin tiamemí, “Afá iyan kayo ina vara ain ban maen nun kayo ina nan báé iyan mifo Banta Anin mano ma avíken baran kanú ída van mino.”

59 Máa siren Yisasi ena vanta van temí, “Éi ereya séin dakha fono,” síkan mai vanta ano semí, “Bafan noe, éi áesisá te sifóen nare mo masí uresá ono.”

60 Máa síkan Yisasi véin máa sen tiamemí, “Áesin purin nanin banta ano vetiyan ná púkein kéká masí iyantiya éi oriveya Tiyarafenu yafisin baru fintena vaya sian dákó ono.”\*

61\* Máa síkan ena vanta ano Yisasin máa sen tiamemí, “Bafan noe, séi en bákuron van ukhé umpo éi kaná áesirá tesí kéká mo susu siantádesá ono.”

62 Máa síkan Yisasi evaráne véin tiamemí, “Sitia fákaráken ma ena ena yovaébiyan oyampá ma onan nain kéká ano ída kanaíen Tiyarafenu yafisin baru fintena yorará inten mino.”

## 10

*Yisasi Ano Ma Seventi-tu (72)  
Vantan Ayán Kaúden Tiantan Or-  
ein Baya Ino*

1\* Ínaimpáké Bafan mano seventy-tu (72) vanta avíden beyan ma orono van ukhein barufá tiantan béin anuanten kankanan orirú en mino.

2\* Oriyákan mai kéká máa sen tiamemí, “Dunan anafin kokhon ná dunan afukhakhan mai yunan ma yuyasin banta kayo ída kokhon ban mifo sirení ankan mai yunan

\* 9:54: Tiyarafenu manáa

vompon dókifin ena asotúin baya máa sikhémí, “Pefá Iraiya máan tukharen mino.” \* 9:56: Tiyarafenu manáa vompon dókifin ena asotúin baya máa sikhémí, Béi máa semí, “Tiretí ankan intéa aunan niná bafo mai siren ída afová ukha ompo Banta Anin mano ída vanasi namu ono van eren mifo véi evaránen avirano van mi eren mino.” \* 9:60: Manáa afova vanta kayo

ano ma iniyain esé purin maen aú iyampompin ma fúkein mino. Mai rákená furin maen dan bukhafa ma fúkein mino. \* 9:61: 1Ki 19:20 \* 10:1: Mak 6:7 \* 10:2: Mat 9:37-38; Yon

4:35

ana afóentasá amúkesin ná béis kanaíen doran banta kéká tiantan tiná mai yunan anafin oriven ná duyasino. <sup>3</sup>\*Tiretí ankan orin nompo vá ineno. Téi saretí ankan afá iyan aúbaná ma sipisipi arará kayo ma siantan oreiní é uno. <sup>4</sup>\*Tiretí ankan ída vá moní kain unan má ona khain unan má arantan anamun má bare vá oriyáke mae ída vá aasá ma esantanona nanin banta van bayan mino inúpá ino seno.\*

<sup>5</sup>“Oriyare ma mana namumpin ma oferante vá esé araí in baya vá máa seno, ‘Aésin Tiyarafenu ano vá tire antun ná ará kusin amino.’ <sup>6</sup>Mai namumpin ma mana ará kusin má bain banta ma vantin maen Tiyarafenu ará kusin mano mai vanta vá bei kéká bápin banten mifo máon banta ma ída vantin maen Tiyarafenu ará kusin mai vanta vá bei kéká bápin ída vanten mino. <sup>7</sup>\*Tiretí ankan mai namumpin mana vá bákeya mai finté ma amin nain dunan má non má ana vá nano. Para vara seyo, yoriyá ein banta ano miyan baré iyan mifo saretí ankan ída vá ena namumpin e fere khuve ono.

<sup>8</sup>\*Máon tin nompo saretí ankan ma mana kákán barurá ma oresin ma kama iyáken aviren má naumpin ma mo kaúden ma amin nain dunan ná parav á nano. <sup>9</sup>Tiretí ankan mai varu rákena áí nanin banta kayo ayofiyáke vá Tiyarafenu yafisin baru inka saretí ankani ádé erikhein mino seja vá betí tiámeno. <sup>10</sup>Tiretí ankan ma mana varufin oresin ma mai varuráké kéká ano ma ída e avían mápin ma kaintiya saretí ankan mai varu aasá o mantaveya vá máa seno, <sup>11</sup>\*Tiretí ankani varu rákena kayó ano setí ankan tirantantá dampakhein ma

yo fúpá tian karúdanuna anon tiretí ankan aní iyáken mai avúavá ma vareoná ano umei e ono’ se vá betin tiamiyákeyá vá ‘Tiyarafenu yafisin baru inka ádé erikhen mifo saretí ankan kama e vá ineno,’ seja vá betí ankan tiámeno. <sup>12</sup>\*Téi saretí ankan tiamiyá uno. Banasi ma yaimin damú ma Tiyarafenu ano aní ukheintá ma afoká intín mai varu rákena nanin bantai uman mano Sodomú baru rákena nanin bantai uman esantanten mino.

*Ída Ma Ará Baeran Nain Baru  
Kayo Ano Ma Kákan Uman Baran  
Nain Baya Ino*

(Matiu 11:20-24)

<sup>13</sup>Máa semí, “Korasiníke nanin banta oe, sirun uron mi ke ono. Betsaidáke nanin banta oe, sirun uron mi ke ompo mana vanta ano ma Taiyá bá Saidoni bái varufin ma oriven máon avúavá daná ma mo afoká intín maen betí ankan kanaíen ará baéden arunaná auí daná urem amon ánompin kakhu-faren kumanten betí ume van arunan inté ein mino. <sup>14</sup>Banté ein mifo Tiyarafenu ano ma vanasi yaiminton ma aní ukhein damú ma yákó intín tiretin amaniná ma afoká inain uman mano Taiya sú Saidoni úpin ma afoká ukhá ein uman moéken esantanten mino. <sup>15</sup>Máon tinten mifo éi Kapeneamú baru oe, éin iye ano avían dan ayontá kainten nafino. Ída mana ano aviranten mifo pefá ma fúkein nanin bantai varufin manan aravin nono.”

<sup>16</sup>\*Máa siren Yisasi mai seventi-tu (72) vanta siamemí, “Tiretí ankani vaya ma iniyain nanin banta ano séinti vayan iniyain mifo inká tireti ma oyan amiyain nanin banta ano mai séin mi oyan timiyain mino. Téin ma oyan timiyain nanin banta ano séin

\* **10:3:** Mat 10:16   \* **10:4:** Mat 10:7-14; Mak 6:8-11; Ruk 9:3-5   \* **10:4:** Ma vaya ana máon mi sikhen mí, ayáká ída o mantakhe vá bano aine vá ore yorano.   \* **10:7:** 1Ko 9:6-14; 1Ti 5:18   \* **10:8:** 1Ko 10:27   \* **10:11:** Apo 13:51; 18:6   \* **10:12:** Esé 19:24-25; Mat 10:15; 11:24   \* **10:16:** Mat 10:40; Ruk 9:48; Yon 5:23

ma sisintá ererunan oyan amiyan mino.”

*Seventi-tu (72) Vanta Ma Yisasi Siantan Orikhá ein Kéká Ma Ovaránen Erein Baya Ino*

<sup>17</sup> Ínaiimpáké seventi-tu (72) vanta ma siantan orikhá ein kéká ano ovaránen amusin iyan eriven me siamemí, “Bafan noe, setí ankan ma éin aví arékun maen namu aunan kayo ano setinti vaya ánaín bákuren mino.”

<sup>18</sup>\*Máa síkan Yisasi vetí ankan evaránen tiamemí, “Téi onéku Ban Anon mano inaru me ampiren afayuí ma einiéen eraven mino. <sup>19</sup>\*Ineno. Téi sretí ankan inka ákona amikheruna sretí kanaíeya osafae kayo vá banta untaran danasinta vá dasádeya sretí ankan kanaíeya sretíi namuro minó ákona esantaresin béis ída kanaíen tiretí minó daná namu inten mino. <sup>20</sup>\*Máaón tinten mifo sretí ankan ída vá amusin iyáke seya namu aunan mano setin too yaiyian mino seno. Inarufá ma Tiyarafenu ano ma vei vompon dókifin ma sretin aví uvantein nará amusin ono.

<sup>21</sup> Maí damú Kantá Aunan mano Yisasin arápín amusin amíkan béis máa semí, “Tifóe oe, éi ma vara vá inaru vái Bafan bákeyá éi ma kama afova vain kéká ma ma yaná aúmanantádeya ma arará iyampon kayo an dakhein kéká ma aní eona van tusu sé uno. Tifóe oe, éi fura sireya e anunun dakhádeya éi máaón te ono.

<sup>22</sup>\*“Te Sifóe ano minó danái sen tiyampin kaúken mino. Mana ano ída ve Anin afová ukhen mifo ve Afóe ano anan afová ukhan mi inká mana ano ída ve Afóen afová ukhen mifo ve Anin mano ma aní ukhen kéká bá be Anin má ano anan béis afová ukhen mino.”

<sup>23</sup> Máa siren Yisasi yo vében bei eyo iyampon kayo oniyáken temí, “Tiretí ankan ma oniyaona

yanasinta ma onan nain kéká ano vá amusin ino. <sup>24</sup> Pefá kokhon ná sakhanampa vanta kayo vá kokhon ná kin kayo vá ano sretí ma saréa oniyaona yana onano van anunu iyaren mifo ída onen mino. Inká tiretí ma iniyaona vaya ineno van anunu iyaren mifo ída inen mino.”

*Sameriá Banta Ano Ma Kama Avúavá Mantein Pákena Ma Ovaékein Baya Ino*

<sup>25</sup>\*Mana man baya ma afová ukhein banta ano Yisasin akhenóka uan onano van orun mantaven béis máa sen inaemí, “Aru soe, séi intesá uresá para van oriyan ban aunan barante rafuno.”

<sup>26</sup> Máa síkan Yisasi evaránen béis inaemí, “Man bayafin intéa vayá bákayá dankaféjya fono.”

<sup>27</sup> Síkan man baya ma afova ukhein banta ano evaránen temí, “Tiretí ankaní aú amafon má ákona vá ineine vá pokesá pura uró tire vá Bafan Tiyarafenu van anunu iyáke vá *Diu 6:5* eyan nan ma anunu iyaonaíe vá ena van anunu ono.” *Riv 19:18* <sup>28</sup>\*Máa síkan Yisasi véin tiamemí, “Mai ma seona mai fura se ompo vá mai ma seonai ureya vá para van aunan barano.”

<sup>29</sup> Máa síkan man baya ma afová ukhein banta ano veyan nan puntákein banta ino sino van Yisasin máa sen inaemí, “Man baya ano iyen nará tiretii arona kayo e sikhen nafino.”

<sup>30</sup> Máa síkan Yisasi evaránen béis tiamemí, “Mana vanta ano Yerusalemí me ampiren Yerikó barufá araviyaré íkan umoyan banta kayo ano aasá dafikaren béis pákaren namu arirí uren beni ona varen karan orivíkan béis aasá bakhen ádé anantá purono van iyaren mino. <sup>31</sup> Maí damú ana mana monó doran

\* **10:18:** Yon 12:31; Rev 12:8-9 \* **10:19:** Íbo 91:13; Mak 16:18 \* **10:20:** Fir 4:3; Rev 3:5  
\* **10:22:** Yon 3:35; 10:15 \* **10:25:** Mat 22:35-40; Ruk 18:18 \* **10:28:** Riv 18:5

banta ano mai aasá dakhafen araviyaren onákan mai vanta ano aasá bakhen bákán akhempá o úkuaren esanten oren mino. <sup>32</sup> Orivíkan mana Rivai vanta ano máan mana en mairá oriaren mai vanta e onen akhempá o úkuaren esanten oren mino. <sup>33</sup> Orivíkan mana Sameriá banta ano mai aintá ana araviyaren mai vanta ma vaintá oriven onen moéken arunan uanten mino. <sup>34</sup> Mai vanta van arunan uren béin ádé oriven ben ma arurampin uveri féantíyan uvaini vanaan tiyan uren mai namon damuanten mino. Damuantaden bei donkin daró dauman ka íkan kumamin do aviren aasá ma miyaní uren bariyain namumpin mo kaúden kamaen dafisen mino. <sup>35</sup> Dafisen bakharen ená damú mai má afóen kankanan siriva moní amiyáken máa sen tiamemí, “Ma vanta vá éi kama e vá dafiseno. Dafisiyáke ma manáa ei moní ma ventá kíparákaréesí ma séi ovarané erenté maé éin mai máa moní evarané amenté uno.”

<sup>36</sup> Máa siren Yisasi ano man baya ma afova ukhein banta in-aen temí, “Éi ma iniyaona mai máa kanú manaú banta kayo finté intéa vanta anó umoyan banta kayo ano ma aruádan baré ein banta van anunu ukharen nafino.”

<sup>37</sup> Máa síkan mai vanta ano semí, “Mai ma véin nan arunan uren aya ein banta ino,” síkan Yisasi véin tiamemí, “Éi orive vá máa avúavasá barano.”

### Mata Nú Maria Nú Amápin Ma Yisasi O Varé Ein Baya Ino

<sup>38</sup> Máa siren Yisasi má bei eyo iyampon kayo vá oriyaren mana varurá onóbíkan mai varu ráke mana Matan ne sin nanín mano Yisasin aviren be amápin oren mino. <sup>39</sup> \*Mo orákán mana Matan

aun Marian ne sin nanín baren béis Yisasin arantan ádé o kumanten béisí vaya iniyaren mino. <sup>40</sup> Baya iniyákan Mata veyáká dunan taran tasusasu iyáken kokhon ineine uvaen Yisasi vaintá oriven béisí inaemí, “Bafan noe, se sun mano séin me ampiráká teyan dunan tariyá umpsí mai van ída ovaré iniya fono. Béisí tiamesin ná téin me siya ino.”

<sup>41</sup> Máa síkan Bafan mano evaránen béisí tiamemí, “Mata. Mata oe, éi kokhon dana san ineine iya ompo <sup>42</sup> \*mana yana san mana vá ineno. Maria kama yanái varano van anunu iyain téi ída kanaié béisí ma varano van iyain daná béisí areuantanté uno.”

## 11

### Yisasi Ma Amúkin Afova Amein Baya Ino

(Matiu 6:9-15, 7:7-11)

<sup>1</sup> Maná damú Yisasi mana akhempá amúkiyan baren kíparan mana vei eyo iyampon mano máa sen béisí tiamemí, “Bafan noe, fefá ma Yoni ano ma vei eyo iyampon kayo ma amúkin afova ma amikharé einí eya éi setin afova simeno.”

<sup>2</sup> Máa síkan Yisasi evaránen betí ankan máa sen tiamemí, “Tiretí ankan ma amükinte vá máan ná teno,

Tifóe oe,\*  
en avisá kantasí intin ná  
éini inaru yafisin ná erino.\*

<sup>3</sup> Mana mana yamukáke yunan ná timeno. <sup>4</sup> Éi setinti ume vá ampisintano.

Para vara seyo, ena kayo ano ma sétin umeí usintáká ein ampiantéiyá tiféuno.

Éi ída vá áesí tirá mantan akhenókafin oferá tifano.’\*\*

\* **10:39:** Yon 11:1; 12:2-3    \* **10:42:** Mat 6:33    \* **11:2:** Tiyarafenui manáa vompon dókifin ena asotúin baya máa sikhémí, ‘Inarufá baona Sifóe oe...’    \* **11:2:** Tiyarafenui Manáa vompon dókifin ena asotúin baya máa sikhémí, ‘...erino. Inarufá ma en anunu yakhaifiyainisá ma varará dere ino.’    **11:4:** Tiyarafenui manáa vompon dókifin ena asotúin baya máa sikhémí, ‘Namu yaná pinte vá tétin do sivirano’ áa ‘Ban Anon ayan pinte vá tétin do sivirano.’

<sup>5</sup> Máa siren betí ankan evaránen tiámémí, “Tiretin áúbanáké mana ano ma vei aróna yaré intin ma mai vanta vaípá inuran áúban oriven kanú manaú bereti ana-mun timikáreesí anona evaráne ameno’ sinten mino. <sup>6</sup> Para vara seyo, mana sírona ano ayá káké eriyan baren te simá e vaká béis ma amenuna ída vá uno.”

<sup>7</sup> “Máa sin maen mápin ma vain banta ano evaránen tiámémí, ‘Ten má te sikhafana vá bakhékun ona gefái munkukhein téi ída kanaié e mantavé éin mana yaná amenté umpsí ída vá téin uman timeno.’ <sup>8</sup> Téi saretí ankan tiámé uno, béis ve aróna ifo má afóe ano ída kanaié orun mantaven bereti aminté ein mifo véi ma ínqen onará ankamiyan bain nan mi má afóe ano orun mantaven minó béis ma inantiyaré ein daná máa aminten mino.

<sup>9</sup> Máan tukhein nan mi saretí ankan tiámé uno. Inantesin maen Tiýarafenu ano kanaié aminten mino. Dosiyaré esin maen Tiýarafenu ano kanaié aní intiya ona nono. Onará ma ankamiyaré esin Tiýarafenu ano kanaié ona yiantanten mino. <sup>10</sup> Para vara seyo, iye anó inantéiyá nafi mai anon baré iyan mino. Iye anó dosé iyan nafi mai ano oman dákó é iyan mino. Onará ma ankamein dianté iyan mino.

<sup>11</sup> “Tireti iyampon afóe yan ma vaonafá ma e anin mano\* mana noyana van ma inan tintiya éi kaná mana osafáe aminté fono. <sup>12</sup> Áa éi vaípá ma kokore amú timeno ma sinti mae iyavan ná dauman aminté fono. <sup>13</sup> Tireti namu vanta kéká báke umpsí saretí akhafana ma kama yaná amin ma afová ukhante mae mai Kantá Aunan nan ma inantinona kékái inaru fáké Afóe ano moéken aminten mino.”

\* **11:11:** Tiýarafenu manáa vompon dókifin mará ena asotúin baya máa sikhémí, mana vereti van ma inan tintiya éi kaná mana onámaná aminté fono. Áa...” \* **11:15:** Mat 9:34; 10:25

\* **11:16:** Mat 12:38 \* **11:22:** Kor 2:15

*Yisasi Má Namu Aunani Ánon  
Banta Van Ma Beseburí E Ma Siyain  
Mái Vaya Ino*

(Matiu 12:22-30; Maki 3:20-27)

<sup>14</sup> Mana vantafin namu aunan báken béis oorá iyádan ída vaya sin baré ein Yisasi ano mai namu aunan do siantan orivin mai vanta ano vaya siyákan banasi ano anúden oreraen mino. <sup>15</sup> \*Máan tiyákan manáa kéká ano semí, “Béis namu aunani ánon banta Beseburini ákonarái namu aunan do siantiyan mino.” <sup>16</sup> \*Máa síkan manáa vanta ano inaru fáké aní daná aní ino van Yisasin akhenókaen mino.

<sup>17</sup> Máa siyákan Yisasi vetí ineine gefái afová iyáken máa sen tiámémí, “Mana vantai yafisin aúpin ma áúban daiminten maen mai avúqvá ano kákán uman maman dákó intin inka mana namunté ma áúban daiminten maen mai namun mákúken eravinten mino. <sup>18</sup> Máan tinten mifo Ban Anon mano ma veyan daiminten maen inté ená beni yafisin ákonáen mantanten nafino. Para vara séi máa siya rauno. Tireti ankan mano siyáke Beseburini ákonarái namu aunan do siantiyan minon tiyan ná uno. <sup>19</sup> Tare ma namu aunani ánon banta aviká ma séi namu aunan do siantiyáku mae mai saretíi ánaín ma yakhafin nain kayo ano iyen avikásá namu aunan kayo yo siantanten nafino. Mai kayo ano vá tireti avúqvá daimino. <sup>20</sup> Máan tinten mifo Tiýarafenui ákonafó ma namu aunan do siantiyáku maen Tiýarafenui yafisin ákona ano inka saretíimpin erikhen mino.

<sup>21</sup> “Mana ákona vanta ano ma aruyin danasinta utaaren ma ve amáká dafikantin maen ben nina yanásinta kamaen banten mino.

<sup>22</sup> \*Banten mifo mana veni ákona esantakhan nain banta ano ma eriven mai vanta vá aruvúden ma

véin aruren maen mi veni aruvín danasinta vá ona vá máden béis ma anunu iyain kékái yaiman aminten mino.

<sup>23</sup>\*“Éi iye anó téin má ída vante fono mai éi senti namuro ono. Inka éi iye anó téin ída siyaé banasi avían átaru inte fono mai éi anon banasi intan ne sin orera inten mino.

*Namu Aunan Kayo Ano Ma Evaránen Banta Aúpin Oriyain Baya Ino*

(Matiu 12:43-45)

<sup>24</sup>“Mana vantá ma namu aunañ mano me ampiren kámá barafá oren maen bei avíkan baru van dosen orin ma avíkan baru ma ídg van máa sé iyan mino, ‘Evaráne mai ma me ampíré ereruna namun oronté uno.’ <sup>25</sup>Máa siren o onákan mai namun bakhari uren puntaádán baren mino. <sup>26</sup>Bantin ma ódaren maen béis evaránen oren dan manápá ifo afápá kan un kádán namu aunañ kayo vetí namu avúavá ano veni namu avúavá esantakhein kayo o avían morantin mai namumpin o vanten mino. Pefá mai vanta ano namu ukharen mifo saréa véi móéken namu uron inten mino.”

*Inte Kéká Anó Kákán Amusin Baranten Nafino*

<sup>27</sup>\*Mai vaya Yisasi siyákan banasi aúbonáké mana nanin mano oovaren temí, “Éin ma kaúden nan amein nanin mano vá amusin ino.”

<sup>28</sup>Máa síkan béis evaránen temí, “Tiyarafenui vaya ma iniren oo yaiyen bákuriyain kéká ano vá amusin ino.”

*Yisasi Ano Yonan Pin Ma Aní Daná Afoká Ukhá Ein Baya Sen Mino*

(Matiu 12:38-42; Maki 8:12)

<sup>29</sup>\*Máa siyákan banasi e átaru en kokhoní iyain má Yisasi máa sen betin tiameemí, “Tare má damú

ma vain nanin banta mai namu nanin banta ino. Enará ukhein avúavá aní intí onano van ina inten mifo vetí ankan ída kanaien mana aní daná onanten mino. Mana sakhanampa vanta Yonani aní daná anan betí onanten mino. <sup>30</sup>Máa tukhein nan mi Yona maen Ninivé nanin bantai aní danasí ukháintin pasen Banta Anin mano yere sare ma vain nanin bantai aní danasí inten mino. <sup>31</sup>\*Saotíkena Kuini ano\* vanasii yaimin damú ma yákó intin maen e mantaven má damú ma vain nanin bantai avúavá daíden uman aminten mino. Para vara seyo, mai kuini maen bara akhen páké Soromonini kama afova vaya ineno siren eriven inein mifo saréa Soromonin esantakhein mano e van mino. <sup>32</sup>\*Ninivé nanin banta ano orun mantaven maen má damú kena nanin bantai avúavá daíden uman aminten mino. Para vara seyo, Yona ano ma monó baya vetí ankan tiamin maen mai kéká ano ará baeren mifo saréa mana Yonan esantakhein mi eren mino.

*Auu Ma Vain Mai Au Vukhafai On Mino*

(Matiu 5:15, 6:22-23)

<sup>33</sup>\*“Ída mana vanta ano yaamu uruan aúpa safi kavefin nafi kaé iyan mifo yan takhókái kain báken panu sen kakhiyan mi maifin ma ódiyain kayo ano kamaen oné iyan mino. <sup>34</sup>Éin auu ma vain mai eni aufin ma kakhantan on mi van mifo en auu ma kama ukhan maen minó bukhafafin panu sikha vá ompo auu ma namu intin maen mai minó bukhafan titípa inten mino. <sup>35</sup>Máa tinten mifo éin aúpin ma vain kakhan mano sítípa inafo vá dafían ná ákona ono. <sup>36</sup>Máa tukhein nan mi eni minó bukhafa ma fanu sikhantin ma mana akhempá ída sítípa ukhantin maen mai fanu

\* 11:23: Ruk 9:50 \* 11:27: Ruk 1:28, 42, 48 \* 11:29: Mat 16:4 \* 11:31: 1Ki 10:1-10

\* 11:31: Saotíkena Kuini maen mai Seba kékái kuini ino. Taréa mai vara aví Yemeni e sikhen mino. \* 11:32: Yna 3:5-10 \* 11:33: Mak 4:21; Ruk 8:16

ano en aufá daamu ma kheiní inten mino.”

*Yisasi Ma Farasisi Kayo Van Amaan Baya Sein Mino*  
(*Matiu 23:1-36; Maki 12:38-40;*  
*Ruku 20:45-47*)

<sup>37</sup> Yisasi ma vaya sian kíparan maen mana Farasisi vanta ano véin má mo yunan nano van ina íkan mai vanta amápin óden dunan kaúden nan takhóká un kumanen mino. <sup>38</sup> Un kumamen Yisasi ída ayan tesé inton dunan niyákan mai Farasisi ano kokhon ineine en mino.

<sup>39</sup> Kokhon ineine iyákan Bafan mano máa sen tiämémi, “Tiretí Farasisi kayo ano kápi vá disi vá dante anan teséiyá ompo saretin áupin ída avarí avúavá bá namu avúavá bái vikakhen mino. <sup>40</sup> Tiretí óen kéka soe! Ída mai ma yan bukhafa uvarein mano aú bukhafa vá uvantén nafino. <sup>41</sup> Máan tukhen mifo mai ma disifin bain danasá ona i van nanin banta amesin ná tiretí minó danasinta avusese ukhen bano.

<sup>42</sup> “Tiretí Farasisi kayo ano vá dafiseno. Tiretí ankan tiyan míkampintán ma yaídeya Tiyarafenu mana masin man ma yunan ana fintena sító daná ma safofin ase amin dana kayo amiya ompo ída véin anunu iyáke namu avúavá anan bariya ompo kama avúavá banasi uantiya vá Tiyarafenu van anunu ono.

<sup>43</sup> “Tiretí Farasisi kayo ano vá dafiseno. Tiretí esé an bain kará mädé monó átaru namun kayofin kumaneno van anunú iyákeyá átaru varurá banasi ano kama uren amo sino van manan éiyá ono.

<sup>44</sup> “Tiretí ankan dafíke vá bano. Para vara seyo, furin banta kayo ma aúpá barafin masí uran bákán banasi ano ída onanton ma mai yaró onóbe enóbe iyan ma Tiyarafenu avorá painí ein an mi yakharono.”

<sup>45</sup> Mana man baya ma afová ukhein banta ano mai vaya iníden

Yisasin evaránen tiämémi, “Aru soe, éi ma mai vaya seona mai sétin má inan tinkayan te ono.”

<sup>46</sup> Máa síkán Yisasi evaránen tiämémi, “Tiretí man baya ma afová ukheona vanta kéká basá dafiseno. Tiretí ankan ma afová amiyaona ano vanasi amaníná kákán uman amenan bariya ompo ída mana yámán kaureya ayaiya ono.

<sup>47</sup> “Tiretí ankan dafiseno. Tiretin anafu yan mano sakhanampa vanta kéká arin púkaréiyai mai masí kayoi saretí úádiya ono. <sup>48</sup> Pefá ma saretin anafu aráo ano ma varein danái sare saretin avúavá ano aní iyan mifo mai kéká ano sakhanampa vanta kayo aruan púdákai saretí ano mai kayoi masíi kama iya va ono. <sup>49</sup> Mai van mi Tiyarafenu ano vei inimpin tiyáken, ‘Téi sakhanampa vanta kayo vá baya varen orin banta kéká bá tianté kun betí baípá orintin maen manáa kéká aruan puriyáken inká manáa kéká para uman aminten mino.’

<sup>50</sup> Mai anarái ma vara ma araíen uvarein táké ma furen eriyan baré ein sakhanampa vanta kayoi nare miyan ná tare ma vaona nanin banta aňo vá barano. <sup>51</sup> Eborin táké araí uren eriyan maen íkun uan amin takhó bá monó namun aúbóná ma Sekaraiyan eman aruan purein mai kékái nare miyan tare ma vaona nanin banta amanínái afoká intéi séi saretin tiämíyá uno.

<sup>52</sup> “Tireti man baya ma afová ukheona vanta kéká ano yafíke vá bano. Mai aasá ma ódiyáin kayoi aa iyariya vákeyá veti ma kamaen afová uren ódonó van iyain do manan karúdiya va ompo saretiyantá ída mai aasá ódikhá ono.”

<sup>53-54</sup> Máa siren Yisasi mairá me ampiren oriyákan Farasisi kayo vá man baya ma afová ukhein kéká bá ano véin nan aran nan uren ara ara yana san ina iyan Yisasin máká dantin béis intéa vayá tintirá

béin pákante rafuno siren dafían ákonaen mino.

## 12

*Amaan Baya Kayo Vá Ará Ákona  
Uantan Baya Kayo Vá Ino  
(Matiu 10:26-27)*

<sup>1</sup> Máan tiyákan kokhon tauseni nanin banta e átaru en baru víkaaren makaká uven arantan dasamín maran en mino. Máan tiyákan Yisasi vei eyo iyampon kayo nare máa sen tiämémí, “Tiretí ankan Farasisi kayoi yisi vará dafían ná ákona ono. Beti ma kampun tiren ma mai vaya ánaín ma ída yakhafiyain nan mi siyá uno. <sup>2</sup>\*Máan tukhantin inte yanásá aúpá dará dantin baré inten nafi mai Tiyarafenu ano maman dákó intin maen inká minó aúpá baya vanasi ano kanaíen afova inten mino. <sup>3</sup>Máan tukhen mifo minó baya ma saretí ankan dunteimpin ma siyaré esin maen mai vaya minó nanin banta ano karái ininten mino. Minó baya ma saretí ankan ma aúpá mápin ma kafaya sikharé esin maen mai vaya má amon táké oovaren banasi siaminten mino.”

*Namuro Kayo Van Ma Ída Feran  
Baya Ino  
(Matiu 10:26-31)*

<sup>4</sup> Máa siren Yisasi evaránen tiämémí, “Te sirona kéka soe, séi saretin tiämé uno. Tiretí ída vá dan bukhafa máa ma aruan puré iyain kéka san perano. Ínaimpáké beti ída evaránen kanaíen mana yanásí inten mino. <sup>5</sup> Máan tukhen mifo iyen nará perante fono mai séi saretin tiamenté uno. Tiyarafenu vará tiretí ankan perano. Tiyarafenu ano ma vanta aruan púden maen béisimpin ákona vákan uman baren berai siyan purin barufin karúdanti aravin nompo vá Tiyarafenu van mana vá perano. <sup>6</sup> Tuenti toya máofó

ma yan manápá nun arará máa ma miyaní é iyain tiretí afová ukha ono. Mai nun arará kayo fintena Tiyarafenu ano ída mana áuné iyan mino. <sup>7</sup>\*Máan tukhan mi Tiyarafenu ano saretin ánon do minó dan káan kíparen tiretí ankan minó afova suron ukhen mino. Máan tukhen mifo saretí ankan manon kokhon nun arará kayo esantare kákaní ukha ono.

*Yisasini Vaya Sin Nan Ma Ída  
Ayave In Baya Ino  
(Matiu 10:32-33, 12:32, 10:19-20)*

<sup>8</sup> Máa siren Yisasi evaránen temí, “Téi saretí ankan tiámé uno. Mana nanin banta ano ma sen nan beni kékápin bá uno ma sintin maen mai Banta Anin má ano yeren Tiyarafenui enisori kayo avorá bá tiamen ma véi senti kékápin bain nanin banta ino sinten mino. <sup>9</sup> Máa sinten mifo mana vanta ano ma se nan beni kéká pinte vanta séi ída vá uno ma sintí maé ten má deren Tiyarafenui enisori kéká avorá bái nan ída sentina ino senté uno. <sup>10</sup> Inká banasi ano ma Banta Anin nan ma oyampá baya sinteya mai ume Tiyarafenu ano ída kanaíen ampiantanten mifo Kantá Aunan ma oyampá baya sinteya mai ume Tiyarafenu ano ída kanaíen ampiantanten mino.

<sup>11</sup>\*“Máan tinten mifo yetí ankan ma saretin aviren monó átaru namun kayofin ná orinent nafi áa kamanin kayo vá aví bain banta kéká bá avora safi ma aviren orintiya inte vayá anona evaráne tente rafuno. Máa sireya ída vá perano. <sup>12</sup> Maí áaurá anan Kantá Aunan manon mai ma yetin evaráne siaminona vaya saretí ankan afova aminten mino.”

*Ída Kama Inin Bain Moní Bantai  
Ovaeran Baya Ino*

<sup>13</sup> Máa siyákan mai nanin banta áubanáké mana vanta ano máa

\* 12:2: Ruk 8:17 \* 12:7: Ruk 12:24; Apo 27:34 \* 12:11: Mak 13:11; Ruk 21:12-15

sen Yisasin tiamemí, “Aru soe, se siváen tiamesin ná berasan tifóe ma furiyáken me kaútinte danasinta aúban daíden ná timino.”

<sup>14</sup> Máp sikan Yisasi evaránen mai vanta máa inaemí, “Iye ano séi nan tire anavasani ona van daíde vá masiman uan ameno siren ná mai yoran timikhen nafino.” <sup>15</sup>\*Máp siren béis vanasi siamemí, “Tireti ankan kokhon daná kaúdakeya ena vá moéke varano van inampo mai minó eina yanasintará ída kanaíeya aunañ bara nompo yafianá ákona ono.”

<sup>16</sup> Máp siren béis ena vaya vetin tian baéon amemí, “Mana moní bantai yunan anafin kokhon ná dunan aran intaren mino.” <sup>17</sup> Máp tukhan mai vanta ano veyan ovaren me ineine emí, ‘Tesi yunan ma kaonuna namun ída kanaí ukhen mifo séi intesá onte rafuno.’

<sup>18</sup> Máp sen iniren mai vanta ano semí, ‘Téi máp tonté uno. Tesi yunan kain namun kayo minó barákuré evaráne kákán má kayo uvádé maifin tesí uviti aran má minó kama yanasinta vá átaru uan kaonté uno.’ <sup>19</sup> Máp ma uré maé teyan nan máp mi senté uno. Téi kokhon oranará ma van kama yanasinta inka kaeruna sivikiyá báké kákán dunan má non má niyáké timusin iyá banté uno.’

<sup>20</sup> Máp sikan maen Tiyarafenu ano véin tiamemí, ‘Éi óen banta oe. Sare inuran mana vá purono. Éi ma fúbesin maen iye anó éi ma o éke e éke uan átaru uádeona yanasinta varanten nafino.’

<sup>21</sup>\*Máp siren Yisasi semí, ‘Kokhon danasinta ma o éke e éke uan átaru iyan bain kékápiñ mi ma yaná afoká inten mifo Tiyarafenu avorá betí ankan ída ona vain kéká an mi yakhen mino.’

### *Ída Ma Kokhon Ineine In Baya Ino*

(Matiu 6:25-34)

<sup>22</sup> Máp siren Yisasi vei eyo iyampon kayo máa sen tiamemí, “Máp

tukhen nái séi siren tiamé uno. Tireti van nan ída vá kokhon ineine ureya máa seno, ‘Tetí ankan náinásá nante rafuno.’ Inká tireti ankan ída vá tireti au van kokhon ineine ureya vá máa seno, ‘Tetí nái suí danasá uré bá tifante rafuno.’ <sup>23</sup>Ayun ma fara van aunañ mano yunan esantakhan maen inká au ano aú daná esantakhen mino. <sup>24</sup>Tireti ankan kame kayo vá onano. Betíi yunan ma yódén duyáden ma má uváden kain ída van mifo Tiyarafenu anon betin dunan amé iyan mino. Tireti vanasi ano Tiyarafenu avorá nun kayo esantakha ono. <sup>25</sup>Máp tukhen mifo ayáká bantó uno siren ma kokhon ineine iya vanteya mae kanaíená mai inin mano eni van asotú uantante nafino. Ída uron mino. <sup>26</sup>Máp tukhanti sirení ankan ma ída kanaíeya sitó daná ma varanteya faraé tireyá ena kokhon danasinta van ineine iyá ba fono.

<sup>27</sup> Paravan ma ampantein ná kamaeaya vá onano. Betíi yavaráe ída uvaré iyan mifo séi siren tiamé uno. Kin Soromonini kama aúi daná ano mana faravan má ída manái ukhen mino. <sup>28</sup>Titó mumunan bain nanin banta oe! Afova sá ono. Taréa varé intin inuran tíkaren ira saran nain káta ma Tiyarafenu ano aúi uantiyantiya mai káta kayo esantaren mi sirení aúi daná aminten mifo <sup>29</sup>sirení ankan ída vá nái yunan ná nante rafu nái non ná nante rafu sirení kokhon ineine iya vá bano. <sup>30</sup>Ída ma mumunan in nanin banta ano kokhon ineine iyáken mai yanasinta van dosé iyan mifo sirení Afóe ano inaru fákei mai yanasinta van mi iyaono sen pefái afová ukhen mino. <sup>31</sup>Máp tukhen mifo veni yafisin baru van ma yosesin maen minó dana san ma iyaona aminten mino.

*Moní Bá Ona Vá Ma Kaiyan Ban*

\* **12:15:** 1Ti 6:9-10    \* **12:21:** Mat 6:19-20

***Bayá Ino****(Matiu 6:19-21)*

<sup>32</sup> “Máan tinten mifo sanáa sipsipi ma vaona ano ída vá perano. Tiretí Afóe ma inarufá bain mano amusin iyáken inaru yafisin tiretin ameno van tikhen mino. <sup>33</sup>\* Aesin ná ena kayo ano en nina yanásinta miyaní uaranti vá mai moní ona ma ída van bain kékásá ameno. Máan ma inteya moní ma kain unan ída ainen dáke iyain mi sretiyantá uvaran nono. Ída manáa yaná afeyorantin umoyan banta ano ída varantin minó daná ída antan danú nan baru inarufasá tiretí ina yanásinta ka ono. <sup>34</sup> Máan tukhen mifo sretíi kama yanásinta ma kaesin ban nain barufin mi sretíi kákán inin banten mino.

***Dafian Ákona Ukhén Ma Van Bayá Ino***

<sup>35</sup> \*Máa siren Yisasi evaránen temí, “Tiretí ankan Tiyarafenu yorariín ona ureya sretíi oon áesin para kiyan bantiya utaare vá bano. <sup>36</sup> Kákán banta ano ma anasií in omápin orikhan ma ereno van iyákán ma vei yoran banta kéká ano ma véi ma onará me ankamintí ainé ona yiantano van ave einisá tiretí ankan ono. <sup>37</sup> Ída auun baranton ma auu sapé ukharé intin ma kákán banta ano ma eren ma e onan nain doran banta kéká ano vá amusin ino. Kákán banta ano veyantái yunan kuvin ona uren betin tintin dunan nan takhóká kumanintin maen dunan kuan aminten mino. <sup>38</sup> Máan tinten mifo yo kakhanó siren ma aráí in kókore ma asiyain áaurá ma kákán mano eriyaren e onantin ma yoran banta kayo ano ma ída auun baran para varé inten amusin ná ino. <sup>39</sup> \*Máan tukhein nará tiretí ankan ma yanásá afová ono. Umoyan banta ano ma erin nain áau ma má afóe ano afová uren maen ída ifá

intin mai umoyan banta ano ven amá me varákuren un peranten mino. <sup>40</sup> Banta Anín nan ída erinten mino se sretí ankan ininona yamúi véi erinten mifo sreti utaare vá bano.”

*Kama Yoran Banta Vá Namu Yoran Banta Vái Vaya Ino  
(Matiu 24:45-51)*

<sup>41</sup> Mápá sikan Pita evaránen Yisasi inaemí, “Bafan noe, setin maná mai vaeran baya sisimiya fono áa minó basa fino.”

<sup>42</sup> Mápá sen ina íkan Bafan mano evaránen tiámemí, “Intéa yafisin banta anó kama ineine vákan ná bei yoran kamaen doriyaré inten nafino. Ayafa ano máan dafisin bantan tíkan bei yoran banta kayorá dafisiyáken dunan amin áauí ma íkan maen dunan masiman uan doran banta kayo amé iyan mino. <sup>43</sup> Máan dorarí ma iyáin nain doran banta ma vei ayafa ano eren ma eman onan nain mano vá amusin ino. <sup>44</sup> \*Téi fura siré tiretí ankan tiámé uno. Ayafa vanta ano mai vantán tintin minó ben nina yanáká dafisinten mino.

<sup>45</sup> Máan tinten mifo mai yoran banta ano ma ve aúpin ovaren in-eine iyáken ma sesi ayafa ída ainen erinten mino siren ma aráíen be arona yoran nanin banta ma ankamiyáken dunan niyan non nén óen inten mino. <sup>46</sup> Máan tiyáre intin ma maná damú mai yoran banta ano ída afová en útakharé inain áaurá ma vei ayafa vanta erinten maen mai yoran banta me aruren tíka síka uren ída ma munun in nanin banta vá mana varufin kainten mino.

<sup>47</sup> \*“Inká mana yoran banta ano vei ayafa vantai anunu afová ukhen ma ída veni anunu ánaín bákuriyáken ma ída utaaren baré intin maen mai yoran banta kokhon dádá ankaminten mino. <sup>48</sup> Máan tinten mifo mana yoran banta ano ma ída

\* 12:33: Ruk 18:22    \* 12:35: Mat 25:1-13  
25:21, 23    \* 12:47: Yem 4:17

\* 12:39: Mat 24:43-44; 1Te 5:2    \* 12:44: Mat

vei ayafa vantai avúavá afová ukhen ma yafiyó ankamoren avúavá ukharé intin maeñ mai ayafa vanta ano manáa yádái ankaminten mino. Tiyrafenu ano ma kákán avu amikharé inain nanin banta vaípákena evaránen ena kéká ayain nan onanten mino. Tiyrafenu ano ma kákán ákona amikharé inain nanin banta vaípákena moéken ma yókaré inain ákona van evaránen ina inten mino.”

*Yisasi Ída Kusin Baren Eren Mifo Vanasi Áúban Daimin Mi Varen Eren Mino*  
(Matiu 10:34-36)

<sup>49</sup> Máq siren Yisasi evaránen temí, “Téi ma varará ira iniseno van mi ereruna mai ira ano ainen kano van mumpo ída kiyan mino. <sup>50</sup> \*Téi ma uman baré barafin aravonuna non peranté uno. Mai non téi ída fékékuñ tirá ano uman uron diyá uno. <sup>51</sup> Téi ma erikheruna van ma vara rákena minó aruvín kípaantano van mi erikhen minó teyá tireti ankan iniya rafono. Ída ino. Téi siredí ankan tiámé uno. Banasi áúban daimono yan mi séi erikhé uno. <sup>52</sup> Taréq ráké ma orin naín mai yan manápá antun mano ma mana namumpin baren maeñ mai antun mano yaíden kankanan mano manápá okhábintin kanú manaú ano enafá ekhábintin uven namuroí uantan maran inten mino. <sup>53</sup> \*Máan ma intin maeñ be afóe ano ve anin namuroí uantantin be anin mano ve afóen namuroí uantantin inká be anóe ano ve arauñ namuroí uantantin be arauñ mano ve anóen namuroí uantantin anasi anafú ano ve anafú namuroí uantantin be anafú ano anasi anafú namuroí uantanten mino.”

*Aní Danasinta Ma Yaíden Afováin Baya Ino*  
(Matiu 16:2-3)

<sup>54</sup> Máa siren Yisasi kokhon nanin banta máa sen tiámemí,

“Áau orun perápá ma konan édavíka mae ainen á danten mino sen nan maeñ á dé iyan mino. <sup>55</sup> Inká tireti ankan onen nan ma sautíké ákona uva ma eríka maeya kákán á kanten mino ma sen nan maeñ kákantá á ké iyan mino. <sup>56</sup> Tireti kampun baya sire ída mai ángain dakhafin nanin banta ono. Minan ayontá bá barará bá ma afoká iyain danasintai ana yaíden afová éiya ompo nái vará taréa ma afoká iyain danasinta ana ma yaimin avúavá tireti ída afová ukhera fono.

*Puntákein Avúavá Pó Ma Ará Manafiní In Baya Ino*  
(Matiu 5:25-26)

<sup>57</sup> “Pará puntákein avúavá tiretiyan ída yaídeya afova variya fono. <sup>58</sup> Mana vanta ano ma éin kó tiantano van ma oriyanti vá ben má aayanafasá aine vaya sire siná ará kusintin ná ará manafiní inaifo éi ma ída máan tesin maen éin avireñ mo kó banta ayampin kaintin kó banta ano firipo ayampin kaintin piripo ano avían mo karavusi namumpin kainten mino. <sup>59</sup> Téi fura siré éin tiámé uno, éi ída karavusi namun pinte aineya erin nompo éin ma miyan aví tiantákaré inain miyan ma sipá karúdaan kípa nona yamúi erin nono.”

## 13

*Ída Ma Ará Baeranteya Purin Nono*

<sup>1</sup> Yisasi vei vaya sian kíparan Karirifá ma manáa vanta kayo ano Tiyrafenu íkun uan amiyáin ma Paireti ano ma vei aruvín banta kéká tiantan ma Kariri vanta kéká ma mo arein mai kayoi nare vá Tiyrafenu ma íkun uan amin tafúnai nare vá ma manafin ópé ein baya mai kéká pinté evaránen Yisasin tiamen mino. <sup>2</sup> \*Máa síkan Yisasi evaránen betí ankan tiámemí, “Mai Kariri nanin banta

\* 12:50: Mak 10:38-39

\* 12:53: Mai 7:6

\* 13:2: Yon 9:2

kayo ano ma mai uman barein nan tiretí ankan ma iniyaona vetí ano ena Karirí nanin banta esantaren moéken umelín kéká inó tiya rafono.<sup>3</sup> Ída uron mino. Tiretí ankan ma ída ará baeranteya sирétin má deren mai uman bare furin nono.<sup>4</sup> Siroamí ma ayá ayá namun baré ein mano ma varákuáken eitini (18) vanta yararan ma furein nan ma sирeti iniyaona anó Yerusaremí ma vain nanin banta ano ma namu avúavá bariyain esantaren ná bariyaren nafino.<sup>5</sup> Ída uron mino. Tiretí ankan ma ída ará baeranteya sирeti má deren mai uman bare furin nono.

### *Fiki Yaa Ana Ma Ída Aran Ireintá Ma Ovaéádan Baya Ino*

<sup>6</sup> Máa siren béis mana ovaeran baya siamemí, “Mana vanta ano vei uvaini yunan barafin mana fiki yaa ana yódan baré íkan mai vanta ano aran intein onano van oriyan baren o onákan ída mana aran intaren mino.<sup>7</sup>\* Máan tukheimpin mai yunan anará ma yafíkein doran banta véi máa sen tiamemí, ‘Kanú manaú oranarái ma fiki yaa ana séi o oné erékun béis fasavifái váken bara anu variyan ban ída mana aran iriyen mifo síkaan karúdano.’

<sup>8</sup>\* Máa síkan mai yoran banta ano véin evaránen tiamemí, ‘Kákán banta oe, mana oanará bá áesin para vantí mai anafin kanan ariyá kao ara kaúan onano.<sup>9</sup> Máan tékun ma ena oranafin ma aran iranten mai kama inten mifo ída ma aran iranti mae síkaan karúdano.’”

### *Yisasi Ano Ma Ayorun Davénakhein Nanin Sabati Yamú<sup>10</sup> Ayofein Baya Ino*

<sup>10</sup> Mana Sabati yamú Yisasi mana monó átaru namumpin banasi monó baya siamiyaren mino. <sup>11</sup> Tiamiyákan eitini (18)

oranará mana namu aunan mano fákaan ákoná uran bain nanin má dere maifin baren mino. Bákán mai namu aunan mano véin ayorun punkantan ída kanaíen béis funtáden mantiyaren mino.<sup>12</sup> Máan tiyá íkan Yisasi véin óden aran eríkan máa sen tiamemí, “Eini aí inka séi kípaonté uno.”<sup>13</sup> Máa siren be ayan kain orin mai nanin ayorun aruviyain má ainén puntáben orun mantaaren Tiyarafenu aví daníen mino.

<sup>14</sup>\* Máan tíkan monó átaru namuntá ma ánóni ukhein banta ano Yisasi ma Sabati yamú ayofiyain nan aranan uren máa sen banasi siamemí, “Dan manápá ifo afápá mana un kádan damuí yoran damú ban mifo maí damú kayofin ná eresin ayofana ifo ída vá Sabati yamú ereno.”

<sup>15</sup>\* Máa síkan Bafan mano evaránen béisn tiamemí, “Tireti kampun baya sire ída mai ánain dakhafin nanin banta ono. Tiretí vaya véi avúavá bá ano ída manaí ukhen mino. Sabati yamú tiréti ídá kao véi donkin mái má ona yiantádeyá non nano van anan utúantádeyá avire oréiya rafono.<sup>16</sup> Ma nanin maen Abaraamún arauñ mi Ban Anón mano eitini (18) oranará pákaádan baren mifo mai ma véin pákaádan baré ein daná ma yo varantó iyaruna mai ídá Sabati yamú barante rafuno.”

<sup>17</sup> Máa síkan beni namuro kayo ano ayavevan en mifo vanasi ano mai ma kama yanásinta ma véi varein nan amusin en mino.

### *Mastati Arantá Ma Ovaéádan Baya Ino*

(Matiu 13:31-32; Maki 4:30-32)

<sup>18</sup> Máa siren Yisasi evaránen inaemí, “Tiyarafenu yafisin baru ano intéa yaná aná dakhén nafino. Intéa yanákasá tian baerante rafuno.<sup>19</sup> Mai ano mana Mastati yaa aran ma ein an dakhán mi mana vanta ano varen bei yunan

\* 13:7: Ruk 3:9 \* 13:8: 2Pi 3:9, 15 \* 13:14: Eks 20:9-10; Diu 5:13-14 \* 13:15: Ruk 14:5

barafin mo yódákáréin mai ano e ampamaren kákán daaí uvíkan ay ompin ma noin nun kayo ano mai yaa ayan kaylorá mo nan uvaren mino.”

*Yisirá Ma Ovaéádan Baya Ino  
(Matiu 13:33)*

<sup>20</sup> Mápá siren Yisasi evaránen inaemí, “Téi intéa yanákásá Tiyarafenui yafisin baru sian baéadante rafuno. <sup>21</sup> Mai ano yisi ma ein an dakhan mi mana nanin mano ma máden kokhon paravá bá manafin opé uren ma upí uran maen mai ano mai faravápin oreraen pameiní ukhen mino.”

*Titó Onai Vaya Ino  
(Matiu 7:13-14, 21-23)*

<sup>22</sup> Mápá siren Yisasi Yerusaremí aayana oriyáken mai akhempá ma sító baru vá kákán baru kayo vá ma vain pimpá e monó baya siamen oriyaren mino. <sup>23</sup> E siamen oriyákan manáa kéká ano véin mápá sen inaemí, “Bafan noe, manáa nanin banta aná Tiyarafenu ano evaránen aviranten nafino.”

Mápá síkan bái evaránen betin tiámemí, <sup>24</sup> “Ayampa máareya vá titó onafin ódono. Kokhon mano ódono van iyái séi sirétin tiamiyá umpsí vetí ída kanaíen ódinten mino. <sup>25</sup> \*Maná damusí má intin má afóe ano e mantaaren má ona ma munkurantiya saretí ankan barufá e mantaveya verai siyáke onará ankamesin maen bái evaránen tiretin mápá sen tiáminten mino, ‘Tireti inte fákesá eriya vae. Mai séi ída sretin afová ukhé uno.’

<sup>26</sup> \*Mápá ma sintiya saretí ankan evaráne véin mápá se siamin nono, ‘Tetí ankan éin má manafin dunan má non má niyákuya setisi aasá éi oriveya monó baya sisimiya ono.’

<sup>27</sup> \*“Mápá sesin maen bái evaránen tinten mino, ‘Tireti inte fákena kékásá ere vae. Mai séi

ída afová ukhé umpsí saretí namu avúavá baran kéká umpsí minó ano sifó ono.”

<sup>28</sup> \*“Mápá ma siren tirétin tiantantiya mai ma uman barei sin barufin orun bákeya Tiyarafenui yafisin barufin onesin maen Abaraamun má Aisakin má Yekopun má minó sakhanampa vanta kayo vá ma maifin bantiya saretí ankan kákán ífi diyákeya aveantuntá inkekípa nono. <sup>29</sup> \*Máan ma iyasin maen ma varai áau e uní pákena vá áau orun perá pákena vá saotíke vá notíke nanin banta ano ere ere uven maen Tiyarafenui yafisin barufin ma vain omápin e varu varen kumamen mai yunan nanten mino. <sup>30</sup> \*Máan tukhein nan mi saréa ma ínainí ukhein kéká ano un aní intin maen aní ma ukháiñ nain kéká ano evaránen ínainí inten mino.”

*Yisasi Ma Yerusaremí Baru Van Arunaná Barein Baya Ino  
(Matiu 23:37-39)*

<sup>31</sup> Mai damú ana manáa Farasisi kéká ano Yisasi vaintá eriven bén máo sen tiámemí, “Eroti ano éin arono van iyan mifo éi ma varu me ampireya ena akhempá orono.”

<sup>32</sup> Mápá síkan Yisasi evaránen betin tiámemí, “Tireti ankan oreya mai afá iyan mo mápá sevá tiámeno, ‘Tareá vá inuran má téi namu aunan kayo yo siantiyáke maé aí nanin banta kéká ayofanté umpsí kanú manaú damusí ma intíi sesi yoran kípanté uno.’

<sup>33</sup> Máan tontéi saréa vá inuran má ídamú bá téi fara oronté uno. Mai fara vara seyo, sakhanampa vanta ano ída Yerusaremí ankiñafá o furinte mifo véi Yerusaremí anan purinten mino.

<sup>34</sup> Yerusaremí oe, Yerusaremí oe, éi ano sakhanampa vanta kayo arureya Tiyarafenu ano ma éi vaípá tiantein banta kéká onámaná ankádeya iyan ná

\* **13:25:** Mat 25:10-12    \* **13:27:** Íbo 6:8

\* **13:30:** Mat 19:30

\* **13:28:** Mat 8:11-12    \* **13:29:** Íbo 107:3

náimáa yádasá téi enan tirun nan urerá en akhafana o éke e éke uan anasi kókore ano ma ve ayampin deiní iyáku ompo saretí ída anunu iya ono. <sup>35</sup> Onano. Tireti ankan varu saréa ída yafisé toyen amiré kun namu ukhen para vanten mino. Téin ída evaráne son nan bareya máa sin nono, ‘Bafan aviká ma eriyain banta vá Tiyarafenu ano avu ino.’” *Íbo 118:26*

## 14

### *Yisasi Ma Farasisi Vanta Amá O Varééi Pákena Vaya Ino*

<sup>1</sup> Mana Sabati yamú Yisasi ano mana Farasisi kayoi ánon banta amá mo yunan niyákan betí ankan mano véintá dafian ákonæn mino. <sup>2</sup> Máan tiyákan mana au famín aí bain banta ano maifin béin ádé baren mino. <sup>3</sup>\* Bákán Yisasi máa sen Farasisi kéká bá man baya ma afová ukhein kayo vá inaemí, “Sabati yamú kaná aí nanin banta ayofanten nafino áa ída fino.” <sup>4</sup> Máa síkan betí ankan púkekhaven ída mana vaya siamiyaimpin Yisasi mai vanta au fákaren beni aí kípaantáden tiantan oren mino.

<sup>5</sup>\* Orivíkan bái máa sen betí ankan inaemí, “Tireti ankan pinté mana ano ma mana ain iyampon nafi\* burumákao fi ma yaká esin Sabati yamú ma non bain masipin ma áduvintiya éi ída aineya orun darifaádan akhempá édanten nafino.” <sup>6</sup> Máa sen ina íkan betí ankan ída mana vaya sen mino.

### *Tiretiyan Ma Maman Bararasí In Baya Ino*

<sup>7</sup> Máan tiyákan mai omápin ma erikharé ein kayo onákan dunan nan takhói an karaká ana kumaniyaimpin bái máa sen betin ma vaya ovaéden tiamen mino.

\* **14:3:** Ruk 6:9    \* **14:5:** Mat 12:11; Ruk 13:15    \* **14:5:** Manáa vompon dókifin donkin ne sikhen mino.    \* **14:8:** Pro 25:6-7    \* **14:11:** Mat 23:12; Ruk 18:14    \* **14:14:** Yon 5:29

\* **14:15:** Ruk 13:29

<sup>8</sup>\*“Mana vanta ano ma anasi iran omápin ma éin arantiya ma orinte ída vá esé karaká o khumaneno. Éin esantakhein banta vá deren arakhanten mino. <sup>9</sup> Máan tukhá esin maen tirekánan ma arein banta ano ma ínaimpáké erintin ei kará ma vanta ameno sintiya éi kákán ayave van iyáke ínaaintena karaká o khumanin nono. <sup>10</sup> Máan tinafo vá omáká ma aranti orikhe mae oyampá ma vain karakásá o khumantá esin ná mai omá afóe ano ma onanten maen ‘tirona oe, manteya an bain karaká un kumaneno’ sinti ma un kuman esin maifin ma varé inain kéká ano má onanti vá kákán bí barano. <sup>11</sup>\* Baran nompo ve aví ma manan daní inain kéká Tiyarafenu ano maman bararasí inte mifo ve aví ma maman bararasí in nain kéká Tiyarafenun ano kákán bí aminten mino.”

### *Éi Ma Anona Ída Ameren Kéká Ma Amí Pákena Vaya Ino*

<sup>12</sup> Máa siren dunan me nano van ma ven arein banta máa sen tiameví, “Éi ma mana omasí iyákeya éi ída vá e arona fi e afá aváe fi e anóe afóeni kéká safi e adé ma moní nanin banta vain nafi arano. Éi ma arakharé esin maen éin e araan betí ankan omápin kaúden anona evaránen dunan aminten mino. <sup>13</sup> Máan tinten mifo éi ma kákán omasí ma inte vá minó daná ma ída van nanin banta vá au ma namu ukhein kayo vá arantan ma namu ukhein kayo vá auu yufukhein kayo vá ana vá arakháesin <sup>14</sup>\* ma éin ída evaránen amintiya vá éi amusin ná ono ínaimpá ma funtákein nanin banta ma orun mantan nain damuí Tiyarafenu ano éin evaránen amusin aminten mino.”

### *Kákán Omáká Ma Ovaeran Baya Ino*

(Matiu 22:1-10)

15 \*Máa síkan mai ma véin má dunan niyaré ein kayo finté mana vanta ano mai vaya iniren máa sen Yisasin tiamemí, “Tiyarafenui yafisin barufin ma omasí inaimpín ma o khumamen dunan nan nain nanin banta ano vá amusin ino.”

16 Máa síkan Yisasi evaránen béin tiamemí, “Mana vanta ano kákán dunan taranton iyáken mai omápin kokhon nanin bantan aren mino. 17 Arakharen mai ma kákán dunan taran damusíin pefá ma arakhá ein nanin banta van inka minó dunan taman úbefaráken ariyan ne sen tiamino van mai vanta ano vei yoran banta siantan oren mino.

18 Oríkan minó nanin banta ano ída ino ana sen orera en mino. Máa siyákan mana vanta ano máa sen tiamemí, ‘Téi saréa anan mana yunan ana miyaní uádákéi mai o onantó umpsí sirun noe, séi ída oronté uno.’

19 Síkan inká ena ano máa semí, ‘Téi saréa tiyan míkan doran burumákao kéká miyaní uakeí mai kéká mo yóan onano van oriyá umpsí sirun noe, séi ída oronté uno.’

20 \*Síkan inká ena vá ano máa sen tiamemí, ‘Taráe uron mi anasi iman timikhein téi ída oronté uno.’

21 “Máa síkan mai yoran banta ano evaránen bei kákán banta vaintá oriven mai ma vetí ankan téin baya kayo véin tiámíkan kákán aranan uren bei yoran banta máa sen duvun emí, ‘Éi aineya kákán barui kákán aasá bá titó aasá bá oriveya minó daná ma ída vain nanin banta vá arantan ma namu ukhein kéká bá auu ma yufúkukhein kayo vá au ma namu ukhein kéká bá avire vá ereno.’

22 Máa síkan mai yoran banta ano mai ma seiní uren bái evaránen bei kákán banta vaintá oriven béin máa sen tiamemí, ‘Kákán banta oe, mai ma éi seonaí urékun má naumpin manáa afokhan para van mino.’

23 Síkan kákán banta ano evaránen bei yoran banta siamemí, ‘Ten timápin bíkano van mi séi sununuiyá umpsí éi kákán baru me ampiyea minó kákán aa kayo vá dunan anafimpá bá oriveya éi ma onanona nanin banta siamesin ten timápin erino. 24 Téi saretí ankan tiamiyá uno. Mai ma séi gefá ayusikhá eruna kayo finté mana nanin banta ano ída kanaíen tenti omá pinte yunan me nanten mino.’”

*Yisasin Ánaín Ma Vákurin Mai  
Ída Sesosikhen Mino  
(Matiu 10:37-38)*

25 Kokhon nanin banta ano Yisasin má oriyá íkan bái yovaéaren betin máa sen tiamemí,

26 \*“Téi vaípá ma ereno van inona ano ma e anóe afóen má e aná akhafána vá e afá aváen má ayofin má ei vamipin má ma namuroí iyanona ano ída kanaíeya senti eyo iyamponí in nono. 27 Inká ei yaa unkamádan ma ída mamareya ma séin tíain ma vákurin nona ano ída kanaíeya senti eyo iyamponí in nono.

28 “Tiretí ankan pinté mana ano ma kákán ayá namun ma uvarano van inten maen ná esé bái ída kumanten ná bei moní kaná bain ná mai namun uvaman kípanté rafuno siren ná daíden afová inten nafino. 29 Mai fara vara seyo mai vanta ano ma ída mai yanasta átaruin ma varu avantaren simeni upí uren kaen orera uren ma namádan daféden ma mai namun ída uvaman kípan me ifá urantin maen ena nanin banta ano ma oniyáken ída kama ineine vain banta ino siren oyampá baya sen 30 máa sintemí, ‘Mai vanta ano má uvarano siren uvaman araí uren ída mai namun uvaman kípen mino.’

31 “Inká mana kin mano ma ena kin má mo aruvono siren maen ída bái kumanten ná bei

\* 14:20: 1Ko 7:33    \* 14:26: Ruk 9:23

siyan míkan tauseni (10,000) aruvín banta ano kanaísá ená tuenti tauseni (20,000) aruvín banta ma namuro kín mano ma iyanen eriyain má aruvinten nafino siren ná daiminten nafino.<sup>32</sup> Daíden intin ma ída kanaí ukhantin maen namuro kin ma nentá eriyantin mi vei yoran banta siantantin oren mi namuro kin mo ará kusin baya sen inainten mino.

<sup>33</sup> “Máan mana en mi mana ano ma ída ve ina yanásinta ma me ifá inten maen mai ano ída kanaíen tenti eyo iyamponí inten mino.

*Yisasi Siyáken Banasi Ano Un An Mi Yakhén Mino  
(Matiu 5:13; Maki 9:50)*

<sup>34</sup> “Un maen kama yana ifo veni ase ma kípavinti mae intesá uresin ná evaránen ase inten nafino.<sup>35</sup> Mai un maen ída varafin mo kama inti inká ída kanaíeyá vurumákao ara vá upí ure varafin kain nompo savifái maman karúdán nono.

“Átoren ma van nain kayo ano vá ineno.”

## 15

*Sipisipi Afeyorantá Ma Sian Baéádan Baya Ino  
(Matiu 18:12-14)*

<sup>1</sup> Takisi varan banta kayo vá ume nanin banta kéká bá ano Yisasini vaya ineno van bén ádé eiyen mino. <sup>2</sup>\*Máan tíkan Fara-sisi kayo vá man baya ma afova ukhein kéká bá ano mai van aranan uren máa semí, “Ma vanta ano ume nanin banta kayo anan aronaí iyáken betí ankan má anan dunan niyan mino.”

<sup>3</sup> Máa siyaimpin Yisasi ma vaya ovaéden tiamemí, <sup>4</sup>\*“Tiretí ankan pinté mana ano ma mana antareti (100) sipisipi kaúdakaré intin ma mai finté mana afeyóbintin maen ída nainti naini (99) sipisipi me kaúden ná mai ma mana sipisipi afeyókein nan e yosen oriyán

baren ná o onanten nafino. <sup>5</sup> O óden maen béis kákán amusin iyáken mai sipisipi yauman be afuntá kaúden <sup>6</sup> aviren barufá ma moren maen be arona kayo vá be amá ádé ma vain nanin banta kéká bá e araán manafin átarú uren maen betin máa sen tiaminten mino. ‘Mana sipisipi ma se sina afeyoká ein inka yosé umpsen má eriveya amusin ítifero.’ <sup>7</sup>Téi fura siré tiretí ankan tiamiyá uno. Ma ma einí anan en mi nainti naini (99) funtákein nanin banta ano ída ará baeran nan ininten mifo ume nanin banta finté mana ano ma ará baerantin maen inarufá kákán amusin uron mi inten mino.”

*Maná Moní Afeyorantá Ma Sian Baéádan Baya Ino*

<sup>8</sup> “Maná nanin mano ma siyan míkan aintain moní kaintin baré intin ma mai fintena mana aintain ma afeyóbintin maen béis ída daamu antúduren avové en bakhari uren ná dosiren mai aintain baranten nafino. <sup>9</sup>Béis yosiyán baren ma mai aintain moní dosiareñ maen be arona kayo vá be amá ádé ma vain nanin banta kéká bá e araán manafin átarú uren maen betin máa sen tiaminten mino. ‘Tesi mana aintain moní ma afeyókaré ein inka yosé umpsen má amusin ono.’ <sup>10</sup>Téi fura siré tiretí ankan tiamiyá uno. Ume nanin banta finté mana ano má ará baerantin maen Tiyaratfenu enisori kayo ano máan manan en mi kákán amusin inten mino.”

*Maná Ain Iyampon Ma Afeyorantá Ma Sian Baéádan Baya Ino*

<sup>11</sup> Máa siren Yisasi evaránen temí, “Maná vanta ano kankanán ain iyampon kain baren mino. <sup>12</sup> Kain baren ínainte iyampon mano ve afóen máa sen tiamemí, ‘Tifóe oe, minó daná ma séin masíman uantimeno van ma iyá eona yanásinta saréa ana séin timeno van muno,’ sikan be afóe ano vei

\* **15:2:** Ruk 5:30    \* **15:4:** Isi 34:11, 16; Ruk 19:10

minó daná míkanampin daimen mino.

<sup>13</sup> “Máan turan ínainte iyampon mano ída ayáká banton minó beina yanasinta mamaren mana nentá bain barafá o váken bei minó moní pa savi yanáká afe en mino. <sup>14</sup> Kíparákan mai varafin kákan anan afoká íkan béimpin ída mana yaná baren mino. <sup>15</sup> Ída vaimpin mai vara fintena vantafin mo yorano van ina íkan mai vanta ano vei fon kaylorá dafisino van pon dafufin tiantan oren mino. <sup>16</sup> O vákan mana nanin banta ano ída véin mana yunan amiyaimpin arafan nan uaren pon kayo ano ma niyain basá áitán máden nano van iyaren mino.

<sup>17</sup> “Máan tiyáken béis ovaren me ineine iyan máa semí, ‘Te sifóeni yoran banta kayo ano kokhon dunan ban niyákai séi mará kákan tirafan nan iyá bá uno.’ <sup>18</sup> \*Máan tiyá baruna saréa séi e manté te sifóe vaípá evaránen orivé maé béisín máa sé tiamenté uno, ‘Tifóe oe, Tiyarafenu vá éin má umeí uanté uno.’ <sup>19</sup> Taréa séi ída kama ukhé umpo éi ída vá e anin ne seya séin tariyáke vá téin maman ná ei mana yoran banta aná dano.” <sup>20</sup> Máa siren béis e mantén be afóe vaípá oren mino.

“Béis ma nentá eriyákan ma ve afóe ano véin oniyáken kákan arunan uren tavaen o yafayódén amónen mino.

<sup>21</sup> “Máan tikán be anin mano véin máa sen tiameí, ‘Tifóe oe, Tiyarafenu vá éin má umeí uanté uno. Taréa séi ída kama ukhé umpo éi ída vá e anin ne seya séin tarano.’

<sup>22</sup> Máa síkan be afóe ano vei yoran banta kayo araren máa sen tiameí, ‘Tenti moéken kama ukhein ayá tu anamun aine o vare me uantiyákeyá ayampin rini afu uante vá arantampin arantan anamun uante ono. <sup>23</sup> Uantáde

mae inókein burumákao o vare me aruresí tábé niyáké timusin ó tifano. <sup>24</sup> \*Mai fara vara seyo, se sanin mano furein an dakharen mi evaránen ma mantéinén mino. Béis afeyókaréí evaránen dosé tiféuno.” Máa siren betí ankan aráien amusin en mino.

<sup>25</sup> “Máan tiyákan esékena iyampon mano yunan anafá doren noren má ádá eriven musikí avaya vá danisí ma iyain má inen mino. <sup>26</sup> Iniren mana yoran banta araren máa sen béis inaemí, ‘Mai náisá iyan natino.’ <sup>27</sup> Síkan mai yoran banta ano evaránen béis tiamemí, ‘E afá erikhan mi véi ma ovaránen ma kamaen erein nan mi e afóe ano mana inókein burumákao arurákan mi amusin iyan mantino.’

<sup>28</sup> “Máa síkan esékena iyampon mano aranan uren maifin ída ódikan be afóe ano ekhoven barufá eravuven ará kusin bayá véin tiamen mino. <sup>29</sup> Máa síkan béis evaránen be afóe tiamemí, ‘Onano. Ayá oranará téi eni yorari para oé eriyá báké éi ma seona vaya kayo ída mana átakharé iyákuya mae éi ída mana memé arará timen ná te sirona kayo vá timusin iyaré uno.’

<sup>30</sup> Máan tiyareyá ma ma éin nina yanasinta ma aasá non nanin aríntará ma mo asuse ein iyampon ma ovaránen mápin ereintái éi amusineya inókein burumákao are ono.”

<sup>31</sup> “Máa síkan be afóe ano semí, ‘Tanin noe, minó damú éi sen má anan baonan ban mi minó daná ma sentina vain mai éin ninaii ukhen mino. <sup>32</sup> Máan tukhen mifo saréa erisá tetí ankan timusin ékun ná tétin tirá ano kama ino. Mai fara vara seyo, e afá ano furein an dakharen mi evaránen ma mantéinén mino. Béis afeyokaréí evaránen dosé tiféuno.’”

## 16

Anona Ma Evaránen Ameno

\* 15:18: Íbo 51:4 \* 15:24: Efe 2:1, 5

*Van Mantaré Ein Kayo Ma Fun-taraein Ayafai Ovaeran Baya Ino*

<sup>1</sup> Yisisi vei eyo iyampon kayo máa sen tiameemí, ‘Maná moní banta ano ve ina yanásintará dafisino van mana ayafa yan baré ikón manáa vanta kayo ano moní banta vaípá oriven mo máa sen tiameemí, ‘En nina yanáká má ayafái ukhein banta ano en nina yanásinta máden tavifá asuse iyan mino.’ <sup>2</sup> Máa sen tiámírákan moní banta ano ve ina yanáká ma ayafái ukhein banta aran eríkan máa sen inaemí, ‘Eí naísá iýanan ná ena kayo ano me sisimí iniya rafuno. Evaráne orive vá ten tina yanásinta ma fákakhe ona mai máa vompompin uvádeya vá bare me simeno. Éi ída eyaráne sen tina yanásintará ayafái inono.’

<sup>3</sup> ‘Máa síkan mai ayafa vanta ano veyan nan máa semí, ‘Téi intesá onte rafuno. Tesi kákán banta ano yoran pintena séin do sisintiyan mino. Téimpin bara ápomin ákona ída van inká ena vaípá ma minó daná inantin nan tiyave iyan mino. <sup>4</sup> Máaón tiyá umpo sesi yoran ma kípanuna yamú ma vanasi ano ma séin e sivian betí amápin kain nain aafákena inka afová é uno.’

<sup>5</sup> ‘Máa sen iníren mairá mana mana vanta ano ma vei kákán banta vaípá ma anona evaráne amín daná ma mantaré ein kéká arákán béis vaintá erivin mairá mana vanta nare ayafa vanta ano inaemí, ‘Eí nái máa yanásá tenti kákán banta vaípákena evaráne ameno siré manta fono.’

<sup>6</sup> Máa sen ina íkan mai vanta ano semí, ‘Uveri khave mana antareti (100) máa ino,’ síkan mairá mai ayafa ano siameemí, ‘Mai ma amiyáken ma amikhá ein bompon bare aine e khuman me mai vompompin fifty (50) khave máa ino sire uvarano.’

<sup>7</sup> ‘Ínaimpáké ena vanta inaemí, ‘Eí nái máa mantare fono,’ síkan

‘mana antareti (100) máan uviti unan mantaré uno,’ síkan mairá mai ayafa ano siameemí, ‘Mai uviti unan amiyáken ma amikhá ein bompon bare eriveya eiti (80) unan máa ino se uvarano.’

<sup>8</sup> ‘Máaón turan mai moní banta ano namu ayafa ano ma varein avúavá san inireñ amo sen mino. Para va ino véi kama ineine ma vain banta an mi yaran mino. Ma vara ráke avúavá ma yakhafiayain nanin banta ano ara ara aa fákéi vetíi yoran bariyan pasen mi kakhantá ma vain nanin banta esantakhen mino. <sup>9</sup> Máaón tukhein nan mi sirétin tiámé uno. Ma varará ma yakeona yanásinta fosá ena nanin banta amiya mai kéká avíón tireti aronáí uraká esin ná mai yanásinta ma mo kípan nain damú amusin iyan ná Tiyarafenu ano siren e avíón ayun ma fara van oriyan ban barufín kaino.

<sup>10</sup> \*‘Maná nanin banta ano ma sitó danáká kamaen dafisinten maen mai véi kanaién kákán danáká bá dere yafisinten mino. Inká mana nanin banta ano ma sitó danáká ma ída funtákein avúavá ma inten maen mai véi kákán danáká bá ída funtákein avúavá inten mino. <sup>11</sup> Máaón tinten mifo siréti ma vara rákena namu moní ma ída kanaié yafisinte mae mai iye anó pura yana suron amintiyá tiréti yafisinte fono. <sup>12</sup> Mai van mi siréti ma ída kama e ma ena ina yanáká ma yafisinte mae mai iye anó tiretin nina yana se siren ná amintiyá yafisinte fono.

<sup>13</sup> \*‘Maná yoran banta ano ída kanaié kankanan dafisini aránaópá banten mino. Máaón ma inten maen mana van anunu ureñ ena ará namu uanten maen inká mana avaya inen maen ena avaya oyan aminten mino. Éi ída kanaié Tiyarafenu vá moní bái aránaópá ban nono.’

*Yisasi Ma Tiyarafenu Yafisin  
Má Man Baya Vá Ma Siamein Baya*

*Ino*

<sup>14</sup> Máa síkan Farasisi kéká moni san ukhein kayon baren Yisasi ma sein baya iniren béin auná mun uanten mino. <sup>15</sup>\* Auná mun uantiyákan béis máa sen betin tiameí, “Tiretí ankan nan ena vanta kayo ano funtákein avúavá ana varan banta kéká ino sen inino van in kayo ono. Máa tin kéká ompo Tiyarafenu ano saretí ankan aúpin má ineinefin má aúpá ma vain danasinta fe afová ukhen mino. Banasi ano ma kama uron ukhein daná ino ma sen iné iyain mai yaná ano Tiyarafenu avorá namu uron ukhen mino.

<sup>16</sup>\*“Man baya vá sakhanampa vanta kayoi vaya vá ano eriyan baren monó non péantan banta Yonini yamúi me kanaí uvíkan mai rákéi Tiyarafenui yafisin pintena kama vaya sian dákó iyákan kokhon mano maifin umperano van ákona iyan mino. <sup>17</sup>\*Inaru vá bara vá tesosen o afeyoranten mifo Tiyarafenui man baya maen titó máa ída afeyoranten mino.

*Umeín Avúavá Ano Ma Vanasi  
Aunan Namu Uanté Iyain Baya Ino  
(Matiu 19:1-12; Maki 10:1-12)*

<sup>18</sup> Yisasi ena vaya máa sen tiameí, “Mana vanta ano ma ve aná me ifá en ma ena nanin ma o varanten maen mai vanta ano famúku avúavái inten mino. Inká mana vanta ano ma ifá uantan nanin ma o varanten maen mai vanta vá ano famúku avúavái inten mino.”

*Moní Banta Vá Rasarusin Mái  
Vaya Ino*

<sup>19</sup> Máa siren Yisasi ena vaya máa sen tiameí, “Pefá mana moní banta váken mai vanta ano kama uron ukhein naráré au anamun uren báken mai vanta ano kama yunan mana minó damú niyaren mino. <sup>20</sup> Máa tiyákan mai moní banta amá onará mana ona ída van namon mana en paerí ukhein

banta Rasarusin ne sin aviren mo asemádan báken <sup>21</sup> mai moní bantai yunan nan takhokáké ma yunan antan karúdan ona adé ma eravein nano van iyákan iyan kayo ano yere veni namon me arúniyan mino.

<sup>22</sup> “Máa tiyaren maná damú ona i van banta fúbíkan enisori kayo ano e aviren Abaraamun má mo kain bákan inká moní banta vá dere fúbin mo masien mino. <sup>23</sup> Masí uran mai moní banta ano furin nanin bantai varufin aí bá beraifin má báken dan mun onan Abaraamu nenta suron bákan Rasarusi véin má baren mino. <sup>24</sup> Bákán mai moní banta ano máa sen oovaremí, ‘Tifóe Abaraamu oe, éi sen nan arunan ureya Rasarusin tiantesin ná mana ayamú máa non daaren tima fintá me kaú dantin iyon usintano. Para vara seyo, kákan irafin mi vákun tufá ira síriyá uno.’

<sup>25</sup> “Máa síkan Abaraamu evaránen béis tiameí, ‘Tanin noe, ovare vá me ineno. Éi ma fa vákeya éi kama yanásinta variyan nan maen Rasarusi namu yanásinta mantaren mifo saréa ma varufin béis kamaen kuseñ bákaya inká éi aí bá beraifin má ba ono. <sup>26</sup> Ba ompo ena yaná mai sirenín má tetin má aúbaná mana kákán on ban mino. Máa tukhein nan mi ma ufá ma vain kéká ano mai ma vaona ufá orono van inten mifo vetí ída kanaén orintin maen inká mai u fáké ída kanaén ma ufá é dantin inten mino.’

<sup>27</sup> “Máa síkan moní banta ano evaránen béis tiameí, ‘Tifóe oe, máa ma ukhantiya éi kanaísá eyá Rasarusin tiantesin ná te sífóen amápin oriven ná <sup>28</sup> béis ano se sífá tiváe ma yan manápá bain mo ákonaen tiamtintin ná betíi avúavá maman puntáden ná ma ma sí bá beraifin má baruna varufin ída vá erino.’

<sup>29</sup> “Máa síkan Abaraamu evaránen béis tiameí, ‘Mosesin má sakhanampa vanta kayoi vaya

\* **16:15:** Mat 23:28; Ruk 18:9-14    \* **16:16:** Mat 11:12-13    \* **16:17:** Mat 5:18

vá betimpin ban mifo áesin ná mai ma sikhein baya vá inino.'

<sup>30</sup> "Máa síkan mai moní banta ano máa semí, 'Tifóe Abaraamu oe, mai ída kanaí inten mifo mana furin banta ano ma masí pinté e manten oren ma vetin mo siamintin ma iniren mai anan betí ará baeranten mino."

<sup>31</sup> "Máa síkan Abaraamu véin tiamemí, 'Mosesin má sakhanampa vanta kayoi vaya vá ma ída intinti mae mai ifasá ono. Púkein banta ano yere ma masí pinté e manten betin ma mo siamintin maen mai vaya vá dere ída ininten mino.'"

## 17

*Umeín Avúava San Ma Yafíken Ban Baya Ino*

(Matiu 18:6-7, 21-22; Maki 9:42)

<sup>1</sup> Yisasi vei eyo iyampon kayo máa sen tiamemí, "Ara ara yaná afoká intin banasi ano mai yanáká eraven ankamen umeí inten mifo mai yanasinta ma maman dákó inain nanin banta van mi sirunken mino. <sup>2</sup> Máan tiyaré intin mai vanta ano ma mamá dan nain danáká iyampon arará kayo finté mana ano umeí ukharé intin ínaiimpáké béis moékan uman baran nafo véin amempin kákán konkamú onámaná ma kureya karúdesin un nompin aravintin maen mai ano anan kanaí inten mino. <sup>3</sup> \*Máan tinten mifo saretí aurásá dafiseno.

Tirétin afá aváeyan mano ma umeí inti vá bén akóna e siamesin ná bei avúavá maman puntarano. Bei avúavá ma maman puntáden ma ará baeranti vá beni ume ampiantano."

<sup>4</sup> Béis ma yan manápá ifo afápá kan un kádan dádá ma mana vayában ma umeí uantáden ma inká dan manápá ifo afápá kan un kádan dádá ma vei ovaránen me sirun noe sé uno ma sinti vá beni ume ampiantano."

*Yisasi Ma Mumunan In Avúava San Tiamein Baya Ino*

<sup>5</sup> Máa síkan baya varen orin banta kayo ano Bafan máa sen tiamemí, "Éi sétisi mumunan asotú usintesin mo kákaní ino."

<sup>6</sup> \*Máa síkan Bafan mano evaránen betin máa sen tiamemí, "Tiretií mumunan mano ma mastati aran an den ma sitó mumunan ma vanti mae kasaé mana yaa ana van tiyáke arúbá e yare un nompin o ampan mono ma sesin maen eni vaya ininten mino."

*Yisasi Ma Mana Yoran Bantará O Sian Baéádan Baya Ino*

<sup>7</sup> Máa siren Yisasi ena vaya máa sen tiamemí, "Tiretií ankan pinté mana ano ma ei yoran banta siantesin ma mo vará ápomiyá inten nafi sipisipira sá dafisiyaren ná erinten nafi mai kanaísá eyá 'aine e khumame yunan nano' sinte fono. <sup>8</sup> Ída ino. Kákán banta ano vei yoran banta van máan mi sintemí, 'Tenti yunan tamádareya ei kama aúi daná ure vá dunan puntádesí ten nare naréku vá éi ínaiimpásá nanon,' tinten mino. <sup>9</sup> Kákán banta ano kaná bei yoran banta ano ma véin oo yaiyein nan tuusu siantanten nafino. Ída uron mino. <sup>10</sup> Máan tukhein nan mi sretí ankan ma Tiyarafenu ano amin nain doran ma oo yaiye yódanteya máan ná teno, 'Téi ída kama yoran bantan bákéi sen ma simikhein doran mi yoré uno,' vá teno.

*Yisasi Ano Ma Siyan Míkan Amon Daná Áí Ma Vain Banta Kéká Ma Ayofein Baya Ino*

<sup>11</sup> Yisasi Yerusalemí orono siren oriyaren Sameriá bara vá Karirí bara vái aifin oren mino.

<sup>12</sup> Oriyaren mana varurá ma oriyain má tiyan míkan banta maen amon dana aí pákokhein kéká ano mai aasá Yisasin má

e fóke náke uven nentá e mantaven<sup>13</sup>\* avádóden oovaren temí, “Kákán banta Yisasi oe, setin nan arunan usintano.”

<sup>14</sup>\*Máa síkán Yisasi vetí ankan oniyáken máa sen tiameémí, “Tiretí ore vá monó doran banta kékásá tireti au mo aní ono,” síkán betí ankan oriyákan mai amon dana aí ma varé ein kípen mino.

<sup>15</sup> Betí ankan pinté mana vanta ano onákan be au kama iyaimpin béisí ovaránen Yisasi vaípá eriyáken oovararen Tiyarafenu aví danielen mino. <sup>16</sup> Mai vanta ano Yisasi vaintá onóben mo aron durafúden ben arantampín mátimen tusu sianten mino. Mai veí Sameríá banta ino.

<sup>17</sup> Tusu siantiyákan mai vanta Yisasi oniyan temí, “Tiyan míkán bantan ayofé uno seruna ifo yan manápá ifo afápá kamí kamí un kádan banta ano intesá uvi fono. <sup>18</sup> Ídá ena vanta vá erin ná ma ena anan banta ano veyáká aná me Tiyarafenu aví danielen ná tusu siantian nafino.” <sup>19</sup> Máa siren Yisasi mai vanta siamemí, “Mante orono. Eni mumunan mano éin ayofen mino.”

### *Tiyarafenu Yafisin Ma Erinaí Pákena Vaya Ino*

(Matiu 24:23-28, 37-41)

<sup>20</sup> Maná damú Farasisi kéká ano Yisasin máa sen inaemí, “Inte yamusá Tiyarafenu yafisin erinten nafino.” Síkán Yisasi evaránen betín tiameémí, “Tiyarafenu yafisin ma erin nain ída mana aní daná ma afoká einí intin banasi ano auu fóké onanten mino. <sup>21</sup> Máián tukhantín ída mana nanin banta ano siyáken ‘onano masi mafá bane’ áa ‘mesápá bane’ sinten mino. Para vara seyo, Tiyarafenu yafisin ákona fefái siretimpín ban mino.”

<sup>22</sup> Máa siren Yisasi vei eyo iyampón kayo siamemí, “Ínaiimpá

ma yamú afoká inti mae Banta Anin onano van in nompo ída onan nono. <sup>23</sup>\*Ída onan nompo vanta kéká ano siamiyan ma ‘orive onano mesápá bane’ áa ‘erive onano masi mafá bane’ sinten mifo ída vá mai vaya ánaín dakháan more mere ono. <sup>24</sup>Afayuí ma iyain minó ayompín mo fanuse me fanuse iyain bantín mi Banta Anin ma erin nain mai afayu an mi yantin minó nanin banta anon onanten mino. <sup>25</sup> Onanten mifo véi kokhon uman nare varen ai o yosintin maen máí damú ma vareín nain nanin banta ano ven oyan aminten mino.

<sup>26</sup> “Noani yamú ma afoká ukhá ein avúavá an dakhein avúavá anan Banta Anin ma erin nain damú afoká inten mino. <sup>27</sup> Noani yamú maen banasi ano omasí iyáken dunan ben amin ben amin iyáken anasi varampin nafi vanta varampin tasu sasu en oriyákan Noa votifin umperiyain má kákán á den non taaren minó daná dararan ufuren puren mino.

<sup>28</sup>\*“Rotini yamú banasi ano máan avúavasí anan en omasí iyáken dunan ben amin ben amin iyáken minó daná miyaní in maran iyan dunan doriyan má uvaren dararen iyaren mino.

<sup>29</sup> Máián tiyákan mi Roti ma Sodomú baru me ampen oriyain má anan inaru fáké ira vá ira khiyain onámáná bá ano á ma ereinien minó danasinta irakhen kauren mino.

<sup>30</sup> “Máián tukhain mi vantin Banta Anin ma erin nain damú mai avúavá anan afoká inten mino. <sup>31</sup>\*Mái damú ma mana vanta ano ve amá daró ma un baren maen bei kama yanásinta ma má naumpín baré intin ída vá eravuvén barano van ino. Máián mana ená mana vanta ano ma yungan anafá ovaré inten maen ída vá evaránen mana yaná

\* **17:14:** Riv 14:2-3; Mat 8:3-4    \* **17:23:** Mak 13:21; Ruk 21:8    \* **17:28:** Esé 18:20; 19:25  
\* **17:31:** Mat 24:17-18    \* **17:32:** Esé 19:17, 26

barano van mápin orino.<sup>32</sup>\*Rotin aná amaniná ma afoká ukhá ein danasará ovare me ineno.<sup>33</sup>\*Be aunan ma fákán nain nanin bantai aunan mano o afeyoranten mifo ve aunan ma ampian kain nain nanin bantai aunan para vanten mino.<sup>34</sup>Téi siren tiamé uno. Banta Anin mano ma erin nain inuran kankanan mano ma mana sakhoépin bakharé intin maen Tiyarafenu ano mana aviáren mana ifá inten mino.<sup>35-36</sup>Máan mana en mi kankanan nanin mano ma uviti yasamiyare intin maen Tiyarafenu ano mana nanin aviáren mana me ifá inten mino.”\*

<sup>37</sup>Máa síkan bei eyo iyampon kayo ano mai vaya inirena máa sen Yisasi inaemí, “Bafan noe, mai yanásinta intefasá afoká inten nafino.” Síkan béis evaránen betin tiamemí, “Purin danasinta au ma asenteintai sumpan kayo ano ákané iyan mino. Máan ma inti afováisá ono Tiyarafenu yaimin damú afoká inten mino.”

## 18

### *Baré Nanin Mano Ma Ínanen Inaein Baya Ino*

<sup>1</sup>\*Máa siren Yisasi vei eyo iyampon kayo van ída avesaraen ena ena amúkino van ovaeran baya fóké betin aní iyan tiamemí,<sup>2</sup>“Maná varurá mana vaya yaimin banta váken béis ída Tiyarafenu van peren inká banasi oman kaumpan iyaren mino.<sup>3</sup>Máan tiyákan mai varufin mana varé nanin báken ena ena yamú mai nanin mano mai ma vaya yaimin banta vaípá oren mo yuvunen máa siyamí, ‘Tesi namuro ano séin uman timeno van iyá umps éi siyae mai uman puntátintano.’

\* 17:33: Ruk 9:24 \* 17:35-36: Manáa vompon dókifin ena vaya ves 36 fin asotú ukhen mino:  
36 Kankánan banta ano ma yungan anafin baré intin maen Tiyarafenu mana aviáren mana ifá inten mino. \* 18:1: Kor 4:2; 1Te 5:17 \* 18:12: Ais 58:1-4; Mat 23:23 \* 18:13: Íbo 51:1

<sup>4</sup>Máa siyákan inian aniana iyaren mifo ínaimpáké beyan ovaren me inen temí, ‘Téi ída Tiyarafenu van periyáké banasi oman kaumpan iyá umps<sup>5</sup> ma varé nanin mano ma me yuvunen oren ein nan mi véini umanaya urékun maen béis ma eren oren iyain mai ída sivesara simino van munoo.’

<sup>6</sup>Máa siren mairá Bafan mano semí, “Namu yaimin banta ano inte vayá tikhen nafi mai vá tiretí ineno.<sup>7</sup>Tiyarafenu ano ma veyan iyákein nanin banta ano ma ena ena inuran má bayan má ma ifí den oriyan bantin maen betin ída ayain ná oyan amiyan maná bantten nafino.<sup>8</sup>Téi siren tiamé uno. Béis ainen betin ayainten mifo Banta Anin ma erinten maen mumunán nanin banta ma varará bantin ná e onanten nafino.”

### *Farasisi Vanta Vá Takisi Varan Banta Vái Ovaeran Baya Ino*

<sup>9</sup>Manáa ano ma vetiyan nan tetí puntáké uno siren ma ena kéka san ída funtáken ne ma siyain nan Yisasi ma vaya ovaéden tiamen mino.<sup>10</sup>“Kankánan banta ano amúkono van monó namumpin oren mino. Mana maen Farasisi vanta ifo ena takisi varan banta ino.<sup>11</sup>Farasisi vanta ano o mantaven beyan nan máa sen amúkemí, ‘Tiyarafenu oe, séi ída manáa vanta an dé maé umoyan iyá namu avúávasí iyá inká ena vanta aná baré nō maé inká téi ída má ma sakisi varan banta ma e vain an dakheruna van mi éin tusu siantiyá uno.<sup>12</sup>\*Maná uvikifin kan baya mi séi yungan turiyáké maé téi ma varé iyaruna yanásinta minó tiyan míkan pintan daídé mana masiman éin amé iyá uno.’

<sup>13</sup>\*“Máa siyákan takisi varan banta ano nentá e mantaven inarufá ída mun auu máan onan

mátimen be akorá ankamiyáken máa semí, ‘Tiyarafenu oe, séi ume vanta umpo arunará usintano.’

<sup>14</sup>\*Máa siren Yisasi semí, “Téi sireti ankan tiámé uno. Mai ma sakisi varan banta ma ve amápin orein mai véi Tiyarafenu avorá puntákein bantan oren mifo Fara-sisi vanta ída ino. Máan tukhantin betiyan ma maman daní inain kéká Tiyarafenu ano vetin aví maman bara finí inten mifo vetiyan ma vara finí inain kéká Tiyarafenu ano vetin aví maman daní inten mino.”

*Yisasi Ma Arará Iyampon Arin-tan Avu Uantein Baya Ino*

(Matiu 19:13-15; Maki 10:13-16)

<sup>15</sup> Yisasi avu amino van banni ano véi vaintá iyampon arará kayo aviren ore ore íkan beni eyo iyampon kayo ano óden mai nanin banta ákonæn asen mino. <sup>16</sup> Asiyaimpin Yisasi mai iyampon kayo arákán be vaintá erivin máa semí, “Arará iyampon kayoi aa ída vá iyáonte áesin ná téi varunafá erino. Para vara seyo, ma kéká an ma yákein nanin bantai nan Tiyarafenui yafisin baru van mino. <sup>17</sup>\*Téi fura uron mi sé tireti ankan tiámé uno. Mana nanin banta ano ma ída ma iyampon arará kayo an den ma Tiyarafenui yafisin baru varanten maen mai kéká ano ída kanaien mai varufin ódinten mino.”

*Kokhon Ona Ma Vain Bantai Vaya Ino*

(Matiu 19:16-30; Maki 10:17-31)

<sup>18</sup>\*Maná ánon banta ano Yisasin máa sen inaemí, “Kama aru soe, séi intesá urerá para ma ayun ban oriyan ban aunan barante rafuno.”

<sup>19</sup> Máa síkan Yisasi evaránen béin tiámemí, “Pará te nan kama ukha ono siya fono. Ída mana ano kama ukhen mifo Tiyarafenu veya

anan kama ukhen mino. <sup>20</sup> Éi man baya kayo afová ukha ono.

‘Ída vá ena ana safi, ena avafun nafi vare nono.’

‘Ída vá ena aruan purono.’

‘Ída vá umoyan ono.’  
Tireti ankan ída vá ena nanin banta kampun tire kó tiantano.’

Tireti anóe afóen aránaó bákeya vá betin oo yaiyono.’” Eks 20:12-16; Diu 5:16-20

<sup>21</sup> Máa síkan mai ánon banta ano semí, “Téi sirará iyampon tákéi mai man baya kayo minó dakhaké uno.”

<sup>22</sup> Máa síkan Yisasi mai vaya inireni mai ánon banta siamemí, “Maná yana san éi fara o afasi ukha ono. E ina yanásinta minó sarí ureya minó daná ma i vain nanin banta ameno. Máan ma inte éi inarufá kama yanásinta khaesin banten mino. Máan ture éi ere sen tíngin bákurono.”

<sup>23</sup> Máa síkan mai ánon banta ano kokhon daná dákaren pasin mai vaya iníkan ará uman den mino.

<sup>24</sup> Uman den iniyaimpin Yisasi véin oniyáken máa semí, “Moní bá kokhon ona vá ma yan bain kéká ano ma Tiyarafenui yafisin aúpin ma orin uman dakhen mino.

<sup>25</sup> Pura ino, kameri ano ma ufi aimpin ma ódin mai uman dakhen mifo kokhon ona ma yákein kéká ano ma Tiyarafenui yafisin barufin ma ódin mai moéken uman mi yakhen mino.”

<sup>26</sup> Máa síkan mai vaya ma inein kéká ano semí, “Máan ma ukhantin maen mai iye ná Tiyarafenu ano kanaien aviranten nafino.”

<sup>27</sup> Máa sen ina íkan Yisasi semí, “Banta ano ma ída kanaien bararen daná Tiyarafenu ano kanaien baranten mino.”

<sup>28</sup> Máa síkan Pita véin tiámemí, “Éin ánain bákurono van pefái setisi minó danasinta me ampikhé uno.”

\* 18:14: Mat 23:12 \* 18:17: Mat 18:3 \*

18:18: Ruk 10:25

29-30 Máa síkan Yisasi máa sen betin tiamemí, “Téi fura sирé tiretí ankan tiamiyá uno. Tiyarafenu yafisin baru van ma iniren ma vei varu vá be aná akhafana vá be afá aváe má be anoifon má ma me ampiren ma orin nain kéká ano ma ma varará báken ma yantin ban nain danasinta esantaren moékakhein danasintan Tiyarafenu ano aminten mifo ínaimpá ma yamú afoká intin maen ayun ma fara van oriyan ban aunan baranten mino.”

*Yisasi Veyan Ma Fúaren E Man-  
tan Nain Nan Ma Kanú Manaú  
Dádasí En Tein Baya Ino*

(Matiu 20:17-19; Maki 10:32-34)

31 \*Máa siren Yisasi vei sirantan kan orun kádan (12) eyo iyampon kayo aviren mo kaúden máa sen tiamemí, “Pefá ma sakhanampa vanta kayo ano ma Banta Anín amaniná afoká inain dana san ma vompon uvamádan ma varé ein taréa Yerusearemí orétfékuñ maen pura sen afoká inten mino.

32 \*Afoká ma intin maen banta kayo ano véin pákaan ena anan nanin banta kéká amintin mai kéká ano véin máká maáká en oyampá bayá siyan dafiyó ankáden auufen akhare siren aruan puriten mino. 33 Púkaren maen kanú manaú damusí intin béis evaránen orun mantanten mino.”

34 \*Máa síkan bei eyo iyampon kayo ano mai vayai ana ída uron afová en mino. Mai vaya ana ano aúpá bákan inte vará béis siyan nafi mai vetí ída afová en mino.

*Yisasi Ano Moni San Ma  
Inantín Auu Yufukukhein Banta  
Auu Evaránen Kama Uantein Baya  
Ino*

(Matiu 20:29-34; Maki 10:46-52)

35 Yisasi ma Yerikó barurá e unen oriyan maen mana auu yufukukhein banta ano aa akhempá kumanten banasi vaípá moni san inantiyaren mino.

\* 18:31: Ruk 24:44 \* 18:32: Ruk 9:22, 44

36 Máan tiyaren iníkan banasi ano mai aasá tisuvo sen entaviyaimpin náisá iyan nafino sen inaen mino.

37 Ina íkan mai ma oriyá ein kéká ano véin tiamemí, “Nasaretí banta Yisasin entaviyán mino.”

38 Máa síkan mai vanta ano mai vaya iniyáken oovaren temí, “Devitin anin Yisasi oe, éi se nan arunan usintano.”

39 Máa síkan an ma oriyá ein nanin banta ano mai vanta asiyan temí, “E avaya fákano,” síkan béis moékentá oovaren temí, “Devitin anin noe, séin nan arunan usintano.”

40 Máa síkan Yisasi o mantaven temí, “Mai vanta avire mará ereno”, síkan aviren ádé meran Yisasi véin inaemí, 41 “Éi sen nan náisá uantano vará iniya fono,” síkan mai vanta ano evaránen temí, “Bafan noe, séi suu mábé onano van muno.”

42 Síkan Yisasi véin tiamemí, “Eni mumunan manon éin ayofein auu maran nono.” 43 Máa siyain má

ana mai vanta auu kama uvíkan Yisasin ánaín bákuren oriyan Tiyarafenu aví daní iyákan minó nanin banta ano mai ódären betin má dere Tiyarafenu aví daníen mino.

## 19

*Sakiasi Sakisi Varan Bantai  
Vaya Ino*

1 Yisasi Yerikó barufin ódiaren mai varu aúbaná orikhein aa yakhafen oren mino.

2 Oriyákan mai varufin mana Sakiasin ne sin banta váken béis sakisi varan banta kayoi ánon banta van maen béis kokhon moní kain baren mino.

3 Bákén Yisasi inté ukhein bantá ban nafino siren béis onanton en mifo véi asíka vanta váken kokhon nanin bantafin ída kanaén béis onan nainien mino.

4 Máan tiyaimpin mai ma Yisasi oriyain aasá béis afová iyáken ainen tavaen orein mano mana fiki yaa ana aa akhempá baré íkan béis onano

\* 18:34: Mak 9:32

van maifin óden mino. <sup>5</sup> Un baré íkan Yisasi mai yaa anafin o mantaven mun oniyáken béis máa sen tiememí, “Sakiasi oe, éi aine erano saréa anan en amápin téi o vanté uno.” <sup>6</sup> Máa síkan béis ainen mai yaa ana finté eraven kákán amusin iyáken Yisasin e aviren be amápin oren mino.

<sup>7</sup>\* Oriyákan kokhon nanin banta ano ódaren betí anan iyan temí, “Béis ume vanta amápin mi oriyan mino.”

<sup>8</sup>\* O vákan Sakiasi e mantaven Bafan máa sen tiememí, “Bafan noe, minó daná ma se sina vain taréon aúban daídé maé ída ma minó daná bain nanin banta kayo amiyáké maé inká intéa nanin banta íná mana yaná kampun tirerá mantaré onte rafu. Mai séi evaráné kamí kamí dádá mairá kaúdé amidú onté uno.”

<sup>9</sup>\* Máa síkan Yisasi véin tiememí, “Taréa anan Tiyarafenu ano ma e antun aviren mino. Mai fara vara seyo, ma vanta vá dere Abaraamun anin mino. <sup>10</sup>\* Mai ma afeyóká ein nanin banta kayo yosiré evaráné avirano van mi Banta Anin mano erakhen mino.”

*Moní Ma Yafisin Banta Kayoi  
Ovaeran Baya Ino  
(Matiu 25:14-30)*

<sup>11</sup> Máa siyákan banasi ano ovaren me inen maen béis Yerusalemí adéi oriyain taréa anan Tiyarafenu yafisin baru afoká inten mino sen iniyákan Yisasi mana ovaeran baya siamen mino. <sup>12</sup> Béis máa semí, “Mana kin anin mano ena varafá orintin béis maman kiní urantí ovaráné erivé bei kékáká dafiseno van oren mino. <sup>13</sup> Oriyáken bei siyan míkan doran banta aran erikan mana tausen kina, mana tausen kina (K1,000) uariyan minó máa amiren béis máa sen betin tiememí, ‘Ma moní póké para yore oriya vasirá téi ovaráné ereno.’

<sup>14</sup> “Máa siren orivíkan bei mana varu rákena kayo ano véin inian namu uantáden ‘béis ída sétinti kiní ino van muno’ sen mo siamino siren manáa vanta kéká tiantan mai ma orikhein barufá oren mino.

<sup>15</sup> “Máa síkan betí vaya ída inin mai vanta maman kiní urákan béis ovaránen bei varurá eriven bei yoran banta kayo ma féfá moní amikharé ein kayo van nái máa aman monisá dóáden nafi siren béis onano van betin aren mino.”

<sup>16</sup> “Máa siren arákan mana vanta ano naré esé eren me máa semí, ‘Kákán banta oe, séi ano eni mana tausen kina fóké tiyan míkan tausen kinan aman moní dóan kaékun ban mino.’

<sup>17</sup>\* “Máa síkan bei kin mano evaránen béis tiememí, ‘Éi senti kama yoran bantan bai kama yorarí eono. Éi ma sító danáká ma kama yafisirí eonafá taréa séi ano éin maman kákán urékuya siyan míkan kákán baru máará dafisin nono.’

<sup>18</sup> “Máa sirákan ena yoran banta ano mairá eriven temí, ‘Kákán banta oe, eni tausen kina fóké téi yan manápá tausen kinan aman moní dóan kaékun ban mino.’

<sup>19</sup> “Máa síkan kin mano evaránen béis tiememí, ‘Éi yan manápá kákán barurasá dafiseno.’

<sup>20</sup> “Máa sirákan ena yoran banta ano mairá eriven temí, ‘Kákán banta oe, masina eni mana tausen kina moní davaráefin úkuré kaékun baré íká baré eré uno.

<sup>21</sup> Para vara seyo, séi ma en oniyaruna éi sinko vanta vákeya inká ena vanta ano ma kain baré ein daná éi kasae varyákeya ena vanta ano ma yoká ein dunan éi kasae unafé iya ono. Máan ma iyaona van mi séi en nan peré uno.’

<sup>22</sup> “Máa síkan kin mano evaránen béis tiememí, ‘Éi namu yoran banta uron mono. En

\* **19:7:** Ruk 15:2   \* **19:8:** Eks 22:1; Nam 5:6-7   \* **19:9:** Ruk 13:16; Apo 16:31   \* **19:10:** Ruk 15:4; Yon 3:17; 1Ti 1:15   \* **19:17:** Ruk 16:10

avayarái éin daimonté uno. Éi afová ukhen ná téi sinko vanta váké téi kasaé ena vanta ina yaná bariyá inká ena ano ma yoká ein dunan kasaé o unafiyaré uno. <sup>23</sup> Kasaé o unafiyaruna ifo faraé tireyá tenti moní ída moní ma kain namumpin kaen nan baré irá téi ma ovaráné erivé mai moní ano ma yóádein aman má mai moní bá evare rafuno.’

<sup>24</sup> “Máa siren mai ma ádé mantakhá ein kayo van temí, ‘Béin pintena mai moní dafireya mai ma siyan mikan tausen kina ma kain bain banta ameno.’

<sup>25</sup> “Máa síkan betí ankan evaránen béin tiameemí, ‘Kákan banta oe, béis feáf tiyan mikan tausen kina manten mino.’

<sup>26</sup> \*“Máa síkan béis evaránen betín tiameemí, ‘Téi saretí ankan tiámé uno. Kokhon danasinta ma yantin baréin nain nanin bantan móeken aminten mino. Inká ída ma yakáin nain kéká ina mai sanáa ma yaká intin mai vá deren minó baranten mino. <sup>27</sup> Máan tinten mifo mai ma senti namuro kayo ano ma séi nan ída vá betí ankani kiní ino van ma sein kéká avireya mará me kaúde sen tivorá arono.’”

*Yisasi Ma Kin An Daven  
Yerusaremí Ódein Baya Ino  
(Matiu 21:1-11; Maki 11:1-11;  
Yoni 12:12-19)*

<sup>28</sup> Yisasi mai ovaeran baya siamíden mai oyampáké Yerusaremí ma ódikhen aintá ben nare óden mino. <sup>29</sup> Ódiyaren Betfásí baru vá Betaní baru vá ádé bain anu Orifi se sin dontá ódiven bei eyo iyampon kanan tiantiyan temí, <sup>30</sup> “Tiré kanan mesan barurá oriveya mai varufin un pébe onesin ma mana ano ída amaniná kumantein donkin ma anan kuádantin banti mai vá útufe ereno. <sup>31</sup> Máan tesin ma mana ano ma siré kanan ina iyan ma fara mai anan útufiya fono ma sintiya

vá Bafan mano veni yoran ban tí uno vá te véin evaráne siameno.”

<sup>32</sup> Máa síkan mai ma siantan orein bantá kan mano o onan mai ma Yisasi siameiní ukharen mino. <sup>33</sup> Máan tukharein mikanan mai donkin anan útufiyarein mai donkin afóe ano mikanan máa sen inaemí, “Tiré kanan pará mai donkin anan útufiya rafono.”

<sup>34</sup> Máa síkan mikanan mano evaránen betín tiameemí, “Bafan mano veni yoran bamí sisintá uno.”

<sup>35</sup> Máa siren mai donkin baren Yisasi vaintá mo kaúden betí au anamun póké mai donkin amaniná uvíden Yisasin ayain mai yaró un kumanen mino. <sup>36</sup> Béi mai donkin ané un kumamen oriyákan banasi ano ayá au anamun kayo yavádiyan aasá uvisen oren mino.

<sup>37</sup> Orifi se sin Anu ma me ampiren araviyain aa ádé béis erivíkan ben ma vákuren noin nanin banta ano véi ma enará ukhein danasinta ma afoká iyan ma oniyará ein nan avadóden oovararen Tiyarafenu aví daní iyáken amusin en mino.

<sup>38</sup> \*Máan tiyáken beti oovaren temí, “Bafan avíká ma erikhein kin ná Tiyarafenu ano avábá ino.

*Íbo 118:26*  
Tiyarafenu ano seti vanasi ará kusin timen mifo véin avisá daní ótifano.”

<sup>39</sup> Máa siyákan manáa Farsiisi kayo ano mai nanin bantafin baren betí ankan Yisasin máa sen tiameemí, “Aru soe, ei eyo iyampon kayo asesin ída máan baya kayo sino.”

<sup>40</sup> Máa síkan Yisasi evaránen betí ankan máa sen tiameemí, “Téi saretin tiameemí uno. Ma nanin banta ano ma ve oo fákaren ma ída vaya sintin maen ma onámaná kayo ano kasaen oovararen Tiyarafenu aví daní inten mino.”

*Yisasi Ma Yerusaremí Ban Ifí  
Dein Baya Ino*

\* **19:26:** Mat 13:12; Ruk 8:18    \* **19:38:** Ruk 2:14

<sup>41</sup> Máa siren béis Yerusaremí adé oriven mai varu oniyáken ifí daanten mino. <sup>42</sup> Ifí daren temí, “Yerusaremi oe, saréa ma éin ará kusin daná ma varen me amin afová ono van téi inikhé umpo éi mai yaná afová e varé esin Tiyarafenu ano éin ará kusin amin nainten mifo mai yaná ano saréa saretin avorá aúpasí ukhein ída onan nono. <sup>43</sup> Ineno. Maná damú afoká intin maen eni namuro kayo ano eni yafu akhempá bara khaen eúkuren maen minó ankinafa yafisinten mino. <sup>44</sup> \*Máan turen maen éin ankaman barakuádanti varafin eravesin éin má e akhafana vá maifin ma váin nain dere vá aruren namu uantanten mino. Máan turantin maen mana onámaná ano ída ena onámaná daró banten mino. Mai farava máan tinten na ino. Tiyarafenu ano ma éin aya ono van ma éi vaipá erein damú éi ída kamaeya afová ukharé esin mino.”

*Yisasi Ma Kákan Monó Namun  
Pinte Ma Minó Daná Sarín Banta  
Kayo Yo Siantein Baya Ino*

(Matiu 21:12-17; Maki 11:15-19;  
Yoni 2:13-22)

<sup>45</sup> Máa siren Yisasi monó namun dafufin ódiven maifin ma sarí iyá ein danasinta kayo yo maman karúdiyan tiantan barufá araven mino. <sup>46</sup> Máan turen betin tiememí, “Tiyarafenui vompon dóki ano máan mi sikhemí, ‘Tenti má maen mai amúkin namun’” *Ais 56:7*

ne sikhein mifo sretí ano maman ‘umoyan banta kayoi má an diya ono.’ *Yer 7:11*

<sup>47</sup> \*Máan turen béis ena ena yamú monó namumpin oriven maen monó banta sian banasi amiyákan monó ánon banta kéká bá man baya ma afová ukhein banta kéká bá banasirá ma ánoní ukhein banta kayo vá ano Yisasin ma aruan purin aa van dosiyaren

mino. <sup>48</sup> Máan tiyákan banasi ano ákonáen béisí vaya iniyan pasen béisí ma arin aa vetí ankan ída kanaíen dosen mino.

## 20

*Yisasini Ákona Van Ma Monó  
Átaru Namuntá Ma Ánoni Ukhein  
Banta Kéká Ano Ma Inaein Baya  
Ino*

(Matiu 21:23-27; Maki 11:27-33)

<sup>1</sup> Maná damú Yisasi monó namun dafufin kama vaya sian banasi amiyákan monó ánon banta kéká bá man baya ma afová ukhein banta kéká bá banasii ánon banta kayo vá ano véi vaintá eren mino.

<sup>2</sup> Eriven betí ankan máa sen béisí tiememí, “Eí setin tisimeno. Nái ákonarasá mai yanasí iya fono. Iye anó mai ákona éin amikha fono.”

<sup>3</sup> Máa síkan béisí evaránen betí ankan tiememí, “Téin má deren tiretin ina onté umpo anona vá téin tisimeno. <sup>4</sup> Yoni ma vanasi monó non péantiyaré ein mai Tiyarafenui ákonarasá péantiyan nafi áa varará bantai ákonara safino.”

<sup>5</sup> Máa síkan betiyan ten orera emí, “Inaru fáke na ino ma sé tifékuun maen mai fará ída mairá mumunan iya rafon sinten mino. <sup>6</sup> Inká barará banta ina ino ma sé tifékuun maen banasi ano Yonin nan sakhanampa vanta ino sen mumunan ukheintá tetin onámaná tinkaminten mino.”

<sup>7</sup> Máa sen inireñ betí ankan béisí tiememí, “Mai ma Yoni mantaré ein ákona mai setí ída afová ukhé tiféuno.”

<sup>8</sup> Máa síkan Yisasi evaránen betin tiememí, “Iye anó ákona séin timikhará ma yorará iya rafu, mai séin má dere ída sretin tiamenté uno.”

*Uyaini Yunan Anaará Ma Namu  
Yafisirí in Banta Kéká Pákena Ma  
Sian Ovaéádan Baya Ino*

(Matiu 21:33-46; Maki 12:1-12)

\* 19:44: Ruk 21:6    \* 19:47: Ruk 21:37    \*

20:9: Ais 5:1

<sup>9</sup> \*Yisasi mana vaya máa sen banasi sian baéan amemí, “Mana vanta ano uvaini yunan ana yódákaren dunan ma yoran banta kayo van mairá dafíken dóden manáa uvaini aran betí miyan do variyan dunan afóen nina khaono siren ena varufá ayáká bano van oren mino. <sup>10</sup> Ovaren uvaini aran ma kúdin damusí íkan maifin ma yafikein kayo ano manáa kúduan amino van béis iniren mana vei yoran banta siantan mai yafisin banta kayo vaípá onóbíkan mai kayo ano mai yoran banta ankáden tiantan ída mana yaná baran na fara evaránen oren mino. <sup>11</sup> Oríkan mai yunan ana afóe ano ena yoran banta siantákan betí baípá orin mai kéká ano mai vanta vá dere namu ankamirí uren evaránen tiantan para oren mino. <sup>12</sup> Oriyaimpin béis kanú manaú dádasí en ena yoran banta vá tiantan oríkan mai kéká ano mai yoran banta namu arirí uren darifen dunan akhempá mo kharúden mino.

<sup>13</sup> “Máaón tiyaimpin mai uvaini yunan ana afóe ano semí, ‘Taráe séi intesá onte rafuno. Téi se sanin nan ma sinunu iyaruna fumara ma siantéku orintin maen mi vetí ankan kanaíen béis avaya ininten mino.’

<sup>14</sup> “Máa siren mai fumara siantan oríkan mai yafisin kéká ano mai fumara oniyan temí, ‘Béis anon be afóeni minó daná baranten mifo eresí béis arékuun púbintirá ma yunan ana setiyan bará tifano.’

<sup>15</sup> “Máa siren mai yunan ana fintena mai fumara yo yarifen akhempá morúden aruan puren mifo mai yunan ana afóe ano mai yafisin kéká náisá inten nafino. <sup>16</sup> Béis mai yafisin kéká me aruan púden maen mai yunan ana yafíon ena kékái aminten mino.” Máa síkan banasi ano ena kéká ma

amein baya iniren temí, “Béis ída vá máaón tino.”

<sup>17</sup> Máa síkan Yisasi yetin auufen kakháben inaemí, “Tiyarafenui vompon dókifin ma ma vaya uvamádan baini ana ano naíesá tikhen nafino.

“Má uvaran banta kayo ano ma yo maman karúdein onámaná ano maman má dádaimpin mana ákona onámanasí ukhen mino.” *Ibo 118:22*

<sup>18</sup>\*“Máaón tukhen mifo minó naniq banta ano ma mai onámaná daró ma eraven ankamíten maen morun ta finen titó titó inten mino. Inká mai onámaná ano ma mana nanin banta ané ma eravinten maen béis dasantan panten mino.”

<sup>19</sup> Máa siyákan man baya ma afová ukhein kéká bá monó ánon banta kéká bá ano mai ma ovaeran baya ma véi siyain ovaren me inin betin oyampá baya siyaimpin máí damú ana véin pákano van uvaen banasi van péden ifá en mino.

*Kamanin Ma Takisi Amin Baya Ino* (*Matiu 22:15-22; Maki 12:13-17*)

<sup>20</sup>\*Man baya ma afová ukhein kéká bá monó ánon banta kayoi ánon banta kéká bá ano Yisasi intá dafían ákona uven manáa afurin banta kayo siantákan mai vanta kayo ano fura sen Yisasini vaya iniyán mino sino van kam-puníen nóken Yisasi ma manáa vaya me avá dantí mai vayará béis pákaan ánon kamanin ayampin kaono siráken afuriyaren mino.

<sup>21</sup> Mai ma afurin kéká ano máa sen béis inaemí, “Aru soe, setí afová ukhé uno. Éi funtákein baya anan banasi siamiyákeya aví bain má ída ma aví bain kayo vá o éke e éke ureya manaí ukhein baya anan tiamiyáke mae fura vayafó anan Tiyarafenui avúavá tian dákó éiyá ono. <sup>22</sup> Máaón téiya ompo éi ma iniyona setí kanaísá erá moní

Sisan takisi amente rafuno áa ída fino.”

<sup>23</sup> Máa síkan betí ankan ma máká tiyain béis afová iyáken betin máa sen tiamemí, <sup>24</sup> “Mana moní aní irá onano. Iyen aman manon má aví basá mai moniká ban nafino,” síkan <sup>25</sup> betí ankan evaránen temí, “Sisan mino,” síkan béis vetin tiamemí, “Sisan nina yanásintá Sisan ná ame vá inká Tiyarafenu ina yanásá Tiyarafenun ná ameno.”

<sup>26</sup> Máa síkan betí ankan anú duren mai ma véi vanasifin tein bayará ída kanaén ben pákarí iyaimpin ída vaya sen mino.

### *Pükaren Ma E Mantaven Ábasuí Inain Baya Ino*

(Matiu 22:23-33; Maki 12:18-27)

<sup>27</sup> Sadyusi kayo finté manáá ano sen ma furiyain nanin banta ano ída evaránen orun mantanten ne ma siyain kayo ano Yisasi inaono van béis vaintá eren mino. <sup>28</sup>\* Eriyen mai kéká ano máa sen béis tiamemí, “Aru soe, Mosesi ano seti sina máa sen bompon dókifin uvantaren mino, ‘Mana vanta ano ma anasi mamákoren ma ída iyampon kain na ma mai vanta ano fúbintin ná be afá aváeyen pinté mana ano vá baré mamáken ná mai nanintá mai ma furein nina iyampon kaúantano.

<sup>29</sup> Pefá dan manápá ifo afápá kan un kádan anavádano ano varen esékena vanta ano anasi mamaren ída iyampon kain na fara furen mino. <sup>30</sup> Fúbin mai rákera ano mai varé mamaren máa mana en mino. <sup>31</sup> Máa turan kánú manaú banta ano yere mai varé mamaren osaní uvíkan mai máa yan manápá ifo afápá kan un kádan anavádano ano mai varé nanintá ída mana iyampon kain na máa mana en oriyen minó máa ano o furen mino. <sup>32</sup> Fúbíkan mai nanin má dere o furen mino. <sup>33</sup> O furen mifo mai nanin maen dan manápá ifo afápá kan un kádan anavádano anon mantaren mifo ínaimpá ma

furin nanin banta ma orun mantan nain damú béis iyen aná suron ná banten nafino.”

<sup>34</sup> Máa síkan Yisasi evaránen betin tiamemí, “Ma vararái vanasi ano ma ábasuín ban mino.

<sup>35</sup> Máa tukhen mifo funtákein nanin banta ma furiyain nan Tiyarafenu ano evaránen orun mantanten ne ma sikhein kayofin ábasuín ída vanten mino. <sup>36</sup> Mai farava ino. Tiyarafenu ano furin pintena vetin orun avian mantarantin maen béis akhafanaí uven ída furinton enisorí an daven para vanten mino. <sup>37</sup> Mai ma

sító daa ana ira khiyákan ma Mosesi ano Bafan araaren ma Éi Abaraamun má Aisakin má Yekopun mái Ayarafenu ono ma sikhein mano furin nanin bantai e mantan mi Mosesi ano setin aní ukhen mino. <sup>Eks 3:6</sup>

<sup>38</sup> Aní ukhen mifo Tiyarafenu maen ída furin nanin bantai Ayarafenu ifo véi maen ayun ma fa vain nanin bantai Ayarafenun bantin mi ven avorá minó nanin banta ano ayun para vanten mino.”

<sup>39</sup> Man bayá ma afová ukhein kayo finté manáá kéká ano mai ma Yisasi sein bayá inire béis máa sen tiamemí, “Aru soe, Éi kama vayan te ono.” <sup>40</sup> Máa siran banasi ano evaránen béis mana vaya inain nan peren mino.

### *Tiyarafenu Ano Ma Aní Ukhein Banta Mai Iyen Anin Nafino*

(Matiu 22:41-46; Maki 12:35-37)

<sup>41</sup> Máa tiyákan Yisasi máa sen banasi inaemí, “Tiyarafenu ano ma vei vanasi evaránen avirano van ma aní ukhá ein banta van banasi ayo faraé tiren ná Devitin anin mino siyan nafino. <sup>42</sup> Deviti veyantái Í Bompon dókifin tian pámán en mi,

“‘Bafan mano senti Bafan tiamiyáken,

“Ten tiyan kurompá kumante-sirá

\* **20:28:** Diu 25:5

43 eni namuro kayo maman  
en aránaópá kaé kun ná eni  
arantan kain karasisá ino.”  
*Ibo 110:1*

44 Tiretí onano. Deviti veyantái  
venan Bafan ne sen arakhan mifo  
mai vanta ano inté uákená ben  
animí inten nafino.”

*Yisasi Ma Au Khákán In Banta  
Kayo Van Ma Sein Baya Ino*

(Matiu 23:1-6; Maki 12:38-40;  
Ruku 11:37-54)

45 Máa siyan minó nanin banta  
ano Yisasini vaya iniyákan béis  
vei eyo iyampon kayo máa sen  
tiámemí, 46 “Man bayo ma afová  
ukhein banta kayo vará dafiseno.  
Betí ankan ayá au anamun uren  
nono van anunu iyáken maen  
banasii átaru varurá nontin ba-  
nasi ano kama yamú ino sen  
amé amé ino van anunu iyáken  
maen monó átaru namun kay-  
ofin má omá dunan ma saran  
naimpin má betí ankan esé an  
bain karáká kumaneno van mi  
anunu é iyan mino. 47 Betí  
ankan baré nanin kayo mákáden  
maen mai nanin kayo amá pin-  
tena yanásinta umoyan bariyáken  
maen kampun ten ayáká amuké  
iyan mifo uman ma yaimin damú  
ma afoká intin mai kéká anon  
moéken uman baranten mino.”

## 21

*Baré Nanin Mano Susu Sin Moní  
Ma Karú Dein Baya Ino*  
(Maki 12:41-44)

1 Yisasi oniyan bákan moní  
naniñ banta ano susu moní  
monó namumpin ma moní kain  
bokhise ma vaimpin kaiyaren  
mino. 2 Kaiyákan mana ve avafu  
fúkan ona ída vain baré nanin  
mano kankanan toeya varen mai  
vokhisefin me kaiyákan béis onen  
mino.\* 3 \*Ódaren máa semí, “Téi  
fura uron mi siré tiretí ankan  
tiámiá uno. Minó ona vain

nanin banta ano ma kaein moní  
esantaren mi ma ona ída van baré  
nanin mano khaen mino. 4 Minó  
nanin banta ano kokhon ná moní  
dákáré ein pintena manáa moní  
yaimen me khaen mifo ma nanin  
mano ída kanaí ukhen mi veyan  
ma yunan máden nano van ma  
fákakharé ein moní minó máai me  
khaen mino.”

*Kákán Monó Namun Ma  
Varákin Nain Baya Ino*

(Matiu 24:1-2; Maki 13:1-2)

5 Yisasini manáa eyo iyampon  
kayó ano monó namun ma  
uvantein ódaren betí mai van  
máa semí, “Kama on kayo vá  
kama yanásinta vái Tiyarafenu  
amíkhán mi kamaen aní uran ban  
mino,” síkan Yisasi vetin tiámemí,  
6 \*“Taréa ma oniyaona yanásinta  
ano ínaímpá maná damú afoká  
intin maen namuro kéká ano  
minó daná barákuán karúdantín  
barará ana eravintin maen mana  
onámaná ída áintin ena onámaná  
daró banten mino.”

*Ma Vara Ma Kípan Akhempá  
Ma Aní Daná Afoká Inaí Pákéna  
Vaya Ino*

(Matiu 24:3-14; Maki 13:3-13)

7 Máa síkan betí ankan Yisasi  
inaemí, “Aru soe, inte yamusá mai  
yaná kayo afoká inten nafino. Inte  
yaná ma afoká intirá tetí afová  
erá mai yanásinta inka ádé anantá  
afoká inten mino sé tifante ra-  
funo.”

8 Máa síkan Yisasi evaránen betí  
ankan tiámemí, “Tiretin me kam-  
pun tinten mifo yañón ná ákoná  
ono. Mai fara vara seyo, kokhon  
nanin banta ano eriven maen téin  
tí diyan máa sinten mino, ‘Téi  
ma mai vantán bákon damú inka  
ádé’ e ne sinten mifo saretí ída  
vá betin bákurono. 9 Ínaímpáke  
ma inesin ma kákán aruvín afoká  
intin ma mana vara ano e mantan  
ena vara vá aruvintin inká mana  
vara finté ma verara áuban daíden  
aruvinti maeya saretí ankan ída vá

\* 21:2: Kiriki vayafin kankanan repta en sikhein mino. \* 21:3: 2Ko 8:12 \* 21:6: Ruk  
19:44

akhokho van ono. Mai yanasantia naren afoká inten mifo ma vara ma kípan damú ída ainen erinten mino.”

<sup>10</sup> Mág siren Yisasi evaránen betí ankan tiamemí, “Manáa vara kayo finte kéká ano e mantén ena vara kayo finte kéká bá aruvintin maen inká manáa kini yafisin pintena kéká ano e mantén ena kini yafisinpintena kéká bá aruvintin inten mino. <sup>11</sup> Mág tintín maen ma vara kákantá kaya intin manáa akhempá kákán anan má kákán aí danasinta vá afoká iyantin inká minan ayontá aní daná bá akhokho yanasantia vá afoká inten mino.

<sup>12</sup> “Mai yanasantia ma ída afoká ukhantin maen tiretí ankan pákaren namu arirí inten mino. Betí ano saretin monó átaru namun kayofin kaúden maen baya yaíden aviren mo karavusifin kaiyan maen tiretin aviren kin kayo avorá bá kamanin kayo avórá bá orinten mifo mai fara va ino. Tireti senti eyo iyampon kayon basin pasen mi máan tinten mino. <sup>13</sup> Mág ma inain manon tiretí ankani aaí intiyan betin monó baya siamin nono.

<sup>14</sup> \*Mág tin nompo saretí ída vá betin ma evaráne siaminona vaya van kokhon ineine ono. <sup>15</sup> \*Mai fara vara seyo, seyantái saretin puntákein baya vá kama afova vá amiyákun maen tiretí namuro kayo ano ída kanaíen téi ma amenuna vaya átakharé uren do varanten mino, <sup>16</sup> \*Tireti ankan anóe afóen má afá aváeyan má tiretíi kéká bá arona kayo vá ano yeren tiretin namuro ayampin amintin arintiya saretin pinté manáa ano furin nono. <sup>17</sup> Téin naro siren banasi ano saretin ará namu uantanten mino. <sup>18</sup> Mág tuantanten mifo saretin ánón do finté ída mana ayo farusen

eravinten mino. <sup>19</sup> Mág tinten mifo saretí ankan mantaan ákona ukhareya vá ayun ma fara van oriyan ban aunan barano.”

*Mana Namu Yana Suron Ma Afoká Inain Baya Ino*

(Matiu 24:15-21; Maki 13:14-19)

<sup>20</sup> Mág siren Yisasi evaránen tiamemí, “Tireti ankan onesin ma aruvin banta kayo ano ma Yerusalemí baru ma iyaren eúkintiya mairasá tiretí afová eya vá inka ádé anantá má varu namu inten mino vá teno. <sup>21</sup> Mai damú ma afoká intin ná Yudiá má vain nanin banta ano vá anufá karan ódintin ná Yerusalemí ma vain kéká ano mai varu me ampirena akhempá karan orintin ná Yerusalemí ankinafá ma vain kayo ano ída vá mai varufin ódino. <sup>22</sup> \*Mai fara vara seyo uméi ma iyá ein kéká ma uman amin damusí ma intin maen Tiyarafenui vompon dókifin ma uvamádon baré ein baya kayo ano fura sen afoká inten mino.

<sup>23</sup> Ma varará kákán uman afoká intin Tiyarafenui aranan ná ano mai nanin bantafin afoká inten mifo amúbá nanin kayo vá arará iyampon kayo ma nan kuviyá inain nanin kéká bá ano kákán uman baranten mino.” <sup>24</sup> \*Uman baranten mifo namuro kayo ano me Yerusalemí kéká aruren maen aviren ena vara kayofá mo karavusí inten mino. Mág turantin ena anan banta anon Yerusalemí me aruren ayanavan en oriyantin baren maen Tiyarafenu ano ma vetintá dafisino sikhá inain ma mo akheniún damú ma afoká intin mairái mo kanaí inten mino.”

*Tiyarafenu Anin Ma Overánen  
Erin Nain Baya Ino*

(Matiu 24:29-31; Maki 13:24-27)

<sup>25</sup> \*Mág siren Yisasi evaránen betin tiamemí, “Mai damú ara ara aní daná ano áaura safi viyonta safi ofu kayora safi afoká

\* **21:14:** Ruk 12:11-12    \* **21:15:** Apo 6:10-10; Ose 9:7    \* **21:24:** Íbo 79:1; Rev 11:2    \*

\* **21:16:** Mat 10:21-22    \* **21:22:** Yer 5:29; Ais 13:10; Isi 32:7; Yoe 2:31; Rev 6:12-13

inten mino. Máan tintin maen ma varará minó nanin banta ano un non ma karantó en e man paútin nain avaya ma iniren betí kokhon ineine iyáken berai siya akhokho van inten mino.<sup>26</sup> Máan tiyáken maen ma varará ma afoká ono van ma iyain danasinta van banasi avinantan dantin auu entave entave inten mino. Mai farava ino inaru rákena kákán danasinta ano kayamana inten mino.

<sup>27</sup> \*Máan tintin máí damú banasi ano onantí Banta Anin mano konan daró bei kákán ákona vá panu vá erinten mino. <sup>28</sup> Mai yanasingta ma araién afoká inti vá tiretí ankan orun mantaan ákona uve vá anuran duvaserano. Mai fara vara seyo, Tiyarafenu ano ma saretin evaránen aviran damuí ádesí inten mino.”

*Fiki Yaa Anará Ma Afova Varan Baya Ino*

(Matiu 24:32-35; Maki 13:28-31)

<sup>29</sup> Máa siren Yisasi evaránen ena ovaeran baya vetin tiameemí, “Tiretí ankan fiki yaa ana vá ena yaa ana kayo vasá onano.

<sup>30</sup> Tiretí ankan onen nan ma auyen anaa varen orera íka maeyan tiretí afová eya áken afe inten mino séiya ono. <sup>31</sup> Máa séiya ompo máa mana eya vá tiretí onesin ma mai yanasingta afoká intiyya Tiyarafenui yafisin baru inka ádé eriyan mino vá teno.

<sup>32</sup> “Téi fura siré tiretin tiamiyá uno. Má damú kená nanin banta ano ída fúkesin mi ma yanasingta afoká inten mino. <sup>33</sup> Máan tintin maen ma vara vá inaru vá kípanter mifo séinti vaya ída kanaíen kípanter mino.

*Eyo Iyampon Kayo Ano Ma Yafiken Ban Baya Ino*

<sup>34</sup> “Máan tinten mifo saretí ankan dafian ná ákona ono. Ena ena yamú óen non nareya óeniyá vákeyá namu avúavá bá tiretí ma vaona van ma ineine iyasin maen mai avúavá anon tiretin maman

bararasí intin Bafani erin mano oyivampin ma areinien manadái afoká inten mino. <sup>35</sup> Para vara seyo, oyivan mano ma safuna fáké iyain an den ma vara rákena nanin bantafin máí damú afoká inten mino. <sup>36</sup> Minó damú tiretí ankan dafianá ákona ukhevaya vá ena ena Tiyarafenu vaípá amúkiya vasin na ákona amino. Máan tiyare vá mai yanasingta ma afoká inain damú esantareya vá Banta Anin avorá o mantano.”

<sup>37</sup> Máa siren ena ena yamú Yisasi monó namun dafufin banasi mo monó baya siamiren maen inúpasí ma íkan Orifi se sin anufá un bariyaren mino. <sup>38</sup> Máan tiyáken maen minó nanin banta ano véini monó baya ineno van ena ena ákurá orun mantaaren monó namun dafufin eriyaren mino.

## 22

*Yisasin Arin Aa Van Ma Yosein Baya Ino*

(Matiu 26:1-5, 14-16; Maki 14:1-2, 10-11; Yoni 11:45-53)

<sup>1</sup> Yisi ída Van Bereti Ma Nan Omá Damu san ma Avo Uantan Damu se ma siyain máí damú afokáin ádé en mino. <sup>2</sup> Mai damú afoká ono van iyáken monó ánon banta kéká bá man baya ma afová ukhein kéká bá ano vanasi van periyáken betí ma Yisasin aruan purin nain aa van dosen mino.

*Yudasi Ma Yisasin Namuro Ayampin Avían Kaono Van Kana Ino Sein Baya Ino*

(Matiu 26:14-16; Maki 14:10-11; Yoni 6:70-71)

<sup>3</sup> \*Dosiyáken tiyan míkan mifo sirantan kan orun kádan (12) eyo iyampon kayo finté Yudasi ne sen ma inká ena ví Isikarioti ne ma sikhein banta aúpin Ban Anon mano un peren mino. <sup>4</sup> Un pébikan béri oren mo monó ánon banta kéká bá monó namuntá ma yafisin keka

\* 21:27: Dan 7:13; Mat 26:64; Rev 1:7

\* 22:3: Yon 13:2, 27

bá ayampin ma Yisasin avían amin nain aa van bayaíen mino.<sup>5</sup> Bayaí urákán betí ankan amusin uren béis nan moní amenté uno sen mino.<sup>6</sup> Máo síkan Yudasi kana ino siren banasi ma ída véin má ma átaru inain damú Yisasin avían betin ayampin kaono van ave iyan aa van dosiyaren mino.

*Yisasi Ma Vei Eyo Iyampon Kayo  
Vá Avo Uantan Dunan Típá Nein  
Baya Ino*

(*Matiu 26:17-25; Maki 14:12-21;  
Yoni 13:21-30*)

<sup>7</sup>\*Yisi Ma Ída Veretifin Kain Damú afoká íkan betí ankan sipisipi arará aruren niyáken Tiyarafenu ano ma Isarerí nanin banta Avo Uantan ma kamaen baré ein nan ovaren me intiéin mi<sup>8</sup> Pitan nú Yonin nú Yisasi siantan oriyákan máa sen tiámemí, “Tiré kanan ore vá Avo Uantan Damú kena yunan ná teti sina mo funtáán kaono.”

<sup>9</sup> Máo síkan békánan béis inaemí, “Interasá mai yanásinta mo funtáádante rafuno.”

<sup>10</sup> Máo sen ina íkan béis evaránen tiámemí, “Tiré kanan kákán Yerusalemí barufin ódesin ma mana vanta ano ma kákán non kura vá ma efókantiya mai vanta yakhafe vá be ma ódin nain namumpin ná ódono.”<sup>11</sup> Mai namun ma ódivinte vá má afóen ná máa se siameno, ‘Arú ano éin nan intesiñ ná mana karafaran bain ná tesi eyo iyampon kayo vá Tiyarafenu ano ma Isarerí nanin banta ma Avo Uantein dunan maifin nante rafuno,’ sen inaen mantino vá teno.<sup>12</sup> Máo se ináesin maen béis mana kákán karafaran ma yan bain aní inti maen maifin ná dunan nan takhó bá kumanin kará bá banten mifo maifin ná dunan puntádeya saman ka ono.”

<sup>13</sup> Máo síkan békánan oriyán o onákan mai ma Yisasin ano seiní ukhan mai yanásinta ódaren Avo Uantan dunan mo sáden puntáón kaen mino.

*Yisasi Ano Ma Bereti Vá Uvaini  
Vá Bei Eyo Iyampon Kayo Amein  
Baya Ino*

(*Matiu 26:26-30; Maki 14:22-26;  
1 Korini 11:23-25*)

<sup>14</sup> Dunan nañ áauí íkan Yisasin má bei eyo iyampon kayo vá ano yunan kaúden nan takhóká kumanen eúken mino.<sup>15</sup> Mai sakhoiká kumanen eúkuvíkan betí ankan tiámemí, “Ínaímpá téi uman baranté umpsí Tiyarafenu ano ma Isarerí nanin banta ma Avo Uantein dunan nare ma saretin má ma nan nan téi moéké tinunuiyá uno.<sup>16</sup> Téi saretí ankan tiámé uno. Téi ída evaráne Tiyarafenu Ano Ma Avo Uantein dunan nakhékun mi mai ma siran baré ein daná pura sen Tiyarafenu yafisimpín afoká inten mino.”

<sup>17</sup> Máo siren uvaini non bain kápi máden Tiyarafenu susu siantáden betí ankan tiámemí, “Minó ano mai fintena masiman ure vá nano.”<sup>18</sup> Para vara seyo, saréa fi ínaímpáke safi séi ída evaráne uvaini non nakhékun mi Tiyarafenu yafisin afoká inten mino.

<sup>19</sup> Máo turen mana vereti orun máden Tiyarafenu susu siantáden temí, “Ma se sui saretí ankan ayaino van amé umpsí vá máan mana iyákeya vá te nan inisitano,” siren kisiariyan amen mino.

<sup>20</sup> Amin narákán uvaini non kápi orun mamaren mai ma ein ayúavasí ana en máa semí, “Tiretin aya ino siré ma sesi nare vanaeruna mai ma uvaini kápi anón tiretin má ma kasen ban auyen avúavá aní inten mino.”

<sup>21</sup>\*Máo siren betí ankan tiámemí, “Tein ma sivian namuro ayampin ma kaono van inikhein banta vái ma yunan nan takhóká ten má manafin ban mino.”<sup>22</sup> Tiyarafenu ano ma gefá tikhá einén Banta Anin mano furinten mifo véin ma avían namuro ayampin kain nain banta vará arunan uantano.”<sup>23</sup> Máo síkan eyo iyampon kayo

\* 22:7: Eks 12:1-27

\* 22:21: Íbo 41:9; Yon 13:21-22

ano mai vaya iníden betiyan inain maran en orera iyan temi, “Iye anó mai avúavasí inté iná tino.”

*Eyo Iyampon Kayo Ano Ma  
Iyé Kákani Inten Nafino Sen Asive  
Asive Ein Baya Ino*

24 \*Máa siran beni eyo iyampon kayo ano vetin áubaná pinté iye anó kákani o inten nafi siren beraran araíen asive asive en mino.

25 \*Máa sen orera iyákan Yisasi vetin tiameémí, “Ma varará ma ena anan nanin bantai kin kéká bá aví bain banta kayo vá ano ákondaen banasirá dafisiyáken betin asen aren iyáken maen betiyan nan banni ayain kayo uno sé iyan mino.

26 \*Máan tukhen mifo saretí ankan ída vá máan tiyáke vá tiretimpin ma kákani ukhein banta ano vá iyampon arará an dantin ná inká tireti ánóní ma ukhein banta ano vá tireti yoran banta an ná dano.

27 \*Máan tukhen mifo iye anó kákani ukhen nafino. Mai ma kumenten dunan niyain banta ano fi áa mai ma yunan kuan amiayain banta ano fino. Mai ma kumenten ma yunan niyain banta anon kákani ukhen mifo séi saretí áubaná doran banta an dakhéi saretin aya iyá uno. 28 Akhenókain danasinta ma sempin afoká iya mae saretí ankan ten má bare ono. 29 Bare ompo se sifóe ma inaru yafisin téin timeiní ananéi saretin inaru yafisin amé uno. 30 \*Máan tukhantiya mai yafisimpin tireti ankan tesí yunan nan takhóká kumame yunan má non má niyáke Kini kará kaylorá kumameya sirañtan kan orun kádan (12) Isareri anantá dafikeya vetin daimin nono.”

*Yisasi Ma Pita Nan Téin Oyan  
Timin Nono Sein Baya Ino  
(Matiu 26:31-35; Maki 14:27-31;  
Yoni 13:36-38)*

\* 22:24: Ruk 9:46    \* 22:25: Mat 20:25-27; Mak 10:42-45    \* 22:26: Mat 23:11; Mak 9:35  
\* 22:27: Yon 13:12-15    \* 22:30: Mat 19:28    \* 22:32: Yon 17:15    \* 22:35: Ruk 9:3; 10:4

31 Máa siren Yisasi semí, “Saimoni oe, Saimoni oe, ineno. Uviti yasáden ma antan má asu vá ma yo aireiní en tiretií mumunan akhenóka uan onano van Ban Anon mano ina ukhen mino. 32 \*Máa sikhen mifo Saimoni oe, éin ayaintin eni mumunan ída eravino van téi gefái simúkukhé umpsí éi ma sirun noe sire ma ovaráne erinte vá e afá aváen ná ákona uantano.”

33 Máa síkan Pita evaránen tiameémí, “Bafan noe, éin má karavusifin oré inká en má puré ono van útakhé uno.”

34 Máa síkan Yisasi semí, “Pita oe, sare inuran manan kókore ída asikhantiya kanú manáu dádá téi nan ída afová ukhé uno sin nono.”

35 \*Máa siren Yisasi vei eyo iyampon kayo inaemí, “Tiretin nan ma sesi yorarí ono van ma siantéku oriyákeya moní unan má arantan anamun má ona váin unan má ída mamareya ore ono. Ore ompo maí damú tireti ankan manáa yana san o afasíe fono áa ída fino.”

Sikan, “Ída ino,” sen mino.

36 Ída ino ma síkan maen Yisasi vetí ankan tiameémí, “Mai saréa vá moní unan nafi ona váin unan nafi ma van nain banta ano varesin ná baenati ma ída van nain banta ano vá ei iyon au anamun ná mo sarí ure vá mai monípó mana vaenati miyaní ono. 37 Para vara seyo, Tiyarafenui vompompín máa sikhan mino, ‘Banasí ano véin oman mana namu vanta an daren maen bén e yankáan ume nanin banta vá kainten mino’ Ais 53:12 má sikha ein mai ano séin timanáa dákó intéíi saretin tiame uno. Tiyarafenui vompon dókifin ma sen nan tiádan baré ein bayá ano inka yákó irí iyan mino.”

38 Máa síkan bei eyo iyampon kayo ano semí, “Bafan noe, setí

ankan kankanan baenati yékun ban mifo onano.”

Síkan Yisasi evaránen betin tiameemí, “Mai khanai ino.”

*Yisasi Ma Ketsemaní Amúkein Baya Ino*

(Matiu 26:36-46; Maki 14:32-42)

<sup>39</sup> Yisasi ma ena ena varé iyain avúavasien kákán baru me ampiren Orifi anufá oríkan bei eyo iyampon kayo ano vákuren oren mino. <sup>40</sup> Orifi anuyontá ma o unaven betí ankan máa sen tiameemí, “Ákonae amúkiyare vá akhenókafin ída erave anka-mono.” <sup>41</sup> Máa siren Yisasi vetí ankan me ampiren manáa e afánen nentá oriven aron mo yurafüden máa sen amúkemí, <sup>42</sup> “Tifóe oe, éi ma ananu iyante vá téin pintena ma uman do varan nompo mai ída vá téinti sinunu yakhafiyáke vá ei anunu ana vá dakhafono.” <sup>43</sup> Máa síkan inaru fáké mana enisorí ano véi vaintá eriven ákona amen mino. <sup>44</sup> Yisasi ma ovaren me aváduan onan maen aufá uman dákan béis moéken ákonae amúkiyan béis au fáké imúkan mano nare ma kapí kapí einíen barará eraven mino.\* <sup>45</sup> Béis amúkuan kípáren e mantan evaránen bei eyo iyampon kayo vaípá oren o onákan betí arunaná ano auunan ai íkan auun baren orera ukharen mino. <sup>46</sup> Betí ankan auun bakharé íkan béis mo avoriyan temí, “Akhenókain mano sireti ankampin dáko intiya erave ankamin nampo ída auun bariya váke orun mantave amúkono.”

*Yisasini Namuro Kayo Ano Ma Véin Pákein Baya Ino*

(Matiu 26:47-26; Maki 14:43-50; Yoni 18:3-11)

<sup>47</sup> Yisasi fara vaya siyan maen kokhon nanin banta kéká ano eren mino. Eríkan maifin tiyan míkan mifo sirantan kan orun kádan (12) beni eyo iyampon kayo

fintena mana Yudasín ne sin banta ano aní uanten eriaren Yisasin me amónano\* van beni ádé eren mino. <sup>48</sup> Eríkan Yisasi véin máa sen inaemí, “Yudasi oe, éi amónan avúavá pókesá Banta Anin avían namuro ayampin kaono vara fono.”

<sup>49</sup> Máan tiyain má Yisasin má ma varé ein eyo iyampon kayo ano onákan mai yaná afoká iyaimpin betí ankan máa sen Yisasin inaemí, “Bafan noe, éi eyo sinona vará ma kéká tetisi vaenati fóké aronte rafuno.” <sup>50</sup> Máa siyákan mai finté mana ano vaenati máden monó ánon banta kékáí ánon bantai yoran banta ayan kuron pákena átaren do síkaan karúdan barará eraven mino.

<sup>51</sup> Máan tíkan Yisasi onen temí, “Mai avúavá ifá ano,” siyáken mai vanta átarentá ayan kaíkan evaránen kamaen mino.

<sup>52</sup> Máan turen monó ánon banta kéká bá inká monó namuntá ma yafisin kékáí ánon banta vá banaasií ánon banta kayo vá ma véin pákano van erein kéká máa sen tiameemí, “Maná umoyan bantá pákano vará tiretí ankan baenati vá dan má útaoré ere fono.” <sup>53</sup> Ena ena yamú ma séi sireti ankan má monó dafufin bákuya ída sireti ayan tentá kain na varéen nan mi sítipai ákona ano esantan inka siretií yamusién mino.”\*

*Pita Ma Yisasin Nan Ída Afová Ukhé Uno Sein Baya Ino*

(Matiu 26:69-75; Maki 14:66-72; Yoni 18:15-18, 25-27)

<sup>54</sup>\*Máa siran betí ankan Yisasin do fáken monó ánon banta kékáí ánon banta amápin oriyákan Pita má dere vetin oyampá dakhafen manáa nentá oriyaren mino.

<sup>55</sup> Oren manáa vanta kayo ano mai namun ma vain dafu aúban ira sáden kumanen eúukuhán Pitan má maifin baren mino. <sup>56</sup> Bákán

\* **22:44:** Manáa feyante vompompin ves 43 vá 44 vá ída varen mino. \* **22:47:** Mai amónan avúavá ma vain mai arona ma kamaen avábá in mino. \* **22:53:** Ma sitípa maen mai Ban Anoni avúavá ino. \* **22:54:** Mak 14:53-54

mana yoran arinta ano Pitan onan irará kumantan ben ádé eriven purefure en ódaren temí, “Ma vanta vá deren Yisasin má baren mino.”

<sup>57</sup> Máa síkan Pita umeren temí, “Anasi oe, séi ída uron mi véin afová ukhé uno.”

<sup>58</sup> Máa siren manáa vákan ena vanta vá ano yere óden temí, “Éin má dere veni kéká pintena vanta ono.” Síkan Pita umeren temí, “Ída ino. Téi ída veni eyo iyampon bá uno.”

<sup>59</sup> Máa siran mana áau orivíkan ena vanta ano ákonaen temí, “Ma Kariri fáke vantán báken béis má deren ben má baréikái fura siyá uno.”

<sup>60</sup> Máa síkan Pita evaránen temí, “Banta oe, mai ma éi siyaona vaya séi ída uron mi afová ukhé uno.” Máa siyain má anan kókore asen mino. <sup>61</sup> Asíkan Bafan mano yo vaéan Pitan oniyain má mai ma Bafan mano ma véin tiamen ma “Sare inuran kókore má ída asikhantiya éi kanú manaú dádá téin nan ída afová ukhé uno sin nono.” Ma sen Pitan tiamicharé ein baya ovaren me inen mino. <sup>62</sup> Iniyáken béis varufá araven morun kákan iffí den mino.

*Dafisin Banta Kéká Ano Ma Yisasin Máká Máká Ein Baya Ino*

(Matiu 26:67-68; Maki 14:65)

<sup>63</sup> Máan tiyákan Yisasantá ma yafiká ein banta kayo ano véin máká maákáin baya siyáken ankamen mino. <sup>64</sup> Máan tiyáken béis auurá davaráe anan póké damuren ankamiyáken máa sen inaemí, “Éi sakhanampaí eya aví dano iye anó ankamiyan nafino.” <sup>65</sup> Máan tiyáken kokhon ída funtákein baya fóké béis asiren ankayanten mino.

*Erotin Nú Pairotin Nú Ano Ma Yisasin Daimein Baya Ino*

(Matiu 26:59-66; Maki 14:55-64; Yoni 18:19-24)

<sup>66</sup> Do khakhen ákurasí íkan man baya ma afová ukhein banta kéká bá monó ánon banta kéká bá ano manafin e átaru uaren Yisasin do aviren betíi uman ma yaimin banta kayo vaintá oren mino.

<sup>67</sup>\* Aviren moren betí ankan temí, “Éi mai ma Tiyarafenu ano ma vei vanasi evaránen avirano van ma aní ukhá ein banta ma éi vanteya setin tisimeno.”

Síkan Yisasi evaránen temí, “Tireti ankan ma siamékuya sireti ída mumunan inoná uno. <sup>68</sup> Inká téi ma manáa vaya ma sireti ankan baonafá ma ina ékuya sireti ída ovaráne sisiminona van muno. <sup>69</sup>\* Mápán tukhantin taréa ráké ma orin nain Banta Anin mano Tiyarafenu ma kákán ákoná vaini ayan kurompái kuman inten mino.”

<sup>70</sup> Máa síkan minó banta kayo ano inaemí, “Mai éi Tiyarafenu Anin na fono.”

Síkan béis evaránen temí, “Mai inka siretiyantá ten nan pura se ono.”

<sup>71</sup> Máa síkan betí ankan temí, “Inka veyantá be oo fóké mai vaya sí inétiferuna ída ena vanta sekun beni avúavá eman tian páman inten mino.”

## 23

*Monó Ánon Banta Kéká Ano Ma Yisasin Pairotin Ayampin Kaein Baya Ino*

(Matiu 27:1-2, 11-14; Maki 15:1-5; Yoni 18:28-38)

<sup>1</sup> Máa siren minó basiíi ánon banta kayo ano e mantan Yisasin do aviren Pairoti vaípá oren mino. <sup>2</sup> Mo khauren araién ben daimiyáken máa semí, “Tetí ankan onékun ma vanta ano setisi vanta anasii avúavá máden asuse uren maen kamanin ma takisi amin dere are usintiyáken inká beyanan Tiyarafenu ano ma vei vanasi evaráne avirano van ma aní ukharé ein kin muno siyaren mino.”

<sup>3</sup> Máa síkan Paireti ano Yisasin inaemí, “Éi Yutan kayoi kin na fono.”

Síkan Yisasi evaránen béis tiamemí, “Eyo mai inka eyantá te ono.” <sup>4</sup> Máa síkan Paireti ano monó ánon banta kéká bá banasi vá máa sen tiamemí, “Ma vanta finté séi ída mana aaú yosé uno.”

<sup>5</sup> Máa síkan betí ákonáen temí, “Béi Karirí araí uren Yudiá ankinafá eúkiyáken banasi ará mantein monó baya o sen eriyan baren mi mará eren mino.”

<sup>6</sup> Máa síkan Paireti ano mai vaya iniren betí ankan inaemí, “Ma Kariri fákena vantá fino.” <sup>7\*</sup> Máa sen ina íkan betí ankan eyo

siyaimpin maí damú Eroti yere Yerusalemí e varé íkan Paireti ano afová en béis ma yaffikein bara akhen pákena vantán Yisasi van mino siren béis vaipá tiantan oren mino.

<sup>8</sup> Oriyain má Eroti ma Yisasin oniyan maen pefá beni vaya ana iniyáken béis onano van iyaren pasen béis manáa aní danasí intí onano van anunu iyáken kákantá amusin en mino. <sup>9</sup> Amusin iyáken béis ano Yisasin kokhon danasinta van inaiyaren mifo véi ída evaránen mana vaya véin tiamen mino. <sup>10</sup> Máaón tiyaimpin monó ánon banta kéká bá man baya ma afová ukhein kéká bá ano ádé e mantaven Yisasin ákonáen daimen mino. <sup>11</sup> Daídán Erotiín má bei aruvín banta kéká bá ano Yisasin máká maáká uren kini ayá au anamun uantáden evaránen tiantákan Paireti vaipá oren mino. <sup>12</sup> Oriyákan Eroti ano gefá Pairetin namuroí uantiyaren maen maí damú ana míkanan evaránen aronaén mino.

*Paireti Ano Ma Yutan Kéká Ayampín Yisasin Amein Baya Ino  
(Matiu 27:15-26; Maki 15:6-15;  
Yoni 18:38b-19:16)*

<sup>13</sup> Máaón turen mairá Paireti ano monó ánon banta kéká bá banasi vá arákan e átaru en mino.

<sup>14</sup> E átaru uvíkan betin máa sen tiamemí, “Tiretí ma vanta avireya se vaintá mere véi ano vanasii avúavá máden asuse iyaren mino sen ná maé tiretin avorá mai ma siyaona yanásinta van ina uré ída mana uman dosé uno. <sup>15</sup> Máaón tékun Eroti máa deren máaón mana en mi saretí ankan onano van ma vanta ovaránen tiantan tetí barunafá erikhein mi séi ída kanaié béis nan purino senté uno. <sup>16-17</sup> Máaón tukhein nan mi véin dafiyó anan ankádáe tiantékun orinten mino.\*

<sup>18</sup> Máa síkan minó nanin banta ano mana maní oo varáren temí, “Barabasin utúantesin tetimpín eriyantiya mai vanta aruan purono.” <sup>19</sup> Barabasi maen kamanin ma aruvín araí uren banta arin púbíkan mai van béis pákaan karavusifin kain baren mino.

<sup>20</sup> Paireti ano Yisasin utúantantin orino van enádá bá betin inaen mino. <sup>21</sup> Ina iyákan betí ankan para oo variyan báken temí, “Arono,” véin daa unkamádantá arono.

<sup>22</sup> Máa sen oo variyaimpin Paireti ano kanú manaú dádasí en betin tiamemí, “Para vae. Téi ída ma vanta fintena mana uman dosikheruna ída kanaié béis nan purinten mino senté umpo véi nái yaná ausá ukha vae,” siren béis semí, “Máaón tukhein nan mi véin dafiyó ana ankádáe tiantékun orinten mino.”

<sup>23</sup> Máa síkan Paireti ano Yisasin daa unkamádantá arino van betí moéketá ákonáen oo variyan béisí vaya yararen mino. <sup>24</sup> Máa siyaimpin Paireti ano vetí ankaní vaya ánain dakhafen Yisasi nan purino sen mino. <sup>25</sup> Máa siren betí ankaní anunu yakhafen Yisasin

\* **23:7:** Ruk 3:1 \* **23:16-17:** Manáa Tiayrafenui vompon dókifin ves 17 asotúin baya máa sikhen mino. 17 Romu kaminini avúavá ano máaón tukhemí, “Isarerí nanin banta Avo Uantein Omá Damusá mana karavusi utúantantin ná orino.”

betin ayampin amiyáken mai ma kamanin má aruvín araí ureñ ma vanta aruan púðan ma fakaan karavusií uran baré ein banta utúantán oren mino.

*Daa Unkamádantá Ma Yisasin Arein Baya Ino*

(Matiu 27:32-44; Maki 15:21-32; Yoni 19:17-27)

<sup>26</sup> Máan turan aruvín banta kéká ano Yisasin do aviren oriyaré íkan mana Saimonin ne sin Sairiní baru fáke vanta ano Yerusalemí ódono siren eriyaréin mai vanta fákaren duvun íkan Yisasin yaa unkamádan mamaren ben ánaín bákuren oren mino. <sup>27</sup> Oriyákan kokhon nanin banta ano Yisasin bákuriyan manáa nanin kayo ano ifisana yariyan béis nan e ifí den oriyaren mino. <sup>28</sup> Máan ten oriyá íkan Yisasi yo vaében betí ankan tiamemí, “Yerusalemí nanin kéká soe, se nan ída ifí diyákeya sirétiyán má tiretí akhafana va san mana vá ífí dano. <sup>29</sup> \*Para vara seyo, ínáimpá damú afoká inti mae siretí máa sin nono, ‘Aa nanin kayo ma arápín ída iyampon báin ma inká ída ma iyampon nan kuven ma ukhein kéká ano vá amusin ino.’ <sup>30</sup>\*Máa siren maen ‘Kákán anuyon kayo van betí máa sinten mino, “Un kaure setin dararano,”

inká titó anuyon kayo van “tetin maman aúpasí ono.”

*Ose 10:8*

<sup>31</sup> Máa sinten mifo vanasi ano ma auyen daa ma irafin karúdantin maen ída kamaen kanten mifo kakhein daa ma irafin karúdantin maen ainen mi kanten mino. Máan mana en mi séi funtákeruna vanta ma namu avúavá usintiyare esin maen Tiyarafenu ano namu nanin banta moékakhein uman mi amínten mino.”\*

<sup>32</sup> Aruvín banta kayo ano ena aau vantá kan Yisasin má arintin

purino van aviren oren mino.

<sup>33</sup> Aviren Ánon Dampa e siyain dontá o unaven Yisasin aúban kaúden aau vantá kanan pintena mana Yisasini ayan kurompá kaen maen ayan ópá ena vanta khaen ureñ aren mino. <sup>34</sup>\*Máan turen aruvín banta kayo ano Yisasini ona varé oreraono van kati siyákan Yisasi máa semí, “Tifóe oe, vetí ankan ída afová ukhen mi mai yaná bariyan mifo vetí ume vá ampiantano.”\*

<sup>35</sup>\*Máa siyákan banasi ano mairá mantakhen oniyan maen ánon banta kéká ano Yisasin así mun uantiyan temí, “Ena nanin banta kayo anan ayaen noren mifo Tiyarafenu ano ma vei vanasi evaránen avirano van ma aní ukhá ein banta ma vanten maen áesin beyantá kanaén beyan aya ino.”

<sup>36</sup>\*Máa siyákan aruvín banta kayo ano yere eriven béis nan tireñ intiyáken íta uvaini amiyan <sup>37</sup> temí, “Éi fura se ma Yutan kayoi kin ma vanteya eyantá eyan aya ono.”

<sup>38</sup> Máa siren béis árontá, “MA YUTAN KAYOI KIN MINO” sikhein bompon uvaman kaen mino.

<sup>39</sup> Máan turan aau vantá kan ma arukhá ein pinté mana ano Yisasin máa sen oyampá bayá semí, “Éi Tiyarafenu ano ma aní ukhá ein banta ma vanteya eyan aya uare verasan má dere siya ono.”

<sup>40</sup> Máa síkan ena vanta ano mai vaya inireñ mai vanta asiyan temí, “Ma vanta ma variyainí ukhein uman manan e má dere variya ompo éi ída Tiyarafenu van periya fono. <sup>41</sup> Erasan ma variyá eruna avúavákai ma uman bariyá umpsa ma vanta ano ída mana aauí ukhen mino.”

\* 23:29: Ruk 21:23 \* 23:30: Rev 6:16

ma auyen daará ma mai avúavá bariyaren maen ira ma kakhein daará intesá inten nafino.

\* 23:34: Íbo 22:18; Ais 53:12 \* 23:34: Mánáa feyante vompompin mai vaya ída van mino.

\* 23:35: Íbo 22:7-8 \* 23:36: Íbo 69:21

\* 23:31: Kiriki vaya máa sikhemí, Banasi ano

<sup>42</sup> MÁA siren bÉI semÍ, "Yisasi oe, éI ma ei yafisin aúpIn<sup>\*</sup> ma orinona yamusá téI nan inisintano."

<sup>43</sup> MÁA síkAN Yisasi evaránen bÉI tiamemí, "TéI fura siré éIñ tiamiyá uno. Taréa anan téIñ má inarufá ban nono."

*Yisasi Ma Furein Baya Ino*  
(Matiu 27:45-46; Maki 15:33-41;  
Yoni 19:28-30)

<sup>44</sup> Bayan aúbaní iyain má titípa ano ma vara yaranten bákAN kanaú manaú áauí iyain má do kakhen mino. <sup>45</sup> \*MÁAñ tiyan maen áauí fanu kípiyain má anan kákAN monó namumpin ma kákAN davaráe khuran baré ein mano veyantá áubáná kanáren maman kankananien mino. <sup>46</sup> MÁAñ tíkan Yisasi avádóden oovaren temí, "Tifóe oe, se saunan éIñ ayan arumpin kaé uno," siyan puren mino.

<sup>47</sup> MÁAñ tíkan aruvín banta kayoi yafisin banta ano mai yaná ódaren Tiyarafenu aví maman daní iyáken temí, "Pura uron ten ma vanta ída aau van puntákein banta ino." <sup>48</sup> MÁA siyákan mai ma ariyain ma onano van e iyukharé ein nanin banta ano mai yanásinta ódaren arunaná pinté evaránen betí varufá oreraen mino. <sup>49</sup> MÁAñ tiyákan Yisasin arona kayo vá bÉI ma yakhafen Karirí me ampiren erikhá ein nanin kayo vá ano manáa nentá e mantakhen mai yanásinta ma afoká iyain oniyaren mino.

*Yisasin Ma On Aimpin Masí Ein Baya Ino*  
(Matiu 27:57-61; Maki 15:42-47;  
Yoni 19:38-42)

<sup>50</sup> Banasii ánon banta kéká pintena mana Yosepin ne sin kamaen puntákein banta varen mino. <sup>51</sup> BÉI maen Arimatiá se sin Yudiá barafin bain baru ráke vanta váken bÉI Tiyarafenu

yafisin baru van ave ukhen pasen ena ánon banta kayo ano ma Yisasin arono van tiyain baya van ída ará manafiní ukharen mino. <sup>52</sup> MÁAñ tukharen mai vanta ano Yisasin au ifá intí barano van Pairoti vaípá mo inaen mino. <sup>53</sup> Ina íkan kana ino síkAN mai vanta ano Yisasin au un mamádan barará eravíkan efanten davaráe fóké uke uke urem ompin mana masí boraádan bákAN maifin ída mana vanta khaúkaré ein masípin baren mo khaen mino. <sup>54</sup> Sabati ráke yanásinta utaren arakhókuin damú baré íkan ádÉ anantá Sabati aráí ono van en mino.

<sup>55</sup> MÁAñ tiyákan Karirí má me ampiren ma Yisasin bákuren erein nanin kayo ano Yisasin au ma masípin kain nain onano van Yosepin bákuren oren mino.

<sup>56</sup> \*Ódaren mai nanin kayo ano evaránen betí amápin oriven manáa aunka uveri vá pauran kayo vá utaádaren man baya ano ma sikheinien Sabati yamú avíken mino.

## 24

*Yisasi Ma Evaránen E Mantein Baya Ino*  
(Matiu 28:1-8; Maki 16:1-8; Yoni 20:1-10)

<sup>1</sup> Santé pe ákura suron anasi kayo ano mai ma kama aunka iyain uveri ma utaádan baré ein mamaren masiká oren mino.

<sup>2</sup> Betí ankan oren o onákan masí oyirá ma iyádan baré ein onámaná ano e vaébagé en orikharen mino.

<sup>3</sup> MÁAñ tukheimpin betí ankan maifin ódiven onákan Yisasin au ída varen mino.

<sup>4</sup> Ída vákan betí ankan mairá mantakhen mai van kokhon ineine iyan baré íkan kankánan banta ano yetin ádÉ e mantavíkan míkani auí daná kaké moéken afayu ma fanu seinien mino.

<sup>5</sup> MÁAñ tíkan mai nanin kayo ano akhokho van iyáken

\* 23:42: Manáa Tiyarafenui vompon dókifin mará asotúin baya máa sikhémí, eni kini ákonafó

\* 23:45: Ibu 6:19-20; 10:19-20      \* 23:56: Eks 20:10; Diu 5:14

anuran bara finí íkan mai kanan banta ano máa semí, "Tiretí ankan pará purin banta kayoi varu finté ma evaránen aunan mamaren ma e mantakhein banta van me yosiya rafono." <sup>6</sup>\* Béi gefái aunan mamaren e mantakhen mafin ídq van mifo véi ma Karirifá báken ma saretin tiamiyaré ein bayá vá ovare me ineno, <sup>7</sup> 'Banta Anin ume vanta kayo ayampin amintin ná mai kéká ano véin daa unkamádantá arintin pükaren kanú manaú damusí ma intin ná béis evaránen aunan mamaren e mantano,' sen béis saretin tiamikharen mino." <sup>8</sup> Máa síkan mai ma véi sikharé ein bayá vetí ankan ovaren me inen mino.

<sup>9</sup> Ovaren mé iniren betí ankan masí me ampireñ evaránen orein mano mo siyan míkan mifo sirantan mana orun kádan (11) eyo iyampon kayo vá ena nanin banta kéká bá mai ma afoká ein danasinta van tiamen mino. <sup>10</sup> Makdaráke nanin Maria má Yoana má inká Yemisin anóe Maria má ena nanin kayo vá anon masíká orikharen mi mai ma afoká ein danasinta van eyo iyampon kayo me siamen mino. <sup>11</sup> Máa síkan eyo iyampon kayo ano vetin nan kampun bayan tiyan mino siren betí vayará ída mumunan en mino. <sup>12</sup> Máa síkan Pítá e manteñ tavaen masíká orein maifin o mátimen onákan davaráe kayo ana vaimpin béis evaránen mápin oriyáken mai náisá ukhen nafi siren kokhon ineine en mino.

*Emeasi Ayana Fáke Ma Kankanan Banta Ano Yisasin Onein Baya Ino*

(Maki 16:12-13)

<sup>13</sup> Anasi kayo ma masíká orein damú anan kankanan eyo iyampon mano Yerusalemíké tiyan míkan mifo sirantan mana orun kádan (11) kiromitará ma vain baru Emeasi oren mino. <sup>14</sup> Oriyáken mai ma afoká ukhen danasinta van e sen oriyaren

mino. <sup>15</sup> Míkanan mano mai yanasinta van kokhon baya sen oriyákan Yisasi vékanani ádé afoká uven békán má oren mino. <sup>16</sup> Oriyákan manáa yaná ano vékanan aurá iyábikan Yisasi ino sen ída oman afová en mino.

<sup>17</sup> Ída afová íkan béis míkanan máa sen inaemí, "Tiré kanan nái vayá té oriya fono." Síkan míkanan o mantavin békakan auná ano arunána bá ma vainien mino. <sup>18</sup> Máa sen ina íkan míkanan pinté Kireopasin ne sin banta ano evaránen béis inaemí, "Éi enafákesá erikheyá Yerusalemí barufin ma saréá afoká ukhen danasinta ída afová ukhe fono."

<sup>19</sup> Máa síkan Yisasi vékanan evaránen inaemí, "Nái yanasinta fino," síkan békakan evaránen béis tiamemí, "Nasaretíke Yisasin ne sin banta mai véi sakhanampa vanta váken Tiyarafenu avorá bá banasi avorá bá ma vaya seipá ákonáen baya siyáken doriyaré ein banta amaniná ma mai yanasinta afoká ukhen nan mi siyá uno. <sup>20</sup> Tetisi monó ánon banta kéká bá banasii ánon banta kayo vá ano véin kamanin ayampin kaíkan kamanin mano véin nan arintin purino síkan daa unkamádantá béis aren mino. <sup>21</sup>\* Tetí ankan béis nan mumunan iyáké Tiyarafenu ano ma Isarerí nanin banta evaránen avirano van ma aní ukharé ein banta ino siyá ékun mi véin arin púbíkan kanú manaú damusí ma iyain má mai ná dákó en mino. <sup>22</sup> Taréa fe ákurá suron tetisi kéká pinté manáa nanin kayo ano masíká o onákan <sup>23</sup> béis au ída vaimpin ovaránen tetí ankan tinú deruna vaya me sisimiyáken enisorí kayo onékun mai kayo ano Yisasi nan evaránen aun mamaren e mantakhen mino. <sup>24</sup>\* Máa síkan tetí ankan pinté manáa vanta kéká ano masíká oriven mai ma anasi kéká ano ma sein danasinta onen mifo véin ída onen mino."

\* 24:6: Ruk 9:22 \* 24:21: Ruk 19:11; Apo 1:6 \* 24:24: Yon 20:3-10

25 Máa síkan Yisasi vékanan tiamemí, “Tirékananí ineine ída vakai sakhanampa vanta kayo ano ma minó bayá sikharé ein nan ída aine mumunan iya ono.

26 \*Mai ma Tiyarafenu ano ma vei vanasi evaránen avirano van ma aní ukharé ein banta ano vá uman nare mamaren ná Ínaimpákesá Tiyarafenui kakhampin un perano ma sikharé ein tiré kanan ída afová ukhe fono.” 27 \*Máa siren Mosesi ma uvamádan bayá ráké nare araí uren minó sakhanampa vanta kayo vá ano ma Tiyarafenui vompon dókifin ma veyan nan tiádan baré ein bayá kayo míkanan tiamen mino.

28 Máa sen oriyaren betí kanú manaú má vano van inikharé ein Emeasi varu ádé ma orikan maen Yisasi manáa vá orono van en mino. 29 Orono van íkan békaran mano véin ákonáen ayópá iyáken temí, “Ádé anantá áau orun peranton iyain duninten mifo verasan má bano.” Síkan béisíkhanan má bano van mápin oren mino. 30 Ínaimpáké betí ankan dunan nano van íkan Yisasi míkan má dunan nan takhoká kumamen bereti máden Tiyarafenun tusu siantáden békaran kisan amen mino. 31 Máan tiyain má békaran auu sapé tíkan béisíkhanan ída onen mino. 32 Ída oniyáken míkanan ben inain maran iyan temí, “Erasan ma aayanafá eriyákon ma Tiyarafenui vompon pintena ana vaya ma sisimiyákon maen erasan tirá mantiyaren mino.

33 Máa siren míkanan ainen e mantén Yerusaremí oren o onákan tiyan míkan mifo sirantan mana orun kádan (11) eyo iyampon kayo vá manáa kéká bá iyukhen baren mino. 34 \*Iyukharen máa sen békaran tiamemí, “Bafan mano evaránen e mantakharen

pura sen Saimonin avorá dákosí ukhen mino.” 35 Máa síkan inká békaran mano aayanafá ma afoká ein danasinta vá inká bereti ma kiseintá ma oman pámánein má betin tiamen mino.

*Yisasi Ma Vei Eyo Iyampon Kayo  
Avorá Ma Afoká Ein Baya Ino  
(Matiu 28:16-20; Maki 16:14-18;  
Yoni 20:19-23)*

36 Betí ankan mai ma afoká ukhein bayá van para siyan baré íkan Yisasi veyantá mai aúbaná e mantaven máa semí, “Ará kusin masá bano.”

37 \*Máa síkan betí ankan ma inein mano mana van mi oniyá uno siren anú diyáken akhokho van en oreraen mino. 38 Máan tíkan Yisasi vetí ankan máa sen tiamemí, “Pará tiretí ankan anú diyákeyá kokhon ineine iya rafono. 39 Téin bá umpo siyan tirantan oniyákeya su siruvúan onano. Téin tu ma oniyaonaíen ban kayo aurá ída amasi vá ayampa vá baneten mino.”

40 Máa siren be ayan arantan betin anien mino. 41 Ani urákan betí ankan amusin mana iyáken ída mumunan intón kokhon ineine iyaimpin betin inaemí, “Tiretí ída manáa yunan mafin denan ban nafino.” 42 Máa síkan iyó uádan noyana manáa maman amíkan 43 betí ankan avorá béisíkhanan máden niyákon onen mino.

44 \*Oniyákon béisíkhanan máa sen tiamemí, “Téi ma saretin má ma fara vaké Mosesini man bayá vá sakhanampa vanta kayoi vaya vá í bompon má ano ma séin pákena sikharé ein mai minó daná ano vá pura sen afoká ino sé pefái mai yanásinta van tiamikháre uno.”

45 Máa siren béisíkhanan Tiyarafenui vompon dóki fintena vaya ana vetí ankan kamaen inino van afoya amen mino. 46 Béisíkhanan máa sen betí ankan tiamemí, “Tiyarafenui

\* 24:26: Ruk 9:22    \* 24:27: Íbo 22:1-21; Ais 53    \* 24:34: 1Ko 15:4-5    \* 24:37: Mat 14:26

\* 24:44: Ruk 9:22

vompon dókifin máan mi siádan baren mino, Tiyarafenu ano ma vei vanasi evaráneñ avirano van ma aní ukhá ein banta ano vá uman baren púoren ná kanú manaú damusí ma intin ná evaránen masí pinté e mantano. <sup>47</sup> Béin avisá minó nanin bantafin tiamintin ná ará baerantin Tiyarafenu ano vá betii ume ampiantano. Mai yoran Yerusaremísá araí ino. <sup>48</sup> \*Máa sikharé ein paseya siretí anon ma ma afokái ma oneona yanásinta vá ena nanin banta mo siameno. <sup>49</sup> \*Tiretí ankan mafefá te Sifóe ano ma Kantá Aunan ma iyáantákaré ein mai séi siantékun tireti vaípá eranten mifo ma kákan barurá ana vá bare vá ínaiimpákesá mai Tiyarafenui ákona vá baran nono.”

*Yisasi Má Inarufá Ódein Baya  
Ino*

(Maki 16:19-20; Aposeri 1:9-12)

<sup>50</sup> Yisasi vetí ankan avían Betaní moren ayan daní uren avu uanten mino. <sup>51</sup> Ayu uantiyákan Tiyarafenu ano véin aviran betin me ampiren inarufá óden mino. <sup>52</sup> Ódivíkan betí ankan aron durafúden bentá monó tiantáden amusin iyáken Yerusaremí evaránen óden mino. <sup>53</sup> O váken ena ena vetí ankan monó namumpin Tiyarafenu avi daní iyan baren mino.

---

\* **24:48:** Yon 15:27; Apo 1:8    \* **24:49:** Yon 14:16; 15:26; Apo 1:4

# YONINI KAMA VAYA INO (Yoni)

## Yonini Kama Vaya Ma Uvanteí Pákenai Afova Vaya Ino

*Ma vompon ma uvantein banta ino.*

Bayá varen orin banta Sebetin anin Yoni ano ino.

*Uvarein orana ino.*

AD nainti (90) ráké mana antareti (100) fin mi ma vompon uvanten minon ten inikhen mino.

*Ma vompon ma uvantein baru ino.*

Esiá barafin ma áau orun perápá ma vain kákán baru Efesasi ino. Mai vanta karavusíi ono van Aisiní un nompin Patmosí musóká tiantan o váken mi Aúpá Baré ein Bayá Ma Sian Dákó Ukhein Bompon uvaren mino.

*Ma vompon ma uvaman amikhein kéká ino.*

Minó Yisasantá ma mumunan iyain kéká ino. Yutan kéká bá Kiriki kayo vá inká Romú nanin banta ma monó tiyan mumunan iyain kéká bái ino.

*Nái ana vará ma vompon uvan-ten nafino.*

Ma vompon ma yankafin nain kéká ano Yisasin nan Tiyarafenu Anin mino siren afová ino van mino.

*Bayá Ano Vantaí Uven Ma Varará Tetí Ankan Má Baren Mino*

<sup>1</sup>\*Esé aráien minó daná ída afoká ukhan Bayá varen mino. Bayá ano Tiyarafenu vá báken mai Vaya ano Tiyarafenun baren

\* **1:1:** Yon 17:5; 1Yn 1:1-2; Rev 19:13 \* **1:3:** 1Ko 8:6; Kor 1:16-17; Ibu 1:2

\* **1:5:** Yon 3:19 \* **1:6:** Mat 3:1; Ruk 1:13-17, 76

3:3-6; 1Pi 1:23 \* **1:14:** Fir 2:7

mino. <sup>2</sup> Esé aráintá Bayá ano Tiyarafenu vá baren mino.

<sup>3</sup>\*Tiyarafenu ano véin pinté anan minó daná uvamádan afoká ukhen mifo mana yaná ano veyan táké ída afoká ukhen mino.

<sup>4</sup>\*Ayun ma fara van oriyan ban aunan béimpin bákán mai aunan manon minó nanin banta oon uruanten mino. <sup>5</sup>\*Mai oon mano sítipafin kiyan bákán maen titípa ano ída véin iyákaren mino.

<sup>6</sup>\*Tiyarafenu ano monó non péantan banta Yonin tiantan eren mino. <sup>7</sup>Mai ma erein béisano mai ooni vaya sian amá urantin minó nanin banta ano veni vaya iniren mumunan ino van mino. <sup>8</sup>Mai ooni vaya máa sian amá ono van mi Yoni eren mifo véi ída mai oon mino. <sup>9</sup>\*Mai ma fura sikheiñ oon mano ma vanasi kakhaantiyain manon ma varará eriyan mino.

<sup>10</sup>Tiyarafenu ano véin pinté uaren bara uvantaré íkan béisano ída véin oman afová en mino. <sup>11</sup>Béisano vará anará erin mifo vei kéká ano ída véin aviren mino. <sup>12</sup>Ída aviren mifo véintá ma mumunan ein nanin bantan maman Tiyarafenu akhafanaien mino.

<sup>13</sup>\*Betí ankan be anóe afóeni narera safi aui anunura safi vantai anunura safi ída Tiyarafenu akhasí ukhen mino. Tiyarafenu ano veyantái vetin maman be akhasí ukhen mino.

<sup>14</sup>\*Bayá ano vantaí uven ma varará tetin aúbaná baren mino. Tetí ankan inka veni kakhaní ákoné tiféuno. Mai mana iyampon ma ve Afóe ano siantan ma ereini kakhan bákán inká beni sarisari vá puntákein avúavá bá béimpin bíkakhen mino.

<sup>15</sup>Mai van mi Yoni máa sen oovaren banasi siamemí, “Ten toyampá ma eriyain banta mai séi ída báváun béisano fe vá ein bantan bákán

beni ákona ano séin esantakhá ma vanta van mi séi gefá tiretin tiamikharé uno.<sup>16</sup> Mai vantafin tarisari ano moéken bikakhái setí ankan ena ena yamú beni avábá bariyá tiféuno.<sup>17</sup> \*Para vara seyo, Mosesin pinté uaren mi Tiyarafenu ano setí ankan man bayá simen mifo sarisari vá puntákein avúavá bá mai Tiyarafenu ano ma aní ukhein banta Yisasini pinte nan baré tiféuno.<sup>18</sup> \*Ída mana yanta ano Tiyarafenun onten mifo ve Anin mano anan be Afóen ádé báken mai véi Tiyarafenun ban mi ve Afóeni vaya setin tisimen mino.

*Monó Non Péantan Banta  
Yoni Ano Ma Yisasini Aa Uvíden  
Puntáantein Baya Ino*  
(Matiu 3:1-12; Maki 1:7-8; Ruku 3:15-17)

<sup>19</sup> Yutan nanin bantai anon banta kayo ano monó doran banta kayo vá Rivai kayo\* vá tiantákan Yerusalemí me ampiren Yonin mo máa sen inaemí, “Éi Tiyarafenu ano ma aní ukhein banta fono.”

<sup>20</sup> Máa síkan Yoni mai vaya ída umeren mifo amáká máa sen tiádemí, “Tiyarafenu ano ma aní ukhein banta va uno.”

<sup>21</sup> \*Ída ino síkan betí ankan bén inaemí, “Mai éi sakhanampa vanta Iraiya fono,” síkan “Béi va uno” siyaimpin evaránen inaemí, “Mai éi sakhanampa vanta fono” síkan “Ída ino” sen mino.

<sup>22</sup> Máa siyaimpin evaránen bén inaemí, “Mai éi eyan nan iye unó tiya fono. Setin tisimesirá evaránen mai ma sisintá erikheruna kayo mo siameno.”

<sup>23</sup> Síkan Yoni vetí ankan tiamemí, “Pefá ma sakhanampa vanta Aisaiyan oorá ma sen kámá bara fáké ma oovaren, ‘Bafani aa funtarano’ ma sikhá ein mai séi uno.”  
*Ais 40:3*

<sup>24</sup> Máa siyaimpin mai ma Fara-sisi kéká ano ma siantan erikhá ein kéká ano Yonin máa sen<sup>25</sup> inaemí, “Mai éi ma ída Tiyarafenu ano ma aní ukhein banta fo Iraiya fo áa sakhanampa vanta fo ma vanteya mai fará banasi monó non péantiya fono.”

<sup>26</sup> Máa siyaimpin Yoni evaránen betí ankan tiamemí, “Téi nompói féantiyá umpo sirétin aúbanápín mai mana vanta váka ída afová ukha ono.<sup>27</sup> \*Téi ída funtákerung ída kanaié mai ma sen toyampá eriyain bantai arantan anamun anan útufonté uno.”

<sup>28</sup> Yodení non ufá mana sito baru Betaní Yoni monó non péantiyákan mi mai yaná afoká en mino.

*Yisasi Maen Tiyarafenu Arará  
Sipisipi Ino*

<sup>29</sup> \*Ená damú Yisasi ma Yoni vaintá erikan ma onen máa semí, “Onano. Mai Tiyarafenu sipisipi arará ino. Ma vará ráke nanin bantai ume ma arúantan mino.

<sup>30</sup> \*Ten toyampá ma eriyain banta mai séi ída vákun béis fe vá ein bantan bákan beni ákona ano séin esantakhe ne ma séku inikhá eona mai ma vanta van mi sikháré uno.<sup>31</sup> Téi ven ída afová é amino ukhéi Tiyarafenu ano ma aní ukhein banta ino sen Isarerí nanin banta ano afová ino van mi monó non máan péantiyá uno.”

<sup>32</sup> \*Máa siren Yoni sian dákóen mí, “Téi onékun inaru fáké kukhofá nun avúaváká ten Kantá Aunan mano ven ánontá eren mino.<sup>33</sup> Eren mifo séi seyantá bein ída afová ukhékun mi Tiyarafenu ano séin tisintá me vanasi nompó péantiyá uno. Pefá Tiyarafenu ano séin máa sen tisimikharen mino. Onesin ma mana vanta ánontá ma Kantá Aunan ma eran nain mai vanta anon Kantá Aunan poké banasi

\* **1:17:** Eks 34:28; Rom 6:14      \* **1:18:** Eks 33:20; Yon 6:46; 1Ti 6:16      \* **1:19:** Rivai e ma siyain maen mai monó doran banta kékái ayain banta kayo ino.

\* **1:21:** Diu 18:15, 18; Mat 11:14      \* **1:27:** Yon 1:15      \* **1:29:** Ais 53:6-7; 1Pi 1:18-19      \* **1:30:** Yon 1:15      \* **1:32:** Mat

3:16      \* **1:34:** Mat 3:17

non peántanten mino.”<sup>34</sup> \*Máa sikhareí téi ódaréí Yisasin nan Tiyarafenu Anin mino sé tian amá é uno.”

*Yisasi Ma Araí En Bei Eyo Iyampon Kayo Arein Baya Ino*

<sup>35</sup> Máa sirákaren ená damú Yoni evaránen bei eyo iyampon kanan má mairá o mantakharen mino.

<sup>36</sup> \*Mantakharen onan Yisasi entavíkan Yoni semi, “Onano. Mai Tiyarafenu sipisipi arará ino.”<sup>37</sup> Máa síkan mai eyo iyampon kanan mano iniren Yisasin avákuren oren mino.<sup>38</sup> Avákuren oríkan Yisasi yovaéan onen békaranan máa sen inaemí, “Nái vará dosiyan tafono” síkan. Békaranan evaránen inaen temí, “Aru soe, inte namuná éi vaonafino.”

<sup>39</sup> Máa síkan Yisasi evaránen békaranan tiämémí, “Tiré kanan eriveya onano,” siren kamí kamí áauí iyákan aviren be ma vain namumpin o vákan e varen dunin baren mino.

<sup>40</sup> \*Kankanan banta ano ma Yonin avaya ma iniyá ein pinté Saimon Pitán afá aváen Enduru anon Yisasin avákuren oren mino.

<sup>41</sup> O varen ma Yisasin me ampiren maen Enduru ma esé daná barein mai ve afá aváe Saimonin dosiren máa sen tiämémí, “Tetí ankan inka Mesian oné uno.” (Mesia ne ma siyain mai máon mi sikhen mino. Tiyarafenu ano ma aní ukhein banta ino.)<sup>42</sup> \*Máa sen tiämireni Enduru ano Saimonin aviren Yisasi vaintá oríkan Yisasi véin ódaren temí, “Yonin anin Saimoni oe, éi nan ínaiimpá Sifasin ne sinten mino. Mai avíi ana Kiriki\* vaya finté Pitán nen tikhen mino.”

*Yisasi Ma Firipin Nú Natanierin Nú Arein Baya Ino*

<sup>43</sup> Ená damú Yisasi Karirifá orono van iyaren Firipin onen tiämémí, “Éi ere sen tivákurono.”

<sup>44</sup> Endurun nú Pitán núi varu ana Betsaidái vákon Firipin má dere mai varu ráke vanta ino.

<sup>45</sup>\*Firipi ano Natanierin o omáken tiämémí, “Mosesini man bayafin má sakhanampa vanta kayoi vompompin má ma sikhá ein mai vanta Yosepin anin Nasaretiké Yisasin baréí setí ankan inka oné tiféuno.”

<sup>46</sup> Máa síkan Natanieri evaránen bén inaemí, “Nasaretiké kaná mana kama yaná afoká inten nafno.” Síkan Firipi evaránen bén tiämémí, “Erikhe vá onano.”

<sup>47</sup> Máa siran Yisasi vaintá Natanieri eríkan ódaren temí, “Onano, ma vantafin ída mana kampun haya vá avúavá bá bákan bél Isareri vanta uron mino.”

<sup>48</sup> Máa síkan Natanieri evaránen Yisasin inaemí, “Éi intesá ureyá téin afová ukhare vae,” síkan Yisasi evaránen bén tiämémí, “Firipi ma ída éin arakhaya fiki yaa anafin baná téi éin ontaré uno.”

<sup>49</sup> \*Máa síkan Natanieri evaránen bén tiämémí, “Aru soe, éi Tiyarafenu Anin Isareri kayoi kin mono.”

<sup>50</sup> Máa síkan Yisasi evaránen bén tiämémí, “Téi fiki yaa ana ráke éin oné uno ma seruna mairasá éi mumunan iya fono. Ínaiimpáke mai esantakhein kákán danasintan onan nono.”

<sup>51</sup> \*Máa siren bén tiämémí, “Téi fura siré tiretí ankan tiämí uno. Ínaiimpáke tiretí onesin maen inaru ona yivintin Tiyarafenu enisorí kayo ano Banta Anintá ódiven eraven inten mino.”

## 2

*Yisasi Ma Non Maman Uvainíi Ein Baya Ino*

<sup>1</sup> Kan damú orivíkan Kariri varafin Kaná barurá anasi iran omá bákon maifin Yisasin anóen aran o varen mino. <sup>2</sup> Yisasin má

\* **1:36:** Yon 1:29   \* **1:40:** Mat 4:18-20   \* **1:42:** Mat 16:18   \* **1:42:** Máí kan bíi ana mai onámána sen tikhen mino.   **1:45:** Diu 18:18; Ais 7:14; 9:6; Yer 23:5; Isi 34:23   \* **1:49:** Mat 14:33; 16:16; Mak 3:11   **1:51:** Esé 28:12

bei eyo iyampon kayo vá dere arákán mai omápin o varen mino.  
<sup>3</sup> O varé íkan uvaini kípavín be anóe ano Yisasin tiämémí, "Uvaini inka kípakhán mino."

<sup>4</sup> \*Máa síkan Yisasi evaráne vein tiämémí, "Tinóe oe, pará téin e saraan maifin kaiya vae. Ída senti Yamú erikhá uno."

<sup>5</sup> Máa síkan be anóe ano yoran banta kayo siämémí, "Béi ma siamin nain baya ánaín ná dakhafe vá mai yaná barano."

<sup>6</sup> Yutan kayo ma vetí monópin ma variyain avúaváká ma non peré iyain bara kave máa yan manápá ifo afápá mana un kádan bákán mai mana mana kavefin mana antareti (100) ritán non báiyán mino.

<sup>7</sup> Yisasi yoran banta kayo siämémí, "Kave kayofin non dáan bíkáno," síkan betí ankan non dáan mai kave kayo vikaan kaen mino. <sup>8</sup> Bíkarákan Yisasi mai yoran banta kayo siämémí, "Mai fintena manáa non dafeya omá afóen mo ameno." Síkan betí ankan dafen mo amen mino. <sup>9</sup> Amíkan mai ma omaká dafíkáien banta ano mai uvaini máden naan onákán ase iyaimpin mai uvaini inte fáken nafi véi ída afová ukharen mifo mai ma non dáan me amein kayo ano anan afová ukharen mino. Máa tukhan mai omá afóe ano anasi ma iman amin nain banta araren <sup>10</sup> béin máa sen tiämémí, "Kama ase ma iyain uvaini naren masiman uran ma minó banta kayo ano ma naran amu aruvín maen mi ínaiimpákéi ída ase uvaini amiyan mi éi kama uvaini fara káudákareya saréan bare ere ono."

<sup>11</sup> Máa mi en Kariri varafin Kaná barurá Yisasi araeñ enará ukhein daná ma afoká ein mai vei kakhan má ákona vá aní uran mai van mi vei eyo iyampon kayo ano ódaren béintá mumunan en

mino. <sup>12</sup> \*Máa turan mai oyampáké Yisasi ve anóen má be afá kéká bá bei eyo iyampon kayo vá Kaná baru me ampiren Kape-niamú barurá manáa Yamú orun baren mino.

*Yisasi Ma Kákan Monó Namun Pinte Ma Minó Daná Sarín Banta Kayo Yo Siantein Baya Ino*

(Matiu 21:12-13; Maki 11:15-17; Ruku 19:45-46)

<sup>13</sup> \*Baré íkan Yutan nanin bantai Avo Uantan Damú ádé iyaimpin Yisasi Yerusearemí oren mino.

<sup>14</sup> Oriyen onákán monó dafufin kao vá sipisipi vá kukhofá nun kayo vá sarí iyákán inká moní ma arumín kayo ano karáká kumaníyan kumantan mino. <sup>15</sup> Máa tiyákán Yisasi mana ákona anan máden unen unaren mai anan dafiyó póké mai ma monó dafufin ma yan baré ein kao vá sipisipi kayo vá ankamen intaniyáken moní ma arumiýá ein kayo vá dere vanaan karúdaren minó tiantan barufá araven mino. <sup>16</sup> Araviyain má dovaéären kukhofá nun kayo ma yáken sarí iyá ein banta kayo siämémí, "Mai yanasinta mamare orono. Ída vá Tifóen amá minó daná kaúdiyan ma miyan baran namuní ono."

<sup>17</sup> Máa tiyan ma mai avúavá bei eyo iyampon kayo ano oniyáken Tiyarafenui vompon dókifin ma máa sikharé ein baya ovaren me inen mino.

"En ama san tiran nakhan mai ano súpín ira ma kheiní iyan mino." *Íbo 69:9*

<sup>18</sup> Yisasi máa tiyain má Yutan kayoi ánon banta kéká ano mai avúavá ódaren béin máa sen in-aemí, "Tiyarafenu fintena ma éi mai avúavasí in ákona ma mantanteya mae mai éi mana enará ukhein aní daná aní í óderá mai fura yaná ino seno."

<sup>19</sup> \*Máa síkan Yisasi evaráne betí ankan tiämémí, "Tiréti ankan

\* 2:4: Yon 7:30; 8:20

\* 2:12: Mat 4:13

\*

2:13: Eks 12:1-27

\* 2:19: Mat 26:61; 27:40

ma kákən monó namun ma varákuresí maé téi kanú manaú damú anan evaráné uvaman kípanté uno.”

<sup>20</sup> Mápá síkán Yutan kayo ano evaránen temí, “Foti sikhisi (46) oranarái ma kákən monó namun uvantein mifo éi kanú manaú damú aná uvaman kípantó tiya vae.” <sup>21</sup>\*Mápá sen mifo mai Yisasi ve au van mi kákən monó namuntá o siáden mino. <sup>22</sup>\*Béi ma masí pinté e mantavin maen mi veni eyo iyampon kayo ano mai ma sikhá ein baya afová uren mi Tiyarafenu vaya ma vompon dókifin uvamádán baré ein má Yisasini vaya vá ovaren inen mununan en mino.

### *Yisasi Ma Minó Nanin Bantai Avúavá Bá Ineine Vá Afová Ukhein Baya Ino*

<sup>23</sup>\*Avo Uantan Damú ma Yisasi Yerusalemí báken ma kokhon enará ukhein danasinta ma anúin onein nan minó nanin banta ano véintá ana mumunan en mino. <sup>24</sup>Máan tiyan Yisasi minó nanin bantai ineine afová ukhen pasen betí ankan ída kamú máan amen mino. <sup>25</sup>Mai véi ída afova van o afasí ukhantin pasen mana vanta ano ída véin tiaminten mino. Para vara seyo, minó nanin bantai avúavá bá ineine vá béisí afová ukhen mino.

## 3

### *Yisasi ma Nikodimasin Afova Amein Baya Ino*

<sup>1</sup>\*Maná Farasisi vanta Nikodimasi maen Yutan kayoi ánon bantan baren mino. <sup>2</sup>Baren mana inúpá duntein pinté Yisasi má baya seno van eriven béisí semí, “Aru soe, setí ankan minó ano éin afová ukhékun Tiyarafenu ano setí ankan afova simeno van tiantaya erikha ompo mana vantafin ma Tiyarafenu ma ída vantin maen éi ma enará ukhein

danasinta ma uvariyaonaén ída uvaranten mino. <sup>3</sup>\*Mápá síkán Yisasi evaránen béin tian amá uan amemí, “Téi fura uron tiré éin tiamiyá uno. Banasi ano ma ída evaránen auyení inain mano ída kanaén Tiyarafenu yafisin baru onanten mino.”

<sup>4</sup> Mápá síkán Nikodimasi evaránen béin inaemí, “Intesá uren ná anon bantaí ma uvín nain mano evaránen auyení intéi vae. Be anóen arápin ná evaránen un pébintin ná enádá kainten nafino.”

<sup>5</sup>\*Mápá síkán Yisasi evaránen béin tiamemí, “Pura uron tiré éin tiamiyá uno. Banta ano ma non ná Aunan nuká ma ída auyení inain mano ída kanaén Tiyarafenu yafisin barufin oferanten mino.

<sup>6</sup>\*Au ano ma afoká é iyain daná mai au ina ifo Kantá Aunan mano ma afoká é iyain mai yaná Kantá Aunan nina ino. <sup>7</sup>Evaráneya auyení ono ma séi siyaruna vayará éi ída vá anú duman dumán ono. <sup>8</sup>Uva ano vei anunurá minó pimpá orera iyákaya avaya anan iniyákeya inte fákesá eriaren intefasá oriyan nafi mai ída afová éiya ono. Kantá Aunantá ma auyení iyain kayo ano máan manan ukhen mino.” <sup>9</sup>Mápá síkán Nikodimasi véin evaránen inaemí, “Mai ma siyaona yaná intesá en na afoká intéi vae.”

<sup>10</sup> Mápá síkán Yisasi evaránen béin tiamemí, “Éi Isarerí kayoi arú banta ompo intesá ukhayá ma yaná ída afová iya vae. <sup>11</sup>Téti ankan ódaré afová ukheruna yana san mi fura siré tiretin tiamiyákeyai siréti ankan mai vayará ída mumunan iya ono.

<sup>12</sup>Téi ma vara rákena yana san mi siyákeya sireti ída mumunan iya ompo inaru rákena yana san ma sékuya intesá ureyá mairá mumunan inte fono. <sup>13</sup>Ída mana vanta ano inarufá ódikhen mifo

\* 2:21: 1Ko 6:19 \* 2:22: Ruk 24:6-8; Yon 12:16 \* 2:23: Yon 7:31 \* 3:1: Yon 7:50;  
19:39 \* 3:3: Mat 18:3; 1Pi 1:23 \* 3:5: Isi 36:25-27 \* 3:6: Yon 1:13

Banta Anin mano veyákai inaru fáké erakhein bái anan evaránen ódinten mino.<sup>14</sup> \*Pefá ma vanta ída van kámá barafin ma Mosesi ano ma osafae aman manon uváden daa amankampin ma intáneinén Banta Anin maman daní urantin ma<sup>15</sup> \*véintá mununan inain nanin banta ano ída kípon para van oriyán ban aunan baranten mino.

<sup>16</sup> \*Para vara seyo, Tiyarafenu ano auuanon tákena mana ain iyampon uró dákaren barará nanin banta van moéken anunu uaren mai iyampon betí ankan amen mifo véintá ma mumunan inain nanin banta ano ída o afeyoran para van oriyán ban aunan baranten mino.<sup>17</sup> \*Banas yaimin novara Tiyarafenu ano ve Anin tiantan barará ereñ na ino. Béi ma vara rákena nanin banta aya uren evaránen avirano van mino.<sup>18</sup> \*Tiyarafenui auuanon tákena mana iyampon uró ma vaintá ma ída mumunan iyain nanin banta kéká pefái yaimáon afeyorampin ban mifo mai mana iyampontá ma mumunan iyain kayo ano ída afeyoranten mino.<sup>19</sup> \*Mai ma yaimin naini ana máon mi ukhen mino. Kakhan ma varará erakhen mifo vanasi ano namu avúavá anan bariyan kakhan nan ída aran niyan mino.<sup>20</sup> Namu avúavá ma variyain kéká ano mai kakhani namuron báken betúi avúavá maman dákó inain nan péden ída kakhantá erinten mifo<sup>21</sup> funtákein avúavá ma variyain kéká anan kakhantá erintin Tiyarafenui ákonarái yoriyan mino sen onanten mino.”

*Monó Non Péantan Banta Yoni Ano Ma Yisasin Aví Dani Ein Baya Ino*

<sup>22</sup> \*Máa siren mai oyampáké Yisasin má bei eyo iyampon kayo

vá ano Yerusalemí me ampiren Yudiá barafá o váken banasi monó non péantiyaren mino.<sup>23</sup> Máan tiyákan monó non péantan banta Yoni ano Aenoní barurá Sarimí ádé bákan mairá kokhon non eraviyákan banasi ano monó non perano van eríkan Yoni vetí ankan monó non péantiyaren mino.<sup>24</sup> Mai Yonin ma ída karayusifin pákaan kaúdakan mi máon tiyaren mino.<sup>25</sup> Máan tiyain damú ana Yonini eyo iyampon kayo vá mana Yutan banta vá ano Tiyarafenu avorá ma avusesein avúava san araíen asive asive en mino.<sup>26</sup> Máan turen Yonini eyo iyampon kayo ano véin me siamemí, “Aru soe, Yodani non ufákena ma éi ódare ma mai vanta van Tiyarafenu ano aní ukhein banta ino ma seona vanta anon monó non péantiyán maifá anan banasi oriyáken tetí ankan barunafá ída eriyan mino.”

<sup>27</sup> Mái síkan Yoni evaránen betí ankan tiamemí, “Inarufá ma vain Tiyarafenu ano mana mana vanta yoran amídú ukhen mino.

<sup>28</sup> \*Tiyarafenu ano ma aní ukhein banta vaumpo séi veni aa uvisen erin banta unon tékuyan inikha ono.<sup>29</sup> Mana vanta ano ma anasi mádon mai nanin mano ven anasii iyan mifo véin má ma avunté iyá ein mano ma anasi varan baya inire amusin iyainíien téin túpin timusin bíken mino.<sup>30</sup> Béin aví dani suron intiná ten tiví bararasá eravino.

<sup>31</sup> \*“Béi inaru fákéi erikhen pasen minó esantakhen mino. Téi ma vara ráke vantán báké ma varai avúavá anan afová ukhé umpo véi inaru fákéi erikhen mino.<sup>32</sup> \*Máan tukhan mi véi inire ódein dana san mi siamian mifo ída mana vanta ano mai vaya fákaan ákona uren mairá mumunan iyan mino.<sup>33</sup> Inte

\* 3:14: Nam 21:9; Yon 8:28; 12:32    \* 3:15: Yon 20:31    \* 3:16: Yon 3:36; 10:28; Rom 5:8; 8:32; 1Yn 4:9-10    \* 3:17: Ruk 19:10    \* 3:18: Yon 5:24    \* 3:19: Yon 1:5, 9; 8:12    \* 3:22: Yon 4:1-2    \* 3:28: Mat 11:10; Yon 1:20    \* 3:31: Yon 8:23    \* 3:32: Yon 3:11

nanin banta anó mai vaya fákaan ákona uren ná mairá mumunan iyan nafi mai anon Tiyarafenu van pura vaya siya ne sé iyan mino.<sup>34</sup> Tiyarafenu anon mai vanta siantan erikhen beni vayan tiyan mino. Para vara seyo, Tiyarafenui Aunan mano véimpin bíkakhan mino.<sup>35</sup> \*Be Afóe ano ve Anin nan anunu uren minó danáká ma yafisin ákona véin ayampin amen mino.<sup>36</sup> \*Be Anintá ma mumunan inain nanin banta ano ída kípan ayun para van oriyan ban aunan baranten mifo ve Anini vaya ándaín ma ída vákurin nain nanin banta ano ída kanaíen aunan barantin Tiyarafenui aran daná ano vetin má banten mino.”

## 4

### *Yisasi Ma Sameriá Nanin Má Baya Sein Baya Ino*

<sup>1</sup> \*Yisasi ma vañasi monó non péantiyán ma veni eyo iyampon kayo mo kokhoníen ma Yonini eyo iyampon kayo eantiyain baya Farasisi kayo ano inen mino.<sup>2</sup> (Mai maen Yisasi va monó non péantiyaren naifo vei eyo iyampon kayo anon péantiyaren mino.)<sup>3</sup> Mai ma Farasisi kayo ano afová ein baya Yisasi iniren Yudiá bara me ampiren Kariri varafá evaránen oren mino.

<sup>4</sup> Sameriá bara aúbaná ma orikhein aa vá béis yakhafen orino.<sup>5</sup> \*Máon tukhan béis oriyaren mana Sameriái varu Sikha se sikhein barurá Yekopu ma ve anin Yosepin amikhá ein bara ádé oren mino.<sup>6</sup> Órikan bayan áqui en ayá aintá ma eriyá ein mano Yisasin ayampa yíkan Yekopuni non masí mairá baré in mai masí avafá o khumanen mino.<sup>7-8</sup> O khumantán bei eyo iyampon kayo minó ano evúten dunan miyaní ono van kákan barufin orivíkan beyaká ana

varéin mana Sameriá nanin mano non dafono van erin Yisasi véi nan temí, “Non dáan timí nano.”

<sup>9</sup> \*Máa síkan mai Sameriá nanin mano anú duren temí, “Ída Yutan kayo vá Sameriá kayo vá manafiní ukhein mifo éi Yutan bantan ban ná téi Sameriá nanin mí vá umpo éi fará non nan inantiya fono.” Mai fara va máa sen naino, Yutan kéká bá Sameriá kéká bá ída manafiníen dunan má non má nakhein mi van mino.

<sup>10</sup> \*Máa síkan Yisasi evaránen mai nanin tiámemí, “Tiyarafenu ano ma ameno van iyain amusin má inká téi iyé bará éi vaípá non nan inantiya rafu mai éi afová e vareya séi vaípá inantesí mai ma fara van oriyan ban non amenunaren mino.”

<sup>11</sup> Máa síkan mai nanin mano semí, “Kákan banta oe, ma non masí námen mi vákayai éi ída non dafin kura vá anan má mantena sefo inte fákená mai ma fara van oriyan ban non dafinte vae.

<sup>12</sup> \*Erasan tinafu Yekopu ano ma ve anin kayo vá kao vá sipisipi kayo vá ma niyá ein mai non masí ma setin timikhá ein mai vanta éi esantakhe vae.”

<sup>13</sup> Máa síkan Yisasi evaránen béis tiámemí, “Banasí ano ma ma masí pintena non ma narantin evaránen non nan aiinten mino.

<sup>14</sup> \*Aiinten mifo séi ma amenuna non mano non nan ma aiin kípaantáden basasi aúpin non akharun mamen ída ma kípan para van oriyan ban aunan aminten mino.”

<sup>15</sup> Máa síkan mai nanin mano semí, “Kákan banta oe, mai non pintena manáa simikhesin ná enádá ída non nan tiintisá ma masí pintena ída ovaráne e yafono.”

<sup>16</sup> Máa síkan Yisasi mai nanin tiámemí, “Oreya e avafun o aviare ereno.”

\* 3:35: Mat 11:27; Yon 5:20    \* 3:36: Yon 3:16-18; 1Yn 5:12    \* 4:1: Yon 3:22    \* 4:5: Esé 33:19; Yos 24:32    \* 4:9: Esr 4:1-5    \* 4:10: Yon 7:37-38; Rev 21:6    \* 4:12: Yon 8:53  
\* 4:14: Yon 6:35

<sup>17</sup> MÁA síkan mai nanin mano semí, “Te sivafu ída vain mino.” Sikan Yisasi semí, “Éi fura se ono e avafu ída vain mino. <sup>18</sup> Ída vain mompo gefá éi yan manápá bantan mantareya saréa ma ven má baona vanta mai ída en avafun baya fura siya ono.”

<sup>19</sup> MÁA síkan mai nanin mano semí, “Kákán banta oe, éi mana sakhanampa vanta ono. <sup>20</sup>\*Téin tisimeno. Para é tiren ná minó Yutan kayo ano Yerusaremí mana monó tin baru van mino siren o átaru iná inká tetí tinafu siráo ano mará Kerisiní anurá ana monó tiyan nafino.”

<sup>21</sup> MÁA síkan Yisasi mai nanin evaránen tiamemí, “Téinti vayarásá mumunan ono. Damú inka eriyain ída ayáká ban mara safi áa Yerusaremi safi Sifóentá minó ano monó tinten mino. <sup>22</sup>\*Máan tin nompo sireti Sameriá kayo ano ma monó tiyaona mai yaná ída afová ukha ompo seti Yutan kéká ano ana ma monó tiyaruna mai yaná minói afova ukhé tifékun mi Tiyarafenu ano sétin aní uren banasi evaránen aviran doran timikhen mino. <sup>23</sup> Timikhen mifo yamú eriyákan mafin inka fe e van mino. Kantá Aunani ákonará ma fura sikhein ayúaváká ma Sifóentá monó tin nain mai nanin banta van mi Sifóe ano veyantá monó tino van anunu ukhen mino. <sup>24</sup>\*Tiyarafenu maen Aunan mi van mifo vá béintá ma monó tin nain kéká ano Kantá Aunani ákoná vá pura ayúavá bá pókesá benta monó tino.”

<sup>25</sup> MÁA síkan mai nanin mano semí, “Téi afová ukhékun Tiyarafenu ano ma aní ukhein banta ma eriven maen mi véi anon kanaíen minó daná tian amá intí iné tifanté uno.”

<sup>26</sup>\*MÁA síkan Yisasi evaránen mai nanin tiamemí, “Mai ma siyaona vantán ma séi váankuno.”

\* **4:20:** Diu 12:5-14; Íbo 122:1-5    \* **4:22:** 2Ki 17:29-41; Ais 2:3; Rom 9:4-5    \* **4:24:** Rom 12:1; 2Ko 3:17; Fir 3:3    \* **4:26:** Mak 14:61-62    \* **4:34:** Yon 6:38    \* **4:35:** Ruk 10:2

*Eyo Iyampon Kayo Ma Ovaránen Yisasi Vaípá Erein Baya Ino*

<sup>27</sup> Yisasi ma Sameriá nanin má baya siyá íkan ma vei eyo iyampon kayo ano ovaránen e oniyáken maen betí ankan anú duren mana ano véin nan para mai nanin má baya siyayá nái bariya fono sen ída inaen mino.

<sup>28</sup> Mai nanin mano vei non kave me non masí avafá kaúden evaránen kákán barufin oriven minó nanin banta siamemí, <sup>29</sup> “Maná vanta ano séin ma gefá bariyáeruna avúavá máa sisimiyan mifo mai maen Tiyarafenu ano ma aní ukhá ein bantá ban nafi eriveya onano.” <sup>30</sup> MÁA siyain má minó nanin banta ano mai varu me ampiren Yisasin onano van ere ere en mino.

<sup>31</sup> Eriyain má Yisasi nan dunan nano van bei eyo iyampon kayo ano yuvun en mino. <sup>32</sup> MÁA síkan evaránen temí, “Ída ino. Tenti yunan ma vain tiretí ankan ída afová ukha ono.”

<sup>33</sup> MÁA síkan beni eyo iyampon kayo ano veraran máa sen oreraemí, “Iye anó dunan baren ná me amikhan ná tino.”

<sup>34</sup>\*MÁA siyaimpin Yisasi evaránen betí ankan tiamemí, “Tenti yunan ma vain mai Tiyarafenui anunu ánaín ma vákuren beni yorarí uan ma kípan mino. <sup>35</sup>\*Tiretí ankan ídá teyá ‘kamí kamí biyon ma orivitíi yunan duyasenté uno’ séiya fono. Tiretí ankan ná minó pimpá one eúkono yunan inka karaaren duyasirí ukhen mino.

<sup>36</sup>Dunan ma yuyasin banta kayo ano kama miyan mi variyan mino. Mai yunan ma yuyasiyaini aran mi mai vanasi ma aviren ída kípan para van oriyan ban aunampin ma mo kaiyain mino. MÁAán tukhein nan mi yunan ma

yoran banta vá dunan ma yuyasin banta vá ano amusin inten mino. <sup>37</sup> Máon tukhan mi mai vaya fura sikhantin mana vanta ano ma yunan dódákáré intin maen ena vanta anon mai yunan duyasinten mino. <sup>38</sup> Máon tukhein nan mi sireti ankan ída yunan dore nan ena kayo ano ákona yorari uren dóádein dunampin mi sretin nan duyaseno van mi siantiyá uno.”

### *Sameriá Nanin Banta Ano Ma Yisasintá Mumunan Ein Baya Ino*

<sup>39</sup> Para va mai varu ráke Sameriá kéká ano Yisasintá mumunan en naino. Mai nanin mano ma gefá bariyá ein danasinta ma evaránen tiamein baya ma mai naniñ mano vanasi siamín iniren mino. <sup>40</sup> Mumunan uren betí ankan mano véin o oniyáken maen ayópá íkan mai varurá kan damú báken <sup>41</sup> kama vaya siyákan kokhon mano veni vaya iníden mumunan en mino. <sup>42</sup> \*Mumunan iyáken betí ankan mai nanin tiamemí, “Éin avaya inídesa seti mumunan erauno. Taréa setiyantái véini vaya inídéi mumunan iyá uno. Béi fura sen barará nanin banta ma aya uren evaránen aviran nain banta ino.

### *Yisasi Ma Kamanini Ayafa Vanta Anin Ayofein Baya Ino*

<sup>43</sup> Sameriá nanin banta vá bákan kan damú orivin maen Yisasi e mantan Karirifá oren mino. <sup>44</sup> \*Afovasá ono. Pefá Yisasi veyan nan máq sikhán mino. “Ena varafimpái sakhanampa vanta aví bain mifo vei vara anará ída véin aví ban mino.” <sup>45</sup> \*Oríkan Karirí nanin banta ano ódaren amusin iyan\* béin e aviren mino. Mai fara va ino Avo Uantan Damú béi ano Yerusalemí kákón monó dafufin enará ukhein danasi iyákan betí ankan ontaren mino.

<sup>46</sup> \*Kariri varafin mana Yisasi oriyaren béis ma gefá non maman uvainií ukhá ein Kaná barurá oríkan mana kamanini ayafa vanta anin aí iyan Kapaniamú barurá baren mino. <sup>47</sup> \*Baren iníkan Yisasin nan Yudiá me ampiren Karirifá e van ne siyaimpin mai vanta ano Kaná barufá oren Yisasin o yosiren béis má Kapaniamú oren mai ma ve anin aí iyan ma furono van iyain mo ayofano van ákonaen ínaen mino.

<sup>48</sup> \*Máa síkan Yisasi evaráne yéin tiamemí, “Enará ukhein daná bá aní danasinta vá ana afoká intiyá ódé mumunan ono van iya rafono. Ída para mumunan inte rafono.”

<sup>49</sup> Máa síkan kaminini ayafa vanta ano ákonaen inaen temí, “Bafan noe, se sanin purin nafo aine ereno.”

<sup>50</sup> \*Máa síkan Yisasi evaránen béis tiamemí, “E anin e asefa in ten mifo evaráne ei varufá orono,” síkan mai vanta ano Yisasi vayará mumunan iyáken bei varufá oren mino.

<sup>51</sup> Mai ayafa vanta ano ída Kapaniamú orikhen para ayanafá oriyákan manáa vei yoran banta kayo ano vaya varen ayanafá e fóken tiamemí, “E anin inka asefaen mino.” <sup>52</sup> Máa síkan béis yetí ankan inaemí, “Nái áau rasá te sanin e asefaen nafino.” Síkan betí ankan evaránen béis tiamemí, “Inuran inúpá mana áauí in mi veni aí kípen mino.”

<sup>53</sup> Máa síkan mairá be afóe ano mai ma Yisasi sen ma e anin e asefa inten mino ma sein áau ovare me iniren ben má bei kéká bá ano Yisasintá mumunan en mino. <sup>54</sup> \*Yisasi ma Yudiáke eriaren ma Karirifá e varen ma mayaná barein mai anon kan dádasi en mi enará ukhein daná afoká en mino.

\* **4:42:** 1Yn 4:14    \* **4:44:** Mat 13:57    \* **4:45:** Yon 2:23    \* **4:45:** Banasi ano ma mana vanta amusin uanté iyain maen mai yufúdáfú ma iyain mino.    \* **4:46:** Yon 2:1-11    \* **4:47:** Mat 8:5-6    \* **4:48:** Yon 2:18; 1Ko 1:22    \* **4:50:** Mat 8:13    \* **4:54:** Yon 2:11

## 5

*Yisasi Ma Mana Arantan Namu  
Ukhein Banta Ayofein Baya Ino*

<sup>1</sup> Ínaimpáké Yutan kayoi kákan monó tin damú afoká íkan Yisasi evaránen Yerusalemí óden mino.  
<sup>2</sup> Mai kákan dafu ona aví Sipisipii Ona e sikhein akhentá Yerusalemí kákan barufin mana non akharun bákan mai non akharun aví Iburu vaya finté Betesda e sikhan mai akhempá dan manápá dusesí uádan baren mino.  
<sup>3-4</sup> Baré íkan mai yusé kayofin kokhon aí nanin banta vá auu yufukhelin kayo vá arantan namu ukhein kayo vá ai ayan púkein kayo vá baren mino.\*  
<sup>5</sup> Bákán maifin mana vanta teti-eiti (38) oranará aí bain banta ano vakharen mino.  
<sup>6</sup> Mai vanta ayáká aí mantareín Yisasi afová en ódaren béis inaemí, “Éin au evaránen kama ino vará iya fono.”

<sup>7</sup> Máa síkan mai aí banta ano evaránen béis tiememí, “Kákán banta oe, non ma karantó intin ma sivian ten nare ma nompin kain banta ída vákan ena kayo ano anan ainen ten esantaaren nompin araviyá uno.”

<sup>8</sup>\*Máa síkan Yisasi véin tiememí, “Mantaveya ei yuvasí mamare orono.”

<sup>9</sup> Máa siyain má mai vanta au ainen manadá kama íkan bei yuvasí dádaaren oren mifo mai Sabati yamúi mai avúavasien mino.  
<sup>10</sup>\*Máa tíkan Yutan kayo ano ódgren mai vanta máa sen tiememí, “Sabati yamú doran nan airo ananí ukhein mifo éi fará ei yuvasí mamareyá no fono.”

<sup>11</sup> Máa síkan béis evaránen betin tiememí, “Mai ma sen tu ma kama usintein banta anón ‘Ei yuvasí mamareyá orono’ sen tisimikhá uno.”

<sup>12</sup> Máa síkan betí ankan mano véin ákonien inaemí, “Intéa vanta

anó éin tiamen ná ei yuvasí mamareya orono sen nafino.”

<sup>13</sup> Máa siyákan kokhon nanin bantafin Yisasi ofébin mai ma au kama uantein banta ano amino mino.  
<sup>14</sup> Amino ukharéin maen ínaimpáké Yisasi kákan monó na-mumpin ódiveen onákan mai vanta varéin máa sen béis tiememí, “Éi moéke kákan uman baran nampo vá au ma kama uveintá ída vá enádá umeí ono.”  
<sup>15</sup> Máa sirákan mai vanta ano Yutan kayoi ánon banta kéka san dosen oren mo vetin tiememí, “Ten tu ma kama usintein banta mai Yisasi ino.”

*Yisasi Ma Veyan Nan Ti-yarafenu Anin Muno Ma Sein Baya Ino*

<sup>16</sup> Sabati yamú anan Yisasi ano vanasi ayofiyaimpin mi Yutan kayo ano mai van béis namuroí uanten mino.  
<sup>17</sup> Máa uantiyákan Yisasi evaránen betin tiememí, “Te Sifóe ano fara yoren oriyan báken taréa yeren doriyan mifo mai fará téi ifá onte rafuno.”  
<sup>18</sup>\*Sabatirá ma yoran are ukharé ein Yisasi yurafuriyáken ma inká Tiyarafenu van te Sifóe uron mino ma sein nan Yutan kayo ano iníkan Tiyarafenu vá un manaí in bayá siyaimpin mai van ben aruan purin aa van dosen mino.

<sup>19</sup>\*Máa tiyákan Yisasi afová iyáken betí ankan evaránen tiememí, “Pura siré tiretí ankan tiámé uno. Be Anin mano ída kanaíen beyantá mana avúavasí inten mifo ve Afóe ano ma varan nain mai avúavá máa anan be Anin mano varanten mino.  
<sup>20</sup>Para vara seyo, be Afóe ano ve Anin moéken anunu iyáken mi ve ma variyain avúavá máa be Anin aní intin baranten mino. Máa intin ma ma ayofein banta esantaren moéken kákán ukhein danasinta varantiya mai avúavá san anúde

\* **5:3-4:** Manáa Tiyarafenu vompon dókifin ena vaya ano vesí 3 vá 4 vá máa sen asotú ukhen mino. Bafani enisorí ano mana mana yamú eriven non karantó in maen maifin ma esesién aravein nanin bantai aí kípaantiyaren mino. \* **5:8:** Mat 9:6 \* **5:10:** Nee 13:19; Yer 17:21 \* **5:18:**

orera inono. <sup>21</sup> Para vara seyo, fúká ein kéká ma ye Afóe ano orun avian mantiyainí anan en mi ve Anin mano ve ma anunu inain kéká kasaen aunan aminten mino. <sup>22</sup> \*Máon tukhan banta ma yaimin doran maen ída ve Afóe ano yaimé iyan mifo ve Anin mi mai yoran amikhen mino. <sup>23</sup> \*Máon tukhein nará be Afóen aví ma yaní iyaonaí e vá be Anin avisá daní ono. Banta ano ma ve Anin aví ma ída yaní inteya mai ven ma siantan erikhein Afóen aví ída yaní e ono.

<sup>24</sup> \*Téi fura siré tiretí ankan tiámé uno. Mana vanta ano ma sen tivaya inire ma séin ma sisintá erikheruna Tiyarafenurá ma munuman inona ano ída kípan ayun para van oriyan ban aunan baran nono. Beti ume ma yaimin ída vantén mifo veti gefái furin dafu finté ekháden para van oriyan ban aunañi yafufin erikhen mino.

<sup>25</sup> “Téi fura siré tiretí ankan tiámíyá uno. Damú ma afoká ono van iyá ein taréa inka afoká íkan pefá ma fúkaré ein nanin banta ano mai Tiyarafenu Anin avaya iniyantin inká mai vaya ma inin nain kéká ano fara ayun banten mino. <sup>26</sup> Para vara seyo, ve Afoé ma veyampin aunan amin ákoná vainíjen be Anin má ákoná amin be Anin má dere veyampin aunan ma amin ákoná van mino. <sup>27</sup> Inká béis Vanta Anin mi vákan basasii avúavá ma yaimin ákoná amikhen mino. <sup>28</sup> Máon tukhanti sretí ankan ída vá ma vaya van anú dureya kokhon ineine ono. Inka yamú ádé irí iyain púkein nanin banta ano Tiyarafenu Anini vaya iníden maen <sup>29</sup> \*masí pinté evaránen e mantaven maen kama avúavá ma variyaré ein kéká ano ída kípan para ayun ban oriyan ban aunan barantin inká namu avúavá ma variyá inain kéká ma kó tiantan naimpin oferanten

mino. <sup>30</sup> \*Máon tinten mifo séi mana yaná tesí ineine finté ída varanté umpo se Sifóen pintena ma vareruna vayan dakhafé basasii avúavá daiméiyá uno. Téi ída sesi sinunu yakhafin na séin ma sisintá erikheruna Sifóen anunun dakhafiyái séi ma yaimiyaruna ano funtáken mino.

### Tiyarafenu Ano Ma Yisasi Nan Pura Vanta Ino Sein Baya Ino

<sup>31</sup> Téi ma sesi sivútivá bá doran ma san ma seyantá tian amá iyákun maen basasi ano mai vaya van beyantái siyan mino siren ída ininten mino. <sup>32</sup> Maa sen ininten mifo ena ano ma senti sivútivá bá doran ma san ma siyantiya mai furan tiyan mino.

<sup>33</sup> Tiretí ankan Yonini vaya o iniren me siamino van manáa vanta kayo sianten nan orikhan mifo véi fura sikhein baya van mi sian amá ukhen mino. <sup>34</sup> Yonini avúavá baya ma sretí tiámíyaruna mai Tiyarafenu ano sretí ankan evaránen avirano van mumpo senti kama sivútivá bá doran baya vá ma sian amá inain mai ída varará banta kayoi yoran mino. <sup>35</sup> Mana oon ma uruádeiníi Yoni uven tiretin kakhaantayai sitó máará amusin erono.

<sup>36</sup> \*Máon te ompo Yoni ma yoriyáken tenti vaya sian afoká iyá ein mai séi veni yoran esantakhein dorarí iyáké kokhon enará ukhein aní danasinta variyá umpo mai minó doran Tifóe ano séin timikhen mino. Minó doran ma séi ma variyaruna ano vanasi avorá tian amá en Tifóe anon téin tisintá erikhé uno. <sup>37</sup> \*Erikhéun mi Sifóe ano veyantái sen nan tian amá ukhen mifo sretí ankan ída ven avaya ineya ayafen one ukha ono. <sup>38</sup> Máon tukhesin pasen tireti ankan aúpin ída veni vaya vanten mino. Mai fara va ino. Béin ma

\* 5:22: Yon 5:27; Apo 10:42    \* 5:23: Fir 2:10-11; 1Yn 2:23    \* 5:24: Yon 3:15-18    \* 5:29:

Dan 12:2; Mat 16:27; Apo 24:15    \* 5:30: Yon 5:19; 6:38    \* 5:36: Yon 3:2; 14:11    \* 5:37:  
Mat 3:17; Yon 5:32; 8:18

siantan erikhein bantai vayará ída mumunan iya nan mino.<sup>39</sup>\*Tiretí ankan Tiyarafenui vompon dókifin dankáde mai vaya yaíde afová e nan mai ano ída kípan ayun para van oriyan ban aunan timinten mino siya ompo mai Tiyarafenui vompon dóki ano séin nan mi siádan baré íkaya<sup>40</sup> saretí ankan téi vaípá ída eriveya ída kípan ayun para van oriyan ban aunan bariya ono.

<sup>41</sup> “Téi ma ma vaya kayo ma siyaruna mai vanasi fintena kákán bí baranova rauno. Ída ino.<sup>42</sup> Máan tukhein mifo séi saretí ankan afová ukhé uno. Tiretí ankan aúkáké ída Tiyarafenu van anunu ukha ono.<sup>43</sup> Téi Sifóen avíkái erikhé kuyai saretí ankan ída séinti vaya variya ompo mana vanta ano ma ve avíká ma erintiya mae saretí ankan manádái mai vantai vaya aine varan nono.<sup>44</sup> Tiretiyan mi kákán bí baran maran iyáke Tiyarafenu ano ma amiyain bí ída variya ompo intesá ureyá mumunan inte rafono.

<sup>45</sup> “Tiretí ankan ída vá ten nan Tifóen avorá daiminten mino se vá ineno. Tiretí ankan ma Mosesin nan tiya inten mino ma se inikhá eona mai vanta anon tiretí ankan daiminten mino.<sup>46</sup>\*Mosesini vayará pura sen mumunan e vareya mai senti vayará deren mumunan inonaren mino. Mai fara vara seyo, béis ma uvantaré ein bom-pompin mai sen nan mi sikhan mino.<sup>47</sup> Máa sikhan mifo mai ma véi uvanteré ein bayará ma ída mumunan inteya mai saretí ankan intesá ureyá tenti vayará mumunan inte fono.”

## 6

*Yisasi Ma Yan Manápá Tauseni  
(5,000) Vanta Yunan Amein Baya  
Ino*

*(Matiu 14:13-21; Maki 6:30-44;  
Ruku 9:10-17)*

\* 5:39: Ruk 24:27 \* 5:46: Apo 3:22

<sup>1</sup> Máa siran manáa yamú orivíkan Yisasi Kariri non ma ena ví Taibiriasi e siyain e kháden oren mino. <sup>2</sup> Oríkan kokhon nanin banta ano véin e vakuren oren mino. Mai fara va ino véi ma aí nanin banta ayofantá ma enará ukhein daná ma variyan ma ontaré ein nan mino. <sup>3</sup> Bákuren oriyákan Yisasin má bei eyo iyampon kayo vá ano mana anuyontá un kumanen mino. <sup>4</sup> (Yutan kayoi Avo Uantan Damú ádé eriyákan mino.) <sup>5</sup> Un kumantaren onákan kokhon nanin banta ano véi nan dosen amen édiyaimpin dovaéaren Firipin inaemí, “Tetí ankan ma ma nanin banta amékun nan nain dunan inte fákená miyaní ótifante rafuno.”

<sup>6</sup> Béis ma mai vaya ma sein mai veyan ma varan nain daná pé afová ukhen Firipin mi mai vayafo akhenóka uan onen mino.

<sup>7</sup> Máa síkan Firipi evaránen béin tiameemí, “Tetí ankan ma kan tauseni monipó ma yunan miyaní urékun maen ma nanin bantafin ída kanaíen kova inten mino.”

<sup>8</sup> Máa síkan mana vei eyo iyampon Saimon Pitan afá aváe Enduru ano evaránen Yisasin tiameemí,<sup>9</sup> “Masína mana iyampon mano yan manápá bereti vá kan noyana vá kain ban mifo ma nanin bantafin mai ano intesá uren ná kanaí inten nafino.”

<sup>10</sup> Máa síkan Yisasi vetí ankan tiameemí, “Minó nanin banta siamesin kuman ino,” síkan mairá kokhon kata varé íkan mai yaró kumanen oreraen mino. Maifin ma varé ein banta máa mai yan manápá tauseni (5,000) ino.

<sup>11</sup> Kumamíkan Yisasi vereti kayo orun máden Tiyarafenu susu siantáden kisian banasi amíden ínaiimpáke noyana kánan máden máan mana uren amíkan minó nanin banta ano nákan amú kuren mino. <sup>12</sup> Amú kuriyaimpin Yisasi vei eyo iyampon kayo siamemí, “Mai yunan antan tavifá eraven

afein nafo aían átaru ono.”<sup>13</sup> Mág síkan mai ma yan manápá bereti finke ma kisian banasi amin narákan ma amú kurin ifá ein antan kayo o éke e éke uren tiyan mikan mifo sirantan kan orun kádan (12) unan bíken mino.

<sup>14</sup> Mág tíkan mai ma enará ukhein daná ma aní ein minó nanin banta ano ódaren temí, “Pura uron ten mai ma Tiyarafenu ano siantantin ma ma varará erano van ma sikhá ein mai sakhanampa vanta ino.<sup>15</sup>\*Mág siren banasi ano Yisasin duvun intin kiní ino van iyain baya véi iniren afová iyáken mairá me ampirem beyaká anufá óden mino.

*Yisasi Ma Non Akharun Daró Orein Baya Ino*

(Matiu 14:22-33; Maki 6:45-52)

<sup>16</sup> Ódivíkan mai inúpá bei eyo iyampon kayo ano non akhempá orun béin ave ukharen mino.<sup>17</sup> Ave ukhan Yisasi ída ovaránen eríkan duniyaimpin non e kháden Kapeniamú orono van betí ankan botifin un kumanen mino.<sup>18</sup> Kumanen oriyaréin kákan uva uaren non karantó en mino.<sup>19</sup> Mai non aúbaná oriven onákan Yisasi non daró boti kakhaqren oriyaimpin betí ankan akhokho van en mino.<sup>20</sup> Akhokho van iyain má Yisasi oovaren temí, “Téin eriyá umpo ída vá akhokho van ono.”<sup>21</sup> Mág síkan betí ankan amusin iyáken béin botifin avian kaúdan mai voti ano manádá ainen mai ma oriyá ein barufá oren mino.

<sup>22</sup> Ena ákurá banasi ano Yisasin onano van mai non avaruni ena ufá o átaru en mino. Mai fara va ino. Ben má bei eyo iyampon kayo vá ano manápá erikharen mi véin me afá uren eyo iyampon kayo ano ana votifin un kumamen oríkan ontaren mino.<sup>23</sup> O átaru iyákan mai ma Bafan mano ma suusu siren bereti ma vanasi amin neintá manáa Taibiriasí kena voti kayo eren mino.<sup>24</sup> Mairá o

átaru uven onákan Yisasin má bei eyo iyampon kayo vá ída vaimpin minó nanin banta ano mai voti kayofin kumamiyan non akharun e kháden Kapeniamú mo Yisasin nan doseno van oren mino.

*Yisasi Aunan Ma Amin Bereti Ino*

<sup>25</sup> Banasi non e kháden ena ufá oriven Yisasin oniyáken mo véin inaemí, “Aru soe, ínté áau rasá éi mafá ere fono.”

<sup>26</sup> Mág síkan Yisasi evaránen betin tiameemí, “Téi fura uron tiré tiretí ankan tiameiyá uno. Téi ma enará ukhein daná ma aní iyaruna van ída iniya ompo sretí ankan inuran ma vereti amékuya ma nen nan amú kurein mai máa van mi se nan dosiya ono.<sup>27</sup>\*Mág tiya ompo sretí ankan ída vá ainen pútaen ma namuin dunan barano van ono. Banta Anin mano ma fara van oriyán ban aunan ma amin nain ná tiretí ankan ayampa ure vá doseno. Para vara seyo, Tifóe Tiyarafenu ano mai van mi véin tiantan erikhen mino.”

<sup>28</sup> Mág síkan béin evaránen inaemí, “Tetí ankan ínté ma ontesá kanaí é Tiyarafenu yorarí onté tife rafuno.”

<sup>29</sup>\*Mág síkan Yisasi evaránen betin tiameemí, “Tiyarafenu ano ma sretin amin nain doran mai máon mi ukhen mino. Béi ma siantan ma erikhein bantarásá mumunan ono.”

<sup>30</sup>\*Mág síkan betí ankan mai vaya iniren evaránen béin inaemí, “Mai éi íntéa enará ukhein aní daná ma aniesirá tetí ankan ódáresá éintá mumunan ótifante rafuno.<sup>31</sup> Para vara seyo, Tiyarafenu vompon dókifin máa sikhen mino. ‘Tinafu siráo ma kámá barafá nókan maen Mosesi ano inaru fáke manna e sin bereti amíkan nen mino.’ Eks 16:14-15; Nam 11:7-9; Íbo 78:24

<sup>32</sup> Mág síkan Yisasi vetí ankan tiameemí, “Téi fura siré tiretí ankan tiamey uno. Mosesi ano va

\* 6:15: Yon 18:36 \* 6:27: Yon 6:48-58 \* 6:29: 1Yn 3:23 \* 6:30: Mat 16:1; Yon 2:18

mai inaru fáke vereti amikhan naifo, se Sifóe anon amikharen mi inká taréa inaru fáke fura vereti amiyan mino. <sup>33</sup> Para vara seyo, mai Tiyarafenu fura vereti uron manon inaru fáké erakhen barará nanin banta aunan amiyan mino.”

<sup>34</sup> Máa síkan betí ankan temí, “Kákán banta oe, ena ena yamú mai vereti vá tetin timeno.”

<sup>35</sup> \*Máa síkan Yisasi vetí ankan evaránen tiämémí, “Téi aunan amin bereti umpo séi varunafá ma erin nain mano ída arafanan inten mino. Tentá ma mumunan inain mano ída enádá non nan ainten mino. <sup>36</sup> Tireti ankan téin tonte ompo ída mumunan iyanái siamiyá uno. <sup>37</sup> Tiamiyá umpo Sifóe ma simikhein kéká ano ma se vaipá erintí maé téi ída uron mi vetí ankan evaráne tiantanté uno.

<sup>38</sup> Para vara seyo, séi sesi sinunu ánaín dakhafó novara inaru me ampiré erakhe raumpo mai ma sisintá erakheruna Sifóeni anunu ánaín dakhafono van mi erakhé uno. <sup>39</sup>\*Erakhé umpo mai ma séin tisintá erakheruna Sifóeni anunu máan mi ukhen mino. Ma vara ma kípan nain damú mai ma séin timikhein nanin banta finté mana ano ída afeyoranten mifo minó kékái avorékun e mantan-ten mino. <sup>40</sup> Para vara seyo, te Sifóeni anunu máan mi ukhen mino. Be anin ma ódaren bentá ma mumunan ukháiñ nain nanin banta ano ínaimpá kípan damú téi avorékun orun mantaven maen ída kípan para van oriyan ban au-nan barano van mino.”

<sup>41</sup> Yisasi ma veyan nan téi inaru rákena vereti uno ma sein nan Yutan nanin banta ano iniren kakhi kakhi ten oreraen mino. <sup>42</sup>\*Máan tiyáken betí ankan temí, “Ma vanta anóe afóen tetí ankan afová ukhékun béis Yosepin anin Yisasin ban mifo mai fará ten ná ‘téi inaru fáké erakhé uno’ siyan nafino.”

<sup>43</sup> Máa síkan Yisasi evaránen tiämémí, “Tireti ankan ída vá kakhirun tiriya vano. <sup>44</sup> \*Para vara seyo, vanasi ano ída kanaíen te vaipá erinten mifo séin ma sisintá erikheruna Sifóe ano ma o avíadantí ma se vaipá erekharé intí maé ínaimpá kípan damú purin pintena evaráne avoran e mantanten mino. <sup>45</sup> Sakhanampa vanta kayoi vompon dókifin ma vain baya ano máa sikhen mino. ‘Minó nanin bantan Tiyarafenu ano afova aminten mino.’ Ais 54:13

Tifóeni vaya ma inire afová urein kayo anon te vaipá eré iyan mino.

<sup>46</sup> \*Ída mana ano Sifóen ontén mifo Tiyarafenu vá ma varen erakheiñ banta ano anan Tifóen onten mino.

<sup>47</sup> \*Téi fura siré tireti ankan tiamiyá uno. Téintá ma mumunan iyain kayo ano gefái ída kípan aunan mantan mino. <sup>48</sup> \*Téi ída kípan ayun ma fara van oriyan ban aunan ma amiyain bereti uno. <sup>49</sup> Pefá tireti ankan ana-fuyan mano kámá barafá manna e sin bereti nakharen mifo minó ano furein mino. <sup>50</sup> Purein mifo inaruráke ma erakheiñ bereti ma vanasi ano nanten maen beti ída furinten mino. <sup>51</sup> Mai ma aunan bain bereti ma inaru fáké erein mai séi umpo mana vanta ano ma mai vereti nanten maen ayun ma fara van oriyan ban aunan baranten mino. Mai vereti ma amenuna mai varará nanin banta ano ída kípan aunan barano van tesi simasin amenté uno.”

<sup>52</sup> Máa síkan Yutan kayo ano veraran asive asive iyáken temí, “Ma vanta ano intesá urená be amasi simintí nantékun ná tino.” <sup>53</sup> Máa siyákan Yisasi vetí ankan tiämémí, “Téi fura uron tiré tireti ankan tiamiyá uno. Banta Anini amasi vá nare vá ma ída nanteya mai sireti ankampin ayun ma fara

\* **6:35:** Yon 4:14    \* **6:39:** Yon 10:28-29; 17:12    \* **6:42:** Mat 13:55    \* **6:44:** Yon 6:65  
 \* **6:46:** Yon 1:18    \* **6:47:** Yon 3:15-16    \* **6:48:** Yon 6:32, 58

van aunan ída vanten mino.<sup>54</sup> Ída vanten mifo séin timasi vá nare vá ma nan nain kayo ano ída kípan ayun ma fara van aunan mantaré intí maé ínaimpá kípan damú betin avorékun e mantan-ten mino.<sup>55</sup> Mai fara vara seyo, sen timasi maen mai fura sikhein dunan mi vákan inká tenti nare maen mai fura sikhein non mi vákan ukhen mino.<sup>56</sup> Tenti simasi vá nare vá ma niyain kayo ano séimpin baká téi vetí ankampin bá uno.<sup>57</sup> \*Ayun ma fara vain Tifóe ano séin tisintá erikhékun mi veni ákonarái sen taunan para van mifo mana ano ma máan mana en ten ma nanten maen tenti ákonará ayun ma fara van aunan baranten mino.<sup>58</sup> Téi mai inaru fáké ma erein pura vereti umpo féfá ma anafu aráo ano ma manna e sin bereti naren baren maen ínaimpáké puren mino. Purein mifo ma ma siyaruna vereti ano mai vá ída manaí ukhein ma ma nan nain mano ayun ma fara van oriyan ban aunan baranten mino.”<sup>59</sup> Béi ma ma vaya kayo sein mai Kapeniamú barurá monó átaru namumpin mi vanasi monó baya siamen mino.

*Yisasin Ánan Ma Yakhafen Nó  
Ein Kayo Finté Ma Kokhon Mano  
Véin Me Ampiren Orein Baya Ino*

<sup>60</sup> Máa siyákan bei eyo iyampon kayo vá ano yere mai ma siyain baya inirem máa semí, “Amino eruna vayan tiyan mifo iye anó kanaén ná ininten nafino.”

<sup>61</sup> Mai ma vei eyo iyampon kayo ano ma vaya kokhon iyain Yisasi afová iyáken betí ankan tiamemí, “Ma vaya anó tiretí ankani mumunan asuse iya nafino.”<sup>62</sup> Tiretí ankan ma oniyasin ma Vanta Anin mano ma evaránen inarufá ódintiya mai inte esá té ininte fono.<sup>63</sup> Kantá Aunan manon ída kípan ayun ma fara van aunan banasi amé iyan mifo vantai ákona

ano setí ankan ída uron mi siya iyan mino. Ma vaya ma saretí ankan ma siamiyaruna mai aunan mi váken béis ayun ma fara van oriyan ban mino.<sup>64</sup> \*Ban mifo saretin pinté manáa ano séintá ída mumunan iya ono.” (Mai fara va máa sen naino. Iye anó béintá ída mumunan iyan ná inká iye anó béis namuro ayampin aminten nafi mai véi esé aráí in také afová ukharen mino.)<sup>65</sup> \*Máa siren enádá evaránen temí, “Tifóe ano ma ída ákona amin nain mano ída kanaén te vaipá erinten mino. Mai ana van mi séi ma vaya saretin tiámé uno.”

<sup>66</sup> Yisasi ma mai vaya siran maen ben ma yakhafen noré ein kayo finté kokhon mano véin me ifá en tipá oren noren mino.<sup>67</sup> Máan tíkan Yisasi vei sirantan kan orun kádan (12) eyo iyampon kaylorá inaemí, “Tiretí ankan masá téin me ifáeyá orinte fono.”

<sup>68</sup> \*Máa síkan Saimon Pita evaránen temí, “Bafan noe, éini vayafin mi ayun ma fara van oriyan ban aunan ban mifo setí ankan iye vaipasá oronte rafuno.<sup>69</sup> Éi Tiyarafenui mana kantási ukheona vantan ban ná tetí ankan afová ukhé mumunan iyá uno.”

<sup>70</sup> Máa síkan Yisasi evaránen betí ankan tiamemí, “Tiyan míkan mifo sirantan kan orun kádan (12) eyo iyampon mi séi avíké umpo mai aúbañá mana Ban Anon ban mino.”<sup>71</sup> Iskariotíke vanta Saimonin anin Yudasí nan mi véi máa sen mino. Tiyan míkan mifo sirantan kan orun kádan (12) eyo iyampon pintena mai vanta anon Yisasin namuro ayampin amintin aruan purinten mino.

## 7

*Yisasin Má Be Afá Kéká Báí Vaya  
Ino*

\* 6:57: 1Yn 3:24    \* 6:64: Yon 13:11    \* 6:65: Yon 6:44    \* 6:68: Mat 16:16    \* 7:1: Yon 5:18

<sup>1</sup> \*Máan turen mai oyampáké Yisasi Kariri varafin mana váken minó barufimpá noren mino. Yutan kayo ano véin aruan purono van iyákan mai van béis ída evaránen Yudiá barafá orono van ukharen mino. <sup>2</sup>\*Ída orono van ukhan maen Yutan kayoi Iyon Baran Namun Kayo ma Uváden Monó Tin Omá ádé en mino. <sup>3</sup>Ádé iyákan be afá kéká ano véin duvun uren tiameí, “Ei varu me ampireya Yudiá barafá oriveya enará ukhein danasinta aníesin ná ei eyo iyampon kayo ano onano. <sup>4</sup>Minó nanin bantafin ma mana vanta ano ma vei yoran aní ono van maen ída aúpá doré iyain mifo éi minó nanin banta avorá oriveyá ei yoran aníesin ná onano.” <sup>5</sup>\*Mai fara va máa sen naino. Be afá kéká ano yeren bentá ída mumunan iyáken mi sen mino.

<sup>6</sup> Máa síkan Yisasi evaránen betin tiameí, “Tenti yamú ída afoká ukhen mifo saretí ma orono van inona yamú kasee orin nono. <sup>7</sup>Minó nanin banta ano ída kanaíen tireti ankan namuroi uantanten mifo vetí namu avúavái sian páman iyákon mai van mi séin namuroi usintiyan mino. <sup>8</sup>Mai omasí ma iyaipásá tireti ankan orono. Para vara seyo, senti yamú ída afoká ukhein téi ída oronté uno.” <sup>9</sup>Máa sen tiamiren Yisasi Karirifá karemén mino.

<sup>10</sup>Karentan maen be afá kéká ano mai omápá orivíkan ínaimpáké Yisasi aúpáké uaren maifá oren aúpá o varen mino. <sup>11</sup>O vákan Yutan kayoi ánon banta kéká ano mai omápín benan dosi vaen banasirá inaemí, “Mai vanta intefasá ban nafino.”

<sup>12</sup>Máa síkan banasi ano kafaya sen orera iyákan manáa ano semí, “Béis kama vanta ino” siyákan inká ena kéká ano semí, “Ída ino. Béis vanasi kampun tiantan banta ino.”

<sup>13</sup> Máa siyaren mifo vetí ankan Yutan kayoi ánon banta kéká san péden ída afoká tinton aúpá anan tiyaren mino.

*Yisasi Ma Kákan Monó Dafufin  
Banasí Avorá Monó Baya Siamein  
Baya Ino*

<sup>14</sup> Mai omasí e en oriyan ma mo aúban nasí iyan maen Yisasi monó dafufin ódiven monó baya araíen banasi siamen mino.

<sup>15</sup>\*Tiamiyákan Yutan kayoi ánon banta kéká ano veni vaya iniren anú duren takhaen orera iyan temí, “Ma vanta ano ída afova ma varampin orikharen mifo inté uren ná béis ma afova manten nafino.”

<sup>16</sup>\*Máa siyákan Yisasi evaránen betí ankan tiameí, “Ma vaya ma saretí ma séi siamiyaruna mai sesi vaya vaino. Ída ino. Tiyarafenu ano ma séin tisintá erikheruna mai veni vayan téi siamiyá uno. <sup>17</sup>Tiamiyá umpo mana ano ma Tiyarefenu vaya ánaín ma yakhafono van ma iyan ten mai anon kanaíen téi ma siyaruna vayai ana afová inten mino. Mai vaya senti ineine fintesá eriyan nafi áo Tiyarafenu fintesá eriyan nafi mai véin kanaíen afová inten mino. <sup>18</sup>\*Maná vanta ano ve aví daní ino van mi vei ineine fintesá vaya sé iyan mifo ena vanta ano ma siantan erikhein banta mai fura vantán báken mai ma véin tiantan erikhein banta avíi yaní é iyan mino.

<sup>19</sup>\*Ída Mosesi ano saretí ankan man baya amikharen nafino. Tireti ankan pinté mana ano ída mai man baya ánaín dakhafiya ompo fará téin tiruan purono van iya rafono.”

<sup>20</sup>\*Máa síkan banasi ano evaránen béis tiameí, “Eí óen mi iya ompo iye anó éin aruan purono van iya vae.”

\* **7:2:** Riv 23:34    \* **7:5:** Apo 1:14    \* **7:15:** Mat 13:54; Ruk 2:47    \* **7:16:** Yon 12:49; 14:10  
\* **7:18:** Yon 8:50    \* **7:19:** Apo 7:53; Rom 2:21-24    \* **7:20:** Yon 8:48; 10:20

21 Mápá síkan Yisasi evaránen betin tiamemí, “Téi Sabati yamú ma vanta ayofan dorarí ma erúna van mi siretí ankan anúde orera iya ono. <sup>22</sup>\* Mosesi ano au khavin avúavá amikhaya Sabati yamú deren iyampon au khaviya ompo mai avúavá ída véi araí ukhen mifo anafu aráon pintéi erikhen mino. <sup>23</sup>\* Mápán tukhein nan mi siretí ankan Mosesini man bayá ánaín dakhafaya ain iyampon au Sabatirá kaviya ompo séi ma Sabatirá ma vanta ayoferuna van pará tireti séin nan aranan ná bariya rafono. <sup>24</sup> Tireti ankan puntákein avúavá posá minó daimin nompo ída vá auu máa fóké ódeya yaimono.”

*Yisasi Mai Tiyarafenu Ano Ma Aní Ukhein Banta Fino Ma Sein Baya Ino*

25 Yerusalemíké manáa nanin banta ano máa sen oreraen mí, “Ma mai ma aruan purono van iyain banta fino. <sup>26</sup> Béi minó avorá bayá siyan mi setisi ánon banta kéká ano véin nan ída mana vaya siyan mifo Tiyarafenu ano ma aní ukhein banta inó ten afová iyan-ten nafino. <sup>27</sup>\* Tetí ankan beni varu afová ukhé tifé umpsí Tiyarafenu ano ma aní ukhein banta ma erin nain mai mana ano ída veni varu afová inten mino.”

28 \*Yisasi ma monó dafufin banasi monó bayá siamiyáken maen avádóden oovaraaren temí, “Tireti ankan téin má tesí varu vá afová ukha ompo séi ída sesí sinunurá erikhé uno. Ben avúavá purasen puntákein manon téin tisintá erikhékuyan tireti ída véin afová ukha ono. <sup>29</sup> Téi ven má baréi véin afová ukhké kun téin tisintá erikhé uno.”

30 \*Mápá síkan ánon banta kéká ano mai vaya iníden béin pákano van en mifo véi ma uman

baran nain damú ída erikhan mana ano ven au ída aruvén mino. <sup>31</sup> Mápán tiyákan kokhon nanin banta ano ventá mumunan iyáken temí, “Tiyarafenu ano ma aní ukhein banta ma erinten maen ma vanta ano ma variyain avúavá danasinta esantaren ná enará ukhein avúavasá baranten nafino.”

*Monó Ánon Banta Kayo Ano Ma Yisasi Pákano Van Ein Baya Ino*

32 Banasi ano Yisasi ma variyain avúavá dana san kafaya sen orera iyákan Farasisi kéká bá monó ánon banta kayo vá ano iniren Yisasin pákano van monó dafurá ma yafisin banta kéká tianten mino. <sup>33</sup> Siantiyákan Yisasi vetin tiamemí, “Téi ída ayáká tireti ankan má banté umpsí séin ma sisintá erikheruna Sifóe vaípá evaráne oronté uno. <sup>34</sup>\* Orivéku mae siretí ankan te nan dosin nompo ída sonan nono. Inká téi ma o vanuna varufá ída kanaíe orin nono.”

35 Mápá síkan Yutan kayoi ánon banta kéká ano vetiyan ten oreraemí, “Béi intefásá orivintirá tetí ída ven onanté tifékun ná tiyan ná tino. Ena anan bantai varafá ma manáa setinti kéká ma o vaípasá béi o van ná monó bayá siaminton ná tiyan nafino. <sup>36</sup> Téin nan tireti ankan dosin nompo ída kanaíeyá sonan nono sen ma inká tireti ída kanaíeyá se ma o vanuna varurá erin nono ma sikhein mai veni ana intesá ukhen nafino.

*Aunan Ma Vain Non Ma Yisasi Ano Iyáantein Baya Ino*

37 \*Mai ma átqru en monó ten oriyarein mo akhenien kípan kákán damú Yisasi orun mantaven avádóden oovaraaren temí, “Non nan ma aiiyain kayo aësin ná téi varunafásá eriven nano. <sup>38</sup>\* Sentá ma mumunan inain mano se varunafá eriven ná mai non nano.

\* 7:22: Esé 17:9-13; Riv 12:3    \* 7:23: Yon 5:8-10, 16    \* 7:27: Yon 7:41; 9:29    \* 7:28: Mat 11:27; Yon 8:55    \* 7:30: Yon 7:44    \* 7:34: Yon 8:21; 13:36    \* 7:37: Riv 23:36; Ais 55:1; Yon 4:14    \* 7:38: Ais 58:11

Mai fara vara seyo, Tiyarafenui vompon dóki ano máa sikhén mino. ‘Béin aú pinté ayun ma fara van non kayo oriyan banten mino.’<sup>39</sup> \*Máí damú Yisasi ída fúuren kákán bí mantan inká ída Kantá Aunan eran ukhan mi mai ma ventá mumunan inain kayo ano ma ínaimpá Kantá Aunan baran nain nan mi siyaren mino.<sup>40</sup> \*Máa síkán mai vaya iniren manáa nanin banta ano semí, “Pura siren ma sakhanampa vanta uron mino.”<sup>41</sup> \*Máa síkán manáa nanin banta ano semí, “Tiyarafenui ano ma aní ukhein banta ino.” Síkán inká ena kéká ano semí, “Inté uáken ná Tiyarafenui ano ma aní ukhein banta ano Kariri fáké erinten nafino.”<sup>42</sup> \*Para vara seyo, Tiyarafenui vompompin máa sikharen mino. Tiyarafenui ano ma aní ukhein banta ano Kin Devitini anan pintéi véi ma gefá bá ein baru Betariamúi afoká inten mino.<sup>43</sup> Máa siyáken banasi ano Yisasi nan kokhon ineine uren kampintan daimen oreraen mino.<sup>44</sup> Máan tiyáken manáa ano véin bákudé pákano van en mifo ída mana ano ven au aruven mino.

### *Yutan Kayoi Ánon Banta Kéká Ma Ída Mumunan Ein Baya Ino*

<sup>45</sup> Ída fákárí iyaimpin monó dafurá ma yafisin banta kéká ano ovaránen monó ánon banta kéká bá Farasisi kayo vá baípá eríkan betin inaemí, “Tireti ankan pará bén ída fákáré aviré ere rafono.

<sup>46</sup> \*Máa síkán monó dafurá ma yafisin banta kéká ano evaránen temí, “Ma vanta ano ma vaya siyainén pefá mana vanta ano ída sikharen mino.”

<sup>47</sup> Máa síkán Farasisi kéká ano vetin nan tiren intemí, “Tireti ankan mái véi mákáden aviren oriyan ten mino.”<sup>48</sup> \*Tetí monó

ánon banta kayo vá Farasisi kéká bá pinté béintá mumunan iyá tife rafuno.<sup>49</sup> Ída ifo man bayá ma ída afová ukhein nanin banta anon béintá mumunan iyain Tiyarafenui aran daná ano vetin má ban mino.”<sup>50</sup> \*Betí ankan pinté Nikodimasi ano Yisasín pe o ontaren betin inaemí,<sup>51</sup> “Tetinti man bayá ano vanta fasavi avión kópin kaonó tikhen nafi áa veni vaya ana nare inian puntádeya vá onó tikhen nafino.”

<sup>52</sup> \*Máa síkán betí ankan evaránen bén tiamemí, “Éin má dere Kariri fáke vanta fono. Tiyarafenui vompon dókifin kama e yankádeya vá afová ono. Ída mana sakhanampa vanta Karirifá afoká uaren eré iyan mino.”

*Pefá ma vá ein Kiriki vayai vompompin 7:53–8:11 ída varen mino.*

<sup>53</sup> Mai vaya ma kípiyain má minó ano meren be amápá oreraen mino.

## 8

### *Mana Nanin Mano Ena Vanta Vá Noré Íkan Oman Páman Nein Baya Ino*

<sup>1</sup> Orera uvíkan Yisasi Orifí Anufá óden mino. <sup>2</sup> Ódikharen pe ákura suron bái evaránen kákán monó dafufin oríkan banasi e átaru uvin bái kumanten monó bayá siamen mino. <sup>3</sup> Tiamiyákan mana vanta aná ano ena vanta kéká bá moré íkan man bayá ma afová ukhein banta kayo vá Farasisi kéká bá ano mai nanin aviren banasi avorá me khaúden <sup>4</sup> Yisasín tiamemí, “Aru soe, ma nanin mano ena vanta vá noré íkan minó ano ontén mifo”<sup>5</sup> \*Mosesini man bayá ano ma setin tisimikhein mai onámaná kayo fosá ankaman purono sikhén mifo éi inte esá teyá iniya fono.”

<sup>6</sup> Betí ankan ma máa sein mai véi mana vaya sintí iniré mai

\* 7:39: Yon 16:7; 20:22; Apo 2:4    \* 7:40: Diu 18:18; Yon 6:14    \* 7:41: Yon 1:46    \* 7:42: Ibo 89:3-4; Mai 5:2    \* 7:46: Mak 1:22    \* 7:48: Yon 12:42    \* 7:50: Yon 3:1-2    \* 7:52: Yon 7:41-42    \* 8:5: Riv 20:10; Diu 22:22-24

vayará ben avían kópin kaono van ben máka sin maen Yisasi un baren mátimen ayampóké kayóká bompon uvaren mino.  
<sup>7</sup> \*Uvariýakan betí ankan kokhon dádá inaiyan baimpin Yisasi orun mantaven betín tiameémí, “Tiretí ankan aúbaná pinté mana ume ma ída van nain banta ano nare vá onámaná ankamono.” <sup>8</sup> Mág siren evaránen mátimen kayóká bompon uvaren mino.

<sup>9</sup> Uvariýakan mai kayo ano mai vaya iniren maen anón banta ráké nare araí uren oriyan minó orian kípavín Yisasi veyáká para kuman-tan mai nanin mano ana ve vaintá mantakharen mino. <sup>10</sup> Mantakhan Yisasi orun mantaven mai nanin tiameémí, “Anasi oe, mai ma éin kó tiantiyá ein kéká intefasá oren ná ída mana ano éin uman amiyan nafino.”

<sup>11</sup> \*Mág síkan mai nanin mano semí, “Kákán banta oe, mana ano ída van mino.”

Síkan Yisasi semí, “Téin má dere éin ída kó tiantanté umpsa orive ída vá evaráne umeí ono.”

*Yisasi Ma Varará Ma Vain Nanín Bantai Oon Mino*

<sup>12</sup> \*Mág siren Yisasi evaránen banasi siamemí, “Téi ma varai oon mumpo séin tínaín ma vákurin nain banta ano ída kípan au-nan mamaren titípafin ída nonten mino.”

<sup>13</sup> Mág síkan Farasisi kayo ano mai vaya iníden Yisasin evaránen tiameémí, “Éi ei yoran avúavá san manan tiyan nan mi vanasi ano eni vayará ída mumunan iyan mino.”

<sup>14</sup> \*Mág síkan Yisasi evaránen betí ankan tiameémí, “Mai fura ino. Téi sesi sivútivá baya anan tiyá umpsa mai vayará minó ano vá mumunan ino. Mai fara seyo, séi inte fákesá erikherá inká intefasá oronte rafu mai séi

afová ukhé umpsa siretí ankan ída uron mi mayin afová ukha rono. <sup>15</sup> \*Mág tukheyai ma vara ráke avúavá pó séin daimiya umpsa séi ída mai avúavápó mana vanta yaimiyá uno. <sup>16</sup> \*Mág tiyá umpsa yaimono sé baré banasii avúavá puntadéi yaimon nunaren mino. Para vara seyo, seyaká ana ída vá umpsa mai ma sen tis-intá erikheruna Sifóen mái súpá ukhé uno. <sup>17</sup> \*Erasanti man baya ano máa sikhen mino. Kanakan bantai vaya ano ma manaí intiya mai furan tinten mino. <sup>18</sup> \*Mág tukhein nan mi séi seyantá tesi yoran avúavá baya siyákun mi inká ten ma sisintá erikheruna Sifóe ano yere senti yoran avúavá baya anan tiyan mino.”

<sup>19</sup> Mág síkan betí ankan inaemí, “Intesiná e afóe va vae.”

Síkan Yisasi evaránen betín tiameémí, “Téin ma afová ukhanteya mai Sifóen má deren afová inompo séin ma ída afová ukhanteya mai Sifóen má deren ída afová inono.” <sup>20</sup> \*Kákán monó dafufin ma moní kaiyaintái Yisasi váken mi mai monó baya siyan mifo mana ano ída véin páken mino. Mai fara va ino. Beni yamú ída erikhan mino.

*Ída Ma Ará Baeran Kayo Ano Ma Vetú Umefin Purin Nain Baya Ino*

<sup>21</sup> \*Mág siren Yisasi evaránen ena vaya semí, “Téi orivékuya siretí ankan ten nan dosivaeya siretii umefin purin nono. Mai ma séi oronunafá tiretí ankan ída kanaíeya orin nono.”

<sup>22</sup> Mág síkan Yutan kayo ano mai vaya iniren betiyan ten or-eraemí, “Téi ma oronuna varufá tiretí ankan ída kanaíe orin nono ma siyain mai veyantasá beyan aruan purono vará tino.”

\* 8:7: Diu 17:7    \* 8:11: Yon 5:14    \* 8:12: Ais 49:6; Yon 1:4-9; 9:5; 12:46    \* 8:14: Yon 5:31-32; 7:28    \* 8:15: Yon 12:47    \* 8:16: Yon 5:30; 8:29    \* 8:17: Diu 19:15    \* 8:18:

1Yn 5:9    \* 8:20: Yon 7:30    \* 8:21: Yon 7:34; 13:33

<sup>23</sup> \*Máa sen orera iyákan Yisasi semí, “Tiretí bara ráke ompo séi yante uno. Tireti ma vara finté ompo séi ída ma vara finté uno. <sup>24</sup>Máan tukhái saretí umefin purin nona van mi siamiyá uno. Para vara seyo, séi iyé bará teyan nan tiretin tiамиya rafu mairá ma ída mumunan inteya mai saretí ume avúavápíン puraseya furin nono.”

<sup>25</sup> Máa síkan betí ankan bén inaemi, “Mai éi iye fono.” Síkan Yisasi evaránen temí, “Mai ma séi nan iyé ba fono ma siyaona mai vayan o siamé eriyá bá uno. <sup>26</sup>Tiamiyá umpo saretí avúavá ma yaimin baya kayo kokhon mi sempin ban mifo mai ifá iyá uno. Téin ma sisintá erikheruna vantai avúavá puntákai véin pintena ma inireruna mai vaya kayoi varará nanin banta siamiyá uno.”

<sup>27</sup> Be Afóen nan mi Yisasi siyákan betí ankan amino ukhareni mino. <sup>28</sup>\*Amino ukheimpin Yisasi semí, “Banta Anin ma yaa unkamádantá ma yaní inona yamúi séi iyé bará téi uno siya rafu mai afová inono. Tesi sinunurá ída mana yanasí iyá umpo se Sifóe ma sisimein danasíi iyá uno. <sup>29</sup>Téin ma sisintá erikheruna ano sen má báken téin ída ifá teyaká bá uno. Para vara seyo, séi ma ena ena yamú bariyaruna mai anón bén amusin amiyan mino.”

<sup>30</sup> Máa siyákan mai vaya iniren kokhon nanin banta ano ventá mumunan en mino.

### *Abaraamun Akhafanaí Ma In Baya Ino*

<sup>31</sup> Béintá ma mumunan ein Yutan kéká máa sen tiameví, “Tenti vaya ma ákona uan pákanona ano fura uron teya senti eyo iyamponíí inono. <sup>32</sup>Máan ma uveyan pura sikhein baya afová esin mi ma ma fura sikhein baya ano saretí

ankan kampun bayai karavusi fintena utúantanten mino.”

<sup>33</sup> \*Máa síkan betí ankan evaránen bén tiameví, “Teti Abaraamun anavasin mi váké pefá araí in také eriyá ída mana vantai miyan ída van doran bantaí ukhé tifé umpo éi fará pura sikhein baya ano kampun bayai karavusi fintena setin utúantanten mino siya fono.”

<sup>34</sup> \*Máa síkan Yisasi evaránen temí, “Téi fura siré tiretí ankan tiameví uno. Umeí ma iyain kéká ano mai umei miyan ída van doran bantaí ukhen mino. <sup>35</sup>Miyan i van doran banta aví ída ven antumpin ban mifo ve anin avíi ve antumpin para van oriyán bá éiyán mino. <sup>36</sup>Máan tukhein mi ve Anin mano ma saretí nan mai utúanté uno ma sintiya mai saretí ankan pura uron tire kusen ban nono. <sup>37</sup>Tiretí ankan Abaraamun anavasin mi vaná téi afová ukhé umpo saretí ankampin ída senti vaya vákayai séin tiruan purono van iya rono. <sup>38</sup>Téi se Sifóe má ma váké ontaréeruna yaná máan tiretin tiameví umpo saretí ankan afóen pintena ma vareona afova ánaín máan dakhafiya ono.”

<sup>39</sup> \*Máa síkan Yutan kayo ano evaránen bén tiameví, “Abaraamu setin tifóe ino.”

Síkan Yisasi evaránen temí, “Tiretí ankan pura se Abaraamun akhafana ma varé inté mae mai véi ma variyá ein avúavái varan nono. <sup>40</sup>Máan tukhein nan mi Tiyarafenu ano ma fura vaya sisimein ma saretí tiameyaruna van mi séin tirono van iya umpo Abaraamu ída máan tin nain ten mino. <sup>41</sup>\*Máan tiyákeyáñi tiretí afóeyáñi avúavái variya ono.”

Síkan betí ankan bén tiameví, “Teti ankan ída aasá iyampon bá uno. Tiyarafenu veyáká anan tetin Tifóe uron ban mino.”

\* 8:23: Yon 3:31    \* 8:28: Yon 3:14    \* 8:33: Mat 3:9    \* 8:34: Rom 6:16, 20    \* 8:39:

Mat 3:9    \* 8:41: Ais 63:16

### *Ban Anon Akhafanaí Ma In Baya Ino*

<sup>42</sup> Máa síkan Yisasi vetí ankan tiamemí, “Tiyarafenu ma siren Afóe ma varéintiya mai séin tivábá inonaren mino. Para vara seyo, Tiyarafenu vaipákéi séi eréi mará e vá uno. Téi ída sesi sinunurá erikhé umpo Tiyarafenu anon tis-intá erikhé uno. <sup>43</sup> Mágan tukhé umpo senti vaya ma ída ininyaona mai anon tiretí ankan ída kama e afová iya ono. <sup>44</sup>\*Tiretí ankan Ban Anon akhafanan bákeyai siren Afóeni anunu ánaín mi vákuriyá ompo esé araiántá béis vanta aruan purin bantan báken béis ída fura sikhein avúavá ánaín bákuriyán mino. Mai fara va ino. Pura sikhein avúavá ída vempin ban mifo kampun bantan báken kampun baya afóe uron mino. <sup>45</sup> Mágan tukhein nan mi séi fura sikhein bayan tiyamiyákeyan tiretí ankan ída mumunan iya ono. <sup>46</sup>\*Tiretí ankan onesí ma séi ma umeí iyákuya mai senti namu yaná manan dákó inompo séi ma fura sikhein baya ma siyákuya mai fará ída mumunan iya rafono. <sup>47</sup>\*Tiyarafenu akhafana ano minó beni vaya kamaen iniyan mifo sirení ankan ída yen akhafanan bákeyai veni vaya ída iniya ono.”

### *Yisasi Ma Veyan Pákena Ma Sikhein Baya Ino*

<sup>48</sup>\*Máa síkan Yutan kayo ano evaránen bein tiamemí, “Éin nan ma Sameriá bantan ban nan en aúpin namu aunan ban mino ma siyáé tiferuna mai furá tiyá tifé rafuno.”

<sup>49</sup> Máa síkan Yisasi evaránen betí ankan tiamemí, “Téimpin ída mana namu aunan ban mifo séi se Sifóen avíi yaní iyákuyan tiretí ankan ten tiví bararasí iya ono.

<sup>50</sup> Téi se sivisa yaní ono van iya rauno. Ída ino. Tiyarafenu

anon ten tiví daní iyáken béis anan daimin banta van mino. <sup>51</sup>\*Mágan tukhein nan mi fura siré tiretí ankan tiamiyá uno. Tentí vaya ánaín ma yakhafin nain nanin banta ano ída uron mi furinten mino.”

<sup>52</sup> Máa síkan Yutan kayo ano semí, “Éimpin namu aunan mi varé íka taréan afová é tifé uno. Abaraamun má sakhanampa vanta kayo vá púkein mi vákayan éi siyákeyan tentí vaya ánaín ma yakhafinona vanta ano ída uron mi furin nono siya ono. <sup>53</sup> Éi iye unó tiya fono. Erasan tiyavéno Abaraamu má sakhanampa vanta kayo vá ma fúkein mai kéká esantakheyá tiya fono.”

<sup>54</sup> Máa síkan Yisasi evaránen temí, “Téi ma se siví daní ékun maen mai sen tiví paen danasíi inten mifo sirení ankan ma seja setisi Tiyarafenu ino ma siyaona anon ten tiví daní iyan mino.

<sup>55</sup> Mágan tiyan mifo sirení ankan béis ída afová ukha ompo séi anan afová ukhé uno. Béis ída afová ukhé uno ma senté mai sirení an dé kákán kampun mi senté paséi séi ven afová ukhévi veni vaya ánaín bákuriyá uno. <sup>56</sup> Bakuriyá umpo sirení afóe Abaraamu maen tentí yamú onano van amusin iyan ineine iyaren ódaren amusin en mino.”

<sup>57</sup> Máa síkan Yutan kayo ano semí, “Éi ída fifty (50) oranaí ukha ompo éi Abaraamun ontare vae.”

<sup>58</sup>\*Máa síkan Yisasi evaránen temí, “Téi fura siré tiretí ankan tiamiyá uno. Abaraamu ída afoká ukhá téi fefái varé uno.” <sup>59</sup> Mágan siyain má betí ankan onámaná kayo máden ankamono van íkan Yisasi aupáké kákán monó namun me ampíren oren mino.

\* 8:44: 1Yn 3:8 \* 8:46: 2Ko 5:21; 1Pi 2:22 \* 8:47: 1Yn 4:6 \* 8:48: Mak 3:21-22

\* 8:51: Yon 5:24 \* 8:58: Yon 1:1

## 9

*Inamumpá Auu Yufúkukhá Ein Banta Ma Yisasi Ayofein Baya Ino*

<sup>1</sup> Be anóen amúpimpá auu yufúkukhan kain baré ein banta Yisasi oriyaren onen mino.  
<sup>2</sup> \*Oniyákan bei eyo iyampon kayo ano véin inaemí, “Aru soe, ma vanta ma inamumpá auu yufúkukhein ma kaein mai veni ume ano fi áa ve anóe afóeni umeano fino.”

<sup>3</sup> \*Máa síkan Yisasi evaránen tiámemí, “Mai vanta vá be anóe afóen má ída umeíen mifo Ti-yarafenui ákona afoká intin onano van mi véin auu yufúkukhein in-amumpá kaen mino. <sup>4</sup> Taréa ma kakhakhein tasá mai ma séin tis-intá erikherunai yorarisá ótifano. Para vara seyo, yurintin maen ída mana vanta ano yoranten mino.

<sup>5</sup> \*Téi ma ma varará ma varúna mai séi ma vara kakhaantan oon munoo.”

<sup>6</sup> \*Máa siren Yisasi varará akhare siren mai vara fákoren áposí uren mai vanta auufen dampaantáden mai vanta siamemí, “Oreya vá Siroamú non masípin ná mo non perano. (Siroamu e ma sikhein mai siantan oren nen tikhen mino.) Máa siren tiantan mai auu yufúkukhein banta ano mo non péden erin auu kama íkan kasaen minó daná onen mino.

<sup>8</sup> Oniyákan béini ádé ma varé ein kéká bá inká bái ma gefá banasi vaípá moní inantiyan ma ontare ein kayo vá ano vetiyan inaen oreraen temí, “Máa gefá ma kuman-ten banasi vaípá moní inantiyaré ein banta fino.” <sup>9</sup> Máa siyákan manáa ano sen “mai vanta ino” síkan inká ena kéká ano semí, “Ída ino. Ena véiren banta ino” sin iyaimpin mai vanta ano semí, “Téi mai vanta uno.”

\* 9:2: Isi 18:20; Ruk 13:2, 4    \* 9:3: Yon 11:4

\* 9:17: Yon 4:19

<sup>10</sup> Máa síkan betí ankan bén inaemí, “Intesá uren nan ná auu kamaen nafino.”

<sup>11</sup> Máa síkan bái evaránen temí, “Yisasin ne ma siyain banta anón ápó pákaren tuufen damparen tis-inten, ‘Siroamú non masípin mo non pereya ápó tesé ono’ síkái mo fédékun mi sen tuu kama íkái minó daná oniyá uno.”

<sup>12</sup> Máa síkan betí ankan bén inaemí, “Mai vanta intefasá ban nafino.”

Síkan “téi ída afová ukhé uno,” sen mino.

*Yisasi Ma Ayofiyain Avúava San Ma Farasisi Kayo Ano Veti Áuban Kokhon Baya Sein Baya Ino*

<sup>13</sup> Máa siyaimpin mai kéká ano mai ma auu yufúkukharé ein banta yo avireni Farasisi kayo vaintá oren mino. <sup>14</sup> Sabati yamúi Yisasi mai vanta auu kama uanten mino. <sup>15</sup> Moran Farasisi kayo vá dere ano mai vanta auu ma kama ein nan ina íkan betin tiámemí, “Bén ten tuufen ápó damparái nompin mo sesé uré kamaé oné uno.”

<sup>16</sup> Máa síkan manáa Farasisi kayo ano semí, “Téi ankan afová ukhé uno. Tiyarafenu ano ma vanta ída siantan erakhen mino. Para vara seyo, véi Sabati yamú durafuren doriyan mino.” Síkan manáa ano semí, “Intesá urená ume vanta ano máan ten ná enará ukhein danasinta aní intéi væ.” Siren beraran áuban daimen mino.

<sup>17</sup> \*Máan tiyáken mai ma auu yufúkukhá ein banta vetí ankan mano evaránen inaemí, “Mai ma éin ma auu kama uantein banta van iye inó teyá éi iniya fono.”

Síkan mai vanta ano evaránen betin tiámemí, “Mai véi mana sakhanampa vanta inon té téi iniyá uno.”

<sup>18</sup> Máa síkan Yutan kayoi ánon banta kéká ano mai ma gefá auu yufúkukharéin ma saréa auu kama ukhein banta van ída mumunan

\* 9:5: Mat 5:14; Yon 8:12    \* 9:6: Mak 8:23

iyáken mai vanta anóe afóen aren mino. <sup>19</sup> Arákán míkanan erin maen betí ankan máa sen inaemí, “Ma siré kanan anin nafino. Auu yufúkukhein ná inamumpá kaeona fino. Mai máon ma ukhantin intesá urená béisaréa auu kamaen oniyan nafino.”

<sup>20</sup> Máa síkan be anóe afóe ano evaránen betin tiameemí, “Ma verasan tanin inamumpá auu yufúkukhá kaerunan bá afová ukhé uno. <sup>21</sup> Máan tukhen mifo intesá uren ná auu kamain ná iye anó auu avové uanten nafi mai verasan ída afová ukhé uno. Béi anón mifo inaesin ná beyantá tinti vá inero.” <sup>22</sup> Para va vékan máa sen naino. Pefá Yutan kayoi ánon banta kéká ano siyáken Yisasin nan ma Tiyarafenu ano aní ukhein banta ino ma sin nain nanin banta monó átaru namun pintena yo siantanté uno sikhan mai van mi fédén máa sen mino. <sup>23</sup> Mai ana vami ve anóe afóe ano siyáken, “Béi anón ukhein mifo véintá ina ono,” sen mino.

<sup>24</sup> Máa siyaimpin mai ma auu yufúkukhá ein banta evaránen araren tiameemí, “Tiyarafenu aviká pura vá teno. Para vara seyo, Yisasi ume vantan báká tetí afová ukhé uno.” <sup>25</sup> Máa síkan mai vanta ano evaránen betin tiameemí, “Béi ume vanta fi áa ída fi mai séi ída afová ukhé umpo gefá ma séin tuu yufúkukharen ma saréa kama ukhein mai anan afová ukhé uno.”

<sup>26</sup> Máa síkan betí ankan evaránen bén inaemí, “Béi ano éin náisá en nafino. Intesá urená éin auu kama uanten nafino.”

<sup>27</sup> Máa síkan béisaréa evaránen betí ankan tiameemí, “Téi inka saretí ankan tiamiche umpo fará tiretí ída inintoyá kokhon dádá inaiyá ba rafono. Tiretí ankan masá beni eyo iyamponí onova rafono.”

<sup>28</sup> Máa síkan mai Farasisi kayo ano véin asen temí, “Éi veni eyo iyampon mompo setí ankan Mosesini eyo iyampon kayo uno. <sup>29</sup> Tetí ankan afová ukhéku-

Tiyarafenu anon Mosesin bayá siamiyaren mifo mai vanta inte fákesá erikhen nafi mai setí ankan ída afová ukhé uno.”

<sup>30</sup> Máa síkan mai ma auu yufúkukhá ein banta ano evaránen betin tiameemí, “Mai ma séin tuu kama usintá ma suu mareruna vanta van tiretí ankan ena vayan teya setí bén ída afová ukhé uno inte fákesá béisaréa erikhen nafino siya ono. <sup>31</sup> \*Tetí ankan minó ano afová ukhé tiféuno. Ume nanin bantai vaya Tiyarafenu ano ída iné iyan mifo mana vanta ano ma véin avaya iníden ma veni anunu yakhafen ma véinta ana ma monó tin nain bantai vayan ineno van ukhen mino. <sup>32</sup> Pefá aráin in také ma eren tare ma varunará ída mana inamumpá ma auu yufúkukhá kaein mai mana vanta ano evaránen auu kama uanten ne síká inikhé uno. <sup>33</sup> Tiyarafenu ano má ída mai vanta siantantin ma erikhanten maen béisaréa ída kanaíen mana yanasi inten mino.”

<sup>34</sup> \*Máa síkan betí ankan evaránen bén tiameemí, “Éi ume vái inamumpáké afoká ukha ompo éi fará tetí ankan afová simeno van iya fono.” Siren monó átaru namun pintena véin do yarifaan barufá karúdan araven mino.

*Monó Avúavápin Ma Farasisi  
Vanta Kayo Ano Kufa Ukhein Baya  
Ino*

<sup>35</sup> Mai vanta ma yarifaan karúdein bayá Yisasi inire bén nan dosiren máa sen tiameemí, “Éi Vanta Anintá mumunan iya fo áa ída fino.”

<sup>36</sup> Máa síkan mai vanta ano evaránen temí, “Kákán banta oe, Vanta Anin iye fino. Mai éi sisimirá bentá mumunan ono.”

<sup>37</sup> Máa síkan Yisasi evaránen bén tiameemí, “Ma ma saréa éin má bayá siyain mai vantan bákaya éi inka oniya ono.”

<sup>38</sup> Máa síkan mai vanta ano semí, “Bafan noe, séi entá mumunan iyá

\* 9:31: Íbo 34:15    \* 9:34: Íbo 51:5

uno," siren aron kan durafúden mítimen Yisasintá monó ten mino.

<sup>39</sup> Máan tiyákan Yisasi semí, "Téi vanta anasii avúavá daimono van mi ma varará erakheruna auu ma yufukukhein kéká ano auu marantin auu ma kama ukhein nanin banta kayo auu yufükinten mino."

<sup>40</sup> \*Máa síkan manáa Farasisi kéká mairá baren mai vaya inirena bén inaemí, "Tetí ankan masá tuu yufukuhayá éi siya vae."

<sup>41</sup> Máa síkan Yisasi evaránen betin tiamemí, "Auu ma fura sen dufukukhantin mi siredí ankaní ume ída vanten mifo siredi ma seya suu fara vá oniyá uno ma sinteya mai siredí ume fara vanten mino.

## 10

*Kamaen Ma Sipipirá Dafisin  
Banta Vá Bei Sipisipi Kayo Vái Vaya  
Ino*

<sup>1</sup> Yisasi máa siren temí, "Téi fura siré tiretí ankan tiamiyá uno. Mana vanta ano ma sipisipi yafu ona ráké ma ída ódinton ma savi finté dafurá káusiven ma ódin nain mai umoyan bantan báken mi enina yaná barano van ódinten mino. <sup>2</sup> Ódinten mifo ona ráké ma ódin nain banta mai vei sipisipirá ma yafisin banta ino. <sup>3</sup> Máan tukhantin mi onará ma yafisin banta ano ma sipisipirá dafisin banta ma ona yiantádantin minó sipisipi ano véin amen avaya afová ukantin mana mana sipisipi aví ararú intin ekhuyen eranten mino. <sup>4</sup> Dorun ma iyuvintin maen bái an oriyantin minó sipisipi ano vein amen avaya afová ukhen ánaín dakhafen orinten mino. <sup>5</sup> Orinten mifo ena vanta ano ma arantin maen mai vanta amen avaya ída afová ukhen pasen sipisipi kayo ano meren karan orera inten mino."

<sup>6</sup> Yisasi mai vaya sian baéan betí ankan amiyan mifo vetí ída véi ma siyain baya ana afová en mino.

<sup>7</sup> Máan tiyáimpin Yisasi evaránen betí ankan tiamemí, "Téi fura siré tiretí ankan tiamiyá uno. Téi sipisipi kayoi yafu ona uno. <sup>8</sup> \*Esé ma erein banta kayo maen mai ena ina yaná umoyan in banta kéká eríkan mi mai sipisipi kayo ano vetí vaya ída inen mino. <sup>9</sup> Máan tukhái séi ona umpo mana vanta ano ma sempin ma eriaren umperan nain bantan Tiyarafenu ano evaránen avídantin kasaen ódiven eraven iyáken kama yunan nanten mino. <sup>10</sup> Umoyan banta ma erein maen mai vetin aruré asuse iyáké umoyan barano van mi eren mifo séi ma erikheruna mai vetí ankan aunan barantin betimpin bíkano van mi eré uno. <sup>11</sup> \*Téi sipisipirá kamaen dafisin banta uno. Kama yafisin banta anon bei sipisipi vare siren bei aunan ampiadé iyan mino.

<sup>12</sup> \*Máan tiyan mifo mana vanta ano ma ída sipisipi afóe ma váken maen bái ída kamaen dafisin moniká ana ma yoriyaren onantin ma afá iyan erintin maen bái sipisipi kayo me karúden karan orivintin afá iyan mano sipisipi kayo vákúden arintin karan oreraen asuse inten mino. <sup>13</sup> Para vara seyo, mai vanta ano miyan baran máarái yoriyaren pasen sipisipirá ída yafisin meren karan orinten mino.

<sup>14</sup> Téi sipisipirá kama yafisiríin bantan báké minó tesí sipisipi kayo afová ukhékun betí ankan má téin afová ukhen mino. <sup>15</sup> \*Tifóe ano ma séin afová íká ma séi ano véin afová ukheruna van mi mai sipisipi kayo aya ono van te saunan ampiádiyá uno. <sup>16</sup> \*Tenti sipisipi kayo vá ano ena yafufin bain mai kayo vá o avíán mana

\* **9:40:** Mat 15:14    \* **10:8:** Yer 23:1-2; Isi 34:2-3    \* **10:11:** Íbo 23:1; Rev 7:17    \* **10:12:** Apo 20:29    \* **10:15:** Mat 11:27; 1Yn 3:16    \* **10:16:** Ais 56:8; Isi 34:23    \* **10:17:** Fir 2:8-9

yafufin kaurékun ten timen avaya afová uven mana kékásí uvintin mana yafisin manan banten mino. <sup>17</sup> \*Téi ma se saunan ampiádaré ma evaráné baranuna mai van mi se Sifóe ano se nan anunu iyan mino. <sup>18</sup> Ída mana vanta ano kanaíen tenti saunan do varanten mifo séi sesi sinunu fintéi se saunan ampenté umpo sempin ákona vantíi saunan ma ampiré maé evaráné barantékun mi mai ákona Sifóe ano séin timikhen mino.

<sup>19</sup> Yisasi ma mai vaya kayo siyain má Yutan kayo ano iniren beraran aúban daimen mino. <sup>20</sup> Daimen orera iyáken kokhon banta ano semi, “Béimpin namu aunan mi vákan béis óen iyan mifo saretí ankan pará á kasédeyá beni vaya iniya rafono.” <sup>21</sup> Mái síkan ena kéká ano semí, “Ma ída namu aunan ma vain bantai vaya ifo kanaísá en ná namu aunan mano auu ma yufukukhái nain evaránen kama uantanten nafino.”

### *Yisasi Ma Veyan Nan Tiyarafenu Anin Muno Ma Sein Baya Ino*

<sup>22</sup> Maí damú iyonin aúbaná bákan kákán monó tin damú\* Yerusaremí afoká en mino. <sup>23</sup> Mái tukhan maí damú Yisasi maen monó dafufin Soromonini Yuséká noren mino. <sup>24</sup> Noré íkan Yuta kayoi ánon banta kéká ano véin maman aúban den iyen eúkuven inaemí, “Éi iye uron ná baná tetí ankan éi nan amino iyá tife rafuno. Tiyarafenu ano ma aní ukharé ein banta ma vanteya setin kamaeya sisimeno.”

<sup>25</sup> Mái síkan Yisasi evaránen betí ankan tiámémí, “Téi fefái saretí tiámikhé umpo saretí ída mumunan iya ono. Minó doran ma Sifóen avíká ma yoriyaruna mai anon tiretin aní iyan mifo

<sup>26</sup> saretí ankan ída senti sipisipi kéká pinte nan bákeya ída mumunan iya ono. <sup>27</sup> Mái tiya ompo senti sipisipi kayo ano sen timen avaya afová ukhák téi vetí ankan afová ukhékun mi sen tíain dakhafé iyan mino. <sup>28</sup> \*Téi ena ena ma ayun para van oriyen ban aunan amirékun ída afeyoran para vantin maen mana vanta ano ída kanaíen tiyan pintena vetin do varanten mino. <sup>29</sup> Mai fara vara seyo, se Sifóe anon mai kéká téin timikhan béimpin kákán ákona vákan minó esantakhein mana vanta ano ída kanaíen ben ayan pintena yo varanten mino. <sup>30</sup> Para vara seyo, Tifóe rasan manan bá uno.”

<sup>31</sup> Mái síkan Yutan kayoi ánon banta kayo ano véin aruan purono van evaránen onámaná kayo varen mino. <sup>32</sup> Mái tiyaimpín Yisasi vetí ankan tiámémí, “Tifóe vaípáken nan kákán aní daná kayo saretin aní iyá umpo mai kayo fintena inte yaná ma variyarúna vará tireti ankan onámaná tinkamono van iya rafono.”

<sup>33</sup> \*Mái síkan Yutan kayo ano evaránen béis tiámémí, “Tetí ankan eni kama yoran nara iniré éin onámaná ankamono van iya rauno. Ída ino. Éi varará banta ano ma Tiyarafenu varu variyaona ano véin oyampá bayan tiyan ná mai van mi éin onámaná ankamono van iyá tiféuno.”

<sup>34</sup> Mái síkan Yisasi evaránen betí ankan tiámémí, “Tireti ankan man bayafin Tiyarafenu ano vetin nan ayarafenu kayo an mi yakhaonó tikhen nafino. Ibo 8:6

<sup>35</sup> Pefá ma Tiyarafenu ano ma vanta kayo van ma ayarafenu ino ma sikharé intin barará banta kayo ano Tiyarafenu vompon dóki fintena vaya ída kanaíen durafurinten mino. <sup>36</sup> Mái tukhen

\* **10:22:** Mai monó tin damú maen oon ururen amusin in damusan mi Iburu vayafinté Anuka e siyan mino. \* **10:28:** Yon 3:16; 6:39 \* **10:33:** Riv 24:16

mifo Tifóe ano séin iyátintáden mi ma varará tisinta erakhé uno. Erakhéi séi ma Tiyarafenu Anin muno ma siyákuya fará tiretí ankan teyá éi Tiyarafenui varú barano vará iya vae siya rafono. <sup>37</sup> Téi ma Sifóeni yorarí ma ída iyákuya mai sretí ankan ída vá tenti vayará mumunan ono. <sup>38</sup>\*Téi veni yorarí iyá umpo sretí ankan ma ída senti vayará mumunan inteya mai séi ma minó doran ma yoriyaruna rasá mumunan ono. Máan ma inteyan tiretí ankan kanaíeya afová inono. Tifóe sempin bá téi Sifóempin bá uno.”

<sup>39</sup> Máa síkan betí ankan bén enádá pákano van íkan béisvetin me ampiren oren mino. <sup>40</sup>\*Máan tíkan Yisasi evaránen Yodení non ekháden Yoni ma fefá banasi monó non péantiyaré ein baru ádé o varen mino. <sup>41</sup> O vákan kokhon nanin banta ano véi vaintá eriven temí, “Pura ino Yoni vei vaya ákona ino van ída mana avúavá aníen mifo minó bayá ma ma vanta van tiyare ein mai furan tiyaren mino.” <sup>42</sup> Máa siren mai varu ráké kokhon nanin banta ano véinta mumunan en mino.

## 11

### Rasarusini Furin Baya Ino

<sup>1</sup>\*Mana Rasarusin ne sin banta vá be ayofi kanan María nú Mata nú bá Betaní barurá baréin Rasarusin aí en mino. <sup>2</sup>\*Mai ma ínaimpáké ma kama auna iyain uverifó ma Yisasin arantantá banaren ma ve ánon do fóké ma yo arumin nain nanin mi María varéin be aváe Rasarusin aí iyan baren mino. <sup>3</sup> Baré íkan míkan anananosan mano Yisasi vaípa bayá yan oríkan temí, “Bafan noe, mai ma éi moéke anunu iyaona vanta aí iyan ban mino.”

\* 10:38: Yon 14:10-11 \* 10:40: Yon 1:28  
\* 11:4: Yon 9:3 \* 11:16: Mak 14:31

<sup>4</sup>\*Mai vaya ma Yisasi iniyáken béisemí, “Mai aí ma vain mai fura sen purin aisa van naino. Tiyarafenu ano vei ákona vanasi aní intin mai finté uaren be anin mano kákan bí barano van mi mai aí pákakhen mino.” <sup>5</sup> Yisasi ano Rasarusin má be ayofi kanan Matan nú Marian nú ba san mi móeken anunu ukharen mino. <sup>6</sup> Máan tukharé íkan béisemí, “Rasarusini aí bayá ma iniren maen mai ma véi varé ein barurá kan damú bá evaránen baren mino.” <sup>7</sup> Baré íkan kan damú orivin bei eyo iyampon kayo siamemí, “Erí Yutan barafá evaráne oró tifano.”

<sup>8</sup> Máa síkan bei eyo iyampon kayo ano véin tiamemí, “Aru soe, sare uron mi Yutan kayo ano éin onámaná ankamono van ein mifo mai varufásá éi evaráne orono van iya fono.”

<sup>9</sup> Máa síkan Yisasi evaránen betí ankan tiamemí, “Tiyan míkan mifo sirantan kan orun kádan (12) auará ída kakhaken báé iyan nafino. Mana vanta ano ma kará ma nóken ída eyúpóen ankaminten mino. Mai fara va ino, ma varai kakhan oniyan pasen mino. <sup>10</sup> Máan tiyaren ma yúdufumpin orinten maen béisemí, “Aru soe, sare uron mi kakhantan oon ída van mino.” <sup>11</sup> Máa siren Yisasi vetí ankan tiamemí, “Tetisi sirona Rasarusi maen aun mi vakhein mai finté mo avoranté uno.”

<sup>12</sup> Máa síkan bei eyo iyampon kayo ano mai vaya iniren béisemí evaránen tiamemí, “Bafan noe, véi ma auun bakhá inten evaránen e mantanten mino.” <sup>13</sup> Rasarusini furí pákena van mi Yisasi siyákan bei eyo iyampon kayo ano yo inian aun mi vakhan man tino sen mino.

<sup>14</sup> Máan tiyaimpin betí ankan pámanen tiamemí, “Rasarusi fükái <sup>15</sup>sretí ankan mumunan ono van

\* 11:1: Ruk 10:38-39 \* 11:2: Yon 12:3

mi iniré béin má mairá ída o varé umpo erí béin o onatifano."

<sup>16</sup> \*Máa síkan Tomasi nan ma Didimasin ne siyain mano ena eyo iyampon kayo siamemí, "Erí tetí ankan má oré béin má manafin o furó tifano."

*Yisasi Ma Rasarusin Ayofi Kanan Ará Kusiantan Baya Ma Sein Baya Ino*

<sup>17</sup> Yisasi ma Betaní barurá oriven iníkan maen Rasarusin nan pe fúbin masí uran kamí kamí damú orikhen ne sen tiamen mino. <sup>18</sup> Betaní baru ráké ma Yerusalemí barurá ma oriyan mai kankanan maerin bákón <sup>19</sup> Yutan kayo ano Mata nú Maria nú ayofi ma fúkan bain nan ará kusiantano van e varen mino. <sup>20</sup> Mata iníkan maen Yisasi nan eriyan ne síkan béin o onanono van oren mifo Maria maen ifá en mápin baren mino. <sup>21</sup> Mata ma Yisasin o oniyáken temí, "Bafan noe, éi mará baréesin te siyofi ída furin nainten mino." <sup>22</sup> Máan tukhen mifo saréa yere ma éi mana yana san Tiyarafenu vaípá ma inantesin maen éin amintéi téi afová ukhé uno."

<sup>23</sup> Máa síkan Yisasi véin tiameemí, "E ayofi evaránen e mantanten mino."

<sup>24</sup> \*Máa síkan Mata véin evaránen tiameemí, "Ínaiimpá ma ma vara kípán nain damú ma minó nanin banta ano ma e mantiyantin maen béis e mantantéi mai séi afová ukhé uno."

<sup>25</sup> Máa síkan Yisasi véin tiameemí, "Evaránen ma e mantan má au-nan ma varan má téi umpo sentá ma mumunan uven púkaréin nain mano mai finté evaránen aunan baranten mino. <sup>26</sup> Baranten mifo iye anó para váken téintá mumun-an inten nafi mai ano ída uron mi furinte mino. Mairá éi mumunan iya fono."

<sup>27</sup> \*Máa síkan Mata evaránen béin tiameemí, "Eyo Bafan noe, éi Tiyarafenu Anin báke mai ma

ma varafin erinten ne ma sen béis aní ukhá ein bantan baná téi mumunan iyá uno." <sup>28</sup> Mata ma máa siren maen evaránen oren be aunaña Marian mo araan aúpá kaúden tiameemí, "Arú ano e váken éin nan ina iyan mino."

<sup>29</sup> Máa sein baya ma Maria inen maen ainen e mantan Yisasi vaípá oren mino. <sup>30</sup> Yisasi ída mai varufin ódikhen mai ma Mata má o fóken baya seintá para varen mino. <sup>31</sup> Maria ma ainen e mantan barufá aravíkan mai ma véin ará kusiantano van mápin baré ein Yutan kayo ano ma onen maen masíkái mo arunaná barano van mi oriyan mino siren betí ankan béin bákuren oren mino.

<sup>32</sup> Órikan Maria ma Yisasin o oniyáken béin arantampin o mítimen temí, "Bafan noe, éi mará bano se varé esin te siyofi ída furin nainten mino."

<sup>33</sup> Máa siren Maria ifí dákón mai ma véin má orikhá ein Yutan kayo ano yere ifí diyaimpin Yisasi onan béin aúpin ákuna ano víken mino. <sup>34</sup> Máan tiyáken béis inaemí, "Intefasá béin masí uren nan banafino."

Síkan "Bafan noe, erive onano," sen béin tiamen mino.

<sup>35</sup> Máa síkan Yisasi ifí den mino.

<sup>36</sup> Ifí dan maen Yutan kayo ano semí, "Onano. Aúkákéi véin nan anunu ukhen mino."

<sup>37</sup> \*Máa siyákan manáa ano semí, "Béis auu yufúkukhá ein kayo kama uantan oniyain mifo ma vanta ma ayaintin ída furoren mino."

*Rasarusi Fúkáin Ma Yisasi Ano Orun Avían Mantein Baya Ino*

<sup>38</sup> Yisasin arápin evaránen arunaná édavyaimpin masíkái oren mino. Mai masí maen ompin boraádan baré íkan maifin masí uren oyirá onámaná iyádan baren mino. <sup>39</sup> Baré íkan Yisasi semí, "Masí oyi ráke onámaná do varano," síkan maen mai ma

fúkein banta ayofi Mata semí, “Bafan noe, kamí kamí damú orikhein aunka inten mino.”

<sup>40</sup> Máa síkan Yisasi semí, “Téi ídá éin tiamerá mumunan ma inteya Tiyarafenui kakhan ákona onan nono sikha rafuno. <sup>41</sup> Máa síkan betí ankan masí oyi ráke onámaná do mádon maen Yisasi inarufá kakháben máa semí, “Tifóe oe, éi ma senti simúkin iniyaona van mi susu sé uno. <sup>42</sup> Éi ena ena yamú tenti simúkin iniyaonan bái afová ukhé umpo ma ma iyukhein nanin banta ano éin nan mi séin tiantan erikhen mino sen afová iyáken mumunan ino van mi siyá uno.”

<sup>43</sup> Máa siren Yisasi avádóden oovararen temí, “Rasarusi oe, e khuve erano.” <sup>44</sup> Máa sen Rasarusin ariyain má davaráe fóké minó bukhafa úkukhein mano e khuáden barufá erákan Yisasi mai nanin banta siamemí, “Davaráe yo utúantá desin orino.”

*Yisasin Arin Aa Van Ma Yosein Baya Ino*

(Matiu 26:1-5; Maki 14:1-2; Ruku 22:1-2)

<sup>45</sup> \*Máaón tíkan ódaren mai ma Maria má o van arunaná bariyá ein Yutan kayo ano Yisasintá mumunan en oreraen mino. <sup>46</sup> \*Mumunan iyákan mai finté manáa ano oren mai ma Yisasi varein avúavá san mo Farasisi kéká tiamen mino.

<sup>47</sup> Tiámikan monó ánon banta kéká bá Farasisi kayo vá ano Kanisori kéká aran e átaru uvin betin inaemí, “Ma ma enará ukhein aní danasinta ma uvaren dararen iyain banta amaniná naisá otifante rafuno. <sup>48</sup> Tetí ankan ma véin á ékun mai avúavasí ma iyantin minó nanin banta ano véintá mumunan intin maen Romui kamanin mano eriven tetinti kákán monó namun má bara vá máden namu uren asuse inten mino.”

<sup>49</sup> Máa síkan mai aúbanté Kafiafin ne sin banta mai oranafin

monó ánon banta kéká ánon bantai ukharen e mantén temí, “Mai ma siyaona vaya sireti ankan ídá afová ukha ono. <sup>50</sup> Ída afová ukha ompo minó nanin banta ano o afeyoran nafo mana vanta ano ma vetin nan o furintin mai anan kama inten mino.”

<sup>51</sup> Mai vaya ma Kaiafasi sein mai ída vei ineine finté ten mifo mai oranafin monó ánon banta kéká ánon bantai véri ukhen banasi aya ono van ma Yisasi furin nain nan mi sakhanampa vayan Yutan barafin ma vain nanin banta kayofin tiáden mino. <sup>52</sup> \*Mai varafin ma vain nanin banta máa vara siáden naino. Mai ma minó barafá ma Tiyarafenu akhafana ma vain o avian átaru urantin mana kékási ma inain mai va san mi siáden mino.

<sup>53</sup> \*Máaón tukhan béin ma arintin purin nain aa van maí damuké araíen dosen mino. <sup>54</sup> Dosiyákan mai van Yutan kayo avorá non nan Yisasi me ifá en Ifraimí baru ádé kámá barafá bei eyo iyampon kayo vá o varen mino.

<sup>55</sup> O vákan Tiyarafenu ano ma Isarerí kéká Avo Uantein Damú ádé iyákan minó pimpáké banasi ano Tiyarafenu avorá avusese ono van Yerusalemí barurá ana óden mino. <sup>56</sup> Un báken betí ankan Yisasin nan dosian more mere uvaen monó barurá o átaru uven beraran inaemí, “Tiretí ankan náié té iniya rafono. Béi ma omápin erinten nafino.” <sup>57</sup> Máa siren dosiyan maen monó anón banta kéká bá Farasisi kayo vá ano vanasi siamemí, “Yisasi ma onan nona ano vá me sisimirá o fáká tifano.”

## 12

*Kama Auna Iyain Uveri Ma Yisasin Arantantá Banaein Baya Ino*

<sup>1</sup> \*Avo Uantan Damú ma afokáin nain mai yan manápá ifo afápá

\* 11:45: Yon 7:31    \* 11:46: Ruk 16:31    \* 11:52: Yon 10:16    \* 11:53: Yon 5:18    \* 12:1: Yon 11:1, 43

mana un kádan damú ana ukhan mai ma fúkaréin masí pinte avoran e mantein banta Rasarusini varurá Betaní Yisasi o unen mino.

<sup>2</sup> \*Onóbin Yisasin nan amusin uren ma samádan dunan Mata kuviyákán mai ma Yisasi má ma yunan nan takhó ma mamáden kumanen eúkukhein kayo aúbaná Rasarusin má dere kumantaren mino. <sup>3</sup> \*Kumantan María ano mana kama aunka iyain uveri anan aúbanáké ukhein baren me Yisasin arantantá banaren tesé uantáden be ánon do fóké arumiyákán mai namumpin kama aunka ano víken mino.

<sup>4</sup> Máan tiyaimpin mai ma ínaimpáké Yisasin avían namuro ayampín amin nain banta Yudas Iskariotin\* ne sin mano mai van ída amusin iyáken temí, <sup>5</sup> “Kákán moniká bain uveri anan mifo ídá áenásá bare mo sari uresá mai monípó ona ma i vain kéká ame runo.” <sup>6</sup> Béi ma máa sein mai ona i van nanin banta aya onovara sen naino. Béi umoyan bantan báken moní unantá dafisiyan maifinte variyain bákán mi máa sen mino.

<sup>7</sup> Máa síkán Yisasi evaránen béin tiamemí, “Ma nanin áesin máan tino. Téi ma masípin oronuna mái damúken pétintiyán mino. <sup>8</sup> \*Ona ma i van nanin banta anón tiretin má ena ena vanti van nompo séi ída siretin má ena ena vanté uno.”

### *Rasarusin Ma Aruan Purono Van Ein Baya Ino*

<sup>9</sup> Yutan nanin banta ano iníkan ma Yisasin nan Betaní barurá e van ne sin maen béin má inká mai ma fúkáin ma avían mantakhein banta Rasarusin má onano van oren mino. <sup>10</sup> Máan tiyákán monó ánon banta kayo ano Rasarusin dere aruan purono van en mino.

<sup>11</sup> \*Mai fara va ino, Yisasi ano ma Rasarusin orun avían mantakhein nan Yutan kayo ano monó ánon

banta kéká me ampiriyan Yisasi intá mo mumunan iyan mino.

*Yisasi Ma Kin An Daven  
Yerusalemí Ódein Baya Ino  
(Matiu 21:1-11; Maki 11:1-11;  
Ruku 19:28-40)*

<sup>12</sup> Ená damú Yisasin nan Yerusalemí ereno van ayanafá eriyan ne sin baya ano mai ma Avo Uantan Damú monó teno van Yerusalemí barurá o iyyiá ein nanin bantafin orera íkan inen mino. <sup>13</sup> \*Iniren minó nanin banta ano kefo anaí uaren béin aayana fáke o avirano van oriyán oovararen temi,

“Béin avisá daní ino!\*  
Bafan avíká ma eriyan banta vá  
avábá uantano! *Ibo 118:25-26*

Isarerii kin avisá daní ono!”

<sup>14</sup> Tiyarafenui vompon dóki ano ma sikharé einén mana ano ída ané kumantaré ein donkin arará Yisasi yosiren mai amaniná kumamen eren mino:

<sup>15</sup> “Saioní nanin banta oe, onano mana ano ída ané kumantaré ein donkin arará amaniná tiretii kin mano kumamen eriyan mifo ída vá akhokho van ono.” *Sek 9:9*

<sup>16</sup> \*Beni eyo iyampon kayo ano amino ukharen mifo Tiyarafenu ano ma Yisasin purin pinte orun avían mantaren kákán bí amiran maen ínaimpákéi vetí ankan afová iyáken bompon dóki ano Yisasin nan mi sikharen mino sen mai avúgvá ma afoká ein nan ovaren me inen mino.

<sup>17</sup> Máan tiyákán Rasarusi fúbin masí ukháin ma Yisasi ano aran e mantan eran ma ontaré ein nanin banta ayo ena nanin banta mo siamin mai vaya ano oreraen mino. <sup>18</sup> Mai ma enará ukhein daná ma aní ein baya ma inikhá ein nanin banta anón béin aayana fáke o avirano van oren mino. <sup>19</sup> Máan tiyaimpin Farasisi kayo

\* **12:2:** Ruk 10:40    \* **12:3:** Ruk 7:37-38    \* **12:4:** Yudas Iskarioti e ma siyain mai Iskarioti baru ráke vantán ban mino.    \* **12:8:** Diu 15:11    \* **12:11:** Yon 11:45    \* **12:13:** Yon 1:49  
\* **12:13:** Iburu vaya finté ‘Osana’ ma sikhein mai ‘avisá daní ino.’    \* **12:16:** Yon 2:22

ano yeraran ten oreraemí, “Onano minó nanin banta ano ma yéin bákuressa oriyain mano setisi aaí ída iyan mino.”

### *Yisasi Ma Vei Furin Baya Sian Amá Ein Baya Ino*

<sup>20</sup> Avo Uantan Damú ma vanasi ano Yerusalemí monó teno van ódiyan maen Kiriki kayo vá maifin o varen mino. <sup>21</sup> O varen mai kéká ano oren Kariri akhempá ma vain baru Betsaidáke vanta Firipi vaintá oriven inaemí, “Kákán banta oe, Yisasin onátifano van munó.” <sup>22</sup> Máa síkan Firipi ano Enduru mo siamíden mikanan mano Yisasin mo siamen mino.

<sup>23</sup> \*Tiamíkan Yisasi evaránen békakan tiameemí, “Banta Anin ma kákán bí baran nain máí damú inka afoká en mino. <sup>24</sup> \*Téi fura siré tiretí ankan tiamiyá uno. Mana uviti ayun ma varafin ída aravinten maen ída e ampaminten mifo varafin ma orun peran nain manon e ampamaren kokhon aran imádanten mino. <sup>25</sup> \*Máan tukhen mifo mana vanta ano ma vei aunan pákaan ákona iyáintin maen mai o afeyoranten mifo mana vanta ano ma ma varará bei aunan ma ampiyáintin maen beni aunan pákarantin ayun para van oriyan banten mino. <sup>26</sup> Mana ano ma senti yorarí ono van téin tinaín ná bákurino. Para vara seyo, senti yoran banta ano se ma vanunará vanten mino. Te Sifóe ano mai ma senti yorarí iyáin nain bantan kákán bí aminten mino.”

### *Inaru Fáké Mana Oova Ano Ma Yisasin Aví Daní Ein Baya Ino*

<sup>27</sup>\*Máa siren Yisasi semí, “Taréa sen tirá ano uman diyá umpsa náiesá ten nuno. Tifóe oe, ma uman pinte siya onó tente rafuno. Ída ifo mai ma eriyain uman barano van mi erikharé

uno. <sup>28</sup> Tifóe oe, e avisá manan kákání ono” siyain má inaru fáké mana vaya eriyáken temí, “Te siví inka maman kákání uráké evaráné maman kákání onté uno.” <sup>29</sup> Máa síkan mairá ma iyukhá ein nanin banta ano siyáken aafan kankaré tiyan mino síkan manáa ano enisorí anon bén má baya siyan mantino sen mino.

<sup>30</sup> Máa síkan Yisasi semí, “Mai ma ineona vaya mai séin tiyain baya vaino. Ída ino. Tiretin ma ayain baya ino. <sup>31</sup> Barará nanin bantai avúavá ma yaimin damú inka afoká ein ma varará ma yafiká ein ánon banta\* Ti-yarafenu ano vakúdantin orinent mino. <sup>32</sup> \*Máan tinten mifo ma vara ráke ma séin maman daní uranti maé minó nanin banta o avíadékun téi varunará erinten mino.” <sup>33</sup>\*Yisasi ma mai vaya sein mai veyan ma furin nain avúavá páken nan tiamen mino.

<sup>34</sup> \*Tiamíkan banasi ano semí, “Man bayafin inétifekun Ti-yarafenu ano ma aní ukhein banta ano fara van oriyan banten ne sikhen mifo inté uáké Banta Anin maman daní inte ne siya fono. Banta Anin mai iyé ban nafino.”

<sup>35</sup>\*Máa síkan Yisasi vetí ankan tiameemí, “Tiretí ankan ma kakhaantan oon mano sító mágrái vantin dunin mano saretin maman barará danten mifo vá tiretimpin ma oon báken kakhaan tiyaintasá nono. Títípafin ma oriyain banta ano mai ma véi oriyaípá ída afová ukhen mino. <sup>36</sup>\*Mai oon ma saretin má bain nan ma ákona mumunan inte mae mai oon akhafanaíi inono.” Yisasi ma mai vaya kayo vanasi siamíden maen me onen aúpá oren mino.

### *Yutan Kayo Ma Yisasintá Ída Mumunan In Avúavú Ma Ákona En*

\* **12:23:** Yon 13:31-32; 17:1    \* **12:24:** 1Ko 15:36    \* **12:25:** Mat 16:25    \* **12:27:** Íbo 6:3; 42:5; Mat 26:38    \* **12:31:** Barará ma yafiká ein ánon banta mai Ban Anon mino.    \* **12:32:** Yon 3:14    \* **12:33:** Yon 19:6    \* **12:34:** Íbo 110:4; Ais 9:7; Dan 7:14    \* **12:35:** Yon 8:12  
\* **12:36:** Efe 5:8

### *Pákakhein Baya Ino*

<sup>37</sup> Yísasi ma enará ukhein danasta ma vanasi avorá aníyán maen betí ankan ída véintá mumunan iyaren mino. <sup>38</sup> Máan ma ein manon sakhanampa vanta Aisaiya ma siádan baré ein bayan mo kanaíen mino:

“Bafan noe, iye anó tetinti vayará mumunan iyan ná

inká intéa kékápin ná Bafan mano vei ayain ákona aní inten nafino.” *Ais 53:1*

<sup>39</sup> Para va vanasi ano ída mumunan en naino. Aisaiya ma ena vompompin máa sikhein anará ino:

<sup>40</sup> “Tiyarafenu ano vetí ankan auu yufúkuádaren aráká iyádan mai van ída kanaíen oniyáken aúkáké inen ará baerái ída ayofé uno.” *Ais 6:10*

<sup>41</sup> \*Para va máa sikhan naino. Aisaiya ano Yisasini kakhan ákona ódaren mai van mi siádan baren mino. <sup>42</sup> \*Máan tiyákan mai damú ana kokhon Yutan kayoi

ánon banta kéká ano Yisasintá mumunan ukharen mifo Farasisi kayo ano monó átaru namun pinte yo siantan nain nan mi féden betíi mumunan ída sian páman en mino. <sup>43</sup> \*Para va ino, Tiyarafenu ano ma vetin aví daní in nan ída fura anunu ukharen mifo vanasi ano ma vetin aví daní in nan mi moéken anunu ukharen mino.

### *Yisasintá Ma Mumunan Iyain Kéká Ano Mai Ve Afóentái Mumunan Iyan Mino*

<sup>44</sup> Máan tiyákan Yisasí avádóden oo vararen temí, “Mana vanta ano ma sentá mumunan iyain mai séintá ana va mumunan iyan naino. Mai ma séin tisintá erikheruna mai Tiyarafenurá deren mumunan iyan mino.

<sup>45</sup> \*Máan tiyáken ma séin tonanten maen mai ma séin tisintá erikheruna Tiyarafenu vái oniyán mino. <sup>46</sup> Téintá ma mumunan in nain nanin banta ano ída yúdfumpin bano van mi séi ma varará oon an davé erikhé uno.

<sup>47</sup> \*Mana vanta ano ma senti vaya iniren ída kamaen dafisin nain nan ída véin daimonté uno. Para vara seyo, vanasi yaimon novara erikhe rauno. Ída ino. Betin aya uré evaráné avirano van mi erikhé uno. <sup>48</sup> Erikhé umpo senti vaya ma iniren átakharé iyain kéká ma yaimin nain banta mai van mino. Mai ma vetin tiamiyaruna vaya anon ma vara ma akhení inain damú betin uman aminten mino. <sup>49</sup> Para vara seyo, ída sesi ineine finté tiamiyá umpo se Sifóe ano ma sisintáden ma máan ná teno ma sen tisimikharé ein bayan tiamiyá uno. <sup>50</sup> Téi afová ukhé kun mi véi ma sisimikhein baya ano ayun para van oriyan ban aai aní ukhen mino. Máan tukhái mai vaya vá teno ma siren Tifóe ano ma sisimikhá ein bayan tiamiyá uno.”

## 13

### *Yisasi Ma Vei Eyo Iyampon Kayo Arantan Tesé Uantein Baya Ino*

<sup>1</sup> Tiyarafenu ano ma Isarerí nanin banta Avo Uantan Damú ádé iyákan Yisasi veyan ma ma vara me ampireñ ma ve Afóe vaípa orin nain damu inká afoká en mino sen béis afová en mino. Bei vanasi ma ma varará bain nan anunun iyaren mi véi ma furin nain manon mai anunu maman dákó inten mino. <sup>2</sup> \*Inúpáké betí ankan kumantén dunan niyákan mai ma Yisasín avían namuro ayampin kaintin ma arin nain banta Saimonin anin Yudas Iskariotin áupin Ban Ano mano fében ineine amen mino. <sup>3</sup> \*Yisasi afová ukhan be Afóe ano minó

\* **12:41:** *Ais 6:1*   \* **12:42:** *Yon 9:22*   \* **12:43:** *Yon 5:44*   \* **12:45:** *Yon 14:9*   \* **12:47:** *Yon 3:17*   \* **13:2:** *Ruk 22:3; Yon 13:27*   \* **13:3:** *Yon 3:35; 16:28*

daná ben ayampin mana amikhan  
béi Tiyarafenu vaípáké erikhein  
mai véi evaránen Tiyarafenu  
vaípá orinten pasen <sup>4</sup> dunan nan  
takhókáké orun mantaaren bei  
ayá au anamun do yavaman  
kaúden tauri maman avisafin  
damen mino. <sup>5</sup> Damuren mana  
yókifin non banaan kaúden bei  
eyo iyampon kayo arantan tesé  
uriyan mai ma avisafin damukhá  
ein taurifó arúantádú en mino.

6 Máan ten oriyaren Pita vaintá oríkan béisemí, “Bafan noe, pará éi sen tirantan tesé into fono.”

7 Máo síkan Yisasi evaránen  
bén tiameví, "Taréa ma séi  
variyaruna yaná éi ída afová ukha  
ompo ínaimpái afová inono."

<sup>8</sup> Máa síkan Pita véin tiamemí, “Téin tirantan ída vá tesé ono,” síkan Yisasi evaránen béin tiamemí, “Éin arantan ma ída sesé ékuya mae éi ída kanaíeya senti eyo iyampon ban nono.”

<sup>9</sup> Máa síkan Pita evaránen temí, “Máan ma inte mae ída vá tirantan máa ana sesé iyáke siyan má tñon má dere vá tesé ono.”

<sup>10</sup> \*Máa síkan Yisasi véin tiameémí, "Non ma fékein banta ano avusese ukhen mai van ída enádá non peré iyan mifo arantan máan tesé é iyan mino. Tiretí ankan inka avusese ukha ompo ída minó ano avusese ukha ono." <sup>11</sup> Para va máa sen naino. Namuro ayampin ma véin avían kain nain banta Yisasi fe afová ukhen mai van mi minó ano ída avusese ukha ono sen mino.

12 Yísasi yetí ankan arantan ma sesé uan kíparen bei ayá au anamun maman uren takhoká kumamen máa sen betin inaemí, "Ma ma séi vareruna yanái ana sretí ankan afová ukhe fono. 13 Tirití ankan ma Aru soe Bafan noe ma se séin tariyaona mai furan tiya ono. Para vara seyo, séi sretí ankaní Arú bá Bafan mái vá uno. 14 \*Téi Bafan má Arú bá ma váké arantan

tesé uanterunaí e vá ena nanin banta vasá arantan teséin maran ono. <sup>15</sup>\* Téi ma avúavái siretí ankan aní é umpo ma ma sirétintá ma aníeruna mai avúavá ana vá dakhafono. <sup>16</sup>\* Téi fura siré tiretí ankan tiamiyá uno. Doran banta ano ída vei ayafa esantakhan inká bayá ma varen orin banta ano ven ma siantein banta ída esantakhen mino. <sup>17</sup> Ma ma séi ma siameruna vayai ana ínka siretí ankan afová e umpo mai vaya ánaín ná kama e vakuriya sin ná maen mi avábá banti van nono.

*Yisasi Ma Yudasi Nan Éi Anon  
Namuro Ayampin Tívian Kain  
Nono Sen Tian Amá Ein Baya Ino  
(Matiu 26:20-25; Maki 14:17-21;  
Ruku 22:21-23)*

18 "Téi ma avían tesinaí ukheruna mai minó kayo varasiya rauno. Tiyarafenui vompon dókifin ma máa sikhá ein mai furasen afoká inten mino. 'Téin máma mana yókifin dunan niyain banta anon ten tínon dasamono van arantan dani iyan mino.' *Ibo*  
41:9

19 \*“Mai yaná ída afoká ukhái sareá siretí ankan tiamiyaruna ínqimpá ma afoká intiya séin nan mai ma Tiyarafenu ano ma aní ukhá ein banta ino seja afová ure mumunan inono. 20 \*Téi fura siré tiretí ankan tiamiyá uno. Tentí vaya ma varen orin nain banta ma kama inteya mai sen má deren kama inono. Téin ma kama inteya mai sen ma sisintá erikheruna Sifóen má deren kama inono.”

<sup>21</sup> Máa sirákan Yisasin ará ano  
uman deimpin mairá bái semí,  
“Téi fura siré tiretí ankan tiamiyá  
uno. Tiretí ankan pinté mana  
ano sentin namuro ayampin tivían  
kain nono.”

22 Máa síkan bei eyo iyampon  
kayo ano iye nará tiyan nafi siren  
beraran onan maran uren amino

\* 13:10; Yon 6:64, 70-71; 15:3

\* 13:14: Mat 20:28; Ruk 22:27

\* 13:15: Fir 2:5; Kor 3:13;

1Pi 2·21

13:16 Mat 10:24

\* 13·19· Von 14·29· 16·4

•3• 3:20 Mat 10:40

en mino.<sup>23</sup> Amino en orera iyákan maná Yisasi ma anunu ukhein mai eyo iyampon mano veni ádé kumantaren mino.\*<sup>24</sup> Kumantaré íkan Pita ano ánon póké tiameemí, “Iye anó máon tinté iná tiyan nafi mai véin ina ure ineno.”

<sup>25</sup> Máa síkan mai eyo iyampon mano Yisasin ádé e afánen o súpá uven inaemí, “Bafan noe, éi iyen nará tiya fono.”

<sup>26</sup> Máa sen ina íkan Yisasi evaránen tiameemí, “Dunan anufin ma vereti yaré orun maman amenuna mai vanta ino,” siyáken bereti máden dunan anu yókifin daaren Saimonin anin Yudas Iskariotin amen mino.<sup>27</sup>\* Amikan Yudasi ma mai vereti naran maen Ban Anon mano véin áupín un periyain má Yisasi véin tiameemí, “Éi ma varano van ineine iyaona yaná aine varano.”<sup>28</sup> Yisasi ma mai vaya Yudasín tiamiyákan mai yunan nan takhó akhempá ma kumanen eúkukharé ein kéká ano mai vaya ana ída afová en mino.<sup>29</sup> Yudasi vetí ankaní moníká dafisin bantan bákán manáa ano ma inein mano véin nan mai má Ayo Uantan Damú ma nan nain dunan ná baranten nafi áq ona ma ída van kayo amino vará Yisasi véin tiamiyan nafi sen beti inikharen mino.<sup>30</sup> Máa siyain má Yudasi ma mai vaya iniren ainen e mantén dunteimpin barufá araven mino.

### *Yisasi Ma Vei Eyo Iyampon Kayo Auyen Man Baya Siamein Mino*

<sup>31</sup>\* Yudasi ma e mantén barufá aravuvín maen Yisasi semí, “Tareá Vanta Anin mano kákán bí barantín maen Tiyarafenu ano Vanta Anintá kákán bí baranten mino.<sup>32</sup>\* Mái ten ma Tiyarafenu ano kákán bí ma mamaren maen Banta Anin ainen kákán bí aminten mino.<sup>33</sup>\* Tikhafana oe, séi sító máorái saretín má barééku

mae saretí sen nan dosin nompo Yutan kayo ma siameruna mai vaya anan tiretí ankan tiamiyá uno. Téi ma oronuna varufá tiretí ankan ída kanaíeya orin nono.

<sup>34</sup>\* Mái tukhein nán mi saréa auyen man bayan tiretin amiyá uno. Téi ma saretín nán ma sinunu iyarunaí ana eya vá ena van anunu ono.<sup>35</sup> Ben nan anunuin maran ma esin ma minó nanín banta ano afová uren maen mí saretí ankan nan tentí eyo iyampon kayo ino sinten mino.”

*Yisasi Ma Pita Nan Téin Oyan  
Timin Nono Sein Baya Ino  
(Matiu 26:31-35; Maki 14:27-31;  
Ruku 22:31-34)*

<sup>36</sup> Máa síkan Saimon Pita ano Yisasin inaemí, “Bafan noe, éi intefásá orinte vae.”

Síkan Yisasi evaránen bén tiameemí, “Téi ma oriyaruna varufá éi saréa ída kanaíeya sivákurin nompo ínaímpákéi orin nono.”

<sup>37</sup> Máa síkan Pita evaránen bén inaemí, “Bafan noe, séi en nan purono van mi útakhé umpo náisá ukhantirá taréa séi ída éin avákurontéku vae.”

<sup>38</sup> Máa síkan Yisasi evaránen temí, “Éi kanaisáeyá téin nan purinté tiya vae. Téi fura siré éin tiamiyá uno. Inuran kúkarópasí iyantin ma kokore ída asíkantiya éi kanú manaú dádá téin nan ída afová ukhé uno sin nono.”

## 14

### *Yisasi Ma Vei Eyo Iyampon Kayo Ará Kusiantan Baya Sein Mino*

<sup>1</sup>“Tiretí ankan ída vá kokhon ineine ureya ará uman diya vá bano. Tiyarafenurá ma mumunan ukhan te vá mai sentá bá dere vá mumunan ono.<sup>2</sup> Tifóen amápin kokhon karafaran bákái saretí ankaní varu mo funtáantano van mi séi oronté umpo ída máan

\* **13:23:** Yisasi ma anunu ukhein eyo iyampon mai Yoni ino. \* **13:27:** Yon 13:2 \* **13:31:** Yon 12:23 \* **13:32:** Yon 17:5 \* **13:33:** Yon 7:33-34 \* **13:34:** Yon 15:12, 17; 1Yn 3:23; 2Yn 5 \* **14:3:** Yon 12:26

tukharé intí téi ma vaya siretin tiamen nunaren mino. <sup>3</sup>\*Téi ma siretí ankaní varu ma mo funtáádoré maé ovaráné eré tiretin e avirékuya sen má oreya séi ma varuna varurá tireti má o van nono. <sup>4</sup>O van nompo séi ma orono van iyaruna mai varufá ma orikhein mai aa inka sireti afová ukha ono.”

### *Yisasi Maen Be Afóe Vaípá Ma Orikhein Aa Ino*

<sup>5</sup>Máa síkan Tomasi véin inaemí, “Bafan noe, setí ankan ída afová ukhé umpo éi intefasá oriya vae. Intesá urerá téti ankan mai aa afová onte rafuno.”

<sup>6</sup>\*Máa síkan Yisasi evaránen bén tiámemí, “Téi anan aa váké pura vayai ana váké inká ayun ma fara van oriyan ban aunan mi vá uno. Mana vanta ano ída kanaíeyá ena aa sáké oriareya Sifóe vaípá orin nompo séin pinté uaren anan orin nono. <sup>7</sup>\*Tiretí ankan ma séin pura se afová ukharé inteya mai Sifóen má kanaíeyá afová inonaren mino. Taréan araí eya Sifóen afová e véin one ono.”

<sup>8</sup>Máa síkan Firipi semí, “Bafan noe, e Afóen aní esí ma onékun mai anan kanaí inten mino.”

<sup>9</sup>\*Máa síkan Yisasi véin tiámemí, “Firipi oe, ayá damúi séi sireti ankan má bákeyá umpo éi ídá téin afová ukhe fono. Banasi ano ma séin toniyain mai Sifóen mi oniyan mifo éi fará e Afóen aní ono siya fono. <sup>10</sup>\*Téi Sifóempin bákun inká Tifóe ano séimpin ban ukhen mifo éi ídá mumunan iya fono. Tesi ineine fintesa séi sireti ankan baya siamiya rauno. Ída ino. Sifóe ma sempin bain manon téin pinté uaren mi vei yorarí é iyan mino. <sup>11</sup>\*Tifóe ma sempin bá ma séi véimpin ma varuna mairasá mununan inompo ída ma mumunan

inteya mai ma minó doran ma séi variyáku oniyaona mairasá mununan ono.

<sup>12</sup>\*“Téi fura siré tireti ankan tiámiyá uno. Téintá ma mumunan inain mano sen ma yoriyáeruna yoran manáa esantaren doranten mino. Para vara seyo, séi se Sifóe vaípái oronté uno. <sup>13</sup>\*Tiretí ankan ma minó dana san ma sen tiviká inantesí maé mai yanásí kasaé uantanté uno. Para vara seyo, ve Anin mano ma mai yorarí inaintá be Afóe ano kákan bí baranten mino. <sup>14</sup>Tiretí ankan ma minó dana san ma sen tiviká ma inaesí téi mai yanásí kasaé uantanté uno.

### *Yisasi Ma Kantá Aunan Tiantantín Eran Nain Nan Ma Iyáantein Baya Ino*

<sup>15</sup>\*“Tiretí ankan ma sen nan anunu inteya vá minó tenti vaya ánaín ná kamaeya vákurono.

<sup>16</sup>\*Bákuriya sirá Tifóen tékun ná ena siretin Ayain amintin ná mai ano sireti ankan má ena ena van oriyan bano. <sup>17</sup>\*Mai Ayain maen pura vaya ana ma sin Aunan mino. Barará nanin banta ano ída kanaíen bén baren onen afová en inten mino. Mai fara vara seyo, sireti ankan má béisí vákaya ven afová ukheona siretempin mi vantén mino. <sup>18</sup>Téi ída me ifáékuya aso iyampon andan nompo sireti ankan baonafá téi erenté uno. <sup>19</sup>Titó anantá barará nanin banta ano séin ída enádá tonanten mifo sireti ankan manan ten tonan nono. Téi saunán para vantí bákeyá sireti ankan má aunan para vantíya van nono. <sup>20</sup>\*Téin ma furin pinte ma sivorantí e mantékuya maí damúi afová inono. Téi Sifóempin bákuya sireti ankan tempin baná téi siretempin bá uno. <sup>21</sup>Tenti man baya ma mana ano ma iniren

\* **14:6:** Yon 11:25; Rom 5:1-2    \* **14:7:** Yon 8:19    \* **14:9:** Yon 12:45; Kor 1:15; Ibu 1:3

\* **14:10:** Yon 12:49    \* **14:11:** Yon 10:38    \* **14:12:** Mak 16:19-20    \* **14:13:** Mat 7:7; Yon

15:16    \* **14:15:** Yon 15:10; 1Yn 5:3    \* **14:16:** Yon 14:26; 15:26; 16:7    \* **14:17:** Yon 16:13

\* **14:20:** Yon 17:21-23

kamaen mai ánain dakhafin nain mai ano sen nan mi anunu iyan mino. Mana ano ma sen nan anunu intin te Sifóe ano venan anunu intí ten má dere véi nan tinunu uré teyan aní onté uno.”

<sup>22</sup> Máa síkan Yudasi ano Yisasin máa sen inaeémí, “Bafan noe, éi intesá eyá tetí ankan mana eyan aní ureyá barará nanin banta ída kanaí e aní inte fono.” (Yudas Iskarioti ena ifo ena eyo iyampon ma manái ukhein bí dakhein manon inaan mino.)

<sup>23</sup> Máa síkan Yisasi evaránen bén tiameémí, “Banta ano ma séin nan anunu uren tenti vaya ánaín ma kamaen dakhafintin maen Tifóe ano mai vanta van anunu inten mino. Mágan tintí berasan mai vanta vá o vá ena ena fara vá oriyá banté uno. <sup>24</sup> \*Téin nan ma ída anunu iyain banta anon tenti vaya ánaín ída kamaen dakhafiyan mino. Tenti vaya ma iniyaona mai séin ma sisintá erikheruna Sifóeni vaya ino.

<sup>25</sup> “Téi ma saréa siretí ankan má para varunarái ma yanasinta siamiyá uno. <sup>26</sup> Tiamiyá umpo siretí ankan ma ákonæn ayaín nain mai Kantá Aunán mino. Téin tivikái Sifóe ano véin tiantantin eriven tiretin minó daná afova amiren ineine orun mantaantantiyai minó baya ma séi sireti ankan tiamiyáeruna van ovare me ineine inono. <sup>27</sup> Téi siretí ankan me afa uré orono van mi ará kusin tiretin ameruna mai anón tiretin má banten mino. Barará nanin banta ano ma amiyainí ukhein ará kusin na séi ame raumpo siretí ankan ída vá ará uman dare akhokho van ono.

<sup>28</sup> \*Tiretí ankan me ampiré orikharé maé ovarané erenté uno sé pefái siamékuya inikha ompo séin nan ma fura se anunu iyanteya mai siretí amusin ná ono. Para vara seyo, mai ma séin esantakhein Tifóe vaípái oronté uno. <sup>29</sup> \*Mai yanasinta

ída afoká ukhái saréa o útubé tiamiyaruna ínaimpá ma afoká intiyan mumunan inono. <sup>30</sup> Téi ída siretí ankan má ayáká baya senté uno. Mai fara vara seyo, ma varará ma yafíkein ánon banta ano eriyan mino. Béimpín ída mana ákona vain téin ída mana ayúavasí me usintanten mino. <sup>31</sup> Mágan tinten mifo Sifóe ano ma sisimein danasintan téi variyákéi se Sifóen nan ma moéké tinunu iyaruna mai varará nanin banta ano afová ino van muno. Inka ifo erí oró tifano.”

## 15

### *Yisasi Fura Sikhein Uvaini Anan Mino.*

<sup>1</sup> “Téi fura sikhein uyaini anan\* mumpo se Sifóe uvaini yunan ana afóe ino. <sup>2</sup> \*Tenti siyan kayo ano ma ída aran iré iyain mai Sifóe ano yo iyákuon karúdaren aran ma iriyain ayan kayon kamaen ayaní uran kokhon aran iré iyan mino. <sup>3</sup> Téi ma siamiyaruna vaya ano inka saretin áténa yuren ariké iyákurayán kama ukha ono. <sup>4</sup> Tiretí ankan tempin asotú esirá inká téi saretimpin ná asotú ono. Para vara seyo, uvaini ayan mano ma anon kaufin ma ída o auntanten maen mai ano ída kanien aran iranten mino. Tiretí ankan ma ída sentá e asotú inteya máan mana eya ída aran iran nono.

<sup>5</sup> “Téi uvaini anan mi vákuya siretí ankan uvaini ayan mompo sentá ma súpá intí ma séi ventá túpá onuna anon kokhon aran iranten mifo siretí ankan ma sen ampinteya ída kanaien mana yanasí inono. <sup>6</sup> \*Mágan tinten mifo mana vanta ano ma ída sentá ma asotú ukharé intin maen daa ayan ma avaneini uádantin asa khavintin átaru uren irafin karúdantin ken kaurinten mino. <sup>7</sup> Ken kaurinten mifo siretí ankan ma sempin asotú esin ma senti

\* **14:24:** Yon 7:16    \* **14:28:** Yon 20:17    \* **14:29:** Yon 13:19    \* **15:1:** Uvaini aran ma iriyain mai anan manon iré iyan mifo ída yaa ana ino.    \* **15:2:** Mat 3:10    \* **15:6:** Mat 7:19; 13:42

vaya ano ma sirenimpin banti mae sireti ma anunu inona yaná ma inantesin mai siretin aminten mino. <sup>8</sup>\*Tenti eyo iyampon kayo anon pura se kokhon aran imádesin mairái Sifóe ano kákán bí baranten mino.

<sup>9</sup>“Tifóe ano ma séin nan anunu iyainíi é téi siretin nan tinunu iyá umpo ena ena vá tiretí ankan tenti sinunu aúpin ná bano. <sup>10</sup>\*Tiretí ankan ma senti vaya ánaín ma kama e yakhafinteya mai senti avábá aúpin mi van nono. Téi ma Sifóen vaya ánaín ma kamaé bakúdé ma veni avábá aúpin barunaíi inono. <sup>11</sup>Para va ma vaya siretin tiamiya rauno. Tenti simusin mano sireti ankampin bantin mai amusin mano víkaaren avanino van muno. <sup>12</sup>\*Tenti man baya máan mi ukhen mino. Téi ma sirení ankan nan tinunu iyarunaí e vá ben nan anunuin maran ná ono. <sup>13</sup>\*Mana ano ma vei arona kayo van ma anunu uaren betí ankan aya ono van ma vei aunan ma ampian kaé iyain mai avúavá anon ena van ma anunuin avúavá esantakhen mino. <sup>14</sup>\*Téi ma sirení ankan tiamerunaí ma inteya mai sen tironan ban nono. <sup>15</sup>Para vara seyo, yoran nanin banta ano vei ayafa vanta ano ma variyain daná ída afová ukhé iyan mino. Téi Sifóen pintena ma vareruna vaya inka sirení ankan tiamiráké mai van mi sirení ankan nan téi ída yoran nanin banta e senté umpo se sirona en tenté uno. <sup>16</sup>Tiretí ankan ída séin aní ure sivíadén ná bá umpo sireti oreya mo yoresin ayáká ma fara van aran kokhon imádano van mi aní uré tiretin doran amikhé uno. Máan tiyáke ma sen tiviká Tifóe vaípá inantinona yanasinta mai véi kasaen aminten mino. <sup>17</sup>\*Ben avábá in maran ono van mi sirení tiamiyá uno.”

*Barará Nanin Banta Ano Ma Eyo Iyampon Kayo Ará Namu Uantan Baya Ino*

<sup>18</sup> Máa siren Yisasi evaránen temí, “Barará nanin banta ano ma sirení ankan ma namuroí uantantya mai van tireti ída vá amino ono. Mai gefá betí ankan téin namuroí ukhá einíi inten mino.

<sup>19</sup>\*Tiretí ankan ma ma vara ráke vanta kayo an ma yakhesin maen banasi ano setisi kéká ino siren tiretin nan anunu inten mifo sirení ankan ída ma vara ráke vanta ba ono. Téi ma sirení aní uré ma o avíádéku vaona van mi varará nanin banta ano namuroí uantanten mino. <sup>20</sup>\*Téi ma sirení ankan tiamikháeruna mai vaya vá ovare me ineno. ‘Doran banta ano vei ayafa vanta ída esantakhein mino.’ Betí ankan ma séin namu usintákaren maen máan manan en tiretin má dere namu uantanten mino. Máan tinten mifo senti vaya ánaín ma yakhákaren maen mai sirení vaya ánaín deren dakhafinten mino.

<sup>21</sup>Téi ma sisintá erikheruna Ti-yarafenun barará nanin banta ano ída afová ukhen mi séin nare siren tiretin namuroí uantanten mino. <sup>22</sup>Téi ma ída erivé baya siamékun maen betí ankan ída umei miyan baranté ein mifo saréq vetí ankaní ume ma aúmanin aa ída van mino. <sup>23</sup>\*Téin ma namuroí iyain nanin banta ano mai Sifóen mái namuroí uantian mino. <sup>24</sup>Máan tiyan mifo vetin aúbáná ma váké mana vanta ano yoká ein doran ma ída yoriyá kun maen umei miyan ída vetí baranten mino. Taréa enará ukhein danasintan téi aní iyákun betí ankan oniyáken mifo se Sifóe má téi má deren para namuroí usintiyan ban mino. <sup>25</sup>Mai avúavá ma vetí ankan bariyain manon mai ma vetí man bayafin ma máa sikhá ein mi kanaén mino. ‘Ída ana vaintá paran namuroí usintiyan mino.’

*Íbo 35:19;*

\* **15:8:** Mat 5:16   \* **15:10:** Yon 14:15; 1Yn 2:5   \* **15:12:** Yon 13:34   \* **15:13:** Yon 10:11;  
1Yn 3:16   \* **15:14:** Mat 12:50   \* **15:17:** Yon 13:34   \* **15:19:** Yon 17:14   \* **15:20:** Yon  
13:16   \* **15:23:** Ruk 10:16

69:4

<sup>26</sup>\*Tiretí ankan ma Ákoná Uantan Aunan Tifóen má bain téi siantékun tireti vaonafá erinten mino. Pura vaya sin Aunan mi Sifóen má bain eriven maen tenti sivútivá bá doran má me sian amá inten mino. <sup>27</sup>Máan tinten mifo sireti ankan masá tenti vaya vá tivútivá basá tian amá ono. Mai fara vara seyo, sireti ankan manon araí in táké ten má báke minó daná afová ukha ono.”

## 16

<sup>1</sup>“Tiretí ankan ída mumunan ampeno van téi inikhéi siretin ma vaya siamiyá uno. <sup>2</sup>\*Para vara seyo, yamú eriyain monó átaru namun pinte siretin do siantiyáken Tiyarafenu kama yorarí iyá uno siren tiretin aruan purinten mino. <sup>3</sup>\*Mai fara va ino, vetí ankan Tifóen má ten má ída afová ukhen mi mai avúavá baranten mino. <sup>4</sup>Máan tintéii séi siretin má ayáká bantéi ma vaya gefá ída siamikharé umpsa ínaiimpá ma vanta kayo ano ma mai avúavá ma siretin amaniná kaintiya ma vaya ovare me ineno van mi siamiyá uno.

### *Yisasi Ma Kantá Aunani Yorá Pákera Van Tein Baya Ino*

<sup>5</sup>“Téin ma sisintá erikháeruna Sifóe vaípái saréa oronté umpsa intefasá oriya fono se ída mana ano ina iyan ná uno. <sup>6</sup>Téi ma ma vaya siamiyaruna anon tiretin aúpin arunaná édavuaren ákuna víkiyán mino. <sup>7</sup>\*Uman diyan mifo séi furan tiré tiretí ankan tiamiyá uno. Téi sireti ankan aya ono van mi siretin me ampiré oronté uno. Téi ma ída orékon maen mai sireti ankan ma Ákoná Uantan Aunan mano ída kanaen tiretimpin erinten mifo séi ma oronté mai véin tiantékun tireti vaípái erinten mino. <sup>8</sup>Béi ma

eriven maen barará nanin bantai ume vá Tiyarafenu funtákein avúavá bá inká banasii avúavá ma yaimin nain má maman banasii ineinefin kaintin ovaren me iniren afová inten mino. <sup>9</sup>Banasi ano ma ída séintá mumunan iyain mai yeti ume véi anon maman afoká intin onanten mino. <sup>10</sup>Béi anon puntákein avúavá maman afoká intin onanten mino. Para vara seyo, séi se Sifóe vaípái ma orivékuya sireti ankan evaráne séin tonan nono. <sup>11</sup>\*Béi anon Tiyarafenu ma vanasi yaimin nain avúavá maman afoká inten mino. Para vara seyo, ma vara ma yafíkein ánon banta ma yaimin inka afoká ukhen mino.

<sup>12</sup>\*“Téi kokhon baya sireti ankan tiámeno van iyá umpsa sireti ída kanaéya saréa inin nono. <sup>13</sup>Inin nompo Fura sikhein Aunan ma eriven maen tireti ankaníne maman puntaran-tiya minó baya ma fura sin afová inono. Béi ída vei ineine finté baya sinten mifo mai ma iniran nain baya máan tiámiyáken inká ínaiimpá ma afoká ono van iyain danasintan tian amá inten mino. <sup>14</sup>Béi ma sen pinte varan nain baya ma siretin timamin nain manon tenti kakhan maman dákó inten mino. <sup>15</sup>Minó Tifóen níná yaná ma vain mai sen tinan bái mai van mi senti vaya véi mamaren tiretin tiáminten mino siyá uno.

### *Eyo Iyampon Kayoi Arunaná Ano Ma Maman Amusin Amin Baya Ino*

<sup>16</sup>\*Yisasi evaráne temí, “Ádé anantá téin ída sonan nompo ínaiimpáké evaráne sító máarái sonan nono.”

<sup>17</sup>Máá síkan beni eyo iyampon kayo finté manáa ano veraran ten oreraemí, “Ádé anantái séin ída sonan nompo ínaiimpáké evaráne

\* 15:26: Yon 14:26    \* 16:2: Mat 24:9; Ruk 6:22; Yon 9:22    \* 16:3: Yon 15:21    \* 16:7:  
Yon 14:16    \* 16:11: Yon 12:31    \* 16:12: 1Ko 3:1-2    \* 16:16: Yon 14:19

sító máarái sonan nono' sen ma inká 'te Sifóe vaípá oronté uno' ma siyain mai veni ana intesá ukhen nafino." <sup>18</sup> Máa siren betí ankan temí, "Titó máara' se ma siyain bayai ana mai seti ída kanaí é afová iyá tiféuno."

<sup>19</sup> Máa siren betí ankan Yisasin inaono van iyákan béis fe afová uren betin tiameemí, "Téi ma sé, 'Adé anantá tiretí ankan ída sonan nompo ínaiimpáké evaráne sitó máarái séin tonan nono' ma sikheruna vará inain maran iya rafono. <sup>20</sup> Téi fura siré tiretí ankan tiamiyá uno. Barará nanin banta ano kákán amusin inten mifo saretí ankan kákán ifí diyákeya moéke arunaná baran nono. Máan ma iyantin tiretí ankan ará ano uman danten mifo ínaiimpáké mai ano vaégen kama amusiní inten mino. <sup>21</sup> Anasi ano ma iyampon kain damú ma afoká íkán kákán aí pinté ma iyampon kaúden maen mai aí dana san ída iné iyan mifo auyen iyampon ma afoká uádein nan mi amusin é iyan mino. <sup>22</sup> Máan mi ukhantiya saréa saretí ankan ará uman dan nompo séi evaráne tiretí ankan onékuñ maen tiretin ará ano amusin inten mino. Mana vanta ano ída kanaíen mai amusin do varanten mino. <sup>23</sup>\*Mái damú tiretí ankan ída mana yana san téi vaípá inantin nono. Téi fura siré tiretí ankan tiámé umpséin tiviká ma mana yana san ma Sifóe vaípá inantesin maen béis kasaen aminten mino. <sup>24</sup> Pefá tiretí ankan mana yaná barano van ten tiviká ída inan tikhare ompo saréa ma araíe inantire varesin maen mai amusin mano saretí aúpin kanaíen bíkanten mino.

### *Yisasi Ma Ma Varai Ákona Esantakhein Baya Ino*

<sup>25</sup> "Te Sifóeni vaya kayo ma vaédiyá tiamiyaruna yamú ma afoká intí téi ída ena vá bayá vaédiyá tiamenté umpséin tiviká

siamenté uno. <sup>26</sup> Maí damú ten tiviká Sifóe vaípá amúkin nono. Tiretini oo vare Tifóe vaípá timukono vara siya rauno. Ída ino. <sup>27</sup>\*Para vara seyo, séi nan Tiyarafenu vaípákéi erikha ono sireya saretí ankan mano séin tivabá ureya mumunan ukhen nan mai van mi Sifóe ano veyantá tiretin nan anunu iyan mino. <sup>28</sup> Téi se Sifóe vaípákéi ma varará erikharéi saréa ma vara me ampiré Tifóe vaípá evaráne oronté uno."

<sup>29</sup> Máa síkan beni eyo iyampon kayo ano semí, "Taráe éi ída vaya vaéde siya ompo funtádeyai siya ono. <sup>30</sup> Minó daná afová ukhen ná tetí ankan ma inikheruna mai mana vanta ano ída éin inaono van inten mino. Máan tukhái éin nan Tiyarafenu vaípákéi erikha ono siré mumunan iyá tiféuno."

<sup>31</sup> Máa síkan Yisasi evaráneen tiameemí, "Taráe inká mumunan iya rafono. <sup>32</sup>\*Máan tiya ompo yamú ano eriyaren inka e afoká ukhein tiretí ankan mere asuse eya saretí varufá orera uve seyáká anan meran nompo mai ída seyáká ana vanté uno. Mai fara vara seyo, se Sifóe ano sen má banten mino. <sup>33</sup>\*Tiretí ankan téin má túpá uan ákona uvesin tiretin ará ano kusino van mi séi inikhéi ma vaya saretin tiamiyá uno. Ma varará ma yasin maen minó uman mano saretimpin afoká inten mifo ará kusin masá bano. Para vara seyo, séi ma varai ákona inka esantakhé uno."

## 17

### *Yisasi Ma Veyan Nan Amúkein Baya Ino*

<sup>1</sup> Yisasi ma mai vaya kayo siamiden maen béis inarufá kakháben máa sen amúkemí, "Tifóe oe, yamú inka afoká en mifo vá e Anin kákán bí amesin ná inká e Anin mano éin evaráneen kákán

\* **16:23:** Mat 7:7   \* **16:27:** Yon 14:21, 23  
Rom 5:1; 1Yn 5:4

\* **16:32:** Mat 26:31, 56   \* **16:33:** Yon 14:27;

bí amino. <sup>2</sup> Mai fara vara seyo, éi anon minó nanin bantará ma yafisin ákona véin amikha ono. Mai ma véin avían amikheona nanin banta véi anon kanaíen ayun ma fara van oriyan ban aunan aminten mino. <sup>3</sup>\*Ayun ma fara van oriyan ban aunan mai máan mi ukhen mino. Mai aunan ma varan nain kayo anon éin nan manan pura sikhein Tiyarafenu ban mino sen afová en mi inká Tiyarafenu ano ma aní ukhein banta Yisasin nan éi anon tianten nan erikhen ne sinten mino. <sup>4</sup>\*Éi ma sen timeona mai yoran inka yóan kípéi varará nanin bantafin éini kákán bí bá ákona vá aní é uno. <sup>5</sup>\*Tifóe oe, fefá ma ma vara ída afoká ukhá ma kákán bí bá ma väeruna mai kákán bí taréa simiresien má bano van mi ukhé uno.

#### *Yisasi Ma Vei Eyo Iyampon Kayo Amúkuantein Baya Ino*

<sup>6</sup> Barará banta kéká ma éi sen timikhá eona mai kayo éin avi inka siamikhé uno. Betí ankan eni vanta kékái varéiyai séin inka simikhe nan mi vetí ankan eni vaya kamaen dakhafiyan mino. <sup>7</sup> Minó daná ma séin timikheona mai en pinté anan erikhan mi vetí inka afová en mino. <sup>8</sup> Para vara seyo, mai ma sisimeona vaya máa vetin tiámekun inka afová en mino. E vaípákéi séin nan erikhen mino sen afová iyáken inká en nan mi sen tiantan erikhen mino sen mumunan iyan mino. <sup>9</sup> Barará nanin banta aya onovara séi simúkiá raumpo éi ma sen timikheona mai eni kékái vá mai kayo van mi simúkiá uno.

<sup>10</sup> “Tenti vanasi ma vain mai eni nan bákán inká eni vanasi ma vain mai senti nan ban mino. Máan tukharé iyan minó mai nanin banta éi ovaráne sen timen nan mai anon téin kákán bí timen mino. <sup>11</sup> Téi ma vara me ampiré éi vaonafá orivé ída vanté

umpo vetí ankan mi ma varará banten mino. Kantasí ukheona Sifóe oe, mai ma séin timikheona ákona fókesá betin dafiseno. Máan tesin ná erasan ma mana varunai e ná betí ankan mana vá bano. <sup>12</sup>\*Téi ma ma kéká bá báké maé éi ma sen timikheona ákona fóké betin dafíkéun bare mino. Minó ano ída afeyoranten mifo eni vompson dóki ano ma sikhare einíi en mana vanta ano anan o afeyoranten mino.

<sup>13</sup> “Máan tintéii séi ma vetin má para váké maé kokhon bayan tiámíyaréi saréa éi vaonafá ma oriyá kun maen mi senti simusin mano vetin aúpin békanten mino.

<sup>14</sup> Eni vaya máa inka vetin tiámikhéun mi ma vara ráke nanin banta ano vetin namuroí uantiyan mino. Para vara seyo, sen an den betí ankan ída ma vara ráke vanta kékái van mino. <sup>15</sup>\*Ma vara rákena vetí ankan do aviran novara inaiya raumpo vetintá daffibesin Ban Anon mano ída vetin namu ino van mi simúkiyá uno.

<sup>16</sup> Téi ída ma vara ráke vákun betin má dere sen an den ída ma vara ráke ino. <sup>17</sup> Minó ei fura sikhein baya kayo fóké betí ankan afova amesin ná betin aúpin dorantin maman kantasí uven eni kékásí ino van muno. <sup>18</sup>\*Éi ma sen tisinten ná ma varafin ererunaí é ma kéká tiantéun ma varafin orinten mino. <sup>19</sup> Para vara seyo, vetin nan ma sesi minó bukhafa éin amerunaí en betí minó bukhafa fura sen éin aminten mino.

#### *Yisasi Ma Mumuman Nanin Banta Amúkuantein Baya Ino*

<sup>20</sup> “Tenti eyo iyampon kayo ana aya ono vara simúke rauno vetí ankan vaya ma inirene téintá ma mumunan inain mai kéká bá aya ono van mi simúké uno. <sup>21</sup> Téi ma simúkeruna mai minó nanin banta ano ará manafiní uren manafin bano van muno. Éi Sifóe sempin baná ma séi empin barunaíen

\* 17:3: 1Yn 5:20 \* 17:4: Yon 4:34 \* 17:5: Yon 1:1 \* 17:12: Yon 6:39; 13:18 \* 17:15:  
Mat 6:13; 2Te 3:3 \* 17:18: Yon 20:21

betí ankan erasampin bantin éin nan mi se nan tiantan erikhen mino siren barará nanin banta ano mumunan inten mino.<sup>22</sup> \*Éi ma kakhan má ákona vá ma séin timikhá eona mai séi vetin ameruna erasan ma sirá manafin uré manafin barunai betí ankan ará manafin ure manafin banten mino.<sup>23</sup> Téi vetí ankan má bákuya éi sen má banái mai avúava san mi vetí ankan ará manafin ure manafin bantin barará nanin banta ano afová en éin nan mi séin tiantan erikhen mi séin ma anunu iyainii en mi vetin anunu iyan mino sen afová inten mino.

<sup>24</sup> “Tifóe oe, ma ma sen timikhéona nanin banta ano sen ma vanunará bano van mi inikhé uno. Ma vara ma ída afoká ukhaya ma éi sen nan anunu ure ma mai kakhan má ákona vá ma simikhá eona mai kakhan má ákona vá téin ma simikhéona kéká ano onano van muno.

<sup>25</sup> “Puntákein Tifóe oe, minó barará nanin banta ano éin ída afová ukhen mifo séi anan éin afová ukhékun mií éi ma sen tisinten ná erikháeruna mai senti eyo iyampon kayo anon afová ukhen mino.<sup>26</sup> Éin nan betí ankampin téi inka sian afoká uádákeruna eín nan para sian amáé oriyá bákuya mai ma éi sen tivábá iyaonaí eya vetin avábá esí maé téi vetimpin banté uno.”

## 18

*Yisasini Namuro Kayo Ano Ma Véin Pákein Baya Ino*

(Matiu 26:47-56; Maki 14:43-50; Ruku 22:47-53)

<sup>1</sup> Yisasi mai vaya siren bei eyo iyampon kayo vá Kidaroní ava e kháden ena ufá ódiaren orifí dunan anafin oferen mino.<sup>2</sup> Yisasi kokhon damú bei eyo iyampon kayo vá mai yunan anafin o átaru iyain bákan béin ma namuro kayo ayampin avían amin nain banta Yudasi mairá afová ukharen mino.<sup>3</sup> Afová ukharen Yudasi

ano aruvín banta kayo vá monó ánon banta kayoi yafisin kéká bá Farasisi kayoi yafisin banta kéká bá avíoran mai kayo ano aruvín danasinta vá oon má uruaran Orifí dunan anafin oren mino.

<sup>4</sup> Oríkan Yisasi ve aurá ma afoká ono van iyain danasinta afová ukhen béis e afánen mai kéká ádé oriven máa sen inaemí, “Tiretí ankan iyen nará dosiya rafono.”

<sup>5</sup> Máa síkan betí ankan evaránen temí, “Nasaretíke vanta Yisasin nan mi yosiyá tiféuno.”

Síkan Yisasi semí, “Mai séi uno.” Máa siyákan mai ma véin aní intin ma fákan nain banta Yudasi má mairá mantakharen mino.

<sup>6</sup> Betí ankan iníkan ma Yisasi sen, “Mai séi uno,” ma siyain má mai vanta kayo ano e afánen oyampáké oro senten eraven barará ankamen oreraen mino.

<sup>7</sup> Máaón tiyain má Yisasi evaránen betí ankan inaemí, “Tiretí ankan iyen nará dosiya rafono.”

Síkan betí ankan temí, “Nasaretíke vanta Yisasin nan muno.”

<sup>8</sup> Máa síkan Yisasi evaránen temí, “Mai séin bái saretí ankan tiamikhé umpo sen nan ma yosiyanteya mai ma vanta kayo áesin ná orino.”<sup>9</sup> \*“Máaón ma sein manon pefá ma máa sikhá ein bayan kanafen mino. “Mai ma séin timikháeona nanin banta finté mana ano ída afeyoranten mino.”

<sup>10</sup> Máa siyain má Pita mana vaenati yákaren orun danúoren monó ánon bantai ánon banta kékái yoran banta Marákusin ne sin ayan kuron pákena átaren do síkaan karúdan barará eraven mino.

<sup>11</sup> \*Máaón tiyain má Yisasi Pitan tiamemí, “Baenati evaráneya veni anamumpin kain orino. Te Sifóe ano ma simikhéin non kápi sen nan ída nan novara fono.”

\* 17:22: Apo 4:32    \* 18:9: Yon 6:39; 17:12

\* 18:11: Mat 26:39

*Aanasin Ne Sin Banta Ano Ma Yisasin Inaein Baya Ino*

<sup>12</sup> Máan tiyain má aruvin banta kayo vá betí ankaní ayafa vá Yutan kayoi kákan monó namuntá ma yafíkein kéká bá ano Yisasin pákaren ayantá ákoná anampó damen mino. <sup>13</sup> Kaiafasin anan Aanasin ne sin banta vaintá nare vetí ankan ben aviren oren mino. Mai oranafin Kaiafasí monó ánon bantai ánon bantai ukharen <sup>14</sup>\*béi Yutan kayo gefá tiamikharemí, “Minó nanin banta ayaen ma mana vanta ano ma furin nain mai kama inten mino.”

*Pita Ano Ma Esé Araí En Yisasi Nan Ída Afová Ukhé Uno Ma Sin Nain Baya Ino*

(Matiu 26:69-70; Maki 14:66-68; Ruku 22:55-57)

<sup>15</sup> Pitan má ena eyo iyampon má ano Yisasin bákuren oríkan monó ánon banta kékái ánon banta ano mai eyo iyampon afová ukhan pasen áíkan Yisasin avákuren monó anon bantai yafufin óden mino. <sup>16</sup> Ódivíkan Pita onará mantakharéin mai ma monó ánon banta kékái ánon banta ano ma afová ukhein eyo iyampon mano onará ma yafisin nanin tiamíkan Pitan áin dafufin éden mino. <sup>17</sup> Édiyain má mai ma onará dafisin nanin mano Pitan má sen inaemí, “Éin má mai vantai eyo iyampon na fono.” Síkan Pita semí, “Ída ino. Téi ída veni eyo iyampon bá uno.”

<sup>18</sup> Dafisin banta kéká bá doran banta kayo vá ano iyon eimpin ira sáden mantakhen kaniyákan Pitan má maifin mantakharen mino.

*Monó Ánon Banta Kékái Ánon Banta Ano Ma Yisasi Ina Ein Baya Ino*

(Matiu 26:59-66; Maki 14:55-64; Ruku 22:66-71)

<sup>19</sup> Mantakhan monó ánon banta kékái ánon banta ano Yisasi ma siyá ein bayá kayo vá beni eyo

iyampon kayo va san béin inaan mino.

<sup>20</sup> Ina íkan Yisasi evaránen tiamemí, “Téi afokái vanasi vaya siamiyaré uno. Monó átaru namumpin nafi kákan monó namumpin nafi ma Yutan nanin banta átaru uví téi afokái vetí ankan banta siamiyaré umpo ída aúpá tiamiyaré uno. <sup>21</sup> Pará éi inaiya fono. Téi ma vaya siamiyá eruna mai vanta kayo vá ina ono. Betí ankan mi mai vaya afová ukhen mino.”

<sup>22</sup> Yisasi máa síkan mana kákan monó namuntá dafisin banta ano mairá mantakharen Yisasin aunápin ankamiyan temí, “Monó ánon banta kékái ánon banta avorá mai inté ein bayá evaráne siamiya fono.”

<sup>23</sup> Máa síkan Yisasi evaránen béin tiamemí, “Téi ma namu vaya ma siyákeya mai vayai ana sian amá inompo séi ma kama vaya siyákeya éi fará ten tinkamiya fono.”

<sup>24</sup> Máa sirákan mai ma Yisasin ayantá ma ákoná anan damukharé ein para vákan Aanasin ne sin banta ano véin tiantan monó ánon banta kékái ánon banta Kaiafasí vaípá aviren oren mino.

*Pita Ma Evaránen Yisasin Nan Ída Afová Ukhé Uno Sein Baya Ino*

(Matiu 26:71-75; Maki 14:69-72; Ruku 22:58-62)

<sup>25</sup> Máan tiyákan Pita irará mantakhen kaniyáin manáa ano véin inaemí, “Éin má beni eyo iyampon nafono.” Síkan béisemí, “Ída ino. Téi ída veni eyo iyampon muno.”

<sup>26</sup> Máa siyain má monó ánon banta kékái ánon bantai yoran banta ma Pita ano ma átaren tíkein bantai kéká pinté mana ano semí, “Éi ven má orifí dunán anafin baná onte rafunon té iniyá uno.” <sup>27</sup>\*Máa síkan Pita enádá “Ída ino,” siyain má ana kokore asen mino.

\* **18:14:** Yon 11:49-51 \* **18:27:** Yon 13:38

*Pairotin Avorá Ma Yisasin  
Kótiantein Baya Ino  
(Matiu 27:1-2, 11-14; Maki 15:1-5; Ruku 23:1-5)*

<sup>28</sup> Kaiafasí ano Yisasin inaan eriyan me kípiyákan do kakhan ákurasí iyain má aruvín banta kéká ano véin do aviren Romú kayoi ánon kamanin amá oren mino. Mai namun ódikán béis ma namuroí uantiyain Yutan kayo ano maifin ódikháré ékun Tiyarafenu auufen painí eono siren are usintantí mai ma Avo Uantan Omasí ma inain pinte yunan ída nan nae siren maifin ída óden mino. <sup>29</sup> Máon siren barufá baré íkan Pairoti ano eraven morun betin inaemí, “Nái anarasá ma vanta kó tian tiya rafono.”

<sup>30</sup> Máa síkan béis evaránen tiameemí, “Béi ída aau vanta varé intí ída véin aviré éi vaonafá eré tifanunaren mino.”

<sup>31</sup> \*Máa síkan Pairoti ano vetin tiameemí, “Béin avire mo siretií man bayafó puntarano.”

Síkan Yutan kayo ano evaránen temí, “Teti mano ma vanta aruan purin nan airo ananí ukhein mi vá uno. <sup>32</sup> \*Máon ma sein manon Yisasi ma veyan purin nain avúavá san ma fefá tilkháré ein mi fura sen afoká en mino.

<sup>33</sup> Máa síkan Pairoti ano evaránen kamanin amápin ódiven Yisasin aran ódikán máa sen inaemí, “Éi Yutan kayoi Kin nafono.”

<sup>34</sup> Máa síkan Yisasi evaránen béis inaemí, “Éi ei ineine fosá mai vaya siya fo áa ena vanta kayo anó tiamicheyá tiya fono.”

<sup>35</sup> \*Máa síkan Pairoti ano evaránen béis tiameemí, “Téi Yutan bantá báku vae. Ei kéká bá betí monó ánon banta kayo vá anón éin avían téi varunará mera va ompo éi nái aaú mantan nan nafino.”

<sup>36</sup> Máa síkan Yisasi evaránen béis tiameemí, “Tenti yafisin ída ma vara rákena van mino. Tenti yafisin ma vara rákena varé

intin tenti yoran banta kayo ano kanaén aruvintin ída mana vanta ano kanaén Yutan kayo ayampín téin aminté ein mifo senti yafisin mai ena vara fákenan ban mino.”

<sup>37</sup> Máa síkan Pairoti ano véin inaemí, “Mai fura ifo éi mana Kin ná ba vae.” Síkan Yisasi evaránen tiameemí, “Téin nan ma Kin ne seona mai éi furan te ono. Pura sikhein baya sian banasi amin dorariín anarái sinóe ano séin kaen mino. Pura sikhein baya ma iniren mai ángin dakhafin nanin banta anon tenti vaya iné iyan mino.”

*Pairoti Ano Ma Yutan Kéká  
Ayampin Yisasin Amein Baya Ino  
(Matiu 27:15-31; Maki 15:6-20;  
Ruku 23:13-25)*

<sup>38</sup> Máa síkan Pairoti ano véin inaemí, “Pura sikhein baya mai nái yana safino,” siren evaránen Yutan kayo vaípá aravuven betin tiameemí, “Ma vanta ma kó tiantan aau ída van mino. <sup>39</sup> Ída van mifo ena ena oranafin Avo Uantan Damú ma eri mae mana karavusi ma útúantán avúavá afová ukheya sireti ma seona mai vantán karavusi útúdékun oré iyain mifo Yutan kayoi Kin ná útúantantin orino vará iniya rafono.”

<sup>40</sup> Máa síkan betí ankan evaránen oo vararen temí, “Ída ino. Mai vanta ída ifo Barabasi ino.” (Barabasi mai kamanin má aruvín duváden banta aruan püká ein banta ino.)

## 19

*Aruvin Banta Kéká Ano Ma  
Yisasin Máká Máká Ein Baya Ino  
(Matiu 27:27-31; Maki 15:16-20)*

<sup>1</sup> Máa sirákán Pairoti ano síkan ayankuní ukhein dafiyó póké Yisasin ankamen mino.

<sup>2</sup> \*Ankamiyákan aruvín banta kéká ano mana ayankun anan máden mai fóké kini kamamó ma einí ukhein uváden ben árontá afu uantáden mana nararé

au anamun máden uanten en mino. <sup>3</sup> Mágan tuantáden béin máká maáká iyan temí, "Yutan kayoi ákona kin noe, en aví daní iyá tiféuno!" siyáken béin auná ankamen mino.

<sup>4</sup> Mágan tiyákan Pairoti ano evaránen barurá aravuven máa sen banasi siamemí, "Béin pinte mana aaú ída yoseruna mai van mi véin aviré tireti yaonafá erenté umpo vá afová ono." <sup>5</sup> Mágan síkán Yisasi mai ayankun anan kamamó ma ánontá uantein má naráré au anamun ma uantein má para ukhan ekhuven barufá eravíkan Pairoti ano vanasi siamemí, "Ma mai vanta ifo onano."

<sup>6</sup> Mágan ma siyain má monó ánon banta kéká bá kákán monó namuntá ma yafisiyain kayo vá ano oniyáken oovaraaren temí, "Aruan purono. Aruan purono." Síkán Pairoti ano vetin tiamemí, "Beni mana aaú ída yosé umpo sirté ankan béin e avíde vá tireti yantasá daa unkamádantá arono."

<sup>7</sup> Mágan síkán Yutan kayo ano evaránen temí, "Béi ma siyáken téi Tiyarafenu Anin muno ma sikhein mano mai setisi man bayan durafuntein mai anará béis vá purino."

<sup>8</sup> Mágan síkán Pairoti ano mai vaya iniren moéken akhokho van en mino. <sup>9</sup>\* Mágan turen Yisasin evaránen aviren kamanin amápin un pében béin inaemí, "Éi inte yaru fákesa fono." Síkán Yisasi ída mana vaya evaránen ten mino. <sup>10</sup> Mágan tiyáimpin Pairoti ano véin inaemí, "Ifá uantan ma orin má inká daa unkamádantá ma aruan purin ákona vá má sempin bain éi ída afová ukheyá ída ovaráne sen má baya siya fono."

<sup>11</sup>\* Mágan síkán Yisasi evaránen béin tiamemí, "Dan Banta ano ma éin ída ákona amikhá inti séin ída kanaíeya maman barará kain-onaren mino. Mai fara vara seyo, séin ma en ayampin kaein mai

vantai ume ano eni ume esantaren kákani suron ukhen mino."

<sup>12</sup>\* Mágan síkán Pairoti ano iniren mai ráké Yisasin ma ifá uantantin orin nain aa van dosiyákan Yutan kayo ano oovaraaren temí, "Éi mai vanta ma ifá uantesin ma orintiya mai éi ída Sisan aronan ban nono. Inká mana vanta ano ma veyan nan ma séi kin muno ma sin nain mai ano Sisan mi namuroí uantiyan mino."

<sup>13</sup> Mágan síkán Pairoti ano ma mai vaya iniren maen Yisasin evaránen barufá aviren morúden baya ma yaimin kará aví Onámaná Aa e sikhein karáká kumanen mino. (Aramaiki vaya finté Kabata e siyan mino.) <sup>14</sup> Tiyarafenu ano ma Isarerí nanin banta Avo Uantein nan ma ovaren me inin omá kákena yunán útaín damú bákan bayan aúbaní iyaimpin Pairoti ano Yutan kayo siamemí, "Tireti ankani kin masi ifo onano."

<sup>15</sup> Mágan síkán betí ankan oovararen temí, "Béin avire orono! Mo yaa unkamádantá aresin purino!"

Síkán Pairoti ano vetí ankan inaemí, "Tireti Kin ná daa unkamádantá arin novarae."

Mágan síkán monó ánon banta kéká ano evaránen temí, "Tetisi kin ída ena van mifo Sisa veyáká anan ban mino."

<sup>16</sup> Mágan síkán daa unkamádantá Yisasin arino van betin amen mino.

*Daa Unkamádantá Ma Yisasin  
Arein Baya Ino*  
(Matiu 27:32-44; Maki 15:21-32;  
Ruku 23:26-43)

Amíkan aruvín banta kéká ano véin aviren oren mino. <sup>17</sup> Yisasi vei yaa unkamádantá maman afuná uren Ánon Dampa e sikhein dontá oren mino. (Aramaiki vaya finté Korikhota e sikhen mino.)

<sup>18</sup> Mai yontá moren Yisasin daa unkamádantá aruren inká kan banta vá tefá tefá aren en mino.  
<sup>19</sup> Aruran maen Pairoti ano síkán

\* **19:9:** Mat 27:12   \* **19:11:** Yon 10:18; Apo 2:23; Rom 13:1   \* **19:12:** Ruk 23:2; Apo 17:7

betí ankan mana vaya máa sen uváden Yisasini yaa unkamádantá ankantaaren mino, “YUTAN KAYOI KIN NASARETÍKE VANTA YISASI INO.”<sup>20</sup> Pairoti ano síkan mai vaya Yutan baya finté uvaren Romú baya finté uvaren Kiriki vaya finté uvaren ukharen mino. Yisasin ma yaa unkamádantá arukhein mai Yerusaremí baru ádéi vákan Yutan kayo ano oriven mai vaya yankafiyaren mino.

<sup>21</sup> Máan tiyákán Yutan kayoi monó ánon banta kéká ano máa sen Pairotin me yuvun iyáken temí, “Éi ída Yutan kayoi kin ne sire uvarano. Ma vanta ano sen téi Yutan kayoi kin muno siyaren ne sire uvarano.”

<sup>22</sup> Maa síkan Pairoti ano evaránen temí, “Ída ino. Téi ma uvanteruna vaya mai inká uvanté umpo áesin ná para vano.”

<sup>23</sup> Aruvín banta kayo ano Yisasin daa unkamádantá aruren beni yante vuí daná kamí kamí píntan daíden mana mágú uaran námiente au anamun mana en mino. Mai au anamun mana yavaráefó anan amu uran bareñ mino.

<sup>24</sup> Máan tukheimpin aruvín banta kéká ano semí, “Ma au anamun ída kafasé tifanté umpo kati (satu) siré tifékun esesí ma inain manon baranten mino.”

Mai avúavá ma vetí ankan barein manon Tiyarafenui vompon dókifin ma máa sikhá ein mi kanaén mino.

“Betí ankan tenti suí daná daíden baranten mino.

Mamaren betí ankan tenti su anamuntá kati sirákan mi esesí ma ein banta anón baren mino.”<sup>31</sup> *Íbo 22:18*

Máan ma sikhá ein mai avúavá máan aruvín banta kéká ano varen mino.

<sup>25</sup> \*Daa unkamádan ádé ma mantakharé ein kéká mai Yisasin anóen má be aunanan má Maria Koropasin aná bá inká Makdaráke

nanin Marian mái mantakharen mino.<sup>26</sup> \*Mantakhan Yisasi ma moéken anunu ukhein eyo iyampon má ano vetin ádé báin Yisasi ve anóen mo oniyan tiameí, “Anasi oe, mai e anin mino.”<sup>27</sup> Maa siren mai eyo iyampon tiameí, “Mai e anóe ino.” Maa siran maen mai eyo iyampon mano Marian aviren be amápin mo kaúdáken maí damuké araén béintá dafisiyaren mino.

*Yisasi Ma Furein Baya Ino  
(Matiu 27:45-56; Maki 15:33-41;  
Ruku 23:44-49)*

<sup>28</sup> Taréa anan tenti yoran minó kípen mino sen Yisasi iniyáken Tiyarafenui vompon dókifin ma síkharé ein baya kanaí ino van bái máa semí, “Non nan tiiyá uno.”  
*Íbo 22:15*

<sup>29</sup> \*Síkan mana íta uvaini vain kave mairá ádé baré íkan betí ankan maná móhofen ma einí ukhein daná máden ura yankará damuren mai kavefin daaren orun maman kain Yisasin oorá óden mino.<sup>30</sup> Ódikan Yisasi mai uvaini naan onen temí, “Mai inka kipen mino,” siyáken anuran durafuriyan bei aunan ampin orin puren mino.

*Maná Aruvín Banta Ano Ma  
Bankan Póké Yisasin Ayorampin  
Antarein Baya Ino*

<sup>31</sup> \*Avo Uantan Damú mai Sabatirá afoká intéin Sabati rákena yanásinta funtáádano van iyáken Yutan kayoi ánon banta kéká ano iníkan kákán damú ma furin banta kayo au ma yaa unkamádantá ban mai ída kama ukheimpin mai vanta kéká arantan iyarantin ainen púbintin daa unkamádantá kena ainen do varano van betí ankan Pairotin mo inaen mino.<sup>32</sup> Ina urákan Pairoti ano kanai ino sin aruvín banta kéká ano oren Yisasin má ma yaa unkamádantá arukharé ein bantá kanan arantan mo iyen mino.<sup>33</sup> Iyaren maen betí

ankan Yisasi vaintá oriven onákan bei fe fúkeimpin ída veni arantan iyen mino. <sup>34</sup> Ída iyákan mana aruvín banta ano vankan póké ayorampin antariyain má nare vá non má ano manadá avanen barará eraven mino. <sup>35</sup> \*Mana vanta ano ve auufó pura sen ontaré ein danái sretí ankan má mumunan ono van mi sian amá en mino. <sup>36</sup> Mai yanásinta ma afoká ein mai Tiyarafenui vompon dókifin ma máa sikharé ein mi kanaén mino. Mai vaya máan mi sikhan mino, “Beni mana yampa ída yurafurinten mino.” *Eks 12:46; Nam 9:12; Ibo 34:20*

<sup>37</sup> \*Máa sikhan inká ena vaya vá Tiyarafenui vompon dókifin máa sikharen mino, “Bankan ma arukhá ein bantan betí ankan onanten mino.” *Sek 12:10*

*Yisasin Ma On Aimpin Masí Ein Baya Ino*  
(*Matiu 27:57-61; Maki 15:42-47; Ruku 23:50-56*)

<sup>38</sup> Mai oyampáké Arematiáke vanta Yosepi ano Pairottintá mo inaúdé Yisasin au varano van oren mino. Yosepi véi Yutan kayoi ánon banta ifo mai véi mana Yisasini eyo iyampon mi váken ena ánon banta kayo van péden bei mumunan aúpasí ureñ baré íkan Pairoti ano kana ifo varano sikan Yisasin au o varen mino. <sup>39</sup> \*Yosepi ano mana inuran ma Yisasin o onein banta Nikodimasin má oren mino. Oriyákan daa anu fóké uvantan kama aunka iyain uveri\* vá Nikodimasi mamarén oren mino. Mai auna uverii uman teti-foa (34) kiro ino. <sup>40</sup> Yosepin nú Nikodimasin nú ano Yisasin au o máden Yutan kayo ano ma furin banta aurá ma variyain avuavasien kama aunka iyain uveri vanaren kama yavaráe kayofó úken mino.

\* **19:35:** Yon 21:24    \* **19:37:** Rev 1:7    \* **19:39:** Yon 3:1-2    \* **19:39:** Kama aunka iyain uveri mai Mere ino.    \* **20:1:** Kiriki vaya finté Santé san mi esé araí in damú se sikhen mino.  
\* **20:9:** Apo 2:24-32; 1Ko 15:4

<sup>41</sup> Mai ma Yisasin daa un-kamádantá arukharé ein ádé mana yunán ana vákan maifin auyen masí uádan bákan ída mana vanta kaúan araí ukhan mino. <sup>42</sup> Máan tukhan Yutan kayo ano Sabati rákena yanásinta útæn arakhókuin damú ban maen mai masí ádé baré ín Yisasin au yaiyen mai on aimpin mo masiéen mino.

## 20

*Yisasi Ma Evaránen E Mantein Baya Ino*  
(*Matiu 28:1-10; Maki 16:1-8; Ruku 24:1-12*)

<sup>1</sup> Santé\* pe ákura suron Mak-daráke nanin María ano masíká onano van oriyaren o onákan masí ain oyi rákena onámaná do vaébaé uan kain baren mino. <sup>2</sup> Máan tukháin ódaren María ovaránen tavaen Pita nú mai ma Yisasi moéken anunu ukharé ein eyo iyampon nú baípá eren me máa sen tiámemí, “Bafani au masí píntena yo ayóken mifo mai véin intefasá kaúken nafi mai séi ída afová ukhé uno.”

<sup>3</sup> Máa síkan Pitan má ena eyo iyampon má ano masí onano van tavaen oren mino. <sup>4</sup> Békanan tavaen oríkan mai ena eyo iyampon mano Pitan esanten ayampaen ben nare masíká oren mino. <sup>5</sup> Oren o kharemén aimpin onákan kama yavaráe ma Yisasin úkuantákaré ein mana vákan óden mifo véi ída masí aimpin umperen mino. <sup>6</sup> Ben oyampáké Pita oren esavéden masí aimpin un pében onákan davaráe kayo ana vákan <sup>7</sup> mairá mana ena yavaráe Yisasin ánontá ma úkuantán baré ein mai vanta ano ma yádaren ádun kaeiní ukharen mino. <sup>8</sup> Máan tukhan mai ma esé araíen ma masíká orein eyo iyampon má ano masípín un pében mai yanásinta ódaren mumunan en mino. <sup>9</sup>\*Tiyarafenui

vompon dókifin ma Yisasin nan púaren evaránen e mantanten ne ma sikhá ein baya vetí ankan ída afová ukharen mino. <sup>10</sup> Máan turen mai eyo iyampon kanan mano evaránen barufá oren mino.

*Yisasi Ma Makdaráke Nanin Marian Avorá Dákó Ein Baya Ino*  
(Matiu 28:9-10; Maki 16:9-11)

<sup>11</sup> Orivíkan masí ain oyirá Maria mantakhen ifí diyáken masí aimpin mátimen mun onen mino. <sup>12</sup> Onákan enisorí kanan mano efanten buí daná ureñ Yisasin au ma yan bakharé eintá mana ano ánompá kumanin ena ano arantampá kumanin ukharen mino.

<sup>13</sup> Kumantaren míkanan mano Marian inaemí, “Anasi oe, éi fará ifí diya fono.”

Síkan béis evaránen békanan tiameemí, “Tenti Bafan ma ayóden intefasá kaúken nafi séi ída afová ukhé mai van mi ifí diyá uno.”

<sup>14</sup> \*Máa siren dovaera senten onákan Yisasi oyampá mantakharen mifo ve nan ída Yisasi ino sen afová en mino. <sup>15</sup> Máan tiyákan Yisasi véin inaemí, “Anasi oe, éi fará ifí diyá inká iyen nará dosiya fono.” Síkan dunan anará ma yafisin banta ino sen iniren temí, “Kákón banta oe, éi ma ven au ma vare mo kaurákan nonafá tisimesirá téi o varano.”

<sup>16</sup> Máa síkan mairá Yisasi semí, “Maria oe,” síkan María yo vaéan onen Aramaiki vaya finté, “Rabonai oe,” sen aren mino. (Mai “Rabonai” e ma siyain baya Aru sen tiyan mino.)

<sup>17</sup> \*Máa síkan Yisasi véin tiameemí, “Téi ída Sifóe vaípá ódikhé umpo ída vá ten tu fácano. Éi oreya sen tifa tiváeyan mana mo siameno. Te Sifóe má tiretí ankan Afóen má inká tenti Tiyarafenu vá tiretí ankani Ayarafenu vá baípái ódonté uno.”

\* **20:14:** Ruk 24:16; Yon 21:4    \* **20:17:** Rom 8:29; Ibu 2:11-12    \* **20:20:** Yon 16:22; 1Yn 1:1  
\* **20:23:** Mat 16:19

<sup>18</sup> Makdaráke nanin Maria ano evaránen oren mo máa sen eyo iyampon kayo siamemí, “Téi inka Bafan oné uno.” Siren Yisasi ma ven tiamein baya máa vetí ankan tiamen mino.

*Yisasi Ma Vei Eyo Iyampon Kayo Avorá Ma Afoká Ein Baya Ino*  
(Matiu 28:16-20; Maki 16:14-18;  
Ruku 24:36-49)

<sup>19</sup> Esé araí in damú áau eraven inúpasí íkan eyo iyampon kayo ano Yutan kayoi ánon banta kéka san péden má ona munkuan ákona ureñ iyukharé íkan Yisasi vetí áúbaná o mantaven máa sen betí ankan tiameemí, “Tiretí ankan ará ano kusen ná bano.” <sup>20</sup> \*Máa siren be ayan má ayoran má anúin bei eyo iyampon kayo ano onen mino. Aní uran bei eyo iyampon kayo ano ma vetí Bafan onein nan kákón amusin en mino. <sup>21</sup> Amusin iyákan Yisasi enádá betí ankan tiameemí, “Tiretí ankan ará ano kusen ná bano. Te Sifóe ano ma sen tisintá erikhá erunaí é téi sretí ankan tianté umpo vá oronó.” <sup>22</sup> Máa siyan be aunan pútiádan betí ankan baípá oriyan temí, “Tiretí ankan Kantá Aunan ná barano. <sup>23</sup> \*Tiretí ankan ma ena vanta kayoi ume ma ifá uantesin maen mai ume arúqntantén mifo sretí ankan ma ena vanta kayoi ume ma ída ifá uantesin mai kayoi ume fara vantén mino.”

*Yisasi Ma Tomasin Avorá Dakó Ein Baya Ino*

<sup>24</sup> Yisasi ma vei eyo iyampon kayo vaintá ma o afoká ein inúpá Tomasin nan ma Didimasin ne sen ariyain eyo iyampon mano maifin ída varen mino. <sup>25</sup> Máan tukharéin ena eyo iyampon kayo ano véin tiameemí, “Tetí ankan inka Bafan oné uno.”

Síkan Tomasi evaránen betí ankan tiameemí, “Béin ayampin ma antó arukhá ein afun má ayoran afumpin má ma séi ída seyantá

tiyan kaúan onté maé mai séi ída mumunan onté uno.”

<sup>26</sup> Máa siran dan manápá ifo afápá kanú manaú un kádán damú orivíkan Yisasini eyo iyampon kayo ano ona munkuan ákona uren mai namumpin bákán Tomasin má maifin baréin Yisasi vetí aúbaná mantaven máa semí, “Tiretí ankan ará ano kusen ná bano.” <sup>27</sup> Máa siren béis Tomasin tiameémí, “Éi eriveya siyan má tiyoran má tifumpin ayan kaúdeya onano. Ída vá anomé iniyákeya mumunan mana vá ono.”

<sup>28</sup> Máa síkan Tomasi evaránen béin tiameémí, “Tenti Bafan Ti-yarafenu uron mono.”

<sup>29</sup> \*Máa síkan Yisasi evaránen béin tiameémí, “Ei sen tódeyan mununan iya ompo séin ma ída sonten para ma mumunan iyain nanin banta ano vá amusin ino.”

### *Ma Vompon Dókii Ana Vaya Ino*

<sup>30</sup> Yisasi vei eyo iyampon kayo avorá kokhon enará ukhein aní danasinta afoká ukharen mifo séi ída ma vompon dókifin minó uvaré uno.

<sup>31</sup> \*Ída uvaré umpo ma vompon ma séi uvareruna mai Yisasin nan Tiyarafenu ano ma aní ukharé ein banta ino seya inká béis Tiyarafenu Anin mino se ureya véintá mumunan ono van mi uvaré uno. Béintá ma mumunan inona ano fara van oriyan ban aunan baran nono.

## 21

### *Yisasi Ma Yan Manápá Ifo Afápá Kan Un Kádán Eyo Iyampon Kayo Avorá Ma Afoká Ein Baya Ino*

<sup>1</sup> Ínaimpáké Yisasi Kariri non akharun\* akhempá bei eyo iyampon kayo vaintá enádá afokáen mino. Mai máan mi en béis afoká en mino. <sup>2</sup> Saimon Pitán má Tomasin nan ma Didimásin ne siyain má Kariri varafin Kaná

baru ráke vanta Natanierin má Sebetin anin kan má ena kankanan eyo iyampon má ano manafin iyukharen mino. <sup>3</sup> \*Íyukháréin Pita máa sen betí ankan tiameémí, “Noyana arono van oriyá uno.” Síkan betí ankan temí, “Tetin má orinton muno.” Siren minó ano mana votifin un kumamen oren mifo mai inurán betí ankan ída mana noyana aren mino.

<sup>4</sup> Máan tiyákan do kakhiyain má Yisasi non akhempá e mantakhan bei eyo iyampon kayo ano véin ída oman afová en mino.

<sup>5</sup> Máan tiyákan Yisasi oovararen temí, “Tirona kayo oe, ída manáa noyana arukhe rafono.”

Síkan betí ankan evaránen tiameémí, “Ída ino.”

<sup>6</sup> Máa síkan betin tiameémí, “Ayan kuron pákena mai voti akhempá base karúdaresin manáa noyana ferantiya varano.” Síkan betí ankan base maman karúdan aravuvín kokhon noyana víkavín betí ankan ída kanaíen mai vase orun darifaan botifin kaoren en mino.

<sup>7</sup> \*Máan tiyákan Yisasi ma moéken anunu ukharé ein eyo iyampon mano Pitan tiameémí, “Bafan mantino.” Síkan Pita au anamun davamádáken doriyaren iníkan “Bafan mantino” siyain má béis ainen au anamun e maman uren nompin káusiven ayan nakhosá den akhempá oren mino. <sup>8</sup> Mai ráke ma akhempá orin ída nentá baren mifo nainti (90) mita máan bákán manáa eyo iyampon kayo ano mai votifin para váken basefin ma noyana víkakhein darifen oriyaren mino.

<sup>9</sup> Betí ankan ma non akhempá oriven onan maen ira kiyákan maifin manáa noyana iyó uran bákán mai akhempá bereti kayo vá baren mino.

<sup>10</sup> Bákán mairá Yisasi máa sen betí ankan tiameémí, “Taráea ma

\* **20:29:** 1Pi 1:8   \* **20:31:** Yon 3:15; Rom 1:17; 1Yn 5:13   \* **21:1:** Karirí noni ena ví mai Taiberiasí ino.   \* **21:3:** Ruk 5:4-7   \* **21:7:** Mat 14:29; Yon 13:23

fákeona noyana kayo finte manáa vare ereno."

<sup>11</sup> \*Máa siyain má Saimon Pita votifin káusen ódiven base un darifen eyurá meren mino. Mai vasefin ma kákán noyana fékaré ein mai mana antareti ifo fifti-tri (153) noyan nan baren mifo ída mai vase yáken mino. <sup>12</sup> Máan turákan Yisasi vetin tiameemí, "Erive yunan nano." Síkan eyo iyampon kayo ano afová en béis Bafan mino siren béis inain nan péden mana ano éi iyé fono sen ída inaen mino. <sup>13</sup> Máan tiyákan Yisasi mairá oriven bereti vá noyana vá maman betí ankan amen mino. <sup>14</sup> \*Yisasi ma furin pinté e mantaven ma vei eyo iyampon kayo avorá afoká ein mai ma anon kanú manau dádasí en mino.

### *Pitan Nan Ma Yisasi Ano Séin Nan Anunu Iya Fono Sein Baya Ino*

<sup>15</sup> Betí ankan ma yunan narákan Yisasi Pitan inaemí, "Yonin anin Saimoni oe, éi ma sén nan anunu iyaona ano ma vanta kayo ma sen nan anunu iyain mai esantakhen nafino."

Máa síkan Pita semí, "Eyo Bafan noe, éi afová ukha ono. Téi en nan tinunu ukhé uno."

Máa síkan Yisasi véin tiameemí, "Máan ma sinteya mai senti sipisipi arará kayo vá dunan amisintano."

<sup>16</sup> \*Máa siren Yisasi evaránen Pitan inaemí, "Yonin anin Saimoni oe, éi sen nan anunu ukhe fono."

Síkan Pita semí, "Eyo Bafan noe, éi afová ukha ono. Téi en nan tinunu ukhé uno."

Máa síkan Yisasi véin tiameemí, "Tenti sipisipi kaylorasá dafítintano."

<sup>17</sup> Máa siren evaránen Yisasi kanú manau dádasí en Pitan inaemí, "Yonin anin Saimoni oe, éi sen nan anunu ukhe fono."

Síkan kanú manau dádasí en ma Yisasi inaiyain nan Pita anomé

iniyáken temí, "Bafan noe, éi minó daná afová ukha ompo séi en nan tinunu ukhé uno."

Máa síkan Yisasi véin tiameemí, "Tenti sipisipi kayo vá dunan amisintano. <sup>18</sup> Téi fura siré éin tiameemí uno. Éi fumara ma vákeyai eyantá amú anan damure mae eyan ma orono seonafá oriya ompo éi ma afovaí uveya ayan kanan daní uresin ena vanta anon amú anan damuantáden éi ída orono sikhanona varufá aviren orienten mino."

<sup>19</sup> \*Pita inte avúavá puririsá intin ná Tiyarafenu ano kákán bí baranten nafi mai véi afová ino van mi Yisasi ma vaya sen mino. Máa siren Yisasi semí, "Téin tivákurono."

<sup>20</sup> \*Pita yo vaében onákan mai ma Yisasi moéken anunu ukhein eyo iyampon mano vékanan oyampá avákuren eren mino. Dunan ma nein inuran ma Yisasin má o súpá uven ma "Bafan noe, iye anó éin namuro ayampin kaintéi vae" ma sein mai vanta ino. <sup>21</sup> Pita ma véin ódaren Yisasin inaen temí, "Bafan noe, ma vanta vá intesá inten nafino."

<sup>22</sup> Máa síkan Yisasi evaránen béis tiameemí, "Béis fara vantí téi ovaráne ereno van inikhé umpo mai ano éin intesá intéi vae. Téin mana sivákurono." <sup>23</sup> Mai eyo iyampon ída furinten mino ma sein baya ano mumunan nanin banta vaípá oreraen mifo Yisasi véin nan ída furinte ne vaya ída sen mino.

"Béis fara vantí téi ovaráne ereno van inikhé umpo mai ano éin intesá intéi vae." Máan manan béis sikhen mino.

### *Kípan Baya Ino*

<sup>24</sup> \*Mai eyo iyampon mano anan mai yanasantia van tian afoká uren ma vompon uvamá den mino. Mai ma véi ma sian afoká ein baya mai setí ankan afová ukhé tiféku mai fura vaya uron mino.

\* **21:11:** Ruk 5:6    \* **21:14:** Yon 20:19, 26

2Pi 1:14    \* **21:20:** Yon 13:23-25    \* **21:24:** Yon 19:35    \* **21:25:** Yon 20:30

\* **21:16:** Apo 20:28    \* **21:19:** Mat 16:24-25;

25 \*Yisasi ma minó avúavá  
bariyá ein mai kokhon ban mifo  
sei ma iniyaruna mana mana  
yanái vompon dóki uvaman  
kaúdú kaúdú ono sen báintin  
mai vompon dóki kayo ma kain  
afokhan ma varará ída kanaí inté  
ein miño.

mi inká mepifin aníen ukhen mino.

## BAYA VAREN ORIN BANTA (Aposeri) KAYO MA YÓKEIN BAYA INO (Aposeri)

### Aposeri Vompon Ma Uvanteí Pákenai Afova Vaya Ino

*Ma vompon ma uvantein banta ino.*

Ena anan pintena ayofan banta ma Porin arona váken ma ena ena véin má nókan ma minó ano anunu iyá ein banta Ruku ano ino. (Korosi 4:14 fin ná onano).

*Uvarein orana ino.*

AD sikisti-tari (63) fin Porin ma Romu kamani ano ma karavusí ukharé in ma kíparí iyain oranafin mi ma vompon uvanten mino.

*Ma vompon ma uvantein baru ino.*

Romú barurá ifo mai vompon ma uvaran danasinta Sisareá barurái ovare evare uan átaru uádaren mi uvanten mino.

*Ma vompon ma uvaman amikhein kéká ino.*

Ída afová ukhé tiferuna vanta Tiofirasi maen Romu kamani kákán doran banta váken monó tiyan mumunan iyá ein banta vá inká ena anan pinté ma monó tiyan mumunan ukhá ein kayo vá ino.

*Nái ana vará ma vompon uvan-ten nafino.*

AD teti (30) oranafin ma Porin karavusi fáken Romui varafá orein baya vá inká monó doran ma aráí uren dorein baya vá afová ino van uvaren

*Kantá Aunan Amin Nain Nan  
Ma Yisasi Siamein Baya Ino*

<sup>1</sup>\*Tiofirasi oe, Yisasi ma araíen doriyáken monó baya minó nanin banta siamen eriyá ein bompon pefá uvaman amikhá uno.

<sup>2</sup>\*Doren eriyan mai ma vei yorarí ino van ma vaya varen orin kayo me Kantá Aunani ákonafó monó baya siamin doran aní uran mi Ti-yarafenu ano véin aviren inarufá óden mino.

<sup>3</sup>\*Béi uman o varen púaren masí pinté e mantavin beni vaya ma varen orin kayo ano ódarákan béin nan pura sen aun manten mino sino van betin avorá foti (40) yamúpin kokhon dádasi iyáken betí baintá afoká uviani Tiyarafenui Yafisin pintena vaya siamen mino.

<sup>4</sup>\*Maná damú ma Yisasi vetí ankan má duna niyáken máon mi sen tiamicaren mino, “Tiretí ankan ída vá Yerusalemí me ampire ena varufá orera iyákeya mai ma se Sifóe ano ameno van tianten mino séku ma inikhá eona yanasará ave ono.

<sup>5</sup>\*Monó non máa fóí Yoni monó non péanten mifo ída ayáká basin mi Kantá Aunampó tiretin monó non péantanten mino.”

<sup>6</sup>\*Máa sirákan maen bei eyo iyampon kayo e átaru uven béin inaemí, “Bafan noe, saréa Isareri vara evaráne maman ákona uantádesin ná mana kin mano yafisinten nafino áa ída fino.”

<sup>7</sup>\*Máa síkan béri evaránen betí ankan tiámemí, “Mai áau fi yamu safi ída saretí ankan nina yaná banti ída kanaié afová in nompo Tifóe veykái aní uren maináká dafiken mino.

<sup>8</sup>\*Máan tukhein Kantá Aunan ma saretimpín erivinti mae ákona mamareya séin

\* **1:1:** Ruk 1:3   \* **1:2:** Mak 16:19; Ruk 24:49-51   \* **1:3:** Ruk 24:36-49; Apo 10:41   \* **1:4:**

Ruk 24:49; Yon 14:16-17; Apo 2:33   \* **1:5:** Mat 3:11   \* **1:6:** Ruk 24:21   \* **1:7:** Mak 13:32

\* **1:8:** Mat 28:19; Ruk 24:48

pákena vara Yerusaremí barufin má minó Yudiá bara akhempá bá Sameriá barafá bá inká ma varai minó akhempá deren mo siamin nono.”

*Yisasi Ma Inarufá Ódein Baya Ino*

(Maki 16:19-20; Ruku 24:50-53)

<sup>9</sup> Máa siran betí ankan avorá Tiyarafenu ano véin aviran inarufá ódiyain má mana konan mano véin iyádan ída onen mino.

<sup>10</sup> Béi ódivíkan betí ankan ayompin kakhaken baré in efanten buí daná ukhein bantá kanan mano manadá betin ádé e mantén mino. <sup>11</sup> \*E mantaven máa semí, “Karirí banta kayo oe, pará tiretí ankan mará mantakheya ayompin kakhaké bara fono. Mai Yisasi ma Tiyarafenu ano saréa siren pinte avire inarufá ódi ma oneona avúaváká ten mi véi umbaránen eranten mino.”

*Matiasin Avían Tiyan Míkan Mifo Sirantan Mana Orun Kádan (11) Baya Ma Varen Orin Kayofin\* Asotú Ein Baya Ino*

<sup>12</sup> \*Máa siran mairá eyo iyampon kayo ano Orifí Anuyon ne ma siyain anu me ampiren Yerusaremí oren mino. Yerusaremíké ma Orifí Anuyontá oriyain mai mana kiromita ino.

<sup>13</sup> \*Mai varufin oriyen betí ankan ma gefá baré ein namumpin ódiven dan bain karafarampin un bareñ mino. Maifin ma un baré ein kéká mai Pita, Yoni, Yemisi, Enduru, Firipi, Tomasi, Batoromiu, Matiu, Arfiusin anin Yemisi inká Seroti kéká pintena vanta Saimoni, inká Yemisin anin Yudasi siren mino. <sup>14</sup> Mai vanta kéká bá anasi kayo vá inká Yisasin anoe Marian má be afá kayo vá e átaru uven ará manafini uren amúkiyaren mino.

<sup>15</sup> Maí damú kayofin ma Yisasantá mumunan iyá ein nanin banta maen mai mana antareti ifo tuenti (120) nanin bantan átaru ukhen bákan mai finté Pita e mantaven <sup>16</sup> \*máa semí, “Mumunan tiyofi sifá tiváeyan noe, pefá Tiyarafenui vompompin Kantá Aunan mano Devitin oo ráké naren Yudasin nan Yisasin avían namuro ayampin kainten ne ma sikhá ein mano fura sen dákoén mino. <sup>17</sup> Pefá Yudasi setimpin báken monó doran manaén tetin má doriyaren mino.”

<sup>18</sup> \*Máa tukhan maen mai Yudasi ano vei namu avúavákáke miyampó mana vara o miyaní uren mai varafin beyantá ánon páké eraven ankamíkan ben amú pautivin ará kakhufen barará eraven mino. <sup>19</sup> Ínaimpáké Yerusaremí barufin ma vain nanin banta ano mai vaya inirenaen mai vara van betí avaya finté Akeradama e sen mino. Mai víi ana mai nare vanakhein bara en tikhen mino.

<sup>20</sup> Máa siren Pita evaránen temí, “Ma vaya van Í Bompompin máa sikhen mino, ‘Béi ma varé ein afokhan áesin para vantin ná mai afokhampin ída vá mana vanta ano vano.’ *Íbo* 69:25 Inká mai vompompin mana ena vaya máa sikhen mino, ‘Ena vanta áesin ná beni varu varano.’ *Íbo* 109:8

<sup>21</sup> Máa tukhein nará minó banta kéká pinte mana vanta ano ma setí ankan má nókon Yisasi ma yoren non maen ontaré ein banta vá tetí avían kaékun ná beni varu varano. <sup>22</sup> \*Yoni ma araíen monó non péantiyá ein také ma eriaren ma Tiyarafenu ano Yisasin aviran inarufá ódein ma ontaré ein banta vá avían kaesin tetin tiyaen ná Yisasi ma fúoren e mantakhá ein baya vanasi siamino.

\* 1:11: Mat 26:64; Ruk 21:27 \* 1:11: Baya ma varen orin kayo mai Aposeri en tiyan mino.

\* 1:12: Ruk 24:50-53 \* 1:13: Mat 10:2-4 \* 1:16: *Íbo* 41:9 \* 1:18: Mat 27:3-8 \* 1:22:

<sup>23</sup> Pita máa sirákan kankánan banta avían kaen mino. Mana vanta mæn kanú manaú bí ari-yaren mino. Mai vanta van Yosepi ne sen ariyan inká Basabasin ne sen ariyan inká Yastasin ne sen ariyan mino. Ena vanta maen Matiasin ne sin avían kaen mino. <sup>24</sup> Mai vantá kanan avían kaúden máa sen amükemí, “Bafan noe, eyaká anan minó nanin banta aúpin afová ukha ompo ma kanan pinte ma éi anunu ukhanona vanta vá tetin aní uresin ná <sup>25</sup> Yudasí vei yoran me ifá uren be nan ma vano sikhá ein barufá bano van oren mifo vékanan pinté iye anó Yudasini varu varen ná eni vaya varen orin doran bantaí inten nafino aní ono.” <sup>26</sup> Mái siren ayá danka vá asíka yanka vá punkikhaan ayampín pákaran Matiasi ayá danka yanúden e aní uvíkan béin avían tiyan míkan mifo sirantan mana orun kádán (11) baya ma varen orin kayofin asotú en mino.

## 2

### Pentíkosi Yamú Ma Kantá Aunnan Erein Baya Ino

<sup>1</sup>\*Pentíkosi yamú\* e uníkan munanan iyá ein nanin banta minó mana namumpin e átaru ukharen mino. <sup>2</sup> Átaru ukháin inaru fáké manádá kákan uva ma en ereiní uaren mai ma vetí ankan bá ein namumpin e víken mino. <sup>3</sup>\*Máián tiyain má betí ankan onákan banta amafin ten kayo ano ira anafun ma karékárá en oreiní uaren mai namumpin ma varé ein kayo árontá mana mana en o yoman nen mino. <sup>4</sup> \*Máián tiyain má Kantá Aunan mano vetí ankan aúpin bíkaven aya íkan araién ara ara vaya sen mino.

<sup>5</sup> Maí damú Tiyarafenu van ma fédén bentá monó tiyain Yutan

kayo ano minó bara fáké ere ere en Yerusalemí e varen mino. <sup>6</sup> E varen mai ma uariyain ma inein kayo ano akhokho van e átaru uven mai ma siyain baya van takhaen oreraen mino. Mai fara va ino Yisasini vayan be avaya finté tiyan iníden mino. <sup>7</sup> Iniren Yutan kéká ano anú diyáken temí, “Ma Karirí bara fáke nanin bantan banten mino. <sup>8</sup> Máan tukhen mifo inté uáken ná mana mana si vaya finté tiyará iniyá tife rafuno. <sup>9</sup> Para vara seyo, Patiá bara fáké eriyan Midiá bara fáké eriyan Eramíké eriyan Mesopotemiaké eriyan Yudiaké eriyan Kapadosiaké eriyan Pontasíké eriyan Esiaké eriyan <sup>10</sup>Frikhiaké eriyan Pamfiriaké eriyan Isipíké eriyan Sairiní baru adé Ribiaké eriyan Romuké arona eriyan <sup>11</sup>inká Yutan kéká bá ena kéká bá ma setinti monó tiyain kéká bá Kirití kayo vá Arebia kayo vá anon iniyá tifékun tetinti vayafó Tiyarafenu ano ma ákona yorarí ukhein baya siyan mino. <sup>12</sup> Betí ankan anú diyáken kokhon ineine iyan betiyan ten inemí, “Ma yaná ma afoká eini ana mai intesá ukhen nafino.”

<sup>13</sup>Máián tiyákan manáa kayo ano vetin nan taró tiyan temí, “Auyen uvaini kokhon naráken óen iyan mino.”

### Pita Ma Vanasi Monó Baya Siamein Baya Ino

<sup>14</sup> Máa siyákan Pitán má ena siyan míkan mifo sirantan mana orun kádán (11) eyo iyampon kayo vá ano e mantavin Pita oovaren máa semi, “Tirona Yutan kayo vá ena vara fáké ma Yerusalemí e vaona kéká ba soe, átaren ná mafá desin erivintirá mai ma afokái oneona yanái ana siaméku vá ineno. <sup>15</sup>Tiretí ankan ma iniyaona ano ma kayo van óen non mi naráken óen iyan mino ma

\* **2:1:** Riv 23:15-21; Diu 16:9-11    \* **2:1:** Avo Uantan dunan ma amusin iyan do naran mi mai oyam páké fifti yamú orivíkan Kantá Aunan erakhan mai vami Pentikosie siyan mino.    \* **2:3:**

Mat 3:11    \* **2:4:** Mak 16:17; Apo 4:31; 10:44-46; 19:6

siyaona mai ída uron mino. Tare uron mi kakhakhan dan manápá ifo afápá kami kami un kádan (9 kiroki) áquí ukha ákurái va ono.<sup>16</sup> Ma yaná ma afoká iyain nan pefá sakhanampa vanta Yoeri ano siádon baren mino.

<sup>17</sup> “Tiyarafenu ano siyáken ma vara ma kípáno van iyantí maé tesí Kantá Aunan minó nanin banta amaniná batnaékuñ tiretin anin kayo vá inká tiren araun kayo vá ano sakhanampa vanta an danten mino.

Máon tiyantin pumara kéká auu vaédantin oniyantin ayokhuvín banta kayo ano kokhon kain onanten mino.

<sup>18</sup> Mai damú ana sesi yoran nanin má banjafin má dere sesi Kantá Aunan banaá dékun orintin maen sakhanampa vaya sinten mino.

<sup>19</sup> Máon tiyantí maé ara ara yaná ayompin maman dákó é maé inká barará ara ara aní danasí ékuñ maen ira vá nare vá kákan íkun má édavinten mino.

<sup>20</sup> Máon tintin áau ano sítípa intin inká biyon mano nare an den nararé inti ma ódaresin maen ínaimpákéi Bafani erin mai kama uran en panu sikhein damúi erinten mino.

<sup>21</sup> Máon tiyantin intéa kéká anó ayaino van Bafan aví aranten nafi mai kéká aya urev evaránen aviranten mino.’ Yoe 2:28-32

<sup>22</sup> “Isarerí nanin banta oe, Nasaretike vanta Yisasini vaya senté umpo vá ineno. Tiretí afová ono van maen Tiyarafenu ano véin pinté uaren enará ukhein ákoná vá aní daná bá uvaren

dararen iyákaya sireyantá afová ukha ono.<sup>23</sup> Tiyarafenu ano afová ukhen pefá beyantá tiádan baré ein ánaín dakhafen mi mai vanta siretin ayampin kaíkan namu vanta kayo ano siretin ayaen daa unkamádantá antópó béis arin puren mino.<sup>24</sup> Aruan púden nan purini ákoná ano ída kanaíen béis pákaán dan baren mino. Mai fara va ino Tiyarafenu ano füká ein pinte véin orun avíán mantaren ída áin purini aí bá beraifin baren mino.<sup>25</sup> Pefá Deviti ano véin nan máon mi sikhan mino,

“Téi onékuñ Bafan mano minó damú te má túpá ukhen mino.

Para vara seyo, véi sen tiyan kurompá bain mana yana san téi ída feranté uno.

<sup>26</sup> Mai vará ten tirápin kama intirá timusin baya seno.

Máa sé umpo sen tu vá dere ano vá mai van ave ino.

<sup>27</sup> Para vara seyo, éi ída áená purin nanin banta ma vaímpin báku mae inká ei kantasí ukhein banta ída áesin masípín púta inten mino.

<sup>28</sup> Éifefái aun ma varan ain aní ukha ompo

áesien má bákuya moékan timusin timeno. *Íbo 16:8-11*

<sup>29</sup> \*“Mumunan tifá tiváeyan noe, setin tinau Devitini vaya sian páman uan amenté uno. Béi fúbíkan masí uran beni masí para van eriyan taréa setimpin dere mai masí para van mino.<sup>30</sup> \*Mai fara va ino Deviti sakhanampa vantan bákan Tiyarafenu ano pura ódino siren béis iyáontiyáken ínaimpá en ana akhá pinte mana yékuñ eni varu varanten mino síkan afová ukhan mino.<sup>31</sup> \*Máa sikhan mai ma varará nanin banta ma evaránen aviran banta ma e mantan nain Deviti ínaimpákéna

\* 2:29: 1Ki 2:10    \* 2:30: 2Sa 7:12; Íbo 89:3-4; 132:11    \* 2:31: Íbo 16:10

yaná oniyáken béin ída áintin purin nanin banta vá báken mai masipin púta inten mino sikharen mino. <sup>32</sup> Mai vaya ma sikhá einiéni Tiyarafenu ano mai Yisasin masí pinté orun avían mantá tetí minó kayo ódarákaréi mai vaya sian dákó iyá tiféuno. <sup>33</sup> \*Máan tukhan pefá ma Tiyarafenu ano Kantá Aunan amenté uno siren ma iyáontáká ein Yisasin amin mamaren inarufá óden be afóen ayan kurompá un ban mi saréa ma oniyáke ma iniyaona Kantá Aunan banaiyan mino. <sup>34</sup> Deviti ída Yisasi má ódeinién inarufá óden mifo véi máa sikhán mino,

“‘Bafan mano senti Bafan máa sen tiamiche mino,

“Éi sen tiyan kurompá kuman-  
tesí

<sup>35</sup> ma eni namuro kayo maman  
bararasí uré  
en aránaó kaúdéku vá ono.” ,

*Íbo 110:1*

<sup>36</sup> \*“Máan tukhen mifo Isarerí nanin banta oe, minó ano vá afova ono. Yisasi ma yaa unkamádantá ma aruan pureona vanta Tiyarafenu ano véin maman Bafaní uren doran banta e sen Tiyarafenu ano ma aní ukhá ein banta ino”.

<sup>37</sup> Máq síkan banasi ano Pitani mai vaya inin amafon aí iyaimpin Pitan má ena vaya varen orin banta kéká bá inaemí, “Tifá tiváeyan noe, setí náisá onté tife rafuno.”

<sup>38</sup> Máa síkan Pita evaránen betí ankan tiameémí, “Tiretí ankan mana mana ano ume finté ará baédeya Yísas Karaisin avíká monó non baresin ná Tiyarafenu ano sretí ume ampiantano. Máan ma esin mi Tiyarafenu ano Kantá Aunan aminten mino. <sup>39</sup> \*Pefá Bafan tetisi Tiyarafenu ano sretí ankan má tiretí akhafana vá inká nentá ma vain nanin banta vá ma

ínaimpá araren Kantá Aunan amin nain mi iyáantákaren mino.”

<sup>40</sup> Máa siren bái ena vaya kayo vá ákonáen tiamiyan tútúpemí, “Tiyarafenun inaesin ná tare ma vain namu nanin banta kayo fintena sretin aya ino.” <sup>41</sup> \*Pitani vaya ano mai nanin banta amafon aí iyaimpin máí damú ana kanú manaú tauseni (3,000) nanin banta ano ará baéden monó non péden mai nanin banta ano Yisasantá ma mumunan iyain kayo vá o asotú en maman kokhoníen mino.

### *Yisasintá Ma Mumunan Iyain Kéká Ano Ma Ará Manafín Ein Bayá Ino*

<sup>42</sup> \*Kokhoní uven mai kayo ano vaya varen orin banta kayo ma afova amiyain bayá ákonáen iniyáken betin má manafin o átaru uven monó ten dunan nen amúken iyaren mino. <sup>43</sup> Máan tiyan Tiyarafenu ano vaya varen orin banta kayo finté ayan táké uaren kokhon enará ukhein ákoná vá aní daná bá barákan banasi ano mai yanásinta oniyáken anú diyan akhokho van en oreraen mino. <sup>44</sup> \*Máan tiyákan Yisasintá ma mumunan iyain kéká ano ará manafiní uren mana inintá báken minó daná ben amin ben amin iyaren mino. <sup>45</sup> Máan tiyáken betíí vara vá kama yanásinta vá sarí uren moní máden manáa yana san ma o afasí iyain kéká aya iyaren mino. <sup>46</sup> Máan tiyáken minó damú monó namun dafufin ena ena átaru iyáken maen inká mana mana namumpin o iyuve e iyuve en dunan niyáken betiyan maman bararasí uren amusimpin baren mino. <sup>47</sup> \*Báken ena ena yamú Tiyarafenu aví daní iyákan banasi ano vetin nan anunu iyan ena ena yamú Bafan mano ará ma vaerein nanin banta avídú íkan mai ma

\* 2:33: Apo 5:32; 7:55-56    \* 2:36: Apo 5:30-31    \* 2:39: Ais 57:19    \* 2:41: Apo 2:47; 4:4

\* 2:42: Apo 20:7    \* 2:44: Apo 4:32-35    \* 2:47: Apo 6:7; 11:21

Yisasintá ma mumunan iyá ein nanin bantafin mo asotú en mino.

### 3

#### *Mana Arantan Namu Ukhá Ein Banta Ma Pita Ayofein Baya Ino*

<sup>1</sup> Maná damú Pita nú Yonin nú monó namumpin amúkono siren kanú manaú áauíen inúpasí iyan oren mino. <sup>2</sup> Oriyan o onákan monó átaru yafu ona van ma Avorú Ona e siyaintá mana arantan namu ukhein banta minó damú aviren mo khain báken monó dafufin ma ódein nanin banta vaipá moni san inantiyain baré íkan aviren meran baren mino. Mai vanta maen be anóen arápiñ mi arantan namu ukhan kaen mino. <sup>3</sup> Morákan báken ma mai vanta ano Pita nú Yonin nú onan monó namumpin umperano van ódikan maen békakan baipá mai vanta ano moní inan ten mino. <sup>4</sup> \*Inan tíkan Pita nú Yonin nú ano mai vanta mo furefure oniyáken Pita semí, “Eí verasan tonano.” <sup>5</sup> Máa síkan mai vanta ano náinasá timinten nafino sen mumunan iyáken purefure en békakan onen mino.

<sup>6</sup> \*Oniyain má Pita máa sen tiámemí, “Téi ída moní dékun ban mifo se ma yákeruna yana amenté uno. Nasaretike Tiyarafenu ano ma aní ukhein banta Yisasin avíká éi e mantave orono.” <sup>7</sup> Máa siyáken ben ayan kurompáke yáman pákaaren orun ayan nóan mantiyain má ana mai vanta ayákon má arantan má kamaen ákonaen mino. <sup>8</sup> Ákona iyain má beyantá kútin e mantan orian ódaren mairá békakan bákuren monó namumpin ódiyáken káosi káosi iyan Tiyarafenu aví daníen mino. <sup>9</sup> Mai vanta ano káosi káosi iyan Tiyarafenu aví daní iyain minó nanin banta ano oniyáken, <sup>10</sup> betí ovaren me afová en mai ma monó átaru yafu ona van

Avorú Ona e siyaintá ma ena ena yamú báken ma moní inantiyan baré ein banta aurái ma yaná afoká ukhen mino siren takhaiyan kokhon ineine en mino.

#### *Pita Ano Ma Vanasi Vaya Siamein Baya Ino*

<sup>11</sup> Banasi ano ma mai vaya iniyáken anúden orera iyan mairá tavaen e átaru uven mai vanta onákan Pita nú Yonin nú ayan pákáan ákona uren mai ma Soromonini Yuse se ma siyainta mantakharen mino.

<sup>12</sup> Pita máaon ma iyain oniyáken banasi siamemí, “Tiretí Isarerí nanin banta oe, ma yaná ma yáko iyain nan pará anú diyayá békoni kama avúavá bá ákona vá anon ma vanta ayain mantan oriyan mino sireyá berasan urútoniya rafono. <sup>13</sup> \*Abaraamu má Aisakin má Yekopun má inká tetin tinafuyan máí Ayarafenu ano vei yoran banta Yisasin kákan bí amira mai vanta e avían namuro ayampin amen nan Pairoti ano véin ampiantiya ompo siretí Pairotin avorá ben oyan amire ída vá mai vanta ampiresin ná orino se ono.

<sup>14</sup> Máa sireya Kantasien Puntákein Banta oyan amire, vanta aruan purin banta van aésin teti vaipá erino siya inae ono.

<sup>15</sup> An uanten aun bain aintá ma siviren orin bantan tiretí aruan púden nan maen Tiyarafenu ano masí pintena evaránen avían mantará berasan ontaréi mai van tian dákó iyá uno.

<sup>16</sup> Berasan Yisasintá mumunan iyáke ben avíkái ma vanta ayanóan mantékun ákona mamarai óde afová iya ono. Yisasin avíká ma mumunan in manon pura sen ma vanta ayofakhayan oniya rono.

<sup>17</sup> \*“Tifá tiváeyan noe, séi afová ukhékuya siren má tiretí yafisin banta kayo vá ano ída afová ukheyán mai ná avúavá Yisasin

\* **3:4:** Apo 14:9    \* **3:6:** Apo 4:10; 16:18

\* **3:17:** Ruk 23:34; 1Ti 1:13

\* **3:13:** Eks 3:6, 15; Ruk 23:13-25; Apo 2:23

amaniná kae rono.<sup>18</sup> Mágan te ompo gefá Tiyarafenu ano sakhanampa vanta kayo finté uaren mai vanta van mi Tiyarafenu ano ma aní ukhein banta ano uman barante ne sikhá iyan ben amaniná máante rono.<sup>19</sup> \*Mágan tukhen mifo sireti ankan ará baéde sirun noe sireya Tiyarafenu vaípá oresin ná tireti ume arúantano.<sup>20</sup> Mágan turantin Bafan pinté kusen ban erintin ná mai ma vanasi evaránen aviranten ne sen pefá aní ukhá ein banta Yisasin tiantantin ná enádá ovaránen erino.<sup>21</sup> Erinten mifo véi inarufá pa ave ukhantin ná Tiyarafenu ano ma vei kantasi ukhein sakhanampa vanta kayo finté uaren ma iyáan táka ein maman evaránen auyení urantin ná minó danasinta yákó ino.<sup>22</sup> Pefá Mosesi siyáken, ‘Bafan Ayarafenu ano sireti kéká pinte mana vanta avían kaintin ten an den sakhanampa vantái inten mifo sireti beni minó baya inire vá dakhafono.<sup>23</sup> Mágan tukhantin mai sakhanampa vantai vaya ma ída inin nain nanin banta ano ída uron mi Tiyarafenu vanasifin banten mino.’ *Diu 18:15, 18-19*

<sup>24</sup> “Sakhanampa vanta Samuerin táké ma araí uren erikhein sakhanampa vanta kayo minó ano mana yana san mi sikháin maí damú inka yákóen mino.<sup>25</sup> Sakhanampa vanta kayo ma siyá ein baya kayo vá Tiyarafenu ano ma siretin anafuyan má ma manafin kasen ban baya ma sikhá ein mai vetin anavasin mi sireti varé en nan mi siretin amaninái yákóen mino. Béi Abaraamun tiamiyáken, ‘En anavasin pinté uaren mi minó barará nanin banta ano avu varanten ne sikhan mino.’ *Esé 22:18; 26:4*

<sup>26</sup> \*Máa sikharen mai van mi Tiyarafenu ano vei yoran banta avían mantaren tireti mana manai namu avúavá pinte avu uranti ará

baerano van tiantan tireti vaonafá nare eren mino.”

## 4

*Yutan Kayoi Ánon Banta Kayo Ano Ma Pita Nú Yonin Nú Aviren Me Vetí Ankan Aufá Mantein Baya Ino*

<sup>1</sup> Pitán nú Yonin nú ma vanasi vaya siamiyákan mairá monó doran banta kayo vá Sadyusi kéká bá monó namuntá ma yafisiyain kayoi ánon banta vá ano mairá e unen oren mino.<sup>2</sup> Onóben iníkan Yisasin nan e mantakhein púkein kéká ano yere orun mantanten mino sen míkanan mano sian afova amiyyare íkan betí ankan o inen mai van kákantá aranan en mino.<sup>3</sup> Aranan urem békakan pákádaran duniyaimpin ena ákurá do kakhantí kó tiantadé puntarano van míkan aviren mo karavusi namumpin kaen mino.

<sup>4</sup> \*Míkan ma siyain baya inirena Yisasantá mumunan ein banta mai yan manápá tauseni ino (5,000).

*Pitan Nú Yonin Nú Ma Kó Tiatein Baya Ino*

<sup>5</sup> Mágan tukháin ená damú Yutan kayoi yafisin kéká bá monó doran banta kayo vá inká man baya ma afová amin kayo vá ano Yerusalemí e átaru en mino.<sup>6</sup> Átaru iyákan monó ánon banta kékáí ánon banta Aanasi má Kajafasi má Yoni má Areksanda má inká ena monó ánon banta kayoi kéká bá dere maifin e varen mino.

<sup>7</sup> Mai kéká ano Pita nú Yonin nú aviren me vetí ankan avorá kaúden míkanan inaemí, “Intéa ákoná bákayá iyen avíkasá mai yaná bariya rafono.”

<sup>8</sup> Máa sen ina iyákan maen Kantá Aunan mano Pitán aúpin bíkavin betí ankan tiamemí, “Tireti Isareríi yafisin má monó doran banta kayo va soe,<sup>9</sup> ma ma aranta namu ukhein banta ma aya ukheruna fáke inté uákesá berasan bén ayofe rafu mai

\* 3:19: Apo 2:38    \* 3:26: Apo 13:46    \* 4:4: Apo 2:41

séi ma iniyarun sirení ankan tetin inaúdé afová ono van mi iya ono.<sup>10</sup> \*Máan tiya ompo vá minó Isarerí nanin banta ano ma vaya vá afová ono. Mai ma Nasaretíke vanta Yisas Karaisin ma yaa unkamádantá aren nan púbin ma Tiyarafenu ano evaránen avíon mantein banta avíkái ayofaadékun mai vantán tiretin avorá mantakhen mino. Béi maen

11 “‘Má uvaran banta kayo ano  
ma yo maman karúdein  
onámaná ano  
maman má dádaímpin mana  
ákona onámanasí ukhen  
mino.’” *Íbo 118:22*

Mai ákona onámaná maen Yisas Karaisi ino.

12 \*Máan tukhantin ma varará banta ída ena vanta Tiyarafenu ano amikhá intin banasi evaráne aviranten e sikháintin tetin ída siyainten mifo Yisasi anan tetin barará nanin banta kama urev evaránen tiviranten mino.

13 Mai vaya siyákan dafisin kéká ano Pita nú Yonin nú ódaren mikanan Yisasi má pefá bákan ontaren mino. Békanan ída mana sikhuru siren afova mantá eintá ída feran ákonan baya siyákan mai van betí ankan kokhon ineine en oreraen mino.<sup>14</sup> Kokhon ineine iyáken betí ankan onákan mai ma arantan namu ukháiñ ayofein banta ano vékanan má mantakhan mai van betí ankan ída mana vaya evaránen békanan tiamen mino.<sup>15</sup> Máan turen mairá mai Kanisoríano\* vékanan tiantan mai átaru namunté ekhuyen barufá aravuvíkan betiyan baya sen oreraen mino.<sup>16</sup> Ten orera iyáken temí, “Ma vantá kanan mano moéken enará ukhein ákona ma aní ein mai Yerusaremí ma varé ein nanin banta ano inka afová en orera ein ída umera tifanté umpo mikan amaniná náisá otifante rafuno.<sup>17</sup> Máan tiyaren mai vaya

ano minó nanin bantafin orera inafó erítifé békampin ákona é baya siamé tifékun ná ída evárénen mai víká banasi sian amino.”

18 \*Betiyan baya siren mairá békón aran mai namumpin ódikan Yisasin aví tiriya ma vanasi afova amiayin béin aví ma sin má dere mikanan airo ananí uanten mino.

19 \*Máa síkan Pita nú Yonin nú ano vetí ankan evaránen tiameí, “Tiyarafenu avorá tireti inte é té iniya rafono. Berasan mai Tiyarafenu vayá dakhafonu áa sirení vayá dakhafó tifante rafu maifin daídé vá afová ono.<sup>20</sup> Mai van mi verasan ída kanaié vaya mará me fákanté umpo verasan ma oniyá ma inikhá eruna yaná minói sian dákó onté uno.”

21 Máa síkan banasi ano ma mai yaná ódaren Tiyarafenu aví daní iyain nan mai yafisin kayo ano vetí ankan nan péden mikanan amaniná ída kanaí en mana aau kairiún pasen ída uman amin nan evaránen ákona vaya ana siamíden tiantan oren mino.<sup>22</sup> Para vara seyo, mai ma mikan mano enará ukhein ákonafó ayofan ma arantan kamaein bantai orana mai foti (40) orana esantakhein banta ino.

### *Mumunan Iyain Kéká Ano Ma Amúkiyain Baya Ino*

23 Pita nú Yonin nú tiantádan maen mai yafisin banta kayo me ampiren békóni kéká baípá oren o véken mai ma monó ánon banta kayoi ánon banta vá monó doran banta kayo vá ano ma sein baya siamen mino.<sup>24</sup> \*Tiamin inireñ mairá betí ankan ará manafiní urev Tiyarafenu amúkuán amen temí, “Bafan noe, éi vara vá non má inaru vá maifin ma minó daná baini uvaran benafo ono.”<sup>25</sup> Pefá eni Kantá Aunan mano sétin tináu Devitin mana vaya amíkan Deviti máan mi sikhan mino.

\* 4:10: Apo 3:6, 13-16      \* 4:12: Mat 1:21  
ma siyain kéká ino.      \* 4:18: Apo 5:28      \* 4:19: Apo 5:29      \* 4:24: Eks 20:11; Nee 9:6; Íbo 146:6

\* 4:15: Mai Kanisorí kéká maen Sanedrini e

“Intéa ana vará minó ena anan  
nanin banta ano móekentá  
aranan iyáken ná  
para é tiren ná mai Isarerí  
nanin banta ano fasavifá  
namu avúqvásí ono van  
baya sian damuan kaiyan  
nafino.

<sup>26</sup> Minó bara vain bain ma vain kin  
kayo ano aruvín danasinta  
utaaren mantakhan  
inká dafisín kéká bá ano manafin  
átaru uven

Bafan Tiyarafenu maman  
bararasí uré  
barará nanin banta ma  
evaránen aviran nan ma  
sikhá ein banta maman  
bara finí ono van iyan mino.

### Íbo 2:1-2

<sup>27</sup> \*Pura siren Erotin nú Pontias  
Pairotin nú ano ena anan kéká  
bá Isarerí nanin banta kayo vá o  
éken ma varufin e átaru uven ei  
kantásí ukhein doran banta Yisasi  
ma fefa éi aní ure nan baré ein  
maman bararasí ono van iyan  
mino. <sup>28</sup> \*Betí ankan ma varein  
daná mai ei ákonará pefá tiáden  
nan baré íkan mi eni anunu vá  
ineine vá ánaín mi yakhafen mai  
yaná afoká en mino. <sup>29</sup> \*Bafan  
Tiyarafenu oe, setí eni yoran banta  
kayo ma sikhokho simin baya  
kayo ma siyain ná inireya siya  
esirá ákona ukhé ída feran eni  
vaya ákonáe banasifin tian dáko  
ono. <sup>30</sup> E ayan daruádesin orinti vá  
banasi aí kípaon tiyáke aní danas-  
inta aní iya vá ara ara yaná ei  
kantásí ukhein doran banta Yisasin  
avíkasá uvarano.”

<sup>31</sup> Máan amukírí uan kíparan  
maen mai ma vetí ankan baré  
ein namun antu antu iyáken  
Kantá Aunan mano vetí ankampin  
bíka víkan Tiyarafenui vaya  
ákonáen tian dáko iyáken ída feren  
akhokho van en mino.

*Yisasintá Ma Mumunan Iyain  
Kéká Ano Ma Vetiin Nina Yanasinta  
Avari Iyaí Pákena Vaya Ino*

\* 4:27: Mat 27:1-2; Ruk 23:7-11; Apo 3:13

Apo 2:44

<sup>32</sup> \*Yisasintá ma mumunan ein  
kéká ano mana ineine vá mana  
ará bá báken mai kéká pinté ída  
mana ano ma yaká ein dana san  
tiyáken ma seja sina ino sen mifo  
minó dana ma mana mana ano ma  
yan baré ein danasinta mai minó  
avaríen oreraen mino. <sup>33</sup> Máan  
tiyan kákán ákonafó Aposeri kéká  
ano Yisasi ma fúaren orun man-  
takhein baya vanasi siamen or-  
era iyákan Tiyarafenu ano mai  
nanin banta van anunu iyáken  
betí ankan moékentá avábá uan-  
ten mino. <sup>34</sup> \*Máan tíkan betí  
ankan aúbaná ída mana nanin  
banta ano ona varafi yunan narafi  
o afasí ukharen mino. Máan  
tukhen kokhon bara fi ma safi  
ma yaká ein minó sarí uriyan  
moní máden mai moní baren <sup>35</sup> me  
aposeri kayo amíkan mai moní  
daíden i ma vain kéká amiyaren  
mino.

<sup>36</sup> Máan tiyákan Saiprasíke mana  
Rivai ánon banta Yosepin ne ma  
siyain banta aposeri kayo ano ena  
ví Banabasi ne siran baren mino.  
Banabasin bí maen mai veni ana  
Ará Ákona Uantan Anin ne ma  
siyain baya vá manaí ukhen mino.  
<sup>37</sup> Mai vanta ano vei vara sarí uren  
mai ráke moní baren Aposeri kayo  
mo amen mino.

## 5

*Ananiasin Nú Safairan Núi Vaya  
Ino*

<sup>1</sup> Mana Ananiasin ne sin banta  
vá be aná Safairan ne sin má  
baren békoni manáa vara sarí  
uran mana vanta ano miyaníen  
mino. <sup>2</sup> \*Miyaní uran mai vara  
ráke moní be aná ano afovai  
ukhan daíden manáa veyan aúpá  
kaúden manáa ana varen aposeri  
kayo mo makáden tiamen mai  
máa moní i varé uno siren amen  
mino. <sup>3</sup> \*Amíkan Pita máa semí,  
“Ananiasi oe, fara é tire e aú ona  
yire nan Ban Anon mano en aúpin

\* 4:28:

Apo 2:23 \* 4:29: Efe 6:19 \* 4:32:

Apo 2:45

\* 5:3: Yon 13:2

bíkaya Kantá Aunan mákádeya mai vara ráké ma vareóna moní manáá aúpá kae fono. <sup>4</sup> Ídá afová ukhen nan ná mai vara ma ída sarí ukhen nan en nina varéin ná mai vara miyaní urá moní bare fono. Mai moní eninaí uvi ompo e anunu ánaín bákureya ída amenté uno sinona van Ti-yarafenu amenté uno ma sireya náiná anó éin mai inin amiyá mai avúavá bare fono. Tetin na máka sisinte va ompo Tiyarafenu máka siante ono.”

<sup>5</sup> Máa síkan Ananiasi mai vaya iniyáken eraven barara ankamiyan esé ana fúbíkan banasi ano Ananiasin amaniná ma yáko ein baya iniren moéken akhokho van en mino. <sup>6</sup> Máan tuvíkan pumara vanta kayo ano mai vanta e maman davaráefin úkuren baren mo masien mino.

<sup>7</sup> Masí uran kanú manaú áau orivíkan Ananiasin amaniná ma yáko ein daná be aná ano ída afován mápin un peren mino.

<sup>8</sup> Unóbíkan Pita véin inaemí, “Éi sisimeno mai máa monisá tirei vara ráke vare fono,” síkan mai nanin mano siyáken, “Eyo, mai máa moní i varé uno.”

<sup>9</sup> Máa síkan Pita véin tiamemí, “Pará tiré kanan baya sian damureya Bafani Kantá Aunan máka sentá fono. Onano, en avafun ma masí ein kayo onará édiyain mai kéká ano éin má daiyóen orinten mino.”

<sup>10</sup> Máa siyain má anan Pitan arantampin mai nanin eraven ankamen púbíkan mairá pumara vanta dun onan mai nanin púkeimpin mairá béin daiyó en oren be avafun ma masí ukharé ein áde mo masien mino. <sup>11</sup> Masí urákan monópin ma vain nanin banta vá ena nanin banta kayo vá ano mai vaya ma iniyáken moéken akhokho van en mino.

*Aposeri Kéká Ano Kokhon Nanin Banta Ma Ayofein Baya Ino*

\* 5:12: Apo 2:43; 14:3 \* 5:19: Apo 12:7-10

<sup>12</sup> \*Aposeri kéká ano kokhon enará ukhein ákona vá aní danasinta vá banasi aúban uvariyákan maen Bafantá ma mumunan iyain nanin banta ano ará manafiní uren o éken Soromonini Yuséká átaruen mino. <sup>13</sup> Átaru iyan mai kéká ano féden ída vetin má e átaru iyaren mifo mai kékápin ma ída vain nanin banta anon betin aví daní iyaren mino. <sup>14</sup> Máan tiyákan kokhon nanin banta ano Bafantá mumunan iyan beni kékápin me asotú asotú en maman kokhonén mino. <sup>15</sup> Máan ma iyain anarái Pitan aman ma oriyain aa akhempá banasi ano aí nanin banta aviren mo yóki uvíden kaiyan inká manáá kúkútáfin kaiyaren mino. <sup>16</sup> Máan tiyákan Yerusaremí baru áde ma vain barufin páké ano yere aposeri kayo e oniyáken aí nanin banta vá inká namu aunan ma fákakhein kéká bá aviren eríkan mai nanin banta ayofen mino.

*Namuro Kayo Ano Ma Aposeri Kéká Namu Uantein Baya Ino*

<sup>17</sup> Monó ánon banta kékái ánon banta vá bei kéká ma Sadyusifin bain kayo vá ano ma mai avúavá oniyáken aposeri kayo ará namu uantáden mino. <sup>18</sup> Namu uantáden betí ankan e mantén aposeri kayo fákaren aviren banasi ma karavusií iyain namun mo karavusién mino. <sup>19</sup> \*Máan turan mai inurán mana Bafani enisorí ano minó ona yiren betí ankan aviren barufá morúden máa semí, <sup>20</sup> “Tiretí ankan monó dafufin o mantave auyen aunani vaya minó tiamesin ná banasi ano inino.”

<sup>21</sup> Máa síkan aposeri kayo ano mai vaya iniren pe ákurá e mantén oren monó namun dafufin o váken araíen mai vaya sian afava amiyaren mino.

Máan tiyákan mairá monó ánon banta kékái ánon banta vá bei kéká bá Isarerii yafisin

kayoi ánon banta kéká bá aran e átaru uven mai aposeri kayo aviren betí baintá erino van karavusi namumpin bayá yan oren mino.<sup>22</sup> Piripo kayo ma siantan oriyan o onákán mai karavusi namun ída aposeri kayo vaimpin evaránen oren mo mai ánon banta kayo siamemí,<sup>23</sup> Tetí oriyá o onékun karavusi namunte ona fara ákonáen munkukhan onará ma yafisin banta kayo fara mantakhá ma ona ma yiré maifin ma onékun ída mana vanta maifin baren mino.”<sup>24</sup> Máa síkan kákán monó namuntá ma yafisin kayoi ánon banta vá monó ánon banta kayo vá ano ma mai vaya iniren kokhon ineine en amino iyáken máa semí, “Náiná sá afoká inten nafino.”

<sup>25</sup> Máa sen iniyákan mana vanta ano enóben betí ankan tiameví, “Orive onano, mai ma karavusifin kaeona kéká masina kákán monó namun dafufin o váken banasi iyanuan kaúden mai vaya siamín iniyán mino.”<sup>26</sup> Máa síkan kákán monó namuntá ma yafisin kayoi ánon banta vá piripo kayo vá ano oren aposeri kayo o aviren eren mifo vanasi ano onámaná ankamin nain nan péden betí ankan amaniná ída mana yaná avúávasiéen mino.

### *Aposeri Kayo Ano Ma Ti-yarafenui Vaya Anan Dakhafó Tifanté Uno Sein Baya Ino*

<sup>27</sup> Dafisin banta kayoi ánon banta kéká ano aposeri kayo ina ino van piripo kayo ano vetin aviren me kaúdákán monó ánon banta kékái ánon banta ano máa sen inaemí,<sup>28</sup> \*“Teti ma saretí ankan tiame ída uron ná mai vanta aviká monó bayá vanasi siameno siré airo ananí uanteruna ifo fará tiretí mai vaya vanasi siamiyan nan Yerusalemí ma vain nanin banta ano mai vaya inen

orera iyákayá inká tetin nan mai vanta aruan pure ono sireyá tetin tu finté iya fono.”

<sup>29</sup> \*Máa síkan Pita má ena vaya varen orin banta kayo vá ano evaránen betí ankan tiameví, “Tetí Ti-yarafenui vaya anan dakhafó sifanté umpo varará nanin bantai vaya ída yakhafó tifanté uno.”<sup>30</sup> Tiretí ankan manon Yisasin daa unkamádantá aruan púden nan mi setisi sináuyani Ayarafenu ano véin purin pintena evaránen avíán mantakhen mino.<sup>31</sup> \*Béi anón tetinti aa aní ureñ evaránen tiviran bánta vákán Ti-yarafenu ano véin aviren inarufá mun bei ayan kurompá kain dan bain kin aniní ukhein tetí Isarerí nanin banta siyaintí maé tirá baeré tifé kun tetinti ume ampisintanten mino.<sup>32</sup> Tetí ankan mai yanásinta ódákéi mai vaya sian dákó iyá tifé kun inká Ti-yarafenu oo ma yaiyein kékái Kantá Aunan amíkhán mai aunan mano yere sian dákó iyan mino.

### *Kanisori Vanta Kamarieri Ano Ma Aposeri Kayo Van Bempáké Bano Sein Baya Ino*

<sup>33</sup> Máa síkan Kanisori kayo ano mai vaya iniren kákantá aran nan iyáken betin aruan purono van en mino.<sup>34</sup> Aruan purono van iyákan mai yafisin banta kayoi ánon banta kéká pinté mana Fara-sisi vanta véin aví Kamarierin ne sin man bayá afová ukhan ma vanasi ano véin kákán bí amiyyain mano orun mantaven tiameví,

“Ma kéká tiantan manáa afará barufá orun bano.”<sup>35</sup> Máa sin betin aviren barufá aravuvíkan mairá Kamarieri orun mantaven Kanisori kayo siamemí, “Isarerí vanta kayo oe, mana yaná ma ma vanta kayo amaniná kaono sinte mae ovare me inireya vá mainá betí ankan amaniná kaono.<sup>36</sup> \*Afováí ukharono. Ída ayá

\* 5:28: Mat 27:25    \* 5:29: Apo 4:19    \* 5:31: Apo 2:33-34; Efe 1:20; Ibu 2:10; 12:2    \* 5:36: Apo 21:38

damú oriyan mino. Teudasi ano e mantaaren temí, ‘Téi vafan bá kun ten tiví bain banta uno,’ sikan ádé anantá kami kami antareti (400) nanin banta ano véin dakafiyareín maen kamani ano véin aruan púdán bentá ma mumunan iyá ein kayo me ifá en orera íkan beni yoran mo savifa afe ein mino.<sup>37</sup> Ben oyampáké kamani ano ma vanasi aví baran damú Kariri fáke Yudasín ne sín banta ano e manten banasii in-eine maman asuse en kamanin aré tavono van íkan béin má aruan púdán ben ma vakuren noré ein kéká ano me onen karan orera ein mino.<sup>38</sup> Máo tukhein nan mi sireti ankan tiamiyá uno. Ma varará bantai ineinerá ma yori-yaren mai yoran mo asuse inten mifo ída vá mana yaná betin amaniná kaiya ampiantesin ná orino.<sup>39</sup> Tiyarafenu ano ma mai ineine yákó ukhá inti mae máon tiya véin má namuroí inambo ída vá mai yoran are ono.”

<sup>40</sup> \*Máa sikan Kanisori kayo ano Kamarierini vaya iniren baya varen orin banta kayo aran erikan dafiyó ankáden Yisasini vaya siamen non nan airó ananí uantáden ampiantan oren mino.

<sup>41</sup> \*Beti ma Yisasin avíká uman baren ayave o yosin ma Tiyarafenu ano vetin nan kama nanin banta ino ma sein nan mi vaya varen orin banta kéká ano yafisin banta kayoi ánon banta kéká me ampireni oriyáken amusin en mino.<sup>42</sup> Amusin ureni Yisasi ma vanasi evaránen avíkein mai kama vaya ída me ampinton ena ena yamú kákán monó dafu kayofin má mana mana namumpin má orera uven tiamiyaren mino.

## 6

*Dan Manápá Ifo Afápá Kan Un  
Kádan Monó Doran Ayain Banta*

### *Ma Aní Ein Baya Ino*

<sup>1</sup>\*Maí damú eyo iyampon kayo ma mo kokhoní iyan maen mai aúbanáké Kiriki vaya ma siyain Yutan kayo ano Aramaiki vaya ma siyain Yutan kéká anan uanten máa semí, “Minó damú tiretí varé nanin kayo anan ayaiya ompo setisi varé nanin kayo ída ayaiya ono.”<sup>2</sup> Máa siyaimpin tiyan míkan mifo sirantan kan orun kádan (12) eyo iyampon kayo ano ena eyo iyampon kayo minó iyanuan kaúden máa semí, “Dunan amin naro sire ma Tiyarafenu vaya mo siamin doran ma me ampin ída kama ukhen mino.”<sup>3</sup> Máo tukhen mifo sifá tiváeyan noe, siretin aúbaná intéa anó banasi avorá kama ví bákán ná Kantá Aunán mano aúpin bíkakhaná kama afova van nafi mai finté vá dan manápá ifo afápá kan un kádan banta aviádesin ná mai yorantá betí ankan dafisino.<sup>4</sup> Dafisiyantí maé teti minó damú timúkiyáké Tiyarafenu vaya siamiyá banasi aya ó tifanté uno.”

<sup>5</sup> Banasi ano mai ma aposeri kayo ano ma sein baya van amusin ureni mairá ákona mumunan iyan ma Kantá Aunán mano víkakhein banta Stivenin maman kaiyan Firipi má Prokorusin má Níkgnorin má Timonin má Pamenasin má Antióki banta Nikorasin má avían kaen mino. Nikorasi ída Yutan kéká pintena vanta ifo bái ena anan bantan báken Yutan kayoi monó dakhafiyán mino.<sup>6</sup> Máo turen mai vanta kéká avían aposeri kayo vaintá me kaúden mai yorari ino van ayan ánontá kaúden avu uanten mino.

<sup>7</sup>\*Máo turan Tiyarafenu vaya ano minó barufá orera íkan Yerusalemiké kokhon nanin banta kayo ano aú baéden Yisasini eyo iyampon kayoí iyákan inká kokhon monó ánon banta kayo vá

\* 5:40: Apo 4:18    \* 5:41: Mat 5:10-12; 1Pi 4:13    \* 6:1: Apo 4:35    \* 6:7: Apo 2:41; 16:5

dere ano Tiyarafenui vaya iniren mumunan en mino.

*Isarerii Ánon Banta Kayo Ano  
Ma Stiveni O Fákein Baya Ino*

<sup>8</sup> Tiyarafenui sarisari vá ákona vá ano Stivenimpin bíkavín banasi áúbaná enará ukhein aní danasinta uvariyyaren mino. <sup>9</sup> Máan tiyákan Yutan kayoi Monó Ano Ma E Anunurasá Bano ma sikhain monópin ma Sairiní baru vá Areksandriá baru vá inká Sirisia bara vá Esiá bara vápinté ma e varéein Yutan kéká ano mai vayará araíen Stivenin má asiven mino. <sup>10</sup>\*Máa siyan maen Kantá Aunan mano Stivenin kama afava amiyan ma siyain baya mai kéká ano ída kanaíen ankaman durafurin nainiéen mino.

<sup>11</sup> Máan tiyaimpin mai setí inékun Mosesin má Tiyarafenu vái ankayan tiyan mino sino van mai kéká ano aúpáké ena vanta kayo mo arápinén mino.

<sup>12</sup> Mai avúqvasí o senten basni vá monó ánon banta kayo vá man baya ma afava amin kayo vá arápiní uren Stivenin o fáken Kanisori kéká baintá mo khaen mino. <sup>13</sup> Mo khaúden béin aufin manáa kampun baya sino van manáa vanta kayo síkan mai kéká ano máa semí, “Minó damú inétfékuñ ma vanta ano Tiyarafenui kantísi ukhein baru vá beni man baya vá ankayan tiyaren mino. <sup>14</sup> Máan tiyáken inká Nasaretiķe vanta Yisasi ano kasaen monó namun ankaman mágaren inká Mosesi ma setin timikhá ein avúavá do maman karúdanten mino siyáká iniyaré tiféuno.”

<sup>15</sup> Máa siyan mai ma Kanisori namun ma varé ein kayo ano Stivenin purefure en oniyan maen ben auná ano enisorí auná ma fanu seiniéen mino.

## 7

*Stiveni Ma Kanisori Kayo  
Manáa Vaya Siamein Baya Ino*

<sup>1</sup> Máan turan mairá monó ánon banta kéká ánon banta ano Stivenin inaemí, “Ma ma éin nan tiyain baya kayo mai furá tiyan nafino.”

<sup>2</sup>\*Máa síkan Stiveni evaránen temí, “Tifá tiváeyan má tifóeyan ma soe, saretí ankan ná ineno. Teti sinafu Abaraamu ma Mesopotemíá barafá ban ma Araní barufá ída orikhan maen inarufá ma minó ákona vain Tiyarafenu ano Abaraamu vaintá dákó en mino. <sup>3</sup> Dakó uven Tiyarafenu ano véin tiámémí, ‘E antun má ei vara vá ampireya séi ma aní onuna varafasá orono.’ Esé 12:1

<sup>4</sup>\*“Máa síkan Abaraamu Saridía vara me ampiren Arani varufá o varéin be afóe ma fúbíkan Tiyarafenu ano véin tiantan ma ma saréq vaóna vara e varen mino. <sup>5</sup>\*Máí damú Abaraamun ída manáa vara amikhan inká ída iyampon kaúkan maen Tiyarafenu ano siyáken, ‘Ma vara ínaimpáké e má en ana akhá bá amenté uno,’ sen iyántákan mino. <sup>6</sup>\*Tiyarafenu ano Abaraamun máa sen tiámémí, ‘En ana akhá ano ma ena varafá o soya ma vainí ukhantin kami kamí antareti (400) oranarái vetin uman amiyantin miyan ída van dorarí inten mino. <sup>7</sup>\*Máan tinten mifo mai ma ída miyan ban dorarí uantiyaré inona kéká téi uman amirékuñ maen ínaimpáké betí mai vara me ampiren ma varará e váken téintá monó tinten mino.’ Esé 15:13-14

<sup>8</sup>\*Máa siren mairá Tiyarafenu ano Abaraamun má ma kásen báken au ma kai pákena siamidán mairá Abaraamu ano Aisakin afóení uven béin kaúdan ma yan manápá ifo afápá kanú manaú damusí

\* **6:10:** Ruk 21:15 \* **7:2:** Esé 11:31; 12:1 \* **7:4:** Esé 11:31; 12:5 \* **7:5:** Esé 12:7; 15:18;  
17:8 \* **7:6:** Esé 15:13-14; Eks 12:40 \* **7:7:** Eks 3:12 \* **7:8:** Esé 17:9-14; 21:4

ma iyan maen bén au kharan ínaimpáké Aisaki ano Yekopun kaúdan inka Yekopu ano siyan míkan mifo sirantan kan orun kákan (12) banta setin tináuyan kaen mino.

<sup>9</sup>\*“Kaúdan mai sináuyan mano Yosepin ará namu uantáden avían ena kékápin mo sarí uran bén miyaní uren aviren Isipi morun kain baren mifo Tiyarafenu véin má báken<sup>10</sup>\*beni uman kayo aya iyaren mino. Aya iyan Yosepi ma Isipíké Kin Fero má ma vaya siyákan Tiyarafenu véin kama afova amiyan kin mano véin nan moéken anunu uren mai van mi kin mano véin maman kamaniní urákan Isipi daffaren ben amáká dafisen mino.

<sup>11</sup>\*“Dafikaréin ínaimpáké Isipi vá Kenani yái varafin kákán anan eríkan kákán uman baren tetin tináuyan mano arafan nan ída kanaíen dunan doseren en mino.<sup>12</sup> Mai umampin ban maen Yekopu iníkan Isipi dunan ban ne siyain baya inirene tetin tináuyan tiantan ída aravin téké araien araven mino.<sup>13</sup>\*Aravukharen ma evaránen kan dádasi en Isipi aravíkan mairái Yosepi veyan maman páman en be afá aváeyan tiámemí, ‘Téi Yosepi uno,’ ma siyain baya ínaimpá kin mano afová en be antun mi varéin mino sen mino.<sup>14</sup>\*Mai oyampáké Yosepi ma siantan be afóe Yekopun má bei kéká minó ma o aviren erein mai seventi-faipi (75) nanin banta ino.<sup>15</sup>\*Yekopu ma Isipi orun baren ínaimpáké béis fúbin inká setin tináuyan má dere furen mino.<sup>16</sup>\*Púbíkan ínaimpáké mai kéká daiyó en evaránen Sekemú barufá ma gefá Abaraamu ano manáa monipó Amorin akhafana finte miyaní

ukhá ein barafin ma varé ein masípin mo masiéen mino.

<sup>17</sup>\*Kokhon orana oriyan maen Tiyarafenu ano ma gefá Abaraamun tiamen éin avu onté uno ma sikhá ein damú ádesí iyákan Isarerí nanin banta ma Isipi baré ein mano mo ampan kauren kokhonien mino.<sup>18</sup>Máan tiyákan Yosepin ída afová ukhein banta ano Isipí kinien mino.<sup>19</sup>Mai kin mano setisi kéká bá tináuyan má máká maáká en namu uantáden aase ma kaúdan iyampon arará kayo vá arin purino siren betin duvunin baren mo karúden mino.

<sup>20</sup>\*Maí damú ana Mosesin ma ve anóe ano kaúden onan Tiýarafenuí avorá avorú iyampon baimpin be anóe afóe ano kanú manaú biyontá mápin aúpá dafisiyaren mino.<sup>21</sup>\*Dafisiyaren bén ma avían barufá kaúdan maen kin arauñ mano véin aviren mo ve akhasí uran baren mino.<sup>22</sup>Báken maen Mosesi ano Isipi kayoi kama afova variyáken e anonien baya vantaí iyan ákoná yoraréen mino.

<sup>23</sup>\*Máan ten oriyan ma Mosesi e anonien foti (40) oranaí ma iyáken mairá be afá aváeyan Isarerí kéká o onano van en mino.<sup>24</sup>\*Ineine uren oriyan o onákan mana Isipi vanta ano Isarerí vanta aruren namu uantiyá íkan mai anonafä mai vanta mo ayaen Isipi vanta aruádon puren mino.<sup>25</sup>Mosesi ma inikhá ein Tiyarafenu anontiantan tetin me siya iyan mino sen bei kéká ano ovaren me ininten mino sen mifo yetí ída afová ukharen mino.<sup>26</sup>Máan turákaren ena ákurá Mosesi oriyan o onákan Isarerí vantá kan mano aruviyaréin béis mo yódá iyáken temí, ‘Tire anavasan mompo fará tirékan aruvianta fono.’

<sup>27</sup>\*Máa síkan mifo mai aruvín ma arai uren ena vanta vá aruviyá

\* 7:9: 37:11, 28; 39:2, 21-23 \* 7:10: Esé 41:37-44 \* 7:11: Esé 41:54; 42:1-2 \* 7:13: Esé 45:1-4, 16 \* 7:14: Esé 45:9-11; 46:27 \* 7:15: Esé 46:1-7; 49:33 \* 7:16: Esé 23:2-20; 33:19; Yos 24:32 \* 7:17: Eks 1:7-8 \* 7:19: Eks 1:11-22 \* 7:20: Eks 2:2 \* 7:21: Eks 2:3-10 \* 7:24: Eks 2:11-15

ein banta ano Mosesin do ékiyáken máa semí, 'Iye ano éin nan ánon bantaí ukheya setin daimono sikhaya fono.' <sup>28</sup> Éi ma inuran ma mana Isipi vanta ma aruan pureonaí eyá téin tiruan purono vara fono.' <sup>29</sup> \*Máa síkan mairá Mosesi mai vaya inirene onen karan Midianí barafá o soya vanta an dakhen baren maifá anasi mamáken kankanan afon iyampon kaen mino. <sup>30</sup> \*Kaúden baréin foti (40) orana esantari íkan banta i van kámá barafá Sainaí anuyon ádé o varé íkan mana enisori ano ira khiyain daa finté uaren Mosesi vaintá dákó en mino. <sup>31</sup> Mai ira ma khiyan Mosesi ódaren kokhon ineine iyáken mai ma yáko iyain daná onano van ádé oriven iníkan Bafan amen avaya ano máa semí, <sup>32</sup> 'Téi en afóeyan ma vain Abaraamu Aisaki Yekopuni Ayarafenu uno,' ma síkan Mosesin akhokhofen avinantant diyaimpin ída mo onen mino. <sup>33</sup> Máan tiyaimpin Bafan mano véin tiamemí, 'Mai ma éi mantakhaona vara mai kantasí ukhein bara yontá ifo ei arantan anamun ná do ayufono. <sup>34</sup> Intéa uman ná tenti vanasi ma Isipí bain amaniná kaiyan nafi inka séi ódaré vetí ifi inéi mai umanpinte utúantano sirei eré umpo varéa erikhesirá éin tiantéku evaránen Isipisá orono.'

<sup>35</sup> \*'Mai ma vetí ankan Mosesi nan tiyáken, 'Iye anó éi nan tetintasá dafisiyáke vá daimono sirákaya fono' siren ma veni vaya ída inen do ékein mai Tiyarafenu anon daa ana ma ira khiyain pinté béin nan ore vá betí yafisiní ukhe mai uman pinte utúde vá avirano siren tiantéin mino. <sup>36</sup> \*Mosesi ano Isipíke yo iyanen oriýáken maen Isipi varafin má Nare Non má inká foti (40) oranará banta i van kámá barafá bái enará ukhein

ákona vá aní danasinta vá uvaren dararen ukharen mino.

<sup>37</sup> "Mai Mosesi anon Isarerin nanin banta máa sen tiamic'haren mino. 'Tiyarafenu ano sen ma erunaí ukhein mana sakhanampa vanta eni vanasi aúbanáke siantékun orinten mino,' sen tiamic'haren mino. *Diu 18:15*

<sup>38</sup> \*'Béi anon banta ída van kámá barafá banasi iyukhein aúbaná tetin tifóeyan má báken Sainaí anuyompin óden enisori vá un bákán Tiyarafenui aun bain baya siamic'harein taréa setimpin e van mino.

<sup>39</sup> "Tiamíkan mifo setin tináuyan mano veni vaya átakharé en oyan amiren betin ma iniyá ein pura sen evaránen Isipí orono van mi inikharen mino. <sup>40</sup> \*Mai kéká ano Eronin tiameemí, 'Mai ma Isipíke setin tivirene erein Mosesin amaniná nái yanasá dákó ukhen nafi seti ída afová ukhétifé umpo éi ena ayarafenu kayo uvádesin ná tetin tufá oriyan aa aníen tivirene orintisá orono.' <sup>41</sup> \*Máa siren maí damú anan arará burumakaó aman manon uváden betiyantá ma ayampóké uvarein danáká íkun uan amiyan amusin en maináká monosí uanten mino. <sup>42</sup> Máan tiyaimpin Tiyarafenu ano vetí ankan me oyan amiran maen ayontá ma vain danasintará betí araíen monó tianten mino. Máan ma ein manon sakhanampa vanta kéká ano ma vompon uvamádan baré einén mino.

"Isareri nanin banta kayo oe, foti (40) oranará ma vanta ída van kámá barafá ma váke íkun uan amiýá eona yanasinta mai séin ná bare me susu sisintiyare rafono.

<sup>43</sup> Mai ma yavarée fóké ma uvaran namun ma kampun ayarafenu Moreki nina ma vare nóke ma

\* **7:29:** Eks 2:21-22; 18:3-4    \* **7:30:** Eks 3:1-10    \* **7:35:** Eks 2:14    \* **7:36:** Eks 7:3; 14:21;  
Nam 14:33    \* **7:38:** Eks 19:3    \* **7:40:** Eks 32:1    \* **7:41:** Eks 32:2-6

inká tiretí ayampó ma uvaran kampun ayarafenu Re-fanini ofun amantá ma monosí uantiyaóna

mai van mi séi siretin tiantéku mae Babironi esante enai varafá o soya ma vainí ukhe van nono.’ *Amo 5:25-27*

<sup>44</sup> “Tiyarafenu ano ma Mosesin tiámiden béin aníñ onein mai avúaváká ten mi yavaráe fóké Tiyarafenui má uváden maifin Tiyarafenu ano vetin má manafin ban baya kaúdan mi setin tináuyan mano vanta ída van kámá barafá baren noren mino. <sup>45</sup> \*Mai ma yavaráe fóké uvaran namun ma setin tifóeyan amin mamaren maen mai vá baren Yosua má enai vara varano siren oríkan Tiyarafenu ano vetin avorá mai kéká aren tain orivin mai namun mo khain mai varafá para van oriyan Devitini yamú mo kanaén mino. <sup>46</sup> \*Tiyarafenu ano Devitin kama uantan béis amusin uaren Yekopuni Ayarafenu ma van náin namun uvarano siren béis inaúan inen mino. <sup>47</sup> \*Máa sen inaen mifo Soromoni anoi véin amá uvaren mino.

<sup>48</sup> “Máa ten mifo vanta fóké ma uvaran namumpin Dan Bain Tiyarafenu ano ída vákan sakhanampa vanta ano sikhen mino.

<sup>49</sup> “Bafan mano siyáken inarufái senti kini kumanin kará bákán  
bararái se sirantan kain baru van mifo  
sireti inté ukhein namun ná tentina uvarantó iyákeyá inká  
intefasá tenti sivíkan baru vanten nafino.

<sup>50</sup> Téin tiyan mano mai ída minó danasinta uvante rafuno.’ *Ais 66:1-2*

<sup>51</sup> \*“Tiretí ankan monó baya átakharéin nanin banta ma vainí

ukheya ída vaya iniyáke Tiyarafenu ída ará amiya ono. Tiretí afóeyan ma iyare einí eya minó damú Kantá Aunan mano ma siamiyain baya átakharé iya ono.

<sup>52</sup> \*Intéa sakhanampa vantá tiretí afóeyan mano fefá betin amaniná ída uman amikharen nafino. Mai ma Funtákein Avúavá Baran Banta erinten ne sen tian dákó iyaré ein banta kéká inan aruan púkaré íkan mai vanta ma yákói mae sareá sireti anon avían namuro ayampin amen nan bén aruan puren mino. <sup>53</sup> Tireti anan Tiyarafenui man baya enisori kayo finté vareona ifo mai ánain ída yakhafe ono.”

### *Stivenin Ma Onámaná Anamein Baya Ino*

<sup>54</sup> Máa síkan mai yafisin banta kayoi ánon banta kéká ano Stivenini vaya ma inirena maen bén nan aranan iyáken avayanan uanten mino. <sup>55</sup> \*Máa uantiyákan Kantá Aunan mano Stivenin aúpín bíkávin inarufá mun onan Tiyarafenui kakhan má Yisasi véin ayan kurompá mantakharen mino. <sup>56</sup> \*Mantakhan béis máa semí, “Inaru ona yíví téi oniyá umpo onano. Vanta Anin mano Tiyarafenui ayan kurompá mantakhen mino.”

<sup>57</sup> Máa siyain má betíi atarentá iyáden avádoden bádiyáken Stiveni vaintá tavaen oren mino.

<sup>58</sup> Oren béis e yarifen kákán baru akhempá morun kaúden aráien onámanápó ankamiyáken mai ma esé aráien bén au finté ma iyá ein kéká ano vetíi ayá buí dana ayúariyan Sorin ne sin pumara arantampin kaen mino.

<sup>59</sup> Stivenin ma onámanápó ankamiyán maen béis máa sen amukémí, “Bafan Yisasi oe, séin taunañ barano.” <sup>60</sup> \*Máa siren aron kan daféden oovariýáken

\* 7:45: Yos 3:14-17 \* 7:46: 2Sa 7:1-16 \* 7:47: 1Ki 6:1-38 \* 7:51: Ais 63:10 \* 7:52: Mat 23:31 \* 7:55: Íbo 110:1 \* 7:56: Kor 3:1 \* 7:60: Ruk 23:34

temí, "Bafan noe, vetí ankani ume vá ampiantano." Máa siren aun ma vareinién puren mino.

## 8

<sup>1</sup> Sorin avorái Stivenin ma arin puriyan óden kana ino sen mino.

*Yisasintá Ma Mumunan Iyain Kayo Ma Namu Uantein Baya Ino*

Stivenin ma aruan purein táké araí uren mumunan nanin banta namu uanten inká monó ma siyain kayo ma Yerusaremí baré ein máden asuse iyaimpin monó nanin banta kayo me onen karan oreraen Yudiá barafa safi inka Sameriá barafa safi oriyákan aposeri kayo ano Yerusaremí pa varen mino. <sup>2</sup> Tiyarafenu oo yaiyin banta kayo ano Stivenin daiyen mo masí uren kákantá kuniéen mino. <sup>3</sup>\*Máan ten mifo Sori ano monó nanin banta máden asuse iyáken mápin peren kuven iyan banta vá anasi vá do yarifen karavusifin mo khaen mino.

*Firipi Ma Mo Sameriá O Varé Ein Baya Ino*

<sup>4</sup> Máan tiyan ma karan orera ein kéká ano mai ma karan oreípa mo monó baya siamen mino. <sup>5</sup> Máan tiyákan Sameriá akhempá mana varurá Firipi mo Tiyarafenu ano ma aní ukhein bantai vaya vanasi siamen mino. <sup>6</sup> Tiamiyákan kokhon nanin banta ano Firipin avaya iniyáken inká be ma enará ukhein avúavá ma yákó iyain oniyan maen ádé oriven kamaen inen mino. <sup>7</sup> Iniyákan Firipi ano kokhon namu aunan ma varé ein nanin banta aú pinte yo siantiyákan mai namu aunan kayo ano vádiyán orera iyan inká ai ayan ma fúkein kayofi arantan ma namu ukhein kayofi ayofiyákan banasi ano onen mino. <sup>8</sup> Máan tiyákan mai van mai varufin kákan amusin en mino.

*Uvátakhan Banta Saimonini Vaya Ino*

<sup>9</sup> Máan tiyan Saimonin ne sin mana uvátakhan banta mai varurá bákan Sameriá akhempá ma varé ein nanin banta ano véin nan takha iyan maen béisí siyáken, "Téi kákan banta uno," siyaren mino. <sup>10</sup> Máa siyan minó ona vain má ída ona vain má ano veni vaya inireñ béisí amo siyan temí, "Moéken enarasí ukhein ákona e ma siyain ma vantafin ban mino." <sup>11</sup> Máan tiyan pefái veni uvátakhan nan takhaen eriyaren mai van béisí ánaín mana yakhafen mino. <sup>12</sup> Máan tiyaréin ma Firipi ano Tiyarafenu kama yafisin baya vá inka Yisas Karaisin aví bá ma siamin iniyáken mai vayará mumunan uren minó nanin banta ano non baren mino. <sup>13</sup> Máan tiyan Saimoni veyan má mumunan uren monó non péden Firipin dakhafen nóken enará ukhein ákona vá aní daná bá ma uvariyarin oniyáken takhaen mino.

<sup>14</sup> Máan tiyákan baya varen orin banta kayo ma Yerusaremí ma varé ein mano iníkan Sameriá barafá ma vain nanin banta ano inka Tiyarafenu vaya inireñ mumunan iyané siyaimpin Pita nú Yonin nú tiantan maifá oren mino. <sup>15</sup> Békanan Sameriá ma orivin maen mai kéká ano Kantá Aunán barano van Tiyarafenu vaípá amúken mino. <sup>16</sup> Para va ino Bafan Yisasin avíká anan monó non péden mana ano ída Kantá Aunán mantaréin mino. <sup>17</sup>\*Máan turen Pita nú Yonin nú ano vetin árontá ayan kaíkan Kantá Aunán baren mino.

<sup>18-19</sup> Aposeri kan mano ma ayan árontá kain Kantá Aunán bariyain Saimoni ódaren moní baren betin me amiyan temí, "Téin dere mai ákona simikhesirá tiyan ma árontá kaonuna nanin

\* **8:3:** Apo 9:1, 13; 22:4; 26:9-11    \* **8:17:** Apo 19:6

banta ano kanaíen Kantá Aunan barano.”

<sup>20</sup> Máa síkan Pita ano Saimonin tiamemí, “Ei moní bá en masá purase o aiyorano. Para vara seyo, Tiyarafenu ano ma vei sarisarifó para amiyain ákona monípó miyaní onté unon te ine ono. <sup>21</sup> Tiyarafenui yorampin eni afokhan ída vanten mino. Para vara seyo, ven avorá en ará ída funtáken mino, <sup>22</sup> Máan tukhen mifo ará baéde Bafan Tiyarafenurá amúkesin ná e aupín ma namu avúavá inin ma ineona ume vá ampiantano. <sup>23</sup> Téi farava máa siya rauno. Éin ma oniyaruna Tiyarafenui ákona varano van moéke anunu e nan mai ano éin aviáda umei unampin báe ono.”

<sup>24</sup> Máa síkan Saimoni evaránen békakan tiamemí, “Bafan baipásá amúkusintesin ná mai ma sen timaniná dákó ino seona yaná ída vá dákó ino.”

<sup>25</sup> Pita nú Yonin nú ano ma Bafani vaya siamiyáken beni ana vaya maman dákó uren Yerusaremí evaránen oriyáken Sameriá akhempá ma vain baru kayo fimpá kama vaya e siamen oren mino.

### *Firipin Má Itiopiá Banta Vái Vaya Ino*

<sup>26</sup> Maí damú Bafani enisorí ano Firipin máa sen tiamemí, “E mante sautí aravuve vá mai ma Yerusaremíké kámá barafá aravuaren ma Khasá oriyain aintá o muntave vá aravono.” <sup>27-28</sup> Máa síkan Firipi e manten mai aasá araviyaren mana Itiopiá bara fáke kákán banta vá o fóken mino. Béi maen Kandasin ne sin Itiopia kayoi kuinini moníká dafíkein doran banta\* váken Yerusaremí monóká erikharen bei karisifin kumamen evaránen bei varufá oriyáken mana sakhanampa vanta Aisaiyani vompon dóki finté yankafen oren mino. <sup>29</sup> Mai

vompon onen oriyákan Kantá Aunan mano Firipin tiamemí, “Mesan karisi vaintá oriveya mai adé orono.”

<sup>30</sup> Máa síkan Firipi savaen mai karisi adé oriven iníkan mai vanta ano sakhanampa vanta Aisaiyani vompon dóki finté yankafiyareín béin máa sen inaemí, “Mai ma yankafiyona vomponi ana afová ukhe fono.”

<sup>31</sup> Máa sen ina íkan mai vanta ano semí, “Ída ma mana vanta ano sisimintí intesá erá téi mai vayai ana afová onte rafuno.” Máa siren mai vanta ano Firipin aran mai karisifin ben má un kumanen mino.

<sup>32</sup> Mai ma kuinin ayain banta ano ma yankafiyá ein bompon mano máa mi sikhen mino, “Mana sipisipi arono van aviren orén má inká ayo yo khaono van aviren oren íkan ma ída vádeiní en be oo fáken mino.

<sup>33</sup> Béin maman bara ana kanti ana uren ída funtákein kó tiantáden ma vara ráke ven aunan do manteini ana akhá i vain pasen banasi ano ída o araren tinten mino.” *Ais 53:7-8*

<sup>34</sup> Mai vompon ma yankáden mai vanta ano Firipin inaemí, “Tisimeno, mai sakhanampa vanta ano ma sikhein beyan nará tikhen nafi áa ena vanta vará tikhen nafino.” <sup>35</sup> Máa sen ina íkan mai ma yankafein baya ana Firipi araíen tian dákó iyan inká kama vaya ma Yisasin nan tikhein nan tiamen mino.

<sup>36-37</sup> \*Békakan mai vaya e sen oriyán baren manáa non baintá oriven mai vanta ano siyáken, “Onano masi non eraviyan mifo fara vará téi ída monó non perante

\* **8:27-28:** Mai vanta avankan bíkein banta ino. Para va ino, vetí man baya ano siyáken kuinini yoran bantaí ma inona ano avankan ná do viseno sikhan mino. \* **8:36-37:** Apo 10:47

rafuno.”<sup>38</sup> MÁA siren mai vanta ano síkan mai ma oriyarein karisi ma fákaran Firipi má mai vanta vá nompin aravuven Firipi ano mai vanta monó non péanten mino. <sup>39</sup> Péantáden békaran non me ampiren aifá édákan Bafani Kantá Au-nan mano Firipin do aviren enafá orivin ída véin onen mifo mai vanta ano amusin en bei varufá oren mino. <sup>40</sup>\*Firipi maen intesá eipáke safi Asotusí barufin o afoká uven mai ráké araíen Yisasi-ni kama vaya minó baru kayofin e siamen oriyan baren Sisariá e unen mino.

## 9

### *Sori Ano Ma Vei Ará Baerein Baya Ino*

<sup>1</sup>\*Maí damú ana Sori ano Bafani eyo iyampon kayo aruan purono van pa sinko sen oriyáken <sup>2</sup>Damaskasí monó átaru namun kayofin mai intéa nanín banta anó Aa Ma Yakhafin Kéká\* banafi mai vetin páken Yerusalemí karavusifin mo kaono van Sori ano Damaskasí monó ánon banta kayoi ánon banta mo inaen mino. <sup>3</sup>Ina íkan eyo sin Sori oriyan baren Damaskasí áde oriyain má inaru fáké kakhan mano manádá béin panu sen eúkuáden mino. <sup>4</sup>MÁAN tiyain má Sori varará eraven ankamen iníkan mana oo va ano máa sen tiamemí, “Sori oe, Sori oe, nái ana vará tein namuroí usintiya fono.”

<sup>5</sup>MÁA síkan Sori inaemí, “Bafan noe, éi iye fono,” síkan béis evaránen temí, “Mai ma séin namuroí iyaona mai sei Yisasi uno. <sup>6</sup>MÁAN tiya ompo éi mantave kákán barufin ódesin maen inte yanásá barante fo mai mana vanta anon tiaminten mino.”

\* 8:36-37: Ínaiimpáke manáa vompompin ena vaya ves 37 fin asotú ukhen mino: MÁA síkan Firipi semí, “Éi ma e aúkáké mumunan iyante fara monó non baran nono,” síkan mai vanta ano evaránen béin tiamemí, “Yisasi Tiyarafenu Anin ma varará nanín banta evaránen aviran bantan bá bentá mumunan iyá uno.” \* 8:40: Apo 21:8 \* 9:1: Apo 8:3 \* 9:2: Aa Ma Yakhafin Kéká maen Yisasi ánaín bákuriyain kayo van tikhen mino. 19:9, 23; 22:4; 24:14, 22 fin ná dere onano. \* 9:15: Apo 26:2, 6; 27:24; Rom 1:5 \* 9:16: 2Ko 11:23-28

<sup>7</sup>MÁA sin maen Sorin má ma ori-yaré ein banta kéká ano vaya ída sinton mairá mantakhen mai vaya inen mifo mana vanta ída onen mino. <sup>8</sup>MÁA siran Sori varará bakharen orun mantaaren auu máben onákan auu sitípa ukhen ída mana yaná onarí iyaimpin ben má ma orikhá ein kéká ano ayan noren Damaskasí barufin ódeñ mino. <sup>9</sup>Moran maen kanú manaú damúi Sorin auu yufúkuvin báken mana yungan nafi non nafi ída niyan mino.

<sup>10</sup>Damaskasí barufin maen mana Ananiasin ne sin eyo iyampon baré íkan Bafan mano auu véden béin ariyan temí, “Ananiasi oe,” síkan béis evaránen temí, “Boe, Bafan noe,”

<sup>11</sup>síkan Bafan mano véin tiameemí, “Sori maen taréa sentá amúkiyan ban mifo vá Puntákein Aasá oriare Yudasín amá orive Tasusíke vanta Sorin nan muno se vá ina ono. <sup>12</sup>Béin auu vaédan Ananiasin ne sin banta ano véin árontá ayan mo kaíkan béin auu evaránen kama iyan onen mino.”

<sup>13</sup>MÁA síkan Ananiasi evaránen Bafan tiameemí, “Bafan noe, Yerusalemí ma eni mumunan nanín banta vain amaniná ma mai vanta ano ída funtákein avúavasí ma iyain nan kokhon manon ten orera iyá inikhé uno. <sup>14</sup>MÁAN tiyáken monó ánon banta vaípákena eyo sin ákona vompon amin mamaren entá ma monó tiyain kéká minó karavusi fákano van mará erikhen mino.”

<sup>15</sup>\*MÁA síkan Bafan mano siameemí, “Ena anan kéká bá betíi kin kayo vá inká Isarerí nanín banta vápin tenti monó baya varen orino van béin inka aní ukhé umpo vá orono. <sup>16</sup>\*Téin tínaín ma vákurin naintá béi intesá ená

uman baranten nafi mai véin aní onté uno.”

<sup>17</sup> Máa siran Ananiasi orein mano mai namumpin ódiven Sorin árontá mun ayan kaiyan temí, “Tifá tiváe Sori oe, mafá ereno van eriyáe nan ma ayanafá dákói ma oneona vanta, Bafan Yisasi ano éin nan evaránen auu máben onesin Kantá Aunan mano éimpin bíkanó van mi séin tisintá eré uno.” <sup>18</sup> Máa siyain má anan Sorin auufenté ataro ma yo siven eraveiní íkan evaránen auu máben oniyáken e mantén monó non peren mino. <sup>19</sup> Péden manáa yunan naren bei ákona evaránen mamaren Damaskasí ma varé ein eyo iyampon kayo vá manáa yamú baren mino.

### *Sori Ma Damaskasí Bá Yerusaremí Bá Ma Varé Ein Baya Ino*

<sup>20</sup> Ákona mamaren esé ana e mantén Yutan kayoi monó átaru namun kayofin oriven Yisasi Ti-yarafenu Anin mino sen araien monó baya siamen mino. <sup>21</sup>\*Máa síkan beni vaya ma inein nanin banta minó ayo anúden orera iyan máa sen inaemí, “Mai ma Yerusaremí ma Yisasini eyo iyampon kayo aruan puriyan karavusi fakaádaren ma inká maráke kayo vá dere karavusi fáke monó ánon banta kayoi monó ánon kéká baipá orono van ma erein banta fino.” <sup>22</sup>\*Máa siyan Sorini monó baya ano moéken ákona íkan Damaskasí ma varé ein Yutan kayo ano Yisasín nan Tiyarafenu ano ma aní ukhein banta ino sen afová ureñ akhokho van ída evaránen bén má manáa vaya sen mino.

### *Yutan Kayo Ano Ma Sorin Aruan Purono Van Iyain Baya Inireñ Ma Karan Orein Baya Ino*

<sup>23</sup> Máa sen kokhon damú oriyan maen manáa Yutan kayo ano Sorin aruan purono van aúpáké

baya sian damuáden mino. <sup>24</sup> Máa siren mai Yutan kayo ano Sorin aruan purono van mai varui yafu ona kayo ma vaintá ena ena vayan má inuran má daffán ákona iyain baya Sori inen mino.

<sup>25</sup>\*Máaón tiyákan ben ma vakuren noré ein kayo ano inuran pinté Sorin do aviren mo basketifin dan kumamin mairá anan damuren kafi ain pinté dan aravuaren me onen oren mino.

### *Sori Ma Yerusaremí O Varé Ein Baya Ino*

<sup>26</sup>\*Oren ma Yerusaremí oriven Yisasini eyo iyampon kayo vá o asotú uvé dorano van íkan betí ankan bén nan ída fura sen eyo iyamponí ukhen mino sen anomé iniyáken bén nan peren mino.

<sup>27</sup>\*Máaón tiyaimpin Banabasi ano Sorin aviren baya varen orin banta kayo vaintá moren Sori inté ená ayanafá oriyaren Bafan onaná bén baya siamidán inká bén inté ená Damaskasí barufin Yisasin aví ída feranton ná tian dákó ena fi, mai fákena vetin tiamen mino.

<sup>28</sup>Tiamidán Sori yetí ankan má báken Yerusaremí ída feranton Bafan avíká kasaen nóken banasi monó baya siamieren mino.

<sup>29</sup>Tiamen nókan Kiriki vaya ma siyain Yutan kayo ano véi má baya fóké asive asive iniyáken mai kéká ano véin aruan purin aa van dosiyaren mino.

<sup>30</sup>Máa siyain baya ma monópin bain afá aváeyan mano iniyáken bén do aviren Sisariá morúden tiantan Tasusí oren mino.

<sup>31</sup>Orivin mumunan nanin banta ma Yudia safi Karirifa safi inká Sameriá akhempa safi ma varé ein kéká Kantá Aunan mano mumunan ákona uantan kokhon mano vetímpin o asotú íkan amusin pinté kusen báken Bafan nan péan amiyaren mino.

\* 9:21: Apo 8:3 \* 9:22: Apo 18:28 \* 9:25: 2Ko 11:32-33 \* 9:26: Kar 1:17-19 \* 9:27:  
1Ko 9:1

*Ainiasin Nú Dokasin Núi Vaya  
Ino*

<sup>32</sup> Pita ma minó akhempá doren noren maen Ridá barurá ma mumunan nanin banta vain onano van oren mino. <sup>33</sup> O varen mai varu finté Ainiasin ne sin banta onákan dan manápá ifo kanú manaú oranará ai ayan púkan kúkútafin mana vakhen baren mino. <sup>34</sup> Baréin Pita yéin tiämémí, “Ainiasi oe, Tiyarafenu ano ma aní ukhein banta ano ayofen mifo mantave yuvasí dádá ono.” Máa siyain má ana Ainiasi orun manten mino. <sup>35</sup> Máan tíkan Ridá barurá ma varé ein nanin banta vá Seróni puntákein avafin ma varé ein nanin banta vá ano mai vanta amininá ma yákó ein daná ódaren betí ará baéden Bafan baipá eren mino.

*Tabita Ne Sin Nanin Ma Fükaren  
E Mantein Baya Ino*

<sup>36</sup> Máan tiyákan mana mumunan nanin Tabitan ne sin nan ma Kiriki vaya finté Dokasi ne siyain nanin mano Yopá barurá báken minó damú béis kama avúavá ana variyáken ona ma i van nanin banta aya iyaren mino. <sup>37</sup> Aya iyaren aí baren pübikan non péantáden dan bain karafarampin mun asédan baren mino. <sup>38</sup> Ridá baru maen Yopá baru ádé baré íkan eyo iyampon kayo ano inin Pitan nan Ridá barurá ban ne siyaimpin kan banta siantan béis vaípá onóben temí, “Aine setí ma varuna varufá tare ana orono van muno,” siren tútúpen mino.

<sup>39</sup> Máa síkan Pita maí kan má oren onóbín do aviren dan bain karafarampin ódikán minó baré nanin kayo ano véi vaintá e iyen eúkuven ifidiyáken Dokasi ma vetin má para váken amu uariyan amiyaré ein iyon afuin má ona vá Pitan aníen mino.

<sup>40</sup> Máan turan Pita ano minó nanin banta siantan barará karafarampin aravuvíkan aronkan durafúden amúkuren mai ma fúkein nanin baipá do vaében

temí, “Tabita oe, orun mantano,” síkan mai nanin auu máben Pitan me oniyan orun mantaan kumanen mino. <sup>41</sup> Kumamin Pita ano mai nanin ayan pákären ayain mantavíkan mairá mumunan nanin banta kayo vá baré nanin kayo vá aran édákan mai ma füká ein nanin ayun para van aní in onen amen mino. <sup>42</sup> Mai ma yákó ein baya ano Yopá barufin orera íkan inirek kokhon nanin banta ano Bafantá mumunan en mino. <sup>43</sup> Máan turen burumakao aufó ma minó daná uvariyain banta Saimoni má Pita manáa yamú baren mino.

## 10

*Tiyarafenu Enisori Ano Ma  
Koniriasi Vaintá Afoká Ein Baya  
Ino*

<sup>1</sup> Sisariá barurá mana Koniriasin ne sin banta váken Itaríke aruvín banta kéká ino ma siyain pintena mana antareti (100) aruvín banta kaylorá dafisiyaren mino. <sup>2</sup> Dafiken báken be má minó be antun má Tiyarafenun aránaó báken bentá mumunan iyan maen Yutan kayofin ma ona i vain nanin banta aya iyáken minó damú Tiyarafenu vaípá amúkiyáren mino. <sup>3</sup> Máan tiyaren mana inúpáké kanaú manaú áquí iyan béis onákan Tiyarafenu enisori ano yákó ma ereiní uaren “Koniriasi oe,” sen me aren mino.

<sup>4</sup> Arákan Koniriasi akhokho van mo furefure en oniyáken “Bafan noe, nái fino,” sen béin ina íkan enisori ano evaránen tiämémí, “Éi ma amúkiyáona vá inká ona ma i vain nanin banta ma aya iyaóna avúava san Tiyarafenu ano anunu iyáken amusin uantiyan mino. <sup>5</sup> Máan tukhen mifo saréa ana manáa vanta kayo siantesin Yopá barurá oren Saimonin ne sin banta van ma Pitan ne sen ariyain banta mo yosiren aviren ná erino. <sup>6</sup> Mai vanta maen ena Saimonin ne sin banta ven amá un

non akhempá bákán burumakaó au fóké ma manáa yaná uvaré iyain mai vanta vái véi van mino.”

<sup>7</sup> Máa siren mai ma véin tiamein enisori ma orivíkan Koniriasi vei yoran bantá kanan má mana aruvín bantaveyan dere Tiyarafenu ma anunu ukhein ayúavá ana ma vákuriyain banta vá aren mino.

<sup>8</sup> Aran eríkan mai ma afoká ein danasinta van tiámiden mai kanú manaú tiantan Yopá barufá oren mino.

### *Pitan Ma Auu Vaédan Onein Baya Ino*

<sup>9</sup> Oren ayanafá e vakharen ena ákurá Yopá baru ádé oríkan mo vayaní iyan maen Pita amúkono van má daró óden mino.\* <sup>10</sup> Pitán arafan puriyákan dunan nano van iyan para yunan taren tasu susu ein pinté béin auu vaédan maen <sup>11</sup> inaru ona yivin mai finté davaráeren daná minó kamí kamí akhen pákaaren dan barará eren mino. <sup>12</sup> Maifin ara ara osáfæe kayo vá ayon pinte nun kayo vá inká ara ara safúna kayo vá bíkakharen mino. <sup>13</sup> Máan tukhan Pita iníkan mana vaya ano siyáken, “Pita oe, mantave ma safúnan kayo arure nano,” sen béin tiamen mino.

<sup>14</sup>\* Máa síkan Pita evaránen tiámemí, “Éin avorá ída avusese en ída funtákein dunan báká ída nakherúnan bantí Bafan noe, ída séi nantí uno.”

<sup>15</sup>\* Máa síkan mai vaya ano evaránen kan dádasí en béin tiámemí, “Téi Ayarafenu ano ma maman avusese uranuna yana san i vá teya fainí ukhen mino seno.”

<sup>16</sup> Mai ma sein baya ana kanú manaú dádasí en tiámiden ainén evaránen mai yavaráe varen inarufá óden mino.

<sup>17</sup> Máan turan mai ma auu vaédan onein danasinta van ínté

ukhen nafino sire Pita kokhon in-eine iyan bákán mai ma Koniriasi siantan Sisariáke erein kanú manaú banta ano Saimonin ama san o inaen eriyan baren dafu onará e mantén mino. <sup>18</sup> E mantaven maen oovaraáden inaemí, “Saimonin nan ma Pitan ne siyain banta ma namumpin ná báé iyan nafino.”

<sup>19</sup> Máa sen ina iyákan mai ma auu vaédan ma onein danasinta van Pita fa ineine iyan maen Kantá Aunan mano véin tiámemí, “Saimoni oe, kanú manaú banta ano en nan dosen e van mino. <sup>20</sup> Dosiyán mifo ída vá kokhon ineine iyáke vá téi anon betin tiantékun erikhen mifo aravuve vá betin masá orono.”

<sup>21</sup> Máa síkan Pita aravein mano mai vanta kanú manaú morun tiámemí, “Tiretí ankan ten nan mi yosia ompo fará ere fono.”

<sup>22</sup> Máa sen ina íkan mai máa kanú manaú banta ano evaránen temí, “Mana antareti (100) aruvín banta kaylorá ma yafíkein Koniriasin ne sin banta maen Tiyarafenu van péden béin avorá puntáken bákán Yutan nanin banta kayo ano véin nan kama vanta ino siyain bákán kantasí ukhein enisori ano éin nan o aviren erinti vá éi ma siaminona vaya vá inino siren béin tiámidan tetin tisintái éin avirano van mi eré tiféuno.” <sup>23</sup> Máa síkan Pita mai vanta kanú manaú e araádan be ma varé ein namumpin óden mino.

### *Pita Ma Sisariá Barurá Oren Koniriasin Amá O Varein Baya Ino*

Un bakharen ena ákurá Pita mai kayo vá oríkan Yopá baru ráké manáa monópin bain afá aváeyan mano vetin má oren mino.

<sup>24</sup> Orein ayanafá e vakharen ená damú Sisariá oriyán maen Koniriasi o varen me afová iyan máan ten betin nan erinten mino siren bei kama arona kayo vá be antun má o iyanuádaren betin má

\* **10:9:** Isarerí kayoi má daro avaíen ákona ukhan mairá onóbe enóbe é iyan mino. \* **10:14:**

manafin átaru ukhen ave iyaren mino. <sup>25</sup> Átaru ukharéin Pita ma mápin ódiyain má Koniriasi oniyáken aufá mo aron kan daféden béin monosí uanten mino. <sup>26</sup> \*Máan tíkan Pita ano véin orun ayanoá diyáken, “Mantano séi éi ma eonaí é ma varará banta uno,” sen béin tiamen mino.

<sup>27</sup> Máan turen Pita mairá be má e vaya sikhan mápin ódiyan un onákan kokhon nanin banta e átaru ukharen mino. <sup>28</sup> Átaru ukharéin Pita mai nanin banta siamemí, “Tiretí afová ukhen nan tetisi man baya ano siyáken Yutan kayo ano ena anan banta vá ída vá manafin báke ída vá betí baintá orono sikhen mifo Tiyarafenu ano siyáken ída vá mana vanta van ída funtákeona váke ída sesé ukhaona ono se vá tiámeno sen téin aní uren tisimen mino. <sup>29</sup> Mai ana van mi éi ma vanta kayo sianten nan oríká ída áao sin éin oo yaiyé ereruna van mi éin inaiyá umpo nái vará téin tare fono.”

<sup>30</sup> Máa sen ina íkan Koniriasi evaránen tiámemí, “Kamí kamí damú oriyán mifo kanú manaú áauén inúpasí iyáká te simápin timúkiyá baréekun manadá mana vanta ano vei auí daná kaké panu sivin ten tufá e mantén mino. <sup>31</sup> E manjáven mai vanta ano máa semi, ‘Koniriasi oe, éi ma kama avúavasí eya ona ma i vain nanin banta ma aya iyaona van Tiyarafenu ano amusin uren inka eni amúkin inen mino. <sup>32</sup> Máan tukhen mifo Saimonin nan ma Pita ne sen ariyain banta ano vuru-makaó au fóké ma manáa yaná uváriyain Saimonin ne sin banta amá ma un non akhempá baimpin ban mifo manáa vanta siantan ná Yopáké o avirano.’ <sup>33</sup> Máa sen tisimein nan mi éin ainen o avirano van banta siantékun oríká kama avúavasí eya ere ompo intéa vayá tetin tisimeno van Bafan

mano siamí inikharé intefo sare ana minó ano inintó bá tifé umpo Tiyarafenu avorá tisimí inétifano.”

*Pita Ma Koniriasin Amápin  
Yisasini Kama Vaya Siamein Baya  
Ino*

<sup>34</sup> \*Máa síkan Pita araíen betí ankan tiámemí, “Tiyarafenu ano minó ara ara nanin bantafin manaí ukhein avúavasíen aya iyái saréa inka séi fura sé afová é uno. <sup>35</sup> Máan té iyan mifo minó kéká pinté intéa nanin banta anó ben nan péden ben aránaó báken puntákein avúavá ana variyan nafi mai nanin bantan Tiyarafenu ano aviré iyan mino.

<sup>36</sup> Máan tukha saretí afová e nan mai kayoi Bafan ma vain Yisasi Tiyarafenu ano ma aní ukhein banta finté uaren kamaen kusen ma van baya Tiyarafenu ano Isarerí nanin bantafin dan erakhen mino. <sup>37</sup> \*Yoni ano ma monó non péantádan intéa yanásá Karirifá araí uren Yudiá barafá oreraen dákó ukhen nafi mai sretí ankan afová ukha ono.

<sup>38</sup> \*Nasaretí kena vanta Yisasi Tiyarafenu ano intesá ená bei Kantá Aunan má ákona fóké bá aní uran intesá uren ná Ban Anóni ákona ano yaramádan baré ein nanin banta aya uren ayofen noren nafi mai Tiyarafenu véi má túpá ukhan mino.

<sup>39</sup> Yutan kayoi varafá bá Yerusalemí barufin má ma variyaré ein maen mai minó danasinta setí ódoréekun inká béin daa unkamádantá arin púkaréin <sup>40</sup> kanú manaú bayan orivin Tiyarafenu ano furin pinte orun avíón mantarákon banasi avorá orin onen mino. <sup>41</sup> \*Máan ten mifo minó nanin banta ano va yéin onen naino. Mai ma Tiyarafenu ano ma gefá aní ukhá ein kéká ma varé e tifékun ma véi fükaren e mantaaren dunan nen non

\* **10:26:** Apo 14:13-15; Rev 19:10    \* **10:34:** Diu 10:17; Rom 2:11    \* **10:37:** Mat 4:12-17

\* **10:38:** Mat 3:16; Ruk 4:17-21    \* **10:41:** Ruk 24:42-43; Apo 1:8    \* **10:42:** Apo 17:31; 1Pi

nen í ontaréi sian páman iyá tiféuno. <sup>42</sup> \*Tiyarafenu ano véin nan mi fa ma ayun bain má púkein nanin banta vái yaimin banta vá bano siren pefá aní uran baren mino se vá pura vaya vanasifin tian amesin ná inino siren tetin ákonaen baya sisimen mino. <sup>43</sup> \*Béintá ma mumunan inain nanin banta van Tiyarafenu ano véin pinté uaren ume kayo ampiantanten mino sen minó sakhanampa vanta kayo ano ven nan pefá o utúben tian amá uran baren mino.”

### *Ena Anan Nanin Bantafin Ma Kantá Aunan Erein Baya Ino*

<sup>44</sup> \*Pita ma Tiyarafenu vaya fara siamiyan bákán maifin ma e átaru ukhen mai vaya ma iniyá ein nanin banta amañiná Kantá Aunan mano eren mino. <sup>45</sup> Pitan má ma mumunan Yutan kayo ma orikhá ein kéká ano onan ena anan nanin bantafin dere Kantá Aunan banaan amiyaimpin betí anúden oreraen mino. <sup>46</sup> \*Para va ino mai kéká ano ara ara vaya fóké Tiyarafenu aví daní iyan betí ankan iniren mino.

Máon tiyamipin Pita semí, <sup>47</sup> “Tetí ankan ma Kantá Aunan baré tiferuna avúaváká ten mi ma kéká ano Kantá Aunan baren mifo iye anó kanaíená ma nanin banta ano ma monó non peran nain aa iyarante fono.” <sup>48</sup> \*Máa siren mai nanin banta van Tiyarafenu ano ma aní ukhein banta Yisasin avíkasá monó non perano siran betí ankan monó non péden mai oyampáké manáa yamu betin má bano van Pitan inaen mino.

## 11

### *Pita Vaintá Ma Afoká Ein Danasinta Van Ma Veyantá Puntáden Tian Amá Ein Baya Ino*

\* **10:43:** Ais 53:5-6; Yer 31:34; Apo 2:38

\* **10:48:** Apo 19:5

\* **10:44:** Apo 11:15; 15:8

\* **11:3:** Apo 10:28; Kar 2:12

<sup>1</sup> Ena anan kéká bá ano yere Tiyarafenu vaya iniren mumunan iyan mino síkan Yutan barafá ma vaya varen orin banta kayo vá monópin ma varé ein afá aváeyan má ano inen mino. <sup>2</sup> Mai vaya iniren baintá Pita ma Yerusalemí unóbíkan au khavin avúavá ma fara fákaren bain mumuman nanin banta ano véin oyampá baya sen asiyáken <sup>3</sup> \*máa semí, “Ída au khavin banta kéká amái o fébe veti má dunan niya ono.”

<sup>4</sup> Máa síkan bái vaintá ma afoká ein danasinta van puntáden araien tian amá en mino. <sup>5</sup> \*“Yopá barurá téi simúkiyá baréekun tuu vaédá oné kun inaru fáké mana kákán davaráeren daná kamí kamí akhentá pákaaren te vaintá dan eren mino. <sup>6</sup> Eriyain má maifin purefure é oné kun ayuntáke safúna kayo vá afá tafúna kayo vá ara ara osafae kayo vá inká ayompin ma noin nun kayo vá baren mino. <sup>7</sup> Baré íkan mana vaya ano séin tisimemí, ‘Pita oe, orun mantave mai yanásinta arure vá nano.’

<sup>8</sup> “Máa siká téi evaráne tiamiyáké, ‘Bafan noe, éin avorá ída funtáken ída avusese ukhein daná baká ída nakherunan bantí téi ída nanté uno.’

<sup>9</sup> “Máa sékun inaru fáké kan dádasí en temí, ‘Ayarafenu ano ma maman ayusese uran bain danasinta van ída vá painí ukhen mino seno.’ <sup>10</sup> Mai ma sein baya kanú manaú dádasí en tisimíden minó danasinta evaráne darifan inarufá óden mino.

<sup>11</sup> “Máon turan maí damú ana Sisariá baru ráké mana vanta ano kanú manaú banta siantan téin tivirano van eriyan baren te ma varuna namun eren mino. <sup>12</sup> Erikan Kantá Aunan mano séin tisimiyáken, ‘Eí ída vá kokhon ineine iyáke vetí ankan masá orono,’ síkan dan manápá ifo

\* **10:46:** Apo 2:4; 19:6

\* **11:5:** Apo 10:9-48

afápá mana un kádan tifá tiváeyan ma monópin bain kéká ano yere se má oriká oriyá baré mai ma siantan erein banta amá ódé uno.<sup>13</sup> Ódékun béis inté ená mana enisori onan ná ben amápin dákó uven tiamiyáken, Banta siantesin Saimonin nan ma Pitán ne sen ariyain banta vá Yopá baru ráke o avire ereno.<sup>14</sup>\* ‘Béis maen manáq vaya varen éin me siamintin mai vaya finté uaren Tiyarafenu ano éin má e antun má evaránen aviranten mino.’

<sup>15</sup>\* ‘Máa sirá téi arai uré baya siyakun esé araiintá ma setimpin Kantá Aunan mano erein avúaváká ten betimpin eraven mino.<sup>16</sup>\* Máa tíkan Bafan mano gefá tiyáken ma Yoni ano nompói vanasi monó non péanten mifo sireti ankan Kantá Aunan pói féantanten mino ma sikhá ein baya ovaré me iné uno.<sup>17</sup> Pefá ma Tiyarafenu ano ma aní ukhein banta Bafan Yisasintá mumunan ékun ma Tiyarafenu ano Kantá Aunan amusin timikharen mi saréa Tiyarafenu ano manaí amusin mana ena anan kéká amikhen mifo séi iyé barerá Tiyarafenu ioráne are onte rafuno.’

<sup>18</sup>\* Máa sin ma yetí ankan mai vaya iniren mairá ida ananin baya sen mifo Tiyarafenu aví ana manan daní iyáken temí, ‘Ena anan banta ano ma ará baeren inan Tiyarafenu ano kanae sein pasen betin má deren para van oriyán ban aunan baranten mino.’

*Siriá Barafin Ma Vain Antiokí Monó Nanin Banta Fákena Vaya Ino*

<sup>19</sup>\* Stivenin ma arin púbin maen Yisasintá ma mumunan ukhá ein kéká namu arirí iyaimpin betí ankan me onen Fonisiá akhempa safi Saipurusí akhempa safi inká Antiokí barura safi karan orera iyáken Yisasini kama vaya Yutan

nanin bantafin mana e siamen oren mino.<sup>20</sup> Máa tiyákan maen betin aúbaná manáa Saipurusíke vanta kayo vá inká Sairiní baru ráke kéká bá baren Antiokí barurá oriven Kiriki nanin bantafin dere Bafan Yisasini kama vaya fákena vetin tiamen mino.<sup>21</sup> Tiamiyákan Bafani ákoná ano vetí ankampin bákán pasen kokhon ena anan nanin banta ano Bafantá mumunan uren ará baeren béis vaipá eren mino.

<sup>22</sup>\* Máa tiyain baya ma Yerusalemí mumunan nanin banta varé ein kayo ano iniren Banabasin tiantan Antiokí oren mino.<sup>23</sup> Oren o unaven onákon Tiyarafenu ano ma vetin kama uren tarisari uantiyaré ein ódaren béis amusin iyáken betí aúkáké pura sen Bafan má ana vano yan betin ákoná uanten mino.<sup>24</sup> Béis kama vanta vákan Kantá Aunan mano véimpin bíkakhán maen béis ákoná mumunan má bákén kokhon nanin banta kayo aya uren Bafan baipá o aviádan eriyaren mino.

<sup>25</sup>\* Máa turen Banabasi ano Sorin nan došeno van Tasisí barufá oren mino.<sup>26</sup> Oriyan baren béis mo ódaren o aviren Antiokí meran baren mino. Bákén mai orana aúpin Banabasin nú Sorin nú ano mumunan nanin banta kayo vá manafin átaru uviyan kokhon nanin banta kayo Tiyarafenu afova vaya siamiyaren mino. Máa tiyáken eyo iyampon kayo van Karaisini kéká se sen esé araien Antiokí aví tein mino.

<sup>27</sup> Máa tiyain pimpá ana manáa sakhanampa vanta kayo ano Yerusalemí me ampiren Antiokí eren mino.<sup>28</sup>\* Eraven mai kayo finté Akhabusin ne sin sakhanampa vanta ano orun mantaaren Kantá Aunani ákongrá máa semí, ‘Kákán anan dákó

\* 11:14: Apo 16:31

\* 11:15: Apo 2:4

\* 11:16: Apo 1:5

\* 11:18: Apo 13:48; 14:27

\* 11:19: Apo 8:1-4

\* 11:22: Apo 4:36

\* 11:25: Apo 9:30

\* 11:28: Apo 21:10

intin Romi kamanin mano ma yafikein bara kayofin arafan nan puren orera inten mino sikháin ma Sisa Kraudiasi ma kiní uven dafisein damú mai yaná dákó en mino.<sup>29</sup> Mái síkán inireni Yisasin eyo iyampon kayo ano veyan ma ukhei páke en Yutan barafá ma monópin bain afá aváeyan aya ono van bayá sian damuáden mino.<sup>30</sup> \*Mai ma sian damuádeinien betí amusin moní Banabasin nú Sori nuká kaúden tiantan baren Yerusaremí monó doran banta kayo mo amen mino.

## 12

### *Kin Eroti Ma Pitan Páken Karavusín Mo Khaein Baya Ino*

<sup>1</sup> Máan tiyain pimpá ana Kin Eroti ano manáa mumunan nanin banta kayo aruren namu ono van karavusi fáken mino. <sup>2</sup> Pákañ kaúden béisí sikan Yonin aváe Yemisin baenatífó anuran tikan puren mino. <sup>3</sup> Máan turen Eroti onákan Yutan kayo ano mai avúava san amusin iyaimpin Yisi Ída Van Bereti Ma Nan Omá Damú Pitan má dere fáken mino. <sup>4</sup> Pakáadoren Tiyarafenu ano ma Isarerí nanin banta Avo Uantan damú ma esantavintí Pitan avian banasi avorá kaúde daimonté uno sen inireni Eroti ano Pitan avian dumukatifin kaúden sikustini (16) aruvín banta kayo ayampiní uran kamí kamí ano yafidú iyaren mino.

<sup>5</sup> Pitan ma yumukati namumpin kain ban maen béisí Tiyarafenu ano ayaino van monó nanin banta ano ákonaen amúkiyaren mino.

### *Tiyarafenu Enisorí Ano Ma Pitan Karavusi Finté Útúantein Baya Ino*

<sup>6</sup> Máan tiyákan Eroti ena ákurá béisí daimintéin mai inuran kankanan seni anampó béisí damuádan aruvín bantá kan aúbaná bavíkan ena aruvín banta kayo ano yumukati namun onará

dafíkaren mino. <sup>7</sup> Máan tukharéin Bafani enisorí ano maifin manáda áfoká íkan dumukati namumpin panu siyain má enisorí ano Pitan ayorantá ankan ankan iyáken béisí avoren temí, “Aine mantano,” siyain má Pitan ayan pinte seni anan útufen eraven mino.

<sup>8</sup> Máan tiyain má enisorí ano véin tiameví, “Ei ona vá arantan anamun má ono,” síkán Pita uran maen enisorí ano siamemí, “Ei ayá iyón afuin ureya séin dakhafono.” <sup>9</sup> Mái síkán Pita mai karavusi namun me ampireni enisorí yakhafen oriyáken enisorí ano ma mai avúavá bariyain Pita amino ukhen tuu vaédái oniyá uno sen inikharen mino. <sup>10</sup> \*Mái sen iniyáken esé ma yafiká ein má ínaín ma yafiká ein banta vá esanten aravuaren kákan barufin ma oriyain onará oríkán mai ona ano veyantá e yiven oriyain má míkanan mai ona finté e yuvinen oriyain baren mana aasá o muntaven oriyain manáa ayáká orivin mai enisorí anó véin me ampireni ainen oren mino.

<sup>11</sup> Orivíkan mairá Pitan auu sapé tiyain má béisí semí, “Taréa inka afova suron ékun Eroten ayan pinten téin tiviren inká Yutan kayo ano ma intéa yanasá ten timaniná kaono van iyaren nafi mai uman kayo finten Bafan manon bei enisorí siantan téin tiyaen mino.”

<sup>12</sup> Mái siren mai yaná ma afová iyáken Yonin nan ma Maki ne sen ariyain banta anóe Marian amápin kokhon nanin banta kayo ano átaru ukhen amúkiyareí íkan mai namun béisí oren mino. <sup>13</sup> Onóben baru fáke onará béisí mo ankan ankan iyan maen iyé e van nafi siren onano van Rodan ne sin doran arinta ano araven mino. <sup>14</sup> Araven orún iníkan Pitan amen avaya vaímpin kákan amusin iyáken ída ona yivinton evaráne

mun máa semí, “Pita onará e van mino,” sen mai ma iyukhá ein nanin banta siamen mino.

<sup>15</sup> Máa síkan, “Éi óen ná iya vae” sen mai kayo ano véin tiamiyán mifo véi ákonaen tiyáken, “Téi Pitan amen avayan bá inikhore,” siyaimpin betí ankan tiyáken, “Beni enisori anon tino.”

<sup>16</sup> Máa siyákan maen Pita onará pa ankan ankan iyan baimpin betí ankan ma morun ona yiren bén oniyan anúden oreraen mino.

<sup>17</sup> Máan tiyaimpin ída vaya sino van Pita ve ayampó oorá ankan ankan iyáken inté ená Bafan mano karavusi finté útúden bén avían barufá daná eren nafi mai fáke siamíden, “Ma ma yáko ein danasá Yemisi má manáa sifá tiváeyan masá tiameno,” siren betí ankan me ampirena ena varufá oren mino.

<sup>18</sup> \*Máan tukharéin ena ákurá aruvín banta kayo ano Pita interfásá orikhen nafi siren akhokho van dosian more mere en mino.

<sup>19</sup> Máan tiyákan Eroti ma mai vaya iniren Pitan dosíkan ída vaimpin mai ma yafíká ein aruvín banta kayo avían kaúden avóbé en inaúden ma kékásá aresin purino sen mino.

### *Kin Eroti Ma Furin Baya Ino*

Máan turen ínaiimpáké Eroti Yudiá me ampirena Sisariá manáa orun baren mino. <sup>20</sup> Kin Eroti ano Taiyá baru ráke vá Saidoniá baru ráke nanin banta vá anan maran uren betin nan móecken aranan uantiyaren mino. Máan tiyákan mai nanin banta ano véin ma yafíkein bara kayo finté yunan bariyaren pasen kin mano ma kama yoran banta ino siyain banta Barastasi má ará manafiniún baya sian damuaren Kin Erotin onano van oren mino.

\* **12:18:** Apo 5:22-24    \* **12:23:** Dan 5:20    \* **12:23:** Ínaiimpáké Yosifasin ne sin mana afova vanta ano siyáken Erotin aúpin kákan aí afoká mino sen bei vompon dókifin uvantaren mino.

15:37    \* **13:2:** Apo 9:15    \* **13:3:** Apo 6:6

<sup>21</sup> Kin Erotin ma onano sikhá ein damú ma yáko íkan bái kin buí daná uren kini karáká kumamin banasi e iyuvín ákoná vaya siamen mino. <sup>22</sup> Sian míkan mai nanin banta ano ovararen temí, “Ma ma siyain baya ma varara bantai vaya vaino ayarafenui vaya ino.” <sup>23</sup> \*Máa síkan Eroti ano ída Tiyarafenu aví maman daní iyaimpin Bafani enisori ano véin manádá do ankamádán eraviyain má bintokhéná kayo ano véin aú bukhafa nákan puren mino.\*

<sup>24</sup> \*Puren mifo Tiyarafenui vaya ano mo kákánién minó barufá oreraen mino. <sup>25</sup> \*Banabasin nú Sorin nú ano vetíi monó nanin banta ayaín doran dóan kíparen maen Yonin nan ma Maki ne sen ariyain banta avíaren Yerusaremí baru me ampirena evaránen Antioquí oren mino.

## 13

*Yerusaremíke Monó Ánon Banta Kéká Ano Ma Banabasi Nú Saimonin Nú Avu Uantáden Tiantan Monó Dorantá Orein Baya Ino*

<sup>1</sup> Antioquí monó namumpin manáa sakhanampa vaya sin banta kayo vákán ma inká Ti-yarafenui vaya ma afova amin banta kayo van ma ukharé ein mai vetin aví maen Banabasi má Saímonin nan ma sókon banta e sen ariyain má Sairini barurákena vanta Rusiusin má inká Kin Erotin má ma avunté iyá ein banta Manaenin má Sorin má ino. <sup>2</sup> \*Maná damú monó nanin banta kayo ano yunan auraren amúkiyán Bafantá monó tiyan baréin Kantá Aunán mano vetin máa sen tiamemí, “Tiretí ankan Banabasin nú Sorin nú aniesin ná mai ma varano van arakheruna yorarí ino.” <sup>3</sup> \*Máa síkan betí ankan dunan auraren amúkuren

\* **12:23:** Ínaiimpáké Yosifasin ne sin mana afova daná uren kini karáká kumamin banasi e iyuvín ákoná vaya ino.

\* **12:24:** Ais 55:11    \* **12:25:** Apo 11:29-30;

maen mai ma siamein bantá kan ánontá ayan kaúden avu uantáden tiantan oren mino.

*Banabasi Nú Sorin Nú Ma Saiparasí Musóká O Varé Ein Baya Ino*

<sup>4</sup> Máan turan Kantá Aunán mano mikánan tiantan Serusiá barurá aravuven mai ráke sipi evaránen Saiparasí musóká oren mino. <sup>5</sup>\*Oriyaren ma Saramisé barurá o unavin maen betin ayain bantan Yon Maki orikharen mi Yutan kayoi monó átaru namun kayofin Tiyarafenui vaya siamen mino.

<sup>6</sup> Saiparasí musóká békakan o váken ma minó akhempá noren maen Pafosí barurá oriyan o onákán Ba-Yisasin ne sin Yutan kayoi kampun sakhanampa vanta váken béis uvatakhan iyan ara ara aufon iyaren mino. <sup>7</sup> Mai vanta ano kamanini ánon banta Sekius Paurusin ne sin banta vá bákán maen kama ineine vá afova vá bain banta váken Tiyarafenui vaya ineno van Banabasín nú Sorin nú arákan oren mino. <sup>8</sup> Oríkan mifo mai ma aufon iyáken uvatakhan iyá ein banta Ba-Yisasin aví ma Kiriki vaya finté Erimasi ne sen ariyain banta ano ma inikharé ein Kamanini ánon banta ano Yisasintá mumunan inain nan békakan namuroí uantíyan beni aa iyarano van en mino. <sup>9</sup> Inikhan Sori nan ma Pori ne siyain bantafin maen Kantá Aunán mano víkavíkan Erimasin auufen kakhaben temí, <sup>10</sup> “Éi Ban Anon akhái váke minó puntákein avúavá namuroi iyan nan éimpin ara ara mákasín má namu yaná bá bíkakhayai Bafani funtákein avúavá maman kampun bayafin kaiya ompo mai avúavá ídá ifá inte fono. <sup>11</sup>\*Tiyarafenui aran naná ano saréa éin auu namu uvintiya áau ída onan manáa ayáká banono,” máa siyain má anan titípa ukhein konan ten daná

ano Erimasin auurá iyábíkan béis ma ayan noren oriyan aa aníin banta van mo yose me yose en mino. <sup>12</sup> Máan tiyákan Kamanini ánon banta ano mai yaná ódaren mumunan iyákan Bafan nan ma siyain baya ano véin ará mantan mino.

*Porin Má Bei Arona Kéká Bá Pisidiá Bara Fin Bain Baru Antioki Ma Varé Ein Baya Ino*

<sup>13</sup>\*Pori má ben ma ayaen doren noré ein kéká bá ano Pafosí baru me ampiren sipi e varen orein mano Pamfiriá barafin bain baru Peká oríkan mairá Yon Maki vetin mo afa uren Yerusalemí evaránen oren mino. <sup>14</sup> Orívíkan betí ankan Peká me ampiren Pisidiá barafin bain baru Antioki o varen Sabati yamú Yutan kayoi monó átaru namumpin o kumanen mino. <sup>15</sup> Kumantan monó átaru namuni ánon banta kayo ano man baya vá sakhanampa vanta kayoi vaya vá dankáden manáa vanta siantan Pori má bei mana yoran banta kayo vá mo siamemí, “Tifá tiváeyan noe, sretimpin ma vanasi ákona uantan baya ma vantya sesin inino.”

<sup>16</sup> Máa síkan Pori e mantaven betí ankan ida vaya sino van ayan daní uren temí, “Tiretí Isarerí nanin banta vá ena anan nanin banta vá ano ma Tiyarafenu aránaópá oriyaona kayo ano vá ineno. <sup>17</sup>\*Isarerí kayoi Ayarafenu ano setinti sinafu siráon nan be ina e sen aní ukharen betí vara ma me ampiren Isipí o vágón maen béis ano vetin maman kokhonásí uran baréin bei kákán ákonará betí ankan Isipíke iyanen eren mino. <sup>18</sup>\*Eriyáken foti (40) oranará ma kámá barafá Tiyarafenui vaya átakharé iyan ma véin uman amiyákan maen béis yo yuren betintá kamaen dafisiyaren mino. <sup>19</sup>\*Máan

\* **13:5:** Apo 12:12; 15:39    \* **13:11:** Apo 9:8  
12:51    \* **13:18:** Nam 14:34; Diu 1:31-32    \* **13:19:** Diu 7:1; Yos 14:1

\* **13:13:** Apo 15:38    \* **13:17:** Eks 1:7; 6:6;

tiyáken Tiyarafenu ano Kenaní barafin ma yan manápá ifo afápá kan un kádon anan nanin banta ma varé ein aren taaren betíí vara o maman bei vanasi inaí ino van amen mino. <sup>20</sup> \*Mai yanásinta ma yákó iyáré ein mai kamí kamí antareti ifo fifti (450) orana aúpin mino.

Máan turen mai oyampáké Tiyarafenu ano mai nanin bantará ma yafisin banta kéká aní uren amíkan mai kéká ano vetintá dafisen eriyan sakhanampa vanta Samuerini yamú e khanáien mino. <sup>21</sup> \*Máan tiyain damú anan banasi ano kin nan muno siren inantiyaimpin mi Tiyarafenu ano Benisamenini anan banta finté Kisín anin Sorin aní uran foti (40) oranará kiní ukhen betintá dafíkaren mino. <sup>22</sup> \*Dafíkaréin Tiyarafenu ano Sorin doékaren Devitin maman kiní uren béin nan temí, ‘Te súkákéi sinunué Yesín anin Devitin dosiré aní erunan béis anon ten too yaiyen te ma siame-nuna yanásinta varanten mino.’

<sup>23</sup> \*“Mai vanta anavasin pintéi vanasi ma evaránen aviran banta Yisasin nan Tiyarafenu ano fefá tian damuádan baréin mai vantan Isarerí nanin bantafin tiantan eren mino. <sup>24</sup>\*Ínaimpáké Yisasi erintéin Yoni ano minó Isarerí nanin banta van ará baéde vá monó non barano siyaren mino. <sup>25</sup>\*Yoni ma vei yoran kípán akhempá béisemí, ‘Tiretí ankan ten nan iye inó tiyárafono. Téi mai vanta va uno. Ída ifo véi sen toyampá eriyan téi ída kanaí é beni arantan anamuntáke anan útfonté uno.’

<sup>26</sup> “Máan tukhen mifo sifá tiváeyan ma Abaraamun akhafana vaona vá inká tiretí ena anan nanin banta ano ma Ayarafenu van péde ven aránaó baona kéká ba soe, mai ma evaráne aviranté uno ma sikharé ein

baya mai setimpin mi eren mino. <sup>27</sup> Máan turan maen Yerusaremí nanin banta vá betíí yafisin kéká bá ano Yisasi nan banasi ída evaránen aviran banta ino siren béin ída kamaen oman afová en pasen sakhanampa vanta kayo ano ma ena ena Sabati yamú ma vanasi siamyaré ein baya ánaí mi vákuren béin arino sen mino. <sup>28</sup> \*Máan tiyáken ben nan purino ma siyainí aau ana yosíkan ída vaimpin Yisasin arintin purino van betí ano Pairotin ákonáen tútúpen inaen mino. <sup>29</sup> \*Máan turen mai ma fefá sakhanampa vanta kayo ano ma sikhá ein avúaváká ten minó uman béin amaniná kaúden daa unkamádantáke un mamádan barará eravuvín béin daiyen on aimpin mo masiéen mino. <sup>30</sup> Masí en mifo Tiyarafenu ano evaránen purin pinte véin orun avían mantén mino. <sup>31</sup> \*Mantaran mai ma véin má Kariri fáké Yerusaremí barurá ma onóbe enóbe iyáré ein kayo ano kokhon damú béin oniyaren taréa mai kéká anon tetisi vanasifin béin nan tian dáko uan amiyan mino.

<sup>32</sup> “Máan tukhái mai ma Tiyarafenu ano setin tináuyan ma iyáon táká ein kama vayan tiretin tiamiyá tiféuno. <sup>33</sup> Taréa ma vetin akhafana ma varunafin mi Tiyarafenu ano mai ma sian damuádan baré ein baya kanaí ino van purin pintena Yisasin orun avían mantakhan mi kan dádasí ma en uvantein Í Bompon dókifin uvamádan ban mino. Mai vaya ano siyáken,

“‘Taréa séi en afóení ékuya éi sen taniní e ono,’ sikhen mino. <sup>34</sup> Ibo 2:7

Tiyarafenu ano véin purin pintena orun avían mantein ída fúta inten mino sen mi ma

\* **13:20:** Ano 2:16; 1Sa 3:20    \* **13:21:** 1Sa 8:5, 19; 10:20-24    \* **13:22:** 1Sa 13:14; 16:12; Ibo 89:20    \* **13:23:** 2Sa 7:12-16    \* **13:24:** Mat 3:1-2    \* **13:25:** Yon 1:20, 27    \* **13:28:** Mat 27:22-23    \* **13:29:** Mat 27:59-60    \* **13:31:** Apo 1:3, 8

vayan uvamádan baren mino.  
Tiyarafenu ano siyáken,

“Teí ma kantasí ukhein danasinta vá pura sikhein avu vá  
ma gefá Kin Devitin iyáan tékun baré ein tiretí ankan amenté uno.” *Ais 55:3*

<sup>35</sup> Tiyarafenui vompon dókifin ena vaya ano máa sikhen mino,

“Ei Kantasí Ukhein Banta éi ída áesin masípin púta inten mino.” *Ibo 16:10*

<sup>36</sup> “Deviti ma ma varará báken Tiyarafenui oo yaiyen oriyan baren o fúbíkan be anáuyan má masí uran ben au ano mo fútaen mino.” <sup>37</sup> Máan ten mifo mai ma Tiyarafenu ano furin pinte evaránen avíán mantein bantai au ída fútaen mino.

<sup>38</sup> “Máan tukhein nan mi sifá tiváeyan noe, siretí ankan afovasá ono. Yisasin pinté uaren ma saretí ume ampiantákein bayan tiamiyá uno.” <sup>39</sup> \*Mosesini man baya ano ída kanaíen tiretí ume arúantáden puntákein nanin banta e sen aranten mifo mai vantará ma mumunan inain nanin banta ven pinté uaren mi minó ume arúantáden puntákein nanin banta e sen aranten mino.” <sup>40</sup> Máan tukhen mifo mai ma sakhanampa vanta kayo ano ma siádan baré ein danasinta ano siretí ankampin afoká inafo vá dafíán ákona ono.

<sup>41</sup> “Oyampá baya sin kéka soe, sireti oniyáke anú de orera iya vá púan kípano.

Para vara seyo sretí aúbaná ma séi mana yaná uvaré dararé éku

siretí ída kanaí eya mumunan iyasin

manáa kéká ano ma siaminti mai yere ída mumunan in-

ono.” *Aba 1:5*

<sup>42</sup> Máa siren Porin nú Banabasin nú ma vetíi monó átaru namun me ampiren oriyan maen betí ankan tiyáken ena Sabati yamusá mai ma seóna vaya ovaráne me

sesirá inétifano sen békanan tiamen mino.” <sup>43</sup> Máa siren mai namun pinté ma orera iyan maen mai ma ará baéden Yutan kayoi monó avúavá ma vákuriyain kayo vá Yutan kayo vá ano Porin nú Banabasin nú bákuren oriyákan betin má e vaya sen oriyan tútúpen temí, “Ayarafenui sarisari aúpin ákona e vá monó teno,” sen betí ankan tiamen mino.

<sup>44</sup> Orikharen ena Sabati yamu adé anantá mai varu fintena minó nanin banta ano Bafani vaya ineno van e átaru en mino.

<sup>45</sup> Átaru iyaimpin Yutan kayo ano mai ma e átaru ukhein nanin banta ódaren Porin ará namu uantáden béis ma siyain baya van ankayan tiren oyampá baya sen mino.

<sup>46</sup> \*Oyampá baya siyaimpin Porin nú Banabasin nú betin nan ída feran evaránen tian amá uan amen temí, “Tiretin naren araié Tiyarafenui vaya sian améku ída maman kákán danasí eya fara van oriyan ban aunan baran nona van ifá enái saréa yo vaéoré ena anan nanin bantafin mi sian dákó iyá uno.” <sup>47</sup> Para vara seyo, Bafan mano ákona vaya máan mi sen tetin tisimikhen mino,

“Teí anón éin maman ena anan nanin bantai kakhaní urékuya ma varai minó ankina fákena nanin banta aya uresí betin evaráne aviranté uno.” *Ais 49:6*

<sup>48</sup> Máa síkan ena anan nanin banta kayo ano mai vaya inin betin arápin kama íkan mai kéká ano Bafani vayará amusin ureñ ben aví maman daní iyákán mai ma fara van oriyan ban aunan barano van ma Tiyarafenu ano aní ukhein nanin banta ano mumunan en mino.

<sup>49</sup> Máan tiyákan Bafani vaya ano minó akhempá oreraen mino.

<sup>50</sup> Máan tiyan mifo Yutan kayo ano vetíi monó tin avúavá ma

\* **13:39:** Rom 10:4    \* **13:46:** Apo 3:26; 18:6

yakhafiyan ma aví bain nanin kayo vá mai varu ráke ánon banta kéká bá arápiní uren minó ano araíen Porin nú Banabasin nú aruren mai varu fintena vékanan do sianten mino.<sup>51</sup> \*Máan tiyan mai ma sein baya oyan amiyaimpin békanan arantantá ma varé ein kayó do fúpá tiren Antiokí me ampiren Aikoniamú barufá oren mino.<sup>52</sup> Oríkan eyo iyampon kayo ano amusin iyákan Kantá Aunan mano vetin áupin bíken mino.

## 14

*Porin Nú Banabasin Nú Ma Aikoniamú Barufín Kama Vaya Siamein Baya Ino*

<sup>1</sup> Porin nú Banabasin nú ano Antiokí monó átaru namun ma variyaré ein avúavá anan Aikoniamú baren mino. Békanan Yutan kayoi monó átaru namumpin ódiven Tiyarafenu kama vaya siamíkan kokhon ná Yutan kayo vá ena anan nanin banta kayo vá ano iniren mumunan en mino.<sup>2</sup> Máan tiyákan ída ma mumunan ein Yutan kayo ano ena anan nanin banta kayo arápiní íkan mumunan ma iyain nanin banta namuroí uanten mino.<sup>3</sup> \*Máan tiyaiimpin Porin nú Banabasin nú ano Aikoniamú barurá ayáká báken ída feranton Bafani avábá in baya vanasi siamiyákan Bafan mano vékanan ákona amíkan enará ukhein avúavá bá aní danasinta vá banasi aní iyan maman pura yanasi en mino.<sup>4</sup> Máan tiyaiimpin mai varu ráke nanin banta kayo ano kampintan daíden manáa kayo ano Yutan kayoi kékasi íkan manáa ano aposeri kayoi kékasién en mino.

\* 13:51: Mat 10:14; Apo 18:6    \* 14:3: Mak 16:20; Ibu 2:4    \* 14:5: Apo 14:19    \* 14:11:

Apo 28:6    \* 14:12: Siusi maen Kiriki nanin bantai ayarafenun bákan Romu kamani ano ma yáfíká ein bara kayofin bentá mumunan iyaren mino (Romúke nanin banta ano Yupitan ne sen aví ariyaren mino).    \* 14:12: Emesi maen Kiriki nanin bantai ayarafenun báken baya varen oriyáken baya sin banta ino sen mumunan iyaren mino. Romú kéká ano Mekuriun nan ayarafenun ban mino sen mumunan iyaren mino.

<sup>5</sup> \*Máan turen ínaimpáké Yutan kayo vá ena anan nanin banta kayo vá ano Porin nú Banabasin nú onámaná ankamintin purino van betí yafisin kayo vá baya sian damuáden mino.<sup>6-7</sup> Máa sen orera iyain baya ma vékanan inen maen Rikoniá barafin ma vain kákón barú kanan Ristará bá Debé bá kan pin karan oriyáken mai akhempá ma vain nanin bantafin Tiyarafenu kama vaya me asotú en tiamen noren mino.

*Porin Nú Banabasin Nú Ma Ristaráke Nanin Banta Tiyarafenu Kama Vaya Siamein Baya Ino*

<sup>8</sup> Ristará barurá mana vanta ve anóe ano ma kaejn táké arantampin ída ákona vákan ída onóbe enóbe in kumanten mana varen mino.<sup>9</sup> Kumanten báken Pori ma vaya siyain mai vanta ano iniyáken Pori mai vanta fureture en oniyáken ma vanta ano mumunan iyain bái kanaíen kama inten mino sen inen mino.<sup>10</sup> Máa sen iniren Pori oovararen temí, “Ei arantantá orun mantano,” síkan mai vanta ano mai vaya inen kútin orun mantaven oren mino.

<sup>11</sup> \*Máan tíkan kokhon nanin banta kayo ano Pori ma varein daná ódaren Rikoniá baya finté betí ankan oovararen temí, “Ayarafenu kayo ano vantai avúaváká ten tetí ankampin erakhen mino.”<sup>12</sup> Máa siren betí ankan Banabasin nan Siusin\* ne sen inká Pori vaya sin banta vákan béis nan Emesin\* ne sen en mino.<sup>13</sup> Máan turan maen Siusii monó namun mai varu akhempá barein mairá ma mai monó ánon banta vá banasi vá ano manáa afon burumakaó bá manáa faravá asína uran má mamaren Banabasin nú Porin nú íkun uan

ameno van mai varui yafu onará oren mino.

14 Máan tiyain baya ma Banabasin nú Porin nú ma inen maen békani ona yákaren mai nanin banta kayo aúbaná tavaen oriyáken oo vararen temí,  
15 \*“Banta kayo oe, fará ma avúavá barano van iya rafono. Berasan tireti ma einí ukheruna vantant báké mai ma veni ana i vain avúavá ma variyaona finten tiretin avión para van oriyan ban Tiyarafenu ano ma inaru vá bara vá un non má mai aúpin ma minó danasinta vain ma uvantein banta vaípá kaono van mi kama vaya fóké tiretin tiamiyá uno.

16 \*Tiyarafenu ano gefá áikan ara ara vara finté nanin banta ano vetí anunu ano ma orein avúaváká baren oriyaren mino.

17 \*Máan tiyan mifo véi ída manáá yaná úaviran bei avábá anien ayon pintena á dan eriyan inká béis kama áou amíkan dunan ampan kauri niyan nan tiretin aúpin amusin bíkaan tiyan mino.”  
18 Mai vaya fóké Banabasin nú Porin nú ano ákonaen are uantiyan mifo vanasi ano míkaní vaya ída ininton iyaníen míkaní ikun uan ameno van iyaren mino.

19 \*Máan tiyákan Antiokí barurákena manáá Yutan kayo vá Aikoniamú baru rákena vá ano Ristará barurá eriven banasi arápini íkan betí ano Porin ará uman daantáden onámaná anka man kaúden inka furen mino siren kákán baru finté yo yarifen baru akhempá morun karúden mino.  
20 Máan turan mifo Yisasintá ma mumunan iyá ein kéká ano o iyen eúkuyíkan Pori orun mantaaren evárañen kákán barufín o varen ená damú Banabasi má Debé barufá oren mino.

### *Porin Nú Banabasin Nú Ano Ma*

\* 14:15: Íbo 146:6; Apo 10:26    \* 14:16: Apo 17:30    \* 14:17: Yer 5:24    \* 14:19: Apo 17:13; 2Ko 11:25    \* 14:22: Apo 15:32; 1Te 3:3    \* 14:26: Apo 13:1-2    \* 14:27: Apo 15:4, 12

### *Auyen Mumunan Kékái Ará Ákona Uantein Baya Ino*

21 Debé barufá o varen míkanan mano Tiyarafenu kama vaya mai varufin tiamíkan banasi ano Yisasintá mumunan en orera iyákan ínaiimpáké békakan evaránen Ristará barufá bá Aikoniamú barufá bá Antiokí barufá bá oren mino.  
22 \*Oriven míkanan mano Yisasintá ma mumunan iyá ein nanin banta mo ákona uantiyáken temí, “Uman kayofin orivétiféi ínaiimpáké Tiyarafenu Yafisin aúpin oró tifanté umpo fura sikhein mumunanta sá mantaan ákona ono,” sen e siamen oren mino.  
23 Máa sen oriyáken Porin nú Banabasin nú ano yunan auraren amúkiyáken Yisasintá ma mumunan iyain nanin bantará ma kanaén dafiseren ukhein banta kayo aní uren ayan ánontá kauren amúkuanten mino. Máan turen mana mana monó namuntá dafidú uantáden betí ankan Bafan ayampin kaen mino.

### *Porin Nú Banabasin Nú Ma Siriá Bara Fin Antiokí Barufá Evaránen Orein Baya Ino*

24 Máan turen ínaiimpáké Banabasin nú Porin nú ano Pisidiá barafá oriaren Pamfriá barafin oren mino.  
25 Oriven ma Pekhá barurá Tiyarafenu vaya siamíden maen ínaiimpáké míkanan Atariá barufá araven mino.

26 \*Orun baren ma míkanan monó doran kíporen maen mai ma monó nanin banta kayo ano ma vékanan tarisari urantin mai yorári ino van ma Tiyarafenu ayampin kaein baru mai Antiokíi varéin maifá sipi varen oren mino.

27 \*Oriyan baren míkanan mairá o unaven mai ma Tiyarafenu ano vékanan ayan táke uaren ena anan nanin bantai mumunan ona ma yiatein baya monó nanin banta mo átaru uádaren tiamen mino.

28 Tiamíden maen békakan Yisas-intá ma mumunan iyain nanin banta kayo vá manáa ayáká baren mino.

## 15

*Yerusalem Ma Yisasin  
Bákuriyain Kayoi Ánon Banta Kéká  
Ano Átaru Ein Baya Ino*

1 \*Yudiá kena manáa vanta kayo ano Antiokí araven morun monó nanin banta kayo araíen afova amiyan temí, “Tiretí ankan ma Mosesini avúavá ída yakhafe srietí au ma ída kavesín maen Tiyarafenu ano ída kanaén tiretí ankan evaránen aviranten mino.” 2 \*Máan ma siyain baya van Pori nú Banabasi nú mai vanta kéká bá asiven mino. Máan tiyan monó nanin banta ano vaya sian damuaren Porin nú Banabasin nú bá inká ena mumunan banta kayo vá aní uren Yerusalemí ma vain aposeri kayo vá inká monó doran banta kayo vá mai vaya mo funtarano van Yerusalemí tiantan oren mino. 3 Monó nanin banta kayo ano vetí ankan tiantan oriyáken Fonisiá bara vá Sameriá bara vá aúbanapin ma vain kéká afova amiýáken temí, “Tiyarafenu ano ena anan nanin banta kayo ará baéden aviren mino,” síkan maí kan barufin ma mumunan nanin banta vain mano mai vaya iniren amusin en mino. 4 \*Betí ankan Yerusalemí onóbíkan mumunan nanin banta kéká bá baya varen orin banta kayo vá monó doran banta kayo vá ano amusin uren Porin nú Banabasin nú aviren mo khain Tiyarafenu ano ma vékanan ayantá ma varein danasinta vetí ankan tiamen mino.

5 Máa síkan Farasisi kéká pítena manáa mumunan banta kayo ano orun mantaven temí, “Ena anan banta kayo ano ma setí

ankampin ma e ferano van inti vá betin au kare Mosesini man baya siamesin ná mai ánaín dakhafino.”

6 Máa síkan baya varen orin banta kayo vá monó doran banta kayo vá ano mai vaya funtarano van átaru en mino. 7 \*Átaru uven betí ankan kokhon ná baya sirákan Pita e mantaven betí ankan tiámemí, “Tifá tiváeyan noe, srietí ankan afová ukha ono gefái Tiyarafenu ano srietimpin doran daíden téin aní iyáken ena anan nanin banta kayo ano vá kama vaya sen too fentena iniren ná mumunan ino sikhen mino.

8 \*Tiyarafenu ano minó nanin banta kayoi ará afová uren kana van mino siyáken Kantá Aunan tetí ankan ma simeiníen betí ankan amiyan mino. 9 Béi ída setí ankan ena avúavasíen betí ankan ena avúavasíen iyan mino. Betí ankan béintá mumunan íkan mai mumunan manon betin aní íkan mi véin avorá maman avusese iyan mino. 10 \*Máan tukhen mifo fará tinafu siráo fi seti safu mai ída kanaí é bararen uman kayo mamariyá monó nanin banta amempin kuviyáké Tiyarafenun akhenóka uan oniya rafono.

11 \*Bafan Yisasin ano ma sarisari ukhein nará mumunan ékun ná mai vanta kayo ma evaránen avireiníen ná Tiyarafenu ano setí ankan má evaránen tivirano.”

12 Pita máa sirákan mai ma átaru ukhen baré ein banta kayo ano ída mana vaya sinton Banabasin nú Porin nuí vaya átaren amiren inikhan Tiyarafenu ano ma vékan pinté uaren ma enará ukhein ákona vá aní danasinta vá má ena anan nanin banta aúbaná ma mantaré ein nan tia-men mino. 13 \*Békakan baya sian kíparan Yemisi máa semí, “Tifá tiváeyan noe, senti vaya vá ineno. 14 Tiyarafenu ano ena

\* 15:1: Kar 5:2 \* 15:2: Kar 2:1 \* 15:4: Apo 14:27 \* 15:7: Apo 10:1-43 \* 15:8: Apo 10:44; 11:15 \* 15:10: Mat 11:30; Kar 3:10 \* 15:11: Kar 2:16; Efe 2:5-8 \* 15:13: Kar 2:9

anan bantafin oriven betí ankan avían bei kékasí ono van iyákan pefái Saimoni ano\* setí ankan tisimikhen mino. <sup>15</sup> Sakhanampa vanta kayo ano ma uvamádan baré ein bompon má dere ano manaí ukhen mino. Mai vompon mano máon mi sikhen mino.

<sup>16</sup> Ínaimpáké téi ovaráne erivé

Devitini yavaráe namun ma eravukhá ein maman mantanté uno.

Béin amákompin evaráné uvaman kaúdē

pefá ma varé einí uan kaúdékun

<sup>17</sup> manáa vanta ma me á inain kéká anon Bafan nan dosintin inká ena anan kéká pinté ma sen tíví mamaren bain kayo anon mumunan intéin

Bafan mano ma sikhá ein mai yanasantan afokáen mino.’

*Amo 9:11-12*

<sup>18</sup> Pefa suron mi ma yanasantia ma afokáin nain baya sikhán afová ukharen mino.’

<sup>19</sup> “Máon tukhen mifo séi ma iniyarúna setí ankan ída vá ena anan banta kayo ano ma ará baéden Tiyarafenu vaípá oriyan uman ameno. <sup>20</sup> \*Erí tetí ankan mana vompon uvamádé kun betí ankan baípá orintí betí tiamiyáke ída vá kampun ayarafenuntá ma íkun uran dunan barano seno. Mai avúavasí ma uran dunan mano Tiyarafenu avorá painí ukhen mino será inká betí ankan nan ída vá ena nanin banta kayo vá banasiúin avúavá barano será inka ída vá banta kayo ano ma amempin anan damuren ariyain tafúna kayo ne vá nare ma fara vain tafúna kayo ída vá nano sé tian amé tifano. <sup>21</sup> Para vara seyo, fefá ma eriyan taréa ma eman kanaí iyain minó barufá ma Yutan kayoi monó átaru namun ma vaimpin Mosesini man baya

ena ena Sabati yamú tiamiyan inikhen mino.”

*Yerusaremíké Ma Mana Vompon Uvaman Ena Anan Nanin Banta Amein Baya Ino*

<sup>22</sup> Máa siren aposeri kayo vá Yisasini mumunan nanin bantai monó doran banta kayo vá monó nanin banta kayo vá ano vaya sian damuaren betin pinke manáa vanta aní ureñ tiantantin Porin nú Banabasin nú bá Antiokí orino van en mino. Mana vanta mai Yudasi nan ma Basabasi ne siyain má inká ena vanta Sairasi má ino. Békanan maman monó nanin banta kayoi ánon bantaién mino. <sup>23</sup> Békanan ayantá betí ankan bompon uvamá diyáken temí,

Tetí aposeri kayo vá monó doran banta kayo vá inká tiretini monó afá aváeyan má ma varuna ano ma vompon uvadé máa sé uno:

Tireti ena anan nanin banta kéká pinté ma Yisasintá mumunan iyaona kayo ma Antiokí baona vá Siriá barafin ma vaona vá Sirisiá barafin ma vaona mai kayofin mái oren mino.

Tifá tiváeyan noe, bayan mino.

<sup>24</sup> Tetí iné kun maen tetin pinté manáa vanta kéká ano seti ída sianterunará tireti ankampin oriven betíi vaya fóké akhokho amiren tiretií ineine assuse uantiyan mino. <sup>25</sup> Máon tiyain nan mi setí ankan mai yaná ma afoká iyain baya iniréi setí ankan tirá manafiní uré moeké tinunu iyaruna sifá tiváe kan Banabasin nú Porin nú bá kankanan tifá tiváen má aní uré tianté kun orino van tetí ankan baya sian damuadé uno. <sup>26</sup> Békanan ma furin nain nan ída feranton kasaen Bafan Yisasi Karaisin aví tian páman inten mino. <sup>27</sup> Máon tukhái setí ankan Yudasín nú Sairasin nú tianté kun tireti ankan baonafá oriven betiyantá mo vaya sian amá inten mino. <sup>28</sup> \*Kantá

\* **15:14:** Saimonini ena ví maen Pita ino.  
Mat 23:4

\* **15:20:** Eks 34:15-17; Riv 17:10-16 \* **15:28:**

Aunan mano setí ankan má bakái ída siretin kokhon uman amenuna van inikhéi ma vaya sian damuádé umpo vá mai avúavá anáin mana vá dakha-fono.<sup>29</sup> Kampun ayarafenun kayo ma íkun uantanton ma aruran nain tafúna saretí ankan ída vá neya inká nare ma fara vain tafúna kayo ída vá neya inká banta kayo ano ma amempin anan damuren arin nain tafúna ída vá neya inká ena nanin banta kayo vá ma vanasiún avúavasá ifá ono. Tiretí ankan ma mai avúava sintará dafisinteya mai kama in nono.

Inka ino.

<sup>30</sup> Máa siren monó nanin banta ano mai vanta kayo siantan Antiokí araven monó nanin banta kayo morun iyanuan átaru uren mai vompon amen mino.

<sup>31</sup> Amíkan mai nanin banta ano mai vompon dankáden béti ankan ma ákona uantan kama vaya ma inein nan amusin en mino.

<sup>32</sup> Yudasín nú Sairasin nú sakhanampa vantá kan baren békaran mano monó nanin banta kokhon ná kama vaya kayo fóke tiamiyáken mai avúavá póke betíi ará ákona uanten mino.

<sup>33-34</sup> Antiokí békaran manáa ayáká baré íkan ínaiimpáké monó nanin banta ano susu siantáden ará kusin masá orono siran mai ma siantan erikharé ein banta\* kayo vaípá evaránen oren mino.

<sup>35</sup> Orivíkan Porin nú Banabasin nú Antiokí barurá para váken manáa kokhon kayo vá békaran Bafani vaya siamiyan afova amen mino.

*Porin Nú Banabasin Nú Ma Kákan Asivirí Ein Baya Ino*

<sup>36</sup> Manáa yamú orivíkan Pori ano Banabasin tiamiyáken, "Bafani vaya ma erasan pefá tiamerúna kayo evaráné minó barufá noké oné eúkiyá maé betí

ankan kaná ban nafi afová onté tiféuno."<sup>37</sup> \*Máa síkan békaran má Yonin nan ma ena ví Maki ne siyain banta vá Banabasi aviré orono van ten mino.<sup>38</sup> \*Máa tíkan Pori siyáken, "Mai vanta ano gefá Pamfiriá barafá erasan má oren doran nain nañ ifá ukharé ein erasan má ída orinten mino."<sup>39</sup> Máa siren mai van békaran kákán asivirí uren békán enádá bá ída manafín doren mino. Banabasi ano Makin aviären mana sipifin kádusiven Saiparasí mušóka oren mino.<sup>40</sup> Máa tíkan Pori ano Sairasin avíären békaran orono van íkan monó nanin banta ano siyáken Bafani avábá ano vá tirékan má bano sen tiamen mino.<sup>41</sup> Máa sirákan békaran Siriá bara vá Sirisiá barafá bá oriven mai akhempá ma monó nanin banta kayo ma vain ákona uanten mino.

## 16

*Timoti Ma Porin Nú Sairasin Nú Bá Monó Dorarí Ein Baya Ino*

<sup>1</sup>\*Pori ano Debé barurá onóben mai ráké Ristará barufin oríkan maifin mana mumunan banta Timotin ne sin be anóe Yutan nanin báken mumunan iyain maen be afóe Kiriki vantán baren mino.

<sup>2</sup>\*Ristaráké bá Aikoniamú baru rákena vá monó afá aváeyan mano véin kákantá amo siyan mino.

<sup>3</sup> Porini anunu ano Timotin aviré orono siren bén au khaen mino. Para vara seyo, mai akhempá ma vain Yutan kayo ano afováí ukhan ben afóe Kiriki vantán bain bákán mino.

<sup>4</sup>\*Máa turen Pori mai kéká bá minó barurá oriven mai ma Yísasini mumunan nanin bantai ánon banta kayo vá aposeri kayo vá ano ma Yerusalemí ma sian ákona ein baya e siamen oriyáken temí, "Ma vaya inire vá dakha-fono."<sup>5</sup> Máa sen ákona uantan baya mumunan nanin banta siamiyan mai kéká ano mo ákona iyan maen ena ena

\* **15:33-34:** Manáa vompompin ena vaya asótúen ena ves 34 fin máa síkhen mino, 34 Sairasi Antiokí bano van en mino. \* **15:37:** Apo 12:12, 25 \* **15:38:** Apo 13:13; Kor 4:10 \* **16:1:** Apo 14:6; 2Ti 1:5 \* **16:2:** Fir 2:19-22 \* **16:4:** Apo 15:23-29

mumunan nanin banta e asotú iyan mo kokhonién mino.

*Porin Ma Auu Vaerein Baya Ino*

<sup>6</sup>\* Kantá Aunan mano vetin nan ída vá Esiá barafá mo monó baya siameno siren airo ananí uantiyaimpin Pori má bei kéká bá ano Kaesíá bara vá Firikhiá baravái minó akhempá orera uven monó baya siamen mino. <sup>7</sup> Oriyaren Misiá bara akhempá ma onóben Bitiniá barafá orono van íkan maen Yisasini Aunan mano ída vá orono sen mino. <sup>8</sup> Máa siyaimpin Misiá bara esanten Troasí barafá araven mino. <sup>9</sup> Mai inurán Porin auu vaédan Masedoniá bara fáké mana vanta ano mantákhen Porin ákonáen ariyan temí, “Ma ufa ekháde Masedoniá erive vá tiya ono.” <sup>10</sup> Porin ma auu vaédan má ódarár maé mai varafá mo vanasi siamino van mi setin tariyan mino siré Masedoniá barafá orono van útaé tiféuno.

*Firipaí Baru Fin Ma Ridia Ará Baerein Baya Ino*

<sup>11</sup> Máa siré Troasíké mana sipifin kumamé un nompín Samotresí barafá puntadé onóbé ená damú Neaporisí barurá o uné tiféuno. <sup>12</sup> Mai varu me ampiré maé pefá ma Romu ano Masedoniai varafin kákón baru vaimpin ma mo varuí ma ukhá ein Firipaí barurá manáa yamú o varé tiféuno.

<sup>13</sup> O varé Sabati yamú mai kákón baru me ampé aravuaré mana non akhempá timukó tifano van oriyá onékun anasi kéká átaru ukhái mai nanin kayo vá o khumamé monó baya siamé tiféuno. <sup>14</sup> Mai nanin kayo fintena mana Taiatairá baru rákena naniq Ridian ne sin báken béis náráre davaráe kayo kain bákán miyaní iyain ban maen béis Tiyarafenurá monó tiyain baréin Bafan mano ven aú ona yiran Pori ma kama vaya sein mai vaya máa inen

mino. <sup>15</sup> Inire Ridian má bei kéká bá ma monó non péden maen temí, “Ten nan ma Bafantá mumunan iyan mino ma se sireti ankan iniyante mae ereya sen timápin o vano,” sen tetin ínanen taren mino.

*Porin Nú Sairasin Nú Ma Firipaí Karivusifin Pákaañ Kaein Baya Ino*

<sup>16</sup> Maná damú amúkin barurá orono van oriyaré é tiféku mana miyan ída van doran arinta namu aunan mano véin pákakhán ínaiimpá ma erin nain danáká sakhanampa vaya siran maen beni yafisin kayo ano kákán miyan bariyain baré íká béin má o fóké uno. <sup>17</sup>\* Pori ma setin má oriyán maen mai arinta ano sínain dakhafen eriyáken oovararen temí, “Ma vanta kayo maen Dan Bain Tiyarafenui yoran banta kékáí váken para van aunan baran aa ma orikhein bayan tiamiyán mino.” <sup>18</sup> Mai arinta ano ena ena máa sen oriyán baré íkan maná damú Pori iníkan aí pefe iyaimpin béis yo vaéoren mai aunan tianten temí, “Yisasi Karaisin avíká éi mai arinta me ampiré orono,” síkan esé ana mai aunan mano mai arinta me ampiren oren mino.

<sup>19</sup> Orivin mai arintai yafisin kayo ano onákán betí ankan ma moní bariyáré ein ída aaí iyaimpin mai kayo ano Porin nú Sairasin nú pákaren do yarifen átaru varurá ayafa vanta kayo avorá mo khaen mino. <sup>20</sup>\* Békakan darifen baya ma yaimin banta kéká avorá mo khaúden máa sen tiámemí, “Ma Yutan bantá kan mi váken ma varufin uman maman dákkó en asuse iyan mino. <sup>21</sup> Békakan manoi Romui varafá ma are ukhein avúavá maman dákkó uren banasi afova amiyan mino.”

<sup>22</sup>\* Máa síkan banasi o átaru uven Porin nú Sairasin nú ákonáen asen aufin baya siyaimpin baya

\* 16:6: Apo 18:23 \* 16:17: Mak 1:24 \* 16:20: Mak 13:9 \* 16:22: 2Ko 11:25; 1Te 2:2

yaimin banta kayo ano síkan békani auí daná do vararó uan karúdaren dafiyó ankamen mino. <sup>23</sup> Békakan ma yafiyó namu ankamirí uren maen aviren mo karavusifin karúdaren karavusi namuntá ma yafisin banta van ákona e vá békantá dafiseno sen tiamen mino. <sup>24</sup> Máa síkan mai vaya iniren mai namuntá ma yafisin banta ano vékan aviren mai namumpin ma aúbaná bain karafarampin mun kaúden daa khaeádon békán arantantá kaúden damen mino.

<sup>25</sup> Máaon turan báken inuran aúbaná Porin nú Sairasi nú ano Tiyarafenurá amúkiyáken í diyan ena karavusi kéká ano iniyaren mino. <sup>26</sup> Iniyaré íkan anú deiníen kákantá bara kaya iyain má mai mái namádan kayo kaya iyain má manáda ona yiven orera íkan minó karavusi ayan arantantákena seni anan útufen oreraen mino. <sup>27</sup>\* Máaon tiyain má mai namuntá ma yafiká ein piripo vanta ano orun mantaven onákan ona yiven orera ukhan inka karavusi kéká karan oren mino siren bei vaenati orun danú aren beyantá beyan arono van en mino. <sup>28</sup> Arono van íkan Pori avádóden ooavararen temí, “Minó ano ída kharan orera ukhé tifé umpo ída vá eyantá arono.”

<sup>29</sup> Máa síkan mai firipo vanta ano oon ure ereno sen oovariyan tavaen Porin nú Sairasin nú ma vain karafarampin ódiven akhokho ano avinantan diyaimpin békán baintá un baren aron kanan daféden matimen mino. <sup>30</sup>\* Máaon turen békakan aviren barufá morun kaúden in-aemí, “Kákán bantá kan noe, inte avúavasá uré kun ná Tiyarafenu ano evaránen tiviranten nafino.”

<sup>31</sup> Máa síkan békán mano veín evaránen tiamemí, “Bafan Yisasintá ma mumunan esin maen mi éi má ei kéká bá evaránen aviranten mino.” <sup>32</sup> Máa siren Bafani vaya

mai vanta vá be amápin ma varé ein kéká bá tiamen mino. <sup>33</sup> Mai inuran mai áourá anan mai firipo vanta ano Porin nú Sairasin nú aviren namon mo sesé uantádan béin má bei kéká bá monó non péantén mino. <sup>34</sup> Máaon turan mai firipo vanta ano Porin nú Sairasin nú aviren be amápin mo khaúden kákán dunan táden amin niyákan bái má minó bei kéká bá ma Tiyarafenurá mumunan ein nan béin aúpin amusin bíken mino.

<sup>35</sup> Máaon turen bákan kakhen ákurási iyain má baya yaimin banta kayo ano vetíi firipo kéká tiantan mai ma karavusi namuntá ma yafiká ein banta mo siamemí, “Mái kan banta karavusi finté útuantesin orino.” <sup>36</sup> Máa síkan mai firipo vanta ano Porin tiamemí, “Baya ma yaimin kéká ano siré kanan karavusi fintena vá utúantano sen mifo vá tirékan ará kusin masá orono.”

<sup>37</sup> Máa síkan Pori mai firipo kéká máa sen tiamemí, “Berasan Romúke vantán bákun ída kamaen kó tiren ana afováin banasi avorá dafiyó tinkáden karavusifin kai baréekun aúpáké ma sisintano van iyain mai ída kama ukhen mifo mo sesin mai vanta kayo eriven e sivian kaintisá aravono.”

<sup>38</sup> Máa sen tiamíkan mai firipo kéká ano Porini vaya varen mo vaya yaimin banta kéká tiamíkan iníden Porin nú Sairasin nú Romú bantá kan baré íkan mai van akhokho van en mino. <sup>39</sup> Akhokho van uren baya yaimin banta kayo ano karavusi namumpin oriven mo sirun noe siren Porin nú Sairasin nú do aviren barufá morun kaúden mai varu me ampireñ orino van míkanan tianten mino. <sup>40</sup> Karavusi namun ma me ampireñ Ridian amápin oren mo monó afá aváeyan ákona uantan baya siamíden békán mai varu me ampireñ oren mino.

## 17

### *Porin Nú Sairasin Nú Ma Tesoniká Barufá Baré Ein Baya Ino*

<sup>1</sup> Porin nú Sairasin nú ma Amfiporisí baru vá Aporoniá baru vápin ma onóben maen Tesaroniká barurá oríkan mai varurá mana Yutan kayoi monó átaru namun baren mino. <sup>2</sup> Bákán Pori ve avúavá baren monó átaru namumpin ódiven kanú manaú Sabati yamú Tiyarafenui vrompon dóki fintena vaya vanasi vá tiren iniyaren mino. <sup>3</sup> Máan tiyáken maen Tiyarafenu ano ma aní ukhein banta ma uman baren púaren ma furin pinté orun mantanten ne ma vrompon dóki ano sikhá ein mai Yisasi ino. Béin mi Tiyarafenu ano aní ukhein bantan báká beni vayan tian dákó iyá uno sen beni ana vaya siamen mino. <sup>4</sup> Mái síkan inireñ manáa Yutan kéká bá kokhon ná Kiriki kéká ma Tiyarafenu van periyain kayo vá inká manáa ánon nanin kayo vá ano Pori ma siamein baya van mumunan iyáken békán ánaín dakhafen mino.

<sup>5</sup> Máan tiyaimpin manáa Yutan kayo ano ará uman daantáden Porin nú Sairasin nú arintin purino van átaru varurá ma aau vanta kéká ma vain má kokhon nanin banta vá iyanuádaren mai kayo arapinien mino. Máan tikan Yasonin ne sin banta amá ona mo varákuren Porin nú Sairasin nú o aviré banasi vaintá merano van mo yosen mino. <sup>6</sup> Dosíkan míkanan ída vaimpin bádiyáken Yasonin má manáa mumunan afá aváeyan má do yarifen baru ánon banta kayo avorá mo khaúden oovaren temí, “Ma vanta kayo anon minó akhempá nóken aau maman dákó iyain bákán taréa ma varufin e van mino. <sup>7</sup>\*Máan tiyan mi Yasoni anon betin avían be amápin kain báken mai kéká ano Sisaní vaya yurafúden ena Yisasin ne sin banta van kin ban mino

sen banasi siamiyaren mino.”

<sup>8</sup>Mái síkan mai varu fintena nanin banta vá ánon banta kayo vá ano ma mai vaya inireñ amino iyáken kokhon ineine en mino. <sup>9</sup>Mai vaya iníden ánon banta kayo ano síkan Yasonin má mai ma fáken erein kéká bá ano kó miyaní uran betin ampiantán oren mino.

### *Porin Nú Banabasin Nú Ma Beriá Barufá Baré Ein Baya Ino*

<sup>10</sup> O vakan ma inuraní iyain má monó afá aváeyan mano Porin nú Sairasin nú tiantan Beriá barufá onóben Yutan kayoi monó átaru namun ma vaípá oren mino. <sup>11</sup> Beriá barurá ma vain Yutan kayo ano Tesaronaiká barurá ma vain Yutan kayoi avúavá esantakhen pasen Porin nú Sairasin nú ano ma siamein baya kayo iníden amusin iyáken Tiyarafenui vrompon dóki fintena ena ena yamú dankáden maen daíden mai ma siyain baya furá tiyan nafino van oniyaren mino.

<sup>12</sup> Ódaren Yutan kéká pintena kokhon ná nanin banta vá manáa aví ma vain Kiriki nanin kayo vá kokhon Kiriki vanta vá ano mumunan en mino.

<sup>13</sup> Mumunan iyáken Pori ano Tiyarafenui vaya ma Beriá barurá banasi siamiyain baya Tesaronaiká baru ráke Yutan kayo ano iníden oren mai varurá o vanasi iyanuádaren arápiní íkan betin máden intanen aşuse en mino.

<sup>14</sup> Máan tiyaimpin monó afá aváeyan mano Porin tiantan un non akhempá aravuvíkan Sairasin nú Timotin nú Beriá barurá para varen mino. <sup>15</sup> Manáa mumunan banta kayo ano Porin aviren morun Atení barurá afa urem orun baránen édiyákan Sairasin nú Timotin nusá tiamesin ainen téi varunará erino sen Pori mai vanta kayo siamen mino.

### *Porin Nú Banabasin Nú Ma Atensi Barurá Baré Ein Baya Ino*

\* 17:7: Ruk 23:2; Yon 19:12

<sup>16</sup> Pori ma Atensi barurá Sairasin nú Timotin nú ave ukhen ma onákan maen kampun ayarafenu kayoi aman manon minó akhempá bákan ódaren ará namuen mino. <sup>17</sup>\*Máan tukhan Pori ano Yutan kékái monó átaru namumpin oriven Yutan kayo vá ena anan nanin banta vá ano ma Tiyarafenu van péden bentá monó tiyain kéká bá mai vaya sian puntariyan inká ena ena yamú átaru varurá oriven mairá ma o átaru ein nanin banta vá baya siyan iyaren mino. <sup>18</sup>Máan tiyákan manáa Epikuriani vá Sitoiki vái ineine ma yakhafiyain afova vanta kayo ano Porin má ákonaen baya fóké asive asive iyákan manáa ano semí, “Ma ma vaya uvaren noin banta ano nái yaná bayá teno vara fino.” Máa sen ina íkan manáa ano siyáken, “Ena varu fáke ayarafenu kayoi vayan tiyanten mino.” Para va ino Pori ano Yisasini kama vaya vá púkaren ma evaránen orun mantakheí pákena vaya kayon tian dákó uan amiyan mino.

<sup>19</sup> Máa siren béin do aviren kó inin kayo van ma Ariopakhusi e siyain kéká baintá mo khaúden inaemí, “Éi ma auyen baya ma vanasifin tian dákó uan amiyaona kaná beni ana sian amá esirá inétifante rafuno. <sup>20</sup>Éi ma siyaona vaya ma inétifékun maen auyen avúavákai siyan ná mai van mi éi mai vaya ana sian amá esí inétifano van muno.” <sup>21</sup>Atensi nanin banta vá ena fáke kéká ma mai varufin e vain kayo vá ano ída mana yorarí inton ena ena yamú auyen baya vá ineine vá ma yákó iyain mai vaya kayo ana siren daídion iniyaren mino. <sup>22</sup> Máan tiyan maen Areopakusí kéká aúbaná Pori orun mantaven máa semí, “Atensi banta kayo oe,

sei onékuya saretí ankan ákona e ara ara avúavá póké monosí iya ono. <sup>23</sup> Para vara seyo, sei ma eúkiyá tireti ma monosí uantiyaona yanasinta ma avóbé é oniyaré maé mana íkun uan amin onámaná ma kará nará urantá ma onékun maen *Ída Afová Ukhé Tiferuna Ayarafenu* ina ino seya vompon uvantaré enái mai ma ída afová ukhe ma monosí uantiyá eona mai saréa saretin tian amá uan amenté uno.

<sup>24</sup>\*“Ma vara vá mai áupin ma vain danasinta ma uvantein Tiyarafenu mai inaru vá bara vaí Bafan mi váken ída varará banta ano ma uvantein monó namun kayofin báé iyan mino. <sup>25</sup>\*Máan tukhen béis ída mana yana san o afasí ukhantí teti varará banta ano veín ayaó tifantéuno. Para vara seyo, veyantái minó danasinta vá auanan má banasi amé iyan mino. <sup>26</sup> Ma varafin banasi víkáhen bano van béis mana vanta finté uaren ara ara nanin banta yákó uádoren betin ma avión kain nain damú bá baru vá puntáden aní urú en mino. <sup>27</sup>\*Tiyarafenu ma mai avúavasí ein mai vanasi ano veín nan dosen oriyan o oman dákó ino siren máanten mifo véi ída setin me ampireñ nentá ban mino. <sup>28</sup> Para vara seyo, veín mái manafin báké baré aruvé iyá tifékun mai van mi saretí ankaní afova vanta kayo ano sikharé ikái vetin anavasin mi setí ankan bá tiféuno. <sup>29</sup>\*Máan tukhái Tiyarafenu anavasin ma vá tiferuna ano ída vá Tiyarafenu van kori siriva onámaná an dakhen ne será barará banta ano ma ayan póké uvaman kain danáká inin onan kaó tifano. <sup>30</sup> Pefá banasi ano mai avúavá sintá ída afová ukhen bariyan maen Tiyarafenu ano ifá uantiyaren mifo saréa minó akhempá ma vain

\* 17:17: Apo 18:19 \* 17:24: 1Ki 8:27; Apo 7:48 \* 17:25: Íbo 50:12 \* 17:27: Íbo 145:18; Yer 23:23 \* 17:29: Ais 40:18-20; 44:10-17; Apo 19:26 \* 17:31: Íbo 96:13

nanin banta ano ará baerano van béis ákonaen baya siamiyan mino.  
 31 \*para vara seyo, véi ma maná damú puntákein avuávápó bara yaimino van ma aní uran baré ein banta mai minó nanin banta ano ódaren pura ino sino van mai vanta ano ma fúkaréin purin pinte véin orun avían mantakhen mino."

32 Máo siran purin nanin banta ma orun mantan baya ma sian dákó iyain nan manáa kéká ano inian kaumpán uren kakhirun ariyan mifo manáa ano semí, "Éi mai vaya evaráne sesí inétifano van muno." 33 Máo siran kó inin banta kéká Pori me ampiren oren mino. 34 Pori ma siamein bayará manáa nanin banta ano véin dakhafen mumunan en mino. Mai ma mumunan ein kékápin mana Ariopakhusi fintena vanta Dionisisasin má inká ena Damarisin ne sin nanin má manáa nanin banta vái varen mino.

## 18

### *Pori Ma Koriní Barufá O Varé Ein Baya Ino*

1 Máo turen mai oyampáké Pori Atensí baru me ampiren Koriní barufá oren mino. 2 \*Koriní barurá oriven mai rákena mana Yutan banta Ákuíran ne sin má ofóken mino. Béis maen Pontasi bara fákena vanta váken ída ayá damú orikhan be aná Prisiran ne sin nanin má Itari bara me ampiren erikharen mino. Para va ino, Yutan kéká ma Romú barufin baré ein Sisa Kraudiasi ano minó do siantan orera iyákan mai finté erikhá íkan Pori vékan onano van oren mino. 3 \*Oren o onákan kao au fóké davárae namun uváran ábasu vákán Pori yere mai yoran afová ukharen be ábasu vá o váken mai yanasinta uvariyaren mino.

4 Máo tiyáken ena ena Sabati

yamú Yutan kayoi monó átaru namun oriven maen Yisasini kama vaya inirem mumunan ino van Yutan kayo vá Kiriki kayo vá ákonaen tútúpiyaren mino.

5 \*Máo tiyáken ikan Sairasin nú Timotin nú ma Masedoniá bara fáke eravíkan maen Pori fura sen monó bayafin o aní uven Tiyarafenu ano ma aní ukhein banta Yisasini ban mino sen Yutan kéká tiamen mino. 6 \*Máo sen tian miyákan maen Yutan kéká ano véin namuroí iyaimpin mai avúava san Pori vetí ankan anien bei auí daná kákena kayó do fupá tian karúdiyáken temí, "Tare ráké ena anan bantá kayofin mi monó baya mo siamenté umpo saretí ankan ma o aiyoranonai mai saretí nina yana ifo mai uman ída séi varanté uno."

7 Máo siren mai monó átaru namun me ampiren ena anan banta ano ma Tiyarafenurá mumunan iyain banta Titius Yastusin amá adé baré íkan mai namun oren mino. 8 O vákán monó átaru namuntá ma ánoní ukhein Karipusin ne sin banta vá bei kéká báano Bafantá mumunan íkan Koriní baru ráké kokhon nanin banta váano mai vaya iníden mumunan uren monó non peren mino.

9 Máo tiyákan mana inuran Bafan mano Porin auu vaéden tiamemí, "Ída vá perano. Mai ma siyaona vaya ída vá pákiyákeya kasae vá banasi siameno. 10 \*Para vara seyo, ma varufin tenti vanasi kokhon bain pasé téi en má túpá ukhékun éin ída uman aminten mino." 11 Máo sirákan Pori mai varurá eitini viyontá báken Tiyarafenui vaya siamiyan afova amiyaren mino.

12 Máo tiyákan Karion ne sin banta ma Akaiá barafá kamanini uvín maen manáa Yutan kéká ano manafin o átaru uven Porin namuroí uantáden do aviren kópin

\* 18:2: Rom 16:3 \* 18:3: Apo 20:34 \* 18:5: Apo 17:14-15 \* 18:6: Apo 13:46, 51; 20:26  
 \* 18:10: Yos 1:9; Ais 41:10

mo khaen mino. <sup>13</sup> Mo khauren máa semí, “Ma vanta ano setisi man bayá ma yurafurin avúavái vanasi aní iyáken afova amiyan mi enará ukhein avúavápó Ti-yarafenurá monosí iyan mino.”

<sup>14</sup> Máa síkan Pori vei vaya seno van iyain má Kario ano máa sen Yutan kayo siamemí, “Yutan kayo oe, sireti ma onesin ma sító aau fi kákán aau fi ma mantaré inain banta ma avire khópin me kaesí maéi saretíi vaya inenté uno.

<sup>15</sup> Máan tukhen mifo saretíi vaya ma inéku mae saretíi man bayá vá aví bá bayá va san mi inaeona séi mai yanásinta ída yaimonté umpo saretíi yantasá mai vaya funtarano.” <sup>16</sup> Máa siren betí ankan kó baru fintena yo sianten mino. <sup>17</sup> Máan turákan banasi ano Yutan kayoi monó átaru namuntá ma anoní ukhein banta Sostenesín kó baru rákena fákaren ankamiyákan maen Kario oman kaumpan en mino.

### *Prisiran Nú Akuiran Nú Bá Inká Aporosin Mái Vaya Ino*

<sup>18</sup> \*Máan turan Pori manág Yamú Koriní barurá baren mairá monó afá aváeyan me susu siantáden Siriá barafá orono van aravíkan Ákuira ná Pirisiran ná ábasu ano véin bákuren oriyaren Senkriá barurá orun báken ínaiimpá sipi varen orinten pefá Tiyarafenu vá tian damuádáká eiñién ánon do khaen mino. <sup>19</sup> Máan turen mai ráke sipi varen Efesasí barurá oriven Prisiran nú Akuiran nú ábasu mairá me afa uren Yutan kayoi monó átaru namun oriven betí ankan má bayaén mino. <sup>20</sup> Bayá urákan betin má manáa ayáká bano van inain Pori ifá en mino. <sup>21</sup> Ifá uren orinton iyáken betí ankan máa sen tiámemí, “Tiyarafenu ma anunu intí ovaráne erenté uno,” siren sipifin kumamen Efesasí me ampiren oren mino. <sup>22</sup> Mai

sipi ano ma Sisiá barurá mo khuádan maen mai ráké Pori Yerusalemí barufá ódiven mun mumunan nanin banta oniyáken bayan mino siren mai oyampáké Antiokí barufá evaránen araven mino.

<sup>23</sup> Mánáa Yamú ma Antiokí barurá orun baren maen mai ráké mai varu me ampiren Karesia bara vá Frikhiá bara vápin eúkiyan Yisasintá ma mumunan iyain nanin banta aya iyan ákona uanten mino.

### *Aporosi Ne Sin Banta Ano Ma Efesasí Barufá Ma Yisasini Kama Vaya Sein Baya Ino*

<sup>24</sup> Máan tiyákan Areksandriá baru fáké Aporosin ne sin mana Yutan banta ano Tiyarafenui vompon pintena vaya moéken afova mantein bákán Efesasí barurá eren mino. <sup>25</sup> Eren mifo Aporosi maen Bafani aa afová ukhen pasen moéken amusin iyáken Yisasin pákena vanasi siamiyáken Yonini monó non peran manan afová ukharen mino. <sup>26</sup> Máan tukhen monó átaru namun oriven ída feranton ákonaen baya siyaré íkan Prisiran nú Akuiran nú ábasu ano yenyi vaya inire bén do aviren békán amá moren Tiyarafenui aa fákena manáa aya íkan moéktentá afová en mino.

<sup>27</sup> Máan turen Efesasí baru me ampiren Akaiá barafá orono van muno sen Aporosi siyaimpin monó afá aváeyan mano véin ákona uantáden Akaiá barafá ma vain eyo iyampon kayo ano véin kama ino siren mana vompon uvamádan mamaren oren mino. O váken maen Tiyarafenui avábápó ma Yisasintá mumunan iyain kéká kama ayairí iyaren mino.

<sup>28</sup> \*Máan tiyáken maen Yutan kéká bá ákonaen bayafó asive asive iyáken banasi aúbaná monó dóki fintena vayafó tian amá iyáken

\* **18:18:** Nam 6:18; Apo 21:24    \* **18:28:** Apo 9:22

Tiyarafenu ano ma aní ukhein bantan Yisasi van ne sen mino.

## 19

### *Pori Ma Efesasí Barufá Baré Ein Baya Ino*

1 \*Aporosi ma Koriní barurá o vákan maen Pori anuyompin bain baru kayo fimpá eúkiyan banasi onen oren Efesasí barurá oriven mai ráke manáa eyo iyampon kayo o yosen mino. 2 \*Yosiren mai kéká máa sen inaemí, "Mumunan ma eona yamú Kantá Aunan bare rafono," sikan mai kéká ano evaránen temí, "Ída ino. Kantá Aunán ban mino sé ída afová ukhá tiféuno." 3 Máa sikan Pori evaránen inaemí, "Mai intéa monó non ná tireti varera fono," sikan betí evaránen temí, "Yoni ma aní ukhein monó non ma feren mino." 4 \*Máa sikan Pori semí, "Pefá ma Yoni monó non péantiyá ein maen mai vanasi ano ma ará baédan mí féantiyaren mino. Máa tiyáken ínaimpá ma sen toyampá erin nain bantarasá mumunan ono ma sikhá ein mai Yisasin nan mi sikharen mino. 5 Máa sen tiamin inireni mai kéká ano Bafan Yisasin avíká monó non peren mino. 6 \*Monó non pédákan Pori ano vetin árontá ayan kaíkan Kantá Aunan mano vetimpin e víkovíkan ara ara vaya vá sakhanampa vaya vá ten oreraen mino. 7 Máa ma ein mai siyan míkan mifo sirantan kan orun kádan (12) banta kayo ino.

8 Máa turen Pori kanú manaú biyontá mairá báken maen Yutan kayoi monó átaru namumpin ódiven Tiyarafenui Yafisin aú pintena vaya ákonæn tiamiyaren mino. 9 Máa sen tian miyákan manáa kéká ano mai vayará ída mumunan inton banasi aúbaná mai ma Yisasantá mumunan in Aa Ma Yakhafin Kéká ankayan

tiyaimpin Pori me ifá uren eyo iyampon kayo iyan uaren Tairanusini afova amin namun o váken ena ena yamú mai kéká bá bayaí iyaren mino. 10 Kan orana aúpin máa sen oriyan bákán Yutan kéká bá Kiriki kéká bá ma Esiá barafin ma vá ein mai minó kayo ano Bafani vaya inen mino.

### *Skivan Anin Kayo Ano Ma Namu Aunan Kayo Yo Siantano Van Ein Baya Ino*

11 \*Máa tiyákan Porin ayan táké uaren Tiyarafenu ano manáa enará ukhein danasinta afoká iyaren mino. 12 \*Máa tiyan maen asínun arumin davaráe ano fi inká aurá ma yampan davaráe ano fi ma Porin au aruvúdein baren mo aí nanin banta aurá tosain maen mai kéká aí kípiyán inká namu aunan ma varé ein mano me ampíren oriyan mino.

13 Máa tiyákan manáa Yutan banta kayo ano eúkiyan Yisasin avíká namu aunan ma vanasifin bain ma yo siantano van maen máa siyaren mino, "Mai ma Pori ano ma vanasifin tian dákó iyain banta Yisasin avíká mai kéká mé ampeno." 14 Yutan kayoi monó ánon banta ma Skiva ne sen aví tiyain banta anin kéká ma yan manápá ifo afápá kan un kádan kayo ma vain mano namu aunan do siantiyaren mino. 15 Máa ten oriyá íkan maná damú mai namu aunan mano vetí vaya iníden evaránen temí, "Mai ma siyaona Yisasin má Porin má onté umpo sireti intéa kékasa fono." 16 Máa siren mai ma namu aunan aúpin bain banta ano mai kéká ankáden ká aruren auí daná dákarán nare ana kéká ano avápá me onen má me ampíren karan oren mino.

17 \*Máa turákan Efesasí barufin ma Yutan nanin banta vá Kiriki nanin banta vá ma vain mano mai vaya iníden kákantá

\* 19:1: 1Ko 3:6    \* 19:2: Apo 8:16    \* 19:4: Mat 3:11    \* 19:6: Apo 8:17; 10:44, 46  
 \* 19:11: Apo 14:3    \* 19:12: Apo 5:15    \* 19:17: Apo 5:11

akhokho van iyáken Bafan Yisasin aví danién mino. <sup>18</sup> Mai vaya iníden ma mumunan ein kéká ano vanasi avorá e unen eriven betí ume sian dákó en mino. <sup>19</sup> Máan tiyákan manáa kéká ano ma ara ara uvátakhan baya ma uvantá ein bompon kayo varen me khaúden banasi avorá ira saman kauren mino. Mai vompon kayoi miyan ma yankafein mai fiftytauseni (50,000) drakma\* e sin moní ma sirivafó uvantein mino. <sup>20</sup> Máan tíkan mai aa fáké Bafani vaya ano ákona vá mo kákánien minó akhempá oreraen mino.

<sup>21</sup> \*Mai yanásinta ma yákó uvíkan maen Pori Yerusalemí orono van iyáken temí, "Masedoniá bara vá Akaiá bara vápin oriaré ma Yerusalemí onóbé maé mai ráké Romú barufá deren oronté uno." <sup>22</sup> Máa siren béis ayaen doran bantá kan Timotin nú Erastasin nú tiantan ben an uanten Masedoniá barafá oriyákan béis Esiá barafá manáa ayáká baren mino.

### *Efasasí Barurá Ma Kákán Aruve Asive In Afoká Ein Baya Ino*

<sup>23</sup> \*Mái damú ana Aa Ma Yakhafin Kéká san Efesasí barufin kákán uman dákó en mino. <sup>24</sup> Esé aráí in uman maen mana Demitriasin ne sin banta váken béis ano kokhon doran banta avian kain anasi ayarafenu Atemisini sitó namun sirivafó uvádán kákán monípó miyaní iyaren mino. <sup>25</sup> Máan tiyain bákán mai vanta ano vanasi vá bei yoran banta kayo vá inká ena mai yanásinta ma uvariayain kéká bá iyanuan kaúden máa semí, "Banta kayo oe, afovasá ono mai yorantái setí kákán moní bariyá tiféuno. <sup>26</sup> Máan tiyákan tiférura ifo inká tireti iniyáke onen nan Pori ano Efesasí baru rákena nanin banta vá Esiá bara fin ma vain nanin banta vá

ákona vayafó aviretavi aasái oren mino. Béi siyáken ayampó ma uvaran mai ída ayarafenu ino siyan mino. <sup>27</sup> Máan ma siyain baya ano setí ma uvadé moní bariyá tiférura yanái aa iyariyákan banasi ano Atemisintá ma monosí iyá ein má bení monó namun mái maman paen danasí inten mino. Máan tiyáken Esiá barafin má minó akhempá ma ven aví daní iyá ein maman paen danasí intin beni kákán bí asuse inten mino."

<sup>28</sup> Máa síkan mai vaya iníden mai nanin banta ano aranan uaren avadóden oovaren temí, "Efesasí nanin bantai kákán ayarafenu Atemisi ino." <sup>29</sup> \*Máa síkan Efesasí barurá ma vain nanin banta ano aran má bádiyan o átaru uven Khaiusin nú Aristakusin nú do yarifen átaru varurá oren mino. Mai ma yarifen orein bantá kan mai Masedoniákéi váken Pori má monó doraríen noren mino. <sup>30</sup> Máan tíkan banasi avorá Pori orive baya seno van ikán eyo iyampon kayo ano ída vá orono siren ayopá en mino. <sup>31</sup> Máan tiyákan Esiá barafá ma Kamanin dorampin ma Porini arona kayo varé ein mano yere véin nan ída vá banasi avorá átaru varurá orino siren baya yan baren eren mino.

<sup>32</sup> Mai ma átaru varurá o iyein nanin bantai ineine asuse ukhan, minó ano ara ara vaya esen orera iyáken nái anavará e átaru ukhé tiferafuno siren kokhon mano amino en mino. <sup>33</sup> Máan tiyákan Yutan kayo ano Areksandan avéken mun banasi avorá kaúdan manáa kéká ano venan mai ma afoká iyain baya sian dákó ino síkan béis ayan daní uren baya fákano siren beyan nan tian amá ono van en mino. <sup>34</sup> Máan tíkan banasi ano afová en onákan béis Yutan banta vaimpin minó ano

\* **19:19:** Drakma e ma siyain mai mana aintain moní an dakhein bákán mai moní ano mana vayan ma yorarí uren miyan bariyá ein má manaí ukhen mino. \* **19:21:** Apo 23:11; Rom 1:13 \* **19:23:** 2Ko 1:8 \* **19:29:** Apo 20:4; 27:2; Kor 4:10; Frm 24

oo manafiní uren kankan áau aúpin ovaren oriyaren temí, "Efesasi nanin bantai Atemisi anan kákóní ukhen mino."

<sup>35</sup> Máa siyákan Efesasi barui vompon uvaran banta ano vanasi van baya fákano síkan mai ma oovariayá ein mo fákaran béis máa semí, "Minó akhempá ma vain nanin banta ano ída afová ukhan ná kákón Atemisin aman ma inaru fáké un kararen erayin ná Efesasi baru ano mai yanaká bá beni monó namuntá dafiken nafino." <sup>36</sup> Máan tukhantin ída mana vanta ano sen mai yaná ída onté uno sinten mifo ída uron ná ámun uare mana yanasi ono. <sup>37</sup> Ma vantá kanan mano ída mana yaná monó namun pintena umoyan baren inká ída setisi anasi siyarafenu Atemisin ankayan tikheintá pasavin avire ere ono. <sup>38</sup> Demitriasin má bei yoran banta kayo vápin ma uman baya ma vanti mae mai vaya kópin maman kaúdesin ná kó inin banta kéká ano vá mai vaya yaíden ná puntarano. <sup>39</sup> Máan tukhen mifo sirectimpin ma manáa ena vaya vá ma vanti mae mai vaya vare mo átaru yarurá tiresin banasi ano vá mai vaya yaimino. <sup>40</sup> Máan tiyanti afovásá ono. Tare ma variyá tiferuna avúaváká kasaen kó tisintaren ukhen mino. Ída mana ana vaintá paran e átaru iyá tiferuna ída kanai é tian amá ótiféuno." <sup>41</sup> Máa siren mai nanin banta siantan oreraen mino.

## 20

*Pori Ma Masedoniá Barafá Bá Kiriki Varafá Bá Ma Orein Baya Ino*

<sup>1</sup> Mai ma ákonará asiviyá ein baya kayo ma mo kípavín maen Pori ano eyo iyampon kayo aran e átaru uvíkan betin ákona uantan baya siamíden mai oyampáké betí ankan me susu siantáden Masedoniá barafá oren mino. <sup>2</sup> Masedoniá barafin oriyen monó nanin banta ará ákona uantan

baya e siamen oriyaren Kiriki varafin o unaven <sup>3</sup> mairá kanú manaú biyontá o varen mai ráké Siriá barafá sipi varé orono van ein mifo ifá uren evaránen Masedoniá barafá oren mino. Mai fara va ino. Yutan banta kayo ano véin aruan purono van aúpá baya sian damuádiyain baya iníden mai van mi erikhá ein aintá evaránen oren mino. <sup>4</sup> Oríkan má véin má orein kéká maen Beriá banta Pirusin anin Sopaten má Tesaronái káke vantá kan Aristakusin nú Sékundusin nú bá Debí baru ráke vantá kan Khaiusin má Timotin má inká Esiá bara fákena vantá kan Tikikasín nú Trofimusin nú bá ino. <sup>5</sup> Mai vanta kayo ano anien oren Troasi barurá o sive ukharen mino. <sup>6</sup> O sive ukhá Firipaí barurá bá kun Yisi Ída Van Bereti Ma Nan Omá Damú esantaví mai ráké sipifin e varé oriyá kun dan manápá damú oriví mairá Troasí barurá betí ankan baintá orivé mai yarurá mana uikirá baré uno. <sup>7</sup> Baré ese araí in damú bereti kisi kisi é nano van monó nánin banta vá mana namun o átaru ukhé kun Pori vaya sen oriyen evaránen inuran aúbanasí en mino. Mai fara va ino. Ena ákurái véi orinten pasin máan ten mino. <sup>8</sup> Tari stori namumpin minó ano iyukhé tifékuñ maifin kokhon oon uruádan kiyaren mino. <sup>9</sup> Kiyákan mai namuni unduará Yutikusin ne sin pumara ano kumanten aun tókó iyan bákan Pori vaya sen oriyen baré in aunká baaren eraven barará ankamin banasi ano orun aviádaran maen mai fumara ano fükaren mino. <sup>10</sup> Máan tukhan Pori araven mai fumara orun dafayoriyan máa semí, "Ída fükén ayun para van mifo i vá akhokho van ono." <sup>11</sup> Máa siren evaránen mai namumpin ódiven bereti un máden kisiren naren ayáká baya sen oriyen mo kakhen ákurasí íkan me onen oren mino. <sup>12</sup> Orivíkan mumunan nanin banta ano mai fumara ayun para van ará

kusin má amusin iyan aviren mo mápin kaen mino.

*Pori Ma Efesasike Monó Doran Banta Kayo Ará Ákona Uantein Baya Ino*

<sup>13</sup> Pori ano Asosí baru ráke nan sipi e varanté uno siren barará oriyaimpin tetí ankan béin an uanté sipi varé Asosí barurá béin o ave é tiféuno. <sup>14</sup> O ave ukhá ekun Pori onóbí ben má do aviré sipifin Mitirini barufá oré tiféuno. <sup>15</sup> Ená damú Mitirini baru ráke sipi varé Kiosí musó akhempá onóbé ená damú Samosí barurá onobé inká ená damú Miretusí barurá o uné tiféuno. <sup>16</sup> O unavékun Pori Esiá barafin manáa ayáká ída vano van Efesasí baru esantano van en mino. Para va ino. Aaí ma intí maé Kantá Aunan ma erein damú ída erikhanti ainé Yerusaremí barufá orono van en mino.

<sup>17</sup> \*Máa siren Miretusí barurá báken Efesasí baru rákena Yisasiní mumunan nanin bantai ánon banta kayo ano e onano van Pori vaya siádan oren mino. <sup>18</sup> \*E siádan orin mai kéká ano eriyain má bái máa sen betin tiamemí, "Esé araí é ma Esiá barafin ere runa ráké tiren má anan bá oriyá bákuya senti sivútivá pefái afová ukha rono. <sup>19</sup> Máan tukhein nan téi ifí pinté teyan maman bararasí uré Bafani yorarí iyákun maen manáa Yutan kéká ano séin tiruan purono siren moéken uman timiyaren mino. <sup>20</sup> Tiretí ankan afová ukhe rono, siretin ayaen ma ará ákona uantan monó baya kayo ída mana áé umpo minó nanin banta avorá mai afova amiýá maé inká tiretin amápin e feré kuvé iyá mai yorarí é uno. <sup>21</sup> Máan tiyá maé Yutan kayo vá Kiriki kayo vá tiamiyáké ará baéde Tiyarafenu vaípá orive vá tetisi Bafan Yisasiná mumunan ono sé tiamikhé uno.

<sup>22</sup> "Máan tukhein nan mi sareá Kantá Aunani anunu vákuré Yerusaremí barufá oriyá umpo intéa yanásá ten timaniná afoká inten nafi mai séi ída afová ukhé uno. <sup>23</sup> \*Máan tukhen mifo minó barurá ma orerunafin mai Kantá Aunan mano sisimiyáken kákán uman má karavusi vá ano anan éin ave ukhen mino. <sup>24</sup> \*Máa siyan mifo ída se suu van iniyáké Bafan Yisasi ano ma simikhein doran dóan kípano van mi inikhé uno. Mai yoran mi Tiyarafenu ano ma vei sarisarifó ma evaránen tetin tivíkein mai kama vayan tian dákó onté uno.

<sup>25</sup> "Máan tukhein nan mi séi afová iyákéi mai ma varu vaintá eúkiyá ma Tiyarafenu Yafisin aú pintena vaya kayo ma siamiyá eruna nanin banta finté mana ano ída evaráne séin tonan nono.

<sup>26</sup> Máan tukhein nan mi siretin pinté ma mana ano o afeyoresí maé téi ída kanaí é mai uman barantéi sareá siretin avorá tian amá e uno. <sup>27</sup> Para vara seyo, Tiyarafenu ano ma siretin nan tiamesin ná afová en inino ma sikhá ein baya máa fefái minó tiamikhé uno.

<sup>28</sup> \*Máan tukhé umpo siretiyan kama e yaffíare vá inká tiretin nan ma yafisino siren ma Kantá Aunan mano ma amikhein nanin banta kayo rasá kama e yafiseno. Tiyarafenu ano ma ve anini narefó ma miyaní uan beinaí ukhein mumunan nanin bantarasá sipisipirá ma yafisiyain kéká an de vá dafiseno.

<sup>29</sup> \*Téi ma orivékun maen manáa nanin banta ano afá iyan ma sirempin ereiní uven sipisipi kayo ma máden asuse ono van einí intéi téi afová ukhé uno. <sup>30</sup> Máan tiyantin tiretí aúbanáké manáa ano e mantaven pura yaná do vaéden kampun bayafó Yisasin bákurin nanin bantai inin máden asuse uren iyanen orinten mino.

\* **20:17:** Apo 18:21    \* **20:18:** Apo 18:19–19:10    \* **20:23:** Apo 9:16; 21:11    \* **20:24:** Apo 21:13; 2Ti 4:7    \* **20:28:** 1Ti 4:16; 1Pi 5:2-4    \* **20:29:** Mat 7:15; Yon 10:12    \* **20:31:** 1Te 2:11

<sup>31</sup> \*Máan tinten mifo vá dafían ákona iyáke vá ovare me ineno. Kanú manaú orana áupin mi ída sivíkan te sínu finté inúpá ákurá man o amé eriyaré uno.

<sup>32</sup> Mai van mi sareá siretí ankan avián Tiyarafenui yafisimpín má béis ma sarisari ukhein baya aúpin má mä kaeruna mai ano vá tiretí ankaní ará ákona uantiyá intí vá bení kantasi ukhein nanin banta ano ma o varan nain avábosá barano. <sup>33</sup> \*Téi ma saretin má báké maé ída mana nanin bantai siriva fi kori fi inka kama auí danasa rafi sinunu iyá uno.

<sup>34</sup> \*Máan tiyá umpo sreti afovasá ono, te siyampói minó danasinta uvadé teyan tiya iyá inká tesi mana yoran kéká ayaé iyá uno. <sup>35</sup> Ákona yorarí uren ma ona i van kéká ma ayain inka saretin aní é uno. Bafan Yisasi ano ve oo fenté máan mi sikharen mino, ‘Ena vanta ma amin kékápin mi moéken avábá ban mifo ena finté ma varan kékápin ída avábá ban mino’ ma sikháré ein baya vá ovare me ineno.”

<sup>36</sup> Mai vaya kayo sian kíparen Pori aron durafúden mai nanin banta kayo vá amúken mino. <sup>37</sup> Máan turan mai kayo ano Porin o yafayóden iffí diyáken amónen mino. <sup>38</sup> Mai ma vetí ankan ma moéken arunaná barein maen mai ma Pori sen téin tiyafen ída evaráne sonan nono ma sein baya van mino. Máan turen bén aviren sipifin mo afaen mino.

## 21

*Pori Má Bei Mana Yoran Kéká Bá Ano Ma Yerusaremí Orein Baya Ino*

<sup>1</sup> Efesasí baru ráke monó doran banta kayo ída me amperen iyá maé ayan amantiyá tusu siantadé sipifin un kumamé puntadé Kosí musóká oré uno. O varé ená damú Rodesí musóká onóbé mai

ráké Patará barurá oré tiféuno. <sup>2</sup> Patará barurá o varé iné tiféku maná sipi ano Fonisiá barafá orinton iyane siyaimpin mai sipifin kumamé oré tiféuno. <sup>3</sup> Oriyá baré Saiparasí musó adé ayan ópá oriáré Siriá barafin Taiyá barurá o unavé tiféku mai varu rákena yanásinta ma varen oriyá ein mo khaen mino. <sup>4</sup> \*Máan tiyaimpin tetí ankan Taiyá barurá eravuvé mumunan nanin banta van e yosé oriyá o odaré betin má dan manápá ifo afápá kan un kádan damú bákun Kantá Aunan pintena mumunan nanin banta ano maná inin mamaren Porin ayópá en ída vá Yerusalemí barufá orono sen mino. <sup>5</sup> Máq sirá bákuñ tetisi orin damusí iyain má mai varu me ampiré oré tiféuno. Minó mai varuráké ma Yisasin bákuriyain banta kayo vá betí aná akhafana vá ano Taiyá baru me ampiren tetin tiviren un non akhempá morúdá eyu ampantá tiron durafúdá timuké tiféuno. <sup>6</sup> Timukuré inaimpáké tiyan timantin maran uré tetiyan sipifin odékun maen betí evaránen barufá oren mino.

*Akhabusi Ne Sin Mana Sakhanampa Vanta Ano Ma Porin Amaan Baya Siamein Baya Ino*

<sup>7</sup> Máan turé Taiyá baru me ampiré sipi varé oriyá baré Toremaisí barurá o unavé tifé mai rákena mumunan nanin banta o ódaré, bayan mino siré tifé betí ankan má mana vayan baré tiféuno. <sup>8</sup> Baré ena ákurá Toremaisí baru me ampiré oriyá baré Sisariá barurá o unavé maé monó baya ma sian banasi amin banta Firipin amá o varé tiféuno. Mai ma vaya varen orin kéká ma yunan ayaino van dan manápá ifo afápá kan un kádan banta kéká ma aní uran baimpin ben mái van mino. <sup>9</sup> Béi kamí kamí arinta kéká dan báken banta ída varanton para van maen

\* **20:33:** 1Ko 9:11-12    \* **20:34:** Apo 18:3; 1Te 2:9    \* **21:4:** Apo 20:23    \* **21:8:** Apo 6:5; 8:40

sakhanampa vaya kayo siyaren mino.

<sup>10</sup> \*Máan tiyáká mai varurá manáa yamú ovátifékun Yutan bara fáké mana sakhanampa vanta Akhavusin ne sin mano eren mino. <sup>11</sup> \*Mai vanta ano seti varunará eriven Porini amú anan e máden be ayan arantantá damuren máa semí, "Kantá Aunan mano sisimiyáken, 'Yerusaremí ma vain Yutan kayo ano ma avúavá anan baremi ma amú anan afóen ayan arantantá damuren ena anan banta kayo ayampin kainten mino.

<sup>12</sup> Máa siká mai vaya ma iniré tifé mai varu ráke nanin banta vá Porin nan ída Yerusaremí barufá odino van ayópa é tiféuno. <sup>13</sup> \*Ayopá é tifékun béis evaránen temí, "Pará tiretí ankan ifiso vaso iyayá ten tikuna simiya rafono. Bafan Yisasín aviká ma sen tiyan tirantantá ma yamin nan mana va útakhe raumpo Yerusaremí ma sen tiruan purin masan deren útakhé uno." <sup>14</sup> Máa siká ínané ayópa é tifékun Pori yo yurú en oronté uno siyaimpin mairá mo ifá uré máa sé tiféuno, "Bafani anunu áesin ná dákó ino."

<sup>15</sup> Máa siré mai oyampáké tetisina yanásinta utaaré Yerusaremí barufá odé tiféuno. <sup>16</sup> Ódékun Sisiáriá baru ráke manáa eyo iyampon kayo ano siviren ódein mana mana feyan eyo iyampon Saiparasíke vanta Nasonin amápin mun kaí baré tiféuno.

*Pori Má Bei Mana Yoran Kéká  
Bá Ma Yerusaremí Ódein Baya Ino*

<sup>17</sup> Yerusaremí barurá ma e uné odé tifékun maen monó tifá tiváeyan mano amusin iyáken tiviren mino. <sup>18</sup> Máan turá baré ená damú Yemisin onano siré oré tifékun Pori setin má oríkan minó monó doran banta kayo vá e átaru

en mino. <sup>19</sup> \*E átaru uvíkan Pori mai kéká ará kusin baya siren mairá Tiyarafenu ano ma veni monó doran pinté uaren ma ena anan nanin bantafin ma ara ara yorari ukhá ein baya siamen mino.

*Pori Ma Yerusaremí Kákán  
Monó Namumpin Ma Tiyarafenu  
Avorá Avusesein Avúavasí Ein Baya  
Ino*

<sup>20</sup> \*Siamíkan mai ánon banta kayo ano Porini vaya inidaren Tiyarafenu aví daní iyáken temí, "Tifá tiváe oe, éi afovásá ono. Kokhon tauseni Yutan kayo ano inka Yisasintá mumunan iyáken, mai kayo ano Mosesini man baya ánaín ákonæn dakhafiyan mino. <sup>21</sup> Máan tiyan mifo manáa kayo ano eni yoran baya mai nanin banta me siamiyáken maen éin nan ena anan nanin banta aúban ma vain Yutan kéká san ída vá Mosesini man baya yakhafiyyáke inká tiretí ankan akhafana ída vá au khaiya ída vá peyante avúavá bákurono siyan ne sen tiamikhen mino.

<sup>22</sup> Éin nan pura sen e vane sen ininten mifo intesá ó tifante rafuno. <sup>23</sup> \*Máan tukhein nan mi seti ma siamenuna aa vá dakhafono. Tetin pinté kamí kamí banta kayo ano Tiyarafenu vá ákona vaya sian damukhen mino.

<sup>24</sup> Mai van mi éi mai kéká bá o asotú uve vá mai vanta kéká avíareya Tiyarafenu avorá ma avusese in avúavasí iya vá éi ano íkun uan amin danasinta miyaní uresin ná mai kayo ano ánon do minó barukhano. Máan tesin ná minó nanin banta ano oniyáken ná mai ma éin au finté iyain baya vará ída fura vaya ino sen iniyáken ná en nan man baya ánaín dakhafiyan mino sen inino. <sup>25</sup> \*Máan tukhái ena anan nanin banta finté ma mumunan iyain kéká pefái vompon uvaman amiyáké máa sé tiféuno. Ída vá

\* **21:10:** Apo 11:28    \* **21:11:** Apo 20:23; 21:33    \* **21:13:** Apo 20:24    \* **21:19:** Apo 15:12  
\* **21:20:** Apo 15:1, 5    \* **21:23:** Nam 6:1-20; Apo 18:18    \* **21:25:** Apo 15:29

kampun ayarafenun ma íkun uan amiran nain danasinta neya vá, nare fa yiayin tafúna ída neya vá amempin ma anan kuren arukhan nain tafúna ída neya vá inká ída vá ena ana safi ena avafun nafi inká aasá non nanin arinta va safi vá banasii ono sikhé tiféuno.

<sup>26</sup>\*Máa sirákan ena ákurá Pori ano mai ma seinien mai vanta kayo aviaren Ayarafenu avorá ma avusesein avúavasí uren maen kákán monó namumpin ódiven mai avúavá ma kípan nain damú ma mana mana vanta ano íkun uan amin nain baya vanasi siameno van óden mino.

*Esiá Bara Fáke Yutan Kayo Ano  
Ma Porin Aruan Purono Van Pákein  
Baya Ino*

<sup>27</sup> Dan manápá ifo afápá kan un kádan damú ma avusese in avúavá ma variyá ein mai ádé anantá mo akhen diyákan maen Esiá bara fáke ma erikhá ein Yutan kéká ano kákán monó namun pinte Porin ódaren banasi arapiní íkan aranan uaren Porin páken mino. <sup>28</sup> Páken oriyáken máa sen oovaren mí, “Isareri vanta kayo oe, erive setin tiya ono. Ma vanta ano minó akhempá nóken Mosesini man baya vá tetinti vanasi vá inká ma kákán monó namun má ankayan tiyaren mino. Máa siyaren inká Kiriki vanta kéká aviren ma kákán monó namumpin dun peran maen mai avúavá ano kantasí ukhá ein baru maman painien mino. <sup>29</sup>\*Para va máa sen na ino. Pefá Pori ano Efesasi baru rákena vanta Tarofimusin má Yerusaremí nókan Yutan kayo ano ontaren pasin mi mai vantan aviren kákán monó namun dafufin óden mino sen iniren mi máan ten mino.

*Romú Piripo Kayo Ano Ma  
Porin Ayaein Baya Ino*

<sup>30</sup> Porin ma fákán baya Yerusaremí nanin banta ano

iniren o éke e éke en kákán monó namuni varurá ana e iyuaren béin do yarifen barufá araviyain má ainen monó dafu ona kayo munken oreraen mino. <sup>31</sup> Munkuren béin aruan purono siráken minó Yerusaremí nanin banta ano aran má o éken átaru iyain baya Romú bara fákena aruvín banta kaylorá ma yaffíkein banta ano inen mino. <sup>32</sup> Iniren mai yafisin banta ano esé ana manáa aruvín banta kayoi yafisin banta vá aruvín banta kéká bá avíaren mai ma sisubo siyain barurá araviyain má mai nanin banta ano vetin onen Porin ma ankamiyá ein mo ifá en mino.

<sup>33</sup> Máaón tiyain má mai yafisin banta ano Porin o fákaren aruvín banta kéká tíkan kankan seni anampó béin damuran mairá Yutan kaylorá inaemí, “Ma iyen bantá báken nái quisá ukha fono.” <sup>34</sup> Máa sen ina íkan manáa kéká ano ooavarariyan ena vaya e sen orin maen inká ena kéká ano ena vaya e sen orin tisuvofin ída kanaien betí vaya inen mai ma afoká iyain afová oren iyaimpin mai yafisin banta ano aruvín banta kayo síkan Porin aviren aruvín banta kayo amápin óden mino. <sup>35</sup> Porin ma aviren oriaren ma yetará ódiyain má mai nanin banta ano véin aruan purono siren aran má aasá iyariyaimpin aruvín banta kéká ano véin avíán daní uren daiyó en óden mino. <sup>36</sup>\*Oriyákan minó nanin banta ano yakhafen oyampá oriyáken, “Béin aruan purono,” sen oovaren mino.

*Pori Ma Aramaiki Vaya Finté  
Banasí Vaya Siamein Baya Ino*

<sup>37</sup> Máa siyákan mai aruvín banta kayo ano Porin aviren mápin ódono van ádé oriyain má bái máa sen dafisin banta inaemí, “Kaná áési manáa vaya éin tiamente rafuno,” síkan. Mai yafisin banta

\* 21:26: 1Ko 9:20 \* 21:29: Apo 20:4 \* 21:36: Ruk 23:18 \* 21:38: Apo 5:36-37

ano Porin inaan temí, “Éi Kiriki vaya afová ukhe fono. <sup>38</sup>\* Éi nan Isipíke vanta mairá ma kamanin namuroí uantáden ma manáa yamú orivin kamí kamí tauseni (4000) aruvín banta kayo yo iyanen kámá barafá ovaré ein banta inon té iniyá uno.

<sup>39</sup> Máa sen ina íkan Pori evaránen temí, “Ída ifo séi maé Sirisiá barafá Tasusí ma aví bain baru ráke Yutan mumpo áesi banasi vaya siameno.”

<sup>40</sup> Máa síkan dafisin banta ano kana ino síkan má ona ódintá un mantaven ayan daní íkan banasi ma sisubo siyá ein mo fúkehávin Aramaiki vaya finté máa sen tiamen mino.

## 22

<sup>1</sup> Pori semí, “Tifá tiváeyan má tifóeyan ma soe, inimesirá téin ma kó tisintiyaona fákena sian amá ono.” <sup>2</sup> Máa siren Yutan kayoi vaya Aramaikí finté má síkan maen banasi mai vaya iníden tisuvo ma siyá ein mo fúkehávin Pori máa sen mino,

<sup>3</sup>\*“Téi maé mana Yutan bantan bákun te sinóe ano Sirisiá barafin ma vain baru Tasusí séin kaen mifo ma kákán barurái e inoré uno. E inoriyá maé Kamarierin aránaó bákun teti sináuyáni minó man baya sisimídá pasé mai ma siretin ma Tiyarafenun aví ma yaní iyaonaí anan éi Tiyarafenun aví daní iyá uno. <sup>4</sup>\*Máaón tiyá mai Aa Ma Yakhafin Kéká uman amé aruan puriyáké manáa kéká anasi vá banta vá páké mo karavusifin kaiyá uno. <sup>5</sup>Mai avúavá ma variyá eruna mai monó ánon banta kayoi ánon banta vá Kanisori kayo vá ano afová ukhen mino. Betí ankan mana vompon uvamádá betíi kéká ma Damaskasí barurá bain morun amiré mai ma Yisasantí ma mumunan iyá ein kéká karavusi orun páké Yerusalemí

mun kaúdé uman ameno van aravé uno.

<sup>6</sup> Araviyaré kun bayan aúbaná Damaskasí baru ádé ma oré kun maen inaru fáké manadá kákán panu sin mano séin iyááden mino. <sup>7</sup> Máaón tíká barará ma eravé tin-kamiyá mana vaya iné kun téin tisimemí, ‘Sori oe, Sori oe, fará tein uman timé oriýá ba fono.’

<sup>8</sup> “Máa síká mairá bén inaéú, ‘Bafan noe, éi iye fono,’ sékun bén máa semí, ‘Téi Nasaretíke vanta Yisasin bákuya éi uman time oriya va ono.’ <sup>9</sup> Mai ma sen má orikhá ein kéká ano inaru fákena kakhan manan onen mifo mai ma séin baya sisimiyain banta avaya ida inen mino.

<sup>10</sup> “Máa síká mairá bén inaéú, ‘Bafan noe, séi náinásisá onte rafuno,’ sékun Bafan mano máa semí, ‘Mantaveya Damaskasí barufin ódesin maen mairái éi ma yoranona minó baya siaminten mino.’ <sup>11</sup> Máa sirá mai ma fanu sein mano suu yufukuádá ida onanuñaí ékun mai ma se má orikhá ein kayo ano siyanoren Damaskasí barufin óden mino.

<sup>12</sup> “Mai varurá Ananiasin ne sin banta maen Tiyarafenui man baya ánaín dakhafiyáken ben aránaó bákán Yutan kayo ano véin amo siyain banta varen e sonano van eren mino. <sup>13</sup> Eren bén ano senti ádé e mantaven temí, ‘Te sifá tiváe Sori oe, auu mábe onano,’ síkan esé anan tuu kama iká tuu mábé bén mun oné uno.

<sup>14</sup> “Oné kun bén máa semí, ‘Set-inti sinaúyáni Ayarafenu ano vei anunu afová ure yakhafiyá inká Puntákein Banta oniyáke veni vaya ineno van mi éin aní uren aviren mino. <sup>15</sup> Éi anon mai ma oniyáke veni vaya ineona vanasifin tian pura yanasí iyákeya véin pákena sian dáko inono. <sup>16</sup> Máaón tukhen mifo naínásará aye ukhé ba fono. Mantaveya Yisasin avíká mumunan ureya monó non pédesin eni ume sesé ino.’

\* 22:3: Apo 5:34 \* 22:4: Apo 8:3

*Ena Anan Nanin Bantafin Kama  
Vaya Mo Siamino Van Ma Yisasi  
Ano Porin Tiantain Baya Ino*

17 "Máa sirá Yerusaremí ovaráné e vá maé kákán monó namun un báké timúkiyá ékun tuu vaéda  
18 \*Bafan onékun téin tisimen temí, 'Aineya Yerusaremí baru me am-pire sare ana orono. Para vara seyo, séin pákena vaya ma sesin banasi ano ída uron mi ininten mino.'

19 \*"Máa siká evaráné béin tiáméú, 'Bafan noe, mai nanín banta ano afová ukhá monó átaru namun pimpá oriviýá éintá ma mumunan iyá ein kéká pákaré aruriyá karavusifin kaiyá uno.  
20 \*Máan tiyáké éintá ma mumunan ukhá ein banta Stivenin ma arein damú téi anon mai ma ariyá ein kayoi ayá auí danáká dafíké, kana ino siyákun mi véin aruan purein mino.

21 \*"Máa sirékun Bafan mano semí, 'Orono, éin tian tékuya nenta suron ena anan nanín bantafin orin nono."

*Pori Ma Romú Bara Fákena  
Vantá Uno Sein Baya Ino*

22 Banasi ano vempáké púkekakhken inikhan Pori mai vaya ma sian kíporen maen mairá banasi ano bádiyáken ooavararen temí, "Ída áesin máan banta kéká ma varará pa vanten mifo véin aresin purino.

23-24 Banasi ano má máa sen o variyáken danténa iyón afluín daváden dan beravé iyáken kayó páken karúdarú iyan, maen Porin aviren mápin ódino van aruvín banta kayoi ayafa ano sianten mino. Máa síkan aruvín kéká ano aviren odiyan máa sen tiáméí, "Yafiyosí ureya Porin ankádeya ina ono. Paraé tiren ná banasi ano aran má ooavararen ma avúavá bariyan nafino se veni ana ina ono. 25 \*Máa síkan Porin

dafiyó ankamono van béin barará maman aseriyákan mairá mana antareti (100) aruvín banta kayoi yafisin banta ano mantakhái mai vantará Pori inaen temí, "Kanaísá eyá Romú bara fákena vanta maen ída veni aui ana afová inton dafiyó ankaminte fono.

26 Máa síkan mana antareti (100) aruvín banta kayoi yafisin banta ano Pori ma sein baya iníden oren bei ayafa vanta mo siamemí, "Ma Romú bara fákena vantan ban mifo intesá inte fono," sen inaen mino.

27 Ayafa vanta ano mai vaya iníden oren mo Porin inaemí, "Éi fura seyá Romú bara fákena vanta fono," síkan Pori eyo sen evaránen béin tiamen mino.

28 Máa síkan mai ayafa vanta ano semí, "Romú bara fákena vantaí onovan kákán monípói miyaní ukhé uno," síkan Pori semí, "Máan te ompo se sinóe sifóe maen Romú bara fákena nanin bantan baren téin kái bá uno."

29 \*Máa síkan mai vaya inídaren mai ma véin dafiyó ankáden inaono siyá ein kéká ano me ifáen orera iyáken ayafa vanta ano Porin ma Romú bara fáke vanta vákan ma seni anampó ayan arantantá damukhá ein nan ovaren me inen akhokho van en mino.

*Kanisori Kayo Avorá Porin  
Aviren Mo Khaein Baya Ino*

30 Máan turen ená damú ayafa vanta ano fará Yutan kéká ano Porin namuroí uantiyan nafino van afová ono siren seni anan utuántaden tíkan monó ánon banta kayoi ánon kéká bá Kanisori kayo vá e átaru uvin betí ankan avorá Porin aviren mo khaen mino.

## 23

\* 22:18: Apo 9:29-30 \* 22:19: Apo 8:3; 26:9-11 \* 22:20: Apo 8:1 \* 22:21: Apo 9:15  
\* 22:25: Apo 16:37 \* 22:29: Apo 16:38

aufuen mo oniyáken temí, “Tifá tiváeyan noe, Tiyarafenu ano ma simein doran inka séi yóan kíparékun téimpin ída mana uman bá tirá kusin mái vá uno. <sup>2</sup>\*Máq siyain má monó ánon banta kékai ánon banta Ananiasi ano Porin ádé ma mantakhá ein kayo van béin oo ankamino van tiamen mino. <sup>3</sup>\*Máa síkan Pori evaránen béin tiameí, “Tiyarafenu ano éin mi ankaminten mino. Para vara seyo, éin aúpin mana namu yafu ma fúta ukhan banasi ano kama ukhen mino siren onano van efanten kava ma yan me fereneiníi ukha ono. Man baya fóké téin kó tisintano sireya eyantá mai man baya yurafuriyáke séin tinkamino van tian miya ono.

<sup>4</sup> Máa síkan mai ma Porin ádé mantakhá ein kayo ano máa sen béin tiameí, “Eí ída perantó Ti-yarafenui ánon banta kékai ánon banta ankayan baya siré ayave amiya fono.”

<sup>5</sup> Máa síkan Pori evaránen temí, “Tifá tiváeyan noe, Ti-yarafenui vompompin man baya ano siyáken, ‘ída vá banasirá ma yafikein banta oyampá baya seno,’ ” *Eks 22:28* sikhen mifo véin nan ída monó anon banta kékai ánon banta ino se afováin mi ma vaya sé uno.

<sup>6</sup>\*Máa siren Pori ma afová íkan maifin manáa Farasisi kayo vá manáa Sadyusi kayo vá bákan maen mai Kanisori kayo auufen kakháben oovararen temí, “Tifá tivaéyan noe, mai séi mana Farasisi vanta anin mi váké téi yere Farasisi vantán bá uno. Tareá ma séi kó avorá e mantakheruna mai fúkaren orun mantantá ma mumunan iyaruna anará ino.”

<sup>7</sup> Máa síkan Farasisi kayo vá Sadyusi kayo vá ano vayafó aruve asive iyain má mai átarufin ma o iyukhá ein nanin banta ano

veraran aúban daimen mino. <sup>8</sup>\*Sadyusi kayo ano mai fúkaren ma evaránen orun mantan má enisori kayo vá ara ara aunan kayo va san ída mumunan in maen inká Farasisi kayo ano mai máa yana san mumunan in iyain mi van mino.

<sup>9</sup> Máa siren kákantá baya sen tisuvo siyaimpin manáa Farasisi kayo finté ma man baya afová ukhá ein kéká ano orun mantaven ákonará baya siyáken temí, “Mana aunan mano fi inká mana enisori ano fi véin má bayaí ukhan ten mifo setí onékun ída mana uman ma vantafin ban mino.” <sup>10</sup> Máa siyákan aruvín banta kayoi ayafa vanta ano onan kákantá asive asive en Porin darifen more mere iyaimpin, máan tiyaren Porini ayan arantan davisen orinae siaren bei aruvín banta kayo van aine vetí ankan ayan pintena orun avire aruvín banta kékai mápin mun kaoro sen tiamen mino. <sup>11</sup>\*Máa síkan aviren módan baré in ena inuran Bafan mano ven ádé e mantaven máa sen tiameí, “Yerusalemí barurá ma senti vaya sian dákó eonái eya Romú barufin dere mai vaya mo sian dákó inompo mantaan ákona vá ono.

*Yutan Kéká Ano Ma Porin  
Aruan Purono Van Baya Sian  
Damuádein Baya Ino*

<sup>12</sup> Máan turan ena ákurá manáa Yutan kéká ano o átaru uven baya sian damuádiyan temí, “Ída mana yunan má non má nakhé Porin ma aruan púdéri yunan ná tifanté uno,” siren baya sian damuáden mino. <sup>13</sup> Mai vaya ma sian damuádein mai foti (40) vanta esantakhein kayo ano ino. <sup>14</sup> Máan turen mai kayo ano monó ánon banta kayoi ánon banta kéká bá monó doran banta kayo vá baípá oriven mo máa semí, “Tetí ída

\* 23:2: Yon 18:22-23 \* 23:3: Mat 23:27 \* 23:6: Apo 26:5 \* 23:8: Mat 22:23 \* 23:11: Apo 27:24; 28:16, 23

mana yunan nakhé tifé ma Porin aruan púdē maé mai anan dunan nanté uno sé baya sian damuádē tiféuno. <sup>15</sup> \*Máa sé tifé umpo sireti má Kanisori kayo vá ano oreya vá aruvín banta kayoi ayafa mo mákaseya máa ná teno, ‘Porin avireya setin tivorá mo khaesin ná béis ma manáa vaya sikhein ana sian amá intí sá iné tifano sesin ma mará aviren ereno van ma eriyantísá aayana fákena vá arékun purino.’

<sup>16</sup> Máan ma siyain baya ma Porini nointa ano iniren maen aruvín banta kayo ma vain namun oriven Porin mai vaya mun tiamen mino.

<sup>17</sup> Pori mai vaya iniren mana antareti aruvín banta kayoi yafisin banta aran eríkan máa sen tiámemí, ‘Ma fumara avire mo ayafa vanta aní ono véimpin manáa vaya vain ayafa siaminten mino. <sup>18</sup> Máa síkan mai ayafa vanta ano mai fumara aviren mo ayafa vanta avorá káuden temí, ‘Karavusi vanta Pori ano séin tará onóbékun tiyáken ma fumara vá avire ayafa vaintá orono. Béimpin manáa vaya vain éin nan tiaminten mino siren tisintá aviré eré uno.’

<sup>19</sup> Máa síkan ayafa vanta ano mai fumara ayan noren akhempá mo khaúden inaemí, ‘Nái vayá bákayá tisimeno van ere fono.’

<sup>20</sup> Máa sen ina íkan mai fumara ano máa semí, ‘Manáa Yutan kéká ano siyáken inuran ákurá éintá inaé tifékun Porin aviren mo Kanisori kayo avorá kaintin béis ma sikhá ein baya evaránen tian amá inten ne siyan mino. <sup>21</sup> Máa sinten mifo ída vá betí ankan avaya ineno. Para vara seyo, foti (40) vanta esantakhein kayo anón aúmantoren Porin ma avire oresin maen aruan purono van ákoná vaya sian damuádan bákan

dunan má non má auraren báken minó dana utaan kauren éi ma eyo sinona van aye ukhen mino.

<sup>22</sup> Máa sirákan mai ayafa vanta ano mai fumura siantan oriyákan máa sen tiámemí, ‘Ída uron ná ma ma sisimeóna vaya ena vanta mo siameno.’

*Romui Aruvín Banta Kéká Ano Ma Porin Aviren Sisariá Barafá Or-ein Baya Ino*

<sup>23</sup> Máan turen kankanan bei aruvín banta kayoi ánón banta aran eríkan máa sen tiámemí, ‘Oreya kan antareti (200) aruvín banta kayo vá osintá ma kumamen aruviyain seventi (70) vanta kayo vá inká uve isanafó ma aruviyain banta kayo kan antareti (200) vá o avídeya utaare vá tare inuran dan manápá ifo afápá kamí kamí águ rasá Sisariá barufá orono.’

<sup>24</sup> Máan tiya vá manáa osin amanina sá kumanin avové uresin ná Pori mairá kumaminti vá dañian ákoná uve avire mo kákon kamani Feriksin ayampin ka ono.

<sup>25</sup> Máa siren ayafa vanta ano máa sen bompon uvaren mí,

<sup>26</sup> ‘Séi Kraudias Risiasi ano kákon kamani Feriksin mi ma vompon uvan man amé uno. Bayan mino.

<sup>27</sup> \*Ma vanta maen Yutan nanin banta ano fákaren aruan purono van iyái téi iné kun béis Romú bara fákena vanta vaimpin tesí aruvín banta kayo aviré betir me intanuré aviré tiféuno. <sup>28</sup> \*Nái vará Yutan kéká ano ven arono van iyan nafino van afová ono siré béis aviré morun betí ankani Kanisori átarufin kaé uno. <sup>29</sup> Aviré morun kaúde iné kun, Yutan kéká ano vetíi man bayará anan esiaren mo vaya siyá iné kun maen béis ída mana furin aau fi inká karavusií oren aau fi mantaren mino. <sup>30</sup> \*Máan turé iné kun aúpáké béis aruan purono van baya yamuan kaiyá í iniré mai

\* <sup>23:15:</sup> Apo 25:3    \* <sup>23:27:</sup> Apo 21:30-33; 22:25-27    \* <sup>23:28:</sup> Apo 22:30    \* <sup>23:30:</sup> Apo 23:16-23; 24:1-9

van mi ainé mai vanta siantékuñ e vaonafá aviren orinten mino. Orivintíú mai ma véin kó tiantan kayo van baya utaaren véi vaípasá oresin tiretí ankani khó inino sé tiámé uno.

<sup>31</sup> Mai vompon uvaman amin mamaren maen ayafa vanta ano ma seinén mai aruvín banta kayo ano mai inuran manan Porin do aviren Antipatirisi barurá oren mino. <sup>32</sup> Moren ena ákurá osintá ma kumamen aruvín banta kayo ana áíkan Porin do aviren Sisariá barufá oríkan mai ma varará orin aruvín banta kayo ano ovaránen Yerusalemí eren mino. <sup>33</sup> Erivíkan osintá ma kumamen aruvín banta kayo ano Sisariá barurá o unaven bompon bareñ mo kamanin banta amiyáken Porin má dere mai vanta ayampin kaen mino. <sup>34</sup> Máan turan kamanin banta ano mai vompon dankáden mairá Porin inaen mí, “Éi inte vara fákesá fono,” síkan téi Sirisiaí bara fáké uno sen tiamen mino. <sup>35</sup> Máa síkan inídaren kamanin banta ano semí, “Éin ma kó tiantan kayo ma erintí maéi eni khó inenté uno,” siren bei yoran banta kayo siantan Porin aviren mo Kin Erotin amá karavusién mino.

## 24

### Feriksi Ma Porini Kó Inein Baya Ino

<sup>1</sup> Dan manápá damú orivíkan monó ánon banta kékáí ánon banta Ananiasin má manáa monó doran banta kayo vá mana kamanini man baya ma afová ukhein banta Teturusin ne siyain má avíaren Sisariá barurá dorun nóbén Porin ma kó tiantano siyain baya seno van kamaní vaintá oren mino. <sup>2</sup> Kamanini kó barufin o khu-mamín mairá Porin aviren me khaúdan Teturusí ano Feriksín máa sen tiámemi, “Feriksi oe, éi ma kamaniní eona ráké ma eriyá tiferuna afokhampin ída mana aruvín nafi asivin nafi vaká eni

kama ineinerá bá tifékun ída varé ein danasintan dákó iyan mino.

<sup>3</sup> Kákán banta Feriksi oe, mai yana san éin moékentá timusin uantiyáké éin kákán bí amiyá tiféuno.

<sup>4</sup> Mai van mi éin ayáká pákaré ban nampó kaná ará timeya ma ma setí ankan tenuna vaya vá inisintante fono.

<sup>5</sup> \*Tetí ankan onékuñ ma vanta maen aau yákó in bantan báken minó barafá nóken Yutan kéká arapíní íkan aruve asive iyan mino. Máan tiyáken béis maen ena auyen monó ma Nasarini kayo e ma siyain kékáí ayafa vantán ban mino. <sup>6-8</sup> \*Máan tiyáken béis setinti kákán monó namun ankayan tiren máden painí ono van iyá tiféi mai ánarái véin páké tiféuno. Tetisi man baya ánañ mi yakhafé béis kó tiantanté uno. Aruvín banta kékáí ayafa vanta Risiasi ano setin tiyan pintena véin e aviren oren mino. Béis ma ina ureyai ven ma kó tiantiyaruna ana eyantá afová inono.”

<sup>9</sup> Máa siyain má Yutan kéká ano yere asotú uven ákonæn tiyáken mai fura vayan tiyan mino.

### Pori Ma Feriksin Avorá Kó Tein Baya Ino

<sup>10</sup> Máa sirákan kamani ano Porin mo oniyáken auufó éi seno síkan mairá máa semí, “Kákán banta Feriksi oe, ayá oranarái ma nanin banta aúban bákeya vaya yaimin bantái ukhen ná afová ukhé mai anarái simusin iyá teyantá tesí vaya siamenté uno. <sup>11</sup> Éi aine afová inono mai ída kokhon damú orikhen mifo tiyan mikan mifo sirantan kan orun kádan (12) damú máan orikhen mino. Téi ma Yerusalemí kákán monó namur kayofin monó teno van óderunga <sup>12</sup> ma ma sen kó tisin tiyain kéká maen ída mana ano soná mana vanta vá kákán monó namumpin tisiviýáké inká monó átaru namumpin má

\* 24:5: Apo 17:6 \* 24:6-8: Apo 21:28-30

Yerusaremí barurá bá ída aau yákó ino siré mana vanta arápini ukhé uno. <sup>13</sup> Máan tukhan mi ída kanaien ma kéká ano mai ma séin kó tisintiyá ein baya kayoi ana mamañ amá inten mino. <sup>14</sup> Pura yaná ma vain mai máan mi ukhen mino. Mai ma auyen monó ino ma veti siyain Aa Ma Yakhafin Kéká ma yakhafiyaruna mai sinafu siráo ma yakhafiyá ein Tiyarafenui yakhafiyáké Mosesini man baya vá Sakanampa vanta kayo ma vompompin uvantein máa vái minói yakhafiyá uno. <sup>15</sup>\* Mumunan kéká bá ída mumunan kayo vá ma fe fúkaré ein ma Tiyarafenu ano avorantin orun mantan nain nan ma veti ave ukhein máan manan é mumunan iya ave ukhé uno. <sup>16</sup> Máan tukhein nan mi Tiyarafenun avora safi inká banasi avora safi mana uman téimpín banae siré tirá ákona é iya uno.

<sup>17</sup> “Manáa oranará ena akhempá noré maé ovaráné Yerusaremí ma sesi kéká ona ída van ma vain mai kayo amusin amiyáké inká Tiyarafenun tusu siantan danasinta vá baré eré uno. <sup>18</sup>\* Téi sinafu siraóni avúavá baréi avusesé uvé monó dafufin o vákun mi soñen mifo maifin ída vanasi váken tisuvu siyan mino. <sup>19</sup> Máan tukhen mifo Esiá bara fáké ma erikhein Yutan banta kayo ma varé inten maen mai kéká ano kasaen en avorá e mantaven téin ma kó tisintano ma siyain baya kayo tian amá inten mino. <sup>20</sup> Máan tukhantin Kanisori kéká avorá ma un manteruna mai senti aau ma ma kayo ano afová ukhan ten mai vaya sian amá ino. <sup>21</sup>\* Mana vaya máai Kanisori kayo avorá oo vararé té uno mai vaya maen purin nanin banta furin pinté orun mantanten mino ma serunarái saréa en avorá kó tisintyan mino.”

<sup>22</sup>\* Pori ma mai vaya siran

\* 24:15: Yon 5:28-29 \* 24:18: Apo 21:17-28 \* 24:21: Apo 23:6 \* 24:22: Apo 23:26  
\* 25:2: Apo 24:1 \* 25:3: Apo 23:15

maen Feriksi Aa Ma Yakhafin Kéká afová ukhen pasen mairá kó mo fákaren kó nanin banta siantan orera iyákan máa semí, “Ayafa vanta Risiasi ma erantíi saretíi kó daimonté uno.” <sup>23</sup> Máa siran orera iyákan mana antareti (100) aruvín banta kayoi ayafa vanta máa sen tiamesí, “Porintá dafike vá áesin beyan kasaen nontin ná bei kéká ano me aya iyan be ma sin nain danasinta amino.

<sup>24</sup> Máa siren baréin manáa yamú oriyákan Feriksin má be aná Durusira mai Yutan nanin bain bákan eriven békaran Porin avire ereno síkan aviren meran Tiyarafenu ano ma aní ukhein banta Yisasintá ma mumunan iyain baya siamen mino. <sup>25</sup> Tiyarafenui funtákein avúavá baya vá inká banta ano ma ve avúaváká dafisin má inká Tiyarafenu ano ma ínaiimpá kó tiantan nain baya vá Pori siyákan Feriksi iníden akhokho van iyáken temí, “Inka ifo orikháesi ená damú afokhan ma vantí ovaráné araanti uno.” <sup>26</sup> Máa siren tiantan oriyákan maen Feriksi ano mana yana san ave ukharen mino. Feriksi ma inikhá ein mai Porin nan moní miyaní urantíi siantekun orinten mino siren kokhon damú araren ben má bayai iyaren mino.

<sup>27</sup> Máan ten oriyan bákan kankánan orana esantavin Posius Festusi ano Feriksi varu varen kamaninién mino. Kamanini ukhan mifo Feriksi ano Yutan kayo amusin ameno van Porin karavusifin áin baren mino.

## 25

### Festasi Ma Kó Inein Baya Ino

<sup>1</sup> Festasi ma kamanini ánon bantai uvín kanú manaú damú orivin maen Sisariá baru me ampíren Yudiá barafin oriven Yerusaremí óden mino. <sup>2</sup>\* Ódikan monó ánon banta kayoi ánon banta kéká bá Yutan kayoi kákan banta kayo vá ano véi vaintá

\* 24:21: Apo 23:6 \* 24:22: Apo 23:26

oriven Porin ma kó tiantan baya funtaren mino.<sup>3</sup> \*Betí ankan manáa vanta kayo siamintin aasá aúmantaren Porin arintin purino van ákonæn béin tiamen temí, “Éi setí ankan tiyaeyavá mai vanta siantesin Yerusaremí erino.”<sup>4</sup> Mág síkan Festasi betí ankan evaránen tiamiyáken, “Porin Sisariái karavusií ukhein tanáa yamúi váké evaráné Sisariá oronté uno,” sen tiamen mino.<sup>5</sup> “Oronté umpo aésin tireti ankan pinté manáa ánon banta kayo ano séi má aravuven mai vanta ano ma aau mantantiya kó tiantano.”

<sup>6</sup> Mág siren Festasi ma yan manápá ifo afápá kanú manaú un kádan damu safi áa tiyan míkan damu safi vetí ankan má baren Sisariá araven orun baren ená damú daimin namumpin béis o kumamen Porin aviren béis vaintá erino van baya yan oren mino.

<sup>7</sup> \*Oríkan maen Porin do aviren merákón Yerusaremí ma me ampiren aravein Yutan kayo ano véin ádé e mantaven kokhon ná kó baya kayo fóké béin kó tianten mifo veni ana ída maman dáko en mino.

<sup>8</sup> Mágón tiyaimpin Pori evaránen betí vayará mág sen tiademí, “Téi ída mana Yutan kayoi man baya fi kákón monó namun ma safi inká Sisan ma safi ída mana namu avúavá uantaké uno.”

<sup>9</sup> Mág síkan Yutan kayo amusin ameno van Festasi ano Porin inaen temí, “Téin nan ma uman kayo Yerusaremí mo yaimino vará anunu iya fono.”

<sup>10</sup> Mág síkan Pori evaránen temí, “Ma ma saréa séi mantakherúna namun mai Sisan yaimin namun mi vain ma namun manan téin daiminten mino. Yutan kayoi mana aaui téi ída ukhékuya éi gefái afová ukha ono.”<sup>11</sup> Mana aaui furino ma sikharé intí kasaé puronté umpo mai ma Yutan kayo ano séin daimiyain bayai ana ma ída fura vantin mana vanta ano

ída kanaén betí ankan ayampin téin kainten mifo Sisan mano senti kó daimino van muno.”

<sup>12</sup> Mág síkan Festasin ma inin amiyain banta kayo vá bayaí uaren ínaimpáké Porin tiademí, “Sisa ano éin daimino van anunu iya ompo véi vaipásá orono.”

### *Festasi Má Kin Akhripa Má Ma Manafin Baya Sein Baya Ino*

<sup>13</sup> Manáa yamú orivin Kin Akhripa má be ayofi Benisi má ano Festasin onano van Sisariá araven mino.<sup>14</sup> \*Békakan kokon damú Sisariá baimpin Festasi ano Porini vaya kin tiademí, “Pefá ma Feriksi ano yumukatifin pákaádein bantan taréa yere fara van mino.

<sup>15</sup> Yerusaremí ma séi un bákun monó ánon banta kayoi ánon banta kéká bá monó doran banta kayo vá ano véin ákonæn kó tian tiyáken aruan purono van inaen mino.

<sup>16</sup> “Mág síká téi evaráné betí ankan tiamiyáké tetí Romúke kéká ano ída fara vanta aré iyá umpo aau ma vain banta afokhan amékuñ béis ma kó tiantiyain banta kayo avorá be ma varein danasinta sian amá é iyan mino.

<sup>17</sup> Téi ma Sisariá ovaráné ererúna yamú mai vanta kayo vá dere ano séin má eríká ída áékuñ betí ankan ave en mifo ená damú anan daimin namumpin kumamé mai vanta aviren erino van baya yékun oren mino.<sup>18</sup> Mai ma véin kó tian tiyain banta kayo ano ma mantaven Porin kó tian tiyá maé mana kákán aau mantan nain nan iné umpo ída ino.<sup>19</sup> Ída ifo vetí ankaní ará uman ma sian dáko ein mai Yutan kayoi monó tin avúavá baya vá inká Yisasin ne sin banta ma fúkein nan ma Pori fa van ne ma siyá ein nan mino.<sup>20</sup> Mai vayai ana yoseno van ékuñ mifo senti ineine ano ída kanaí tiyaimpin Yerusaremí orintí bení kó daimono van béin inaé uno.<sup>21</sup> Inaékuñ Pori siyáken,

'Dumukatifin baréekun ínaímpáké Sisa ano séin daiminten mino,' síká téi siyáké, 'Dumukatifin baré intirá béini aa yosiré tiantékun Sisa vaípá orino,' sé uno."

<sup>22</sup> Mápá síkan Akhripa mai vaya inireñ Festasin tiameñí, "Teyantá mai vantai vaya ineno van muno," síkan Festasi semí, "Inuran mi inin nono."

### *Kin Akhripan Avorá Ma Pori O Mantein Baya Ino*

<sup>23</sup> Mápá sikharéin ená damú Akhripan nú Benisin nú ano kini kama ona uren békakan oríkan aruvín banta kayoi ánon banta kayo vá mai varurákéna kákán banta kayo vá ano átaruin namumpin ódivin Festasi ano síkan Porin aviren eren mino. <sup>24</sup> Merákan Festasi semí, "Kin Akhripan má tireti minó banta kayo vá ano ma setin má baona ano ma vanta vá onano. Minó Yutan anan nanin banta kayo ma Yerusaremí bain kéká bá mará ma vain kéká bá ano ma vanta kó tiantiyáken betí ákonæn ooavararen béis ída vanten mifo aresin purino sen mino. <sup>25</sup> Mápá síká téi iné kun béis ma kanaíen purin nain aau ída mantaré iká Sisa ano véin daimino van anunu iyaimpin béis tiantékun Romú orino van tian damuádékun ban mino. <sup>26</sup> Mápá tukhen mifo setisi kin baípá ma veni aau fákena ma uvamádékun orin nain baya ída vaímpin mi veni aau ana vaya inian puntádesí bom pompin uvarano van mi Kin Akhripa má minó nanin banta vá avorá aviré eré uno. <sup>27</sup> Téi ma mana karavusi vanta ma siantékun orintí ma véin ma kó tian tiyarunai ana ma ída siamenté mai séi ma iniyaruna mai avúavá ano ída kama inten mino."

## 26

<sup>1</sup> Mápá siran Kin Akhripa ano Porin tiameñí, "Ei vaya seno van

\* 26:5: Fir 3:5-6 \* 26:6: Apo 23:6; 28:20

afokhan amé uno," síkan Pori ve ayan daní uren bei vaya araién temí, <sup>2</sup> "Kin Akhripa oe, mai ma ei vaya seno van muno ma seona van timusin iyá Yutan kayo ano ara ara vaya kayo ma sen nan tiyái pákena saréa en avorá mantakheruna sian amáéku vá ineno. <sup>3</sup> Yutan kayoi minó avúavá bá aruven asivein má éi afova suron ukheona vantant baná mai éi ineno van tiamenté umpo vempáké bake vá tenti vaya kama e ineno.

<sup>4</sup> "Téi ma sirará iyampon táké ma sesi vara anará baré ma Yerusaremí barurá o váké intéa sivútvá basá ee sinóní erafu mai minó Yutan kayo ano afova suron ukhen mino. <sup>5</sup> \*Téi Farasisi vanta ma váké betí ákoná man baya kayo aránaó eriyaré umpo Yutan kayoi monó avúavá bá ída manái ukhein pasen tenti sivútvá ma siameno sinten maen kasaen tiamenten mino. <sup>6</sup> \*Mai ma fefá tetinti sináuyan ma Tiyarafenu ano iyáantan baré ein mai yaná maman dákó intí onano van mi mumunan iyákun mai van mi sareá séin kó tisintiyan mino. <sup>7</sup> Mai ma setinti kéká tiyan míkan mifo sirantan kan orun kádan (12) anan banta kéká ma Tiyarafenu ano iyáantan báken mai yaná dákó intí onano van inuran má bayan má Tiyarafenun monó tiantiyaré ein mai mumunan mi iyá uno. Kin noe, mai van mi Yutan kayo ano séin kó tisintiyan mino. <sup>8</sup> Paraé tiré Tiyarafenu ano ma fefá puká ein nanin banta kayo evaránen avían purin pinte mantiyain nan tiretin pinté ída mumunan iya rafono.

<sup>9</sup> \*Pefá téi má dere Nasaretíke vanta Yisasin aviká ma yoriyain doran mágde namu ono van iniré kasaé ara ara avúavá bariyare eruna ino. <sup>10</sup> Mápá tiyáké monó ánon banta kayoi ánon banta kéká ano ma ákoná simikhá maé Tiyarafenu vanasi fáke mo

\* 26:9: Apo 8:3

yumúkatifin dékun baréí maé ten má dere siyan befió urékun mai kéká arin puriyaren mino. Mai avúavái Yerusaremí barurá bariyaré uno. <sup>11</sup> Máan tiyáké betin pákaré aau ameno van ena ena yamú betí monó átaru namun e feré kuvé iyá Tiyarafenun asiren oyan amino van ákonáe tútúpiyaré uno. Máan tiyáké betin pákaré aruré uman ameno van kasaé nentá ma kákán baru kayo vain pimpá dere oriyaré uno.”

<sup>12</sup> “Mai avúavá ma varé noruna fimpá maná damú monó ánon banta kéká ano vaya séin tisimíden tisintá Damaskasí barufá ma oriyain aayana oré uno. <sup>13</sup> Kin noe, mai aayana oriyaré ékun bayan aúbaná inaru fáké áau fanu esantakhein panu ano séin má ten má ma oriyaré ein kéká bá ekuádá oné uno. <sup>14</sup> Máan tiyain má minó ano varará eravé tinkamiyá iné kun Aramaiki vaya finté téin tisimemí, ‘Sori oe, Sori oe, fará téin dakháon karudé tiriya fono. Éi ma séin namuroí iyaona mai anon eyan uman baran nono.’

<sup>15</sup> “Máa síká, ‘Bafan noe, éi iye fono,’ sé béin inaé kun, ‘Téi Yisasin bákuya séin mi yakháon karúde siriya ono sen téin evaránen tisímen mino. <sup>16</sup> Taréa ana éi orun mantano. Téi éin aní uréku senti yoran bantaí uveya séi ma éin aní onuna yoran má mai ma éi séin toneona vaya vá banasi siámeno van mi éi vaonará dákkó uno. <sup>17</sup> Ei vanasi finté vá ena anan nanín banta finté vá aya uré kun éin ída aren asen inti mae vetí baípá tiantéku orono van munó. <sup>18</sup> \*Orive mae yúdufun daná pinte vetin auu yo vaéan kakhantá kaúde inká Ban Anoni ákona ano ma fákaran bain pinte avían Tiyarafenu amiresin betí ume kayo van tirun noe sintin betí ume ampiantádantin ná mai

ma sentá mumunan uvíkan Ti yarafenu ano sesina ino ma siren aní uran bain nanin bantafin aví bantin ná bano.’

<sup>19</sup> “Máan tukhái Kin Akhripa oe, mai ma suu vaédan ma inaru finté dákkó iká ma oneruna mai yaná téi ída soyan amenté uno. <sup>20</sup> Téi maen Damaskasí barurá ma vain nanin bantafin araí uré Yerusaremí barurá onóbé inká Yudiá barafin eúkuáré ena anan nanin bantafin oriyáké ará baéde vá Tiyarafenu vaípá erive vá mai

ma fura se ará baékanona mai siretií avúavá posá aní ono siré tiámé uno. <sup>21</sup> Máan ma seruna vaya van mi Yutan kayo ano monó dafu fintena séin pákaré tirono van iyan mino. <sup>22</sup> Máan tiyan mifo Tiyarafenu ano séin tiya iyáká eriyaré taréa e mantakhé aví i vain má aví bain nanin bantafin má pefá ma sakhanampa vanta kayo vá Mosesin má tiádán baré ein danasinta van dákkó inten mino sé betin tiamiyá umpo mai amaniná ída mo ena vaya kayo vá tiyá uno.

<sup>23</sup> \*Mai ma Tiyarafenu ano ma aní ukhein banta ano vá uman o varen púben ná purin kayoi aníen orun mantan banta vá báken bei vanasifin má ena anan nanin bantafin má Tiyarafenui kakhan ná bano sen tiádán baren mino.

<sup>24</sup> Pori ma siamiyain baya van Festusi vaé tiyáken oovaren temí, “Pori oe, Éi ma moéke afova mante siyaona vaya kayo ano éin tavifá do óen uáda oriya ono.”

<sup>25</sup> Mág síkán Pori evaránen béin tiámemí, “Festusi oe, séi ída óen iyá umpo fura sen beni ana vain baya kayon tiamiyá uno.” <sup>26</sup> Téi ma éin tiamiyaruna vaya kayo ída feranton Kin Akhripan avora safi atarenta safi ída mana vaya fa savifá esanten mifo minó baya kayo inikhái siamé uno. Para vara seyo, ída mana vaya aúpasíe uno. <sup>27</sup> Mág siren Pori maen do vaéoren Kin Akhripan inaemí,

\* **26:18:** Ais 42:16; Efe 2:2; Kor 1:13

\* **26:23:** Ruk 24:44-47; 1Ko 15:20

"Kin Akhripa oe, éi sakhanampa vanta kayoi vaya van mumunan iya fono. Téi afová ukhé uno éi mumunan iya ono.

<sup>28</sup> Mápá síkán Kin Akhripa ano Porin inaemí, "Tare ana éi ano séin maman mumunan bantaí onté unó té iniya fono."

<sup>29</sup> Mápá síkán Pori véin evarámen tiameemí, "Taráea fi ínaimpáke safi séi ma Tiyarafenu vaipá timúkiyaruna eya ana vaompo mai ma séi ma siamiyaruna vaya ma iniyain kéká bá ída áinti seni anan kayo fóké damuádanti van nompo Tiyarafenu ano siren maman téi ma varunai inten mino."

<sup>30</sup> Mápá síkán Kin Akhripa má kamanini ánón banta vá Benisi má maifin ma o kumantá ein kéká bá orun mantén mino. <sup>31</sup> Orun mantén mai namun me ampiren ma varufá morun bayaén orera iyáken temí, "Ma vanta maen ída mana furin aau fi karavusiín auu fi mantén mino."

<sup>32</sup> Mápá sen orera iyákán Kin Akhripa ano Festusin tiameemí, "Ma vanta ano Sisan nan tenti kó inino van muno ída sen baré inti éi kana véin karavusi útuantesin orin nainten mino."

## 27

### Pori Ano Ma Mana Sipifin Romú Barufá Orein Baya Ino

<sup>1</sup> Tetí ankan nan sipi varé Itarí barafá orino siren baya sian damuá daren mana antareti (100) aruvín banta kayoi ánón banta ayampin Porin má ena karavusi kayo vá kaen mino. Mai vanta Sisan aruvín banta kéká pintena Yuriasin ne sin banta ino. <sup>2</sup>\* Tetí ankan mana Adaramitiamú kena sipi ano Esia kayoi non akhempá ma vain baru kayo fimpá orono van iyáká mai sipifin un kumamé kun Masedoniai varafá ma vain baru Tesaroniká ke vanta Aristarkusi ano setin má manafin un kumamen oren mino.

<sup>3</sup> Oriaré ená damú Saidoní barurá o unavé tifékun Yuriasi ano Porin kama avúavá uanten tiantan be arona kayo o oniyáken beti vaípákena aya varen mino.

<sup>4</sup> Mamaren ma Pori ovaránen sipifin eriví maé teti Saidoní me ampiré oriyá tifékun uva ano ákonaen sipi e avéken eriyaimpin Saiparasí musó akhempá ana oren mino. <sup>5</sup> Mai ráké Sirisiá bá Pamfiriá bái un non aúbaná oriáré maé Risiai varafá Mairá barurá oré tifé uno. <sup>6</sup> Aruvín banta kayoi ánón banta ano mai varurá oren o onan Areksandariá baru rákéna sipi ano Itarí orono van iyáré íkan tetí ankan e sivireni mai sipifin mo khaen mino. <sup>7</sup> Kaúdá mai sipifin oré tifékun ákona uva iyáken sipi e avékiyaimpin tasoren oriyáken sipifin ma yoran banta kayo ano ákonaen doren oriyán baréi manáa yamú o uné tifé uno. Nidasí baru ádé oré tifékun uva ano ákonaen e sivékiyaimpin do vaéaré Kirití musó oriáré Saramoné bara ádé onóbé mai musó oyampa oré tifé uno. <sup>8</sup> Oriyá tifékun botifin ma yoran banta kayo ano ákonaen dorákán Kirití musó kayoi non akhen mana yakhafé oriáré Raseá baru ádé non un mantan ma sipi kayo ano ma Kamaen Avíkiyainta se ma siyaintá o uné tifé uno.

<sup>9</sup> Kokhon damú un nompin be mpáké oriyáken Yutan kayoi yu nan auran damú ma esantavin maen mai oyampáke kákáni suron en non karantó íkan mai van Pori emantaaren betí ankan dafisin baya siameemí, <sup>10</sup> "Minó banta kayo ano vá ineno. Tetí ankan ma oré tifékun maen kákáni uman afoká intin kokhon daná o aiyorantéi afová ukhé uno. Ona vá sipi vá ana va aiyoranten naino, seti mái furó tifanté uno." <sup>11</sup> Mápá síkán aruvín banta kayoi ánón banta ano ída Porini vaya ininton sipi ma varen noin banta vá sipi afóen mái ineine ánain mana

\* 27:2: Apo 19:29

vákuren mino. <sup>12</sup> Kákán uva ma inaintá ma sipi varen mai non akhempá ma mo khain ída kama ukhein mino siren sipifin ma vain banta kayo ano vaya siaren mai varu me ampiren Finiksí oren o vantin uva kípóno van inikharen mino. Kirití musópin ma Finiksi e ma siyaintá mana non un mantan tefá tefá akhen kanan mano áau aravípá auuí ukhan mino.

*Kákán Uva Ma Afoká Uaren  
Békon Unen Erein Baya Ino*

<sup>13</sup> Saoti fáké uvaen mifo ída ákona íkan beti ma inein mano kama intíi savaé ainé mai ma serúna nompin oronté uno siren anka orun darifaan kaúden Kirití Musó non akhempá oren mino. <sup>14</sup> Ída ayáká oriayain má mana kákán uva, Noti fáke Uva e ma siyain araíen afoká uaren békon unen eren mino. Kirití musó pintéi mai uva ano eren mino. <sup>15</sup> Eriaren sipi me ákonaen avékiyain má sipifin ma yoran banta kayo ano sipi evaránen e vaéko uan mai ma ereípasí uren orono van íkan ída kanaí eimpin ifáin uva ano sipi e avéken oren mino. <sup>16</sup> E avéken orí tifé saoti fákena mana Kauda se sin titó musó ópá orin ma uva sitosí iyain má tetí ankan ainé titó dinki ma sipi oyampá damuran baré ein ída kanaíen o yarifaren iyá ákonaé darifiyá darifaan ádesí é uno. <sup>17</sup> Máan turé tifé kun sipifin ma yoran banta kayo ano yinkí orun darifaan sipifin kaúden damuan ákona uren anan karúden sipi aránaópá aravuvín sipirá eükuren damuan ákonaen mino. Afarika kayoi un nompin Sirtisi e siyaintá manáa eyu yon kayo varé intin mairá sipi o khumanin nae siren sipifin ma yoran banta kayo ano akhokho van uren anka karúden nompin araven mino. <sup>18</sup> Uva uaren non kákantá karantóen tetin tivékiyaimpin ená damú

sipifin ma yoran banta kayo ano araíen manáa ona maman nompin karúden mino. <sup>19</sup> Kanú manaú damusí íkan sipifin ma yoran banta kayo ano sipi fintena yanasinta vetiyantá mamariyan nompin karúden mino. <sup>20</sup> Kokhon damú tetí ankan áau vá ofu kayo vá ída onékun kákán uva ano ana setin tivékiyákan mai van teti ma ineruna ano ída kamaé banté tifé umpsó minó anon afeyoranté uno siré ineine é tiféuno.

<sup>21</sup> Minó banta ano ayá damú ída yunan nan eriyaimpin Pori vetin aúban mantaven máa semí, “Tiretí ma vanta kayo ano senti vaya inire mai ángan dakhafeya Kirití musó ída me ampireya ere varé esí ída ma uman e yosékun ída minó daná ída o afeyoran nainten mino. <sup>22</sup> Máan inainten mifo saréa sretí ankan tiámé uno. Mantaan ná ákona ono. Para vara seyo, sipi anan afeyoranten mifo sretin pinté ída mana vanta afeyoranten mino. <sup>23</sup> Téi Tiyarafenui vantan báké bentái monó tiyarunan ban mi sare inuran bení enisori ano senti ádé emantaven máa sen mino, <sup>24</sup> \*“Pori oe, éi ída vá akhokho van eya vá éi Sisan au-fasá o mantano, Tiyarafenu ano eni amúkin inen mino. Éin má minó banta ma sipifin baona vá ano ída afeyoran nono. <sup>25</sup> Enisori ano máa sikhen mifo ma vanta kayo oe, mantaan ná ákona ono. Téi mumunan iyaruna Tiyarafenu ano ma séin tisimein daná máan béisí afoká inten mino. <sup>26</sup> \*Máan tinten mifo sipi ifá é tifé kun orintin ná uva ano sipi e avéken eyu rasá mo kaintin kuman ino.”

*Un Non Mano Ma Sipií Oyampákena Ankaman Barakein Baya Ino*

<sup>27</sup> Fotini (14) inuran kákán Mediterenianí un nompin non daró sipi e iyanká oriýá baré é tifé kun inuran aúbaná sipifin

\* 27:24: Apo 23:11    \* 27:26: Apo 28:1

doran banta kayo ano avádúan onen temí, "Mana vara ádé eriyá tiféuno." <sup>28</sup> Mái siren non ma avamaran danka kain aravin avamáden onan 40 mita vákán manáa sipi e afánen orián mairá evaránen avamaran danka kain aravin ayamáan onan 30 mitaén mino. <sup>29</sup> Sipi ma onámaná baintá ma orinten mo varakinten mino siren betí ankan akhokho van uren kamí kamí anka sipi ayompá karúdan aravuvín ainen do kakhanó van amúken mino. <sup>30</sup> Sipifin doran banta kayo ano sipi me ampiré aupáké karan orono van dinki anan utúden kain eravíkan kampun ten sipi aunasi ma ukheípá anka khaono van muno sen mino. <sup>31</sup> Mái síkan aruvín banta kayoi ánón banta vá aruvín banta kayo vá Pori siamemí, "Ma vanta kéká ma ída sipifin ma vanti maeya saretí ankan afeyoranono." <sup>32</sup> Mái siyain má aruvín banta kayo ano mai ma dinkirá ma kukhá ein anan tikaran non mano evaren oren mino.

<sup>33</sup> Do yákan áau iniseno van iyákan minó banta ano yungan nano siren Pori máa semí, "Tiretin ará ano ída kamaen kumaniyákaya fotini (14) damú ída yungan nanton arafan mi vare ono. <sup>34</sup> Baré enái séi ákonaé tiretin tiamé umpo vá manáa yungan tireti nesin ná mai ano ákona amino. Tiretin ánón do fintena mana ída afeyoranten mino."

<sup>35</sup> Maa siren mairá bái vereti máden betin avorá Tiyarafenu susu siantáden kisiren araien nen mino. <sup>36</sup> Niyáken Pori ano vetin ákona uantáden betí ankan dunan nen mino. <sup>37</sup> Kan antareti ifo seventi sikhisi (276) vanta ano mai sipifin baré uno. <sup>38</sup> Minó ano yungan kanaíen naren sipi ída uman dano vare siren uviti yungan kayo nompin karúden mino.

<sup>39</sup> Áau e uníkan sipifin ma yoran banta kayo ano mai ma

seti ovaruna non akhempá ída afová ukharen betí ankan onákan mana kama eyu vákán kanaí ma intin sipi maifasí urantin mai eyu yaró tavaen ódino van en mino. <sup>40</sup> Mái sen inireni minó bakharaíni anan ma sippi ankará kukharé ein tíken orera uren ifái un nompin bákán sipi ma stiaí iyá ein kákán danká kanan takena vakharaini anan útufen mino. Útúdan uva ano e avékantin non akhempá orino van minó seri antúkaádan ódivin akhempá orono van oren mino. <sup>41</sup> Orin mifo non aúbaná eyu yon bareín mai sippi ano mai yaró o kumamin non mano sippi oyampákena ankaman baráken mino.

<sup>42</sup> Máan tiyain má aruvín banta kayo ano karavusi kéká karan orin nae siren minó aruan purono van en mino. <sup>43</sup> Máan tíkan aruvín banta kayoi ánón banta ano Porin aya ono van inireni aruvín banta kayo van ída vá karavusi kayo aruan purono siren airo ananí uanten mino. Máan turen ayan nakhosá ma afová ukheona vanta kayo nare vá un nompin káusiveya nakhosáde akhempá orono. <sup>44</sup> Orivinti maeya vá ena kéká ano vá sippi rákena ma varákuádan daa vá mádeya mai yaró nakhosáde akhempá orono síkan aruvín banta kayoi ánón banta ano má seinén ída mana afeyoran minó ano non akhempá oré tiféuno.

## 28

### Pori Má Maratá Musóká O Varé Ein Baya Ino

<sup>1</sup> Tetí minó ano kamaé eyurá orivé iné kun mai muso san Maratá ino sen mino. <sup>2</sup>\*Mairá áden iyon iyákan mai varu ráke nanin banta ano setin kama avúava suron usinten ira sáden tetin e sivian ira akhempá kaiká tu mémue tiféuno. <sup>3</sup> Máan tiyá tiféunk

\* 28:2: 2Ko 11:27

Pori ira aíden me sariyaréin mai irafin banta arin osafáe varéin ira akhiyaimpin e unen eraaren Porin ayan untaren mino. <sup>4</sup> Máan tíkan mai varu ráke nanin banta ano onákan mai osafáe ano Porin ayan afáoren iroriró nakhan betiyan máa sen oreraemí, “Onano ma vanta aruan purin bantan baren ída un nömpin púkaréin mi namu avúaváká anona ayarafenu ano ve nan ída ayun bano van mi máan tiyan mino.” <sup>5</sup>\*Máa siyain má Pori mai osafáe yo yampátian karúdan irafin eravuvíkan ída mana uman baren mino. <sup>6</sup>\*Máan tiyain má banasi ano Porin nan ainen au faminten nafi áa vararasá eraven ankamen purinten nafi siren ayáká ban onan mana uman ída ven aurá afoká iyaimpin banasi ano evaránen ena inin baren temí, “Mai véi mana ayarafenu van mino sen inen mino.”

<sup>7</sup> Mai musóká ma ánoní ukhein banta aví Pubiriasiñi vara mai varu ádé baré íkən mai vanta ano setí ankan e siviren be amápin mo kaiká kanú manaú damú bákun kama yafisirí iyaren mino. <sup>8</sup> Máan tiyá íkən Pabiriasin afóen ara oriaren aufá ira kharo iyan bakhen baré íkən Pori véi vaintá oriven ben aurá mo ayan kaúden amúkiyain má evaránen e asefaen mino. <sup>9</sup> Máan turan mai musóká ma aí nanin banta ma varé ein mano minó eríkan mai kayo vá Pori ayofan asefaen mino. <sup>10</sup> Máan turákan betí ankan mai setin kama avúava suron usintiyáken ínaiimpá ma sipifin oriyáké ma varanuna yanásinta van ma sinunu iyá eruna yaná máa simen mino.

### *Pori Ma Romú Barufá O Varé Ein Baya Ino*

<sup>11</sup> Máan turá kanú manaú biyontá Maratá musóká baréekun mana Areksandariá baru rákena sipi asíká karina ayarafenu Kaston nú Poruksin núi aman manon

uvaman kain bain sipi ano kákán uva van péden baré iká maifin un kumamé mai musó me ampiré oré tiféuno. <sup>12</sup> Oriaré Sirakyusí barurá o unavé kanú manaú damú mairá o varé tiféuno. <sup>13</sup> O varé mai ráké oriáré Rekhiumú barurá oré tiféuno. Ovaré ékun ená damú saoti fáké uva iká Rekhiumú me ampiré oriyaré ená damú Puteorí barurá o uné tiféuno. <sup>14</sup> O unavé mai rákena manáa monó tifá tiváen onékun tetin tiyopá iká mai varurá dan manápá ifo afápá kan un kádan damú baré mai varu me ampiré barará Romú barufá oré tiféuno. <sup>15</sup> Oryáken tetin nan eriyan mino sin baya Romúke monó tifá tiváeyan mano iniren o aayana fáke setin e sivirano van eren mino. Apiusini Makheti varurá ma Miyaní Uren Baran Namun ma Kanú Manaú Bainta se ma sikheintá o fókan maran ékun mai van Pori ano Tiyarafenun tusu siantan ben ará anó ákona varen mino. <sup>16</sup> Máan turá teti Romú o vákun kamani ano Porin mana má amiren eyakasá bano síkan Pori mai namumpin ban maen mana aruvín banta ano ventá dafisiyaren mino.

### *Pori Ma Romú Barufin Ti-yarafenu Vaya Siamein Baya Ino*

<sup>17</sup> Máan tiyákan kanu manaú damú esantavin Pori Yutan ánon banta kayo aran e átaru uvín máa sen betin tiameemí, “Tifá tiváeyan noe, séi ída se sifá tiváen oyampá baya sé inká teti si sinafu siráoni avúavá doeké é ukhékun Yerusaremíke séin karavusi fákaren Romú kayo ayampin kaen mino. <sup>18</sup>\*Kauran Romú kayo ano ma senti vaya yaíden iníkan maen tenti aaú ída vákan ten nan ída kanaíen purinten mino siren tisintano van en mino. <sup>19</sup>\*Máan tíkan maen Yutan kayo ano mai vaya átakharé íkan tenti aa ída ena vaimpin

\* 28:5: Mak 16:18   \* 28:6: Apo 14:11   \* 28:18: Apo 26:31   \* 28:19: Apo 25:11

mi Sisa vá tenti vaya yaimino sé umpo mai sesi kékápin ída mana aau vantí betin ída kanaié daimonté uno. <sup>20</sup>\*Tiyarafenu ano ma aní ukhein banta onano van ma Isarerí nanin banta ano ave ukhá ein banta gefá erikhái mai vantará ma séi mumunan iyaruna mai anarái sen timempin ma seni anan kukhein nan téi siretin oniyá baya siameno van mi arékuya ere ono.”

<sup>21</sup> Máa síkan betí ankan evaránen béin tiameémí, “Yudiáké mana vanta ano ída éin nan bompon uvaman timin maen inká mai fáké ma erein Yutan banta kéká pinté mana ano ída éin nan me namu vaya sikhen mino.

<sup>22</sup>\*Ída mana vaya sikhen mifo éi eyanta ei ineine setin tisimesí ineno van mi setí ankan iniyá uno. Mai fara vara seyo, Yutan kékápin ma auyen monó ma afoká iyan ma minó páke nanin banta ano ma mai kéká oyampá baya siyain baya ana seti afová ukhé tiféuno.”

<sup>23</sup> Máa siren ovaránen ma e átaru inain damú aní urákaren Pori ma vain namumpin kokhon nanin banta ano e iyuvíkan Tiyarafenui yafisin pintena vaya vá Mosesini man baya vá sakhanampa vanta kayoi vompon pintena vaya vá tiamen mino. Tiameýáken betin nan ará baéden Yisasintá mumunan ino van ákurákaké aráí uren e siamen oríyan evaren inúpasien mino.

<sup>24</sup>Inupasí íkan manáa ano mai ma Pori siamein bayará mumunan en mifo ena kéká ano mai vayará ída mumunan en mino. <sup>25</sup>Máan tiyan betiyan asive asive uaren oreraen mino. Ínaimpá orera intéin Pori kípan baya máa sen betin tiameémí, “Teti sinafu siráon nan Kantá Aunan mano fura uron mi sen sakhanampa vanta Aisaiyan

ooráké uaren máa sikharen mino,  
<sup>26</sup> “Mai nanin bantafin oriveya máa se vetin tiameno,  
“Tiretí ankan ena ena vaya inin nompo ída kanaíeya veni ana afová inono.

Tiretí ankan ena ena onan nompo ída kanaíeya mana yaná oman afová inono.

<sup>27</sup> Para vara seyo, mai nanin bantai inéine ona munukuhan baya inin nan betin átaren mano afon kiyan inká auurá iyádan ban mino.

Beti mana yaná ódaren inká baya inireñ beni ana afová uren ará baéden te varunafá ovaránen erintí téi vetin evaráne kama uré ayofanuna van mino.’ *Ais 6:9-10*

<sup>28-29</sup>“Mai ana van mi Tiyarafenu ano ma kama yorarí uren ma vei vanasi aya ein inka e siantáan ena anan nanin bantafin kaintin mi mai yaná afová uren dakhafintéí sireti ineno van mi séi siamé uno.”\*

<sup>30</sup> Máan turen Pori kan oranará mana vanta amá máden báken mai má afóen miyaní iyan maen bánsi ano ma véin o onano van ma orin maen amusin iyan e araán kaúden baya siamiyaren mino.

<sup>31</sup> Máan tiyáken bái ída feranton ákonáen Tiyarafenui yafisin pintena vaya siamiyan maen inká Tiyarafenu ano ma aní ukhein banta Bafan Yisasin nan banasi afova amiyan maen mana ano ída véin airo ananí uanten mino.

\* **28:20:** Apo 26:6-7 \* **28:22:** Apo 24:14 \* **28:28-29:** Tiyarafenui manáa vompon dókifin ena asotúin baya ves 29 fin máa sikhen mino, 29 Mai vaya máa siren maen Yutan kayo véin ampien oreimpin betiyan ákonáen asiven mino.

# PORI MA ROMÚ KEKÁ UVAMAN AMEIN BOMPON MINO (Romu)

## Romui Vompon Ma Uvanteí Pákenai Afova Vaya Ino

*Ma vompon ma uvantein banta ino.*

Baya varen orin banta Pori ino.

*Uvarein orana ino.*

AD fifti-seveni (57) fin nafi áa fifti-eiti (58) fin nafin uvanten mino. Mai maen Pori ma kanú manaú dádasí en ma monó dorarién eúkiyaren ma mo kípiyan mi ma vompon uvanten mino.

*Ma vompon ma uvantein baru ino.*

Koriní barurá ino. Mai maen kanú manaú biyontá ma Kiriki varafin ma Pori nóein pimpá ino.

*Ma vompon ma uvaman amikhein kéká ino.*

Yisasintá monó tiyáken ma munan in avúavá ano Romú barafin pefá o vákan mai kayo esé araien o onano van Pori inikhen mai van mi mai kéká uvaman amikhen mino.

*Nái ana vará ma vompon uvanten nafino.*

Mai vompon mano setisi ume avúavá ma ena ena vain mi sian aní ukhen mino. Tiyarafenu ano vanasi aya urantin ume ída vain kéká ino sino van mi anunu iyáken be Anin ma e fúaren e mantakheini narefó umei karavusi fintena miyaní uren mi Kantá Aunani ákonafó banasi maman kantasí ukhen

mino. Monó dorarií in má inká ma varará ma aronaí in avúavá bá dereñ kákání ukhan mai van mi sikhen mino.

**Mai vompomin ma kákán in-eine ma sian amá ukhein baya ino.**

*Mumunantá ma miyaní uren aviran baya:* Yisasintá ma mumunan é tiferuna anon umei karavusi fintena setin miyaní uren mi fura sen ume vá aau vá ída van nanin banta e sen aní ukhen mino. Karaisi ma furen bei nare vanaein manon tetin tesé uran mi Tiyarafenu ano setin nan puntákein nanin banta e sen tariyain Tiyarafenu ano ma vanasii avúavá daimin nain damú tetin tiya inten mino (Romu 5:9 fin ná onano).

*Tesé uran ma avusese ukhein baya:* Mana yaná ano ída o yampakhan pura sen avusese uaren maman kantasí ukhen ne sen mai vompon mano sian amá ukhen mino.

*Pori Ma Araí En Banasi Ákona Uantein Baya Ino*

<sup>1</sup> \*Téi Pori Yisas Karaisini yoran banta uno. Tiyarafenu ano vei kama vaya varen banasi mo siamino van tividen tisinten mino.

<sup>2</sup> \*Mai kama vaya Tiyarafenu ano vei sakhanampa vanta kayo oorá tiádan kantá bompon dókifin uvamádan baren mino.

<sup>3</sup> Tiyarafenu Anin Yisisi ma varará banta an daven Kin Devitini anampin afoká ukharé eini kama vaya ino.

<sup>4</sup> Tetinti Bafan Yisas Karaisin ma masí pintena Tiyarafenu ano ma vei ákonará avión mantaran maen mai véi Tiyarafenu Anin mi varéin Kantá Aunán mano setin anien mino.

<sup>5</sup> \*Tiyarafenu ano setin nan beni vaya varen ena anan nanin banta ma minó akhempá ma vaimpin

mo siamintin bentá mumunan uren ben ángan bákuriyáken ben aví maman daní ino van mi Yisas Karaisin pinté uaren mai amusin má ákona vá tetin timikhen mino.<sup>6</sup> Mágan tukhan mi mai ma Yisas Karaisini kékásí ino van ma arakhein nanin bantafin tiretin má baono.

<sup>7</sup>\*Romu kéka soe, Tiyarafenu ano siretin avábá uren mi veni kékásí ono van aren mino. Tetin Tifóe Tiyarafenu vá Bafan Yisas Karaisin má ano vá tiretin tarisari uantanti vá kuse vano.

*Romú Ma Monó Nanin Banta  
Vain Ma Pori Onano Van Iniyaré  
Ein Baya Ino*

<sup>8</sup> Ma varará minó akhempá ma vain nanin banta ano ma siretí ákona mumunan nan ma siren iniyain nan mi Yisas Karaisin avíká araíé Tiyarafenu susu sianté uno. <sup>9-10</sup>\*Mai ma séi moéqué tukáké mumunan iyaruna Tiyarafenu Anini kama vaya ma vanasi siamiyaruna mai sireti ma o afasí iyaona yana san nái máa yádasá béis timúkimpó ena ena siamiya rafu mai véi afová ukhen mino. Mai Tiyarafenu ano kanaén aaí intí tiretin o onano van mi ena ena simúkiá uno.

<sup>11</sup> Mai fara vara seyo, siretin ma ayain monó avúavá ma ákona uantan mai siretin má daídékuya Bafampin ákona e vano van mi iyá uno. <sup>12</sup> Mai senti ineine máan mi ukhen mino. Tiretí ankaní mumunan mano sen tiya intin maen inká anona senti mumunan mano siretin aya intin ma inten mai avúavá anon minó tetinti mumunan ákona usintanten mino. <sup>13</sup>\*Mumunan tiyofi sífá tiváeyan noe, sireti vaípá téi orono van kokhon damú ineine iyaré umpo saréa sretí ankan afovásá ono. Tenti yorantá ma ena anan kéká ano mumunan nanin bantai uan unein máa mana siretin má ono

van mi séi iyákun mifo kokhon daná ano ena ena afoká iyan tenti aa iyariyaren mino.

<sup>14</sup> Para vara seyo, Kiriki kéká maen afova vain nanin bantan bákon inká ena kéká maen ída afova yain nanin banta vákan mi maí kampin dorano van mi Tiyarafenu ano séin ma yoran timikhen mino. <sup>15</sup> Mágan tukhái sreti Romú nanin banta ma kama vaya siamin nan ten tirá ano mantiyen mino.

<sup>16</sup>\*Mágan tukhái kama vaya ma siami nan téi ída siyave éiyá uno. Mai fara vara seyo, Tiyarafenui ákona mai kama vayafin báken mumunan ma ein nanin banta evaránen aviriyen mino. Teti Yutan kéká nare ma siviaren ena kéká bá deren aviranten mino. <sup>17</sup>\*Tiyarafenu ano mai kama vaya rákéi vei avúavá aní uren mi setin nan puntákein nanin banta e sen taré iyan mino. Tetí ankan pura sé mumunan iyákun ná tetin nará puntákein nanin banta e sino. Mumunan aa sáké anan Tiyarafenu avorá puntákein nanin bantai in-ono. Mai fara vara seyo, Tiyarafenui vompon dókifin máa sikhen mino. “Mumunan ma inain nanin banta van mi Tiyarafenu ano funtákein nanin banta e sen ararantin ída furin ayun para van aunán baranten mino.” *Aba 2:4*

*Ume Avúava San Ma Tiyarafenu  
Ano Aran Nan Uantein Baya Ino*

<sup>18</sup> Mágan tukhan maen mai ma namu avúavá san mana uren pura sikhein avúavá ma oyan amé iyain kékápin Tiyarafenu ano inaru fáké bei aran daná aníe iyan mino.

<sup>19</sup>\*Para vara seyo, Tiyarafenu ano mai nanin banta vei avúavá aní ikán afová uran betíi inímpin pe van mino. <sup>20</sup>\*Mai ma vain danasinta maen Tiyarafenu ano ma esé araíen inaru vá bara vá uváden

\* **1:7:** Nam 6:25-26    \* **1:9-10:** Apo 19:21; Rom 15:23    \* **1:13:** Apo 19:21    \* **1:16:** Mak 8:38; Apo 13:46; 1Ko 1:18-24    \* **1:17:** Rom 3:21-22    \* **1:19:** Apo 14:15-17; 17:24-28    \* **1:20:** Yop 12:7-9; Íbo 19:1

inká minó danasinta ma uvantein táké ma erikhein mai vanasi ano véin ída ontén mifo veni áupá ma vain ákona vá béis ma uvantein danasinta vá anan afová en onten mino. Máan tukhantín mi ída mana nanin banta ano kanaíen Tiyarafenu van ída afová ukhé uno sen tinten mino.

<sup>21</sup>\*Betí ankan Tiyarafenu afová ukhen mifo vetí ída ven aví daní iyan ben tusu sian tiyan é iyan mino. Máan tiyákan mi vetíi ineine ano asuse uvíkan ineine vá afova vá ma ída vain kéká an dakhan mai anon áupin titípa ukhan aminofin ban mino. <sup>22</sup>\*Báken tetimpin afova van mino sé iyan mifo vetíi ineine asuse ukhein kayo ino. <sup>23</sup>\*Máan tukhen mi aunan má kakhan má ma vain Tiyarafenun betí ankan oyan amiren ída ena vá bentá monó té iyan mino. Betí ankan banta aman manon nafi nun aman manon nafi safúna aman manon nafi inká osafáe aman manon nafi uvariyan uren Tiyarafenurá ma monó teren me ifá en mai yanásintará anan monó té iyan mino.

*Barará Ma Vain Nanin Banta Ano Ma Ara Ara Umeí É Iyain Baya Ino*

<sup>24</sup> Máan tiyákan Tiyarafenu ano vetin ampiádan mi uméin anunu ano vetin e yarifaádan ída funtákein avúavasí iyáken beraran namu avúava suron baré iyan mino. <sup>25</sup> Máan nanin banta ano Tiyarafenu fura sikhein baya ampiren kampun bayan bariyan mino. Máan tiyáken minó daná ma uvantein Tiyarafenu me oyan amiyáken béis ma uvantein danasintará monó tiyan mai yanásinta aránaópá oriyan mifo seti vá Tiyarafenu avisá ena ena yaní ótifano. Pura ino.

<sup>26</sup> Betí ankan Tiyarafenu me oyan amin mi mai Tiyarafenu ano vetin ampiádan mi vetíi fain

avúavápin ban mino. Bákan mi anasi kéká ano ábasui funtákein avúavá me ampiren beraran ída funtákein namu avúavá ánaín bákuré iyan mino. <sup>27</sup>\*Banta kayo vá deren ábasui funtákein avúavá bá me ampiren betin áupin ira ariyákan e manten ena vanta kéká bá namu avúavasí é iyan mino. Banta kéká ano ma ayave avúavá ma variyain mai ayái anona evaránen betíi namu miyan baré iyan mino.

<sup>28</sup> Betí ankan ída Tiyarafenu aránaó ban ineine ikán mi vetin áikan namu ineine ánaín bákuriyáken minó ída funtákein avúava sintá varé iyan mino. <sup>29</sup> Ara ara namu avúava sintá ma veti varé iyain mai ída funtákein avúavá bá ena ina yaná ódare namu ineine uantan má ena namuroí uantan avúavá bá ena ina yana san aran iyáken inká banta aruan puriyáken aruve asive iyan ena vanta kampun tian tiyan ena vanta namu uanté iyan mino. Máan tiyáken inká ena oyampá baya siyan maen

<sup>30</sup> oorá ará baya e sian more mere iyáken Tiyarafenu namuroí uantiyan baya átakharé uren au khákan iyáken beyan nan amo siren namu avúava sintá varano van mana iniyáken be anóe afóeni vaya átakharé iyan mino. <sup>31</sup> Betí ankampin ída ovaren me iníden baran avúavá bákan betí ma siádákaré ein baya ánaín ída yakhafiyan mino. Máan tiyáken betíi adékena van ída iniyán ena vanta van ída arunan uantiyan mino. Mai namu avúava sintá ano vetimpin bíkákhén ban mino. <sup>32</sup> Tiyarafenu man baya ano máan avúava sintá ma varan nain mano vá purino sikhan maen betí ankan afová ukhen mifo mai vaya átakharé iyáken ara ara namu avúavá betí bariyan ena kéka

\* 1:21: Efe 4:17-18 \* 1:22: Yer 10:14; 1Ko 1:20 \* 1:23: Diu 4:15-19; Íbo 106:20 \* 1:27: Riv 18:22; 20:13; 1Ko 6:9

san moéke mai avúavasá barano siyákán bariyan mino.

## 2

### *Tiyarafenu Ano Ma Ume Yaimiyain Baya Ino*

<sup>1</sup>\*Máan tukhanti éi ída setisi kéka san mai namu avúavá bariyan mino sinono. Para vara seyo, ei avúavá ano ída funtákan mae mai ena ano ma variyain avúavá máan éi má bariya ono.

<sup>2</sup> Máan tukhan mae setí ankan afováé tifékun mai Tiyarafenu anon puntákein avúavápói mai ma namu avúavá bariyá ein kéka daiminten mino. <sup>3</sup> Máan tukhanti éi ma iniyaona ena kéka anan Tiyarafenu ano yaíden uman amirantí maé mai uman ída varanté unó té iniya fono.

<sup>4</sup>\*Tiyarafenu ano ma éin ída ainan namu miyan amin ma kama avúavasien ayáká ma ave ukhen bain mai van éi ída iniyáké oman aniana iya fono. Éi mai avúavá pinté ará baerano van mi vei kama avúavá anien ída ainan uman amiyan mino.

<sup>5</sup> Máan tiya ompo éi e ará ákona ureya ída ará baere ono. Máan ma iya vaona avúavá anoi ei namu miyan átaru iya vaonai Tiyarafenu funtákein kó ma erin nain damúi veni aranan ná ano yákó intiya éi mai namu miyan baran nono. <sup>6</sup>\*“Mana mana nain banta ano ma variyain avúavákái Tiyarafenu ano yaiminten mino.”

*Íbo 62:12; Pro 24:12*

<sup>7</sup> Máan tinten mifo inte kéka anó mantaan ákona ukhen kama yorarí iyare inten nafi mai Tiyarafenu ano ínaiimpáké betin amo siren kákan bí bá ayun ma fara van oriyán ban aunan ma aminten mino. <sup>8</sup>\*Aminten mifo mai ma vetiyan ban nain nan mana ma inire pura vaya me

oyan amiren ída funtákein avúavá ánaín mana vákuriyá inain kékái mai Tiyarafenu ano ve aran nan ná betin amaniná bana inten mino. <sup>9</sup> Mai ma namu avúavá ma variyain kayofin mi aau vá uman má afoká inten mino. Mai uman mano Yutan kayofin nare afoká uaren ena anan nanin bantafin orera inten mino. <sup>10</sup> Máan tinten mifo kama avúavá ma variyarain nain nanin bantan Tiyarafenu ano inarurá kama kumanin má kákán bí bá ará kusin má aminten mino. Yutan kayofin nare amiaren ena anan nanin banta vá deren aminten mino. <sup>11</sup> Para vara seyo, ída aronaín avúavá bantin Tiyarafenu ano mana avúaváká anan daiminten mino.

<sup>12</sup> Man baya ma ída afová ukhen ma umeí iyárein nain kékái Tiyarafenu ano yaíden uman aminten mino. Man baya ma afová ukhen ma umeí iyáin kékái Tiyarafenu ano mai man bayafó betí avúavá daíden uman aminten mino. <sup>13</sup> Para vara seyo, man baya van mino sen ma fara oniyain kéka sa Tiyarafenu avorá puntáken naino. Ída ino. Mai ma man baya ánaín bákuriyáin kéka san mi Tiyarafenu ano funtákein kéka se siyan mino. <sup>14</sup>\*Ena anampin ída Tiyarafenu man baya váé iyan mifo vetíi inin pintéi fura sen ma man baya afová ukhen dakhafeinií iyan mino. Para vara seyo, vetíi aukákéi funtákein avúavá ánaín dakhafiyán namu avúavá oyan amiyan mino. <sup>15</sup> Mai ma variyain avúavá anon betin anien Tiyarafenu man baya ano setin túpin bái funtákein avúavá bariyáké namu avúavá ída variyá uno sen inikhen mino. <sup>16</sup> Inikhen mifo vanasi ma yaimin nain damú ma fura sen afoká intin maen Tiyarafenu ano Yisas Karaisin ákona amintin minó nanin banta ma aúpá bariyáin nain avúavá

\* 2:1: Mat 7:1-2; Yon 8:7 \* 2:4: Efe 1:7; 2Pi 3:15 \* 2:6: Mat 16:27; 2Ko 5:10 \* 2:8:

2Te 1:8 \* 2:14: Apo 10:35

daiminten mino. Máan mi sé tesí vaya minópin tian amá uno.

*Man Baya Anon Kanaén Tiya Inten Ne Ma Yutan Kayo Ano Siyan Baya Ino*

<sup>17</sup> Téi Yutan bantan báké Tiyarafenu man bayá fákakhé maé beni kékáí varuna véi siya inten mino sireya e amo sé iya ono. <sup>18</sup> Tiyarafenu ma anunu iyain éi afová ukha ono. Para vara seyo, man bayá fintena kama avúavá bá namu avúavá bá inka éi inireya afová ukha ono. <sup>19</sup> Éi seja inka séi afová ukheruna kanaíé auu yufukukhein aa aní uanté inká anukheimpin ma vain kéká oon kakhaanté onté uno se iné iya ono. <sup>20</sup> \*Éi ma iniyaona ano Tiyarafenu man bayá fintena fura vaya vá afova vá minó manteruna mai kasaé ída ma afova vain kayo vá inka iyampon arinta an ma yakhein kéká bá afova amiýá onté uno se iné iya ono.

<sup>21</sup> \*Máan téiyá ompo ena nanin banta ma afova amiýáke mai eyan ída afova variya ono. Ena kéká san ída vá umoyan barano sire mae éi umoyan baré iya ono. <sup>22</sup> Ena ana safí avafun nafi ma yarifan mai namu ukhen ne sé iya ompo éi mai avúavá baré iya ono. Kam-pun ayarafenurá ída vá monó teno séiya ompo monó ma ída inin afokhampin ma vain nanin bantai monó namun pintena éi manáa yaná umoyan baré iya ono. <sup>23</sup> Éi ma iniyaona ano Tiyarafenu man bayá afová ukhé uno sireya e amo sé iya ompo éi Tiyarafenu me oyan amireyá beni man bayá yurafuré iya ono. <sup>24</sup> Mai avúavá san mi Tiyarafenu vompon dóki ano máa sikhen mino. “Tiretí ankani anarái ena anan kéká ano Tiyarafenu oy-ampá bayá siren béin oyan amé iyan mino.” *Ais 52:5; Isi 36:22*

\* 2:20: 2Ti 3:5 \* 2:21: Mat 23:3-4 \* 2:26: Kar 5:6 \* 2:29: Diu 30:6; Kor 2:11

*Au Khavin Avúavá Pákena Vaya Ino*

<sup>25</sup> Tiyarafenu man bayá ánain ma vákurinteyá mai au ma khavin avúavá kama inten mifo ída ma minó man bayá ánain bákurinteyá mai éi ída ma au khakhein banta an mi yakha ono. <sup>26</sup> \*Máan tukha ompo ena anan nanin banta kayo ano ma Tiyarafenu man bayá ánain ma yakhafintin maen mai ída Tiyarafenu ano vetin avían bei kékáí inten nafino. <sup>27</sup> Ena anan nanin banta ano ída au khavin Tiyarafenu man bayá ánain dakhafiyan mifo sreti Yutan kéká ano veni man bayá afová ureya au khaviya ompo man bayá ánain ída yakhafiyona enan anan kéká ano ínaimpáké tiretin daídantin uman aminten mino.

<sup>28</sup> Mai fara vara seyo, éi ída kanaíé yan bukhafa máara safi inká au khavin avúaváka safi Yutan banta uroní inono. <sup>29</sup> \*Ida ino. Tiyarafenu avorá ma funtákein manoi fura sen Yutan banta uron ban mino. Inká pura sen au khavin avúavá ma vain mai yan bukhafa máa ma au khavin naino. Tiyarafenu Kantá Aunan manoi aúpin afoká uádé iyan mino. Intéa kéká anó mai avúavá baré iyan nafi mai varará nanin banta ano va amusin uanté iyan naino. Ída ino. Tiyarafenu anon amusin uanté iyan mino.

### 3

*Tiyarafenu Ano Ma Siren Mai Ánain Pura Sen Dakhafiyain Baya Ino*

<sup>1</sup> Au ma khavin avúavá ma au ina yaná ana ma vantin maen Yutan kéká anó intesá ená ena anan banta kéká esantanten nafino. Au khavin avúavá anó kama yanásá afoká uádé iyan nafino. <sup>2</sup> Pura uron mino. Tiyarafenu ano Yutan kayo ara ara kama yanásinta

amikhen mino. Esé araíen minó bei vaya amikharen mino.<sup>3</sup> Pura ino, manáa ano vetí ma siadákaré ein baya yurafuren mai ánaín ída yakhafé iyan mifo máan ma inaín nan Tiyarafenu ano veyan ma siadákaré ein baya yurafurinten nafino.<sup>4</sup> Ída uron mino. Minó barará banta ano kampun té iyan mifo Tiyarafenui vompon dóki ano ma sikheiníen Tiyarafenu veyáká anan pura sé iyan mino.

“Tiyarafenu oe, éi funtákein avúavá máa fosá téin kó tisintano.

Beti ma éin kó tiantano van inti maeya éi vetíi kó darádeya funtákein kó anan tin nono.” *Íbo 51:4*

<sup>5</sup> Tetisi namu avúavá ano ma Tiyarafenui funtákein avúavá ma maman dákosí urantí maé mai seti inte esá tente rafuno. Tiyarafenu ano ma setinti ume ayá ma anona simin nain nan mai véi namu avúavái iyan minó tétifante rafuno. (Manáa nanin banta ano máan ineinen é iyan mino.)<sup>6</sup> Ída uron mino. Tiyarafenu ano ma ída kama avúavá ánaín ma ena ena vakurinten maen intesá ureñ ná béis minó barará nanin bantai avúavá daiminten nafino.<sup>7</sup> Manáa ano máa sen iné iyan mino: “Tenti kampun baya ano ma Tiyarafenui fura vaya ma maman dákó intin mai ano veni kákán bí moékantin ma kákani suron iyantin maen mai véi nái anarasá téin nan ume vanta ino siren ná namu miyan timinten nafino.”<sup>8</sup> Erí namu avúavá bariyá tiféken mai ráké moéken kama avúavá afoká ino ma siyanteya mai asuse vayan té iya ono. Manáa vanta ano sen tufin kuráden téi ma siyaruna vaya van asuse vaya vá manaí ukhein bayan tiyan mino sé iyan mino. Mai ineine máden ma mai avúavá ánaín dakhafiyá inain kékái Tiyarafenu ano yaíden mai ayá namu miyan aminten mino.

\* 3:9: Rom 1:18; 2:24; 3:23

*Ma Varará Ma Mana Ída  
Funtákein Nanin Banta Vain Baya  
Ino*

<sup>9</sup> \*Máan tiya ompo mai seti Yutan kéká anó ena anan kayo esantakhé tife rafuno. Ída ino! Minó Yutan kéká bá Kiriki kéká bá ano manai é umefin bá tíféuno.<sup>10</sup> Mai van Tiyarafenui vompon dóki ano máa sikhen mino.

“Ída mana yanta ano funtákein avúavá baré iyan mino.

Ída uron mino.<sup>11</sup> Ída mana ano kama afova mantén mino.

Ída mana ano Tiyarafenu van dosikhen mino.

<sup>12</sup> Minó ano inka Tiyarafenu oyan amen mino.

Minó ano mo namu uron en mino.

Ída mana ano kama avúavá bariyan mino.

Ída uron mino.” *Íbo 14:1-3; 53:1-3; Ekr 7:20*

<sup>13</sup> “Betíi vaya ano vanta masí ma yuvakhen namu aunka é iyainíi ukhen mino.

Betí ankan kampun baya anan té iyan mino. *Íbo 5:9*

Betin oofen namu osafáei aufon ma víkakhen avanen eraveiníi iyan mino. *Íbo 140:3*

<sup>14</sup> Betí ankan ena vanta ma namu ureñ aran amiyan uman amin baya anan té iyan mino.” *Íbo 10:7*

<sup>15</sup> Beti ainan ena vanta aruan purono van manan é iyan mino.

<sup>16</sup> Betí ankan ma oriyaintá ena nanin banta namu uanten uman amen en nó é iyan mino.

<sup>17</sup> Ena nanin banta vá ma ará manafín ureñ ban avúavá betí ankan ída afová ukhen mino.” *Ais 59:7-8*

<sup>18</sup> “Tiyarafenu ano ma vetí ankan uman amin nan ída feré iyan mino.” *Íbo 36:1*

<sup>19</sup> Máan tukhein nan mi man bayá ma amikhein nanin banta ano mai man bayá ano ma sikhan nain aránaopa sá bano. Para vara seyo, ínaimpáké ma Tiyarafenu ano ma varará nanin banta ma yaimin nain damú ída mana ano kanaíen tiyáken téi man bayá ída afová ukharé uno sinten mino. <sup>20</sup>\* Man bayá ánaín ma vákurin avúavá ano Tiyarafenu avorá ída funtáken banten mino. Para vara seyo, man bayá ma afova suron ma inten mai seti ume nanin bantan bá uno sen afová inten mino.

*Yisas Karaisintá Ma Mumunan  
Iyain Kayon Tiyarafenu Ano Ume  
Arúantáden Puntákein Nanin  
Banta E Sen Aré Iyan Mino*

<sup>21</sup> Man bayá ánaín ma yakhafintasa Tiyarafenu ano setin nan puntákein nanin banta e sinten naino. Ída ino. Pefá ma Tiyarafenu vompon dókifin ma sikaré einiéen ena aa sákéi setin nan puntákein nanin banta e sinten mino. <sup>22</sup>\* Ume arútintáno van muno siren ma Yisas Karaisintá ma mumunan inain nanin bantan Tiyarafenu ano ume arúantáden puntákein nanin banta e sinten mino. Yutan nanin banta fi ena anan nanin banta fi mai aa sáké anan Tiyarafenu ano minó aviranten mino.

<sup>23</sup> Mai fara vara seyo, minó nanin banta ano umeí ukhéi Tiyarafenu kakhakhein avúavápíñ o afasí ukhé tiféuno. <sup>24</sup>\* Yisasi ma setin ume arútintákein mairái Tiyarafenu ano setin tarisari uren puntákein nanin bantae siyan mino. <sup>25</sup> Tiyarafenu ano ma Yisasin tiantan erein mai véi furintin beni nare ma vanain nain mano minó bei vanasii ume arúantáno van mino. Mai avúavá ma Tiyarafenu varein manon tetin nan puntákein nanin bantae siyan mino. Pefá Tiyarafenu ano funtákein avúavasíí en umeí ma

ein nanin banta ída ainen uman amikharen mino. <sup>26</sup> Máan mana en mi saréa ma ume nanin banta ano Yisasintá ma mumunan in maen Tiyarafenu ano funtákein nanin bantae siyan mino.

<sup>27</sup> Máan tukhen mifo mana vanta ano kanaisa en ná téi kama avúavá bariyákuñ Tiyarafenu ano amusin iyan mino siren ná be amo sinten nafino. Ída ino. Man bayá ánaín ma vákuriyá tiferuna rasaino. Ída ino. Tetisi mumunantái funtákein nanin banta e sinten mino. <sup>28</sup> Para vara seyo, mumunan ma iyá tiferuna anon Tiyarafenu avorá puntaké tifé umpo man bayá ánaín ma vákurin avúavá ano vaino. Ída ino.

<sup>29</sup>\* Tiyarafenu maen mai Yutan kayoi Ayarafenu aná ban nafino. Béi ída ena anan nanin bantai Ayarafenu van nafino. Ída ino. Béi ída Yutan kéká Ayarafenu ana van mifo ena anan nanin bantai Ayarafenu vái van mino.

<sup>30</sup>\* Mágñ tukhan maen mai mana Tiyarafenu anan báken pura sen ma mumunan in aa sáké anan Yutan kéká safi inká ena anan nanin banta fi e avíán puntákein kéká se sinten mino. <sup>31</sup>\* Máa sinten mifo mai seti nan man bayá me ifá uren mumunan in ain mana yakhafino vara fino. Ída uran mino. Pura sen mumunan in avúavá anoi man bayá maman ákona iya ono.

## 4

*Abaraamuni Mumunantá Ma  
Funtákein Banta E Sein Baya Ino*

<sup>1</sup> Abaraamu maen tetin an dakhein bantan báken tetin tináu ifo véin nan ma Tiyarafenu ano funtákein banta e ma sikha ein nan ma afová iyáké tetí ankan nái esá té tifante rafuno. <sup>2</sup> Abaraamu ma kama yorari iyá ein nan puntákein banta uno siren be amo sinten mifo Tiyarafenu avorá ída ino. <sup>3</sup>\* Para vara seyo,

\* **3:20:** Íbo 143:2; Rom 7:7; Kar 2:16 \* **3:22:** Kar 2:16 \* **3:24:** Rom 5:1 \* **3:29:** Rom 10:12 \* **3:30:** Diu 6:4; Kar 3:20 \* **3:31:** Mat 5:17 \* **4:3:** Kar 3:6

Tiyarafenui vompon dóki ano setin tisimiyáken Abaraamu ma Tiyarafenurá mumunan ein nan mi véin nan puntákein banta e sikhen mino. *Esé 15:6*

<sup>4</sup> Banasi ano yoriyá eintái miyan baré iyan mifo ída fara amusin ne siren miyan amé iyan mino.

<sup>5</sup> Máan tukhan maen basasii mumunantái Tiyarafenu ano funtákein nanin banta e siyan mifo vetíi yoranta saino.

<sup>6</sup> Man bayá ma yakhafiyareona rasa Tiyarafenu ano funtákein banta e sikhen naifo amusin ná ono sen Kin Deviti mai avúavá san mi sikhen mino.

<sup>7</sup> “Bayá átakharé uren umeí iyá intin ma ume ampiantáden daramantákán nain kéká ano vá amusin ino.”

<sup>8</sup> Tiyarafenu ano ume ampiantáden ma fura sen ma áuntan nain kéká ano vá amusin ino.”  
*Ibo 32:1-2*

<sup>9</sup> Tetí ankan ma iniyaruna ano Abaraamuni mumunan nan mi Tiyarafenu ano funtákein banta e sikhen mifo mai avábá ma vain mai Yutan kéká ina ana fi aa ena anan nanin banta yasa fino. <sup>10</sup> Máa sikhen mifo mai inté ma uran ná bénan nanin puntákein banta e sen nafino. Au ma kharan ná puntákein banta e sikharen nafi áa au ma ída khakhan ná puntákein banta e sikharen nafino. Au ma ída khakhan maen pefái Tiyarafenu ano véin nan puntákein banta e sikharen mino.

<sup>11</sup>\* Au khavin avúavá ída afoká ukhan inká Abaraamu yere ída au khakhan maen pefái Tiyarafenu ano veni mumunantá puntákein banta e siren bén avíkaréin mai avúavái aníen mi au ma khavin dákóen mino. Máan tukhein nan mi mai ma au ída khavin mumunan ukhein kékái anafun Abaraamu van mino. Betí ankaní mumunantái Tiyarafenu avorá puntákein kékasi ukhen mino.

<sup>12</sup> Abaraamu maifefá ída au khakhen mumunan ukharen mifo au ma khakhein kéká ano ma Abaraamun an den mumunan ma intin maen mai Abaraamu vetin anafu vá deren ban mino.

*Tiyarafenu Ano Ma Iyáantákein  
Mai Minó Mumunan Nanin Banta  
Anon Baranten Mino*

<sup>13</sup>\* Pefá Tiyarafenu ano ma Abaraamu má be anavasin má ayampin minó bara amenté uno siren ma iyáantákarein mai véi ma man bayá ánaín bákuriyá einta saino. Ída ino. Béi ma Tiyarafenu vayará ma mumunan eintái véin nan puntákein bantae siren iyáantákaren mino. <sup>14</sup>\*Máan tukhan mi man bayá ánaín ma vákurin kéká anan Tiyarafenu ma iyáantákáré ein daná baranten mino ma sinteya mai mumunan ánaín ma vákurin avúavá ano faen daná an dantin mi mai ma Tiyarafenu ano iyáantán nain daná ano yere fara savifá o afeyoranten mino. <sup>15</sup>\*Mai fara vara seyo, man bayá ánaín ma vákuron van ein kéká man bayá anon uman amé iyan mifo man bayá ma ída vantin maen man bayá yurafurin avúavá ída vanten mino.

<sup>16</sup>\*Máan tukhan mi Tiyarafenu ano ma iyáintákáré ein mai yaná mumunan aa sáké anan para vará tifanté uno. Yutan kayoi avúavá ánaín ma ída yakhafin ma Abaraamu ma mumunan iyá ein an ma yátifanté mai Tiyarafenu ano ma Abaraamun iyáantákáré ein daná bará tifanté uno. Máan mana en mi Abaraamu mai minó mumunan ma inain nanin banta anafu í inten mino. <sup>17</sup> Tiyarafenu ano ma véin tiamikharé ein mai vompon dókifin máa sikhen mino. “Téi anón éin maman kokhon nanin banta anafuní é uno.” *Esé 17:5*

\* **4:11:** Esé 17:10-11 \* **4:13:** Esé 17:4-6; 22:17-18; Kar 3:29 \* **4:14:** Kar 3:18 \* **4:15:**

Purin banta ma evaránen aunan amen ma ída varé ein daná ma vayafó tíkan afoká ein Tiyarafenurá ma mumunan ein nan mi Abaraamu maman barará nanin banta anafuní uanten mino. <sup>18</sup> Tiyarafenu ano máa sikharen mino, “Éi kanaié minó ofu yankafinte fono. Ída ifo en ana akhafana ano máan uron mi en mo kokhoní inten mino.” *Esé 15:5*

Mai ma iyáantein danasinta ano ída kanaíen afoká irí ukhan mifo Tiyarafenui vayará ana Abaraamu fura sen mumunan ukharen mino. <sup>19</sup> \*Abaraamuni orana mana antareti (100) vákan ben au varimú ukhan Sara ída kanaíen iyampon kairí ukhan maen béis afová ukhen mifo veni mumunan mano ída ánuní in moéken ákona ukharen mino.

<sup>20</sup> Tiyarafenu ano ma Abaraamu minó daná iyáantákein nan iniren béis ída kokhon ineine ina vei mumunan ákona uren Tiyarafenu aví daní iyaren mino. <sup>21</sup> Para vaino, Tiyarafenu ano ma iyáantákein daná kanaíen afoká inten mino siren béis afová ukhen pasen mino. <sup>22</sup> Béini mumunan nan mi Tiyarafenu ano funtákein banta e sen mino.” *Esé 15:6*

<sup>23</sup> Tiyarafenui vompon dókifin ma funtákein banta e sen ma arakhein mai Abaraamun beyákasara sikhen naifo <sup>24</sup> mai setin ma san deren tikhen mino. Tetisi Bafan Yisasín ma Tiyarafenu ano masí pintena avían mantakheitá ma seti mumunan ma iyaruna mai van mi Tiyarafenu ano iniren teti nan puntákein nanin banta e sen tariyan mino. <sup>25</sup> \*Tetisi ume arútintano vare siren Tiyarafenu ano namuro kéká ayampin Yisasín ampiádan aruan puren mino. Púbíkan tetin nan puntákein nanin banta e sen tarano van mi Tiyarafenu ano véin

masí pintena orun avían manten mino.

## 5

### *Mumuman Mano Ma Amusin Afokáin Nain Baya Ino*

<sup>1</sup> Máan tukhái setí ankan inka mumunan ukhé tifé kun mi Tiyarafenu ano seti nan puntákein nanin banta e sikhen mino. Tetisi Bafan Yisas Karaisí ma varein avúavá anon Tiyarafenu vá maman teti sirá manafiní usinten mino. <sup>2</sup> Yisaíi anon tetisi mumunantá aa uvitintádai Tiyarafenui sarisari aúpin bá tifé uno. Tiyarafenui ákona vá kakhan má dere varano van mi mantaan ákona ukhé tifé uno.

<sup>3</sup> \*Máan ma ukhé kun ma minó uman tetimpin afoká iyain mai vasará timusin ó tifano. Mai fara vara seyo, mai anon tetisi mumunan ákona usinten oriyan banten mino. <sup>4</sup> Tetisi mumunan ma ákonaen bantin maen mai anon tetin ákona usintantí minó akhenóka yo ékaré Tiyarafenu ma sivirano van tikhein nan ave ó tifanté uno. <sup>5</sup> Tiyarafenu ano ma setin tivirano van tikhein mai ída fasavi ave ukhé bá tifanté uno. Mai fara vara seyo, Tiyarafenu ano setin nan anunu uren mi Kantá Aunan timikhan mai ano setin túpin bíkakhen mino.

<sup>6</sup> Teti yantá ída kanaí é mantaan ákona irí ékun mi Tiyarafenu ano ma aní ukhá ein damú afokáin ume nanin banta evaránen avirano van mi Yisas Karaisí yorun puren mino. <sup>7</sup> Ída kanaíen mana vanta ano kama vanta aya ono van beni varu varen purinten mifo kama avúavá suron ma variyain bantai varu varen kasaen purono van inten mino. <sup>8</sup> \*Teti ume avúavúpin para vá tifé kun mi Tiyarafenu ano ve ákona arunanái anien mi Yisas Karaisí furino van tiantan eren mino.

\* **4:19:** Esé 17:17   \* **4:25:** Ais 53:4-5   \* **5:3:** Yem 1:2-3; 1Pi 1:5-7   \* **5:8:** Yon 3:16; 1Yn  
4:10   \* **5:9:** Rom 1:18; 2:5; Efe 2:3-5

9 \*Karaisi ma furen bei nare vanaein manon tetin tesé uran mi Tiyarafenu ano setin nan puntákein nanin banta e sen tariyain bái ma vanasii avúavá daimin nain damuí setin tiya inten mino. <sup>10</sup> Tetí ankan ma Tiyarafenu vá namuroí ukharé ékun ma Tiyarafenu Anin ma furein manon namuro avúavá kípa sintáden Tiyarafenu vá maman tirá manafiní usinten mino. Máan tukhan bái evaránen e mantakhein mai ma fara van oriyán ban uman pintena fura siren tiya inten mino. <sup>11</sup> Mai ma Bafan Yisas Karaisin ano ma varein avúavá anon tetin maman Tiyarafenu vá ma sirá manafiní ukhein mai vará timusin ótifano.

*Adamun Pinté Purin Afoká Uvin  
Ma Karaisin Pinté Aunan Baran  
Afoká Ukhein Baya Ino*

<sup>12</sup> \*Adamu ano ma umeí ein mai anon purin dákó uran ma varará oreraen mino. Mai fara va ino, minó nanin banta ano umeí ukhan mino. <sup>13</sup> \*Man baya ída afoká ukhan ume nare ma varará baren mifo man baya ma ída afoká ukhan maen namu avúavá ma variyá ein kayoi ume Tiyarafenu ano ída yankafiyán mino. <sup>14</sup> Adamun táké ma aráí uren eren Mosesintá ma e kanai ukhá eintá purini ákona yafikhán minó ano furiyaren mino. Mai kéká ano ída Adamu ma mana ákona are varákeinén mifo yetí ankan paran puriyaren mino. Ínaiimpáké Yisasi ma ena avúavá baran nain mi Adamu faran aní ukhan mino.

<sup>15</sup> Máan tukhen mifo Adamuni ume vá Tiyarafenu sarisari vá ída manaí ukhen mino. Mai fara vara seyo, mana vantai umerái minó nanin banta ano furiyárein mi Tiyarafenu sarisari ákona anon Yisas Karaisin pinté uaren banasii ume arúden evaránen avíken mino. <sup>16</sup> Tiyarafenu sarisari

ano Adamuni ume vá ída manaí ukhein mi setimpin afoká é iyan mino. Adamu ano umeí ureintái Tiyarafenu ano minó nanin banta van umeí ukha ono sikhá maé tetí ankan moéké ume avúavá bariyá tifékuñ maen Tiyarafenu ano mai van ída inin tetin tarisari uren puntákein nanin banta e sen taré iyan mino. <sup>17</sup> Adamu veyáká umeí ureintái furin mano minó nanin bantafin afoká ukharen mifo Tiyarafenu moékakhein tarisarirá ma funtákein avúavá baran nain kéká anon Yisas Karaisin pinté uaren ume vá purin má esantan-ten mino.

<sup>18</sup> \*Máan tukhan mi mana vanta anon man baya yurafúdein anarái Tiyarafenu ano seti minó nanin banta mai umerái kó tisintákaren mino. Máan manan en mi mana vanta ano funtákein avúavá uren tétin e sivian Tiyarafenu kékasi uren mi véi ayun ma fara van aunan tetin timen mino. <sup>19</sup> \*Para vara seyo, mana vanta ano ma vaya átakharé ureintái minó nanin banta ano veni avúavá baren umein nanin bantaí ukharen mino. Máan manan en mi mana vanta ano ma Tiyarafenu oo yaiyuká eintái kokhon nanin banta ano véin avorá puntákein nanin bantaí inten mino.

<sup>20</sup> Minó nanin banta ano vetí ume afová ino van Tiyarafenu man baya amirákan beti mai man baya moéken durafuriyan mino. Durafuriyáken kokhon umeí ma iyan maen Tiyarafenu sarisari ano moéken kákoni iyaren mino. <sup>21</sup> \*Máan tukhen mi ume avúavá ano vetí yafisiní ukhen mi mai ume anon purin afoká uanten mino. Máan tukhen mifo setisi Bafan Yisas Karaisini yorantái Tiyarafenu sarisari ano yafisiní ukhen mi véi setin tarisari uren teti nan puntákein nanin banta e sen tarará ayun para van oriyán ban aunan manté tiféuno.

\* 5:12: Esé 3:6; Rom 6:23

\* 5:13: Rom 4:15

\* 5:18: 1Ko 15:22

\* 5:19: Ais 53:11

\* 5:21: Rom 6:23

**6***Umei Ákona Ma Kípakhein Baya Ino*

<sup>1</sup> Taréa inte esá teti sé tifante rafuno. Umeí aná teti é oriyá bá tifékun ná Tiyarafenu ano sarisari en oriyan banten nafino. <sup>2</sup> Ída uron mino. Teti inka ume avúavá kíparé purein an dakhé umpo mai intesá uré evarané ume avúavá baranté tife rafuno. <sup>3</sup> \*Tetí ankan ma Yisas Karaisin má ma manafin túpá uvé monó non baré inká manafin túpá uvé puré ma ukhá é tiferuna mai sreti áunte rafono. <sup>4</sup> \*Monó non ma feré tiferuna anoi Karaisini furin má teti súpá uvé kun mi Tiyarafenu ano Karaisin má manafin masí ukhen mino. Be Afóe ano ma Karaisin masí pintena ma vei kákan ákonofó avían manteiní é tetí ankan auyen aunan mamaré bá tifanté uno.

*Yisas Karaisin Má Ma Mumun Nanin Banta Ano Orun Mantakhein Baya Ino*

<sup>5</sup> Tetí ankan Karaisini furin má manafiní ukhé tiferuna véi ma e manteiní é tetin má dere e mantá tifanté uno. <sup>6</sup> \*Tetí ankan ma umei yoran bantaí ma ukharé é tiferuna mai inka Karaisin ma yaa unkamádantá aruan purein mano setin túpin ma yoriyaré ein umei ákona kípakhen mino. Máan tukái seti ída umei yoran bantan bá tiféuno. <sup>7</sup> Para vara seyo, setí ankan ma Karaisin má pureruna anoi umei ákona fintena ampiádá bá tiféuno.

<sup>8</sup> Inká tetí ankan ma Karaisin má manafin puró tifanté béini auyen aunan bará tifanté afová ukhé tiféuno. <sup>9</sup> Para vara seyo, Karaisi inka masí pinté e mantakhein béi ída enadá purinté tetí ankan afová ukhé uno. Mai furini ákona ída vain ída kanaíen bén maman bararasí inten mino. <sup>10</sup> Béi ma manádá ana ma furein avúavá

anon umei ákona kípaáden mino. Máan turen mi véi Tiyarafenu aví daní ono van para van mino.

<sup>11</sup> \*Máan manaeaya sretí ankan má dere umei ákona aránaópá ída va ompo Yisas Karaisin pinté uare vá Tiyarafenu aví daní ono vará para vano. <sup>12</sup> \*Tireti ankan ída vá áesiná ume ano sretíi avúaváká dafisino. Mai fara vara seyo, ume ano e yarifaádantiya namu avúavá ánaín bákurin nono. <sup>13</sup> \*Tireti ankan ída vá mana vukhafa áesin ná umei yoran danasí ukhen ná ena nanin banta namu uantiyan bano. Ída vá máan tiyáke vá Tiyarafenu ma auyen aunan amikhein nará tireti ankan pura sire vá minó bukhafa véin ná ameno. Tireti ankan e au áesin ná Tiyarafenu yoran danasí uven ná beni funtákein avúavá dorarí ino. <sup>14</sup> \*Taréa ume ano ída sretí ankantá dafiken mino. Mai fara vara seyo, sretí ankan taréa ída man bayai aránaópá ba ompo Tiyarafenu sarisari aránaópái va ono.

*Puntákein Avúavúi Yoran Bantaí Ma In Baya Ino*

<sup>15</sup> Máan tukhái setí ankan ída man baya aránaópá taréa vátifé umpo mai intesá ótifante rafuno. Tiyarafenu sarisari aránaópá bá tifé umpo mai umeisá é oriyá bá tifante rafuno. Mai ída uron mino. <sup>16</sup> \*Tireti ankan ma maná yana san ma moéke ininteya mai veni miyan ída van doran bantaí ma inona ídá afová ukhe fono. Tireti ankan umei miyan ma ída van doran bantaí ukheyá purinte fo áa Tiyarafenu vaya ánaín ná bákureyá puntákein nanin bantaí inte fono. <sup>17</sup> Tireti ankan pefá umei yoran bantaí ukharé en nan ma Tiyarafenu ano sretin ma vei auyen afova vaya siamira ma yakhafiyaona vará Tiyarafenu susu siantano. <sup>18</sup> Tireti ankan

\* 6:3: Kar 3:27    \* 6:4: Kor 2:12    \* 6:6: Kar 5:24    \* 6:11: 2Ko 5:15; Kar 2:19    \* 6:12:

Esé 4:7    \* 6:13: Rom 12:1    \* 6:14: 1Yn 3:6    \* 6:16: Yon 8:34; 2Pi 2:19

umei yoran bantaí ukharé en nan mai finté Tiyarafenu ano ovaránen avíden maman puntákein avúavái miyan ída varan doran bantaí uráya va ono.

<sup>19</sup> Ayafa vanta kéká bá ída miyan baran doran banta kayo váká o siaré ma siamiyaruna mai sretí ankan kasae ineno van muno. Pefá tiretí ankan e au áenán pain avúavá bá baya átakharéin avúavá bái miyan ída varan doran bantaí ukhareya ompo saréa sreti au áesin ná puntákein avúavái ída miyan baran doran bantaí uvinti vá Tiyarafenu avorá kantasí ukhe vano.

<sup>20</sup> Pefá ume avúavái ída miyan baran doran bantaí ma ukhá eona yamú kayofin puntákein avúavasí ma inan tiretí ankan ída iniyare ono. <sup>21</sup> Mai avúavá ano intéa kama yanásintá maman afoká uáden nafino. Ída ifo mai ano e aú iyampon ma aruan purin manan maman afoká ukhayai sretí ankan ma fefá bariyá eona avúava san taréa ayave iya ono. <sup>22</sup> Ayave van iyaré enan Tiyarafenu ano umei ákona fintena sretin evaránen avíden bei ída miyan baran doran bantaí ura va ono. Máan ma eona anon puntákein avúavá afoká intiya fara van oriyan ban aunan baran nono. <sup>23</sup> \*Para vara seyo, umei miyan purin mana ifo setisi Bafan Yisas Karaisin pinté uaren Tiyarafenu ano vei amusin mi ayun ma fara van oriyan ban aunan tetin timikhen mino.

## 7

### Taréa Seti Ída Man Baya Aránaópá Bá Tiféuno

<sup>1</sup> Mumunan ukhe ma man baya afová ukheona kéká soe, mai ma ída furin para vain kéká ano vá man baya ánaín dakhafino ma sikhein mai sretí ída afová ukhe

fono. <sup>2</sup> Mana ábqsui avúavákai siádanté uno. Anasi ano ma vanta mantantin ma ve avafu ída furin para vantin maen mai man baya ano ve avafu má damuádan ban mifo ve avafu ma furintin man baya ano ída enádá bá be avafun má damuádantén mino. <sup>3</sup> Máan tukhen mifo vanta ma ída furin para vantin ma ve aná ano ena vanta e mantent o varanten maen mai nanin mano famúku avúavasí inten mino. Máan tinten mifo ve avafu ma fubintin maen mai man baya ano ída véin damukhein ena vanta ma varanten mai ída famúku avúavasí inten mino.

<sup>4</sup> \*Máan tukhanti mumunan tifá tiváeyan noe, ma vá afová ono. Tiretí ankan man bayai ákona finté Yisas Karaisin má daa unkamádantá púken nan mi Mosesini man baya ano ída fákááda va ompo mai ma furin pinté e mantakhein banta vái kase vaono. Máan tukhaona kasae Tiyarafenu avorá kama yorarí iyáke kama aran imádan nono. <sup>5</sup> Tetí ankan ma feyante sinunu ánaín ma fara yakhafiyá bá tiferuna anon tetin túpin umeiin ineine édavíyan mino. Máan tiyain mano man baya mamádan umeiin inin erí ma umeí uré kun mi furin afoká iyaren mino. <sup>6</sup> \*Máan tiyare ma setí ankan Yisas Karaisi má pureruna anon man bayai ákona fintena utítintádan ída mai ano setí ankan damukhen mino. Máan tukhantí ída setí ankan peyante man baya ano ma uvantein bompon ánaín dakhafó tifanté umpo Kantá Aunani auyen avúavá kái fure sé Tiyarafenu ánaín dakhafó tifanté uno.

### Tiyarafenu Man Baya Ano Ma Setisi Ume Maman Afoká Ein Baya Ino

<sup>7</sup> Tiyarafenu man baya ma iniyaruna anó umeí iyá tife rafuno. Ída ino. Man baya ano ída umeí iyan mifo setisi umen aní usinté

\* 6:23: Rom 5:12, 15    \* 7:4: Rom 6:2, 11

\* 7:6: Rom 8:2; 6:4

iyan mino. Para vara seyo, man baya ano ma sen “ída vá ena ina yana san aran nano.” *Eks 20:17; Diu 5:21*

Man baya ano ma ída sisimikhantí mai séi ída kanaí é afová onté uno.<sup>8</sup> Mágan tonté erunaren mifo man baya finté uaren mi ara ara sinunu mamádon tetin túpin édavé iyan mino. Man baya ída varé intin umei ákona ída van nainten mino.

<sup>9</sup> Téi man baya ma ída afová ukhé maé mai séi kana vá uno siyare umpo man baya ma ineruna anon téi ume vantan baruna furonté uno sé afová é uno. <sup>10</sup> Man baya ano kamaen ayun ma fara van oriyan ban aunan ma simeren mifo furin miyan manan timen mino.

<sup>11</sup> \*Man baya ano séin mákádá umeí uré kun mairái man baya ano umeí e ono siren purin miyan timen mino. <sup>12</sup> \*Mágan ten mifo man baya ano veyan ádun ban puntáden kantasien kama ukhen mino. <sup>13</sup> Kama ukhen mifo mai kama avúavá anó téin tiruan ná puriyan nafino. Ída uron mino. Mai ume ano kama yaná pókéi séin purin miyan timen mino. Kama man baya anon téi ma variyaruna yanasinta van mai namu avúavá variyáke umeí iya ono siren aní iyan mino. Tiyarafenui man baya fókéi ume ano namu yanasinta afoká iyantí mai setí ankan umei namu yanasinta fura sé oná tifanté uno.

### *Tetimpin Ma Namu Avúavá Bá Kama Avúavá Bá Aruviyain Baya Ino*

<sup>14</sup> Man baya ano funtáká afová ukhé tifé umpo séimpin ma aau vain manon ten maman umei ída miyan baran doran bantaí uren ná bá uno. <sup>15</sup> \*Téi ma variyaruna avúavá ída afová ukhé uno. Mai fara vara seyo, funtákein avúavá barano ma seruna ída varéiyá

ná bá uno. <sup>16</sup> \*Téi ma variyaruna avúavá ída afová ukhé uno. Mai fara vara seyo, funtákein avúavá barano ma seruna ída varéiyá

\* 7:11: Esé 3:13    \* 7:12: 1Ti 1:8    \* 7:15: Kar 5:17    \* 7:23: Kar 5:17; 1Pi 2:11    \* 7:25: 1Ko 15:57

umpo ída ma sinunu ukhein avúavá sintan téi variyá uno. <sup>16</sup> Bariyá umpo séi ma variyaruna avúavá sintu van ma ída sinunu ékun maen mai anon man baya van kama yaná ino sen aní inten mino. <sup>17</sup> Aní inten mifo mai ída seyantá namu avúavá sintu variyá uno. Ída ino. Ume ma sen túpin bain manon namu ineine simí bariyá uno. <sup>18</sup> Dan bukhafai anunu ánaín bákuré moékantá namu avúavasí ékun mai ano sen túpin ída mana kama avúavá báká afová ukhé uno. Mai fara vara seyo, kama avúavá ana varano van iyá umpo ída kanaí é baré iyá uno. <sup>19</sup> Téi kama avúavá ma varano seruna mai ída varé iyá uno. Inká namu avúavá ma ída varano seruna mai séi varé iyá uno. <sup>20</sup> Baré iyá umpo séin ma ída sinunu ukhein avúavá ma varé iyaruna mai ída seyantá baré iyá uno sé iniyá umpo sen túpin ma vain ume anon baré iyan mino.

<sup>21</sup> Mágan tukhái séi oné kun mai avúavá ano sentá daffikái séi kama avúavá ma varano van ékun maen namu ineine ano senti aa iyariyan ban mino. <sup>22</sup> Mágan tiyákái séi Tiyarafenui man baya van pura sé te súkáké tinunu ukhé uno. <sup>23</sup> \*Mágan tukhen mifo séi oné kun umei ákona ano sen túpin báken mai ano senti ineine vá aruvé iyan mino. Mai umei ákona ma séin túpin para vain manoi mamaan bararasí uren miyan ma ída varan doran bantaí urá bá uno. <sup>24</sup> Mai ume anon téin maman kákán umampin kaen mifo iye anó mai fintena séin tiya uren tiviran-ten nafino. <sup>25</sup> \*Tetisi Bafan Yisas Karaisin pinté ma uaren tiyaein nan mi Tiyarafenun tusu sianté uno.

Mágan tukhein nan mi sesi ineine finté Tiyarafenui yoran bantaí ono van inikhé umpo yan bukhafai anunurái umei miyan ída varan

doran bantaí ukhé uno.

## 8

### Kantá Aunan Táké Ma Aunan Bariyain Baya Ino

<sup>1</sup> Máan tukhái Yisas Karaisin má ma manafin túpá ukheruna nanin banta mai man bayo ano ída kanaén kó tisintanten mino. <sup>2</sup>Mai fara vara seyo, Yisas Karaisin pinté uaren mi aunan ma amé iyan mai Kantá Aunani ákona anon ume ú purin nui ákona finté setin útúfen mino. <sup>3</sup>Man bayo ano ume fintena ída kanaén tetin tiya oren eimpin Tiyarafenu ano setin tiyaono van ena aa uvisen be Anin tiantan barará banta an daven eren mifo véi ída ume vain banta ino. Tiyarafenu ano mai aa sákéi setisi ume yan be Anin tiantan daa unkamádantá e fúaren umei ákona ano ma setintá dafikáré ein mai aruan puren mino. <sup>4</sup>\*Man bayo ano ma gefá tikharé ein mai setimpin mo kanaí ino van mi mai avúavá baren mino. Máan tukhái saréa setí ída ume avúavá ánaín dakhafiyá umpo Kantá Aunani avúavákai yakhafiyá tiféuno.

<sup>5</sup> Bara ráke avúavá ánaín ma yakhafiyain kékái ineine ano vara ráke avúqva san mi iné iyan mifo Kantá Aunani avúavá ánaín ma yakhafé iyain kékái ineine ano Kantá Aunani mano ma anunu ukhein mai ánaín mi yakhafiyán mino. <sup>6</sup> Bara ráke avúavái anunu ánaín ma yakhafin nain kéká ano furinten mifo Kantá Aunani anunu ánaín ma yakhafin nain mai kéká ano ayun ma fara van aunan mamaren ará kusen banten mino. <sup>7</sup> Mai fara vara seyo, vara ráke avúava san ma anunuin manon Tiyarafenu namuroí uantiyáken ída veni man bayo ánaín dakhafé iyan mino. Máan tiyain ínaiimpáké ída kanaén beni man bayo ánaín dakhafinten mino. <sup>8</sup> Máan tukhantin mi vara

ráke avúavái anunufin ma noin kéká ano Tiyarafenun ma amusin ukhein avúavá ída kanaén baranten mino.

<sup>9</sup>\*Baranten mifo sireti ankan ída enádá bá bara ráke avúavápin no ono. Ída ino. Tiyarafenui Aunan ma sireti ankampin ma vantin mae mai sireti sareá Kantá Aunani avúavápin mi no ono. No ompo Karaisini Aunan ma ída mantein kéká mai ída Karaisini kéká ifo afova sá ono. <sup>10</sup>\*Ume avúavá ano siretin au aruan purinten mifo Karaisi ma fúaren e mantein manon Tiyarafenu avorá funtákein kékásí ukha ono. Máan tukhen nan Yisas Karaisi ma saretimpin bain manon tiretin aú iyampon ayun para van mino. <sup>11</sup> Tiyarafenui Aunan mano Yisas Karaisin masí pintena avían mantén mino. Mai Aunan ma sireti ankampin ma vanti mai ma furin bukhafafin Aunani yorantá Tiyarafenu ano ayun ban aunan aminten mino.

### Kantá Aunani Ákonafó Ma Mumunan Iyain Kayo Mai Tiyarafenu Akhafana Ino

<sup>12</sup> Mumunan tiyofi tifá tiváeyan noe, setí ankan auyen avúaváká ana vá nó tifano. Teti feyante arái avúaváká nono vara siya rauno. Ída ino. <sup>13</sup>\*Tireti ankan ma feyante arái avúavápin ma nonteya mai furin nompo Kantá Aunani ákonará ma minó aui namu avúavá ma aruan purinteya mai sireti ankan ayun ban aunan baran nono. <sup>14</sup> Minó nanin banta ano ma áin ma Tiyarafenui Aunan mano ma aviren oriayin mai Tiyarafenu akhafanan ban mino. <sup>15</sup>\* \*Mai Aunan ma Tiyarafenu ano amikhein mano ída siretin maman para yoran bantaí urantiya sireti evaráne akhokho van inono. Ída ino. Tiyarafenui Aunan mano siretin

\* **8:4:** Kar 5:16, 25    \* **8:9:** 1Ko 3:16; 12:3

\* **8:15:** Mak 14:36; 2Ti 1:7    \* **8:15:** Kar 4:5-7; Rev 21:7

\* **8:10:** Kar 2:20    \* **8:13:** Kar 6:8; Kor 3:5

maman Tiyarafenu akhafanaí iyan mino. Kantá Aunani ákonarái seti máa sé Tiyarafenu van aréiyá tiféuno. "Tifóe oe, Tifóe oe."

<sup>16</sup> \*Mai veni Kantá Aunan mano setinti sú iyampon tisimí tiféi seti Tiyarafenu akhái vá uno sé iyá tiféuno. <sup>17</sup> Teti Tiyarafenu akhafanan bákun mai ma véi simeno van tisintákein daná ma setin tifá tiváe Karaisin ma amikhein mai kama yaná baranté tiféuno. Béi ma uman barein máan té ma saréa seti uman mantaré ínaimpá teti kákán bí mamaré ben má kama kumaníri onté tiféuno.

### *Ínaimpá Ma Kákán Bí Baran Nain Baya Ino*

<sup>18</sup> Ínaimpá ma Tiyarafenu ano setin kákán bí timin nain mano saréa ma seti variyaruna uman má ída manái inten mino. <sup>19</sup> Mai fara vara seyo, Tiyarafenu akhafanaí ma ukháin nain kéká má maman afoká ínain damu san mi véi ma uvantein danasinta ano ave ukhen mino. <sup>20</sup> \*Minó daná ma saréa ma váken ma namu ukhein mai yanásinta ída vei anunurá afoká ukhen mino. Ídaino. Tiyarafenu anon betin afoká uráken betin kama avúavá uantano van iyákan ave ukhen mino. <sup>21</sup> Ave ukhen ma fúaren pútaono van ma iyareín nain uman pintena ma utúantantin Tiyarafenu akhafana vá ma kákán bí baran nain mai van mi ave ukhen mino.

<sup>22</sup> Para vara seyo, Tiyarafenu ano ma uvantein danasinta ano mai ma anasi ano iyampon kaono van inamun nan ma aureinén eriyan bá tetí ankan afová ukhé tiféuno. <sup>23</sup> \*Ída mai yanásinta ano ana aí bariyan berai siyan mifo setí aráí in amusin ma Kantá Aunan timikhein kayo ano yeren mai uman pintena útútintano van mi verai siyá tiféuno. Máan turen Tiyarafenu ano ma setin

ayuen bukhafa simiren inká manan be akhafanai suron ono van ma siádan bain damu san mi ave ukhé tiféuno. <sup>24</sup> Tiyarafenu ano setin evaránen tividái véi ma kama avúavasí usintano van ma sikheiñ nan mi setí ankan mumunan ukhé bén ave iyá tiféuno. Mai fara vara seyo, gefá ma mantanuna yana san ída ave iyá bá tifanté uno. <sup>25</sup> Máan tó tifanté umpsó mai ma ída mantanuna yanásinta ma varano sé tifanté mai setí ankan tirá kusin má bákesá ave ó tifano.

<sup>26</sup> Máan ma ukhé tiféun mi Kantá Aunan mano setin uman pintena siya inten mino. Mai fara vara seyo, setí ankan ma simúkonuna yanásinta ma ída afová ukhékun maen mai Kantá Aunan mano setin tiyaen berai siyan Tiyarafenu amúkuán aminten mino. <sup>27</sup> \*Mai ma setin túpin afová ukhein Tiyarafenu anon Kantá Aunan inin afová ukhen mino. Mai fara vara seyo, Tiyarafenu iníne ánain mi yakhaen Kantá Aunan manon tetí mumunan kéká ákonáen amúkusinté iyan mino. <sup>28</sup> \*Tiyarafenu ano ven nan ma anunu ukhein kéká ayaino van mi minó danápín doriyái setí ankan afová ukhé tiféuno. Tiyarafenu fin manáa ákoná iníne vain nan mi mai kéká arakhen mino. <sup>29</sup> \*Para vara seyo, Tiyarafenu ano vei vanasií ma ínain kéká ma maman be Anin an darantin ma mai nanin banta aváení ma ve Anin mano ínain mai véi gefá afová ukharein mino. <sup>30</sup> Béi ma gefá aní ukharé ein kéká arakhen mino. Mai ma véi arakhein kéká san puntákein kéká ino sen araren mai kéká kákán bí aminten mino.

### *Mana Yaná Ano Ma Ída Kanaí En Tiyarafenu Avábá Pinte Yo Siviran Nain Baya Ino*

<sup>31</sup> \*Tiyarafenu ano ma kama avúavasí ukhein nan mai inte esá

\* **8:16:** 2Ko 1:22    \* **8:20:** Esé 3:17-19    \* **8:23:** 2Ko 5:2-4    \* **8:27:** Íbo 139:1    \* **8:28:** Efe 1:11    \* **8:29:** Kor 1:18; Ibu 1:6    \* **8:31:** Íbo 118:6

teti sé tifante rafuno. Tiyarafenu ano ma setin tiya ukhantin maen mai iye anó kanaén tetin namuroí usintanten nafino. <sup>32</sup> Tiyarafenu ano ída ve Anin pákan tetin tiyaino van béin tiantan eren mino. Be Anin ma setin timikhanten maen mai ída ena yanasantá vá dere fara siminten nafino.

<sup>33</sup>\*Tiyarafenu ano ma setin manman bei nái ma urantí bá tifékuñ maen mai iye anó tetin kó tisintanten nafino. Ída ino. Tiyarafenu ano veyantái setin nan puntákein nanin banta e sen tarakhen mino. <sup>34</sup>Iye anó teti nan ume ayá namu miyan barano sinten nafino. Ída ino. Yisas Karaisi fúaren e mantavin Tiyarafenu ano véin kákán bí amiran ben ayan kurompá báken tetin tiyaino van Tiyarafenu siamiyan mino.

<sup>35</sup>Karaisiní avábá pinte nái yaná anó tetin do siviranten nafino. Aau anó tetimpin afoká inten nafi uman nafi vanta kayo anó tetin namu usintanten nafi sirafan nará ótifante rafu ída ma suí daná ban nain mano fi áa namu yaná anó tetin namu inten nafi áa furin nan ma akhokho van in mano fi mai minó máa yanasantá ano kaná Karaisiní avábá pintena yo siviranten nafino. <sup>36</sup>Mai yanasantá ma setimpin ma afoká é iyain mai Tiyarafenu vompon dóki ano máa sikhan mino.

"Tetí ankan eni vanasin bákul ena ena yamú tetin tiruan puriyan mino.

Sipisipi an den tetin timen tíkano van manan iyan mino." *Íbo 44:22*

<sup>37</sup>Máan tukhé tifé umpo mai yanasantá afoká inten mifo mai ma Karaisi ano setin nan avábá iyain mai véi anón tiyaintí mai yanasantá esantanté uno. <sup>38</sup>Ída mana yaná ano kaníen beni avábá pintena setin do siviranten mino.

Purin má ayun ma fara van mano fi áa enisorí kayo vá namu au-nan má ano fi áa saréa ma afoká ukhein danasinta vá ínaimpá ma afoká inain danasinta vá ano fi áa minó ákoná vain ara ara yanasantá vá ano fi mai yanasantá ano ída kanaén Tiyarafenui avábá pintena setin do siviranten mino. <sup>39</sup>Tetí ankan dan uron ná un bá tifante rafu áa un nompin námen ná orun bá tifante rafu mai Tiyarafenu ano ma uvamádan bain mai yanasantá ano ída kanaén tetisi Bafan Yisas Karaisin táké ma Tiyarafenu ano aní ukhein avábá pintena seti yo siviranten mino.

## 9

### *Tiyarafenu Ano Ma Isarerí Kéká Aní Ukhein Baya Ino*

<sup>1</sup>Téi Karaisiní yoran bantan bákul Kantá Aunan mano se súpín báken ineine simiyái ída kampun tin téi fura vaya anan tiyá uno. <sup>2</sup>Ena ena yamú te súpín kákán tirunan ná édaviyáká kokhon ineine anan iyá báé iyá uno. <sup>3</sup>\*Isarerí kéká ma se siyofi sifá tiváeyan ma vain mai Tiyarafenu ano evaránen avirano van mi iniyá uno. Téi ma Karaisin pinte yo sisintan nain mano ma vetin ayairí ma ukhantin mai kasaen téin tisintano van mino. <sup>4</sup>\*Betí ankan Isarerí nanin bantan bákul mi Tiyarafenu ano vetin nan be akhafana e sikhen mino. Tiyarafenu ano vei kakhan má ákoná vá betin aní ureñ betí ankan má ará manafin kasen ban avúavái aníen bei man baya amen mino. Amiren monó tin avúavái betin aní uantáden kama yaná iyáantán ban mino. <sup>5</sup>Pefá betí anafu aráo ano Tiyarafenui yorampin aví bain nanin bantan baré íkon mi Karaisi ano vetí kékápin mi vantaien mino. Karaisi véi Tiyarafenun báken minó danáká dafiken mifo ena ena

\* 8:33: Ais 50:8-9 \* 9:3: Eks 32:32 \* 9:4: Eks 4:22; Riv 1-10; Íbo 147:19; Rom 15:8; Ibu 9:5

yamusá ben aví daní ó tifano. Mai fura ino.

*Tiyarafenu Ma Iyáantan Daná  
Ma Varé Iyain Mai Vei Anunurái  
Amé Iyan Mino*

<sup>6</sup> Tiyarafenu ano ma Abaraamun iyáontákaré ein baya ano ída fa savifá afe en mino. Ída ino. Para vara seyo, Yekopun ana akhá pinté ma e afoká iyain kéká ano seti Isarerí kéká uno siyan mifo ída fura sen Tiyarafenurá mumunan ukhen mino. <sup>7</sup> Abaraamun pinté ma ayuman ukhein nan mi véin ana akhafanan bá uno siyan mifo vetí ankan ída fura sen ben ana akhafanan ban mino. Para vara seyo, Tiyarafenu ano gefá Abaraamun máa sen tiamikharemí, “Kokhon iyampon kaesin banten mifo Aisakin pinté ma ayuman inain nanin banta mai senti kékái vanten mino.” *Esé 21:12*

<sup>8</sup> \*Mai vayai ana máan mi ukhen mino. Abaraamuni nare ráké ma afoká ukhein mai iyampon kéká pinté manáa anon Tiyarafenu akhafanaí ukhen mifo Tiyarafenu ano ma iyáantantá ma mumunan in avúavá káké ma afoká ukhein mai kéká san mi Abaraamuni kéká se siyan mino. <sup>9</sup> Mai van mi Tiyarafenu ano máa sen iyáan temí, “Mai ma sikará onuna yamu ma séi ovaráné eréku maen Sara ain iyampon kainten mino.” *Esé 18:10, 14*

<sup>10</sup> Mai ma sikháré ein iyampon teti sinafu Aisakin mi kain baren e anoní uaren Reyekan mamáken ain iyampon kanan karina kaen mino. <sup>11-12</sup> Reveka karina iyampon kanan kauran maen Tiyarafenu ano míkani kama avúavá bá namu avúavá bákasaq ódaren anien nafino. Ída ino. Tiyarafenu ano vei anunurái mana anien mino. Béi fe o útúben Reyekan tiamikharen mino. “Esé ma ká inain iyampon mano ínain

ma afoká inain iyampon yoran bantaí inten mino.” *Esé 25:23* Mai ma siamikháréin ma afoká ein avúavá ano Tiyarafenu ineine ánain mi vákuren mifo seti ma kama yoran má namu yoran má ma variyarunara saino. Ída ino. <sup>13</sup> Tiyarafenu vompon dóki ano máa sikhen mino. “Téi Yekopun nan mi sinunu iyá umpo Iso nan ída sinunu iyá uno.” *Mar 1:2-3*

<sup>14</sup> Mai van Tiyarafenu ano ída funtákein avúavasíi iyan minó té tifante rafuno. Ída ino. <sup>15</sup> Mai fara vara seyo, Tiyarafenu ano Mosesin pefá tiamikharen mino, “Téi mana vanta ma siruná uantano van tesi sinunurái máan té iyá uno.

Inká téi mana vanta ma avábá uantano van tesi sinunurái máan té iyá uno.” *Eks 33:19*

<sup>16</sup> \*Máan tukhan mi Tiyarafenu ano ma iyáantán daná ma varé iyain mai ída vanasii anunura safi yoranta safi varé iyan mino. Ída ino. Tiyarafenu ano vei anunurái amé iyan mino. <sup>17</sup> Para vara seyo, vompon dókifin Tiyarafenu ano ena vaya máa sen Kin Feron tiamikharen mino. “Éin ma manan kiní uréku vaona mai sesi kákán ákona éintá aní uréku ten tiví ano ma varará orera ino van muno.” *Eks 9:16*

<sup>18</sup> Máan tukhanti seti afova sá ó tifano. Tiyarafenu ano manáa kéká ma arunan uantano van mai vetin arunan uanté iyan mino. Inká béis ma manáa kékái ineinerá ma yasirádantín baya ída inino van ma é iyain mai vei anunu fóké máan té iyan mino.

<sup>19</sup> Tiretí ankan pinté manáa ano máa sin nono. “Tiyarafenu ano veyantá ma yuvun intin banasi ano namu avúavá bariyan nain nan mai fará tenti vaya ída iniyá uno sen béis sinten nafino.”

<sup>20</sup> Ída vá máan baya seno. Éi varará banta ano iyé bakeyá

Tiyarafenu ano ma vara nain avúavá san asinte fono. Kave ano kanaisá en ná ben ma uvarein banta van ten ná, “Eí fará téin máqon uvararí e fono” Ais 29:16; 45:9

<sup>21</sup> \*Kave uvaran banta ano ma kankanan káve uváden maen mana kaverá kamaen bompon uren mai kave kama yorarí in kaen inká ena kave fara ena yorarí in uvaman kaen é iyan mino. Mai avúavá ano ídá puntáken nafino.

<sup>22</sup> Tiyarafenu ano véimpin ákona vantin pasen banasi yaiminten mino. Máan tinten mifo inká beimpin ákona vantin kasaen mai ma veni vaya átakharé inain kéká ave ukharen ínaimpákéi yaíden uman aminten mino. <sup>23</sup> Mai fara va ino véimpin ákona van bei arunanápín ma aviádantin bano ma sikhein naniñ banta vá deren bei kakhan aní intin onanten mino. <sup>24</sup> Tiyarafenu ano ma sen Yutan kéká bá ena anan nanin banta kayo vái arakhé uno ma siyain mai setin nan mi siyan mino.

<sup>25</sup> Sakanampa vanta Oseani vompon dókifin Tiyarafenu ano ena anan nanin banta kayo van máa sikhen mino.

“Mai ma fefá ída senti vanasi varé ein mai ínaimpáké tesí vanasi oe sé aranté uno.

Inká mai ma ída sinunu iyáreeruna kéká ínaimpáké móéké tinunu ukheruna kéká ino senté uno.” Ose 2:23

<sup>26</sup> Inká ena anafin máa sikhen mino.

“Ída senti vanasi ono’ ma sikháré inain kéká san ínaimpáké ‘taunan bain Tiyarafenu sikhafana ono’ sinten mino.” Ose 1:10

<sup>27</sup> Isarerí kéká san Aisaiya iniyáken ovaraaren temí,

“Isarerí nanin banta ano kokhoníen non akhempá ma vain eyu an ma yesin maen

Bafan mano manáa nanin banta anan aviranten mino.

<sup>28</sup> Para vara seyo, Bafan mano varará nanin banta ainén mi kó tiantáden uman aminten mino.” Ais 10:22-23

<sup>29</sup> Inká ena anafin Aisaiya máa sikhen mino. “Minó ákona ma vain Bafan mano setin tinafu síráon manáa ída áen bareñ mai Sodomu vá Komora vá ma einén minó tiruan kípanté ein mino.” Ais 1:9

*Isarerí Kéká Ma Ída Mumunan Ein Baya Ino*

<sup>30</sup> Mai avúavá san tetí ankan inte esá tente rafuno. Máan ná té tifano. Ena anan nanin banta ano Tiyarafenu van ída yosiyán mifo vetíi mumunantá Tiyarafenu avorá puntákein nanin bantan ban mino. <sup>31</sup> Ban mifo Yutan kéká ano man baya ánaín dakhadé puntákein nanin bantaí ono van en mifo ída kanaíen mai avúavá baran nainén mino. <sup>32</sup> Mai fara fino. Mumunán ma ureñ Tiyarafenu avorá puntákein nanin bantaí oren mi man baya ánaín dakhafiyá kama avúavá baranté uno sen inikharen mino. Máa sen inikhan betimpin ída mumunán bákan mai ano kákan onámaná ma aasá bainí ukharéin eyúpóen ankamen mino. <sup>33</sup> \*Tiyarafenu vompon dóki ano mai van mi afova amikharen mino.

“Ineno. Banasi ano ma eyúpó en ma eraven ankamin nain onámaná Yerusaremí kaonté uno. Ais 8:14

Mai onámanáká ma mumunán inain nanin banta ano ída ayave van inten mino.” Ais 28:16

## 10

*Isarerí Kéká Ano Ma Tiyarafenu Avúavá Ída Afová Ukhéin Baya Ino*

<sup>1</sup> Mumunan tiyofi sifá tiváeyan noe, Tiyarafenu ano Isarerí kayo aya uren evaránen avirano van mi sen tú ano vetin nan moéken anunu iyákái Tiyarafenu vaípá timúkuán amé iyá uno. <sup>2</sup> Téi afová ukhékun Tiyarafenú ma anunu ukhein avúavá ánaín dakhafiyá uno siyan mifo véin ánaín ma yakhafin mai avúavá betí ída afová ukhen mino. <sup>3</sup> Mai fara vara seyo, Tiyarafenu ano ma vetin maman puntákein nanin bantaí ma in aa ída afová ukhen mino. Man bayá ánaín ma yakhafin avúavúpókéi Tiyarafenu avorá puntákein nanin bantaí onté uno siyan mifo Tiyarafenu funtákein ine inerá ída oriyan mino. <sup>4</sup> Mosesini man bayá inka Karaisi me kanaí ukhein minó nanin bantaí ano ma mumunan inteya mai Tiyarafenu avorá puntákein nanin bantaí inono.

*Mumunan Nanin Bantan Ma  
Tiyarafenu Evaránen Aviran Nain  
Baya Ino*

<sup>5</sup> “Minó man bayá ánaín ma yakhafin nain nanin banta anón Tiyarafenu avorá puntákein nanin bantaí inten mino” sen Mosesi vompompin uvantaren mino. *Riv 18:5*

<sup>6</sup> Máa sikhen mifo Tiyarafenu avorá ma funtákein nanin bantaí inain nan máa sikhémí, Yisas Karaisi aya ino van “ída kanaí e inaru fáke un avire eran nono.” *Diu 30:12*

<sup>7</sup> Inká máa sikhémí, “Yisas Karaisin evaráne avíán mantano van ída kanaí e furin nanin bantai varufin aravin nono.” *Diu 30:13*

<sup>8</sup> Yisas Karaisintá ma mumunan esin Tiyarafenu ano saretin evaránen aviran nain nan bompon dóki ano máa sikhen mi, “Mai vaya ano yákó bákayai kasae vanasi siamiyan nan tiretin aúpin ban mino.” *Diu 30:14*

<sup>9</sup> Mai fara vara seyo, saretin pinté

mana ano ma Yisasi nan Bafan mino sireya ma Tiyarafenu ano masí pintena véin avíán mantakhen mino seja aúkáké mumunan inteya mai Tiyarafenu ano éin evaránen aviranten mino. <sup>10</sup> Mai fara vara seyo, setí tükáké ma mumunan iyarunarái Tiyarafenu ano setin nan puntákein nanin banta e sé iyan mino. Máa sé iyan mifo inká too fóké ma setisi mumunan tian amá iyarunarái Tiyarafenu ano setin evaránen tivranten mino. <sup>11</sup> Tiyarafenu vompon dóki ano mai van máa sikhen mino. “Béintá ma mumunan inain kéká ano ída ayave van inten mino.”

*Ais 28:16*

<sup>12</sup> \*Yutan kayo vá Kiriki kayo vá mai manaí anan ukhan betí Bafan mana anan bákán mi vetí ankan ma inantein danasinta manaí uren amé iyan mino <sup>13</sup> Mai fara vara seyo, “Bafan aví ma aran nain nanin banta mai véi aya uren betín evaránen aviranten mino.” *Yoe 2:32*

<sup>14</sup> Aviranten mifo vetí ankan ma ída véin nan mumunan iyáken intesá urená ayain nan be vaípá inantinten nafino. Beti ankan ída ma veni vaya inikhen mai intesá uren ná bentá mumunan inten nafino. Mana ano ma vetin ída vaya siamintin maen mai veti intesá uren ná beni vaya ininten nafino. <sup>15</sup> Baya siamino van ma ída vanta siantantin mai inté uren ná bayá siaminten nafino. Tiyarafenu vompon dóki ano máa sikhen mino. “Kama vaya ma varen eriyain kéká ano setin mi simusin timiádiyán mino.” *Ais 52:7*

*Isarerí Nanin Banta Ano Tiyarafenu Kama Vaya Kayo Iniyán  
Mifo Mairá Ída Mumunan Éiyán  
Mino*

<sup>16</sup> Timiyan mifo ída minó nanin banta anó mai kama vaya inikhen mino. Mai fara vara seyo, Aisaiya máa sikharen mino. “Bafan noe,

\* **10:12:** Apo 15:9

setí ankan ma vetin tiamiyaruna vayará iye anó mumunan ukhen nafino.” *Ais 53:1*

<sup>17</sup> Karaisini kama vaya ma inín avúavá anon mumunan afoká é iyan mino.

<sup>18</sup> Máan tukhen mifo Yutan kayo ano fura sen ná mai vaya inikhen nafino. Eyo inka inikhen mino.

“Tiyarafenu ano ma minó danas-inta uvantein baya ano  
inka minó nanin bantafin ori-aren  
mai vaya ano minó barafá or-  
era ukhen mino.” *Íbo 19:4*

<sup>19</sup> Orera ukhen mifo mai fura sen ná Isarerí nanin banta ano minó bayai ana afova suren ukhen nafino. Eyo mai fura sen betí ankan afova suren ukhen mino. Para vara seyo, Mosesini yamú dere Tiyarafenu ano máá sikharen mino.

“Ena vara fákena ída aví bain nanin banta séi avábá uantanuna van tiretin ará uman daantan nono.

Inká ena anan nanin banta ma ída afova vain kayo ma avábá uantanuna van tireti ankan betin aranan uantan nono.” *Diu 32:21*

<sup>20</sup> Máá siran ínaimpáké Aisaiya ano Tiyarafenu van máá semí,

“Téin nan ma ída yosiyaré ein kéká avorá inka yákó é uno.

Téin nan ma ída iniyá ein kékápin inka seyan aní é uno.” *Ais 65:1*

<sup>21</sup> Máá sikhán mi Isarerí nanin banta van iniren Tiyarafenu ano semí,

“Minó damú betin ariyákun mifo senti vaya átakharé uren ten toofá do yuriyan mino.” *Ais 65:2*

## 11

*Tiyarafenu Ma Isarerí Nanin Banta Arunan Uantein Baya Ino*

\* **11:1:** 1Sa 12:22; Íbo 94:14; Fir 3:5 \* **11:6:** Kar 3:18

<sup>1</sup> \*Tiyarafenu ano Isarerí kayo me oyan amikhará téi siya rafuno. Ída uron mino. Téi Abaraamun pinté ma ayuman ukhein Bensamenin anan bantan báke Yutan bantai vá umpo afova sá ono.

<sup>2</sup> Máan tukhékun Tiyarafenu ano gefá araí in táké ma veinaí ukhein nanin banta ída me ampikhein mino. Mai van ma vompon dóki ano sikhein tireti ídá afová ukhe fono. Sakhanampa vanta Iraiya ano Isarerí naniń banta ayaino van Tiyarafenu vaípá ákonaen máá sikhén mino. <sup>3</sup> “Bafan noe, eni sakhanampa vanta kéká minó aruan púden éin ma íkun uan amin kará kayo vá dere varakuariyan karúdará teya anan ukhékun téin má tirono van dakhifiyá uno.” *1Ki 19:10, 14*

<sup>4</sup> Máá síkan Tiyarafenu ano ma evaránen bén tiamein mai vaya afová ukhe fono. Tiyarafenu ano semí, “Eí ída eyaká ana vaono. Dan manápá ifo afápá kan un kádon tauseni (7,000) ano ma kampun ayarafenu rá ída monó tiyain kayo vá deren para van mino.” *1Ki 19:18*

<sup>5</sup> Máan tukhan taréa minó Yutan kayo vá dere Tiyarafenu me ampikhen naino. Mai ma Tiyarafenu ano sarisari uren avíkaré ein nan manáq ano fara van mino.

<sup>6</sup> \*Máan tukhan betíi yorantasá avíken naino. Tiyarafenu ano vei sarisari rái avíken mino. Betíi dorantá ma avíkantí maen Tiyarafenu sarisari ano ída fura yanásí inten mino. <sup>7</sup> Máan tukhen mifo mai seti inte esá té.tifante rafuno. Isarerí kéká ano mai yaná barano van ákona yorari uvákon den mifo ída varan nainien mino. Betíi kéká pintena mai ma Tiyarafenu aní uran ben ninaí ukharé ein máá anon baren mifo minó kayoi ineinerá dasirákoren mino. <sup>8</sup> Tiyarafenu vompon dóki ano máá sikhareín mino.

"Tiyarafenu ano vetin maman purin banta an daran aunká bakhé  
eriyaren taréa vetin aurá iyádan ída onariín átaren dasíkaran ída vaya iniyán mino." *Diu 29:4; Ais 29:10*

<sup>9</sup> Devitin má dere máa sikhen mino.

"Áesin ná beti ma omasí inain mano maman betí oyivan an davintin ná anuran ariyan nain nan kana vá uno vá tino.

Áesin ná mai amusin mano sin nainien uman barano.

<sup>10</sup> Áesin ná betin auu yufúkuvintin ída vá onano.

Áesin ná uman mano amininá ódiven ayorun davénarantin ná mátinten bano." *Íbo 69:22-23*

*Ena Anan Nanin Banta Ano Afá Orifi Yaa An Dakhá In Ma Tiyarafenu Ano O Iyaaren Ayun Táke Orifi Yaará Ma Asótú Ein An Dakhein Baya Ino*

<sup>11</sup> \*Máa sikhen mifo mai fura sen ná Isarerí nanin banta ano eraven ankanten ída evaránen e mantanten nafino. Ída uron mino. Betí ankan ma Tiyarafenu oyan amiyan nan mi Tiyarafenu ano ena anan kéká evaránen avídantin Isarerí kayo ano ódaren tetin mana sivirano van muno siren aranan ino van mino. <sup>12</sup> Isarerí kéká ano ma Tiyarafenu oyan amiran mai van mi ena anan nanin bantafin Tiyarafenu ano avábá amikhen mifo ínaiimpáké Isarerí kéká ano ma Tiyarafenu vaípá ovaránen erintin maen minó nanin bantafin beni avábá ano mo kákani suron inten mino.

<sup>13</sup> Mai van mi sretiéna anan nanin banta ma vaona van mi séi siyá uno. Ena anan nanin bantafin baya varen orino van ma Tiyarafenu ano séin aní ukhein mai kákán doran uron mino. <sup>14</sup> Mai fara vara seyo, Tiyarafenu ano

ma sreti ena anan nanin banta kama avúová uantan nain mano Isarerí kayo auu yavo sintin Tiyarafenu ano senti yorantá betin pinte manáa ovaránen avirano van muno. <sup>15</sup> Mai fara va ino. Tiyarafenu ano Isarerí nanin banta oyan amiren mai van mi sreti ena anan nanin banta avíden avábá uanten mino. Máan ten mifo Yutan kayo ano ma Tiyarafenu vaípá ovaránen erintin maen mai fükären ma e manteiní intin Tiyarafenu ano vetin moéken avábá inten mino. <sup>16</sup> Abaraamu má Isarerí kayo ma ayuman in banta kéká bá ano ma kantasi ukhantin maen mai vetin ana akhafaná vá ano yeren kantasi inten mino. Inká daa arú kayo ano ma kama ukhantin maen mai yaa ayan kayo vá ano yeren mo kama inten mino.

<sup>17</sup> \*Máan tukhan maen Isarerí kéká ano mai ayuntáke orifi yaa ana an mi yakhá en nan mi Tiyarafenu ano manáa ayan iyaren do varen mino. Do máden inká tireti ena anan nanin banta ano mai afá orifi yaa an mi yakhá en nan Tiyarafenu ano o iyaaren ayuntáke orifi yará ma asótú einien mino. Máan turai saréa sreti ankan ayuntáke orifi ayan ma einí uveyan mai yaa fintena anu variyákeya ana variya vaono. <sup>18</sup> Máan tukha ompo ída vá mai ma iyaan karúdakhein ayan kayo van esantakhé uno se ineno. Tireti ma máan ineine ma iyanteya mai sreti afova sá ono. Ída yaa ayan mano arúpin anu aminten mifo yaa arú anoi yaa ayampin anu aminten mino.

<sup>19</sup> Amé iyan mifo sreti ankan ída vá teya "Tiyarafenu ano mai ayan kayo síkarán bain téin maifin asotú inten mino" sire avan avan ono. <sup>20</sup> Mai fura máan tin nompo Yutan kayo ano ma ída mumunan ein nan mi Tiyarafenu ano yo síkaan karúdakhen mino. Tireti

\* 11:11: Apo 13:46 \* 11:17: Efe 2:11-19

ankan ma mumunan eona van mi maifin maman asotú ura va ompo ída vá avan avan iyákeya siretin ma Tiyarafenu ano yo síkaan karúdan nain mai vará perano.  
<sup>21</sup> Para vara seyo, Tiyarafenu ano gefá ma varé ein daa ayan ma yo síkakhanti mae mai sretí ankan má dere yo síkanten mino.

<sup>22</sup>\*Máon tinten mifo Tiyarafenu ano kamaen avábá iyáken inká ákonaen baya siyan é iyan mifo afova sá ono. Mai ma Tiyarafenu oyan amé iyain kéká béis auufen kakháben ákona vaya sé iyan mifo véin nan ma anunu ein kéká béis avové uren kama uanté iyan mino. Tireti ma véin purase oyan amesin maen béis má deren tiretin oyan aminten mino. <sup>23</sup> Mai ma gefá daa ayan kayo ma sikakharé ein mai Yutan kéká san mi sikhein mai veti ma mumunan intin maen Tiyarafenufin ákona vantin kasaen evaránen maman mai ma síkakhareéimpin asótú inten mino. <sup>24</sup> Tireti ankan afová ukha ono. Tireti gefá afá orifi yaa ayan an mi yakharé en nan Tiyarafenu ano síkaren ayuntáke orifi yaa anará mo asótú ura vaompo mai ída éi mai finté yaa ayan uron mono. Máon tukhantin pasen Tiyarafenu ano kasaen mai ma yo síkan karúdakharé ein ayan evaránen maman asótú inten mino.

### *Tiyarafenu Arunaná Mai Minó Nanín Banta Ina Ino*

<sup>25</sup> Ena anan nanin banta má mumunan iyaona kéká soe, aúpá baya sreti afová ono van muno. Ída vá teya Tiyarafenu ano Isarerí nanin banta inka me oyan amiren teti nan mana iniyá uno sire au khákán ono. Manáa Isarerí kékái ará bá ineine vá ano ákona ukhen bantin ma ena anan nanin banta kayo ano mumunan en maifin mun asótú uvintin mi máon tinten mino. <sup>26</sup>\*Mai aa sákéi minó Isarerí kayo evaránen avirantéin mi

Tiyarafenui vompon dóki ano máa sikhen mino.

"Isarerí kéká ma aya ino van ave ukharé ein banta ano Yerusalemíke emanten eren me ayaintin  
 Isarerí kéká ano ma Tiyarafenu oofá átakharé iyá ein avúavá me an pinten mino. *Ais 59:20-21*

<sup>27</sup> Ampirantí mái damúi séi vetíi ume arúantadé tirá manafiní é kasé banté uno." *Yer 31:33-34*

<sup>28</sup> Isarerí kayo ano Yisasini kama vaya oyan amiran mai anon Tiyarafenu vá namuroien mino. Namuroí ein nan mi Tiyarafenu ano vei avábá po ena anan nanin banta ayaen mino. Ayaen mifo gefá ma Abaraamun ana akhápin ma iyáon takharé ein nan mi Tiyarafenu ano veinaí ukhein bákan taréa vetin nan para anunu ukhen mino. <sup>29</sup> Mai fara vara seyo, Tiyarafenu ano ma veinaí ono siren aren ma inká bei amusin amen ma uran nain daná ída evaránen do varanten mino. <sup>30</sup> Pefá tireti ankan Tiyarafenui vaya átakharé iyare ompo saréa Isarerí kéká ano ma vaya átakharé iyain mai anarái Tiyarafenu ano sretin tarisari uanten mino. <sup>31</sup> Mai ma gefá baya átakharé iyá eonaíen mi saréa Isarerí kéká ano Tiyarafenui vaya átakharé íkan mai van mi sretin tarisari uanten mifo maná damusí ma intin maen betin má deren Tiyarafenui sarisari varanten mino. <sup>32</sup> Minó nanin banta ano vaya átakharé uran mi Tiyarafenu ano vei sarisari aní ono van mi vetíi ume avúavá san karavusií uádan baren mino.

### *Pori Ma Tiyarafenu Aví Daní Ein Baya Ino*

<sup>33</sup>\*Óodo. Onano, ven nina yanasinga vá afova vá ineine vá ma moékakhein Tiyarafenu ma vain nee.

\* 11:22: Yon 15:2, 4

\* 11:26: Ais 27:9

\* 11:33: Ais 55:8-9

Onano, véi ma ineine uren  
bariyain avúavá  
mai setí ída kanaié afová ó  
tifanté uno.

**34** \*“Iye anó Tiyarafenu ma ineine  
iyain afová inte fono.

Inká iye anó kanaíeya véin in-  
eine aminte fono.” *Ais  
40:13*

**35** “Iye naré Tiyarafenu mana  
yaná amiresin ná anona éin  
ovaránen aminten nafino.”  
*Yop 41:11*

**36** \*Para vara seyo, Tiyarafenu  
anon minó daná uvamá  
daran beni ákonará báken  
mai yanasantá ano véin  
kákán bí amiyan mino. Béin  
avisá ena ena yaní ono. Mai  
fura ino.

## 12

*Minó E Au Ma Tiyarafenun Íkun  
Uan Amin Baya Ino*

**1** \*Máan tukhein nan ma sireti  
mumunan nanin banta ano ma  
Tiyarafenui arunana san ma  
ovare me iniyaona kayo oe, minó  
bukhafa vá Tiyarafenun ma íkun  
uan amiyan an deya vá ameno.  
Máan ma inteyan beni vanasií esin  
Tiyarafenu ano moéken amusin  
inten mino. Tiretí ankan ma  
máan tinteya mai fura seyan  
Tiyarafenurá monó tin nono.  
**2** Tiretí ankan ída vá ma vara  
ráke avúavá ánaín dakhafiyákeya  
áesin ná Tiyarafenu ano saretí  
ineine maman auyení uranti vá  
puntákein avúavá basá nono.  
Máan ma urantian inte yanasa  
Tiyarafenu avorá kama ukhan  
ná ben ma amusin amin avúavá  
ban ná puntákanti varano van béis  
iniken nafi mai afová inono.

*Tiyarafenu Ano Ma Setin Ara  
Ara Yorarí In Amusin Timikhein  
Baya Ino*

\* **11:34:** 1Ko 2:16    \* **11:36:** 1Ko 8:6    \* **12:1:** Rom 6:11, 13; 1Pi 2:5    \* **12:3:** 1Ko 12:11;  
Efe 4:7; Fir 2:3    \* **12:4:** 1Ko 12:12, 27    \* **12:6:** 1Ko 12:4-11; 1Pi 4:10-11    \* **12:10:** 1Pi 1:22

**3** \*Tiyarafenu ano vei sarisari  
fói séin aní uren bei yorarí ino  
sikhái siretin tiamiyá uno. Tiretí  
ankan ída vá teya setisi sivútivá  
ano ena kéká esantakhen mino  
seno. Tiretí ineine yaídeya afová  
ure vá tiretí mumunantá ma Ti-  
yarafenu ano amikhein doran ná  
puntáde yorano. **4** \*Tetisi minó  
bukhafa ano ída mana yorarí ana  
é iyan mifo mana mana vukhafa  
ano veyan ara ara yorarí i é iyan  
mino. **5** Máan manan é tetí minó  
ano Karaísini mana mana vukhafa  
an mi yakhé tiféi ara ara yorarí  
ó tifanté uno. Karaisin má mana  
vukhafái ma ukhantesá ben aya  
ven aya é dorá tifano.

**6** \*Tiyarafenu ano setin ara ara  
yoraríin amusin paran timikhen  
mino. Máan tukhanti ma  
sakhanampa vaya sin afova éin  
amikhantiya mai ei mumunantasá  
Tiyarafenu ano ma siamin nain  
baya seno. **7** Inká banasi ayain  
afova ma éin Tiyarafenu ano  
amikhantiya mai kama ure vá  
banasi aya ono. Inká arú doraríin  
afova ma éin Tiyarafenu ano  
amikhantiya mai kama ure vá  
afova ameno. **8** Inká ará bá  
ineine vá ákona uantan afova  
ma amikhantiya mai yorarisá  
ono. Inká ona avariín doran ma  
amikhantiya mai aúkáke sá avari  
ono. Inká Tiyarafenu ano ma  
yafisin doran ma amikhantiya mai  
fura yorarisá ono. Inká éin ma ena  
sarisari in doran ma amikhantiya  
mai amusin iya vá dorano.

*Ena Ma Avábá Uantan Baya Ino*

**9** Ena nanin banta ma avábá  
ono van pura se aúkáke sá avábá  
ono. Namu avúavá oyan amireya  
funtákein avúava sá pákaan ákona  
ono. **10** \*Tireti ankan Tiyarafenui  
vanasi vá ara amireya e afá  
aváyeyan ma avábá iyaonai sá

ono. Tiretí ankan eyan maman bararasí ure vá ena aví ana vá daní ono. <sup>11</sup> Tiretí ankan ída vá avesara yorarí iyákeya avúavá basá Bafani yorarí ono. <sup>12</sup> \*Mai ma Tiyarafenu ano ma kama uantano van ma iyain nará amusin iya ave ukhe vá bano. Uman ma siretempin afoká iyantiya mantaan ákona ukhe vá amúkiya vano. <sup>13</sup> \*Tiyarafenui vanasi ano ma mana yana san ma o afasí intiya mai vetin ná aya ono. Ena varu fáke ḥnanin banta ano ma sireti vaonará ma erintiya mai vetin ná kama ure yafiseno.

<sup>14</sup> \*Mumunan inona van ma vanasi ano ma siretin namu uantantiya ída vá aranan uantiyákeya Tiyarafenu vaípá amúkesin ná betin avábá ino. <sup>15</sup> Amusin ma inain nanin banta vasá manafin amusin ono. Inká arunañá ma varan nain nanin banta vasá tireti manafin arunan ono. <sup>16</sup> \*Tiretí ankan banasi vá manafin ná amun amun iya vano. Tiretí ankan ída vá téimpin mana afova vá uno sire kákón banta an diyákeya fara nanin banta vasá manafin bano.

<sup>17</sup> \*Tiretí ankan ma namu avúavá uantantiya mai ída vá anona evaráne vetin namu uantano. Ída ino. Minó nanin banta ano ma siretin kama ineine uantaren avúavasá ena ena yamú barano. <sup>18</sup> Minó nanin banta vá ma ará manafiní uren ma kusen ban aa vará ákona e yoseno. <sup>19</sup> \*Te sirona kayo oe, siretin ma namu uantantiya anona ída vá evaráne vetin namu uantano van iyákeya Tiyarafenui ayampín ná ampiádano. Mai fara vara seyo, Bafan mano vei vompon dókifin máo sikhen mino.

“Namu uantan ayá ma amin mai senti yoran mino.

Namu ma uantein ayá téi vetin afova amenté uno.”

\* **12:12:** 1Te 5:16-18    \* **12:13:** Ibu 13:2

3:7    \* **12:17:** 1Te 5:15    \* **12:19:** Mat 5:39

\* **13:3:** 1Pi 2:13-14

### Diu 32:35

<sup>20</sup> \*Máan tonté umpo mai ma vompon dóki ano sikheinisá ono.

“Namuro kéká ano ma arafan nan intiya yunan ná betin ameno.

Inká non nan ma intiya non ná dáon ameno.

Tireti ma máan tesin maen betí ma namu avúavá bariyá ein nan ayave inten mino.” Pro 25:21-22

<sup>21</sup> Ída vá áesin namu avúavá ano siretin maman bararasí ino. Kama avúavá posá namu avúavá maman bararasí ono.

## 13

### Kamanini Ará Naópá Ma Van Baya Ino

<sup>1</sup> \*Minó nanin banta ano vá kamanini aránaopa sá bano. Para vara seyo, Tiyarafenu anon kamanin doran kain bákán béis anan minó kamánin ákona amikhan doríyan mino. <sup>2</sup> Máan tukhanti kamanini man bayá ma ída inin nain kéká ano mai Tiyarafenui vayan átakharé iyain ínaimpáké uman baranten mino. <sup>3</sup> \*Para vara seyo, kama avúavá ma variyain kékásá kamani ano akhokho amen novara ino. Mai ma namu avúavá ma variyain kékái akhokho ameno van mino. Máan tinten mifo kamanin mano ma inikhein avúavá ana ma yakhafinteya mai kama iya ono siren amo sinten mino.

<sup>4</sup> Tiretí ankan ayaintiya kama e vano van mi Tiyarafenu ano kamanin kain ban mifo sreti ma namu avúavá bariyá inte veni miyan baran nompo vá perano. Namu avúavá ma uran nain ma yaíden evaránen miyan amin nain mai anarái Tiyarafenu ano kamanin ákona amiren kain ban mino. <sup>5</sup> Máan tukhanti vá kamanini aránaópá báke vá namu avúavá bá kama avúavá bá oman

\* **12:14:** Mat 5:44; 1Ko 4:12    \* **12:16:** Pro

\* **12:20:** Mat 5:44    \* **13:1:** Pro 8:15; Tai 3:1

afová iyákeya aau ma varan nará perano.

<sup>6</sup> \*Kamanin ma saretí ankan takisi amesin maen beni yoran kéká ano miyan bariyáken mi Tiyarafenu ano ma amikhein dorantá ákonqen dafisinten mino. <sup>7</sup> Tiretí ankan nan ma yorano sikhan nain doran purase vá dorano. Tireti ma ye nan bain danasinta vá inká enafáke ma ovariyaona yanásintará bá ma kameni ano ma sakisi van inantintiya mai kasae vá ameno. Inká tiretí ankan kamanini aránaópá báke vá kama avúavasá aní ono.

*Ena Van Ma Anunu In Avúavá  
Ano Ma Tiyarafenu Man Baya Mo  
Kanaí Inain Baya Ino*

<sup>8</sup> \*Ena ina yanásinta ma mantare anona evaráne amin nompo ena ma avábá in avúavá ano fara vá ban oriyan bano. Para vara seyo, ena ma avábá iyain avúavá anon Tiyarafenu man bayan kanaí iyan mino.

<sup>9</sup>\*Tiyarafenu man baya ano máan mi sikhen mino.

“Ída vá pamúkuí eya”

inká “ída vá ena aruan pureya”  
inká

“ída vá ena ina yanásinta umoyan bareya” inká

“ída vá ena ina yana san aran nano.” *Eks 20:13-15, 17*

Mai man baya kayo vá ena man baya kayo vá anoi ma mana man bayafin manan ban mino. “Eyan nan ma anunu iyaonaíe vá ena van anunu ono.” *Riv 19:18*

<sup>10</sup>\*Ena nanin banta van ma avábá iyaona ano mai vetin ída namu uantiyan nan mai avábá anon Tiyarafenu man baya mo kanaí iyan mino.

*Bafan Yisas Karaisini Avúavá  
Ano Ma Siretú Auí Daná An Ma Yan  
Baya Ino*

<sup>11</sup> \*Tareá ma vaona yamú mai avúavá barano van mi siamiyá umpsa afovasá ono. Mai ma setin e siviranten mino sire ma araiintá mumunan iyá eona mai damú inká adé en mifo aunañ ma vakhá eona vá orun mantave auu safe seno. <sup>12</sup>\*Mai ma yuntaré ein inka yo kakhan adé iyan mifo ída vá dunin avúavápin báke kakhakhein avúavá po sa manan aruvín auí daná ma yampeini sa ono. <sup>13</sup>\*Máan ture vá kakhakheintá ma noin nanin banta an de vá puntadé nono. Tetí ankan ída vá óen non nare sa óen é noké pamúku avúavá iyáke inká ena nanin banta ina yana san ída vá tirá namu uré tiruve sisive é nó tifano. <sup>14</sup>\*Aesin ná Bafan Yisas Karaisini avúavá ano sretíi auí daná an dakhangi ída vá dan bukhafai anunu ánañ dakhangono.

## 14

*Ena Mumunan Nanin Banta Van  
Ma Oyampá Baya Sin Baya Ino*

<sup>1</sup>\*Mumunan ma ída ákonq ukhein kékásá aya iyáke ída vá betí ankan ma variyain avúavá daimono. <sup>2</sup>\*Para vara seyo,

manáa ano ma mumunan iyain mai kasaé minó dunan nanté uno siren niyan mifo manáa ano auraren maen manáa yunan máan né iyan mino. <sup>3</sup>\*Máan té iyan mifo mai ma minó dunan ma niyain kéká ano ída vá mai ma manáa yunan aurakhein kéká oyampá bayo se siná inká manáa yunan ma aurakhein kéká ano ída vá minó dunan ma niyain kéká daimono. Mai fara vara seyo, Tiyarafenu ano minói aviranten mino. <sup>4</sup>\*Éi iyé bákeyá enai yoran

\* **13:6:** Mat 22:21    \* **13:8:** Mat 22:39-40; Yem 2:8    \* **13:9:** Diu 5:17-19, 21    \* **13:10:**

1Ko 13:4-7    \* **13:11:** Efe 5:14; 1Te 5:6-7    \* **13:12:** 1Yn 2:8    \* **13:13:** Ruk 21:34; Efe 5:18

\* **13:14:** Efe 5:11    **14:1:** Rom 15:7    \* **14:2:** Esé 9:3-4    \* **14:3:** Kor 2:16    \* **14:4:** Mat 7:1; Yem 4:11-12

bantai avúavá daiminte fono. Daimin nompo veni avúavá ano mo kama inten nafi áo namu inten nafi mai Bafan mano anan betin daíden ayaintin mantaan ákoná inten mino.

<sup>5</sup>\*Máon mana en mi manáq ano ma inin nain mano maná damú anan moéken kantasi ukhen ne sintin inká manáa ano ma inin nain mano minó damú ano manái anan ukhen ne sinten mino. Máon tukhanti inte inin manó ei inimpín kama ukhanten nafi mai ángain ná dakhafono. <sup>6</sup>Mai ma maná damu san inian kákán damusí uren monó tiyain kéká ano mai Bafan nan mi iniren máon tiyan mino. Inká mai ma minó dunan niyain kéká ano Bafan nan iniren Tiyarafenun naren tusu siantáden né iyan mino. Inká mai ma manáa yunan ma aurakhein kéká ano Bafan amusin uantano van mi Tiyarafenun naren tusu siantáden né iyan mino. <sup>7</sup>Mai van mi ayun ma fara van má purin má maen mai ída seti sinunurá banté tifé umpo Tiyarafenui na yaná ino. <sup>8</sup>\*Bafan amusin uantano van mi ayun para vátifé umpo ínaiimpáké ma furonuna ano yere mai venina anan banté uno. Máon tukhantí seti ayun para vante rafu áa furonte rafu mai Bafan nina yaná ana ino.

<sup>9</sup>Mai ma fara ayun bain kayo vá mai ma fúkein kayo vái Bafan ni-náí ono van mi Karaisi ano fúoren e mantakhen mino. <sup>10</sup>\*Máon tukhen mifo mai fará ena mumunan kékáí avúavá daídeya vetin maman bararasí iya fono. Tiyarafenun avoráí mana mana ano mantavékun mi setin daiminten mifo afovasá ono. <sup>11</sup>\*Tiyarafenui vompon dóki ano máa sikhen mino.

“Téi ena ena varuna Bafan mano fura uron té uno.

Minó ma varará nanin banta ano séi varunará eriven me

\* **14:5:** Kar 4:10-11 \* **14:8:** Kar 2:20 \* **14:10:** 2Ko 5:10 \* **14:11:** Fir 2:10-11 \* **14:14:** Apo 10:15; Tai 1:15 \* **14:15:** 1Ko 8:11-13 \* **14:19:** Rom 12:18; 15:2 \* **14:20:** 1Ko 8:13

aron durafúden te nan Tiyarafenu uron mino sinten mino.” Ais 45:23

<sup>12</sup> Máon tukhein nan mi setí afová ukhé tiféuno. Minó teti ma variyaruna sivútivá Tiyarafenu siamékun ná béis ana vá daimino.

*Ena Mumunan Nanin Bantai Avúavá Ma Ída Yaimin Baya Ino*

<sup>13</sup> Máon ná tin nompo ída vá mumunan nain bantai avúavá daimin maran ono. Máon ma ótifanuna anoi vetíi aa iyará tifanté uno. <sup>14</sup>\*Bafan Yisasi ano senti inin amá usintá pura sé afová ukhékun mana yunan ma nan mano ída veyantá Tiyarafenu avorá painí ukhen mifo vantafó ma Tiyarafenu avorá namu ukhen ne siren ma mumunan inté inti mai vanta avorá mai yunan pura sen namu ukhen mino. <sup>15</sup>\*Máon tukhantí seti inká éi niyanona van ma ena afá aváe ano ará namu uantantiya mae ma éi ída véi ará amiya ompo ída vá mai yunan nano. Para vara seyo, Yisas Karaisi véi ma san mi fúken mifo ída áesin éini yunan nan mano véin mamádantí umefin eraven ankan mino. <sup>16</sup>Máon tukhantíya ída vá áesin ena mumunan nanin banta ano éi ma kama ukhe ne se inin nona yana san namu yaná ino vá tino.

<sup>17</sup>Para vara seyo, yunan má non má ma niyain mai ano va Tiyarafenui yafisimpín kákán danasí ukhen naino. Mai ma funtákein avúavá bá ará kusin má amusin in avúavá bá ma Kantá Aunan mano setimpín afoká é iyain mai anoi kákán danasí ukhen mino. <sup>18</sup>Tireti ankan ma Karaisini yorari iyákeyá máon avúavá ma varesin maen mai Tiyarafenun mi amusin amesin banasi ano yere saretin nan kama yorarí iyan mino sinten mino.

<sup>19</sup>\*Máon tukhen mifo setisá ena nanin banta vá manafin tirá kusé

bákesá mumunan avúavápíñ ben aya ven aya ó tifano. <sup>20</sup>\*Tiretí ankan ma niyaona mai yunan naro sire ída vá Tiyarafenui yoran máde asuse ono. Minó dunan kama ukhen mifo mumunan kéká ma mamádantin umefin eraven ankamoren dunan ma nan nain manon mai namu inten mino. <sup>21</sup>Mumunan kéká ano ará uman daantáden ma eraven ankamoren mai safúna fi uvaini non nafi ída vá niyáke inká namu yaná ino ma sen afová ukhan nain daná ída vá barano.

<sup>22</sup>Mai ma saretí ankan ída uman ban mino sireya mumunan iya ma variyaona yanasinta áin ná Tiyarafenu vá tirékan nampin mana vá bano. Inká mai ma funtákein daná ino siren mumunan iyan ma variyain kéká ano vá amusin ino. <sup>23</sup>Máon tukhen mifo mana vanta ano ma ída mumunan in kan inin má ma váken dunan nanten maen mai yan bái umeiñ inten mino. Bái ma ída funtákein danasinta ino sen mumunan ukhein danasinta ma varanten mai véi umeiñ inten mino.

## 15

*Ena Nanin Banta Aya Ono Van Ma Iyan Ban Baya Ino*

<sup>1</sup>Tetisi mumunan ma ákona ukhá baruna kéká ano vá mai ma vetii mumunan ída ákona ukhan ma umampin bain kékásá aya ótifan numpo ída vá tetiyan nan mana ma simusin timin avúavá ana variyá bá tifano. <sup>2</sup>\*Tetí ankan ná ena mumunan nanin banta ayaé tifékun ná betii mumunan mano moéken ákona ino. <sup>3</sup>Para vara seyo, Karaisi má deren ída veyan amusin barano van doriyá in mai van mi Tiyarafenui vompon dóki ano máa sikhen mino. “Mai ma saretin oyampá baya siyain kayo ano mai sen timaniná kainten mino.” *Íbo 69:9*

<sup>4</sup>\*Para vara seyo, mai vaya kayo

ano setin afova simiyantí mantaan ákona ukhé Tiyarafenun ave ukhé tifékun tetin evaránen tivirano van mi gefá bompon dókifin uvantaren mino.

<sup>5</sup>Yisas Karaisin ánaín ma yakhafiyante mai áesin ná mai ma kama ineine amiren ákona uantiyain Tiyarafenu ano vá bei Kantá Aunan póké tiretiyan ma manafin ban avúavá amino. <sup>6</sup>Amirantii ará manafiní ure ma varanona yaná anon tetisi Bafan Yisas Karaisin afóe Tiyarafenun avíí maman daní in nono.

<sup>7</sup>\*Yisas Karaisi ma saretin nan anunu uren avireinie ma ena nanin banta anunu ure avirante mae mai anoi Tiyarafenun kákán bí amin nono. <sup>8</sup>\*Tetí ankan afovásá ó tifano. Yisas Karaisi ma Yutan kayoi yoran bantaí ma ein mai anoi mai ma vetin anafu aráompin ma iyáamtákaré ein bayá ano kanaí intin mai Tiyarafenu ano furan tikharen mino sino van mino. <sup>9</sup>\*Inká ena anan nanin banta avábá uantádantin betin má dere Tiyarafenu aví daní ino van mi Karaisi eren mino. Mai van mi vompon dóki ano máa sikhen mino.

“Ena anan nanin banta finté uaré éin aví daní onté uno.

Éin aví daní in í kayo yanté uno. *2Sa 22:50; Íbo 18:49*

<sup>10</sup>Tiyarafenui vompon dókifin enádá máa sikhen mino.

“Ena anan nanin banta kayo oe, Tiyarafenui vanasi vasá manafin amusin ono.” *Diu 32:43*

<sup>11</sup>Inká evaránen máa sikhen mino. “Tireti ena anan nanin banta oe, Bafan avisá daní ono.

Minó barará nanin banta oe, véin avisá daní ono.” *Íbo 117:1*

<sup>12</sup>\*Inká sakhanampa vanta Aisaiya máa sikhen mino.

“Yesin anan pinté ma afoká in nain banta ano minó barará diffíbintin maen

\* **15:2:** 1Ko 10:24, 33 \* **15:4:** 2Ti 3:16 \* **15:7:** Rom 14:1 \* **15:8:** Mat 15:24 \* **15:9:**

Apo 3:25 \* **15:12:** Rev 5:5

béi anan tiya uren evaránen  
tiviranten mino siren  
ena anan nanin banta ano  
ventá mumuran inten  
mino." *Ais 11:10*

<sup>13</sup> Mai ma ameno siren  
iyáantáka ave iyaona Tiyarafenu  
vaípá timükékun ayainti mumu-  
nan esin amusin má ará kusin  
má bíkaantanten mino. Mai ma  
varano sire ave iyaona inimpin  
Kantá Aunan mano moéken ákona  
amintin mantaan ákona in nono.

*Pori Ma Vompon Uvarein Bayai  
Ana Ino*

<sup>14</sup> Mumunan tifá tiváeyan  
noe, Tiyarafenu kama avúavá  
inka sireti afová uren nan mai  
yanasinta ano sirectimpín bíká téi  
fura siré afová eruna kasaen ena  
nanin banta mai vaya afova amin  
nono. <sup>15</sup> Tiyarafenu ano sein  
tarisari uren doran timikhá ein  
nan mi manáá ákona vaya sirectin  
uvaman ameruna mai ano kasaen  
tiretin ineine aminten mino.

<sup>16</sup> \*Tiyarafenu anon ena anan  
nanin bantafin Yisas Karaisini  
kama vaya mo siamino van mi séin  
aní uren monó ánon banta ano ma  
yoriyain avúaváká ten nan dorano  
van mai yoran timen mino. Kama  
vaya mo siamékun Kantá Aunan  
mano vetin ayaintin Tiyarafenu  
ano ma ará manafiní é iyain íkun  
uan amin an dantin pura sen betin  
maman bei vanasí ino van muno.

<sup>17</sup> Máan tukhái Yisas Karaisi  
ma seimpin báká ma Tiyarafenu  
yorarí iyaruna van mi simusin  
iyá uno. <sup>18</sup> Téi ída ena yan-  
asinta van baya seno van mumpo  
mai ma Yisas Karaisin pákena van  
ma siyá bariyá iyarunará ma ena  
anan nanin banta e mamádán Ti-  
yarafenu oo yaiiyiyain mai vaya  
anan tenté uno. <sup>19</sup> Ara ara  
enará ukhein daná ma afokáin  
ákona Tiyarafenu Aunan mano  
sén timikhá Karaisini kama vaya  
Yerusalemí ké araí uré avové é

banasi e siamé oriyá Iririkumí  
barafin mo kanaí é uno.\*

<sup>20</sup> \*Tenti ákona inin ma vain  
mai Karaisini kama vaya ma fefá  
inikhein akhempá ifá uré mai ma  
ída inikhein nanin bantafin ma  
mo siamin nan mi sinunu iyá  
uno. Ena vanta ano ma namádan  
daféadantá ma uvareiní ída ono  
van muno. <sup>21</sup> Tiyarafenu vompon  
dókifin máa sikhen mino.

"Mai ma Tiyarafenu vaya ída  
siamikháin nain kéká ano  
onantin  
inká mai ma veni vaya ída  
inikharéin nain kéká ano  
afová inten mino." *Ais  
52:15*

<sup>22</sup> \*Mai ma Tiyarafenu vaya ída  
inikharé ein barufimpái siamé  
noké tiretin ída ainé o oné uno.

*Pori Ma Romú Orono Van Ineine  
Ein Baya Ino*

<sup>23</sup> Ída ainé oné umps mai  
varafimpá ma yoré noré eruna  
inka saréa me kípé uno. Tiretin  
nan kokhon oranarái o ineine  
é eriyá baréi saréa sirectin o  
onano van iyá uno. <sup>24</sup> Spenii  
varafá ma oronté maé tiretin  
naren e odé oronté uno. Tiretin  
má ma manafin o varééku mae  
sirectii aaí usintesí oronté uno.

<sup>25</sup> \*Oronté umps monó nanin  
banta ma Yerusalemí bain naren  
mo amusin moní amiré ínaimpákei  
oronté uno. <sup>26</sup> \*Mai fara vara  
seyo, Masedoniaú Akaiaú varafá  
ma Tiyarafenu vanasi vain mano  
Yerusalemí ma Tiyarafenu vanasi  
váken manáá yana san ma o  
útuifiyain kékápin dantin ma orin  
nain danasinta van betiyan baya  
sian damuré moní átaru ono  
van iniyan mino. <sup>27</sup> \*Betí ankan  
amusin mái mai avúavá bariyaren  
mino. Mai fara vara seyo,  
Tiyarafenu kama vaya ma Yutan  
kéká pintena varein mai ayái  
anona moní átaru uren evaránen

\* **15:16:** Rom 1:5; 11:13    \* **15:19:** Iririkumí mana Ítarí ádé ma vain bara ino.    \* **15:20:**

2Ko 10:15-16    \* **15:22:** Rom 1:13    \* **15:25:** 1Ko 16:1-4    \* **15:26:** Apo 24:17; 1Ko 16:1;

2Ko 8:1; 9:2, 12    \* **15:27:** 1Ko 9:11

aminten mino. <sup>28</sup> Mai moní ma áturu urantí baré mo amiré kun ma mamarantí maé ínaiimpáké Spení ma orono van tiretin naren e oné oronté uno. <sup>29</sup> \*Téi fura sé afová iyá umpo séi ma sreti vaonafá ma oronuna mai Karaisini kákán avábá bái oronté uno.

<sup>30</sup> \*Mumunan kéka soe, setisi Bafan Yisas Karaisin avíkái sretin ákoné tiamiyá uno. Mai ma Kantá Aunani yorantá avábá in maran iyá tiferuna van mi Tiyarafenu vaípá amúkusintesin téin tiya ino van muno. <sup>31</sup> Amúkesin ná Tiyarafenu ano séintá daffikantisá Yudiá barafin ma vain kéká ano ma veni vaya átakharé iyaimpin mai ma átaru uádan moní baré oré kun ná mumunan kéká ano amusin iyan barano. <sup>32</sup> Mamarantin ma Tiyarafenu ano anunu intí maé túpin timusin bantíi sretin má e váké mumunan ákoná uantan maran ótifanté uno. <sup>33</sup> Ará ma kusiantan Tiyarafenu ano sretin masá bano. Mai fura ino.

## 16

*Pori Ma Amusin Baya Vei Arona  
Kayo Van Tein Baya Ino*

<sup>1</sup> Teti mumunan tiyofí Fibi maen Sinkriá barurá minó dorarí iyain bákán tiretin onano van orinten mino. <sup>2</sup> Orínti mae mai ma Bafani yoran banta kama e aya iyaonai e véin aya ono van muno. Manáa yoran aya ono van ma sinti véin ná aya ono. Mai fara vara seyo, kokhon nanin banta aya uaren ten má deren tiya ukhen mino.

<sup>3</sup> \*Prisira nú Ákuira nú ten má tiyaen Yisas Karaisini yorariín ábasu ifo vá amusin uantano. <sup>4</sup> Míkan nan mano séin naro siren purin aví doká ida seya ana vékan tusu siantiyá umpo ena anan pinte monó nanin banta ano yeren tusu siantiyán mino.

<sup>5</sup> Mai ma vékan amápin átaru iyain monó kékásá tenti simusin baya siameno.

Tiamiyáke mai ma Esiá bara finté esé araién ará baéden Yisas Karaisin ánón ma yakhafein banta mai sesi kama sirona Epenetusí ifo vá tenti simusin baya vá dere véin ná tiameno.

<sup>6</sup> Mai ma sretin aya ono van ákona yorarí iyain nanin Marian dere vá tenti simusin baya siameno.

<sup>7</sup> Inká Antronikusin nú Yuniasin nú mai senti ádéken nan báken ten má karavusí ukharen mifo senti simusin baya vá míkan dere siameno. Téi ma ida Karaisini yoran bantaí ukhé kun maen békán manon pefá ayáká dókein bantá kan bákán ena aposeri kéká ano vékan nan peyan doran bantan báken Karaisini kama yorarí ukharen ne siyaren mino.

<sup>8</sup> Bafan avíká ma séi sinunu iyaruna vanta Ampriatusin ná tenti simusin baya siameno.

<sup>9</sup> Tetisi mana yoran banta ma Karaisini yorarí iyain Urubanusi má inká tesí kama sirona Stakisi nusá tenti simusin baya siameno.

<sup>10</sup> Mai ma ara ara uman eriyan Karaisin avíká mantaan ákoná ukharé ein banta Aperesin má inká Aristoburusini mápin ma vain mumunan kéká dere vasá tenti simusin baya siameno.

<sup>11</sup> Tentí ádékena vanta Erodionin má inká Narsisusin amápin ma vain mumunan kéká basá tenti simusin baya siameno.

<sup>12</sup> Mai ma Bafani ákona yorarí in nanin kan Tri finan nú Tirfosa nú bá inká ena sen tirona nanin ma Bafani ákona yorarí iyá ma sinunu ukheruna Pesisí masá

tenti simusin baya siameno.

**13**\* Inká mai ma Bafan mano aní ukhá ein banta Rufusin má be anóe masá tenti simusin baya siameno. Rufusin anóe anonte sinóen an dakharen mino.

**14** Asinkritusin má Frekonin má Ermesin má Patrobasin má Ermasin má inká betin má ma vain mumunan kéká basá tenti simusin baya siameno.

**15** Firorokusin má Yuriasin má inká Nereusin má be ayofi má inká Orimpasi má betin má ma vain mumunan kéká basá tenti simusin baya siameno.

**16** \*Tiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.\*

Minó Karaisini vanasi ma vain mano sirectimpín betíi amusin baya yan oren mino.

*Monó Tin Kéká Aúban Ma  
Yaimen Noin Kékasán Ma Feran  
Baya Ino*

**17**\* Mumunan tiyofi sifá tiváeyan noe, ma ákona vayan tiamenté uno. Mai ma nóken eraran aúban daimin baya ma sen noin kéká sará dafiseno. Beti ma sin nain baya ano mai ma fefá afová ukheona vaya vá ída manái ukhantin mi savifái aviren orinten mifo ída vá betin ádé orono.

**18**\* Mai fara vara seyo, mai kéká ano setisi Bafan Karaisini avúavá ánaín ída yakhafiyan mifo vetíi ineinerái yakhafiyan mino. Betíi kampun baya kayo fóké banasi ase amiádaren betíi kama mumunan máden asuse iyan mino. **19**\*Máan tiyan mifo sirecti ma Bafani vaya ánaín dakhafiyaona mai minó nanin banta ano afová ukhen mino. Mai van mi séi simusin iyá umpo sirecti ankan puntákein

\* **16:13:** Mak 15:21    \* **16:16:** 1Ko 16:20; 1Pi 5:14    \* **16:16:** Kiriki vaya fintéi Tiyarafenurá ma monó tiyain nanin banta ano ma kantási ukhein amónan maran iyain nan tikhen mino.

\* **16:17:** Mat 7:15; Tai 3:10    \* **16:18:** Fir 3:19; 2Pi 2:3    \* **16:19:** Rom 1:8; 1Ko 14:20

\* **16:20:** Esé 3:15    \* **16:21:** Apo 16:1-2; 19:22; 20:4    \* **16:23-24:** Apo 19:22; 1Ko 1:14

\* **16:23-24:** Tiyarafenu manáá vompon dókifin ves 24 fin ena vaya asotúin máa sikhen mino.

24 Tetisi Bafan Yisas Karaisini sarisari ano sirectin masá bano. Pura.    \* **16:25:** Rom 1:5; Efe 1:9; 3:5, 9; Kor 1:26

avúavá óde afová ure vá betin má namu avúavá barana vá teno.

**20**\* Mágan ma iyasin maen ída ayáká báken mi ará kusin ma amiyain Bafan mano sirectin arantan aránaópá Ban Anon kaúden dasaminten mino.

Tetisi Bafan Yisas Karaisini sarisari ano sirectin masá bano.

**21**\* Tesi mana yoran banta Timotin má inká tenti ádékena kéká ma Rusiusin má Yesonin má Sosipaterin má ano amusin baya yan tireti vaonafá oren mino.

**22** Téi Porini vaya ma uvariyaruna vanta Tertiusi anon Bafan avíká tesi simusin baya yékun tireti vaonafá oren mino.

**23-24**\* Monó nanin banta vá ma Kaiusin amápin ma átaru iyákun ma setintá kamaen dafisiyá ein mai véin má deren amusin baya sirecti vaonafá dan oren mino.

Mai ma kákán barufin kamanini moniká ma yafisiyain banta Erastusin má inká mumunan tifá tiváe. Kuartusin má dere anon amusin baya yan tireti vaonafá oren mino.\* **25**\* Yisas Karaisi ano ma sirectin ena anan nanin banta ayain nan ma fefá bompon dókifin tiádan aúpá baré ein mai saréa Tiyarafenu ano sirectin aya inti mantaan ákona in nono. **26** Mai ma fefá sakhanampa vanta kayo ano siádan baré einén mi fara van oriyan ban Tiyarafenu ano ma ákonaen tiádan baré ein mi minó barará nanin bantafin inka sian amá é tiferuna mai kasaen Karaisintá mumunan ureñ ben ánaín dakhafinten mino. **27** Yisas Karaisini kama avúava sará mai ma afova víkakhein Tiyarafenun aví ena ena yaní ótifano. Mai fura ino.

**PORI MA ESÉ  
ARAÍEN KORINÍ  
NANIN BANTA  
UVAMAN AMEIN  
BOMPON MINO**

(1 Korini)

**Korinii Esé Bompon  
Ma Uvanteí Pákenai  
Afova Vaya Ino**

*Ma vompon ma uvantein banta  
ino.*

Baya varen orin banta Pori ino.  
*Uvarein orana ino.*  
AD fifti-siksi (56) fin nafi áa fifti-seveni (57) fin nafin uvanten mino. Mai maen Pori ma kanú manaú dádasí en ma monó dorarien eúkiyain pimpá ino.

*Ma vompon ma uvantein baru  
ino.*

Taréa ma Téki e siyain barafin ma áau orun perápá bain baru Efesasii kanú manaú oranará o váken ma vompon uvanten mino.

*Ma vompon ma uvaman  
amikhein kéká ino.*

Pori ma kan dádasí en ma monó dorarien eúkiyaren ma Ákaiá barai ánon baru váken ma inká bisinisí impin o aní ukhein baru Korini ma ena anan nanin banta ano ma monó tin avúavápin ma mo kokhoní iyain kékái uvaman amikhen mino. (Aposeri 18:11 fin ná onano.) Béi mana orana ifo afápá mana un kádan biyontái váken uvanten mino.

*Nái ana vará ma vompon uvan-  
ten nafino.*

Korini baru ráké ma eriyain bompon má inká mai fáké ma erein arona kéká bái vaya Pori afová en iníkan monó nanin bantafin kampun afová amin banta kéká ano oriven

uman maman dákó uran monó tin avúavá mo ampiren peyan ineine rá oriyan ne seimpin mino. Ma ma esé uvantein bompon ída fura sen mai uman afová inton paran manáorái kampun afová amin banta kayo van tikhen mino. (Kan dádasí ma en uvanteimpin mi fura sen tian amá ukhen mino). Inká kiafosí in avúavá safi man baya fi Bafani ká dunan nan nafi fúoren orun mantan nafi inká Korini nanin bantai ábasuí in má dunan nan ma safi Kantá Aunan mano ma amusin amiyain má monó tin avúavá ba safi ano ma Korini nanin banta uman amiyain maman bararasí ino van Pori ída o úku e úku inton puntáden tian amá ukhen mino. Sapta 13 fin ma avábá í pákena ma sikhein ma san deren tian ákona ukhen mino.

*Pori Ma Amusin Bompon Uva-  
man Koriní Nanin Banta Amein  
Baya Ino*

<sup>1</sup> Yisas Karaisini kama vaya varen mo vanasi siamino van ma Tiyarafenu ano vei anunurá tiviká ein banta séi Porin má mumunan tifá tiváe Sostenesin má anon ma vompon uvaré uno.

<sup>2</sup> Tiyarafenu ano vei vanasií uveya kantasí ukhe vano van ma avíkein kéká ma Korini barurá banan ma inká Yisas Karaisini yorantá ma avíden maman kantasí ura ma minó akhempá baona nanin banta ano ma Yisas Karaisin nan ma setisi Bafan má betií Bafan má ino ma siyaona mai kékái ma vompon berasan mano uvaman amé uno.

<sup>3</sup> Teti Sifóe Tiyarafenu vá tetisi Bafan Yisas Karaisin má pinte sarisari vá ará kusin má ano kanaien tiretin má banten mino.

*Pori Ma Susu Siantein Baya Ino*

<sup>4</sup> Tiyarafenu ano ma vei sarisari siretin amira ma saréa Yisas

Karaisin ninaí ukheona van mi séi ena ena véin tusu sianté iyá uno. <sup>5-6</sup> Para vara seyo, mai ma ara ara afova váka ma ákona e vaya siyaona mai Tiyarafenu anon Yisas Karaisin pinté uaren mai afova amikhái Yisas Karaisin nan ma siamiyá erun mai inka sireti ankan pinté afoká en mino. <sup>7</sup> Máan tukhanti setisi Bafan Yisas Karaisi ma ovaránen erin nain nan ma ave ukhe ma Kantá Au-nani ara ara amusin barano van ma iyeré eona mai inka saréa vare ono. <sup>8</sup> \*Inká béis ano mai amusin kayo fóké tiretin maman ákona uantádanti oriyare setisi Bafan Yisas Karaisi ma ovaránen erin nain damú ída mana aau vanti ven avorá o mantan nono. <sup>9</sup>\*Tiyarafenu ano veyan ma siren daná bariyain mi vákan be Anin ma setisi Bafan Yisas Karaisi vain má manafin bano van mi sireti arakhen mino.

*Monó Nanin Bantafin Ma  
Yaimin Avúavá Bain Baya Ino*

<sup>10</sup>\*Mumunan tiyofi sifá tiváeyan noe, ída vá aruve asive iyáke setisi Bafan Yisas Karaisin aviká kama e manafin báke vá eraran ma aúban daimin avúavá ída vanti vá manafin ma vaya siren ma varanona yaná ano vá mai kama ino. <sup>11</sup>Mumunan kéká soe, siren ankan ma aruve asive iyaona vaya mai Karoen amápin ma vain kéká anón me sisimí iniréi ma vaya siyá uno. <sup>12</sup>\*Tireti ankan máa mi siya ono. Manáa kéká ano Porin mi yakhafiyá uno siyáka inká manáa ano Aporosin mi yakhafiyá uno síka manáa ano Pitán mi yakhafiyá uno síka manáa ano Karaisin mi yakhafiyá uno siya ono.

<sup>13</sup> Kanaí eyá Yisas Karaisin maman aúban daiminte fono. Téi Pori anó tiretin nan pukékuyá inká ten tivíkasá monó non mante fono. <sup>14</sup>\*Téi ma Krispusin má

Kaiusin má monó non péantadé ma siren ída féantákeruna van mi Tiyarafenu tusu siantiyá uno. <sup>15</sup> Máan tukhé umpo ída vá mana ano sen nan ben avikái monó non péké uno vá teno. <sup>16</sup>\*(Stefanasini kéká bá deren monó non péan tákékun ban mifo mai oyampáké ena kéká bá péke rafu ída afova ukhé uno.) <sup>17</sup> Yisas Karaisi ano monó non péantano vara séin tisinten naino. Tiyarafenu kama vaya siamino van mi sisinten mino. Mai fara va ino vara ráke afova ma mantein banta kayo ano ma siyain avúaváká baya siyaré Yisas Karaisini yaa unkamádan maman paen danasí onuna van mino.

*Yisas Karaisi Mai Tiyarafenu  
Kama Afova Vá Ákona Vá Ino*

<sup>18</sup> \*Mai fara vara seyo, Yisas Karaisini yaa unkamádan nan ma siyain baya ano varará ma o afey-oriyain kéká avorá paen danasíi ukhá afova ukhé umpo mai ma inarufá orono van ma útakhé tiferuna kéká ano ma oniyá tiferuna mai Tiyarafenu ano ma setin tiviriyain ákonon ban mino. <sup>19</sup>Mai fara vara seyo, vanasi ano ma vetiyantá betiyan ayain nain nan Tiyarafenu vompon dóki ano máa sikhen mino.

“Bantai afova mágé asuse uré betí ineine finté kama afova yo varanté uno.” Ais 29:14

<sup>20</sup>\*Máa sikhen mifo mai ma kama ineine vain kéká bá kama afova variyain kéká bá inká be afova van ma fura fura sin kéká bá mai intesá ukhen nafino. Tiyarafenu ano máan ineine vá ma vain kéká afova maman paen danasí ukhen mino. <sup>21</sup>\*Mai fara va ino, vantai ineine ano Tiyarafenu ineine vá ída manáí ukhan ída kanaíen beni vaya ineren ukhan

\* 1:8: 1Te 3:13; 5:23    \* 1:9: 1Te 5:24; 1Yn 1:3    \* 1:10: Fir 2:2    \* 1:12: Apo 18:24-28;  
1Ko 3:4    \* 1:14: Apo 18:8; Rom 16:23    \* 1:16: 1Ko 16:15    \* 1:18: Rom 1:16    \* 1:20:  
Yop 12:17; Ais 19:12; 33:18; 44:25    \* 1:21: Mat 11:25

mi setí ankan ma asuse aa fáké monó bayá siamiyaruna anon bana nasi aya iyákan Tiyarafenu ano amusin iyan mai kéká aviriyán mino. <sup>22</sup> Yutan kayo ano enará ukhein avúavá aní intí ódaré mumunan ono van iyákan inká ena anan nanin banta kayo ano vetí ankan ma afová ukhein avúaváká ma siamintin iniren mumunan in nain nan mi yosiyan mino.

<sup>23</sup> \*Máan tiyan mifo Yisasi ma yaa unkamádantá purein nan ma setí ankan tiamiyákuñ Yutan kayo ano mai vaya inian paen danasí iyan maen inká ena anan nanin banta kayo ano iniren asuse vaya ino siyan mino. <sup>24</sup> \*Máa siyan mifo mai ma Tiyarafenu ano Yutan kayo vá ena anan nanin banta kayo vá ma evaránen avíkein mai Yisas Karaisi maen Tiyarafenui ákonan báken beni kama ine inen ban mino. <sup>25</sup> \*Mai fara vara seyo, varará banta ano Tiyarafenui in-eine van asuse ukhen mino siyan mifo vetí kama ineine esantakhen mino. Inká Tiyarafenui avúavá san ída ákona van ne siyan mifo vantai ákona esantakhen mino.

<sup>26</sup> \*Mumunan kéká soe, afova sá ono. Manáa kéká ano ída afova váka ída aví bain nanin banta akhafanán báke ída ona vain kayon baré en nan mi Tiyarafenu ano siretin arakhen mifo ovare vá me ineno. <sup>27</sup> Mai ma kama ineine vákai vá uno ma siyain kéká ayave ameno van mi mai ma asuse ineine vain kéká Tiyarafenu ano aní uren doran amen mino. Inká mai ma ákona vain kéká ayave ameno van mi mai ma ída ákona vain kéká aní uren doran amen mino. <sup>28</sup> Kama ineine ma vain kékái afova mágé asuse ono van mi ma ma vanasi ano namuen púta ukhen mino siyá ein kéká Tiyarafenu ano aní uren doran amen mino. <sup>29</sup> \*Máan turantin

\* 1:23: Rom 9:32; 1Ko 2:14    \* 1:24: Kor 2:3  
2:5    \* 1:29: Efe 2:9    \* 1:30: Yer 23:5-6    \*

Tiyarafenu avorá ída mana ano séi mai yaná manté uno sen be amo sino van mino.

<sup>30</sup> \*Yisas Karaisin pinté uaren tetin tiya ono van mi Tiyarafenu ano veyantá mai aa maman asamana uran ban mino. Mai fara va ino, Tiyarafenu ano setin evaránen tivirano van mi Yisas Karaisimpó tetin afova simiren maman puntákein kékási ureñ inarufá orino van tetin kantasí urá bá tiféuno. <sup>31</sup> Máan tukhein nan mi Tiyarafenui vompon dókifin tikhen mino. “Mana nanin banta ano ma amo seno van Bafan mana vá amo sino.” *Yer 9:24*

## 2

*Pori Ma Tiyarafenui Kama Afova Vaya Vanasi Siamein Baya Ino*

<sup>1</sup> Mumunan tiyofi sifá tiváeyan noe, Tiyarafenui vaya ma aúpá baré ein ma séi esé araíé tiretin tiameruna mai ma varará banta ano ma káká afova manten ma siyain avúavákasa siame rauno. Ída ino. <sup>2</sup> Para vara seyo, Yisas Karaisin má inká daa unkamádantá ma véi fureí pákena vá anan tiameno van ukhá uno. <sup>3</sup> \*Téi ma esé araíé tireti ankan baonafá oreruna mai ída ákona vákai sikhokhofiyá oré uno. <sup>4</sup> \*Téi ma Tiyarafenui vaya siamiyaré eruna mai kama uréi siamiyáke ída ase vayafó iyaní uré tiretin avíké umpo Kantá Aunán manon tiretin aúbaná ákona yorarí ukhen mino. <sup>5</sup> Máan turéku mae varará bantai ineinerá ifá ureya Tiyarafenui ákonará mumunan ono van mi siamiyaré uno.

*Kama Afova Ma Kantá Aunán Pinté Erein Baya Ino*

\* 1:25: 2Ko 13:4    \* 1:26: Mat 11:25; Yem 2:3: Apo 18:9; 2Ko 10:1    \* 2:4: 1Te 1:5

<sup>6</sup> Tiyarafenui vaya ma inikhein kékápin mi véi ma simikhein ineinerá baya siyaré umpo varará bantai ineinera safi inká ma varará ma o aiyoran nain dafisin kékái ineinera safi va siyare rauno. Ída ino. <sup>7</sup> Tiyarafenu ano ma setin tiya uré tivirano van pefá bara ída uvanten aúpá ma aúmádan baré ein mai ineine vayan tiamiyá uno.

<sup>8</sup> Tiamiyá umpo varará ma yafisin kéká ano mai yaná ída afová ukharen mino. Betí ankan afová en baren tetisi Bafan ma kakhan má bain ída yaa unkamádantá arintin purin nainten mino. <sup>9</sup> Mai van mi Tiyarafenui vompon dóki ano máq sikhén mino.

“Tiyarafenu ma avábá in nain kéká ina ma útaádan bain mai ída mana ano onan ída mana ano inin ída mana vantai inimpin bá ukhen mino.” *Ais 64:4*

<sup>10</sup> Máan tikhen mifo Tiyarafenu ano vei Aunan pökéi mai yanasta mamañ dákó uren minó daná dosiren Tiyarafenui aúpá bain daná ina aní urá mai afová ukhé tiféuno. <sup>11</sup> Mana ano ída kanaén ena ano ma iniyain ineine afová inten mifo veykái afová inten mino. Inká ída kanaén manaano Tiyarafenui ineine afová inten mifo vei Aunan mano anan afová inten mino. <sup>12</sup> Tiyarafenu ma kama yanasta fara setin timikhein afová ino van mi vei Aunan tetin timikhen mifo ma vara ráke aunan naifo afova sá ó tifano. <sup>13</sup> Tetí ankan ma ma vaya kayo siamiyaruna mai ma vara ráke afova fosa siamiya rauno. Ída ino. Aunan mano ma setin timikhein mai Aunani vayan pura sé monó tiantan avúqvá tian amá uan amiyá tiféuno. <sup>14</sup> Amiyá tifé umpo ída ma monó avúqvá afová ukhein kéká anon Tiyarafenui Aunan mano ma monó tiantan avúqvá san ma siamin nain ída kanaén afová inten mino. Mai

anon asuse ineine vetimpin ban mifo Aunán ma vain kéká anon nái yana sará Aunan mano siamiyan nafi mai kasaen afová inten mino. <sup>15</sup> Mai ma Aunan bain kéká anon minó daná daíden afová inten mifo ída ma Aunan bain kéká anon ída kanaén mai kékái avúqvá daíden afová inten mino. <sup>16</sup> Mai van mi Tiyarafenui vompon dóki ano ina ukhen mino.

“Para vara seyo, iye anó Bafani ineine afová ukheyá  
bén inin aminte fono.” *Ais 40:13*

Máa sikhá afová ukhé tifé umpo setimpin Karaisini ineine van mino.

### 3

*Monópin Ma Aruve Asivein  
Baya Ino*

<sup>1</sup> Mumunan tiyofi sifá tiváeyan noe, gefá téi ma sretí ankan má báké monó baya inikhein nanin bantafin ma vaya siamiyainsa iyare rauno. Ída ino.

Yisas Karaisini avúqvápin arará iyampon kayo an mi yakhenái vara rákena avúqvá ánaín ma vákuriyain kékápin ma vaya siamiyainíi iyare uno. <sup>2</sup> \*Pefá tireti ankan ída ákona yunan narí ukhareya saréa yere máan manan ukhen nái arará iyampon ma nan anu máa ameiníi iyá uno. <sup>3</sup> \*Mai fara vara seyo, ume avúqvá ánaín para vákuriya vákeya afá aváen má anan maran eya aruve asive iya nan mai anon tireti avúqvá aní iyan mino. Máan ma iyaona anon ída Bafani vanasi ano ma einíi iya ono. <sup>4</sup> \*Pará ída ma monó inin kéká ano ma variyain avúqvá bariyayá mana ano se séi Porin ánaín mi vákuriyá uno siyá inká ena ano se séi Aporosin ánaín mi vákuriyá uno siyá ba rafono.

<sup>5</sup> \*Aporosi iyé bará inká téi Pori iyé bákuyá berasantá aruve

\* **3:2:** Ibu 5:12-13; 1Pi 2:2    \* **3:3:** 1Ko 1:10-11    \* **3:4:** 1Ko 1:12    \* **3:5:** Apo 18:4, 11,  
27-28

asive iya rafono. Berasan pinté uareya mumunan ono van mi Bafan mano mai yoran berasan timikhá doriyá uno. <sup>6</sup> Téi ma yanayun pafasirékun Aporosi non amiran maen Tiyarafenu anon e ampamádé iyan mino. <sup>7</sup> Máan tukhan mi yanayun ma fafasé iyain má non ma amé iyain mái aví ída van mifo Tiyarafenu ma e ampamádé iyan mai veyáká aví van mino. <sup>8</sup>\*Danayun ma fafasin banta vá non ma amin banta vá ano maman manafiní ukhen mana anarái yoriyain pasen míkan ma yoriyá inaintái miyan madú madú inten mino. <sup>9</sup> Mai fara vara seyo, setí ankan manafin mi Tiyarafenui yorararí iyá tiféku saretí ankan beni yunan bara vá má bái va ompo setí sina vaono.

*Monó Doran Banta Kayo Van Ma O Sian Má Uvaran Bantará Dan Bain Baya Ino*

<sup>10</sup> Tiyarafenui sarisarirái afova van ma má uvariyan banta an davé namádan dafédékun mi ena kayo ano mairá má uvariyan mino. Uvariyan mifo mai namádantá ma má uvaran nain kéká ano vá kamaén dafibén ná uvarano. <sup>11</sup>\*Mai fara vara seyo, Tiyarafenu ano Yisas Karaisin maman namádaní uren pe yafédan bain mana ano ída kanaíen ena namádan daferanten mino. <sup>12</sup> Máan tukhein mai namádantá ma má uvaran nain mano kasaen kori fi siriva fi kama onámaná kayo fi yaa fo safi namí po safi inká uviti ayan po safi uvaranten mino. <sup>13</sup>\*Uvaranten mifo Tiyarafenu ano ma vanasii avúayá daíden kó tiantan nain damúi má uvaran banta kayoi yoran amáká afoká inten mino. Mai damú anan minó nanin bantai yoran irafin ma iyó einíi urantin iyé kama yorarí iná inká iyé namu yorarí iyan nafi yákó inten mino.

<sup>14</sup> Iye anó mai namádantá má uvantá intin ná ída ira khanten nafi mai vanta anon bei miyan baranten mino. <sup>15</sup> Máan tinten mifo iyen amasá ira kanten nafi mai yoran bantai yoran tavifái o afeyoranten mino. Máan tintin mai ma ira anamuná pinté ma e yúden karan ereiníi en mi má uvaran banta kayo ano anan para vantem mino.

*Monó Namun Ma Vain Mai Vanasi Ino*

<sup>16</sup>\*Tiretí ankan Tiyarafenui kákan monó namun mi van nan ma veni Kantá Aunan mano ma sretimpin bain mai ídá afová ukhe rafono. <sup>17</sup>Tiyarafenui kákan monó namun ma namu inain bantan Tiyarafenu ano véin namu inten mino. Mai fara vara seyo, Tiyarafenui kákan monó namun kantasi ukhayai sreti vanasi ano mai veni kákan monó namun mi va ono.

*Ída Ma Vanasii Aví Daní In Baya Ino*

<sup>18</sup> Tiretí ankan ída vá tiretiyan kampun tiantiya vá baro. Ma vara ráke yanasintará ma afova vanitiya sretiyan maman asuse vanta kayo an dakhare vá ínaimpáké Tiyarafenu avorasá kama afova ma vain banta kayoí ono. <sup>19</sup> Mai fara vara seyo, ma vara ráke afova ano Tiyarafenu avorá asuse ukhan mi veni vompon dókifin máa sikhen mino.

“Manáa kéká ano ma vara ráke afova fóké ma minó danasinta variyain nan ma kana variyá uno ma siyain mai Tiyarafenu ano maman betíi oyivan ma munteiníi uádé iyan mino.” *Yop 5:13*

<sup>20</sup>Evaránen Tiyarafenui vompon dókifin máa sikhen mino.

“Manáa nanin banta ano setimpin afova van mino sen ininten mifo

\* **3:8:** Mat 16:27; Efe 2:20-22    \* **3:11:** Ais 28:16; 1Pi 2:4-6    \* **3:13:** 1Ko 4:5    \* **3:16:** 1Ko 6:19; 2Ko 6:16

Bafan mano mai ineine afová  
ukhantin paen danasí inten  
mino.” *Ibo 94:11*

<sup>21</sup> Máan tukhein nan mi minó daná  
mai sretin ninan ban mifo vanta  
aví ma yaní in avúavá ifasá oro.  
<sup>22</sup> Porin má Aporosin má Pitan má  
mai sretin ayain kéká ino. Inká  
ma vara vá ayun ma fara van má  
purin má taréa vá inká inuran má  
minó daná bá mai sretí ina yanái  
vákaya <sup>23</sup> inká tireti Yisas Karaisin  
ninan banan béis Tiyarafenu inan  
ban mino.

## 4

### *Yisas Karasini Kama Vaya Ma Varen Orin Banta Kéká Vaya Ino*

<sup>1</sup> Máan tukhen mifo Aporosi  
rasan nará Yisas Karaisini yoran  
bantá kanan mi váken beni aúpá  
bayan kamaen dafíben tisimiyan  
mino seja vanasi ano vá afová  
ono. <sup>2</sup>\*Ena ina yanáká dafíantano  
van ma mana vanta aviádantin  
báken maen ben nina yanákasá  
dafíán ákona uantano. <sup>3</sup>Téi kama  
e sá doriya rafu áa namue sá  
doriya rafu mai seyantá ída afová  
ukhé umpo sreti safo áa ena  
kéká ano fi ma sen tivútivá daíde  
afová inteya mai sító daná ino.  
<sup>4</sup> Teyan nan kama anan é doriyá  
uno siyá umpo Bafan beyaká anan  
tenti yoran daíden afová uren mai  
kama yorarii e ono sen inká mai  
namu yorarii e ono sen tisim-  
inten mino. <sup>5</sup>\*Máan tukhen  
mifo vanasí avúavá ma yaíden  
afováin damú ma ída erikhanti  
ma yoriyaruna sivútivá ída vá  
daimiyáke áesin ná baré intin  
Bafan mano vá me yaimino. Bafan  
ma eriven maen tetisi súpin ma  
aúpáké bariyá onuna yaná maman  
dákó kakhakheintá kaúdantin tetí  
ma yoriyaruna sivútiváká ten Ti-  
yarafenu ano miyan timídú inten  
ino.

*Koriní Nanin Banta Ano Vetyian  
Amo Siyan Ma Amaan Baya Sein  
Mino*

<sup>6</sup>\*Mumunan tiyofi sífá tiváeyan  
noe, Aporosi rasan mano sretíi  
ayainí uvé ayaéku ma ma siami-  
yaruna yanasinta one afová ono  
van mi siamiyá uno. Tiyarafenui  
vompon dóki ano ma sikhein baya  
amaniná ída vá ena vaya kayo  
maman asotú ono. Máan ma inté  
mae ída mana ano ma yoriyain  
avúava san maman daní ureya  
ena ano ma yoriyain nan maman  
bararasí inono. <sup>7</sup>\*Intéa yaná  
ma variyaona anó tiretin maman  
enará ukhen nafino. Intéa kama  
yanasá Tiyarafenu ano sretin ída  
amikhen nafino. Tireti ankan ma  
kama yaná amikhanti ma kama  
yorarí iyanteya ída vá tesí ákonrái  
yoriyá uno se vá e amo seno.

<sup>8</sup> Tireti ankan ma ineona ano  
minó dana san ma iyaré eruna  
inka yareruna mai kin an davé  
tetisi ákonrá bátifanté uno sireya  
setin me ampin nompo mai kana  
ino. Tireti ankan ma kin an dante  
mae mai setin má deren kiní uvé  
tiretin má banté uno. <sup>9</sup> Mai fara  
vara seyo, kó tiantáden ma fu-  
rino van kana ino sikhein banta  
kéká an mi yen Tiyarafenu ano  
seti aposeri kayo maman dákosí  
urá bátifékun enisori kayo vá ba-  
nasi vá ano setin toman paen  
danásí iyan mino. <sup>10</sup> Tetí ankan  
Yisas Karaisini asuse yoran banta  
an dakhéku mae sretí ankan ma  
iniyaona ano Yisas Karaisin má  
túpá ukhé minó daná afová ukhé  
uno siya ono. Tireti ankan Ti-  
yarafenui ákona váká bá tiféuno  
sireya setin nan ída ákona vákan  
ban mino siya ono. Tireti ankan  
banasi ano setin mi simo siren  
betin nan intiyan mino siya ono.  
<sup>11</sup>\*Taréa ma vá tiferuna yamú mai  
sirafan nan iyáké maé non nan tii  
iyáká tuí dana san iyákun banasi

\* **4:2:** Ruk 12:42 \* **4:5:** 1Ko 3:8 \* **4:6:** Rom 12:3 \* **4:7:** Rom 12:6 \* **4:11:** 2Ko  
11:23-27 \* **4:12:** Mat 5:44; 2Te 3:8

ano siruren tisiren iyákan ída setin timá ban mino. <sup>12</sup>\*Tetí ankan ma vanuna van mai ákonaé tiyan póké dódékun mai ano setin tiya iyan mino. Tetí ankan ma aufon usin-tein kéká kamaé avábá uantiyáké tetin ma sirono van iyáká maé bempákéi vá tiféuno. <sup>13</sup>Banasi ano ma namu vaya sen tisiká betí ankampin puntákein baya anan tiamiyá uno. Taréa ma vá tiferuna yamú mai vanasi ano setin manan kanti ma karúdiyaimpin ma karúdeinii iyá bá tiféuno.

### *Pori Ma Monó Afóen An Mi Yakhé Uno Ma Sein Baya Ino*

<sup>14</sup>Ma ma uvaryaruna vompon mai siretin ayave ameno vara uvaryia raumpo se sikhafana an mi yakhen nái siretin afova vaya siameno van muno. <sup>15</sup>\*Tiyan míkan tauseni (10,000) vanta ano ma Yisas Karaisini vaya ma siamiyain kéká pinté mana anon tiretin afóen an dé iyan mino. Para vara seyo, séi ma Tiyarafenui kama vaya siretin tiamiyaruna mai Yisas Karaisimpin tiretin afóen an mi yakhé tiretin naren tiámé uno. <sup>16</sup>\*Máan tukhái sen tan deya se ma variyaruna avúavá ánaín bákurono van mi siretin tiamiyá uno. <sup>17</sup>\*Mai van mi siretin ayainti séi ma variyaruna avúavá barano van mi Timotin tiantékun tireti vaonafá oriyan mino. Para vara seyo, véi anon te sikhá an dakhen Bafantá kamaen monó tiantiyái véin nan tinunu ukhé uno. Inte avúavá kasá Yisas Karaisini vaya minó akhempá ma vain nanin bantafin afova amiya rafu mai vayan béis siaminten mino.

<sup>18</sup>Téi afová ukhékun manáa kéká ano séin nan ída ovaránen e so-nantí uno siren betí ankan ma variyain avúavá san betiyan amo siyan mino. <sup>19</sup>Amo siyan mifo

Bafan mano séin nan orino van ma anunu intí téi ma oréku mae mai ma vetíi avúaváká ma ve amo siyáken kákán baya siyain kayo ano mai fura sen ná Tiyarafenui ákona ano vetimpin baná ban nafi mai o onanté uno. <sup>20</sup>\*Mai fara vara seyo, Tiyarafenui Yafisin pintena vaya ana ma siyain mano ída kanaí inten mifo Tiyarafenui ákona vasá báken dorano. <sup>21</sup>Tiretí ankan nái yanásá ino vará iya fono. Téin nan tiretin mo uman amiyáken asino va rafono, áa vempáké kamaen avábá uantano vará iniya rafono.

## 5

### *Namu Avúavá Ma Variyain Banta Ma Monó Pinte Yo Siantan Baya Ino*

<sup>1</sup>\*Ída monó inin kéká ano ída variyain pamúku avúavá ma siretí ankampin afoká iyain nan téin me sisimí uman dé iné uno. Tiretí ankaní monó pinté mana vanta ano ve afóen aná bá aau variyan mino sen tisimikhen mino. <sup>2</sup>Mai fará tireti ankan au khákán mana iyákeyá ída arunaná mádeyá ayave van iya rafono. Tiretíi monó pintena mai vanta fará ída yo siantiya rafono.

<sup>3</sup>\*Téi siretí ankaní yan bukhafafin ída vá umpo sretíi aunampin mi vá uno. Máan tukhái séi ena ena siretin má bái mai vanta ano ma varein avúavá inka feffá dainté uno. <sup>4</sup>Tetisi Bafan Yisasín avíká ma sretíi ankan átaru esí maé tesí inímpin tiretin má báken inká tetisi Bafan Yisasini ákona ano ma sretin má ena ena vaintasá <sup>5</sup>\*mai vanta monó pintena yo avían Ban Anon ayampin amesin ná beni ume vukhafa namu uvintin baré intin ná Bafan ma erin nain damusá Tiyarafenu ano véini aunan evaránen avirano.

\* 4:15: Kar 4:19   \* 4:16: Fir 3:17   \* 4:17: Apo 19:22   \* 4:20: 1Ko 2:4   \* 5:1: Riv 18:7-8; Diu 22:30   \* 5:3: Kor 2:5   \* 5:5: 1Ti 1:20   \* 5:6: Kar 5:9

6 \*Tiretí aví anan daní iya vákeyá mai ma namu avúavasí iyain ifá en nan para oriyan ban mino. Mai avúavá ma áesin ma mana ano varen oriyan baré intín maen mai ano minópin orera inten mifo saretí ídá afová ukhe rafono.

7 \*Mai ma namu avúavasí iyain banta yo siantáde vá kama e vano. Mai fara vara seyo, Yisas Karaisi anon avo uantan dunan ma nan sipisipi arará an daven tetintá ákonte ukhen mino. 8 \*Máan tukhein nará erí tetí ankan ída vá pefá ma omáká niyá ein bereti an dé namu avúavasí iyáké ída yisi vain bereti ma niyá ein an desá kamaen ma funtákein avúavá ana vá bará tifano. 9 Pamúku avúavasí ma iyain nanin banta vá tireti ankan ída vá manafin banon tiré téi gefá bompon uvaman amikharé uno. 10 Barará nanin banta ano ma famúku avúavá bariyan ma ena ina yana san aran naren umoyan bariyan ma inká kampun ayarafenurá monó tiyan ma iyain mai kéká ampeno vara siamiya rauno. Ída ino. Máan nanin banta ma me ampeno vará mai fura se ma vara vasá me ampeno. 11 \*Taréa ma séi vompon uvaman tiretí ankan ma amiyaruna mai mana vanta ano ma saretin má monópin bá uno siren ma famúku avúavá baren ma ena ina yana san aran nen ma kampun ayarafenurá monó ten ma ena oyampá baya sen ma inká ákona non naren óen en ma kampun avúavá póké ena vanta ina yaná umoyan baren ma iyain mai vanta vá manafin ída vákeyá yunan nano van muno.

12 Ída ma monópin bain kéká ma yaimin mai senti yoran naino. Ída ino. Monópin ma vain kéká ma yaimin mai setisi yoran mino. 13 \*Monó ma ída inin afokhampin ma vain nanin bantan Tiyarafenu

ano yaimintéin maen mai van Tiyarafenui vompon dóki ano máa sikhen mino. "Namu vanta ma saretin aúbaná bain ná do siantaro." Diu 17:7; 19:19; 21:21; 22:21, 24; 24:7

## 6

### *Monópin Bain Kéká Ma Avían Kópin Kain Baya Ino*

1 Monópin bain kéká bá ma aruve asive uareya mai uman monópin ma vain kaylorá desin puntaran nain nan pará kópin puntarano van betin avire oré iya fono. 2 \*Manáa yamú dákó intí ma setí monópin baruna kéká ano ma ma vara ráke nanin bantai avúavá ma yaídé afová ó tifanuna saretí ankan ída afová ukhe fono. Ínaiimpáké barará nanin bantai avúavá daimin nompo sareá ma sitó uman kayo ma vain kanaí eyá eyantá mai uman kayo ará amin aa fáké daiman onante fono.

3 Enisori kayo ano ma yoriyá ein avúavá ma ínaiimpáké tetí monópin ma varuna nanin banta ano ma yaídé afová ótifanuna mai saretí ída afová ukhe fono. Afová ma ukhanteya ma varará ma sitó uman kayo vain mai kasae vá eyantá daiman onano. 4 Máan tukhanti monópin ma vaona kayo aúbaná ma uman bantia mai fará tiretiyantá mai uman ída funtaranonaí iyá baru kópin baré oré iya rafono.

5 Tiretí mumunan ma iyaona kayo aúbanápin ídá kama ineine vá bain kéká báken ná mai uman kayo funtaran naini iya rafono. Tiretí ankan ma kópin bare oriyaona avúava san mi ayave ono van ma vaya siamiyá uno. 6 Monópin ma vain banta ma avireya afokhampin ma vain kéká avorá ma mo kó tiantiya ona van mi sakha iyá uno.

\* 5:7: Ais 53:7; 1Pi 1:19    \* 5:8: Diu 16:3  
17:7    \* 6:2: Rev 20:4

\* 5:11: 2Te 3:6; Tai 3:10    \* 5:13: Diu 13:5;

<sup>7</sup> Monópin ma van nain kéká bá ma aruve asive urante mai inka ayave manta ompo ída vá mai uman bare kópin oriyákeya saretí ará ana vá ameno. <sup>8</sup> Ída ma máon tinten mae mai sretiyan mi namu avúavasí eya monópin ma vain kéká kampun tire avire kópin oriya ono.

### *Ída Ma Famúku Avúavá Ma Variyain Baya Ino*

<sup>9</sup> \*Namu avúavá ma variyá ein kéká ano Tiyarafenu Yafisimpin ída ódinten mifo mai ída afová ukhe rafono. Pamúku avúavasí ma en noin kéká safi varará danáká ma monó tiantan nafi ena ana safi ena avafun nafi ma varen non má inká banta kéká safo ain iyampon kéká safo ma nókeya ena vanta ano famúkuí uantano vará iya rafo inká banta ano vanta vá ábasuí iya rafo <sup>10</sup> aá ena ina yanasinta umoyaní in kéká safo inká kokhon ona vantí bano van anunu in kéká safo áa óen non nan kéká safo áa ena namu vaya sen asin kéká safo áa kampun tiriyá ena ina yaná baré no rafo mai kayo ano ída kanaíeya Tiyarafenu Yafisimpin ódin nono.

<sup>11</sup> \*Tiyarafenurá ma ída mumunan ukheya gefá manáa ano mai avúavá sintu variyare ompo sareá Tiyarafenu ano mai ume kayo sesé uantáden maman beinaíi uraya va ono. Mai ma Bafan Yisas Karaisi ano ma varein avúavá san má inká Tiyarafenu Kantá Aunán mano setin túpin ákoná yorarí iyaintá bái Tiyarafenu ano sretin nan puntákein nanin banta e sen ariyan mino.

### *Bantai Au Vukhafa Mai Kantá Aunan Amá Ino*

<sup>12</sup> \*Tireti ankan kasaé minó danasinta varanté uno sin nompo mai yanasinta finté manáa yaná ano ída ayainten mino. Minó

danasinta séi kasaé baranté umpo ída vá mai yanasinta ano sentá dafisino. <sup>13</sup> \*Dunan ma vain mai sirápin mi nékun aravé iyan maen tirá ma vain mai yunan báin mi van minon manáa ano séiya mifo ínaimpáké Tiyarafenu ano mai ma anunu in avúavá do varanten mino. Máon tintéin mi famúku avúavasí ino vara setin tu vukhafa uvamádon ban naino. Ída ino. Bafani yorarí ino van mi su vukhafa uvamádon ban mi Bafan mano setin turá dafisiyan mino. <sup>14</sup> \*Tiyarafenu ano ma setisi Bafan pükáin ma masí pinte orun avían manteiní en mi vei ákoná fóké tetin tu vukhafa masí pinte evaránen tivían mantanten mino. <sup>15</sup> \*Tireti ankan au vukhafa ano ma Yisas Karaisini mana mana vukhafa vain mai ída afová ukhe rafono. Mana vantai au vukhafa ano Yisas Karaisin niná ma vantin maen bái kasaen ná mai vukhafa fóké pamúku avúavasí inten nafino. Ída uron mino.

<sup>16</sup> \*Mana vanta ano ma mana nanin pamúkuí uantanten mai míkan nan mano mana yukhafaií inten mino ma sikhein ída afová ukhe rafono. Mai fara vara seyo, Tiyarafenu vompon dóki ano sikhen mino. “Míkanan mano maman mana vukhafaií é iyan mino.”

*Esé 2:24*

<sup>17</sup> \*Máon tiyan mifo Bafantá ma súpa ukhein kayo ano aunampin bén má maman manafiní ukhen mino.

<sup>18</sup> Pamúkuí ma in ume finté me ampire vá karan orono. Ena ume kayo ano ída aú bukhafa ano ma umeí einí iyan mino. Para vara seyo, famúku ume ano aú pintéi yákó iyan mino. <sup>19</sup> Tireti ankan aú ma vain mai Kantá Aunani kákán monó namun mi vákan Tiyarafenu anon Kantá Aunán tiretin amikhan maifin ban mifo ída afová ukhe rafono. Tireti

\* **6:9:** Kar 5:19-21; Efe 5:5; Rev 22:15    \* **6:11:** Tai 3:3-7    \* **6:12:** 1Ko 10:23    \* **6:13:** 1Te 4:3-5    \* **6:14:** Rom 8:11; 1Ko 15:20; 2Ko 4:14    \* **6:15:** Efe 5:30    \* **6:16:** Mat 19:5    \* **6:17:** Yon 17:21-23; Rom 8:9-11    \* **6:20:** 1Ko 7:23; 1Pi 1:18-19

ankan ída saretí inan ba ompo Tiyarafenu ina ono. <sup>20</sup> \*Para vara seyo, Tiyarafenu anon esantakhein miyan pókéi saretin miyaní uádaya va ompo saretíi au vukhafa fókesá beni yorarí iyákeya véin aví ana vá daní ono.

## 7

### *Ábasuí Ma Iní Afova Vaya Ino*

<sup>1</sup> Tiretí ankan ma vompompin ina ukharé eona mai vaya anan taréa siamenté uno. Banta ano ma ída anasi varano sinte mae mai kaman inono. <sup>2</sup> Máan tñ nompo famúku avúavá ano mo kákani iyái mai van banta ano anasi varantin ná inká anasi ano vanta varantin ná ino van mi siyá uno. <sup>3</sup> Banta au ma vain mai anasi inan ban mifo ída vá pákaon ákona intin inká anasi ano máan mana en be au ma vain mai vanta inan ban mifo ída vá pákaon ákona ino. <sup>4</sup> Be aná ano ve au ampián be avafun amintin ná inká be avafun má dere máan mana vá ino. <sup>5</sup> Banta vá anasi vá ma manafin bákeya vanasií iyare ma manáa afará pa váké timúkintó uno sire ará manafin ure ma varé inte vá aine vá evaráne vanasiín avúavá maman kaono. Para vara seyo, ábasuí ma ukhein kéká ano ma aui anunurá ída yafisintin maen Ban Anon mano akhenóka inten mino. <sup>6</sup> Tesi ineinefin ma vain bayan tamiyá umps vanasiín avúavasá are uantiya rauno. Ída ino. <sup>7</sup> Minó banta ano sen tan den ída anasi varan para vano sé inikhé umps minó ano ída manáí ukhé tiféuno. Tiyarafenu ano ábasuí ma in amusin manáa kéká amiyan inká ena kéká ída ábasuí in para ma van amusin amiyan ukhen mino.

<sup>8</sup> Máan tukhái ída anasi varan ma inká banta ída varan ma ukhein kéká bá kentosi ma ukhein kéká ba san mi siyá uno. Téin tan den ma ída ábasuén para

ma van mai kama ukhen mino. <sup>9</sup> \*Máan tukhái mifo manáa ano ma vanasiín in anunurá ma ída kanaíen dafisirí intin maen kasaen betí ankan ábasuí inten mino. Para vara seyo, vanta varantin ma inká anasi varantin ma inain avúavá anon pamúku avúavá san ída ará mantanten mino.

<sup>10</sup> \*Máan tukhái mai ma ábasuí ukheona kéka san mi Bafan mano ákona vaya sikhái mai vayan tamiyá umps sesi vaya vaino. Ída ino. Banta aná ano ída vá be aná me ifá ino. <sup>11</sup> Máan tinten mifo anasi ano ma ve avafun me ifá inten maen mai ena vanta ída vá o variyáken ná evaránen be avafu vaipá orintin ná be avafu ano ída vá be aná ifá ino.

<sup>12</sup> Taréa manáa kayofin mi siádanté uno. Mana monópin ma van nain banta ano ma ída monópin bain nanin ma mantaré intin ma ven má bano van inikhantin maen ída vá mai nanin ifá uantano. Bafan mano va ma man baya sian naifo seyantai siyá uno. <sup>13</sup> Inká monópin ma van nain nanin mano ma ída monópin bain banta ma mantaré intin ma ven má bano van inikhantin maen ída vá mai vanta ifá uantano. <sup>14</sup> Mai fara vara seyo, ída ma mumunan iyain banta ano ve anái mumunantai kantasí ukhan inká ída ma mumunan iyain nanin mano ve avafuni mumunantai kantasí iyan mino. Ída ma máan tesin maen tiretí ankan akhafana ano ída kantasien pain má banten mifo mai avúavá ma varesin mi Tiyarafenu avorá kantasí inten mino.

<sup>15</sup> \*(Máan tinten mifo ída ma monópin ban nain nanin banta ano ma ve avafun nafi inká be ana safi ma ifá uantanti mae mai áesin ná orino. Ída mumunan in nanin banta ano mumunan nanin banta vá manafin ída vanten mino. Mai fara vara seyo, ará kusin má bano van mi Tiyarafenu

\* **7:9:** 1Ti 5:14    \* **7:10:** Mat 5:32; 19:9; Mak 10:11; Ruk 16:18    \* **7:15:** Rom 14:19    \* **7:16:** 1Pi 3:1

ano ve akhafana arakhen mino.)  
 16 \*Anasi kayo oe, afovasá ono. Tireti ma mumunan ukhesin ma vanta kayo ano onanten maen mai ano kasaen ayaintin ará baeranten mino. Inká banta kayo oe, afovasá ono. Tireti ma mumunan ukhesin ma anasi kayo ano onanten maen mai ano kasaen ayaintin ará baeranten mino.

*Intéa Avúavá Kasá Banan Ná  
 Tiyarafenu Arákaya Mumunan  
 Ukháré Intefo Mai Avúavákasá  
 Bano*

17 Tiyarafenu ano ma araádaren intéa varurasá kainten nafi mai van eyo sire vá mai ma esé ákona uan mantanona rasá ba oriya vano. Minó akhempá mai man baya anan monó nanin bantafin tiamiyá uno. 18 Pefá ma ída mumunan ukhen au khakharein banta ano ída kanaíen ída ma au khakhein banta an danten mino. Inká ída ma au khakhen mumunan uvin nain banta ano ída vá au kha ino. 19 \*Mai fara vara seyo, au khain avúavá safi inká ída ma au khain avúavá safi mai sító daná ifo Tiyarafenu man baya ánain ma vákurin manon kákán danasí ukhen mino.

20 Intéa avúavá kasá banan ná Tiyarafenu ano arákayá mumunan ukharé intefo mai avúavákasá béin má kase vano. 21 Éi ma miyan ída varan doran banta váesin ma mai fintená Bafan mano arakhanti mae mai véi anon umei ákona finté utúanten mifo vá afovasá ono. Miyan baran doran banta váesin ma Bafan mano arakhantiya mai saréa veni miyan ída varan doran bantaí e ono. 22 Tiyarafenu ano esantakhein miyan pókéi siren miyaní uádaya va ompo ída vá barará avúavái miyan ída

van doran bantáí ono. 24 Máan tukhein nan mi mumunan tifá tiváeyan noe, intéa avúavákasá banan ná Tiyarafenu ano arákayá mumunan ukharé inte fo mai avúavákasá béin má kase vano.

*Ída Ma Ábasuí Ukhein Kékái  
 Vaya Ino*

25 Máan tukhantí ída ma ábusuí in kayoi afova vayan tiamenté uno. Bafan mano ída mana ákona vaya sisimikharé intí tiamenté umpo véi ma sen afová ukhá beni arunaná áupin ma fura sé baruna vanta anon man baya siamiyá uno. 26 Taréa ma ara ara uman afoká iyain mai van mi mai ma vaona avúavákasá para vano van tiamiyá uno. 27 Taréa ma ábasuí ukhanteya ída vá durafurono van ono. Ábasuí ma ída ukhanteya mai ída vá ábasuí ono van en nono. 28 Máan tin nompo ábasuí ma ukhanteya maifin ída umei ukha ono. Ínka arinta ano ma vanta varanten mai ída umei inten mino. Ábasuí ma uvintin kokhon uman afoká intéi aurá dafiseno van mi ma vaya siyá uno.

29 Mumunan tiyofi sifá tiváeyan noe, yamú inka asíka ukhái séi ma vaya siamenté uno. Tare rákesá anasi ma mantan nain banta kéká ano ída vá áintin ábasuí in avúavá ano vetíi vampin kákán danasí ino. 30 Amusin mano fi arunaná ano fi ona vará o afasí inten nafi mai ano ída vá áintin Tiyarafenu yorantá aa iyarano. 31 \*Mai ma vara ráke yanásinta ma varen aruven iyain kéká ano ída vá mai yanáká ákona inin kaiyáken kama aasákesá baren aruven ino. Para vara seyo, minó ma varafin ma vain danasinta ano mo kípanten mino.

32 Minó avúavá ma variyanteya mai ineine ampesin eravino van munó. Anasi ma ída mantan nain banta ano inté uresá Bafan amusin amente rafu siren beni

\* 7:19: Rom 2:25; Kar 5:6; 6:15    \* 7:22: Frm 16; 1Pi 2:16    \* 7:31: 1Yn 2:17

yorarí ana ono van é iyan mino.  
<sup>33</sup> Mai avúavá anasi avafu ano ída kama uren baré iyan mifo mai ma ve aná amusin ameno yan ma iyain ineine anon <sup>34</sup> beni kama ineine máden daimiyan mino.

Máan mana en mi kentó nanin kayo vá inká arinta kayo vá ano fura sen be áu bá aman má Bafan amiren beni yorarí ono van é iyan mino. Máan tiyákan banta ma mantein nanin mano ma vara ráke yanáká inin kaúden mai intesá uré te sivafun amusin uantante rafu siren kokhon ineine é iyan mino. <sup>35</sup> Máan tukhái ma vaya ma siamiyaruna mai sireti ankan kama e vano van mi siyá umpo sretin na mai yanáká are uantiya rauno. Ída ino. Kama e vákeya intesá esin ná ayainti Bafani yorarí inte fo mai avúaváká dafibeya yorano van mi siyá uno.

<sup>36</sup> Mana vanta ma arinta amikhantin mai vanta ano ma ayáká báken ída ákonten be aurá dafisirí ukhantin maen kasaen ná mai ma amikhá ein arinta varano. Maifin ída ume vantén mino. <sup>37</sup> Máan tinten mifo mana vanta ma ena ano ída siamintin ma vei anunu ángan dakhafen mai ma amikhá ein arinta van ída varan kasaé banté uno siren ma ve aurá dafíán ákona inten maen mai yere kama ukhen mino. <sup>38</sup> Máan tukhantin ábasuí ma ukhen ban mano kama ukhen mifo inká ída ma ábasuí in mai anon moéken kama ukhen mino.

<sup>39</sup> \*Mana nanin ma ve avafu ída furin para vartin maen ída ena vanta varanten mifo ve avafu ma fúbintin ena vanta ma varano van inten mai Bafantá ma mumunan ukhan nain banta vá barano. <sup>40</sup> Máan tukhen mifo se ma inikheruna mai nanin mano ma ída ena vanta varan para ma van mi kama ukhen mino. Téi ma iniyaruna ma vaya kayo Kanta Aunani ineinerái siyá uno.

## 8

*Namu Yanasintará Ma Ákontaktein  
Bayá Ino*

<sup>1</sup> \*Namu yaná baimpin ne siré ma yunan pon unadé ákonté iyaruna fákena vaya ino. Kákan afova ma manté tiferuna van mi su khákón iyá tifé umpo ena ma ará amin avúavá anon monópin ma vain nanin banta ará ákona uanté iyan mino. <sup>2</sup> \*Mana vanta ano ma siyáken minó danái ana afová ukhé uno ma siyain mai ída fura sen afova ukhen mino. <sup>3</sup> Máan tukhen mifo Tiyarafenu van ma anunu é iyain nanin bantan Tiyarafenu ano afová ukhen mi vetintá dafisé iyan mino.

<sup>4</sup> \*Máan tukhen mifo namu yanáká ma ákonte uran dunan pontá mai náiesá tétfante rafuno. Mai fura ino setí ankan afová ukhékun ída ena ayarafenu vákan mana Tiyarafenu máan báé iyan mino. <sup>5</sup> Mai fara vara seyo, manáa ano ma iniyain mano ma varará kokhon ayarafenu vákan inká inarufá deren kokhon ayarafenu van ne sé iyan mino.

<sup>6</sup> \*Máa sé iyan mifo setí ankan ma inikheruna mai seti Sifóe mana Tiyarafenu anan báken béis anon minó daná afoká uráken béis dafiká bá uno sé iniyá tiféuno. Máan tukhen mana Bafan ma Yisas Karaisi vain mai véin pintéi ara ara yaná afoká ukhan béis anon tetin taunan timikhá bá tiféuno.

<sup>7</sup> Máan tukhékun maen minó monópin ma vain nanin banta ano ana va mai yaná afová ukhen naino. Ída ino. Manáa ano fura ayarafenurái monó tiyá uno siren mai ma ákonté uran dunan pon niyaré íkan mai avúavá anon betíi in-eine mo asuse ukhen mino. <sup>8</sup> Máan tukhen mifo ara ara yunan ma nan avúavá ano ída siván Tiyarafenun ádá mo khainten mino. Dunan ma suraré bá tifanuna van ída mana

\* 7:39: Rom 7:2-3    \* 8:1: Apo 15:29    \* 8:2: Kar 6:3    \* 8:4: Diu 4:39; 6:4; Kar 4:8  
 \* 8:6: Efe 4:5, 6

yaná o afeyorantin inká dunan ma nanuna finté ída mana kama yaná o vará tifanté uno.

<sup>9</sup> \*Máan tonté tifé umpo sireti ankan ma nan daná ino sire kasae nan nona ano monópin ma ída ákona van bain kékái ineine madre asuse uresin eraven ankamin nafo yafían ná ákona ono.

<sup>10</sup> Mai fara vara seyo, ída ákona van ma monópin báken aurakhá ein nanin banta anon oniyantiya kampun ayarafenui monó namumpin nan nono. Máan ma inona anon betin ará mantaantesin mai ma kampun ayarafenurá aurakhá ein dunan pon naren eraven ankaminten mino. <sup>11</sup> \*Máan ma inona avúavá anon mai ma ída monópin ákona ukhein kéká aya ono van ma Yisas Karaisi e fúkein mai kékái ei afova fóké máden asuse inono. <sup>12</sup> Máan tesin ma monópin ída ákona ukhein kéká ano ma eni namu avúaváká ma umeí intiya mai Yisas Karaisin má deren umeí uantan nono. <sup>13</sup> \*Mai van mi séi ma nanuna yunan pon mano ma monópin ma ída ákona ukhein kéká mamádantin eraven ankamoren ma ukhantí maé mai séi ída evaráné mai yunan nanté uno. Mai fara seyo mai ma monópin ída ákona ukhein kéká ída mamádékun eraven ankamino van muno.

## 9

### Aposeri Kayo Ano Vetú Yorantá Ma Miyan Baran Baya Ino

<sup>1</sup> \*Téi mai manáa kéká an dé monópin kama erá ba rafuno. Téi ída Yisas Karaisini vaya varen orin bantá\* ba rafuno. Te suu fóké ída tetisi Bafan Yisasin onte rafuno. Téi ma ákona yorarí iyaruna rasá tireti ankan Bafantá mumunan iya rafono. <sup>2</sup> \*Ena kéká ano séin nan ída aposeri e siyan mifo sireti

ankan afová en ná téi aposerin bá uno. Para vara seyo, sireti ma fura mumunan má ma vanteya mai séi nan Bafani aposerin ban mino sin nono.

<sup>3</sup> Téimpin ma aposeri yorarí in ákona váká ma yoriyaruna van ma yaimiyain kékái evaráné tiamiyá uno. <sup>4</sup> \*Kasaerá tireti ankan amápin bariyá tiretin má manafin dunan ná non má nan tifante rafuno. <sup>5</sup> Ena aposeri kayo vá Bafan Yisasin afá kéká bá inká Pitan má an derá kasaé monópin ma vain nanin avígré monó dorarí é nonte rafuno. <sup>6</sup> Áo Banabasi rasan mano aná moní baran dorarí urerá mai yoran aya onte rafuno.

<sup>7</sup> Aruvín banta ano kasaen ná beyan dunan dosiren nariyan ná para yoranten nafino. Inká dunan ma yoran banta ano yunan mana yoriyan báken mai finté ída manáa unáden nanten nafino. Inká sipisipirá ma yafisin banta ano fara aná dafisiyan báken ída nan anu kháden nanten nafino. <sup>8</sup> Tiayarafenui man baya ano ída mai van tikhará bantai ineine finté tiya rafuno. <sup>9</sup> \*Mai fara vara seyo, Mosesini man baya ano máa siyáken, “Kao ano ma uviti áitán do siviyáken ma yunan niyanti ída vá así ono,” sikhen mino. Diu 25:4 Tireti ankan ma ininyaona Tiayarafenu ano kao van maná tiyan nafino. <sup>10</sup> \*Mai ma siyain mai seti Tiayarafenui yoran nanin banta kayo va san má deré tiyan nafino. Eyo. Mai setin ma san nan mi siyan mino. Dunan ma yoran banta ano yunan ma yuyasiyáké mai fintena manáa naanté unon té iyan mino. Máan manae vá monó dorarí ma iyain kéká ano ma mo aya iyanti vá anona vetin ná aya ono. <sup>11</sup> \*Tireti ankampin monó baya fókéi yanayun mafafaseiní

\* **8:9:** Rom 14:13-15; Kar 5:13    \* **8:11:** Rom 14:15, 20    \* **8:13:** Rom 14:21    \* **9:1:** Apo 22:17-18; 26:16; 1Ko 15:8-9    \* **9:1:** Yisas Karaisini vaya varen orin banta e ma siyain mai aposeri van mino.    \* **9:2:** 2Ko 3:2-3    \* **9:4:** Ruk 10:8    \* **9:9:** 1Ti 5:18    \* **9:10:** 2Ti 2:6  
\* **9:11:** Rom 15:27

urékun ban mifo yunan má tuí daná ba san ma inantiyá tiferuna mai siretempin ída kanaí ukhayá anona ída inan tiya iya rafono. <sup>12</sup> \*Ena kéká ano ma monó baya siretin me siamiyain nan ma vetin aya iyaona mai setin má dere ída moéke siya inte fono.

Máon tiyaré Yisas Karaisini kama vaya ma oriyain aa iyaranuna van mi sireti vaonafá tiya ono van ída ina iyá tiféuno. <sup>13</sup> \*Kákán monó namumpin ma yafikein kéká ano maifin ma varen eriyain dunan ma né iyain ída afová ukhe rafono. Íkun uan amin dunan antan ma maifin doriyain kéká ano ma varen mo né iyain mai vá deré ída afová ukhe rafono. <sup>14</sup> \*Máon mana en mi mai ma kama vaya varen mo siamiyain kéká ano mai aa sákéi aya variyan mifo mai ma mo siamin nain kéká ano vá anona vetin aya ono sen Bafan mano ákona vaya sikhen mino.

<sup>15</sup> Máon tukhen mifo séin tiya ino van ída uron mi ina iyaré umpsaréa séin araíe siya ono vara siamiya rauno. Ída ino. Téi ma simusin pinté monó baya vanasi sian amiyarunará miyan timeno vara ma vompon uvariya rauno. Ída ino. Te ma yoré oriyaruna yorantá ma miyan inantiré baranté maé mai sesi yoran aa iyaranté paséi mai aésirá téi furono. <sup>16</sup> \*Mai fara vara seyo, Yisasini kama vaya ma siamintá ída su khakan onté uno. Tiyarafenu ano séin tútúpein nan mi siyá umpsída ma siamenté mai séi uman mi varanté uno. <sup>17</sup> Tesi sinunu finté ma mai avúavá bariyá maé mairá beni miyan baranté umpsída mai ída sesi sinunurái variyá uno. Tiyarafenu anon téin aní urem airo ananí urá

báké beni yoran bariyá uno. <sup>18</sup> Téi nái miyan ná bariya rafuno. Monó baya ma sian amiyarunará ma miyan bararen mifo mai vanasi ma kama vaya sian amiyaruna van mi simusin manan iyá uno.

#### *Pori Mai Minó Nanin Bantai Yoran Banta Ino*

<sup>19</sup> Téin ída mana nanin banta ano miyan timiyantí pasé betíi vaya ída inenté umpsí minó nanin bantai yoran banta vakesá mai aa sáké banasi o aviádékun ná Yisas Karaisintá mumunan ino. <sup>20</sup> \*Yutan kayo vá ma vákesá betí ankan ma variyain avúavá pókesá o aviádékun ná Yisas Karaisintá mumunan ino. Yutan kayoi man baya ma yakhafiyan kéká bá ma vakesá mai séi ída mai man bayai aránaópá bá umpsí veti ma variyain avúavá pókesá o aviádékun ná Yisas Karaisintá mumunan ino. <sup>21</sup> Yutan kayoi man baya ma ída afová ukhein kéká bá ma váké mai vetin an dakhéi mai aa sáké betí ankan o aviádékun Yisas Karaisintá mumunan iyan mino. Máon ma iyaruna anon Tiyarafenu man baya ída yo variyá umpsí Yisas Karaisi ma me yóan kanaí ein man baya aránaói vá uno. <sup>22</sup> \*Mumunan ma ída ákona ukhein kéká bá ma váké betí an dakhé mai aa sákéi vetin o aviádékun Yisas Karaisintá mumunan iyan mino. Minó kéká ano ma kasaen mumunan oren aa sákéi o aviádékun Yisas Karaisintá mumunan iyan mino. <sup>23</sup> Yisas Karaisini kama vaya ano orera ino van mi yoriyákun mi maifin beni avábá ano simusin timiyá doriyá uno.

#### *Íú Tirem Ma Uviní In Baya Ino*

<sup>24</sup> Kokhon mano ma sava iyare ein pinté mana anoi minó esantaren miyan baré iyan mifo afivasá ono. Tiretí ankan má dere mai avúaváká teya sava

\* 9:12: Apo 20:34; 2Ko 11:9  
20:9      \* 9:20: Apo 21:20-26

\* 9:13: Diu 18:1-3  
\* 9:22: 2Ko 11:29

\* 9:14: Mat 10:10; Kar 6:6      \* 9:16: Yer  
\* 9:25: Fir 3:14; 2Ti 2:4-5; 4:7-8

iyare vá esantare miyan barano.  
<sup>25</sup>\* Ara ara íú ma siyain kéká ano yafiben baren mi íú tiren minó ma esantarein mano ainen mo kípan miyan mi varé iyan mifo ída kípan miyan nan mi seti yoriyá tiféuno. <sup>26</sup>Mai van mi savifá mo yáan dana siréi mesan ma mo kípan akhen ma vain mi kakhá áké tava iyá uno. Mai ma ayan dámaná ma aruviyain banta ano ma ayan tavifá karúdein nisa iya rauno. Ída ino. <sup>27</sup>\*Ena nanin banta ana monó bayá siamé oriyaré ida miyan baranae siré teyan dafibéi ákona maman one one iyá uno.

## 10

### *Kampun Ayarafenurá Ma Monó Tiyain Baya Ino*

<sup>1</sup>\*Mumunan tiyofi sifá tiváeyan noe, sretí ankan ída mo áunono van muno. Pefá kámá barafá Tiyarafenu ano konan dákan tetin tináuyan an uanten oriyákan inká non aúbaná pe uantáden mairá betin avían ena ufá kádakkharen mino. <sup>2</sup>Mosesin ma yakhafen orein kéká minó ano konan má un nompin má monó non péken mino. <sup>3</sup>\*Inká minó ano enará ukhein avúavápó ma afoká uádan dunan nen mino. <sup>4</sup>\*Inká minó ano enará ukhein avúavápó ma afoká uádan non nen mino. Mai fara vara seyo, enará ukhein onámaná anon betin má oriyákan mai finten non nein baréin mai onámaná Yisas Karaisi ino. <sup>5</sup>\*Tiyarafenu ano ma avireni oriyáken maen betí ankan pinté ma kokhon mano variyain avúavá san ída amusin ureni pasen kámá barafá aruren asuse en mino.

<sup>6</sup>\*Betí ankan ma variyaré einí ukhein avúavá baranuna van mi Tiyarafenu ano fe o útúben mi setin aní ukhen mino.

7 Tiretí ankan ída vá manáq kéká an deya kampun ayarafenurá monó tiantano. Para vara seyo, Tiyarafenui vompon dóki ano máq sikhen mino. “Banasi ano omá dunan má non má niyáken pamúku avúavasien iyaren mino.”

*Eks 32:6*

<sup>8</sup>\*Manáá kéká an deya ída vá pamúku avúavasí ono. Máan tiyaren tuenti-tri tauseni (23,000) ano maná damú ana furein mino.

<sup>9</sup>\*Inká mai kéká ano ma Bafan akhenóka uan oniyaré in ma osafáe ano untádan purein mifo vá betí ankan an ída vá dano.

<sup>10</sup>\*Manáá kéká ano ma aveantumpin bayá siyaré ein an ída vá dano. Para vara seyo, mai avúavá san mi vetin aren asuse ino van Tiyarafenu ano vanta ma aruan purin enisori siantan erein mino.

<sup>11</sup>Mai avúavá sintá ma vetin amaniná ma afoká ukhein manon tetin aní ukhen mino. Ma vara ma mo kípan akhempá ma vá tiferuna nanin banta ano afova varano van mi Tiyarafenui vompon dökifin uvamádan baréin mai inka afoká ukhen mino. <sup>12</sup>Tiretí ankan mantaan ákona ukhé uno sireya aniana iyare mai avúavápín tiretin má dere erave ankamin nampo yañan ná ákona ono.

<sup>13</sup>Mai avúavá tiretin amaniná dáko inten mifofefá ma varé ein kéká ano mai ma variyona akhenókafin orikhen mifo afovasá ono. Mai akhenóka kayo ano siretin maman bararasí uranti ída mantaan ákona inae siren Tiyarafenu ano vei yorarién ída áin mai akhenóka ano moéken kákán iyan mino. Tiretimpin ma akhenóka erintin maen béisaa yosirantiya sireti akhen uvesin mai akhenóka ano siretin ída maman bararasí inten mino.

### *Kampun Ayarafenun Ma Íkun Uan Amin Má Bafani Yunan Nan*

\* **9:27:** Rom 8:13; 13:14 \* **10:1:** Eks 13:21-22; 14:22-29 \* **10:3:** Eks 16:35 \* **10:4:** Eks 17:6; Nam 20:11 \* **10:5:** Nam 14:29-30 \* **10:6:** Nam 11:4, 34; 1Ko 10:11 \* **10:8:** Nam 25:1-9 \* **10:9:** Nam 21:5-6 \* **10:10:** Nam 16:41-49

*Avúavá Bá Baya Ino*

<sup>14</sup> Mágan tukhen mifo séi ma sinunu úkheruna sirona kéká soe, kampun ayarafenurá ma monó tiantan avúavá sará péde nentasá bano. <sup>15</sup> Tiretí ankan kama inín má bain nanin banta ompo vá téi ma sian amiyaruna vaya mai furá tiya rafu sireti yantasá daídeya afová ono. <sup>16</sup>\*Bafani yungan kain takhoká ma kápi fintena uvaini non niyá tiferuna anon Yisas Karaisini nare vái manafin kasé bá tiféuno. Inká bereti ma kisiré niyá tiferuna anon Yisas Karaisini au vái manafin kasé bá tiféuno. <sup>17</sup>\*Mágan tukhein nan mi mana vereti finté ma kisiré niyá tiferuna anon mai setí ankan mana vukhafan bá tiféunk mai anon aní iyan mino. <sup>18</sup>\*Isarerí kéká ano ma íkun uan amiyáken ma mai fintena varen mo niyaré ein avúavá anon Tiyarafenu vá manafiní iyaren mifo ovare vá me ineno.

<sup>19</sup>\*Nái yana sará téi siamiya rafuno. Mai ma kampun ayarafenu kaylorá ma monó ten noin kéká ano ma fura ayarafenu kayon bá uno siren ma íkun uan amiyain mai kákán danasá bará tiya rafuno. <sup>20</sup>\*Ída uron mino. Tiyarafenu rasa íkun uan amiyán naifo mai namu aunantái íkun uan amiyai saretí ankan má mai namu aunantá ma monó tiantan avúavá ída varano van mi siamiyá uno. <sup>21</sup>\*Tiretí ankan ída kanaíeyá Bafani kápi finté vá namu au-nani kápi finté vá non niyáke inká ída kanaíeyá Bafani yungan kain takhókáke vá namu aunani yungan kain takhókáke vá dunan nan nono. <sup>22</sup>\*Nái avúavasá bariya rafuno. Bafan mano ma Isarerí kékái namu avúavá san ma uman ameiní ino vará tiretí ankan béin

aran amiya rafono. Tetisi ákona ano veni ákona esantakhen minó té iniya rafono.

*Tiyarafenu Aví Ma Yaní In Ma Moéken Kákaní Ukhein Baya Ino*

<sup>23</sup>\*Tiretí ankan mai minó danasinta kasaé baranté uno siya ompo minó danasinta ano va ayainten naino. Ída ino. Minó danasinta kasaé baranté uno siya ompo minó danasinta ano va sretii mumunan ákona uantanten naino. Ída ino. <sup>24</sup>\*Tiretí ankan ma vanona van ída vá iniyákeya ena kéká ma aya inona vará ineno.

<sup>25</sup>Nái safúna kayó sarí urantiya miyaní inte fo mai van ída vá nan nafi áá ídá nan nafi seja kokhon ineine iyákeya mai fara vá bare mo nano. <sup>26</sup>Mai fara vara seyo, minó ma varará ma vain danasinta mai Tiyarafenun nina ino. *Íbo 24:1*

<sup>27</sup>Ída ma monó tiyain banta ano ma ve amápin ma yungan nano van avireni orintiya mai kasaé vá orono. Oresin ma yungan amintiya mai ída vá kokhon ineine iyákeya fara vá máde nano. <sup>28</sup>\*Nan nempo manáa kéká ano ma siamiyáken ma yungan kayo mai kampun ayarafenurá ákonte ukhein dunan pon mino ma sintiya mai vetin ará namu uantan nampo ída vá máde nano. <sup>29</sup>Tiretí ankan ma nanteya maifin ída uman ban mifo mai ma siamin nain kéká ano ma ódaren ará uman daantan nain nan mi siamiyá uno.

Mai anarái séi ma ída variyaruna avúavá ma ena ano varano sintí mai ídá kanaí é barante rafuno. <sup>30</sup>\*Tiyarafenu ma susu siantadé timusin iyá nanuna yungan nan mai fará uman barante rafuno.

\* **10:16:** Mat 26:26-28   \* **10:17:** Rom 12:5   \* **10:18:** Riv 7:6   \* **10:19:** 1Ko 8:4   \* **10:20:** Diu 32:17; Rev 9:20   \* **10:21:** 2Ko 6:15-16   \* **10:22:** Diu 32:21   \* **10:23:** 1Ko 6:12   \* **10:24:** Rom 15:1-2   \* **10:28:** 1Ko 8:7   \* **10:30:** 1Ti 4:4   \* **10:31:** Kor 3:17   \* **10:32:** Rom 14:13

<sup>31</sup>\*Dunan má non masá nante fo áa manáá yanasá barante fo mai Tiyarafenu aví ma maman daní in avúavá kasá barano. <sup>32</sup>\*Tireti ma varanona yanáká ída vá áesin Yutan kayo fi áa ena anan nanin banta fi áa monó nanin banta fi vá eraven ankan mino. <sup>33</sup>\*Téi má deren mai aa yakhafiyákéi minó nanin banta ma amusin amenuna yanasinta anan bariyá uno. Intéa yanasá tempin kama ukhen nafi mai ída sesi sinunurá bariyá umpo ena nanin banta ma ayaintin Tiyarafenu ano vetin evaránen aviraren ukhein danasinta anan bariyá uno.

## 11

<sup>1</sup>\*Yisas Karaisi ma aní ukhein ánaín ma séi vakuriyarunai e vá tireti ankan téi ma aní iyaruna sínaín bákurono.

*Banasifin Ma Funtákein  
Avúavaká Monó Tin Baya Ino*

<sup>2</sup> Tireti ankan ma séin nan para ineine iyákeya ma inká téin tisimein bayá ma siretin tiamékuya ma fákakheona van mi amo siyá uno. <sup>3</sup>\*Timusin iyá umpo mana yaná tireti ankan afová ono van muno. Minó bantai ánon mi Yisas Karaisi van mi inká anasii ánon mi ve avafun ban mi inká Yisas Karaisin ánon mi Tiyarafenu van mino. <sup>4</sup> Ánontá ma yóki yádáken amúken ma inká sakhanampa vaya sé iyain banta kéká ano mai vei ánon Yisas Karaisin nan ída iniyán mino. <sup>5</sup> Ánontá ma ída yóki yádáken amúken ma inká sakhanampa vaya sé iyain nanin kayo mai ve avafun nan ída iniya inká be ánon do ma minó do varukheiní iyan mino. <sup>6</sup> Anasi ano ma ve ánontá ma ída yafinten ná be ánon do asíkarasá kavino. Anasi ano ma ánon do asíkará kaven do varukhen in nan ma ayave van

inten ná be ánontasá dóki yafino. <sup>7</sup>\*Banta ano ma ída ánontá dóki yafin nain mai véri Tiyarafenu aman manon mi váken beni kakhan mái van mifo anasi ma vain mai vantai kakhan mái van mino. <sup>8</sup>\*Mai fara vara seyo, vanta ano ída anasi finté afoká ukhen mifo vanta fintéi anasi ano afoká ukhen mino. <sup>9</sup> Banta ano anasi aya ino vara uvanten naifo anasi ano vanta aya ino van mi uvanten mino. <sup>10</sup> Máan tukhantin anasii ánontá ma van nain dóki ano vá béimpin ma vain ákonai aní danasí ino. Mai fara vara seyo enisori kayo ano yafiken mino.

<sup>11</sup> Bafani vanasi uno ma sikhein ábasufin ída kanaíen anasi ano ádun bantin inká banta ano ádun bantin inten mino. <sup>12</sup> Para vara seyo gefá Tiyarafenu ano vanta aufói anasi uvantaréin mi saréa anasi ará pinté banta afoká iyan mifo minó daná Tiyarafenu fintéi erikhen mino. <sup>13</sup> Tireti yantasá ma vaya yaimono. Anasi ano ma ánontá ída yo yafinton Tiyarafenurá ma amúkin nain mai kama avúavasá inten nafino. <sup>14</sup> Banta ano ma ánon do ifái ayasi iyain mai seti vanasi ano ma variyaruna avúavári siretin aní iyan mifo mai vanta ano ída ayave iyan nafino. <sup>15</sup> Mai fara vara seyo, anasi kayoi auí danasí ukhen betin ánontá dáken amusin amino van mi Tiyarafenu ano ayá ánon do amikhen mino. <sup>16</sup> Máan tukhen mifo manáá ano ma senti vaya kayo van ma kokhon bayá sinten maen Tiyarafenu ena monó kayofin ída ena avúavá bain mai ánaín ída vakurinten mino.

*Bafani Au Vá Nare Vá Ma Nan  
Bayá Ino*

<sup>17</sup> Taréa ma séi siamenuna vaya mai saretí ankan ma amo sin bayá va sente rauno. Ída ino. Mai fara vara seyo, saretí ankan ma átaru iyaonafin kama yaná

\* **10:33:** 1Ko 9:20-22 \* **11:1:** 1Ko 4:16 \* **11:3:** Esé 3:16; Efe 5:23 \* **11:7:** Esé 1:26-27

\* **11:8:** Esé 2:18-23

manáai afoká é iyan mifo namu yaná anan esantakhé iyan mino. <sup>18</sup> \*Ma vaya seno van iyáké téi ma inéku mae saretí ankan ma monó átaru iyá eona fin asivúare eraran aúban daintenan mai vaya me sisimiká mai van puran tino sé iniyá uno. <sup>19</sup> Máan tiyái mai ma aúban dainteona finté mai intéa kéká anó pura sen Tiyarafenui anunu ánaín bákuriyan nafi mai sretiyantái afová inono.

<sup>20</sup> Bafani yunan nantá ma manafin e átaru uve mai yunan ma neinisa iya vaono. Ída ino. <sup>21</sup> Mai fara vara seyo, séin ma sisimí ineruna sretin pinté manáa ano ída ave into sretii yunan afasi iyáké kokhon uvaini nare óen en nan inká manáa kéká ano arafan nan é iyan mino. <sup>22</sup> Tireti ankan yunan má non má ma nan namun ídá ba rafono. Tireti ankan Ti-yarafenui mono san paen danasí ureya monó nanin banta vá ída ma yunan bain kéká bá ayavé amiya rafono. Téi náiesá té tiretin tiamente rafono. Mai avúava san tiretin amo sente rafono. Ída uron mino.

*Yisasi Ma Vereti Vá Uvaini Vá Bei Eyo Iyampon Kayo Amein Baya Ino*

(Matiu 26:26-29; Maki 14:22-25; Ruku 22:14-23)

<sup>23</sup> Mai fara vara seyo, séi ma Bafan pintena vareruna vayan tiretimpin tiadékun oriyan mino. Namuro ayampin ma véin amin nain inurán manan Bafan Yisasi ano vereti orun mamaren <sup>24</sup> Tiyarafenu susu siantáden kisiren temí, “Ma se sui sretin ayaino van amé uno. Máan tiyáke vá tireti ankan ten nan inisinte vá baro.” <sup>25</sup> \*Bereti ma amin naran maen mai ma einí ana en uvaini kápi orun mamaren temí, “Ma kápi mai Tiyarafenu vá ma auyen avúaváká kasen ban mi sesi naren

banaé umpo máan mana e niyáke vá ten nan inisinte vá baro.” <sup>26</sup> Mai fara vara seyo, sretí ankan mai vereti vá mai kápi finté vá ma niyasin maen mai anon Bafani furin bayá sian dákó iya vasin mi véi ovaránen erinten mino.

*Tetisi Sivútvá Daíden Ma Bafani Au An Dakhein Dunan Nan Baya Ino*

<sup>27</sup> \*Máan tukhein nan mi mana vanta ano ma mai vereti vá Bafani kápifin má ma niyáken ma ída funtákein avúavasí ma inain mai véi Bafani au vá nare vái fainí uren umé avúavái varen mino. <sup>28</sup> Máan tukhein nan mi mai vereti vá kápifin má ma nano sinte vá ei in-eine vá aú bá daíde inire vá nano. <sup>29</sup> Mai fara vara seyo, mana vanta ano ma Bafani au van ída kamaen inin nan ma mai vereti vá kápifin má ma nanten mai ano veyantái Bafan mano ma yaíden amin nain uman o maman be amaniná kain-ten mino. <sup>30</sup> Mai anaráti sretí ankan pinté kokhon ná ano ída ákoná van aí bariyan maen manáa ano inka fúken mino. <sup>31</sup> Máan tukhen mifo setisi ineine vá tú bá ma yaídé ma nékun maen Ti-yarafenu ano setin ída yaiminten mino. <sup>32</sup> \*Máan tonté tifé umpo Bafan mano ma setinti sivútvá daíden ma uman timé iyain mai anon tetin puntariyain mai varará nanin banta vá ída uman bará tifanté uno. <sup>33</sup> Máan tukhen mifo vá mumunan tiyofi sifá tiváeyan noe, Bafani yunan nanovan ma átaru inte vá ben avein maran ná ono. <sup>34</sup> Arafan uron ma furinti e amá nare ma yunan nare e átaru inona mai anon e amaniná ída uman e mamádan nono.

Ínaiimpá ma séi oronté maé ena vá mo inin amenté uno.

## 12

*Kantá Aunan Ma Amusin Amiayin Baya Ino*

\* **11:18:** 1Ko 1:10-12   \* **11:25:** Eks 24:6-8; Ibu 8:8-13   \* **11:27:** Ibu 10:29   \* **11:32:** Ibu 12:5-6

<sup>1</sup> Mumunan tiyofi sifá tiváeyan noe, Kantá Aunan mano ma siretin mana mana amiyain amusin nan taréa vompon uvaman amenté uno. Mai fara vara seyo, Kantá Aunan mano ma amiyain amusin ída afová ukhen ná mai kamaé tiamento van muno. <sup>2</sup>\*Tireti ankan ma ara ara yanáká ma monó tiyan nan maen mai yanasinta ano sretíi ineine yo yarifaádaya ída vaya siyain ayarafenu kayorá monó tiantiyare ono. <sup>3</sup>\*Máan tiukhein nan mi siretin tiamiyá uno. Tiyarafenui Kantá Aunan má ma vaya siyain kéká ano ída kanaíen Yisasin amaniná aau amino van Tiyarafenun tiaminten mino. Inká ída ma Kantá Aunan ban nain kéká ano ída kanaíen Yisasin nan Bafan mino sinten mino.

<sup>4</sup>\*Ara ara monó dorarí in amusin ma amé iyain mai mana Kantá Aunan manon mai amusin kayo amé iyan mino. <sup>5</sup>Banasi ano monópin ara ara yorarí é iyan mifo mai mana Bafani yorarí anan é iyan mino. <sup>6</sup>Tiyarafenu ano ara ara aa sákéi setin túpin doriyan mifo mai mana Tiyarafenu anan báken mi minó pin doriyan mino.

<sup>7</sup> Minó nanin banta aya ono van mi Kantá Aunan mano monó dorarí in amusin mana mana simikhen mino. <sup>8</sup>Kantá Aunan mano manáa kéká kama ineine ma amin afova vá banasi ma monó baya sian amin má amiyáken inká ena kéká mai Tiyarafenui vaya ma ovaren me yaíden afová in amusin amen ukhen mino. <sup>9</sup>Kantá Aunan mano manáa kéká mai ákonan ma mumunan in amusin amiyáken inká ena kéká aí banta ma ayofan ákona amen ukhen mino. <sup>10</sup>Manáa kéká mai enará ukhein aní danasí ma in ákona amiyáken inká ena kéká sakhanampaí ma in afova amen ukhen mino. Inká manáa kéká

mai ena aunantasá baya siyan nafi áa Tiyarafenui Kantá Aunan tasá baya siyan nafi siren ma afová in ákona amikhen mino. Máan tiyáken inká manáa kéká mai ara ara vaya finté ma vaya sin amusin amiyáken inká mai vaya ma vaéon amin afova ena kéká amen ukhen mino. <sup>11</sup>\*Mana Kantá Aunan manon beyantá mana mana ano ma kanaíen doraren avúgyáka ten ákona vá afova vá amídú ukhen mino.

### *Mana Aufin Ma Kokhon Bukhafa Vain Baya Ino*

<sup>12</sup>\*Banta aufin mai ara ara yanái van mifo mai mana vukhafa fintéi yákó ukhen mino. Yisas Karaisini monó nanin bantafin máan manan ukhen mino. <sup>13</sup>\*Tetí manáa ano Yutan kéká bá tiféku manáa ano ena anan kéká bákan manáa ano ída miyan ban doran kéká bákan inká manáa ano kusen ban kéká ban ukhen mino. Máan tukhan maen mana Kantá Aunan manon Yisas Karaisimpin monó non pétintadá mai Kantá Aunan manan minó ano manté tiféuno.

<sup>14</sup>Máan tukhan mana vukhafa fintéi ara ara yaná ban mifo ída mana yaná ana van mino.

<sup>15</sup>Arantan mano sen téi ída ayan bákéi ída au vukhafafin bá uno sinten mifo mai véi aui mana vukhafan ban mino. <sup>16</sup>Inká átaren mano sen téi átaren mi váke ída auu varuna séi ída au vukhafafin bá uno sinten mifo véi aui mana vukhafan ban mino. <sup>17</sup>Minó bukhafa ano auu ana ma vantin mai inté uren ná baya ininten nafino. Inká minó bakhafa ano ma mana átaren mana ma váken mai inté uren ná manáa yaná auna inten nafino.

<sup>18</sup>Tiyarafenu ano veyan ma anunu ein barurái mana mana vukhafa uvaman kaudú uran ban mino. <sup>19</sup>Au vukhafafin mana yaná ana varé intin mai intesá in nainten nafino. <sup>20</sup>Mai ída kanaí in nainten mifo mana

\* **12:2:** Aba 2:18-19 \* **12:3:** 1Yn 4:2-3 \* **12:4:** Rom 12:6 \* **12:11:** 1Ko 7:7 \* **12:12:**  
1Ko 10:17 \* **12:13:** Kar 3:28

vukhafafin mi ara ara yaná ban mino.

<sup>21</sup> Auu ano ída kanaíen ayan nan ída éin nan iyá uno sintin inká ánon mano ída kanaíen arantan nan ída éin nan iyá uno sintin inten mino. <sup>22</sup> Manáa ída ákona vain bukhafa mai vanta aufin ída vano sen baré intin au vukhafa ano ída kamaen ban nainten mino. <sup>23</sup> Manáa vukhafa ída kama ukhen mino ma sétiferunan tuí uake kama iyá uno. Inká manáa siyave vukhafa ma vain mi mai ena ano onana siré aúpasii iyá tiféuno. <sup>24</sup> Manáa vukhafa mai veni yoran ída van mino siyá tifé umpo Ti-yarafenu ano minó bukhafa ovare evare uan manafin kaúden ída aví bain bukhafa ino ma siyaona mai kama e yafiseno van mi kain ban mino. <sup>25</sup> Máan tukhein nan mi veraran ída aúban daiminten mifo ventá dafisin maran mi inten mino. <sup>26</sup> Mana vukhafa ano ma aí o yosin maen minó bukhafa anon ai san éiyán mino. Inká mana vukhafa ma maman daní in maen mai minó bukhafa anon amusin éiyán mino.

<sup>27</sup> \*Minó ano Yisas Karaisini au vukhafan bákeya mana mana ano veni mana vukhafan barú ukha ono. <sup>28</sup> \*Ti-yarafenu ano ma Yisas Karaisini au vukhafafin asotú uran bain kéká maen masi van mino. Esé ma vain mai vaya varen orin banta kéká bákan mairá sakhanampa kéká bákan ukhen mino. Inká kanú manausí ma ukhein kéká mai afova amin kayo vá enará ukhein aní daná ma uvaran kayo vá bákan inká aí ma ayofan amusin ma mantein kayo vá ena nanin banta ma kasaen aya orin kéká bákan ukhen mino. Inká mai ma yoran danasintará ma yafiken doran amin kéká bákan inká ara ara vaya finté ma vaya sin kéká bá bákan ukhen mino. <sup>29</sup> Minó ano aná baya varen orin kéká ban nafino. Ída ino. Inká minó anó sakhanampa kéká ban

nafino. Ída ino. Inká minó anó afova ma amin kéká ban ná inká enará ukhein aní danasí ma in ákona mai minópin ná ban nafino. Ída ino. <sup>30</sup> Inká minó ano aná ayofan amusin mantan ná inká ara ara vaya ma sin amusin mai minosá timikhan ná inká mai vaya kayo ma o vaéon amin amusin minó anó manté tife rafuno. Ída uron mino. <sup>31</sup> \*Máan tukhen mifo ena nanin banta ayain amusin ma varan nará moéke anunu ono.

#### *Ena Van Ma Anunu In Avúavá Ano Moékkhen Mino*

Máan tin nompo mai yanasingta ma esantakhein avúavá mai siaméku inin nono.

## 13

<sup>1</sup> Barará nanin bantai ara ara vaya vá inká enisori kayoi vaya vá pó ma siyákun ma ena avábá uren ará amin avúavá ma sempin ída vantin maen mai senti vaya ano yavema ma ankamiyan avaya yakhaní iyan inká bano ano ma aseinii iyákun pasen mi veni ana ída vanten mino. <sup>2</sup> \*Máan tinten mifo sakhanampa vaya sin amusin baré ma inká Ti-yarafenu aúpa baya afováin baré ma inká minó afova varé ma inká anuyon kayo siantantin ma e afánen orin mumunan ma sempin bantin ma ena ará amin avúavá ma ída vantí maé mai senti yoran mano mo faen danasii inten mino. <sup>3</sup> Ona ída van nanin banta ma se síná yanasingta varé mo amiýá ma inká ira khiyaimpin te su ampian kaiyá ma ena nanin banta ma ída avábá onté maé mai senti yoran paen danasii inté uno.

<sup>4</sup> Avábá in avúavá maen mai ída ma ainen aran édavin avúavá bákan inká ena ma ará amin avúavá ban ukhen mino. Avábá in ma vain mai ena ina yana san inian namu uanten ma inká be amo siyan be aví daní in naino. Ída ino. <sup>5</sup> Avábá in avúavá ma vain

\* 12:27: Rom 12:5    \* 12:28: Efe 4:11-12

\* 12:31: 1Ko 14:1    \* 13:2: Mat 17:20

mai koen ma veyan nan mana iniyán ma ainén aran nan uaren ena inian namu uantan avúavá saino. <sup>6</sup> \*Ída ino. <sup>6</sup> Avábá in avúavá mai ume yanápín amusin in naino. Pura yanápín ma amusin in avúavá ino. <sup>7</sup> \*Avábá in avúavá maen ída ainén o kípan maen inká ena ena Tiyarafenurá inin kaen inká ena ena yamú kama yana san ave en maen inká ara ara uman eriyantin ákonaen dafíken báken ma ena kéká bá manafin ban avúavá ino.

<sup>8</sup> Avábá in avúavá maen para van oriyán banten mifo sakhanampa vaya sin nafi ara ara vaya finté ma sin nafi inká kákán afova ma mantein mai avúavá sintá kípanten mino. <sup>9</sup> Mai fara vara seyo, saréa sító máorái afova manté tifé kun inká sakhanampa vanta kayoi vaya vá dere ano sító máorái sian amá iyan mino. <sup>10</sup> Máan tukhen mifo mai yanasinta ma fura sen minó afoká inain damú ma ma sanáa afová ukhé bariyá tiferuna yanasinta ída vantén mino.

<sup>11</sup> Arará iyampon ma váké maé iyampon mano ma vaya seiní é arará ineine é inká iyamponi avúaváká noré umps e inoré bantai ma iyáké mai damú anan iyampon kayoi avúavá me ampé uno. <sup>12</sup> Taréa mai Tiyarafenui auná onano van iniyá tifé umps ven auná maen namu ukhein kamufin ma oneiní iyáken béis anan tetin toniyan mifo ínaimpái veni adé orivé ben ayafen ódé pura sé afová ó tifanté uno.

<sup>13</sup> \*Máan tukhantin kanú manaú avúavái fara vantén mino. Mai máa maen mumunan in má kama yana san ma avein má ena ma avábá uantan má ifo avábá in manon moéken kákání ukhen mino.

## 14

*Ara Ara Vaya Vá Sakhanampa  
Vaya Ma Sin Má Amusin Baya Ino*

<sup>1</sup> \*Ena nanin banta ma avábá in avúavasá pákoresin bantiya Kantá Aunán mano ma ara ara amusin amiyain bariyáke vá Tiyarafenui vayará ma sakhanampa vaya sin avúavá sará moékentá anunu iyáke vá barano. <sup>2</sup> Mai fara vara seyo, mana vanta ano ma ara ara vaya finté ma ara ara sin nain baya mai vanasi ano ída afová inten mifo Tiyarafenu ano anan afová inten mino. Kantá Aunání ákonarái mai ma aúpá baré ein baya siyan mino. <sup>3</sup> Máan tiyan mifo sakhanampa vaya ma siyain manon ena nanin banta ákona amiren ará kusiantiyan maen betí monó tin avúavá aya íkan ákona é iyan mino. <sup>4</sup> Ída afová ukhein baya finté ma vaya siyain banta ano veyan manan aya iyan mifo sakhanampa vaya ma siyain banta ano monó nanin bantan aya é iyan mino. <sup>5</sup> Monópin báke ma mumunan iyaona kéká ano ara ara vaya finté baya seno van inikhe ompo sakhanampa vaya seno van mi moéken tinunu iyá uno. Mai fara vara seyo, sakhanampa vaya ma siyain avúavá anon ara ara vaya finté ma veni ana ída sian amá in ma siyain esantakhen mino. Mana vanta ano ma mai ma siyaona vaya ma kanaíen baéan monó nanin banta ma amintín manan mai finten betin ma ayain baya afová inten mino.

<sup>6</sup> Mumunan tiyofi sifá tiváeyan noe, saretí ankan ma ída afová ukhanona vaya finté ma siame-nuna ano mai inté en ná tiretin ayainten nafino. Ída ayainten mifo mai ma Tiyarafenu ano aúpá baya sisimein má inká sakhanampa vaya vá inká afova amin baya vá ma sian amenuna anon tiretin kanaíen aya inten mino. <sup>7</sup> Okhakhan nafi vano fi

\* 13:6: Rom 12:9

\* 13:7: 1Pi 4:8

\* 13:13: 1Te 1:3

\* 14:1: 1Ko 12:31; 14:39

ma ída aunan bain danasinta ano ma asiyainíi en kamaen puntáden baya siamiyan mino. Mai fara vara seyo, mai yanasantia fóké ma ída kamaen asintin mai ída kanaíen mana ano afová inten mino. <sup>8</sup> Inká ufen ma ída kama asirí ma intin mai aruvín banta kayo ano inté uren ná aruvín damú ino sen afová uren ná utá inten nafino. <sup>9</sup> Tireti ankan má dere máon manan inono. Ída ma e avaya finté baya sin ma ena vaya finté ma siyasin mai intesa uren ná mai vaya ena kéká ano afová inten nafino. Mai ma sinona vaya ano fasavi afokhampin ma oreiníi inten mino.

<sup>10</sup> Ara ara vayan minó akhempá bákán mai vaya kayo ma inikhein kéká ano anan mai vaya kayoi ana vaya kamaen afová é iyan mino. <sup>11</sup> Máon tukhen mifo mana yanta ano ma ena vaya finté baya siyantí ma mai vayai ana ída afová ékun maen mai verasan enafá banta ma vainí ukhé beni vaya ana ída afová ékun inká tenti vaya ana yeren ída afová inten mino. <sup>12</sup> Máon mana eya Kantá Aunani amusin barano sire anunu iya ompo Tiyarafenurá amúkesin ná monópin ma vain kéká ayaen amusin amintin ná monó tin avúavá ákona ino.

<sup>13</sup> Máon turanti mae mai ída afová ukhein ena vaya finté ma vanasi siamin amusin ma mantanona ano amúkesin ná mai ma seona vaya ana ma sian amá in ákona Tiyarafenu ano amino.

<sup>14</sup> Mai fara vara seyo, séi ma ída afová ukheruna vaya finté ma simúkiyákul ten tú iyampon manon amúkiyán mifo sesi ineinefó basá timúkono. Inká tú iyampon ma ídiyantí mai sesi ineinefó bái í

<sup>15</sup> Máon tukhantí maé mai séi intesá onte rafuno. Téin tú iyampon ma amúkiyantí mai sesi ineinefó basá timúkono. Inká tú iyampon ma ídiyantí mai sesi ineinefó bái í

danté uno. <sup>16</sup> Mai fara vara seyo, en aú iyampon mano ma Bafan aví daní iyan amúkuán amiyan ma susu sian tiyantin ma mai vayai ana ma ída afová ukhá in nain mano intesá uren ná mai vaya ma siyaona afová en ná pura ino sinten nafino. <sup>17</sup> Éi ma susu siantan nona mai kama uron mi inompo mai ma ádē báken inin nain kéká ída uron mi aya inten mino.

<sup>18</sup> Téi ma siretin esantaré ma ara ara vaya kayo fóké banasi sian amiyaruna van mi Tiyarafenun tusu sian tiyá uno. <sup>19</sup> Máon tiyá umpsi Tiyarafenui monó nanin bantafin kasaen ma ineren ukhein dan manápá baya máa vá ten umpsi ena vaya finté ma siyan míkan tauseni (10,000) vaya ma sekun maen kokhon nanin banta ano ída kanaíen ininten mino.

<sup>20</sup>\* Mumunan tiyofi sífá tiváeyan noe, mai ma sian amiyaruna yanasantia van ída vá arará iyamponi ineine variya vano. Namu avúavápin ma o fékeya arará iyampon an diya van nompo siretii inimpin ná karakhein nanin banta an ná dano. <sup>21</sup> Tiyarafenui vompompin Bafan mano máa sikhen mino.

“Ída ontanona vanta kayo finté safi  
inká ída afová ukheona vaya  
siyain kéká oo ráke safi uaré  
mai nanin bantafin baya siamenté  
umpo  
vetí ankan ída senti vaya ininten mino.”

Ais  
28:11-12

<sup>22</sup> Ara ara vaya finté ma vaya siyain avúavá mai mumunan nanin banta ayain baya vaifo mai ma ída ma mumunan iyain kéká ina ino. Sakhanampa vaya ma siyain mai mumunan ma iyain kayo ayain baya ifo ída ma mumunan iyain kéká ina vaino. Ída ino. <sup>23</sup>\*Máon tukhein nan mi manáa ída ma mumunan in

\* **14:20:** Efe 4:14 \* **14:23:** Apo 2:13

kéká bá inká mai vaya ída afová ukhein kayo vá ano eriyan ma e onantin mumunan nanin banta ano ma ara ara vaya fóké ma monó bayá siyantin mai van amino uren mai kéká ano óén mi iyan ne sin ten mino. <sup>24</sup> \*Máan tukhen mifo sakhanampa vaya siyá esin ma manáa kéká ano eriyan ma e imintin ma mai vaya siyasin maen mai vaya ano vetí ume maman dáko urantin ará baeranten mino. <sup>25</sup> Máan tintin maen mai kayo aúpin ma ara ara ineine aúpá baré in nain e unen dáko intin arón durafúden Tiyarafenurá monó tiyáken mai Tiyarafenu ano sireti má pura sen ban mino sinten mino.

*Puntákein Avúavá Póké Ma Monó Tin Baya Ino*

<sup>26</sup> \*Máan tukhein mifo mumunan tiyofi sifá tiváeyan noe, mai ma sian ameruna vayai ana sian amékuya inin nono. Monó nanin banta ma átaru uvinte vá manáa kéká ano í desin ena kéká ano afova vaya sinti vá inká mai ma Tiyarafenu ano aúpá bayá siamikhá in nain kéká ano vá tian dáko ono. Ínká manáa kéká ano ída ma afová ukhan nain bayá finté tiresin ena kéká ano vá mai vayai ana sian amá ino. Máan ma inona ano vá Tiyafenurá ma monó tiantan avúavápin ná ákona uantano. <sup>27</sup> Máan tiyantin kan mano fi kanú manaú ano fi ma ena vaya finté ma vaya seno van ma intin maen ná mai áintin mana ano sirú tirú iyantin ena ano vá mai vayai ana vaéan banasi amino. <sup>28</sup> Aminten mifo ma mai vaya ana ma vaéan amin banta ma mai átarufin ída vantin mai ma ída afová ukhein bayá finté ma siyain banta ano ana vei ineine finté sá Tiyarafenu vá aúpá bayá sino.

<sup>29</sup> \*Áésin ná kan mano fi kanú manaú ano fi vá sakhanampa

vaya siyantin minó ano mai ma siyain bayá vá daíden afová ino. <sup>30</sup> Afová inten mifo manáa kéká ano ma sakhanampa vaya siyantin ma mai aúbanáké mana vanta ano Bafani vaya ma varantin mai ma vaya siyá in nain banta ano vá bei vaya fákano. <sup>31</sup> Mai aa sákéi mai ma sakhanampa vaya siyaré inona kéká ano kasae eyan tirú tirú iyasin minó nanin banta ano mai vayai ana afová intin betíi mumunan ákona uantanten mino. <sup>32</sup> Mai ma sakhanampa vaya siyain kéká ano ve aunantái yafidú ukhen mi vaya sé iyan mifo afovásá ono. <sup>33</sup> Mai fara vara seyo, minó akhempá ma monó nanin banta vaimpin mai ída asusein Tiyarafenun ban mifo ará kusin mana ma amin Tiyarafenun ban mino.

<sup>34</sup> \*Yutan kayoi man bayá ano ma sikheinén ída vá anasi arinta ano monó átarufin o anien bayá siyáken betiyan ná maman bararasí ino. <sup>35</sup> Anasi ano ma mana inain bantin maen bé amápin oriven ná be avafun tasá ina ino. Mai fara vara seyo, anasi ano ma monó átarufin bayá sin maen mai ída funtáken mino.

<sup>36</sup> Tireti Koriní nanin banta ano ma iniyaona ano mai Tiyarafenu afova vaya ano setimpin mi araí uren mo kípakhen minó tiyrafono. Ída uron mino. <sup>37</sup> \*Mana vanta ano séi sakhanampa vantán báké monó bantan bá uno se vareya mai sen nan Bafani ákona vayan uvaman timiyan mino sireya afová inonaren mino. <sup>38</sup> Máan tinonaren mifo ma vaya ma inian kaumpan esin maen mai Tiyarafenu ano éi má deren inian kaumpan inten mino.

<sup>39</sup> Mai vará mumunan tiyofi sifá tiváeyan noe, amusin pintesá sakhanampa vaya siyákeya inká ara ara vaya finté ma siyaintá

\* 14:24: Yon 16:8    \* 14:26: 1Ko 12:8-10    \* 14:29: 1Te 5:21    \* 14:34: 1Ko 11:3; 1Ti 2:12  
\* 14:37: 1Yn 4:6

ída vá are ono. <sup>40</sup> Máan tin nompo funtákein avúavá pókesá minó daná arakhóku ure varesin ná mo kama ino.

## 15

### *Yisas Karaisi Ma Evaránen E Mantein Baya Ino*

<sup>1</sup> Mumunan tiyofi sifá tiváeyan noe, pefá ma Yisas Karaisini kama vaya siaméku ma inire mantaan ákona ukhaona van tian ákona uantano van mi ma vaya senté uno. Mai fara vara seyo, mai vaya ma ineonarái mantaan ákona ukha ono. <sup>2</sup> Mai ma siamenuna kama vayará ma ákona mumunan esin maen mairái Tiyarafenu ano aviranten mifo ena yanáká ma mumunan esin mai ída aviranten mino.

<sup>3</sup> \*Mai fara vara seyo, inte vayá mantare rafu mai vaya máan tiretimpin tiámé uno. Tiyarafenui vompon dókifin ma sikhá eníen Yisas Karaisi ano setinti umerái e fúken mino. <sup>4</sup> \*Tiyarafenui vompon dóki ano ma sikháré einié bén masí uran ma kanú manaú damú orivíkan masí pinté e man-ten mino. <sup>5</sup> \*Masí pinté e mantakharé íkan Pita nare ódaran ínaímpáké eni eyo iyampon kayo ano onen mino. <sup>6</sup> Ódaran mai damú anan dan manápá antareti (500) nanin bantafin afoká íkan onen mino. Afoká íkan ma ontaré ein kéká pinté manáa ano furiyan maen kokhon mano fara van mino. <sup>7</sup> \*Mai oyampáké Yemisi ano véin ódaran ínaímpáké ena bayá varen orin kéká onen mino. <sup>8</sup> \*Minó ano ontaréí ínaímpáké iyampon ma kain damú ma esantavin ma fasavi yamú ma mo afoká einíi en ten tívorá afokái oné uno.

<sup>9</sup> \*Mai fara vara seyo, séi ma gefá Tiyarafenui vanasi aruan

puriyaré eruna van téin nan ída aposeri oe sen tarantí eyo iyampon kayoi aránaó bano van muno. <sup>10</sup> \*Máa siyá umpo sesi yoran tasa Tiyarafenu ano séin tarisari usintádá máan tukhe rauno. Ída ino. Mai fara vara seyo, ena aposeri kéká esantaré téi yóké umpo mai seyantasa yóké rauno. Ída ino. Tiyarafenu ano vei sarisari fókéi séin pinté uaren doren mino. <sup>11</sup> Máan tukhanti séi ma sian amiyaruna mai vaya ano fi ena eyo iyampon kayo ano ma siamin nain bayá ano fi mai ída enará ukhantiya onan nono. Yisasi ma fúaren e mantakhein bayá ma seti siaméku mairá ma mumunan iyaona anon kákan danasí ukhen mino.

### *Púká Inain Kéká Ma E Mantan Nain Baya Ino*

<sup>12</sup> Máan tukhen mifo Yisasi ma fúaren e mantakhein bayá ma siamékuya inikha ombo mai faraé tireyá tiréti ankan pinté manáa ano mai ma fúkein nanin banta van ída orun mantanten mino siya rafono. <sup>13</sup> Mai fara vara seyo, fúkein nanin banta van ma ída orun mantanten ne sinte mai Yisas Karaisin nan ída evaránen e mantakhen nen tin nono. <sup>14</sup> Yisas Karaisi ma ída evaránen avían mantakhanti mae mai ma veni furin bayá ma sian ameruna vá Tiyarafenurá ma ákona inin kaiyaona vá ano mo faen danasí anan inten mino. <sup>15</sup> Púkein kayo ano ída evaránen orun mantanten ne ma sé tifanté mai seti aposeri kéká ano Tiyarafenun kampun tiántá tifanté uno. Mai fara vara seyo, Tiyarafenu anon Yisas Karaisin masí pintena orun ayán mantakhein bantí teti ma siyaruna vaya mai kampun mi siyanté uno. <sup>16</sup> Mai fara vara seyo, fúkein nanin banta ma ída e mantanté intin mai Yisas

\* 15:3: Ais 53:5-12    \* 15:4: Mat 12:40; Apo 2:24-32    \* 15:5: Mat 28:16-17; Ruk 24:34  
\* 15:7: Apo 1:3-4    \* 15:8: Apo 9:3-6    \* 15:9: Efe 3:8; 1Ti 1:15    \* 15:10: 2Ko 11:23

Karaisin má deren masí pinté ídə e mantakhen mino. <sup>17</sup> Inká Yisas Karaisin ma ídə masí pintena orun avián mantakhe ne ma sinteya mai saretíi mumunan mano mo faen danasí intiya saretí ankan umefin para van nono. <sup>18</sup> Máan tukhantin mi Karaistintá ma mumunan uven púkən nain kayo ano o afeyoranten mino. <sup>19</sup> Inká taréa ana Yisas Karaisin nan tiya ino van muno siré ma iniyaruna mai fura sé ma varará ma ídə funtákéin nanin banta ma vain esantaréi namu uron ukhé bá tifékun mi ena nanin banta ano setin nan arunan usintanten mino.

<sup>20</sup> Máan tukhen mifo Yisas Karaisi ma fúbin masí pintena Tiyarafenu ano orun avión mantakhein mai fura yaná ino. Mai ma fúká intin evaránen orun avión mantan nain kékáí véi ano anien ifan dunan pinte ma araíen duyasein an mi yakhen mino. <sup>21</sup> \*Mai fara vara seyo, Adamun pinté uaren purin afoká ukháin mi inká Yisas Karaisin pintéi orun mantan afoká en mino. <sup>22</sup> Máan tukhein nan mi Adamuni kékási ma in nain mano mai furiyan manan banten mifo Yisas Karaisini kékási ma in nain kayoi fara van oriyan ban aunan aminten mino. <sup>23</sup> \*Aminten mifo evaránen ma e mantani aa mai máan mi ukhen mino. Yisas Karaisin naren púbin mi ifan dunan ma yuyaseinén béin orun avión mantakhein pasen béis ma ovaránen erin nain damú beni vanasi ma fúkoren masí pinté orun mantanten mino. <sup>24</sup> Orun mantavintin maen namu aunan kayoi ara ara ákona vá inká namuro ano\* ma yafisiyá ein má maman bararasí uren dafisin ákona maman Tifoe Tiyarafenun kaúdantin mi ínaimpáke bara ma kípon damú afoká inten mino.

<sup>25</sup> \*Mai fara vara seyo, Yisas Karaisi ma kin karáká kuman-tantin maen béis anon beni namuro kayo maman bararasí urantin mi véi yafisinten mino.

<sup>26</sup> \*Purin ma vain mai sipá kípon namuron bain mai maman bararasí uren beni ákona yo maman karúdantin mino. <sup>27</sup> Mai fara vara seyo, Tiyarafenu vompón dóki ano sikhen mino. “Tiyarafenu ano minó danáká ma yafisin ákona véin amikhen mino.” *Íbo 8:6* (Amikhen mifo Tiyarafenu vasa mai ma ven amikhein ákona aránaó ban naino. Ída ino.)

<sup>28</sup> Máan turen béis ma minó daná ákona maman barasí uren be Afóen ayorá orintin maen mai ma esé arái en be Anin minó ákona amikhá ein Tiyarafenu ano minó danáká o ánoní inten mino.

<sup>29</sup> Púká ein kayo ano ma ídə e mantantin maen betin aya ono van ma monó non péantáká ein kéká ano náiesá tinten nafino. Inká púká ein kayo ano ma ídə orun mantanté intin mai nái ana vará purin nanin banta aya intó uno siren monó non maman ti-yaren nafino. <sup>30</sup>\*Inká nái vará ena nanin banta aya ono van ena ena yamú tetiyantá uman bariyá bá tife rafuno, <sup>31</sup> Monó nanin banta oe, fura siré ma vaya siamiyá uno. Ena ena yamú maen purin mano sen má áde suron ban mifo Yisas Karaisi ma sretin má túpá ukhen ma sretimpín doriyain nan mi simusin iyá uno. <sup>32</sup> Nai yanasá barano vará Efesáí ma vain banta kayo vá ma siruviyaruna ano afá tafúna kayo vá ma aruvein an diyá tife rafuno. Ída ma fúkein nanin banta ma orun mantiyain ma vantí maé mai setí ankan ída kanai é kama yanáká inin kaúdē ave ukhé bá tifanté uno. Mai fara vara seyo, sakhanampa vanta Aisaiya máa sikhen mino.

\* **15:21:** Rom 5:12    \* **15:23:** 1Te 4:16; Rev 20:5    \* **15:24:** Namuro maen mai namu aunan kayo vá Ban Anon má bei namu enisori kayo vá ino.    \* **15:25:** Mat 22:44    \* **15:26:** Rev 20:14    \* **15:30:** Rom 8:36

"Inuran puró tifanté umpo erí tifé  
omasí iyáké  
óen non naré óen ó tifano." Ais  
22:13

<sup>33</sup> Ída vá áesin ná mai ma furi pinté ída e mantanten ne ma siyain kéká ano éin máka sino. Mai fara vara seyo, "namu avúavá ma variyain kéká ano kama avúavá aruan puré iyan mino." <sup>34</sup> Ída vá umeí iya váke ovare vá me ineno. Mai fara va máa siya rauno, manáa ano ma ída Tiyarafenun afová ukhanteya mai saretin ayave vá bano.

*Evaránen Ma E Mantan Nain Bukhafai Vaya Ino*

<sup>35</sup> Banten mifo manáa vanta ano ina iyan ma "Intesá uren ná púkein nanin banta ano orun mantaven inté ukhein bukhafá mammaren ná erintéi vae" ma siyain, <sup>36</sup> \*mai faraé tiré óen banta ano ma inaeiní iya rafono. Danayun ma varafin pafasiren nan maen ída esé ana orun pótiyan mifo fúaren mi ínaimpá orun póté iyan mino. <sup>37</sup> Inká danayun ma varafin dóden nan baren ma e ampamé iyain mai esesa máon tukhein na yaruan mo yoré iya vaono. Ída ino. Titó asakhakhein ayun mi varafin pafasiren nan baren orun póté iyan mino. <sup>38</sup> Póté iyan mifo Tiyarafenu ano vei anunurái mai yanasisinta auí uanté iyan mino. Ara ara ayun ma vain mai vei avúavákai sen orun ampamé iyan mino. <sup>39</sup> Mai ma ara ara yanayun kayo vá káta kayo vá ano ma e ampamiyain má minó danái au ano ída manái ukhen mino. Banta au vá uraran au vá nun au vá inká noyana au kayo vá ano enarasí ukhé iyan mino.

<sup>40</sup> Máon manan en mi ayompin ma vain danasisinta vá barará ma vain danasisinta vá ban mino. Ayompin ma auí ukhein danasisinta vá barará ma auí ukhein danasisinta

vá ano ída manaí ukhen mino. <sup>41</sup> Áau ano veyan enará ukhein daná bákán mi inká biyon má ofu kayo vá ano enará ukhen mino. Máon tukhan ofu kayo mai veyan mana mana ano ena avúaváká panu sirú é iyan mino.

<sup>42</sup> Evaránen e mantan nain bukhufa ano máon manan ukhen mino. Mai ma masí ukhá ein bukhafa ano fútæn namu ukhá intin maen evaránen ma orun mantan nain bukhafa ano ída fútæn namu inten mino. <sup>43</sup>\*Tetisi furin bukhafa ma onékun maen tivesara iyan mifo füká intin ma ínaimpáké orun avían mantan orera uvintin maen kama vukhafa vái vanten mino. Inká taréa ída ákona vákan ban mifo ínaimpáké ma evaránen orun avían mantarantin maen kákan ákona vái vanten mino. <sup>44</sup> Betí ankan mai yan bukhafa vái sareá van mifo fükáré intin ma ínaimpáké orun avían mantaren maen Kantá Aunan mano ma aunan amin nain bukhafa vái vanten mino. Mai fara vara seyo, ma varará ma ainen purin bukhafa ano ma vainien inarurá deren mai ma Kantá Aunan mano aunan amin nain bukhafa vái van mino.

<sup>45</sup> Máon tukhan Tiyarafenui vompon dóki ano máa sikhen mino. "Esé araíntá Adamu ne ma siyain banta ano aun mantaren mino."

*Esé 2:7*

Mantein mifo ínaimpá ma Adamun an dakhein banta Yisas Karaisi ma erein manon ayun para van oriyan ban Aunan amin bantaén mino. <sup>46</sup> Barará bukhafá naren erivin maen ínaimpái Kantá Aunan mano ma aunan amin bukhafa eren mino. <sup>47</sup> Esé ma erin banta Adamu maen bara ráke kayó pákoren uvantáin mi ínaimpá ma erin banta Yisas Karaisi mai inarufákéi erikhen mino. <sup>48</sup> Minó barará nanin banta ano Adamun an den barará bukhafa vái van mifo inaru vukhafa ma vará tifanuna ano mai Yisas Karaisin au vukhafa an mi yanten mino.

\* 15:36: Yon 12:24    \* 15:43: Fir 3:20-21

<sup>49</sup> Adamu ma ma varará banta vain an mi yakhé tiferuna maná damusí ma intí maé inaru fáke vanta Yisas Karaisin an dá tifanté uno.

<sup>50</sup> Mumunan tiyofi sifá tiváeyan noe, séi máan mi siyá uno. Dan bukhafa vá nare vá ano ída kanaén Tiyarafenui yafisin aúpin orinten mino. Ma ma setinti ainen pútain bukhafa ano ída kanaén ayáká para oriyán banten mino.

<sup>51</sup> \*Máan tukhen mifo inikhesirá taréa Tiyarafenui aúpá baya ma setí ankampin afoká ukhein tiaméku vá ineno. Ída minó ano fura sé puró tifanté umpo maman ena vukhafaí ó tifanté uno. <sup>52</sup> Tipá kípon ufen ma asinti mai ma auu makhlí diyaona an den mi mai avúavá afoká inten mino. Mai fara vara seyo, ufen ma asintin mai ma mumunan uven püká in nain kéká ano auyen bukhafa vái orun mantantén mino. Inká mai ma ída füká ótifanuna nanin banta ano maman auyení é ída furin para oriyá bá tifanté uno. <sup>53</sup> \*Mai fara vara seyo, ma varará ma ainen puren púta iyain bukhafa ano maman inaru rákena ída ma furin para van oriyán ban bukhafaisá ino.

<sup>54</sup> Mai ma ma varará ainen puren púta iyain bukhafa ma maman ída ainen pútain inaru vukhafaí urantin maen mai ma Tiyarafenui vompon dóki ano sikhá ein mi mo kanaí inten mino. Mai máan mi sikhán mino.

"Aunan mano furin inka aruan kípen mino. *Ais 25:8*

<sup>55</sup> Purin noe, intesí eni ákona van nafino.

Purin noe, inté ureyá tirinte fono." *Ose 13:14*

<sup>56</sup> \*Mai fara vara seyo, ume anón aruan puriyákan inká ume ano man baya finten ákona variyan mino. <sup>57</sup> Máan tiyan mifo Tiyarafenu ano ma setisi Bafan Yisas

Karaisin pinté uaren tiyaí ma furin má ume vá ma esantakhé tiferuna vará béin moékantá aví daní iyá tusu siantano.

<sup>58</sup> Máan tukhein nan mi séi ma moéké tinunu iyaruna mumunan tiyofi sifá tiváeyan noe, Tiyarafenui yorantá mantaan ákona uvuya vá moékán dorarí ono. Mai fara vara seyo, sireti ankan ma Bafani yorari iyaona mai ída fa savifá o afeyoranté afová ukha rono.

## 16

*Yerusaremí Ma Vain Monó Nanin Banta Ayain Moní Ma Átaruin Baya Ino*

(*Romu 15:25-29; 2 Korin 8-9; Karesia 2:10*)

<sup>1</sup> \*Yerusaremí ma monó nanin banta aya ono van átaru uáden nan bain moni san mi siamenté uno. Mai ma siaméku Karesia nanin banta ayaeonai eya vá betin aya ono. <sup>2</sup> Ena ena Santesí ma intiya siretiyan ma yoriyaona aa fáké ma moní dosiyaona vá daídeya susu siantan monisá ákonafin kaono. Téin nan me sintí moní átaru ono van muno sire ída vá tive iya vano. <sup>3</sup> Téi ma oronté maé mai ma Yerusaremí nanin banta aya ino van ma amusin baren orin kéká aní yresin baré in nain kayoi mo máan ná ono siré bompon uvaman amenté uno. <sup>4</sup> Inká téi ma inékun kama ukhan nain nan mi siretin má manápá oró tifanté uno.

*Pori Ma Mónó Doran Kéká Ayaino Van Ina Ein Baya Ino*

<sup>5</sup> \*Masedoniá barafá orono van iyaruna ma onobé maé inaimpáké tiretin e onanté uno. <sup>6</sup> \*Téi ma inikheruna iyonin damú ma siretin má manáa o vákun iyonin ma kípavintí ma orono van éku mae sireti anón tivire mo sifa in nono. <sup>7</sup> Taréa ma sireti vaonafá

\* **15:51:** Mat 24:31; 1Te 4:15-17    \* **15:53:** 2Ko 5:4    \* **15:56:** Rom 7:13    \* **16:1:** Rom 15:25-26; 2Ko 8:1-9    \* **16:5:** Apo 19:21    \* **16:6:** Rom 15:24

ma oronté maé ída ainé tiretin me ampiré orono van mumpo Bafan mano ma kana ino sin nain nan mi sretin má manáa ayáká o vanté uno.<sup>8</sup> Máan tonté umpo saréa Efesasí barurá bákun maen Pentíkosí yamú afoká uvintíi vetin me ampenté uno.<sup>9</sup> \*Mai fara vara seyo, mará kákán doran baká dorano van iyákun kokhon nanin banta ano ineno van iyan mifo manáa kéká ano séin namuroí usintiyan mino.

<sup>10</sup> \*Timoti ma sreti vaonafá intiya vá téi ma erunaén Bafani yorarí iyain banta ifo véin kama uresin ná bano.<sup>11</sup> \*Ída vá áesin manáa kéká ano véin oman aniana ino. Timusin iyáké béin má manáa mumunan kéká bá onano van iyá umpo véi ma avire me afa iyákeya ará kusin masá tiantan erino.

<sup>12</sup> \*Mumunan tifá tiváeyan mano ma sretin oman oniyaín kéká bá teti sifá tiváe Aporosi ma san tiretin mo onano van ena ena sútúpiyákun mifo véi ída oriyan mino. Máan tiyain béis ma orono van inin nain damúi sretin o onanten mino.

<sup>13</sup> Tiretiyan dafíón ákona ukheya vá puntákein mumunantá mantaan ákona ukheya ída feran daná bantiya vá ákona ukhe vano.<sup>14</sup> Minó danasinta ma varanteya avábá in avúavá póké ana vá barano.

<sup>15</sup> \*Akaiá\* barafá onen nan maen Stefanasin má bei kéká bá naren monó baya iniren mumunan iyáken betiyantá ena mumunan kéká ayain dorarí ein mi vakái mumunan tiyofi sifá tiváeyan noe, sretin ákona é tiamiyá uno.<sup>16</sup> Máan avúaváká teya ma ma aví teruna kéká bá inká pura sen ma monó dorarí

iyain kayo vá kama e yafiseno van mi siamiyá uno.<sup>17</sup> Tiretin má ída mará ere ompo Stefanasin má Fotunatusín má inká Akaikusín má sreti vaona fákeña ma ayain danasinta varen erein nan mi kákán timusin iyákéi oné uno.<sup>18</sup> Mai ma sretií mumunan ákona uantiyá einien mi senti mumunan me ákona usinten mino. Máan ma en kama yorarí iyain kékasá amusin uantano.

### Pori Ma Sipá Amusin Baya Sein Mino

<sup>19</sup> \*Esiá barafá ma vain mumunan kéká bá Akuiran má Prisiran má inká mai ma monó dorarí intón ma vetí amápín átaru uven baya siyain kéká bá anon betí aú kákéi Bafan avíká tireti vaonafá amusin baya yákan oren mino.<sup>20</sup> Mará ma vain monó nanin banta ano sreti vaonafá monó amusin baya yan oren mifo vá tiretiyan monó avúavá posá betin avábá in maran ná ono.\*

<sup>21</sup> Téi Pori anon teyantá timusin baya uvaman amé uno.

<sup>22</sup> \*Bafan ma ídq avábá in nain nanin banta ano vá uman barano. Tetisi Bafan noe, ereno.

<sup>23</sup> Bafan Yisasini sarisari ano sretin masá bano.<sup>24</sup> Yisas Karaisin avikasá tenti avábá ano sreti vaonafá orino.\*

\* **16:9:** Apo 19:8-10; 2Ko 2:12    \* **16:10:** 1Ko 4:17    \* **16:11:** 1Ti 4:12    \* **16:12:** 1Ko 3:6    \* **16:15:** 1Ko 1:16    \* **16:15:** Akaiá bara maen Kiriki akhempái van mino.    \* **16:19:** Apo 18:2, 18, 26    \* **16:20:** Kiriki vaya fintéi Tiyarafenurá ma monó tiyain nanin banta ano ma kantasí ukhein amónan maran iyain nan tikhen mino.    \* **16:22:** Kar 1:8-9; Rev 22:20  
\* **16:24:** Ínaimpá ma uvarein bompopmin ena vaya mo asotú ukhen mino. Mai vaya Mai fura ino sikhen mino.

# PORI MA KAN DÁDASÍEN KORINÍ NANIN BANTA UVAMAN AMEIN BOMPON MINO (2 Korini) **Kan Dádasí En Ma Korini Uvanteí Pákena Afova Vaya Ino**

*Ma vompon ma uvantein banta  
ino.*

Baya varen orin banta Pori ino.

*Uvarein orana ino.*

AD fifty-sevenifin mino. Esé bompon uvádan manáa viyon orivin mai oyampákéi ma vompon uvanten mino.

*Ma vompon ma uvantein baru  
ino.*

Kiriki varafin bain baru Masedoniá ino. Taitasi ma Koriní me ampiren ma evaránen ovan mi uvaren mino.

*Ma vompon ma uvaman  
amikhein kéká ino.*

Koriní barurá ma monó tiyan mumunan iyain nanin bantafin mino.

*Nái ana vará ma vompon uvan-  
ten nafino.*

Koriní baru ráké kampun afova amin banta kayo ano Porini vaya varen orin doran má pura sikhein kama vaya ma sian dákó iyain ma san ma uman amiyain nan mino. Pori vei yoran má Yisasini kama vaya ma siamiyain ma san mi esé araí in ai (sapta) kayofin ákonæn tian amá ukhen mino. Yerusalemí ma monó tiyain nanin banta ma ayain moní ma karú darú in má inká Taitasi ma Koriníké

ovaránen erin nain damu san ma sikhei páken nan sapta eiti vá naini vápin tikhen mino. Monó nanin banta vá ma ará manafiní in avúavákai Pori orikhen mino. Sapta teni (10) fin amen avaya ano manáa mo enará ukhen mino. Sapta teni (10) ráké tetini (13) fin ma orikhein mai manáa nanin banta ano ma ída ará baeran báken Porin uman amiyan ará namu uantiyan baya ino.

## *Porini Amusin Baya Ino*

<sup>1</sup> Yisas Karaisini kama vaya varen mo vanasi siamino van ma Tiyarafenu ano vei anunurá tiviká ein banta séi Porin má inká tetisi kama sifá tiváe Timotin má anon ma vompon uvaré uno.

Mai ma Koriní barurá baona monó nanin banta kayo vá inká Ákaiá barafin má ma mumunan kéká baonafái uvamádékun oren mino.

<sup>2</sup> Teti Sifóe Tiyarafenu vá inká Bafan Yisas Karaisini sarisari vá ará kusin má ano sretin má banten mino.

## *Tiyarafenu Ano Ma Minó Nanin Banta Ará Kusiantein Baya Ino*

<sup>3</sup> \*Tetisi Bafan Yisas Karaisin Afóe Ayarafenun avisá daní ótifano. Mai véi anon tetin nan arunan uren kusin timé iyan mino. <sup>4</sup> Teti ma umampin oré tifékun ma véi setin kama uren kusin timé iyainí esá ena nanin banta ma umampin orintí maé kamaé aya ékun ná kusin barano.

<sup>5</sup> \*Mai fara vara seyo, Yisasi ma vareiní ukhein uman ma seti variyaruna van mi Tiyarafenu ano Yisasin pinté uaren tetin moékan arunan é iyan mino. <sup>6</sup> Máan tiyantí tetí ma uman baranuna anon tiretin ará kusiantantin Tiyarafenu ano sretin kanaíen aya uren evaránen aviranten mino. Mai fara vara seyo, Tiyarafenu ano ma setin tirá

\* 1:3: Rom 15:5    \* 1:5: Íbo 34:19

kusisintan nain manon tiretin ará ákona uantanten mino. Máon ma urantiyan bempáké báke mai ma setí ankan bariyarunaí ukhein uman baran nono.<sup>7</sup> Tetí ankan ma ákonáé iniyaruna mai ma seti variyarunaí ukhein uman ma saretí ankan má dere varesin maen Tiyarafenu ano saretin mái ará kusin aminten mino.

<sup>8</sup>\*Mumunan tiyofi sisá tiváeyan noe, Esiá barafin ma setin timaniná afoká ukhá ein uman afová ono van muno. Kákán uman urói afoká uven tetisi ákoná maman bararasí uraká tetí ankan puronté uno sé inikhá uno.<sup>9</sup> Pura ino. Tetí ankan purimpin tisintákaren mifo mai yaná ma yáko ein nan ída setisi ákonará ino sé iné tifanté umpo füká ein ma evaránen avían manté iyain mai Tiyarafenu ákonará ino sé uno.<sup>10</sup> \*Tiyarafenu ano furin pintena setin tiya uren tivíkein béisano anan ena ena setin tiya uriyán tiviranten ne sé iniyá ave ukheruna mai yaná afoká inten mino.<sup>11</sup> Tiretí ankan ma setin tiyae amúkeona vá inká kokhon nanin banta ano má amúkein mái Tiyarafenu ano iniren mi setin tarisari uren tiya ukhein kokhon nanin banta ano setin too varen béisano tusu siantanten mino.

### Pori Ma Orono Sikhá Ein Nan Ma Sirun Noe Sein Baya Ino

<sup>12</sup> Máon tukhein nan mi setiyan timo siyá uno. Tetí ma saretin má báké ma saretimpin má inká ena nanin bantafin má ma yoriyá eruna mai fura sen puntákein inin má avúavá bá ma Tiyarafenu ano simikheintái yoriyaré uno. Ena nanin banta vá tiretí ankampin má ma yoriyaré eruna mai ída setisi ákonará ifo Tiyarafenu sarisarirá ino.<sup>13</sup> Tiretí ankan ma kasae yankáde afová oren bompon mi séi uvaman amiayaruna

manáa Yamú ma oriyantiyan tetí ma siamiyaruna vaya oman afova suron inono.<sup>14</sup> \*Taréa setinti vaya ana manáon afová iyaona ínaiimpáké minó afova ureya Bafan Yisasi ma ovaránen erin nain damuí saretin ma amo siyarunaí eya setin timo sin nono.

<sup>15</sup> Mai fara vara seyo, saretí ankan nare o ódékuya kan dádasí e avu varano van mi sirá mantiyá inikhé uno.<sup>16</sup> \*Téi ma inikheruna mai Masedoniá barafá ma oronté tiretin e oné orikharé ma ovaráne erenté maé tiretin má e vákuya mai ráké aaí usintesí Yudiá barafá oronté uno.

<sup>17</sup> Ma vaya ma sian damuáderuna van tiretí ankan ten nan ineine uren ifá inten minó té iniya rafono. Ída ino. Mai ma vara ráke nanin banta ano ma vaya sian damiyan ma varanté uno sen inká ída varanté uno sen uren ma mai yaná kasaen bariyainisá iya rafuno. Ída ino.

<sup>18</sup> Tiyarafenu ano minó bei vaya ánaín mi yakhafé iyain bantí pasé máon manan onté uno. Téi fura siré tiretin tiamiyá uno. Téi ma siyaruna vaya kayo mai séi ma varanuna yana san mi fura sé tiyá uno.<sup>19</sup> \*Mai fara vara seyo, Tiyarafenu Anin Yisas Karaisini vaya gefái sen má Sairasin má inká Timotin má ano siamiyáké bémipin eyo sin manan ban mifo mai ma arakhéké iyan ída ino ma sin má eyo ma sin má bémipin ída vane séku inikha ono.<sup>20</sup> \*Mai fara vara seyo, Tiyarafenu ano ma iyáantan baya kokhon uron mi varé íkan Yisasi ano mai vaya kayo me kanaí ukhen mino. Máon tukhein nan mi setí ankan mai véin pinté uaré pura ino siyáké maé Tiyarafenu aví daní é iyá tiféuno.<sup>21</sup> Mai van mi Tiyarafenu ano setin má inká tiretí ankan má aní uren mi setin

\* **1:8:** Apo 19:23; 1Ko 15:32    \* **1:10:** 2Ti 4:18    \* **1:14:** 2Ko 5:12; Fir 2:16    \* **1:16:** 1Ko 16:5-6    \* **1:19:** Apo 18:5    \* **1:20:** Rev 3:14    \* **1:22:** 2Ko 5:5; Efe 1:13-14

ákona simiká Yisasin má manafin báké mantaan ákona ukhé tiféuno.  
<sup>22</sup> \*Máan tukhékun pasen kokhon daná ma setin timeno van ma kaúdákein pintena Kantá Aunan pói araíen aní daná tetin túpin kain eravíkan tetin maman bei vanasiú ukhen mino.

*Pori Ma Ída Ainen Evaránen Koriní Barufá Orein Baya Ino*

<sup>23</sup> Tiyarafenu ano séin afová ukhái furan tiyá uno. Tiretin uman amenaen tiré Koriní barufá ída ainé evaráne oré uno.  
<sup>24</sup> \*Tiretin amusin ameno van mi siretin má doriyá umpsa ída siretitum munantá dafisintó uno. Para vara seyo, mununampin pefái mantaan ákona ukha rono.

## 2

<sup>1</sup> \*Mai van mi séi ovaré me iniré ída vá betin ena vá mo uman amékun aú arun barano sé iniréi ifá é uno. <sup>2</sup> Mai fara vara seyo, séi ma siretin uman amirékun ma arunanápin basin maen mai ena intéa kékasá bain ná téin timusin timinten nafino. Ída ino. Tireti anan ba ono.  
<sup>3</sup> Mai van mi gefá ma yé kun orein bom pom pin máa sé uvantaré uno. Téi ma oré kun maen mai ma séin moékantá amusin timiyain kéká ano ída vá tirun naná timino sikháré umpsa séi ma inikheruna mai sempin ma vain timusin tireti ankan má dere varano van muno. <sup>4</sup> \*Tiretin nan kákón tirunáná bariyáké ifí pintéi mai vompon uvaré uno. Tireti ankan arunaná amen novara ma vompon uvare raumpo séi ma siretin nan moékantá tinunu iyaruna mai afová ono van muno.

*Ena Nanin Bantai Ume Ma Ampiantan Baya Ino*

<sup>5</sup> Mana vanta ano ma e manten tireti ankan uman amintiya ma arunanápin basí mai uman téi ída varanté umpsa monó nanin banta

ma amikhein uman mai manáá sesosikhái séi ída kanaí é kokhon baya senté uno. <sup>6</sup> Máan turaya ma kokhon mano mai uman daíde ma mai vanta ameona uman mai kanaí ukhen mino. <sup>7</sup> Máan tukhein nará mai vanta enádá ída uman ame vá beni ume ampiantádeya kama e ayaesin ná ída arunanápin báken amusin ná ino. <sup>8</sup> Máan ture véin aní eya en nan para sinunu iyá uno vá tenovan mi éin duvuniyá uno. <sup>9</sup> Éi intesá é tenti vaya iniré bákurinte fono van mi mai vompon uvaman amé uno. <sup>10</sup> Éi ma mana vantai ume ampiantesí maé inte uman ná béis mantaren nafi mai séi yere veni ume ampiantanté uno. Tiretin naren tiré Yisas Karaisin ayorá máan tonté uno. <sup>11</sup> \*Máan tékun Ban Anon mano ída kanaíen tetin akhenóka intí eravé tinkamó tifano van muno. Para vara seyo, veni namu avúavá pefái seti afová ukhé tiféuno.

*Auyen Kasen Ban Avúaváí Yoran Banta Kékáí Vaya Ino*

<sup>12</sup> \*Troasí barurá ma Karaisini kama vaya seno van ma oriyá bá o oné kun maen Bafan mano gefái senti aa uvíádan baren mino.

<sup>13</sup> \*Máan tukhan mifo mairá ma kusen ban nan ída sinunu ukharé uno. Mai fara vara seyo, se sífá tiváe Taitasin ída onté pasé betin nan me sirun noe siré béis nan dosintó Masédoniá oré uno.

<sup>14</sup> Máan tukhantí tetí ankan Tiyarafenu vará tusu sian tátifano. Mai fara vara seyo, Tiyarafenu anon Yisas Karaisin pinté uaren tetin tiyá minó danápin esanté iyá uno. Tiyarafenu anon tiyá Yisas Karaisin pákena afova vaya minó akhempá tiyákun kama uveri aunka ma orera einíi iyan mino.

<sup>15</sup> Mai fara vara seyo, inarufá orin aintá manta ma inká aron i van masípin orin aintá manta ma ukhein kayofin tetí ankan

\* 1:24: 1Pi 5:3    \* 2:1: 1Ko 4:21    \* 2:4: Apo 20:31    \* 2:11: Ruk 22:31    \* 2:12: Apo 14:27; 1Ko 16:9    \* 2:13: Apo 20:1

aunka uveri an mi yakhé tifé kun Yisas Karaisi ano setin máden íkun uan Tiyarafenun amiyan mino. <sup>16</sup> \*Mai ma inarufá orin aintá ma mantakhein kayo ma aunan amin uveri ano ma kama aunka einí ukhé tifé umpo mai ma verai siyan ban barufin ma orin aintá ma mantakhein kayofin namu aunka ma iyain uveri an mi yakhé tifé uno. Iye anó mai avúavápin kanaí inten nafino. Ída ino. <sup>17</sup> Máan tukhéi setí ankan ona ma mamáken miyaní ino van me khoe khoe en noin kayo an ída yakhé tifé uno. Moní barano siren ma monó ten noin kayo kokhon mi van mino. Tetí ankan Yisas Karaisi yafíká ben avorá pura sen puntákein avúavákái Tiyarafenui vaya sé nó tifé uno.

### 3

#### *Aposeri Kéká Mai Auyen Kasen Ban Avúavái Yoran Banta Kayo Ino*

<sup>1</sup> \*Araíerá téi kamaé puntáké doriyá unó terá evaráné te simo siya rafuno. Ída ino. Tetí ankan manáa kéká an derá tetí siví daní ono van ena vanta kayo ano uvamádein bompon ná amiya rafu áa sirtí ankan mano máan ukhein bompon uvamádesin tetin tiyaino vará iya rafuno. Ída uron mino. <sup>2</sup> \*Tiretí ankan manan tetisi vompon bákeya súká uvanten nan minó nanin banta ano mai vompon mi yankáden afová é iyan mino. <sup>3</sup> \*Tetí ankan ma yoriyaruna yoran manon aníen Karaisin pinté erikhein bompon mino siyan mino. Mai vompon maen ída vompon dankafó uvanten mifo fara van oriyan ban Tiyarafenui Kantá Aunan pói uvanten mino. Onámaná daro sa uvanten naifo vanasi aúkái uvanten mino. <sup>4</sup> Yisas Karaisin

pinté uaren mi Tiyarafenu ano setin tiyaí mai yorarí iyái ventá anan ákona inin kaúké tifé uno. <sup>5</sup> Ída setisi ákonarái mai yoran doriyá tifé uno siré tetí siví daní otifanté umpo Tiyarafenu finté anan mai ákona eré iyan mino. <sup>6</sup> \*Máan tukhan Tiyarafenu anon tivíadá auyen avúavápin ma kasen ban doran bantaí ukhé tifé uno. Peyante man baya ano ída kanaien ayun ma fara van oriyan ban aunan timinten mifo mai ma auyen kasen ban avúavákái Kantá Aunan mano ayun ma fara van oriyan ban aunan timikhen mino.

#### *Auyen Kasen Bani Kakhan Ákona Ino*

<sup>7</sup> \*Mosesini Man Baya ma onámanáká uyantaré ein mai kama aa sákéi amikharen mifo mai ano furin manan dákó iyaren mino. Mai man baya ano Tiyarafenui kakhan mái eríkan Mosesin auná pinté panu uron tiyákan Isarerí nanin banta ano ída kanaén ben auná onen mifo mai kakhan mano ainen mo kípen mino. <sup>8</sup> Máan tukhen mifo saréa ma Kantá Aunan mano yoriyain khakhan mano ídá moéken esantakhen nafino. <sup>9</sup> \*Banta ma aruan purin daná ano ma kakhan baren erikharé intin ma inká auyen avúavápin kasen ban mano ma setin nan puntákein nanin banta ino ma sikhein panu anon moékakhen mino. <sup>10</sup> Máan tukhein nan mi auyen kakhan manon pura sen peyante kakhan esantakhen mino. <sup>11</sup> Para vara seyo, feyante avúavá ano ainen kípan kakhan mái erikharen mifo auyen avúavá anon moékan kakhan má para van oriyan banten mino.

<sup>12</sup> Máan tukhein nan mi setisi ákona inin mairá kaúdákéi ída feran kasaé baya siyá uno.

\* **2:16:** Ruk 2:34; 2Ko 3:5-6    \* **3:1:** Apo 18:27; 2Ko 5:12    \* **3:2:** 1Ko 9:2    \* **3:3:** Eks 24:12; Yer 31:33; Isi 36:26-27    \* **3:6:** Yer 31:31; Yon 6:63; 1Ko 11:25    \* **3:7:** Eks 34:29    \* **3:9:** Diu 27:26; Rom 1:17    \* **3:13:** Eks 34:33

<sup>13</sup> \*Máan tukhantí tetí ankan ída Mosesin an dé mai ma ve aunápin panu siyan ma Isarerí kayo ano onan nae siaren ma yavaráe fóké iyareiní ó tifanté uno. <sup>14</sup> Máan tukhan taréa yere feyante Man Baya yankafiyán mifo mai ma fefá iyákáré ein davaráe ano vetí ankaní inintá para iyákán ída kanaíen beni ana afová iyan mino. Yisas Karaisintá ma mumunan intin manan mai ma iyákein davaráe yo varanten mino. <sup>15</sup> Máan tukhan taréa yere Mosesini Man Baya ma yankafiyán maen mai ma iyákáré ein davaráe ano vetí inintá para iyákán pasen beni ana ída kanaíen afová iyan mino.

<sup>16</sup> \*Máan té iyan mifo Bafantá ma ará baéden mumunan inain kékái ineinerá ma iyákáré inain davaráe Tiyarafenu ano yo varanten mino. <sup>17</sup> \*Máan tinten mifo Bafan maen Aunan mi váken pasen interasá Beni Aunan ban nafi mairái kusin amé iyan mino. <sup>18</sup> Máan tiyain nan mi mai yavaráe ano ída setin tunáká iyákein Bafani kakhan mano setimpin eriaren kamu finté ma mo fanu seinén ena nanin banta fanu siantanten mino. Bafani Aunan mano setimpin bempáké erirú iyan tetin maman béin an darantin beni kakhan mano setimpin bíkaoren ena nanin banta mo fanu siantanten mino.

## 4

### Bara Khavefin Ma Kama Yanasinta Vain Baya Ino

<sup>1</sup> Máan tukhein nan mi Tiyarafenu ano vei arunaná pinté uaren ma yoran timikhái ída sivesara iyá tiféuno. <sup>2</sup> \*Máan tukhái setí ankan betin ayave amin avúavá ída variyá inká ída auráké iyá tiféuno. Tetí ankan

ídq ena nanin banta máká maáká iyáké inká Tiyarafenu vaya ída ovaédé tiyá tiféuno. Tetí ankan Tiyarafenu avorá puntákein bayá anan tiyá tifékun mi kama ineine ma vain kéká anon pura sen afová iyan mino.

<sup>3</sup> Máan tukhen mifo seti ma kama vaya siyaruna ano inte kayo avorasá davaráe ano ma iyareiní iyan nafi mai o afeyoran nain kékái váká tetí afová ukhé tiféuno.

<sup>4</sup> \*Ma vara ráke Ban Anon mano vetí ankaní inintá dasirádán pasen Kama Vayai ákona kakhan ída oniyán mino. Yisas Karaisi ma Tiyarafenu aman manon báká ma veni ákona kakhan nan ma siyaruna van ída iniyán mino.

<sup>5</sup> Mai fara vara seyo, setisi sivútivá pákena va siamé nó tífe raumpo Yisas Karaisi ma setisi Bafan bain mai véin páken nan tiamiyá tiféuno. Inká béis ma setin tiya ukhein nan mi sretin ayain kékái vá tiféuno. <sup>6</sup> \*Mai fara vara seyo, fefá ma ma varafin titípa ukháiñ ma kakhan afoká ino síkán ma afoká ein Tiyarafenu anon tetin túpin kakhásintái nó tiféuno. Mai khakhan manon tetinti inin amá usintái Yisas Karaisin pinté uaré Tiyarafenu ákona kakhan oniyá tiféuno.

<sup>7</sup> \*Máan tukhen mifo mai ma ainan duvé iyain bara khave kayo an mi setí ankan dakhé tifékun mi Tiyarafenu kakhan mano ma setimpin bain manon kama yanasinginta ma vara khave kayofin bainí ukhen mino. Máan tukhan mi setin pinté uaren aní ino van mi Tiyarafenu finté mai kakhan ákona ano erikhen mifo ída setin pinté erikhen mino. <sup>8</sup> \*Máan tukhan minó akhen pákei ara ara uman mano setin timaniná afoká iyan mifo mai ano setin ída maman bararasí iyan mino. Máan

\* **3:16:** Eks 34:34    \* **3:17:** Yon 8:36; Rom 8:2    \* **4:2:** 2Ko 2:17; 1Te 2:5    \* **4:4:** Efe 2:2; Kor 1:15; Ibu 1:3    \* **4:6:** Esé 1:3; Ais 9:2; 2Ko 3:18    \* **4:7:** 2Ko 5:1    \* **4:8:** 2Ko 1:8; 7:5

tiyan mai ano setinti inin máden asuse iyan mifo ída ifá iyá tiféuno. <sup>9</sup> Namuro kayo ano setin timaniná ara ara uman kaé é iyan mifo Tiyarafenu ano ída setin oyan timé iyan mino. Tetin tiruren namurá maé e mantaaré para yoré oriyá tiféuno. <sup>10</sup> \*Yisas Karaisi ma vareiní ukhein ái bá uman má ma variyá tiferuna anon béis ma evaránen e mantakhein ákona aníin oniyan mino. <sup>11</sup> \*Mai fara vara seyo, seti ma ayun para vá tiferuna nanin banta ano ma Yisasin ánaín bákuriyaruna van mi furin uman tetin timaniná kaiyan mino. Máan ma inain manoi setinti yan bukhafa fintena Yisasini ayúavá onanten mino. <sup>12</sup> Máan tukhein nan mi seti ma furin uman bariyá tiferuna anoi sirectimpin ayun ma fara van au-nan afoká uantiyan mino.

<sup>13</sup> Máan tiyan mai van mi í Bom-pompin pefá máa sikharen mino. "Tiyarafenu rái mumunan iyáké tiyá uno." *Íbo 116:10*

Máan ma sikhá einí é tetí ankan deren mai manái mumunan mái vá mai vaya kasaé tiyá uno. <sup>14</sup> \*Mai fara vara seyo, Yisasi ma fukaréin ayíán mantein Tiyarafenu anon béis má tetin tivíán mantarantí siretí ankan má manafin ben avorá o mantanté afová ukhé tiféuno. <sup>15</sup> Mai yanásinta ma setin turá afoká iyain mai siretí ankan aya ino van mino. Tiyarafenu sarisari ano kokhon nanin banta aviádantí Karaisi vaípá eriven béis avi moékantá daní intin khakhan ákona ano véimpin bíkaaren avan inten mino.

### *Ákona Yorarí In Baya Ino*

<sup>16</sup> \*Mai van mi setí ankan ída ifá onté tiféuno. Setinti yan bukhafa finte ákona kípé iyan mifo minó damú Kantá Aunan manon túpin

\* **4:10:** 1Ko 15:31    \* **4:11:** Rom 8:36    \* **4:14:** 1Ko 6:14    \* **4:16:** Efe 3:16    \* **4:17:** Rom 8:17-18    \* **4:18:** Kor 1:16    \* **5:1:** 2Ko 4:7    \* **5:2:** Rom 8:23    \* **5:6:** Ibu 11:13-16

evaránen auyen ákona simé iyan mino. <sup>17</sup> \*Mai fara vara seyo, saréa seso sikhein uman mi variyá tife umpo ínaimpáké para van oriyan ban kakhan mi siminten mino. <sup>18</sup> \*Máan tintéii saréa ma uman bariyá tiferuna van ída iniyá uno. Para vara seyo, seti ma oniyá tiferuna mai ída ayáká ban uman mifo mai ma fara van oriyan ban danasinta ma ída onté tiferuna ano ma simusin timin nain nan mi saréa inikhé tiféuno.

## 5

### *Tiyarafenu Ano Ma Fara Van Oriyan Ban Bukhafa Simin Nain Baya Ino*

<sup>1</sup> \*Mai fara vara seyo, ma varará ma yavaráe namun uvantáin ma varákiyain an mi setin tu ano yakhá afová ukhé tiferuna furé maé ma vararái ma vukhafa me ampé tifanté uno. Máan tuvintin maen para van oriyan ban bukhafa ma Tiyarafenu ano veyantá uvantein timídantí inarufá o vá tifanté uno. <sup>2</sup> \*Máan tukhein nan mi inaruráke vukhafafó auí daná ma usínteini ino van mi ma vara ráke vukhafafó berai siyá tiféuno. <sup>3</sup> Mai fara vara seyo, inaru ráke vukhafa ma usintádantí maé ída sivápá vátifékun onanten mino. <sup>4</sup> Para vara seyo ma vara ráke vukhafafin ma váké berai siyá umpo ma vukhafa ída vantí bano vara siya rauno. Ída ino. Inaru ráke auyen bukhafa mamarékuñ mai ano ona an davintin mai vukhafa ano ída furinton para vano van mi siyá uno. <sup>5</sup> Tiyarafenu ano mai anarái setin uváden mi mai ma kama yanásinta ma iyátintákein ma ínaimpáké timin nain mi aníen Kantá Aunan timikhen mino. <sup>6</sup> \*Mai vukhafafin ma vá tiferuna anon Bafani varufin ben má ída vátifé umpo mai ma iyátintákein

danásinta anon ena ena setin tirá ákona usintiyá mai seti afová ukhé tiféuno. <sup>7</sup> Máan tiyain nan mi setí ankan mumunantái vátifé umpo suufó ma onan tasa ino. Ída ino. <sup>8</sup> \*Máan tukhá ma vukhafa me ampiré Bafani varufin ben má o vá tifano van moéké tinunu ukhéi mai van ákonaé iniyá tiféuno. <sup>9</sup> \*Mai van mi ma vukhafafin má inká ena vukhafafin má ma vanté maé mai véin ma amusin amin inin onan masá bá tifano. <sup>10</sup> \*Mai fara vara seyo, minó anon Yisasini yaimin karáká oré tifé kun maen teti ma mai vukhafa vá báké ma kama yana safi namu yana safi ma variyá ótífáruna avúavákai miyan timídú inten mino.

*Tetí Ankan Tiyarafenu Ará Manafín In Baya Ma Vanasi Siamin Baya Ino*

<sup>11</sup> Máan tukhein nan mi setí ankan Tiyarafenu van pédé ben aránaópá bákéi véintá mumunan ino van banasi ákonaé tiamiyá uno. Mai yorarí ma iyaruna mai Tiyarafenu ano gefá afová ukhái mai siretin má dere afová ono van mi ákonaé iniyá uno. <sup>12</sup> Máa senuna van tetin nan puntákein banta kéká ino sireya simo seno vara ma vompon uvaman amiya rauno. Ída ino. Tetisi sivútiva san amusin ureya mai ma yan bukhafará ana oniyá ma súkáké Tiyarafenu funtákein avúavá ma variyaruna kéká san ma soyampá bayá siyain kaylorá daffán ákona ono van mi siyamiyá uno. <sup>13</sup> Onesí ma óen áén ma iyáku mae mai Tiyarafenu ano kákán bí barano van mumpo inká onesí ma funtákein inin ma variyáku mae mai siretin nan mi iniré máan tiyá uno. <sup>14</sup> Mai fara vara seyo, Karaisini avábá anon tetin tirá mantarái siretin nan inire mumunan ono van mi siamiyá uno. Mai ma Yisasi

ma minó nanin bantai ume van púkein nan mi setí ankan dere fúaré e mantakhé uno sé mumunan iyá tiféuno. <sup>15</sup> \*Minó nanin banta van mi véi fúken mifo aun ma vantin ban nain kayo ano veyan nan ída vá inin naifo mai ma vétin nan e fúaren ma e mantakhein banta van mana vá inino.

<sup>16</sup> Máan tukhein nan mi ma vara ráké avúavápó banasii avúavá taréa ída yaimiyá tiféuno. Pura ino. Pefá maé barará avúavápó Karaisini avúavá daimiyá tifé umpo sareá ída ino. <sup>17</sup> \*Máan tukhein nan mi mana ano ma Yisasin má o súpá inten maen béis auyeníi inten mino. Beni feyante avúavá ano e kípavintin auyen avúavá bái vanten mino. <sup>18</sup> \*Karaisi ma varein avúavá kái Tiyarafenu ano setin evaránen tivíden mi auyen avúava sínta simiren inká ena nanin banta ma o avíán dantin ma véin má ará manafín in doran tetin timikhen mino. <sup>19</sup> \*Mai fara vara seyo, Tiyarafenu ano Karaisimpin báken mi minó nanin banta vá ma manafin kusen ban aa uví dáken pasen taréa ída vanasii ume yankáden uman amiyan mino. Máan tukhein nan mi vanasi ma o avíán béis amin doran mi setin timikhen mino. <sup>20</sup> Tetí ankan Karaisini oo vanta kékái vákun Tiyarafenu ano setin pintéi uaren tiretin baya siamiyan mino. Tiyarafenu vá manafin kuse vano van mi Karaisin oo varé tiretin tútúpé ariyá uno. <sup>21</sup> \*Karaisi maen ída ume van banta ifo setin tiya ino siren mi Tiyarafenu ano setinti namu avúavá maman Karaisin amaniná kaúdán mi íkun uan Tiyarafenun amikhein pasé béis pinté uaréi Tiyarafenu funtákein nanin bantaí ó tifanté uno.

## 6

<sup>1</sup> Tetí ankan Tiyarafenu vá

\* **5:8:** Fir 1:23    \* **5:9:** Kor 1:10; 1Te 4:1    \* **5:10:** Afo 12:14    \* **5:15:** Rom 14:7-8    \* **5:17:** Rom 8:1; Kar 6:15    \* **5:18:** Rom 5:10    \* **5:19:** Rom 3:23-25    \* **5:21:** Ibu 4:15

manafin doriyákéi véi ma sarisari ukhein nan béis pákaan ákona ono van mi ínané tiamiyá uno. <sup>2</sup> Para vara seyo, véi máa sikhen mino.

“Teyantá ma saretin avídé kama onuna yamú ma aní ukharé eruna yamú afoká iká tiretí ifí iniré aya é uno.” *Ais 49:8*

Tiyarafenu ano ma saretin aya uren ma evaránen aviriyan damuí saréa vaono.

*Pori Ma Uman Kayo Yosiá Ein Bayo Ino*

<sup>3</sup> Banasi ano setisi yoran nan namu yorarién mino sin nain nan pasé mana nanin bantai inarufá orin aasá ída mana yaná maman iyariyá uno. <sup>4</sup> Tetí ankan Tiyarafenui yoran banta kékái váke pasé kama avúavá anan ena nanin banta aní é iyá uno. Máan tiyáké maé tetin timaniná ma aau fi uman nafi ma afoká iyá maé mantaan mi ákona ukhé bá tiféuno. <sup>5</sup> \*Banasí ano siruren karavusifin pákaan kaiyan inká namuro kayo ano sisiren tinkayan tiyá maé tetí ankan kákán uman uron bariyá maé ída kamaé tuun bariyá inká tirafan báé iyá uno. <sup>6</sup> \*Kantá Aunani ákona fókéi sirá kusin avúavá bá ena avábá in má inká kama ineine uren ma funtákein avúavá baran mái fákáraké doriyá uno. <sup>7</sup> Tiyarafenui ákona ano setimpin bakái fura sikhein baya anan tiamiyá uno. Puntákein avúavá pói setisi siruvín danasí é inká tankoi é ukhé tiféuno. <sup>8</sup> Manáa nanin banta ano sinkayan máden toyampá baya siren kampun dorarii iyan mino siyan maen inká manáa ano setin timo siren kama yorarii iyan ne siren tetin tiví daní iyan mifo setí ankan Tiyarafenui yoran para yoré oriyá banté uno. <sup>9</sup> \*Banasí ano ma ída afová ukhein banta

an dakhé tifé umpo minó anon tetin afová ukhen mino. Purin mano setin pákiyan mifo ída furiyá tiféuno. Inká tetin tinkáden purin tirirí iyan mifo ída furiyá tiféuno. <sup>10</sup> Tetisi sirun nanápin bá umpo ena ena yamú Tiyarafenu ano simusin manan timé iyan mino. Minó daná ída vá bá umpo ena nanin banta ayaé kun inaru fáke kama yanásinta variyan mino. Inká ída mana yaná dékun ban mifo minó danái kanaí ukhé tiféuno.

<sup>11</sup> Koriní ma vaona nanin banta oe, fura vayan tiretin tiamiyá pasé tukákéi saretin tirá amé tiféuno.

<sup>12</sup> Tiretin nan moéké tinunu iyái saretin ída sirá namu uantiyá umpo mai setin ará namu usintiya nái sirá ída manafiní ukhé tiféuno. <sup>13</sup> \*Tiretin ma sirá amerunaí eya vá tetin ará timeno van mi ve afóe ano ma ve akhafana siameiní éi saretin tiamiyá uno.

*Ída Ma Mumunan Iyain Nanin Banta Vá Ma Ída Manafin Doran Baya Ino*

<sup>14</sup> \*Ída ma monó tiyain kéká bá ída vá o súpá uveya yorari ono. Mai fara vara seyo, funtákein avúavá bá namu ayúavá bá ano ída manafin dorarí inten mino. Inká kakhan má titípa vá ano ída manafin túpá inten mino.

<sup>15</sup> Yisaín má Ban Anon má ano ída ará manafiní ukhein pasinti monó ma siyaona nanin banta ano ída kanaíeyá ída ma monó tiyain nanin banta vá o súpá uveya yoran nono. <sup>16</sup> \*Ayarafenui monó namun má kampun ayarafenui monó namun má kasaesá maman túpá ótifante rafuno. Ída ino. Mai fara vara seyo, aun ma fara van oriyan ban Tiyarafenui monó namun mi setí ankan báken pasen bái máa sikhen mino.

“Téi ano vetin má báké

\* **6:5:** 2Ko 11:23-27    \* **6:6:** 1Ti 4:12    \* **6:9:** 2Ko 4:10    \* **6:13:** 1Ko 4:14    \* **6:14:** Efe 5:11    \* **6:16:** 1Ko 3:16; Yer 32:38; Isi 37:27

betin aúbaná nó maé  
 Betí Ayarafenu váken inká  
 tenti vanasin banten mino.”  
*Riv 26:12*  
 17 \*“Máan tukhein nan mi Bafan  
 mano siyáken  
 mai kéká me ampire nentá  
 oriveya  
 vetí fain danasinta ída aruvesirá,  
 tiretin avirano sen mantino.”  
*Ais 52:11*  
 18 \*“Minó ákona ma vain Bafan  
 mano máan mi sen  
 mantino.  
 Tiretin Afóení éku mae inká  
 ten tikhafanaü inono.” *2Sa 7:14*

## 7

<sup>1</sup>Téi ma sinunu ukheruna sirona  
 kéka soe, Tiyarafenu ano ma  
 amenté uno siren ma iyáantan  
 baré ein danasinta inka varé tifé  
 umpo erisá dante vukhafa vá tú  
 iyampon má ma fainiín avúavá  
 do sesé uan karúdaré avusese uve  
 sá ben nan mana feriyáké kantasi  
 ukhein avuavá ana vá bará tifano.

*Koriní Nanin Banta Ano Ma Ará  
 Baerein Nan Ma Pori Amusin Ein  
 Baya Ino*

<sup>2</sup> Tetí ankan ída maná vanta  
 namu uanté, aré asé inká ena  
 vanta kampun tiré namu yanápin  
 avión kaüké tifé umpo ara sa  
 timeno. <sup>3</sup> Ma ma siyaruna mai  
 siretin au finí in baya va siya  
 rauno. Ída ino. Pefái siretin  
 tiamiyái setí purasé túkákéi siretin  
 nan tinunu iyá uno séku inikha  
 ono. Mai van mi furonte rafu áa  
 fá bante rafu mai avúavá anan  
 bariyá banten mino. <sup>4</sup> Ara ara  
 uman ma setin timaniná erí ma  
 siretin nan ovaré me inékun maen  
 mai anon tirá kusin timé iyan  
 mino. Máan tiyain nan mi sreti  
 ankan nan kákán timusin uan  
 tiyákéi ma vaya siamiyá uno.

<sup>5</sup> \*Mai fara vara seyo, Mase-  
 doniá barafá ma onóbekun maen  
 ara ara vayafó tetin uman timíkan

mai anon tikhokho fan tufá  
 tivesaraen mino. <sup>6</sup> Máan tiyákun  
 mifo mai ma uman baren ará  
 namuin ma ará kusin amé iyain  
 Ayarafenu ano ma Taitasin tiantan  
 orein manon tirá kusin mo simen  
 mino. <sup>7</sup> Taitasini erin mano  
 ana va sirá kusin timen naino.  
 Tireti ma véin má dere ará kusin  
 amireya inká ten timaniná ma  
 afoka ukhein dana san ma arunan  
 usintáde ma sretií avábá ma aní  
 eona van ma véi me sisimein nan  
 mi kákán timusin é uno.

<sup>8</sup> \*Tenti vompon mano sreti  
 ankan ará namu uantáken mifo  
 mai van ída sirá amé uno. Mai  
 fara vara seyo, fefá tirun noe siyá  
 umpo saréa afová é ma vompon  
 mano manáorái sretin ará namu  
 uanten mino sé iniyá uno. <sup>9</sup> Mai  
 vompon ma uvaman amiré kun ma  
 ará namu eona rasa saréa simusin  
 iya raumpo Tiyarafenu anon mai  
 ará uman maman dákó en mino.  
 Mai anón tiretií ineine maman  
 amá urayan ará baere ompo set-  
 inti vaya ano ída uman amen  
 mino. <sup>10</sup> \*Tiyarafenu anón ará  
 uman maman dákó uran mi mai  
 anó setisi inin maman amá uren  
 tiya íkái sirá baédékun evaránen  
 tiviré iyan mino. Máan té iyan  
 mifo mai ma ída aúkáké tirunoe  
 sin aú baerarí ma ein nanin banta  
 anon purin maman dákó é iyan  
 mino. <sup>11</sup> Tiyarafenu ano ma mai  
 arunaná maman dákó ein manon  
 kama avúavá sintá maman tiretin  
 aúbaná dákóen mino. Mai avúavá  
 sintá maen ákona inin má doreya  
 inká tiretiyan maman aní eya ída  
 ume vane seja inká tireti ankan  
 ume van aranan iyáke akhokho  
 van eya inká téin tonano van eya  
 inká kama e yafibe yoreya inká  
 ena ma funtadé yaimin avúavá ma  
 vareona ino. Mai avúavá ma eona  
 anón aní eya sretimpin ída mana  
 aau van minon te ono. <sup>12</sup> Aau  
 vanta fi áa aauí uantan banta fi  
 funtarano vara séi mai vompon

\* **6:17:** Isi 20:34, 41; Rev 18:4    \* **6:18:** 2Sa 7:8; Yer 31:9    \* **7:5:** 2Ko 2:13    \* **7:8:** 2Ko 2:4  
 \* **7:10:** Mat 27:3-5; Ibu 12:16-17

uvare rauno. Ída ino. Tiretí avúavá e unen dákó édavintiya Tiyarafenu avorá teti nan purase anunu ono van mi mai vompon uvaman amé uno. <sup>13</sup> Tiretin ma setin nan anunu iyaona avúavá anon tetin tirá ákona usinté iyan mino.

Inká mai ma Taitasini ará uman ma maman kusiantádeya ma véin amusin ameona avúavá bá ano yeren tetin kákán timusin timen mino. <sup>14</sup> Tiretí kama avúavá san amo sé pefái Taitasin tiamikharé ékuyan mai ma séi siamikáreuna avúavasí uren nái séi ída siyave van é uno. Mai fara vara seyo, Taitasi ano yeren tenti vaya van puran tikha ono sen mino. <sup>15</sup> Taitasi ma sreti vaonafá oríka ma avinantan má béin e avire mo kauráke ma ven oo yaiiyá eona van béis moékantái arunan uantiyan mino. <sup>16</sup> Máan tiyain nan mi sreti ankan nan moéke kama avúavasí inono se mumunan iyáke timusin uantiyá uno.

## 8

### Tiretí Ankan Aúkákesá Avari Ono

<sup>1</sup> \*Mumunan tiyofi sifá tiváyan noe, Tiyarafenu ano ma Masédoniáke monó kéká ma sarisari uren aya ukhá ein onano van muno. <sup>2</sup> Betí ankan amaniná kákán uman uron afoká íkan minó dana san o afasí iyáken mifo mai van betí ankan ída inina mai ma ona ída van ma o afasí iyain kéká ameno siren amusin má kokhon moní átaru en mino. <sup>3</sup> Mai ma átaru ein moní betí anunu finte nái máa yákaren nafi mai máa me khaúdú en mifo mai esantaren moéken karúden mino. <sup>4</sup> Máan tiyáken inká setin nan áesí Yerusalemí ma vain mumunan kéká bá dere aya ono siren ákonéen tútúpiyaren mino. <sup>5</sup> Máan tiyaren mifo esé daná betiyan Bafan amiren inká

betí ará tetin timiren mi mai ma Bafan mano vetin amein inin ánaín bákuren téten timiyan mino. Betí ankan ída kanaén baranten mino siré inikháeruna avúavá esantaren moéken avúavá variyan mino. <sup>6</sup> Pefá Taitasi ano ena nanin banta ma aya kama yaná amin dorarí ono van tiretin ará ákona uantaya yókareya afová ukhe nái véi evaránen o váké dóan kípano van mi ákoné tiyá uno. <sup>7</sup> \*Tiretí ankan ara ara yoran ma variyaonafin kama iya ono. Tiretí ankan Tiyarafenurá mumunan iyákeya ída feran kasaé mai ma mumunan iyaona avúavá tian amá iya ono. Inká tiretí ankampin kokhon afova vakaya Tiyarafenui yorarí ono van moéke anunu iyákeya setin nan iniya ono. Máan mana e vá ena ma amin avúavápin ná tiretí ankan moékantasá dorano.

<sup>8</sup> Téin too yaiye mai yorari ono vara yuvuniya rauno. Ída ino. Ena nanin banta ano ma mai yorari ono siráken ma iniyain nan mi sreti ankan ma ena ayábá uantan avúavá purase aní ono van muno. <sup>9</sup> \*Mai fara vara seyo, sreti ankan pefái setisi Bafan Yisas Karaisini sarisari in avúavá onta ono. Béis ma inarufá báken maen minó danáí yan baren mifo sretin naron tiren ona ída van banta an den mino. Mai ma inarufá bain danasinta varano van mi máan ten mino.

<sup>10</sup> Tiretí ankan ma moní átaruin dorarí ukhá eona fákena sesi inin máan mi ukhen mino. Maman ma esantein oranafin tiretí ankan mai yoran araí urákeya mai yorari ono van anunu iya ono. <sup>11</sup> Máan tiya ompo mai yoran ná e yore mo kípano. Pefá tiretin ará ano mai yorarí ono siren mantakhen mifo sreti ma yákánona avúaváka tiya vá ameno. <sup>12</sup> \*Para vara seyo, Tiyarafenu ano inte yanasá tiretí

\* **8:1:** Rom 15:26; 2Ko 9:1-2    \* **8:7:** 1Ko 16:1-2    \* **8:9:** Mat 8:20; Fir 2:6-7    \* **8:12:** Mak 12:43-44

ankan dákefo mai aúkáké ma amin nan mi amusin ukhen mifo ída ma vain dana san ída inikhen mino.

<sup>13</sup> Tiretí ankan mana mai uman baresin ena nanin banta ayo avábaká baño vara ma vaya siya rauno. Ída ino. Minó ano manaí ukhein uman barano van mi siyá uno. <sup>14</sup> Taréa saretí ankan kokhon daná kaen nan bái kasa eya vetin aya ukhá esin ná inká anona sireti ma o afasí inona yamú anona aya ino. Máan ma inte mae minó ano manaí ukhe van nono. <sup>15</sup> Mai van ma Tiyarafenui vompon dókifin máa sikhen mino.

"Kokhon dunan ma átaru uan kaé iyain kéká ano ída esantaren kai é iyan mino. Inká manáa yunan ma átaru é iyain kéká ano ída o afasí é iyan mino." Eks 16:18

### Taitasin Ma Siantan Koriní Or-ein Baya Ino

<sup>16</sup> Téi ma saretin nan iniyarunaí en ma Tiyarafenu ano Taitasin inin iniyain nan mi Tiyarafenu tu-su sian tiyá uno. <sup>17</sup> Tiretí ankan baonafá orino siré tetí tiantékun eyo sikhareni mifo véi yere orivé mai yorari ono siren moékantá anunu iyaren pasen mi vei anunu finté tiretí baonafá orinten mino. <sup>18</sup> Tetí ankan ena sífá tiváen má deren Taitasin má tiantékun orinten mino. Tiyarafenui kama vaya ma véi siamiyain nan mi monó nanin banta ano véin amo sé iyan mino. <sup>19</sup> Mai avúavá máa rasa ino, Monó kéká ano ven ma sá moní ma átaru uádán baren Yerusamí orino sikhen mino. Tetí ankan mai yorarié Tiyarafenu aví moékantá daní iyáké inká tetí ankan mai yorari ono van inikhé uno vá té banasi aní ono. <sup>20</sup> Mai ma átaru uran moní baré Yerusaremi oronunafin ída mo asuse urékuñ mana ano namu ineine ino van mi mai sifátiváen má aviré uno. <sup>21</sup> Para vara seyo, setí ankan puntákein avúavási ó tifanté umpo

\* 8:24: 2Ko 7:13-14 \* 9:1: 2Ko 8:1-7

ída vá Tiyarafenu avorá ana kama avúavási ono van iyáké bana-nasi avorá basá máan ó tifano.

<sup>22</sup> Máan tukhá ena sifátiváen má békantái muntaré tiantékun oren mino. Kokhon damú ara ara yorampin bén akhen ókha ékun ákona yorarií oné uno. Béi fura sen tiretin nan kama avúavási anan inono sen afová ukhen pasen bén mai yorari ono siren kákantá anunu ukharen mino. <sup>23</sup> Máan tukhen mifo manáa ano ma Taitasin nan ma ina intiya mae siamiyákeya senti mana yoran bantan báken tiretin ayaé iyan mino vá teno. Ena sífá tiváe kan maen ena akhen pákena vantá kan mi o varen monó dorarí iyáken Karaisin kákan bí amiayain mino vá te siameno. <sup>24</sup> \*Máan tukhein nará tiretimpin ma kama avúavá bain ná míkan banta rasá aní ono. Máan tesin ná tiretimpin ma ará amin avúavá bain minó nanin banta ano afová uren ná pura ino sen onano.

## 9

### Yerusaremi Ma Vain Monó Nanin Banta Ano Ma Moní Átaru Ein Baya Ino

<sup>1</sup> \*Téi ída kanaié Tiyarafenu vanasi ma aya iyaona fákena van tenté uno. <sup>2</sup> Mai fara vara seyo, saretí ankan ma amusin má ma ena nanin banta aya iyaona avúavá téi afova ukhé pasé Masédoniá kayo avorá tiretin amo sé iyá uno. Tiretí Akaiá barafin ma vaona kayo van pe o útúben maman oranafin mi mai yorari ono siren útakhen mino sé tiamé uno. Tiretí ankan ma ará bá ena amin avúavási eona ano vetí ankan ará manter nan pasen betí deren mai yorari ono van en mino.

<sup>3</sup> Máan tiyan mifo saretí ankan amo sin bayá ma siyá eruna van banasi ano iniren ída aniana ino van muno. Mai ma siameruna yanásinta útakhe fono van mi

maí kanan banta ano onano van tianté kun oren mino. <sup>4</sup> Mai fara vara seyo, Masédoniáké ma manáa kéká ano sen má oriyaren o onanti ma ída útakharé esí maé mai setí ankan tiyave van éku mae sretí moéke ayave van inono. <sup>5</sup> Mai van mi iniré pe o útubé tifá tiváeyan tianté kun oren mo aya inti mai ma monó kéká amusin ameno van ma iyánten nan baré ein danasinta úton kaono van muno. Téi ará bá ma amin amusin nan mi inikhé umpo enai yuvuntá ma amin amusin nan ída siyá uno.

### *Danayun Pafasintá Ma Sian Baeran Baya Ino*

<sup>6</sup> \*Tiretí ankan afosasá ono. Tanáa yanayun ma fafa sikhareya sanáa yunan mi yuyasin nompo kokhon danayun ma fafa sikhareya kokhon dunan mi yuyasin nono. <sup>7</sup> Máan tukhantiya mana mana vanta ma ona ameno van inteya ovare me inídeya vá ameno. Ída vá enai yuvuntá ameno. Mai fara vara seyo, ará bá ma amin nanin banta van mi Tiyarafenu ano anunu é iyan mino. <sup>8</sup> Máan ma esin Tiyarafenu ano éi ma ininyaona yanasinta víkaantádantiya fase onesin kokhon danasinta vanti kasaé ena nanin banta avari inono. <sup>9</sup> Mai van Tiyarafenu vompon dóki ano máa sikhen mino.

“Bé ve ina yanasintafó ona ída vain nanin bantafin amusin dan orera en mino.

Beni funtákein avúavúa ano fara van oriyan banten mino.” *Íbo 112:9*

<sup>10</sup> \*Máan tukhan Tiyarafenu anon danayun amiren inká bái anan ara ara yunan amé iyan mino. Máan manan en minó danasinta amintiya maifó ena nanin banta aya iyasin pasen mana vanta ano ma kokhon danayun pafa siráken ma kokhon dunan duyasiyainí

\* **9:6:** Pro 11:24-25   \* **9:10:** Ais 55:10   \* **9:11:** 2Ko 1:11; 4:15   \* **10:1:** 1Ko 2:3   \* **10:2:** 1Ko 4:21

eya funtákein avúavá kayo varan nono. <sup>11</sup> \*Máan tesin Tiyarafenu ano kokhon danasinta amintiya mae maifó máan mana eya ena nanin banta aya inono. Máan tukhantiya mai yanasinta mare mae ona van ma o afasí iyain kéká amesin mi vetí ankan mai avúavá san moékantá Tiyarafenun tusu siantanten mino.

<sup>12</sup> Máan tinten mifo sretí ankan ma varanona yoran manon Tiyarafenui kéká ayaintin maen ída mana yana san o afasí iyáken Tiyarafenun moékantá tusu siantanten mino. <sup>13</sup> Máan te ma ena amin avúavá anoi Tiyarafenu aví daní inono. Para vara seyo, éni moéken amin avúavá anon mi anien Yisas Karaisini Kama Vaya yakhafiya ne sinten mino.

<sup>14</sup> Máan tesin maen mai nanin banta ano Tiyarafenui sarisari ma vetí ankampin bíkakhein nan tiretin moéken anunu uren Tiyarafenu ano sretin kama ino van amíkuantanten mino. <sup>15</sup> Máan tukhantí Tiyarafenu ma moékan kama ukhein amusin daná ma simikhein nará tusu sé tifano.

## 10

### *Pori Ma Monó Dorarí Iyáken Mai Yoran Ma Ákona Ein Baya Ino*

<sup>1</sup> \*Tiretí banasi ano séi nan tiyáke Pori ma setin má báken maen periyen baren ma enafá o van mi ákona vayafó bompon uvan man timiya ne siya ompo Karaisi ma einí éi seyan bararasí uré bempáke bákéi sretin tiamiyá uno.

<sup>2</sup> \*Te ma iniyaruna ída mai ano kanaí inten mifo intéa kéka sará bara ráke avúavá bariyan ne siyan nafi mai kékápin ída ákona é baya seno van muno. <sup>3</sup> Pura ino. Tetí ankan ma varará bá umpo ma vara ráke nanin banta ano ma siruveini sa iyá tife rauno. Ída

ino. <sup>4</sup>\*Ída ma vara ráke aruvin danasinta ifo inaru fáke Tiyarafenu ákona aruvin danasinta fóí Ban Anoni ákona yafu ankanan mádariyá tiféuno. <sup>5</sup> Mai aruvin danasinta fóí Tiyarafenu kama ayúavá ma yanasi ano afova ono sein ma iyákaré ein aruan mádariyá tiféuno. Inká mai aruvin danasintafó anan betí átakharéin ineine ma vá ein do maman karúdaréi Karaisin oo yaiyino van afova amiyá tiféuno. <sup>6</sup> Máan tukhantin intéa kéká anó iniren dakhafiyantin ná inká intéa kéká anó mai ánaín ída yakhafinten nafi mai kékái uman amenté uno.

<sup>7</sup> Tiretí ankan afoká ma vain danasintarái ineine kaiya ono. Mana ano ma Yisas Karaisini vantan bá uno ma sinten ná mai setin má deren Yisas Karaisini vantan bá tifé umpsó véi ovaren ná me inino. <sup>8</sup>\*Para vara seyo, sretíi mumunan ákona uantano van mi Bafan mano mai yoran timikhantí pasé ída sretíi mumunan mádé asuse onté uno. Máan tukhantí mai yorantá ma seti siví daní onté ída siyave van ó tifanté uno. <sup>9</sup> Máan tukhantíi sesi vompon pöké tiretin ída akhokho amiran muno. <sup>10</sup> Para vara seyo, manáano ano siyáken Porini vompon mano setin ákonará duvun iyan mifo seti varunará mai vempáké tiyan mino. Máan tukhan maen beni vaya mai ída ákona ukhen mino. <sup>11</sup> Máan baya ma siyain kéká ano vá ovaren me afová ino. Mai ma enafá báké ma vompompin uvaman amikharé eruna mai sretin má ma e váké mai avúavú anan baranté uno.

<sup>12</sup> Máan tukhantí manáá kéká ano ma ve amo siren be aví daní é iyainí ída onté uno. Inká tetisi sivútvá bá betin avúavábá manaí ukhen ne ída senté uno. Ída ino. Mai kéká maen betiyantái enai avúavá óden betí avúavá daimen non mifo mai kékápin ída fura

afova van mino. <sup>13</sup>\*Máan tukhantí tetisi sivútvá ída maman daní uré tetimpin ákona van mino sé tifantéuno. Tiyarafenu ano ma setin timikhain doran máráai seti simo siré mai máa anan doriyáké bái ma mai ayúavákasá daimono ma sikhein márá anan daimonté umpsó Tiyarafenu ano ma iniádan baré einíi eya sretin mái mai yorampin baono. <sup>14</sup> Máan tukhein nan mi ída moéké teti simo siyá umpsó mai ma Tiyarafenu ano simikhain kanarái sé teti simo siyá uno. Mai fara vara seyo, setí ankan naren araié Yisas Karasini Kama Vaya sretimpin baré orikharé uno. <sup>15</sup> Máan tukhá ena ano ma yókeintá ída seti siví maman daní iyá uno. Tiyarafenu ano ma simikhain doran puntadé dorékun mai ano sretíi ankaní mumunan ákona uantantin tetisi yoran mano sretimpin mo kokhoní ino van muno. <sup>16</sup> Máan intí maé tiretin oyampá ban ma ída yoriyain baru kayo fimpá bá orivé dorano van muno. Para vara seyo, ena ano ma fefá dókein baru kayofin dóde te simo sira rauno. Ída ino. <sup>17</sup>\*Mai van Bompon dóki ano máa sikhen mino. “Banta ano ma mana vanta amo seno vará Bafan mano ma yókein nará amusin uren ben mana vá amo sino.” Yer 9:24

<sup>18</sup>\*Para vara seyo, vanta ano ma amusin iyáken beyan amo sé iyain kéká maen Bafan avorá mai kayo ída kákání ukhen mifo véi ano ma mana vanta kákán bí amé iyain banta anon kákán bí baré iyan mino.

## 11

*Porin Má Kampun Aposeri Kayo  
Vái Vaya Ino*

<sup>1</sup> Téi ma fara aniana vaya siyá báké ma se simo siyákuya mai ída vá me ifá ono. Tirun mompo mai ma aniana vaya ma

\* **10:4:** Efe 6:13-17 \* **10:8:** 2Ko 13:10 \* **10:13:** Rom 12:3 \* **10:17:** 1Ko 1:31 \* **10:18:** 1Ko 4:4 \* **11:2:** Efe 5:26-27

siyaruna vá ineno. <sup>2</sup>\*Mai fara vara séi saretí ankan nan kokhon ineine iya rauno. Tiyarafenu ano yeren kokhon ineine iyái mai van mi vanta amikhein arinta ano ma ákona en bainí ukheya Karaisin má bano van mi siamiyá uno. <sup>3</sup>\*Máan tukhen mifo gefá ma osafae ano Ivin ma mákasikharé einien Ban Anon mano saretii inin máden asuse intiya mai ma funtade Karaisin ánaín dakhafiyá inona me ifá ure kampun avúavápó béin dakhafinona van mi iniyá uno. <sup>4</sup>\*Para vara seyo, saretí ankan ma onékuya enará ukhein Yisasin má Kantá Aunan má monó baya vá pákena van ma ena kéká ano me siyákaya mae saretí ankan kasae mumunan iya ono. <sup>5</sup>\*Máan tiya ompo setí ankan kama uron mi iyá uno ma siyain aposeri kayoi aránaópá téi ída vá uno. <sup>6</sup>\*Máan tukhéi vanasifin ma sándaen monó baya sin afova ída manté umpsu fura sé betin esantaréi afová ukhé uno. Mai afova gefái ara ara aa sáké tireti ankan aní ékuya fura se afová ukha ono.

<sup>7</sup>\*Máan tukha ompo séi ma seyan bararasí uré tireti vaipáke ma ída miyan inantinton Ti-yarafenu Kama Vaya ma siamiyaruna mai umesá iya rafuno. Ída ino. <sup>8</sup>\*Tireti ankan ma fara aya ono siré ena monó kéká ano ma karúdarú uádan pintena moní ma variyaruna anoi umoyaní ma einí iyá uno. <sup>9</sup>Máan tukhantií saretí ankan baonafá ma o varé maé mana yana san ma o afasi ma é ída saretí vaonafá inan té iyá uno. Mai fara vara seyo, Masédoniáke ma erein tifá tiváeyan mano mai ma o afasi iyá eruna yanásinta simikhantií pasé téi ída kanaié tireti siya ono van mana yana san inan tenté uno. Ída uron mi

máan tonté uno. <sup>10</sup>Téi fura sé afová ukhékun Karaisini fura yaná ano sempin bantí pasé mai ma ída miyan bariyaruna van Akaiá barafin ma minó akhempá nöké mai van kasaé te simo senté uno. <sup>11</sup>Mai séi fará tireti vaonafá mana yana san ída inantiya rafuno. Téi ída tiretin nan tinunu é iya rafuno. Tiyarafenu ano afová ukhái séi fura siré tireti nan moeké tinunu iyá uno. <sup>12</sup>Máan tiyái mai ma setin má manaí dorarí iyá uno siren ma vetiyan amo siyain kéká aa yasíkano van pasé para máan tiyá banté uno. <sup>13</sup>Mai kéká maen kampun doran banta kayo ino. Betí avúavá ano saretin aurráké uren Yisas Karaisini kama yoran banta ma einí é iyan mifo ída ino. <sup>14</sup>Máan tiyan mifo séi ída sinú diyá uno. Para vara seyo, Ban Anon mano yere kasaen kakhan enisorí ma einí iyan mino. <sup>15</sup>Máan tukhantiya Van Anoni yoran kéká ano ma ara ara avúavá pójé ma vanasi mákáden ma vetiyan nan puntákein kéká uno ma sin nain nan tireti ankan ída vá anú duman duman iya vá baro. Ínaiimpáké betí ankan ma variyá inain avúaváká miyan baranten mino.

### *Porin Amaniná Ma Eriyain Uman Kayo Van Ma Sein Baya Ino*

<sup>16</sup>Mai ma gefá tiamikharé eruna mai vaya anan taréa evarané tiamiyá uno. Mana vanta ano sen nan ída vá óen iya ne sin nompo séi ma manáá aniana vaya ma siyákeyá mai kampun banta kayoi vaya ma iniyonaí eya senti vaya inésí maé manáqrá te simo seno van muno. <sup>17</sup>Au khakan in avúava san Bafan mano ída anunu ukhen mifo séi maen óen banta an mi iyíyá uno. <sup>18</sup>Máan tukhein nan mi kokhon nanin banta ano ma vara ráke avúavápíñ au khakan inté intí maé mai sen mái máan tonté uno. <sup>19</sup>Máan tukhein nan mi intéa kéká

\* **11:3:** Esé 3:4, 13    \* **11:4:** Kar 1:8-9    \* **11:5:** 1Ko 15:10; 2Ko 12:11    \* **11:6:** 1Ko 2:1, 13  
\* **11:7:** 1Ko 9:18    \* **11:8:** 2Ko 12:13; Fir 4:15-16

anó mai van afová ukhé uno siyafó  
mai kéká ano óen kayo an mi yiya  
ono.<sup>20</sup> Máan tukhein nan mi mana  
vanta ano ma veni yorarí ono  
van duyun en nafi áa saretin nina  
yanasinta varen nafi áa saretin  
máká maáká en nafi inká tiretin  
maman bararasí uren beyan nan  
mana inian kákóni iyáken inká  
tiretin aqñá ma ankamen ma  
intiya mai saretí ankan ída mana  
avúavasí ukha ompo ifá en nan mi  
máan tiyan mino.<sup>21</sup>\*Máan tukhá  
téi siyave van ída kanaí é tiyáké  
tetimpín ída ákona vain mai yanasi  
ontere senté umpo vetí ankampin  
ákona van mi máan tiyan ne senté  
uno.

Betiyan ma inte yanápin nafi  
ma ve amo sintí maé mai seyan  
dere se simo senté umpo mai  
evaráné óen banta an mi yanté  
uno.<sup>22</sup> Máan tukhantin betí ankan  
Iburu kéká unó tinten nafi mai  
sen má Iburu vanta uno. Inká  
betí ankan Isarerí kéká unó tinten  
nafi mai sen má Isarerí vanta  
uno. Inká betí ankan Abraamun  
anavasin munó tinten nafi mai  
sen má ben anavasin muno.<sup>23</sup>\*Mai kéká ano Karaisini yoran  
banta uno sé iyan mifo séi mana  
óen banta an ma yiyruna anoi  
vetí ankan esantaré moékantá  
Karaisini yorarí iyá uno. Téin  
karavusifin pákaan moren ída  
yankaforen dádá dafiyó tinkáden  
tiruan purirí é iyan mifo séi  
moékantá ákona yorarí é iyá  
uno.<sup>24</sup>\*Yutan kéká ano yan  
manápá damúpin teti naini (39)  
yádái ákona yafiyópó tinkadú  
ukhen mino.<sup>25</sup>\*Kanú manaú  
dádasí en Romu kéká ano kunan  
dafiyópó tinkamen mino. Maná  
damú Yutan kéká ano onámanápó  
tinkamen mino. Inká kanú manaú  
dádá téi ma oreruna sipi namuein  
mino. Máan tuví mana inuran  
má bayan má un non daró noré  
uno.<sup>26</sup>\*Máan tukhá kokhon dádá

minópimpá ma nóké anon nonpim  
e iyankarí iyákon inká umoyan  
banta kayo ano siruren ten tina  
yanasinta yafiyaren mino. Inká  
ena anan nanin banta vá tesí kéká  
bá ano yere siroño van iyaren  
mino. Kákón baru kayofin nafi  
kámá barafa safi uman baré ída  
kama iyáre uno. Un nompin  
afeyorari é iyákon inká kampun  
ten monó kéká uno ma siyain  
kayo ano uman timiyan mino.<sup>27</sup> Máan tukhái séi kokhon damú  
ákona yorarí iyá paséi ída kamaé  
tuun baré iyá uno. Kokhon damú  
ída non má dunan má nanton  
tirafanan para e manté oré iyá  
uno. Ída ona vaká pasé iyon  
nan takhin takhin é iyá uno.<sup>28</sup> Máan tiyá maé monó nanin  
banta ano intesá ena ena uman  
kayo varanten nafi siré anomé iné  
iyá uno.<sup>29</sup> Manáa monó kékái  
mumunampin ma mo iyon in  
maen ten tufá ída mémú é iyan  
mino. Manáa kéká ma umefin  
mamádan eráyen ankamí maé  
tiran nan uantiá uno.

<sup>30</sup> Máan tukhantí te simo ma  
seno vará inte yanasinta anó tenti  
sivesara aní iyan nafi mai vará  
moékantá te simo seno van muno.<sup>31</sup> Mai ma ena ena aví dani iyain  
Tetisi Bafan Yisas Karaisin Afóe  
Tiyarafenu ano afová ukhái ma  
fura vayan tiamiyá uno.<sup>32</sup>\*Téi ma  
Damaskasí bákun maen Aretasin  
ne sin Kin ni kamanin banta kayo  
ano séi nan pákano siren aruvín  
banta kayo kaíkán kákán baru ona  
kayorá dafisen orikharen mino.<sup>33</sup> Máan tukharen mifo kákán  
barui kafi aimpinté uaren téin  
unampin uféden kaí aravuaré me  
oné karan oré uno.

## 12

*Pori Ma Ayankuní Ukhein Daná  
Aní In Onein Baya Ino*

\* 11:21: Fir 3:5 \* 11:23: Apo 16:23 \* 11:24: Diu 25:3 \* 11:25: Apo 16:22; 14:19  
\* 11:26: Apo 9:23; 14:5 \* 11:32: Apo 9:23-25

<sup>1</sup> Te siví ma yaní in pintena ída mana yaná baranté umpo ída ena aa vain pasé mai avúavá para varé oriyá banté uno. Máan tiyá banté umpo áesí Bafan mano ma séin tuu vaéden ma aní ein danasinta vá inká aú páke yanasinta vá tiaméku vá ineno. <sup>2-3</sup> Téi Yisas Karaisini yoran bantan baré ékun Tiyarafenu ano e siviren dan uron inarufá módá bákun fotini. (14) oranan orikhen mino. Mai sen tu minó bukhafa anó o van nafi áa saunan máa anó o van nafi mai séi ída afová ukhé umpo Tiyarafenu ano anan afová ukhen mino. <sup>4</sup> Téin ma siviren inaru varufin ma moráká maé téi sinú duré mai ma enará ukhein baya ma ineruna van ída kanaí é baya seren é uno. <sup>5</sup> Mai vaya ma inikherunará te simo senté umpo mai van ifá iyá umpo mai ma sesi ákona ma ída vain nan manan te siví daní onté uno. <sup>6</sup> Te siví ma yaní onté maé mai fura vaya anan tenté umpo ída óen banta an danté uno. Máan tonunaren mifo ifá é uno. Mai fara vara seyo, vanasi ano senti vayará ten tiví daní uren tenti ineine ánaín dakhafin nain nan paséi se ma variyaruna avúavá bá inká te ma siyaruna vaya vá inen onen ma uren maen ten nan puran tiyan mino sen inino van muno.

<sup>7</sup> \*Tiyarafenu ano kama yanasinta séin aní uren maen inká téin nan mai yanasinta van ovaren me inirene be aví daní inae siaren mana ayankun an dakhein daná áíkan ten tufin dafékakhen mino. Mai yaná maen mai Ban Anoni vaya varen orin bantan tiantan e váken mi séin nan be aví daní inae siren iyariyan ban mino. <sup>8</sup> Máan tiyáká mai yaná do maman karúdásintano van kanu manaú dádái simúkimpói Bafan baipá ínané inantiyaré uno. <sup>9</sup> \*Máan tékun maen béri evaránen tisimemí, “Ein an den ma ákona

ída vain nanin bantafin mi senti sarisari ano kama yorarí iyáken mai sarisari ano éimpin kanaí ukhen mino,” sen tisimikhá paséi senti ákona ma ída vain nan mi se siví daní iyáken maen Yisas Karaisini ákona ano sen pinté uaren doriyan mino. <sup>10</sup> Máan tukhein nan mi Yisas Karaisini yorarí impin ma ída senti ákona vantin ma vanasi ano siruren tisiren toyampá baya siyá ma kákán uman bariyaruna van mi simusin iyá uno. Para vara seyo, séimpin ma ída ákona van maen mai Yisas Karaisini sarisari anon téin evaránen ákona simé iyan mino.

#### *Pori Ma Korini Nanin Banta Van Kokhon Ineine Ein Baya Ino*

<sup>11</sup> \*Tireti ankan manon téin tirá maman mantarenái óen banta an davé te simo siyá uno. Tireti ano ma séinti sivútvá baya uvádeya ma séin timo seren mifo saretí ankan ída máan tená paséi seyantá tian dákó é umpo mai ma aví bain aposeri kayo aránaópá ída séi vá umpo séi faen danái vá uno. <sup>12</sup> \*Téi ma saretin aúbaná ma o váké maé ten nan purase aposeri ino seno van kokhon danái variyaré uno. Para vara seyo, séi nan Tiyarafenu yorarí iyan mino seya afová ono van paséi mantaan ákona uvé minó uman bariyáké maé inká enará ukhein danasinta vá aní danasinta vá maman dákó ukharé uno. <sup>13</sup> \*Ena monó namun kayofin ma monó tiyain nanin banta ma maman tiyaruna avúavá anan tiretin manan té umpo mana uman máan ída amé uno. Téin dunan timin uman ma ída ameruna ano ma namu ukhéku maeya mai ume vá ampisintano.

<sup>14</sup> Kanú manaú dádasí é tireti ankan baonafá orono van útakhé umpo mai ma oronunafin ída saretin uman amenté uno. Tireti

\* **12:7:** Yop 2:6    \* **12:9:** Fir 4:11-13    \* **12:11:** 2Ko 11:5    \* **12:12:** Rom 15:19    \* **12:13:** 2Ko 11:9

afová ukharono. Iyampon kayo ano ída yunan dosen be anoifon mo amé iyan mifo veticano ifon anon dunan dosen be akhafana mo amé iyan mino. Máan tukhein nan mi saretí minó daná barano vara oronte raumpo saretin nan mi oronté uno. <sup>15</sup> Minó te sina yanasinga vá te su vá tiretí ankan ameno van moéké tinunú iyá umpo saretí ankan téin nan ída anunu iya ono.

<sup>16</sup> Tiretin pinté manáa ano sen nan ída uman timiyán ne siren maen máa siyan mino. “Teti sira yanasinga ída afoká umoyan iyan mifo ara ara vaya kayofó tetin mákáden maen aupáké baré iyan mino.” <sup>17</sup> Mai intesá ukhen nafino. Mai ma siantékun orein banta kayo ayan také uaresá tiretin nina yaná umoyan bare rafuno. <sup>18</sup> \*Tiretí ankan baipá ma Taitasin tiantékun oriyá maé ena sivá tiváen tékun ben má muntaven oren mifo Taitasi ano saretin nina yaná mákáden na umoyan baren nafino. Ída ino. Para vara seyo, verasampin mana Aunan mi vaká mana aasái oriyá manaí doraríi iyá uno.

<sup>19</sup> Tetian aúpasí ono vara ma vompon uvaman ame rauno. Ída ino. Tetí ankan Karaisini yoran banta kékai váké Tiyarafenun avorá pura vayan tiyá umpo séi ma sinunu ukheruna sirona kéká soe, saretí mumuman maman ákona uantano van mi ma vaya siyá uno. <sup>20</sup> Para vara seyo, séi ma oriyá o onéku maeya séi ma inikheruna avúaváká ma ída vare ma inká tireti ma inikheona avúaváká ída séin tonanona van mi feriyá uno. Téi ma o onéku ma aruve asive in nafi ena ará namu uantan nafi ena aranan uantan nafi eyan nan mana inin avúava safi oyampá baya sin nafi e sian more mere in nafi au khákán in avúava safi asuse avúava safi ma

van nan mi feriyá uno. <sup>21</sup> \*Para vara seyo, fefá ma umeí iyá éona van ída ará baédeya sirun noe sen nan ma famukú avúava safi inká ena aranan avúava safi ma saretimpin para vain ma mo onéku ma Tiyarafenu ano siyave simin nain nan mi feri yá uno.

## 13

*Pori Ma Sipá Ákona Uanten Amaan Baya Sein Mino*

<sup>1</sup> \*Kanú manaú dádasí é tiretí ankan baonafá oronté umpo Tiyarafenu vompon dóki ano máa sikhen mino. “Kan nafi kanú manaú banta ano fi ma onantin ma mana vanta ano aaui ukhá inti mae kasae mai vaya kópin puntuaran nono.” *Diu 19:15*

<sup>2</sup> Pefá ma kan dádasí é ma saretin má báke maé mai ma umeí ukhá ein kayo fefá afova vaya siamikharé uno. Máan tukharéi saréa ma vompon ma uvaman amerunafin dere evarané mai ma umeí ukhá ein kayo vá ena kéká bá afova vaya siameruna fasintí téi ma oronté mai ma umeí iyáin nain kéká ída avo uantanté uno. <sup>3</sup> Máan ma ékuyan tireti afová eya Karaisi anon ben pinté uaren baya sisimiyan mino sinono. Tiretii avúava ma maman puntarampin béin ída afonakhein pasen bei kákán ákona fóti saretimpin doranten mino.

<sup>4</sup> \*Para vara seyo, fefá bémppin pura sen ída ákona van maen daa unkamádantá arukhareni mifo saréa Tiyarafenu kákán ákonarái van mino. Máan tukhan tetin má deren ída ákona van mifo véin má ma súpá ukheruna van mi Tiyarafenu ákona ano setimpin báken mi mai ákona ano saretimpin doriyan mino.

<sup>5</sup> \*Ena ena yamú ákonaé mumuhan iya rafuno sire vá e avúava bá

\* **12:18:** 2Ko 8:6, 16-18    \* **12:21:** 2Ko 13:2

\* **13:5:** 1Ko 11:28

\* **13:1:** Mat 18:16; 1Ti 5:19    \* **13:4:** Fir 2:7-8

ineine vá daíde vá onano. Eyan avádúan onesin ma Karaisi ma ída sretimpin banti maeya mai fura se ída mumunan ukha ono.<sup>6</sup> Máan tiyákeyan teti ma Karaisini yorarí iyaruna oman afová inono sé inikhé uno. <sup>7</sup> Tiyarafenu ano sretin ayaintiya ída namu avúavá barano van mi setí ankan timúkiyá umpo setin nan Karaisini yoran banta kéká ino sen banasifin tino varauno. Ída ino. Para vara seyo, seti nan kampun banta kéká ino siya ompo setinti kákón inin ma vain mai funtákein avúavá ana varano van muno. <sup>8</sup> Para vara seyo, setí ankan ída kanaí é pura yaná námuróí ó tifanté umpo mai yanákái mantakhé pasé mai yanái ayaiyá tiféuno. <sup>9</sup> Tetimpin ma ída ákona van ma sretimpin ákona vain nan mi simusin iyáké Tiyarafenu ano sretin ayaintiya ákona mumunan má bano van timúkiyá uno. <sup>10</sup>\* Bafan mano vei yorantá dafisino van mi séin aní ureñ ákona simikhá doriyákéi sretin má ma ída varuna afokhampin ma vompon uvamádékun oren mino. Mai fara vara seyo, séi ma oronté maé ída ákona vayafó tiretin má baya seno van muno. Tiretin máden asuse ino yara Bafan mano mai ákona simikhen naifo sretin ayaintiya mumunan ono van mi simikhen mino.

### *Pori Ma Amusin Ein Baya Ino*

<sup>11</sup> Mumunan tiyofi sifá tiváeyan noe, sesi vaya mará me akhení iyá tusu sé umpo senti kípan baya vá inero. Tiretíí namu avúavá ampiyea vá ben ákona uantan maran iya vá amusin iyáke inká manafin báke vá ará kusin avúavá baresin ná avábá ureñ ma ará kusiantan Tiyarafenu ano sretin má bano.

<sup>12</sup> Tiyarafenurá ma monó tiyain nanin banta ano ma avábá iyain

avúavá kasá ben avábá in maran ná ono.\* <sup>13</sup> Tiyarafenui kantasi ukhein nanin banta ayo amusin baya ne siádon oren mino.

<sup>14</sup> Bafan Yisas Karaisini sarisari vá Tiyarafenui avábá bá Kantá Au-nani manafin ban avúavá bá ano vá tiretin má bano.

\* **13:10:** 2Ko 10:8 \* **13:12:** Kiriki vaya fintéi Tiyarafenurá ma monó tiyain nanin banta ano ma kantasi ukhein amónan maran iyain nan mi sikhen mino.

# **PORI MA KARESIÁ NANIN BANTA UVAMAN AMEIN BOMPON MINO (Karesia)**

## **Karesia Vompon Ma Uvanteí Pákenai Afova Vaya Ino**

*Ma vompon ma uvantein banta ino.*

Baya varen orin banta Pori ano ma ma vompon uvantein nan kan ineinen iyan mino.

- (1) Karesiá barafin ma Pisidiá distrikifin ma sautí bain baru kayo Antiokí bá Aikoniamí bá Ristará bá inká Debé bápin ma esé araén monó dorarí uren ma avión mantakhá eimpín minon ten iniyan maen inká
- (2) Karesiá barafin ma notí bain baru kayofin ma kan dádasí en monó dorarí ukhá ein ne sen iniyan mino. Taréa ma Teki e siyain barafin mi Karesiá bara varen mino.

*Uvarein orana ino.*

- (1) Karesiá barafin ma sautí bain kéká ma uvaman amikhanten maen mai AD foti-eiti (48) fin nafi áa foti-naini (49) fin nafin uvanten mino. Mai maen kanisori kayo ano ída Yerusalemí átaru ukhan mino.
- (2) Inká Karesiá barafin ma notí bain kéká ma uvaman amikhanten maen mai AD fifti-siksi (56) fin nafi áa fifti-seveni (57) fin nafin uvanten mino. Mai maen Romú nanin banta ída vompon uvaman amikhen mino.

*Ma vompon ma uvantein baru ino.*

Kanisori átarufá Yerusalemí oriyáken nafi áa Masedonia safi áa Koriní barurá ma kanú manaú dádasí en ma monó

dorarién noren ma e váken nafin ten iniyan mino.

*Ma vompon ma uvaman amikhein kéká ino.*

Pori ma Karesiá barafin esé araén monó dorarí iyákan ma mumunan ukhá ein kékápin nafi áa kan dádasí ma en monó dorarí ikan ma mumunan ein kékápin nafi non ten iniyan mino.

*Nái ana vará ma vompon uvanten nafino.*

Monó nanin banta ma Pori afova amiyan ma Yisas Karaisintá ma mumunan esin maen mai avúavá anon auu ída manten ne sinten mino ma sikhá ein me ampiren man baya ánaín bákuriyaimpin mino. Kampun banta kayo ano kampun afova amiren enará ukhein bayafó banasi aviren tavi aasá oriyan mifo Pori ano vei vaya varen orin doran nan pura sen ákoná vain doran ne sen maman amá ukhen mino. Karesiá nanin banta ano ma Yutan kékái avúavá ánaín ma yakha fono van ma auu khavin daná ma maman kainten maen mai vetimpin manan minó afova van mino. Mai man bayai karavusii sá inten nafi áa Yisasin pinté uaren ná auu ivan kékási inten nafi mai vetíi anunu ino. Máón tukhen mifo mai ma monó nanin bantai ukhen ma amusin dosiyá ein mai ída vetíi anunu ánaín bákurinten mifo Tiyarafenun anunu ánaín dakhafen ena nanin bantai yorarién ná aya ino.

*Porini Amusin Baya Ino*

<sup>1</sup> Téi vaya ma varen orin banta Pori uno. Baya ma varen orin dorarí ino van ma vara ráke vanta kayo ano fi áa mana vanta ano fi ída séin aní uren ákoná simikhen mifo Yisas Karaisin má inká bein ma furin pintena avían

mantakhein Afóe Tiyarafenu vá anon mai ákona simikhen mino.

<sup>2</sup> Minó mumunan ayofi afá aváeyan manon ten má manafiní uven mi ma vompon uvaman Karesiá ma vain monó kayofin ma vaona nanin bantan amen mino.

<sup>3</sup> Tifóe Tiyarafenu vá Bafan Yisas Karaisini sarisari vá ará kusin má ano vá tiretin má bano. <sup>4</sup>\*Yisas Karaisi anon teti Sifóe Tiyarafenuí anunu ánaín dakhafen mi sareá ma vain namu avúavá pintena setin tiya ono van e fükaren mino. <sup>5</sup>Máan tukhein nará Tiyarafenu avisá ena ena yaní ó tifano. Pura ino.

### Kama Vaya Mana Anan Ban Mino

<sup>6</sup> Yisas Karaisini yoran táké uaren ma Tiyarafenu ano siretin kamaen tarisari uren arákaya ma veni vanasií ukharé eona kéká ano ma aine véin me oyan amire ma enará ukhein monó baya ánaín ma yakhafiya ona van mi séi sinúdiyá uno. <sup>7</sup>\*Ída ena kama vaya van mifo manáa kéká anón tiretin maman kufa uádaren mi Yisas Karaisini kama vayan do vaéadiyán mino.

<sup>8</sup>\*Máan tiyan mifofefá ma siamékuya inikhá inona kama vaya vá ma ída manaí ukhan nain monó baya ma setí ankan pinte safu áo inaru fáke enisorí ano fi ma me siamin nain mano vá ira khiyan ma uman baren berai siyan purin barufin ná típá o afeyorano. <sup>9</sup>Tetí ankan pefái siamikharéi sareá evaráné ákona iyá uno. Pefá ma inire afová ukhá inona monó baya vá ma ída manaí ukhan nain baya ma me siamin nain banta ano vá ira khiyan uman baren ma verai siyan purin barufin ná típá o afeyorano.

<sup>10</sup>\*Banasí amusin uantano vara ma vaya siya raumpo Tiyarafenun

mi amusin uantiyá uno. Banasi amusin uantano van ma iyanté maé mai séi ída Yisas Karaisini yoran banta uno.

### Yisas Karaisin Pinté Erikhein Bayan Pori Siyan Mino

<sup>11</sup>\*Mumunan tiyofi sifá tiváeyan noe, afovasá ono. Mai ma aya ureñ ma evaránen aviran baya ma siretin tiamikheruna mai ída mana vanta finté erikhen mino. <sup>12</sup>Mai vaya ída mana vanta finte varé kun inká mana vanta ano ída afova simen ukhen mifo Yisas Karaisi anon aú páke vaya simikhen mino.

<sup>13</sup>\*Pefá ma Yutan kayoi avúavá ánaín ma ákonáé dakhafiyáké maé Tiyarafenuí vanasií monó bá namuroí uré minó aruan kípano van iyákuya afová ukhare ono. <sup>14</sup>\*Téi Yutan kayoi avúavá ánaín ákonáé dakhafiyá paséi sinifu siráoni avúavá ánaín ma yakhafimpin te sivun kéká esantakharé uno.

<sup>15</sup>\*Máan tukhé umpo sinóén amúpim ma vákun mi mai ma Tiyarafenu ano ma aní ein damúi vei sarisarifó téin tararen aní urá bareí e vantaí é uno. <sup>16</sup>Bantai uvékuñ ena anan nanin bantafin be Anini kama vaya siamino van béin ten anien mino. Aní ma urá maé mai vayai ana sisimino van ída manáa kaylorá mo inaé uno. <sup>17</sup>Inká téi ída vákun ma vaya varen orin bantaí ukharé ein banta kayo onano siré ída ainé Yerusalemí ódé umpo Arebiá barafái o varé maé mai ráké evaráné Damaskasí oré uno.

<sup>18</sup>\*O vákun kanú manaú orana orivíká Pitan onano van Yerusalemí ódé ben má un bákun fiftini (15) yamú oren mino.

<sup>19</sup>Yerusalemí ma o váké maé baya ma varen orin banta kéká pintena ída mana oné umpo Bafan afá Yemisin manan oné uno. <sup>20</sup>Máan tukheruna van mi sareá

\* **1:4:** Kar 2:20    \* **1:7:** Apo 15:1, 24    \* **1:8:** 1Ko 16:22    \* **1:10:** 1Te 2:4    \* **1:11:** Mat 16:17    \* **1:13:** Apo 8:3    \* **1:14:** Apo 22:3    \* **1:15:** Ais 49:1; Kar 2:7    \* **1:18:** Apo 9:26-27

ma uvaman amiyaruna vaya mai Tiyarafenu avorá ída kampun tiyá uno. <sup>21</sup> \*Máan turé mai oyampáké Siriá bá Sirisiá barafá bá oré uno. <sup>22</sup> Oré umpo Yisasini vanasi ma Yudiá barafin ma vain kayo ano ída sen toman afová ukharen mino. <sup>23</sup> Máan tukharen mifo vanasi ano ma máa siyain baya anan inikharen mino. “Mai ma setin tiriyáken ma inká tetí ma mumunan iyaruna yaná ma máden namu ono van iyaré ein banta ano saréa mairá mumunan iyáken mai ma fefá namu ono van iyaré ein mumunan nan mi sian banasi amiyan mino” sin baya ma iniren maen <sup>24</sup> mai van Tiyarafenu aví daní iyan mino.

## 2

### *Ena Aposeri Kayo Ano Ma Porin Má Ará Mana finí Ein Baya Ino*

<sup>1</sup> \*Fotini (14) orana orivíkái Banabasin nú Taitasin nú bá Yerusaremí evaráné ódé uno. <sup>2</sup> Tiyarafenu anon téin aní uren maifá orino síkái Yerusaremí ma oré o váké maé ena nanin bantafin ma yoriyá eruna vaya kayo mai monó ánon banta kéká anan tiamiyaré uno. Taréa ma yoriyaruna yoran má peyante yoran má ano fara savifá o afeyoran nain nan mi vetí ankan iniren ará manafiní ino van mi máqan té uno. <sup>3</sup> Inká Taitasi maen Kiriki anan bantan báken téin má bákán mifo véin au khavino van betí ankan ída sen mino.

<sup>4</sup>\*Ída máa sen mifo Yisas Karaisi ano ma man bayai karavusi fintena ma setin tívíkein avúavá ma aní ukhein baya ma átoru uvé tiyá tiferunafin manáa kampun mumunan bain banta kéká ano e féken tifuriyaren mi mai karavusifin tetin evaránen tívian kaono van mino. <sup>5</sup> Máan tono van en mifo mai fara va vetin titó máa ída afokhan ame rauno. Kama

vayai fura yaná ano siretin má para vano van uno.

<sup>6</sup> Kokhon nanin banta ano Yerusaremí monó ánon bantai ma ukhein kéká san kákán bí mantén nen ten inikhen mifo séi ma inikheruna mai ída kákán daná ino. Mai fara vara seyo, aví bain má ída aví bain má ano Tiyarafenu avorá manaí anan ukhen mino. Mai van mi monó ánon banta kéká ano sentí vayará ída manáa mo asotúen mino. <sup>7</sup>\*Ída manáa vaya mo asotú ukhen mifo Tiyarafenu ano ma Yutan kayofin kama vaya siamin doran ma Pitan ameiní en ena anan nanin bantafin ma kama vaya siamin doran téin timikhen mino sen afová ukhen mino. <sup>8</sup> Mai fara vara seyo, Tiyarafenu ano ma Pitan má bákán ma Yutan kayofin doriyá einí anan en mi sen má báká ena anan nanin bantafin doriyá uno. <sup>9</sup> Yemisi, Pita, Yoni néne van ma vanasi ano monó ákona uantan banta kéká ino ma siyain kéká anon mai ma Tiyarafenu ano séin tarisari uren ma ma yoran timikhein ódaren mi Banabasi rasan nan kana ino siren e sivian betimpin kaen mino. Máan turen mi verasan ákonaen tisimiyáken tirékan ena anampin doresirá inká tetí Yutan kayofin dorano sen tisimen mino. <sup>10</sup>\*Máa siren mana vaya ma sisimein mai ona ma ída van nanin banta aya ino van mi sen mifo séi mai yoraríi fe iyákéi ákonaé doranté uno siré timusin é uno.

### *Pori Ma Pitani Namu Avúavá Maman Dákó Ein Baya Ino*

<sup>11</sup> Pita ma Antiokí erí maéi véi ma namu avúavá bariyain nan ben avorá asé uno. <sup>12</sup> \*Béi ma esé o unaven maen ena anan nanin banta ano ma monópin bain má kama avúavá en manafin kumamen dunan niyaren mino. Máan tiyaren mifo ínaimpáké Yemisi kéká ma oríkan maen au khavin avúavá ánaín ma

\* 1:21: Apo 9:30    \* 2:1: Apo 15:2    \* 2:4: Kar 1:7; 5:1, 13    \* 2:7: Apo 22:21    \* 2:10:  
Apo 11:29-30    \* 2:12: Apo 11:3

yakhafiyain kayo van péden betin má ída manafin kumamen dunan nen mino. <sup>13</sup> Máan tíkan inká Yisasintá ma mumunan iyain manáa Yutan kayo vá ano yere mai kampun avúavá barákan mai avúavá ano Banabasin má dere e aviádan maifin oren mino.

<sup>14</sup> Máan tiyáken betí ankan ída kama vaya ánaín puntáden dakhafiyái téi ódaréi ena kéká avorá Pitan tiamé uno. “Éi Yutan anan banta anon ena anan banta ano ma Yutan kayoi avúavá ánaín dakhafeiníi iyákeya ena anan banta ma vainíi ukha ompo fará ena anan kayo van Yutan kayoi avúavá ánaín dakhafino van duvun iya fono.”

*Yisasintá Ma Mumunan Iyain Nanin Banta Van Ma Funtákein Kéká Ino Sein Baya Ino*

<sup>15</sup> Máa siré tiamé uno. “Erasan Yutan anampin mi afoká ukhé umps ume van ne ma siyain anampin ída afoká ukhé tiféuno.

<sup>16</sup> \*Mosesini man baya ánaín ma yakhafintá Tiyarafenu avorá ída funtákeruna nanin bantaí ó tifanté umps Yisas Karaisintá ma mumunan inain nanin banta ano anan Tiyarafenu avorá puntáken banten mino. Yisas Karaisintá ma mumunan iyá tiferuna mai aa sáké anan Tiyarafenu ano setin nan puntákein nanin banta e sinten mino. Mai fara vara seyo, mana nanin banta ano ída kanaíen minó man baya ánaín ma yakhafin naintá Tiyarafenu ano funtákein nanin banta ino sinten mino.

<sup>17</sup> “Yisas Karaisintá ma mumunan ó tifanuna mai ano anan Tiyarafenu avorá puntákeruna nanin banta vanté tifé umps seti Yutan kayo vá deren ena anan nanin banta an dé umeí iyá tiféuno. Yisas Karaisi anó ayaen ume ákona uanté iyan nafino. Ída uron mino. <sup>18</sup> Mai ma séi ankaman barákuhká onunan man

baya ma evaráné uvaranté maé mai séi man baya yurafurein bantan bá uno senté uno. <sup>19</sup> Mai fara vara seyo, man baya ánaín ma vákurékun mai ano furino sin nain nan pasé mai ánaín ída vákuroncé umps Tiyarafenu vái súpá ukhé banté uno. <sup>20</sup> \*Máan tukhen nan mi Karaisi má téi fe fükéi séi seyan na va raumpo Yisas Karaisi anon tempin ban mino. Tiyarafenu Anin mano ma séi nan moéken anunu uaren ma sen nan e fükéin mumunantái vá uno. <sup>21</sup> Tiyarafenu sarisari ída maman paen danasí uré do ékano van muno. Mai fara vara seyo, Mosesini man baya ano ma Tiyarafenu avorá tetin maman puntákein nanin bantaí ma intin maen mai Yisas Karaisi fasavin puren mino.”

### 3

*Man Baya Ma Yakhafin Avúavá Bá Mumunan In Avúavá Bá Baya Ino*

<sup>1</sup> Karesiá nanin banta ano ma óen iya vaona oe, Yisas Karaisin ma yaa unkamádantá arukhá ein tiamékuya siretiyantá mai gefái siretin ma oneiní ukha ompo saréa iye anó tiretí ineine asuse uantiyan nafino. <sup>2</sup> Téi siretimpin mana vaya máan ina onté uno. Tiretí ankan ma Kantá Aunan bareona mai man baya ánaín ma yakhafintasá bare rafono. Áa kama vaya ma inirena mairá ma mumunan in tasá bare rafono.

<sup>3</sup> Kantá Aunani ákonará arae mumunan ukhare ompo fará óen uareyá tiretí ákonará mantákheyá Tiyarafenu ano kama vanta e sinten mino siya rafono. <sup>4</sup> Mai ma ara ara uman kayo ma siretimpin afoká iya ma verai siyáke ma variyá eona mai náiná anarasá mantareyá taréa fasavifá mai mumunan karúdanto rafono.

\* **2:16:** Apo 15:10-11; Rom 3:20-28; Kar 3:11

\* **2:20:** Kar 1:4

5 Tiyarafenu ano ma siretin Kantá Aunan amíden ma enará ukhein avúavá ma saretimpin aní iyain mai Mosesini man baya ánaín ma yakhafiyaona rasafino. Ída ino. Karaisini vaya ma inire mumunan iyaonará ino.

6 \* Abaraamun ná onano. Beni mumunantái Tiyarafenu ano funtákein banta e sikhan mino. *Esé 15:6*

7 Máan tukhein nan mi Tiyarafenurá ma mumunan iyain kayo van Abaraamun akhafana ino se afová ono van muno.

8 \*Ena anan nanin banta ano kama vayará mumunan intin betin nan puntákein nanin banta e sen aranten pasen mi Tiyarafenu ano afová ukhen kama vayafó pefái Abaraamun iyáanten bei Vompon dókifin máa sikharen mino. “Éin pintéi uaré ma varafin ma vain nanin banta minó avábá uantanté uno.” *Esé 12:3*

9 Máa sikhlein pasen mi ventá ma mumunan inain kéká ano yeren mai ma Abaraamu mumunan uren barein avábá baranten mino.

10 Máan tinten mifo man baya ánaín ma setí ankan bákuronunga anon Tiyarafenu avorá puntákein nanin bantaí onté uno ma sen inin nain kayo amaninái Tiyarafenui aran naná banten mino. Mai fara vara seyo, Tiyarafenui vompon dóki ano máa sikharen mino. “Tiyarafenui vompon dókifin ma minó man baya vain ánaín ma ída vákurin nain nanin banta amaninái veni aran naná banten mino.” *Diu 27:26*

11 \*Máan tukhein nan mi man baya ánaín ma yakhafin nain nanin banta ano Tiyarafenu avorá ída funtákein kayon banten mino sé afokái afová ó tifanté uno. Mai fara vara seyo, Tiyarafenui vompon dóki ano máa sikharen mino. “Mumunan ma inain nanin

banta van mi Tiyarafenu ano funtákein nanin banta e sirantin ayun para vanten mino.” *Aba 2:4*

12 \*Man baya ánaín ma yakhafin maen mai mumunan má ída manaí ukhen mino. Mai van mi Tiyarafenui vompon dókifin máa sikharen mino. “Ayun ma fara van oriyen ban aunan ma varano van inain mano vá minó man baya ánaín ná bákurino.” *Riv 18:5*

13 Máan tinten mifo man baya ano setin uman timiyaréin mi Yisas Karaisi ano setin evaránen tivirano van daa unkamádantá e fükán mi mai van Tiyarafenui vompon dóki ano máa sikharen mino. “Daa unkamádantá ma furin nain nanin banta amaninái Tiyarafenui aran naná banten mino.” *Diu 21:23*

14 Tiyarafenu ano ma Abaraamun iyáontákaré ein mai avu ena anan nanin banta ano Yisas Karaisin pintéi uaren evaránen aviranten mino. Máan tukhein nan mi mumunantá anan mai ma iyátintan baré ein Kantá Aunan baranté tiféuno.

### *Man Baya Vá Tiyarafenui Iyáantan Baya Fáke Vá Ino*

15 Mumunan tiyofí sifá tiváeyan noe, seti ma ma varará bá tiferuna fákena vaya siamékuya inin nono. Mana vanta ano ma ve ina yanásinta yaíden ma ve akhafana iyáontádú uren ma vompon uvamádantin baré inain mai ída ena vanta ano yo varen nafi inká asótúen nafi inten mino.

16 \*Tiyarafenu ano Abaraamun má be anin mái iyáontákaren mino. Mai van mi Tiyarafenui vompon dókifin ída kokhon iyampon nan “e akhafanafin” ne sikharen mifo “e akhápín” ne ma sikaré ein mai Yisas Karaisin nan mi sikharen mino. 17 \*Ma ma siyaruna vayai ana máan mi ukhen mino. Tiyarafenu ano Abaraamun má

\* 3:6: Rom 4:3, 16; Yem 2:23 \* 3:8: Rom 4:3, 16; Esé 18:18; 22:18 \* 3:11: Kar 2:16

\* 3:12: Rom 8:3 \* 3:16: Esé 12:7 \* 3:17: Eks 12:40

ma kasen manafin ban baya siran ma fo antareti ifo teti (430) orana orivin maen ínaimpákéi man baya afoká ukhein pasen mai man baya ano mai ma ará manafinien ma inká iyáanten ukharé ein baya ída yo avékaan akhempá kaúken mino. <sup>18</sup> \*Mai fara yara seyo, Tiyarafenu ano vei sarisari fóí Abaraamun iyáantákaren mino. Máan tukhein nan mi man baya finté ma uaré minó daná bariyákun maen mai ma iyáanteini aran ída afoká inten mino.

<sup>19</sup> \*Máan tinten mifo mai fará man baya amen nafino. Tiyarafenu anofefái iyáantáken mi ume aní ino van man baya amikharéin mai ma Tiyarafenu ano iyáantán baré ein iyampon ma afokáin mairái me kanaíen mino. Tiyarafenu ano man baya enisori kaylorá dákan inká enisori kayo ano áuban banta Mosesin amíkan mi setin timikharen mino. <sup>20</sup> Kankanan banta ano ma ará manafiní ono van maen áubaná bantan dosiren ará manafiní é iyan mifo Tiyarafenu veyáká anan báken beya anon Abaraamun iyáantákaren mino.

### *Man Baya Maen Mai Setisi Yafisin Tifóe Ino*

<sup>21</sup> \*Máan tukharen mifo mai ma Tiyarafenu anofefái iyáantán baré ein masá man baya ano namuroí ukhen nafino. Ída uron mino. Man baya ano ma auyen au-nan ma simiyantí tiferá mai ánain ná dakhifiyá Tiyarafenu avorá puntáké bá tifano. <sup>22</sup> Máan tó tifanté umpo Tiyarafenu vompon dóki ano máa sikhen mino. Ume anon minó nanin banta karavusíí uádá bá tifé umpo mai ma Tiyarafenu ano ma iyáantán ma vain danasinta ma vará tifanuna aa ma vain mai Yisas Karaisintá ma mumunan in mano ino.

<sup>23</sup> \*Mumunan in ma ída yáko ukhan maen man baya ano setin karavusíí uádá eriyaré ékun mi Karaisintá ma mumunan intin ma man bayai karafusi finté ma útútintan aa Tiyarafenu ano man man dákó en mino. <sup>24</sup> \*Man baya ano yafisin tifóení ukhen tetin afova simiyan tiviren eriyaren Yisas Karaisin táí me khaen mino. Máan tukhein nan mi Karaisintá ma mumunan é tiféku maen Tiyarafenu ano setin nan puntákein nanin banta e sinten mino. <sup>25</sup> Máan tukhein nan mi mumunan inka yáko ukhein teti ída evaráné mai yafisin tifóeni aránaópá banté tiféuno.

### *Yisas Karaisin Pintéi Tiyarafenu Akhafanaí Ukhé Tiféuno*

<sup>26</sup> \*Máan tukhein nan mi Yisas Karaisintá ma mumunan eona anon Tiyarafenu akhafanaí ukha ono. <sup>27</sup> \*Para vara seyo, monó non ma vareona anon Yisas Karaisin má túpá uveya véin maman ayá au anamun ma einíí ukha ono. <sup>28</sup> \*Taráea ída Yutan banta van ena anan banta van ída miyan ban doran banta van para van banta van inká ída afon ban anasi van ukhen mifo minó ano Yisas Karaisimpin o asotú uveya manan ba ono. <sup>29</sup> \*Yisas Karaisini kéká ma vanteya mai saretí ankan Abaraamun akhafanan baona minó daná ma Tiyarafenu ano ma véin iyáantákáré ein mai saretin ninaíi inten mino.

## 4

### *Mumunan Nanin Banta Ano Ma Tiyarafenu Ina Yanasinta Varan Nain Baya Ino*

<sup>1</sup> Tenti vaya máan mi ukhen mino. Iyampon kéká ma arará bantin ma vetí afóe ano ma ve ina yanasantia me amiren púká intin maen mai iyampon kéká

\* 3:18: Rom 4:14    \* 3:19: Apo 7:38; Rom 5:20    \* 3:21: Rom 8:2-4    \* 3:23: Kar 4:3  
\* 3:24: Rom 10:4    \* 3:26: Yon 1:12    \* 3:27: Rom 6:3    \* 3:28: Rom 10:12    \* 3:29:  
Rom 4:13

ano miyan ída van doran banta kayo ída esantanten mifo vetin má manaí ukharen ma e anoní uyen mi minó betí afóen nina yansinta varanten mino. <sup>2</sup> Betí ankan betí yafisin banta kéká oo yaiyen oriyantin ma vetí afóe ano ma siran nain orana máa ma orivintin mi vetiyantá dafisinten mino.

<sup>3</sup> \*Yisas Karaisi ma ída erikhá maé tetin má dere máan manan é ma vara ráke man baya kayoi miyan ída van doran nanin bantan baré tiféuno. <sup>4</sup> \*Máan tukharé é tifékun mi veni yamú puntáden afoká iyain má Tiyarafenu ano ve Anin tiantan anasi arápín eravíkan béin kaúadán maen mai man baya aránaópá baren mino. <sup>5</sup> Báken mai man bayai miyan ída van doran bantaí ma ukháé tiferuna evaránen tívíden maman Tiyarafenu akhafanaíen mino. <sup>6</sup> \*Tiretí ankan inka Tiyarafenu akhafanaí uven nan mai van mi ve Anini Aunan tiantan tireimpin eriven mai Aunan manon “Abba,” Tifóe oe,” sen ariyan mino. <sup>7</sup> Máan tukhein nan mi saretí ankan ída evaráne miyan ída van doran nanin bantaí in nompo inka Tiyarafenu akhafanaí ukha ona ve ma iyáantan bain danasinta varan nono.

### Pori Ma Karesiá Nanin Banta Van Ma Inikhein Baya Ino

<sup>8</sup> Pefá ma saretí ankan Tiyarafenu ma ída afová ukhe mae kampun ayarafenu kayoi miyan ída van doran banta kéká vare ono. <sup>9</sup> Máan tukhare ompo saréa inka Tiyarafenun afová e onó tente rafu áa Tiyarafenu ano saretin pefái afová ukhen né tente rafuno. Máan ma ukhaya mai fará evaráne ma varará ma ída ákonq vain man baya kayoi miyan ída van doran nanin bantaí iya rafono. <sup>10</sup> \*Tiretí ankan mai ma kákán damú ma afoká é iyain nafi biyon nafi aú

\* 4:3: Kor 2:20    \* 4:4: Yon 1:14; Rom 1:3  
finté Abba e ma siyain mai Tifóe oen tiyan mino.

damu safi inká orana fi vakuriya mae Tiyarafenu ano saretin nan anunu ino van avébe yafisé iya ono. <sup>11</sup> Máan tiya ompo senti yoran ma savifá o afeyoran nain nan mi saretíi avúava san tikhokho fiyan mino.

<sup>12</sup> Mumunan tiyofí sifá tiváeyan noe, séin má manaí ono van mi ákonaé tiretin tiamiyá uno. Mai fara vara seyo, séi seyantá man baya ampiré tiretin má manaí uvékuya séin ída namu usinte ono. <sup>13</sup> Tiretí ankan ná ovare me ineno. Téi sí mantéi Yisas Karaisini kama vaya esé araí é tiameruna ino. <sup>14</sup> Téin tu ano ída ákona ukhen mai anon tireti ankan uman amiya ompo séin ída afonkarí ureya oyan timinton Yisas Karaisin nafi áa Tiyarafenui enisorí fi ma avíde kama yafisirí eonaí séin e ono. <sup>15</sup> Tetimpin ma simusin baré ein taréa mai intefasá ban nafino. Mai yamú kayofin tiretí amusin iyákeya minó daná time ompo kanaíen banti saretí auu vá inan bían timimonaren mino. <sup>16</sup> Ma fura vaya ma saretí ankan tiamiyaruna anó téin maman tiretí namuroí iyan nafino.

<sup>17</sup> Mai kampun banta kayo ano saretin o aviádantiya vetin ánaín bákurano van mi ákona yorarí iyan mifo saretin aya ono vara ino. Ída ino. Tenti aa iyádantiya vetin ayain ineine ana ono van mino. <sup>18</sup> Ena nanin banta ma kama ure o aviádesin ma saretin ánaín bákurin doran tasá ákona inin kaono. Téi ma ída váku yere vá mai ma variyaonaí ana vá ono. <sup>19</sup> Te sikhafana oe, anasi ano ma inamunan iniyán ma aureinii iyá uno. Mai fara vara seyo, Yisas Karaisi ano saretin aúpin dákkó ino van muno. <sup>20</sup> Taréa séi ída saretí ankan má bá umpo saretin má bano van mi inikhé uno. Tiretin má baré kama vaya anan tiamen

\* 4:6: Rom 8:15-17    \* 4:6: Aramaiki vaya  
\* 4:10: Rom 14:5; Kor 2:16

nunaren mino. Tiretin inté uresá  
aya onte rafunon tiré taréa amino  
ukhé uno.

*Akhan Nú Saran Núká Ma O  
Siaren Tikhein Baya Ino*

<sup>21</sup> Man baya aránaópá ma  
vano van iyaona nanin banta  
ano sisimeno. Beni vaya ana  
ano nái yanasará tikhen nafino.

<sup>22</sup> \*Tiyarafenui vompon dóki ano  
máa sikhen mino. Abaraamun  
anin mai kankanan mi varen  
mino. Miyan ída van doran  
nanin mano mana khain maen  
inká aví nanin mano mana khain  
ukharen mino. <sup>23</sup> \*Mai ma miyan  
ída van doran nanin mano ma  
khaein iyampon maen mai vanasii  
avúavá kái khaen mifo aví nanin  
mano ma khaein mai Tiyarafenu  
ano ma iyáontákáré ein mino.

<sup>24</sup> Tiyarafenu ano ma kan dádá  
ará manafíní eini aman manon mi  
maí kan nanin ban mino. Akhan  
maen Sainaí anui aman manon  
mi aní ukhan mai anurái vanasi  
ano esé araien man bayai miyan  
ída van doran nanin bantái ukhan  
mino. <sup>25</sup> Mágan tukhá ein nan mi  
Arabiá barafá ma Sainaí anuyon  
bain má Yerusaremí bá manaí  
ukhan Akhan mai an mi yakhen  
pasen ben má be akhafana vá  
anon miyan ída van doran nanin  
bantái ukhen mi maifin ban mino.  
<sup>26</sup> \*Mágan tukhen mifo inarufá ma  
fara vain Yerusaremí maen mai  
aví nanin Saran an mi yakhan béis  
setin tinóe ino. <sup>27</sup> Para vara seyo  
Tiyarafenui vompon dókifin máa  
sikhen mino.

“Aaí ma ukheya iyampon ída  
khaiyaona nanin mano vá  
amusin ono.

Éi iyampon ma ída khaen nan au  
ída aí ukhein nanin arasá  
kama ino.

Oovarare amusin iya vá í dano.

Para vara seyo, aa nanin ma  
varé ein mano

iyampon ma kokhon ná kain baré  
ein nanin kayo esantaren  
béis kokhon iyampon kainten  
mino.” <sup>Ais 54:1</sup>

<sup>28</sup>\* Mumunan tiyofi sifá tiváeyan  
noe, siretí ankan Aisakin an  
deya iyáontan iyamporinta ono.

<sup>29</sup> \*Iyáontantá ma afoká ukharé  
ein iyampon Aisakin ma miyan  
ída van doran nanin akhá Ismaeri  
ano ma máká maáká einú en Kantá  
Aunantá ma afoká ukheruna kéká  
man baya ánaín ma yakhafino van  
iyain kayo ano uman timinten  
mino.

<sup>30</sup> Máan tinten mifo Tiyarafenui  
vompon dóki ano náiesá tikhen  
nafino. Mai máan mi sikhen mino.  
“Miyan ída van doran nanin má  
be akhá bá tiantan orino. Miyan  
ída van doran nanin akhá ano  
ída vá aví nanin akhái ona yaíden  
barano.” <sup>Esé 21:9-10</sup>

<sup>31</sup> Mágan tukhein nan mi mumu-  
nan tiyofi sifá tiváeyan noe, setí  
ankan miyan ída van doran nanin  
akhá ída vá tifé umpo aví nanin  
akhafanan bá tiféuno.

## 5

*Yisas Karaisi Anon Tetin Kama  
Uren Kusin Timirá Bá Tifé Uno*

<sup>1</sup> Yisas Karaisi ano inká man  
bayai karavusi finté útúden tetin  
maman kusintá kaí bá tifé umpo  
mantaaán ákona uveya vá ará kuse  
vano. Ída vá evaráneya man bayai  
miyan ída van doran nanin bantái  
uvesin ná damuádantiyá vano.

<sup>2</sup> Ineno. Téi Pori anon ma vaya  
siretí ankan tiamiyá uno. Au  
khavin avúavá ma fara fákare  
vante mae mai Yisas Karaisini  
yoran mano ída uron mi siretin  
ayainten mino. <sup>3</sup> E au ma ifáe  
nan ma khaviyain kayon evaráné  
tiamenté uno. Mágan ma iyante  
mae mai minó man baya ánaín  
ná avové ure yakhafono. <sup>4</sup> Mai  
fara vara seyo, man baya ánaín

\* <sup>4:22:</sup> Esé 16:15; 21:2    \* <sup>4:23:</sup> Rom 9:7-9

15:4-5; Rom 9:7    \* <sup>4:29:</sup> Yon 8:35

ma yakhafin mano ma Tiyarafenu avorá puntákein nanin bantaí ma inteya mai Karaisin pintena siretin do síkarantiya Tiyarafenu sarisarifin ída van nono.

<sup>5</sup> Máan tin nompo setí ankan puntákein bí barano van ma inikheruna kéká ano Kantá Aunani ákonará mumunan ukhé mai van mi ave ukhé bá tiféuno. <sup>6</sup>\* Mai fara vara seyo, Yisas Karaisintá ma mumunan iyá tiferuna mai anon au ma khavin má ída ma au khavin má maman paen danasí ukhen mifo Tiyarafenurá ma mumunan uren ma ena nanin banta ma ará amin manon pura yanásí ukhen mino.

<sup>7</sup> Tiretí ankan kama e oriyare ompo iye anó tiretíi aa iyádoyá pura yaná ma yakhafiyá eona me ifáe rafono. <sup>8</sup> Mai ma sareá yakhafiyona ineine mai ída Tiyarafenu finté erikhein mino. <sup>9</sup>\* Máan tukhen mifo siretin aúbaná mana namu vanta váken mi sitó máa yisi ano ma ainan beretifin orera einíi iyan mino. <sup>10</sup>\* Bafan mano siretin evaránen avíadantíya séi ma mumunan iyalaruna yanásintará mumunan onono sé inikhé uno. Mai ma sireníi ineine máden asuse uren ma uman amiyain banta kéká Tiyarafenu ano yaíden uman aminten mino.

<sup>11</sup> Mumunan tiyofi sifá tiváeyan noe, banta ano vá au khavino ma siyákun mai fará betí ankan téin tirirí iyan ban nafino. Téin ma sirirí iyan bain manon aní iyáken mi Yisas Karaisini ma yaa unkamádantá purein mano ma vanasi evaránen avíkein baya siamiyan bano van mino. Mai avúavá anón betí ankan aran naná amé iyan mino. <sup>12</sup> Au khavin avúava san ma siretin uman

amiyain mai kayo ano vetí au vasá kavino.\*

<sup>13</sup>\* Mumunan tiyofi sifá tiváeyan noe, Tiyarafenu anon tiretin manan kama uren mi kuse vano van anunu ukhen mifo ída vá evaráne ume avúavápin oriyaya avábá posá ben moéken ayain maran ná iya vano. <sup>14</sup>\* Mai fara vara seyo, minó man baya ano mana man bayafin manan bákan mai ano máan mi sikhen mino. “Eyan nan ma anunu iyaonaíe vá ena van anunu ono.” Riv 19:18

<sup>15</sup> Máan tin nompo ída ma ará amin maran into ma aruve asive ana ma inteya mai sreti yantái namuin maran inompo yafian ná ákona ono.

#### *Kantá Aunani Ákonará Ma Van Baya Ino*

<sup>16</sup> Máan tukhein nan mi Kantá Aunani ákonarasá auyen aunan mamare vá ume avúavái anunu ánaín ída yakhafono van mi inin amiyá uno. <sup>17</sup>\* Para vara seyo, ume avúavá bá Kantá Aunan má ano ven maman bararasí in maran iyáken maen aruve asive iyain pase mai ma varano sinona yaná ída kanaíe varan nono. <sup>18</sup> Máan tin nompo Kantá Aunan mano ma avireñ orinti mae mai ída evaráne man bayai arángópá ban nono.

<sup>19</sup>\* Tiretin ará ma mantanti ma ume avúavá ánaín ma yakhafesin maen tiretíi vampin ma yanasin tan afoká intin ena nanin banta ano mai avúavá kasaen onanten mino. Pamúku avúavá bá pain avúavá bá namu avúavasí ono van ma ará manta avúavá bá <sup>20</sup> inká kampun ayarafenurá ma monó tin avúavá bá uvátakhan avúavá bá namuroí in avúavá bá arankantin ma asivin avúavá bá ará namu uantan avúavá bá ena ina yana san anunuin avúavá bá eyan nan mana inin avúavá bá bayafó aruvúden aúban daimin

\* 5:6: 1Ko 7:19; Kar 6:15    \* 5:9: 1Ko 5:6    \* 5:10: 2Ko 11:15; Kar 1:7    \* 5:12: Betí avankan masá do vían karúdano. Béi aran nan uaren tikhein baya ino.    \* 5:13: 1Pi 2:16  
\* 5:14: Rom 13:9    \* 5:17: Rom 7:15-23    \* 5:19: 1Ko 6:9-10

avúavá bá<sup>21</sup> kamaen bain banta kayo ma ará namu uantan avúavá bá ákona non naren ma óen uaren báden non avúavá bá ino. Máan avúavá sintá vá ma varé in nain nanin banta ano ída uron mi Tiyarafenui yafisin pintena yanasta varantéii mai ma gefá tiamiyá erunaíi é tiámé uno.

<sup>22</sup> Mágan tukhen mifo Kantá Aunan mano ma setinti saunantá ma yafiben maen mayan aran mi imádanten mino. Ena van anunui má amusin en kusen ban má bempáké báken ena avábá in má kamaen puntáden non avúavá bá<sup>23</sup> kayone en ban má inká ei avúaváká dafisin má ino. Ída ena man baya ano mai kama avúavá sintá áncain ma vákuriyain aasá iyaranten mino.

<sup>24</sup> \*Yisas Karaisini kékásí ma ukhein kayo ano gefái vetíi ume avúavá daa unkamádantá aruan púken mino. <sup>25</sup> Taréa ma Kantá Aunan mano ma setimpin ma vantirá mai minó tetin tufin ma Kantá Aunan mano ma yoriyain áncain mana vá dahafó tifano. <sup>26</sup> \*Tetí ankan ída vá te siví daní erá aruvín afoká ino van ena ará antarerá inká ena ará namu ó tifano.

## 6

### *Intéa Ayun Ná Doká Inte Fo Mai Yanái Yuyasin Nono*

<sup>1</sup>\*Mumuman tiyofi sifá tiváeyan noe, sretí ankan pinté ma mana ano ma umefin eraven ankamitiya mae vá ákona e ma monó tiyaona kéká ano vá bempáké oriveya ayaesin ná bei avúavá puntarano. Siretin má dere mai akhenókafin erave ankamin nampo yañian ná ákona ono. <sup>2</sup>\*Tretí ankan afá aváen ayain maran ma intéya mai Yisas Karaisini man bayan mo kanaí inono. <sup>3</sup> Ena ano ma umampin bantiya ma eyan inian kákán bantaí ure ma ída ayainteya mai eyan mi mákasiya ono.

\* 5:24: Rom 6:6; Kor 3:5    \* 5:26: Fir 2:3    \* 6:1: Mat 18:15    \* 6:2: Rom 15:1    \* 6:5: Rom 14:12    \* 6:6: 1Ko 9:11, 14    \* 6:7: Rom 8:13

<sup>4</sup> Tiretí ankan intéa avúavásá barano vará inte fo mai yaíde afová ure vá barano. Mai fara vara seyo, éi ma ei yoran ma ída yaiminteyá mai éi amusin manan inompo enai avúavá ída yaíde afová inono. <sup>5</sup>\*Mai fara vara seyo, mana mana anon bei uman mádú inten mino.

<sup>6</sup>\*Tiyarafenui vaya ma afova amintin bariyan nain mai arú kékásá anona ayaen ná miyan amino.

<sup>7</sup>\*Tiretí ankan ída vá Tiyarafenuin máká maáká ono. Tireti ma máan inin baranteya mai siretyan mi kampun tiantan nono. Éi ma fafasikharé inona yanayun tákera mai yaná dunan manan unafin nono.

<sup>8</sup> Mana ano ma ume avúavá poké ma ve aufin danayun ma fafaseiní ma iyaren maen purin manan una finten mifo Aunan ma amusin uantiyaré inain manon Aunan pintena ayun ma fara van aunan mi o una finten mino. <sup>9</sup> Máan tukhen mifo kama avúavá ma in nan ída vá tivesara ó tifano. Mai fara vara seyo, veni yamusí ma intí kama amusin mi unafó tifanté uno. <sup>10</sup> Máan tukhein nan mi vanasi ma kama avúavá uantan afokhan ma vantí maé minó nanin banta vá kama iyáké munuman nanin banta moéké kama ó tifano.

### *Porini Kípan Baya Ino*

<sup>11</sup> Onano ma kákán bompon kayon te siyampoké uvaman tiretin amé uno. <sup>12</sup> Banasi ano vetin kákán bí amino van mi sretí ankan au khavono van aufin kuráden baya siyan ban mino. Tetí ankan nan Yisas Karaisini yaa unkamádantái mumunan iyan mino siren betin arin nain nan mi feriyan mino. <sup>13</sup> Au khavino van ma yuvun iyain kéká ano ída fura sen minó man baya áncain dakhafiyan mifo sretí ankan

duvun intiya au kharesin mairá betí kákán bí barano van mino.

<sup>14</sup> Téi ída ena yaná aví daní onté umpo Bafan Yisas Karaisi ma yaa unkamádantá púkein mai ven aví anan daní onté uno. Tenti sínunu ma mā varafin bákán mā inká ma varai anunu ma sempín baré ein mai fefái Yisas Karaisini yaa unkamádantá arukhen mino.

<sup>15</sup> \*Tetí ankan tu khakhe rafu áq ída kakhe rafu mai ída kákán daná ino. Tiyarafenu ano ma setin mamán auyení urá bá tiferuna mai anan pura yaná ban mino. <sup>16</sup> Ma ineine ma fákaren ban nain nanin banta vá Tiyarafenu ano arunan uren ná ará kusiantantin ná beni auyen nanin bantái ino.\*

<sup>17</sup> \*Tare ráké ma oronuna mai ída vá á ékun ná ma yanásintará ena ano uman timiyan bano. Mai fara vara seyo, sen turá ma namon tifun kayo ma vain manon aníen Yisasin nina inon ten mi sen nan tikhen mino.

<sup>18</sup> Mumunan tiyofi sifá tiváeyan noe, setisi Bafan Yisas Karaisini sarisari ano vá tiretin má bano. Pura ino.

---

\* **6:15:** Kar 5:6; 2Ko 5:17    \* **6:16:** Kiriki vaya finté mai Tiyarafenu Auyen Isarerí kéká san mi sikhen mino.    \* **6:17:** 2Ko 4:10

# PORI MA EFESASÍ NANIN BANTA UVAMAN AMEIN BOMPON MINO (Efesasi)

## Efesasi Vompon Ma Uvanteí Pákenai Afova Vaya Ino

*Ma vompon ma uvantein banta  
ino.*

Baya varen orin banta Pori ino.

*Uvarein orana ino.*

AD sikisti-tu (62) fin mi Korosí nanin bantai vompon má Fir-imonini vompon má manafin kauran baren orein mino.

*Ma vompon ma uvantein baru  
ino.*

Romú kákən barurá karavusií uran báken karavusií namun pintéi uvanten mino.

*Ma vompon ma uvaman  
amikhein kéká ino.*

Efesasí ma monó nanin banta varé eimpin mifo mai vompon mano anan Esiá barafin ma varé ein monó namun kay-ofimpá deren eúkukhen mino.

*Nái ana vará ma vompon uvan-  
ten nafino.*

Ena anan nanin banta finté ma monó tiyain nana ma Esiá barafin bain Yutan kayo ano ma oyan amen nan mino. Yutan kayo vá ena anan kéká bápin ma ákona kafi varé ein ma Tiyarafenu ano Karaisin tiantan ma yoruman barákuren ma míkampin mana mumunan kaen ma inká Karaisimpin ma maman mana kékásien ma ukhein nan mi ma ma minópá uvaman amikhein bompopmin tian amá ukhen

mino. Ma vompon kankan saptafin mi monó tin avúavá pákena ineine amen mi inká Tiyarafenu aruvín dana san tikhan ma minó ano anunu iyain vesi va san tian amá ukhen mino. (Sapta 6:10-18 fin ná onano.)

### *Porini Susu Vaya Ino*

<sup>1</sup> \*Yisas Karaisini kama vaya varen orin bantaí ino van ma Tiyarafenu ano vei anunurá ma aní ukhein banta séi Pori anon ma vompon uvaré uno. Efesasi ma Tiyarafenu kantá nanin banta váken Yisas Karaisintá ma mumunan ukheona kayon uvaman amé uno.

<sup>2</sup> Teti Sifóe Tiyarafenu vá inká tetisi Bafan Yisas Karaisin má anon tiretin tarisari uren ará kusin aminten mino.

### *Yisas Karaisin Táké Ma Kantasi Ukhein Avu Varan Baya Ino*

<sup>3</sup> \*Tetisi Bafan Yisas Karaisin Afóen Tiyarafenu avisá daní ó tifano. Béi anoi setin tivábá uren mi inaru fákena kama yanasantia setin timikhan mai anoi setin tú iyampon tiya iyan mino. <sup>4</sup> \*Mai fara vara seyo, Tiyarafenu ano ma vara ída uvanten pefái setin aní uren Yisasin má maman túpá ukharen mino. Para va ino. Béi setin nan anunu uren mi mai avúavá mádan baren ben avorá kantasi ukhein nanin banta ano setin nan ída aaú manten mino sinten mino. <sup>5</sup> \*Tiyarafenu ano Yisasin pinté uaren tetí ankan e sivían be akhasí ono van inikhen mi véin kákən amusin uanten mino.

<sup>6</sup> Tiyarafenu ano ma setin tarisari urá ma ve Anin má túpá ukhé tiferuna vará ben aví daní ó tifano. <sup>7</sup> \*Tiyarafenu ano Yisas Karaisin pinté uaren mi setin moéken tarisari uren beni narefó ume finté setin evaránen tiviken mino. <sup>8</sup> Tiyarafenu ano

\* 1:1: Apo 18:19-21; 19:1    \* 1:3: Efe 2:6  
Efe 2:7; Kor 1:14    \* 1:9: Rom 16:25

\* 1:4: Yon 15:16    \* 1:5: Yon 1:12    \* 1:7:

vei kama ineine vá tarisari vá tetimpin banaen mino. <sup>9</sup>\*Pefá ma Tiyarafenu ano ma Yisas Karaisintái ma yaná baranté uno siren ma inian kain ma aúpá bá ein mai sareán bariyáken mi setimpin tian amá iyan mino. <sup>10</sup>\*Mai veni ineine máqan mi ukhen mino. Be ma aní ukhein damú ma afoká intin maen minó ma vara ráke yanasinta vá inaruráke yanasinta vá o éke e éke uan manafin átoru urantin maen Yisas Karaisini yafisin aránaópá anan banten mino.

<sup>11</sup>\*Yisas Karaisin má ma súpá ukhé tiferuna van mi Tiyarafenu ano setin nan bei vanasi ino sen aní ukhen mino. Máon tukhantí Tiyarafenu ano ma gefá iyátintákoré ein danasinta vará tifanté uno. <sup>12</sup>Tiyarafenu ano ma máon tein mai seti Yutan nanin banta ano ma Yisas Karaisimpin naren ma ákona inin ma ave ukhé tiferuna kéká ano Tiyarafenu aví daní iyan kákán bí amino van mino. <sup>13</sup>Tireti ena anan nanin banta ano Yisasini fura vaya vá kama vaya vá inire mumunan e ono. Máon ma eona anon tiretin aya uran mi Tiyarafenu ano seti Yutan kayo ma einén tiretin avían Yisasin má túpá en mino. Máon turen mi vei vanasi ma ameno van iyáantan baré ein Kantá Aunan ma siretin amein manon beni vanasi ino sen aní ukhen mino. <sup>14</sup>\*Tetí ankan ma Tiyarafenu ano iyatintón bain danasinta ma ínaimpá baranunai fura sen Kantá Aunampó tetimpin aní ukhen mino. Mai vará tetí ankan kakhakein Tiyarafenu aví daní ó tifano.

### *Efesasi Nanin Banta Ayaino Van Ma Pori Amúkein Baya Ino*

<sup>15</sup>Bafan Yisasintá ma ákona e mumunan iyáke monó nanin

banta ma minó pimpá ma vain ma avábá iyaona vaya vá iné uno. <sup>16</sup>Mai van mi séi Tiyarafenu vaipá ena ena susu siantiyáké ákona é timúkuantiyá uno. <sup>17</sup>\*Máon tiyá inká tetisi Bafan Yisas Karaisin Afóe ma moéken kakhakhein Tiyarafenu vaipá tiretii mumunampin kama afova amintin Tiyarafenurá ma mumunan in avúavá kama e afová ono van timúkuantiyá uno. <sup>18</sup>Máon tiyá inká tiretii inin ona yiantantiya kama yanasinta ma ameno van dan bain afová ureya mai yanasinta varanté uno sire mairá ákona kaono van mai van deren timúkiyá uno. Mai fara vara seyo, kokhon danasinta ma vei vanasi iyáantan baréin ma amikhein afová ono van muno. <sup>19-20</sup>\* \*Máon tukhái mai ma minó daná esantaren dan uron bain ákona vantá ma mumunan iyá tiferuna kéká ano afová ó tifano van mi simúkiyá uno. Mai ákona maen mai ma Yisas Karaisi ma furin pintena evaránen avían mantaren kákán bí amiren ma ve ayan kurompá ma yan inarufá bain má manaí ukhein ákona ino. <sup>21</sup>\*Máon tukhein nan mi Yisas Karaisi anon namu aunan kayo ma moékan ákona vain kaylorá dafiken mino. Máon tukhan mi ven aví bá ákona vá anon ánon banta kayo aví bá ákona vá esantakhen mino. Máon tukhein béis ida sareá ana yafisinten mifo ínaimpá deren dafisinten mino. <sup>22</sup>\*Tiyarafenu ano minó danáká ma yafisin ákona Yisas Karaisin amikhen mino. Mai monó nanin banta ano mai fintena ayain barano van mi mai ákona amikhen mino. <sup>23</sup>\*Monó nanin banta ma vain mai Yisasin aun ban mino. Máon tukhan mi minó akhempá ma vain danasintafin béis kanai suron ukhen mino.

\* **1:10:** Kor 1:16, 20   \* **1:11:** Rom 8:28-29   \* **1:14:** 2Ko 1:22   \* **1:17:** Kor 1:9   \* **1:19-20:** Kor 1:11; Íbo 110:1; 2Ko 13:4; Kor 2:12   \* **1:19-20:** Íbo 110:1; 2Ko 13:4; Kor 2:12   \* **1:21:** Kor 1:16; 2:10   \* **1:22:** Íbo 8:6   \* **1:23:** Rom 12:5; Efe 4:10, 15; Kor 1:18

**2**

*Tiyarafenu Ano Ma Furin Pintena Yisas Karaisi Má Ma Evaránen Tivian Mantein Baya Ino*

<sup>1</sup>\*Yisas Karaisintá ma gefá ída mumunan ukhaya mae Tiyarafenu oo átakharé ureya namu avúavá bariyáke fasen purin nanin banta an mi yakhare ono. <sup>2</sup>\*Máon ma iyaona anon afokhampin ma namu aunani ánon banta kayo ano ma Ban Anoni oo yaiyení iya va ono. Tiyarafenu oo ma átakharé iyaín nanin banta aúpin mai namu aunan manon dafíken doriyan mino. <sup>3</sup>\*Máon tiyan mifo Yisas Karaisintá ma gefá ída mumunan ukhé tifé maé teti minó ano yeren mai avúavá bariyaré tiféuno. Tetí ankan dere ume avúavá pinté e afoká ukhá é tiféun Tiyarafenui aran naná ano ma minó ena anan nanin bantafin má erikhá ein mano setimpin má deren erikharen mino.

<sup>4</sup>\*Máon tinten mifo mai ma arunaná bíkakhein Tiyarafenu ano setin nan moékantá anunu ureñ <sup>5</sup>tetí ankan ma véin oo átakharé eruna anoi furin nanin banta an dakhá é tiféun mi Yisas Karaisin ma avión mantein manon tetin auyen aunan timen mino. Mai Tiyarafenu anon bei sarisarifó tetin tiya ureñ evaránen tiviken mino. <sup>6</sup>\*Tiyarafenu ma furin pintena Yisas Karaisin má orun tivión mantaren maen inarufá ma vain danasintará dafisin nono sen iyátintáken mino. <sup>7</sup>Yisas Karaisin pintéi uaren Tiyarafenu ano setin tarisari ukhein taréa fi ínaímpa safi mai minó nanin banta anon mai ma minó daná esantakhein danasinta ma aní ukhein onanten mino.

<sup>8</sup> Mai fara vara seyo, Yisasintá ma mumunan eona anarái Tiyarafenu ano vei sarisari fóké

\* 2:1: Kor 1:21; 2:13    \* 2:2: Kor 3:7; Tai 3:3    \* 2:3: Kor 3:6    \* 2:4: Rom 6:11-13  
 \* 2:6: Kor 2:12    \* 2:9: 1Ko 1:29-31; 2Ti 1:9    \* 2:10: Tai 2:14    \* 2:12: Rom 9:4; Kor 1:21  
 \* 2:13: Kor 1:20    \* 2:14: 1Ko 12:13

tiretin aya ureñ evaránen avíken mino. Mai sreti ma kama avúavá bariyaona vara máon ten naifo Tiyarafenu ano vei anunurái faran aya ureñ evaránen avíken mino. <sup>9</sup>\*Tireti ankan ma kama avúavá manteona vara Tiyarafenu ano aya ureñ evaránen avíken naifo mana ano ída vá be amo sino. <sup>10</sup>\*Mai fara vara seyo, Tiyarafenu ano Yisas Karaisin pinté uaren mi setin kama ureñ uvamádá bá tiféuno. Mai vará téti nan ma kama avúavá barano van ma gefá iniádan baré ein ná bará tifano.

*Yisas Karaisin Má Ma Mana Vukhafai In Baya Ino*

<sup>11</sup> Tireti ankan ída Yutan kayo ompo ena anan bantafin mi afoká ukha ompo afovásá ono. Máon tukhein nan mi Yutan kayo ano sretin nan ída au kakhein kayo ino siren betí ma yan bukhafa máorá kakhein nan mi au khákán iyan mifo aúpin ída funtáken mino.

<sup>12</sup>\*Máon tukhen mifo maí damú tireti ankan ída Yisasini ádé bare ompo ovare vá me ineno. Isarerí nanin banta van ma Tiyarafenu ano vei vanasi e sen avíkeimpin tiretin má maifin ída váke Tiyarafenu ano ma vetin iyáantákeimpin ída sretin nina van mino. Mai fara va ino. Tireti ankan ma ma varafin báke ompo Tiyarafenu ída afová eya inká beni kama yanasantia van ída ákona e ave ukhare ono. <sup>13</sup>\*Máon tukha ompo Yisasi ma sretin nan e furen ma vei nare vanaein manon tiretin e avión beni ádé kaen mino.

<sup>14</sup>\*Mai fara vara seyo Yisas Karaisi anon tetí Yutan kayo vá inká tireti ena anan kéká bá ma ara kusen manafin ban avúavá timen mino. Mai ma erasampin ma ven ará namu uantan maran iyákun ma mai ano erasan aúbaná ma kákán on kakhá ein mi yo

máden mai on evaránen antíkaren erasan maman manafinén mino. <sup>15</sup>\*Yutan kayoi man bayafin kokhon bayan baré íkan mi Yisasini furin manon mai vaya kayo yo maman karúdaren Yutan kayo vá ena anan kéká bá e avían beyantá túpá uren mi maman mana auyen ananíen mino. Míkanan ma ará kusen manafin ban avúavá ameno van mi véi máan ten mino. <sup>16</sup>\*Béi ma yaa unkamádantá purein manon míkanan anan maman manafiní uran mi vékanan Tiyarafenu vá aronaíen mino. Mai van mi míkan mano ída evaránen ben ará namu uantan maran inten mino. <sup>17</sup>\*Yisas Karaisi ano ma ma varafin eriven tireti ena anan kéká ma Tiyarafenui ádé ída váke nentá ma vaona vá inká tetí Yutan kayo ma Tiyarafenu ádé bá tiferuna vá ano ma kusen bani kama vayan tisimen mino. <sup>18</sup>Mai fara vara seyo, Yisasín pintéi uaré tetí Yutan kayo vá tireti ena anan kéká bá ano kasaé Tiyarafenu avorá ódó tifantékun mai ma varé tiferuna Kantá Aunan manon mai aa aní inten mino.

### *Tiyarafenui Kantá Namuni Vaya Ino*

<sup>19</sup>\*Máan tukhayan tireti ena anan kayo ano saréa ída soya nanin banta ma vaonaí ukha ompo sretin má deren Tiyarafenui vanasi vákeya veni kékasí ukha ono. <sup>20</sup>\*Máan tukhái setí ankan Yisasín amái vákun mi inká beni kama vaya ma varen orin banta kayo vá sakhanampa vanta kéká bá anon namádaní ukhan inká Yisas Karaisi anon beyantá mai namuni Bafani ukhen mino. <sup>21</sup>\*Mai setí ankan ma mumunan iyá tiferuna anoi maman manafiní uvéi Bafani kantasí ukhein monó namun ma uvariyá tiféuno. <sup>22</sup>\*Máan

tukhayan tireti ena anan kéká bá ano yere Yisasimpin o asótú uyen nan mi sretin ma maman Tiyarafenui Kantá Aunan ma van namuní iya ono.

## 3

### *Pori Ena Anan Kayofin Monó Tiamin Banta Ino*

<sup>1</sup>\*Tireti ena anan nanin banta aya ono van mi séi Pori ano Yisas Karaisini karavusifin bá uno. <sup>2</sup>\*Bákun mi sretí ankan ena anan nanin banta ma siamíden tarisari ino van ma Tiyarafenu ano ma simikhein doran inka afová ukha rono. <sup>3</sup>\*Mai sarisari ma aúpá baréin ma Tiyarafenu ano séin aní ódaré maé ma gefá afova vompon tiretin uvaman amikharé erunan taréa afoká en mino. <sup>4</sup>Máan tukhein mi mai ma uvaman amikharé eruna vompon ma yankafinteyan Yisasi ma yoriyaré éi pákena ma afová ukheruna mai afová inono. <sup>5</sup>Pefá Tiyarafenu ano mai aúpá ineine ída vanasifin aníñ ontaren mifo saréan Kantá Aunan tákéi sakhanampa vanta kayo vá inká baya ma varen orin banta kéká bápin mi afokáin onen mino.

<sup>6</sup>\*Máan tukhan Tiyarafenui aúpá ineine máan mi ukhen mino. Tireti ena anan nanin banta ano ma mumunan iyaona kéká bá inká Yutan kayo ano ma mumunan ukhein kayo vá ano maman manaí uveyan Yisasín má túpá eonai véin pinté uarei Yutan kayo ma iyáontan baré ein danasinta yaídeya varan nono. <sup>7</sup>\*Tiyarafenu ano séin tarisari uren kama usintáden ákona simikhái veni yoran bantai ukhé beni kama vaya ma siamin dorarí iyá uno.

<sup>8</sup>\*Tiyarafenui kama nanin banta an téi ída yakhékun mi

\* 2:15: Kor 2:14    \* 2:16: Sek 9:10; Kor 1:20, 22    \* 2:17: Ais 57:19    \* 2:19: Efe 3:6  
 \* 2:20: 1Ko 3:11    \* 2:21: 1Ko 3:16    \* 2:22: 1Pi 2:5    \* 3:1: Fir 1:7, 13    \* 3:2: Kor 1:25  
 \* 3:3: Efe 1:9-10; Kor 1:26    \* 3:6: Efe 2:13, 16-19    \* 3:7: Kor 1:25    \* 3:8: 1Ko 15:9-10

Tiyarafenu ano séin tarisari uren mi Yisasín ída kanaien dosiren kama yanásinta setin timikhei pákena van ma ena anan nanin banta siamin doran téin timikhen mino. <sup>9</sup> Máon tukhan mi minó daná ma uvantein Tiyarafenu ano séin nan bei aúpá ineine ma esé araí in tá baré ein maman dákó ino van mi séin aní uren tiviken mino. <sup>10</sup> Máon tukhan mi véi ma ena anan má Yutan kayo vá ma maman manafiní inain manon bei kama ineine vá afová vá ma ayompin bákán ma ákona ví bá ma vain aunan kayofin afoká inten mino. <sup>11</sup> Pefá ma vara ma ída uvantén maen bái Bafan Yisas Karaisin pinté uaren mai yaná barano van mi iniádákaren baren mino.

<sup>12</sup>\*Tetí ankan ma véintá mumunan é tiferuna anon béisimpin o asótú uvé tifékun mi mai anon Tiyarafenu vaipá ma orin ona yirá tiféi véin avorá ída feranton oriyá tiféuno. <sup>13</sup> Máon tukhái séi ma kama vaya siamiyarunará ma uman timiyain nan tiretí ena anan nanin banta ano ída anomé iniyáke amusin mana ono van mi ákona é tiamiyá uno.

### Pori Ma Efesasi Kéká Ákona Uantano Van Amúkein Baya Ino

<sup>14</sup> Mai anarái séi siron kanan durafúdé tiretin nan te Sifóe vaipá timúkiyá uno. <sup>15</sup> Mai fara vara seyo, ma vara ráke yanásinta vá inká inaruráke yanásintará ma ánoní ukhein benafo veyáká anan ban mino. <sup>16</sup> Máon tukhan béisimpin moéken avábá bakái veni Kantá Aunan mano siretin ákona amino van mi séi simúkiyá uno. <sup>17</sup>\*Inká Yisas Karaisintá ma mumunan esin maen tiretimpin bái vantén mino. Máon tuvinti Tiyarafenu kama varafin ma amun dan aravuvín mantan ákona eini ono van mi simúkiyá uno. <sup>18</sup> Tiretí ankan má minó Tiyarafenu

mumunan nanin banta vá ano Yisas Karaisini ída kípan avábá ma kákón in inká ayasí in dan ódin ma námen aravin ukhein ma afová in ákona varano van mi simúkiyá uno. <sup>19</sup> Yisas Karaisini avábá maen moéken kákón mi vantya ída kanaíeya minó afová inompo mai finté manáa kokhon afová ono van munó. Máon tesin maen Tiyarafenui aunan má ákona vá ano sretimpin bíkakhen bano van mi simúkiyá uno.

<sup>20</sup> Tiyarafenui ákona ano ma setimpin doriyá ma setí ankan ina ono van ma iniyá tiferuna yanásintai ákona ano moéken esantakhen mino. <sup>21</sup> Máon tukhein nará minó mumunan nanin banta ano Yisas Karaisin také uaren ná ena ena yamú Tiyarafenun kákan bí amen oriyan ná bano. Pura ino.

## 4

### Yisas Karaisi Má Ma Mana Vukhafaí in Baya Ino

<sup>1</sup>\*Tiyarafenu anon tiretin arakhen mifo mai van inian kákón ono van mi Bafani yorari ma iyarunará ma fákáan karavusií ukhein banta anon tiretin duvun iyá uno. <sup>2</sup>\*Ena ena yamú kuse váke vá bempákesá nono. Tiretí avábá posá beni uman ayain maran ná ono. <sup>3</sup>\*Tiretí ákona ure vá Kantá Aunan má o súpá uveya ará kusen ban avúaváposá tiretiyan damono. <sup>4</sup> Para vara seyo, mana vukhafa vá mana Aunan mái vákán inká ínaimpáke yanáká ma ákona inin kauren ma avein mai manan bákán mi siretin arakhen mino. <sup>5-6</sup>\*Mana Bafan má mana mumunan má mana non baran má inká tetin Tifóe mana Tiyarafenu vá anan ban mi minó tetimpin doriyáken minó esantakhen mino.

<sup>7</sup>\*Máon tukhen pasen mi Yisas Karaisin pinté uaren minó nanin

\* 3:12: Yon 14:6; Rom 5:2    \* 3:17: Yon 14:23; Kor 1:23; 2:7    \* 4:1: Kor 1:10    \* 4:2: Kor 3:12-13    \* 4:3: Kor 3:14-15    \* 4:5-6: 1Ko 12:6    \* 4:7: Rom 12:3, 6

banta ayábá uren mana mana amusin daná amirú amirú ukhen mino. <sup>8</sup> Mápán tukhein nan mi Tiyarafenui vompon dóki ano máa sikhen mino.

**“Béi ma inarufá ódiyáken maen bei vanási ma kárváusií ukhá ein iyanen ben oyampá oriyán**

**maen mana yaná amusin amirú en mino.** *Íbo 68:18*

<sup>9</sup> \*Mai ma véi yan ódé uno ma sein bayai ana máan mi ukhen mino. Ma ma seti varuna varafin béisí veyan maman bararasí uren erakharen mi evaránen ódikhen mino. <sup>10</sup> Mai ma veyan maman bararasí uren erakhá ein mano anan minó danápin béisí yafisin

mano víkano van ayompin ma vain danasinta esantaren dan uron ódikhen mino. <sup>11</sup> \*Béi anon monó nanin banta amusin amen mi manáa avian aposeriien inká manáa avian sakhanampa vantaíen inká manáa avian monó nanin bantará dafisinien mi inká manáa avian monó baya ma siamin bantaíen mi inká manáa avian monó afova ma amin bantaí urú en mi ukhen mino. <sup>12</sup> Mápán tukhan mi vetíi yoran ma vain mai Tiyarafenui vanasi ayaaintin beni yoran doriyáken monó nanin banta ano ma Karaisin au vukhafái ma ukhein mai ákonéen báken kamaen bano van mino.

<sup>13</sup> \*Mápán té oriyá tifé ma setisi mumunan má afova vá ma o éke e éke uan Tiyarafenu Anintá kauré ma sirá manafini uré tifé ma Bafan oman tapé tiyá inká monó tin avúavápin ma mantaan ákona uvé maé Yisas Karaísí ma kama avúavá sintá ma variyá einí ó tifanté uno.

<sup>14</sup> Mápán tuvé maé ída evaránen arará iyampon kayo an davé kampun banta kékái vaya van puran tiyan mantino siré e mumunan uan more mere ó tifanté uno. Mai fara vara seyo, manáa kéká ano

kampun baya fóké dákói fura vaya ma seiní iyáken tetin máka siyan mino. <sup>15</sup> \*Máka sinten mifo seti monó nanin banta ano vá tetisi ánon ma Yisas Karaísí vaká ma ven au an ma yakhé tiferuna kéká ano vá beni avúavá moéké bariyákesá pura vaya vá avábá basá pákaan ákona ó tifano. <sup>16</sup> Mápán tukhé tifékun mi véi anon minó bukhafa maman manará asótú uran kamaen báken bei yorarí urú iyáken mi ena vukhafa aya ikán inoriyan mairái minó bukhafa ano kama ukhen avábápin inoriyan mino.

*Kakhan Avúaváká Ma Vain Iyamporinta An Ma Yakhen Ban Baya Ino*

<sup>17</sup> \*Mápán tukhein nan mi Bafani ákonará tiretin ma vaya siamiyá uno. Monó ma ída inin nanin bantai avúaváká ída vá nono. Mai fara vara seyo, vetíi inin asuse uron mi ukhen mino. <sup>18</sup> Betíi inin maen titípa an mi yakhan pasen Ti-yarafenui avúavápin nenta suron mi van mino. Mai fara va ino. Betíi inin mano nenta suron bákan aú ano ákona ukhen mino. <sup>19</sup> Mápán tukhan pasen betíi ineine finté kama inin orivin maen moéken namu avúavápin oferan namu in-eine kayo anan bíkakhan pasen kasaen ara ara avúavasí é iyan mino.

<sup>20</sup> Mápán té iyan mifo sretí ankan mai aa sákesa Yisas Karaísí afová ukhe va ono. Ída ino. <sup>21</sup> Yisas pinten mai fura vaya inirei véin afová eono. <sup>22</sup> \*Pefá tireti ankan má deren mai ma kampun tin avúavá bá inká ará mantan ma namu avúavá barampin má bare ompo saréa mai avúavasá oyan ameno. Mai fara vara seyo, mai avúavá anon kampun tireya vanasii ineine máde asuse uanti-yare ono. <sup>23</sup> \*Mápán ma iyá eona vará monó avúavápin tiretíi ineine vasá maman auyení ono. <sup>24</sup> \*Tireti

\* 4:9: Yon 3:13    \* 4:11: 1Ko 12:28    \* 4:13: Kor 1:28    \* 4:15: Kor 1:18; 2:19    \* 4:17:

Rom 1:21; 1Pi 1:14    \* 4:22: Rom 8:13; Kor 3:9    \* 4:23: Rom 12:2    \* 4:24: Esé 1:26; Kor 3:10

ankan auyen nanin bantaí ukha  
ompo auyen avúavá sá aní ono.  
Mai fara vara seyo, Tiyarafenu  
ano maman beyan an mi yara  
vaompo funtákein nanin bantaí  
ukheya kantasí ukhe fura yaná  
ana vá barano.

<sup>25</sup>\* Mai vará kampun tin avúavá  
ifa ureya vá pura sikhein baya ana  
vá ben tiamin maran ono. Mai  
fara vara seyo, setí mana vukhafa  
finte nan bá tiféuno. <sup>26</sup>\* Tiretí  
ankan umeí inampo ída vá áesin  
arankan avúavá ano saretintá  
dafisino. *Ibo 4:4*

Ída vá aran nan iya vasin ná áau  
eraven orun perano. <sup>27</sup> Mai fara  
vara seyo, aran nan ma in avúavá  
anon Ban Anoni ona yiantan nono.

<sup>28</sup> Umoyan ma iyá inona kéká  
ano mai avúavá ifá ure vá tiretí  
ayampó pura se kama yorarí  
ureya kokhon daná máde vá o  
ma afasí ukhein nanin banta sretí  
aúkáke sá aya ono. <sup>29</sup>\* Tiretí ankan  
oorá dafike ída vá namu vaya kayo  
seno. Ena nanin banta ma aya  
oren baya kayo ana siyasin ná mai  
vaya ma inin nain kayo aya ino.

<sup>30</sup>\* Tiyarafenu ano saretin  
evaránen miyaní uren maen bei  
Kantá Aunampó tiretin anien be  
ina e sikhen mifo ída vá tiretí  
avúavá ano Kantá Aunan arunaná  
amino.

<sup>31</sup>\* Máan tinona van mi ena  
asiren ma ará namu uantan  
avúavá bá aranán in má baé naé  
tin má oyampá baya sin má inká  
namu avúavá sintá vá ampeno  
van tiyá uno. <sup>32</sup>\* Ampire vá tiretí  
ankan ben kama uren ará amin  
maran iyákeyá vá Tiyarafenu ano  
ma Yisas Karaisin pinté uaren ma  
sretí ume ampianteiní eya vá  
enai ume ampiantano.

\* **4:25:** Sek 8:16; Kor 3:8-9   \* **4:26:** Yem 1:19-20   \* **4:29:** Kor 4:6   \* **4:30:** Ais 63:10; Efe 1:13-14; 1Te 5:19   \* **4:31:** Kor 3:8   \* **4:32:** Mat 6:14; 18:22-35; Kor 3:12-13   \* **5:1:** Mat 5:48   \* **5:2:** Eks 29:18; Ibu 10:10   \* **5:5:** 1Ko 6:9-10; Kor 3:5   \* **5:6:** Rom 1:18; Kor 2:4, 8  
\* **5:8:** Yon 12:36; Efe 2:13; Kor 1:13; 1Pi 2:9

## 5

### Kakhakheintá Ma Van Baya Ino

<sup>1</sup>\*Tiretí ankan ma minó danasí  
inte mae mai Tiyarafenui avúavá  
ángin ná bákurono. Mai fara  
vara seyo, sretí béin akhafanan  
ban nan tireti nan anunu ukhen  
mino. <sup>2</sup>\*Yisas Karaisi ma saretin  
nan anunu uren ma vei aufó  
ákonte uran Tiyarafenu avorá  
aunka uveri an dákan ma amusin  
uaren tiretí ume ampianteiní e vá  
ena ma anunuin avúavá áesin ná  
tiretipin bíkakhanti vá bano.

<sup>3</sup> Máan tukhanti ída vá pamúku  
avúavá safi ena ina yaná ma  
aranan nafi ena namu avúavá  
sinta fi vá barano. Mai fara  
vara seyo, Tiyarafenui vanasifin  
máan avúavá ma variyain kayoi  
afokhan ída van mino. <sup>4</sup> Tiretí  
ankan Tiyarafenu vá tusu siantan  
nompo ída vá namu vaya fi  
aniana vaya fi inká namu vaya  
fo safi vá taró teno. <sup>5</sup>\*Para  
vara seyo, sretí ankan afovásá  
ono. Pamúku avúavá safi inká  
ída funtákein avúavá sintá fi ena  
ina yaná ma aran nan nafi ma  
variyaín mai kampun ayarafenu  
kayoi monó tiantiyaín pasen máan  
nanin banta ano ída kanaén  
Yisas Karaisin má Tiyarafenu  
vái yafisimpin orinten mino.  
<sup>6</sup>\*Kampun banta kayoi vaya inire  
vákurin nampo yafíon ná ákoná  
oro. Mai fara vara seyo, namu  
avúavá ma variyá inain nanin  
banta amaninái Tiyarafenui aran  
naná afoká inten mino. <sup>7</sup> Máan  
tukhanti mai ma vanasi ano ma  
namu avúavá baran naimpin ída  
vá o fébe varano.

<sup>8</sup>\* Mai fara vara seyo, gefá  
títipafin baré en nan mi saréa  
Bafan mano avíón kakhantá  
kaúken mifo kakhan avúavá kasá  
bano. <sup>9</sup> Mai fara vara seyo,  
mai khakhan ma saretimpin bain

manon kama avúavá bá puntákein avúavá bá inká pura sin avúavá bái maman dákó é iyan mino.

<sup>10</sup> Máan tukhein nará Bafan mano ma amusin oren ukhein avúavasá dosireya afová oro.

<sup>11</sup> Namu avúavá ma variyain nanin banta vá ída vá avunté ono. Mai ayúavá sintá ano ída kama aran imádé iyan mino. Máan tukhein nará mai ayúavá sintá vará antan nono. <sup>12</sup> Mai fara vara seyo, ume nanin banta ano ma aúpáké bariyain avúavá ma yáko tian amáin nan tiyave inten mino.

<sup>13</sup> \*Máan tiyan mifo oon mano ma vetimpin panu sin maen namu avúavá sintá maman afoká é iyan mino. <sup>14</sup>\*Para vara seyo oon mano ma kamaen panu sin maen minó daná maman dákó é iyan mino. Mai van mi máa sikhen mino.

“Aun ma vakheona kéka soe, mantano.

Púkanona finté orun mantesin  
ná  
Yisas Karaisi ano kakhaantano.”

### Kantá Aunani Ákonará Ma Van Baya Ino

<sup>15</sup> \*Máan turanti sretí ma vanonafin dafíon ná ákona ukhe vano. Kama ineine ma vákán bain nanin banta an ná dakheya ída vá aniana ma ukhein nanin banta an dano. <sup>16</sup> Taréa namu yamúi va ompo yafíon ákona ukheya ena ena kama avúavá ana vá barano. <sup>17</sup> Mai van ída vá aniana iya váke Bafan mano intéa yanasá barano van anunu ukhen nafi mai yanasá afová ono. <sup>18</sup> \*Mai namu avuává ano sretíi yan máden asuse inten mifo ída vá óen non nare óen iya vano. Áesin ná Kantá Aunan mano vá tireimpin bíkákhanti vá bano. <sup>19</sup>\*Banti vá Í Bompon pintena í bá ena í kayo vá inká Kantá Aunan mano ma inimpin báuántan nain

\* 5:13: Yon 3:20-21    \* 5:14: Ais 26:19; Rom 13:11    \* 5:15: Kor 4:5    \* 5:18: Ruk 21:34  
 \* 5:19: Kor 3:16    \* 5:20: Kor 3:17    \* 5:21: 1Pi 5:5    \* 5:22: Kor 3:18; 1Pi 3:1    \* 5:23:  
 1Ko 11:3; Efe 1:22    \* 5:25: Kor 3:19; 1Pi 3:7    \* 5:26: Tai 3:5    \* 5:27: 2Ko 11:2; Kor 1:22

í kayo vá ben tiamin maran iya vá tiretíi aúkáké Bafantá í dano. <sup>20</sup>\*Máan tiya mae minó danasinta vará tetisi Bafan Yisas Karaisin avíkasá ena ena yamú tiretin Afóe Tiyarafenun ná tusu siantano.

### Ábasu Ano Ma Kamaen Ban Avúavá Baya Ino

<sup>21</sup> \*Tiretíi ankan Karaisin aránaópá báke vá ena nanin banta vá oo yaiyin maran ná ono. <sup>22</sup> \*Bafani aránaópá ma vaonaí eya sreti anasi kayo ano sretíi avafuná aránaópasá bano. <sup>23</sup>\*Mai fara vara seyo, Yisas Karaisi ma monó nanin banta ánon báken ma ve au fóké aya urem ma evaráneñ avíkeinien mi vanta anon be anái ánon ban mino. <sup>24</sup> Monó nanin banta ano ma Yisas Karaisini aránaópá bainí eya vá tireti anasi kayo ano vá avafuná aránaópasá bano.

<sup>25</sup> \*Inká avafuná ano vá Yisas Karaisi ma monó nanin banta van ma anunu urem aya ono van ma vei aunan ampikheinie vá tireti anáona vará anunu ono. <sup>26</sup>\*Banasí mamán kantasí ono van mi Yisas Karaisi anon non má Tiyarafeni vayafó bái vei vanasi sesé uran mi ven avorá kamaen kantasí ukhen mino. <sup>27</sup> \*Béi ma máan tein mai ve avorá maman avusesen kama urantin pain nafi snton nafi ída vantin bei vanasi ano ída aau vantin kantasí ana ukhen bano van mino. <sup>28</sup> Máan mana en ná avafuná ano ma vetíi au van ma anunu iyainien ná betí anáona vará anunu ino. Mai fara vara seyo, avafu ano ma ve ana san ma anunu inten mai fura sen beyan nan mi anunu iyan mino. <sup>29</sup> Yisas Karaisi ma ve au an dakhan ma monó nanin banta van anunu iyainien mana vanta ano ída vei au van oman kaumpan é iyan mifo kama urem mi yafisé iyan mino. <sup>30</sup> Máan tukhái setí

ankan Yisas Karaisini au vukhafan bá tiféuno.

<sup>31</sup> \*Tiyarafenui vompon dóki ano máa sikhen mino. “Mai van mi vanta ano ve anóe afóen me ampiren be aná bá o súpá en mana vukhafaí é iyan mino.” *Esé 2:24*

<sup>32</sup> \*Mai vaya anon moéken kákani suron ukhen mifo Yisas Karaisi ma monó nanin banta vá manan mana vukhafaí ukhei pákena vayan tiádon ban mino. <sup>33</sup> Máan tukhein nan mi saretin evaráné tiámé uno. Mana mana vanta ano ma eyan nan ma anunu iyaonai eya vá e aná anunu ono. Inká anasi ano vá be avafuni aránaópá báke ná ben oo yaiyino.

## 6

### Anóe Afóen Má Iyamporinta Vái Vaya Ino

<sup>1</sup> \*Iyamporinta oe, Bafan mái súpá ukha ompo anóe afóni oo vá daiyono. Mai fara vara seyo, máan ma inteya mai kamaen puntákein avúavá baran nono. <sup>2</sup> Tiyarafenui siyan míkan man baya kayo finté ma esé iyáantán ma vain man baya ano máan mi sikhen mino. “Tiretí anóe afóeni aránaópasá bákeya vetin oo vá daiyono.” <sup>3</sup> Mai ma iyáantán baya ano máan mi sikhen mino. “Tiretí anóe afóen aránaópá báke ma vetin oo yaiyinte mai kama e ma varará ayáká ban nono.” *Diu 5:16*

<sup>4</sup> \*Inká tiretí afóe yan noe, ída vá iyampon kayo ma aran amin avúavá bariyákeya vetin kama uantádeya vá Bafani kama avúavá sintá vá afova ameno.

### Miyan Ída Van Doran Banta Kayo Vá Ayafa Kéká Báí Vaya Ino

<sup>5</sup> \*Miyan ída van doran nanin banta oe, Yisas Karaisini oo yaiyono van ma iyaonai eyá tiretí

ayafa aránaópá bákeya vetin ma sin nain dorarisá ono. <sup>6</sup> Tiretí ayafa kayo ano ma saretin ádé ban nain damú ana ída vá betin amusin ameno van ákona yorari ono. Ída ino. Yisas Karaisini miyan ída van doran nanin banta ma vanteya aúkáke sá Tiyarafenui anunu vákurono. <sup>7</sup> Bafan mano amusin ino van munó siren vá amusin iyákeya aúkáke sá minó doran dorano. <sup>8</sup> \*Máan tukhein nan mi miyan ída van doran nanin banta fu inká miyan ban doran banta fu mai ovaresá me iné tifano. Tetí ma kama yorari ukhá onunarái siyan Bafan mano miyan timirú inten mino.

<sup>9</sup> \*Inká tireti ayafa vanta kayo oe, saretí miyan ída van doran nanin banta kayo ída vá akhokho amiyákeya vetin kama uresin ná bano. Ovare vá me ineno. Betí má tiréti mái Kákán mai inarufái váken béisí ída mana van mana anunu é iyan mino.

### Tiyarafenui Aruvín Danasinta Fákena Vaya Ino

<sup>10</sup> Tesi kípon baya ino. Bafani kákán ákona vasá mantaan ákona ono. <sup>11</sup> \*Tiyarafenui minó aruvín buí daná ma ureyan kasae mantaan ákona uve mae Ban Anoni máka simpin esantan nono.

<sup>12</sup> \*Mai fara vara seyo, varará nanin banta vá ída siruviyá tifé umpo namu aunani ánon banta kayo vá ma varará ma yafíkein namu aunan kayo vá inká titípa avúavá bá ayompin ma namu avúavá bariyain aunan kayo vá siruviyá tiféuno.

<sup>13</sup> Máan tukhein nan Tiyarafenui minó aruvín buí daná urákareya namu yamú ma erintiya kasae mantakhare vá inká aruvín ma kípavinti yere mantaan ákona ukhe vano. <sup>14</sup> \*Mantaan ma

\* 5:31: Mat 19:5    \* 5:32: Rev 19:7    \* 6:1: Kor 3:20    \* 6:4: Íbo 78:4; Pro 22:6; Kor 3:21  
 \* 6:5: Kor 3:22-23; Tai 2:9-10; 1Pi 2:18    \* 6:8: 2Ko 5:10; Kor 3:24-25    \* 6:9: Rom 2:11; Kor 4:1    \* 6:11: Rom 13:12; 2Ko 10:4    \* 6:12: 1Pi 5:8-9    \* 6:14: Ais 11:5; 59:17; 1Te 5:8

ákona ono ma sinteya fura vaya ana ma simpo sá amú ananí eya vá Tiyarafenui funtákein avúavápó kápá ona ma uan ákorá iyareinisá ono. <sup>15</sup>\* Inká Tiyarafenui kama vaya finté ma eriyain kusin bayá fosá arantan anamun an dareya fura se útare vá bano. <sup>16</sup> Mai aruvín danasinta ma variyákeyá inká mumunan ná pákaán ákona uresin ná mai ano sanko an davintin ná Ban Anoni ira khiyain uve kayo ano e khútino. <sup>17</sup>\* Máan tiyantiya vá inká Tiyarafenui ma siretin evaránen avíkein inin mano vá kápá kamamó ma einí uvintiya vá inká Tiyarafenui vaya fosá maman Kantá Aunani vaenatií ure vá pákaán ákona ono. <sup>18</sup>\* Kantá Aunani ákona rasá ena ena yamú amúkiyáke vá ákona e Tiyarafenun tiamesin ná tiretin aya ino. Ena ena yamusá minó akhempá ma vain monó nanin banta van iniya vá amúkuantano.

<sup>19</sup>\* Máan tiyákeyá Tiyarafenui kama vaya ma vain mai ena anan nanin banta ina vá dere ifo vá amúkusintiya sirá beni aupá in-eine ída feran kamaesá tian amá uan ameno. <sup>20</sup>\* Mai fara vara seyo, séi Tiyarafenui oo vantán bákéi mai vaya ma siyaruna anarái siyan tirantantá seni anan kukhen mifo amúkusintiya sirá ída feranton kasaé beni vaya sian amá ono.

*Pori Ma Kípiyan Amusin Baya  
Sein Mino.*

<sup>21</sup>\* Tikikasi maen téin tinunu ukhein tifá tiváén báken tiyaen Bafani ákona yorarí iyain bantin téi ma variyaruna fáké bayá sian amá intiya inin nono. <sup>22</sup> Mai van mi siretin ákona uantan bayá siamiyáken inká teti ma varuna fáke yere siamino van mi véin tiantékun tireti vaonafá orinten mino.

<sup>23</sup> Mumunan tiyofi sifá tiváeyan noe, seti Sifóe Tiyarafenu vá Bafan Yisas Karaisin má anon tiretin nan anunu uren ará kusiantáden mumunan ákona uantan mino. <sup>24</sup> Mai ma setisi Bafan Yisas Karaisin nan ma aúkáké anunu iyain kayofin ná Tiyarafenui sarisari ano vano.

---

\* **6:15:** Rom 10:15    \* **6:17:** Ibu 4:12    \* **6:18:** Ruk 18:1; Kor 4:2; 1Te 5:17    \* **6:19:** Kor 4:3-4; 2Te 3:1    \* **6:20:** 2Ko 5:20; Frm 9    \* **6:21:** Apo 20:4; Kor 4:7-8; 2Ti 4:12

**PORI MA FIRIPAÍ  
NANIN BANTA  
UVAMAN AMEIN  
BOMPON MINO**  
**(Firipai)**

**Firipai Vompon Ma  
Uvanteí Pákenai  
Afova Vaya Ino**

*Ma vompon ma uvantein banta ino.*

Baya varen orin banta Pori ino.

*Uvarein orana ino.*

AD sikisti-uvani (61) ráké sikisti-tari (63) fin mi ma vompon uvanten minon ten kokhon afova vanta kayo ano inikhen mino. Mai maen Korosí nanin bantai vompon má Firimonini vompon masá uvanten nafi áa ída fi sen iniyan mino.

*Ma vompon ma uvantein baru ino.*

Romú barurá karavusií uran báken karavusi namun pintéi uvanten mino.

*Ma vompon ma uvaman amikhein kéká ino.*

Pori ma kan dádasí en ma monó dorarién eúkiyáin pimpá ma Firipaí nanin banta o avían monópin kauká ein kékái amikhen mino. (Aposeri 16:12-40 fin ná onano.)

*Nái ana vará ma vompon uvan-ten nafino.*

Firipaí nanin banta maen baya inin kéká báken inká ena kéká ará amin kayo vákan pasen Pori vetin nan moéken anunu iyáken betin má túpá uven Yisasini kama vaya siamein tusu siantano van mi uvanten mino (2 Korin 8:1-5 fin má Firipai 1:5 fin masá onano). Maifin ma varé

ein kéká maen mai nararé davaráe ma sariyá ein nanin Ridian má Firipaíke karavusi namuntá ma yafíkein banta vá be aná akhá bá ino. Maifin Ruku masá baren nafi sen iniyan mino. Pori veyan ma karavusifin bain nan ída inen mifo vei amusin má anunu vá inká Karaisini yoran ma moékentá doriyain má bei vaya ana vái ma vompompin tian amá ukhen mino. Firipaí nanin banta ano ve ma afova amikhá ein baya me ampiren tavi yaná eyakhafin nain nan mi ma vompon uvaren mino. Mai van mi véin tusu siantiyá uno.

*Porini Amusin Baya Ino*

<sup>1</sup> \*Minó Tiyarafenu vanasi vá ánoní ma ukhein kéká bá inká monó doran banta kayo vá ma Firipaí barurá báken Yisas Karaisintá monó tiyain kéká baípái ma vompon uvamádékun oren mino. Yisas Karasini yoran bantá kanan téi Porin má Timotin má anon ma vompon uvaré uno.

<sup>2</sup> Teti Sifóe Tiyarafenu vá inká Bafan Yisas Karaisin má ano vá tarisari vá kusin má tiretin amino.

*Firipaí Ma Monó Nanin Banta  
Vain Nan Ma Pori Susu Amúkirí Ein  
Baya Ino*

<sup>3</sup> Tiretin nan ma ineine eruna yamú tetisi Tiyarafenu vaípá tusu sé iyá uno. <sup>4</sup> Téi ma simúkeruna yamú mai simusin máí siretin aya ino van timúkuanté iyá uno.

<sup>5</sup> Mai fara vara uno. Esé ma ineron táké ma se má túpá ukhen ná ma Yisasini kama vaya siamé eruna avúavá ma sareá fara fákaan ákona ukhaona van muno. <sup>6</sup> \*Máón tukhein nan mi Tiyarafenu ano siretin afová ukhen mi siretimpin bei kama yoran araí ukhein doren oriyaré intin ma Yisas Karaisi ma

\* 1:1: Apo 16:12-40    \* 1:6: 1Ko 1:8

ovaránen erin nain damúi mo kípanten mino.

<sup>7</sup> Tiretí ankan nan te súkákéi kama inín manan tiyá uno. Mai fara vara seyo, séi ma karavusifin nafi varufa safi ma vákuya saretin má deren Tiyarafenu sarisari variyáke véi ma simikhein doran tiyae yoriyare ono. Máan tiya inká beni fura sikhein kama vaya ma namuroí uantiya mae yo yureya mai vayará ákona uantiyare ono. <sup>8</sup> Yisas Karaisini arunaná pókéi saretin nan moéké tinunu iyá uno. Tiretin oman onano van kákantái ineine iyáku Tiyarafenu ano afová ukhen mino. <sup>9</sup> Téi ma simúkiyáruna mai sretíi avábá in maran mano moéken bíkaqren avaniyantiya funtákein avúavá afová iyasin kama ineine ano e inoren mo kákán ino van muno. <sup>10</sup> \*Mai fara vara seyo, sretíi ankan kákán daná óde afová ureya ída mana ume vantiya avusese e funtáke oriyasin Yisas Karaisi ma ovaránen erin nain damú o afoká ino van mi inikhé uno. <sup>11</sup> Yisas Karaisi anon minó damú puntákein avúavá tiretin aúpin ákona uantiyantin mai avúavá ano sretíi kama avúavái nan aran irantin maen mai ano Tiyarafenun kákán bí aminten mino.

*Porin Ma Fákaan Karavusií  
In Avúavá Anon Kama Vaya Ma  
Siamin Aa Uvisen Mino*

<sup>12</sup> Mumunan tiyofi sífá tiváeyan noe, sretíi ankan afovasá ono. Mará ma sen timaniná afoká iyain mai yanásinta anon tiya iyan Tiyarafenu kama vaya ano minópá orera iyan mino. <sup>13</sup> \*Mai fara vara seyo, Yisas Karaisini yorarí ma iyaruna van mi karavusií ukhékun ma varuráké nanin banta vá kin amápin ma yafisin kéká bá ano afová ukhen mino. <sup>14</sup> Téi ma karavusifin baruna anon mumunan nanin banta ákona uantan ída

feranton Tiyarafenu vaya kasaen banasi siamiyan mino.

<sup>15</sup> Pura sen manáa kéká ano séi ma yoriyaré eruna yoran maman daní ono van iyan mifo ena kayo ano funtáden kama ineinefói Yisas Karaisini vaya máan banasi siamiyan mino. <sup>16</sup> Betí ankan téin nan anunu iyáken mi kama vaya siamiyan mino. Mai fara vara seyo, Tiyarafenu anon téin nan aní uran báken mi kama vayará ákonaen dafíken mino sen afová ukhen mino. <sup>17</sup> Manáa kéká ano ída funtákein inin onan mái Yisas Karaisini vaya vanasi siamiyan mino. Betí ankan ída ena van iniyáken ma vetiyan kákán bí bariyain mai avúavá anon téi ma karavusifin baruna mai moéken uman timiyan mino. <sup>18</sup> Betí ankan ída funtákein ineine fosá Yisas Karaisini vaya vanasi siamiyan nafi áa funtákein ineine fosá tiamiyan nafi mai van timusin iyaruna mai fara simusin manan é oriyá banté uno. <sup>19</sup> \*Mai fara vara seyo, sretíi ankan ma sen nan amúkusintiyaona van mi Yisas Karaisini Kantá Aunan mano siya iyan mi mai anon tenti uman mo seso sisintanten mino.

*Pori Ma Yisas Karaisini Vayará  
Mantakharé Ein Baya Ino*

<sup>20</sup> Mai fara vara seyo, séi ma inikheruna ída siyave van onté umpsó feffá ma iyá erunaí é Yisas Karaisini vaya kasaé tiámé oriyá banté uno. Téi ma mumunan ukheruna mai furonte rafu áa fará bante rafu mai anon Yisas Karaisin kákán bí aminten mino. <sup>21</sup> \*Mai fara vara seyo, séi ma fara saunán bantí maé Yisas Karaisin ninan baréi furékun maen mai moéken kama uron inten mino. <sup>22</sup> Máan tinten mifo séi ma fara váken maen Yisas Karaisini vayará ma mumunan inain manon aran imáden inká anon buáden mifo

\* **1:10:** 1Te 5:23    \* **1:13:** Apo 28:30    \* **1:19:** 2Ko 1:11    \* **1:21:** Kar 2:20    \* **1:23:** 2Ko 5:8

maí kanan pintena intéa anó esantakhen nafi mai séi ída afová ukhé uno. <sup>23</sup>\*Tesi inin mano kampintaní iyan mifo maíkán daná ma me ampiren Yisas Karaisi má ma o van mi kama uron ukhen mino. <sup>24</sup>Máan tukhen mifo séi ma ída furin para váké ma siretin ayaín mi kama ukhen mino. <sup>25</sup>Tenti ákona inin ma vain mai séin ma ída furin para váké maé tiretí ankani mumunampin amusin amiyáku mai afová uresin tiretíi mumunan mano mo ákona ino van muno. <sup>26</sup>Ákona ukhá esí ma séi ovarané tireti vaonafá eréku mae mai ma séin pinté uaren ma Yisas Karasi ano variyain avúavá san kasae sretí ankan amusin iyáke véin aví manan daní inono.

### *Tiyarafenu Vanasií Ma Ukhén Ban Baya Ino*

<sup>27</sup>\*Máan tin nompo séin timaná ma afoká inain dana san ída vá iniyákeya sretíi fura ineine vá Yisas Karaisini kama vayará ana vá kaúde inaruráke nanin banta an ná dakhe vano. Máan tukharé esí ma séi eré e onante rafu áq fará inente rafu mai manafin mi inin onan kaúde mantaaán ákona ukheyán Kama Vayará mununan ino van mi vanasi siamiyaren mino sé afová onté uno. <sup>28</sup>Tiretíi namuro ano inte aafákesá tireti amaniná uman kaono van inten nafi mai van ída vá perano. Mai avúavá anon betin aní intin mi afová iyáken Tiyarafenu ano setin tiren asuse inten mino siyantin beyantá tiretin aya inten mino. <sup>29</sup>\*Mai fara vara seyo, Yisas Karaisintá ma mumunan in afova ana va amikhen naino. Ída ino. Ben aviká ma uman baran mái amikhen mino. <sup>30</sup>Teti minó anon manaí ukhen uman bariyá tiféuno. Pefá ma séi variyaré eruna uman tireti ontareya saréa

mai uman aúbaná para vákuya afová iya ono.

## 2

### *Yisas Karaisin An Den Ma Ará Bararasí Uren Ban Baya Ino*

<sup>1</sup> Yisas Karaisin nina yaná pinte ídá mana ákona mantare fono. Inká beni avábá pinte ídá ará kusin mantare fono. Inká Kantá Aunan má ída ará manafiní ukhare rafono. Inká aúkáke sá ena nanin banta kama ure yafisiyare fono. <sup>2</sup>Máan ma iyáre inte mae ará manafin ure vá ben anunuin maran iyáke inká inin onan manafin kaúde vaya sian damuare vá téin timusin in dorarisá ono.

<sup>3</sup>\*Ída vá eyan nan inireya ena oman kaumpán ono. Ará barará desin erafuvinti vá ena nanin banta vará moéke ineno. <sup>4</sup>\*Tireti ina yanásinta ma yafisinona van mana ída vá iyákeya ena ina yanásinta vá dere vá daffantano.

### *Yisas Karaisi Ma Veyan Maman Bararasí Ukhéin Baya Ino*

<sup>5</sup> Yisas Karaisi ma variyaré ein mai avúavá ana vá tiretimpin bano.

<sup>6</sup>\*Pefá bái Tiyarafenu vá manaí ukharen mifo  
ma varafin ma erein damuí  
mai ma manaí ukaré ein me  
ampen mino.

<sup>7</sup>\*Beyan maman bararasí uren  
ída miyan ban doran banta an  
daven  
inká barará banta ma noin  
avúavákai sen noren mino.

<sup>8</sup>\*Inká Tiyarafenu vaya iniren bei  
au maman bararasí uren  
umoyan banta ano ma yaa  
unkamádantá ma furein an  
den mino.

<sup>9</sup>\*Mai van mi Tiyarafenu ano  
véin mamañ dan uron bain  
barurá kaúden

\* <sup>1:27:</sup> Efe 4:1; 1Te 2:12      \* <sup>1:29:</sup> Apo 16:19-40      \* <sup>2:3:</sup> Kar 5:26      \* <sup>2:4:</sup> 1Ko 10:24  
\* <sup>2:6:</sup> Yon 1:1-2; 17:5      \* <sup>2:7:</sup> Yon 1:14; 2Ko 8:9      \* <sup>2:8:</sup> Ibu 5:8; 12:2      \* <sup>2:9:</sup> Apo 2:33;  
Efe 1:20-21; Ibu 1:3-4

minó ena aví kayo esan-  
takhein bí amikhen mino.

<sup>10</sup>\*Amikhein mai inarufá ma vain  
kayo vá inká barará ma vain  
kayo vá ma vara aránaópá  
ma vain kayo vasá  
Yisasín bí ká ana vá aron du-  
rafúden monó tiantano.

<sup>11</sup>\*Máan tintin minó ano Yisas  
Karaisin nan ma Bafan  
mino sinain manon  
Tifoe Tiyarafenu aví yaní in-  
ten mino.

*Tiyarafenu Vanasi Ano Ma Ofu  
An Den Moéken Kakhaantan Baya  
Ino*

<sup>12</sup> Téi ma sinunu ukheruna  
sirona kéka soe, séi ma saretin  
má báku mae séi ma seruna vaya  
ánain ena ena yamú kama e  
yakhafiyaré en nái sareá saretin  
má ída vá umpo ákona e vá mai  
ma siamiyaré eruna vaya ánain  
ná dakhafono. Tiyarafenu ano  
ma saretin evaránen avíkein nará  
purase veni aránaópá bákeyá ven  
nan periya vá beni yoran posá  
banasi aní ono. <sup>13</sup> Mai fara vara  
seyo, Tiyarafenu anon tiretimpín  
doriyáken beyan ma amusin amé  
iyain mai ákona vá anunu vái  
saretin amiyan mino.

<sup>14</sup> Minó dorarí ma inonafin  
ída vá ena oyampá baya seya  
inká asive asive iya vano.

<sup>15</sup>\*Máan tesin ná ída vá tiretin  
oyampá baya sen kakhirun arino.  
Puntákein nanin banta váke vá ma  
varará ma kampun avúavá ana  
ma varen oriyan bain kékápin ná  
Tiyarafenu akhafana an dakhe vá  
betin aúbaná ofu kayo ano ma  
kiyan bainisá ono. <sup>16</sup>Aun bain  
baya ma fákaan ákona ukharé esí  
máé Yiás Karaísí ma ovaránen  
erin nain damúi séi ma yoriyaré  
eruna yoran ída fa savifá o  
afeyoren mino siré timusin onté  
uno. <sup>17</sup> Timusin onté umpo se  
saunan mano Tiyarafenurá ma

íkun uan amin non ma vanaein  
an ma yanten maen tireti ma  
yoriyaona mai moéken ákona  
uantanten mino. Tiretin naro siré  
ma fúkaré maé tiretin má manafin  
timusin ono van muno. <sup>18</sup>\*Máan  
tukhanti saretin má dere vá mai  
van amusin esi sá ten má timusin  
ono.

*Firipai Nanin Banta Ayaino Van  
Ma Pori Ano Timotin Tiantan Nain  
Baya Ino*

<sup>19</sup> Bafan Yisas Karaísí ma  
anunu inain nan mi ainé Timotin  
tiantékun tireti ma monó dorarí  
iyaona o ódaren intesá é doriya fo  
mai me sisimintí timusin onté uno.  
<sup>20</sup> Timoti ma einí ukhein banta ída  
ena sen má báken tiretin ayaen  
dorano van inikhé mino. <sup>21</sup> Para  
vara seyo, ena kéka ano vetiyan  
ma ayain doran nan manan iniren  
Yisas Karaísí ma amikhein doran  
nan ída iniyán mino. <sup>22</sup> Máan  
tiyan mifo Timoti ma ákonaen  
doriyain doran tireti afová ukhen  
nan mi ve anin mano ma ve afóe  
má túpá uven doriyainén mi séin  
tiyaen Tiyarafenu kama vaya  
vanasi siamiyan mino. <sup>23</sup> Mará  
ma séin timaniná intéa yanasá  
afoká inten nafi mai ma afová  
uré maé ída ayáká báké bén  
tiantékun tireti vaonafá orinten  
mino. <sup>24</sup> Máan tukhái séi ma  
Bafantá inin kaiyaruna véi ma aaí  
intí ída ayáká báké teyantái saretin  
o onanté uno.

*Pori Ma Epafrodusin  
Tiantantin Firipai Nanin Banta  
Vaípá Orino Van Ein Baya Ino*

<sup>25</sup>\*Máan tukhá umpo saréa  
Epafrodusin tiantékun tireti  
baonafá orino van mi séi inikhé  
uno. Béi funtákein tifá tiváen  
báken mi séi ma o afasí eruna yaná  
tiya é iyan mino. Inká béi saretíi  
vaya varen orin bantan báken  
monó baya simpin ma séi uman  
barékuñ maen ída feranton tiya  
é iyan mino. <sup>26</sup> Béin nan aí iyan

\* **2:10:** Rom 14:11 \* **2:11:** Rom 10:9 \* **2:15:** Dan 12:3; Fir 1:10; 1Te 2:19 \* **2:18:** Fir  
3:1; 4:4 \* **2:21:** 2Ti 4:10 \* **2:25:** Fir 4:18

ban mino se ma sireti ineona van mi véi anomé iniyáken tiretin o onano van iyáká mai van mi véin tiantano van iyá uno. <sup>27</sup> Béi aí mamaren pura sen purinté ein mifo Tiyarafenu ano verasan nan arunan uren mi séin nan moékán arun naná baranae siren mi véin ayain asefaen mino.

<sup>28</sup> Mai van mi véin tiantéku tireti vaonafá orino van mi séi moéké tinunu ukhé uno. Mai fara vara seyo, séi ma afová ukheruna sireti ma véin oniyáke kákán amusin esí maé téi sretin nan ída sirunam uré kokhon inéine onté uno. <sup>29</sup> Béi ma orinti mae amusin iyáke vá monó avúavá posá kama ureya e avian kaúde mae máan banta kama uresin ná bano. <sup>30</sup> Mai fara vara seyo, sireti nentá báke ída kanaíe siya oren ukhen nan mi véi ída ve au van ininton téin tiyaen Yisas Karaisini yorarí iyaren mi furin avídoren mino.

### 3

#### *Yisas Karaisin Ma Afová Uren Moékán Miyan Baran Baya Ino*

<sup>1</sup> Mumunan tiyofi sifá tiváeyan noe, nái avúavasá afoká inten nafi Bafan mano vá amusin amino. Tiretui mumunan ákoná uantano van mi ída sivesara inan ena ena siamiyá bá uno.

<sup>2</sup> Mai ma afá iyan kayo an daven ma námu avúavá baren nóken au ma khavinona kéká anon para van oriyan ban aunan baran nono ma siyain kéká sará dafian ákoná ono. <sup>3</sup> \*Mai fara vara seyo, Ti-yarafenurá ma Kantá Aunampin monó tiyá tiferuna kéká anon pura sé tu khakhé tiféuno. Mai ma Yisas Karaisi ma setin nan púaren e mantakheintái setisi ákoná inin kaúké umpo varará nanin bantai avúaváka saino. Ída ino.

<sup>4</sup> \*Dan bukhafará ma variyaruna yanasisinta ano sétin tiyaen

baré intí mai ma yan bukhafará dáko iyan ma amusin iyain kéká esantaré kama ukhévanunaren mino. <sup>5</sup> \*Mai fara vara seyo, séi Bensamenini anan pinté dáko ukhé Isarerí anan banta uron mi vá uno. Téin ma se sinóe ano kauran ma yan manápá ifo afápá kanú manaú damú orivíkan maen tu khakharen mino. Máan tukhái Farasisi kéká man bay afová suron ukhé mai ánain dakhafé iyá uno. <sup>6</sup> \*Pefá Yisasintá ma mumunan iyain kéká ariyáke uman amiyaré umpo mai ma séi yoriyaruna sivútivá ma vanasi ano yaíden afová inten maen mai séi ída mana man bay a yurafuriyá uno.

<sup>7</sup> \*Mai ma yan bukhafará bariyá eruna yanasisinta van kákán daná ino siyaré umpo Yisas Karaisi ma fúaren e mantakhein ma oniyáke mai ma variyaré eruna yanasisinta van ída veni ana vain daná inon té iniyá uno. <sup>8</sup> Tesi Bafan Yisas Karaisi ma mantaré ein avúavá ma afová ékun kákán danasi íkan inká tetí ma variyaréeruna yanasisinta anon mo faen danasi en mino. Mai fara vara seyo, mai ma mantaré ein daná anon tiya iyain bara ráke vantai avúavá maman pasavi yanasi uré maé Yisas Karaisin mái súpá onté uno. <sup>9</sup> \*Máan turé ma ven má manafin túpá uvé maé béstá mumunan uvé puntákein bantan banté umpo seyantá ma man bay a yakhafin mano va funtákein banta vante rauno. Ída ino. Mai fara vara seyo, Karaisintá ma mumunan é tiféku mi Tiyarafenu ano funtákein nanin banta e sinten mino. <sup>10</sup> \*Yisas Karaisi ma fúkaréin orun avian mantakhein ákoná ma afová uré béis ma variyá ein uman kayo variyaré maé béis ma fureiní ono van muno. <sup>11</sup> Mai fara vara seyo, mai ma véi fúkaréin

\* 3:3: Rom 2:29    \* 3:4: Apo 22:3    \* 3:5: Ruk 1:59; Apo 23:6; 2Ko 11:22    \* 3:6: Apo 8:3

\* 3:7: Mat 13:44-46    \* 3:9: Rom 3:21-22    \* 3:10: Rom 6:3-5; 8:17

e manteiní ana ono van muno.

### *Ákona En Tava Uren Ma Esantaren O Miyan Baran Baya Ino*

<sup>12</sup> \*Téi gefasa ven avúavá mamaré puntákera siya raumpo mai ma Yisas Karaisi ano ma iyátintákein pákaan ákona ono van mi ma yorarí iyá uno.

<sup>13</sup> Mumunan tiyofi sifá tiváeyan noe, mai ma siamiyaruna yanasingta ída mantéi mai van mi feyante avúavá me soyán amiré nái yanásá ínaimpá barante rafu mai yana san mi kakháké doriyá uno.

<sup>14</sup> \*Inaru fáke miyan barano van ma Tiyarafenu ano Yisas Karaisin pinté uaren ma setin tariyain nan mi mai miyan o varano van ákonaé tava iyá uno.

<sup>15</sup> \*Monópin ma vá tiferuna nanin banta ano mai yanasingta van mi kakhábó tifanté umpo manáa yana san ma ída sirá manafini é tifékun maen Tiyarafenu ano aní usintanten mino.

<sup>16</sup> Mágan tukhen mifo mai ma gefá ma fákakhá é tiferuna avúavasá pákaan ákona ó tifano.

<sup>17</sup> \*Mumunan tiyofi sifá tiváeyan noe, mai ma séin tínaín bákuriyain kékái avúavasá afová ureya senti sivútvá basá maman manaí oro.

<sup>18</sup> Mai fara vara seyo, mai van mi gefá kokhon dádá tiáméku iniyá en ná taréa yere kokhon kékái avúavá anon Yisas Karaisini yaa unkamádan nan namuroí uantiyái sínu finté tiretin tiamiyá uno.

<sup>19</sup> \*Ma vara ráke anunu ma vain mai vetíi ayarafenui vákan mai yanasingta van mana iniyá ída ayave inton kasaen namu avúavá bariyain mai kéká ano ínaimpáké umampin oferanten mino.

<sup>20</sup> \*Mágan tinten mifo Bafan Yisas Karaisi ma vain baru mai inarufái váká tetin má dere inaru

fáke nanin bantan báké béis ma setin e siviran nain nan mi ave ukhé tiféuno. <sup>21</sup> \*Mai ma minó daná esantan nain ákona fóké anan tetin turá ma váken uman timiyain bukhafa yo vaéan bei kakhakhein bukhafa an danten mino.

## 4

<sup>1</sup> \*Mágan tukhein nará mumunan tiyofi sifá tiváeyan noe, Bafantasá túpá uan ákona uron ono. Mai fara seyo séi ma saretimpin doriyá erunai nan aran mi vanái saretin onano van moéké tinunu iyá uno.

### *Porini Kípan Afova Vaya Ino*

<sup>2</sup> Tinunu iyá umpo Yuodia má Sintiki masá ineno. Tiré kanan Bafan ninan baompo ída vá anan uantan maran iyáke manafin ná bano. <sup>3</sup> \*Ten má ma manafin doriyaona ano mai kan nanin aya ono van mi siamiyá uno. Mai fara vara seyo, vékan má anon tiyaen Tiyarafenui Kama Vaya siamiyáken Karemenin má mai ma siyaen doriyain kéká bá túpá uven ákona yorarí iyan mino. Mágan tiyákan betin aví ano Aunan Baran Bompon Dókifin ban mino.

<sup>4</sup> Minó damú Bafampin amusin iya vano van mi evaránáé tiamiyá umpo amusin ono. <sup>5</sup> \*Minó avúavá ma variyaona áesin ná banasi ano oniyáken kusen ban avúavá variyan mino sen afová ino. Bafan inká ádé anantá erinten mifo afová ono.

<sup>6</sup> \*Minó dana san ída vá kokhon ineine iyáke Tiyarafenu ma mantein danasará tusu siyáke sreti ma o afasí inona yanasará béis vaípá amúkimpó inan teno. <sup>7</sup> \*Mágan ma inte mae setisi ineine ano má ída kanaien afová oren daná mai Tiyarafenui kusin manon Yisas

\* 3:12: 1Ti 6:12, 19    \* 3:14: 1Ko 9:24    \* 3:15: 1Ko 2:6    \* 3:17: 1Ko 4:16    \* 3:19:

Rom 16:18    \* 3:20: Efe 2:6, 19    \* 3:21: 1Ko 15:28, 42-53    \* 4:1: 1Te 2:19-20    \* 4:3:

Ruk 10:20    \* 4:5: Ibu 10:25; Yem 5:8-9    \* 4:6: Mat 6:25-34; Kor 4:2    \* 4:7: Ais 26:3; Yon 14:27; Kor 3:15

Karaísimpin tetisi sú bá inin má maman túpá urantí bá tifanté uno.

<sup>8</sup> Mumunan tiyofi sifá tiváeyan noe, sipá kípan bayá siameno van muno. Mai ma fura sikhein avúavá bá inká ena ma avábá in má puntákein avúavá bá inká avusese ukhein avúavá bá káma uron ma ukhein avúavá bá inká ena ma esesí in má ma vain mairasá minó ei inin onan kaono. Kamaen ma funtákán nain danasinta vará maman kákan danasí ureya mai yanasará ineine ono.

<sup>9</sup> \*Mai ma sretí ankan téin tonen ná bariyáké inká inen ná tiameruna yanasisma afova vareona vá maman avúavápín ná kaúan one one vá ono. Máan ma esin maen ará ma kusiantan Tiyarafenu ano sretin má banten mino.

#### *Firipaí Nanin Bantai Amusin Danasinta Van Ma Pori Susu Sianstein Baya Ino*

<sup>10</sup> Téi afová ukhéku sretí ankan evaráne séin tiya ono van iyan ná Bafan nan kákan timusin uantiyá umpo séin ma siya ono van iyaona afokhan ída vakayai ída siya iya ono. <sup>11</sup> Manáa yana san o afasí ukhesa ma vaya siya rauno. Ída ino. Ten timaniná ma afoká é iyain daná afova ukhéi simusin má bariyaréi siyá uno. <sup>12</sup> Ona van damu safi áa ona ída vantin para van damusá afoká é iyan nafi inká dunan mano simükuntantirá banterafu áa sirafan ná bante rafu mai máan damú kayo ma afoká é iyain afova suron ukhéi simusin má anan bá é iyá uno. <sup>13</sup> \*Mai fara vara seyo, Yisas Karaisi ma simé iyain ákoná fói mai yanasisma kanaí é baré iyá uno.

<sup>14</sup> Máan té iyá umpo sretí ankan ma séin tiyaen ná ma mai umampin ma ofereruna mai kama uron mi e ono. <sup>15</sup> \*Téi ma arai é Tiyarafenu Kama Vaya sretin tiamídé ma Masedoniá

bára me ampiré oréku mae sretí afová ukhen nan ída ena nanin banta ano siyaen mifo sretí Firipaí nanin banta anon anan monípó tiyaeona ino. <sup>16</sup> Inká kákan baru Tesaroniká dere ma váku mae kokhon dádá tiya ono van kokhon danasinta khaenan oriyaren mino. <sup>17</sup> Téi sretin pintena mana yaná barano vara siya raumpo sreti ma kama avúavá bariyaonará Tiyarafenu ano miyan amino van mi siamiyá uno. <sup>18</sup> Mai ma sen pinte mantaré eona yanasisma esantare kokhon amusin mi Epafroditusintá kaen nan baren erí oné uno. Mai avúavá anon íkun uan amin ma kama aunka ódikan Tiyarafenu ano amusin einí en mino. <sup>19</sup> Mai ma séin kamaen dafisiyain Tiyarafenu anon Yisas Karaisin pinté uaren mi sreti ma o afasí inona yanasisma mai ma vei kakhampin bíkakhein pinte aminten mino.

<sup>20</sup> Teti Sifoe Tiyarafenu avisá ena ena yamú maman daní ótifano. Mai fura ino.

#### *Pori Ma Vaya Kípiyan Amusin Baya Sein Mino*

<sup>21</sup> Yisas Karaisintá ma mumunan nanin banta ma maifá baonafin mi sesi susu vaya kaékun oren mino. Inká ten má ma mumunan tifá tiváeyan ma vain mano vetíi amusin baya kain tireti vaonafá oren mino. <sup>22</sup> Yisasintá ma mumunan iyain nanin banta ano vetíi amusin bayan kain oriyan inká Romú kamanimpin ma yoriyain monó kéká bá anon moéken betíi amusin baya kain tireti vaonafá oren mino.

<sup>23</sup> Bafan Yisas Karaisini sarisari ano vá tiretií aunan má bano. Mai fura ino.

# PORI MA KOROSÍ NANIN BANTA UVAMAN AMEIN BOMPON MINO (Korosi)

## Korosi Vompon Ma Uvanteí Pákenai Afova Vaya Ino

*Ma vompon ma uvantein banta  
ino.*

Baya varen orin banta Pori ino.

*Uvarein orana ino.*

AD sikisti-tu (62) fin mi Efe-sási nanin banta vái vompon má Firimonini vompon má uváden mi manafin dan baren oren mino.

*Ma vompon ma uvantein baru  
ino.*

Romú barurá karavusií uran báken karavusi namun pintéi uvanten mino.

*Ma vompon ma uvaman  
amikhein kéká ino.*

Esiá barafin bain baru Korosaé ma vain monó nanin banta ma Efesasíke monó doran banta kéká ano ma o avían mantakhein kayofin nen ten iniyán mino. Korosaé barurá Pori ída oman monó dorarí ukhen ne sen ontén mino.

*Nái ana vará ma vompon uvan-  
ten nafino.*

Korosí barurá Pori ída orikharen pasen avábá bá aronaí in má bompon mi uvamádán orikhen mino. Kampun sakhanampa vanta kéká ano ma Yutan kayoi feyante avúavá bá inká Kiriki kékái avúavá bá ma maman manafiní iyain kéká amaan baya siamiyáken inká Tiyarafenu ano intesá uren ná ma vara uvaren ná inká

Tiyarafenun má ará manafiní e váke vá inká ákona e vá amúkono ma siyain mano Karaisini ovaránen erin manan titósí iyain nan mi sian amá ukhen mino. Máon ma ein manon Yisasi iyé ban nafi mai ven nan tian amá iyáken inká ena anampin ma fura kama vaya varen orin banta uno sen Pori veyan nan tian amá ukhen mino.

*Porini Susu Vaya Ino*

<sup>1</sup> Yisas Karaisini vaya varen orin bantaí ino siren ma Tiyarafenu ano vei anunurá ma aní ukhein banta séi Porin má inká tetí sifa tiváe Timotin má anon ma vompon uvaman,<sup>2</sup> Korosí barurá ma vákeya ma Tiyarafenurá monó tiyaona nanin bantan ameruna seti Sifóe Tiyarafenu sarisari vá ará kusin má ano saretin má banten mino.

*Porini Amúkin Má Inká Ti-  
yarafenun Ma Susu Siantan Má  
Baya Ino*

<sup>3</sup> \*Ena ena yamú ma saretin nan timúkiyá maé tetisi Bafan Yisas Karaisin Afóe Tiyarafenu susu sianté iyá uno. <sup>4</sup> Mai fara vara seyo, Yisas Karaisintá ma mumunan iyákeya ma Tiyarafenu vanasi ma avábá uantiyaona van mi setí ankan iniré uno.

<sup>5</sup> \*Mai fara va máan tiya vaono. Tiyarafenu ano ma kama yaná inarufá iyáantádan ma vain mai fura vayan iniyákeya mairái Yisas Karaisintá mumunan iyai veni vanasi ará amiya ono. <sup>6</sup> Tiretí ankan ma ineona mai kama vaya ano inka minó akhempá orera iyan maen inká mai ma saretin ará baéda ma Tiyarafenu fura yaná bá ume nanin banta ma sarisari in má ma afová eonaí en mi minó akhen páke nanin banta ará baédan mi mumunan iyan mino.

\* 1:3: Efe 1:15-16    \* 1:5: Efe 1:13; 1Pi 1:4

\* 1:7: Kor 4:12; Frm 23

<sup>7</sup> \*Teti ma sinunu iyaruna sifá tiváe Epafrasi ano ma ma kama vaya siamein mai véi maen Karaisintá mumunan iyain doran bantan báken tetin má manafin doriyain mi van tetin too varen mai yorarén mino. <sup>8</sup> Ena nanin bantá van ma anunuin avúavá ma Kantá Aunan mano siretin amikha ma mai avúavá má ena kéká ani iyaona van mi véi setin tisimen mino.

<sup>9</sup> \*Máan tukhein nan mi siretí ankaní vaya ma ineruna yamú kákéi siretí ankan aya urantiya moékentá béin afová iyasin Kantá Aunan mano kama ineine vá afova vá amino van Tiyarafenun timúkuon amiyá tiféuno. <sup>10</sup> Máan tiyá tífeúku mae siretí ankan mano Bafani vanasi ano ma funtákein aasá ma oriyainí esin mai van tiretin moéken anunu ino van muno. Máan intin tiretini ara ara yorani nan aran kamaen afoká inten mino. Máan esin Tiyarafenui afova ano mo kákání inten mino.

<sup>11</sup> \*Máan tiyantin Tiyarafenu ano vei moékan ákonafó tiretí ankan ákona amintiya mantaan ákona uve ara ara uman bare oriya mae mai uman kayo ma kípan nain damu san bempáké báké ave in nono. Máan tukhare maeya amusin mái <sup>12</sup> \*Afóen tusu siantan nono. Mai ma Tiyarafenui kakhantá báken ma kantasí ukhein nanin banta ma ameno van Tiyarafenu ano ma iyáantán bain danasinta van mai siretin mái varan nono sikhen mino. <sup>13</sup> \*Mai fara vara seyo, gefá kákán titípa aránaói varé é tiféku mi véi mai finté o siviren meren mi mai ma véi moéken anunu ukhein iyamponi yafisin aúpin kaí bá tiféuno. <sup>14</sup> \*Máan turen Tiyarafenu ano

veni narefói ume fintena setin miyaní urev evaránen tivíden ume ampisintáken mino.

### *Yisas Karaisini Kákan Bí Pákena Ma Pori Sikhein Baya Ino*

<sup>15</sup> \*Tetí ankan ída kanaí é Tiyarafenun oná tifanté umpo ven Anin Yisasi ano anan ben má manaí ukhen maen beni esé iyampon báken bái anan Tiyarafenu ano ma uvantein danasintará o ánoní ukhen mino.

<sup>16</sup> Mai fara vara seyo, Tiyarafenu ano Karaisin pintéi uaren mi inarufá ma vain danasinta vá inká ma varará ma vain danasinta vá uvantén mino. Mai ma yáko bain danasinta vá aúpá ma vain danasinta vá ara ara ákona vain enisori kayo vá inká ákona Aunan kayo vá ákona yaná kayo vá ma ma varará bain mai ven ninaen tiren uvadákan mi véi yaffiken mino. <sup>17</sup> \*Minó daná ída afoká ukhan maen bái gefá baréin pasen mai yanasinta ano véintái o súpá ukhen mino.

<sup>18</sup> \*Máan tukhein nan mi véin mumunañ nanin bantai ánon bákán mai nanin banta ano ventá o súpá uven mana vukhafai ukhen mino. Bái anon purin pinté an uanten orun mantaven minó danaká o ánoní uven mai yanasintará dafiken mino. <sup>19</sup> \*Mai fara vara seyo, Tiyarafenu ano Yisasimpin bano van amusin uaren mi véimpin e víkakhen mino.

<sup>20</sup> \*Bíkavin inarufá ma vain danasinta vá barará ma vain má ano Yisasin má manafin kasen bano van mi véin tiantan daa unkamádantá dorun puren mino. Púbin beni nare ma vanaein manon ben ma namuroí uantiyá é tiferuna kéká bá manafin kasen ban avúavá maman dákó en mino.

<sup>21</sup> \*Pefá Tiyarafenu ádé ída vákei siretií ineinefin béin namuroí uantiyákeya namu ineine iyaya namu

\* **1:9:** Efe 1:16-17    \* **1:11:** Efe 1:19; 3:16

2:2    \* **1:14:** Efe 1:7    \* **1:15:** Yon 1:18; 2Ko 4:4

26:23; Efe 1:22-23; Rev 1:5    \* **1:19:** Kor 2:9

\* **1:22:** Rom 5:10; Efe 5:27

\* **1:12:** Efe 1:11, 18    \* **1:13:** Ruk 22:53; Efe

\* **1:17:** Yon 1:1; 8:58    \* **1:18:** Apo

\* **1:20:** Efe 1:10    \* **1:21:** Rom 5:10; Efe 2:12

avúavasí iyare ono. <sup>22</sup> \*Máan tiyare ompo Yisas Karaisi ma yaa unkamádantá e furein manon mai ma Tiyarafenu vá ma namuroí iyá eona maman manafin kasen ban ayúavá dákó en mino. Béi ma máan tein manon tiretí ankan maman kantasi uren mi aviren Tiyarafenu avorá morantiya o mantan nono. <sup>23</sup> Máan tukhein nará mantaan ákona uve vá pura yanákasá mumunan iya vano. Máan tiyaré esin mana yaná ano e yarifaádantia mai ma inire ma mumunan iyá eona kama vaya me ampinona van muno. Minó akhempá ena kéká ano kama vaya siamiyákan mai yorarí ino van Tiyarafenu anon téi Porin aní ukhen mino.

### *Pori Ma Monó Nanin Bantai Yorarí Iyain Baya Ino*

<sup>24</sup> Tiretí ankan ma aya iyáké uman bariyaruna van timusin mi iyá uno. Para vara seyo, Yisas Karaisin aui monó nanin banta vákan mi vetin naro siren ma Yisasi uman baren mo áin ma fara vain uman aya uan kípantó uno. <sup>25</sup> \*Tiyarafenu anon téin aní uren tiván kaí monó nanin bantai yoran banta váke aya iyá uno. Máan turen mi sretí ena anan nanin bantafin minó beni vaya máa sian dákó ino siren mai yoran timikhen mino. <sup>26</sup> \*Tiyarafenu ano gefái ma vaya aúpá kain ban eriyan baren mifo saréan kantasi ukhein nanin banta avorái véi sian dákó en mino. <sup>27</sup> Para vara seyo, Tiyarafenu ano vei anunurái mai ma aúpá kain baré ein bayan bei vanasi avorá tian dákó uran mi mai vaya ano ena anan nanin banta ma mumunan iyain kayo aya iyan mino. Mai aúpá baya maen Yisasi ano sretimpin bantiya ventá mumunan iyá esin e aviren morantiya vei kakhampin

o vasin kama yanásinta amintiya varan nono.

<sup>28</sup> Máan tukhein nan mi seti ma oreruna akhempá Karaisini kama vayan minó nanin bantan tiamiyá uno. Tiyarafenu ano ma simein ineine vá afova vá ánaín dakhaféi ákona vayafó tiamiyá uno. Mai fara vauno funtákein nanin banta máa ana aviré Tiyarafenun mo ameno van muno. <sup>29</sup> \*Máan tukhein nan mi Yisas Karaisi ano ma simiyain ákona fói kákan dorarí iyá uno.

## 2

### *Yisas Karaisin Pin Ma Minó Kama Yanásinta Vá Kama Afova Vá Bain Baya Ino*

<sup>1</sup> Siretin má Raodisiá barurá bá má mumunan nanin banta vajn má inká téin ma ída sontein kéká bá ma aya ono van ma ákona yorarí iyaruna van afová ono van mi séi inikhé uno. <sup>2</sup> Téi ma mai yorarí iyaruna ana maen mai sretí ankan ará ákona uantékuya Tiyarafenui vanasi ará amire manafin kase vano van muno. Máan téku kama ineine varesin mai ano sretí ankani mumunan ákona uantantiya Tiyarafenui aúpá baya afová ono van muno. Mai aúpá bayai ana Yisas Karaisi ino. <sup>3</sup> \*Moní kain namun ma moní bíkakhen bain an mi yen ara ara afova vá aúpá ineine vá ano Yisas Karaisimpin bíkakhen ban mino.

<sup>4</sup> \*Manáa vanta ano ase vayafó tiretí ankan mákáden aviran nan mi ma vaya siamiyá uno. <sup>5</sup> \*Para vara seyo, séi ída sretí ankan má bá umps se sú bá ineine vá ano sretin má ban mino. Tireti ma funtáke váke ma Yisas Karaisintá ákonae mumunan iyaona vaya ma iniré timusin é uno.

### *Yisasin Má Tupá Uven Ma Kusin Má Para Van Oriyan Ban Aunan Má Baran Baya Ino*

\* **1:25:** Efe 3:2, 7-8    \* **1:26:** Rom 16:25-26; Efe 3:5, 9    \* **1:29:** Efe 3:7, 20; Fir 4:13    \* **2:3:**  
1Ko 1:24, 30    \* **2:4:** Rom 16:18    \* **2:5:** 1Ko 5:3    \* **2:7:** Efe 3:17

<sup>6</sup> Yisas Karaisin inka maman ei Bafaní ukha ompo ventá o súpá uve vá béin oo yaiya vano. <sup>7</sup>\*Daa ana ano ma varafin arú dan aravuvín ma mantaan ákona uven anu orun darifaren ma ampameiní eya va Yisasintá o súpá uan ákona uve vá mai ma siamé tiferuna vaya kaylorá ákona e mumunan iyáke vá Tiyarafenun moéke susu siantano.

<sup>8</sup> Manáá vanta kéká ano eriven maen kampun baya vá beni ana ída vain baya vápó me mákádantiya vetin dakhafin nompo yafíon ná ákona ono. Máan banta kayo ano vetí anafu aráoni ineine vá namu aunan kayo ma ayompín báken ma ma vara yafíkein kéká bái ineine ángain manan dakhafiyan mifo Karaisini ineine ángain ída yakhafiyan mino.

<sup>9</sup>\*Mai fara vara seyo, Yisas Karaisi ma varará bukhafa mamen ma setin tan davin maen Tiyarafenui Aunan mano véimpin e víken mino. <sup>10</sup>\*E víkayin namu aunan kayoi ákona yanasantará béis o ánoní ukhein pase véimpin ma o asótú uvesin maen Tiyarafenui Aunan mano véin pinté uaren tiretimpin e víkanten mino.

<sup>11</sup>\*Tiretí ankan ma ventá o súpá eona anon puraseya au ma khaveiní ukha ono. Mai maen dante vukhafarasa ifo aú bukhafará ino. Yisas Karaisi ano ve avúavápó ume vukhafa yo síkaan karúdara va ompo varará banta ano va máon tura va vaono. Ída ino. <sup>12</sup>\*Mai ma monó non pereona anon Yisas Karaisin má ma masí einí ukhareyan inká mai ma Tiyarafenu ano ma Yisasin Karaisin orun avían mantein ákongrá ma mumunan eona anon Karaisin má evaráne orun mantakha ono.

<sup>13</sup>\*Namu avúavápín pefá bákeyai feyante anunu ángain bákuriyan nan mai avúavá ano

siretin aruan pükaren mifo Ti-yarafenu anon tiretin avían Yisas Karaisintá túpá uren mi furin pintena evaránen avían manten mino. Máan turen mi setisi ume yo arútinten mino. <sup>14</sup>\*Man baya ano setin kótisintáden maen tetinti ume maman dákó uráí man baya aránaópá baré é tiféku mi Tiyarafenu ano mai ma kó tisintiyá ein baya minó do maman karúdaren man bayai ákona máden asuse uren Yisas Karaisini yaa unkamádantá mo khauren aríkan kípahlen mino. <sup>15</sup>Máan ma ein manon namu aunan kayoi ákona maman bararasí uren kípaanten mino. Yisas Karaisini yaa unkamádantá ma Tiyarafenu ano vei ákona aní ein manon betin maman bara finí uren mi vanasi avorá ayave amikhen mino.

#### *Tireti Ma Yisas Karaisin Má Púkeona Vaya Ino*

<sup>16</sup>\*Máan tukhein nan mi sireti ankan ída vá áesin ná tinafu siráoni man bayafin ma yunan má non má ma nan na fi áa avíkan damú kayo ma ída yafisin nara fi áa auyen biyon ma me khain damú ma amusin in nara fi áa Sabati yamusara fi ma are ukhan nain póké mana vanta ano siretin daimino. <sup>17</sup>\*Para vara seyo, mai man baya kayo ano ínaimpá ma yákó inain daná amamanon mi varé íkan Yisas Karaisi anon pura sen mai yaná ban mino.

<sup>18</sup>Barará bantai ineine ángain ma yakhafiyan banta kéká ída vá áesin ná tiretíi ineine máden asuse uren ná kama miyan baran aa yasirano. Inká tetí ankan kain onté umpo enisorí kayo rasá monó tiyaya mumunan ono ma sin nain banta kéká ída vá áesin ná tiretíi ineine máden asuse ino. Máan banta kayo ano vetiyan manan minó afova manté uno siren be aví daní é iyan mino. <sup>19</sup>\*Máan té

\* **2:9:** Yon 1:14, 16   \* **2:10:** Efe 1:21-22   \* **2:11:** Rom 2:29   \* **2:12:** Rom 6:4   \* **2:13:** Efe 2:1, 4-5   \* **2:14:** Efe 2:14-16; 1Pi 2:24   \* **2:16:** Rom 14:1-13   \* **2:17:** Ibu 8:5   \* **2:19:** Efe 2:21; 4:16

iyan mifo setisi ánon Yisas Karaisin má vain má ída o asótú ukhen mino. Para vara seyo, setí ankan béisipin mi o asotú uvé tifékuñ mi vei minó bukhafafin béis yuñan amiran maen ákoná varé iyan mino. Tiyarafenu fintena anan ákoná mamaréi mumunampin inoré iyá tiféuno.

<sup>20</sup> \*Tireti ankan pefái Yisas Karaisin má púore orun mantaven nan mi véi ano saretin maman auyení ukhen mifo fara é tiré ma vara ráke vantai man baya ano ma máa sikhein ánañ bákuriyá ba rafono. <sup>21</sup> “Ída vá maifó dorari ono, ída vá nano, ída vá aruvono ma sikhein man baya kayo van mi siyá uno.” <sup>22</sup> \*Máan man baya kayo ma vain mai varará bantai ineinen báken mai vayafó ma yorarí ure nan maen ainen o kípé iyan mino. <sup>23</sup> Mai man baya kayo ano ará mantarantiya ákoná e monó tiyáke kama ineine vá afova vái monópin bare sire maeya e amo sire yunan auriya moéke monó tiyáke mumunan inono. Máan tin nompo mai man baya ánañ ma yakhafín mano ída umefin ma orin aasá iyaranten mino.

### 3

#### Kantasi Ma Ukhen Ban Man Baya Ino

<sup>1</sup>\*Tiyarafenu ano Yisas Karaisin má inka orun avión mantara va ompo inaru fáke yanasantará ana vá kakhábe orono. Para vara seyo, mai varurái Yisasi ano vei kin karáká Tiyarafenu ayan kurompa kumanten mino. <sup>2</sup>\*Inaru fáke yana san mana vá ineine iyáke ída vá ma vara ráke yanasantará inin kaono. <sup>3</sup> Mai fara vara seyo, Yisasin mái saretí ankan

púben nan ben mái saretíi auñan mano Tiyarafenufin aúpá ban mino. <sup>4</sup> Yisasi maen tireti ankan aunañ mi vain Tiyarafenui ákoná kakhan má ma e unen dákó inain damuí saretin má dere yáko inono.

#### Tireti Aúpin Ma Vain Namu Avúavasá Aruan Purono

<sup>5</sup>\*Máan tukhein nará ma vara ráke avúavá ma saretí ankan aúpin bain ná aruan purono. Kampun ayarafenu rá ma monó té iyaona mai famúku avúavá safi fain avúavá safi ará manta avúavá safi namu avúavá safi inká ena ina yana san ma aranan avúavá safin ban mino. <sup>6</sup> Mai fara vara seyo, Tiyarafenui aran naná ano mai avúavá ma variyain nanin banta amaninái erinten mino. <sup>7</sup> Pefái tiretin máa deren mai ma namu avúavá bariyain kéká bá avunté uveya mai avúavá bariyare ono.

<sup>8</sup>\*Máan tiya ompo mai ma aranan uren ma ena ará namu uantáden ma oyampá baya sin avúavá bá inká namu vaya ma sin avúavá bá ina vá taréa ifasá tifano.

<sup>9</sup>\*Tireti ankan ída vá kampun bayafó monó nanin banta van e sian more mere ono. Mai fara vara seyo, pefái mai avúavá sinta me ampikha rono. <sup>10</sup>\*Peyante avúavá inka me ampireya auyení ukha rono. Tiyarafenu ano saretí ankan maman auyení uren ena ena yamú kama afova kayon amiyákayai véin má manaí ukha rono. <sup>11</sup>\*Máan tukhé auyení ma ukhé tiferuna nanin banta ano manaí ukhé tiféuno. Maifin ída Krikí vanta fi Yutan banta fi au khakhein nafi áa ena vaya siyain nafi áa ena vara fáke vanta fi áa miyan ída van doran banta fi inká para van banta fi van mino. Mai fara vara seyo, Yisasi veyáká anan báken minó nanin bantafin ban mino.

\* 2:20: Kar 4:3, 9; 1Ti 4:3    \* 2:22: Mat 15:9

Mat 6:33    \* 3:5: Rom 6:6, 11; Efe 4:19; 5:3-6

\* 3:10: Efe 4:24    \* 3:11: Kar 3:28

\* 3:1: Mak 12:36; 16:19; Efe 1:20    \* 3:2:

\* 3:8: Efe 4:25-29; 5:4    \* 3:9: Efe 4:22, 25

*Ena Ma Avábá In Baya Ino*

12 \*Tiyarafenu ano sretí maman kantasi uren tesina e siren anunu ukhen mino. Máan tukhein nará ma avúavá sintá vá bararo. Ena nanin banta van arunan uantáde kama iyáke vá inká ará bararasí ureya vempáké kama e kuse vá bano. 13 \*Bempáké manafin bákeyá vá ben ma ará namu uantan maran ma ukhá inona vasá tirun noe sin maran iyáke vá inká tiretin ma namu uantákáin naini ume vá ampiantano. Bafan mano ma sretíi ume ampiantákeiní eya vá ena nanin bantai ume ampiantano. 14 \*Máan tiyáke mae ena nanin banta vá avábá ono. Para vara seyo, ena ma avábá in manon ara ara avúavá esantakhen mai anon minó nanin banta o fáke e fáke uádan manafin ban mino. 15 \*Yisasin pinté ma eriyain ará kusin ná áesin tiretin auká dafisino. Tiyarafenu ano ma sretin araren ma ará kusin amira ma mana vukhafái ukhaona vará ena ena yamusá tusu siantano.

16 \*Yisas Karaisini vaya vá áesin tireti ankampin moéken báken ná mai ano sretin kama ineine amintiya vá ben ayaín maran iyáke afova amin maran ná ono. Máan tiyákeyá sretí ankan aúkáke sá Tiyarafenun tusu siantiya vá í bompon pintena í bá monó í bá inká Aunan mano ma amiyain í basá dano. 17 \*Máan tiyáke ara ara yoraríñ po safi áa vayafo safi ma varanona mai Bafan Yisasin avíkasá barano. Máan tiyaya ven avíkasá Tiyarafenun tusu siantano.

*Monópin Ma Vain Nanin Bantai Man Baya Ino*

18 \*Anasi kéka soe, sretí avafuná aránaópasá baro. Mai avúavái

\* 3:12: 1Pi 2:9    \* 3:13: Efe 4:2, 32    \* 3:14: Rom 13:8-10    \* 3:15: 1Ko 12:27; Efe 4:4; Fir 4:7    \* 3:16: Efe 5:19    \* 3:17: 1Ko 10:31; Efe 5:20    \* 3:18: Efe 5:22    \* 3:19: Efe 5:25  
 \* 3:20: Efe 6:1    \* 3:21: Efe 6:4    \* 3:22: Efe 6:5-8    \* 3:25: Rom 2:11    \* 4:1: Efe 6:9  
 \* 4:2: Efe 6:18; Fir 4:6    \* 4:3: Rom 15:30; Efe 6:19

Bafan avorá puntáken mino. 19 \*Inká banta kéka soe, sretí aná ona vara anunu iyákeyá ída vá betí ankan ará namu uantano.

20 \*Iyamporta oe, anóe afóe ma sin nain baya ánaín ná dakhaforo. Para vara seyo, mai avúavá anon Bafan amusin amé iyan mino.

21 \*Tireti afóeyan noe, ída vá iyamporta arápini esin ná anan maran ino. Máan tesin maen kaumpán uren kama avúavá ampiinten mino.

22 \*Tireti miyan ída van doran banta kayo oe, funtáde vá ei ayafa ano ma sin nain baya ánaín mana vá dakhafono. Ída vá timo sino van muno sireya veín avorá ana kama yorarí iyákeyá Bafan nan periya vá dorarí ono. 23 Intéa yoran ná dorante fo mai Bafani yoran mi yoriyá umpo ída varará bantai yoran doriyá uno seya ovare me iniyáke amusin masá dorano. 24 Tireti ankan afovásá ono. Bafan mano fefái sretíi miyan útaren iyáantan ban mino. Mai ma yoriyaona yoran kayoi ayafa maen mai Bafan Yisasi ino. 25 \*Máan tukhein nan mi mana vanta ano ma aaúi uranten maen mai miyan beyan mi varanten mifo aronará ma áuantiyain avúavá ída Bafampin ban mino.

**4**

1 \*Tireti ayafa kéka soe, sretíi miyan ída van doran banta kayo rasá kama yafisirí ono. Para vara seyo, sretí ankan afová ukhe nan tiretií Kákán inarufái van mino.

*Amúkí Pákena Van Ma Sikhein Baya Ino*

2 \*Tireti ankan ma amúkono van inten mae yafian ákona ukhe vá tusu siyáke vá amúkono. 3 \*Amú

ma khiyáke setin nan ída vá áun nono. Amúkuan Tiyarafenu amesin ná aaí usintantirá mai ma kama vaya ma aúpá baini ana sian dákó ono. Mai ma aúpá bain baya mai Yisas Karaisin báká mai vaya ma sian dákó eruna van mi karavusí urá bá uno.<sup>4</sup> Téi nan puntáden kama vaya sian dákó ino van muno sireya vá Tiyarafenun amúkuan ameno.<sup>5</sup> \*Ída ma monópin bain nanin banta áuban ma nókeya kama inin má ana vá noya vetin ayaesin ná Yisasintá mumunan ino. <sup>6</sup>\*Ena ena yamú ma vaya sinonafin ase vain kama vaya ana siyá esin ma ena kéká ano ma éin má bayaí inti mae anona funtákein baya siamin nono.

### *Pori Ma Kípan Baya Sein Mino*

<sup>7</sup>\*Téi ma yoriyaruna fákena vaya Tikikasi anon tiaminten mino. Béi maen tetin tifá tiváen báken Bafanín ákona yoran bantan ban mi setin má manafin doriyan mino. <sup>8</sup>\*Máan tiyain mi vái saretin ará ákona uantiyan inká teti intesá é barafu mai vaya kayo vá dere siamino van mi véin tiantékon oren mino. <sup>9</sup>\*Tiretin pinte vanta Onesimasi maen mumunan tifá tiváen bain Tíkikusín má tiantékon oren maen intéa yanasa dákó iyan nafi mai vaya mo siamintiya afová inono.

<sup>10</sup>\*Aristakusi ma sen má karavusifin bain banta ano vei amusin baya yákan inká Banabasin afóna Maki yere amusin baya siáden mino. Makin ma sreti yaonafá orintin ma kama ure aviran nona vaya fefái saretin tiamikhé uno. <sup>11</sup>Yásasin nan ma Yastasin ne siyain banta ano yere amusin baya sen mino. Yutan kayo finté mai kéká ano anan ten má báken doriyá timusin iyá

\* **4:5:** Efe 5:15-16    \* **4:6:** Efe 4:29; 1Pi 3:15    \* **4:7:** Efe 6:21    \* **4:8:** Efe 6:22    \* **4:9:** Frm 10-12    \* **4:10:** Apo 12:12; 13:13; 15:37-39; 2Ti 4:11    \* **4:12:** Kor 1:7; Frm 23-24    \* **4:17:** Frm 2    **4:18:** 1Ko 16:21

Tiyarafenui yafisin nan tian dákó iyá tiféuno.

<sup>12</sup>\*Tireti varu ráke vanta Epafarasi maen Yisas Karaisini yoran bantan báken béis yeren amusin baya yan oren mino. Tiyarafenu ano saretin aya intiya mantaan ákona uveya veni anunu afová ure maifin karakhe vano van mi véi ena ena yamú amúkuantian ban mino. <sup>13</sup>Beni yoran afová ukhé paséi ma vaya sian dákó iyá uno. Tiretin má Raodisiá baru ráke kéká bá inká Ieraporisi varu ráke kéká bá aya ono van mi ákona yorarii iyan mino.

<sup>14</sup>Ayofan banta ma minó ano simusin iyá tiferuna vanta Rukun má inká Demasin má ano yere amusin baya yan oren mino.

<sup>15</sup>Tenti simusin baya vá Raodisiá baru rákena mumunan tiyofi sifá tiváeyan má inká Nimfan má ben amá ma o átaru uven monó tiyain mumunan kéká basá tiameno.

<sup>16</sup>Tireti ankan ma ma vompon dankádeya ma inirante mae Raodisiáke nanin banta amesin ná betiyan dere yankáden iniyanti vá inká betin ma amenuna vompon ná tireti yere yankáde ineno.

<sup>17</sup>\*Máan tiyáke vá inká Akipusin tiamesin ná Bafan mano ma amikhein doran ná dafian ákona uven ná dóan kípano.

<sup>18</sup>\*Téi Pori ano seyantái ma vompon uvaman tireti ankan amé uno. Téi karavusifin pa vákéi ma vompon uvaré umpo vá téin nará inisintaro.

Tiyarafenui sarisari ano saretin má banten mino.

**PORI MA ESÉ  
ARAÍEN  
TESARONIKÁ NANIN  
BANTA MA UVAMAN  
AMEIN BOMPON  
MINO  
(1 Tesaronika)  
Tesaronikai Esé  
Bompon Ma Uvanteí  
Pákenai Afova Vaya  
Ino**

*Ma vompon ma uvantein banta  
ino.*

Baya varen orin banta Pori ino.

*Uvarein orana ino.*

AD fifti-uvani (51) fin nafi áa  
fifti-tu (52) fin nafin uvanten  
mino. Mai maen Pori ma kán  
dádasí en ma monó dorarien  
eúkein pimpá ino.

*Ma vompon ma uvantein baru  
ino.*

Koriní barurá ma mana orana  
ifo afápá mana un kádan biy-  
ontá ma váken mino. (Aposeri  
18:11 fin ná onano).

*Ma vompon ma uvaman  
amikhein kéká ino.*

Kan dádasí en ma Pori monó do-  
rarien eúkiyáken Tesaroniká  
orin ma Kiriki nanin banta  
ano ará baéden ma monó tiyá  
ein kékái uvaman amikhen  
mino. (Aposeri 17:1-9).

*Nái ana vará ma vompon uvan-  
ten nafino.*

Pori iníkan Tesaroniká nanin  
banta ano Yisasini kama vaya  
mo oyan amiyaimpin betin  
ayaen ákona uantano siren  
Timotin tiantan orikharen  
ma Masedoniá bara fáké ma  
ovaránen Koriní eriven ma  
amusin baya me siamin ma  
iniren mai van mi esé bompon

uvaren mino. Inká 1 Tesaron-  
aika vá 2 Tesaronaika va san  
máan mi sen iniyán mino.  
Ma vara kípón akhempá ma  
yákó inain danasinta vá inká  
Yisasín ma ovaránen erin  
nain ma san ma Kiriki kayoi  
vompon mano ma sikhá ein  
mi sian amá ukhen mino.

*Pori Ma Tesaroniká Nanin  
Banta Amusin Uantein Baya Ino*

<sup>1</sup> \*Téi Porin má Sairasin nú  
Timotin nú bái ma vompon  
uvaman Tesaroniká kákán barurá  
ma monó nanin banta váke ma  
Sifóe Tiyarafenu vá Bafan Yisas  
Karaisiní máj kékásí ma ukhaonan  
uvaman amé uno.

Tiyarafenu sarisari vá ará  
kusin má ano saretin masá bano.

*Tesaroniká Nanin Bantai Yoran  
Nan Ma Pori Amusin Uantein Baya  
Ino*

<sup>2</sup> Ena ena yamú tiretí ankan nan  
ovaré me iniyáke Tiyarafenu susu  
sianté timúkuán amiyá tiféuno.

<sup>3</sup> \*Máan tiyáké tiretí ankan ma  
Yisasintá mumunan iyáke ma  
yoriyaona vá ena nanin banta  
ará amire ma ayaе yoriyáke ma  
inká tetisi Bafan Yisas Karaisin  
nan ovaránen erinten mino siren  
ma ákona inin kauráke ma kama  
yorarí iyaona van mi ovaré  
me iniré teti Sifóe Tiyarafenun  
timúkimpó tiamiyá tiféuno.

<sup>4</sup> Mumunan tiyofi sífá tiváeyan  
noe, Tiyarafenu ano saretin nan  
anunu ureñ be ina e sen aní ukhá  
tetí ankan afová ukhé uno. <sup>5</sup> \*Mai  
fara vara seyo, Yisasini Kama Vaya  
ma varé eré tiferuna mai vayafó  
ana va siámé tife raumpo Kantá  
Aunani ákona fóké bá ino. Mai  
vaya van tetí ankan puran tinon té  
afová ukhé uno. Inká teti ma saretí  
akan má bákuya setin tivútivá  
inka sontent nan mai ano yere ma-  
man puraí ukhen mino. <sup>6</sup> \*Mai ma

\* 1:1: Apo 17:1-9    \* 1:3: 1Ko 13:13; Kor 1:4-6    \* 1:5: 1Ko 2:4-5    \* 1:6: Apo 17:5-9

Tiyarafenui kama vaya ma vare-  
ona mai kokhon uman mái vare  
ompo Kantá Aunan manon ákona  
amíkaya veni amusin mái vare  
ono. Mai anon tetin tivútivá bá  
Bafani avúavá bá maman manaí  
eno. <sup>7</sup> Máan ma eona anon  
Masedoniá barafa safi inká Akaiá  
barafa safi ma váken Yisas Karais-  
intá mumunan iyaín nanin ban-  
tan aní uante ono. <sup>8</sup> Mai saretí  
ankan ma Bafani vaya sian dákó  
eona anon ída Masedoniá bá Akaiá  
bara vápin mana ufen ma asein  
an den oren mifo minó akhempái  
oreraen mino. Mai fara vara seyo,  
inte akhempasá oriya rafu mai  
sireti ma Tiyarafenurá mumunan  
iyaona vaya anan tiyá iniyá tifer-  
una ída evaráné betín tiamiyá bá  
tifanté uno. <sup>9</sup> Mai fara vara seyo,  
vetí ankan baípá ma oréku ma  
séin kama ureya sivireona avúava  
san betiyantá tian dákó iyáken mai  
ma varará ayarafenu kayo ma me  
ampire ará baéde fura sen para  
van oriyan ban Tiyarafenurá ma  
mumunan iyaona vaya vá dere  
siyá iné uno. <sup>10</sup> Tiyarafenu ano ma  
ve Anin Yisasin ma furin pintena  
orun avían mantakhein ma inaru  
fáké ovaránen erin nain nan ma  
ave ukhaona van deren tiyá iné  
uno. Tiyarafenu ano ma ma vara  
kípon nain damú ma vei aran naná  
ma vanasi amaniná kain nain pin-  
tena Yisasi ano siya é iyan mino.

## 2

### *Pori Ma Tesaroniká Barafá Monó Dorarí Ein Baya Ino*

<sup>1</sup> Mumunan tiyofi sifá tiváeyan  
noe, seti ma saretí ankan má o váké  
doriyá eruna yoran ída fara savifá  
o afeyóka sretiyantá afová ukha  
ono. <sup>2</sup> \*Tireti vaonafá ínäimpáké  
oronté maé Firipái barurá orékun  
ma mai ráke nanin banta ano  
ma setin tiren tisen iyaré ein

\* **2:2:** Apo 16:19-24; 17:1-9    \* **2:4:** Kar 1:10  
orin banta ino.    \* **2:9:** Apo 20:34    \* **2:11:** Apo 20:31

baya saretí ankan afová ukha ono.  
Tireti ankan Tiyarafenui Kama  
Vaya siamiyákun ara ara aa fáké  
uman eriyaren mifo Tiyarafenu  
ano ákona simiyáká ída feran-  
ton kasaé beni vaya siamiyaré  
uno. <sup>3</sup> Máan tukhanti afovásá ono.  
Namu ineinefó tiretin ída mákádé  
kampun bayo kayo siamiyá uno.

<sup>4</sup> \*Mai fara vara seyo, Ti-  
yarafenu anon tetin nan bei  
Kama Vaya fura sen banasi  
siaminten ne siren mai yoran  
timikhái yoriyá tiféuno. Béin  
tetisi ineine yaimiyain mi vái  
véin amusin ameno van doriyá  
umpo ma varará nanin banta  
va amusin ameno vara yoriyá  
tife rauno. Ída ino. <sup>5</sup> Tireti  
ankan afová ukhená Tiyarafenu  
avorá pura vayan tiamiyá uno.  
Tiretin kampun tirékuya setisi  
vayará anunu uareya manáa  
yaná timeno vara sretin kampun  
tiantiya rauno. Ída ino. <sup>6</sup> Tireti  
ankan nafo áa ena kéká anó fi ída  
kákán bí timeno van mai yoran  
doriyá tiféuno. <sup>7</sup> Yisas Karaisini  
aposeri\* kékái váké tireti vaonafá  
manáa yanásinta varano van  
kasaé inanten nunaren mifo anóe  
ano ma arará iyampon nan kuvein  
an déi saretí ankantá kamaé dafisé  
uno. <sup>8</sup> Tireti ankan nan moeké  
tinunu uré paséi Tiyarafenui  
Kama Vaya ana va siame raumpo  
setisi minó danasinta vái amé  
tiféuno.

<sup>9</sup> \*Mumunan tiyofi sifá tiváeyan  
noe, seti ankan ma manáa yana  
san ékun ma siyain uman ída  
varano van mi inuran má bayan  
má miyan baran dorarí iyá uno.  
Máan tiyái Tiyarafenui Kama Vaya  
ma sretin tiamé iyaruna van ídá  
ovaré me iné iya rafono. <sup>10</sup> Tireti  
ankan má Tiyarafenu vá ano afová  
ukhen ná pura sen puntáken ma  
kantasí ukhein avúavápói mumu-

\* **2:7:** Aposeri maen Tiyarafenui vaya varen  
Apo 20:31

nan ma iyaona nanin banta avorá doré iyá tiféuno. <sup>11</sup> \*Para vara seyo, siretí ankan purase afová ukhen ná afóe ano ma ve akhafanará kama yafisirí iyainí éi sireti mana manará kamaé dafisé iyá tiféuno. <sup>12</sup> Kama vaya fókéi siretin ará ákona uantadéi Tiyarafenu avorasá kama e vasin onano siré tiamé iyá tiféuno. Beni khakhan ákona mamareya vei yafisin aúpin ben má ba oriya vano van ariyan mino.

*Pori Ma Tesaroniká Nanin Bantai Mumunan Nan Ma Susu Siantein Baya Ino*

<sup>13</sup> \*Inká beni vaya ma siren tin tiaméku mae ma vara ráke vantai vaya va siyan naifo Tiyarafenu. Vaya inon tireyan kama e iniyánái ena ena véin tusu sian tiyá tiféuno. Mai vaya ma kama e inireya mumunan eona kékápin mi ákonæn doriyan mino.

<sup>14</sup> \*Máon tiyan mifo mumunan tiyofi sifá tiváeyan noe, Yudiá barafá ma Tiyarafenu vanasi ano Yisas Karaisintá mumunan ein nan ma Yutan kéká ano uman amiyaré einí ukhein uman manan tiretí kéká ano amikhen mino.

<sup>15</sup> \*Manáa Yutan kéká anoi vetíi sakhanampa vanta kayo vá Bafan Yisasin má aruan pükären mi saréa setin má dere sirono van mi yakhafiyan mino. Máon tiyáken minó nanin bantan namuroí uantiyákan Tiyarafenu ano ída amusin iyan mino. <sup>16</sup> Mai fara va ino. Tiyarafenu ano ena anan nanin banta evaránen aviran nain nan péden beni Kama Vaya ma siamiyaruna aa iyariyan mino. Máon ma iyain avúavá anon betíi ume maman mími doní iyáin mi Tiyarafenu aran naná ano vetin amaniná ínaimpáké dáko en mino.

\* 2:13: 2Te 2:13    \* 2:14: Apo 17:5    \* 2:15: Apo 9:23, 29; 13:45, 50; 14:2, 5, 19    \* 2:19:  
Fir 2:15-16; 4:1; 2Te 1:4    \* 3:1: Apo 17:15    \* 3:2: Apo 16:1-3    \* 3:3: 2Ti 3:12

*Timoti Ma Tesaroniká Doriyain Nan Ma Pori O Onano Van Ein Baya Ino*

<sup>17</sup> Máon tukhen mifo mumunan tiyofi sifá tiváeyan noe, siretimpin ma vain Yutan kayo finté manáa ano setin tirono van íká mai anarái sitó máorá tiretin me ampirákei ovaráné e onano van túkáké kákán ineine iyáké aa van dosiyá tiféuno. <sup>18</sup> Mai fara vara seyo, setí ankan tiretin o onano siré teyantá ara ara aa van dosiyákun mifo Ban Anon mano setisi aa iyan mino. <sup>19</sup> \*Máon té iyan mifo Bafan Yisasi ma erin nain damú náinásá baré intí béin mo aní é tifékun ná tetisi yoran nan amusin uren miyan timinten nafino. Ída ifo siren tíi vaona Bafan Yisasi ma ovaránen erin nain damú ma siren oniyáké anan kákán timusin onté uno. <sup>20</sup> Tiretí ankan nan kama kéká inon tiyákan kákán timusin timiya ono.

### 3

*Pori Ma Tesaroniká Orino Van Timotin Tiantein Baya Ino*

<sup>1</sup> \*Máon tukhái siren nan ma ída oniyaruna van ma ineine é oriyaruna ano inin tiriyaimpin mi Atensí barurá bano van iné uno.

<sup>2</sup> \*Máon tukhéi setin tifá tiváe Timoti ma Tiyarafenu yoran banta váken ma Karaisini Kama Vaya siamiyain banta anan tianteruna mai setisi varu varen tiretin o oniyáken ayainti mumunampin ákona ukhe van nono. <sup>3</sup> \*Béi anón ayainti mai ma afoká in nain uman kayofin mantaan ákona in nono. Máon uman kayo anón monó nanin banta simaniná afoká inté iya afová ukha rono. <sup>4</sup> Tiretí ankan má ma o váké máe mai uman mano setin timaniná dáko inten ne sé tiamikharé ékun mi mai uman mano fura sen dáko íkaya siren ankan afováe ono.

5 Mai fara vara seyo, mai van iné kun tufá ída kama iyaimpin mi saretí ankan inté eyá mumunan ukhe fono siré afová ono van Timotin tiantékun oren mino. Mákasin banta ano akhenóka intiya sretii mumunan me ampesin tetisi yoran mano fa savifá o afeyoran nain nan mi sikhokho van iyá uno.

*Timoti Ma Seti Nan Amusin  
Baye Sein Baya Ino*

6 \*Orikharen taréa uron mi Timoti ovaránen me sisimen tireti mumunan nan para ákona ukhan ena ma avábá in avúavá moéken bariyan mino síká iné uno. Tetí ankan ma gefá tiretin o ontaréeruna van ma ovare me iniyákeya setin nan moéke amusin pinté tonano van iya ono. Máan tiyan nái setin má dere simusin pinté tiretin o onano van ineine iyá uno. 7 \*Máan tukhái mumunan tiyofi sifá tiváeyan noe, sretí ankan ma ákona mumunan iyaona vaya ma iné tiferuna anon kákan uman ma variyaré eruna maman mumunan ákona usinten mino. 8 Tireti ankan ma Bafantá ákona mumunan para ukheona vaya má iné kun mai anon tetin evaránen ákona usinten mino.

9 Tireti ankan ma mumunan iyaona van mi Tiyarafenu avorá kákan timusin iyá umpsó mai inté uresá tiretin nan béin tusu siantante rafuno. 10 Tiyarafenu ano aaí usintantí tireti ankan baonafá orivé manáa yana má mumunan iyáke me áuntanona aya ono siré ena ena inuran má bayan má timúkiyá tiféuno.

*Pori Ma Tesaroniká Orin Aa Van  
Dosein Baya Ino*

11 \*Máan tiyá tifé umpsó setin Tifoe Tiyarafenu vá Bafan Yisasin má ano vá aaí usintantí tireti ankan baonafá ainé orono. 12 Tetí ankan ma sretin avábá

iyarunaíen Bafan mano sretin ávu inti vá ben moéken avábá in maran iyáke ena nanin banta yere avábá ono. 13 Máan tesin ná Karaisi ano sretí ankan ará ákonq uantantiya ída fain má aau vá baré inti funtákein nanin bantaí ukhare Bafan Yisasi ma vei kantasí ukhein kéká bá erin nain damusá teti Sifoe Tiyarafenun avorasá o mantano.

## 4

*Tiyarafenu Ma Amusin Ukhein  
Avúavaká Ma Van Baya Ino*

1 Mumunan tiyofi sifá tiváeyan noe, Tiyarafenu ma amusin in nain avúavaká bano van mi Bafan Yisasin ayiká tireti ankan aní ukhé uno. Máan tukhare sareá mai avúavá bariyan ná moéke varano van mi ákonae tiamiyá tiféuno. 2 Mai fara vara seyo, Bafan Yisasiní ákonará pefái vaya siaméku afová ukha rono.

3 \*Tiyarafenu ano sretin nan kantasí ukhe vano van mi inikhen mifo famúkuí ma in avúavá sintá vará perano. 4 \*Inká kantasí ukhein avúavá póké ma sretii aurá dafian ákona ureya vasin maen ena nanin banta ano amo siyanti van nono. 5 Mai ma monó ída inin nanin banta ano ma asuse avúavapin báken Tiyarafenu vá beni avúavá bá ída afová ukhen ma vain an ída yakheya vano van mino.

6 Máan avúavá póké ída vá mákade monó afá aváeyan aná ona vare nono. Para vara seyo, máan avúavá ume ma variyain kékai Tiyarafenu ano uman am-inten ne sé pefái ákonae tiámé tiféku afová ukha rono. 7 \*Para vara seyo, Tiyarafenu ano setin nan namu avúavapin bano vara sarakhen naifo mai kantasí ukhen bano van mino. 8 \*Máan tukhan maen mai vaya ma yurafuriyain kéká ano varará bantai man baya

\* 3:6: Apo 18:5   \* 3:7: 2Te 1:4   \* 3:11: 2Te 2:16-17   \* 4:3: 1Te 5:23; 1Pi 1:16   \* 4:4:

1Ko 6:13   \* 4:7: Ibu 12:14; 1Pi 1:15-16   \* 4:8: Ruk 10:16; 2Ko 1:22

ída yurafuriyan mifo Kantá Aunan ma amikhein Tiyarafenui oyan amiyan mino.

*Pori Ano Ma Tesaroniká Nanin Bantai Ará Ákona Ein Baya Ino*

<sup>9</sup> \*Máan tiyan mifo ena ma avábá in avúavá páke Tiyarafenui vanasi aní ono vara ma vompson uvaman amiya rauno. Ída ino. Para vara seyo, Tiyarafenu ano gefái ven avábá in maran ma in avúavá aní íkaya afová ukhen ná uno. <sup>10</sup> Máan tukheyai sireti ano Masedoniá barafá ma vain mumunan nanin banta kama ure avábá iya ompo mai avúavá moéke varano van mi ákonáe tiamiyá tiféuno. <sup>11</sup> \*Máan tiyáke kama khumanin ma o yosin nará pefá ma siamikhá erunaí eya sireti ina yanasantará inin kaúdákeya au ma ayain doran ná ákona e yorano. <sup>12</sup> Máan tesin maen afokhampin ma vain nanin banta ano sireti ma vaona avúavá san amo siyanti váke mae ída moni san o afasí iyá uno sire ena vaípá inantin nono.

*Bafan Ma Ovaránen Erinai Pákena Vaya Ino*

<sup>13</sup> Mumunan tiyofi sifá tiváeyan noe, mumunan uven ma füká ein kéká ano ínaimpáké intesá inten nafi mai sireti afová ukha ono. Máan tukheya mai ma afokhampin báken ma Yisasiní ovaránen erin nan ma ída avé ukhen bain kéká an deya moékan arunanápin ída vano van muno. <sup>14</sup> \*Mai fara vara seyo, Yisasi ma fükaren masí pinté orun mantakheintái setí ankan mumunan ukhé tiféuno. Máan tukhéi véi ma ovaránen erin nain damú mai ma mumunan uven püká ein kéká Tiyarafenu ano evaránen avíán mantarantin Yisasin má erinten minon té mumunan iyá tiféuno.

<sup>15</sup> \*Bafan pintéi ma vaya fura sen erikhá tiamiyá uno. Bafan ma erin nain damú ma ma ayun para vá tiferuna kéká ano mai ma mumunan uven püká ein kéká ída me ampiré teti nare oró tifanté uno. <sup>16</sup> Mai fara vara seyo, Bafan mano veyantá inaru fáké eriyan ákonará bayá sintin maen ánon enisorí ano kákánién ovarantin Tiyarafenui ufen mano asinten mino. Máan tintin mumunan uven ma fükáin nain kayo nare anon masí pinté orun mantanten mino. <sup>17</sup> Mantavintí mai ma ayun para vá ó tifanuna kéká bá ano manan manafini uvé ayompin Bafan o oniyáké ben má tipá o vá tifanté uno. <sup>18</sup> Máan tukhein nará ma vaya kayo fóké mumunan ákona uantan maran ná ono.

## 5

*Yisasi Ma Ovaránen Erin Nain Nan Ma Útain Baya*

1 Mumunan tiyofi sifá tiváeyan noe, mai yanasantá ma afoká in nain damú bá áau vá pákena ída kanaí é ma vompsonin uvaman amenté uno. <sup>2</sup> \*Mai fara vara seyo, Bafan ma erin nain damú mai ída ma afová íkan umoyan banta ano ma inuran erein an mi yanté iya sireti ankan afova suron ukha rono. <sup>3</sup> \*Banasí ano ma siyáken inka kama yamú afoká ein kamaé bátifanté uno ma siyain má anan anasi ano ma inamun nan iniyáken ai san auriyain an dakhein uman betin aminten mino. Máan ma intin maen betí ankaní karan orin aa ída vantén mino.

<sup>4</sup> Máan tinten mifo mumunan tiyofi sifá tiváeyan noe, sireti ankan ída anukheimpin ma vainí ukháesin ma umoyan banta an den Bafan ma erintiya ída anúdin nono. <sup>5</sup> \*Mai fara vara seyo,

\* 4:9: Yon 13:34    \* 4:11: Efe 4:28    \* 4:14: Rom 14:9; 1Ko 15:3-4, 12    \* 4:15: 1Ko 15:51-52    \* 5:2: Mat 24:42-43; 2Pi 3:10; Rev 3:3    \* 5:3: Mat 24:39; Ruk 21:34-35    \* 5:5: Rom 13:12

sireti ankan panu va kakhan avúavá ba ma non kéká ono. Tetí ankan duntein avúavápín na váké anukheimpin na nó tife rauno. <sup>6</sup> MÁAN tukhé tifé umpo ída va manáa kéká an davé tuun bariyá báké tuu sapé tikherá dafiké ba tifano. <sup>7</sup> Mai fara vara seyo, auun ma varano van ein kéká ano inurán mi varé iyan mino. Inká óen non ma nan kéká ano inurán mi naren óen é iyan mino. <sup>8</sup>\*MÁAN tiyain mifo kakhan aúpin ma va tiferuna nanin banta ano setisi sivútivá dafibésá mumunan avúavá ba ena kéká ma ará amin avúavá ba maman tanko an ná dá tifano. Tiyarafenu ano ma sivirano van ma sikhein nará ákona jinín kaúdé maman kápá kamamó an daré uré tifé kun ná bano. <sup>9</sup> Mai fara vara seyo, Tiyarafenu ano vei aran daná tetin timaniná kaono vara anunu ukhen naino. Ída ino. Tetisi Bafan Yisas Karaisin pinté uaré tetin tiya uré tivirano van mi inikhen mino. <sup>10</sup>\*Tetí ankan púkaré tife rafu áa ayun para varé tife rafu mai véi ma erin nain damú ben má o vano van mi setin nan e fúken mino. <sup>11</sup>MÁAN tukhein nará mai ma variyaona avúavasí eya Tiyarafenurá ma mumunan in avúavá ben ákona uantan maran ná ono.

### *Pori Ma Sipá Ákona Uantan Baya Sein Mino*

<sup>12</sup> Mumunan tiyofi sifá tiváeyan noe, mai ma Bafani yorarí iyáken ma sirenintá dafikein kéká aránaópasá bano. Betí ankan manon tiretin aúbaná ákona yorarí iyáken ída namu avúavá barano van ákonæn baya siamiyan mino. <sup>13</sup> MÁAN tiyan mifo vetin aránaópasá báke veti ma yoriyain nará aúkáké moéke avábá ono. MÁAN tiyáke vetin masá manafin ará kuse vano.

<sup>14</sup>\*Mumunan tiyofi sifá tiváeyan noe, mai ma vetíi yoran mo ampiren avesara iyain kéká ákona e vaya siamesin ída avesara ino van mi siamiyá uno. Akhokho van ma iyain kékái mumunan ákona uantiya inká ma vara ráke avúavá ano ma ineine máden asuse iyain kékáká kama e va dafiseno. MÁAN tiyáke minó nanin banta va ará manafiní ureya vempáké bano van mi siamiyá uno.

<sup>15</sup>\*MÁAN tiya mae namu avúavá ma uantan nain kéká anona ída va namu avúavá uantiyáke vetin má inká ena kéká ba kama avúavasí in maran mana va ono.

<sup>16</sup>\*MÁAN tiyáke minó damú amusin mana va iya vano. <sup>17</sup> Inká amúkin avúavá ída va me ampeno.

<sup>18</sup>\*Uman nafi kama yana safi ma sirenin amaniná afoká inti mae va minó damú tusu ana va teno. Mai fara vara seyo, sirení ankan Yisas Karaisini kékásí ukhen nan mi Tiyarafenu ano mai yanasantá varano van anunu ukhen mino.

<sup>19</sup>\*Kantá Aunan ma yoriyain aa ída va iyarano. <sup>20</sup> Kantá Aunan manon imin amiyan mi sakhanampa vaya siyan mifo ída va inian paen danasí ono.

<sup>21</sup>\*Mai ma siamin nain baya kama e yaide afová ure va puntákein baya máa va pákano. <sup>22</sup> Minó namu avúava sintá vará perano.

### *Pori Ma Sipá Amusin Uantan Baya Sein Mino*

<sup>23</sup>\*Ará ma kusiantan Tiyarafenu ano va minó avúavasí ma inonafin ná maman kantasí uantano. Inká tiretii aunan má aú iyampon má minó bukhafa va ano avusese ukhanti oriya vare va tetisi Bafan Yisas Karaisi ma ovaránen erin nain damu sa o afoká ono. <sup>24</sup> Mai ma sirenin arakhein Tiyarafenu ano véi

\* **5:8:** Ais 59:17; Efe 6:14, 17    \* **5:10:** Rom 14:8-9; 1Te 4:14    \* **5:14:** 2Te 3:6, 11    \* **5:15:**

Rom 12:17; 1Pi 3:9    \* **5:16:** Fir 4:4    \* **5:18:** Efe 5:20    \* **5:19:** Efe 4:30    \* **5:21:** 1Yn 4:1

\* **5:23:** 2Te 3:3

ma sirein baya ánaín pura sen bákuriyain bantin pasen mai ma sirein daná baranten mino.

<sup>25</sup>\* Mumunan tiyofi sifá tiváeyan noe, setin nará amú kusintano.

<sup>26</sup> Tiyarafenurá ma monó tiyain nanin banta ano ma avábá iyain avúaavá kasá ben avábá in maran ono.\*

<sup>27</sup> Minó mumunan tiyofi sifá tiváeyampin ma vompon dankafesin inino van mi Bafan aviká ákonae tiamiyá uno.

<sup>28</sup> Máon tukhantin tetisi Bafan Yisas Karaisini sarisari ano vá tiretin má bano.

---

\* **5:25:** Kor 4:3; 2Te 3:1    \* **5:26:** Kiriki vaya fintéi Tiyarafenurá ma monó tiyain nanin banta ano ma kantasí ukhein amónan maran iyain nan tikhen mino.

**PORI MA KAN  
DÁDASÍEN  
TESARONIKÁ NANIN  
BANTA UVAMAN  
AMEIN BOMPON  
MINO  
(2 Tesaronika)  
Kan Dádasí En Ma  
Tesaronikai Vompon  
Ma Uvanteí Pákenai  
Afova Vaya Ino**

*Ma vompon ma uvantein banta ino.*

Baya varen orin banta Pori ino.

*Uvarein orana ino.*

AD fifti-tu (52) fin mi uvaren mino. Esé ma uvarein bompon dan orivin maen manáa viyontá báken mi uvaren mino.

*Ma vompon ma uvantein baru ino.*

Koriní barurá ma mana orana ifo afápá mana un kádan biyontá ma váken mino (Aposeri 18:11 fin ná onano).

*Ma vompon ma uvaman amikhein kéká ino.*

Tesaroniká barurá ma monó tiyain nanin banta ino.

*Nái ana vará ma vompon uvan-ten nafino.*

Esé araí in bompon ma uváden maen mai oyampáké Pori iníkan Yisasini ma ovaránen erin nain baya ano vanasii ineine máden asuse iyaimpin mi evaránen ma vompon uváden mi maí damú ma yákó inain baya sian amá ukhen mino.

<sup>1</sup> Téi Pori má Sairasin nú Timotín nú bá anon Tesaroniká kákán

\* **1:2:** Rom 1:7 \* **1:4:** 2Ko 7:4; 1Te 2:19  
Ais 66:15 \* **1:9:** Ais 2:10 \* **1:10:** Kor 3:4

barurá ma mumunan nanin banta váke setin Tifóe Tiyarafenu vá Bafan Yisas Karaisini kékasi ma ukhaonafin mi ma vompon uvanañ amé uno. <sup>2</sup> \*Tifóe Tiyarafenu má Bafan Yisas Karaisin má pinté ma eriyain tarisari vá ará kusin má ano vá tiretin má bano.

*Porini Susu Siantan Má Amúkin  
Má Baya Ino*

<sup>3</sup> Mumunan tiyofi sifá tiváeyan noe, funtákein avúavá baréi saretin nan Tiyarafenu susu sianté iyá uno. Mai fara vara seyo, saretí ankani mumunan mano mo ákonae kákani iyákayan ben moéken ará amin maran iya ono.

<sup>4</sup> \*Ara ara uman bariyáke ma mai uman kayo van ída ininto ma ákona e mumunan iya ma yorarí iyaona van mi minó akhempá ma Tiyarafenurá mumunan iyain kékápin ma orivé maé tireti ankan nan amo sé iyá uno.

*Bafan Yisasi Ma Erin Nain  
Damú Ma Banasii Avúavá Daimin  
Nain Baya Ino*

<sup>5</sup> Máan tiyá umpo mai ma variyaona uman manon aníen mi Tiyarafenu ano funtáden daimiyan pasen mi saretin e avían bei yafisimpin kainten mino.

<sup>6</sup> \*Tiretin ma uman amiyain anonafá Tiyarafenu ano vetin daíden uman aminten mino.

<sup>7</sup> \*Máan tinten mifo setisi Bafan Yisasi ma vei ákona enisori kayo vá ma inaru fáké ira anamuná bá ma erin nain damúi mai ma uman bariyá ótifanuna kéká tivíkan timinten mino. <sup>8</sup> \*Mai ma erin nain damúi Tiyarafenun ma ída afová en ma inká Bafan Yisasini kama vaya ma oyan amiyáin nain kéká uman aminten mino. <sup>9</sup> \*Baya ma ída iniyáin nain nanin banta ano ída kípan namu uron ukhein uman mamaren Bafan má beni kakhakhein ákona vái ádé ída

\* **1:6:** Rom 12:19 \* **1:7:** 1Te 3:13 \* **1:8:**

vanten mino. <sup>10</sup>\*Bei ma ovaránen erin nain damuí mai yanásinta afoká inten mino. Máan ma intín maen kantasí ukháin nain nanin banta ano véin amo siyan aví daní iyantiya saretin má deren maifin ban nono. Mai fara vara seyo, seti ma ontaré ma siameruna vayarái mumunan ukhare ono.

### *Pori Ma Amúkein Baya Ino*

<sup>11</sup>\*Máan tukhein nan mi saretí ankan Tiyarafenu ano sesi funtákein nanin banta e siren béis ma araren avíká einén bei ákonafó tiretí ankaní kama ineine vá kama avúavá bá ma mumunan mano afoká uádiyain kanai ino van mi ena ena simúkuán béis amiyá uno. <sup>12</sup>Minó nanin banta ano saretí kama avúavá san Bafan aví daní intín maen inká béis anō saretin aví daní ino van mi simúkiyá uno. Tetisi Tiyarafenu vá Bafan Yisas Karaisin mái sarisari ano saretin má báken mai yanásinta maman dákó inten mino.

## 2

### *Bafani Erin Ádé Iyantin Ma Aní Daná Dakó Inain Baya Ino*

<sup>1</sup>Mumunan tiyofi sifá tiváeyan noe, setisi Bafan Yisas Karaisi ma erintí ma ven má manafin bá tifanuna vaya siaméku inin nono. <sup>2</sup>Manáa vanta ano ma oriven Bafani yamú inká erikhen mino ma sin nain baya van ída vá anú duman duman ono. Máa siren ma seti ankan nan mai vompon uvamádan erikhen mino sen ma inká sakhanampa vaya sen ma intiya mai vaya ída vá ineno. <sup>3</sup>\*Máan ma sin nain baya kayo ano ída vá tiretin kufa uádano. Mai fara vara seyo, Yisasi ma ída erikhantin maen kokhon nanin banta ano Tiyarafenu vá aruviyantin maen mai ma man baya ma átokharé iyáin nain banta

maman dákó inten mino. Mai vantan Tiyarafenu ano kákán uman aminten mino. <sup>4</sup>\*Mai vanta ano ve aví daní uren maen Tiyarafenu ma araren monó tiyain oyampá baya siren beni kákán monó namumpin un kumamen téi Tiyarafenu umpo sen tiví daní ono sinten mino.

<sup>5</sup>Téi ma saretí ankan má báké maé mai vaya fefa suron mi siamikhá umpo ídá ovare me iniya rafono. <sup>6</sup>Intéa yaná anó béis pákaran ná baren nafi mai saréa inka afová iya ono. Mai fara vara seyo, veni yamú ma erintin mi yáko inten mino.

<sup>7</sup>Man baya ma átokharéin ákona ano aúpá báken pefái yoriyái fura sé tiamiyá uno. Máan tukhen mifo mai ma iyáká inain banta ma yo avían kaúdantin mi mai yaná dákó inten mino. <sup>8</sup>\*Mai ma man baya átokharé iyá inain banta ano ma e unen afoká édavuvintin mi inaimpáké ma Bafan Yisasi erinten mino. Eriven maen bei ákona vayafó mai vanta maman barasí uren khakhan ákona fókéi mai vantai ákona yo varanten mino.

<sup>9</sup>\*Man baya ma átokharéin banta ma erin nain mai Ban Anoni ákona fóí yoriyan mino. Máan tiyan pasen enará ukhein avúavá bá inká aní daná bá maman afoká inten mifo mai kampun danasinta ino. <sup>10</sup>Tiyarafenu aran nanápin ma vain nanin banta kayo mai vanta ano ara ara mákasimpó betin máden kufa uádante mino. Mai fara vara seyo, fura vaya ano vetin ayaintin mumunan ino van iyan mifo mai van beti ída anunu ukhen mino. <sup>11</sup>Máan tukhantin pasen Tiyarafenu ano ákona mákasín tiantantin mai kéká mákadantin mai kampun bayará pura ino sinten mino. <sup>12</sup>Máan tintin maen mai ma Tiyarafenu fura yanáká ma ída

\* 1:11: Kor 1:9; 1Te 1:2-3 \* 2:3: 1Ti 4:1; 1Yn 2:18; 4:3 \* 2:4: Isi 28:2; Dan 11:36 \* 2:8: Ais 11:4; Rev 19:15 \* 2:9: Rev 13:11-13

mumunan inton ma namu avúavá san ma anunu ukharéin nain kékái Tiyarafenu ano ínaiimpá daíden uman aminten mino.

### *Mumunan Nanin Banta Ano Ma Mantaan Ákona In Baya Ino*

<sup>13</sup>\*Máan tukhein nan mi mumunan tiyofi sifá tiváeyan noe, Bafan mano ma anunu uren avábá uantiyain monó nanin banta van mi ena ena yamú Tiyarafenu vaípá tusu siantiyá tiféuno. Mai fara vara seyo, setin ma evaránen tivíkein daná afová ino siren mi esé araiintá Tiyarafenu ano siretin aní ukharé in mi Kantá Aunani funtákein doran mano sreti manan ayusese en mino. Máan turen mi mai ma fura yanáká mumunan iyaonarái evaránen aviren mino. <sup>14</sup> Mai kama vaya ma siamé tiferunarái setisi Bafan Yisas Karaisini kakhan aúpin bano van béisiretin arakhen mino.

<sup>15</sup>Máan tukhein nará mumunan tiyofi sifá tiváeyan noe, mai ma vompon po safi áa soo fo safi ma siamiyáké afova ameruna vaya vá pákaan ákona uveya mairasá mantano.

<sup>16</sup> Tetisi Bafan Yisaş Karaisin má Tifoe Tiyarafenu vá ano setin tivábá uren mi vei sarisari fóké para van oriyan ban ará ákona vá inká kamaen báken ma avein avúavá bá timen mino. <sup>17</sup>Béi ano vá tiretin ma minó kama avúavá bariyaona vá inká kama vaya kayo ma siyaonafin masá ákona uantano.

## 3

### *Porin Amúkuantano Van Ma Inaúkein Baya Ino*

<sup>1</sup> Mumunan tiyofi sifá tiváeyan noe, ma sípá bayan té uno. Mai ma Bafani kama vaya ma sreti ankan inire ma mai aránaópá baona vaya minó akhempá tiámé orera ékun banasi ano iniren mai vaya aránaópá bano van mumpo

vá amúkusintano. <sup>2</sup> Amúkesin ná namu vanta kayo ano ma setin uman timiyain pinte vá Tiyarafenu ano siya ino. Mai fara vara seyo, minó ano ída Bafantá mumuman ukhen mino. <sup>3</sup> Máan tukhen mifo Bafan mano ma sirein bayá ánaín pura sen bákuriyain mi vantin tiretin ákona amiren dafikantin Ban Anon mano siretin ída uman aminten mino. <sup>4</sup>\*Mai ma sretin nan barano van ma siamé tiferuna yanasinta kama e variyan nan Bafan mano setiñ ineine simí afová ukheruna ínaiimpá deren mai avúavá pákaresin banten mino. <sup>5</sup> Áesin ná Bafan mano sretin ayainti vá Tiyarafenu ano ma vanasi avábá iyain má inká Yisas Karaisi ma mantaan ákona uyen uman barein má afová ure vá mai ma einí ono.

### *Ída Ma Avesara In Baya Ino*

<sup>6</sup>\*Mumunan tiyofi sifá tiváeyan oe, setisi Bafan Yisas Karaisin avíkái ma man bayá siamé uno. Mai ma siamikhé tiferuna vaya ánaín ma ída yakhafiyan ma avesaraen noin kéká áde ída vá orono. <sup>7</sup>\*Mai fara vara seyo, sretin má ma váké maé teti ankan ída sivesara iyákuya gefái afová ukha ompo setinti sivútitá ánaín mana vá bákuron. <sup>8</sup>\*Ída mana yunán para variyá umpo miyaní uré anan bariyá uno. Máan tiyái sretin ída uman ameno van pasé inuran má bayá má ákona yorarí uré mai yanasinta variyá uno. <sup>9</sup>\*Tetí ankan kasaé dunan inantiré nunaren mifo mai avúavá ódareya mai ánaín bákuron van mi sretin aní é uno. <sup>10</sup> Para vara seyo, sreti ankan má ma váké maé ma man bayan tiamikhá uno. “Maná vanta ano ma avesara uren ída yoranten maen mai vanta ano ída vá dunan nano.”

\* **2:13:** Efe 1:4; 2Te 1:3    \* **3:4:** 2Ko 7:16; Kar 5:10    \* **3:6:** Rom 16:17    \* **3:7:** Fir 3:17  
\* **3:8:** 1Te 2:9    \* **3:9:** 1Ko 9:4; 1Te 1:6    \* **3:11:** 1Ti 5:13

<sup>11</sup> \*Máa sé tiamikharéi inékun tiretin aúbanté manáa ano avesaraen nóken ena kékai yoran aa iyáden avesera amiyan ne sen me sisimí iniyá tiféuno. <sup>12</sup> \*Máa sé iniréi Bafan Yisas Karaisin avíká máan nanin banta van manará báken dunan dóden nano van mi ma man bayá siamiyá uno.

<sup>13</sup> \*Máan tiyantiya mumunan tiyofi sifá tiváeyan noe, puntákein avúavasí in nan ída vá avesara ono.

<sup>14</sup> Ma vompompin ma siamé tiferuna vaya ánaín ma ída yakhafin nain nanin banta vá ída o muntesin ná betii avúava san ayave van ino. <sup>15</sup> \*Ída vá béin namuro an de yá afá aváen ma man bayá siameinisá ono.

*Porini Amusin Baya Ino*

<sup>16</sup> Ara, ara uman mano siretin amaniná erinten mifo áesin ná ará kusin benafo Bafan mano ena ena ará kusin amiren ná tiretin má bano.

<sup>17</sup> Téi Pori anon te siyampókéi ma kípan bayá uvádéi sesi aní daná mairá kaé uno. Minó bompon kaylorá máan manan ukhé uno.

<sup>18</sup> Tetisi Bafan Yisas Karaisini sarisari ano siretin má banti vá bano.

**PORI MA ESÉ  
ARAIÉN TIMOTIN  
UVAMAN AMEIN  
BOMPON MINO  
(1 Timoti)**

**Ma ma kanú manaú  
bompon ma uvaman  
monó doran banta  
amikhein mai  
1Timotin má 2  
Timotin má inká  
Taitusin ma san ma  
sian amá ukhein  
baya maen AD  
sikisti-fo (64) ráké  
sikisti-seveni (67)  
ráké ma aúban mi  
uvanten mino.  
Oo siádan bayá vá o ukí  
páké ma erikhein bayá  
vá ano siyáken AD  
sikisti-fo (64) fin ma  
Sisa Nero ano ma monó  
nanin banta ariyá  
eimpin pasa Porin aren  
naifo ída ino. Karavusi  
finte utúantán maen  
evaránen bei yoran mo  
araí ureñ ma varu  
kayofin naren eúken  
mino. Kiriti vá  
Masedonia vá Akaiá  
barafin ma yain baru  
Nikoporisi vá Troasi vá  
Miretusi vá inká Korini  
vá Efesasí bá ino. Inká  
Speini varafá inan  
orikhen ne sen iniyán  
mino. Monó dorarién  
noren enóbíkan  
evaránen karavusi**

**fáken mo khauren  
maen kó tiantáden AD  
sikisti-seveni (67) fin  
aruan puren mino. Béi  
ma monó dorarién  
nóken mi esé ma  
Timotin uvaman  
amikhein bompon má  
inká Tatusin ma  
uvaman amikhein  
bompon má uvanten  
mino. Inká kó  
tiantáden purino ma  
sirákan mi kan dádasí  
en uvaman Timotin  
amen mino.  
Timotini Esé  
Bompon Ma Uvanteí  
Pákenai Afova Vaya  
Ino**

*Ma vompon ma uvantein banta  
ino.*  
Baya varen orin banta Pori ino.

*Uvarein orana ino.*  
AD sikisti-tari (63) ráké sikisti-  
sikisi (66) ráké ma aúban  
mino. Mai maen Porin ma  
karavusi fintena utúantán ma  
evaránen bei yoran mo yorein  
pimpá ino.

*Ma vompon ma uvantein baru  
ino.*  
Masedoniá inon ten iniyán  
mino.

*Ma vompon ma uvaman  
amikhein banta ino.*  
Timoti maen Porini eyo iyam-  
pon báken kama arona varen  
ma Pori má Efesasí o monó  
doran bantaí ein pumara ino.  
Ínaiimpáké Pori ma Masedoniá  
barafá oríkan maen bái monó  
dorarión ono van Efesasí para  
varen mino.

*Nái ana vará ma vompon uvan-  
ten nafino.*

Timoti maen pumaran bákan mi mantaan ákona uyen monó dorarí ino van ará ákona amín baya siamiyáken kama ineine amikhen mino.

### *Pori Ma Susu Sein Baya Ino*

<sup>1</sup> Tetin tiya uren ma evaránen tivíkein Tiyarafenu vá inká tetin ovaránen e sivirante ne siré ma ave ukheruna vanta Yisas Karaisin má ano ma aní uren aposeri yoran timikhein banta séi Pori anon ma vompon uvaré uno.

<sup>2</sup> \*Monó avúavápin ma se sanin uren, an dakhein banta Timoti vaipái ma vompon uvamádé uno. Teti Sifóe Tiyarafenu vá tetisi Bafan Yisas Karaisin mái sarisari vá arunána bá ará kusin má ano vá en má bano.

### *Kampun Monó Baya Sin Kayoi Aaman Vaya Ino*

<sup>3</sup> Téi ma Masedoniá orono van iyáké maé éin nan Efesasi bákeya vá mai ma kampun bayafó ma vanasi afova amiyain kéká tiamesin ída máan tino van mi éin me ayópá é uno. <sup>4</sup> \*Mai ma vetí anafu aráoni avúavá ma mamádáken ma ara ara kampun baya kayo e sen oriyan bain mano ída kanaén betin ayaintin Tiyarafenurá mumunan uren betin ma aya ono van iyain daná afová inten mino. Máan tinten mifo mai ano vetí ineine anan máden asuse urantin maen aruve asivein avúavá anan baranten mifo ída vá áesin mai avúavá barano. <sup>5</sup> Mai van mi Yisasin ánaín ma vákuriyáin kékápin ná ena ma moéken avábá in avúavásá bano. Betí ankan aú ma avusese intin ma kama yaná bá namu yaná bá ma yaíden afová in ineine ma vantin inká pura mumunan má ma vantin mi ena ma moéken avábá in avúavá afoká inten mino.

<sup>6</sup> Máan tinten mifo manáa kam-pun afova ma amin kéká ano mai

avúava sintá inka me ampiren beni ana ída vain baya sen orera iyan mino. <sup>7</sup> Betí ankan nan man baya afová ukhein kéká ino sen banasi ano afová ino van mi inikhen mino. Máan tiyan mifo mai ma kana siyá uno siren ma vanasi siamiyain bayai ana ída uron mi afová ukhen mino.

<sup>8</sup> \*Tetí ankan ma afová ukhé tiferuna vanasi ano ma Tiyarafenu man baya ánaín ma funtáden bákurin manon man baya kama ukhen mino. <sup>9</sup> Máan tukhen mifo funtákein avúavá ma variyain nanin banta ina va man baya uvanten naino. Ída ino. Man baya ma yurafuriyáken ma Tiyarafenu vaya átokharé iyain kéká bá ume avúavá ma variyain kayo vá inká Tiyarafenu kantasi ukhein danasinta ma oyan amin kéká bá ino. Inká béin nan ma afon karí iyain kéká bá be anóe afóen má ena nanin banta vá ma aruan puriyain kéká bá ino. <sup>10</sup> Inká pamúkuí ma iyain kayo vá banta ano fi áa anasi ano fi ma vaéden beraran pamúkuí iyain kéká bá inká banta ano ma arona vanta avíden sarií iyain kayo vá ino. Inká kampun baya sin kéká bá ena nanin banta iyáantáden ma ída avúavápin kaé iyain kayo vá inan man baya van mino. Banasi ano ma mai avúavá sintá vá minó ara ará namu avúavá sintá vá ma variyain manon Tiyarafenu ano ma fura sikhein avúaváká bano van ma setin afova simikhein baya ánaín ída yakhafiyán mino. <sup>11</sup> Mai ma setí ankan afova simikhein mai Tiyarafenu fanu sikhein kama vaya ino. Tiyarafenu ano séin nan mai kama vaya vá banasi siameno sikhen mino.

### *Tiyarafenu Sarisari Van Ma Pori Susu Sikhein Baya Ino*

<sup>12</sup> \*Tetisi Bafan Yisas Karaisi ano séin nan kanaén beni yorarí inten

\* **1:2:** Apo 16:1-3; Tai 1:4    \* **1:4:** 1Ti 4:7; Tai 1:14    \* **1:8:** Rom 7:12, 16    \* **1:12:** Apo 9:15; 1Ko 15:9-10; Kar 1:15-16    \* **1:13:** Apo 8:3; 9:1-5

mino siren mi séin aní uráken ma ákona simiyain nan mi véin tusu siantiyá uno. <sup>13</sup>\*Pefá kama anan iyá uno siré maé oyampá baya siyáké ben ánain ma vákuriyá ein kéká dakhadé ariyaré uno. Máon tiyaré umpo Bafan mano ma séin nan arunán uren tivirein mai fara va ino, séi ída véin afová é mumunan ukharé ékun mino. <sup>14</sup>Bafan Tiyarafenu ano séin moéken tarisari uren mi Yisas Karaisimpin ma vain mumunan má avábá bá manan téin túpin bíkasinten mino.

<sup>15</sup>\*Ume nanin banta aya ure virano van mi Yisas Karaisi ma varafin erikhá mai fura vayan tiámé umpo vá minó ano véíntasá mumunan ono. Namu avúavá baran kéká esantaré téi moéken ume vanta uron mi vá uno. <sup>16</sup>Máon tukhékun mifo Yisas Karaisi ano ída ainen téin uman timen mifo mai ma moéken umeí iyain nanin banta aní intin onano van mi Tiyarafenu ano séi nan moéken arunán uren tivire mino. Máon turantin béisntá ma mumunan inain nanin banta ano fara van oriyan ban aunan baranten mino. <sup>17</sup>Máon tukhanti vá mai ma fara van oriyan ban Tiyarafenun avisá daní iyáke kákán bí ameno. Para vara seyo veyáká anan Tiyarafenu váken inká ída furinton para van oriyan ban Kin bákán mana nanin banta ano véin ída kanaíen oné iyan mino. Pura ino.

### Pori Ma Timotin Nan Mantaan Ná Ákona Ono Sein Baya Ino

<sup>18</sup>Te sanin Timoti oe, gefá ma sakhanampa vaya siádán ma varé ein nan mi ma vaya kayo ákonaé timiyá uno. Áesin ná ma vaya kayo ano éin ákona uantanti vá Bafani yorampin báke namu yaná bá ákona e aruvono. <sup>19</sup>Yisas Karaisintá ákona mumunan kaúde vá minó damú puntákein ineine ana vá barano. Mai fara vara

seyo, manáa nanin banta ano mai avúavá me ampiren ída funtákein avúavá mo varaq maen betíi mununan mano sipi ma oriyaren onámanáká mo kuvanten barákein an dakhen mino. <sup>20</sup>\*Imeneusin nú Areksanda nú ano máon avúavái variyaré iká míkan nan mano afova máden Tiyarafenun ída oyampá baya sino van mi míkan avíón Ban Anon ayampin kaé uno.

## 2

### Monó Tin Avúavá Pákena Vaya Ino

<sup>1</sup>Máon tukhein nan mi mai ma saretin tiamicheruna vayará ma kákán ukhein bayan tiamenté uno. Tiyarafenun amúkuán amesin ná minó nanin banta aya uren evaránen aviriyanti vá inká tusu amúkirí basá ono van mi ákonaé tiamiyá uno. <sup>2</sup>Mai avúaváká teya vá kin kéká bá inká dafisin kéká bá amúkuán amiyasirá kamaé tirá kusin má manafin bá tiferá Tiyarafenu ano ma anunu ukhein avúayá ana vákuriyárá banasi avorá kantasi ukhé bá tifano. <sup>3</sup>Mai avúavá anon kama ukhen mi setin ma Siya Uren Tivikhein Tiyarafenun amusin amé iyan mino. <sup>4</sup>Mai fara va ino, minó ano ída kípan aunan mamaren pura yaná afová ino van mi véi inikhen mino. <sup>5</sup>Mai fara vara seyo, Tiyarafenu veyáká anan bákán inká aúbóná banta mana anan báker mi Tiyarafenu vá banasi vá ma manafin kasen ban baya e sian more mere iyain nan mi siyá uno. Mai vanta mai Yisas Karaisi ino. <sup>6</sup>\*Tiyarafenu ano ma siádán baré ein damú ma afoká in maen mi minó nanin banta miyaní uren avirano van Yisasin tiantan e furen mino. <sup>7</sup>\*Tiyarafenu ano vei vaya vanasi siamiyáken mumunan ma in avúavá pákena vá pura sikhein baya vá baren ena anan nanin

\* **1:15:** Ruk 19:10 \* **1:20:** 1Ko 5:5; 2Ti 4:14-15 \* **2:6:** Rom 3:29-30; Kar 1:4 \* **2:7:** Apo 9:15; Kar 2:7-8; 2Ti 1:11

bantafin mo siamino van mi séin aní urá baré ma fura vayan tiamiyá uno.

<sup>8</sup> Máan tukhantiya mumunan kéká ano ma manafin átaru inonafin aruve asive in má ará uman daantan avúavá bá ampire vá ayan daní ureya Tiyarafenu aví daní iyáke vá amúkono.

### Kama Avúavá Ano Ma Anasi Ar-intai Auí Daná An Dan Baya Ino

<sup>9</sup>\*Máan tiyanti mae anasi arinta ano kama ukhein buí daná uren bantai inin namu ina siren ná au ma ída yákó in buí daná ana vá ino. Máan tiyáken ída vá ánon do kama uren kori fóké uvaren dana safi inká ankaroro fi áa moékan miyantá ma vain danasinta fi vá ino. <sup>10</sup>\*Máan tinten mifo Tiyarafenun ánaín mi vákuriyá uno ma siyain nanin arinta ano kama avúavá ana varantin ná mai avúavá ano vá betii kama vuí daná an dano.

<sup>11</sup> Anasi arinta ano fúkekhen bempáké báken ná monó doran banta kayoi vaya iniren ná mai aránaópá bano. <sup>12</sup>\*Anasi arinta ano vempáké báken ída vá bantará ánoní ená inká ída monó baya sino. <sup>13</sup>\*Mai fara vara seyo, Tiyarafenu ano Adamun naren uváden ínaiimpákéi Ivin uvaren mino. <sup>14</sup>\*Máan turan Ban Anon mano ma mákandán maen anasi ano naren umeí ein mifo Adamu ano vaino. Ída ino. <sup>15</sup>Máan tukhen mifo anasi kayo ano ma aí pinté iyampon kaiyáken ma au vararasí uren mumunan iyáken avábá in avúavá bariyan ma kantasí ukhen ban avúavá ana ma variyan bantin mi Tiyarafenu ano aya uren evaránen aviranten mino.

\* 2:9: 1Pi 3:3-5 \* 2:10: 1Ti 5:10 \* 2:12: 1Ko 14:34 \* 2:13: Esé 2:7, 21-22; 1Ko 11:8-9  
\* 2:14: 2Ko 11:3; Kar 3:1-6 \* 3:1: Apo 20:28 \* 3:2: Tai 1:6-9 \* 3:2: Manáa afova vanta kayo ano mai van máa sikhen mino. Mana nanin máa vá barano. Ena afova vanta kayo ano mai van máa sikhen mino. Ída vá anasi máde ifá urú urú en nono. 3:12; Taitasi 1:6 fin dere vá onano. \* 3:7: 2Ko 8:21

### 3

#### Monó Doran Kayoi Vaya Ino

<sup>1</sup>\*Monoká ma yafisin dorarí ono van ma anunu iyaona mai yan bain doran mi vákayán mai yorarí ono van iyan ná ma fura vayan tiamé uno. <sup>2</sup>\*Mai ma monóká dafiseno van iyain bantai avúavá ano funtákantin ná ena nanin banta ano ída kanaíen héin oyampá baya sino. Inká be aná bá ana vá puntáden báken\* ná beyantasá kama avúavá ma vain ná manan one one ino. Inká puntákein ineine vá bantin kama vanta ino siyantin ná ena kéká ano ma ven amápin erintin ná betín kama iyáken Tiyarafenu afova vaya vá banasi siamino. <sup>3</sup>Béi ída vá óen non nen ná inká ída vá aruve asive inton bempáké báken moni san ída vá anunu ino. <sup>4</sup>Bei kéká kamaen dafisin banta vantin ná inká ben akhafana ano kamaen baya iniren ben aránaó ana vá bano. <sup>5</sup>Mai fara vara seyo, anasi iyampontá ma ída kamaen dafisin nain banta ano inté uren ná Tiyarafenu vanasirá dafisinten nafino.

<sup>6</sup>Auyen mumunan keká ída vá ainen monóká dafisin doran amino. Para vara seyo, véin ma amiran nain doran nan au khákan intin maen mairái Ban Anon mano véin mamádantin ainen eraven ankaminten mino. <sup>7</sup>Inká afokhampin ma vain kéká ano ma véin nan kama yorarí iyan mino ma sintin béi ída kanaíen Ban Anoni vase unampin o áduven ayave van inten mino.

#### Monó Doran Banta Kéká Ano Ma Varan Nain Avúavá Ino

<sup>8</sup>Inká monó namumpin ma yoran banta kéká ano yere máan mana en kama avúavá ana vá barano. Ída vá kampun baya e sian more mere en ná inká ída vá

óen non nen ná inká moníká inin kaen iyantin ná bén nan kama vanta ino sino. <sup>9</sup> Betí ankan kama yaná bá namu yaná bá ma yaíden afová in ineine funtáden ná pura mumunan pákaan ákona uren ná bano. <sup>10</sup> Monó namumpin titó doran kayo nare amesin doriyantiya kamaen ná doranten nafi mai ódare vá ínaiimpáké monó namumpin ma yafisin doran ameno.

<sup>11</sup> \*Betin aná ona ano máon mana en ná kama nanin kéká ino siyantin ná mai nanin kéká ano ena nanin banta ída vá oyampá baya sino. Beti yantasá kama avúavá ma vain maman one one iyáken minó danákasá ákonaen dafisino.

<sup>12</sup> Monó namumpin ma yoran amiran nain banta ano ve aná bá ana funtáden báken ná\* be akhafana vá bei kéká bá kamaen ná dafisino. <sup>13</sup> Mai mä kamaen doran nain kékái vanasi ano amo siyantin Yisas Karaisintá ma mumunan in avúavá ano moéken kákani inten mino.

#### *Tetisi Fura Mumunan In Baya Ino*

<sup>14</sup> Éi vaonafá orono van ukhé umpo ída ma ainé oréku maeya ma yanasinta varano van mi ma vompon uvaman amé uno. <sup>15</sup> Téi ma ída ainé oréku maeya mumuman kékasá ma vompon pinte ódore vá afova ameno. Mai kéká anon ákona namádan kayo an daven mi fara van oriyán ban Tiyarafenu fura vaya fákaan ákona uráken doranten mino.

<sup>16</sup> \*Tiyarafenu ano Yisasini kama vaya afova inon tiren mi aúpá bá ein maman dáko ukhein pasen mana ano ída kanaén mai vaya van ina inten mino.

Yisas Karaisi ano varará banta an daven afoká ukhan

Kantá Aunan mano yéin nan puntákein banta e siren manan dáko uran enisori kayo ano ódaren banasi siamíkan barará nanin banta ano véintá mumunan uvin Tiyarafenu ano yéin aviren inarufá óden mino.

## 4

#### *Kampun Monó Baya Sin Kékáí Vaya Ino*

<sup>1</sup> Máon ten mifo ma vara kípan akhempá ma oriyantin maen manáa kéká ano mai ma esé araiintá ma Tiyarafenurá mumunan iyá ein me ifá uren kampun aunani vaya ánoín dakhafinten mino sen Kantá Aunan mano mai fákena sian amá ukhen mino. <sup>2</sup> Mai ma kampun ten monó banta kéká uno ma siyain kéká anon mai afova aminten mifo vetí kama yaná bá namu yaná bá ma yaíden afová in ineine asusen ukhen mino.

<sup>3</sup> \*Máon tukhan mi ábasuí ma in avúavá bá inká mai ma fura sikhein baya ma afová ukhen mumunan iyain kéká ano susu siantáden nano van ma Tiyarafenu ano uvamádan bain dunan kayo vá are uanté iyan mino. <sup>4</sup> Para vara seyo, Tiyarafenu ano ma uvantein danasinta mai kama anan ukhen mifo ída vá manáa mo ifá iyáké túkákesá bén tusu siantiyá timusin pintesá mai yanasinta vará tifano. <sup>5</sup> Mai fara vara seyo, Tiyarafenu vaya ano máo sikhen mino. Ábasu ma vamipin má ara ara yunan ma nan avúavá bápin pefái Tiyarafenu ano maman kantasí ukhen mifo amúkimposá tusu siyákeya varano.

#### *Yisas Karaisini Kama Yoran Bantaí Ma In Baya Ino*

\* **3:11:** Tai 2:3    \* **3:12:** Manáa afova vanta kayo ano mai van máa sikhen mino. Mana nanin máa vá barano. Ena afova vanta kayo ano mai van máa sikhen mino. Ída vá anasi máde ifá urú urú en nono. 3:2; Taitasi 1:6 fin ná dere onano.    \* **3:16:** Mak 16:19; Yon 1:14; Kor 1:23

\* **4:3:** Esé 9:3; Rom 14:6; 1Ko 10:30-31

<sup>6</sup> Ma vaya kayo ma mumunan kéká tiaminte mae mai Yisas Karaisini kama yoran bantaü uveyan mai ma fura mumunan má inká kama vaya vá ma inire ma mantaan ákona eona vayan tian dákó inono. <sup>7</sup>\*Kampun banta kayo ano ma siamin nain baya kayo van pédeýa nentasá bano. Mai fara vara seyo, mai vaya kayo ano ída ayainten mifo ída vá asive asive iya vákeya kantasí ukhen ban avúavá ma varan nará ena ena ákona e yoseno. <sup>8</sup> Mai fara vara seyo, manáa nanin banta ano máa sikhen mino: “Dan bukhafará ma ákona varan mai veni nena sanáan ban mifo monó avúavá san ma ákona varan mai moéken kákán danái van mino. Mai fara vara seyo, saréa ma vá tifanuna vá inká ínaimpá ma vá tifanuna vái miyan pefái Tiyarafenu ano iyátintan ban mino.” <sup>9</sup> Ma fura vayan tiyan mifo minó ano mai rasá mumunan ono. <sup>10</sup>\*Mai fara van oriyán ban Tiyarafenu ano ma minó nanin banta vá inká béintá ma mumunan iyain kayo vá ma aya uren avíkeintái setisi inin kauráké moékan uman o yosiyáké ákona yorarí iyá tiféuno. Mai fara vara seyo, fura yanáká banasi ano mumunan ino van muno.

<sup>11</sup> Ma vaya vá minó nanin banta siamíde afova amesin ná mai ánain dakhafino. <sup>12</sup>\*Ída vá áeesin ná mana ano éin nan pumara ino siren ná éi ma siamínona vaya oyan amino. Mumunan kéká ma afova amiyáke ma yanasinta vá aní ono. Éi ma ne vare inonafín, má inká mumunampin ma kantasí ukhen ban má inká ena ma avábá in má ino. <sup>13</sup>Tiyarafenui vompon dóki finté yankafesin iniyantiya vá mumunan kéká ákona uantiyáke vanasi afova amiyasirá téi oreño.

<sup>14</sup>\*Mai ma sakhanampa vaya

ma inikhein Yisasini mumunan nanin bantai ánon banta kayo ano ma ayan árontá kauren avu uantákaré ein amusin ída vá kaumpán ono. <sup>15</sup> Éin ma amikhein dorantasá ei minó inin onan kaure yoriyákeya inká Tiyarafenu ano ma anunu ukhein avúavá ana variya sin ná minó nanin banta ano onano. <sup>16</sup> Ei avúavá bá inká Tiyarafenui vaya ma siamiyaonará basá dafiseno. Puntákein avúaváká ma mantaan ákona uvesin maen mai ma siamesin inin nain kéká bá inká éin má Tiyarafenu ano aya uren aviranten mino.

## 5

### *Timoti Ma Ena Nanin Banta Avábá Uantan Baya Ino*

<sup>1</sup> Anon banta ída vá asin baya siyákeya e afóen má ma vempáké baya siyaonaisá ono. E afá aváeyan ma kama iyaonaí eya vá ena fumara vantá kama ano. <sup>2</sup> Anon nanin kékásá e andoen ma kama einí iyáke vá inká e ayofin ma kama iyaonaí eya vá puntákein avuavá posá ena nanin arinta kama ono.

<sup>3</sup> Manáa yana san ma o afasí iyain baré nanin kayo ma vanitiyá vetin ná aya ono. <sup>4</sup> Máan tin nompo mai varé nanin mano ma iyampon kaintin ná baré inten nafi áq ve anayasin ná baré inten nafi mai esé daná betí amápin ná monó avúavá baren ná betí anóe afóentá anona yafisino. Para vara seyo mai avúavá anon Tiyarafenun amusin amé iyan mino.

<sup>5</sup> Máan té iyan mifo fura sen ma veni kéká ma ída vain baré nanin mano vei ákona inin Tiyarafenurá kauráken mi aya ino van ena ena vayan má inuran má amúkiyan bá é iyan mino. <sup>6</sup> Máan té iyan mifo yan bukhafará ma amusin dosiyain baré nanin mano monó

\* **4:7:** 1Ti 1:4 \* **4:10:** 1Ti 2:3-4 \* **4:12:** Tai 2:15 \* **4:14:** 2Ti 1:6 \* **5:6:** Pori ma ma vaya sikhein mai máan nanin kaylorá ída yafiseno van mi sikhen mino.

avúavápin purein an mi yakhen mino.\* <sup>7</sup> Máan tiyáke ma afova vaya vá ákona e monó nanin banta vá dere siamiresin ná mai ma varé nanin kaylorá ma yafisi-nonará mana ano ída vá oyampá baya sino. <sup>8</sup> Máan tinten mifo ve anóe afóen nafi áa ve anafu aráon nafi ma ída kamaa dafisin nain kéká ano vetíi mumunan pefái me ampikhen mino. Máan kéká ano afokhampin ma vain nanin banta esantaren namu uron mi ukhen mino.

<sup>9</sup> Mai ma aya ono van ukhanona varé nanin ná mai sikisti (60) orana esantakhein báken ná inká pefá be avafun má ákonaen baré ein nanin ná bano. <sup>10</sup> Mai varé nanin mano gefá be akhafanará kama yafisirí iyaren nafi áa ena kéká ano ma ven amápin erin maen betin kama iyaren nafi áa ena monó nanin bantafin ará barará dáken doriyaren nafi áa umampin bain kéká aya iyaren nafi áa minó damú kama avúavá barano van útakhen bákan ná banasi ano véin nan kama nanin mi van mino siyaré ein nanin ná bano.

<sup>11</sup> Auyen nanin kéká ma varesí ukhan tiya ída vá aya ono van ono. Mai fara vara seyo, vetí ankan ma evaránen banta varano van ma anunu inten maen Karaisin ma mumunan in avúavá me ampiren banta o varanten mino. <sup>12</sup> Máan ma inain avúavá anon betí ma gefá tian damú dákaré inain baya yurafúden uman baranten mino. <sup>13</sup> \*Máan tiyan maen avesara uren nóken banasi amá e feren khuvén iyáken baya e sian more mere iyan maen ena nanin banta ano ma yan bain dana san ankayan tiren ída seren baya sé iyan mino.

<sup>14</sup> \*Máan tukhein nan mi auyen baré kayo ano evaránen banta mamaren báken iyampon kaiyan mápin dafisino van mi siamiyá

uno. Máan ma intin mi vetí ankani namuro kayo ano ída kanaén oyampá baya sinten mino. <sup>15</sup> Mai fara vara seyo, manáa kéká ano mumunan inka me ampiren Ban Anon ánaín dakhafiyái ma vaya siyá uno.

<sup>16</sup> Máan tukhein nan mi mana mumunan nanini kékápin ma varé nanin kayo ma vantin mai nanin mano vá mai kékáká dafisiyáken ída vá monó nanin banta uman amiyan bano. Máan tintin ná monó nanin banta ano vá mai ma ve antun ída van ma ída kanaén ayain danasinta yoseren ukhein baré nanin kaylorasá dafisino.

#### *Monó Ánon Banta Kaylorá Ma Kama En Dafisin Baya Ino*

<sup>17</sup> Monó doran banta kayo ano ákonaen ná ben ma amikhein doran dorariyáken ná Tiyarafenui vaya vanasi siamiyan afova amiyantiya vá betíi miyan mun ékaan tano. <sup>18</sup>\*Mai fara vara seyo, Tiyarafenui vompon dóki ano máa sikhen mino. “Burumákaó ano ma uviti aran dasamiyáken niyantiya ída vá oorá damono.” *Diu 25:4* Inká Tiyarafenui vompon dókifin deren máa sikhen mino. “Mai ma yoran nain kéká ano miyan ná barano.” *Ruk 10:7*

<sup>19</sup> \*Kankanan mano fi kanú manaú ano fi ma ída afová en ontan nain danáká ma monó doran banta kayo au finté ma intiya mai vaya ída vá ineno. <sup>20</sup>\*Umeí ma uran nain kékábanasi avorá asesin ná ena nanin banta ano máan avúavá baran nan perano.

<sup>21</sup> Tiyarafenu vá Yisas Karaisin má inká kantasí ma ukhein enisorí kayo vá avorái ma vaya siamé umpo ída vá aronará o khábe e khábe iya vá puntáde yorano.

<sup>22</sup> Ída vá ámun uare monóká dafisin banta aní ureya aviádesin dorano. Manáq kéká ano ma umeí inaimpin ída vá éin má oriveya

\* 5:13: 2Te 3:11 \* 5:14: 1Ko 7:9 \* 5:18: Mat 10:10; 1Ko 9:9 \* 5:19: 2Ko 13:1 \* 5:20:  
Efe 5:11

umeí iyáke funtákein avúavá ana vá barano.

<sup>23</sup> Ena ena aí baré iya ompo ída vá non uró ana niyákeya ará ma ayain ná manáa uvaini non masá nano.

<sup>24</sup> Manáo kéká ano ume avúavásí iyan maen mai kayo van Ti-yarafenui kópin oriven uman baranten mino sen minó ano afóvá ukhen mifo manáa kékái ume mai ída afóvá esin baré intin ínaimpákéi maman dákó inten mino. <sup>25</sup> Máan mana en mi mai ma kama avúavá ma variyain kéká banasi ano afóvá ukhen mifo inká mai ma aupáké ma kama avúavá bariyain kéká ída afóvá esin baré intin ínaimpákéi maman dákó inten mino.

## 6

### Doran Banta Ano Ma Vei Ayafa Aránaó Ban Baya Ino

<sup>1</sup> \*Monó nanin banta ano ma ída miyan baran dorarí ma iyan ten ná betí ayafa vanta aránaópá bantin ná banasi ano Tiyarafenu aví bá inká teti ma siamiyaruna vaya vá ída oyampá baya sino.

<sup>2</sup> \*Monópin ma van nain bantai yorarí ma iyan nain kéká ano ída vá te sifá tiváe ino siren ná avesarain avúavá barano. Máan tin nompo, ena mumunan kékái aya iyá uno sireya ída vá avesara iyáke ákona e vá dorano. Timoti oe, fura sikhein baya vanasi afova amiyáke vá ákona e siamesin ná mai ánain dakhafino.

### Moni San Ma Anunu In Maen Mai Namu Avúavái Ana Ino

<sup>3</sup> \*Kampun afova ma amin kéká ano ma ma siamiyaruna vaya van kampun baya e sinten mifo ma maen tetisi Bafan Yisas Karaisini vayan báken monó avúavá ma ákona uantan bayan ban mino.

<sup>4</sup> Mai ma ena avúaváká ma afova amiyain kéká ano kákán bí barano

van manan iyan mifo mana yaná ída afóvá ukhen mino. Betí ineine ano fura sen asuse ukhan pasen betí vaya van manan pura siyá uno siren ena nanin banta manan bararasí iyan mino. Máan tiyáken aruve asivein baya vá kampun baya ma e uvaman more mere in má inká ena ano ma namu avúavásí iyain nan namu ineine uantiyan ban avúavá anan baré iyan mino. <sup>5</sup> \*Máan avúavá ma variyain nanin bantai ineine ano fura sen namu uron ukhan pasen ena ena kampun baya anan tiyáken uman maman dákó é iyan mino. Máan tiyáken monó aa fákéi kokhon danasinta varanté unon ten iné iyan mino.

<sup>6</sup> \*Máa siyan mifo Tiyarafenui vaya ma iniré mai ánain bákuriyá tiferuna anon tetisi monó tin avúavá e inoren kákání iyan mino.

<sup>7</sup> \*Mai fara seyo ma varafin ma afoká é tiferuna yamú ída mana yaná baré erikhé tiferuna inká puronté maé ída mana yaná baré oró tifanté uno. <sup>8</sup> Máan tukhein nará dunan má tuí daná bá ma yékun bantí maé mai van kana vá uno vá tétifano. <sup>9</sup> Máan tukhen mifo kokhon danasinta varano van ma iyain kéká anon akhenókafin eraven ankamin mi namu ineine vá namu avúavá bá ena ina yaná ma aranan má ano máden asuse uran uman baré iyan mino. <sup>10</sup> \*Mai fara vara seyo, moni san ma anunu in maen mai namu avúavá kayoi arú ino. Moni san ma anunu ein kéká ano mumunan avúavá me ampireن maen arun naná o yosé iyan mino.

### Mumunan Avúavápíñ Ma Ákona Ukhen Ban Baya Ino

<sup>11</sup> \*Máan tiyan mifo Timoti oe, Tiyarafenui vanta ompo mai avúavá san péde nentá báke vá mai ma kamaen puntákein avúavá

\* **6:1:** Efe 6:5    \* **6:2:** Frm 16    \* **6:3:** Kar 1:6-9    \* **6:5:** 2Ti 3:8; 4:4; Tai 1:14    \* **6:6:**

Fir 4:11-12; 1Ti 4:8; Ibu 13:5    \* **6:7:** Yop 1:21    \* **6:10:** Efe 5:5    \* **6:11:** 2Ti 2:22

ana vá bákurono. Máan tiyáke ei monó avúavápíin Tiyarafenun amusin ame vá bentá mumunan má avábá ma in má bempáké ma kusen ban̄ avúavá bá inká ara ara uman erintin ma mantaan ákona ukhen ma van masá pákaan ákona uráke vá bano. <sup>12</sup> \*Máan turáke mumunan avúava sará kama aruvirí ono. Mai ma vanasi avorá ma siyákeya inka Tiyarafenurá mumunan é uno siren nan ma fara van oriyan ban aunan ma amiren arakhein ná pákaan ákona ure vano. <sup>13</sup> \*Minó danasinta ma aun amikhein Tiyarafenun avorá bá inká mai ma Pontius Paerotin avorá ma funtákein kó ma sein banta Yisas Karaisin avorá bái éin ákonaé timiyá uno. <sup>14</sup> Mai ma Tiyarafenu ano sein baya ánaín mana yakhafiyáke vá banasi avorá puntáke vasin ná tetisi Bafan Yisas Karaisi ovaránen erino. <sup>15</sup> \*Ma ma minó ákona van ma avábá bíkakhein Tiyarafenu vá kin kayoi Kin má bafan kayoi Bafan má ano ma aní ukhein damú ma afoká intin mi inaru fáke Yisas Karaisin maman dákó inten mino. <sup>16</sup> Beyakáí ída furinton moéken kakhakheitá para vákán maen mana ano ída véin ádé oré iyan mino. Mana vanta ano béin ída ontein hantin ída kanaíen onanten mifo béin maman daní esin ná beni ákona ano fara van oriyan bano. Pura ino.

*Kokhon Ona Van Kéká Ano Ma  
Kama Avúavá Baran Baya Ino*

<sup>17</sup> \*Mai ma kokhon danasinta ma varará dan bákan ma vetíi moníká ma ákona inin kaiyain kéká mai ainen mi kípanter mifo vetin tiamesin ná ída vá au khakan ino. Mai ma o afasí é tiferuna yanasinta ma moéken timiyá ma simusin dosiyá tiferuna Tiyarafenu anon para van oriyan báé iyan mifo véintasá ákona inin kaono. <sup>18</sup> Betin tiamesin ná betíi monípóké kama yorarisá ino.

Máan tiyáken ná amusin pinté mai ma manáa yana san ma o afasí in nain kéká aya iyáken intéa yanasá Tiyarafenu ano amikhen nafi mai ena nanin banta aya ono vará ena ena útakhen bano. <sup>19</sup> \*Mai avúavá ma varan nain manon betíi kama yanasinta inarufá kainten mino. Mai anon ákona namádan ma yafereiní uádákaren mi fura sikhein aunan ínaimpáké o varanten mino.

*Pori Ma Timotin Nan Ti  
yarafenui Yorantá Kama En  
Dafisino Van Tiamein Baya Ino*

<sup>20</sup> Timoti oe, Tiyarafenu ano ma eni avúavá ódaren amikhan nain dorantasá dafian ákona ono. Namu avúavá oyan amire vá mai ma kampun baya sen noin kayo vará perano. <sup>21</sup> \*Manáa kéká ano kamaen mumunan iyá íkan mai kampun baya kayo ano e yari-  
faádan betíi mumunan me am-  
piren orikhen mino.

Tiyarafenui sarisari ano vá tiretin má bano.

\* **6:12:** 1Ko 9:25-26; 2Ti 4:7    \* **6:13:** Yon 18:36-37    \* **6:15:** Rev 17:14    \* **6:17:** Ruk  
12:20-21    \* **6:19:** Mat 6:20    \* **6:21:** 1Ti 1:6; 2Ti 2:18

**PORI MA KAN  
DÁDASÍEN TIMOTIN  
UVAMAN AMEIN  
BOMPON MINO  
(2 Timoti)  
Kan Dádasíen Ma  
Timotin Uvanteí  
Pákenai Afova Vaya  
Ino**

*Ma vompon ma uvantein banta  
ino.*

Baya varen orin banta Pori ino.  
Ma maen bei sipá kípan baya  
ma uvantein mino.

*Uvarein orana ino.*

AD sikisti-seveni (67) fin ma  
Porin evaránen karavusi  
fáken Romú moráken arono  
van iyan mino.

*Ma vompon ma uvantein baru  
ino.*

Romú ino.

*Ma vompon ma uvaman  
amikhein banta ino.*

Porini eyo iyampon báken kama  
arona varen ma Efesasí o van  
monó doran bantái ukhein  
pumara Timotin mino.

*Nái ana vará ma vompon uvan-  
ten nafino.*

Pori ma yei furin ádesí ukhan  
ma sipá intan bompon uva-  
man Timotin amein mino. Ma  
vompompin Timotin ayaen  
ákong uantan baya vá inká  
manáa yoran má ma varan  
nain ma san mo sian asotú  
iyáken inká Romú barufá  
Timoti nan oren béin o onano  
van ina ukhen mino.

*Pori Ma Amusin Baya Sein Mino*

<sup>1</sup> Téi Pori mai Yisas Karaisini  
vaya varen orin banta anón ma  
vompon uvaré uno. Mai ma  
Yisas Karaisintá mumunan in

\* **1:2:** Apo 16:1; 1Ti 1:2    \* **1:3:** Apo 23:1  
Rom 8:15

nain nanin banta ma Tiyarafenu  
ano iyáantán bain aunan nan mi  
vanasi mo siamino van Tiyarafenu  
ano vei anunu finté téin tisinten  
mino. <sup>2</sup> \*Te sanin an ma yakhein  
banta Timotin mi ma vompon  
uvaman amé uno.

Teti sifóe Tiyarafenu vá tetisi  
Bafan Yisas Karaisin mái sarisari  
vá arunana bá ará kusin má ano  
vá éimpin bano.

*Pori Ma Timoti Ákona Uantein  
Baya Ino*

<sup>3</sup> \*Timoti oe, éin nan Tiyarafe-  
nun tusu siantiyáké mai ma se  
sináuyan mano funtákein ineine  
vá monó tiantiyá einíi iyá uno.  
Tiyarafenurá ma inuran má bayan  
má timúkiyáké maé éin nan ena  
ena simúkuantiyá uno. <sup>4</sup> Éin  
evaráné onano van mi iyá uno.  
Para vara seyo, éi ma arunaná  
bariyan ná ma me afa ukháeruna  
van mi ovaré me iniyaruna éin  
ma onanuna yamúi kákán timusin  
onté uno. <sup>5</sup> \*Téi afová ukhéku  
éi fura seja Bafantá ákona e mu-  
munan iya ono. Para vara seyo,  
e anóe Yunisin má e aráo Roisin  
má ma mumunan iyá ein mumu-  
nan mái va onon té iniyá uno.

<sup>6</sup> \*Máan túkhen nái éin ánontá  
ma siyan kaudéku ma Tiyarafenui  
amusin mantaona van mi ákona e  
yoresin ira an den barúten kano  
van mi siamiyá uno. <sup>7</sup> \*Mai fara  
vara seyo, setín nan akhokho van  
iyan bano vara Tiyarafenu ano  
ma saunan timikhen naino. Ída  
ino. Tetin ákong simirantin ena  
nanin banta avábá iyáken inká  
tetisi sivútiváká dafian ákona ino  
van mi inin timikhen mino.

<sup>8</sup> Máan tukhen mifo Bafani vaya  
ma vanasi siamin nan ída vá ayave  
van iyákeyá séi ma karavusifin  
baruna mai Karaisini yoran nan  
mi vá umpo mai van dere ída vá  
ayave van ono. Téin má uman o

\* **1:5:** Apo 16:1    \* **1:6:** 1Ti 4:14    \* **1:7:**

yosiyáke veni kama vaya vanasi siamin nompo Tiyarafenu ma amikhein ákona vasá útakhe vano.  
<sup>9</sup> \*Tiyarafenu anon tetin nan kantasi ukhen bano van mi setin tivíden aní urá bá tifé umpo setinti sinunura saino. Ída ino. Pefá ma vara ída afoká ukhan maen bei tarisari vá kama avuayasi ma in má Yisas Karaisin pinté uaren tetin aní ono van mi vaya sian damuádan baren mino. <sup>10</sup> \*Baré íkan mi setin tiyain banta Yisas Karaisi ano furini ákona finté e silíden bei Kama Vaya finté uaren mi fara van oriyana ban aunan ma varan aai aníen mino. <sup>11</sup> \*Máan turen bei Kama Vaya ma vanasi siamin banta váke vá aposeri yorarí iyáke vanasi afova amin banta vá bano siren Tiyarafenu ano séin aníen mino. <sup>12</sup> Mai van mi séi karavusí ukhé ma umampin bá umpo mai van ída siyave iyá uno. Para vara seyo, séi ma mumunan iyaruna Vanta afová ukhékun mai ma véi simikhein kama vayará dafíken ten má bantí oriyaré bái ma ovaránen erin nain damúi mo afoká onté uno.

<sup>13</sup> Banasi ma funtákein baya siamin avúavá ma sen pinte afova mantanona vá pákaan ákona ukhe Yisas Karaisintá ma mumunan ukhesin ávabá banti ma vanona vará ovare me ineno. <sup>14</sup> \*Tiyarafenu ano ma éin Kama Vaya amikhein ná mai ma erasampin bain Kantá Aunan mano ayainti vá kama e yafiseno.

<sup>15</sup> Éi afová ukhen nan Esiá bara fáké ma erikháen monó nanin banta vá inká Fíkerusin má Emokenesin má deren téin me ampikhen mino.

<sup>16</sup> Téi karavusifin bákun ída ayave usintan nan Onesiforusin má minó bei kéká bá ano séin e soniyáken me ákona usintiyan mifo Bafan mano vá betin arunan

uantano. <sup>17</sup> Béi ma Romú barafá eriven maen ten nan mi minó akhempá doseñ noren e soman dákó en mino. <sup>18</sup> Karaisi ma ovaránen erin nain damusá Bafan mano véin nará arunán uantano. Para vara seyo, Efesasi barufin ma Onesiforusi ano ara ara aa fáké ma séin tiya ukhein mai éi afová ukha ono.

## 2

### *Yisas Karaisini Kama Aruvín Bantai Vaya Ino*

<sup>1</sup> Máan tukhein nan mi se sanin Timoti oe, Tiyarafenu ano ma Yisas Karaisin pinté uaren ma amikhein tarisari rasá ákona e mantano. <sup>2</sup> Minó danasinta ma vanasi afova amiýá eruna mai fákengé éi afová ukhen ná kokhon nanin banta avorái éin mai vaya siamikhe umpo mai ma fura sen dorano van iyain banta kéká tiamesin ná betí ankan má dere vá ena nanin banta kasaen afova amino.

<sup>3</sup> \*Yisas Karaisini kama aruvín banta an deya vá tetí ankan ma variyaruna uman ná barano.

<sup>4</sup> Aruvín bantai ma inte mai ída vá áesin ma varáke yanásinta ano éin damuan ákona ino. Para vara seyo, máan ma esin maen mai ma vei aruvín bantai uraya vaona vanta ano ída amusin inten mino.

<sup>5</sup> \*Mai ma iútin banta ano ma iútin avúavá pákena ída yakhafiyaren ma fa savifá iú tian afe urem ída mana yaná o vareiní in nampo vá Bafan mano ma sikhein avúavá kasá dorano. <sup>6</sup> \*Ákonaen ma yungan dorarí iyaré ein kéká anoi amusin iyáken esé araíen mai yungan naan oné iyan mino. <sup>7</sup> Bafan mano ineine aminti mae afova varan nompo ma ma siamiyaruna yanásinta ákona e vá inian kaono.

<sup>8</sup> \*Kin Devitini kéká pintéi Yisas Karaisi afoká ukharéin mi Tiyarafenu ano avían mantakhen

\* **1:9:** Efe 2:8-9; Tai 3:5    \* **1:10:** Ibu 2:14

2Ti 1:8    \* **2:5:** 2Ti 4:8    \* **2:6:** 1Ko 9:7    \*

1:12-14

\* **1:11:** 1Ti 2:7    \* **1:14:** 1Ti 6:20    \* **2:3:**

**2:8:** Rom 1:3; 1Ko 15:4    \* **2:9:** Efe 3:1, 13; Fir

mifo ída vá áun nono. Mai Tiyarafenu Kama Vayan bakái vanasi siamiyá uno. <sup>9</sup>\*Mai ma Kama Vaya siamiyaruna van mi karavusifin senípó anan damuádá umoyan banta an dakhé uman bariyá umpsó Tiyarafenu vaya ana ída kanaén damuádantin banten mino. <sup>10</sup>Ten timaniná uman eriyan mifo Tiyarafenu ma aní ukhein kéká aya ékun Yisas Karaisintá mumunan ukharen para van oriyán ban kakhampin orino van mi fara ákona ukhé uno.

<sup>11</sup>\*Ma ma sikhein baya ano mai furan tikhen mino.

Béi má ma furó tifanté

mai véi máí o vá tifanté uno.

<sup>12</sup>\*Tetí ankan ma umampin oró tifanté,

mai véi máí o yafisiní ó tifanté uno.

Béin ma oyan amé tifékun maen, béis yere setin oyan timinten mino.

<sup>13</sup>\*Yisasin ánain bákuró tifanté uno siré ma ída vákuré tifékun maen,

béis fara mai vayará dafían ákona ukhen banten mino.

Para vara seyo, véi ma iyáantádan nain daná ída yo varanten mino.

### *Tiyarafenu Ano Ma Aní Ukhein Doran Bantai Vaya Ino*

<sup>14</sup>\*Ma ma siamiyaruna yanásinta van banasi evaráne siamiyásin Tiyarafenu avorá ída vá baya van asive asive iyan bano. Máan avúavá ano ída kanaén banasi ayaiyantin pasen Kama Vaya ma siamintin ineno van in nain kékái ineine máden asuse inten mino. <sup>15</sup>\*Ákona yorarí iyásin ná Tiyarafenu ano eni yoran nan amusin iyan ná onano. Kama yoran banta ano ída vá ayave van iyáken Tiyarafenu fura vaya ana vaéon banasi amintin

<sup>15</sup>\* 2:11: 2Ko 4:11    \* 2:12: Mat 10:33    \* 2:13: Rom 3:3-4; Tai 1:2    \* 2:14: 1Ti 6:4; Tai 3:9

\* 2:15: 1Ti 4:6    \* 2:16: 1Ti 4:7    \* 2:17: 1Ti 1:20    \* 2:19: Ais 52:11; Yon 10:14; 1Ko 8:3

\* 2:22: 1Ti 6:11

ná inino. <sup>16</sup>\*Namu avúavá san péde nentá báke vá aniana vaya ma sin naimpin ída vá o ferano. Para vara seyo, mai avúavá sintá ano namu uron ukhan mi Tiyarafenu ano ída amusin é iyan mino. <sup>17</sup>\*Mai avúavá anoi namu namon ma khen orera einí inten mifo Imeneusin nú Firetusin nú amaniná ma yáko ukhein ná onano. <sup>18</sup>Betí ankan mai fura sikhein baya me ampiren maen pükáré ein kéká san pefái e mantakhen mino sen kampun ten nóken manáa monó nanin bantai mumunan máden asuse iyan mino. <sup>19</sup>\*Máan tiyan mifo Tiyarafenu monó nanin banta anon ákona varará ma namádan daféan ákona einí ukhan mai van Tiyarafenu vompompin máa sikhen mino. “Bafan mano mai ma ven nináí ukhein kéká afová ukhen mino.” *Nam 16:5* Inká enádá máa sikhen mino. “Bafan ninan bá uno ma siyain kéká ano vá namu avúavá oyan amino.”

<sup>20</sup>Kokhon ona ma yan bain kékái mápin ma yunan kuren nan danasinta ma vain mai kori vá siriva vá póké uvaran danasinta bákon inká daa vá karí póké bá ma uvaran danasinta van ukhen mino. Kákán doran ma vain damú anan kori vá siriva fóké bá ma uvaran danasintafó aruyen baren é iyan mifo yaa vá karí bápolo ma uvanteimpin mi kanti karúdé iyan mino. <sup>21</sup>Máan té iyan mifo mai yanásinta ma sesé uan avusese einén ma mana vanta ano vei fain avúavá do sesé uan karúdaren maen kori vá siriva vá póké ma uvanteiní uvintin Tiyarafenu ano vetin pókéi vei yorarí inten mino.

<sup>22</sup>\*Auyen pumara arintai namu avúavá sará pédeya funtákein avúavá ma varano van anunu iyaona ana vá dakhafono. Mumunan in má avábá bá ará kusin

avúavú bá ana variyákeyá vá mai ma inin mano funtákán ma Bafantá monó tiyain kéká basá manafin amusin eya vano. <sup>23</sup> \*Máan tiyáke mai ma arápiní in ma aruvín maman afoká é iyain baya kayo ma sin naimpín ída vá en má oriveya aya ono. <sup>24</sup> Bafani yoran nanin banta ano ída vá aruve asive in avúavápín oferiyáken ná inká béis ma ará namu uantan nain kéká kama ana iyáken ara ara nanin banta vá kama inin amino. <sup>25</sup> Mai ma Tiyarafenu fura sikhein baya ma oyan amiyain kékápin kusin avúaváposá afova amino. Manáu yamú Tiyarafenu ano máan kéká inin amintin maen ará baéden pura sikhein bayará mumunan inten mino sé ákona ineine iyá uno. <sup>26</sup> Mumunan uvintin ma kama ineine erin nain damúi mai ma Ban Anoni kádampín báken ben oo yaiiyiyá ein pinté me yumíáden erinten mino.

### 3

#### *Bara Khípan Akhempá Ma Namú Avúavá Afoká Inain Baya Ino*

<sup>1</sup> \*Timoti oe, ma ma siamenuna vaya yere vá afová ono. Ma vara ma mo kípano van iyantin maen mai namu avúava suron mi afoká inten mino. <sup>2</sup> Mai fara vara seyo, vanasi ano moniká inin kaúden beyan ma van nain nan manan iniyáken be amo siren au khakan inten mino. Máan tiyáken Tiyarafenu van tiren intiyan betíi anóe afóeni vaya átakharé uren betin ma susu siantan avúavá ída vantin maen inká Tiyarafenu kantasi ukhein danasinta van inian paen danasí inten mino. <sup>3</sup> Betimpin ída avábá in má ena nanin banta ma ume ampiantan avúavá bá ena nanin banta van kampun baya e sian more mere iyan betí

aurá ída kamaen dafisinten mino. Máan tiyáken kama avúavápín ída amusin bantin maen ena nanin banta ma ái amin nain nan manan ininten mino. <sup>4</sup> Betíi arona kayo avión namuro ayampin amiyan aau vain daná ino sen ída ovaren me ininten mino. Inká au khákan daná mamádantin édavyantin maen bara rákena amusin in avúava san moéken anunu iyáken Tiyarafenun me oyan aminten mino. <sup>5</sup> \*Betí ankan mai yan bukhafará anan monó té iyan mifo Tiyarafenu ma monó tiantan avúavápín ma ákona vain me oyan amé iyan mino. Máan avúaváká ma vain kéká sará péde nentasá bano.

<sup>6</sup> Máan kéká anon banasii mápin peren kuven iyáken aran nan avúavápó mai ma ída ákona vain nanin kayo ano ma umeí uren mai umampín bain kéká máka siyan mino. Máan tiyákan mai namu avúava sintá ano vetintá dafisiyan mino. <sup>7</sup> Máan kéká ano ena ena yamú auyen avúaváká ma monó tin dakhafé iyan mifo mai ída uron mi fura yaná afová iyan mino.

<sup>8</sup> \*Mai afova ma amiyain kéká ano Mosesi ma fura vaya siamiyákan ma Yanesin nú Yambresin nú ano oyampá baya siyaré ein an mi yiyan mino. Betíi ineine ano asuse ukhan ída fura mumunan mái van pasen Tiyarafenu ano vetin oyan amen mino. <sup>9</sup> Máan tein mifo ída ayáká báken mi Yanesin nú Yambresin nú amaniná ma afoká ein avúavá dákó intin ódaren betí ma variyá ein avúava san namun iyaré uno sen afová inten mino.

#### *Pori Ma Manáa Yoran Timotin Amein Baya Ino*

<sup>10</sup> Máan tinten mifo Timoti oe, séi ma siamiyaruna vaya vá tivútivá bá inká téi ma varano van tiádékun bain má éi afová ukha ono. Inká intéa mumunan masá bákerá ena avábá iyá kama

avúavá baré oriya rafu mai yeren afová ukha ono.<sup>11</sup>\*Téin ma uman timiyáká ma sí pinté erikheruna éi afová ukha ono. Inká téi ma Antioki safi Aikoniamu safi Ristará barura safi ma váké umampin oriyákun ma Bafan mano mai uman kayo finté siya iyá ein éi afová ukha ono.<sup>12</sup>\*Mai fura ino, Yisas Karaisintá mumunan iyáké kama avúavá ana variyá bano van muno ma sin nain kéká ano uman o yosinten mino.<sup>13</sup>Máan tinten mifo namu vanta kéká bá dan bukhafará ana ma kama ukhan ma vetin aúpín namu ukhein kéká bá anon kampun bayafó ena nanin banta siamen nóken betiyan deren mai kampun baya kaylorá mumunan inten mino.

<sup>14</sup>Máan tinten mifo mai ma afova variyaona yanasantá mai fura yaná ifo fákaan ákona ukhe vá bano. Para vara seyo, éi afová en nan mai fura vaya khayon tamiyaren mifo mai rasá ákona mumunan kaono.<sup>15</sup>Éi ma e anoni iyanan maen Tiyarafenui kantasí ukhein Bompon Dóki finté nan Yisas Karaisintá ma ákona mumunan esin ma Tiyarafenu ano evaránen aviran nain afován amikharen mino.<sup>16</sup>\*Tiyarafenui Aunan manon ma vara ráke vanta inin amíkan mi Tiyarafenui vompon dókifin minó baya uvamádan báken tetin tiya íkái kama yaná bá namu yaná bá afová iyá tiféuno. Mai vaya anon tetin maman puntáden puntákein avúavá ma varan afova simiyan mino.<sup>17</sup>Tiyarafenu ano mai aa sákéi minó damú ma kama yoran mana ma variyan ban avúavái maman ákona usintiyan mino.

## 4

<sup>1</sup> Máan tukhein nan mi mai ma maná damusí intin ma vei yafisin maman dákó ono van

iyáken ma eriven ayun para vain má púkein kéká bá ma yaimin nain Tiyarafenu vá Yisas Karaisin má avorái éin ákonaé tiamiyá uno.<sup>2</sup>Kama yamu safi áa namu yamu safi mai Tiyarafenui vaya fara vá tiame oriya vano. Ei vanasi vempáke sá maman puntariyákeya namu avúavá baran nafo sireya ará ákona uantiya vá ákona e kama afova vaya siameno.

<sup>3</sup>\*Mai fara vara seyo, maná damusí ma intin maen banasi ano funtákein baya ma siamiyasín ída ininten mino. Betíi anunu ánaín mi yakhafen mai amusin en inin nain baya ma siamin nain kayo van mi yosinten mino.

<sup>4</sup>Betí ankan mai fura vaya me oyan amiren maen maní baya kayo ánaín mi yakhafinten mino.<sup>5</sup>Máan tinten mifo ara ara avúavá ma yákó iyantiya afová ukhe vá bano. Bafani yorantá ma aí o yosin nan ída vá periyáke vanasi ma o aviádesin Karaisi vaípá ma erin nará ineno. Máan tiyáke Tiyarafenu ma amikhan nain doran ná dóan piseno.

### Pori Ma Kama Yorarí Uren Bei Miyan Nan Ave Ukhein Baya Ino

<sup>6</sup>\*Tiyarafenun ma susu siantan uvaini ma vanaein an dé pefái se saunan amikhé uno. Máan tukhékun tenti furin inka ádesí ukhen mino.<sup>7</sup>\*Téi kama siruvirí uré téin ma simikhá ein doran dóan kíparéi Yisas Karaisini Kama Vaya ma siamin doran ákona uan pákaré bá uno.<sup>8</sup>\*Máan tukhéi Bafan ma erin nain damúi funtákein avúavá póké me yaíden mi mai ma savaimpin o aní uvin ma amusin amiyanén mi siminten mino. Teya va siminten naifo mai ma funtákein avúavá bariyan ma veni erin nan ave

\* 3:11: Apo 13:14-52; 14:5, 8-20    \* 3:12: Mat 16:24; Yon 15:20; Apo 14:22    \* 3:16: Rom 15:4    \* 4:3: 1Ti 4:1    \* 4:6: Fir 2:17    \* 4:7: 1Ti 6:12    \* 4:8: 1Ko 9:24-25

ukhein kéká bá deren kama amusin aminten mino.

*Pori Ma Timotin Nan Aine Vá Ereno Seín Baya Ino*

<sup>9</sup> Aine vá aa van dosire se vaípa éreno. <sup>10</sup> \*Mai fara vara seyo, Demasi ano vara ráke yanasantia van anunu iyan pasen mi séin me ampiren Tesaroniká barufá orikan Karesensi mai Karesiá barafá oríkan inká Taitasi mai Daramesiá akhempá orin en mino. <sup>11</sup> Mágan tuvin mi Ruku anan téin má ban mifo vá erinte mae Makin masá avire éreno. Para vara seyo, véin ten tiyaen dorarí ukhen mino. <sup>12</sup> Tikikasin pefá tiantékun Efesasí barufá orikhen mino. <sup>13</sup> \*Éi ma eriyáke vá Troasí barurá Karapusintá tesi yante afuin me yavamádékun ban mifo mai vá bompon dóki kayo vá inká mairá ma sipisipi aurá ma uvanteruna vompon dóki ma yékun bain masá bare éreno. <sup>14</sup> \*Aeni fóké ma manáa yaná uvaran banta Areksanda ano séin uman timiyain baré intin Bafan mano mai avúavákai anona véin uman aminten mino. <sup>15</sup> Tetí ankan ma siamiyaruna vaya kayo van bái oyampá baya sé iyan mifo véin tasá dafíon ákona ono.

<sup>16</sup> Esé aráien ma kó daimin banta avorá tiviren oriyan maen minó ano séin me ampikharen mifo mana ano ída séin má baren mino. Mai avúavasí ma ein Tiyarafenu ano vetü ume ampiantano van mi inikhé uno. <sup>17</sup> Mágan tiyá umpo Tiyarafenu Kama Vaya siamintin minó ena anan nanin banta ano inino van mi Bafan mano séin má báken ákona simiren purin pintena siyaen mino. <sup>18</sup> Namu avúavá sintia ano ma séin dakhafiyan pintena Bafan mano siya uren kamaen tiviren orintí bei inaru yafisimpin oronté uno. Minó

damú Tiyarafenu avisá maman daní iyá bano. Mai fura ino.

*Porini Kípan Baya Ino*

<sup>19</sup> \*Pirisiran má Akuíran má inká mai ma Onesiforusini kéká bápin ná tenti simusin baya yesin orino. <sup>20</sup> \*Erastusi ano Koriní barurá e kharemí maé inká Trofimusin aí iyaimpin Miretusi barurá me afa é uno. <sup>21</sup> Mará aine erivesin ná iyón in damú afoká ino. Yuburusin má Pudensin má Rinusin má Krodian má inká minó mumunan kéká bá anon amusin baya yan éi vaonafá oren mino. <sup>22</sup> Bafan mano sretin aunampin bantin ná beni sarisari ano sretin má bano.

\* **4:10:** Apo 15:37-39; 2Ko 8:23; Kor 4:14    \* **4:13:** Apo 20:6    \* **4:14:** Ais 59:18; Rom 2:6  
\* **4:19:** Apo 18:2; 2Ti 1:16-17    \* **4:20:** Apo 19:22; 20:4; Rom 16:23

## PORI MA TAITASIN UVAMAN AMEIN BOMPON MINO (Taitasi)

### Taitasi Vompon Ma Uvanteí Pákenai Afova Vaya Ino

*Ma vompon ma uvantein banta ino.*

Baya varen orin banta Pori ino.

*Uvarein orana ino.*

AD sikisti-sikisi (66) fin mino.  
Mai maen Pori ma karavusi  
finte ma utúantán ma Romú  
baru me ampiren bei yorarien  
nóken mino.

*Ma vompon ma uvantein baru ino.*

Masedonia safi Efesasi safi áa  
Nikoporisi safi sen amino iyan  
mino. (Taitasi 3:12 fin ná  
onano.)

*Ma vompon ma uvaman  
amikhein banta ino.*

Ena anan pinte vanta ma Porin  
arona váken ma ven ayaen  
monó doraríen noré ein banta  
Taitasin mino. Máan tiyaren  
maen Kirití musóká o váken  
monó dorarí iyan mi uvaman  
amikhen mino.

*Nái ana vará ma vompon uvan-  
ten nafino.*

Taitasi ma Kirití musóká monó  
dorarí iyáken ma uman  
dosiyain nan mi ará ákona  
uanten inká manáa yorani aa  
aní uanten ukhen mino.

*Pori Ma Taitasin Uvaman  
Amein Baya Ino*

<sup>1</sup> Téi Pori Tiyarafenu miyan ída  
varan doran bantan báké Yisas  
Karaisin vaya varen mo siamin

\* **1:2:** Kor 1:27   \* **1:4:** Rom 1:7; 2Ko 8:23; Kar 2:3   \* **1:6:** 1Ti 3:2-7; 2Ti 2:24-26   \* **1:6:**  
Manáa afova vanta kayo ano mai van máa sikhen mino. Mana nanin máa vá barano. Ena afova  
vanta kayo ano mai van máa sikhen mino. Ída vá anasi máde ifá urú urú en nono. 1 Timoti 3:2,  
12 fin dere vá onano.

banta uno. Béi anon téin tisintéin mai ma veyan iyákein nanin bantai mumunan ayaé mo ákona uantéku Tiýarafenu fura sikhein baya vá avúavá bá afóvá uren béin ánaín bákurinten mino. <sup>2</sup>\* Ma fura sikhein baya ano mai ma Tiýarafenu ano fara van oriyan ban aunan amenté uno siren iyáantán bain nanin bantai mumunan má afóvá vá ákona uantanten mino. Pefá ída minó daná afoká ukhan mai ma fara van oriyan ban aunan timeno van tiádón baren mino. Tiýarafenu ano ída setí ankan kam-pun tisinté iyan mino. <sup>3</sup> Pefá ma véi siádkaré ein damú pura sen afoká íkan mi vei Kama Vaya maman amasí urái mai Vaya setí ankan minó nanin bantafin tian amá iyá uno. Mai ma setin evaránen tivíkein mai Tiýarafenu ano séin aní uren beni yorarí ino van tisintái ma Vaya minó nanin banta siamiyá uno.

<sup>4</sup>\* Taitasi oe, erasan tisinté momunán mano manaí ukha, éi sen tanin an mi yakhen ná ma vompon éin uvaman amé uno. Tetin Tifóe Tiýarafenu vá tetin ma siya uren tiviran banta Yisas Karaisin mái sarisari vá ará kusin masá éimpin bano.

*Taitasini Yoran Kirití Musóká  
Ban Mino*

<sup>5</sup> Erasan ma ída yóan kípakeruna yoran dóan kípiyákeya séi ma siamerunaí e vá minó kákón baru kayo fímpá Yisasini mumunan nanin bantai yoran banta kayo khaono van mai anarái éin Kirití Musóká me afaé uno. <sup>6</sup>\* Mai yoran bantai avúavá ano vanasi avorá puntákantin be aná bá ana vá puntáden bano.\* Béin akhafana ano yere vá monópín mana váken be anóe afóeni vaya ída átakharé uren ma fon iyani

avúavá ma ída variyantiya vá mai vá ódeya avirano.<sup>7</sup> Tiyarafenu ina yanáká ma yafisin bantai avúavá ano vanasi avorá puntáken ná bano. Béi ída vá bei aví daní uren ena aví maman bararasien ná inká ainen aran adé bain banta váken ná ída vá óen non naren ná aruvono van ino. Béi ída vá banasii ona kampun tiren baren ná inká moniká ana inin kaen ná ino.<sup>8</sup> Máan tin nafo ena nanin banta ano ma véin amápin ma erintin ná avábasá ino. Béi minó kama avúava san mana vá anunu iyáken kama ineine ánaní bákuriyan dafiken ná bano. Béi vei ineinerá dafiben ná puntáden kantásí ukhen bano.<sup>9</sup> Mai ma fura vaya véin pefá tiamicáha ein ná pákaaren mantaan ákona ino. Mantaan ma ákona uven maen puntákein bayafó ákonaen banasi siamiyáken ná inká mai ma fura vaya ma namuroí iyain kayo vá puntarano.

### *Kirití Musóká Ma Namu Avúavá Bariyain Kékái Vaya Ino*

<sup>10</sup> \*Para vara seyo, vaya ma átakharéin nanin banta kokhon mi Kirití musóká ban mino. Beni ana i vain baya ma sian pura yanasi uren banasi ma máka sen noin kéká kokhon mi van mino. Mai kéká pinté au khavin avúavákáti Tiyarafenu ano evaránen aviran-ten mino ma siyain kéká anon moéken pura ma seiní iyan mino.  
<sup>11</sup> \*Pura sikhein baya fókesá betí aa iyádesin ná betí avaya fákano. Para vara seyo, vetí ankan banasii ona vá moní bá kampun tiriyá barano van ída ma siameren baya e sian more mere iyan banasii van máden asuse iyan mino.  
<sup>12</sup> Kiriti kayo van kampun baya ana siyáken afá pon an den nóken avesara ana iyan ban kéká ino sen betí sakhanampa vanta kayo finté mana ano sian dákó ukharen

\* 1:10: 1Ti 4:7    \* 1:11: 2Ti 3:5-6; 1Pi 5:2  
1Yn 1:6; 2:4    \* 2:3: 1Ti 3:11

mino.<sup>13</sup> \*Ma fura sen afoká ukhein avúavá baya ifo vá mai avúavápín ma oferiyain kéká aufin ná ákona e vaya siamiyasin ná mai ma fura sikhein avúavá ánaní mana vá bákurino.<sup>14</sup> \*Yutan kayoi anafu aráoni maní bayará ma ákonaen tiamen nóken pura vaya ma yo ékiyain kékái vaya ída vá inino.<sup>15</sup> Ará ma avusese ukhein kayo ina yanásinta minó avusese ukhen mifo ará ma fainí ukhan ída mumunan iyain kayo ina yanásinta ída avusese ukhen mino. Betíi ineine vá kama yaná bá namu yaná bá ma afóváin asuse ukhen mino.<sup>16</sup> \*Betí ankan oo máa fókéi Tiyarafenu van afóvá ukhé uno sé iyan mifo vetíi avúavá ano ída véin bákuriyan mino. Máan tiyáken betí ankan Tiyarafenu van ída anunuen inian kaumpán uren baya átakharé iyain ída kanaíen mana kama avúavasí inten mino.

## 2

### *Pori Ma Taitasin Nan Puntákein Afova Vá Ameno Sein Baya Ino*

<sup>1</sup> Máan tukhen mifo Taitasi oe, intéa vaya ákonaen puntákein ban nafi mai vá banasi siamesin ná afóva uren dakhafino.<sup>2</sup> Anon banta kayo afóva amesin ná ída óen non nen asuse en nóken ná betíi ineinerá dafisino. Máan tiyáken inká kama vanta ino siyantin ena van anunu iyáken ná mai fura vayará mumunan ukhen ná mirenén uman eriyantin mantaan ákona ukhen ná bano.<sup>3</sup> \*Mai ma anon banta kayo siame-onaí ana e vá anon nanin kayo siamesin ná betíi ayúavá bá inin onan má pura sen Tiyarafenurasá dantin bano. Máan tiyáke ída vá baya uvaman more mere en ena nanin banta aran amiyáken ída vá áintin óen non naren ma óen in anunu ano vetíi inintá dafisino. Mai ma kamaen puntákein avúavá ana vá ena nanin banta aní ino.

\* 1:13: 2Ti 4:2    \* 1:14: 1Ti 4:7    \* 1:16:

<sup>4</sup> Máon tiyáken ná auyen nanin kayo vá kama afova amintin ná be avafu akhá avábá ino. <sup>5</sup>\*Inká betí ankani ineinerá dafiben Tiyarafenu avorá puntáken ban ná mápin kamaen dafisiyáken kama avúavá ana variya ná betí avafunái aránaópasá oriyán bano. Betí ankan mai avúavasí ma intin maen minó nanin banta aňo Tiyarafenui vayará ída oyampá baya sinten mino.

<sup>6</sup> Máon mana e vá minó pumara vanta afova amire ayaesin ná betíi ineinerá dafian ákona ino. <sup>7</sup>\*Minó danasí ma inonafin ná ei kama avúavasá aniesin ná mai fumara vanta aňo ódaren ná mai ánaín mana vá dakhafino. Inká Tiyarafenui vaya ma sian afova ma ameno van éi fúkekhhokhe vá ineine ure funtáde fura vaya ana vá tiameno. <sup>8</sup>\*Éi ma funtákein baya ana ma siyasin maen maifin ída namu ukhantin banasi aňo oman afoká inten mifo namuroi ma iyain kayo aňo vetí ma siyain baya van ayave uren ída setin toyampá baya sinten mino.

<sup>9</sup>\*Ída miyan baran doran banta afova amesin ná betíi yafisin banta aránaó báken betíi yoran bariyan ná doran nan ma siantantin ídq vá evaránen anona vaya sino. <sup>10</sup>Inká ída vá betíi yafisin banta kayo ina yanásinta umoyan barantin ná betin oman pura yorarién kéká ino vá tino. Máon siyantin ná minó daná ma varan nain mano setin ma Evaránen Tívikein Tiyarafenui vaya ma ena nanin banta aňo iniyáken kama vaya ino sinten mino.

<sup>11</sup> Para vara seyo, Tiyarafenui sarisari aňo ma vanasi ume fintena ma evaráne avíkein aa inka minó nanin bantafin dákó en mino. <sup>12</sup>\*Tiyarafenun ma oyan amin avúavá bá inká ma

vara ráke namu avúavá san ma anunu uren mai ánaín bákurin má ifá inon tiren mi mai sarisari ano saréa setin tisimiyan mino. Tiretíi ineinerá kama e yafibe nóke ákona e mantakhe vá Tiyarafenu van peran kékásá bano sen tetin tisimiyan mino. <sup>13</sup> Mai ma setisi kákán Yisas Karaisi aňo ma Evaránen Tívikein Tiyarafenu ma vei kakhampin ma afoká inain nan tetí inikhé timusin iyá ave ukhé tiféuno. <sup>14</sup>\*Mai ma setin nare siren ma ve au fóké ma namu avúavá pintena ma miyaní uren ma setin evaránen tivíden tesé uan avusese uren ma ve inaí ukhein mai nanin banta aňo kama avúavá ana varano van mi iyan mino.

<sup>15</sup>\*Máon tukhein nan mi Taitasi oe, mai ma éin tiameruna vaya kayo vá ena ena yamú minó nanin banta siamiyáke vá baya ma átakharéin kéká sa ákonae funtarano. Mai ákona éimpin ban mifo ída vá áesin éi ma sinona vaya van mana nanin banta aňo oyampá baya sino.

### 3

*Pori Ma Vanasi Van Puntákein Avúavá Ana Vá Barano Sein Baya Ino*

<sup>1</sup>\*Banasí evaráne siamesin ná kamarién má beni ánon banta kéká bái aránaópa sa báken betin oo yaiiyian ná kama avúavá barano van utaaren ná bano. <sup>2</sup>Inká ída vá ena oyampá baya siren aruve asive iyáken ná bempáke sa ará kusen bano. Betí ankan puntáden báken ná ena nanin banta fura avúavá aní ino.

<sup>3</sup>\*Pefá tetin má dere vaya átakharé iyáké maka siré óen avúavapin timusin dosé nökun mai aňo setin damuádá baré tiféuno. Maifin ma vá tiféun maen namu avúavá bá ume avúavá bá aňo setimpin bíkakhá ena ina yana san

\* 2:5: Efe 5:22   \* 2:7: 1Ti 4:12   \* 2:8: 1Pi 2:15   \* 2:9: 1Ti 6:1   \* 2:12: 1Yn 2:16  
 \* 2:14: Eks 19:5; Diu 7:6; Isi 37:23; Kar 1:4; 1Pi 2:9   \* 2:15: 1Ti 4:12   \* 3:1: Rom 13:1-7;  
 1Pi 2:13-14   \* 3:3: 1Ko 6:9-11; Efe 2:1-2; 5:8   \* 3:4-5: 2Ti 1:9; Ibu 10:22

tiran niyáké ben ará namu uantan maran iyaré uno. <sup>4-5</sup>\*Máan tiyaré tifé umpo setí ankan ma Evaránen Tivíkein Tiyarafenui anunu vá avábá bá ma afoká ein nan mi véi setin evaránen tíviken mifo seti ma funtákein avúavá bariyare é tiferuna rasa ino. Ída ino. Bei arunanápói setin evaránen tíviken mino. Tiyarafenu ano Kantá Aunan pói setin tesé uren evaránen maman auyení urá bá tiféuno. <sup>6</sup>\*Tetin ma Evaránen Tivíkein Yisas Karaisin pintéi uaren Tiyarafenu ano vei Kantá Aunan ída fákán tetin timaniná banaen mino. <sup>7</sup>Máan turanti mae Tiyarafenui sarisarirá tetin nan ída umeí ukhein mino siren para van oriyan ban aunan nan ma iyátintan bain ída aa iyarantí barano van ma ave ukharé eruna kasaé tetí ankan bará tifanté uno. <sup>8</sup>Taitasi oe, ma ma éin tiameruna vaya vará pura sen puntákein baya ino vá teno. Mai vará éi ma vaya fara e siame oriya vasin ná Tiyarafenurá ma mumunan iyain kéká ano yafíben kama avúavá ana vá barano. Mai vaya ánaín ma vákurin nain kéká mai vaya ano kama ayairí inten mino.

### *Porini Kípan Baya Ino*

<sup>9</sup>\*Máan tinten mifo mai ma ída kama ineine van ma asuse vaya kayo sen nóken ma vanasii ineine máden namu iyan ma inká be anafu aráon aví para vano van ma séi ven ana ayavéno uno siriyan ma vetí man bayará bákuriyán ma aruve asive en noin kéká ádé ídq vá orono. Mai fara vara seyo, mai vaya kayo maen asuse vaya kayon báken mai ano ídq kanaíen éin aya inten mino. <sup>10</sup>\*Manáa uman afoká inafo vá mai ma nóken betfí vayará ma ákona e nóken kam-pun baya kayo fóké ma ena monó kéká arápinien ma noin kéká ma

siamesin ída ininti inká evaráne enádá tiamesin ma ída ininti mai ída vá oo aí iya mairasá mo ifá ano. <sup>11</sup>Éi afová ukha ono. Máan bantai avúavá ano ída funtákan bei umefin bákan mai anon béin daimiyan mino.

<sup>12</sup>\*Ínaiimpáké ma Atemasin nafi Tikikasin nafi ma siantékun ma eni varu varen eni yoran aya ono van ma éi vaqnará ma o uninta-tya éi aine vá aai ureya Nikoporísí barurá ereno. Mai fara vara seyo, iyon aú ma afoká inaimpin mai varurái o vanté unon té inikhé uno. <sup>13</sup>\*Aporosin nú man baya afova vanta Senasin nú ma mairá onóben ma intéa yanasará inten nafi mai éi ayampaí ure vá mai yanasantia ayaesin ná mamaren orino. <sup>14</sup>\*Tetin má ma monó tiyain nanin banta ano kama avúavá ana ma varen oriyan bani ana má afová uren maen mi yunan má ona vá ma ída van nain kéká kasaien aya iyáken asese nanin banta anan banßen mino.

<sup>15</sup>Téin má ma minó mumunan nanin banta ma vain mano amusin baya siádákan éi vaípá oren mino. Taitasi oe, éi vá Kirití ma mumunan nanin banta váken tetin nan anunu iyain kékásá amusin baya siameno. Tiyarafenui sarisari ano vá tiretí ankan má bano.

\* 3:6: Apo 2:17-18 \* 3:9: 2Ti 2:14, 16 \* 3:10: Mat 18:15-17 \* 3:12: Efe 6:21-22; Kor 4:7-8 \* 3:13: Apo 18:24; 1Ko 3:5-6 \* 3:14: Efe 4:28

# PORI MA FIRIMONIN UVAMAN AMEIN BOMPON MINO (Firimoni)

## Firimoni Vompon Ma Uvanteí Pákenai Afova Vaya Ino

*Ma vompon ma uvantein banta ino.*

Baya varen orin banta Pori ino.

*Uvarein orana ino.*

AD sikisti-tu (62) fin mi uvan-ten mino. Korosike vompon má Efesasíke vompon má ma Tikikasi varen orein pimpá ino.

*Ma vompon ma uvantein baru ino.*

Romú ma karavusií ukhen maen karavusi namumpin mi uvan-ten mino.

*Ma vompon ma uvaman amikhein banta ino.*

Korosí baru ráke vanta Firimonin mino.

*Nái ana vará ma vompon uvanten nafino.*

Firimonin ina urantin miyan ída van doran banta Onesimasi ma Karaisimpin mumunan afá aváení ukheini ume ampiantano van mino. Ma vompon mano ume ampiantan má avábá in máisian amá ukhen mino.

*Pori Ma Amusin Baya Ino*

<sup>1</sup> Téi Pori ano ma Yisas Karaisini Kama Vaya ma siamiyarunarái karavusifin báké erasan tifá Timotin mái ma vompon uvaman éi Firimonin ma verasanti mana yoran banta van ná ma moéké tinunu iyarunan amé uno.

\* **1:2:** Kor 4:17; 2Ti 2:3 \* **1:7:** 2Ko 7:4 \* **1:10:** 1Ko 4:15; Kor 4:9 \* **1:11:** Kiriki vaya finté ma Onesimasin ne ma siyain mai Kamaen Ayain Banta e sikhen mino.

<sup>2</sup> \*Inká tetin tiyofin Afian má tetisi mana yoran banta Akipusin má inká mumunan nanin banta ano ma en amápin átaru uven monó tiyain kayo vái ma vompon uvaman amé uno.

<sup>3</sup> Teti Sifóe Tiyarafenu vá Yisas Karaisin má ano vá tiretin tarisari uren ná ará kusin amino.

*Pori Ma Tiyarafenun Tusu Sianten Amúkein Baya Ino*

<sup>4</sup> Téi ma éin nan timúkuantiyá maé Tiyarafenun ena ena susu siantiyá uno. <sup>5</sup> Mai fara vara seyo, ena kéká ano éi ma Yisas Karaisintá mumunan iyáke ma mumunan nanin banta van anunu ure ma aya iyaona van tisimí iniré uno. <sup>6</sup> Éi ma mumunan iyaonaén ma mumunan iyain kéká bá ma monó tesin maen mai ma monó tin avúavápin ma éi ákona iyaonaén mai kayo ano ákona iyantiyan mai ma Tiyarafenu ano ma kama yanásinta setin timiyain afová inono. Mai avúavá aésin afóka intin ná Karaisi kákan bi barano van mi ákonaé timúkuantiyá uno. <sup>7</sup> \*Éi ma mumunan nanin banta anunu iyaona anon téin kákan timusin má tirá ákona usintan má timiyan mino. Mai fara vara seyo, éi sen tifá anon mumunan kékái ará ku-siantiya nái ma vaya siyá uno.

*Pori Ma Onesimasi Ano Aya Ino Van Ina Ein Baya Ino*

<sup>8</sup> Mai van mi Karaisin avíká kasaé éin duvun ékuya kama avúavasí inon naren mifo <sup>9</sup> se nan ma anunu iyaona van mi fara inaúan iniyá uno. Anon banta Pori ma Yisas Karaisini yorantá karavusifin bain mano ma inauádein bompon ná barano.

<sup>10</sup> \*Ma karavusi namumpin ma séi monó tiyákun ma Onesimasi ará baeren mumunan bantaí ein manon ten tanin uró an dakhái ei kama avúavá bén aní esin onano

van mi séi inaé uno. <sup>11</sup> Pefá Onesimasi\* ano ída kamaen ayainton karan orikharen mifo saréa erasan kama uron mi en tiya inten mino.

<sup>12</sup> Te súkákéi véin nan tinunu iyákéi e vaonafá evaráné tianté kun oriyan mino. <sup>13</sup> Banasi ma Kama Vaya siamiyarunará ma karavusií ukherunafin béin ayópá é kun eni varu varen téin tiya ino van inikharé uno. <sup>14</sup> Inikhé umpo éi ma eyo sesirá béin ayópá ono van mi iyá uno. Ída éin duvun onté umpo ei anunurá tiya ono van mi inikhé uno. <sup>15</sup> Éin má típá bano van mi sanáa afará éin me ampireñ karan orikharen mifo mai van iniya vá evaráne avirano van mi inikhé uno. <sup>16</sup> \*Béi ída miyan baran doran banta ana vanten mifo séin tiran nakhein tifá tiváenii ukhen mino. Mágan tukhein nan mi eni miyan ída van doran bantaién maen inká eni mumunan afá aváení en intéi véin nan moéke anunu inono sé inikhé uno.

<sup>17</sup> Éj ma sen nan téi má mana yorarí iyain banta ino ma se ininte vá mai séi ma orékuya ma sivábá inona máon uron ná eya véin avábá ure vá amusin uantano. <sup>18</sup> Inká éin uman amen ná en nina yaná umoyan baren ná ukharé inten nafi mai yanasingta anona evaráné amenté uno. <sup>19</sup> Téi Pori anon te siyampóké ma vompon uvaré uno. Mai ma véi mantáin nain danasinta séi anon anona evaráné amenté umpo éin ma ayaékuya Yisas Karaisintá ma mumunan ukheona yina maen éimpin para van mifo mai van ída inantenté uno.

<sup>20</sup> Tifa soe, erasan Yisas Karaisin ninan bá umpo Bafan avíkasá téi ma inaerunaí esin ná tirá kusi sintano. <sup>21</sup> Téi ma ma vompon uvádé inaeruna fákena éi moéke kama avúqva suron mi varan nono sé iniyá uno.

<sup>22</sup> \*Téi ma iniyaruna mai Ti yarafenu ano siretí ankani amúkin eyo sintí maé tiretin má evaráné o vanté umpo mana karafaran ná ten tina funtáádano.

### *Pori Ma Kípan Amusin Baya Sein Mino*

<sup>23</sup>\*Yisas Karaisini yorantá ma sen má karavusií ukhein banta Epafrasi anon ma vompompin éin amusin baya amen mino. <sup>24</sup>\*Ten má ma mana yorarí iyain banta kéká mai Maki má Aristarkusi má Demasi má Ruku má ano yeren amusin baya amen mino.

<sup>25</sup> Bafan Yisas Karaisini sarisari ano vá eni aunampin ná bano.

## **IBURU KEKÁ MA UVAMAN AMEIN BOMPON MINO (Iburu)**

### **Iburu Vompon Ma Uvanteí Pákenai Afova Vaya Ino**

*Ma vompon ma uvantein banta ino.*

Ída mana ano afová ukhen mino. Ma vompon ma uvantein banta maen Timotin arona váken Tiyarafenui Feyante Vompon Dóki Kayo afová ukhein manon uvanten mino.

*Uvarein orana ino.*

Yutan kayo vá Romú kamanin mái aruvín ída araí ukhan AD sikisti-faipi (65) fin mi uvanten mino. Yutan kékái aruvín ma AD sikisti-sikisi (66) ráké seventi-tari (73) rá ma mo kípein aruvín ída araí ukhan inká Yerusaremí kákán baru vá dere ída aren taren ira saman káukan mi ma vompon uvanten mino.

*Ma vompon ma uvantein baru ino.*

Romú barurá ino sen iniyan mifo o siádan baya ano siyáken Itarí barafin ne sikhen mino. (Iburu 13:24 fin ná onano.)

*Ma vompon ma uvaman amikhein kéká ino.*

Yutan kéká pinté ma sanáa ano Yisasintá monó tiyan mumunan iyákan ma Iburu kéká ino siyan ma vompon uvaran banta ano afová ukhan ma mana akhempá baré ein kayon uvaman amikhen mino. Mai kayo van Yerusaremí baren ne

sen iniyan mifo manáa ano siyáken Areksandriá se sen Korini se sen Efesasi se sen inká Romu se sen iyan mino. Esé araí in táke Karaisintá mumunan nan betin aren asen iyákan mai ma araí in táke ma ákonæn eriyá ein avúavá me ampiren Yutan kayoi ara ara kampun afova ánaín bákurirí iyaimpin mi ma vompon uvaman amen mino.

*Nái ana vará ma vompon uvanten nafino.*

Yutan anan pinté ma Yisasintá monó tiyan mumunan iyain kékái aní iyáken Yisasini ákona anon man baya vá sakhanampa kéká bái vaya vá esantakhen ne sen aní iyáken mi sian amá ukhen mino.

*Tiyarafenu Anin Mano Ma Enisori Kayo Esantakhein Baya Ino*

<sup>1</sup> Pefá Tiyarafenu ano kokhon dádái ara ara aa sáké uaren mi sakhanampa vanta kayo oo ráké tetin tinafu siráon baya siamikharen mino. <sup>2</sup> \*Máan tukhan mifo ma vara kípan damú ádesí iyan mi ve Anin pinté uaren tétin tisimikhen mino. Tiyarafenu ano ve anin pinté uaren bara vá inaru vá inká minó danasinta vá uváden béin iyáantákaren mi minó bei yanásinta mai iyampon amikhen mino. <sup>3</sup> \*Máan tukhan mai iyampon mano Tiyarafenui kakhán aúpin mi váken minó béis ma variyain avúavá máan aní iyan mino. Bei ákona vaya fókéi ma varafin ma vain danasinta ákona uanté iyan mino. Tetinti ume sesé uré avusese usintano van ma e fúuren mantaven mai oyampákéi ve afóen ayan kurompá ma vain Kin karáká inarufá un kumamen kákán bí baren mino. <sup>4</sup> \*Máan ma ein avúavá anon anien mi ve Anin manon enisori kayo esantakhan

\* 1:2: Yon 1:3    \* 1:3: Yon 14:9; Kor 1:20; Ibu 8:1    \* 1:4: Fir 2:9

betí ankan ben aránaópái van mino. Mai ma Tiyarafenu ano enisori kayo esantakhe ne siren amikhá ein bí an den enisori kayo aví esantakhen mino.

5 \*Mai van mi Tiyarafenu ano Yisas Karaisín nan ma máa sikharé ein baya mai ída mana enisori van tikhen mino.

“Éi sen tanin baná taréa en afóení é uno,” *Íbo 2:7*  
Inká Tiyarafenu ano evaránen máa sikhen mino.

“Téi ven afóení é kun inká béis sen taniní inten mino.” *2Sa 7:14; 1Kr 17:13*

6 \*Máa sikharen Tiyarafenu ano ve anin eséke iyampon ma aviren barará nanin banta ma me amusin amiren maen evaránen máa sen mino.

“Áesin ná Tiyarafenui enisori kayo ano véintá ana vá monó tino.” *Diu 32:43*

7 Mai van mi Tiyarafenu ano vei enisori kayo van máan mi sikhen mino,

“Uva an den inká ira anamuná ma ein an den ukhen mino.” *Íbo 104:4*

8 Máan té iyan mifo ve Anin máan mi sen tiamen mino,

“Tiyarafenu oe, eni yafisin ákona ano fara van oriyán banten mino.

Eni funtákein avúavá anón bánsirá kama yafisirí inten mino.

9 Funtákein avúavá san manan éi anunu ureyan namu avúavá san afon karíen nan, Mai van mi Séi eni Ayarafenun báké éin avídéi ena kheká esantaré dan uron kaúdé amusin uverifó en ánompín bana é uno.” *Íbo 45:6-7*

10 Inká evaránen máa sikhen mí, “Bafan noe, esé araiintá ma ma vara uvarano van inikháré eona,

mai ayontá ma vain danasinta en ayan afun mi van mino.

11 Mai yanásinta ano o khípanten mifo éi fara va oriya van nono.

Mai yanásinta ano feyante vuí daná ma kafá kafá einí inten mino.

12 Peyante vuí daná ma yádá einí eyan mai yanásinta yádáin nono.

Mai yanásinta ano feyante vuí daná ma kafá kafá einí inten mifo éi mai ma vanonará para váke ída ayokhuvín inono.” *Íbo 102:25-27*

13 Tiyarafenu ano ída mana enisori van be anin nan ma máa seiní ukhen mino,

“Ten tiyan kurompá kumantesirá eni namuro kayo maman bararasí uré en arantan kain karasí uantanano.” *Íbo 110:1*

14 \*Máa sikhen mifo enisori kayo mai yoran banta máan ban mino. Tiyarafenu ano ma evaránen aviran nain kékáká ma yafíken aya inain aunan kayon bákán mi siantan erikhen mino.

## 2

*Kama Vaya Ma Oyan Amiyaren  
Ma Uman Baran Nain Baya Ino*

1 Máan tukhein nan mi setí ankan ma mumunan iyá tiferuna me ampen nampo mai ma funtákein baya ma sisimí iné tiferuna rasá dafian ákona ótifano.

2 \*Para vara seyo, Tiyarafenu ano ma enisori kayo oo ráké uaren ma sikháré ein mai fura vaya kayon bákán banasi ano ma mai vaya átakharé uren ída yakhafein kéká ano uman bariyaren mino.

3 \*Máan tiyaréin mi setin ma evaránen tiviran baya ma Bafan mano sian dákó uran ma inikháré ein kéká anón puran tino sen tetin tisimiyán mino. Mai ma setin ma evaránen tivíkein baya

\* 1:5: Apo 13:33 \* 1:6: Rom 8:29 \* 1:14: Íbo 34:7; 91:11 \* 2:2: Kar 3:19 \* 2:3: Ibu 10:29; 12:25

ma átakharé onté mai intesá uré karan oró tifante rafuno.  
<sup>4</sup> \*Tiyarafenu ano enará ukhein avúavá bá inká aní daná kayo vá pói aní iyáken maen inká bei anunu fintéi Kantá Aunan amusin amídú ukhen mino.

*Yisasi Ma Uman Baren Purein  
Manon Ma Setin Evaránen Tívíkein  
Baya Ino*

<sup>5</sup> Mai ma ínaimpá erin nain bara van ma siyá tiferunará enisori kayo ano ída yafisinten mino.  
<sup>6</sup> Máan tinten mifo Tiyarafenui bompon dókifin máa sikhen mino.  
 “Inte anarasá banasi van iniya vákeya,  
 inká pará banasirá dafisiyá ba fono.

<sup>7</sup> Manáorái véin maman enisori kayo aránaópá denan baré iyan,  
 kákán bí bá kakhan má póké bén kamamosí uantádeya,  
<sup>8</sup> minó daná ben aránaópá kae ono.” *Íbo 8:4-6*

Tiyarafenu ano minó daná maman ben aránaópá kaúdan beni yafisin akhempá mana yaná ano ída van mifo saréa ma oné tiféku maen mai yanasinta ano ven aránaópá ída van mino. <sup>9</sup> \*Máan tukhen mifo Yisasin ma maman enisori kayo aránaópá dan ma manáa rá baré íkon ma Tiyarafenu ano kákán bí bá kakhan má pó ma véin kini kamamosí uantákein mi oniyá tiféuno. Mai fara va ino. Tiyarafenui sarisari áupin mi Yisas Karaisi ano ma vara ráke nanin bantai ara ara uman baren púbin mino.

<sup>10</sup> Mai ma minó daná uváden maman dan ma kamaen doriyain Tiyarafenu ano funtákein avúavá baren mi kokhon nanin banta avíden béisí ma kákán bí manteinien betin amen mino. Yisasin ma uman bareintái Tiyarafenu ano vanasi aya urev evaránen avian

kakhantá kaen mino. <sup>11</sup> \*Máan tukhein nan mi Yisas Karaisin má inká mai ma maman kantasi uantákein kéká bá Aföe mai mana anan ban mino. Mai ana van mi Yisas Karaisi ída ayave van inton kasaen te sun tifá kayo ino sen ariyan mino. <sup>12</sup> Mai van mi Tiyarafenui vompon dókifin béisí máa sikhen mino.

Te sun tifá tiváeyan avorá eni kákán bí tian dákó onté uno, monó nanin banta ayorá í diyáké en aví daní onté uno.” *Íbo 22:22*

<sup>13</sup> Máa siren evaránen temí, Tiyarafenurá anan tesi inin kaonté uno,” *Ais 8:17*  
 siren evaránen temí,  
 “Tiyarafenu ano ma simein iyam-  
 pon kayo vá masi vá uno.” *Ais 8:18*

*Yisasiñi Furin Mano Ma Ban  
Anoni Ákona Maman Bararasí  
Ukhein Baya Ino*

<sup>14</sup> \*Tiyarafenu akhafana mai amasi vá nare vápói uvantein pasen Yisas Karaisi yere mai avúavápin mi yorun afoká uven mai yukhafa vái varen mino. Barará banta an daven ma véi furein manon purini ákona ma fákakhá ein Ban Anoni ákona maman bararasien mino. <sup>15</sup> Yisas Karaisi ma mai avúavásí ein manon mai ma furini akhokho ano ma vanasi yamuádan báken ma veni miyan ída varan doran nanin bantai ma ukharé ein mi útúanten mino. <sup>16</sup> Para vara seyo, enisori kayo aya ono vara véi eren naifo, Abaraamun anavasin aya ono van mi erikhá mai afrová ukhé tiféuno. <sup>17</sup> Máan ma ein manon tetin maman be aun afasí urev mi Tiyarafenu avorá tarisari vá puntákein monó ánon banta kékáí ánon bantai uven béisí íkon uan amintin banasii ume ampiantaten mino. <sup>18</sup> Akhenókain uman béisí varen afrová ukhein pasen mai

\* **2:4:** Mak 16:20; 1Ko 12:4, 11    \* **2:9:** Fir 2:8-9    \* **2:11:** Mat 25:40    \* **2:14:** 1Yn 3:8;  
 Rev 12:10

uman ma varan nain kéká kasaen  
aya inten mino.

### 3

#### *Yisasi Ma Mosesin Esantakhein Baya Ino*

<sup>1</sup> \*Máan tukhein nará kantasi ukheona sifa tiváeyan má tiyó má bá ano ma inarufá orono van iyaona kéká ano vá ineno. Tiyarafenu vaya varen orin banta Yisasi ma monó ánon banta kayoi ánon bantaí ukhen mino ma siyáeruna vará ineno. <sup>2</sup> Mai fara vara seyo, Mosesi ma Tiyarafenu oo yaiyen puntáken beni vanasirá dafiká ein an mi yen Karaisi ano mai ma véin aní uren tiantan erikhá ein Tiyarafenu oo yaiyen puntáden doren mino. <sup>3</sup> Mana vanta ano ma kama ukhein namun uváden maen mai vanta anon kákán bí baré iyan mifo mai namun mano ída kákán bí baré iyan mino. Máan manan en mi Yisasi anon Mosesin esantaren kákán bí baren mino. <sup>4</sup> Mai fara vara seyo, mana mana namun ma vain mai mana mana vanta anon uvanten mifo Tiyarafenu anon minó danasinta uvanten mino.

<sup>5</sup> \*Mosesi ano Tiyarafenu yoran bantaí ukhen mi véin oo yaiyen puntáden beni vanasirá dafiken maen inká íncimpáké ma Tiyarafenu ano fura vaya ma maman dákó inain avúavái aman manon an mi yakharen mino. <sup>6</sup> Máan tiyaren mifo Tiyarafenun Anin Yisas Karaisi anon ben oo yaiyen puntáden báken ben amáká dafiken mino. Máan tukhái mai ma Karaisi ano e siviran nain nan ma simusin iyáké ákonaé ave ukhé tiferuna kéká ano ven amá an mi yakhé tiféuno.

#### *Ída Ma Ará Baeran Nain Kéká Año Ma Uman Baran Nain Nan Ma Amaan Baya Sein Mino*

\* **3:1:** Nam 12:7; Ibu 4:14; 7:26    \* **3:5:** Nam 12:7; Diu 18:15-19    \* **3:8:** Eks 17:7; Nam 20:2-5    \* **3:11:** Nam 14:21-23    \* **3:13:** "Taráe" e ma sikhein mai í Bompon 95:7-8 fin ma máa sikhein mino. "Tireti ankan ída vá Isarerí kéká ano ma Tiyarafenu vaya átakharé uren ma vetí ará pákaan ákona iyá einisá ono."

<sup>7</sup> Máan tukhein nan mi Kantá Aunan mano máa siyan mino, Taráe vá beni vaya ineno.

<sup>8</sup> \*Mai ma kámá barafá ma vanasi ano Tiyarafenu vaya átakharé uren, béin akhenóka uan oniyá ein an deya ída vá tiretí ará pákaan ákona ono.

<sup>9</sup> Tiretí ankan anáuyan mai foti (40) oranarái enará ukhein daná aní ékun oniyáken mifo séin akhenóka uan oniyaren mino.

<sup>10</sup> Máan tiyaimpin betin nan tiran nan uantádé máa sé uno, Minó damú téi ma siameruna vaya me oyan amiren maen ída sen too yaiyiyan mino.'

<sup>11</sup> \*Máa siré tiran má ákona vayafó máa sé uno.  
'Betí ankan mai séi ma sivikiyaruna varufin ída uron mi orinten mino.' *Íbo 95:7-11*

<sup>12</sup> Máa seruna ifo mumunan tiyofi sifá tiváeyan noe, máan tiyare mana ano aúkáké ída mumunan esin mai avúavá ano sireti ankan aviren tavi aípá orintiya aunan bain Tiyarafenun me ampin nampo yaffian ná ákona ono. <sup>13</sup> Máan tin nompo "Saréa" ana e ma sikhantiya ena ena yamu sá ben ákona uantan maran iyasin ná ume ayúavá ano sireti inéine ída e yarifanti vá Tiyarafenun ída me oyan ameno. <sup>14</sup> Mai fara vara seyo, mai ma esé araié mumunan é tiferunaí é ma Tiyarafenurá ákona inin kauré ma oriyá maé mai Karaisin mái manafin dorá tifanté uno. <sup>15</sup> Máan tonté tifé umpsó ákona vaya ma sikhein ída vá áun ono.

"Taráe vá beni vaya ineno.

Tiretí ankan ída vá Isarerí  
kéká ano ma Tiyarafenui  
vaya átakharé uren  
ma vetí ará pákaan ákona iyá ein-  
isá ono.” *Ibo 95:7-8*

<sup>16</sup>\*Intéa kéká anó Tiyarafenui  
vaya inikhen mifo mai vaya  
átakharé ukharen nafino. Mai ma  
Mosesi ano Isipiké iyanen erein  
kéká ino. <sup>17</sup>\*Inká intéa kékásá  
Tiyarafenu ano foti (40) oranara  
aranan quantákaren nafino. Mai  
ma kámá barafá umei uren ma  
fúan kipein nanin banta ino.  
<sup>18</sup>Inká Tiyarafenu ano intéa kéká  
sará ída senti siyíkan barufin o  
feran nono sen ákona vaya sein  
nafino. Mai ma veni vaya átakharé  
iyá ein kéká san mi sein mino.  
<sup>19</sup>Máan tukhá in mi veti ma ída  
mumunan ein avúava san bei  
avíkan barufin ída orinten ne  
sikhái afová ukhé tiféuno.

## 4

### *Tiyarafenui Vanasi Ano Ma Avíkan Baran Nain Baya Ino*

<sup>1</sup>Tiyarafenu ano ma vei avíkan  
barufin orino van ma iyáantákein  
mai fara vain tiretin pinté manáa  
ano maifin ída orin nona van  
mumpo setí ankan dafian ná ákona  
ukhesá bátifano. <sup>2</sup>Mai fara  
vara seyo, Tiyarafenu ano ma  
avíkan baru útaádan baini Kama  
Vaya ma vetí ankan tiamikharé  
einén tetin má deren tisimikhen  
mifo Tiyarafenu ano ma siamein  
bayará ída mumunan íkan mi  
mai ano vetin ída ayaen mino.  
<sup>3</sup>\*Tiyarafenu vaya iniré ma mu-  
munan iyá tiferuna kéká ano anan  
beni avíkan barufin oró tifanté  
umpo mai vayará ma ída mu-  
munan inain kayo van máan mi  
sikhén mino.

“Téi sesi sirananá bái fura ódino  
siré té uno.

‘Mai kéká ano ída uron mi senti  
avíkan barufin orinten  
mino.’” *Ibo 95:11*

Máan tinten mifo esé ma ma  
vara uvareintái veni avíkan baru  
útaádan ban mino. <sup>4</sup>Mai fara vara  
seyo, yan manápá ifo afápá kan  
un kádan damusan béis monó bom-  
pompín máa sikhén mino. “Ti-  
yarafenu ano yoriyá ein nan dan  
manápá ifo afápá kan un kádan  
damusi íkan mi avíken mino.” *Ese  
2:2*

<sup>5</sup>Inká esé ma seruna vompon  
anafin Tiyarafenu ano máa sikhén  
mino. “Mai kéká ano ída uron mi  
senti avíkan barurá orinten mino.”  
*Ibo 95:11*

<sup>6</sup>Tiyarafenui avíkan baru ma  
vain mai vanasi ano orin nain  
mifo gefá ma mai kama vaya  
siamin ma átakharé ein kéká ano  
mai varufin ída oren mino. <sup>7</sup>Máan  
tiyaimpin Tiyarafenu ano vei  
avíkan barufin ma orin ená damú  
maman kaúden mai damusan  
taréa en tikhen mino. Pefá ma  
sikháré ein baya máan Devitin oo  
ráké uaren máa sikhén mino.

“Taréa ma véin avaya ininteya,  
ída vá e ará pákaan ákona  
ono.” *Ibo 95:7-8*

<sup>8</sup>\*Mai fara vara seyo, Yosua  
ano Isarerí kéká iyanen Kenaní  
barafin mo khaúden avíkan amen  
bare intin Tiyarafenu ano ída  
ená damusan baya siádan té ein  
ten mino. <sup>9</sup>Máan tukhan mi  
Tiyarafenui vanasi ano ma avíkan  
nain damú ma iyáantán bain  
mano fara ave ukhen ban mino.

<sup>10</sup>\*Mai fara vara seyo, Tiyarafenui  
avíkan barufin ma ódin nain kéká  
ano véi ma yóan kíporen avíkein  
an den mai avíkan o varanten  
mino. <sup>11</sup>Máan tukhein nará mai  
avíkan barufin ma orin nará ákona  
ó tifano. Para vara seyo, gefá  
ma Isarerí nanin banta ano ma  
Tiyarafenui vaya ma átakharé  
einí ma inain manon eraven  
ankamínten mino.

\* **3:16:** Nam 14:1-35 \* **3:17:** 1Ko 10:10

\* **4:3:** Ibu 3:11 \* **4:8:** Diu 31:7; Yos 22:4

\* **4:10:** Ibu 4:4 \* **4:12:** Efe 6:17; Rev 1:16; 19:13-15

<sup>12</sup> \*Mai fara vara seyo, Tiyarafenu vayafin mi ayun ma fara van ákona víkakhen mino. Mai vaya ano vaenati ma sefá tefá an bákán ma avané iyain esantaren moékentá avan iyáken mai ano kasaen aú bá ayampa vá amasi vápin o feranten mino. Mai vaya anon aú bá ineine vá avúavá bá daiminten mino. <sup>13</sup> Minó daná ma ma varará bain mano Tiyarafenu avorá ída uron mi aúpá ban mino. Minó ano ma monó té ayí daní é iyá tiferuna vanta avorá minó daná ano amákai van mino. Máan tukhein nará minó daná ma varé aruvé iyá tiferuna vá Tiyarafenun avorá tian amá ó tifano.

*Yisas Karaisi Ma Monó Ánon  
Banta Kayoi Ánon Bantaí Ukhein  
Bayo Ino*

<sup>14</sup> \*Máan tukhein nan mi Tiyarafenu Anin Yisas Karaisi setisi monó ánon banta kékái ánon banta anon inarufá ódikhen mino. Mai ma véjntá mumunan iyáke ma sian dáko iyá é tiferuna vaya vá pákaan ákona ó tifano.

<sup>15</sup> Mai monó ánon banta kékái ánon banta anon tetimpin ma ída ákona vain afová ukhen arunan usintiyan mino. Mai fara vara seyo, varará nanin banta ano ma variyá tiferuna uman bariyáken inká Ban Anoni mákasimpin orivin akhenóka uan onen mifo véi ída umeien mino. <sup>16</sup> \*Máan tukhein nará mai ma sarisari ma víkakhein kin kará ádé ída feran oriverá tiyaino van ma ékun ná arunan uren tarisari ino.

## 5

*Yisasin Ma Ve Aufó Tiyarafe-nun Íkun Uan Amiren Ma Setin Evaránen Tívikein Bayo Ino*

<sup>1</sup> Banasii oo vantaí ukhen Tiyarafenu vá bayá ino van mi

\* **4:14:** Ibu 3:1; 10:23    \* **4:16:** Ibu 10:19    \* **5:3:** Riv 9:7; 16:6    \* **5:4:** Eks 28:1    \* **5:5:** Manáa vompon dókifin máa sikhen mino. Taréa éin maman te sikhasí é uno.    \* **5:6:** Ibu 6:20; 7:1    \* **5:7:** Mat 26:36-46; Fir 2:6-8

monó ánon banta kékái ánon bantaí maman uran ban mino. Banași ano ma Tiyarafenun íkun uan amiyan inká tusu siantiyan ono van ma varen orin maen betí ume ampiantano van béin Tiyarafenun íkun uan amé iyan mino. <sup>2</sup> Béi ma varará bantan bákán ben má dere ída ákona van mifo mai ma ineine asuse ukhein nanin banta ano ma savi aintá oriyan maen bempáké ará kusin pintéi vetí ankan maman puntariyan mino. <sup>3</sup> \*Mai yan mi vei ume vá basasii ume vá ampiantano van mi Tiyarafenun mo íkun uan amiyan mino. <sup>4</sup> \*Máan tukhantin mana vanta ano ída vá beyantá kákán bí barano van monó ánon banta kékái ánon bantaí ino. Tiyarafenu ano ma Eronin aní uran baré einien ná béis ana vá aní urantin mai yorari ino.

<sup>5</sup> Máan tukhan Yisas Karaisi ano ída veyantá kákán bí barantó uno siren monó ánon banta kékái ánon bantaíen mifo Tiyarafenu anón máa siren béis mai yoran amen mino.

“Éi sen Tanin mono,  
saréa éin afóení é uno.”\* *Íbo 2:7*

<sup>6</sup> \*Inká ena vompon anafin béis nan máa sikhen mino.

“Éi Merkisedekin an deya  
fara van oriyan ban monó  
ánon bantaí e ono.” *Íbo 110:4*

<sup>7</sup> \*Ma varará ma Yisasi yorun báken purin pintena aya ino van bei arunaná pinté kákán ifí diyáken Tiyarafenu ano aya ino van béisntá ákona inin kaein nan mi veni amúkin inen mino. <sup>8</sup> Yisasi maen Tiyarafenu Anin mifo vara ráke uman kayo ma variyáken mi oo yaiyin avúavá afová en mino.

<sup>9</sup> Mai aa sákéi Tiyarafenu ano véin maman monó doran banta kékái funtákein ánon bantaí uren mi

kasaen minó dorarí inte ne sikhen mino. Máan tukhein béis anón mai ma ven oo yaiyin nain kéká evaránen avíden para van oriyan ban aunan aminten mino.<sup>10</sup> Máan tukhein nan mi Tiyarafenu ano véin maman Merkisedékin an den monó ánon banta kékái ánon bantaíen mino.

*Bayá Inin Avúavá Ma Me Oyan Amiyái Pákena Aaman Bayá Ino*

11 Ma ma siamiyaruna mai kokhon bayan ban mifo ída kama e iniyánai veni ana ída sian amá iyá uno. <sup>12</sup>\*Tiretí ankan pefa suron mi monó nanin bantaí ukheya eriyare ompo ena nanin banta ma afova amiyan baren mi ena kéká ano saretin evaránen monó baya fákena afova amino van iniya ono. Tiretí ankan arará iyampon mano ma ída ákona yunan nakhen ma nan anu máa ana ma niyain an mi yakharono. <sup>13</sup> Máan kéká ano arará iyampon ma nan anu nein an mi yiyan pasen puntákein avúavá sintá ída moéken afová ukhen mino. <sup>14</sup>Puntákein avúavá bá ída funtákein avúavá bá ma oman afova suron ureñ ma funtákein avúavá ana variyain kékái nan ákona yunan ban mino.

## 6

*Arará Iyampon Ma Afova  
Amein An Ma Yan Avúavá Ma Me  
Ampín Bayá Ino*

<sup>1</sup> Máan tukhen mifo ída vá mai ma esé araiintá ma Yisas Karaisini vaya sisimí iné tiferuna avúaváká evaráné orive orive iyá bá tifano. Monó avúavá purasé afová uresá ume avúavá ma me soyan amiré erikhé tiferuna ída vá evaráné mo aruviyáké Tiyarafenurá ma ákona mumunan in nará inétifano. <sup>2</sup> Monó non péantan nafi ayan árontá kaúden avu uantan nafi fúaren ma orun mantan nafi inká Tiyarafenu ano ma índaimpáké ma

vanasii avúavá daiminaí pákena van mana ída vá tiамиya vano. <sup>3</sup> Máan tiya tifékun ná Tiyarafenu ano ma anunu intí maerá moékan afova vará tifano.

<sup>4</sup>\*Para vara seyo, mai ma Tiyarafenu fura vaya vá kama yanásinta vá afová en ma Kantá Aunani avúavá baren ma Tiyarafenu kama avúavá bain baya vá <sup>5-6</sup> inká índaimpáké ma ma vara kípan nain ákona vá ma afová ukhein kéká ano ma Tiyarafenun me oyan amiren orivinten maen ída kanaíen ará baeranten mino. Mai fara va ino. Máan kéká anón Tiyarafenu Anin oyan amiyáken mi véin evaránen daa unkamádantá ariyáken banasi avorá béis ankayan tiren ayave amiyan ban mino.

<sup>7</sup> Banasi ano ma varafin danayun dókáin ma á eren bara afú daran ma orun ampamaren ma kama aran iré iyain mai Tiyarafenu avábáí varé iyan mino. <sup>8</sup>\*Máan té iyan mifo mai yunan anafin ma namu naman má ayankun naman má ma e ampamaren ma yunan ana yarádantin maen mai yunan ana afóe ano mai vara van aufon ukhen mino siren ira saman kaurinten mino.

<sup>9</sup>Téi ma sinunu ukheruna sirona kéká soe, ma vaya ma siyaruna van mai ída saretin nan tiyá unon té iniyá tiféuno. Tiyarafenu ano ma setin tiya ureñ tívíkeimpin ma kama yaná afoká intí ma varan nona rái inin onan kaúka ononté inikhé tiféuno. <sup>10</sup>\*Mai fara vara seyo, Tiyarafenu ano funtáken ban mino. Mai ma veni ákona yorári iya ma mumunan nanin banta avábá ureya ayaiya ma kama e yafisiya vaona van béis ída áun inten mino. <sup>11</sup> Ena ma ará amin avúavá ákona uan pákaráke oriyareya mai ma ákona inin

\* 5:12: 1Ko 3:1-3 \* 6:4: Mat 10:22; Ibu 10:26-27; 1Yn 5:16 \* 6:8: Esé 3:17-18; Mat 13:7,  
\* 6:10: Ibu 10:32-34

onan kauráke ma ave iya vaona yaná purase o varano van mi setí ankan tinunu ukhé uno. <sup>12</sup> Mágan ma inteyan monó avúavápíñ ida avesara in nono. Mágan tin nompo mai ma Tiyarafenu ano iyáantán bain daná ma fura sen afoká intéí uno siren ma mai yanáká ákona mumunan kaúdáken kama avúavá ana varen oriyaren ma mai yaná o varein kéká an mi yan nono.

*Tiyarafenu Ano Ma Iyáantan  
Danáká Ma Ákona Mumunan Kain  
Bayá Ino*

<sup>13</sup> Mana vanta ano ida Tiyarafenu esantakheimpin mi veyantá be avíkái ayan befió uren pura ódino siren mi Abaraamun máa sen iyáan ten mino.

<sup>14</sup> “Éin purasé moeké avu uantadé en ana akhá maman kokhoní suron uantanté uno. *Esé 22:17*

<sup>15</sup> Mágan siran ará kusin má Abaraamu ave ukharen mai ma Tiyarafenu ano iyáantáká ein daná baren mino.

<sup>16</sup> Mana vanta ano ma mana yaná ma ena kéká iyáantano van maen ben ma esantakhein banta avíkái ayan befiyó uren pura ódino siran mi mai ano fura sen ákona ukharéin mi ida ara ara vaya vákan kasaen baré iyan mino.

<sup>17</sup> Mágan avúaváká anan ten mi mai ma iyáantákain nain kéká ano fura sé baranté uno siren ákona mumunan ino van mi Tiyarafenu ano veyantá ayan befiyó uren pura ódino sikhein ida kanaíen do varanten mino. <sup>18</sup> \*Mágan tukhein nan mi Tiyarafenu ano setin iyátintáden inká ayan befiyó uren pura ódino siran ban mino. Maíkan dana san ma Tiyarafenu ano kampun tiantáden ma yurafurimpin ida seso sikhen mino.

Mágan tukhein nará mai ma ven ópá aúmaneno van muno siré ma karan oronuna kéká ano kasaé

mántaan ákona uvé maé mai ma iyátintán bain danáká ákona inin kaó tifanté uno.

<sup>19</sup> \*Mai ma ave ukhé ma ákona inin onan kaiyá tiferuna anon sipii ankan ma un nompin kain orun pákaan ákona ukhen bain an mi setin tuká ukhen mino. Mai anon tetin tivireñ inarufá ma vain monó namumpin ma moéken kantasí ukhein karafaran ma iyákein davarae esantaren maen Tiyarafenu kantasí ukhein karafarapin ódiyán mino. <sup>20</sup> Yisasi ano setin tiya ono van pefái maifin un báken Merkisedekin an den para van oriyen ban monó ánon banta kéká ánon bantaí ukhen mino.

## 7

*Merkisedekini Vaya Ino*

<sup>1</sup> \*Merkisedeki maen Saremi\* kákan barui kin báken inká moéken dan bain Tiyarafenu monó ánon banta ino. Mágan tukharen maen Abaraamu ma kokhon kin kéká bá ma kákan aruvirí uren betin aruan kiparen ma evaránen barufá orono van eriyan ma Merkisedekin má ayanafá o fókan maen béin avu amen mino. <sup>2</sup> Mágan turan maen Abaraamu ano mai ma aruvúden baren erein danasinta siyan míkampintan daíden mana masiman Merkisedekin amen mino. Merkisedekin ne ma sikhein bíi ana maen mai funtákein avúavái kin nen ten mino. Inká Saremi kin ne ma sikheini ana maen mai ará kusian tiyáken kusin baren erin kin nen tikhen mino.

<sup>3</sup> Tiyarafenu vompompin ben anoifon má anafu aráon má ma afoká ukheini ana vaya ida váken inká ben ma khæin má be ma o furein máí ana vaya yere ida van mino. Béi maen Tiyarafenu Anin an daven mi fara van oriyen ban monó ánon bantaí ukhen mino.

<sup>4</sup> Merkisedeki ma kákan bantai ukharé ein ná ovare me

\* **6:18:** Nam 23:19    \* **6:19:** Riv 16:2-3    \* **7:1:** Esé 14:17-20    \* **7:1:** Saremi e ma siyain mai Yerusalemí baru van mi sikhen mino.

ineno. Abaraamu maen Isarerí barafin aví bain bantan baren mifo mai ma aruvín pintena varen eriyá ein danasinta ma siyan míkampintan daíden ma mana masiman Merkisedekin ma amikhein manon kákán danasí ukhen mifo afovásá ono.

<sup>5</sup> \*Rivain anan banta finté ma monó banta kékási ukhein nan Mosesini man bayá ano máan mi sikharen mino. Minó ano siyan míkampintan daíden ná mana masiman betín amino sikhán maen betí afá aváeyan pinten nan e variyaren mifo mai Abaraamun anavasin manan baren mino. <sup>6</sup> Máan tiyaren mifo

Merkisedeki maen ída Rivain anan banta anon Abaraamun pintena mana masiman barein mino. Mamaren mi mai ma Tiyarafenu ano gefá ma iyántan baré ein banta Abaraamun ánontá ayan kaúden avu amein mino. <sup>7</sup> Máan tukhantin ída mana inain bantin maen avu amin ákoná ma vain banta anoi mai ma avu variyain banta esantakhen mino.

<sup>8</sup> Purin nain monó ánon banta kéká anon Yutan kayo fintena mana masiman bariyaren mifo Merkisedeki ano mai kéká esantakhen mino. Mai fara va ino. Béin nan ma ayun para van ne ma sikhein mano ino. <sup>9</sup> Inká ena ma vain mai Rivaini anan banta kéká ano ma mana masiman máden maen betí anáu Abaraamun pinté uaren Merkisedekin amikharen minon té tifanté uno. <sup>10</sup> Mai fara vara seyo, Rivai má ída afoká ukhan maen be anáu Abaraamun pinten nan Merkisedeki ano mana masiman mantaren mino.

### *Yisasi Ma Merkisedekin An Dakhein Baya Ino*

<sup>11</sup> Rivain anan banta ano ma kanaén Tiyarafenu yoran mo kíporen ukhantin mai fará Tiyarafenu ano Rivain nú Eronin núi kéká pintena ída siantanton ná

Merkisedekin an dakhein banta siantantin erino van en nafino.

<sup>12</sup> Para vara seyo, ena kéká ma maman monó ánon bantaí iyáken maen mai auyen man bayá vá uvarano. <sup>13</sup> Mai fara vara seyo, ma ma siamiyaruna vanta vá bei kéká bá maen mai ena anan pintena kékái váken mai ma onámaná karángrá uádantá ma íkun uan amiyain doran pefá ída yókaren mino. <sup>14</sup> \*Mai van téi máan mi siyá uno. Tetisi Bafan maen mai Yutan anan pintéi afoká ukhan mai anan pinté ída monó ánon bantaí inten ne sen Mosesi ano sian amá ukharen mino.

<sup>15</sup> Merkisedekin an dakhein banta ma maman monó ánon bantaí urantin ma ena avúaváká doran nain nan ma Tiyarafenu auyen man bayá ano sikheí pákenan tian amá iyá tiferuna mai afová inono. <sup>16</sup> Béi ma monó ánon bantaí ein mai Rivaini kéká ano ma variyá ein avúavá kasa ifo mai ma fara van oriyan ban aunani ákonará ino. <sup>17</sup> \*Máan tukhan mi Karaisin nan Í Bompon pin máa sikhen mino.

“Éi Merkisedekin an dakhe, fara van oriyan ban monó ánon bantaí e ono.” *Ibo 110:4*

<sup>18</sup> Peyante man bayará ma monó dorarí iyá ein mai ída ákoná vákan mo namu ukheimpin do maman akhempá kaen mino. <sup>19</sup> \*Mai fara va ino. Man bayá ano ída mana yaná maman kama íkan mi moéken kama ukhein danáká ma inin onan kaúden ave ukhein ban manon beni varu yaren mino. Mai aa sákéi setin e sivian Tiyarafenu adé mo khaiyan mino.

<sup>20</sup> Tiyarafenu ano Karaisin nan mi ayan befiyó uren pura ódino siren mi fara van oriyan ban monó ánon bantaí inono sikhen mifo ena monó ánon banta kayo van ída máa sikhen mino. <sup>21</sup> \*Tiyarafenu

\* 7:5: Nam 18:21 \* 7:14: Ais 11:1; Mat 2:6; Rev 5:5 \* 7:17: Ibu 5:6 \* 7:19: Ibu 10:22;  
Yem 4:8 \* 7:21: Ibu 5:6

ano Yisasin manan máa sen tiamen mino.

“Bafan mano ayan befiyó uren pura ódino sikhein,  
bei vaya ída yurafurinten mino.

Éi fara van oriyan ban monó ánon bantaí e ono.” *Ibo 110:4*

<sup>22</sup> \*Tiyarafenu ano ma ayan befiyó uren ma fura ódino sikhá ein nan mi mai ma manafin kaseñ ban avúavá Yisasi ano me yóan kanaí uren mi maman kama uáden mino.

<sup>23</sup> Inká ena ma vain mai feyante avúavákai kokhon monó ánon banta kéká ano yoriyaren mino. Mana vanta ano ma monó dorarién oriyaren ma fúbin maen ena anon beni varu variyaren mino. <sup>24</sup> Máan tiyaren mifo Yisasi maen para van oriyan ban monó ánon bantán bantín mai yoran mano ída mo kipánten mino. <sup>25</sup> \*Máan tukhein nan mi intéa kéká anó béin pinté uaren ná Tiyarafenu vaintá erinten nafi mai vetin aya uré evaránen avídantin para van oriyan bano van mi inikhen mino. Béin para van oriyan báken mi setisi ume ampisintano van Tiyarafenun tiamian ban mino.

<sup>26</sup> Béimpin ída mana ume vákan kantasien avusese ukhen baréin mi ume nanin banta finté véin avión dan bain barurá kaúden inarufá kákán bí amiran báken ma siya iyain monó ánon banta ino. <sup>27</sup> \*Béi ída ena monó ánon banta kéká ánon banta ano ma minó damú Tiyarafenun íkun uan amiýa ein an danten mino. Mai kéká ano vetíi ume van naren íkun uan amiren mi ínaimpáké banasii ume van íkun uan amiýaren mino. Máan tiyaren mifo Yisasi maen manádái minó nanin bantai ume van íkun uan amen daa unkamádantá púken mino. <sup>28</sup> Bara ráke vantai ákona ída vákan mi Mosesini man baya ánaín

dakhafen monó ánon banta kéká ánon bantái iyaren mino. Máan tiyarein ma man baya amiren maen mai oyampákéi Tiyarafenu ano ve Anintá ayan befiyó uren pura ódino siren mi véin nan puntákein avúavá baren oriyan bante ne sen anién mino.

## 8

*Karaisi Maen Auyen Avúaváká  
Ma Kasen Bani Monó Ánon Banta  
Ino*

<sup>1</sup> Ma ma senuna mai ana vaya ino. Tetisi monó ánon banta kéká ánon banta Yisasi ano inarufá kákán bí mamaren Tiyarafenun ayan kuompá kumanten mino. <sup>2</sup> Máan tukhan maen mai ma fura sen kantásí ukhein monó namun ma varará banta ano ída uvaran ma Bafan mano veyantá uvantein namumpin mi monó dorarí iyan mino.

<sup>3</sup> Banasi ano ma Tiyarafenun tusu siantan daná bá inká íkun uan amin daná bá ma varen moran maen mi monó ánon banta kéká ánon banta kayo fintena mana aní uran mi mai yanásinta varen mo Tiyarafenun íkun uan amiýaren mino. Máan tiyaren mifo setisi auyen monó ánon banta kéká ánon banta ano yere vá manáa yanásinta varen Tiyarafenun mo íkun uan amino. <sup>4</sup> Béi ma varará bano sen baren ída kanaíen monó ánon bantái ina inten mino. Mai fara vara seyo, Mosesini man baya ano ma sikhein ánaín dakhafen pefái monó ánon banta kéká ano Tiyarafenun íkun uan amiýaren mino. <sup>5</sup> \*Mai ma fura sikhein monó namun ma inarufá baini aman mi ma varará ma vain monó namun bákán maifin mi yoriyan mino. Mai fara vara seyo, Tiyarafenun monó tiantan namun ma Mosesi uvarano van iyan maen Tiyarafenu ano ákonaen ma vayan tiamikharen mino. “Ma anuyontá ma aní eruna avúavá

\* 7:22: Ibu 8:6; 12:24

\* 7:25: Rom 8:34

\* 7:27: Ibu 5:3    \* 8:5: Kor 2:17; Ibu 9:23

kasá teya minó daná uvarano.”  
*Eks 25:40*

6 \*Máa sikharen mifo ma varará ma feyante man baya ánaín dakhafen ma yoriyá ein kéká esantaren moéken kama ukhein doran mi setisi monó ánon banta amen mino. Para vara seyo, kama avúaváká ma Tiyarafenu vá kasen ban mi véi ano moéken kama ukhein danasintafó iyátintan ban mino.

*Auyen Kasen Ban Mano Ma Feyante Kasen Ban Esantakhein Baya Ino*

7 Para vara seyo, esé araíntá ma kasen ban avúaváká ma vareimpin ída mana uman baré intin. Ída evaránen ena kasen ban avúaváká kain nainten mino. 8 Máon tin nainten mifo féfá ma manafin kasen ban avúaváká ma mantaré ein pintena Tiyarafenu ano onákan banasi ano ume avúaváká bariyaimpin mi máa sikhén mino. “Bafan mano siyáken damú ma erintí,

Isareri vá Yutan nanin banta vá ma  
 auyen avúaváká ma manafin  
 kasen ban amenté uno.

9 Auyen kasen ban mano  
 vetí anáuyan má ma manafin  
 kasen ban ma uvantá eruna  
 vá ída manai inten mino.

Inká mai ma vetin ayan pákaoré,  
 ma Isipi vara finté yo aviré  
 merékuñ maen  
 mai ma vetin má ma manafin kasé  
 banuna van ma siamikhá  
 erunera ída ákona inin  
 kaeimpin mi  
 vetin me soyán amé uno sen  
 Bafan mano sen mino.

10 Máon tukharé umpo ma maen  
 auyen kasen ban mi  
 Isareri nanin banta vá taréa  
 uvaranté unon ten Bafan  
 mano sen mantino.

Tesi man baya kayo vetí inimpin  
 kaúdékun  
 betí ankan mai ana afová  
 uvintí maé

inká betí ankan auká uvadékun  
 mai ánaín dakhafinten mino.  
 Téi vetí Ayarafenu vákun  
 betí ankan tenti vanasin ban-  
 ten mino.

11 Báken betí arona fi  
 áa vetí kéka safi ída afová  
 amiyáken

Bafan ná afová ono sen ída  
 siaminten mino.

Mai fara vara seyo, aví ída vain  
 kéká káké ma aví bain  
 kékáká ma o khanaí ukhein  
 mai minó anon téin pefá afová  
 inten mino.

12 Para vara seyo, vetí ma  
 namu avúaváká bariyá inain  
 ampiantadé  
 ída evaráné betí ume van in-  
 eine onté uno.

*Yer*

*31:31-34*

13 Tiyarafenu ano ma auyen  
 avúaváká ma manafin kasen ban  
 nan ma siyanti mae mai feyante  
 kasen bani ákona ano inka o  
 khípiyán mi yo maman akhempá  
 kaono van mantino.

## 9

*Ma Vara Ráke Monó Namumpin  
 Ma Feyante Avúaváká Monó Tiyá  
 Ein Baya Ino*

1 \*Esé araíntá kantasí ukhein  
 davaráe namun mi ma varará  
 uvadáken Tiyarafenu vá Isarerí  
 kéká bá manafin kasen ban  
 avúaváká bákan monó tiyaren  
 mino. 2 Mai yavaráe namumpin  
 kankanan karafaran mi varen  
 mino. Esé karafarampin on ma  
 antúduan divin danka vá dunan  
 kain kará bá bákan mai yarói airo  
 ananí ukhein bereti kain baren  
 mino. Mai karafarampin nan  
 mi Kantasi Ukhein Karafaran ne  
 siyaren mino. 3 \*Inká mai oyampá  
 ena kharafaran davaráe fóké  
 e auádan bákan mai karafaran  
 nan mi Moéken Kantasi Ukhein  
 Karafaran ne siyaren mino. 4 \*Mai  
 karafarampin maen aunka fauran  
 ma íkun uan amin kará ma korifó  
 uvantein má inká daafó uváden

\* 8:6: Ibu 7:22 \* 9:1: Eks 25:23-26:30 \* 9:3: Eks 26:31-33 \* 9:4: Eks 16:33; 25:10-16;  
 30:1-6; Nam 17:8-11; Diu 10:3-5

ma korifó me iyákein bokhise vái kain baren mino. Mai vokhisefin manna e ma siyain bereti kayo ma kaúkein kori khave vá Aronini ayonta ráké ma ariké e fótein danka vá inká tiyan míkan man bayafin ma manafin kasen ban baya uvantein onámaná bái kain baren mino. <sup>5</sup>\* Mai vokhise yarói vanasii ume ma ampian tiyain bákán serubimi e ma siyan ma Tiyarafenui kakhan má ma vain daná kankanan korifó uváden mai yaró kaíkon ayan tátá uren baren mino. Mágan tukharen mifo saréa ída kanaí é mai yanásinta fáke sian amá ótifanté uno.

<sup>6</sup>\* Mai yanásinta ma arakhóku uan kaúden maen monó banta ánon kéká ano esé ma vain karafarampin mi ena ena un peren kuven iyáken mai ma amikhá ein dorarí iyaren mino. <sup>7</sup>\* Mágan tiyaren mifo monó ánon banta kéká ánon banta ano anan Moéken ma Kantasi Ukhein Karafarampin manadá anan ena ena oranafin ódiyaren mino. Ódiyáken maen bei ume vá inká banasi ano ma ída afavá ukhen ma variyá ein ume vá arúantano van nare yáaren Tiyarafenun mun ákonte uan amiyaren mino. <sup>8</sup> Mai avúavá ma varará bain monó namumpin ma fara yantin maen banasi ano ída kanaíen Tiyarafenui Moéken Kantasi ukhein karafarampin ódinten ne sen Kantá Aunan mano setin aní ukhen mino.

<sup>9</sup>\* Mai monó namun nan ma siyain mai saréa ma afoká inain dana san mi aní ukharen mino. Mai ma monó ánon banta kéká ano ma susu siantan danasinta vá inká íkun uan amin danasinta vápó ma íkun uan amiyaré ein mano ída kanaíen monó nanin bantai ineine fintena sesé uantiyaren mino. <sup>10</sup> Betí ankan peyante avúavá ángan dakhafen dunan má non mápó mai avúavá bariyantin

dan bukhafa ana sesé en oriyantin mai ma siádan baré ein damú afoká ino van mi sikharen mino.

### *Yisas Karaisini Nare Ano Ma Funtákein Ákontakte Ukhein Baya Ino*

<sup>11</sup> Mágan sikharein taréa Karaisi ano kama yaná kayo ma afoká eintá o monó ánon banta kéká ánon bantaí en mino. Mágan tuven mai ma varará banta ayan mano ída uvaran ma inká ma varará ma uyamádan bain danasinta vá ma ída manái ukhan ma moéken kama ukhein monó namun ma inarufá baimpin mi óden mino. <sup>12</sup> Óden mifo memé bá kao vái nare fóké ákontakte ono vara mai ma Moéken Kantasi Ukhein karafarampin óden naino. Ída ino. Karaisi ano ume fintena vanasi aya uren evaránen avirano van mi vei nare fóké manadá Tiyarafenun íkun uan amen mino.

<sup>13</sup>\* Peyan avúavápin meméi nare vá afon kaói nare vá inká arará kaoi kasi bá anon, kanaíen man baya ma yurafurein nanin bantai yan bukhafa sesé iyaren mino.

<sup>14</sup>\* Mágan tiyaren mifo setisi ume sivútivá ano ma furin aasá tiviren oriyare in ma Tiyarafenurá monó tiantano van ma Karaisi ano vei narefó ma setin tú tesé ukhein nará ovare me ineno. Mai fara vara seyo, Karaisi anon para van oriyen ban Kantá Aunani ákoná fói ve au fóké tetisi ume van puntákein íkun uan Tiyarafenun amen mino. <sup>15</sup> Mai ana van mi Tiyarafenu ano ma arakhein nanin banta ano kasaen mai ma fara van oriyen ban aunan ma iyáatan bain barano van mi vei ano Tiyarafenu vá banasi vá aúbaná báken auyen avúavápin ma kasen ban aa uvíken mino. Para vara seyo, esékena kasen ban ma kain baré ein mano umei miyan uman manan amiyaré íkan mi mai uman pinten nan útúantano van Karaisi e furen mino.

\* 9:5: Eks 25:18-22 \* 9:6: Nam 18:2-6 \* 9:7: Riv 16:2-34 \* 9:9: Ibu 10:1-2 \* 9:13: Riv 16:15-16; Nam 19:9, 17-19; Ibu 10:4 \* 9:14: 1Pi 1:18-19

<sup>16</sup> Mágan tukhantin mana vanta ano ma veina yanasantará bompon uvariyáken ma mana iyampon nan téi ma fúbékuya sesina yanasantá éi vá barano sikharen ma fura sen púbintin manan mai ma iyáon takháiñ nain iyampon mano venina yanasantá varanten mino. <sup>17</sup> Mai fara vara seyo, mai ma vompon uváden iyáantein banta ano ma ída fúkantin maen mai ma iyáantán mano fara ave ukhen baré intin ma véi fúbintin mi mai ma iyáantein danasinta varanten mino.

<sup>18</sup> Mágan manan en mi esékena kasen bani avúavápin ma nare ma ída vantin maen mai ída ákona vantent mino. <sup>19</sup> Mosesi ma Tiyarafenu man bayá kayo maman banasi amiren maen arará kaoi nare vá meméi nare vá maman non má manafinén mino. Mágan turen isopi yaa ayan má inká sippi sippi ayorá ma nararé kava fékein mápó maifin morun daaren mi Tiyarafenu vompon dóki vá bánnasi aufá bá péantákaren mino. <sup>20</sup> Mágan turen maen betin máa sen tiamikharen mino. “Mai ma Tiyarafenu ano saretin má manafiní é kasé bano yan ma sikháré ein mi ma narefó perékun mai anón maman pura yanasi en mino.” Eks 24:6-8

<sup>21</sup> \*Mágan mana en mi mai ma yavaráefó ma uvantein monó namun má inká maifin ma vákan doriyain danasintará bá ina nare feren mino. <sup>22</sup> \*Mai van mi Mosesini man bayá ano siyáken nare ano anan minó danasinta sesé inten mifo mana yaná ma ída aruren narefó ákonte intin mai Tiyarafenu ano ída kanaíen ume ampiantante ne sikharen mino.

<sup>23</sup> \*Mágan tukhein nan mi varará ma vain davaráe namun má maifin ma vain danasinta vá anón inarufá ma vain danasintai aman mi vákan Tiyarafenu man bayá ma safúnai nare fóké sá ákonte

ono sikhen mino. Mágan sikhán mifo fura yanasantá ma inarufá bain mai safúnai nare esantakhein daná pói ákonte uren tesé uan avusese ukhen mino.

<sup>24</sup> Mai fara vara seyo, ma varará ma uvamádan baré ein danasinta mai inarufá ma vain danasintai aman mi varen mino. Mágan tukháiñ ma varará ma vain monó namumpin na Karaisi óden naifo mai ma inarufá ma vain monó namumpin mi un báken teti ma variyá tiferuna uman pintena siya ino van Tiyarafenun avorá ákonaen duvuniyan mino.

<sup>25</sup> Inká ena ena oranafin ma monó ánon banta kékáí ánon banta ano ma Moéken Kantasí ukhein karafarampin ma safúnai narefó ákonte iyá ein an den ná be aufó ena ena Tiyarafenun íkun uan amiyan bano vará inarufá ódikhen nafino. Ída uron mino. <sup>26</sup> \*Kokhon dádasá purono sen baré intin ma vara ma araí ein tákéi véi o furen eriyan ban nainten mifo ma vara ano me akhen diyán manadái umei ákona finté fura sen utútintano van mi e fúaren bei narefó me ákonte ukhen mino.

<sup>27</sup> Barará nanin banta ano ma manadá pükaren ínaimpáké kopín o mantan nain an mi yakhen mino. <sup>28</sup> Mágan tukhan kokhon nanin bantai ume ampiantano van Karaisi ano manadái e fúaren bei narefó ákonte ukhen mino. Béi ma ovaránen erinten maen banasii ume evaráne ampiantiyá bano vara erinten naino. Ída ino. Mai ma véin ave ukháiñ nain kéká virano van mi erinten mino.

## 10

*Tafúnai Nare Ano Ma Ída Kanaí En Banasii Ume Arúantan Nain Baya Ino*

<sup>1</sup> Mosesini man bayá maen mai ma ínaimpá ma kama yaná erin nain aman mi varen mifo Yisas Karaisi ano ma fura sikhein daná ma varen erein naino. Ída ino.

\* 9:21: Riv 8:15, 19    \* 9:22: Riv 17:11    \* 9:23: Ibu 8:5; 10:1    \* 9:26: Ibu 10:10

Para va máa siya rauno. Mai ma ena ena oranafin ma safúñai narefó ma ákontakte uanten eriyá ein mano ída uron mi vanasi ano ma monó tiyá ein ayaiyaren mino. <sup>2</sup> Pura siren ume arúantén baré intin mai ma íkun uan amin avúavá ída vanainten mino. Mai fara vara seyo, manadá ma íkun uan amin ayúavá ano ma monó nanin bantai ume ma ena ena sesé urantin maen mai ída umeí ukhé uno sen afová inainten mino.

<sup>3</sup> Máan tiyaren mifo mai ma ena ena oranafin ma manadá ákontakte iyáre ein mano mai ma umeí ukhá ein mi aní uantiyaren mino. <sup>4</sup>\* Mai fara vara seyo, mémé bá afon kao vái nare ano ída kanaien ume arúantanten mino. <sup>5</sup> Máan tukhan pasen Yisas Karaisi ma ma varara dorun báken máan mi sikharen mino.

“Íkun uan amin avúavá bá ákontakte in avúava ba san éi ída anunun e ompo

sen tui útaqan kaútinte ono.

<sup>6</sup> Ume arun mino siren ma íkun uan amin má inká tafúña aruren ma íkun uan amin avúavá ba san

éi ída amusin ukha ono.

<sup>7</sup> Máan tiyaonafin mi séi siyáké, ‘Masi séi vakun, Bompon dókifin téin nan mi sikhen mino.

Tiyarafenu oe, éin oo yaiyé dorano van mi erikhé uno.”

*Íbo 40:6-8*

<sup>8</sup> Esé araién Yisas Karaisi máa semi, “Ara ara yanápó ma íkun uan amin nafi safúña ma aruren íkun uan amin nafi inká ume ampiantano siren ma íkun uan amin nafi mai Mosesini man baya ano sikha ompo mai avúava sinta van éi ída anunu ure amusin e ono.” <sup>9</sup> Máa siren temí, “Éin oo yaiyé dorano van mi eré uno.” Esé ma kasen ban man baya ma amikhá ein do madé auyen avúaváká ma kasen ban man baya maman dákó ono van mi máa sen mino. <sup>10</sup>\* Mai van mi minó damú

para oriyan bano van Yisas Karaisi ano ve aufó Tiyarafenun manadá íkun uan amiren tetin maman kantasí urá bá tiféuno.

*Yisas Karaisi Ano Minó Nanin Banta Van Manadái Tiyarafenun Íkun Uan Amikhen Mino*

<sup>11</sup>\* Peyante avúaváká ma kasen ban aránaó ma váken monó ánon banta kayo ano ena ena yamú monó dorarí iyáken inká ume arumino van ena ena íkun uan amiyaren mifo mai ano ída kanaien arumiyyaren mino. <sup>12</sup> Máan tiyaren mifo setisi Monó Anon Doran Banta ano ume ampisintano van kama avúavasien minó damú kena manadá íkun uan Tiyarafenun amiren ben ayan kurompá kin karáká un kumanten mino.

<sup>13</sup>\* Un kumanten mi yei namuro kayo maman bararasí uren beni arantan kain karasí ino van ave ukhen mino. <sup>14</sup> Mai fara vara seyo, ve aufó ma manadá íkun uan Tiyarafenun amein avúavá anon mai ma funtákein avúavá bariyain kéka maman kantasí iyan mino. <sup>15</sup> Máan tukhan Kantá Au-nan mano yere mai van tetimpin tian amá iyáken esé araí in baya máa sikhen mino.

<sup>16</sup>\* “Tesi vanasi vá ma auyen ayúaváká kasen ban maen máí damúi yamuán kaonté uno sen Bafan mano sikhen mino.

Betí ankan aúká ma sesi man baya kaúdé maé inká betíi ineinefin uvádé kun mai vaya ánaín bákurinten mino.”

*Yer 31:33*

<sup>17</sup> Máa siren evaránen temí, “Betí ankan ma man baya átakharé uren ume avúavá ma variyá ein nan ída ovaré me ineine onté uno.”

*Yer 31:34*

<sup>18</sup> Máan tukhein nan mi ume ma ampiantá dantin maen ída evaránen íkun uan amin avúavá banten mino.

\* **10:4:** Ibu 9:13 \* **10:10:** Ibu 9:12 \* **10:11:** Eks 29:38 \* **10:13:** Íbo 110:1 \* **10:16:** Ibu 8:10

### *Tiyarafenun Ádé Ma Orin Baya Ino*

19 \*Máan tukhein nan mi mumunan tiyofi sifá tiváeyan noe, Yisasini nare ano setin maman avusese ukhein pasé ída feran kasaé Moéken Kantasí ma Ukhein Karafarampin ódó tifanté uno. 20 \*Mai ma yavaráe fóké ma are ukhá ein mi Yisas Karaisi ano vei fúrimpó auyen aunan ma varan aa uvisiyáken do varen mino.

21 Máan tukhan maen Tiyarafenu vanasirái setisi kákání ukhein Monó Anon Banta anon dafiken mino. 22 \*Máan tukhanti erí tifé purasé tükáké bentá mumunan é Tiyarafenun ádesá oró tifano. Mai fara vara seyo, Yisas Karaisini nare anon tetinti namu ineine maman avusese uren ída fain bain nompói minó bukhafa sesé ukhen mino.

23 Mai ma Tiyarafenu ano amenté uno sikhá ma ákonqumunán iyá tiferuna ída vá me ampé tifano. Para vara seyo, Tiyarafenu ano vei vaya ánain mi yakhafen mai ma iyáantan bá ein daná amé iyan mino. 24 Máan tukhein nará erí tifesa ará amín avúavápó ben aya ven aya iyáké kama avúavá ana vá bará tifano. 25 \*Máan tiyáké ída vá manáa kéká an desá manafin ma átqruin avúavá me ampé tifano. Beni erin inka ádesí ukhen mifo erí tifesa ben ma moéken ákoná uantan maran ná ó tifano.

### *Ída Ma Tiyarafenu Anin Oyan Amin Baya Ino*

26 \*Máan tukhen mifo fura sikhein baya ma afová ure ma evaráne umeí iya vante mae mai ume ma ampiantano van ma íkun uan amín avúavá ena ída vantén mino. 27 \*Máan tinten mifo Tiyarafenu kó barufin ma o mantan má kákán ira ano ma

veni namuro kayo saman kaurin nain má anan ave ó tifanté uno.

28 \*Mana ano ma Mosesini man baya yurafúdan ma kan mano fi kanú manau ano safi ma ódaran maen ída avo uantan bákan esé anan aruan puriyaren mino. 29 \*Máan tukhantin intéa kéká anó Tiyarafenu Anin barafin daren ná arantampó dosasí iyáken ná auyen kasen ban man baya ma vei narefó ákonte ukhein maman painí iyáken ma inká tarisari amé iyain Aunan ma ankayan tiyá inten nafi mai kéká ano kákán uman uron mi varanten mino.

30 \*Mai fara vara seyo, setí ankan afová ukhékun beyantá máo sikhén mino.

“Mai anonafrá betin daídé uman amenté uno.”

“Mai yaná ma varano van iyain kéká evaráné amenté uno.” *Diu 32:35*

Máo siren evaránen temí,

“Bafan mano veyantái vei vanasi yaiminten mino.” *Diu 32:36*

31 Máan ume vá ma ayun para van oriyán ban Tiyarafenun ayampin ma orin maen mai namu ukhan kákán akhokho yanái van mino.

### *Mumunan Avúavápíñ Ma Mantaan Ákona In Baya Ino*

32 Mai ma esé arauíntá ma Yisas Karaisini kama vaya inire afova vareona yan ída vá áun nono. Moékentá uman bariyáke ma ákonáe mantakhá eona vará ovare me ineno. 33 Manáa yamú tiretí ankan avíón banasi avorá mo khaúden maen aruren uman amiyaren mino. Inká ená damú tiretí ankan mano ena kéká ma uman bariya mae oyampá mantaveya aya iya ono. 34 \*Máan tiyan nan ma siretin páken karavusíí mo ura mae maifin ma vain kéká bá kama iya mae inká tiretin nina yanasinta ma vara maeaya

\* 10:19: Ibu 4:16 \* 10:20: Mat 27:51 \* 10:22: Riv 8:30; Isi 36:25; Efe 5:26 \* 10:25:  
Ibu 3:13 \* 10:26: Ibu 6:4-8 \* 10:27: Ais 26:11 \* 10:28: Diu 17:6; 19:15 \* 10:29:  
Mat 12:30-32; 1Ko 11:27-29 \* 10:30: Íbo 135:14 \* 10:34: Mat 5:11-12; 6:20

sentisi kama ukhein danasinta inarufái yan bane se afová ukhe fase amusin manan iyare ono.

<sup>35</sup> Máan tiya ompo mai ma Tiyarafenurá ma ákona inin dáke ma mumunan iyaona avúavá ída vá me ampiyákeyá mai ma kákán miyan ma ave ukhein nará ovare me ineno. <sup>36</sup> Mantaan ákona ukhe ma Tiyarafenui anunu ánaín ma yakhafiyare maeya mai ma iyáontákein amusin baran nono.

<sup>37</sup> Mai fara vara seyo, Tiyarafenui Vompon dókifin máa sikhen mino.

“Ída ayáká ban mi  
mai ma Ereno Sikhein Banta  
ainen erinten mino.

<sup>38</sup> Máan tinten mifo funtákein  
banta ma váken maen  
tentá anan mumunan iyan  
banten mino.

Inká ten ma oyan timikhá in-  
ain kéká ída simusin uan-  
tanté uno.” *Aba*

<sup>2:3-4</sup>

<sup>39</sup> Máan tinten mifo mai ma Tiyarafenun oyan amiren ma ainan eraven ankamé iyain kéká an ída yakhé tifé umpo ákona mumunan má ma van oriyan ma o ayain baré iyain kékai vá tiféuno.

## 11

### *Ákona Mumunan Má Ma Varé Ein Kékai Vaya Ino*

<sup>1</sup> \*Inte avúavá sará mamunan ne siyan nafino. Mai ma ída onté tiferuna yana san ma afoká inté uno siré purasé ákona inin kaiyá tiferuna van mi mumunan ne siyan mino. <sup>2</sup> Pefá ma varé ein nanin banta ano ákona mumunan iyákon mai van mi Tiyarafenu ano kana ino siren amusin ukharen mino.

<sup>3</sup> \*Ma varará ma saréa afoká ukhá ma oniyá tiferuna yanasinta maen mai suufó ma ída oniyá tiferuna yanasintan baré íkan mi

Tiyarafenu ano ma seintái mai yanasinta afoká ukhen ne sé afová iyái mumunan iyá tiféuno.

### *Ebori Inoki Noa Nénei Mumunan In Baya Ino*

<sup>4</sup> \*Ebori ano ákona mumunan má baren mi Kenin esantaren Tiyarafenu ano amusin ein avúaváká íkun uan amen mino. Eborini íkun uan amin avúavá san ma Tiyarafenu ano amusin ein manon aníen béin nan puntákein banta e sen mino. Máan turen béisefái fúken mifo véi ma mumunan ukhá ein avúavá ano saréa o sisimen eriyan mino.

<sup>5</sup> \*Mumunan manon tíkan Inokin maen ída fúken ayun para van mi Tiyarafenu ano véin aviren inarufá orivin béin nan dosivaen ifáen mino. Ínqimpáké béin aviren orintéin maen Tiyarafenu ano véin nan amusin ukhein bantan baren mino. <sup>6</sup> Máan tukhein nan mi ída ma mumunan inteya ída kanaié Tiyarafenun amusin amin nono. Béi vaípá ma orono van inain kéká ano vá mumunana iyáken ná pura sen Tiyarafenu váken mi ven nan ma anunu uren dosein kéká kama miyan amé iyan mino vá tino.

<sup>7</sup> \*Noa ano mumunan iyaren mi ída afoká ukhá ein daná afoká inten ne sen ma Tiyarafenu ano afova vaya siamin maen ben oo yaiyen sipi uváden mi ve aná akhafana vá anafú basin nan má maifin ódivíkan non taven ída aren mino. Noa ma mumunan iyáken ma variyá ein avúavá ano ma ma vara ráke nanin bantai ume avúavá daídán ma vetin amaniná uman afoká ein manon Tiyarafenun avorá puntákein bantai ukhen mino.

### *Abaraamun Nú Be Aná Saran Núi Mumunan In Baya Ino*

<sup>8</sup> \*Tiyarafenu ano Abaraamun nan enafá bain bara éin amenté umpo ei varu vá me ampireya

\* **11:1:** 2Ko 5:7    \* **11:3:** Esé 1:1; íbo 33:6; Yon 1:3    \* **11:4:** Esé 4:3-10    \* **11:5:** Esé 5:21-24    \* **11:7:** Esé 6:13-7:1    \* **11:8:** Esé 12:1-5

orono ma síkan béisumunán iyáken mi ven oo yaiyen mai ma véi orin naipá ída afová ukhen para oren mino. <sup>9</sup>\*Béin ma Tiyyarafenu ano iyáontan baré ein barafin ma oriven maen toya vanta an dakhen mumunán mái yavaráe namumpin baren mino. Inká Tiyyarafenu ano ma iyáontan bantá kan Aisakin nú Yekopun nú ano yere máon manan en davaráe namumpin baren mino. <sup>10</sup> Para va Abaraamu ano mai avúavá bariyaren naino. Mai ma veni akhen ída vain baru ma Tiyyarafenu ano uvantein nan mi ákona inin kaúden ave ukharen mino.

<sup>11</sup>\*Saran nú Abaraamun nú ayokhuvinií ukhan Sara a nanin baren mifo mai ma Tiyyarafenu ano ma iyátintákein daná timinten ne siren míkanan ákonaen mumunán iyan baren mi iyampon kaen mino. <sup>12</sup>\*Máon tukhein nan mi Abaraamu maen ayokhuvinién puoren ukhen ída iyampon kaoren mifo ven ana akhafana anon ayompin ma vain ofu kayo vá inká un non akhempá ma vain eyu kayo vá an den ída yankaforen ukhen mino.

<sup>13</sup>\*Mai kéká ano Tiyyarafenu ma iyáantein danáká ákona inin kaúden oriyaren ída mana yaná baran o furen mifo mai ma iyáontan danasinta ano nentá bákan para ódaren amusin mana uanten mino. Máon ma iyan mi ena vara finté toya nanin banta anon ma varafin e varé tiféuno sen inen mino. <sup>14</sup>Máon bayá ma siyain nanin banta ano mai vetí varu anáí ma ureñ ban nain bara van mi inin onan kaúkoren mino. <sup>15</sup>Betí ankan ma erikhá ein bara van máa sen baren mai ma erikháeipá kasaen evaráen orin nainten mino. <sup>16</sup>Máon tin

nainten mifo inarufá ma moéken kama ukhan ma mató baru vain nan mi vetí inin onan kaúden oriyaren mino. Máon tiyáken mi Tiyyarafenun nan ída ayave inton betí Ayarafenu e sen ariyaren mino. Mai fara vara ino. Béi anon betí kákán baru útaádán inarufá ban mino.

<sup>17</sup>\*Tiyyarafenu ano ma Abaraamun akhenóka uan onan maen bémipín mumunán baré íkan mi Aisakin íkun uan béisumunán ameno van en mino. Tiyyarafenu ano ma Abaraamun iyáontan baré ein danasinta mantaren mi auuanon táké iyampon Aisakin íkun uan ameno van en mino. <sup>18</sup>Tiyyarafenu ano véin iyáán tiyáken máa sikharen mino, “En anin Aisakin ará pinteí en ana akhá afoká inten mino.” *Esé 21:12*

<sup>19</sup>\*Tiyyarafenu ano füká ein kéká evaráen avían mantiyain bantin Aisaki ma fúbintin maen evaráen avían mantanten ne sen Abaraamu inikharen mi furin pinte ve akhá evaráen avire mino.

*Aisaki Yekopu Yosepi Nénei Mumunán In Baya Ino*

<sup>20</sup>\*Ínaimpáké ma Tiyyarafenu ano ma Yekopun nú Ison nái vampin ma maman afokáin nain avúavá san Aisaki fura sen inidén mumunán iyáken mi maíkan iyampon avu amen mino.

<sup>21</sup>\*Yekopu ma ayokhuvinién purono van iyáken ma varampin mana vakhen ban ma monó tiyan maen mumunán iyan mi Yosepin anin kanan avu amirú en mino.

<sup>22</sup>\*Inká Yosepi ma furono van iyáken maen mumunán iyan mi máa sen ákona vaya siamikharen mino. Isipíke ma Tiyyarafenu ano Isarerí nanin banta yo avirenti sen tiyampa kayo vasá bare orono.

\* **11:9:** Esé 35:12    \* **11:11:** Esé 18:11-14; 21:2; Rom 4:19    \* **11:12:** Esé 15:5; 22:17  
 \* **11:13:** Esé 23:4; 1Kr 29:15; Íbo 39:12; 1Pi 2:11    \* **11:17:** Esé 22:1-14    \* **11:19:** Rom 4:17  
 \* **11:20:** Esé 27:27-29, 39-40    \* **11:21:** Esé 47:31-48:20    \* **11:22:** Esé 50:24-25; Eks 13:19

### *Mosesini Mumunan In Baya Ino*

<sup>23</sup> \*Mosesin anóe afóe ano mumunan iyáken mi véin ma kaúden kanú manaú biyontá béin aúpá aúmamádan baren mino. Ti-yarafenu ano enará ukhein iyampon mi míkanan amikhan pasen kin mano inte avúavasá bariyan nafi mai van ída feren mino.

<sup>24</sup> Mosesi ma e anoní iyáken bémipin mumunan bákán mi véin nan ída kin Feron araun anin ne sen arano van inikharen mino. <sup>25</sup> Umei amusin mano ma ainen mo kípé iyain pinté me ifá uren mi Tiyarafenu vanasi ano ma variyain uman barano van inikharen mino. <sup>26</sup> Béi ma inikhá ein mai Yisas Karaisin naro siren ma uman baran mi kama ukhen mifo Isipíkena kama yanasantará ma o ánoní inan ída inikharen mino. Mai fara va ino. Mai ma Tiyarafenu ano moékakhein miyan ma amin nain nan mi inin onan kaúkaren mino. <sup>27</sup> Mosesi ano mumunan mái váken kin nan ída feranton Isipi bara me ampireñ oren mino. Oriyákan ara ara uman mano ayanafá afoká iyan mifo mai ma aúpá bain Tiyarafenurái inin onan kaúdáken mi oren mino. <sup>28</sup> \*Isarerí kéká ano Avo uantan avúaváká dafiben ona yaará nare fédantin aruan ma furin enisori ano vetíi esé kena ain iyampon ída arino van Mosesi ano mumunan iyáken betin ákonæn baya siamen mino.

### *Isarerí Nanin Bantai Mumunan In Baya Ino*

<sup>29</sup> \*Isarerí nanin banta ano mumunan iyáken mi Nararé Non ne ma siyain un non aúbaná pe ukhein barará ma oreinién ena ufá e kháden ódivín mi Isipi kéká ano vetin ánain dakhafen oriyaren minó ano non ufureñ puren mino.

<sup>30</sup> \*Isarerí kéká ano mumunan iyáken mi yan manápá ifo afápá kan un kádan damú ma Yerikó baru eúkiyain má kafi ma uvantá ein mano un baráken eraven mino.

<sup>31</sup> \*Pamúku nanin Reapi ano mumunan ukhareñ mi mai ma vei varu ráke nanin banta ano ma Tiyarafenu vaya átakharé iyaren ma fureimpin bái ída furen mino. Mai fara va ino. Mai ma afurin bantá kan ma aronaí uren avían aúmanantáká eintá ino.

<sup>32</sup> \*Máon tukharen mifo mai inte vaya kayó ena vantirá tiamentera funo. Mai ma Kidioni fi Baraki fi Samonsoni fi Yefta fi Deviti fi Samueri fi áa inká sakhanampa vanta kayo fi ma mumunan iyá ein baya kayo mai van mifo ída afokhan bain ída siamenté uno. <sup>33</sup> \*Mai vanta kayofin mi mumunan bákán ída ma kamaen dafisein kamanin kayo maman bararasí uren puntákein avúavá póké banasi aviren oriyaren mi mai ma Tiyarafenu ano iyáantán baré ein daná o varen mino. Mai kéká anon raioni kayo oorá páken mi

<sup>34</sup> \*ira ma varúten kiyá eimpin dusimiyáken inká baenatífó ma aruan purono van iyan maen aúpá karan noren mino. Betimpin ma ákona ída varé ein mái damú anan ákona mamaren namuro aren dakhafin karan orera iyaren mino. <sup>35</sup> \*Anasi arinta ano yetíi kéká ma füká ein pinte evaránen oniyaren mino. Oniyákan manáa kéká aruren betin amaniná ara ara uman kaiyan mifo Tiyarafenurá mumunan iyáken mi furin nan peden ma véin me oyan amiren ma kamaen ban nan ída inen mino. Mai ma fükaren ma ínaimpáké evaránen e mantaaren ma kamaen amusin pinté o van nain nan mi vetíi ákona inin kaiyaren

\* **11:23:** Eks 1:22; 2:2    \* **11:28:** Eks 12:21-30    \* **11:29:** Eks 14:21-31    \* **11:30:** Yos 6:12-21    \* **11:31:** Yos 2:1-21; 6:21-25; Yem 2:25    \* **11:32:** Ano 6:11-8:32; 4:6-5:31; 11:1-12:7; 13:2-16:31; 1Sa 16:1-1Ki 2:11; 1Sa 1:1-25:1    \* **11:33:** Dan 6:1-27    \* **11:34:** Dan 3:23-27  
\* **11:35:** 1Ki 17:17-24; 2Ki 4:25-37    \* **11:36:** 1Ki 22:26-27; Yer 20:2; 37:15; 38:6

mino. <sup>36</sup>\* Manáq kéká máká maáká uren ayankun dafiyó pó ankáden au yo yavarava fiyan inká ena kéká seni anampó amempin kuren karavusi namumpin mo kaiyaren mino. <sup>37</sup>\* Manáa kéká onámanápó ankamádan puriyákan manáa sofó aúbán dana siyáken inká manáa vaenatífó tíka sáka in puren mino. Máan tiyákan manáa kéká ano sipisipi au fi memé au fi yo siren maen aui danasí uren arafan nóken kákán uman bariyaren mino. <sup>38</sup> Máan tiyáken mai kéká ano vanta ída van kámá barafa safi anuyon pimpa safi yon aimpin nafi inká bara aimpin nafi aúmanen noren mino. Mai kéká ma variyá ein avúavá ano varará nanin bantai avúavá esantakhen mino.

<sup>39</sup> Mai ma siaméku ineona kéká ano mumunan eintái mai uman barákán Tiyarafenu ano kanaiéne sen mifo mai ma iyáontan baré ein danasinta fura sen ída manten mino. <sup>40</sup> Mai fara vara seyo, mai ma vetin ameno siren ma iyáontan bain daná mai moéken kama yanái Tiyarafenu ineinefin bain tetin má ma mai yoran dóan kíparékun maen manápasién mi mai miyan timinten mino.

## 12

*Yisasintá Ana Ma Inin Onan  
Kaúden Ban Ma Ventá Mumunan  
In Baya Ino*

<sup>1</sup>\* Máan tukhan mai nanin bantai ákona mumunan mano ma setin aní ukhein manon iyaren eúukhen mino. Máan tukhein nan mi namu avúava sintá ano ma setinti aasá iyariyan ma fákaan ákona inain mai umé yanasá karúdaré mai ma Tiyarafenu ano yóde vá barano ma sikhein daná tiyampa é tava uresá o vará tifano. <sup>2</sup>Yisasi ma setisi mumunan ana vain ná kakhábé tiféku ná tivire orino. Béin arono

siren ara ara uman ben amaniná kaúden ankayanten aufen akhare siyákan Tiyarafenu oo yaiyen daa unkamádantá ayave furirien mino. Máan ten mifo amusin danasinta vákan mai varano van mi máan turen Tiyarafenu ayan kurompá kin karáká kumanten mino. <sup>3</sup> Ume nanin banta ano ma véin amaniná ída funtákein avúavasí ein nará ovare me inesin ná mai ano ída avesara aminti vá oyan ameno.

*Tiyarafenu Ano Ma Ve  
Akhafan Funtarano Van Uman  
Ameín Baya Ino*

<sup>4</sup> Ume avúavá bá ma aruvimpin mana ano ída fureya ei nare vanakha ono.

<sup>5</sup>\* Te sikhafana ono ma sen ákona uantákaré ein baya áunta fono. Béi máa sikhén mino.  
“Te sanin noe, Bafan mano ma man baya siamintiya mai éin mi funtariyan mifo ída vá inian namu uantáde vá tisiyá uno sire ará namu ono.

<sup>6</sup> Mai fara vara seyo, Bafan mano ma anunu ukhein kéká man bayafó puntariyáken inká te sikhafana e ma siyain kéká yafiyosí uren ankamé iyan mino. *Pro 3:11-12*

<sup>7</sup>\* Tiyarafenu ano ve akhasí urá bátifé umpo uman ma variyá tiferuna vará béis anón man bayafó tetin puntariyan ne vá té tifano. Iye anó man bayafó be akhafana ída funtare ne siyá inikhe fono.

<sup>8</sup> Tiyarafenu ano ve akhafana funtaré iyan mifo onesin ma saretin aúban ma mai ayúavá ída vanti vá mai afova sá ono. Tiretí ankan ída ven akhafana ompo aasá iyampon mi vaonon tikhen mino. <sup>9</sup> Bararáke sifóeyan mano ma setin puntará maé betíi vaya iné iyá tifé umpo inté urerá inaru fáke Sifóen oo yaiyé ben aránaópá oriyará para vá tifante rafuno.

\* 11:37: 2Kr 24:21 \* 12:1: 1Ko 9:24-25

\* 12:5: Yop 5:17; Rev 3:19 \* 12:7: Diu 8:5

<sup>10</sup> Tetin tifóeyan mano ma inin ma kama ukhein avúavá máan tanáa oranará tetin puntaré iyan mifo setisi kama avúava san mi Tiyarafenu ano funtaré iyain mino. Mai fara vara ino. Bei kantasí ukhein avúavá barano van mino. <sup>11</sup> \*Puntáden ban man baya ma siamiyantiya ída amusin inompo uman manan baran nono. Máan tukharen maen mai avúavá ma afová ukhein kéká anon ínaimpáké kama yunan ma yuyaseinén kama khumanin o yosé iyan mino.

<sup>12</sup> \*Máan tukhein nará mai ma avíkiyain ayan puríkiya vá inká mai ma antu antu iyain arantatasá mantaan ákona ono. <sup>13</sup> \*E arantan ma orin nain aa vá aní ure kama uresin ná ai ayan ma namu ukhein kéká ano ma en dakhafinten maen ída e yupóen ankam-inten mifo evaránen kama inten mino.

### *Tiyarafenui Vaya Ma Átakharé Iyái Páke Ma Sikhein Baya Ino*

<sup>14</sup> Banasi vá ma ará kusen ban má inká avusese en kantasí ukhen ma van avúavá basá ákona e varano. Para vara seyo, ída ma kantasí ukhein kéká ano ída kanaíen Bafan onanten mino. <sup>15</sup> Tiretí ankan pinté mana ano íta yaa aran ma imá deiní esin manáa ano eraven ankamen Tiyarafenui sarisari ída varanafo yafian ná ákona ono. <sup>16</sup> \*Mana ano famúku avúavá iyá intin pefá ma Iso ano Tiyarafenun oyan amiren ma vei esé iyampon bí ma sító dunantá ma amiyan bareiní inafo yafian ná ákona oro. <sup>17</sup> \*Máan turákoren ínaimpáké mai avu evaránen barano van en mifo ída kanaíen mino. Mirenén aran íta uan amiýákan iffí den mifo evaránen ma sirun noe siren ma mai avu varampin ída kanaíen mino.

\* **12:11:** Yem 3:17-18    \* **12:12:** Ais 35:3

\* **12:17:** Esé 27:30-40    \* **12:18:** Eks 19:16-20; Diu 4:11-12

5:22-27    \* **12:24:** Esé 4:10; Ibu 8:6    \* **12:25:** Ibu 2:1-3; 10:26-29

### *Inarufá Bain Yerusalem Ádé Inká Ore Ono Ma Sein Baya Ino*

<sup>18</sup> \*Mai ma Sainaí anu yompin kákán ira khiyákan titípa ukhan ma kákán uva uaren baékon uniyan ma Tiyarafenu ano Isarerí kéká ma vei man baya ameintá ída orikha rono. <sup>19</sup> \*Mai fara vara seyo, ufen mano kákantá asin maen Tiyarafenu ano vetin má baya síkan akhokho van uaren ben nan tesin ída setin má baya sino sen mino. <sup>20</sup> Máa síkan Tiyarafenu ano vetin tiantan e afánen manáa nentá oriyákan temí, “Manasafúna ano ma anuyon me aruvinti vá onámanápó ankamesin ná purino.”

*Eks 19:12-13*

<sup>21</sup> Mai avúavá ano Mosesin akhokho amíkan béis máa semi, “Téin tivinant den tikhokho fiyá uno.”

*Diu 9:19*

<sup>22</sup> Máa síkan maen Saioní anu yontá ma ayun para vain Tiyarafenui auyen Yerusalemí baru ma inarufá baintá inka ere ono. Kokhon tauseni enisori kayo ano ma kéká ukhen amusin iyaimpin mi e va ono. <sup>23</sup> Tiyarafenui eséke iyampon kayo ma inarufá aví uvantá ein kékái átarufin mi ere ono. Mai ma minó nanin bantai avúavá ma yaimin nain Tiyarafenu vá inká banasi ma evaránen avíden ma maman kama uádiyain Aunan kayo vá <sup>24</sup> \*inká Tiyarafenu vá barará nanin banta vá aúban ma váken auyen kasen bani man baya ma maman ákona uantan banta Yisasin má baípái ere ono. Eborini nare ano ma fefá berai siyan ma anona vá uman ameno ma seinén beni nare ano ída máa sinten mifo moékan tarisari uren ma ume arúantan nare vaípái ere ono.

### *Tiyarafenui Vaya Ma Ída Átakharé In Baya Ino*

\* **12:13:** Pro 4:26    \* **12:16:** Esé 25:29-34

\* **12:19:** Eks 20:18-21; Diu

10:26-29

25 \*Tiyarafenu ano ma siren tin tiamiyain baya vá inireya mai ánaín bákuromo. Mai fara vara seyo, fefá ma ma vara ráke vanta Mosesi ano ma vaya varen oríkan ma Isarerí nanin banta ano átakharé uren maen uman barein mino. Máon tein mifo inaru fáké ma vaya siyain banta avaya ma ída iné tifanté mai inté ukhein uman ná bará tifante rafuno. 26 Tiyarafenu ano ma Sainaí anu yontá ma vaya síkan maen bara vái khayaen mifo saréa ma sian damuádan ma vain mai máon mi sikhen mino. “Enádá ma vaya sékun maen minan ayon má bara vái antu antu inten mino.” Aka 2:6

27 Máon ma sikhein mai minan ayontáke yanásinta vá ma varáke yanásinta vá ano kípanten mifo inaruráke yanásinta ano fara vanthen mino.

28 Máon tin nain nan mi mai ma ída namuin baru ma variyá tiferá Tiyarafenu van péde béin tusu siantadé amusin amerá bentá ana monó té tifano. 29 \*Mai fara vara seyo, Tiyarafenu maen afá iran báken minó danái kaan kaurinten mino. Diú 4:24

## 13

### Kípan Baya Ino

<sup>1</sup> Ena vá ma ará amin maran in avúavá sá para fákoressin bano.

<sup>2</sup>\*Ena fáke vanta ma aviren mápin mo khaúden kama uantan avúavá ída vá áun nono. Mai fara vara seyo, fefá ma mai avúavá ma variyá ein kéká ano ída afová inton enisorí kayo aya ukharen mino.

<sup>3</sup> Karavusifin ma vain kékásará ineine iyáke vá beti ma variyain uman bariya vá inká manáa ano ma ena kéká uman amiyanti mae mai ma variyain uman ná ayaeya varano.

\* 12:29: Diu 9:3    \* 13:2: Esé 18:1-8; 19:1-3; Rom 12:13    \* 13:4: Efe 5:5    \* 13:5: Yos 1:5  
\* 13:7: 1Ko 4:16    \* 13:9: Rom 14:17    \* 13:11: Riv 16:27

4 \*Ábasuí impin áesin ná puntákanti vá míkanan mano ven oo yaiyin maran iya vá ben nan anunu in maran ono. Ena nanin banta vá ma kiyafó maran en inká ena ana safí avafun nafi ma varen asuse en noin kéká Tiyarafenu ano yaíden kó tiantanten mino.

5 \*Moni san ma anunuin avúava sará periyáke vá mai ma yákeona máo vará kanaí ukhé uno seno. Mai fara vara seyo, Tiyarafenu ano máo sikhen mino,

“Ída uron mi éin me ampiré nentá oré inká

ída uron mi éin táunonté uno.” Diú 31:6, 8

6 Máo sikhein nan mi setí ankan ída feran kasaé máo sen té uno. “Bafan mano séin tiyain bantan bantí mai van ída feranté uno.

Barará banta ano sen timaniná náisá intéi vae.” Íbo 118:6

*Yisas Karaisini Avúavá Ano Fefa  
Safi Saréa Fi Áa Ena Ena Yamu  
Safi Mai Manaí Anan Ukhén Banten  
Mino*

7 \*Ei yafisin banta kayo ano ma Tiyarafenu vaya sikhá ein nará ovare me ineno. Betin pinté ma kama avúavá erikhein nará iniyáke vá beti ma iyainí e vá Bafantá mumunan ono.

8 Yisas Karaisini avúavá ano fefa safi saréa fi áa ena ena yamu safi mai manaí anan ukhen banten mino. 9 \*Máon tukhanti ída vá áesin ná ara ará kampun afova ma amin mano sirenii ineine maden asuse ino. Tiyarafenu enará ukhein tarisari anon tiretí monó tin avúavá ákona uanté iyan mifo yunantá ma are ukhein man baya finté ída erikhen mino. Máon tukhan mai ánaín ma vákurein kéká ída aya ukharen mino.

10 Monó ánon banta kayo ano ída kanaén arata yaró ma kaiyain dunán nanten mino. 11 \*Ume ampiantano siren maen monó

ánon banta kayoi ánon banta anon tafúna kayoi nare varen mi Moéken ma Kantasí Ùkhein Karafarampin ódiyaren mifo mai safúna kayo au varufái ira saman kauriyaren mino. <sup>12</sup> \*Máan tiyaréin mi inká Yisasin má dere vanasi maman kantasí ono siren kákán barui yafu ona akhempá bei nare vanaen mino. <sup>13</sup> \*Máan tukhein nan mi erí baru akhempá aravuvé mai ma véi ayave vareiní é bará tifano. <sup>14</sup> \*Mai fara vara seyo, ma vara maen mai ída setisi mató baru ifo inarufá ma kákán baru váken ída erikhein nan mi yosiyá tiféuno.

<sup>15</sup> \*Yisasini siyain tasá tetisi monó tin avúavápó ena ena Tiyarafenun íkun uan amiyá beni kakhakhen puntákein bí tian dákó ó tifano. <sup>16</sup> \*Manáu yana san ma o afasí iyain kéká ma kama urem ma e ina yaná ma avarí in avúavá ída vá áun nono. Para vara seyo, mai avúavá anon Tiyarafenun moéken amusin amé iyan mino.

### Kípan Baya Ino

<sup>17</sup> \*Tiretíi monó tin avúaváká ma yafikein ayafa kayo ano ma siamin nainisá oro. Tiretíi aú bukhafa ma maman puntáontan doran mí vetíi yoran bákán inká mai yorarí ma iyáin nain mai vetí anón Tiyarafenun tiaminten mino. Betin oo yaiyesin ná ída arunaná bá doren ná amusin masá dorano. Mai fara vara seyo, ída ma amusin pinté doriyá inti mae ída uron mi siretin aya inten mino.

<sup>18</sup> \*Tetisi ineine kama ukhá inká ena ena yamú kama avúavá ana varano van iniyá umpo Tiyarafenun amúkuan amesin ná tetin tiya ino. <sup>19</sup> Téin nan amúku sintesin ná ainen aaí intirá tiretí ankan baonafá orono.

<sup>20-21</sup> \*Máan tukhein nará mai ma kusin amin Tiyarafenú ano ma setisi Bafan Yisasin ma masí pinte orun avian mantein mano vá mai ma veni anunu ángan dakha-fono van ma iyaona vá ákona uantano. Béin ma amusin ameren avúavasá Yisas Karaisini ákona finté uaren ná tiretimpin dákó ino. Yisas Karaisi maen sipisipirá dafisin bantan báken bei nare vanaren auyen kasen ban man bayan ákonte ukhen mifo ena ena vá béin aví daní iyáke vá kákán bí ameno. Pura ino.

<sup>22</sup> Mumunan tiyofi sífá tiváeyan noe, ma ma asíka vompon ma uvaman ameruna finté vá kama e inire afová ono.

<sup>23</sup> Tetí ankan tifá tiváe Timotin inka karavusi fintena útúantán bain ainen ma erintí maé avíaré tiretin o onano van oronté uno.

<sup>24</sup> Tiretí ankani yafisin kéká bá mumunan nanin banta kayo vasá tenti ará kusin baya siameno. Itarí ma vain monó nanin banta ano ará kusin baya siádan tireti ankan baonafá oren mino.

<sup>25</sup> Tiyarafenú sarisari ano vá tiretin má bano.

\* **13:12:** Yon 19:17    \* **13:13:** Ibu 12:2    \* **13:14:** Ibu 11:10, 16; 12:22    \* **13:15:** Íbo 50:14,  
23    \* **13:16:** Fir 4:18    \* **13:17:** 1Te 5:12    \* **13:18:** Apo 24:16; 2Ko 1:12    \* **13:20-21:** Yer  
32:40; Isi 37:26; 1Pi 2:25

# YEMISI MA UVANTEIN BOMPON MINO (Yemisi)

## Yemisi Vompon Ma Uvanteí Pákenai Afova Vaya Ino

*Ma vompon ma uvantein banta ino.*

Yisasin afá ma Yerusaremí barurá báken ma mumunan kayoi ánon bantai ukhá ein banta Yemisi ino.

*Uvarein orana ino.*

AD foti-faipi (45) ráké foti-naini (49) ráké mai aúban mino. AD foti-naini (49) fin Kanisorí átaru fákakhan mino. Mai damú ma ákonaen tikharé ein baya kayo ída ma vompompin uvanten mino.

*Ma vompon ma uvantein baru ino.*

Yerusaremí kákan barurá inon ten iniyan mino.

*Ma vompon ma uvaman amikhein kéká ino.*

Yutan monó nanin banta ano ma Parestatíní bara me ampiren ma karan orera ukhá ein kékái amikhen mino.

*Nái ana vará ma vompon uvanten nafino.*

Esé araí in bompon ma uvanteimpin Yutan monó nanin banta ano Tiyarafenu man baya ánaín puntáden bákurino van ákona uantiany inká uman erintin ma mantaan ákona inain bayan afova amikhen mino. Yisasi ma anuyontá monó baya siameinien mi Yemisi ano monó tin avúavá ma ara ara aa ma vain mi monó nanin banta siamikhen mino. Máan ma in manon monó tin

avúavápin mumunan mano kama yoran afoká iyan ne sen aní ukhen mifo mumunan manon kantasí ukhé uno ma sin mano ída ino.

*Yemisini Amusin Baya Ino*

<sup>1</sup> \*Tiyarafenu vá Bafan Yisas Karaisin máí ída miyan baran doran banta séi Yemisi anon ma vompon uvare uno. Mai ma siyan míkan mifo sirantan kan orun kádan (12) anan kéká ma Yutan barafin bain pinté ma ena varafá meren mana mana ukhein pimpái ma vompon uvamádé kun oreraen mino.

*Akhenókain Mano Ma Mumunan Maman Ákona Iyain Baya Ino*

<sup>2</sup> \*Mumunan tiyofi sífá tiváeyan noe, uman mano ma siren amariná ma yáko intiya mai van amusin mana in daná ino vá te afová ono. <sup>3</sup> \*Mai fara vara seyo, sirení ankani mumunan ma akhenóka uan onan nain manon tireti mumunan moéken ákona uantantiya mantaan ákona in nono. <sup>4</sup> Máan tukhen mifo áin ná mai avúavá ano orun potino. Para vara seyo, máan avúavá ano ma fara oriyan báken mi sirení mumunan pura sen ákona uantantiyan akhenókafin ída erave ankamín nono.

*Amúkin Avúava San Ma Siamein Baya Ino*

<sup>5</sup> \*Tiyarafenu ano ma varano sikhein daná ma afová ono van ma in nain mano vá mai ma uman nan ída ininton amusin iyáken amiayin Tiyarafenun inaesin ná amino. <sup>6</sup> Máan tukhen mifo véin ma ina ono sinteya vá mai véi simintéi ina iyá uno siyákeya vá ina ono. Para vara seyo, kokhon ineine ma iyain kéká ano mai ma uva ano ma non karantó ein an mi iyian mino. <sup>7</sup> Máan avúaváka ma van nain nanin banta ano ída vá

\* **1:1:** Mat 13:55; Apo 15:13; Kar 1:19; 1Pi 1:1  
Pro 2:3-6

\* **1:2:** Rom 5:3-5    \* **1:3:** 1Pi 1:7    \* **1:5:**

Bafan mano mana yaná timintéí uno siren ineine ino.<sup>8</sup> Máon kékái ineine ano mo asuse ukhantín pasen beti ma varan nain danasinta ano non ma karantó en onóbe enóbe ein an manan danten mino.

*Ona Ída Van Kéká Bá Kokhon  
Ona Van Kéká Bá Vaya Ino*

<sup>9</sup> Mumunan kékái ano ma minó dana san o afasí ma iyanten ná amusin ino. Para vara seyo, Tiyarafenu ano máon kékái kákan bí amiyan mino. <sup>10</sup>\*Inká mai ma minó danasinta ma kain bain kékái ano amusin ná ino. Para vara seyo, Tiyarafenu ano máon kékái oman bararasí urantin mi katafin ma vain paravan mano ma mo khafureiní inten mino. <sup>11</sup> Para vara seyo, áau édaven ma ákonaen á kan maen mai ma kamaen ki-yaré ein paravan mano ma ainén mo kafuré iyain an mi yen mai ma kokhon ona ma kain bain kékái ano vetí ina yanásinta vá ainén o aiyoranten mino.

*Minó Kama Yanasinta Ma  
Eriyain Mai Tiyarafenun Pinté Ana  
Ino*

<sup>12</sup> Mai ma akhenóka iyákan ma maifin mantaan ákonaé iyain kékái Tiyarafenu ano avábá uanté iyan mino. Para vara seyo, maifin ma mantaan ákonq ukháré inain manon mai ma Tiyarafenurá ma anunu ukhein kékái ma aunan bain kamamó iyáantan ma vain baranten mino. <sup>13</sup> Inká akhenókafin ma orivinona ano ída vá tiyákeyá Tiyarafenu anon téin akhenóka uan oniyan mino seno. Mai fara vara seyo, Tiyarafenu ano namu ayúavá barano van mana ano ída véin akhenóka uan ontein bantin béri ano ída kanaén banasi akhenóka inten mino. <sup>14</sup> Máon té iyan mifo setin tirá mantá ma siran niyaruna yaná anoi akhenóka in avúavá maman dákó iyá tiféuno. <sup>15</sup> Mai ma akhenóka in avúavá ano ma éimpin afoká uven

e yarifaáda ma umeí iyaona anon purin maman dákó é iyan mino.

<sup>16</sup> Máon tukhein nan mi mumunan tiyofi sífá tiváeyan noe, ída vá áesin kampun baya fóké tiretin do aviren tavifá orino. <sup>17</sup> Ayompin báken kano van ma oon kayo uvamádan ma vain danasinta Afóe Tiyarafenu vaipákéi kama yanásinta ano eriyákan béri ída aman mano ma onóbe enóbe einí é iyan mino. <sup>18</sup>\*Bei fura vaya fókéi setin maman be akhafanaí uren minó danasinta ma uvantein amaninái setin esesi urá bá tiféuno.

*Bayá Inire Ma Mai Ánain  
Dakhafen Doran Bayá Ino*

<sup>19</sup> Mumunan tiyofi sífá tiváeyan noe, minó baya ma sin nain kama e inireya ída vá aine vaya siyáke vá aranan ono. <sup>20</sup>\*Para vara seyo, aranan ma in avúavá ano ída kanaíeyá Tiyarafenu ma anunu ukhein avúavá maman dákó inono.

<sup>21</sup>\*Máon tukhein nan mi namu avúava sintá ma saretin áupin ma van nará pédeya Tiyarafenu ano ma vei vaya saretin áupin doádan bain ná kama ureya mai ánaín dakha fono. Para vara seyo, mai ákona anon kanaén tiretin aya uren purin pintena evaránen avi-ranten mino.

<sup>22</sup>\*Máon ma ukhein nan ovare vá me ineno. Mai vaya kayo ánaín dakhafano van mi siamiyan mifo iniya ana vano va raino. Ída ma mai vaya kayo ánaín dakhafinteya mai eyantái óen banta an daveya eyan mi máka siya va ono. <sup>23</sup> Para vara seyo, vaya ana inire ma ída mai ánaín dakhafintye mae mai kamufin ma sretii auná onein an diya ono. <sup>24</sup> Tiretiyan ódareya ma oren nan maen manádái áuné iyan mino. <sup>25</sup>\*Máon tukhen mifo mai ma ume finté ma Tiyarafenurá funtákein man baya ano

\* **1:10:** Ais 40:6-7    \* **1:18:** Yon 1:13    \* **1:20:** Ekr 7:9    \* **1:21:** Kor 3:8; 1Pi 2:1    \* **1:22:**  
Mat 7:26; Rom 2:13    \* **1:25:** Rom 8:2; Yem 2:12

ma útúantaya ma vaona ma oman afova suron ureya ma mai ánaín dakhatiyáke ma inká mai ma ineona vaya ma ída áun esin maen mai van Tiyarafenu ano avu uantanten mino.

<sup>26</sup>\*Monó nanin banta uno sire ma sretí ankan amafintá ma ída yafisinte mae mai sretiyantái óen banta an daveya eyan máká maáká esin mi sretí monó tin mo asuse en beni nan aran ída vantten mino. <sup>27</sup>Teti Sifóe Tiyarafenun avorá ma fura sen monó nanin bantaí ukhé banu ma sinte vá aso iyamporinta vá inká baré naniñ kayo vá ano ma umampin bantiya vá betin aya iyákeya ída vá áesin ná ma varákena yanásinta ano setin máden asuse ino.

## 2

*Aronará Ana Ma Kama Iyai  
Pákena Van Ma Sikhein Baya Ino*

<sup>1</sup>\*Mumunan tiyofi sifá tiváeyan noe, manáá kayo van mana anunu ureya ma ena kéká oyan amiyáke mae mai inte ana vará teyá tetisi kakhathein Bafan Yisas Karaisintái mumunan ukhé uno siya rafono.

<sup>2</sup>Tiretií átarufin ma mana vanta ano kama ukhein auí daná bá kákán miyantá bain ankaroro vá uren erintin ma inká ena vanta ano yáka ráka ukhein auí daná ma uren erinti ma <sup>3</sup>kokhon ona vain banta van tiamesin kama karáká kumamintiya ma inká ona ída vain banta van ma mesapá o mantakheya vanó tinte fo áa varará kumanenó tiyanteya fo mai <sup>4</sup>sretí ankan mi yaimin bantíi uveyan tiretií namu ineine fóké banasi yaimiya ono.

<sup>5</sup>\*Mumunan tiyofi sifá tiváeyan noe, ma vaya vá ineno. Ma varafin ma ona ída vain nanin banta van mi mumunampin moéken kákání

inten ne sikhen mino. Mai kéká anon mai ma Tiyarafenu anunu iyain kéká ma iyáantán bain dafisimpin orintéin aní ukhen mino. <sup>6</sup>Máan tukha ompo sretí anon mai ma ona ída van kéká ayave amiya ono. Kokhon ona ma vain kéká anon tiretin nina yaná máden asuse uren avian kópin kaiyan mifo mai van ída afová intoyá kama iyá ba rafono. <sup>7</sup>Mai ma Tiyarafenu ano ma Yisas Karaisini kama ví ma maman tiretin amaniná ma kaein banta mai vetí ankan manon oyampá baya sein mino.

<sup>8</sup>\*Mai fura ino. “Eyan nan ma anunu iyaonaí e vá ena van anunu ono” *Riv 19:18*

sikhein man baya ma Tiyarafenui vompon dókifin bain ánaín ma fura se vákurinte maen pura yanásí in-ono. <sup>9</sup>\*Máan tukhen mifo mai ma ona vain kékái vaya ánaín mana ma yakhafinte mae mai man bayan durafúde umeí eono.

<sup>10</sup>\*Para vara seyo, iye anó minó man baya yakhafiyáken ná mai fintena mana man baya yurafurinten nafi mai Tiyarafenui minó man bayan durafuren mino.

<sup>11</sup>\*Para vara seyo, mai Tiyarafenu ano anan temi, “Ída vá pamúku avúavásí ono.” *Eks 20:14*

Inká ena máa sikhemi, “Ída vá banta aruan purono.” *Eks 20:13* Máa sikhanti ma sreti ma ída famúku avúavásí iyáke ma vanta aruan purinte mae mai man bayai yurafure ono.

<sup>12</sup>\*Máan tukhantiya vaya ma sin nona fi áa nái avúavásá barante fo mai ovare vá me ineno. Mai ma avábá bain man baya ano ma ume fintena utúantaya ma vaona anoi kó tiantanten mino. <sup>13</sup>\*Mai fara vara seyo, ena nanin banta van ma ída arunan uantiyaré esin maen

\* **1:26:** íbo 141:3   \* **2:1:** Apo 10:34; Yem 2:9   \* **2:5:** 1Ko 1:26-28   \* **2:8:** Mat 19:19; Kar 5:14   \* **2:9:** Diu 1:17   \* **2:10:** Riv 19:37; Nam 20:7-12, 24; Mat 5:19   \* **2:11:** Rom 13:9; Diu 5:17-18   \* **2:12:** Kar 6:2; Yem 1:25; 1Pi 2:16   \* **2:13:** Mat 5:7; 18:32-35

Tiyarafenu ano éin ída arunan uantanten mino. Máan tinten mifo ena van ma arunan uantiyaré esin maen mi Tiyarafenui arunaná ano vei kó pintena siretin ampiantan ten mino.

*Mumunan Mano Ma Kama Avúavá Ída Maman Dákó Inten Maen Mai Mumunan Púken Mino*

<sup>14</sup> Mumunan tiyofi sifá tiváeyan noe, siretí avúavá ano ma ída kama ukhantiya mai nái ana vará teyá tetí ankan mumunan ukhé tiféuno siya rafono. MÁAN mumunan mano ída kanaíen mana nanin banta aya urantin Tiyarafenu ano aviranten mino. <sup>15</sup> \*Afá aváe ano fi áa ayofi ano fi ma yungan má auí daná ba san ma iyantiya ma <sup>16</sup> mana yaná ída aminton ma inka ino mémuká bákeya kama e yungan niyasin ná Tiyarafenu ano avábá uantano ma sin nona ano mana kama yanasá maman dákó inte fono.

<sup>17</sup> MÁAN tukhanti afovasá ono. Mumunan iyáken ma kama yorarí in avúavá ma ída vantin maen mai mumunan mano mo faen danasí en purein an mi yakhen mino.

<sup>18</sup> \*Manáq ano kokhon ineine uren máa sé iyan mino. “Manáa kéká ano kama mumunan má bákan maen inká ena kayo ano kama yorarí in avúavá bá ban mino,” siya ompo séi siretin tiamenté uno. Tiretií kama yorarí in avúavá ma ída vantí maé tiretí mumunan ída onanté umpo sesi kama yorantái sesi mumunan aní ékuya onan nono.

<sup>19</sup> Mana Ayarafenu anan ban minó tireya sretí ankan mumunan iya rafono. Mai fura ino. Namu aunan kayo vá ano yeren mumunan iyáken avinantampin ban mino. <sup>20</sup> Tireti óen banta kayo oe! Kama yorarí in ma ída

vain mumunan mano ma mo namuen asuse ukhein mai inte yamusá afová inte rafono.

<sup>21</sup> \*Teti sinafu Abaraamu ma ve anin Aisakin ma on kará nará uádantá ma Tiyarafenu íkun uan amein avúavá san ma Bafan avorá puntákein bantae ma sikhá ein nan ídá ovaré me iniya rafono.

<sup>22</sup> \*Tireti ankan afovasá ono. Beni mumunan má kama yorarí in má ano manafini uven doran mi veni mumunan mano mo fura yanasá en mino. <sup>23</sup> \*MÁAN tukhan mi Tiyarafenui vompon dókifin ma varé ein bayai mo khanaíen mino. Mai vaya ano máa sikharen mino. “Abaraamu ano Tiyarafenurá mumunan uran mi véin maman puntákein banta e siran,” *Esé 15:6* banasi ano yere véin nan Tiyarafenui kama arona e sen ariyaren mino. <sup>24</sup> MÁAN tukhein nará afová ono. Mumunan mana ma in mano va Tiyarafenu avorá tetin maman puntákein nanin bantaí iyan naifo setisi kama yoran má ano yeren máan té iyan mino.

<sup>25</sup> \*Pamúku nanin Reapin má dere anon mai avúavá tetin aní ukhen mino. Afurin banta kéká ma avían aúpá kaúdákaren ma sianta ena aí páké uaren ma evaránen orein avúavá anoi Tiyarafenu avorá puntákein naniníen mino. <sup>26</sup> Kama yorarí in mumunan ma ída vantin maen mai mumunan mano furein an mi yakhen mino.

### 3

*Oorá Ma Yafisin Baya Ino*

<sup>1</sup> Mumunan tiyofi sifá tiváeyan noe, monópin ma vanasi afova amin nanin bantaí ono van kokhon mano ída vá ono. Mai fara vara seyo, vanasi ma yaimin damú ma afoká intin maen mai ma afova amin nanin bantaí ukharé inain kékái Tiyarafenu ano umantá daiminten mino.

\* 2:15: 1Yn 3:17    \* 2:18: Kar 5:6    \* 2:21: Esé 22:9-12    \* 2:22: Ibu 11:17-18    \* 2:23: 2Kr 20:7; Ais 41:8    \* 2:25: Yos 2:1-21; Ibu 11:31

<sup>2</sup> Tetí minó ano kokhon dádái namu avúavápin eravé tinkamé iyá tifé umpo intéa kéká anó oorá dafisinten nafi mai kayo anon monó avúavápin anoní ukhen pasen be aurá kamaen dafisinten mino. <sup>3</sup> Osin maen kákán tafúná ifo sító aenifó ma véin oofen damurákei kasae o amáe e amáe iyasin eni anunu ángan dakhafinten mino. <sup>4</sup> Inká sipirá dere vá afová ono. Mai maen kákán daná bantin inká kákán uva iyáken o mamáde e mamáde iyantin mifo sító danka ano ma o mamáde e mamáde ma inaintá anan orinten mino. <sup>5</sup> Máan manan en mi amafin mano yere sító danái van mifo kasaen kákán dana maman namu uádanten mino. Inká titóká karé uvín nain ira ano kasaen kákán aafan kanten mino. <sup>6</sup> \*Amafin ma vain mai máan mana en mi ira ma kхиyain an dakhen pasintin namu vaya kayo ma amafintá báken maen kasaen tiretií kumanin máden asuse ureñ tireti ma kama e vaona mai ira anamuná ano ma e khen orera einíen kákán uman o maman aminten mino. Para vara seyo, mai ma uman baren berai siyan purin barufín ma ume nanin banta máden asuse iyain ira ma eriyain mai Ban Anon pintéi eriyain mino.

<sup>7</sup> Banasi ano kasae ara ara osafae fi nun kayo fi safúná kayo fi inká noyana kayo fi máde ayuní inono. <sup>8</sup> \*Máan tin nompo mana ano ída kanaíen amafin ayuní inten mino. Maifin mi namu vaya kayo víkakhen maen mai ano vanta ma aruan puriyain uvá an mi yakhen mino. <sup>9</sup> Máan tukhan mi mai simafin mano manáq yamú tetisi Bafan Tifóen aví daní iyáken maen inká manáa yamú mai ma Tiyarafenu ano ma ve avúaváká ten ma uvamádan bain nanin banta vá asiren ankayan té iyan mino. <sup>10</sup> Kama vaya kayo

vá namu vaya kayo vá ano mana oofentéi khuvíyan mino. Máan tiyain nan mi mumunan tiyofi sifá tiváeyan noe, máan avúavá ma variyain mai ída funtáken mino. <sup>11</sup> Non mantein pinté ma vimpun édé iyain mai kama non má íta non masá manafin édé iyan nafino. <sup>12</sup> Inká kanaíeyá fíki yaa ana fintena orifi aran kúdeyá inká uvaini anan tákéná fíki aran kúdinte fono. Ida ino. Máan tukhantiya un non ma mantan nain fintena ída kanaíeyá auyen non dafin nono.

### Kankánan Afova Van Ma Sikhein Baya Ino

<sup>13</sup> Máan tukhein nan mi kama ineine vanti ma Tiyarafenui avúavá ma afová ukhanteya mai kama avúaváká basín ná tiretin pinté kama avúavá ano non ma vanaein an dano. Kama avúavá ma variyan nonará ma ída au khákán inte mae mai fura seja kama ineine vain kékásí in nono. <sup>14</sup> Máan tin nompo eyan nan mana in avúavá bá inká ena ará namu uantan má ma sretimpin bantiya mae mai fura sen namu uron ukhen mino. Máan tukhen mifo mai van ída vá tiretyan amo se vá tetin túpin kama ineine vá uno sireya fura vaya me oyan ameno. <sup>15</sup> Mai ma veyan nan mana in avúavá bá inká ena nanin banta ma inian namu uantan má ano Ban Anon pintéi eriyain mifo ída Tiyarafenu finté eriyain mino.

<sup>16</sup> Para vara seyo, veyan nan mana ma in avúavá bá inká ena nanin banta ma inian namu uantan má ma vaimpin ma onesin maen namu avúavá ana variyantin minó daná ano mo asuse anan inten mino.

<sup>17</sup> Máan tinten mifo mai ma inaru fáké erikhein afova ma mantein kéká ano ma esé araien baran nain avúavá máan mi ukhen mino. Avusesé ukhen ban má ará kusin avúavápó ma ena anunu in má

\* 3:6: Mat 12:36-37; 15:11, 18-19    \* 3:8: Rom 3:13

minó damú ma vempáké kusen ban má ino. Inká ena nanin banta vá ma manafin ban avúavá bá inká ena van arunan uantiyáken kama avúavá ana variyan ma van má mino. Inká aronará ana ída kama iyan ban avúavá baren ma fura sen afoká in nain baya ana ma sin má ino. <sup>18</sup> \*Mai ma ará kusin avúavá ma maman kaiyain kéká ano ma ará kusin danayun ma yóden maen puntákein avúava sintan duyasinten mino.

## 4

### *Tiyarafenu Ádé Ma Orin Baya Ino*

<sup>1</sup> \*Nái yaná anó tiretin aúbaná aruve asive in avúavá maman kaiyan nafino. Namu avúava san ma aran nan daná anó maman aruvín banta kéká an daren ná tiretin aúpin aruvíyan nafino. <sup>2</sup> Tiretí ankan ma anunu iyaona yaná barano van maeya mai ma yan bain kéká aruan pureya inká oyampá baya seja inká aruve asive eya iya ompo mai yaná ída variya ono. Para vara seyo, amúkimpó ída Tiyarafenu vaípá inantiya rono. <sup>3</sup> Inká Tiyarafenu vaípá ma inanten nan maen ída amé iyan mino. Mai fara va ino. Tiretíi avúavá ano namu ukhan pasen mi amintiya yan bukhafa ma amusin amintá do maman karúdanona van mino.

<sup>4</sup> \*Tiretí ankan pamúku nanin banta an den non kéká ompo ma vara rákena avúavá ma aronaí in avúavá ano ma Tiyarafenu namuro vain mai sretí ankan ída afová ukhe rafono. Ma vara rákena avúavápin amusin doseno van ma inikhanteya mai ída kanaíeya Tiyarafenu arona vanonái sretin evaráné tiamiyá uno. <sup>5</sup> Tetin nan Tiyarafenurá ákona inin kaúden bano van ma

vei Kantá Aunan túpin kain bain nan ma Tiyarafenui vompon dóki ano sikhein nan mai sretí ankan nái inin ná bariya rafono. <sup>6</sup> \*Tetin nan mantaan ákona uven namu yana san ma anunu in avúavá bá aruvín non tiren mi Tiyarafenu ano moékan tarisari simiyan mai van mi Tiyarafenui vompon dóki ano máo sikhen mino.

“Au khákán ma iyain kéká Tiyarafenu ano namuroí iyan mifo veyan ma maman bararasí iyain kéká sarisari amiyan mino.” *Pro 3:34*

<sup>7</sup> \*Máoñ tukhen mifo Tiyarafenu avorá eyan maman bararasí ureya váke vá Ban Anoni avúavá oyan amesin ná tiretin me ampiren orino. <sup>8</sup> \*Tireti ma Tiyarafenu adé ma oresin maen Tiyarafenu ano sretin adé erinten mino. Tiretí ume kéká ompo ayan tesé e vá inká baya sireya ída varan kéká ompo aúpin ná avové ure sesé ono. <sup>9</sup> Ída funtákein avúavá ma vare ona vará ifí diyákeya moékan arunaná bariyáke ída vá intireya amusin iya vá bempáké arunanápin ná bano. <sup>10</sup> \*Bafan avorá ará bararasí ureya váke ma vení ákonará ana vano van ma esin maen bái ano sretin maman daní uren kákan bí aminten mino.

### *Ena Nanin Banta Ma Yaimí Pákena Vaya Ino*

<sup>11</sup> Mumunan tiyofi sifá tiváeyan noe, ída vá ben namu vaya sin maran ono. Ená oyampá baya sinte fo áa yaiminte fo mai ano man bayan oyampá baya sireya yaimin nono. Man baya ma yaiminteya mai man bayará ída yafisiya ompo véin mi yaimin nono. <sup>12</sup> \*Man baya ma uvantein Tiyarafenumpin mi ákona vantin tetin daiminten mino. Beyafin mi vanasi ma evaránen aya uren

\* **3:18:** Mat 5:9; Ibu 12:11    \* **4:1:** Rom 7:23    \* **4:4:** Rom 8:7; 1Yn 2:15    \* **4:6:** 1Pi 5:5

\* **4:7:** Efe 6:12    \* **4:8:** Ais 1:16; Sek 1:3; Mar 3:7    \* **4:10:** Yop 5:11; 1Pi 5:6    \* **4:12:** Rom 2:1; 14:4

aviran ákona vá aruren asuse in ákona vá ban mifo siretempin intéa ákoná bákayá ben daimín maran iyá ba rafono.

*Inurantena Yanasan Ma Ve Amo Sí Pákena Vaya Ino*

<sup>13</sup>\*Máon tiyan mifo afova sá ono. Manáo kéká ano siyáken maen “Taréa fi áa inuran nafi e manté mana kákán barufá orivé maé mairá mana oranará báké manáa yoran kauré maé kokhon aman moní uvaranté uno,” siyan mino. <sup>14</sup>\*Inuran ma afoká in nain danasinta sretí ankan ída uron mi afová ukha ono. Para vara seyo, sretí ma vaona ano non ayo ano ma sító máorá afoká uaren ma ainen mo aiyoré iyain an mi yakharono. <sup>15</sup>Tireti ankan máon ná teno. “Bafan mano ma setin nan mai avúavá barano ma sinti mai ída furin para váké mai avúavá baranté tiféuno.” <sup>16</sup>Mai ma varano van ma iyaona yanasantará ma e amo siya varé esin maen mai ano namu avúavá anan mamádantiá umeí in nono. <sup>17</sup>\*Tireti ankan afova sá ono. Mai avúavái varanté uno seya afová ure ma ída varante mae mai umeí in nono.

## 5

*Kokhon Ona Ma Yan Bain Kayo Ano Ma Uman Baran Nain Baya Ino*

<sup>1</sup> Kokhon ona ma yenan bain nanin banta ano ma vaya vá ineno. Akhokhofarí ukhein uman kayo ma eriyain nará ifí diyáke ái pinte sá kákán berai seno. <sup>2</sup>\*Tireti ma kama yanasantá yenan bain mano mo avóken tonton arukhan inká kama vuí danasinta antan danú ano nakhen mino. <sup>3</sup>Tireti ma yenan bain kori vá siriva vá ano mo namuen karokharoní ukhen mino. Ma vara ma kípan

nain damúi mai ma kama yanasta ma kaiyá inona anon tireti avúavá daíden maen ira ano ma kheiní inten mino. <sup>4</sup>\*Para vara seyo, mai ma sretí ankani yorá iyákaya ma ída kama e miyaní into ma manáo moní do maman kaiyá eona ano sretí mai avúavá inka siamíkón minó ákona ma vain Bafan mano inikhen mino.

<sup>5</sup>\*Ena ena yamú tireti ankan kama namumpin bákeyá kama yunan kayo ana niyáke kama inorarí ukhaona inka arinti furin nono. <sup>6</sup>Mai ma kama kéká báken ma sretin ída aroren ukhein kayo yaíde mae aruan purono sreya aren nan puriyaren mino.

*Ará Kusin Má Báken Ma Uman Baran Baya Ino*

<sup>7</sup>\*Mumunan tiyofi sifá tiváeyan noe, afová ukha ono. Dunan doran kéká ano vara finté danayun orun ampamaren karavintí duyaseño van ma a san ave é iyain an deya vá ará kusin má bempáké báke vá Bafani erin ave ono. <sup>8</sup>\*Tireti ankan ará kusin má bákeyá mantaan ákona ukhe vá bano. Para vara seyo, Bafani erin inka ádé ukhen mino.

<sup>9</sup> Mumunan tiyofi sifá tiváeyan noe, Tiyarafenu ano sretí avúavá daíden uman amin nafo ída vá eraran aveantumpin bayá sin maran iya vano. Mai fara vara seyo, mai avúavá ma yaíden uman amin banta ano inka ereno van iyáken onará mantakhen mino.

<sup>10</sup> Mumunan tiyofi sifá tiváeyan noe, afovásá ono. Mai ma Bafan aviká ma kama avúavá bariyáken uman o yosiyaré ein sakhanampa vanta kayo anon tetin aní ukhen mino. <sup>11</sup>\*Mai ma kákán umampin o fékein kékái kákán bí amiýá tiféuno. Mai ma Yopun amaniná afoká in ma varein avúavá ano ma

\* 4:13: Ruk 12:18-20 \* 4:14: Íbo 39:5, 11; Pro 27:1 \* 4:17: Ruk 12:47 \* 5:2: Mat 6:19

\* 5:4: Diu 24:14-15 \* 5:5: Ruk 16:25 \* 5:7: Diu 11:14; Yer 5:24 \* 5:8: Rom 13:11-12;

1Pi 4:7 \* 5:11: Eks 34:6; Yop 1:21-22; 2:10; Íbo 103:8

Bafani inéine ma kanaí ein manon tetin aní ukhen mino. Para vara seyo, Bafampin mi moéken avába in má arunaná bá bíkakhen mino.

<sup>12</sup> \*Máan tukhen mifo mumunan tiyofi sifá tiváeyan noe, ída uron ná inaru fi vará fi áa manáa yanasinta fi aví tireya vá pura ódino sire ayan befiyó ono. Para vá eyo seja ída inó se iya vá mairá ída uman barano.

*Mumunan Nanin Bantai  
Amúkimpin Ma Ákona Vain Baya  
Ino*

<sup>13</sup> Tiretin pinté ma uman baren oriyen ban nain mano vá Tiyarafenu amúkuan amino. Inká amusin ma iyan nain mano vá Bafan anédó diyáken ben aví daní ino.

<sup>14</sup> \*Tiretin pinté ma aí iyantin ban nain mano vá monó doran banta kayo arantin ná Bafan avíká mai kéká áñontá uveri vanaren amúkuantano. <sup>15</sup> \*Mumunan má ma amúkuantan nain manon betin aí daná kípaantádantin mi Bafan mano evaránen betin kama uantanten mino. Inká mai kéká ano ma umeí ukharé intin maen Tiyarafenu ano vetí ume ampiantanten mino.

<sup>16</sup> Máan tukhein nará tiretíj ume van sirun noe sin maran ná iyáke vá ben amúkuantan maran esin ná Tiyarafenu ano aya ino. Puntákein nanin banta ano ma amúkiyaimpin mi moékan ákona van mino. <sup>17</sup> \*Tetin an dakhein bantan Iraiya varen mi a ída yano van ákonaen amúkin mi kanú manaú orana ifo afápá mana un kádan biyontá ída á den mino.

<sup>18</sup> \*Máan tukharéin maen inká evaránen á dano van ma amúkin ma a eran maen dunan má káta vá ano evaránen orun póten mino.

*Mumunan Ma Me Ampikharé  
Ein Ma Ayaintin Ma Evaránen Mu-  
munan In Baya Ino*

\* **5:12:** Mat 5:34-37    \* **5:14:** Mak 6:13    \* **5:15:** Mat 17:18-20    \* **5:17:** 1Ki 17:1; 18:1  
\* **5:18:** 1Ki 18:42-45    \* **5:19:** Kar 6:1    \* **5:20:** Pro 10:12; 1Pi 4:8

<sup>19</sup> \*Mumunan tiyofi sifá tiváeyan noe, sirenín aúbanáké ma manáa kéká ano Tiyarafenu fura sikhein baya ma me oyan amiren orikharé intin ma ovaránen aviádanti ma erinti mae <sup>20</sup> \*mai vá afová ono. Mai ma o aviáden nan ma erein banta anon mai ume vantai furin pintena aya uren nan mi Tiyarafenu ano mai vantai ume kayo ampianten mino.

# PITA MA ESÉ ARAÍEN UVANTEIN BOMPON MINO (1 Pita)

## Pita Ma Esé Bompon Uvanteí Pákenai Afova Vaya Ino

*Ma vompon ma uvantein banta ino.*

Pita anon Sirivanusin nan ma Sairasine sen ariyain banta ma veni vompon uvaran doran bantai ukhá ein mi siamin uvanten mino.

*Uvarein orana ino.*  
AD sikisti-fo (64) fin mino.

*Ma vompon ma uvantein baru ino.*

Ovaeran bayafó ma Babironi e siyain baru Romú ino. (1 Pita 5:13 fin ná onano.)

*Ma vompon ma uvaman amikhein kéká ino.*

Esiá bara van ma saréa Teki e siyain barafin ma vain monó namun kayofin kokhon Yutan kayo vákan inká ena anan pinté ma monó tiyain kéká bá dere vákan mai kayon uvanman amikhen mino.

*Nái ana vará ma vompon uvan-ten nafino.*

Monó nanin banta ano ída uman baranté uno sen inikharé ein uman kayo variyaimpin mi ma vayafó betin ákona uantáken mino. Inká baru yafisin kayo vá antuntá ma varú barú ukhein kéká bá ano ará manafinien bano van mi aní iyáken ará ákona uantan baya siamikhen mino.

*Pita Ma Amusin Baya Sein Mino*

\* **1:2:** Rom 8:29; 2Te 2:13    \* **1:4:** Kor 1:12  
5:10

<sup>1</sup> Yisas Karaisini vaya varen orin banta mai séi Pita anon ma vompon uvaré uno. Mai ma Pontusí barafa safi Karesia safi Kapadosiá barafa safi inká Esiá barafin nafi Bitiniá barafin nafi ma Ti-yarafenu ano aní ukhein nanin banta ano ma meren mana mana ukhein kékápin mi ma vompon uvamádékun oren mino. <sup>2</sup> \*Tifóe Tiyarafenu ano gefái saretin aní uraya varé en nan mi Kantá Aunan mano saretin maman kantasien mino. Mai ma saretin maman kantasí ukhein ana maen mai mágn mi ukhen mino. Yisas Karaisini vaya inire ma mai áncain dakhafe nan ma inká beni nare ano sretií ume sesé uanteintá ino.

Máan tukhantin Tiyarafenui avábá bá ará kusin má ano moéken tiretin masá bano.

*Para Van Oriyan Ban Aunan Ma Sive Ukhein Nará Tiyarafenun Aví Daní Tifano*

<sup>3</sup> Tetisi Bafan Yisas Karaisin Afóe Ayarafenun avisá daní ono. Mai fara vara seyo, setinti monó tin avúavápin maman auyení ino van mi Tiyarafenu ano Yisas Karaisin pinté uaren ída kípan arunaná tetin timikhen mino. Máan tukhái Yisas Karaisi ma fúaren evaránen e mantakhein nan mi ákona inin kauré ave iyá tiféuno. <sup>4</sup> \*Mai ma ída miyantá bain amusin Tiyarafenu ano ve akhafana amikhen mino. Mai ma saretin amikhein amusin ma inarufá kauúantón bain mano ída avóken inká o afeyoren en inten mino.

<sup>5</sup> \*Tiyarafenurá ma mumunan iyaona van mi vei moékan ákona fóké tiretintá dafíkantiya oriya varé esin ume fintena saretin aya uren evaránen aviranten mino. Ma vara ma mo kípan nain damuí mai ma evaránen aviran nain maman dákkó urantin minó anon onanten mino. <sup>6</sup> \*Mai vará minó ano fura se amusin ono. Asíkarái kokhon uman kayofin oferan

\* **1:5:** Yon 10:28; 17:11    \* **1:6:** Yem 1:2; 1Pi

nompó mai oyampáké amusin ban mino.

<sup>7</sup>\*Tiretí ankan kaná ákona e mantakheya fo mai saretíi mumunan akhenóka uan onano van mi mai uman kayo erinten mino. Irafin ma kori iyó uan oniyain an den mi saretíi mumunan akhenóka uan onanten mifo Tiyarafenu avorá mai saretíi mumunan mano kori esantaren moéken kákan danái van mino. Máon tukhantin ákona akhenóka kayofin ma sreti mantaan ákona ukharé esin maen Yisas Karaisi ma ma varará afoká inain damúi sretin nan amusin uren kákan bí aminten mino.

<sup>8</sup>\*Tiretí ankan bén ída yáko oné iya ompo véin nan para anunu é iya ono. Inká bén ída onteya mumunan iyáke mae moéke amusin é iya ompo mai moéketasá amusin ono. <sup>9</sup> Para vara seyo, véintá ma ákona mumunan kaiya ona van ma amin nain miyan mai Tiyarafenu ano ma ume fintena sretin evaránen aviran nain mino.

<sup>10</sup>\*Mai ma Tiyarafenu ano ume fintena vanasi sarisari urevánen aviran van ma sikhein nan mi sakhanampa vanta kayo ano moéké afová ono van iyaren mino. Mai avúavasí ma inain ana mai yetí ankan ída afová ukhen kokhon ineine iyáken mi fara sakhanampa vaya siyaren mino. <sup>11</sup>\*Karaisi ma uman o yosen púaren ma ínaimpáké e mantan kákan bí baranaí pákena van ma veni Kantá Aunán mano fe o útúben tiamiyain nan betí ankan amino ukharen mino. Mai yaná inte yamusá afoká intéin ná iye anó mai uman barantéin ná tiyan nafi siren kokhon ineine iyaren mino.

<sup>12</sup>Betí ankan ma vá ein damu san mai yanásinta ída afoká inten ne sikharen mifo kokhon orana ma esantavintin mi sreti ma vanona yamu san mi afoká inten

nen tikharen mino. Máa sikharejín mi inaru fáké ma siantan erein Kantá Aunani ákona vá ma vaya sen noin kéká anoi saréa mai Kama Vaya siamiyan mino. Mai ma afokáin nain avúavá ano mo kama uron ukhan mi enisori kayo ano yere amusin iyáken mai yaná afoká intin onano van iyaren mino.

### *Kantasí Uken Ma Van Avúavá Pákena Vaya Ino*

<sup>13</sup>Máon tukhanti Yisas Karaisi ma ovaránen erin nain damú ma varanóna sarisari vará ákona inin kauráke vá tiretí aurá kama e yafiseno. <sup>14</sup>\*Tiyarafenu akhafana ompo veni vaya vá ineno. Mai ma Tiyarafenun ída afová ukhe ma ída funtákein avúavá bariyá eona ano sretin damuádan nafo ída vá mai avúavá evaráne yakhafono van anunu ono. <sup>15</sup>Máon tukha ompo saréa ma Tiyarafenu ano sretin maman be akhafanaí ono van ma aní urev kantasí ura vaona rasá kantasí ukhein avúavá ana vá barano. <sup>16</sup>\*Mai fara vara seyo, Tiyarafenun vompompin máa sikhén mino. “Téi kantasí ukhé umpsí sreti ankan masá kantasí ono.”

*Riv 11:44-45; 19:2; 20:7*

<sup>17</sup>\*Máa sikhén mifo afová ono. Mai ma inarufá bain Tifoe oe sreti ma amúkuán amiyaona ano ma vanasi yaimin nain damú mai ída arona ino sin avúaváká daiminten mino. Tiretí ankan ma variyáré eona avúaváká ten mi yaíden miyan aminten mino. Máon tukhanti ma varará ma vákeya ena vara fáké ma e vain an dakhe vá Tiyarafenu aránaópá ma van avúavá ana vá barano. <sup>18</sup>Mai fara vara seyo, sreti anáuyani avúavá ánain ma vákuriyáona ano ída kanaén ayairí ukhan mi mai fintena sretin aya uré aviran van Tiyarafenu ano Yisasin pinté uaren tiretin miyaní ukhen mino.

\* **1:7:** Pro 17:3; Sek 13:9; Mar 3:3; Yem 1:3 \* **1:8:** Yon 20:29; 2Ko 5:7 \* **1:10:** Mat 13:16-17

\* **1:11:** Íbo 22; Ais 53; Ruk 24:26-27 \* **1:14:** Rom 12:2; Efe 2:3; 4:17-18 \* **1:16:** Mat 5:48

\* **1:17:** Rom 2:11; Rev 2:23

Mai miyan mai kori vá siriva fóké basa miyaní ukhen naino. Ída ino. <sup>19</sup> \*Tiyarafenun anin Yisas Karaisi ída mana ume vákan ma afun ída vain sipisipi an dakhein ni aunan bain nare fókéi miyaní uraya vaono. <sup>20</sup> \*Pefá ma vara ída afoká ukhan maen mai avúavá barano van mi Tiyarafenu ano véin aní uran baré íkan damú ma afoká iyain má ume fintena saretin aya ino van béin tiantan ma varará eren mino. <sup>21</sup> \*Tiretí ankan Yisas Karaisimpinté uarei Tiyarafenurá mumunan iya ono. Inká Tiyarafenu ano ma furin pintena Yisas Karaisin orun avían mantaren kakhan ákona amikhein manon tiretii mumunan moéken ákona uantiyan mino.

*Afá Aváeyan Ma Aúkáké Avábá  
In Avúavá Baya Ino*

<sup>22</sup> \*Tiretí ankan ma fura sikhéin Kama Vaya inire ma mai ánaín bákureona van mi saretí ume yo sesé uraya va ompo saréa vá mana nanin banta akhafana an dakheya fura se ven avábá in maran ná ono. Máan tiyáke ena nanin banta yere fura seja aú kákesá avábá ono.

<sup>23</sup> Mai fara vara seyo, saretí ankan monó tin avúavápin evaráne auyení ukha ono. Ma vara ráke anóe afóe ano ma amikhein aunan mai sreti ma furesin maen kipanten mifo auyen aunan betin pintesa erikhen naino. Ída ino. Mai aunan Tiyarafenui fara van oriyan ban baya fintéi erikhein mai ída kípan para van oriyan banten mino. <sup>24</sup> Para vara seyo Sakhanampa vanta ano máa sikhen mino,

“Banasi ano ainen ma kafuriyain kata an mi yakhen mino.

Betíi kama yukhafa ano katafin bain kama faravan

mano ma ainen mo kha-noenii iyan mino.

Kata ma kafuriyain má beni faravan mano kano uaren un pafasen eravé iyan mino.

<sup>25</sup> Máan té iyan mifo Bafani vaya ano fara van oriyán banten mino.” *Ais 40:6-8*

Mai vaya maen Tiyarafenui Kama Vaya ma fefá tiamíka inikhá eona ino.

## 2

<sup>1</sup> \*Máan tukhen mifo minó namu avúavá bá kampun ma siantan avúavá bá ifasá ono. Ída vá kama avúavá anan bariyá bá uno seno. Baya ana ma siren ída varan avúavá safi ena ma namu inin mamantan nafi ena ina yaná ma kampun tiren baran avúavá safi vá oyan ameno. <sup>2</sup> Arará iyampon mano ma nan anu máa niyáken e inoriyain an deya vá monó avúavápin e inoresin ná Tiyarafenu ano saretin aya urev evaránen avirano. <sup>3</sup> \*Tiretí ankan taréé Bafani kama avúavá inka afová e ono.

*Ákona Onámanáká Ma Má Uvaran Baya Ino*

<sup>4</sup> Yisas Karaisi ano Tiyarafenui monó namuntá ákona namádaní ukháiñ mi vanasi ano namu ukhen ne siren do éken mino. Máan turan Tiyarafenu avorá kama ukhen baréin béin aní ukhen mifo ve vain tasá ereno.

<sup>5</sup> \*Tiyarafenu ano saretimpó deren maman bei ákona namádaní uren mi ven ma monó tiantan namun uvariyan mino. Yisas Karaisi ma varein avúavákai Tiyarafenu ano saretin maman kantasí ukhein monó doran banta kékási uren mi véi ma íkun uan amiyaona van amusin iyan mino.

<sup>6</sup> \*Mai fara vara seyo, Tiyarafenui

\* **1:19:** Apo 20:28; Ibu 9:12-14    \* **1:20:** Efe 1:4; 2Ti 1:9-10    \* **1:21:** Yon 14:6; Rom 5:1-2  
 \* **1:22:** Yon 13:34; Rom 12:10    \* **2:1:** Efe 4:22; Yem 1:21    \* **2:3:** Íbo 34:8    \* **2:5:** Efe 2:21-22; Rev 1:6    \* **2:6:** Efe 2:20    \* **2:6:** Yerusalemie ma siyain baya mai Saioni sen tiyan mino.

vompon dókifin tian amá ukhen mino.

"Onano. Yerusaremí\* barurá mana onámaná aní ure  
maman ákona namádan an daré dafédékun bain  
béintá ma mumunan in nain kéká  
ano  
ída ayave van inten mino." *Ais 28:16*

7 Mai ma veni vaya iniren oyan amiyain kéká ina va van naifo mumunan ma iyaona kékái kama yanái van mino.

"Má uvaran banta kayo ano ma yo  
maman karúdein onámaná  
ano  
maman má dádaimpin mana  
ákona onámanasí ukhen  
mino." *Ibo 118:22*

8 Inká Tiyarafenui vompon dóki  
ano evaránen máa sikhen mino,  
"Banasi arantantá duádan ma  
eyúpó en ankamé iyain  
onámanái véi van mino.

Inká mai ma vanasi ano  
eraven ankamé iyain  
onámaná ino." *Ais 8:14*

Betí ankan ma Tiyarafenui vaya  
ída inintin mi mai avúavá afoká inten  
ne sikháin mai avúavá afokáen  
mino.

<sup>9</sup>\*Máan ten mifo saretí ankan  
mai ma einisa ukha va ono. Ída  
ino. Para vara seyo, Tiyarafenu  
ma kin bain manon tireti ankan  
aní urayan beni monó doran  
bantaí uveyan tireti má inká beni  
kantasií ukhein nanin banta vá  
ano ven ninái ukha ono. Máan  
tukhantin Tiyarafenu ano ma  
yuntein avúavá pintena avían  
bei kakhakhein avúavápin ma  
kaúdákantiá kasae veni kama  
avúavá ena nanin banta aní inono.

<sup>10</sup>\*"Pefá tireti ankan banasi va  
vare va ono.

Taréa saretí ankan Ti-  
yarafenui vanasin ba ono.

Pefá tireti ankan Tiyarafenui  
arunaná ída mantare  
saréa yeni arunaná inka vare  
ono."

<sup>11</sup>\*Téi ma sinunu ukheruna  
sirona kéka soe, saretí ankan  
ena vara fákéi e van ná namu  
avúavá sintá ayo ma saretíi au  
anunu vá aruviyain nan mi nentá  
bano van ákonaé tiamiyá uno.

<sup>12</sup>\*Afokhampin ma vain nanin  
bantafin ma váke yafíon ákona  
ukheya vá bano. Tireti ankan  
ma Tiyarafenu aví daníin avúavá  
bariyanona van ída kama iyan  
ne siyaren maen Tiyarafenu ma  
vanasii avúavá me yaimin nain  
damúi saretin nan kama avúavá  
variaren ne siren mumunan  
iyáken Tiyarafenu aví daní inten  
mino.

### *Banasirá Ma Yafíkein Kékái Aránaopá Ma Van Baya Ino*

<sup>13</sup>\*Kin manon minó danáká  
dafikein bákon bái ma siamín nain  
baya kayoi aránaopá ana vano  
van mi Bafan mano inikhen mino.  
<sup>14</sup>Máan tukhan kin mano vei  
yoran banta kéká aní uran ban  
mifo mai kayo aránaopá dere vá  
bano. Mai fara vara seyo, mai  
ma namu avúavá baran nain kéká  
uman amiyáken kama avúavá ma  
varan nain kéká maman daní  
ino van mi vetin tiantan erikhen  
mino.

<sup>15</sup>\*Para vara seyo, saretí ankan  
ma kama avúavá baran nona ano  
mai ma oyampá baya sin nain  
kékái oorá iyarano van mi Ti-  
yarafenu ano anunu ukhen mino.

<sup>16</sup>Tireti ankan miyan ída van  
doran banta kéká saono. Ída  
ino. Tiretin inka útúantaya va  
ompo ída vá inka útúintá bá uno  
sire namu avúavá bariyáke vá Ti-  
yarafenui yoran banta kékásí ukhe  
yoriya vano. <sup>17</sup>\*Ena nanin banta  
aráopá ma van avúavá aní iyákeyá  
vá monópin ma vain kékásá avábá  
ono. Tiyarafenu van periya vá kini  
aránaopá sá bano.

\* 2:9: Diu 7:6; 14:2; Ais 9:2; Apo 26:18; Efe 5:8      \* 2:10: Ose 2:23      \* 2:11: Kar 5:17, 24  
\* 2:12: Mat 5:16      \* 2:13: Tai 3:1      \* 2:15: 1Pi 3:16      \* 2:17: Rom 12:10

*Miyan Ída Van Doran Bantai  
Vaya Ino*

<sup>18</sup> \*Miyan ída van doran banta kéká ma vanteya siretií ayafa aránaópa sá bano. Ída vá mai ma kama avúavá aní iyáken doran amin nain kékái yoran mana varano van ono. Mai ma yoran barano van duvun in nain kékái vaya yere vá ineno. <sup>19</sup> Mai fara vara seyo, siretií ankan kamá iya fo áa namú iya fo mai kama ineinen iyákeya manaí ukhein avúaváká anan míkani yoran bariyan nan mi Tiyarafenu ano amusin iyan mino.

<sup>20</sup> \*Tiretií namu avúaváká ma uman bariyare ída mana miyan o varan nompo kama e váke ma funtákein avúavá bariya ma uman bariyaré esin mi Tiyarafenu ano siretin nan amusin inten mino.

<sup>21</sup> \*Mai uman barano van mi Tiyarafenu ano siretin arakhen mino. Para vara seyo Yisas Karaisi ma siretií ankan nan uman mantein manon tiretin aní ukhen mifo yéin ángan ná dakhafono.

<sup>22</sup> "Béi ída umeí iyáken  
manáa kéká ída mákáken  
mino." *Ais 53:9*

<sup>23</sup> \*Béin ma asiyákan anona ída asikharen mino. Inká béin ma uman amiyákan anona ída uman amikharen mino. Mai ma funtákein avúaváká kó tiantan banta Tiyarafenu ayampin mi vei uman kaen mino. <sup>24</sup> \*Tetin nan ume avúavá me ampiren puntákein avúaváká bano van mi veyantá tetisi ume maman be aurá kaúden baren daa unkamádantá un puren mino. Béin ma arein afun kayo anon tiretin ayofen mino. <sup>25</sup> \*Para vara seyo siretií ankan aiyókein sipisipi an deya kufa ukhare ompo saréa evaráneya sipisipirá ma yafisin banta an den ma siretií aúká dafisin banta vaípái orikha ono.

### 3

*Ábasuí Ma Ukhein Nanin Banta  
Ano Ma Vetíi Avúaváká Dafisin  
Baya Ino*

<sup>1</sup> \*Anasi kayo oe, máon mana e vá tiretií aváná ano ma Tiyarafenu Kama Vaya ída iniyanti mae beti ma sin nain baya aránaópasá bano. Tiretií ankan ída vaya sin nompo Tiyarafenu van ma fédeya funtákein avúavá ana ma varanona anon betin aní inten mino. <sup>2</sup> Mai ma funtákein avúavá ma varano nan óden mi vetíi arábaeranten mino.

<sup>3</sup> \*Tiretií ánon do ma ara ara yamíri in nafi inká kori fóké ma uvaran danasintafó ma auí in nafi áa kama ukhein auí daná póké ma yan bukhafará auíin mano funtákein avúavá ída yáko é iyan mifo mai van ída vá kokhon in-eine ono. <sup>4</sup> Mai ma Tiyarafenu avorá moéken kama uron ukhan ma vempáké ban avúavá ano ma aú pinté eriyan ma ída ainen mo kipé iyain avúava sará ineno.

<sup>5</sup> Para vara seyo, máon avúavá pókéi gefá ma kantasí ukhá ein nanin kayo ano auí uran moéken kama uron iyaren mino. Betí ankan Tiyarafenurá ákona inin kaúden betíi avafuná aránaópa báken baya iniyaren mino. <sup>6</sup> \*Sara ma ve avafu Abaraamuni vaya iniren ma sesi ayafa oe ma si-yaré ein an ná dano. Tiretií avafun ná ano ma siretin namu uantan nain avúava san ma ída ferana funtákein avúavá ana ma varanteya mai Saran araumasin an mi vaono.

<sup>7</sup> \*Máon manae vá aváná ano siretií anáona kákán bí amireya vetin má ma manafin kamaen ban avúavasá aní ono. Betíi au ano siretin an den ída ákona ukhen mifo Tiyarafenu ano siretin má manaí uren uváden auyen aunan

\* **2:18:** Efe 6:5    \* **2:20:** 1Pi 3:14, 17    \* **2:21:** Mat 16:24; Yon 13:15    \* **2:23:** Ais 53:7;  
1Pi 3:9    \* **2:24:** Ais 53:5-6; Rom 6:11    \* **2:25:** Isi 34:5-6; Mat 9:36; Yon 10:14; Ibu 13:20-21  
\* **3:1:** Efe 5:22    **3:3:** 1Ti 2:9    \* **3:6:** Esé 18:12    \* **3:7:** Efe 5:25

bain amusin mi amikhen mino. Tiretí anáona yafiseren aa fáké ma ída kama ureya yafisesin maen Tiyarafenu ano saretí amúkin ída ininten mino.

*Monó Nanin Banta Ano Ma Vetií  
Avúaváká Dafsin Baya Ino*

<sup>8</sup> Kípan baya ma siamenuna mai máan mi ukhen mino. Minó ano vá mana intintá bákeya arunaná bíkakhantiá vá tiretí aú bá inin má bararasí ureya ven avábá in maran ná ono. <sup>9</sup> Namu avúavasí ma uantiyanti ída vá anona namu avúavasí uantano. Banasi ano ma ída funtákein baya sen asinti ída vá betí ankan anona aseno van iyákeya avábásá aní ono. Para vara seyo, mai avúavá barano van mi Tiyarafenu ano inikhen maen máan ma inonarái siretin avábá uantanten mino. <sup>10</sup> Mai fara vara seyo, Tiyarafenu vompon dókifin máa sikhen mino.

“Para van oriyán ban aunan má kama yamú kayo va san iye anó anunu inten nafi mai kayoi amafin mano ma namu vaya sintá dafisen ná inká oo ano ma kampun baya kayo sintá dafisen ná ino.

<sup>11</sup> Mai kéká ano namu avúavá ampiren kama avúavá ana vá barano.

Ena kéká bá ma ará kuse manafin ban nará ákona e yorano.

<sup>12</sup> Para vara seyo, funtákein avúavá ma variyain kékái Bafan mano yafíken

betí amúkin nan á kaséden iniyán mifo

mai ma namu avúavá bariyain kékái

Bafan mano oyan amiyan mino.” *Íbo 34:12-16*

*Tiyarafenu Oo Yaiyintá Ma  
Uman Baran Baya Ino*

<sup>13</sup> Tiretí ankan ma kama avúavá barano van esin maen iye anó umó danten nafino. <sup>14</sup> \*Máan

tukhen mifo kama avúaváká ma uman baresin maen Tiyarafenu ano mairái miyan aminten mifo “ída vá akhokho van iyáke ída vá kokhon ineine ono.” *Ais 8:12-13*  
<sup>15</sup> Ída vá kokhon ineine iyáke saretíi vampin ná Karaisin maman tiretíi Bafaní ure vá béintá monó teno. Inká monó avúavápín ma ákona inin kaúkeona van ma ina inti siaminona vaya vá ena ena útakhe vá bano. <sup>16</sup> \*Máan tin nompo ovare me ineine ureya vá bempáké ará amin aa fákesá tiamento. Máan tesin maen tiretíi ankan Karaisin ninan basin pasen mai ma namu vaya sen asiyaré ein kéká ano kama avúavá ma variyaona van ódaren ayave van inten mino. <sup>17</sup> Tiyarafenu oo yaiyen ma kama avúaváká uman baran manon namu avúaváká ma uman baran esantakhen mino.

<sup>18</sup> Mai fara vara seyo Yisas Karaisi ma setisi umerá manadá para van oriyán ban purirí ma ein mai véi yeren máan uman o yosikhen mino. Béi ída mana umeí iyaren mifo setin tiviren Tiyarafenui varufin orono van mi ume nanin banta van dan bukhafafin uman o yosen pubíkan mi Kantá Aunan manon aunan amin evaránen e mantan mino.

<sup>19</sup> Mai aunan pinté uaren mi mai ma auí uran ma karavusi uádan baré ein aunan kayofin mo monó baya siamen mino.

<sup>20</sup> \*Mai ma Noan tiamin ma voti uvaryákan ma Tiyarafenui vaya átakharé iyan ma Tiyarafenu ano vempáké báken ave ukhá ein kéká ino. Kákán á daaren ma non taven banasi ariyan maen mai finten dan manápá ifo afápá kanú manaú un kádan nanin bantan máan Tiyarafenu ano ayaen mino.

<sup>21</sup> Mai ma non taven banasi arein manon non ma féontan aní ukhen mino. Yisas Karaisi ma fúaren e mantaein ákona ano ma siretin aya ukhein manon monó non ma

\* **3:14:** Mat 5:10; 1Pi 2:20; 4:14

\* **3:16:** 1Pi 2:12

\* **3:20:** Esé 6-7

féantán avúavá aní ukhen mino. Monó non ma féantán mai au fáke va fain do sesé in naifo inin ma sesé uren aviren Tiyarafenu ádé orin avúavá ino. <sup>22</sup> Taréa Yisas Karaisi inarufá oren kakán bí o mamaren Tiyarafenu ádé kumantan maen minó enisorí kayo vá minó daná ma varan ákona vá ara ara ákona kayo vá ano véin aránaópái van mino.

## 4

### *Tiyarafenu Avúavá Bá Ma Van Baya Ino*

<sup>1</sup> \*Máan tukhein nan mi Yisas Karaisi ma aí o yosikhanti siredí ankan mái máan uman o yosin nompo mai ma véi variyaré ein avúavá basá útaore vá bano. Mai fara vara seyo, Yisas Karaisin avíká ma uman barantó uno ma sireya inikhante mae umeí ma iyaona vá ampeno. <sup>2</sup> Máan ma inteyan umeí ma in anunu khayo ída e yakhágan more mere eya non nompo Tiyarafenu yoran mana varano van moéke anunu in nono. <sup>3</sup> \*Para vara seyo mai ma afokhampin bain kéká ano ma aruven baren iyáken amusin dosiyán ma aurá ída yafisin avúavá bákán ma famúku avúavasí ono van anunu iyaré ein avúaváifefá bariyare ono. Betí ankan ma ara ara omasí iyáken óen non naren óen iyan ma inká ída funtákein omasí iyáken ma kampun ayarafenu kayorá ma namu avúavá póké monó tiyá ein mai feyante avúava sintá ifo vá ampeno.

<sup>4</sup> Mai ma fefá manápá noré eona kéká bá ma ída evaránen oriveya vetin má namu avúava sintá variyaona van mi siredin oyampá baya sen asiyan mino.

<sup>5</sup> \*Máa siyan mifo fúkein kéká bá mai ma ída furin nan para vaona

kéká bá anon Tiyarafenu avorá o mantavesin minó naniñ bantan daiminten mifo afovasá ono. <sup>6</sup> Para vara seyo mai van mi fúkein kékápin dere Tiyarafenu Kama Vaya Yisas Karaisi siamikharen mino. Mai kéká ano fura sen dan bukahfarái uman baren púken mifo vetí ankan ínaiimpáké Tiyarafenu ma einén aunampin ída furin para vanten mino.

### *Tiyarafenu Ano Ma Amusin Amikhein Dorantá Ma Kamaen Dafisin Baya Ino*

<sup>7</sup> \*Ma vara ma kípan nain damú inka ádesí iyan mifo siredí avúavápin dafíón ákona ukheya funtákein avúavá ana variya vá amúkiya vano. <sup>8</sup> \*Moéken ma kákoni ukhein daná ma vain mai ven avábá uantan maran eya vá oriya vano. Para vara seyo, avábá in avúavá anon ara ara ume kayo yaran ten mino. <sup>9</sup> \*Inte kheká anó tiretin má dunan niyáken bano van inten nafi mai amusin pintesá mai kéká aviádesin siredin má bano.

<sup>10</sup> \*Ena nanin banta aya ono van ma Tiyarafenu ano mana mana amusin amirú ukhein dorantá kama e yañibesin ná Tiyarafenu sarisari ano siredimpin bíkaaren banasifin orino. <sup>11</sup> Tiyarafenu oo vantaí ono van ma arakhanti mai véi ma siredin pinté uaren baya seinisá ono. Inká ena nanin banta aya ono van ma Tiyarafenu ano arakhanti mae mai ma véi amin nain ákona fókesá mai yoran barano. Máan ma esin mi Yisas Karaisi ma mantein avúava san Tiyarafenu aví ara ara avúavá póké daní inten mino. Minó kakhán má ákona vá ben ninan bain ayáká para oriyán banten mino. Mai fura ino.

### *Monó Nanin Bantaí Uven Ma Uman Baran Nain Baya Ino*

\* **4:1:** Rom 6:2, 7    \* **4:3:** Efe 2:2-3    \* **4:5:** Apo 10:42    \* **4:7:** Rom 13:11-12    \* **4:8:** 1Pi 1:22    \* **4:9:** Ibu 13:2    \* **4:10:** Rom 12:6-8

<sup>12</sup> Téi ma sinunu ukheruna sirona kéka soe, akhenóka yanasinginta ano ma siren aufin ída vá enará ukhein danái afoká iyá uno sire akhokho van ono. <sup>13</sup>\*Máan akhenóka kayo anon Yisas Karaisi ma varein uman má manái ukhá intiya ínaiimpáké ma vei kakhan má ma ovaránen eriven amusin in nain damú tiretí ankan moéke véin má amusin in nono.

<sup>14</sup>\*Yisas Karaisin ánain ma yakhafiyasin ma aren asen iyanatiya mai sirení ankan amusin mana vá ono. Mai fara vara seyo, Tiyarafenui kakhakhein Aunan manon tiretin má banten mino. <sup>15</sup>Mai ma vanta aruan puré iyainta safi umoyan inta safi aau varanta safi áa enai yoran máden asuse inta safi ma uman baren berai sin nara siya rauno. Ída ino. <sup>16</sup>Yisasin ánain ma yakhafin nonará ma uman baran nona van mi siamiyá umpo ída vá ayave van ono. Tiretin nan ma Karaisini vaya ánain bákuriyán nanin banta e ma sen ariyain nará amusin iya Tiyarafenu avisá daní ono. <sup>17</sup>Mai fara vara seyo, vanasi ma yaimin nain damú inka afoká ein Tiyarafenu ano ve akhafana finté naren araí ureñ daiminten mino. Monó nanin bantafin naren daiminten mifo mai ma Tiyarafenui Kama Vayará ma ída mumunan iyáin nain kéká anon moékon uman baranten mino. <sup>18</sup>Tiyarafenui vompon dókifin máa sikhen mino,

“Puntákein nanin banta ano uman ma mamarantin ínaiimpáké Tiyarafenu ano aya ureñ aviranten mifo mai ma Tiyarafenu oo átakharéiyá in nain kéká bá ume nanin banta vá ano ma umampin orintin maen Tiyarafenu ano ída uron mi ayainten mino.” Pro 11:31

<sup>19</sup> Máan tukhanti Tiyarafenui anunu ánain dakhafiya ma uman bariyáke vá puntákein avúavá ana vare oriyáke vá mai ma siren uvantein Tiyarafenura sá ákona inin kaono. Mai fara vara seyo, véi ma siren daná ída ifá é iyan mifo minói varé iyan mino.

## 5

### *Monó Doran Kayo Vá Pumara Kayo Vái Vaya Ino*

<sup>1</sup> Mai ma sirenimpin ma vain monó doran banta kayo ma vaya siamenté uno. Téi má deren monó nanin bantai yafisin báké Yisas Karaisi ma mantein uman nan banasi siyamiyaruna véi ma ovaránen erin nain damú téi má deren beni amusimpin orékuñ kákán bí timinten mino. Monó nanin bantará ma yafisin baruna van mi ákona é ina iyá uno. <sup>2</sup>\*Tiyarafenu ano sirení mai yoran amikhen mifo sipisipi kaylorá ma yafisiyain banta an de vá beni vanasirá dafiseno. Mai yorarí iyáke miyan barano vara siya rauno. Ída ino. Tiyarafenui vanasirá dafisin anunu vantiya amusin má beni yoran para varano van mi siamiyá uno. <sup>3</sup>\*Ída vá betintá ayafaí in dorarí iyákeya sirení yoran pókesá betin kama avúavá aní ono. <sup>4</sup>Máan tiyaré esin ma sipisipirá dafisin banta kéká Ayafa ma erinti ma veni amusimpin oresin maen kákán bí amiren ayáká para van oriyán ban miyan mi siren aminten mino.

<sup>5</sup>\*Tireti pumara kéká soe, monó nanin bantará ma yafisin banta kéká ano ma siamin nain baya inire vá mai ánain bákuron. Inká monó nanin banta oe, eyan manan bararasí ure vá ben ayain maran ono. Mai fara vara seyo,

\* 4:13: Apo 5:41; Yem 1:2; 1Pi 1:6-7

\* 4:14: 1Pi 2:20 \* 5:2: Yon 21:15-17; Apo 20:28

\* 5:3: 2Ko 1:24; Fir 3:17; Tai 2:7

\* 5:5: Efe 5:21; Yem 4:6

Tiyarafenui vompon dókifin máa sikhen mino.

"Mai ma au khákan iyain kékái

Tiyarafenu ano oyan amé iyan mifo

ará ma varará kaúden bain kékái sarisari uanté iyan mino."

*Pro 3:34*

6 \*Máan ma sikhanti ará bararasí ure vá Tiyarafenui moékan ákona aránaópá basin ma veni kama yamú ma afoká intin tiretin manman daní ino. 7 \*Tiretin amaniná ma afoká é iyain uman pinte mai Tiyarafenu anon ayaé iyan mifo minó uman béin ná ameno.

8 \*Tiretíj namuro mai Van Anon mi váken be ma onan nain arono van raioní an daven báden non mifo véin nará daffán ákona ono. 9 \*Tiretíj mumunantá ákona ukheya vá béintá dafíke mantaan ákona vá ono. Mai fara vara seyo, sireti an den ma minó akhempá ma mumunan afá aváeyan má ayó má bá ma vain mano sireti má variyaonaí ukhein uman mi varé iyan mino.

10 Tiyarafenu ano Yisas Karaisin pinté uaren mi vei sarisarifó tiretin o avían bei ída kípan kakħantá kaúken mino. Mañáorá ma uman o yosiresin mi véi anon tiretin oyampá mantaven evaránen ákona amiranti mantaan ákona ukheya van nono. 11 Minó ákona mai ven ninan bain para oriyan banten mino. Mai fura ino.

### *Pita Ma Vei Vaya Mo Akhení Iyáken Amusin Baya Sein Mino*

12 \*Ten má ákonaen monó dorarí iyain tifá tiváe ino sé ma inikheruna vanta Sairasi mái siya iká asíka vompon tiretin uvaman amé uno. Inte uman ná tiretin amaniná afoká é iyan nafi mai Tiyarafenui sarisari ano sirenín má

\* 5:6: Mat 23:12; Ruk 14:11; Yem 4:10    \* 5:7: Mat 6:25-30    \* 5:8: 1Te 5:6    \* 5:9: Efe 6:11-13; Yem 4:7    \* 5:12: Apo 12:2, 25; 13:13; 15:22, 37-40    \* 5:13: Apo 12:2; 2Ti 4:11

\* 5:13: Romue ma sikhein mai Kiriki vaya fintéBabironia en tikhen mino.    \* 5:14: Kiriki vaya fintéi Tiyarafenurá ma monó tiyain nanin banta ano ma kantasi ukhein amónan maran in póké ma avábá aní iyain nan tikhen mino.

bakái ákona uantano van ma vompon uvaré uno. 13 \*Romú\* barafin ma vain mumunan nanin banta ano vetü amusin bayá kain tiretí ankan baonafá orin inká te sanin an ma yákein banta Makin má deren bei amusin bayá kain oren mino. 14 Monó avúavá pókesá ben avábá in maran ono.\* Mai ma Yisas Karaisini vanasi vaonafin ná ará kusin banti vano.

# PITA MA KAN DÁDASÍEN UVANTEIN BOMPON MINO (2 Pita)

## Pita Ma Kan Dádasíen Bompon Uvanteí Pákenai Afova Vaya Ino

*Ma vompon ma uvantein banta  
ino.*

Baya varen orin banta Pita ino.

*Uvarein orana ino.*

Pitan aruan purin ádesí iyákán  
AD sikisti-faipi (65) fin nafi  
áá sikisti-sikisi (66) fin nafin  
uvanten mino.

*Ma vompon ma uvantein baru  
ino.*

Romú barurá ino.

*Ma vompon ma uvaman  
amikhein kéká ino.*

Mai ma esé uvantein bom-  
pomin ma sikhein barafin  
ma vain monó namun kayofin  
mino.

*Nái ana vará ma vompon uvan-  
ten nafino.*

Kampun doran banta kayo ano  
ma nóken Yisasín nan ída Ti-  
yarafenu Anin báken inká ída  
ovaránen erinten ne ma siyain  
nan mi vanasi ano yafíben  
bano van áká ukhen mino.

*Pita Ma Amusin Baya Sein Mino*

<sup>1</sup> Téi Saimon Pita ma Yisas  
Karaísini aposerí ukhé beni ída  
miyan ban dorarí iyaruna vanta  
anon ma vompon uvaré uno.

Yisas Karaísí ma setisi Ti-  
yarafenu vá Tiyain Banta vá  
báken ma setin maman Tiyarafenu  
avorá puntákein nanin bantaí  
urá bátiféku ma setin má manaíe

funtákein mumunan iyaona kéá  
baonafái ma vompon uvamádéku  
oren mino.

<sup>2</sup> Yisas Karaísí ma setisi Bafan  
má Tiyarafenu vá bain ma afová  
ono van esin maen mai Tiyarafenu  
ano vá bei sarisari vá ará kusin má  
pókesá tiretin avu uantano.

*Tiyarafenu Afova Vayafín Ma  
Kákání In Baya Ino*

<sup>3</sup> Yisasín ma oné afová é tiféku  
maen beni moékakhein ákonq ano  
mai ma funtákein avúaváka ma  
vano van iyá tiferuna yanásinta  
siminten mino. Bei khakhan má  
kama avúavá bá barano van mi  
setin tarakhen mino. <sup>4</sup> Bei kákán bí  
bá kama ukhein avúavá bá pinté  
uaren móeken ma kama ukhein  
avúavasí usintano van mi setin  
iyátintan baren mino. Mai ma  
namu avúavasí in tinunu ano ma  
setin eúkuádá bá tiferuna finté me  
ampiren beni kama avúavá sintá  
variyan ben an dakhen bano van  
mi iyátintáken mino.

<sup>5</sup> Máan tukhanti mai ma  
iyáántan bain danasinta ma  
varano vará ayampaí ureya vá  
tiretií avúavápin maman kaono.  
Máan ma esin mi sretíí mu-  
munampin kama avúavá asotú  
uanten inká kama avúavápin  
Tiyarafenu van ma anunu in afova  
asotú uantanten mino. <sup>6</sup> \*Inká  
mai afovafin e aurá ma kamaen  
dafisin avúavá asotú uantten maen  
umampin ma mantaan ákona in  
avúavápol aurá ma yafisimpin  
asotú uantanten mino. Inká  
umampin ma mantaan ákona  
uven ma Tiyarafenu avúavá  
ánaín bákurin má asotú uantanten  
mino. <sup>7</sup> Inká Tiyarafenu avúavá  
ánaín ma vákurimpin afá aváén  
nan ma anunu in avúavá asotú  
uanten maen inká afá aváe ma  
anunuimpin minó nanin banta  
van ma anunu in avúavá bá asotú  
uantanten mino. <sup>8</sup> Mai avúavá  
sinta ma moéke varesin maen mai  
anon tetisi Bafan Yisas Karaísín  
ma afova inonafin moéken aran  
iranten mino. <sup>9</sup> Máan tinten

mifo mai avúavá ma ída afova variyain kékái auu yufúkein an dakhan ída kamaen oniyan mino. Ume avúavá pinte ma Tiyarafenu ano yo sesé uren avíkein mai me áunten mino.

<sup>10</sup>Máan tukhein nará mumunan tiyofí sifá tiváeyan noe, sireti ankan ákona e yoresin ná tiretin nan pura sen Tiyarafenu ano ma araren bei naí ukhein kékápin ban mino sen ná afová ino. Mai fara vara seyo máan ma inteya ída kanaieya erave ankamin nono. <sup>11</sup>Máan ma esin mi Tiyarafenu ano setin Tiyain Bafan Yisas Karaisini fara van oriyan ban dafisin barufin ma orin ona yiantanten mino.

*Monó Dóki Finte Vaya Ma Avovéen Inin Baya Ino*

<sup>12</sup>Tireti ankan pefái fura sikhein avúavá afová ureya mantaan ákona ukhe ompo me áuninona van pasé para e siamé oriyá bano van mi inikhé uno. <sup>13</sup>Téi ma ída furin ma ma vukhafa vá para vanté maé mai vaya kayo fara sretin e siamé oriyá bano van mi inikhé uno. <sup>14</sup>\*Máan tiyá umpo setisi Bafan Yisas Karaisi ano séi ma ma varará banuna yamú inka aní iká afová ukheruna ída ayáká bákéi furonté uno. <sup>15</sup>Máan tukhein nan mi séi ákona yorarí ékuya mai yanasinta afová ukhare ínaiimpáké ma fúbéku mae mai yanasinta van para ineine eya oriya vano van muno.

<sup>16</sup>\*Mai fara vara seyo, setisi Bafan Yisas Karaisini ákona vá beni ovaránen erí pákena vaya kayo ma siyaruna mai ída vantai inintá tiyá umpo seti suu fóké ma fura sé beni ákona onteruna van mi siyá tiféuno. <sup>17</sup>\*Para vara seyo seti Sifóe Tiyarafenu ano ma inaru fáké ákona oovaraádan eriyan maen máa sikharen, "Ma sen

sanin téi moeké tinunu ukheruna iyampon mi vakái, véin nan moeké timusin uantiyá uno." Máa ma sein manon moékan ákona ma vain Tiyarafenun pinte kákan bí bá kakhan ákona vá baren mino. <sup>18</sup>Kantasí ukhein anu yontá ma véin má un bákéi setiyantá mai vaya iné kun inaru fáké oovaraádan eren mino.

<sup>19</sup>Mai van mi sakhanampa vanta kékái vaya kayo ano sian amá ukhái afová ukhé tifé umpo vetí ankan ma uvamádán bain baya kayo vasá avové ureya ineno. Mai fara vara seyo, vetí vaya ano yunteimpin ma kakhaan teiní iyantiya oriya varé esin mi ínaiimpáké ma Yisas Karaisi afoká inain damú beni moékan kakhan manon aupín kakhaan tanten mino. <sup>20</sup>Ma furan tiyá umpo sakhanampa vanta kayo ano sakhanampa vayaí ono vara vetí inin pinté Tiyarafenui vompon dókifin o véden tiádán ban naino. Ída ino. <sup>21</sup>\*Mai fara vara seyo, Kantá Aunan manon ákona amiyákan Tiyarafenu ano vetin pinté uaren baya sikhen mino.

## 2

*Kampun Afova Amiran Ma Uman Afoká É Iyaí Pákena Vaya Ino*

(Yuti 4-13)

<sup>1</sup>\*Máan tukhen mifofefá ma Isarerí kékápin kampun sakhanampa vanta kayo varé einén mi sretimpin kampun arú kayo ano afoká inten mino. Mai kéká anon Tiyarafenu ma sikhein baya yo vaéden maen betíi ineinefó ena nanin banta aupáké afova aminten mino. Máan tiyáken betin ma miyaní uren ma minó dafisiyain Bafan me oyan aminten mino. Máan ma inain manon betíi amaniná ainan uman o maman kainten mino.

\* **1:14:** Yon 21:18-19; 2Ko 5:1    \* **1:16:** Mat 17:1-5    \* **1:17:** Mat 17:5; Mak 9:7; Ruk 9:35  
\* **1:21:** 2Ti 3:16; 1Pi 1:11-12    \* **2:1:** Mat 24:11; Yut 4

2 Máan ma iyantin kokhon nanin banta ano vetí namu avúavá ánaín dakhafiyáken Karaisini fura vaya ma maman paen danasí uren maen ayave amin aváuvá banasi avorá maman dákó inten mino.<sup>3</sup> 3 Máan tiyáken betí ineinerá kampun bayá fóké pura ma seiní uren tiretí moniká dafiseno van inten mino. Máan inten mifo Tiyarafenu ano ma vetin kó tiantáden uman ameno sikhá ein damú pefái aní ukháiñ inka eriyain betí ankan uman baranten mino.

4 \*Mai fara vara seyo, enisori kéká ano ma umeí uran maen Tiyarafenu ano vetin ída avo uanten mifo sitípa ukhein don aimpin kain orun báken mi vetin ma kó tiantan nain damu san ave ukhen mino. 5 \*Inká pefá Noani yamú dere Tiyarafenu ano ume nanin banta ída avo uanten mifo Noan má dan manápá ifo afápá kan un kádan bei kéká bá máa anan avo uantein mino. Tiyarafenu ano ma funtákein avúavá pójé ma vanasi yaiminaí pákena vayan Noa ano siamiyaren mino. Mai oyampákéi Tiyarafenu ano á dan eraáken non taven maen beni vaya ma átakharé iyá ein kéká ufurin puren mino. 6 \*Ínaiimpákéi Sodomu vá Komora vái kákán baru kayo ira saman kaúden kasí o éke e éke uren ma vara rákena yo fútian karíudein mino. Ume nanin banta amaniná ma ínaiimpáké kain nain mai avúavái vetí ankan amaniná aní ukhen mino. 7 \*Máan ten mifo maí damú ana Roti funtákein banta váken ume avúavá san aí pefe iyan berai siyaré íkán Sodomú barurá ma afoká ein uman pintena Tiyarafenu ano véin aya uren aviren mino. 8 Mai véi funtákein bantai váken pasen namu avúavá sintá ma ena ena yamú afoká iyákan ma onen inen iyan maen kákantá berai siyaren

mino.

9 Máan tukhantiya afovásá ono. Bafan mano afová ukhein mi máan uman pintena ven ánaín ma yakhafiyáin nain kéká kasaen aya uren aviranten mifo mai ma ume avúavá bariyáin nain kéká uman amen oriyantin daimin nain damú afoká inten mino. 10 \*Bafan mano mai ma vetí anunu ánaín dakhafen namu avúavá sintá varyáken Tiyarafenui vaya átakharé iyáin nain kéká moékakhein uman aminten mino. Máan nanin banta ano au khákán iyáken ída ma ena van inin avúavá bá bákán mi kasaen inarufá ma kantasí ukhen khakhan má bain aunan kayo van ída feranton betin nan tiren inté iyan mino. 11 \*Máan té iyan mifo mai ma kampun afova amé iyain kéká ma esantakhan ákona vá bain enisori kayo vá dere ano ída máa sen kantasí ukhen kakhan má báken ma Bafan avóra bain aunan kayo maman bararasí uren tiren intikhein mino.

12 \*Mai ma kampun afova amiyain kéká ano ída ma ineine vain uraran má afá tafúna kayo vá ano ma arin daná baimpin ma amúkuven orein an mi yiyan mino. Mai kéká ano akhokho amin ákona ma sitó máorá afová ukhein nan mi siren intiyain betin má deren aruan kípanten mino. 13 Betí ankan ma namu avúavá bariyaré inain takéna mai namu miyan manan baranten mino. Betí ankan dákó ma namu avúavasí in nan mi moéken anunu iyáken tiretin kákán ayave maman amé iyan mino. Mai kéká ano ma sirenin má manafin dunan niyái páké ma sirenin máká maaká iyain manon mai omá máden asuse uren mi ayave amiyán mino. 14 Betí ankan ira yoren nóken auu fóké ma fara oniyaintá ina famúku avúavasí iyan mifo mai

\* 2:4: Yut 6    \* 2:5: Esé 6-8; 2Pi 3:6    \* 2:6: Esé 19:24; Yut 7    \* 2:7: Esé 19:1-16    \* 2:10: Yut 7-8, 16    \* 2:11: Yut 9    \* 2:12: Yut 10

avúavá ano ída ayoé iyan mino. Betí ankan kama yanásinta fóké íú an daren ída ma mumunan ákona ukhein kéká mamádan umefin eraven ankamiyan mino. Máan tiyáken beyan nan mana iniren ma ída ená van inin ayúavá ákonae bariyain mai kéká ano moékan uman baren namu uron inten mino. <sup>15</sup> \*Betí ankan puntákein avúavá me ifá uren mai ma Beorin anin Baramun an dé namu avúavái miyen barano van mi anunu iyaren mino. <sup>16</sup> \*Baramu ma namu avúavá bariyaréin maen banta ano ma vaya seinén bei yonkin mano véin asiran mi mai ma óen banta ano ma variyain avúavá ma variyá ein me ampen mino.

<sup>17</sup> \*Mai kéká ano ainen mo káné iyain non an den inká uva ano ma e avéken mo asuse iyain konan an dakhen mi vetí ma siren danasinta ída funtáden baré iyan mino. Mai kayoi nan kákantá titípoen ma kumayusí ukhein baru útaan kaúantán ban mino. <sup>18</sup> Betí ankan ída mana yanásí inaí páké be amo ana siren au khaiyan banten mino. Pamúku avúavá san maman kama yaná an daren maen moéken anunu iyáken mai avúavá pinté ma asare me ampireni eriyain kéká mamádantin evaránen eraven ankaminten mino. <sup>19</sup> Betí ankan ten kama e kuse van nono sinten mifo umei miyan ída van doran bantan báken betí moéken namu uron en asuse ukhen mino. Mai fara vara seyo, mana vanta ano ma áintin mana yaná ano véintá dafisinti mae mai yanái miyan ída van doran bantaí inten mino. <sup>20</sup> \*Inká banasi ano ma namu avúavá me ampireni setisi Bafan Yisas Karaisin ánaín dakhafiyyare ma evaráne ume avúavái miyan ída van doran bantaí ma inten maen mai gefá

ma namu avúavá bariyaré ein esantaren namu avúavá suron mi varanten mino. <sup>21</sup> \*Kantasí ukhein man bayá ma vetí ankan amikhein ma ódaren me oyan amiyaín mai funtákein avúaváká ma van aa ída afová en baré intin kama uron mi inainten mino. <sup>22</sup> Mai kayo van mi minó nanin banta ano sikharéin mi fura sen afoká en mino. “Iyan mano mun biádaren evaránen nanten mino.” Pro 26:11 Inká “Non peádan pon mano evaránen ápópin o vaven típon ananten mino”.

### 3

#### *Bafani Yamú Inka Eriyan Mino*

<sup>1</sup> Téi ma sinunu ukheruna sirona kéká soe, siriéti ankan evaráne tiáméku mai ma siameruna vaya van ovare me inesin mai ano kama ineine amino van mi kan dádásié ma vompon uvamádékun tireti vaonafá oren mino. <sup>2</sup> \*Kantasí ukhein sakhanampa vanta kayo ano ma gefá tikharé in ma inká tetin Tiyain Bafan mano ma aposeri kéká pinté uaren ma ákoná vaya siamikheini ana vaya ovare me afová ono van mi siyá uno.

<sup>3</sup> \*Esé aráí in daná ma siriéti ankan evaráne tiamenuna mai ma vara ma mo kípan akhempá pura vaya van ma siren intin kéká ano siren intiyáken betíi anunu ánaín dakhafen namu avúavá barano van inten mino. <sup>4</sup> \*Mai kéká ano máan mi sen anona vaya sinten mino, “Yisasi ma ovaráne ereno van ma sikhá ein mai intesi eriyán nafino. Ma vara ma afoká ein táké mai vaya anan o sen eriyán mifo minó daná ano vaintá anan para van mino.”

<sup>5</sup> \*Tiyarafenui vayará ma ayon afoká uádaren ma inká non pinté bara afoká uren non póké eúkuádan bain ma san betí ankan áuden ída ovaren me iniyán mino.

\* 2:15: Nam 22:7; Yut 11; Rev 2:14      \* 2:16: Nam 22:28-35      \* 2:17: Yut 12:13      \* 2:20: Mat 12:45      \* 2:21: Ruk 12:47-48      \* 3:2: Yut 17      \* 3:3: 1Ti 4:1; Yut 18      \* 3:4: Mat 24:48      \* 3:5: Esé 1:6-9      \* 3:6: Esé 7:11; 2Pi 2:5

6 \*Máan turákaren mai nompói ma vara máden namu uren asuse ein mino. 7 Inká Tiyarafenu ano evaránen ákona vaya sikhen mino. Banasii avúavá ma yaimin nain damuí inaru vá bara vá ira saman kauriyáken Tiyarafenui vaya ma átakharé iyain nanin bantan uman aminten mino.

8 \*Máa sikhen mifo séi ma sinunu ukheruna sirona kéka soe, ída vá áun nono. Bafan avorá mana tauseni (1,000) orana ano maná damú an mi yakhan inká maná damú ano mana tauseni (1,000) orana an mi yakhen mino.

9 \*Manáa nanin banta ano ma iyainiéen Bafan mano siren dana san ída vempáké doré iyan mino. Ída ino. Tiretin nan mi iniren máan tiyan mino. Mana ano ída uman barano van mi inikhen mifo ará baerano van béis ayáká para ave ukhen mino. 10 \*Máan tukhen mifo Bafan ma erin nain damú ída afová esin umoyan banta an mi yanten mino. Erintin maen inaru ano akhokhofaríen uu aruaren mo kípiyantin maifin ma varé inain danasinta ira ano khaan kaurintin maen inká bara vá maifin ma vain danasinta vá dere ira khaan kaurinten mino.

11 Minó danasinta ma eúukhein mai ira ano khaan kaurinten mifo kantasi ukhe vá puntákein avúavá ana variyan ban nanin banta vá bano. 12 Máan ma iyákeya mai ma Tiyarafenu ano afá ira fóké ma minó danasinta saman kaurin nain damu san aine ereno sire vá ineine iya vano. 13 \*Máan tin nompo mai ma auyen bara vá inaru vá ma iyátintan bákan ma funtákein nanin bantai varu ma vain nan mi ave ukhé tiféuno.

14 Máan tukhein nará téi ma sinunu ukheruna sirona kéka soe, mai yanásinta ma afoká inain nan ma ave ukhanteya mai minó danápin ma funtáke vanona

avúavasá bariya vá Tiyarafenu vá kuse vano.

15 \*Banasii ano ída o afeyorano van mi Bafan mano ave ukhen mifo afovásá ono. Mai van mi seti ma sinunu ukheruna sifá tiváe Pori ano Tiyarafenu ma amein afova fókéi saretin bompon amikharen mino. 16 Béis ma uvantein bompon kayofin ma onesin maen máan danasinta kayo van manan tikhen mino. Béis ma uvantein bompon kayo ma onante manáa uman dakhanti maen inin ma ída kama ukhein kéká anon mai vaya vaéden ena yanáá tiádiyán mino. Ena vompon dóki kayofin dere máan avúavá anan bariyákan mai ano uman manan o maman afoká iyan mino.

#### *Pita Ma Kípan Baya Sein Mino*

17 \*Téi ma sinunu ukheruna sirona kéka soe, saretin pe o útúbé amaan haya siaméku afová ukharé esin maen namu nanin bantai avúava sinta ano saretíi inin ída máden asuse intiya ákona e ma mumunan iyaona ída me ampeno van muno. 18 Máan tin nompo setin ma Siyain Bafan Yisas Karaisin ma anunu ukhein tarisari vá afova vasá e inorano.

Béimpin ná minó kakhan má aví ma yaní in avúavá bá ano saréa váken ná para van oriyan bano. Mai fura ino.

\* 3:8: Íbo 90:4    \* 3:9: Aba 2:3; 1Ti 2:4    \* 3:10: Mat 24:29, 35; Ruk 12:39; 1Te 5:2    \* 3:13: Ais 65:17; 66:22; Rev 21:1, 27    \* 3:15: Rom 2:4    \* 3:17: Mak 13:33; 1Ko 10:12

# YONI MA ESÉ ARAÍEN UVANTEIN BOMPON MINO (1 Yoni)

## Yoni Ma Esé Bompon Uvanteí Pákenai Afova Vaya Ino

*Ma vompon ma uvantein banta ino.*

Bayá varen orin banta Yoni vei furin ádesí ukhan ma uvarein minon ten manáa afova vanta kéká iniyán mifo ída mana vanta ano fura sen afová ukhen mino.

*Uvarein orana ino.*

AD nainti (90) ráké mana antareti (100) ráké mai aúban mino.

*Ma vompon ma uvantein baru ino.*

Esiá barafin ma un non akhempá áau orun perápá ma vain baru Efesasí ino.

*Ma vompon ma uvaman amikhein kéká ino.*

Efesasí ma vain monó namun má Esiá barafin ma vain monó namun kayo vá inká minó akhen pá ma vain monó namun kayofin mái uvamádan oreraen mino.

*Nái ana vará ma vompon uvan-ten nafino.*

Minó akhempá ma monó tiyain kéká ano ma Yisasintá mu-munan iyan ma kamaen ban avúavá ma varan nain má inká pefá ma Yisas Karaisini kama vaya siamikhá ein ma san mi sian amá ukhen mino. Ma vara ráke avúavá bá inká kampun monó doran banta kéká bái avúavá ba san mi ma vompon ma yankafin nain kayo afova amikhen mino.

Inká ena avábá uantan ma kákani ukhein nan tian amá iyáken mi Tiyarafenu ano ma setin avábá usintiyain oniyáké maé mai vará ben aya ven aya vá onon tikhen mino.

*Ayun Ma Fara Van Oriyan Ban  
Baya Ino*

<sup>1</sup>\*Minó danasinta ma ída afoká ukhan ma varé ein mano setin má baya siyáká beni Vaya iniyáké oné tiféuno. Béi Yisas Karaisin báken Ayun Ma Fara Van Aunan mi varé iká béin oniyáké aruvé tiféuno. <sup>2</sup>\*Pefá mai Aunan manon be Afóen má manafin baré íkan béin maman dákó urá purasé onteruna van mi ayun para van au-nan mi véi van mino sé tiretin tiamiyá uno. <sup>3</sup>Tetí ankan ma fura sé ódaré inikhé tiferuna yana san mi eresí manafin átqru uvé monó teno van tiretin tiamiyá uno. Manafin ma átaru uvé monó té tifanuna mai ve Afóen má be Anin Yisas Karaisintá bái monó tiantá tifanté uno.

<sup>4</sup>\*Tetí ankampin moéken timusin bíkano van mi ma vompon uvaman amiyá tiféuno.

*Tiyarafenui Kakhantá Ma Van  
Baya Ino*

<sup>5</sup>\*Ma vaya vá tiretin nan tiameno siren ma véi sisimikhá ein bayan tiretin tiamiyá uno. Tiyarafenu mai kakhan mi vákan bémipin ída sítipa van mino.

<sup>6</sup>\*Máan tukhantí setí ankan ma manafin átaru uvé Tiyarafenu vá monó tiyá uno siré ma yuntein avúavápin para vá tifanté maé mai kampun mi siré ída fura sikhein avúaváká nó tiféuno.

<sup>7</sup>Máan tiyá tifé umpo Karaisin an dé ma Tiyarafenui kakhakhein avúavápin ma vá tifanté maé mai véin tái manafin átaru uvé monó tiyá tiféuno. Máan tiyá tifékun maen be Anin Yisasini nare ano

\* 1:1: Yon 1:1 \* 1:2: Yon 1:14 \* 1:4: Yon 16:24 \* 1:5: 1Ti 6:16; Yem 1:17 \* 1:6:  
1Yn 2:4

setinti ume yo sesé usinté iyan mino.

<sup>8</sup> \*Tetí ankampin ída ume van mino ma sé tifanté mai setiyan mi máká máaká iyá tifékun pura sikhein aváuvá ano setimpin ída van mino. <sup>9</sup> Máan tukhen mifo setisi ume ma sian amá uan bén amé tifékun maen béis ma sikhein ánaín dakhafen mi setinti ume yo sesé usintáden puntákein avúaváká kainten mino. <sup>10</sup> Tetimpin ída ume van mino ma sé tifanté mai Tiyarafenu van mi kampun banta ino siyá tifékun mai avúavá anon beni vaya van tetin túpin ída van ne sen aní iyan mino.

## 2

### *Yisas Karasin Ma Fura Sen Afová In Baya Ino*

<sup>1</sup> \*Téi ma sinunu ukheruna iyamprinta oe, sretí ankan ída umeí ono van mi ma vompon uvaman amiýá uno. Mana ano ma umeí inteya mai mana vanta váken mi setisi ume ampisintano van Tiyarafenun tiamyan ban mino. Béi Yisas Karaisi Tiyarafenu avorá puntákein bantan ban mino. <sup>2</sup> \*Béi anon tetisi ume van be au fóké ákonte ukhen mino. Máan turen tetisi ume ana ída yo sesé ukhen mifo minó baraffá ma vain nanin bantai ume väi yo sesé ukhen mino.

<sup>3</sup> Máan tukhen mifo inté uresá beni nan bá uno sé afová ótifante rafuno. Beni man baya khayo ánaín ma vákuró tifanté mai anon beni nan bá uno sé afová ótifanté uno. <sup>4</sup> Mana vanta ano ma séi Tiyarafenu afová ukhé uno siren ma veni man baya ánaín ma ída vákurinten maen mai véi kam-pun bantan bákán pura vaya ano veimpin ída van mino. <sup>5</sup> \*Máan tukhen mifo fura sen ma Tiyarafenu van anunu ukhein kéká anon beni vaya ánaín dakhafiyan

mino. Máan ma onté tiféi mai véin masá o súpá ukhe rafu áa ída fi sé afová ó tifanté uno. <sup>6</sup> Tiyarafenu vá manafin bá uno ma sin nain kéká ano vá Yisas Karaisi ma varé ein avúavá kasá bano.

### *Auyen Man Baya Ino*

<sup>7</sup> \*Téi ma sinunu ukheruna sirona kéká soe, ma auyen man baya va sretin uvaman amiya rauno. Ída ino. Mai fara vara seyo, ena vá ma avábá in maran ná ono ma sikhein man baya ma araíntá amikhaya o ine eriyá eona fákena vompon mi uvaman amé uno. <sup>8</sup> \*Máan té umps mai ma fura sikhein avúaváká ma Yisasín má tiretin má baonarái ven avábá in maran ná ono ma sen peyante man baya ano sikharé ein mai anon tireimpin auyení ukhen mino. Mai fara vara seyo, sítipa ano inka e kípiyon mi fura oon mano yákó uven kakhaan tiyan mino.

<sup>9</sup> \*Mana vanta ano ma siyáken, "Téi kakhan aúpin bá uno," ma siren monópin bain afá aváeyan ma safi ayofin ná ba safi ma ará uman daan tiyanten mai véi sítipafin para van mino. <sup>10</sup> \*Iye anó ena monó nanin banta van anunu inten nafi mai véi kakhan aúpin mi váken betin ída mamádantin eyúpóen ankaminten mino. <sup>11</sup> \*Máan tinten mifo mana ano ma monópin bain afá aváeyan nafi ayofin nafi ma ará namu uantanten mai sítipa yaná ano véin auu yufúkuádan kufan ukhen mino.

<sup>12</sup> Téi ma sinunu ukheruna iyam-pon kayo oe,

Yisasí ma varein avúavá anoi sretíi ume arúantáká mai van mi ma vompon uvaman amiýá uno.

\* **1:8:** Ibo 32:5; Pro 28:13    \* **2:1:** Ibu 7:25-26

Yon 14:21, 23    \* **2:7:** Yon 13:34; 2Yn 5-6

\* **2:10:** Rom 14:13    \* **2:11:** Yon 12:35

\* **2:2:** Yon 1:29; Kor 1:20; 1Yn 4:10    \* **2:5:**

\* **2:8:** Yon 1:9; Rom 13:12    \* **2:9:** 1Yn 4:20

**13** Monó bayafin ma karakheona  
nanin banta oe, esé araién  
ma minó danasinta afoká  
ein bantan Yisas Karaisin  
báká tiretí ankan béin afova  
suron ukhen nái ma vompon  
uvaman amiyá uno.

Auyen nanin banta oe,

Ban Anon má aruvúde véin  
maman bararasí ureya ven  
esantakhen nái ma vompon  
uvaman amiyá uno.

Téi ma sinunu ukheruna iyampon  
kayo oe, inarufá ma vain  
Afóen pefái afová ukhen ná  
ma vompon uvaman amiyá uno.

**14** Monó bayafin ma karakheona  
nanin banta oe,  
esé araién ma minó danasinta  
afoká ein bantan Yisas Karaisin  
báká tiretí ankan béin afova  
suron ukháen nái  
ma vompon uvaman amé uno.

Auyen nanin banta oe,

Tiyarafenui vaya maman  
ákong ure  
áupín denan baréi

Ban Anon maman bararasí  
ureya véin esantakháen nái  
ma vompon uvaman amé uno.

### *Bararáke Avúavá San Ma Ída Anunu In Baya Ino*

**15** \*Ma vara vá maifin ma vain  
danäsinta vá ída vá anunu ono.  
Mai fara vara seyo, ma vara ráke  
avúavá san ma anunu iyanteya  
mai Afóen nan ma anunuín ída  
éimpin bain mi aní iya ono. **16**\* Mai  
vara vara seyo, ma vara ráke  
avúavá anon ará mantaya ena ina  
yana san anunu iyákeya au khákan  
in avúavá maman afoká uadé iya  
ono. Mai avúavá sinta ano ída  
Sifóen pinté erikhen mifo ma vara  
finte yanasantan afoká iyan mino.

**17** \*Ma vara vá maifin ma vain  
danäsinta vá ano inka mo kípiyan  
mifo Tiyarafenu ma anunu ukhein

avúavá ma varan nona kéká anon  
ayun para va oriya van nono.

### *Yisas Karaisini Namuro Kayo Van Ma Amaan Tikhein Baya Ino*

**18** \*Téi ma sinunu ukheruna  
iyampon kayo oe, ma vara ma  
kípan damú inka afokáen mino.  
Pefá ma siretí ankan inen nan ma  
Yisas Karaisini namuro erinten ne  
ma siyaré ein mai inka kokhoná  
afoká ukhen mino. Mai yaná ma  
oniyá tifesa ma vara ma kípan  
damú inka afokáen mino sé tifano.

**19** \*Mai vanta kéká ano setin má  
bareñ mifo vetí ankan ída setin  
tinan báken mi monó pinté me  
ampiren orikhen mino. Mai ma  
setin me ampiyain avúavá anon  
enina ída vá uno sen aní iyan  
mino. **20** \*Máan tiyan mifo siretí  
ankan ída vetin an dakhaono.

Mai fara vara seyo, Kantá Aunan  
mano sirectimpin bákayai fura ma  
sikhein baya afova suron ukhá  
ono. **21** Máan tukhen nái siretí  
ankan nan pura vaya ída afová  
ukhen mino va sé iniresa ma vompon  
uvaman amiya rauno. Ída ino.  
Tiyarafenui fura vaya kayo vá  
ano ída manafiní ukhá pasé mai vaya  
afová ono van mi ma vompon uva-  
man amiyá uno. **22** \*Iyé kákán  
kampun banta van nafino. Mai  
ma Yisasin nan Tiyarafenu ano  
vei vanasi evaránen avirano van  
ma aní ukhá ein banta va ino ma  
siyain kéká anon Yisas Karaisini  
namuro van mino. Mai fara vara  
seyo, máan kéká anon be Afóen má  
be Anin má ída afová ukhé uno  
siren namurói uante iyan mino.

**23** \*Mana vanta ano ma ve Anin  
nan ída afová ukhé uno ma sinten  
mai véimpin ída ve Afóe vantán  
mifo iye anó be Anin nan tian  
páman inten nafi mai véimpin mi  
ve Afóe vantán mino.

\* **2:15:** Rom 8:7    \* **2:16:** Rom 13:14    \* **2:17:** Mat 7:21    \* **2:18:** Mat 24:5, 24; 2Yn 7

\* **2:19:** Apo 20:30    \* **2:20:** 1Ko 2:15; 2Ko 1:21; 2Yn 2    \* **2:22:** 1Yn 4:3; 2Yn 7    \* **2:23:**

*Kantá Aunan Mano Ma Afóva  
Amiyain Baya Ino*

<sup>24</sup> Mápán tukhein nan mi mai ma esé araié ma iníkharé eona vaya vá pákaan ákona ono. Mápán ma inteyan be Anin má be Afóen mápiñ o súpá ukheya van nono. <sup>25</sup> Mápán ten ma setin má manafin bantí maéi mai ma Yisas Karaisi ano ma ayun ma fara van oriyan ban aunan ma iyátintákáré ein mai simusin má bará tifanté uno.

<sup>26</sup> Mai ma saretí ankan kampun tiré e avían namu avúavápín kaono van ma iyain mai kéká afová ureya ferano van mi ma vompon uvaman amé uno.

<sup>27</sup> \*Tireti ankan inka Kantá Aunan mantan nan tiretimpin bákayá ena ano fura vaya saretin ída afova amino van mi iniya ono. Mai fara vara seyo, Kantá Aunan mano saretin míñó afova amiran mai fura vayan ban mino. Mai ma Kantá Aunan mano siamein baya ánaín para vákure oriya vá inká Yisas Karaisin masá túpá ukhe vá oriya vano.

*Tireti Tiyarafenu Akhafanan Ba Ono*

<sup>28</sup> Téi ma sinunu ukheruna iyampon kayo oe, saréa vá Yisas Karaisin má manafin túpá ukheya mumunan iyaré esin ná béis ma ovaránen erin nain damú ída ayave van ina mantaan ákona ono. <sup>29</sup> \*Tiyarafenu funtákein avúavá ma afová ukhante mae mai ma funtákein avúavá ma variyain kayo van afová eya ven akhafana inon tin nono.

### 3

*Tiyarafenu Akhafana An Dakhen Ma Van Baya Ino*

<sup>1</sup> \*Tiyarafenu ano vei anunu moéken tetimpin banaráken te sikhafana oe sen tariyá mai fura sé ben akhafanan bá tiféuno! Mápán

tukhé tifé umpo varará nanin banta ano Tiyarafenu ída afová ukhen pasen mi ven akhafana ma vá tiferuna mai ída afová ukhen mino. <sup>2</sup> \*Téi ma sinunu ukheruna sirona kéká soe, inka setí ankan Tiyarafenu akhafanaí ukhé tiféuno. Yisas Karaisi ma erin nain damú inté ukhein bukhafa vasá bá tifante rafu mai ída afová ukhé tifé umpo véi ma erin nain damúi fura sé ben andavé tifékuñ mi mai ma vaintá béis fara vantí oná tifanté uno. <sup>3</sup> Mai van ma mumunan in nain kéká anón Yisas Karaisi ma avusese ukhein an den avusese ukhen banten mino.

<sup>4</sup> Umeí ma iyain nanin banta anon Tiyarafenu man baya yurafuriyan mino. Mai fara vara seyo, ume avúavá ma variyain mai Tiyarafenu man bayan durafuriyan mino. <sup>5</sup> \*Yisas Karaisimpin ída ume vákan mi setisi ume yo arútintano van béis erikhayai saretí ankan afová ukha ono. <sup>6</sup> Mápán tukhantin béisn má ma van nain nanin banta ano ída umei iyan banten mino. Inká ume avúavá ma varen oriyan bain kayo ano véin ída afová en ontén mino.

<sup>7</sup> Téi ma sinunu ukheruna iyampon kayo oe, ída vá áesin manáa kéká ano saretin mákáden tavifá aviren orino. Yisas Karaisi funtákein bantan bákán ben an ma yákein nanin banta anon puntákein avúavá ana varé iyan mino. <sup>8</sup> \*Mápán tiyan mifo vanasi ano ma fara umefen oriyan banten mai ma araiintá umei ukhein bantan Ban Anon bákán mi veni kékái vá uno sen aní iyan mino. Mápán tiyan mifo Ban Anon yoran ma varé ein morun asuse ono van mi Tiyarafenu Anin mano eren mino. <sup>9</sup> \*Tiyarafenu kékápin ma afoká ukhein nanin banta ano veni avúavá bái váken ída umefen oriyan bá é iyan mino. Tiyarafenun pintéi afoká ukhen

\* 2:27: Yon 16:13   \* 2:29: 1Yn 3:10   \* 3:1: Yon 1:12-13; 16:3   \* 3:2: 2Ko 3:18   \* 3:5:  
Yon 1:29; 1Pi 2:22-24; 1Yn 2:2   \* 3:8: Yon 8:44   \* 3:9: 1Yn 5:18

pasen betí ankan ída umeén oriyán banten mino. <sup>10</sup> Máan tukhanti inte kékasá Tiyarafenu ina van ná inká inte kékasá Ban Anon nína van nafi mai saréón afová ó tifanté uno. Tiyarafenu man bayá ánaín ma ída vakuren ma inká afá aváen nan ma ída anunu iyain kéká mai ída Tiyarafenu akhafana ino.

## *Ena Vá Ma Avabá In Maran In Bayá Ino*

11 \*Esé araiintá ma inikharé é  
tiferuna vaya mai ena vasá avábá  
in maran onon tikharen mino.  
12 \*Keni ma Ban Anoni kékasí uven  
ma ve afá aruan purein an ída vá  
dá tifano. Mai fará bén aruan  
puren nafino. Mai fara va ino.  
Keni namu avúavá bariyan maen  
be afá ano funtákein avúavá bari-  
yareín pasen mi máan ten mino.  
13 \*Máan tukhein nará mumunan  
tiyofi sisá tiváeyan noe, varará  
nanin bánta ano ma siretin namu  
uantantiya mai van ída vá anú  
duman duman ono.

<sup>14</sup>\*Mumunan tiyofi sifá tiváeyan ma avábá ó tifanté mairái furin pinté esanté para ma ayun ban oríyan ban aunampin oré uno sé afová ó tifanté uno. Mágan ó tifanté umpo avábá in avúuvá ma ída vain kéká ano fara fúken ban mino. <sup>15</sup>\*Mana vanta ano ma monó nañin banta ma namuroí uanté iyain mai vetin mi aruan puriyan mino. Banta ma aruan puriyain kékápin mi ayun ma fara van aunan ída váka sretí ankan afová ukha ono. <sup>16</sup>\*Yisas Karaisí ma ve aunan tetin timikhein mai fura avábái vá tetí ankan afová ukhé tífeno. Mágan ma ukhein nará teti siyofi sifá tiváen naro siré tetisi saunan má dere vá ampiádá tifano. <sup>17</sup>\*Mágan tukhen mifo mana vanta ano ma kokhon danasinta kaúdáken ma amusin iyantin ma ve afá aváe ano manáa

yana san ma o afasí ukhantin ma  
ída aya inten mai inté uren ná Ti-  
yarafenui avábá ano mai vantafin  
banten nafino.

18 \*Téi ma sinunu ukheruna iyampon kayo oe, setí ankan ída vá bayafó ana ena avábá iyá uno sé tifan numpo sivútivá pókesá pura sé aní ó tifano. 19 Pura sikhein avúavá ánaín mi vákuriyan mino sen tetisi sivútivá anon aní intíi afová iyáké ída feranton kasaé Bafan avorá o mantá tifanté uno. 20 Máan tiyákun maen tetin tú bá inin má ano ma ume nanin banta ono sen tisimiyantí maé ída feran kasaé ben avorá o mantanté uno. Mai fara vara seyo, Tiyarafenu ano setin tú bá inin má esantakhen pasen pefái minó afová ukhen mino.

21 \*Téi ma sinunu ukheruna  
sirona kéka soe, setin tú bá inin  
má ano sisimen ma ída umeí  
ukha ono ma sin nain manon  
ákona siminti ída feran kasaé Ti-  
yarafenu avorá o mantá tifanté  
uno. 22 Mantakhé oo yaiiyáyá  
ké

béi ma amusin ukhein danasinta  
anan bariyá tifékun pasen mi inan  
ma senuna yaná kasaen timinten  
mino. <sup>23</sup> \*Béi ma sikheiní esá  
ben anin Yisas Karaisin avíká mu-  
munan iyá ena nanin banta vasá  
avábá in maran ó tifano. Máon  
ma in avúavái veni man baya van  
mino. <sup>24</sup> \*Tiyarafenui man baya  
ánain ma vakuriyain kayo anon  
bén má manafin bákan inká béi  
vetin má ban mino. Kantá Aunan  
ma setin timikhein manon ani íkái  
Tiyarafenu ano setin má ban mino  
sé afová ukhé tiféuno.

4

*Kampun Sakhanampa Vanta  
Kayoi Vaya Ma Yaíden Afová In  
Baya Ino*

<sup>1</sup> \*Téi ma sinunu ukheruna sirona kéka soe, Kantá Aunan

\* **3:11:** Yon 13:34    \* **3:12:** Esé 4:8    \* **3:13:** Yon 5:18-19    \* **3:14:** Yon 5:24    \* **3:15:**  
 Rev 21:8    \* **3:16:** Yon 13:1; Kar 1:4    \* **3:17:** Diu 15:7    \* **3:18:** Yem 2:15-16    \* **3:21:**  
 Ibu 4:16    \* **3:23:** Yon 6:29; 13:34    **3:24:** 1Yn 4:13    **4:1:** Mat 7:15; 1Te 5:21; 1Yn 2:18;  
 2Yn 7

manon ákona simiyá bayá siyá uno ma siyain kéká mai Tiyarafenu fintesá mai aunan erikhan ná tiyan nafino van daíde afová ure vá mumunan ono. Mai fara vara seyo, kokhon kampun sakhanampa vanta kayo ano ma varará orera ukhen mino. <sup>2</sup> \*Yisas Karaisin nan ma sian amá iyáken barará bantái uven mi afoká ukhan mino ma sin nain sakhanampa vanta van mi Tiyarafenui Aunan mái van mino seya afová in nono. <sup>3</sup> \*Máan tin nompo Yisas Karaisin nan ma ída máan bayá sin nain banta mai véi ída Tiyarafenu vaípáké erikhen mino. Máan banta van mi Yisas Karaisin ma namuroí uwantan aunan má ma varará afoká inten ne sen pefá tiami inikharé en nan mai vanta inka e van mino.

<sup>4</sup> \*Máan tukhen mifo séi ma sinunu ukheruna iyampon kayo oe, siredí ankan Tiyarafenu inan bákeyá mai ma kampun sakhanampa vanta kéká bá ma aruviyá eona inka vetin esantakha ono. Mai fara vara seyo, siredí ankampin ma vain Aunan manon ma varafin ma vain aunan esantaren kákani ukhen mino. <sup>5</sup> \*Mai ma Tiyarafenui fura vayan tamiyá uno ma siyain nanin banta mai ma vara rákena kékái váken ma vara rákena afova fóí vanasi siamikan iniren mai vaya ánan bákuriyon mino. <sup>6</sup> Máan tiyan mifo setí ankan Tiyarafenu inan báken mi véin ma afová ukhein kéká anon tetinti vaya iniyán mino. Inká Tiyarafenu ina ma ída vantén mai seti ma siamenuna vaya ída ininten mino. Máan ma in nain avúavákai ma fura Aunan mái van mino sé inká ma kampun aunan mái van mino sé uré afová ó tifanté uno.

### *Ena Vá Ma Avábá In Maran In Baya Ino*

\* **4:2:** 1Ko 12:3    \* **4:3:** 1Yn 2:18    \* **4:4:** Mat 12:29; 1Yn 5:4-5    \* **4:5:** Yon 8:47; 15:19  
 \* **4:9:** Yon 3:16    \* **4:10:** Rom 5:8-10; 1Yn 2:2    \* **4:12:** Yon 1:18    \* **4:13:** 2Ko 1:22; 1Yn 3:24

<sup>7</sup> Téi ma sinunu ukheruna sirona kéká soe, ena vá ma anunu in maran in avúavá mai Tiyarafenu finté erikhein mifo erí máan avúavá ana vá baré oriýá bá tifano. Ena van ma anunu in nain mano mai véi Tiyarafenu fintéi afoká ukhen inka véin afová ukhen mino. <sup>8</sup> Máan tukhen mifo mana ano ma ena van ída anunu inten mai véi ída Tiyarafenu afová inten mino. Mai fara vara seyo, anunu ma in avúavái anan Tiyarafenu van mino.

<sup>9</sup> \*Tiyarafenu ano ma setin nan anunu ukhein mi aníen be Anin mana iyampon uró tiantan ma varará eren mino. Béin pinté uaren ayun ma fara van oriyan ban aunan barano van mi máan ten mino. <sup>10</sup> \*Teti ankan ma Tiyarafenu van tinunu iyá tiferuna vara siya raumpo mai ma véi ano seti nan anunu iyan ma ve Anini furimpó ma setisi ume ampisintákein nan mi siyá uno.

<sup>11</sup> Téi ma sinunu ukheruna sirona kéká soe, Tiyarafenu ano ma setí ankan nan máan anunu ma iyantisá máan mana erá ena van anunu in maran ná ó tifano.

<sup>12</sup> \*Mana ano ída Tiyarafenu onté iyan mifo setí ankan ma ven anunu in maran ma é tiféku maen mi Tiyarafenu ano setin má e váken tetin pinté uaren ena ma anunuin avábá maman kákani inten mino.

<sup>13</sup> \*Tiyarafenu ano setin má báken tetin nan beni avúavá ánan bákurino van mi vei Kantá Aunan tetin timikhá mai afová ukhé tiféuno. <sup>14</sup> Barará nanin banta aya uren evaráne avirano van ma ve Afóe ano ve Anin tiantan ma erakhá ein mai seti suufó ontaréi sian amá iyá uno. <sup>15</sup> Yisas Karaisin nan ma Tiyarafenu Anin mino ma siren tian dákó inain nanin banta vái Tiyarafenu ano manafin bantin mai kayo ano veni

avúavá ánain bákurinten mino.<sup>16</sup> Tiyarafenu ano ma setin nan moéken anunu ukhein mai afová ukhé tiféi véimpin ákona inin kaiyá tiféuno.

Avábá in avúavá anan Tiyarafenufin bákán mi avábá aúpin ma vain kéká anon Tiyarafenufin bákán inká betimpin béis van mino.<sup>17</sup> Tiyarafenui avúavá ánain ma vákuriyá tiferuna anon ena ma avábá uantan avúavápin moéché ákona iyá tiféuno. Máan tukhein nan mi vanasi ma yaimin nain damú ida feran kasaé ben avorá o mantá tifanté uno. Mai fara vara seyo, ma varará ma váké maé Yisas Karaisini avúavá ánain mi vákuriyá tiféuno.

<sup>18</sup> Máan anunu ma in manon ída feran bantin inká puntákein avúaváká ma anunun in manon minó peran avúavá do maman karúdanten mino. Mai ma yaimin nain damu san ma iniré tikhokho van é tifékun maen mai anon anien tetimpin beni anunu ano ída ákona ukhen nen tinten mino.

<sup>19</sup> Tiyarafenu ma esé araiántá tetí ankan nan anunu ukhein nan mi setí ankan ena vá anunu in maran iyá tiféuno. <sup>20</sup> Mana vanta ano ma ve ayofi afá aváen nan ma ída anunu iyáken ma Tiyarafenu van tinunu iyá uno ma sinten maen mai véi kampun banta ino. Mai fara vara seyo, setí ankan ma oniyá tiferuna siyofi sifá tiváen ma ída sununu ó tifanté mai ma ída oniyá tiferuna Tiyarafenun inté uresá tinunu ó tifante rafuno.

<sup>21</sup>\* Tiyarafenu ano ma man bayan timikhen mino. Tiyarafenun nan ma anunu inain mano vei ayofi afá aváeyan masá anunu ino.

## 5

### *Tiyarafenu Anintá Ma Mumunaní Pákena Vaya Ino*

\* **4:21:** Mak 12:29-31    \* **5:1:** 1Yn 4:15

\* **5:8:** Yon 15:26    \* **5:9:** Yon 5:32-37    \* **5:10:** Yon 5:36-40

<sup>1</sup>\* Minó ano ma Yisasin nan Tiyarafenu ano vei vanasi evaránen avirano van ma aní ukharé ein banta ino sen mumunan inten maen mai vetí ankan Tiyarafenu akhafana ino. Inká minó ano ma Tiyarafenu van anunu inten mai ven akhafana vá inan anunu inten mino. <sup>2</sup> Tiyarafenu van ma sinunu ó tifanté mai veni man baya ánain mi yakhafiyá ben akhafana vá inan tinunu iyáké afová iyá tiféuno. <sup>3</sup>\* Tiyarafenu van ma anunu in nan ma siyain mai veni man baya ánain ma funtáden bákurin avúavá san mi siyákán mai ída uman dakhen mino. <sup>4</sup> Mai fara vara seyo, Tiyarafenu akhafana ano ma Yisas Karaisintá mumunan intin maen betin ákona amintin ma vara ráke namu avúavá maman bararasí uren mantaan ákona inten mino. <sup>5</sup> Yisas Karaisin nan ma Tiyarafenu Anin mino siren mumunan ein kéká anon bara ráke avúavá bá ma aruviyare ein maman bararasí uren mantaan ákona iyan mino.

<sup>6</sup>\* Yisas Karaisi ma monó non perein má daa unkamádantá ma vei nare vanaein má anon Tiyarafenu Anin muno sen anien mifo non máa fo saino. Ída ino. Non má nare vá póke ino. Máan tukhan mi Kantá Aunan mano yere ma siyain mai fura vayan bákán tetin tisimian mino. <sup>7</sup> Kanú manaú daná anon Yisasin nan puran tino sen aní ukhen mino.

<sup>8</sup>\* Mai yaná ma vain mai Au-nan ban non ban nare van ukhen mino. <sup>9</sup>\* Tetí ankan ma vara ráke vantai vayará mumunan iyá tifé umpsa Tiyarafenui vaya ano moéken kákán ukhen mino. Para vara seyo, Tiyarafenu ano ve Anin nan mi sian amá uran ban mino.

<sup>10</sup>\* Mai vaya van mi Tiyarafenu Anintá ma mumunan iyain kayo ano mai furan tikhen ne sen afová iyan mino. Mai fara vara seyo, ída

\* **5:3:** Yon 14:15, 23-24

\* **5:6:** Yon 1:29-34

ma mumunan iyain kayo ano Tiyarafenu van kampun banta inon tiyáken ben Anini vaya ma sian amá iyain nan ída mumunan iyan mino.

<sup>11</sup> Máan tiyan mi Tiyarafenu ano mai van tjan amá ukhen mino. Be Anini avúavá ánaín ma vákuriyá tiferuna kékái ayun ma fara van oriyán ban aunan Tiyarafenu ano simikhen mino. <sup>12</sup>\*Máan tukhan maen iye anó Tiyarafenu Anin maman áúpin dan ban nafi mai véi fara van aunan mantén mifo Tiyarafenu Anin ma ída mantéin mano mai aunan ída mantéin mino.

### *Yoni Ma Kípan Bayafó Tian Ákona Ukhein Baya Ino*

<sup>13</sup>\*Tiyarafenu Anintá ma mumunan ukheona kayo ano ayun para van aunan manté uno sire afová ono van mi ma vompon uvaman amé uno. <sup>14</sup>\*Tetí ankan ma ákonae mumunan iyáké ma veni anunurá mana yana san inanté kun maen béis setinti vaya ininten mino. <sup>15</sup>Inká béis inikhái inan tiyá uno ma siré afová iyáké ma inantenuna yaná mai véi kanaíen timinten mino sé afová ukhei inanté tifanté uno.

<sup>16</sup>\*Tiretin pinté mana ano ma onesin e ayofi fi afá aváe fi ma furimpin ída ororen ukhein umeí ma iyanti vá amúkuantesin ná Tiyarafenu ano véin aunan ná amino. Inká purimpin ma aviren oré iyain ume váé iyan mifo mai ume ma variyain kéká amúkuantano vara siya rauno. Ída ino. <sup>17</sup>Minó namu avúavá ma vain mai ume ifo manáa ume kayo ano ída furimpin aviren oré iyan mino.

<sup>18</sup>\*Tetí ankan afová ukhé tifékun Tiyarafenui kékasí ma ukhein kayo ano ída umeí ana en oré iyan mino. Mai fara vara seyo, Tiyarafenu Anin manon betin

pákaan ákona ureñ dafíkan mi Ban Anon mano ída kanaíen betí au aruvé iyan mino. <sup>19</sup>Tetí ankan Tiyarafenu akhafanan bá afová ukhé tifékun mi ma vara ma eúkukhein mai Ban Anoni ákona arángópái vákan beni inintá minó daná bariyan mino. <sup>20</sup>Tetí ankan nan pura sikhein Tiyarafenu afová ino van mi ve Anin mano setin morun afova simikhá afová iyá tiféuno. Máan tukhái setí ankan ma ven Anin Yisas Karaisimpin baruna van mi Tiyarafenu fin bá tifere siyá uno. Beyáká anan pura sikhein Tiyarafenu váken ayun ma fara van oriyán ban aunan mi van mino.

<sup>21</sup>Téi ma sinunu ukheruna iyampon kayo oe, kampun ayarafenu kayo ano Tiyarafenui varu varen tiretí aúpin kumanin nafo yafían ná ákona ono.

\* 5:12: Yon 3:36 \* 5:13: Yon 20:31 \* 5:14: Yon 14:13-14; 1Yn 3:21-22 \* 5:16: Mat 12:31 \* 5:18: 1Yn 3:9

**YONI MA KAN  
DÁDASÍEN  
UVANTEIN BOMPON  
MINO  
(2 Yoni)**  
**Yoni Ma Kan  
Dádasíen Bompon  
Uvanteí Pákenai  
Afova Vaya Ino**

*Ma vompon ma uvantein banta ino.*

Baya varen orin banta Yoni vei furin ádesí ukhan ma uvarein mino.

*Uvarein orana ino.*

AD nainti (90) ráké mana antareti (100) ráké mai aúban mino.

*Ma vompon ma uvantein baru ino.*

Efesasí barurá ino.

*Ma vompon ma uvaman amikhein kéká ino.*

Monó nanin má be avafu akhafana va safi áa monó namun má maifin ma monó tiyain nanin banta va safin amiken mino.

*Nái ana vará ma vompon uvan-ten nafino.*

Mana antumpin nafi áa monó nanin bantafin nafin uvaman kaúden mi avábá in ayúavá pá ana vá bano sen mi inká kampun monó banta kayo van dafíke vá bano sen tiamikhen mino.

*Amusin Baya Ma Sein Baya Ino*

<sup>1</sup> Téi Yisasintá ma mumunan iyain bantai monó doran bantan báké

Tiyarafenu ma veina e siren aní ukhein nanin má be akhafana vá báká ma séi sinunu ukheruna

\* **1:1:** Anasi vá be akhafana vase ma sikhein mai monó namun má banasi va san mi sikhen ne sen kokhon afova vanta kayo ano iniyan mino. \* **1:4:** 3Yn 3 \* **1:5:** 1Yn 2:7 \* **1:7:** 1Yn 4:1-3

kéká baonafái ma vompon uva-man amé uno. Ída seyáká ano ana siretin nan purasé tinunu iyá umps Tiyarafenu fura sikhein avúavá ánanin ma vákuriyáin kéká bá ano yeren anunu ukhen mino.\*  
<sup>2</sup> Tetin túpin ma fura sikhein avúavá bain nan mi siretin nan tinunu iyaruna mai ano fara oriyan banten mino.

<sup>3</sup> Pura vaya vá avábá en tarisari in avúavá bá ma vain banta mai seti Sifóe Tiyarafenu vá be Anin Yisas Karaisin pinté basá arunaná bá ará kusin má ano setin túpin bano.

*Pura Vayará Bano Van Ma Ákona Uantein Baya Ino*

<sup>4</sup> \*Tifóe ma seinén ma e akhafana ano fura sikhein avúaváká nöká ma oniyaruna anon kákan timusin timiyan mino.

<sup>5</sup> \*Máan tukhái mai ma moéké tinunu ukheruna nanin noe, ída auyen man baya uvaman amiá umpsfefá ma araiintá inikharé tiferuna mai man bayan báká ena nanin banta vá avábá in maran ono van tiamiyá uno. <sup>6</sup> Tetí ankan ma Tiyarafenu man baya ánanin ma vákuriyá tiferuna van mi avábá se siyan mino. Pefá araiintá ma iné tifékun mai man baya anón ena vasá anunuin maran ono sikharen mino.

<sup>7</sup> \*Banasi mákáden ma aviren tavi aipá orin kéká ano inka ma varará orera ukhen mino. Betí ankan manon Yisas Karaisin nan banta vukhafa vá ma varará erikhen ne siren ída mumunan é iyan mifo máan kéká anon banasi mákáden aviren namu aasá oriyáken mi Karaisin namuroi iyan mino. <sup>8</sup> Máan tukhen mifo mai ma varano van ákona e yoriyá eona yaná pa savifá dóan afein nampo yafíon ákona ukhare vá tiretii miyan puntáde

varano.<sup>9</sup> Mai fara vara seyo, Yisas Karaisini vaya ma ída funtáden banasi afova aminton ma vetí iñin ánaín dakhafen ma yanasi siaminten maen mai véi ída Tiyarafenu vá túpá ukhen mino. Máan tukhen mifo Yisas Karaisini vaya ma funtáden banasi afova amen nonten mai ve Anin má be Afóen mái véi súpá ukhen mino.<sup>10</sup> Mana vanta ano ma ída funtákein aa sáké Yisas Karaisini vaya varen erinti vá ída vá e amá o avíon kaúde véin avábá uantano.<sup>11</sup> Mai ma véin o avíon kaúden kama in nain banta ano véi ma namu yorarí iyain mi aya inten mino.

### *Kípan Baya Ino*

<sup>12</sup> Téimpin kokhon baya vá tiretin tiameno van inikhé umpo fa savifá ída vompon uvaré afe iyá bano van muno. Máan tono van inikhé umpo áde anantá tiretin o onano van iyaruna séi ma oréku soniyasí ma siretin má baya sékun mai anon timusin ma iyá é tiferuna mo fura yanasi inten mino.

<sup>13</sup> Mai ma Tiyarafenu ano aní ukhein ayofin akhafana\* anon betí amusin baya yan tireti vaon-afá oren mino.

---

\* **1:13:** Tiyarafenu ano aní ukhein ayofin akhafana e ma sikhein mai ena varufá ma mumunan nanin banta vain nan mi sikhen mino.

**YONI MA KANÚ  
MANAUSÍEN  
UVANTEIN BOMPON  
MINO  
(3 Yoni)**

**Yoni Ma Kanú  
Manausíen Bompon  
Uvanteí Pákenai  
Afova Vaya Ino**

*Ma vompon ma uvantein banta ino.*

Baya varen orin banta Yoni vei furin ádesí ukhan ma uvarein mino.

*Uvarein orana ino.*

AD nainti (90) ráké mana antareti (100) ráké mai aúban mino.

*Ma vompon ma uvantein baru ino.*

Efesasí barurá ino.

*Ma vompon ma uvaman amikhein kéká ino.*

Romú kéká ano Khaiusin bí kokhon banta aví daran ban mino. Auyen avúavá ma uvantein bomponpin (Niu Testameni) ma Khaiusin bí bain mai Koriní barurá ban (Romu 16:23, 1 Korini 1:14) Masedoniá barafá ban (Aposeri 19:29) inká Debi barurá ban ukhen mino. (Aposeri 20:4, 5) 3 Yoni vompompin ma vain banta ída mai vanta kayo vá manái ukhen mifo manái ukhein bí bain banta inon ten afova vanta kayo inikhen mino.

*Nái ana vará ma vompon uvanten nafino.*

Khaiusini mumunan má monó nanin banta ma ven amá orin ma avábá uantiyá ein ma san mi susu sian ten mino. Diotre-fesin ne sin banta ano monó

ayain banta kayo namuroí uantiyan mi Khaiusi mantaan ákona ino van Yoni ano vaya siamen mino.

*Yonini Amusin Baya Ino*

<sup>1</sup>\*Téi Yisasintá ma mumunan iyain nanin bantai yoran bantan báké

éi sesi kama sirona uron mi Khaiusi van ná éin nan purasé tinunu iyákéi ma vompon uvaman amé uno.

<sup>2</sup>Téi ma sinunu ukheruna sirona oe, éin aú iyampon mano kama ukhái eni yante vukhafa vá ano yere ákona ukhantiya amusin iyáke minó daná kama e varano van mi simúkuantiyá uno.

<sup>3</sup>\*Ei inte avúavá kasá bákeyá pura vaya ánaín dakhafiyafa mai manáa sifá tiváeyan mano séin me sisimí iniréi kákán timusin é uno.

<sup>4</sup>Te sikhafana ano ma fura sikhein baya ánaín ma vákuriyain baya ma séi iniyáké mai ena yanáká ma simusin iyaruna simusin esantaréi moeké timusin uantiyá uno.

*Bafani Yoran Banta Kaylorá Ma  
Kamaen Dafsií Pákena Ma Ákona  
En Tein Baya Ino*

<sup>5</sup>Téi ma sinunu ukheruna sirona oe, mirenie ena fáké monó doran banta kéká ano ma esanten oriya ma e amápin avían kaúde yafisiyaona avúavá mai Tiyarafenu kama yoraríi iya ono.

<sup>6</sup>\*Ei ma vetin avábá ure kama avúavá aní iyaona vaya van mará ma vain monó nanin banta siamíkan inen mino. Betí ankan ma éin me ampire orono van iyantiya vá Tiyarafenu ano ma amusin ukhan nain aa sákesá manáa yanasantia aya esin ná mamaren orino.

<sup>7</sup>\*Mai fara yara seyo, vetí ankan Bafani yoraríi en nóken pasen afokhampin ma vain nanin banta finté ída mana ayain daná baré iyan mino.

<sup>8</sup>Mai vará

\* 1:1: Apo 19:29; Rom 16:23 \* 1:3: 2Yn 4

\* 1:6: Tai 3:13 \* 1:7: 1Ko 9:11-12

máon banta kéká kama avúavá aní erá mai kéká aya iyáke inká manafiní uverá Tiyarafenu fura avúavá tian banasi amé tifano.

<sup>9</sup> Monó nanin bantafin ma afova vompon uvamádékun orikhan mifo mai ma veyan ánon bantai ono van iyain banta Diotrefesi ano ída mana yanásí inten mino. <sup>10</sup> Téi ma oronté béis ma setin nan namu yorarí iyan mino sen ma soyampá baya siren namu vaya kayo siyain nan éin mo siamenté uno. Ena fáke monó doran banta kéká ma ída ve amápin o avión kaúden ída kama iyáken inká betin ída aya ino van ma monó nanin banta siamiyain nan deren tiamenté uno. Máqn banta kéká ma aya iyain nanin banta mai monó namun pinte véi ano yo sianté iyan mino.

<sup>11</sup> \*Téi ma sinunu ukheruna sirona oe, ída vá máon avúavá ena nanin banta aní iyáke kama avúavá áñain mana vá dakhafono. Kama avúavá ma varé iyain kayo ano anien Tiyarafenu vanasi uno sé iyan mifo namu avúavá ma variyain kayo ano mai Tiyarafenu ída afová ukhé uno sen aní é iyan mino. <sup>12</sup> Máon té iyan mifo minó ano Demetriusini kama ayúavá bá inká béis ma fura vaya siamiyain mái sian dákó iyan mino. Tetí ankan má dere ma veni kama avúavá san tian dákó iyaruna mai saretí ankan afová ukhen nái fura vayan tiyá uno.

### *Ma Sipá Ma Kípan Baya Kayo Ino*

<sup>13</sup> \*Téimpin kokhon baya kayon bái éin tiamento van inikhé umpo ída vompompin uvaman amenté uno. <sup>14</sup> Mai fara vara seyo, seyantá tiretin o oniyáku sen má baya seno van mi inikhé uno.

<sup>15</sup> Tiyarafenu ará kusin mano éin masá bano.

Mará ma vain arona kayo ano vetí amusin baya siádán éi vaon-afá oren mino. Tentí simusin baya

yere maifá ma vain tirona kayo vá mana mana arariya siameno.

# **YUTI MA UVANTEIN BOMPON MINO**

**(Yuti)**

## **Yuti Vompon Ma Uvanteí Pákenai Afova Vaya Ino**

*Ma vompon ma uvantein banta  
ino.*

Yissasin nú Yemisin nú afá Yuti  
ano ino.

*Uvarein orana ino.*

AD sikisti-faipi (65) fin nafi  
áa sikisti-sikisi (66) fin nafin  
uvanten mino. Yerusaremi  
baru ma AD seventi (70) fin  
ira saman kaurein ída afoká  
ukhan mino.

*Ma vompon ma uvantein baru  
ino.*

Mai ma Kantasí Ukhein Bara  
e ma siyain bara Parestainí  
inon ten iniyán mino.

*Ma vompon ma uvaman  
amikhein kéká ino.*

Mana monó namun nafi áa  
kokhon monó namun kay-  
ofin nafi ma Yutan kéká ano  
mumunan iyain mi amikhen  
mino. Parestainí barafá bá  
Asiriá barafá bá inká Pesiá  
barafá bá ma vain mumu-  
nan kékápin ma Yuti monó  
dorarien noré eipái uvaman  
amikhen minon ten iniyán  
mino.

*Nái ana vará ma vompon uvan-  
ten nafino.*

Mai ma famúku avúavá bá monó  
ano ma sikhein baya ma  
maman tavi aipá kaiyan ma  
kampun bayafó banasi afova  
amiyain kayo van perano van  
mi amaan baya siádan ban  
mino.

*Yuti Ma Amusin Baya Sein Mino*

<sup>1</sup>\*Téi Yuti Yisas Karaisini miyan  
ída van doran banta ma Yemisin  
afá baruna anon ma vompon  
uvare uno.

Tifóe Tiyarafenu avábápin  
basin ma Yisas Karaisi yafíkanti  
vano van má arakhein nanin  
bantafin mí ma vompon  
uvamádékun oren mino.

<sup>2</sup> Tiyarafenu arunaná bá ará  
kusin má ayábá in avúavá bá ano  
vá tiretimpín moéken bano.

*Kampun Afova Ma Amiyáin  
Nain Kéká Ma Uman Baran Nain  
Baya Ino*

*(2 Pita 2:1-18)*

<sup>3</sup>Téi ma sinunu ukheruna sirona  
kéká soe, Tiyarafenu ano ma setin  
tiya uren evaránen tivíkei pákena  
van mi vompompin uvadé tia-  
meno van inikharé umpo mai  
ma fura vaya ma namuroí uan-  
tiyain kékáká dafiseno van mi  
uimpin ma vompon uvaman amé  
uno. Pura vayará ma mumu-  
nan in avúavá ano minó damú  
para oriyan bano van mi Ti-  
yarafenu ano manádai vei kantásí  
ukhein nanin banta amikhantin  
ída kanaén mana vanta ano yo  
arúden ena vaya khainten mino.

<sup>4</sup>\*Máon tukhan mi Tiyarafenu oo  
ma ída yaiiyain kéká ano aúpáke  
inka siren aúbaná o féken namu  
avúavá kasae varano van mi Ti-  
yarafenu ano ume ampiantíyan  
mino sen tiretin tiamíyan mino.  
Máon banta kayo van mi setisi  
mana Ayafa ma vain Bafan Yisas  
Karaisini vaya namuroí inten ne  
sen mi inká mai kayon Tiyarafenu  
ano yaíden uman aminten ne sen  
sakhanampa vanta kayo ano gefái  
siádan baren mino.

<sup>5</sup>\*Isarerí nanin banta má Bafan  
mano Isipí kena aya uren iyanen  
oriyákan mai ma véintá ída mumu-  
nan ein kéká ma arukhá ein tiretí  
akan afova ukhen nái evaráne  
tiamékuya afova suron ono van

\* **1:1:** Mat 13:55 \* **1:4:** Kar 2:4; 2Pi 2:1 \* **1:5:** Eks 12:51; Nam 14:29-30 \* **1:6:** 2Pi 2:4

muno. <sup>6</sup> \*Inká Tiyarafenu ano ma enisori kayo yoran amiran ma veni haya átakharé uren ma vetin amein doran me ampikhein nan afová ono van muno. Tiyarafenu ano vetin ayanan kuren titípa ukhein barufin karavusií uran báken banasi ma yaimin nain damu san mi ave ukhen mino. <sup>7</sup> \*Inká máan mana en Sodomú baru vá Komorá baru vá mái kan baru adé ma varé ein baru kayofin má ma famúku avúavá bá ída funtákein avúavá sintá vá ano mo kákani suron ukhá ein tiretí ankan afová ono van muno. Mai varu kayo ma ira saman kaurein manon namu avúavá ma variyáiñ nain nanin banta ma ínaiimpáke para van oriyan ban ira fóké ma vetin taman kaurin nain mi aní ukhen mino. <sup>8</sup> Máan mana en mai ma nóken kain ódarákéi ma avúavá kasaé bariyá uno siyain kéká anon pamúku avúavá bariyáken baya inin avúavá me oyan amiren kakhan má ma vain enisori kayoi ákona van dere siren intiyan mino.\* <sup>9</sup> \*Máan té iyan mifo Ban Anon mano ma Mosesin au yarano van ma aví bain enisori Maikorin má aruve aruve iyan maen béin ída oyampá baya sen mifo Tiyarafenu ano ana vá éin daíden uman aminon tein mino. <sup>10</sup> \*Máan tein mifo ma vanta kayo van ma siyaruna mai vetí ankan manon ída afová ukhein danasinta van oyampá baya siren betíi anunurá namu avúavá sintá variyan mino. Máan ma iyain manon iyan má pon mái aasá oriyáken mi uman o maman be amaniná kaiyan mino. <sup>11</sup> \*Máan kéká san mi sirun nan uantiyá uno. Mai fara vara seyo, Keni ano ma ve afá Eborin aruan purein an mi yen noin moékan uman mi varanten mino. Betí ankan

Baramun an mi yen moni saro siren ara ara avúavá baranten mino. Inká Kora ma Tiyarafenu oyampá baya siyaréin ma arein an den mi vetí namu avúavá san aruan kípanten mino.

<sup>12</sup> \*Monó nanin banta vá ma avábá aní iyáke manafin dunan tágé nano nafin máan kéká anon eriven asuse avúavá bariyáken ída ayave van inton beyan ma nan nain nan manan inten mino. Mai kayo anon tókonten konan mano ma o átaru uvin ma uva ano yo fútian asuse uran ma ída á danton meren asuse ein an den mi mai ma iyaantán nain danasinta ída fura sen avúavápin maman kainten mino. Máan kékáí ída ma aran iré iyain daa ana ma arú bá do yaruádan báken kano einí iyain evaránen purinten mino. <sup>13</sup> Betí ankan ma namu avúavá sintá variyain manon un nompin ma uvaen karantó uaren ma fain evaránen eriyan ma kákantá avaya seiní iyan mifo ída ayave van é iyan mino. Inká me khoe khoe en ma noin ofu kayo an mi yakhen pasen kumayusí uaren ma sítipa ukheimpin tipá oriyan mino.

<sup>14</sup> \*Adamun táké ma o khaen eriyan ma yan manápá ifo afápá kan un kádan banta Inoki ma afoká iyáken mai nanin banta van máa mi sen sakhanampa vaya siádan baren mino. “Onano, Bafan mano vei ída yankaforen tausen enisori vái eriyan mino. <sup>15</sup> Mai ma Tiyarafenun me oyan amiren béin oyampá baya siyáken ara ara namu avúavá sintá ma variyá ein nanin bantan me yaíden betíi namu avúavá sintá maman dákó uren uman aminten mino.” <sup>16</sup> Mai nanin banta ano aveantumpin baya vá inká oyampá baya vá tiren maen kasaen betíi anunurá

---

\* **1:7:** Esé 19:1-25; 2Pi 2:6, 10      \* **1:8:** Afova vanta kéká ano mai enisori kayo van namu ukhein kayo inon tikhen mino.      \* **1:9:** Dan 10:13, 21; 12:1; Sek 3:2; 2Pi 2:11; Rev 12:7      \* **1:10:** 2Pi 2:12      \* **1:11:** Esé 4:7-8; Nam 16:1-35; 2Pi 2:15; 1Yn 3:12      \* **1:12:** 2Pi 2:13, 17      \* **1:14:** Esé 5:18, 21-24

namu avúavá sintu varé iyan mino. Mápán tiyan maen beti ma variyain danasinta van betiyan amo siren maen ena nanin banta van kampun ten kama avúavái variya ono siren beti vaípákena kokhon danasinta inantiren baré iyan mino.

*Mumunampin Ákona Ukhēn  
Bano Van Ma Arakhein Baya Ino*

17 Mápán té iyan mifo séi ma sinunu ukheruna sirona kéka soe, setisi Bafan Yisas Karaisini aposeri kéká ano ma siamikhá ein bayá vará ovare me ineno.

18 \*Ma vara kípon damú ádesí ma iyantín betií namu anunu ánaín mana yakhafiyáken Tiyarafenui avúavá san ma siren intin kéká afoká intene síka inikhare ono.  
19 Mápá sikháré íkan mai vanta kayo ano sareá afoká ukhen mi siretin maman aúban daimiyan mino. Mápán kékápin Tiyarafenui Aunan ída vákan mi vetíi yan bukhafa ánaín dakhafen mai avúavá bariyan mino.

20 \*Mápán tiyan mifo séi ma sinunu ukheruna sirona kéka soe, kantasí ma ukhein mumunan tasá mantaan ákona ukhe inká Kantá Aunan mano ma amin nain inintá ana vá amúkono. 21 Mápán tiyáke setisi Bafan Yisas Karaisi ano ma vei arunana pinté uaren ma ayun para van oriyán ban aunan ma varen me amin nain nan ma ave ukheyá Tiyarafenui avábápin ná bano. 22 Mápán tiyanti mai ma mumunan ída ákona ukhan ma kokhon íneine iyáin kéká sara arunan uantano. 23 \*Mápán tiyáke mai ma yaimin nain damú ma ira ano khanaín kékásá aya ure avirano. Kokhon nanin banta ano fara vain betin nan arunan ure ayain nompo vetíi ume avúavá ano ma siretempin erin nará dafian ákona ono.

*Amúkimpó Ma Tiyarafenui Aví  
Daní Ein Baya Ino*

24 Tiyarafenu anon tiretin nan eraven ankamin nafo siren dafian ákona ukhanti varé esin maen béis anan ume avúavá do sesé uantáden aviren orinti kakakhchein barufin amusin pinté o van nompo véin avisá daní ono. 25 \*Beya anan tetisi Bafan Yisas Karaisin pinté uaren Tiyaín Tiyarafenu van mifo véin avisá daní ono. Minó kakhan má kini ákona vá béimpin bákan inká minó danáká ma yafisin ákona kayo vá báken minó danáká pefá dafikaren taréa vain ínaimpáké dere fara oriyán banten mino. Pura ino.

---

\* 1:18: 2Pi 3:3   \* 1:20: Kor 2:7   \* 1:23: Sek 3:2; Rev 3:4   \* 1:25: Rom 16:27; 2Pi 3:18

# AÚPÁ BARÉEIN BAYA MA SIAN DÁKÓ UKHEIN BOMPON MINO

(Revaresen)

## Aúpá Baré ein Baya Ma Sian Dákó Ukhein Bompon Ma Uvanteí Pákenai Afova Vaya Ino

*Ma vompon ma uvantein banta  
ino.*

Baya varen orin banta Yonin ma  
Patmosi Musóká do siantan  
karan o váken mi uvaren  
mino.

*Uvarein orana ino.*

AD sikisti-eiti (68) ráké seventi  
(70) ráké mai aúban mino.  
Romúke kin Nero ma vanasi  
aruau puriyá ein pimpái  
uvanten mifo AD seventi (70)  
fin Yerusalemí baru ídá ira  
saman kaúkan nafi áa AD  
nainti (90) ráké nainti-faipi  
(95) rá ma Kini Domisiani ano  
ma vanasi uman amen aruan  
puriyán ma veni kin doran  
mo khípein orana kayo fin  
mino. (AD eiti (80) ráké nainti-  
sikisi (96) ráké mai aúban  
mino.)

*Ma vompon ma uvantein baru  
ino.*

Esiá barafin áau orun perapá  
Eisiní un nompin bain musó  
Patmosí ino.

*Ma vompon ma uvaman  
amikhein kéká ino.*

Mai ma yan manápá ifo afápá  
kan un kádan monó namun  
kayo ma Esiá barafin bákan  
aví tikhein kayo vá inká minó  
akhempá ma Yisasintá monó  
ten oriyan ban nain nanin  
banta vá ino.

*Nái ana vará ma vompon uvan-  
ten nafino.*

Enará ukhein danaśinta van  
ma sakhanampaí uádan  
aúpá baré ein ma sian amá  
ukhein bompon ma Yisasi  
ano Yonin amein nan mino.  
Esé Araín Bompong (Esé  
Araín Bompon 1-11) ma vain  
banasi ano ma umeí uren  
Tiyarafenun me ampiren  
orein bayan tian amá ukhen  
mino. Ma vompon mano mai  
ma umeí uren Tiyarafenun  
me ampiren nentá orikharen  
ma aú baéden ará manafiní  
in doran ma Yisas Karaisi ano  
maman dákó ukhein mi sian  
amá ukhen mino.

Aúpáke Yanasinta ma Maman  
Dákó Ukhein Mai:

Esiá barafin ma vain monó  
namun kayofin Romu kamanin  
mano uman amiyan ma inká baru  
finté uman amiyan ma iyain nan  
mi amaan baya sikhen mino (1:1-  
3:22). Inká Tiyarafenu Sipi sipi  
Arará ano ma savore sópe an  
dakhein mai:

1. Tiyarafenu ano ma ma vara  
yaimin nain (4:1-19:10)
2. Namu avúavá ma maman  
bararasí inain (19:11-20:15)
3. Auyen bara vá inaru vá  
ma erin nain mai auyen  
Yerusalemí ino (21:1-22:5).

Mo khípan baya maen Karaisi  
ma vanasifin tiádan bain mino  
(22:6-21).

*Esé Araí In Baya Ino*

1 \*Pefá ma aúpá baré ein danas-  
inta ma e unen dákó ono van  
iyán maen Yisas Karaisi ano vei  
yoran banta kayo aní ino van Ti-  
yarafenu ano mai yaná béin amen  
mino. Máan turan mai yaná ma-  
man dákó ino van mana enisorí  
siantan bei yoran banta Yoni vaipá  
oren mino. <sup>2</sup> Mo aní in ma ódaren  
maen Tiyarafenu vaya vá Yisas

\* 1:1: Rev 22:6    \* 1:3: Rev 22:7, 10

Karaisiní avúavá bá puntáden tiamen mino. <sup>3</sup>\*Ma sakhanampa vaya ma yankáan monó nanín banta amin nain kéká bá inká mai vaya iniren ma mai ánaín dakhafin nain kayo vá Tiyarafenu ano avábá aminten mino. Para vara seyo, mai yanásinta ma yákó inain damú inka ádesí iyan mino.

*Dan Manápá Ifo Afápá Kan Un Kádan Monó Namumpin Ma Mumunan Nanin Banta Van Ma Yoni Amusin Baya Siantein Mino*

<sup>4</sup>\*Téi Yoni anon dan manápá ifo afápá kan un kádan monó namun kayo ma Esiá barafin ban ma maifin mumunan nanin banta vaípái mai vompon uvamádékun oren mino.

Mai ma gefé baren taréa van ma inká ínaimpá dere ma fara van nain má inká dan manápá ifo afápá kan un kádan Aunan kéká ano ma Tiyarafenui kin kará aufá bain mái sarisari vá kusin má ano vá tiretin má bano. <sup>5</sup>\*Inká Tiyarafenui vaya ma funtáden tian dákö en ma inká purin pinté an uanten orun mantaven ma ma vara ráke kin kayoi ánon bantái ma ukhein banta Yisas Karaisiní sarisari vá kusin má ano yere vá tiretin má bano.

Mai ma setin avábá urem ma vei narefó ma umei karavusi fintena útútintein banta avisá daní ótifano. <sup>6</sup>\*Be Afóe Ayarafenui monó doran bantái uven Tiyarafenu vá barará nanin banta vá aúban báken dorarí ino van mi vei ano setin tiván bei yafisin aúpin kaúken mino. Mai vará béin moéke kákán bí amesin ná beni yafisin doran mano fara van oriyan bano. Pura.

<sup>7</sup>\*Onano. Konan daró bái erintin maen minó auu ano oniyantin

inká mai ma véin ayorampin ma vankampó antáká ein kéká bá ano yere oniyantin maen ma varai minó akhen pákera nanin banta ano véin nan ifí danten mino.

Pura ino.

<sup>8</sup>\*Bafan Tiyarafenu ano máa sikhen mino. “Téi maé Araíin má Kípan mái vá uno.” Mai ma gefé baré taréa vá ma inká ínaimpá dere ma fara vá ma Moékan Ákona vá Banuna uno.”

*Yonin Auu Vaédan Ma Yisasin Onein Baya Ino*

<sup>9</sup>Téi Yoni saretin afá aváe uno. Yisasin oo yaiyé Tiyarafenui yafisin aúpin tiretin má mana yoran bantan báké tirá kusin pinté ara ara uman bariyá tiféuno. Tiyarafenui vaya vá Yisasiní vaya vá ma sian dákö eruna van mi Patmosi musóká tivireni mo karavusií urá baré uno. <sup>10</sup>Bafani yamú afoká uví bentá monó tiyá ékun toyampáké mana oova ano ufen ma aseinién máa semí, <sup>11</sup>“Ma ma oneona yanásinta vompon dókifin uváde vá dan manápá ifo afápá kan un kádan monó namun kayofin ma mumunan nanin banta vaímpin ná dan orino. Mai monó namun kayo maen Efesasií Simeñáí Pekamamíí Taiatairaí Sadisií inká Firaderfia vá Raodisia vá ino.

<sup>12</sup>Mai ma soyampáké ma vaya siyain onano siré dovaébé onékuun maen dan manápá ifo afápá kan un kádan oon uruan dankará intánuran baren mino. <sup>13</sup>\*Máan tukhan mai ma oon uruan intánukhein danka kayo aúbaná mana Vanta Anin ma einí ukhein mano arantantá aravukhein ayá buí daná urem inká akhoní in ma korifó uvanteimpó akhoní urem baren mino. <sup>14</sup>\*Béin ánon do ano

\* **1:4:** Eks 3:14-15; Rev 3:1; 4:5    \* **1:5:** Íbo 89:27; Kor 1:18    \* **1:6:** 1Pi 2:9; Rev 5:10; 20:6  
 \* **1:7:** Dan 7:13; Sek 12:10; Mat 24:30; Yon 19:34-37; 1Te 4:17    \* **1:8:** Rev 21:6; 22:13    \* **1:8:** Kiriki vaya finté Arfa vá Omekha va se ma siyain mai Araíin má Kípan má unon tiyan mino. Revaresen 21:6; 22:13 fin dere vá onano.    \* **1:13:** Dan 7:13; 10:5    \* **1:14:** Isi 43:2; Dan 7:9; 10:6; Rev 2:18; 19:12

## 2

*Efesasí Monó Namumpin Ma Mumunan Nanin Banta Vaípái Ma Vompon Uvamádan Orein Baya Ino*

<sup>1</sup> \*“Efesasí baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma yan manápá ifo afápá kan un kádan ofu fákoren ma inká dan manápá ifo afápá kan un kádan oon kayo ma uruan korifó uvantein dankará intá nukheintá ma noin banta ano máa mi sen mino. <sup>2</sup>\*Tiretí ankan ma ákona yorarí iya ma mantaan ákona uve uman bariya ma kama avúavasi iyaona van téi afová ukhé uno. Afová ukhékuya namu vanta kayoi avúava san avesara iyáke vaya varen orin kéká uno ma siyain kayoi avúavá bá baya vá daide onen nan mai ma siyá ein mai kampun bayan tiyaren mino. <sup>3</sup>Téin tivisare sireya ída avesarain uman bariyáke ákona yorarí e ono.

<sup>4</sup> Máan te ompo esé ma araiintá ma séin nan anunu iyáke ma ena kéká ará amiyá eona avúavá mo ampire ná mai van mi saretin tirá namuanté uno. <sup>5</sup>\*Mai ma esé araiintá ma variyá eona avúavá ma me ampireya o vaona vá onano. Ará baéde vá pe ma variyá eona avúavasá barano. Ída ma ará baeresí maé mai ma saretí ankani oon uruan intánin danka ma vain do khanenté uno. <sup>6</sup>Máan tonté umpsa mana avúavái saretí ankampin kama ukhen mino. Mai avúavá maen Nikorasini kéká ano ma variyain danasinta van ma afon karí iyaona mai sen má deren tifon kakhen mino.

efan ankará íkan inká auufenté ira ma anamuná einí iyaren mino. <sup>15</sup>Máan tiyan maen béin arantan mano aeni ma irafin iyó uran ma karo kharo einí iyákan inká beni vaya ano non iya ma káosiyán avaya seiní iyan mino. <sup>16</sup>\*Máan tiyan maen inká dán manápá ifo afápá kan un kádan ofu ve ayan kurompá pákkhan inká míkan akhempá an ukhein baenati ano ven oo fenté e unen mino. Máan tiyan maen ben auná pinté áau ano ma moékentá panu seiní iyaren mino.

<sup>17</sup>\*Máan tukharéí ma mo oné ben arantampin o sinkamé purin an davékun maen ayan kuron pákena yámampó ten timaniná kaúden máa semí, “Téi maé Araí in má Kípan má umpsa ída vá akhokho van ono. <sup>18</sup>Téi maé para van oriyan ban mi varéi fúkaré umpsa saréa ayun para vá oriýá banté uno. Máan tukhéi furin má beni aron ída van masipin ma ira khiyain takéna khi vá pákkhé uno.

<sup>19</sup>“Máan tukheruna van mi mai ma saréa yákó inain danasinta vá inká ínaimpá ma yákó inain danasinta vá ma oniyaona vá bompon dókifin uvarano. <sup>20</sup>Mai ma yan manápá ifo afápá kan un kádan ofu ma siyan kurompá pákké ma inká yan manápá ifo afápá kan un kádan oon kayo vá ma uruan korifó uvantein dankará ma intánuran bákán ma oneonai ana vaya mai máan mi ukhen mino. Dan manápá ifo afápá kan un kádan ofu maen mai ma yan manápá ifo afápá kan un kádan monó namun kayo ma vain pintena enisori kékái van mino. Inká dan manápá ifo afápá kan un kádan oon ma uruan dankará intánuran bain maen mai ma yan manápá ifo afápá kan un kádan monó namun kayo ma vain mino.

\* **1:16:** Ibu 4:12; Rev 2:12; 19:15    \* **1:17:** Ais 44:6; 48:12; Rev 2:8; 22:13    \* **2:1:** Rev 1:16  
\* **2:2:** 1Yn 4:1    \* **2:5:** Rev 3:3

<sup>7</sup>\*“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino.\* Intéa anó mai uman kayo esantanten nafi mai vantán tiantékun mi Tiyarafenui varu fintena aunan bain daa aran kúduren nanten mino.

### *Simená Monó Namun Ma Uvamádan Orein Baya Ino*

<sup>8</sup> “Simená baru ráke monó namumpin ma mumunan nanin banta vákan ma vetintá dafíkein enisori vaípasá ma vompon uvamádan ná orino siren máa sen mino.

Mai ma Esé Araíñ má Kípan má báken ma fúaren orun mantakhein banta ano máa mi sen mino. <sup>9</sup>\*Afová ukhékuya ona ída váka e arunanápíñ ba ompo mumunan in avúavápin tiretí ankan moékakha ono. Mai ma Yutan kéká uno siren ma kampun baya e sian more mere iyan ma saretin oyampá baya siyain kayo maen ída fura Yutan kayo ifo Ban Anoni monó namun kayon báká betí ankani kampun baya afová ukhé uno. <sup>10</sup>\*Mai ma uman erinti varanona van ída vá akhokho van iya vano. Tiretin pinte manáa akhenóka uan onano van Ban Anon mano avían karavusifin kaúdantin maen tiyan mikan damúpin tiretin aruren ara ara uman amiyáken purin arirí inten mifo mumunan ná pákoan ákona ure varé esirá aunan bain kini kamamó uantano.

<sup>11</sup>\*“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. Intéa anó mai uman kayo esantanten nafi mai vantán

evaránen ma furin mano ída fákanten mino.

### *Perkamumí Monó Namun Ma Uvamádan Orein Baya Ino*

<sup>12</sup> “Perkamumí baru ráke monó namumpin ma mumunan nanin banta vákan ma vetintá dafíkein enisori vaípasá ma vompon uvamádan ná orino siren máa sen mino.

Mai ma sefá tefá avan iyain baenati ma fákakhein banta ano máa mi sen mantino. <sup>13</sup> Ban Anon mano ma vei kin kará kain bain barufin mi van ná afová ukhé umpsen tiviká pura seja mantaan ákona ukha ono. Téintá mumunan iyáken ma sen tiví tian dákó iyá ein banta Antipasin ma Ban Anoní kéká ano sretí varu fintena ma aruan púda mae mai umantá ída mumunan me ampe ono.

<sup>14</sup>\*“Máan tiya ompo sretí ankampin manáa sirá uman para van mino. Mai ma Barami ano ma Barakin afova amin ma Isarerí nanin banta yuvun íkan ma kampun ayarafenurá íkuñ uran dunan kayo niyan ma inká pamúkuí iyá einí ukhein banta kayo ano sretin aúbaná para van mino. <sup>15</sup> Máan manan eya Nikorasini ineine ma vanasi siamiyáken ma mai ume avúavá ánañin dakhafiyain kéká deren áen nan tiretin aúban para van mino. <sup>16</sup> Máan tukhein nan mi ará baerano. Ída ma ará baeresí maé tireti vaonafá ainé erivé mai ma sefá tefá an bain baenati ano ma soo fenté e unakheimpó mai kayo vá tiruvonté uno.

<sup>17</sup>\*“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. Intéa anó mai uman kayo esantanten nafi mai

\* **2:7:** Esé 2:9; Rev 22:2, 19 \* **2:7:** Átaren ma van nain mano inino ma siyain mai vayai ana afová inovan mi siyan mino. Revaresen 2:11, 17, 29; 3:6, 13, 22; 13:9 vá dere onano. \* **2:9:** 2Ko 11:14-15; Rev 3:9 \* **2:10:** 2Ti 4:8; Yem 1:12 \* **2:11:** Rev 20:14; 21:8 \* **2:14:** Nam 22:1-25:2; 31:16; 2Pi 2:15 \* **2:17:** Eks 16:4, 14-15, 33-34; Ais 62:2; Yon 6:48-50

vantan aúpá ma vain manna manáa amiyá maé inká efanten onámanáká ma vei auyen bí uvantan nain amékun maen mai ma varan nain mano veyáká anan afová inten mino.

*Taiatirá Monó Namun Ma Uvamádan Orein Baya Ino*

<sup>18</sup>\*“Taiatirá baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma Tiyarafenu Anin au-fenté ma ira kheiní iyan ma inká aeni ma iyó uran ma karo kharo einí ma arantan táke iyain banta ano máa mi sen mino.<sup>19</sup> Ena kéká ará amin nafi mumunan ma iyaon nafi inká ará kusin pinté ma ara ara yorarí iya ma mantaan ákona uve ma uman bariyaona mai gefái afová ukhé uno. Mai ma esé bariyá eona avúavá kayo ma esantare variya onan oniyá uno.

<sup>20</sup>\*Máan tiya ompo mai ma saretí ankan aúban ma mana Yeseberin ne sin naniñ ma váken beyan nan téi sakhanampa nanin muno siren ma senti yoran nanin banta iyanen pamúku avúavápin oriyan ma inká kampun ayarafenuntá íkun uran dunan niyain nan mi saretin tirá namu uantiyá uno.<sup>21</sup> Manáa afokhan amiré bei namu avúavá ampiren ará baerano siyákun mifo mai vaya ída iniyan mino.<sup>22</sup> Máan tiyain nan mi mai nanin kákán aí daná amirékun maen barampin bakhen berai siyantí inká mai ma ven má ma namu avúavá bariyá inain kéká ano ma ída ará baerantí maé betin má deren mai uman amenté uno.

<sup>23</sup>\*Téi ano mai nanin akhafana aruan púdékun maen mairái

minó monó namun kayo ano afováén téin nan mi ineinefin má aúbá daíden oné iyan ne sinten mino. Máa siyantí maé tireti ma variyá inona avúaváká sé daídé miyan amídú onté uno.

<sup>24</sup> Máan tonté umps Taiatirá barurá ma vaona nanin bantan ma vaya siamé uno. Mai nanini vaya ánaín ma ída yakhafen ma inká Ban Anoni aúpá baya ma ída afova variyaona kéká amaniná ída uron mi ara ara uman kaonté uno.<sup>25</sup>\*Mai ma fákakheona avúavá máa vá ákona uan pákare váesirá téi ovarané ereno.

<sup>26</sup>\*“Intéa kéká anó esé araíin táké ten too yaiyen doriyáken ná mantaan ákona uven ara ara uman esanten mo akhení uranten nafi mai kayon ákona amékun ara ara varafin ma vain nanin bantará dafisinten mino.

<sup>27</sup>\*Aenifó uvantein ayonta fákaren banasirá dafisíyáken maen bara khave ma ankaman duyufeinii vanasi inten mino.”

Mai ma se Sifóen pinte ma vare-runaí ukhein ákona anan betin má baranten mino.<sup>28</sup>\*Máan turé maé kukharó ma afoká é iyain ofu vá dere mai kayo amenté uno.<sup>29</sup> Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino.

### 3

*Sadisí Monó Namun Ma Uvamádan Ma Orein Baya Ino*

<sup>1</sup>\*Sadisí baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma Tiyarafenu yan manápá ifo afápá kan un kádan

\* 2:18: Rev 1:14-15 \* 2:20: 1Ki 16:31; 2Ki 9:22 \* 2:23: Íbo 7:9; Yer 17:10; Rev 20:12-13  
\* 2:25: Rev 3:11 \* 2:26: Íbo 2:8-9 \* 2:28: Rev 22:16 \* 3:1: Rev 1:4, 16

Aunan má inká dan manápá ifo afápá kan un kádan ofu kayo vá ma fákakhein banta ano máa mi sen mino. Éi ma vare aruve iyaona yanásinta afová ukhékuya siyáke setimpin taunan báká bá uno siya ompo fura seja fúkarono. <sup>2</sup> Auu mábe onano. Mai ma sító máa mu-munán ma fara váken ma ádé anantá kípano van iyaimposá ákona uan mantano. Mai fara vara seyo, saretí avúavá ano Tiyarafenu avorá nenta suron mi van mino. <sup>3</sup>\*Máan tukhein nará mai ma esé inire ma mumunán ukhá eona vaya oo yaiye vá ará baerano. Ída ma ará baeresí maé umoyan banta ano ma ereiní ékuya mai ma erenuna yamú ída afová inono.

<sup>4</sup>\*Máan tin nompo Sadisí barufin maen manáa nanin banta ano vetíi auí danáká ída ume avúavápo paini ukhein mai kayo ano efanten buí daná uren téin má nonten mino. Mai fara vara seyo, vetíi avúavá ano funtákáré intin mino. <sup>5</sup>\*Inká intéa kéká anó mai uman esantaren ná erinten nafi mai kéká bá deren efanten buí daná uantanté uno. Máan turé maé aunan bain bompopmin ma vetin aví bain ída arumonté umpo Tifónen má beni enisorí kayo vá avorá tesiná ino sé tian amá onté uno. <sup>6</sup> Ma ma Aunan mano siádan monó namun kayo fimpá orera iyain baya kayo vá átaren ma van nain mano inino.

### Firaderfiá Monó Namun Ma Uvamádan Orein Baya Ino

<sup>7</sup>\*“Firaderfiá baru ráke monó namumpin ma mumunán nanin banta vákan ma vetintá dafikein enisorí vaípasá ma vompson uvamádan ná orino siren máa sen mino.

Mai ma Devitini ki fákakhen pura sen kantasí ukhein banta ano máa mi sen mino. Intéa yanásá béisí ano yivé iyan nafi mai ída mana ano kanaí e munkin nono. Inká be ma munkuran nain daná ída kanaí e mana ano yivin nono. <sup>8</sup>\*Ei ma variyaona yaná máa afová ukhé uno. Onano en avorá ona yiantanon tirékun bain mana ano ída kanaien munkinten mino. Éimpin manáa ákona vaká afová ukhé umpo senti vaya fara fákárákeya ída sen tiví aúmane ono. <sup>9</sup>\*Afovasá ono. Mai ma kampun banta kayo ano nóken ma ída Yutan kéká báken mifo kampun bayafó Yutan kéká pintena uno siren ma Ban Anoni kéká bain mai kayo aviré en arantampin me kaudékun aron durafúden tiyáken Yisasi ano saretí ankan nan moéken anunu ukhein kéká se sinten mino.

<sup>10</sup>\*“Mai ma sen too yaiye uman bariyáke ma senti man baya fákaan ákona ure varé eona anonafá maé Tiyarafenu ano ma ma varará nanin banta akhenóka uan onan nain damú tiretin aya onté uno.

<sup>11</sup>“Ainé ovaráné erenté umpo mai ma fákaren nan bain avúavasá pákaan ákona ukharé esin mana vanta ano ída eni kin kamamó do varano. <sup>12</sup>\*Aruyin ma uviní uran nain mi avian Tiyarafenui monó namuni namádaní urékun mai kéká ano ída uron mi evaránanten mino. Máan turé betin amaniná tesí Tiyarafenun aví bá beín pinté ma auyen Yerusalemí baru ma inaru fáké eran nain aví bá uvaranté uno. Inká betin amaniná tesí auyen bí bá uvaranté uno. <sup>13</sup>Ma ma Aunan mano siádan monó namun kayo fimpá orera iyain baya kayo vá

\* 3:3: Mat 24:43-44; 1Te 5:2; Rev 2:5; 16:15

10:32; Ruk 12:8 \* 3:7: Ais 22:22 \* 3:8: 1Ko 16:9

\* 3:4: Yut 23 \* 3:5: Eks 32:32-33; Mat

\* 3:9: Ais 45:14; 49:23; 60:14; Rev 2:9

\* 3:10: Ruk 21:19; 2Ti 2:12 \* 3:12: Ais 62:2; 65:15; Rev 14:1; 21:2

átaren ma van nain kayo ano inino.

### *Raodisiá Monó Namun Ma Uvamádan Orein Baya Ino*

<sup>14</sup> “Raodisiá baru ráke monó namumpin ma mumunan nanín banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma Tiyarafenu ano ma uvantein danáká ma fura siren dafiken ma véin ánaín ákondaen dakhafiyan ma funtákein avúavá ana fura sen baran banta van ma Pura Vaya ana sin banta e sen ma ariyain banta ano máa mi sen mantino.

<sup>15</sup> \*Afová ukhékuya éi ída iyon eya inká ída múmer suron ukha ompo séi ma inikheruna mai finté mana ma inonaí ono van mi iniyá uno. <sup>16</sup> Máan tukhá éi maen tanáorá iyon uron ona se múmer suron ona sikhaona van mi se soo fenté éin do vían karúdanté uno. <sup>17</sup> \*Kokhon ona va moní bá dékun báká mana yana san ída o afasí ukhé uno siya ompo éin ma auu yufukhá avápá váke ma minó dana san iyanan ma ena kéká ano arunan uantiyain nan ída afová iya ono.

<sup>18</sup> \*Éin afova amékuya mai séin pintena irará iyó uran kori ma fanu siyain miyaní ureyá mairá teya séi minó danápin kanaí ukhé uno siyáke inká efanten buí daná bá miyaní ureya avápá ma vaona iyáde ída ayave van ono. Inká uveri yere miyaní ure auufen pédesin kama intiya auu mábe onano. <sup>19</sup> \*Téi ma sinunu é iyaruna kéká maen aré asé ureí anteré iyá umpo vaya inire ará baerano.

<sup>20</sup> \*Onano, masi onará e mantakhé ankamiyá umpo mana ano séinti vaya ma iniren ma

ona yivin nain mái un kumamé dunan nékun inká bái sen má nanten mino.

<sup>21</sup> Téi ma aruvín uviní urékun ma se Sifóe ano e siviádá ma veni kin karáká o kumaneruna an déi aruvín ma uviní uran nain banta o avíadékun tenti kin karáká ten má e kuman inten mino. <sup>22</sup> Ma ma Aunán mano siyádan monó namun kayo fimpá orera iyain baya kayo vá átaren ma van nain mano inino.”

## 4

### *Inarufá Ma Monó Tiyain Baya Ino*

<sup>1</sup> \*Máan turé mun oné kun inarufá mana ona yiádan bákán pefá ma ufen an den ma vaya sikhá ein oo ano máa semí, “Mará édesí ma yaná ma entavuvintin dákó inain daná aniéku onano.”

<sup>2</sup> \*Máa siyain má Kantá Aunán mano séimpin bíkví maé inarufá mun oniyaruna vá mana kin kará bákán mairá mana ano kumantaren mino. <sup>3</sup> \*Kumantan maen mai vanta au fáké yaspa onámaná bá inká nararé onámaná kanerianí bá káké ma fanu seiní iyan mino. Máan tiyákan mana afayonan mano mai kin kará mamáden eúkukhen maen danaren onámaná ano ma fanu seiní iyaren mino. <sup>4</sup> \*Tuenti-fo (24) kará kayo ano mai kin kará maman aúban kaúden eúkukhan mai kará kaylorá tuenti-fo (24) ánon enisori kayo ano efanten buí daná bá korifó uvantein kamamó bá ánontá uren kumantaren mino.

<sup>5</sup> \*Mai ma kin kará bain pinté aafa kankaré tiyan afayuí iyákán mai kin kará aufá maen dan manápá ifo afápá kan un kádan oon uruan korifó uvantein dankará intánurán kiyaren mino. Mai maen Tiyarafenui yan manápá ifo

\* **3:15:** Rom 12:11    \* **3:17:** Ruk 12:21; 1Ko 4:8    \* **3:18:** Ais 55:1    \* **3:19:** 1Ko 11:32; Ibu 12:6; Rev 2:5    \* **3:20:** Yon 14:23    \* **4:1:** Rev 1:1, 10    \* **4:2:** Ais 6:1    \* **4:3:** Isi 1:28  
\* **4:4:** Rev 3:18    \* **4:5:** Isi 1:13; Sek 4:2; Rev 1:4; 8:5; 11:19; 16:18    \* **4:6:** Isi 1:5-10, 22;  
10:14

afápá kan un kádán Aunan kayo ino. <sup>6</sup> \*Mai kin kará aufá kamu an dakhein un non bákón maifin ída mana yaná ban maen avusese uron ukharen mino.

Mai kin karái sefá tefá akhen pákena safúnaren daná ma kaya iyan aunan bain kami kami ano vákan maen betí oyampá bukhafa vá inká aufá bukhafa vápin auu kayo ano eúkukharen mino. <sup>7</sup> Mai ma safúnaren danasinta maen máan mi ukhen mino. Esé ma an uanten ma vain mai raioni ma einí ukhan maen inká mairá ma vain mano afon burimakau ma einí in maen inká kanú manausí ma ukhein mano vanta auná ma einí ukhan maen inká tipá ma vain mano ámaren noin tumpan an dakhen mino. <sup>8</sup> \*Mai ma kaya iyain daná kayo maen dan manápá ifo afápá mana un kádán aayan barú barú ukhan maen minó bukhafafin auu kayo ano eúkukhán inká aayan aránaópá dere varen mino. Mai yaná kayo ano ena ena vayan má inuran má ída avíkan máa siyan ban mino:

“Minó Ákona Vá Bain Bafan  
Tiyarafenu maen  
kantasí ukhen ne, kantasí ukhen  
ne,

pefá baré ein taréa fara van  
ínaimpá erinten mino.”

9-10 \*Tafúnoren daná kayo ano mai ma kin karáká kumanten ma ayun para van oriyan bain manon amusin uanten ben aví daní iyaren mino. Máan tiyan maen tuenti-fo (24) ánon enisori kayo ano varará erafúben matimen mai ma ayun para van oriyan bain manon monosí uantíyan inká betí korifó uvantein kamamó do yavanúan kin kará arantampin kaiyáken máa siyan mino.

11 “Bafan noe, éi maen tetisi Ti-  
yarafenun báke mae  
eya anan dan uró banan minó  
ano éin manan amusin uan-

ten éin aví ana yá daní iyáken eni ákona aránaó ana vá banó.

Mai fara vara seyo, éi anón minó danasinta uvaryáke inká ei anunurái mai yanásinta sen nan dákó ukhen taréa mai yanásinta van mino.”

## 5

### *Sipisipi Arará Bá Bompon Dóki Vái Vaya Ino.*

<sup>1</sup> \*Máan tiyáká onékun mai ma kin karáká kumanteini ayan kuron pákena yámampin mana vompon dóki fákakhán mai vompongá maen tefá tefá akhentá bompon uvantan dan manápá ifo afápá kan un kádán pintan dampan ákona uran baren mino.

<sup>2</sup> Máan tukhá onékun mana ákona enisori ano oovararen máa semí, “Iye anó kanaíen ma vompongá ma yamparen ákona uran bain do kavótireñ kavasinten nafino.”

<sup>3</sup> Máa sen mifo inaru fáke safi vara ráke safi inká bara aú pinte safi ída mana ano mai vompon kaváden dankafin nainén mino.

<sup>4</sup> Ída mana ano mai vompon kanaíen kaváden dankafin nainí ukheimpin téi váguriyá ifí dé uno.

<sup>5</sup> \*Ifí diyarunafin mai-tuentifo (24) ánon enisori kayo finté mana ano máa semí, “Ída ifí diyáke onano. Yutan anan pinte vanta Devitin akhá ano ma raionií uven ma aruvín uvíní uren ma Devitini kin kará barein banta anón kanaíen mai ma yan manápá ifo afápá kan un kádán anamuntá ma fúkin damparan bain kasaen kavótireñ dankafinten mino.”

<sup>6</sup> \*Máa sirá téi onékun Sipisipi Arará ma aruan púkaré ein mano aúbaná mantakhan mai ma safúnaren daná kayo ma kamí kamí bain má ánon enisori kéká bá ano véin maman aúban den

\* **4:8:** Ais 6:2, 3; Isi 1:18; 10:12    \* **4:9-10:** Rev 19:4    \* **5:1:** Ais 29:11; Isi 2:9-10    \* **5:5:** Esé 49:9; Ais 11:1, 10; Rev 22:16    \* **5:6:** Sek 4:10; Yon 1:36; Rev 13:8

manten eúkukhan mino. Béjn ánompin kaoi viri an dakhein dan manápá ifo afápá kan un kádan bákan inká dan manápá ifo afápá kan un kádan auu vákan ma ukhein mai Tiyarafenu ano ma yan manápá ifo afápá kan un kádan Aunan ma siantan ma varará orera iyain mino. <sup>7</sup> Mai Sipisipi Arará ano oriven mai ma kin karáká kumantein bantai ayan kurompáke yáman pintena mai vompon o varen mino. <sup>8</sup> \*Mai vompon dóki mamaran maen mai ma kamí kamí tafúnoren daná kayo ma kaya iyain má tuentifo (24) ánon enisori kéká bí ano mai Sipisipi Arará arantampín mágimen mino. Mágimen mana mana ano kítá fákárú en inká kori fóké uvantein dókifin ma aunka fauran bain dere fákakhán mino. Mai Tiyarafenui vanasi ano ma amúkiyain dóki kayo ino.

<sup>9</sup> \*Mai kéká ano auyen í máa sen den mino.

“Éi anan kanaíeya mai vompon mádeya

mairá ma yampakhein púkin do khavótire mai vompon kavasin nono.

Mai fara vara seyo, éin aruan púdayai ei narefókéi vanasi miyaní uan Tiyarafenun ame ono.

Minó anan pinte vá ara ara vaya ma siyain má inká bánsi ma minó barafá bain kayo vá ino.

<sup>10</sup> \*Máan ture éi anon mai nanin banta maman Tiyarafenui monó doran bantaí uren nan mi Tiyarafenu vá barará nanin banta vá aúban báken beni yorari iyan inká barará nanin bantará dafisinten mino.”

*Arará Sipisipi Aví Ma Yaní Ein Baya Ino*

\* **5:8:** Íbo 141:2; Rev 8:3-4    \* **5:9:** Íbo 33:3; 40:3; 96:1; 98:1    \* **5:10:** Eks 19:6; Ais 61:6; Rev 1:6; 20:6    \* **5:11:** Dan 7:10; Ibu 12:22    \* **6:1:** Rev 4:6; 5:1    \* **6:2:** Sek 1:8; 6:1-6

<sup>11</sup> \*Máan turé evaráne mo oniyáké iné kun ída yankaforen enisori kayo ano veni kin kará mamáden íyen eúkuven í diyákán kamí kamí tafúnoren daná ma kaya iyain má ánon enisori kayo vá ban mino. <sup>12</sup> Avádóden máa sen í den mino.

“Mai ma aruan púkaré ein Sipisipi

Arará kantasí ukhen mino. Tiyarafenu ano véin nan mi kanaíen kantasí ukhein ákona vá kokhon ona vá inká afova vá ákona vá inká kákán bí bí kakhan má avu vá baranten ne sikhen mino!”

<sup>13</sup> Máa siyá iné kun inaru fáke safi vara ráke safi vara aú pinte safi inká un nompin nafi ma vain tafúna kayo ano yere máa sen í den mino.

“Avu vá kákán bí bí kakhan má ákona vá kin karáká ma kumantein nina vá inká sipisipi arará ina vá para van oriyan bano.”

<sup>14</sup> Máa sen í diyain má mai ma kamí kamí tafúnoren daná kayo ano fura ino síkán inká tuentifo (24) ánon enisori kayo ano aron durafúden Tiyarafenu vá sipisipi arará bí aví danien mino.

## 6

*Dan Manápá Ifo Afápá Mana Un Kádan Anamun Máa Ma Yamparan Baré ein Ma Sipisipi Arará Ano Kavótein Baya Ino*

<sup>1</sup> \*Kakháké onté kun Sipisipi Arará ano mai ma yan manápá ifo afápá kan un kádan pintan ma yamuan ákona uran baré ein pintena mana fúkin do karáto faan karúdiyain má iné kun aafa ma kankaré teiní iyain má tafúnoren daná kayo ma kamí kamí baré ein pinté mana ano siyáken, “Ereno,” sen mino. <sup>2</sup> \*Máa síká mun oné kun maen mana efanten osin

e mantavin mai osin amaniná ma kumantá ein banta ano uve vá isana vá pákakhán kin kamamó béin amen mino. Máan turan mai vanta ano vanasi vá mo aruvúdé betin maman barasí uré ereno van oren mino.

<sup>3</sup> Orivin maen sipisipi arará ano ena ana máden púkin do kavótiyain má inékun tafúnaren daná kayo finté ena ano siyáken “Ereno,” sen mino. <sup>4</sup> Máa siyain má ena nararé osin e unen erikan mai osin amaniná ma kumantaré ein banta mana kákqan baenati manan amiren barará nanin banta finté ma kusen ban avúavá do mágantin ma ven aruan purin maran in ákona amen mino.

<sup>5</sup> Sipisipi arará ano kanú manaú dádasí en ena ana máden púkin do kavótiyain má inékun maen tafúnaren daná kayo finté kanú manausí ma ukhein mano siyáken “Ereno,” síká mo oniyaruna vá mana sókonten osin mano sufá e mantavin mai osin amaniná ma kumantá ein mano kan kanan uman dajimin tikheri fákakhären mino. <sup>6</sup> Máan tukhan mai ma safúnaren daná kayo ma kamí kamí bain áubanáké mana oo ano siyáken, “Orive ei yorarí esin ná banasi ano arafan nan ino. Máan tiyan ná maná damú ma yóden miyan baran nain mano vá mana sátó kurafin ma uviti miyaní inafi áa kanú manaú tátó kurafin ma uviti an dakhein daná bari ma miyaní inafi vá barano. Máan tin nompo ída vá orifi yaa vá uvaini ana vá namu uantesin ná para vano.”

<sup>7</sup> Máa siran maen sipisipi arará ano kamí kamí dádasí en ena ana máden púkin do kavótiyain má inékun maen tafúnaren daná kayo finté kamí kamisi ma ukhein mano siyáken “Ereno,” sen mino.

<sup>8</sup> \*Máa sirá mo onékun mana aufáke yanaren uvin ayoran mana ukhein osin eren mino. Mai

osin amaniná ma kumantaré ein banta aví Purin ne sikhan maen inká Banta Masi se sin mano véin bákuren noren mino. Nókan maen kamí kamí pintan banasi yaíde vá baenatifo safi anampo safi namu ái kayofo safi inká afá tafúna kayofo safi vá mana masiman aruan kípano siren mai ákona míkanan amen mino.

<sup>9</sup> Máan turan maen sipisipi arará ano yan manápá dádasí en ena ana máden púkin do kavótiyain má onékun Tiyarafenui vaya ma sian dákó eintafan ma aruan püká ein kayoi aú iyampon kayo ano arata aránaópá baren mino. <sup>10</sup> Bákén mai kéká ano oovararen máa semí, “Dan báke ma fura se kantasi ukhe ona Bafan noe, intéa yamusá barará nanin banta ano ma setin tirukhá ein anonafá betin daídeya uman aminte fono.

<sup>11</sup> \*Máa siyain má mai kéká efanten buí daná kayo amiren tiamemí, “Tanáorá ave ukhe avíkiyasin ná arona yoran nanin banta ma fara vain kayo yere aruan púdantisá máan tono.”

<sup>12</sup> \*Máa sirá kakháké ontanan sipisipi arará ano yan manápá ifo afápá mana un kádan dádasí en ma ena ana máden púkin do kavótiyain má kákantá bara kaya íkan áau ano maman tókonten iyain má biyon mano maman nare an den nararesien mino. <sup>13</sup> \*Máan tiyain má ayon pinte ofu kayo ano kákán uvaen ma fiki yaa ana sori in ma aran kakhufeinien barará eraven mino. <sup>14</sup> \*Máan tiyain má ayon mano vompon dóki ana ma yádaeinien orin maen inká anuyon kayo vá un nompin ma musó kayo ma varé ein má ano afeyoren mino.

<sup>15</sup> \*Máan tíkan bara rákena kin kayo fi yafisin banta kayo fi aruvín banta kayoi ánon banta fi ona

\* **6:8:** Yer 15:1-3; Isi 5:12, 17; 14:21      \* **6:11:** Rev 7:9, 13; 19:14      \* **6:12:** Mat 24:29; Apo 2:20; Rev 8:12; 11:13; 16:18      \* **6:13:** Ais 34:4

\* **6:14:** Rev 16:20      \* **6:15:** Ais 2:10, 19, 21

kokhon dákein kéka safi áa kákán ákona vain kayo fi inká miyan ída van doran nanin banta vá para van nanin banta kayo vá ano karan don aimpin má inká on ain ma anuyompin bain kayo fimpá o aúmánen mino. <sup>16</sup>\*Máan tuven mai kayo ano oo vararen temí, "Minan anuyon noe, mesan ma on don baona oe, o ankábore setin e man darádesí mai ma sipisipi arará ano ma kin karáká kuman-tein ayafen ída oné tifékun beni aran naná ano setimpin ída erino. <sup>17</sup>\*Mai fara vara seyo, veni aran naná ma erinten ne siká ein damuí yákó ukhen mifo iye anó kanaén mantanten nafino."

## 7

*Tiyarafenu Vei Vanasirá Ma Yafibintin Ma Uman Mano Vetiñ Amaniná Ída Afoká Inain Baya Ino*

<sup>1</sup>\*Máan turá oné kun kamí kamí enisorí ano ma varai kamí kamí akhen ma vaintá mantakhen mai enisorí kayo ano varará ída uvaen orino van kamí kamí uva fákakharen mino. Pákakhan mai uva ano ída uvaen oren barará ma vain daa anara safi inká un nompin nafi mo kayaen mino. <sup>2</sup>Máan tukhá oné kun áau e uní páké mana enisorí ano Aunan ma vain Tiyarafenu ina ma fúkimpó damparen damuan ákona ukhein ana fákaoaren eren mino. Eriyáken mai ma kamí kamí enisorí ma ma vara namuin ákona amikhein kéká oo vararen máa sen tiamen mino. <sup>3</sup>"Ída vá bara fi un non nafi inká daa ana ma vain maman namu ukhesirá Tiyarafenu iorán nanin banta ayafentá beni aní daná damparé tifékú vá ono."

<sup>4</sup>\*Máa sirá iné kun Tiyarafenu iorán daná ma yampakharé ein mai Isarerí kéká pinte mana antareti ifo foti fo sauseni (144,000) nanin bantan aní ukharen mino.

5 Yutan anan pinte maen tiyan míkan mifo sirantan kan orun kádán tauseni (12,000) ino.

Rubenin anan pinte maen tiyan míkan mifo sirantan kan orun kádán tauseni (12,000) ino.

Katin anan pinte maen tiyan míkan mifo sirantan kan orun kádán tauseni (12,000) ino.

6 Asani anan pinte maen tiyan míkan mifo sirantan kan orun kádán tauseni (12,000) ino.

Naptarini anan pinte maen tiyan míkan mifo sirantan kan orun kádán tauseni (12,000) ino.

Manasenin anan pinte maen tiyan míkan mifo sirantan kan orun kádán tauseni (12,000) ino.

7 Simionini anan pinte maen tiyan míkan mifo sirantan kan orun kádán tauseni (12,000) ino.

Rivaini anan pinte maen tiyan míkan mifo sirantan kan orun kádán tauseni (12,000) ino.

Isakani anan pinte maen tiyan míkan mifo sirantan kan orun kádán tauseni (12,000) ino.

8 Yeburunini anan pinte maen tiyan míkan mifo sirantan kan orun kádán tauseni (12,000) ino.

Yosepini anan pinte maen tiyan míkan mifo sirantan kan orun kádán tauseni (12,000) ino.

Bensamenini anan pinte maen tiyan míkan mifo sirantan kan orun kádán tauseni (12,000) ino. Mai máa anan nanin bantafin mi Tiyarafenu iorán daná ayafentá kaúken mino.

\* **6:16:** Ruk 23:30   \* **6:17:** Yoe 2:11; Mar 3:2   \* **7:1:** Yer 49:36; Dan 7:2   \* **7:3:** Isi 9:4,  
6; Rev 9:4   \* **7:4:** Rev 14:1, 3

*Kokhon Nanin Banta Ano Ma Sipisipi Arará Aví Ma Yaní Iyain Baya Ino*

<sup>9</sup> Máan turá mo onékun ída yankaforen nanin banta ma minó akhempá báken ara ara vaya siyain kayo ma minó barafin bain má minó anan nanin banta vá ano Sipisipi Arará ma kin karáká kumantein aufá mantakharen mino. Mai nanin banta ano efanten buí daná ana uriyan kefo ana fákárú ukharen mino. <sup>10</sup>\*Mai nanin banta ano avádóden oovararen máa siyaremí, “Banta ma evaránen aviran mai setisi Tiyarafenu

ma kin karáká kumantein má inká Sipisipi Arará bá ina ino.”

<sup>11</sup> Minó enisori kayo ano kin kará bá tuenti-fo (24) ánon enisori kayo vá inká mai ma kamí kamí tafúnaren daná kayo vá maman aúban kaúden manten eúkukhen mai enisori kayo ano kin kará aufá ánon bara finí uren matimen Tiyarafenun aví daní iyáken <sup>12</sup>\*máa semí,

“Pura ino.

Aví daní in avúqvá bá kakhan má kama ineine vá tusu siantan má béis kákán bí amin má moékan ákona vá mai setisi Tiyarafenu inan bantin ayun para van oriyan bantén mino.

Mai fura ino.”

*Tiyarafenu Ano Ma Sipisipi Ararái Narefó Ma Uman Pinté Ódein Kayoi Auí Daná Ma Sesé Uantein Baya Ino*

<sup>13</sup> Máa siyákan mana ánon enisori ano séin inaen temí, “Ma ma efanten buí daná uren bain kayo mai inté ukhein kéka sá báken ná inte fákesá e van nafino.”

<sup>14</sup>\*Máa síká béis tiáméú, “Kákán banta oe, éi anan afová ukha ono,” sékun béis semí, “Mai ma kákán uman pinté e unen erein kékái váken Sipisipi Ararái narefó betí

uí daná tesé uran mi maman efanten ukhen mino. <sup>15</sup> Máan tukhein nan mi mai kayo anon Tiyarafenu kin kará aufá báken beni monó namumpin inuran má bayan má dorarí iyan mino. Máan tiyain mai ma kin karáká kumantein mano vei kákán davaráefó betín dáontáden dafisinten mino.

<sup>16</sup>\*Mai kayo ída uron mi enáda arafan puren inká non nan aien inten mino. Mai ma kákán áa ma akhiyan imúkan ariyan noré ein mi yáantanten mino.

<sup>17</sup>\*Mai fara vara seyo, Sipisipi Arará ma kin kará aufá mantakhein mano sipisipirá dafisin bantaí uven aunan amin non baípá aviren orintin mai non niyantin Tiyarafenu ano vetí ánu ma auu fenté eriyá ein minó do arúantanten mino.”

## 8

*Sipisipi Arará Ano Yan Manápá Ifo Afápá Kan Un Kádaní (7th) En Púkimpó Damparan Baré Ein Dóki Kavóten Mino*

<sup>1</sup> Dan manápá ifo afápá kan un kádaní en ana ma fúkimpó damparan baré ein ma Sipisipi Arará ano yo kavótayain má teti (30) minitirá inarufá baya fúkekhen oreraen mino. <sup>2</sup> Máan tiyain má onékun dan manápá ifo afápá kan un kádan enisori kayo ano Tiyarafenu aufá mantakháin mana mana en ufen amirú en mino.

<sup>3</sup>\*Máan tiyákan kama aunka iyain pauran ma íkun uan amin dóki ma korifó uvantein ena enisori ano mamaren mai ma onámaná karángará urantá e mantén mino. Mumunan nanin bantai amúkin má manafiní uren íkun uan amino van kokhon kama aunka ma iyain pauran mai

\* 7:10: Rev 5:6-7 \* 7:12: Rev 5:12 \* 7:14: Dan 12:1; Mat 24:21 \* 7:16: Ais 49:10

\* 7:17: Íbo 23:2; Ais 25:8; Rev 21:4 \* 8:3: Eks 30:1-3; Rev 5:8

enisori ano mamaren kori fóké má uvantein arata ma kin kará aufá baintá oren mino.

<sup>4</sup> Mai fauran má mumunán nanin bantai amúkin má ma manafini uren íkun uan amein mano mai enisori ayan pinté Tiyarafenu vaintá óden mino.

<sup>5</sup> \*Máan turen mai enisori ano mai ma kori fóké uvantein dókifin arata rákena ira o váan kaúden ma varará karúdan eriyain má aafa kankaré tiyáken aafayuí íkan kákánen bara khayaen mino.

### *Ufen Ma Asiyain Baya Ino*

<sup>6</sup> Máan tiyain má mai ma yan manápá ifo afápá kan un kádan enisori kéká ano ma ufen pákakhá ein aseno siren maman ama san en oreraen mino.

<sup>7</sup> \*Esé ma varé ein enisori ano ma vei ufen asiyain má nare vá ira vá inká komópa amú báano manafiní uven barará eren mino. Máan tiyain má minó daná ma kanú manaú pintan masiman uran baré eimpinté mana masiman irá ano vara vá daa vá kaaren káta vá dere khen kauren mino.

<sup>8</sup> Máan turákan kaní ma ukhá ein enisori ano vei ufen asiyain má kákán ira anamuná ano anuyon an davin maman un nompin karúdan aravuven kanú manaú masiman pintena mana masiman mano maman nareén mino. <sup>9</sup> Máan tiyain má un nompin ma kanú manaú pintan ma ara ara uraran ma varé ein mai mana masiman mano furen orera en mino. Máan tiyan maen inká sipi kayo ma kanú manaú pintan baré eimpinté mana masiman mano na-muen mino.

<sup>10</sup> Máan tiyákan kanú manausí ma ukhá ein enisori ano vei ufen asiyain má kákán ofu ano inaru fáké tosi on ma keinén kákán non kayo vá titó non kayo vá ma vain daró eraven mino. <sup>11</sup> \*Mai ofu aví

Íta ino. Ítan báken kanú manaú masiman pintena mana masiman maman íta nonién mino. Máan turan mai non ma nein nanin banta ano furen mino.

<sup>12</sup> \*Máan turákan kamí kamisí ma ukhá ein enisori ano vei ufen asiyain má kanú manaú pintan ma áau vá biyon má ofu kayo vá ma masiman uádán baré ein pintena mana masiman ankádú íkan mai akhen páke mo sítipaen dunen mino. Máan tíkan kanú manaú masiman pintena vayani mana masiman titípa íkan inká inurán má dere máan manaen mino.

<sup>13</sup> \*Máan turá mun onékun mana sumpan mano ámaren ayompin entaviyan avádódén asiyán máa semí, “Barará nanin banta oe, uman eriyán mifo yafike vá bano. Mai fara vara seyo, kanú manaú enisori ano ma fákakhéin ufen ma asintin ma yákó inain nan mi aaká iyá uno.”

## 9

### *Dan Manápasí En Asein Ufen Mano Ma Esé Araín Akhokho Ma- man Afóka Ein Baya Ino*

<sup>1</sup> \*Máan turan dan manápasíen ma erein enisori ano vei ufen asiyain má onékun mai ma inaru fáké un kararen barará eravukharé ein ofu mai ma arón ída van masí káke khi amen mino.

<sup>2</sup> \*Mai khi ma mamaren arón ída van masí ona yiviyain má mai masí pinté kákán ira ma sádán íkun ódein an daaren áá ma khiyaré eintá mun iyábin titípaen mino.

<sup>3</sup> Mai íkun pinté panon kayo ano e unaren barará eravíkan iyavan kayo ano ma untaré iyainí ukhein ákona amen mino. <sup>4</sup> \*Amiren mai fanon kayo siamemí, ‘Káta yana safi yunan ana fi inká daa ana fi ída vá arin nompo Tiyarafenui

\* **8:5:** Eks 19:16-19; Riv 16:12; Rev 11:19; 16:18      \* **8:7:** Eks 9:23-26; Isi 38:22; Yoe 2:30

\* **8:11:** Yer 9:15      \* **8:12:** Isi 32:7; Rev 6:12-13      \* **8:13:** Rev 9:12; 11:14      \* **9:1:** Rev 20:1

\* **9:2:** Esé 19:28; Eks 10:12-15; Yoe 2:2, 10      \* **9:4:** Rev 7:3

aní daná ma ída ayafentá man-  
tan naiñ nanin banta vá arono.  
<sup>5</sup> Banasi ma aruan purin ákona  
ída vetin amen mifo iyavan mano  
ma vanta untádan ai san auré  
iyainí ukhein ákona máa anan  
dan manápá biyontá amen mino.  
<sup>6</sup> \*Mai yanásinta ma afoká intin  
maen banasj ano furin nan dos-  
inten mifo ída kanaén onanten  
mino. Betí ankan purintó uno  
siren ineine inten mifo furin mano  
karan orinten mino.

<sup>7</sup> \*Osin kayo ma aruvimpin  
orino van auí uanteiní ureñ  
ánontá korifó uvantein kini  
kamamó uantádan mai fanon  
kayo vanta aunasi ukharen mino.

<sup>8</sup> \*Betí ankan ánon do ano anasi  
arinta ánon do ma eraveiní  
ukhan inka aveantun mano raióni  
aveantun an dakharen mino.

<sup>9</sup> \*Mai yaná kayo maen aenifó  
uvantein tanko aurá uran betin  
aayan mano karisi kayo ma osin  
mano yarifen aruvimpin oriyan  
ma uu areinien mino. <sup>10</sup> Betí  
ankan ame vákán iyavan mano ma  
untareiní iyan maen dan manápá  
biyontá ma vanasi untaran ákona  
amen mino; <sup>11</sup> Mai kékái kin  
maen aron ida van masí pintena  
enisorin ban mino. Ben aví ma  
Iburu vaya finté Abadoni e sin  
inká Kiriki vaya finté Aporioni  
e ma siyain mai Minó Daná ma  
Máden Asuse in Banta en tikhen  
mino.

<sup>12</sup> Esé ma erein uman inka esan-  
ten mifo ena kankan uman ma  
eriyain nará dafiseno.

*Dan Manápá Ifo Afápá Mana Un  
Kádaní En Asein Ufen Mano Ma Esé  
Araín Akhokho Maman Afoká Ein  
Bayá Ino*

<sup>13</sup> Máan turan dan manápá ifo  
afápá mana un kádaní ma ukhá  
ein enisorí ma varé ein mano  
vei ufen asiyan má Tiyarafenun  
avorá ma kori fóké uvantein arata  
akhentá ma kamí kamí biri ma

vain pinté baya siyá iné uno.  
<sup>14</sup> Mai vaya ano ufen ma fákakhá  
ein enisorí van temí, "Kamí kamí  
enisorí ma Yufretisí non akhempá  
ma yamuádan bain ná útúantano."  
<sup>15</sup> Máa sikhan mai ma kamí kamí  
enisorí van má mai oranafin  
mai viyontá mai damú mai áau  
rasá kanú manaú pintan ma yain  
mádán bain nanin banta fintena  
vá mana kéká arino yan ma sikan  
ma útaoren baré ein kéká san  
inka ifo vá oriveya máan tono sen  
tiamen mino. <sup>16</sup> Mai ma aruvín  
banta kayo ma osintá kumantare  
ein mai kan antareti mirioni  
(200,000,000) bákan tisimiyá iné  
uno.

<sup>17</sup> Téin ma suu vaédá onéku  
maen osin kayo amaniná banta  
kéká kumantaren mino. Mai  
vanta kékái aruvín buí daná káké  
nararein kun inaru an dan inká  
anafuren uaren sarafa onámaná  
an dakharen mino. Inká osin kayo  
ánon mano raioni kayo ánon an  
davin ira anamuná bá íkun má  
ira kharo iyain sarafa onámaná  
bá ano vetin oo fenté e khoven  
orera iyaren mino. <sup>18</sup> Mai osin  
kayo oo fenté ma ira anamuná bá  
íkun má inká ira kharo iyain sarafa  
onámaná bá ma e khoven orera  
iyaré ein mai aran naná anon  
kanú manaú pintan ma varará  
nanin banta yaimádan baré ein  
pintena mana kéká arin puren  
mino. <sup>19</sup> Mai osin kayoi ákona  
ma vain mai oofen má amefin má  
van mino. Mai fara vara seyo,  
vetin ame ano osafae ánon an  
dakhan mi vanasi ma arin ákona  
ano amefin deren ban mino.

<sup>20</sup> \*Mai ma kanú manaú uman  
mano ma ída aruan purein kéká  
ano vetí ume avúavá pinté ída  
ará baeren erin nainien mino.  
Mai kayo anon namu aunan má  
inká kori vá siriva vá onámaná  
bá bronsi vá daa vá ma máden  
ayan pójé uvádan báken ída onen  
ída vaya sen inká ída khayaen  
iyaren mino. Máan tiyákan mai

\* 9:6: Yop 3:21; Yer 8:3    \* 9:7: Yoe 2:4    \* 9:8: Yoe 1:6    \* 9:9: Yoe 2:5    \* 9:20: Íbo  
115:4-7; 135:15-18; Dan 5:23; Rev 16:9, 11

kampun ayarafenu kaylorái monó tiyaren mino. <sup>21</sup> Mápán tiyan báken mai ma vanta aruan puriyá ein nafi uvátakhanisá iyaren nafi inká pamúku avúavasá iyaren nafi umoyanisá iyaren nafi mai yanasisinta finté ída ará baeran nainén mino.

## 10

### *Mana Enisori Vá Titó Bompon Dóki Ana Vái Vaya Ino*

<sup>1</sup> Mápán turá mairá mun oniyaruna vá ena ákona enisori ano inaru fáké eriyákan konan mano véin eúkuvin afayonan mano árontá davénakhan mino. Béin auná ano áau ma fanu seiní iyákan ben arantan mano irá ma uruádan keiní iyaren mino. <sup>2</sup> Mai enisori ano ayan kuron pákena yarantan un non daró kaen inká ayan ópake yarantan barará kaen uren mantakhen ayampin mana sató bompon dóki kaváden pákakharen mino. <sup>3</sup> Pákakhén mai enisori ano raioni ma vádeiní iyain má dan manápá ifo afápá kan un kádan dádá aafa khankaré tiyan baya sen mino.

<sup>4</sup>\*Mai ma aafa khankaré tiyan baya sein maman bompompin uvarano van iyaruna vá inaru fáké mana oova ano máo semí, “Mai vaya áin ná inimpin mana vantiya ída vá bompompin uvarano.”

<sup>5</sup>\*Máa síkan mai ma un non daró bá barará bá arantan daren mantakharé ein enisori ano ayan kuron pákena yáman orun maman inaru fasien mino. <sup>6</sup> Mápán turen mai ma ayun para van oriyan bain Tiyarafenu ano ma inaru vá bara vá uváden maifin ma vain danasinta uváden ma inká un non uváden maifin ma vain danasinta ma uvantein manon avíká ayan befiyó uren temí, “Tiyarafenu ano ída ave iyan banten mino. <sup>7</sup>\*Mápán tinten mifo ena enisori ano ma vei

ufen asin nain damuí Tiyarafenu aúpá ineine ma vei sakhanampaí in doran banta kayo oo ráke uaren ma sikhá ein mo kanai inten mino.”

<sup>8</sup>Máa siren inaru fáké evaránen mai oova ano semí, “Ore vá un non daró bá barará bá ma mantakhein enisori ayampin ma kavákein bompon dóki ana vá o varano.”

<sup>9</sup>\*Máa síká mai enisori vaípá orivé titó bompon dóki ana simino van mo inanté kun béisemí, “Máde nano. Nesin maen oorá bonkampun anu an den ase inten mifo nankúdesin ma arápin aravinten mi morun kákantá íta inten mino.”

<sup>10</sup>Máa síká mai enisori ayan pintena sító bompon dóki ana o mádé nékun bonkampun anu an den ase en mifo nankúdékun ma sirápin araven maen morun kákantá ítaen mino. <sup>11</sup> Mápán tiyákan béisemí, “Ma yanasisinta ano minó nanin bantafin má minó bara kayofin má ara ara vaya ma siyain nanin bantafin má inká kin kayofin mái afoká inten mifo sakhanampa vaya vá evaráne mai kéká tiameno.”

## 11

### *Kankan Daná Ano Ma Sian Amá Ukhein Baya Ino*

<sup>1</sup>\*Máa siren mana avamáón onan danka maman timireñ temí, “Oriveya vá Tiyarafenu monó namun má arata vá mo avamáón oniyáke vá maifin ma monó tiyain nanin banta yere vá dankafono. <sup>2</sup>\*Mápán tin nompo akhempá ma uvaren eúkukhein dafu aúpín ída vá avamáón onano. Mai fara vara seyo, ena anan nanin banta amikhein afokhan mi vantin mai nanin banta anón mai ma Yerüsáremí baru ma kantasi ukheimpin foti-tu (42) viyontá onóbe enóbe iyáken dasan dasan inten mino. <sup>3</sup>Mápán tiyantí tenti vaya ma sian amá in bantá kan

\* **10:4:** Dan 12:4, 9    \* **10:5:** Diu 32:40; Dan 12:7    \* **10:7:** Amo 3:7    \* **10:9:** Isi 2:8-3:3

\* **11:1:** Isi 40:3; Sek 2:1-2    \* **11:2:** Ruk 21:24; Rev 13:5

ákona amékun maen baré buí daná uren mana tauseni ifo tu antaret sikisti (1,260) yamúi sakhanampa vaya sinten mino."

<sup>4</sup>\*Mai sakhanampa vantá kan maen mai ma ma varará dafikein Bafan avorá ma mantakhein orifi yaa aná kan má oon uruan intánin danka kanan má ino. <sup>5</sup>\*Mana vanta ano ma vetí ankan aruré uman ameno van ma intin maen betin oo fenté ma kuvín nain ira ano mai ma namuroí uantiyái nain kéká kaan kaurinten mino. Mai aa sáké anan betin ma uman ameno van iyá inain kéká ano furinten mino. <sup>6</sup>\*Betí ankampin ákona vantin pasen Tiyarafenui sakhanampa vaya ma siyáken kasaen inaru onará dasirádantin ída á danten mino. Máan tiyáken un non má non kayo vá maman nare noní ana iyáken inká betúi anunurá ara ara aa fáké barará nanin banta amaniná uman aminten mino.

<sup>7</sup>\*Betí ankan ma sakhanampa vaya sian kíparantin maen mai ma arón ída van masípin ma afá tafúna varéin nain mano e unen édavuven maen békanan aruan purinten mino. <sup>8</sup>\*Kákán baru Sodomu vá inká Isipi vara va san ma namu avúavá bíkakhen ne ma siyain an mi Yerusalemí baru ano yakhen betí Bafan Yisasin daa unkamádantá arein mino. Máan manan en mí mai yarui kákán aasá békanan aruan kaintin banten mino. <sup>9</sup>Máan turantin maen kanú manaú bayan má manápá áaurá bái míkanan bantin minó bara fáké nanin banta vá ara ara anan má inká ara ara vaya ma siyain kayo vá ano e óden ída vá masí ono sinten mino. <sup>10</sup>Mai sakhanampa vantá kanan manon ara ara uman barará nanin banta amaniná kaiyaré intin pasen békan ma furein nan barará nanin banta

ano amusin uren kama yanásinta ven amin maran inten mino.

<sup>11</sup>\*Máan ten oriyantin ma kanú manaú bayan má manápá áau vá ma esantantin maen aunan ma amin aunan mano Tiyarafenu finté maí kanan bantafin e ferantin maíkan banta ano evaránen orun mantantin maen mai ma oniyaré inain nanin banta ano akhokho van en orera inten mino. <sup>12</sup>\*Máan tiyan inintin maen inaru fáké avádóden oovararen máa sinten mino. "Mafá édano," sintin maen békaní namuro kayo ano kakħáken ontantin konan mano míkanan aviren inarufá ódinten mino.

<sup>13</sup>\*Mai áaurá anan kákantá bara khaya intin mai varui mana akhen pákena minó daná baráken asuse intin dan manápá ifo afápá kan un kádan tauseni (7,000) nanin bantan aruan purinten mino. Máan tintin ma ída furin para varé inain kéká ano akhokho van uaren inarufá ma vain Tiyarafenu aví daní inten mino.

<sup>14</sup>\*Kaní ma in uman mano inka esanten\* mifo kanú manausí ma in uman mano inka e un inten mino.

*Dan Manápá Ifo Afápá Kana Un Kádaní Ma Ukhein Ufen Ma Asein Manon Kanú Manausí Ma In Uman Baren Eren Mino.*

<sup>15</sup>\*Máa sirákan mai ma yan manápá ifo afápá kan un kádaní ma ukharé ein enisorí ayo ma vei ufen asiyain má inarufin avádóden ovaren temí, "Ma varará ma yafisin mai Bafan mano ma vei vanasi evaránen avirano van ma aní uran baré ein nináin inka ein béi anon mai nanin bantará dafisen oriyán banten mino."

<sup>16</sup>Máa siyákan mai ma Tiyarafenu aufá ma tuenti-fo (24)

\* **11:4:** Sek 4:3, 11-14   \* **11:5:** 2Sa 22:9; Íbo 97:3   \* **11:6:** Eks 7:17-20; 1Sa 4:8; 1Ki 17:1  
**11:7:** Dan 7:21; Rev 12:17; 13:7; 17:8   \* **11:8:** Ruk 13:34   \* **11:11:** Isi 37:5, 10   \* **11:12:**  
2Ki 2:11   \* **11:13:** Rev 6:12; 16:18   \* **11:14:** Rev 9:12   \* **11:14:** Mai kaní ma in uman maen 9:13-21 fin tikhen mino.   \* **11:15:** Eks 15:18; Íbo 10:16; Dan 2:44; 7:14

ánon enisorí kéká ma kin karáká kumantein kayo ano ánon bara finí uren mátimen bein monó tiantiyan<sup>17</sup> temí,

"Minó Ákona Vá Baona Bafan Ti-yarafenu oe,

éi gefá bare ma saréa fara vaona van mi

setí ankan éin tusu sianté uno.

Mai fara vara seyo, inka kákán ákona mamareya

ei yafisin aúpin inka kin dorarí in araí ukha ono.<sup>18</sup> \*Minó bara fáke nanin banta ano éin aranan uantiany mino

saréa inka eni aran naná eren mino.

Púkaré ein nanin bantai avúavá ma yaimiyáke ma ei yoran banta kéká miyan aminona yamú inka afoká en mino.

Ei sakhanampa vanta kéká bá inká ei kantasí ma ukhein nanin banta vá miyan amin nono.

Mai ma aví bain má inká aví ma ída vain má anon éin nan peré iyain mino.

Ma varará ma váken minó daná madden asuse iyá ein kéká éi anon aruan kípan nono."

<sup>19</sup> \*Máa siran inarufá Ti-yarafenu monó namun ona yiran bái ma ará manafiní uren kasen ban man baya ma kain bain bokhise kasaen minó ano onen mino. Onákan mai finté afayú iyáken aafa kankaré tin kákantá bara khaya iyain má kákán á dan kómopá amú eren mino.

## 12

### Mana Nanin Má Drakoni\* Vái Vaya Ino

<sup>1</sup> Mana kákantá enará ukhein daná inarurá afoká íká oniyaruna vá mana nanin mano áau fóké auí uran biyon mano ven arantan aránaópá bákán tiyan míkan mifo

\* **11:18:** Íbo 110:5; 115:13; Rom 2:5; Rev 20:11-13      \* **11:19:** Ibu 9:4; Rev 8:5; 15:5; 16:21

\* **12:** Drakoni e ma siyain mai kákán púpíku an dakhein osafáe ma ayan má bain mino. Banasi ano véin nan peré iyan mino.      \* **12:2:** Mai 4:10      \* **12:3:** Dan 7:7      \* **12:4:** Dan 8:10      \* **12:5:** Íbo 2:9; Ais 7:14; 66:7; Rev 19:15      \* **12:7:** Yut 9      \* **12:9:** Esé 3:1, 14; Ruk 10:18; 22:31; Rev 20:2      \* **12:10:** Yop 1:9-11; Sek 3:1

sirantan kan orun kádán (12) ofu kayo fóké kin kamamosí ukharen mino. <sup>2</sup>\*Mai nanin mano amúbasí ukharen iyampon kaono van inamun nan iniyáken bá den mino.

<sup>3</sup> \*Máa tiyain má inarurá ena ayúavá afokáí oné uno. Mana kákán nararé drakoni ano yan manápá ifo afápá kan un kádán ánon bákán tiyan míkan biri e unakhan minó árontá kin kamamó ukharen mino. <sup>4</sup>\*Mai drakoni ano kanú manaú pintan ma ofu kayo yaimádán baré ein pintena mana masiman ame fóké do ankaman karúdan ma varará eraven mino. Mai ma inamun nan iniyáken ein nanin mano iyampon kaintí aruré kakhaseno van aufá mantakharen mino.

<sup>5</sup> \*Mai nanin mano afon iyampon kaúdan ínaiimpá mai iyampon mano aeni fóké uvantein ayonta fákaren minó bara fintena nanin pantará dafisin rai nái bákán mai drakoni ayan pintena yo yafen Tiyarafenu kin karáká mun kaen mino. <sup>6</sup> Máa turákan mana tauseni ifo tu antareti vá sikisti (1,260) yamú o vantin dafiseno van ma Tiyarafenu ano kámá barafá útaan kaúantan baré eipá mai nanin mano karan oren mino.

<sup>7</sup> \*Máa turákan inarufá kákán aruvín afoká in Maikori ano vei enisorí kayo vá kábin inká mai drakoni ano vei enisorí kayo vá kábin uven kákán aruvirén mino. <sup>8</sup> Mai aruvín manon drakonii kéká ma inarufá baré ein pintena Maikorini kéká ano aren taven mino. <sup>9</sup> \*Mai drakoni van ma Ban Anon ne siyákan peyanté osafáe ma váken barará nanin banta máksiyán baré ein má bei enisorí kayo vái kharúdan ma varará eren mino.

<sup>10</sup> \*Máa turá iné kun mana oova \* **11:19:** Ibu 9:4; Rev 8:5; 15:5; 16:21 \* **12:2:** Mai 4:10 \* **12:3:** Dan 7:7 \* **12:4:** Dan 8:10 \* **12:5:** Íbo 2:9; Ais 7:14; 66:7; Rev 19:15 \* **12:7:** Yut 9 \* **12:9:** Esé 3:1, 14; Ruk 10:18; 22:31; Rev 20:2 \* **12:10:** Yop 1:9-11; Sek 3:1

ano inaru fáké máa semí,

"Banasí ma evaránen avirano van ma aní ukharé ein bánta ano inka vanasi evaránen avíden béimpin ákona vákan Tiyarafenui yafisimpin dafisen mino. Mai fara vara seyo, Tiyarafenu avorá ma inuran má bayan má ma seti siyofi sifá tiváeyan aufin kuráden baya siyáken betíi avúavá ma yáimiyáre ein banta inka yau-man karúdan ma varará eren mino. <sup>11</sup> Sipisipi Ararái nare vá pura vaya vá pói Maikorini kéká ano mai ma aufin kuráden baya siyaré ein banta maman bararasí ureñ betíi furin nan ída feren mino. <sup>12</sup> \*Máan tukhein nará inaru vá maifin ma vaona kayo vá ano amusin ná ono. Máan tukhen mifo vara vá un non ma soe, akhokho vará ono. Mai fara vara seyo, Ban Anon mano afová iyáken titó máarái yoranté uno siren kákán aran naná bái erakhen mino."

<sup>13</sup> Mai drakoni ano onákan bén barará do siantiyaimpin mai ma afon iyampon kaein nanin dakhafen mino. <sup>14</sup> \*Dakhádan oriyan maen kákán tumpan aayan amiren tiantan mai ma kanú manaú orana ifo yan manápá ifo afápá mana un kádan biyontá (3-½ orana) ma kámá barafá o vantín ma ventá dafisino siren ma útaan kaúantan baré eipá ámaren oren mino.

<sup>15</sup> Máan tiyain má drakoni ano nompó mai nanin ufurono van oo safédan mai finté kákán non taven mino. <sup>16</sup> Máan tíkan maen bara ano mai nanin ayaen oo safédan drakoni oo fenté ma khuevin non mano varafin orun peren mino. <sup>17</sup> \*Máan tíkan drakoni

ano mai nanin nan kákán arananá baren mino. Arananá máden mai nanin akhafana ma Tiyarafenui man baya ánain bákuriyan ben oo yaiiyáken inká Yisasini kama vaya ma sian dákó iyain kéká bá aruvín araíen mino.

*Afá Tafúna Ma Un Non Pinté E  
Unen Édein Baya Ino*

<sup>18</sup> Máan turen un non akhempá o mantakhen ave en mino.

## 13

<sup>1</sup> \*Máan tukhá ma oniyaruna vá mana afá tafúna ano un non pinté e unen éden mino. Mai safúna maen dan manápá ifo afápá kan un kádan ánon bákán inká tiyan míkan biri e unakheintá tiyan míkan kin kamamó uran bákán ánon kaylorá Tiyarafenu ma ankayan tikhein bí kayo uvantaren mino. <sup>2</sup> \*Mai safúna ano repeti\* an dakharen mifo ven arantan mano bea\* arantan an dakhán inka oo ano raioni\* oo ma einí ukharen mino. Máan tukhan mai drakoni ano vei ákona vá kin kará bá dafisin ákona vá amen mino.

<sup>3</sup> \*Mai safúna ma oné kun maen bén ánon kayo fintena mana ánon aruran bákán ída kanaíen unirí ukharen mino. Máan tukharen mifo mai namon ma evaránen uniyain má barará nanin banta ano sakha iyáken mai afá tafúna oo yaiyen bén ánain bákuren mino. <sup>4</sup> Drakoni ano ma afá tafúna mai ákona amikhein nan banasi ano amusin iyáken béintá monó tiyan inká mai safúna vá dere monó tiantiyan amusin en temí, "Iye anó bén an dakhe fono. Iye

\* **12:12:** Ais 44:23; 49:13    \* **12:14:** Dan 7:25; 12:7    \* **12:17:** Rev 11:7    \* **13:1:** Rev 12:3; 17:3, 7-12    \* **13:2:** Dan 7:4-6    \* **13:2:** Repeti e ma siyain mai kákán pusi an dakhein tafúna ino. Mai ano kasaen banta aruren kakha sinten mino.    \* **13:2:** Bea e ma siyain mai iyan an dakhein kákán tafúna ino. Bén ayan arantan kákán bákán ayafo báta uron ukhein mino. Mai ano kasaen banta aruren kakha sinten mino.    \* **13:2:** Raioni e ma siyain mai kákán ayo ana fusi an dakhein tafúna ino. Bén aveantun an báta ukhan kasaen minó daná kakhásé iyan mino. Banasi ano mai van kákántá peré iyan mino.    \* **13:3:** Rev 17:8

anó kanaíeya véin má aruvinte fono.”

<sup>5</sup> \*Máa siren mai safúna áíkan Tiyarafenu oyampá bayá siyáken ma foti-tu (42) viyontá ma vei anunurá minó avúavá baran nain ákona amen mino. <sup>6</sup> Máan turákón béis Tiyarafenu oyampá bayá siyáken ben aví bá inká ben má ma inarufá bain nanin banta vá ankayan ten mino.

<sup>7</sup> \*Máan tiyákón Tiyarafenu kantasí ukhein nanin banta ma aren tavin ákona mai safúna amen mino. Amiren minó anan nanin banta vá banasi vá ara ara vaya siyáken ma minó barafá bain nanin bantará ma yafisin ákona vá dere amen mino. <sup>8</sup> \*Amirantin maen mai ma vara ída uvanten ma aun baran bomponipin ma aví ída uvantaréin nain nanin banta ma vain nain mano mai safúnará monó tinten mino. Mai vompon maen mai ma vanasi ano aruan purein Sipisipi Arará ina ino.

<sup>9</sup> Átaren ma van nain mano vá mino. <sup>10</sup> \*Karavusifin orino ma sikhá in nain kéká ano karavusií intin inká baenati fóké aruan purino ma sikhá inain kéká baenati fóké aruan purinten mino. Máan ma intiya kantasí ma ukhan nona nanin banta ano ída vá akhokho van iyákeya mumunan ná pákaan ákona ono.

### Afá Tafuna Ano Ma Vara Finté E Unein Baya Ino

<sup>11</sup> Máa sirá ma oné kun bara finté ena afá tafúna e unen édákon ánon pinté Sipisipi Arará virí kan ma e uneiní ukhan mifo veni vaya ano drakoni ma vaya seinien mino. <sup>12</sup> Mai safúna ano esé ma non pinté erikhá ein tafúnai ákona mamaren maen minó nanin banta yuvun íkon mai ma arukháiñ ma namon unein tafúnará monó ten mino. <sup>13</sup>\*Máan tiyákén moéken enará ukhein aní

danasinta uvaren dararen iyan ira van dere síkan inaru fáke minó nanin banta avorá barará eriyan onen mino. <sup>14</sup> Enará ukhein aní danasinta ma uvaren dararen in ákona Tiyarafenu ano amiran maen mai ma esé e unein tafúna avíká barará nanin banta mákáden tikán mai ma vaenatífó aruran ma fükären evaránen e mantein tafúnai aman manon uvaren mino. <sup>15</sup> Máan turan mai ma uvamá dein tafúna aman manon ma aunan amintin bayá sinti ma véintá ída monó tin nain nanin banta ma aruan purin nain ákona Tiyarafenu ano amen mino.

<sup>16</sup> \*Amiran minó aví bain má ída aví bain má inká ona vain má ída ona vain má inká miyan ída van doran banta vá para ma van banta vá ano mana aní daná ayan kurompáke yámanta safi ayafenta safi kaino van duvun en mino. <sup>17</sup> Mai aní dana ma ída van nain kéká ano ída kanaíen ena finté miyaníen nafi inká sarii safi en inten mino. Mai aní daná maen esé ma e unein tafúna aví vákan mai nampá ano ven aví aní ukhen mino.

<sup>18</sup> Máan tukhein nan mi kama ineine vá afova vá ma van nain kéká ano vá mai afá tafúnai nampá daíden beni ana vaya afová ino. Mai fara vara seyo, mai nampá maen mana vanta inan bákan mai nampa maen kanú manaú sikhisi (666) ino.

## 14

### Sipisipi Arará Bá Mana Antareti Ifo Foti Fo Tauseni (144,000) Nanin Banta Vái Vaya Ino

<sup>1</sup> Máa sirá oné kun Sipisipi Arará ano Saioní anuyontá mantakhan mana antareti ifo foti fo sauseni (144,000) nanin banta ma ven aví bá be Afóen aví bá ma ayafentá uvantein kéká ano véin má baren mino. <sup>2</sup>\*Máan tukhá iné kun inaru

\* 13:5: Dan 7:8, 25; 11:36; Rev 11:2      \* 13:7: Rev 11:7      \* 13:8: Íbo 69:28; Rev 17:8; 20:12,  
15; 21:27      \* 13:10: Yer 15:2; 43:11; Rev 14:12      \* 13:13: 1Ki 18:24-39; Mat 24:24; Rev 19:20  
\* 13:16: Rev 14:9-11; 16:2; 20:4      \* 14:2: Rev 1:15; 19:6

fáké non iya ma káusiyán avaya seiní iyan inká aafa ma kákantá kankaré teinjén mino. Mai ma kita asín banta kayo ano ma manafín asiyan avaya ereiní iyá iné uno.

<sup>3</sup> \*Mai kayo ano kin kará aufá mantakhen kamí kamí tafúnaren daná ma aunañ bain má tuenti-fo (24) ánon enisorí kayo vá avorá mana auyen í diyaren mino. Mai íi ana ída ena kéká ano afová en mifo mai ma mana antareti ifo foti fo suseni (144,000) nanin banta ma ma vara ráke miyaní uren avíkaré ein kayo ano anan afová en mino.

<sup>4</sup> Mai kéká ano ída anasi arinta vá bariyáken maen pura sen avusese ukhen mi Sipisipi Arará ma oreípá bákuren noren mino. Barará nanin banta fintena esé ma kharaein dunan ma Tiyarafenu vá Sipisipi Arará bá ma íkun uan amein an dakhein kéká ino.

<sup>5</sup> Mai kayo oo fenté ida mana kampun baya sikhein bákán pura sen betíí aau ída van kéká ino.

### Kanú Manaú Enisorii Vaya Ino

<sup>6</sup> Mái sirá ónekun mana enisorí ano ayompin ámaren entaviyáken ma varará ma minó akhempá mana mana anan nanin banta ma váken ara ara vaya siyaimpin kama vaya ma fara van oriyan bain tian dáköen mino.

<sup>7</sup> Mai enisorí ano oovararen temí, “Tiyarafenu van periyáke véin mana vá kákán bí ameno. Mai fara vara seyo, véi ma vanasi yaimin nain damú inka yákó en mifo mai ma inaru vá bara vá un non má titó non kayo vá ma uvarein Tiyarafenurá ana vá monó teno.”

<sup>8</sup> \*Mái siran inká kaní má ukhá ein enisorí ano ayompin mai ánaín eriyáken oovararen temí, “Aví ma yaré ein baru Babironi inka varáken asuse en mino. Mai fara va ino; Mai kákán barui famúku avúavá anon banasi e yarifádan beni avúavá bariyáken óen non ma

neiní iyaré in mi Tiyarafenu aran naná anon máon ten mino.”

<sup>9</sup> \*Mái sirákan kanú manausí ma ukhá ein enisorí ano mai ma esé erein enisorí kanan ánaín eriyáken avádóden oovararen temí, “Inte nanin banta anó afá tafúna vá beni aman manontá bá monó tiyáken ná beni aní daná ayafenta safi ayanta safi mantaré inten nafi

<sup>10</sup> \*mai kéká anon Tiyarafenu aran naná ma vain kápifin ma ída ena non má ópé ukhan íta iyain mi nanten mino. Narantin maen Sipisipi Arará bá inká kantasí ma ukhein enisorí kayo avorá bái mai kéká sarafa onámaná ma ira khiyain pójé akhiyantin berai siyan banten mino.

<sup>11</sup> \*Máián tiyantin mai ma akhiyan nain íkun mano édaviyán para van oriyan banten mino. Mai fara vara seyo, safúna vá beni aman manontá bá ma monó tiantiyáken ma ven aví ma mantaréin nain kéká anon ena ena vayan má inuran má ída kusen avíken banten mino.”

<sup>12</sup> \*Mai ma kantasí ukhein Tiyarafenu man baya vákuriyáken Yisasintá mumunán iyan ma ara ara uman bariyain nanin banta vá ará kusin masá mantaan ákona ino.

<sup>13</sup> \*Mái sirá inékun mana oova ano inaru fáké temí, “Ma vaya vompompin uvarano. ‘Tare ráke ma Bafan avíká purin nain mano vá amusin ino.’”

Mai van Aunan mano furan tino siren máa semí, “Mai kéká ano ma uman pinté doriyá ein nan avíkan baranten mino. Mai fara vara seyo, vetí ankan ma kama avúavá bariyáré ein manon betin ánaín bákurinten mino.”

### Ma Vara Ráke Nanin Banta Ma E Avían Átaru Inain Baya Ino

<sup>14</sup> \*Mái sirá mo oniyaruna vá mana efanten konan bákán mai

\* **14:3:** Ais 42:10; Rev 5:9; 7:4    \* **14:8:** Ais 21:9; Yer 51:7-8; Rev 17:2; 18:2, 3    \* **14:9:** Rev 13:12-17    \* **14:10:** Esé 19:24; Íbo 75:8; Ais 51:17, 22; Yer 25:15-16; Isi 38:22; Rev 16:19; 20:10  
\* **14:11:** Ais 34:10    \* **14:12:** Rev 13:10    \* **14:14:** Dan 7:13

yaró mana vanta aninten mano kumantaren mino. Ben áontá kofíó uvantein kin kamamó bákán inká davénakhan an iyain tópe ven ayampin baren mino.

<sup>15</sup> Máan tiyain má ena enisori ano kákán monó namun pinté e khuven eriyáken mai ma konan daró kumantaré ein banta oovararen tiamemí, “Davénakhein tópe eina mamare yunan duyaseno. Mai fara vara seyo, varará inka yunan karakhan mai yunan ma yuyasin damú inka afoká en mino.” <sup>16</sup> Mápá síkan mai ma konan daró kumantaré ein banta ano vei yavénakhein tópe mamaren ma vara amaniná karúdan mai ma karakhá ein dunan duyasen mino.

<sup>17</sup> Máan turan inká ena enisori ano inarufá ma vain kákán monó namun pinté e khuven eriyáken ben ayampin má dere yavénakhen an iyain tópe varen mino. <sup>18</sup>\*Inká mai oyampáké ma vara ma ira saman kaurin ákoná ma amikhein enisori ano arata ma vaípáké e unen eriyáken mai ma an ukhan davénakhein tópe ma fákakhá ein enisori oovararen tiamemí, “Ei sópe mamareya vá barará ma uvaini anan táké aran intaré ein mai inka afu khakhen mifo vá tíkano.” <sup>19</sup> Mápá síkan mai enisori ano vei yavénakhein tópe maman barará karúdaren afu ma khakharé ein uvaini aran máa tíkao Tiyarafenui aran naná ano ma uvaini aran dasamiyaiimpin karúdan oren mino. <sup>20</sup>\*Máan turen kákán baru akhempá mai uvaini yasamiyan mai finté nare non mano kanú manaú antareti (300) kiromitará oriyákan mai nare ano orun manen dan manápá fitirá óden mino.\* Mai ma orun manen édein mai osin oorá ma aeni kuvé iyainí ukheintái mun kanaíen mino.

\* **14:18:** Yoe 3:13 \* **14:20:** Ais 63:3; Rev 19:15 \* **14:20:** Kiriki vaya finté osin oorá ma aeni kuvé iyaintái mun kanaí ukhen ne ma sikhein mai yan manápá fiti vá manaí ukhen mino.  
\* **15:3:** Eks 15:1; Íbo 139:14; 145:17 \* **15:4:** Íbo 86:9; Yer 10:6-7 \* **15:5:** Eks 38:21

## 15

### Mosesin Má Sipisipi Arará Báí I Ino

<sup>1</sup> Máan turá inarufá onékun maen kákantá enará ukhein daná afoká en mino. Mai yaná maen dan manápá ifo afápá kan un kádan enisori kayo ano yan manápá ifo afápá kan un kádan aí daná bá uman má pákakharen mino. Mai maen Tiyarafenui sipá kípan aran naná ma amin nain mino. <sup>2</sup> Máan tukhá onékun mana kamu an dakhein un non má ira vá ano manafini ukhan mino. Máan tukhan mai ma afá tafúna vá ben aman manon má ma aruvüden esantakhá ein kéká ano mai akhempá mantakhen Tiyarafenu ano ma amein kita kayo asiyaren mino. <sup>3</sup>\*Asiyáken Tiyarafenu yoran banta Mosesin má Sipisipi Arará bái í máa sen den mino.

“Minó Ákona Vá Baona Bafan Ti-yarafenu oe,  
kákantá enará ukhein danasinta éi maman dáko é iya ono.

Ara ara nanin bantai kin mi van nan  
éin avúavá anon pura sen puntáken mino.

<sup>4</sup>\*Bafan noe, iye anó éin nan ída feranton kákán bí aminten nafino.

Para vara seyo, eyaká anan kantasí ukha ono.  
Ara ara vara fáke nanin banta ano e átaru uven  
éintá anan monó tiantanten mino.

Mai fara vara seyo, eni funtákein avúavá inka maman dáko en mino.”

*Dan Manápá Ifo Afápá Kan Un Kádan Dókifin Ma Áí Daná Bá Uman Má Ma Vái Pákena Vaya Ino*

<sup>5</sup>\*Máan turá oniyaruna vá inarufá ma Tiyarafenui kákán

monó namun bákán ma yavaráefó e auádan ma kantasi ukharé ein karafarani ona yiven mino. <sup>6</sup> Mai ma yan manápá ifo afápá kan un kádan enisori kayo ma Tiyarafenui aran naná bain dóki kayo ma fákakhá ein kéká ano mai kákán monó namunté e khuyen eren mino. Betí ankan ayá efanten buí dana en inká kori fóké ma uvantein daná ákorá kuven ukharen mino. <sup>7</sup> Máan turen ma e khuyen eriyain má mai ma kamí kamí tafúnqren daná ma aunan bain kayo finté mana ano mai ma yan manápá ifo afápá kan un kádan dóki ma korifó uvanteimpin ma ayun para van oriyan ban Tiyarafenui aran naná ma varé ein mamariyan mai enisori kéká mana amirú en mino. <sup>8</sup> \*Máan turákan Tiyarafenui kakhan má ákona vái íkun mano mai kákán monó namumpin biken mino. Mana ano ída kanaien mai namumpin ódikhantin ma yan manápá ifo afápá kan un kádan enisori ano ma uman má aí daná bá bain dóki kayo ma vanasi amaniná banaan kíparantin mi ínaimpáké un peranten mino.

## 16

### *Tiyarafenui Yan Manápá Ifo Afápá Kan Un Kádan Aran Daná Banain Nain Baya Ino*

<sup>1</sup> Máa sirá inékun mai monó namunté mana oova ano mai máa enisori siamemí, “Aravuveya mai ma yan manápá ifo afápá kan un kádan dóki ma fákakheongfin ma Tiyarafenui aran naná bain bara amaniná bana ono.”

<sup>2</sup> \*Máa síkan eséke enisori ano vei yóki varen mo vara amaniná bana íkan mai ma afá tafúnai aní daná mamaren ma ven aman manontá monó tiyá ein kayo aurá moéken namu ukhein namon kayo inisen ken mino.

\* **15:8:** 1Ki 8:10-11; 2Kr 5:13-14; Ais 6:4  
7:17-21    \* **16:7:** Íbo 19:9; Rev 15:3

<sup>3</sup> \*Máan tiyain ma kaní ma ukhá ein enisori ano vei yóki varen mo un non ané bana iyain má un non mano furin bantai nare ma einí íkan minó danasinta ma maifin baré ein mano fúan kípen mino.

<sup>4</sup> Máan tuyin maen kanú manusí ma ukhá ein enisori ano vei yóki varen mo kákán non kayo vá inká titó non kayo vápin banaran maen maman nareien mino. <sup>5</sup> Máan turá inékun mai ma minó non kaylorá dafiká ein enisori ano máa semí, “Mai ma fefá bare ma saréa fara vaona oe, éi Kantasi Ukhona ono. Mai fara vara seyo funtákein avúavákai vanasi yaídeya ma uman amiya ono. <sup>6</sup> Mai fara vara seyo, mai nanin banta anon eni kantasi ukhein kéká bá sakhanampa vanta kayo vá aruan púdan betíi nare ano varafin eravukharé iyan mai anonafái vetíi nare amen nan niyan mino.” <sup>7</sup> \*Máa sirá inékun arata vain táké mana vaya ano máa semí, “Minó Ákona Vá Baona Bafan Tiyarafenu oe, eni vanasi yaimin avúavá maen pura sen puntáken mino.”

<sup>8</sup> Máa sirákan áau ano kákánien basasi áá akhano van kamí kamisi ma ukharé ein enisori ano vei yóki varen mo áaufin banaren ákona amen mino. <sup>9</sup> \*Máan turákan kákán áá ken basasi akhiyaimpin Tiyarafenu ano ma mai uman kayo amein nan ben oyampá baya siren ída ará baeren béis avi danien mino.

<sup>10</sup> \*Máan tiyákan dan manápasí ma ukharé ein enisori ano vei yóki varen mo afá tafúnai kin karáká banarákan beni yafisin aúpin manadá kákán titípaen kumayusí iyain má beni kéká ano aveantuntá inkékípiyáken kákantá berai sen mino. <sup>11</sup> Máan tiyáken betíi namon mano ma aí iyain nan manan inarufá ma

\* **16:2:** Eks 9:10; Rev 13:12-17    \* **16:3:** Eks 9:20-21    \* **16:10:** Eks 10:22; Ais 8:21-22

vain Ayarafenun oyampá baya sen mifo mai ma namu avúavá bariyaré ein nan ída sirun noe siren ará baeren mino.

<sup>12</sup> \*Máan tiyákan dan manápá ifo afápá mana unkádaní ma ukhá ein enisori ano vei yóki varen mo Yufretisi e ma siyain nompin bannan mai non kánen mino. Áau e uní pákena kin kékáí aaí uantantin kasaen betíi aruvín banta kayo iyanen áau orun perápá orino van mi máan ten mino. <sup>13</sup> Máan turá onékun tokhá an dakhein namu aunan kanú manau ano drakoni vá afá tafúna vá inká kampun sakhanampa vanta vá oo fenté e khuyen eren mino. <sup>14</sup> \*Mai au-nan kayo maen Ban Anoni enará ukhein daná kayo ma maman dákó in kékáí yaren mino. Mai kékáí ano minó barafá ma vain kin kayo siamintin mai ma Minó Ákona Vá Bain Tiyarafenui yamú ma yáko intin ma ven má aruvín nain danasinta útaan manafin átaru ino van mi oreraen mino.

<sup>15</sup> \*“Afovasá ono. Téi maé umoyan banta an davé uimpin mi erenté umpo intéa kéká anó betíi ona uren ban ná auu sapé tikhá inten nafi mai kéká ano vanasi avorá ída avápa oren maen inká ayave van en inten mino.”

<sup>16</sup> \*Máan turen minó kin kayo o avire e avire uren Iburu vaya finté Amákedoni e ma siyain barurá átaru en mino.

<sup>17</sup> Máan tiyákan dan manápá ifo afápá kan unkádaní ma ukhá ein enisori ano vei yóki varen mo uvafin bana iyain má kákán monó namumpin ma kin kará bain pinté mana kákán oova ano máa semí, “Inka kípen mino.”

<sup>18</sup> \*Máa siyain má pefá ída iyá einien afayuién aafa kankaretiyain má ma vara moéktá

kayaen mino. <sup>19</sup> \*Máan tiyain má mai ma kákán baru Babironi e sin ma varé ein mano kanú manaú pintan kauren orera íkan minó akhempá ma kákán baru kayo varé ein dere vá kauren oreraen mino. Máan tiyákan Tiyarafenu ano Babironí baru ma váken umeí iyá ein nan o varen me iniren mai ma vei aran naná uvaini ma kápifin bíkakhá ein amen mino. <sup>20</sup> \*Máan tíkan un nompin ma musó kayo varé ein o afeyoran inká anu yon kayo ma varé ein maman avaíen mino. <sup>21</sup> \*Máan tiyan maen inaru fáké kómópa amú kayo eren mino. Beni uman maen fifty (50) kirokaremi vákan mai ano vanasi yasamiyan kákán uman amiyaimpin Tiyarafenu oyampá baya sen oreraen mino.

## 17

### Kákán Pamúku Nanini Vaya Ino

<sup>1</sup> \*Mai ma yan manápá ifo afápá kan un kádan enisori kayo ano ma yan manápá ifo afápá kan un kádan dóki kayo ma fákakhein pinté mana enisori ano séi varunará eriven temí, “Téin má ere sirá non kayo yaró ma kákán pamúku nanin mano ma kumantein ma uman amin nain aní ékuya onano. <sup>2</sup> \*Ma vara ráke kin kayo ano mai nanin má pamúku avúavá bariyákan inká mai nanini namu avúavá ano varará nanin banta maman óen uádan mi óen non ma naren óen einí iyan mino.

<sup>3</sup> \*Máa siren mai enisori ano sen taunan do maman kámá barafá kaí onékun dan manápá ifo afápá kan un kádan ánon bákán tiyan míkan biri e unakhein nararé tafúna ané mana nanin mano kumantaren mino. Tiyarafenun ma oyampá baya sikhein baya

\* 16:12: Ais 11:15    \* 16:14: Rev 19:19    \*

12:11    \* 16:18: Rev 4:5; 8:5    \* 16:19: Rev 14:10    \*

9:23-24; Rev 11:19    \* 17:1: Yer 51:12-13    \*

Rev 13:1    \* 17:4: Yer 51:7; Rev 18:16

\* 16:15: Mat 24:43-44; Rev 3:3    \* 16:16: Sek

\* 16:20: Rev 6:14    \* 16:21: Eks

\* 17:2: Ais 23:17; Yer 51:7; Rev 14:8    \* 17:3:

kayo mai ma kumantein tafúna au fimpá uvantaren mino. <sup>4</sup>\*Mai nanin mano ara ara nararé pó uvantein buí daná uren bákən ben au fáké kori vá ara ara onámaná kaké ma kanen kanen einí iyaren mino. Kori fóké uvantein kápi véi fákakħan maifin beni namu avúavá bá pamúku avúavái fúta yanasinta vá ano víkakhären mino. <sup>5</sup>Máon tukhan mai nanin ayafentá ovaeran bayafó ben aví máo sen uvantaren mino. “Kákən baru Babironi maen ma varará ma famúku nanin kayo ma váken púta avúavá bariyain kéká anóe ino.” <sup>6</sup>\*Mai nanin mano Yisasini vaya ma sian dákó iyare ein mumuman nanin bantai nare narákan mai nare ano véin óén uádan báká ódé takha é uno. <sup>7</sup>\*Máon tékun mai enisori ano sisimemí, “Éi fará takha iya fono. Mai nanini aúpá daná bá dan manápá ifo afápá kan un kádan ánon bákən ma siyan míkan biri e unakhein tafúnai vaya vái ana éin tiamenté uno. <sup>8</sup>\*Mai ma one ona safúna anofefá baren mi saréa ída vain ínaimpáké ma aron ída van masí pinté ma e unaaren ída kípən uman baranten mino. Ma vara ma araien uvarein táké ma aunan baran dókifin ma aví ída uvantaré inain kayo anon mai ma fúkaré ein tafúna ma aron ída van masí pinté orun baránen ma édən nain nan anú duren takhaen orera inten mino.

<sup>9</sup> “Kama ineine ma van nain manon ma vayai ana vaya afová inten mino. Mai ma yan manápá ifo afápá kan un kádan ánon ma vain mai yan manápá ifo afápá kan un kádan anu yon mi vákan mai varufin mai nanin mano yafíken mino. <sup>10</sup>Dafiken maen dan manápá ifo afápá kan un kádan kin kayoi varu vá deren mantan mino. Mai kin kayo finté dan manápá kin kéká ano eraven

ankamin mana kin mano saréa fara van mino. Inká ínaimpáké ena kin ma afoká in nain mano ída ayáká dafisinten mino. <sup>11</sup>Mai ma fefá afá tafúna varen ma saréa ída vain mai yan manápá ifo afápá kanú manaú un kádaní ma ukhá ein kin mino. Beni avúavá ano yan manápá ifo afápá kan un kádan kin kayoi avúavá bái manai ukhein ben má deren uman baren purinten mino. <sup>12</sup>\*Mai ma siyan míkan biri ma e unakha oneona mai siyan míkan kin mano ma ída yafisin ákona mantein mi one ono. Ínaimpáké ma kin karáká kumanin ákona ma mai kin kayo amirantin maen afá tafúna vá manafín uven asíka afará doranten mino. <sup>13</sup>Mai kin kayo ano mana inintái yoriyan pasen betíi ákona vá dafisin ákona vái mai afá tafúna aminten mino. <sup>14</sup>Mai kéká ano Sipisipi Arará bá aruvinten mifo véi maen bafan kayoi Bafan báken kin kayoi Kin mi vain pasen betin aruren manan bararasí inten mino. Mai ma veyantá araren aní uran báken ma ven oo yayiyaré ein kéká anon bén má banten mino.”

<sup>15</sup> Máq siren mai enisori ano sisimemí, “Mai ma famúku nanin mano kumanta oneona non maen minó akhempá ma váken ara ara vaya siyain nanin banta kayoi aní ukhen mino. <sup>16</sup>\*Mai ma siyan míkan biri ma oneona vá afá tafúna vá ano mai famúku nanin oman kaumpán uren maen beni aúi daná dákañ karúdarantin avápa vantin ben au vukhafa kankafen naren ira saman kaurinten mino. <sup>17</sup>Mai fara vara seyo, mai avúaváká ten dorano van mi Tiyarafenu ano mai ineine vetin aúká pe khain ban mino. Máon tukhantin pasen mai kin kayo ano sen inen uren betíi yafisin ákona mai safúna amintin maen mai yorarí inten mino. Máa ma inain manon Tiyarafenu ma sikhá ein baya mo kanaí inten mino. <sup>18</sup>Mai

\* 17:6: Rev 18:24; 19:2 \* 17:7: Rev 13:1  
Dan 7:7, 24 \* 17:16: Rev 18:8

\* 17:8: Dan 12:1; Rev 11:7; 13:7 \* 17:12:

ma oneona nanin maen mai ma kákán baru váken ma vara rákenu kin kaylorá ma yafíkein mino."

## 18

*Babironí Baru Ma Eraven  
Ankamein Baya Ino*

<sup>1</sup> Máan turáká oniyaruna vá ena enisori ano inaru fáké kákán ákona vá eriyákán bén au fáke khakhan mano ma vara fanu siáden mino. <sup>2</sup>\*Mai enisori ano avádóden oovararen temí, "Kákán baru ma Babironi varé ein inka eraven ankamen mino. Maifin namu aunán kayo vá pútæn aunka ukhein danasinta ma niyain tumpan kayo vái varuí uvíkán akhokho farí ukhein tafúno kayoi masisíi en mino. <sup>3</sup>Mai fara vara seyo, varará nanin banta ano véin má ma famúkuí iyain avúavá anon óen non ma naren óen einí iyan mino. Inká bara ráke kin kayo vá dere anon mai nanin má pamúkuí iyákán ara ara yaná ma miyaní iyain kéká anon beni namu avúavákái kokhon danasinta máden ona van nanin bantaén mino."

<sup>4</sup>\*Máa sirá inékun ena vaya ano inaru fáké oovararen temí, "Tenti vanasi ma vaona oe, veni ume avúavá manafin bariyare véi ma varan nain uman ayaе varan nampo mai finté me ampire kharan ereno. <sup>5</sup>\*Mai fara vara seyo, veni ume kayo ano víken inarufá ódikán Tiyarafenu ano mai nanini namu avúavá daídé uman ameno van inikhen mino. <sup>6</sup>\*Ei vanasi ma uman amiyaré ein avúavá kasá asotú ure anona véin uman ameno. Bei kápifin ma ákona non opé uren amiyaré ein nará anona ena kápi vasá uvaman kova ure ameno. <sup>7</sup>\*Béi kokhon ona vákán amusin iyáken kamaé bá uno siren ena nanin banta uman

amiyaren mifo ovare me iniyáke vá anona véin uman ameno. Mai nanin mano vei inimpin beyan amo sen máa semi, 'Téi kuinin mi váké kuinini karáká kumanté uno. Téi ída varé nanin baruna ída kanaí é tirunaná bariyá banté uno.' <sup>8</sup>\*Máan ma siyá ein nan mi furin má arunan ná bá arafan má ano maná damú anan bén maman bararasí inten mino. Mai fara vara seyo, minó ákona ma vain Bafan Tiyarafenu anon beni avúavá daíden ira saman kaurinten mino.

<sup>9</sup>\*"Máan intin ma vara ráke yafisin kayo ano ma mai nanin má pamúku avúavasí iyáken beni kama yanasintafin ma amusin iyá ein kéká ano véin ma ira saman kauriyain íkun ma oniyáken ben nan arunan uren ifí daantanten mino. <sup>10</sup>Mai nanin ma ira khen kaurintin mä aí dosen berai sin nain nan mai ma véi má amusin iyá ein kéká ano akhokho van nentá e mantakhen máa sen bá danten mino: 'Sirun noe, kákán baru ma varé ein Babironi inká namu uron en mino. Tiyarafenu ano veni avúavá daíden mana áaurá anan uman amen mino.'

<sup>11</sup>\*"Ma varará ma váken ona miyaní uriyen saríi iyáre ein kayo ano vetin nina yanasinta ma miyaní in kéká ída vantin pasen mai nanin nan arunan uren ifí daantanten mino. <sup>12</sup>\*Mai kékái ona maen kori vá siriva vá kama onámána kayo ma kanen kanen iyain má kama ankaroro kayo vá efanten davaráe kayo vá ino. Inká nararé davaráe kayo vá sirikha yavaráe vá kama auna iyain daa kayo vá ara ara yanasinta ma erofanti aveantumpó ma uvantein kayo vá ino. Inká kákán miyan takena yaafó ma uvantein danasinta kayo vá bronsi vá aeni vá mampori vái mai nanin mano

\* **18:2:** Ais 13:21; 34:11-14; Yer 50:39; Rev 14:8

\* **18:4:** Ais 48:20; Yer 50:8; 51:6, 45; 2Ko 6:17

\* **18:5:** Esé 18:20-21; Yer 51:9 \* **18:6:** Íbo 137:8; Yer 50:15, 29; 2Te 1:6

\* **18:7:** Ais 47:7-9

\* **18:8:** Rev 17:16 \* **18:9:** Isi 26:17; 27:30-35

\* **18:11:** Isi 27:36 \* **18:12:** Isi 27:12-13,

miyaní iyaren mino. <sup>13</sup> Miyaní in ona kayo ma mai kéká ano ma kain baré ein maen sinamoni vá bin má irafin kaúdan ma íkun uaren kama aunka in pauran má ino. Inká ara ara masamen ma kama aunka iyain má aufá peran uveri ma kama ukhein má uvaini vá orifi anu vá kama faravá bá uviti vá ino. Inká burumakaó bá sipisipi vá osin má osin mano ma yarifiyain kari vá inká miyan ída van doran banta kayo vá banasi vá deren mai nanin mano miyaní uren sarí iyaren mino.

<sup>14</sup> “Mai ona ma miyaní uren sarí iyaré ein kéká ano máa sinten mino, ‘Ase yunan kayo ma naráke ma ena vá nano van iyaré eona mai inka o afeyoren mino. Inká kákán miyan téke yanastinta ma maman kaúdáke amufí nafí iyaré eona inka sipá orein ída kanaé mai yanasantia ovaráne varan nono.’

<sup>15</sup>\*“Ona ma varen mai nampin me sarí uren moní bariyaré ein kayo ano nentá e mantakhen mai nanin mano ma uman bariyan berai siyain nan akhokho van uren ifí daan tiyan máa sinten mino. <sup>16</sup>\*‘Kákán baru Babironi oe, sirunke ono. Éi maen anasi ano ma kama ukhein auí daná uren ma kori vá ara ara onámaná kayo vá ano ma kanen kanen iyain má kama ankaroro kayo vá ma mai yaró uran ma afi sikhan bainíi ukhare ono. <sup>17</sup>\*Máan turákáen nan mana áaurái mai yanasantia ano mo namuen mino.’

“Máan tiyantin maen sipi afóeyan má sippi kapteni kayo vá maifin ma ona varen nóken sarí iyaré ein kéká bá inká sippi kayofin ma yoriyain kéká bá ano nentá e mantanten mino. <sup>18</sup>\*E mantaven onantin ma mai varu ira khen kauriyan ma íkun

édavintin maen ifí diyan máa sinten mino. ‘Ma varará ena kákán baru máan tukhein baren nafino. Ída ino.’ <sup>19</sup> Mai kéká ano kayó pákaan ánompin kaúden kákán arunaná máden ifí diyáken máa sinten mino. ‘Kákán baru Babironi oe, sirun ke ono. Mai nanin nina yanasantia ano ma kákán sipi afóeyan aya íkan ona vain kékási iyaré ein mai manadái o afeyoren mino.’

<sup>20</sup>\*“Inaru oe, véi ma furein nará amusin ono. Mumunan nanin banta vá baya varen orin banta kéká bá sakhanampa vanta kayo vá ano amusin ná ono. Tiretí ankan ma uman amiayaré ein anonafái Tiyarafenu ano veni ayúavá daíden uman amen mino.”

<sup>21</sup>\*Máa sirákan mana ákona enisori ano kákán onámaná ma uviti yasamiyain an dakhein māmaren un nompin karúdan araviyákan oovararen temí, “Ma onámaná ma karúdékun arayein an den mi Tiyarafenu ano kákán baru Babironi maman karúdántin tipá o afeyoranten mino. <sup>22</sup>\*Mai ma kita fi okhakhan nafi ufen nafi ma asiren í diyaré ein kayo avaya ída enadá inin nono. Ara ara yoran bákán ma mai yorantá afova mantein mano ma yoriyare ein kayo ano ída vantin inká uviti yasamiyan ma avaya siyaré ein má dere ída inin nono. <sup>23</sup>\*Oon mano éin ída evaránen kakhaantanten mino. Anasi ma iman amin banta vá mai nanin má ano ma amusin iyaré ein baya ída uron mi enadá éin pintena ininten mino. Eni ona ma miyaní iyaré ein mai kákán banta kékái váken kampun avúavá póké banasi yo iyanen tavi aípá oriyare intin pasen mai avúavá afoká inten mino, <sup>24</sup>\*Béi anon Tiyarafenu kantasi ukhein

\* **18:15:** Isi 27:31, 36    \* **18:16:** Rev 17:4    \* **18:17:** Ais 23:14; Isi 27:27-29    \* **18:18:** Isi 27:32    \* **18:20:** Diu 32:43; Ais 44:23; Yer 51:48    \* **18:21:** Yer 51:63-64; Isi 26:21    \* **18:22:** Ais 24:8; Isi 26:13    \* **18:23:** Yer 7:34; 16:9; 25:10    \* **18:24:** Yer 51:49; Rev 17:6

nanin banta vá sakhanampa vanta kéká bá inká minó akhempá ma vain nanin banta vá aruan puriyaré in mi oman pámán en mino.”

## 19

*Babironi Varu Ma Ira Khavin  
Inarufá Amusin Í Dein Baya Ino*

<sup>1</sup> Máan turá iniyaruna vá inaru fáké kokhon nanin banta ano ovararen temí,

“Bafan avisá daní ono.

Evaránen ma siviran má kákán bí bá minó ákona vá Tiyarafenu inan bákán béin pintéi afoká ukhen mino.

<sup>2</sup> \*Mai fara vara seyo, furen ma funtákein avúavá póké anan Tiyarafenu ano vanasii avúavá daimé iyan mino.

Ma varará ma kákán pamúku nanin báken ma vei namu avúavá póké banasi máden asuse uren Tiyarafenu yoran nanin banta ma aruan puriyá eipái anona yaíden uman amen mino.”

<sup>3</sup> Mág siren evaránen ovarariyan temí,

“Tiyarafenu avisá daní ono.

Mai varu ma ira khen kauriyain pintena íkun mano fara ódiyan banten mino.”

<sup>4</sup> Mág siyákan tuenti-fo (24) ánon enisori kayo vá inká tafúnaren daná ma kamí kamí báken kaya iyain kéká bá ano Tiyarafenu ma vei kin karáká kumantein avorá matimen ovararen temí,

“Pura ino. Bafan avisá daní ono.”

<sup>5</sup> Mág siran mai ma kin kará bain pinté mana vaya ano mág semí,

“Beni yoran banta kéká ma aví bain má inká aví ída vain má ma vákeya

ven nan periyaona kéká ano vá

Tiyarafenun aví daní ono.”

\* 19:2: Diu 32:43; Rev 6:10    \* 19:6: Rev 14:2    \* 19:7: Ais 61:10; Rev 21:2    \* 19:9: Mat 22:2    \* 19:10: Apo 10:25-26; Rev 22:8-9    \* 19:11: Íbo 96:13; Ais 11:4; Rev 1:5; 6:2

<sup>6</sup> \*Máa sirá iné kun kokhon nanin banta ano ovararen bayá siyain mano non iya ma káusiyán avaya seinén inká aafa ma kankaré teinén iyan temí,

“Bafan avisá daní ono.

Mai fara vara seyo, setisi Bafan Tiyarafenu ma Minó Ákona vain manon kinén mino.

<sup>7</sup> \*Erí tifé í diyá timusin é béin kákán bí ameno.

Mai fara vara seyo, Sipisipi Arará ma anasi iman amin damú inka afoká ukhan mai ma véin baran nain nanin mano veyan útaren ave ukhen mino.

<sup>8</sup> Efanten davaráe ma kamaen panu sikhan ma ída mana fain dampakhein mi uren bano siren amikharen mino.”

(Efanten davaráe maen mai ma Tiyarafenu kantasí ukhein nanin banta ano ma funtákein avúavá bariyá ein mi aní ukhen mino.)

<sup>9</sup> \*Mág siran mairá enisori ano sisimemí, “Ma vaya vompomin uvarano. ‘Mai ma Sipisipi Arará anasi varan omáká ma o kumamen dunan nano van ma arakhein kéká ano vá amusin ino.’” Mág siren evaránen temí, “Ma maen Tiyarafenu fura sikhein bayá kayo ino.”

<sup>10</sup> \*Mág siká béin monó tiantano van arantampin o mátímekun mifo véi semí, “Ída vá máan tono. Éin má Yisasini vaya ma sian dákó iyain afá aváeyan má ayofiná bá an dakheruna vantán bá umpsó Tiyarafenun mana vá monó tiantano. Mai fara vara seyo, Yisasi ma fura vaya sikhein manon banasi ákona amíkán sakhanampa vaya sé iyan mino.”

*Efanten Osin Ané Ma Kumantein Bantai Vaya Ino*

<sup>11</sup> \*Mág sirá mo oné kun inaru ona yivi yain má mana efanten

osin mantakhan mai ané mana vanta kumantaren mino. Mai vanta van mi Tiyarafenui Vaya Ánain Puntáden Dakhafiyan inká Pura Vaya Ana Sin Banta e sen aré iyan mino. Béi maen puntákein avúavápói vanasi yaíden bei namuro vá mo aruvé iyan mino.

<sup>12</sup>\*Mai vanta auu fenté ira anafun ma édaveiní iyákán ben ánontá kokhoná kin kamamó baren mino. Ben ayafentá mana ví uvantan maen ída ena ano afová ukhan beyaká anan afová ukharen mino.

<sup>13</sup>\*Narefin dakharé ein buí danái véi urem bákan ben aví ma vain mai Tiyarafenui Vaya ino. <sup>14</sup>Inaru fáke aruvin banta kayo ano efanten buí daná ana uriyán efanten osin kayo ané kumamen béin ánaín bákuren oren mino.

<sup>15</sup>\*Mai ma esé oriyaré ein banta oo fenté barará nanin banta ma aruan purin nain baenati ano sefá tefá an ukhan e unen erakharen mino. Béi anon aeni ayonta fákaren banasirá ákona yafisirí iyáken Minó Ákona vain Tiyarafenui aran naná ma vaimpin dantin aravúbintin uvaini ma yasameiní inten mino.

<sup>16</sup>\*Ben arúkantá bá ayá davaráerá bá máa sen bompon uvantaren mino. Kin kayoi Kin má bafan kayoi Bafan má ino.

<sup>17</sup>\*Máa sikhá ma oné kun mana enisorí ano áaufin mantaven ayompin ma ámaren noin nun kayo oovararen tiämémí, “Tiyarafenui kákán dunan ma samádan bain tasá e átaru ono. <sup>18</sup>Átaru uveya kin kayo vá aruvin banta kayoi yafisin banta kéká bá ákona aruvín banta kayo vá inká osin kayo vá mai osin ané ma kumantá ein kayo vá miyan ída van doran banta vá para ma vain kéká bá inká titó bá kákán banta kayo vái au vukhafa nano.”

\* 19:12: Dan 10:6; Rev 1:14; 2:17

1:16; 14:20

\* 19:16: Rev 17:14

\* 20:1: Rev 9:1

\* 19:13:

\* 19:17:

\* 20:2: Esé 3:1; Rev 12:9

<sup>19</sup> Máa sirá oné kun mai ma efanten osin ané ma kumantein banta vá beni aruvin banta kayo vá aruvono siren afá tafúna vá bara ráke kin kayo vá ano vetí aruvin banta kayo avíán átaru en mino.

<sup>20</sup>\*Máa tiyaréin maen mai afá tafúna fákiyáken inká kampun sakhanampa vanta kéká ano ma ven aviká enará ukhein daná uvaren dararen iyaréin kayo vá dere fáken mino. Mai avúavá pökéi mákádan banasi ano veni aní daná mamaren béin aman manontá monó tiyaré íkan míkanan para ayun kaya iyan páken sarafa onámaná ano ma ira khiyaimpin mo kharúden mino.

<sup>21</sup>Máa turen maen mai ma efanten osin ané kumantáré ein banta oo fenté ma e unen erikhá ein baenati anon afá tafúnai aruvin banta kéká aruan púdan tumpan kayo ano vetin au vukhafa nen mino.

## 20

*Mana Tauseni (1,000) Orana Aúpin Ma Yakó Inain Baya Ino*

<sup>1</sup>\*Máa turá oné kun mana enisorí ano inaru fáké eriyáken aron ída van masí kákena khi vá kákán seni anan má pákakharen mino.

<sup>2</sup>\*Ban Anon nan ma drakoni e siyáken peyante kákán osafae e siyaré ein mai mana tauseni (1,000) oranará bano van seni anampó damuan kaen mino.

<sup>3</sup>Máa turen mana tauseni (1,000) oranará báken ída evaránen banasi mákasino van mai enisorí ano aron ída van masípín béin karúdan aravuvín mai masí ona munkuan ákonæn mino. Mai máa orana ma esantavintin maen tanáa afarái útúantádantin banten mino.

<sup>4</sup>\*Máa turá oné kun kin kará kayo vákan mairá ma kumantá ein kéká maen banasii avúavá ma yaimin ákona amen mino.

\* 19:15: Íbo 2:9; Rev

Ais 63:1-3; Yon 1:1, 14

\* 19:20: Rev 13:12-17; 20:10

\* 20:4: Dan 7:9, 22, 27; 1Ko 6:2; Rev 13:17

Máan tiyákan Yisasini fura vaya vá Tiyarafenui kama vaya vá ma sian dákó ein nan ma anuran tíkakhá ein kayo vá ina oné uno. Inká afá tafúnora safi veni aman manonta safi ma ída monó tian tiyáken beni aní daná ma ayafenta safi ayanta safi ma ída mantaré ein kéká bá dere oné uno. Mai kayo ano evaránen aunan mamaren mana tauseni (1,000) oranará Yisas Karaisin má dafisiní ukhen baren mino.<sup>5</sup> Púkaren ma ída esé orun mantan nain kéká ano mana tauseni (1,000) oranará masípin para vanten mino.<sup>6</sup> \*Púkaren ma esé araén orun mantampin mai Tiyarafenui kantasi ukhein nanin banta anon orun mantanten mifo amusin ná ino. Mai fara vara seyo, Ínaiimpáké ma kan dádasí en evaránen purin ákona ano ída kanaíen betin maman bararasí inten mino. máan tinten mifo mai kéká ano Tiyarafenu vá Yisas Karaisin máí yoran bantaí uven Karaisin má mana tauseni (1,000) oranará dafisiní ukhen banten mino.

### *Tiyarafenu Ano Ma Ban Anon Maman Bararasí Ein Baya Ino*

<sup>7</sup> Mana tauseni (1,000) orana ma orivintin maen Ban Anon ma karavusií ukhá ein útúantanten mino.

<sup>8</sup> \*Karavusi ma útúantádantin Kokin má Makokin máí kéká ma minó barafá bain mo mákáden aruvino van avíon manafin átaru inten mino. Mai kéká maen un non akhen páke eyu an den ída yankaforen mi vanten mino.

<sup>9</sup> \*Máan turá onékun mai kéká ano minó akhen páke eriarien Tiyarafenui vanasi vá béis ma anunu iyá ein kákán baru vá me iyaren eúken mino. Máan tíkán mifo inaru fáké ira ano á ma yeinien eraaren mai kéká morun ken kauren mino.<sup>10</sup> \*Máan turan mai ma vanasi mákasiyaré ein Ban

Anon páken sarafa onámaná káké ma ira khiyaimpin ma afá tafúna vá kampun sakhanampa vanta vá ma mo kharúdakhéimpin mo karúden mino. Maifin mi vetí ankan bantin inuran má bayan má ira akhen oriyanin beraí siyan banten mino.

### *Púká Ein Kékái Avúavá Ma Sipá Daimin Nain Baya Ino*

<sup>11</sup> Máan turá oniyaruna vá mana kákán efanten kin kará bákán mai yaró mana vanta kumantaren mino. Mai vanta au fáké ma fanu siyain nan ma vara vá inaru vá ano fédén karan orin mifo vetíi aúmanin baru ída varen mino.<sup>12</sup> \*Máan tiyáká onékun mai ma aví bain má aví ída vain má ma füká ein kéká ano Tiyarafenu kin kará avorá o mantavin bompon dóki kayo kavasen oriyan Aunan Baran Dóki yere khavasen mino. Kaváden púkaré ein kéká ano ma fara váken bariyaré ein avúavá mai vompon dókifin uvamádan baré in betí ma variyá ein avúaváká tiyan daimen mino.<sup>13</sup> \*Un nompin ma füká ein kéká ampiádan erin maen inká masípin ma masí ukhá ein kéká bá ina ampiádan ere ere uvin betí ankan ma variyaré ejn avúaváká ten daimen mino.

<sup>14</sup> Máan turen puren ma noré ein baru maman karúdan kákán ira khiyain masípin oren mino. Mai ma kákán ira khiyain masí ma vain mai kan dádasí en ma furin mino.<sup>15</sup> Máan tukhan maen mai ma Aunan Baran Bompon dókifin ma aví ída varé ein kayon kákán ira khiyain masípin karúdan oren mino.

## 21

### *Inaru Fáke Yerusaremi Van Ma Sikhein Baya Ino*

\* **20:6:** Rev 1:6    \* **20:8:** Isi 38:2, 9, 15-16    \* **20:9:** 2Ki 1:10    \* **20:10:** Íbo 11:6; Rev 19:20;  
21:8    \* **20:12:** Dan 7:9-10; Mat 25:31-46; Apo 17:31; 2Ko 5:10; Rev 13:8    \* **20:13:** Rom 2:6;  
1Pi 1:17; Rev 2:23; 22:12    \* **21:1:** Ais 65:17; 2Pi 3:13

1 \*Máan turá auyen inaru vá auyen bara vá oné uno. Mai fara vara seyo, feyante inaru vá bara vá e khípan maen inká un non má dere khípen mino.

2 \*Máan tuví onékun maen auyen Yerusaremi ma kantasí ukhein mano Tiyarafenu vaípáké inaru me ampiren auyen nanin ma imádan be avafu vaípá orein an den ma varará eren mino. 3 \*Máan tiyá inékun mai ma kin kará bain pinté mana oova ano máa semí, "Tiyarafenu varu ano saréa vei vanasifin orún bain betin má béis vanten mino. Mai kéká ano veni vanasií intin béis ano vetú Ayarafenuí inten mino. 4 \*Máan tuven maen betin auufente minó ánú yo arúdantin purin nafi arunana safi ifídán nafi aí dana safi ída vanten mino. Mai fara vara seyo, feyante avúavá ano ma uman amiýá ein mano inka e khípen mino."

5 \*Mai ma kin karáká kumantá ein mano máa semí, "Minó danasinta maman auyení iyá uno." Siren temí, "Ma vaya maen pura sen puntákein baya ifo vompon dókifin ná uvarano."

6 \*Máa siren evaránen temí, "Mai inka khípen mino. Téi maé Araín má Kípan má uno. Non nan ma aiyain kayo mai ída miyan bantí aunan baran non ma eraviyain pintena sekun para nanten mino. 7 \*Intéa nanin banta anó ara ara uman esantan ten nafi mai kéká anón mai ma útaan kaékun bain danasinta maren ten tikhafanaí intí séi vetú Ayarafenuí onté uno. 8 \*Máan tinten mifo mai yanásinta van ma fédén téin oyan timin nain kéká bá ída ma mumunan in kéká bá minó daná ma máden asuse in kéká bá banta ma aruan purin kéká bá

pamúku avúavá ma varan kéká bá uvátakhan ma in kéká bá ayampó uyaran danáká ma monó tin kéká bá kampun baya ma sin kéká bái varun mai ma sarafá onámaná káké ma ira khyain ban mino. Mai kan dádasí en ma furin nain mino."

9 Mai ma yan manápá ifo afápá kan un kádan enisori kayo ano ma Tiyarafenuí kípan aran naná ma víkhakhein dóki kayo ma fákakhá ein pinté mana ano eriven temí, "Ten má eresirá mai ma Sipisipi Arará ma varan nain nanin aní ékuyá onano."

10 \*Máa siren mai enisori ano séin taunan do maman kákantá dan bain anuyontá mo khaúden kantasí ukhein baru auyen Yerusaremi ma Tiyarafenu vaípáké ma inaru me ampiren eriyain aníen mino.

11 \*Tiyarafenui kakhan mano mai varufin bíkayin mai khakhan mano kákán miyantá ma vain yaspa onámaná káké ma kanen kanen einí iyaren mino. 12 \*Mai varui kafi yan bákán tiyan míkan mifo sirantan kan orun kádan (12) ona van mai ona kayorá mana mana enisori ano yafidú ukharen mino. Máan tukhan mai ona kayorá tiyan míkan mifo sirantan kan orun kádan (12) anan banta ma Isarerí kékápin bain aví uvantaren mino. 13 Mai ona kayo ma varé ein maen áau ma e urípá kanú manaú ona vakan inká notifá kanú manaú bákán sautifá kanú manaú bákán inká áau ma orun perápá kanú manaú baren mino. 14 Tiyan míkan mifo sirantan kan orun kádan (12) onámaná darói mai varui kafi uvantaren mino. Máon tukhan maen Sipisipi Arará sirantan kan orun kádan (12) eyo iyampon kayo avíi mana mana

\* 21:2: Ais 52:1; 61:10; Ibu 11:16; 12:22; Rev 3:12      \* 21:3: Riv 26:11-12; Isi 37:27; Sek 2:10;  
 2Ko 6:16      \* 21:4: Ais 35:10; 65:19; Rev 7:17      \* 21:5: 2Ko 5:17      \* 21:6: Ais 55:1; Yer 2:13;  
 Yon 7:37; Rev 1:8, 17; 22:17      \* 21:7: 2Sa 7:14; 1Kr 17:13; Íbo 89:26-27      \* 21:8: Mat 25:41;  
 Rev 20:15; 22:15      \* 21:10: Isi 40:2      \* 21:11: Ais 60:1-2, 19      \* 21:12: Isi 48:30-35

onámanáká uvádú ukharen mino.

<sup>15</sup> \*Mai ma sen má bayá sein enisori ano mai varu vá kafi vá inká ona kayo vá ma avamáan onan danka kori fóké uvantein pákakhären mino. <sup>16</sup> Mai varu avamáden onákan kamí kamí akhen ban maen beni ayá bá asíka vá ano kan tauseni ifo kan antareti (2,200) kiro mitan baren mino. <sup>17</sup> Mai varui kafi ma amákó uren uvantá ein ma avamáan onein mai sikisti faif (65) mita ino. Banta ano ma avamáan oniyain avúavákái sen enisori ano avamáan onen mino. <sup>18</sup> \*Mai varui kafi maen yaspa onámaná póké uvaren inká mai varufin ma vain danasinta korifó uvaren urákán mai ráké kamú an dakharen mino. <sup>19</sup> Mai ma sirantan kan orun kádan (12) onámaná daró ma mai varui kafi uvádan bákán ma kákán miyantá bain onámaná kayofó ma aui ukharé ein mai máan mi ukhen mino. Esé araí in bafan ma yaféká ein mai yaspa e ma siyain onámaná bákán mairá kaní ma ukhá ein safiai vákán inká kanú manausíma ukhá ein akhéti vákán inká kamí kamisí ma ukhá ein mai emarari ino. <sup>20</sup> Inká dan manápásí ma ukhá ein sadonikisi vákán inká dan manápá ifo afápá mana un kádaní ma ukhá ein kaneriani vákán inká dan manápá ifo afápá kan un kádaní ma ukhá ein krisoraiti vákán inká dan manápá ifo afápá kanú manaú un kádaní ma ukhá ein mai beriri ino. Inká dan manápá ifo afápá kamí kamí un kádaní ma ukhá ein topasi vákán inká tiyan míkaní ma ukhá ein krisopresi vákán inká tiyan míkaní mifo sirantan mana orun kádaní (11th) ma ukhá ein yasinti vákán inka siyan míkaní mifo sirantan kan orun kádaní (12th) ma ukhá ein ametisiti vákán ukharen mino.

<sup>21</sup> Mai ma sirantan kan orun kádan (12) ona ma varé ein mai

\* **21:15:** Isi 40:3; Rev 11:1    \* **21:18:** Ais 54:11-12    \* **21:23:** Ais 60:19-20; Rev 22:5    \* **21:24:** Ais 60:3, 5    \* **21:25:** Ais 60:11    \* **21:27:** Ais 52:1; Isi 44:9; 1Ko 6:9-10    \* **22:1:** Isi 47:1  
\* **22:2:** Esé 2:9; Isi 47:12; Yoe 3:18; Sek 14:8

kákán miyantá ma vain ankaroro fój mana mana ona uvádú ukhan inká mai varui kákán aa maen kori fóké anan uvantan kamu an dakharen mino.

<sup>22</sup> Mai varufin ída kákán monó namun bá oné uno. Mai fara va ino. Minó Ákona ma vain Bafan Tiyarafenu vá Sipisipi Arará bá anon mai varui kákán monó namun bá mino. <sup>23</sup> \*Mai varufin ácu vá biyon má ano ída kakhaan té iyan mino. Mai fara va ino. Tiyarafenui kakhan manon panu sian tiyan mi Sipisipi Arará anon oon uruanté iyan mino. <sup>24</sup> \*Ara ara vara fáke nanin banta ano mai kakhan aúpin nontin maen bara ráke yafisin kayo ano maifin eriven betíi kákán bí aminten mino. <sup>25</sup> \*Mai varufin ída yunin bákán pasen mi inúpasí ma íkan ída ona munké iyan mino. <sup>26</sup> Minó bara fáke nanin banta ano kama yanasinta vá kákán bí bá baren mai varufin ódinten mino. <sup>27</sup> \*Mai varufin maen ída mana namu avúavá bá ayampó uvaran danáká ma monó tin avúavá bá ayave avúavá ma variyá ein kéká bá kampun ma siyá ein kéká bá ano ódinten mino. Máan tinten mifo Sipisipi Arará aunan baran bom-pompin ma aví uvantan nain kéká ano anan ódinten mino.

## 22

### Aunan Ma Amiyain Noni Vaya Ino

<sup>1</sup> \*Máan tiyákan mai enisori ano Tiyarafenu vá Sipisipi Arará bái kin kará pinté ma avusese ukhen aunan amiyain non mano ma kamu an dakhen oriyain aníen mino. <sup>2</sup> \*Mai non mano varu aúbaná ma kákán aa vaimpin er-aviyákán tefátefá akhentá maen mana aunan amin daa ampanten mai ano sirantan kan orun kádan

(12) dádái mana oranafin aran iré iyan mino. Mana mana viyontái aran iriyan mai yaa ana fókéi ayofan današí uren barará nanin banta ayofé iyan mino.

<sup>3</sup> Aufon ma in avúavá mai varufin ída vanten mino. Mai fara va ino. Tiyarafenu vá Sipisipi Arará bái kin kará mai varufin bantin pasen beni yoran nanin banta ano véintá anan monó tinten mino. <sup>4</sup>\*Máan tiyáken mai kéká ano ven auná oniyantin maen be aví mai nanin banta ayafentá uvaranten mino. <sup>5</sup>\*Máan turantin mai varufin ída yunin bantin oon má águ vá ano ída kakhaantanten mino. Mai fara va ino. Bafan Tiyarafenu ano kakhaan tiyantin mai nanin banta ano kiní ukhen ayun para van oriyán banten mino.

<sup>6</sup>\*Máa siren mai enisori ano sisimemí, “Ma vaya funtákein mi vaká banasi ano iniren pura ino sino van muno. Ínaimpá dákó inain danasinta van ma Bafan Tiyarafenu ano vei sakhanampa vanta kayo siamiká ein bayan bei enisori siantan éin morun tiamiyán mino.”

### *Yisasi Ma Erin Nain Baya Ino*

<sup>7</sup>\*“Afovasá ono. Ainé téi erenté uno. Ma vompompin ma uvantein sakhanampa vaya ma iniren bákuriyá ein kékásá amusin ino.”

<sup>8</sup>\*Téi Yoni anon mai yanásinta oniyáké mai vaya iné uno. Mai vaya iniré maé mai enisori arantampin o mátímé béintá monó teno van é uno. <sup>9</sup>Máan tékun mifo veí semí, “Ída vá máan tono. Téi maé éin má sakhanampa vanta kayo ma afá aváeyan bain má inká ma vompon pinte vaya oo yaiyen ma mai vaya vákuriyain kéká bái

mana yoran bantan bá umpo Tiyarafenun aví ana vá daní iyáke ventá ana vá monó teno.”\*

<sup>10</sup> Máa siren tisimemí, “Ma sakhanampa vaya ma vompompin uvareona mai ída vá damuan ákoná ono. Mai fara vara seyo, yamú inka ádesí ukhen mino.

<sup>11</sup>\*Máan tukhein nará namu avúavá ma inain áesin na mai avúavá baren oriyán bano. Pain avúavá ma inain áesin ná mai avúavá baren oriyán bano. Inká puntákein avúavá ma varan nain áesin ná mai avúavá baren oriyán bano. Inka kantasí ukhen ban avúavá ma varan nain áesin ná kantasí ukhen ban oriyán bano.”

<sup>12</sup>\*“Afovasá ono. Téi ainéi erenté uno. Téi ma erenuna mai miyan mái mamare erivé maé mai ma varará nanin banta ano ma variyá inain avúavákai siyá miyan amídú onté uno. <sup>13</sup>\*Téi maé Arfa vá Omekha vá báké Araín má Kípan má uno.

<sup>14</sup>\*“Bei auí daná ma sesé ureñ bain kayo vá amusin ino. Mai kéká san mi kana ino sintin mi aunan baran daa aran niyáken kákán barui ona finté ódinten mino. <sup>15</sup>Mai varu akhempá mai iyan kayo an den ma uvátakhan iyá ein kéká bá pamúku nanin banta vá banta aruan purin kéká bá ayampó ma uvaran danáká ma monosí iyá ein kéká bá inká kam-pun baya ma e sian more mere iyá ein kayo vái vanten mino.”

<sup>16</sup>\*“Téi Yisasi anon ma vaya siamino van tesi enisori siantékuñ mi mumunan nanin banta vaipá oren mino. Téi maé Devitini Ampamin Anan\* bákéi séi anon beni kin kará baranté uno. Inká téi mae Ákurá Ma Fanu Siyain Ofu uno.”

\* **22:4:** Mat 5:8; Rev 3:12    \* **22:5:** Dan 7:18, 27; Rev 5:10; 20:6; 21:23, 25    \* **22:6:** Rev 1:1    \* **22:7:** Rev 1:3    \* **22:8:** Rev 19:10    \* **22:9:** Rev 19:9 fin ná onano.    \* **22:11:** Dan 12:10    \* **22:12:** Ais 40:10; Yer 17:10; Rev 2:23    \* **22:13:** Ais 44:6; Rev 1:8, 17; 21:6    \* **22:14:** Esé 2:9; 3:22    \* **22:16:** Nam 24:17; Ais 11:1, 10; Rom 1:3; Rev 2:28; 5:5    \* **22:16:** Devitini Ampamin Ana uno ma siyain baya mai Yisasi fefá bákán ínaimpái Devitini afoká ukhan mino.

<sup>17</sup>\*Kantá Aunan má Tiyarafenui vanasi\* vá ano siyáken, “Ereno.” Máa siyantin ma vaya ma inin nain mano vá ereno sino. Máa siyantin ma non nan ai nain mano vá eriven nano. Non ma nano van in nain áesín eriven ná aunan bain non ma Tiyarafenu ano fara amusin amiyain ná nano. <sup>18</sup>\*Ma vompon dókifin ma sakhanampa vaya vain ma inin nain kéká amaninái ma ákoná vayafó amaan té uno. Mana vanta ano ma ena vaya maman ma ma vompongatá asotú intin maen ma vompompin ma Tiyarafenui aran nana san

ma sikhein Tiyarafenu ano manan mai vanta amaniná kainten mino. <sup>19</sup>Inká mana vanta ano ma ma vompon pintena mana vaya yo varantin maen aunan amin daa aran ma véin iyáantan bain Tiyarafenu ano yo mágantin maen mai ma kantasí ukhein baru van ma ma vompon dóki ano sikheimpin ída ódinten mino.

<sup>20</sup>\*Ma vaya kayo ma sian dákó ein banta ano máa semí, “Eyo, séi ainé erenté uno.”

Pura ino. Bafan Yisasi ereno.

<sup>21</sup>Bafan Yisas Karaisini sarisari ano vá Tiyarafenui vanasi vá bano.\*

---

\* **22:17:** Ais 55:1; Rev 21:6 \* **22:17:** Tiyarafenui vanasi van ma siyain mai Kiriki vaya finté banta ma iman amikhein arinta van mi siyan mino. Mai vanta maen Yisasi ino. \* **22:18:** Diu 4:2; 12:32 \* **22:20:** Mat 24:30-31; 1Ko 16:22 \* **22:21:** Manáa Kiriki vompon akhempá ma vaya asotú ukhen mino: Pura ino.